


Tupana Puraca'alo  
Mari



New Testament in Yucuna

# **Tupana Puraca'alo Mari**

## **New Testament in Yucuna**

copyright © 2011 Wycliffe Bible Translators, Inc.

Language: Yucuna

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Yucuna

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 18 Apr 2025 from source files dated 29 Jan 2022  
5b40ab64-069a-5dad-b1d1-fb9829e864cd

Contents

SAN MATEO . . . . .	1
SAN MARCOS . . . . .	60
SAN LUCAS . . . . .	97
SAN JUAN . . . . .	160
LOS HECHOS . . . . .	205
ROMANOS . . . . .	265
1 CORINTIOS . . . . .	290
2 CORINTIOS . . . . .	316
GÁLATAS . . . . .	332
EFESIOS . . . . .	342
FILIPENSES . . . . .	352
COLOSENSES . . . . .	358
1 TESALONICENSES . . . . .	364
2 TESALONICENSES . . . . .	369
1 TIMOTEO . . . . .	372
2 TIMOTEO . . . . .	380
TITO . . . . .	385
FILEMÓN . . . . .	388
HEBREOS . . . . .	390
SANTIAGO . . . . .	410
1 PEDRO . . . . .	417
2 PEDRO . . . . .	425
1 JUAN . . . . .	430
2 JUAN . . . . .	437
3 JUAN . . . . .	438
JUDAS . . . . .	439
Apocalipses . . . . .	442

## SAN MATEO

*Jesús a'ajútayami chuna yucuna marí:*

*(Lc 3.23-38)*

<sup>1</sup> Jesucristo, Tupana l'irí, moto'orí ina'uqué penaje i'imacá. Davidmi chu, Abrahami chu, quele laquénami naquiyana ri'imacá. Marí quele necá i'imaño ra'ajútayami chuna l'imacá:

<sup>2</sup> Abrahami chu i'imari. Isaacmi chu jara'apá ri'imacá. Ricá i'imari Jacobmi chu jara'apá. Jacobmi chu i'imari Judami chu jara'apá, rijmerénami chuna hua'até.

<sup>3</sup> Judami chu i'imari Faresmi chu, Zarami chu, quele jara'apá ri'imacá. Nalomi cholo íf i'imari Tamar. Faresmi chu i'imari Esromi chu jara'apá. Esromi chu i'imari Arami chu jara'apá i'imacá.

<sup>4</sup> Arami chu i'imari Aminadabmi chu jara'apá i'imacá. Aminadabmi chu i'imari Naasonmi chu jara'apá i'imacá. Naasonmi chu i'imari Salmonmi chu jara'apá i'imacá.

<sup>5</sup> Salmonmi chu i'imari Boozmi chu jara'apá i'imacá. Boozmi chu jaló i'imayo Rahabmi cholo i'imacá. Boozmi chu i'imari Obedmi chu jara'apá i'imacá. Rutmi cholo i'imayo raló i'imacá. Obedmi chu i'imari Isaími chu jara'apá i'imacá.

<sup>6</sup> Isaími chu i'imari Davidmi chu jara'apá i'imacá. Ne'emacana Davidmi chu i'imacá. Uriasmi chu yajálo mi cholo hua'até rihuá'aco i'imacá. Rujhua'até ri'irí i'imari, Salomonmi chu i'imacá.

<sup>7</sup> Salomonmi chu i'imari Roboami chu jara'apá i'imacá. Roboami chu i'imari Abíasmi chu jara'apá i'imacá. Abíasmi chu i'imari Asami chu jara'apá i'imacá.

<sup>8</sup> Asami chu i'imari Josafatmi chu jara'apá i'imacá. Josafatmi chu i'imari Jorami chu jara'apá i'imacá. Jorami chu i'imari Uzíasmi chu jara'apá i'imacá.

<sup>9</sup> Uzíasmi chu i'imari Jotami chu jara'apá i'imacá. Jotami chu i'imari Acazmi chu jara'apá i'imacá. Acazmi chu i'imari Ezequíasmi chu jara'apá i'imacá.

<sup>10</sup> Ezequíasmi chu i'imari Manasesmi chu jara'apá i'imacá. Manasesmi chu i'imari Amonmi chu jara'apá i'imacá. Amonmi chu i'imari Josíasmi chu jara'apá i'imacá.

<sup>11</sup> Jeconíasmi chu, rijmerénami chuna quele, jara'apá i'imari Josíasmi chu. Rihuacajé najña'á Israelmi chu laquénami nate'eré naquiyá Babilonia te'eré ejo. Ajopana chá'ataño ne'emacá. Aú nahuá'a necá rejo, nasápacaloje najló penaje. Re Josíasmi chu yaní moto'oño i'imacá.

<sup>12</sup> Napa'acó nate'eré ejo ejomi mariruna moto'oño: Jeconíasmi chu i'imari Salatielmi chu jara'apá i'imacá. Salatielmi chu i'imari Zarobabelmi chu jara'apá i'imacá.

<sup>13</sup> Zarobabelmi chu i'imari Abiudmi chu jara'apá i'imacá. Abiudmi chu i'imari Eliaquimi chu jara'apá i'imacá. Eliaquimi chu i'imari Azormi chu jara'apá i'imacá.

<sup>14</sup> Azormi chu i'imari Sadocmi chu jara'apá i'imacá. Sadocmi chu i'imari Aquimi chu jara'apá i'imacá. Aquimi chu i'imari Eliudmi chu jara'apá i'imacá.

<sup>15</sup> Eliudmi chu i'imari Eleazarmi chu jara'apá i'imacá. Eleazarmi chu i'imari Matanmi chu jara'apá i'imacá. Matanmi chu i'imari Jacobmi chu jara'apá i'imacá.

<sup>16</sup> Jacobmi chu i'imari Josemi chu jara'apá i'imacá. Ricá huá'acaro María hua'até i'imacá. Jesús jaló ru'umacá. Ina'uqué i'imatájeri penaje Jesús.

<sup>17</sup> Abrahami chu laquénami yuriño rapumí chojé a'ajná Davidmi chu i'imacá ejená. Pa'u quele iphata ji'imaji nacojé quele na'ajútayami chuna huani i'imacá. Davidmi chu apumí chojena i'imaño caja pa'u quele iphata ji'imaji nacojé quele, nahuá'a ne'emacá Babilonia te'eré nacojé ejená. Ejomi ne'emá piño pa'u quele iphata ji'imaji nacojé quele Jesucristo moto'ocá ejená.

*Jesucristo moto'ocá i'imacá yucuna marí:*

*(Lc 2.1-7)*

<sup>18</sup> Marí Jesucristo moto'ocá yucuna. María i'imayo raló. Uncá chiyó ruhuá'aco José hua'até ru'umá canupá. Caja napura'ó rinacu i'imacá, nahuá'acacaloje pajhua'atéchaca penaje. I'imaqué e'iyonaja nahuá'acaco piyaja ru'umá canupá. Tupana Pechu a'arí Ri'irí rohuó chojé i'imacá. Aú caja ru'umá canupá.

<sup>19</sup> Palájne'equé ruyajná penaje José i'imacá. Caja canupá ru'umacale, uncá rihuátala ajopana ina'uqué la'acá rucá chapú rijimaje. Uncá rihuátala ajopana ina'uquejlo riyucuna i'imacana. Me'echú rihuátaca ruyurícana, canupá ru'umacale. Uncá rihuátala runacu apáña'atacana.

<sup>20</sup> Marí que ripechu nacú ri'imacá; ehuá ritapúna'aca. Ritapú pajluhuaja Tupana hua'atéjeri, je'echú chiyaje, ya'ataró rijló. Rimá rijló:

—José, Davidmi chu laquemi, pipechu i'imaníya ujhuí María liyá, rujhua'até huá'acacano nacú. Ru'urí i'imajeri, Tupana Pechu a'acale rohuó chojé ricá.

<sup>21</sup> Ñaquele ruhuá'ajica ee ru'urí, pa'ajé ríí Jesús. Ri'imataje ríle'ejena ina'uqué capichácajo liyá. Ñaquele uncá Tupana huajálaje ra'apiyá jema'ajeño pu'uhuaré nala'acare chona. Ñaquele pa'ajé ríí Jesús —que Tupana hua'atéjeri quemacá Josejlo ritapú.

<sup>22</sup> Caja riphá rená chojé Tupana quemacare nacú júpimi ripuráca'alo ja'apátajerimi chujlo. Marí que rimacá rijló i'imacá:

<sup>23</sup> Pajluhuájaru inaya i'imajeyo canupá.

Ru'urí i'imajeri.

Nemaje rinacu: “Huajhua'até Tupana” que, que Tupana quemacá rijló i'imacá.

<sup>24</sup> Rihuacajeja riphá rená chojé. E caja José apori. Ríla'á je'echú chíyaje quemacá rijló que. Rihuá'aco María hua'até.

<sup>25</sup> Canupá ru'umacá quetana uncá rara'aló runacu. E caja ruhuá'a ru'urí. Pamineco moto'ocá rojló rí'imacá. José a'arí ríí Jesús. Rimoto'ocá ejomi rucá, José, quele i'imaño pajhua'atéchaca.

## 2

*Ihujirina nacú jehuíña'ajeño iphaca Jerusalén ejo yucuna marí:*

<sup>1</sup> Jesús moto'ori pajimila Belén e i'imacá. Judea te'eré nacú ricá pajimila. Jesús moto'oqué huacajé, Herodes i'imari judíona i'imacana. E caja ajopana ina'uqué iphaño Jerusalén ejo. Camú jeño'ocá ejo pumitá nephá i'imacá. Ihujirina nacú jehuíña'ajeño ne'emacá. Ñaquele nahue'epí cajrú nacaje nacojé, ihujirina nacú jehuíña'ajeño ne'emacale. E caja nephá nanacu.

<sup>2</sup> Nemá najló:

—¿Mere chí ricá, i'imacana penaje, moto'ocá maare? Huamá ihujirí pato'ocó meyájeje. Camú jácho'oco ejo pumitá huamá ripato'ocó. Huajé huamaca rí'imacá. Aú huahue'epí rimoto'ocá i'imacá. A'acuhuaná hue'ejná majó, huamácaloje ricá, moto'ori i'imacana penaje. Pu'ují huapechu i'imacáloje rinacu penaje hue'ejná majó —que nemacá najló i'imacá.

<sup>3</sup> Ejomi ne'emá ne'emacana Heródesjlo riyucuna. Marí caje aú ricahuíla'lo rinacojé. Ñaque caja piyuque Jerusalén e i'imacaño cahuíla'aco rinacojé riyucuna jema'acana aú.

<sup>4</sup> E ne'emacana jahuacátari sacerdotena huacára'ajeño piyuque. Najhua'até caja rahua-cata Tupana puráca'alo nacú jehuíña'atajeño. E rimá najló:

—¿Mecaje pajimila nacú Tupana i'irí moto'orí? ¿Ricá Tupana huacára'ajicare ina'uqué i'imatájeri penaje huemá nacú?

<sup>5</sup> E nemá rijló:

—Belén e, Judea te'eré nacú rimoto'ó. Marí que Tupana puráca'alo ja'apátajerimi chu lana'acá riyucuna júpimi i'imacá:

<sup>6</sup> Judá te'eré nacú Belén.

Apú pajimila chaje ricá Belén, ne'emacana penaje i'imajícale reyaje.

Ricá amájeri nule'ejena ina'uqué palá.

Israelmi chu laquénami ramaje palá,

que rilana'acá riyucuna i'imacá —que nemacá Heródesjlo i'imacá.

<sup>7</sup> E rimicho'ojneja Herodes huá'aca ihujirina nacú jehuíña'ajeño maná. E rimá najló:

—¿Merohuacajé que amaca ihujirí pato'ocó?

Ne'emá rijló riyucuna.

<sup>8</sup> Ejomi rihuacára'a necá Belén ejo. Rimá najló:

—I'ijná rejo, ihue'epichi méreca ricá. Iphátajica ee ricá rejo, eco i'imá nojló riyucuna, nomíchachi ricá, nupechu i'imacáloje pu'ují rinacu penaje —que rimacá najló majojeja i'imacá.

<sup>9</sup> Marí cajé aú ne'ejná reyá. E caja namá ihujirí pato'ocó piño, namácare camú jácho'oco ejo pumitá i'imacá. Ihujirí i'ijnari ají que natucumá nachó que. Ritajno to'ojmá i'imacare chu pají chaje. Ihujirina nacú jehuíña'ajeño amaño ricamaré patacá rí'imacare chu pají nacú.

<sup>10</sup> Aú caja pu'ují huani napechu i'imacá. E caja nephá rejo.

<sup>11</sup> Mujlúca'año nañacaré chojé. Amaño rí'imacá re raló María hua'até. Aú natára'lo ne'erúpachi aú. Najláma'lo to'ojmá nacojé, pu'ují napechu i'imacale rinacu. E najme'eté napaúre chaya. Na'á rijló oro, a'ahuaná ica, pu'umé jamarí caje, apú a'ahuaná ica hua'até. Mirra ríí i'imacá. Ricá na'á rijló. Rejomi napa'ó.

<sup>12</sup> E natapúna'a. Natapú Tupana quemari najló:

—¡Pa! Ipa'aniyo Herodes i'imacá ejo.

Marí caje aú apú iñe'epú chuhua napa'ó nate'eré ejo.

<sup>13</sup> E caja ihuijrina nacú jehuíña'ajeño pa'año i'ímacá. Eyá José tapúna'ari. Ritapú Tupana hua'ateje, je'echú chiyaje, ya'ataró rijló i'ímacá. Rimá rijló:

—Pácho'o. Piñáata cari to'ojmá, raló, quele ají que a'ajná ño'ojó Egipto te'eré ejo. Re pi'imajé, Herodes culáicale cari to'ojmá, rinócaloje ricá penaje. Quetana pi'imajica re. Pu'uhuacá numájica piño pijló: “Chuhua pipa'ó” que, e pipa'ataje ricá piño majó —que rimacá rijló.

<sup>14</sup> Raú José jácho'oro. Riñáata lapí to'ojmá, raló, quele ají que Egipto te'eré ejo.

<sup>15</sup> Rejo ne'emacá, ma'apona Herodes taca'arí i'ímacá. Quéchami napa'acó piño napumí chuhua nate'eré ejo. Tupana quemacá rinacu júpimi que, iphari rená chojé raú. Marí que rimacá ripuráca'alo ja'apátajerimi chujlo i'ímacá: “Egipto eyaje nuhuá'aje nu'urí i'ímajica.”

*Herodes huacára'aca yuhuaná nótacana yucuna marí:*

<sup>16</sup> Uncá ihuijrina nacú jehuíña'ajeño i'ijnalaño piño ne'emacana Herodes chaje, riyucuna i'ímajé rijló rihuacára'aca necá que. Aú rimá nanacu:

—Namácaya nala'acá nucá.

Raú íqui'ija huani riyúcha'aco najhua'até. Rihuata ilé queráco'ope capichátacana, nemacare nacú: “I'ímacana penaje moto'ocá ricá.” Aú rihuacára'a suráana Belén ejo, nacapichátacaloje piyuqueja yuhuaná rehuájena penaje. Ya'ajná pajimila yámajo i'ímacaño hua'ató rihuacára'a capichátacana. Ihuijrina nacú jehuíña'ajeño quemáño rijló mérohuacajeca namá ilé ihuijri pato'ocó i'ímacá. Ricá nacojé rihue'epí mecacenaca yuhuaná capichátacana. Ñaquele rihuacára'a iyamá jarechí quéchajena capichátacana a'ajná queráco'opena hua'ató.

<sup>17</sup> Tupana puráca'alo ja'apátajerimi chu quemacá chojé riphá raú. Marí que Jeremíasmi chu lana'acá riyucuna papera chojé i'ímacá:

<sup>18</sup> Cajrú namájica chapú caje yajhué nate'eré ehuá.

Cajrú neyájica nayanimínami chuna.

Raquelmi cholo laquénami iyájeño cajrú nayanimínami chuna.

Uncá meño'ojó ajopana pala'atálaje napechu chapú nala'acare liyá, nacapichátajicale nayani, que rimacá i'ímacá.

<sup>19</sup> E caja Herodes taca'arí i'ímacá. Rejo'ocaja Egipto te'eré nacú José i'ímarí riyajalo, to'ojmá, quele hua'até. E lapí ritapúna'a. Ritapú ramá Tupana hua'ateje, je'echú chiyaje, iphaca rinacu. Ricá quemari rijló:

<sup>20</sup> —Chuhua pácho'o. Pihuá'a to'ojmá, raló, quele pite'eré ejo, Israelmi chu te'eré ejo. Caja nataca'á, huátaño to'ojmá nócana. Ñaquele pihuá'a to'ojmá pite'eré ejo —que rimacá rijló.

<sup>21</sup> —Je —que.

Raú rácho'o reyá. Rihuá'a rijhua'ató to'ojmá, raló, quele. Napa'ó ají que nate'eré ejo, Israelmi chu te'eré ejo.

<sup>22</sup> Rihuata riñacajela ejo pa'acano, Judea te'eré ejo. E'iyonaja nemá rijló:

—Arquelao ne'emacana me'etení re.

Herodesmi chu i'irimí ri'ímacá. Aú José quero'oró rejo pa'acano piyá. E caja ritapúna'a piño. Ritapú Tupana quemari rijló ri'ijnacá piyá rejo. Aú ri'ijná Galilea te'eré ejo.

<sup>23</sup> E caja riphá rejo. Pajimila Nazaret ejé ritajno. Re riyuró to'ojmá, riyajalo hua'até. Re Jesús tahuá'aro i'ímacá. Re caja riñapá. Tupana puráca'alo ja'apátajeñomi chuna quemacá que ri'ijnacá najló i'ímacá. Nemá Jesús nacú, Nazaret eyaje ri'ímajica.

### 3

*Juan Bautizar la'ajeri iphaca Tupana yucuna i'ímajé najló yucuna marí:*

(Mr 1.1-8; Lc 3.1-9, 15-17; Jn 1.19-28)

<sup>1</sup> Rihuacajé Juan iphari pu'uteni meñaru chojé Tupana yucuna i'ímajé ina'unquejlo. Judea te'eré ehuájenajlo ri'ímá riyucuna.

<sup>2</sup> Marí que rimájica najló:

—Ipajno'otá ipéchuhua Tupana ejo, pu'uhuaré ila'acare liyá. Yehuicha riphaca rená chojé, Tupana i'ímacáloje ina'uqué huacára'ajeri penaje —que rimájica najló.

<sup>3</sup> Riyucuna, Tupana puráca'alo ja'apátajerimi chu lana'arí papera chojé i'ímacá. Júpimi que Isaiásmi chu i'ímacá riyucuna marí que:

Nema'ajé pajluhuaja ina'uqué jahuíyo'oca pu'uteni meñaru chu.

Marí que rimájica ina'unquejlo: “Chuhuaca ilamá'ataca ipéchuhua palá Huahuacára'ajerijlo.

Ipajno'otá caje ipéchuhua Tupana ejo pu'uhuaré ila'acare liyá”, que rimacá rinacu i'ímacá júpimi que.

<sup>4</sup> Camello chijnemi naquiyá la'acanamí i'imari Juan a'arumacá i'imacá. Camejeri ímami naquiyá la'acanamí i'imari rihuachaphila. Caja'ayuna caje, munumunú jalá, caje i'imari ra'ajné.

<sup>5</sup> Pu'uteni meñaru chu ri'imaqué Tupana yucuna i'imacana nacú ina'uquejlo. Carú Jerusalén eyájena i'ijnajica ripuráca'alo jema'ajé. Pajimila í Jerusalén. Piyuque ina'uqué, Judea te'eré e'iyohuá i'imajicaño, i'ijnajica caja ripuráca'alo jema'ajé. Jordán cha ñacajélaruna i'ijnaqueño caja ripuráca'alo jema'ajé. Juni í Jordán.

<sup>6</sup> Ne'emajica ee pu'uhuaré nala'ajicare yucuna Tupánajlo, rila'aqué bautizar necá juni Jordán acojé.

<sup>7</sup> Fariseo naquiyana, saduceo naquiyana, quele iphaño caja Juan nacú, rila'acáloje bautizar necá penaje. Uncá napajno'otala napéchuhua pu'uhuaré nala'acare liyá. Juan amaca aú nephaca rinacu rimá najló:

—Pajlácachina ta icá. Iqui'i huaní Tupana huajájica pu'uhuaré la'acaño. ¿Na quemari ijló, "i'imajó riliyá" que?

<sup>8</sup> Ila'á palá, iná hue'epícaloje raú, caja iyurica iliyó pu'uhuaré ila'acare penaje.

<sup>9</sup> Imaniya inacuhuá marí que: “Abrahami chu laquénami huecá. Ñaquele lamára'ataquejanami que huecá Tupánajlo”. Uncá ñaque calé ricá ijló. Uncá Tupana i'imatálaje icá capichácajo liyá raú. Tupana huátaquela, rehuíña'atajla marí jipa, ri'imacáloje Abrahami chu laquénami penaje.

<sup>10</sup> Iná la'á iná peruné iré, iná i'icatácaloje paijí mecharú iná mená e'iyayá penaje. Rimacára'aco ejomi iná cára'ata ricá piyuqueja ra'apare hua'ató. Ñaque caja Tupana huajájica ina'uqué naquiyana. Rihuajaje namanaicho la'ajeño, pu'uhuaré la'ajeño, uncá paala la'acaño, cajena rihuajaje marí que.

<sup>11</sup> Nucá la'arí bautizar ina'uqué juni aú —que Juan quemacá—. Raú ajopana ina'uqué hue'epiño caja napajno'otaca napéchuhua Tupana ejo pu'uhuaré nala'acare liyá. Ricá penaje nula'á bautizar necá. Nopumí chojé apú iphájeri. Iqui'i huaní nuphácare ja'apí ricá, nuchaje huaní ri'imacale. Ricá a'ajeri ina'uquejlo Tupana Pechu. Ricaja caja huajájeri pu'uhuaré la'acaño, namanaicho la'acaño, eja'ahuá tajnájico huacajé.

<sup>12</sup> Nopumí chojé iphájica la'ajeri trigo a'arumi ca'ajeño la'acá que caja. Te'erí ichajona aú nácho'ota ricá, carená apho'ocáloje ra'arumi re'iyayá penaje. Quéchami paminá lamá'ataca riñacarelana chojé richa. Ra'arumi ricupá quera'atani uncá yacálare chojé. Marí que caja nopumí chojé iphájica huajájica ina'uqué e'iyohuá. Palá la'ajeño i'imajeño rijhua'até. Eyá pu'uhuaré la'ajeño, namanaicho la'ajeño, rica'ajé quera'atani uncá yacálare chojé —que Juan quemacá najló i'imacá.

*Juan la'acá bautizar Jesús yucuna marí:*

*(Mr 1.9-11; Lc 3.21-22)*

<sup>13</sup> E caja Jesús ñapari i'imacá. Juan i'imacá pu'uteni meñaru chu huacajé rácho'o Galilea te'eré eyá, ri'ijnacáloje ají que Juan chaje penaje. Juni Jordán e ri'imacá. E caja riphá Juan nacú. Jesús quemari rijló:

—Pila'á nucá bautizar.

<sup>14</sup> Ijnú Juan huátaca rila'acana bautizar. Rimá rijló:

—Palánijlaca pila'acajla bautizar nucá. Eta picá iphíchari nunacu, nula'acáloje picá bautizar penaje.

<sup>15</sup> E'iyonaja Jesús quemari rijló:

—Picá la'ajeri bautizar nucá. Palani caja iná la'acá nacaje piyuqueja Tupana huátaca que.

—Je. Ñaque ricá —que Juan quemacá rijló.

<sup>16</sup> Raú rila'á ricá bautizar. Ejomi Jesús jácho'oro junápiya. Hua'ató que je'echú je'echataco. Ricá chiyá Jesús amari Tupana Pechu huitúca'aca ají que majó. Túcu'uchi huitúca'aca que rihuitúca'aca rinacojé.

<sup>17</sup> Ejéchami Tupana quemacá marí que je'echú chiyá:

—Marí Nu'urí. Iqui'ija nuhuátacare ricá. Pu'ují huaní nupechu rinacu —que rimacá rinacu.

## 4

*Jiñá Ch'i'náricana huátari Jesús e'iyajé ca'átacana, rila'acáloje pu'uhuaré penaje. Marí riyucuna:*

*(Mr 1.12-13; Lc 4.1-13)*

<sup>1</sup> Caja Juan la'arí bautizar Jesús i'imacá. Ejomi Tupana Pechu huacára'ari ricá pu'uteni meñaru chojé, Jiñá Ch'i'náricana ca'átacaloje re'iyajé rejo penaje.

<sup>2</sup> Re ri'imá iyamá ina'uqué le'éje que cala quietana. Marí quietana uncá rajñala ra'ajnehuá; quehuí rijló me'epejí i'imacá.

<sup>3</sup> Ejéchami Jiñá Chì'ináricana iphaca Jesús nacú. Rihuata re'iyajé ca'átacana, rila'acáloje pu'uhuaré raú penaje. E rimá rijló:  
—¿Quehuaca chi Tupana I'irí picá? Nuhue'epícaloje ñaqué picá penaje, pihuacára'a marí jipa jehuíña'aco a'ajnejí penaje.

<sup>4</sup> Uncá Jesús jema'alá ra'apiyá. Rimá rijló:  
—Marí que Tupana puráca'alo lana'aquéjami quemacá: “Uncá a'ajnejí aú ja calé iná i'imá. Piyuqueja Tupana puráca'alo ja'apiyá jema'acana aú iná i'imá” —que Jesús quemacá rijló.

<sup>5</sup> E Jiñá Chì'ináricana huá'ari ricá pajimila Jerusalén ejo. Re rihuá'a ricá Tupana ñacaré i'ihuátaje.

<sup>6</sup> E rimá rijló:  
—Tupana I'irí pi'imajica ee, peño'ó maáreya cahuacaje te'erí e'iyajé. Pu'uhucá Tupana I'irí pi'imajica ee, uncá meque pila'alajo raú. Marí que Tupana puráca'alo lana'aquéjami quemacá rinacu:

Tupana huacára'ajeri rijhua'atéjena, je'echú chiyájena, a'acá nanacojé iná. Necá patañó iná ja'apí, iná la'acó piyá quehuí jipa nacojé ja'acano aú, que ripuráca'alo lana'aquéjami quemacá rinacu —que rimacá Jesusjlo.

<sup>7</sup> Raú Jesús quemari rijló:  
—Apa'amá caja Tupana puráca'alo lana'aquéjami quemari marí que: “Pila'aniya pimanai-cho, pamachi méqueca Pihuacára'ajeri Tupana a'acá piñaté raú”.

<sup>8</sup> E caja Jiñá Chì'ináricana huá'ari piño ricá ipuré i'ihuátaje. Yenoje huani ri'imacá. Reyá riyá'atá rijló ajopana te'eré, ajopana te'eré que. Piyuque marí eja'ahuá chu i'imacaño ñacajela riyá'atá rijló ipuré i'ihuátaya. Piyuque nacaje palá nojé re'iyá i'imacare hua'ató riyá'atá rijló i'imacá.

<sup>9</sup> Ejéchami Jiñá Chì'ináricana quemacá Jesusjlo:  
—No'ojé pijló nate'eré piyuqueja, pi'imacáloje ne'emacana penaje. Piphájica ee no'opí, pitára'o pi'irúpachi aú nujimaje. E no'ojé pijló ricá —que rimacá rijló.

<sup>10</sup> Raú Jesús quemari rijló:  
—Pa'apá nuliyá, Satanás. Marí que caja Tupana puráca'alo lana'aquéjami quemacá: “Piphá Tupana ja'apija. Iná Huacára'ajeri huani ricá. Ricá ja'apiyaja calé iná jema'á palá”.

<sup>11</sup> Marí que rimacá rijló aú Jiñá Chì'ináricana ja'apari riliyá. Ejomi Tupana hua'atéjena, je'echú chiyájena, iphaño nacaje la'ajé Jesusjlo.

*Jesús queño'ocá risápaca'ala la'acana Galilea te'eré e yucuna marí:  
(Mr 1.14-15; Lc 4.14-15)*

<sup>12</sup> Caja naca'á Juan ina'uqué huajáquelana chojé i'imacá. Jesús jema'arí riyucuna. Raú ripa'ó riñacajela ejo, Galilea te'eré ejo.

<sup>13</sup> Uncá riyurilo pajimila Nazaret e. Ranúca'o pajimila Capernaum ejo. Caésa cajruni cha ricá pajimila. Zabolón te'eré, Neftalí te'eré, quele te'eré ahua'á ricá. Rejo ranúca'o.

<sup>14</sup> Tupana puráca'alo ja'apátajerimi chu quemacá que rila'acá raú. Marí que ripuráca'alo quemacá, Isaíasmi chu lana'acare papera chojé i'imacá:

<sup>15</sup> Zabolón te'eré, Neftalí te'eré ahua'ayá iñe'epú to'oró.  
Richuhúa ina'uqué i'ijnaño juni jalomi ejo.

Juni Jordán pa'anajo pitá re Galilea te'eré.  
Re cajrú ina'uqué rehuá. Uncá judíona calé necá.

<sup>16</sup> Uncá hue'epílaño Tupana nacojé necá.  
Necá jema'ajeño ripuráca'alo, nahue'epícaloje cajrú rinacojé raú penaje.  
Capichájeño penájena jema'ajeño Ne'emátajeri yucuna, que ripuráca'alo lana'aquéjami quemacá.

<sup>17</sup> E Jesús queño'orí Tupana yucuna i'imacana najló rehuá. Marí que rimájica najló:  
—Ipajno'otá ipéchuhua pu'uhuaré ila'acare liyá. Yehuicha riphaca rená chojé, Tupana i'imacáloje ina'uqué naquiyana huacára'ajeri penaje.

*Jesús quemari pa'u quele jiña ña'ajeñojlo, ne'ejnacáloje rijhua'até ra'apiyatéjena penaje.  
Riyucuna marí:  
(Mr 1.16-20; Lc 5.1-11)*

<sup>18</sup> E caja Jesús chira'aró ají que caesa turenahua. Galilea caesa íi. E ramá ajopana ina'uqué. Ramá Simón Pedro, re'ehué Andrés hua'até. Jiña ña'ajeño huená chojé ne'emacá. Nahuenare naca'acá ejé riphá nanacu.

<sup>19</sup> —I'ijná nujhua'até —que rimacá najló—. Jiña ña'acana nacú sápacajeño icá. Chuhua no'oيجا ijlo apú sápacaje. Ihuá'aje nojló ina'uqué, ne'emacáloje no'opiyá jema'ajeño penaje —que rimacá najló.

<sup>20</sup> —Je —que nemacá rijló.  
Rejeja nayurí nacápiyo nahuenare; i'ijnaño rijhua'até.



<sup>21</sup> E caja Jesús ja'apari piño a'ajná ño'ojó pani. Amari piño apú re'ehué hua'até caja. Santiago rií. Re'ehué í Juan. Nara'apá í Zebedeo. Netane chu ne'emá nahuenare lamá'atacana nacú. Ramá necá. Rimá Santiágojlo, Juanjlo hua'até:

<sup>22</sup> —I'ijná nujhua'até.

Raú caja ne'ejná rijhua'até. Na'apaña netane nara'apá hua'até.

*Jesús jehuíña'ataca cajrú ina'uqué Tupana nacú yucuna marí:*

(Lc 6.17-19)

<sup>23</sup> Jesús ja'apari piyuque Galilea te'eré e'iyohuá Tupana yucuna i'imacana nacú. Re-huíña'ataque necá ajopana, ajopana que nahuacáca'alo ñacarelana chu. Ri'imaqué Tupana i'imataca ina'uqué capichácajo liyá yucuna najló, ne'emacáloje rijhua'atéjena raú penaje. Ra'apátaque natámina liyá nayaripune que'iyapejé.

<sup>24</sup> Marí que ri'imacale rehuá, cajrú riyucuna moto'ocá rehuá. Ya'ajná Siria te'eré ejená riyucuna jema'acó i'imacá. E nahuá'a richaje cajrú natámina. Quehuini yajhué amájeño ne'emacá. Que'iyapé nayaripune i'imacá. Jiñana pechu cahuíla'aque ne'iyajena nacú. Ne'iyajena nopana taca'ataqueri i'imajica. Ne'iyajena napon taca'aqueri camachá. Uncá meño'ojó nacahuitala. Marí cajena nahuá'aque Jesús ejo, ritejmo'ótacaloje necá piyuqueja penaje.

<sup>25</sup> Cajrú ina'uqué i'ijnajica rijhua'até. Galilea eyájena nanaquiyana i'imacá. Decápolis ehua re iyamá té'ela quele pajmíla. Reyájena ajopana i'imacá. Jerusalén eyájena, Judea te'eré eyájena, quele i'ijnáño caja rijhua'até. Ajopana i'imaño Jordán pa'anajo pitá eyájena. Quele i'ijnaqueño rijhua'até.

## 5

*Yenuri i'ihuata nacú ne'emá. Re Jesús jehuíña'atari necá Tupana nacú. Riyucuna marí:*

<sup>1</sup> Jesús amari cajrú ina'uqué jahuacaco rinacojé. Aú rácho'o yenuri i'ihuátaje. Re riyá'o. Ejomí rijhua'até jehuíña'ajeño i'ijnáño rápumi chu. Reje nahuacó rinacojé.

*Pu'ují péchuruna yucuna marí:*

(Lc 6.20-23)

<sup>2</sup> E riqueño'ó nehuíña'atacana marí que:

<sup>3</sup> —Re ina'uqué nemá Tupánajlo: “Pa'a huañaté, huala'acáloje pihuátaca que penaje. Uncá meño'ojó huala'alá huecó pihuátaca que”. Marí que quemacáñojlo ri'imajé palá, Tupana i'imacale Nahuacára'ajeri.

<sup>4</sup> Palani huani inajlo, camu'ují iná pechu i'imacachu pu'uhuaré iná la'acare nacú. Palani inajlo, Tupana pala'atájicale inajlo iná pechu.

<sup>5</sup> Palani huani ina'uquejlo, uncachu nala'alá necó hue'epiño que. Necá caja i'imajeño rijhua'até je'echú chu rimacá nanacu que.

<sup>6</sup> Palani huani inajlo, huechi iná huátacachu Tupana huátaca que la'acana. Aú Tupana a'ajeri iná ñaté rila'acana aú.

<sup>7</sup> Palani huani inajlo, iná hue'epícachu ajopana ina'uqué mu'ují. Ñaqué caja Tupana hue'epíjica iná mu'ují.

<sup>8</sup> Palani huani ina'uquejlo, nahue'epícachu Tupana huátaca que la'acana natucumó. Necá caja amájeño Tupana.

<sup>9</sup> Palani huani ina'uquejlo, napala'atácachu ajopana ina'uqué pechu, napechu i'imacá piyá chapú panacuhuacaca. Raú Tupana quemájeri nanacu: “Nuyani necá” que.

<sup>10</sup> Palani huani ina'uquejlo, ajopana la'acachu necá chapú, nala'acale Tupana huacára'aca que. Nahuacára'ajeri Tupana.

<sup>11</sup> Apala ajopana ca'ajná quemájeño inacu: “Uncá ina'uquélaruna necá” que. Apala nala'ajica icá chapú. Apala majopeja napajlájica inacu. Palani huani ijlo, marí que nala'acachu chapú icá, no'opiyá jema'ajeño i'imacale.

<sup>12</sup> Ipechu i'imá pu'ují raú, palani huani nacaje i'imajicale ijlo je'echú chu. Ñaqué caja a'ajútayami chuna naquiyana la'ajica chapú Tupana puráca'alo ja'apátajeñomi chuna i'imajica.

<sup>13</sup> Icá, no'opiyá jema'ajeño, la'año palá marí eja'ahuá chu, ina'uqué i'imacáloje palá pajhua'atéchaca raú penaje. Yuquira i'imacá a'ajnejijlo que caja icá ajopana ina'uquejlo, ila'acachu necá palá. Yuquira, palani rica'acana a'ajnejí e'iyajé. E'iyonaja rila'acochu uhu'ichí, uncá meño'ojó iná pa'atala rapumí chuhuá ricá, ri'imacáloje ca'ajipareni penaje. Uncá na penaje calé ricá uhu'ichini. Iná cupá ricá te'erí e'iyajé, ina'uqué ja'apácaloje re'iyohuá penaje.

<sup>14</sup> 'Icá, no'opiyá jema'ajeño, la'año Tupana huátaca que. Raú caja amata ajopana ñaqué la'acana aú. Iná camaré ja'apí nacaje amaro palá. Pu'uhucá caja iná amaca pajimila yenuri i'ihuata nacú yá'aco.

<sup>15</sup> Iná lucúna'acachu iná camaró, uncá iná yá'atala ricá i'ichí lájma'ataqueja ja'apejé. Yenú iná yá'ata ricá, piyuque pachu i'imacaño amácaloje palá ricamaré chojé penaje.

<sup>16</sup> 'Icá, no'opiyá jema'ajeño, la'ajeño caja palá. Raú ajopana ina'uqué amájeño palá ila'acare Tupana ja'apiyá jema'acana aú. Palá napura'ajico Tupana, je'echú churí, nacú raú.

*Jesús jehuíña'atari necá Tupana puráca'alo nacú, ricá Moisesmi chu lana'acare i'imacá. Riyucuna marí:*

<sup>17</sup> 'Ipechu i'imanía marí que nunacu: “Ricá quemájeri huajló, hue'emacá piyá reyá a'ajná ño'ojó Tupana puráca'alo ja'apiyá, ricá Moisesmi chu lana'acare i'imacá. Ripuráca'alo ra'apátajeñomi chuna lana'acare hua'ató rimaje nacú huajló, hue'emacá piyá ra'apiyá”, que ca'ajná ipechu nunacu. Uncá ricá penaje calé nu'ujná majó. Nacaje numacare nacú, ina'uqué hue'epéjeño meque quemacánaca ricá nemacare nacú i'imacá. Nacaje nula'acare aú caja nahue'epeje ricá.

<sup>18</sup> Jema'á marí: Tupana puráca'alo, Moisesmi chu lana'acare, re caja jo'ó riyuríjica ijlo. Piyuque nacaje rimacare nacú, i'imacáloje ñaqué caja penaje, quetánaja ri'imajica ijlo.

<sup>19</sup> Iná la'acáloje piyuqueja nacaje rimacá que penaje ricá. Ajopana ca'ajná uncá a'alaño nanacojó rinaquiyánaja, majopéjari. Nehuíña'ata caja ajopana, na'acá piyá nanacojó ricá. Ilé cajena i'imajeño majopéjaruna queja je'echú chu. Rehuájena huacára'ajeri Tupana. Ajopana ca'ajná a'año nanacojó ripuráca'alo. Nehuíña'ata caja ajopana, nala'acáloje rimacá que penaje. Ilé cajena i'imajeño ajopana chaje je'echú chu. Rehuájena huacára'ajeri Tupana.

<sup>20</sup> Palá numacá ijlo: Re e'iyá Tupana puráca'alo nacú jehuíña'atajeño, fariséona quele. Uncá huani i'ijnalaje je'echú chojé, uncachu ichá'atala necá Tupana huátaca que la'acana aú —que Jesús jehuíña'ataca necá.

*Pacháca yúcha'acaño yucuna marí:*

*(Lc 12.57-59)*

<sup>21</sup> 'Marí que puráca'aloji quemacá Tupana yuricare peñahuilánami chúnajlo i'imacá: “Inóniya ina'uqué. Nójeri apú, najña'ajé ricá nahuacára'ajeño ejo, nahuajácaloje ricá penaje”.

<sup>22</sup> Eyá nucá quemari marí que rinacu: Yúcha'ajero apú inaquiyana cha, ilé najña'ajé ihuacára'ajeri ejo, nahuajácaloje ricá penaje. Pura'ajero pu'uhuaré inaquiyana nacú, ilé najña'ajé ihuacára'ajeño, peñahuilana, quele ejo, nahuajácaloje ricá penaje. Quemájeri apú inaquiyana nacú: “Mapéchuru huani ta ricá” que, ilé amájeri quera'atani yajhué uncá yacálaré.

<sup>23</sup> 'Apala pi'ijná Tupana ñacaré ejo, pa'acáloje Tupánajlo pirajina naquiyana, nenócarena pu'uhuaré iná la'acare chaya penaje. Marí que la'acana nacú ca'ajná picá Tupana ñacaré chu. E riphá pipechu nacú: “Re nunaquiyana, chapú ripechu nunacu”.

<sup>24</sup> Marí que ri'imajica ee pijló, rejeja piyurí nacaje pihuátacare a'acana Tupánajlo. Pamineco pi'ijnajé chapú péchuri pinacu chaje, ilamá'atacaloje ricá pajhua'atéchaca penaje. Quéchami pipa'ajico piño nacaje a'ajé Tupánajlo.

<sup>25</sup> 'Apú ca'ajná arucátari picá, uncá pachá pa'alá pilehuérica rijló huemí. Raú ca'ajná rihuata pihuá'acana ihuacára'ajeri chaje, rilamá'atacaloje pijhua'até ricá penaje. Pilamá'ata ricá rijhua'até ñe'epú chuhua' ja'apácana nacú, rihuá'aca piyá picá ihuacára'ajeri ejo. Ricá ca'ajná a'ajeri picá policiajlo. Eyá ricá ca'ajeri picá ra'apiyá ina'uqué huajáquelana chojé.

<sup>26</sup> Numá pijló, uncá pácho'olajo richiyá a'ajná pa'atájica pilehuéricare huemí rijló ejená.

<sup>27</sup> 'Marí que puráca'aloji quemacá, Tupana yuricare peñahuilánami chúnajlo i'imacá: “Uncá achíñana, inaana quele la'alájeño namanaicho pajhua'atéchaca”.

<sup>28</sup> Eyá nucá quemari: Yacá'aro inananu chaje riñujure aú, la'arí rimanaicho. Rujhua'até la'acana que caja rijló ricá.

<sup>29</sup> 'Pila'acachu pu'uhuaré nacaje pamácare pachá, piyurí piliyó ricá. Palani pijló riyurícana piliyó, pi'ijnacá piyá richona quera'atani yajhué amaje. Picahuícha'aquela pijló majó, pica'acáloje pinaquiyó ricá penaje, palani ri'imacajla pijló. Pila'aquela marí que, pi'ijnacá piyá quera'atani chojé, palani ri'imacajla pijló. Iná napona naquiyánaja calé capichácojla raú. Chapú huani inajlo ri'imacajla, piyuque iná napona capicháquelo.

<sup>30</sup> Pila'acachu pu'uhuaré nacaje pila'acare piyáte'ela aú pachá, piyurí piliyó rila'acana. Palani pijló piliyó riyurícana, pi'ijnacá piyá richona quera'atani yajhué amaje. Pi-mata'aquela pinaquiyó piyáte'ela ca'aña chojori pila'acare aú pu'uhuaré, pica'acáloje huichá ricá a'ajná ño'ojó que penaje, palani ri'imacajla pijló. Pila'aquela marí que, pi'ijnacá piyá quera'atani chojé, palani ri'imacajla pijló. Iná napona naquiyánaja calé capichácojla raú. Chapú huani inajlo ri'imacajla, piyuque iná napona capicháquelo.

<sup>31</sup> 'Marí que Tupana puráca'alo lana'aquejami quemacá iná yajalo yurícana nacú: "Iná huátacachu iná yajalo yurícana caja penaje, iná a'á rojló papera lana'aquejami, ruhue'epícaloje na pachaca iná yurica rucá penaje. Raú iná yurí rucá" que rimacá.

<sup>32</sup> Eyá nucá quemari marí que: Yuriri riyajalo, uncá la'alayo rumanaicho apú hua'até, la'arí rimanaicho raú. Apa'ahuelo hua'até la'acana queja caja ricá. Apú huá'acaro riyajalo penađerumi hua'até, la'arí caja rimanaicho. Apa'ahuelo hua'até la'acana queja caja Tupánajlo ricá. Ñaqué caja rula'acá rumanaicho raú. Tupana pechu i'imacale runacu: "Apú yajalo jo'ó rucá".

<sup>33</sup> 'Marí que caja puráca'aloji quemacá, Tupana yurícare peñahuilánami chúnajlo i'imacá: "Pimacachu 'quehuaca' que Tupana nacú, ajopana hue'epícaloje raú pimacá que pila'ajica ricá, pila'á richuhuaja ricá", que rimacá.

<sup>34</sup> Eyá nucá quemari ijlo marí que: Uncá na penaje calé imaje apú nacaje nacú, ajopana hue'epícaloje imacá que ila'ajica raú penaje. Imániya caja 'quehuaca' que je'echú nacú, richiyá Tupana huacára'acale rijhua'atéjena.

<sup>35</sup> Imániya caja 'quehuaca' que eja'ahuá nacú, camu'ují huani Tupánajlo eja'ahuá i'imacale. Nacaje nacú iná to'otá iná i'imá, que caja rijló eja'ahuá. Imániya caja 'quehuaca' que pajimila Jerusalén nacú, l'imacana huani le'ejé pajimila ri'imacale.

<sup>36</sup> Imaniya caja 'quehuaca' que ihuila'aru nacú, uncale ihue'epila pajluhuélano ihuilá lajnere apiyácacana cameni aú, jareni aú.

<sup>37</sup> Marí que imájica: "Nula'ajé ricá", que ca'ajná, "Uncá nula'alaje ricá", que ca'ajná imájica. Rejeja calé imaje rinacu. Ila'á imacá que. Jiñá Chi'ináricana liyaje ricá richaje nacú quemacana.

<sup>38</sup> 'Marí que puráca'aloji quemacá, Tupana yurícare peñahuilánami chúnajlo i'imacá: "Apú ca'ajná la'ajeri picá chapú. Ñaqué caja pila'ajica piño ricá chapú. Apala apú apichátajeri apú pijlú. Ñaqué caja papichátajica rijlú. Apala apú apichátajeri apú paí naquiyana. Ñaqué caja papichájica caja raí naquiyana", que rimacá.

<sup>39</sup> Eyá nucá quemari marí que: Ipura'aniyo ile'ejé jacumi nacú, nala'acachu icá chapú. Marí que ila'ajica: Apú ña'ajica ee icá pajimaya majó ca'ajná, ipajno'otá rijló apojó pitari ijimá, riña'acáloje icá reyá ñaqué caja penaje.

<sup>40</sup> Apú ca'ajná arucátajeri picá majopeja. Aú rihuá'aje picá ihuacára'ajeño ojo, nalamá'atacaloje pijhua'até ricá penaje. E ca'ajná nañña'ajé picamichare pinaquiyá multa huemí penaje. Pa'á rijló ricá. Richaje pa'ajé rijló ricá. Apú pa'arumacá naquiyana hua'até pa'ajé rijló.

<sup>41</sup> Ajopana te'eré le'ejena surárana naquiyana ca'ajná huacára'ari pijña'acá rijló nacaje. Rihuacára'ajica ee pijña'acá ricá iyajmela eja'ahuá jená quetana, rihuátajica ee, pijña'á rijló ricá richaje jucaca, pa'u quele eja'ahuá jená quetana ca'ajná.

<sup>42</sup> Apú quemájica ee pijló, pa'acáloje rijló nacaje rila'ajicare camu'ují nacú penaje, pa'ája rijló ricá. Apú quemájica ee pijló, piya'atácaloje rijló nacaje penaje, piyurija rijló ricá.

*Ihuátacaloje íqui'i chapú péchuruna inacu penaje yucuna marí:  
(Lc 6.27-28, 32-36)*

<sup>43</sup> 'Marí que puráca'aloji quemacá, Tupana yurícare peñahuilánami chúnajlo i'imacá: "Ihuata íqui'ija palá péchuruna inacu. Eyá chapú péchuruna inacu, ñaqué caja amaca necá chapú", que rimacá.

<sup>44</sup> Eyá nucá quemari marí que: Ihuata íqui'ija chapú péchuruna inacu. "Uncá ina'uquélaruna necá", que ca'ajná nemájica inacu. Ipura'ó Tupana hua'até marí que inacu quemajeño nacú. Ipura'ó Tupana hua'até la'año icá chapú nacú.

<sup>45</sup> Marí que la'acana aú icá i'imaño Tupana yaní. Jara'apá, je'echú chu i'imacare, la'acá que caja ila'acá raú. Ricá huacára'ari camú camaré patacá ina'uquejlo pajimato. Palá la'acáñojlo, pu'uhuaré la'acáñojlo hua'até rihuacára'a camú patacá. Rihuacára'a caja juni ja'acó palá la'acáñojlo, pu'uhuaré la'acáñojlo hua'até. Palá rila'acá ina'uqué pajñacani.

<sup>46</sup> Ihuátacachu íqui'ija necaja calé, huataño caja icá íqui'ija, uncá Tupana a'alaje ijlo rihuemí, uncale ila'alá palá raú. Liñeru ña'ajeño ne'emacánajlo, uncá ina'uqué huátalarena necá. Necá caja huataño íqui'ija palá péchuruna nanacu.

<sup>47</sup> Ajalácachu ejénaja calé, uncá ila'alá palá raú. Uncá hue'epilaño Tupana nacojé ajalácáño ñaqué caja pecohuácaca.

<sup>48</sup> Jara'apá, je'echú chu i'imacare, uncá pu'uhuaré la'ajeri calé ricá. I'imá ricá que caja.

## 6

*Jesús jehuiña'ataca necá palá la'acana nacú yucuna marí:*

<sup>1</sup> Ne'iyajena la'año palá ajopana ina'uqué jimaje, ajopana quemacáloje nanacu: “¡Meque palá huani nala'acá!” que penaje. Ihuátajica ee palá la'acana, ila'aniya ilé que. Ñaque ila'ajica ee ricá, uncá Tupana a'alaje ijlo palá ila'acare huemí.

<sup>2</sup> Ñaquele a'ajica ee camu'ují la'acáñojlo nacaje, i'imaníya riyucuna cajrú ina'uquejlo. Re pajlácachina, nala'á necó palá la'ajeño que ina'uqué ijlo chu. E'iyonaja uncá ñaque calé necá. Necá a'año camu'ují la'acáñojlo nacaje nahuacáca'alo ñacarelana chu ajopana jimaje. Le'ejepelaji ñacarelana copi, cajrú ina'uqué e'iyá, na'á camu'ují la'acáñojlo nacaje. Marí queja nala'acá, ina'uqué pura'acóloje palá nanacu penaje. Numá ijlo, palá nemacare nanacu, ricaja calé i'imari najló nala'acare huemí. Uncá Tupana a'alaje najló rihuemí, uncale nala'alá palá.

<sup>3</sup> A'ajica ee camu'ují la'acáñojlo nacaje, i'imaníya riyucuna apujlo, ijhuáque'ehuejlo, quéjlo.

<sup>4</sup> Me'echú a'acá najló ricá ajopana jema'acá piyá riyucuna. Tupana amari nacaje iná la'acare me'echú caje. Ricá a'ajeri inajlo palá iná la'acare huemí.

*Jesús jehuíña'ataca necá Tupana hua'até pura'acano nacú yucuna marí:*  
(Lc 11.2-4)

<sup>5</sup> Ipura'acochu Tupana hua'até, i'imaníya ileruna pajlácachina que. Cajrú ina'uqué e'iyá napura'ó Tupana hua'até nahuacáca'alo ñacarelana chu. Le'ejepelaji ñacarelana copi napura'ó caja Tupana hua'até, cajrú ina'uqué amácaloje necá penaje. Nemacáloje nanacu: “Meque palá huani napechu Tupana nacú”, que penaje. Numá ijlo, ricaja calé nemacare nanacu i'imari nala'acare huemí. Uncá Tupana a'alaje najló rihuemí, ñaque la'acana huemí.

<sup>6</sup> Ñaquele iná huátajica ee Tupana hua'até pura'acano, iná mujlúca'a uacupú chójé, iná icoja iná i'imacáloje re penaje. Richu iná pura'ó iná jara'apá, Tupana hua'até. Uncá iná amálare ricá Tupana, iná pura'ó hua'até. Ricá amari nacaje iná la'acare meñaru chu. Ricá calé a'ajeri inajlo palá iná la'acare huemí.

<sup>7</sup> Iná pura'acochu Tupana hua'até, uncá iná quemalá rijlo pajluhuaja nacuja richuhuaaja. Apú nacú, que'iyapé iná pura'acó rijhua'até. Necá, uncá hue'epilaño Tupana nacojé, pura'año pajluhuaja nacuja Tupana hua'até. Napechu i'imá: “Cajrú pura'acajo aú Tupana jema'arí iná ja'apiyá”.

<sup>8</sup> Ipura'aniyo ilé que huani Tupana hua'até. Tupana hue'epiri naca iná la'acare nacú camu'ují, uncá chiyó iná quemá rijlo rinacu.

<sup>9</sup> Marí que ipura'ajico Tupana hua'até:

Huara'apá, je'echú chu i'imacare.

Palájne'equé huani picá.

<sup>10</sup> Piyuqueja ina'uqué huacára'ajeri penaje picá.

Huahuata caja pi'imacá Huahuacára'ajeri.

Huahuata caja ina'uqué la'acá maare eja'ahuá chu nacaje pihuátaca que, je'echú chu nala'acá que caja.

<sup>11</sup> Pa'á huajló a'ajnejí chuhuajá, huajñácaloje penaje.

<sup>12</sup> Pamó huachaje pu'uhuaré huala'acare liyá, huamaco ajopana chaje chapú nala'acare huecá liyá que caja.

<sup>13</sup> Piyuríniya nacaje a'acá huame'é rijluhua, huala'acá piyá pu'uhuaré raú.

Pi'imatá caja huecá pu'uhuaré la'ajeño huacára'ajeri liyá.

Huahuacára'ajeri huani picá.

Picá hue'epiri piyuqueja nacaje la'acana nacojé.

Matajnaco pi'imajica. Caja queja pi'imajica palánija.

Marí que ipura'ajico Tupana hua'até —que Jesús quemacá najló.

<sup>14</sup> Amácochu ajopana chaje, chapú nala'acare icá liyá, Jara'apá, je'echú chu i'imacare, amájero caja ichaje pu'uhuaré ila'acare liyá.

<sup>15</sup> Uncachu amalo nachaje, chapú nala'acare icá liyá, uncá caja Jara'apá amálajo ichaje pu'uhuaré ila'acare liyá.

*Jesús jehuíña'ataca necá na'ajné liyá i'itacano nacú yucuna marí:*

<sup>16</sup> T'itajico ee a'ajné liyá, ipechu i'imacáloje Tupana nacuja raú penaje, ila'aniya pajlácachina la'acá que caja. Necá la'año najmahua pu'uhuaré, ajopana ina'uqué hue'epícaloje raú ne'etacó na'ajné liyá penaje. Nemacáloje nanacu: “Meque cajrú huani napechu Tupana nacú”, que penaje. Numá ijlo, ricaja calé, palá nemacare nanacu i'imari nala'acare huemí. Uncá Tupana a'alaje najló rihuemí, uncale nala'alá palá.

<sup>17</sup> T'itajico ee a'ajné liyá, ipá ijmá chiyá. A'ató palá ihuilá e'iyayá.

<sup>18</sup> Marí que ila'ajica, ajopana hue'epica piyá i'itacó a'ajné liyá. Jara'apá, uncá iná amálare, ricaja calé hue'epéjeri ricá. Ricá a'ajeri ijlo palá ila'acare huemí.

*Nacaje jahuacátacana je'echú chojé yucuna marí:*

*(Lc 12.33-34)*

<sup>19</sup> Jahuacátaniya ijluhua cajrú nacaje marí eja'ahuá chu. Maare pi'iréjena apichátaño iná nane. Ricoja iná nane apichaco. Ata'acáchina mujlúca'año iná ñacaré chojé rata'ajé.

<sup>20</sup> Ñaquele ila'á nacaje Tupana huátaca que, nacaje i'ímacáloje ijló je'echú chu penaje. Re uncá pi'iréjena apichátalaño nacaje. Uncá caja nacaje apichalo ricó. Uncá caja ata'acáchina mujlúca'alaño richojé nacaje ata'ajé.

<sup>21</sup> Iná i'ijnatá iná péchuhua nacaje íqui'i iná huátacare nacú. Iná huátacachu íqui'ija nacaje je'echú chu i'ímacare, iná i'ijnatá caja iná péchuhua rinacu. Eyá iná huátacachu íqui'ija nacaje marí eja'ahuá chu i'ímacare, iná i'ijnatá caja iná péchuhua rinacu.

*Iná pechu yucuna marí:*

*(Lc 11.34-36)*

<sup>22</sup> Iná pechu loco'opánija iná la'acá nacaje. Palá iná pechu i'ímacachu, iná hue'epí caja piyuque nacaje la'acana palá.

<sup>23</sup> Uncachu iná pechu i'ímalá palá, uncá caja iná hue'epila naca la'acana palá. Chapú huani nacaje i'ímacá inajlo raú.

<sup>24</sup> Tupana i'ímacachu iná huajhué, uncá iná huajhué calé liñeru. Liñeru i'ímacachu iná huajhué, uncá iná huajhué calé Tupana. Iná hue'epíachu liñeru jahuacátacana inajluhua iná tucumó, uncá iná hue'epila Tupana huátaca que la'acana iná tucumó. Uncá meño'ojó iná pechu i'ímalá iyamá chuhua.

*Tupana a'acá rinacajó riyani yucuna marí:*

*(Lc 12.22-31)*

<sup>25</sup> Ñaquele numá ijló: Ipechu i'ímaniya marí que ajñacaje nacú: “Uncá na i'ímalaje ca'ajná huajló, huajñacáloje penaje. Huataca'ajica me'epejí nacú ca'ajná”. Ipechu i'ímaniya ñaque caja i'iracaje nacú, a'arumacaji nacú. Tupana palamane iná cajmucha inajlo, iná napona hua'até. A'ajnejí, a'arumacaji, quele chaje iná cajmucha, iná napona hua'até.

<sup>26</sup> Ihue'epí cupira'aphana nacajé. Yenuhua ajrácaño necá. Uncá nejátala nacaje icha ijí, najña'acáloje richa najluhua penaje. Uncá caja a'ajnejí ñacarelana i'ímalá najló, nalamá'atacaloje najluhua a'ajnejí richojé penaje. Jara'apá, je'echú chu i'ímacare, ricaja calé a'arí najló ajñacaje. Cupira'aphana chaje Tupana huátaca icá.

<sup>27</sup> Iná huo ca'acochu nacaje nacú, uncá ra'alá iná ñaté, iná i'ímacáloje richaje júpica marí eja'ahuá chu penaje.

<sup>28</sup> ¿Naje ihuó ca'aró a'arumacaji a'ajicare inacuhua nacú? Ihue'epí caja a'ahuaná ihuí nacajé. Uncá risápala. Uncá caja riña'alá rijluhua a'arumacaji, ra'acáloje rinacuhua penaje.

<sup>29</sup> E'iyonaja richá'ata a'arumacaji jimáreni. Cajrú huani le'ejepelari, ne'emacánami chu, Salomonni chu i'ímacá. E'iyonaja uncá richá'atala a'ahuaná ihuí palá nojé ra'arumacá au.

<sup>30</sup> Mequetánajloje penaje calé a'ahuaná ihuí. Chuhujá que iná amaca ricá. Muní que rimeriya'aco. E'iyonaja palá amacánami ricá Tupana palamane. A'ahuaná ihuí chaje ra'ajica rinacajó icá, a'arumacaji i'ímacáloje ijló penaje. ¡Meque huejápaja huani ipechu Tupana chojé caphí!

<sup>31</sup> Tupana a'arí rinacajó icá. Aú calé ihuó ca'aniyo nacaje nacú. Imaniya: “¿Na huajñaje? ¿Na hue'eraje? ¿Mérohua huephátaje huajluhua a'arumacaji?”

<sup>32</sup> Necá, uncá hue'epílaño Tupana nacajé, ricaja calé nahue'epí natucumó. Eyá Tupana hue'epiri icá, ra'acáloje ijló nacaje ila'acare nacú camu'ují penaje.

<sup>33</sup> Ihue'epí itucumó pamineco Tupana huacára'aca que la'acana, rihuátaca que la'acana caje. Raú ra'ajé ijló a'ajnejí, a'arumacaji, caje macá.

<sup>34</sup> Thuó ca'aniyo nacaje nacú aquijñojo i'imajicare. Rihuacajé nacaje i'imajeri piño iná huo ca'ajona penaje. Hue'echú ca'alá queja re nacaje inajlo, uncá paala i'ímacare, iná a'acáloje iná nacajó ricá penaje.

## 7

*Re ina'uqué, uncá nayurila pu'uhuaré la'acana naliyó. E'iyonaja nemá ajopana nanaquiyánajlo: “Pu'uhuaré la'ajeño icá” que. Riyucuna marí:*

*(Lc 6.37-38, 41-42)*

<sup>1</sup> Imaniya ajopana ina'uqué nacú na aú ca nala'acá pu'uhuaré majopeja. Imaniya marí que Tupana quemacá piyá ñaque caja inacu.

<sup>2</sup> Ilé imacá nanacu que caja rimájica inacu. Nacaje nala'acare nacú ca'ajná pimá: “Uncá paala ricá. Pu'uhuaré nala'acá raú”. Pila'ajica ee ñaque ricá, Tupana quemájeri caja pinacu ñaque caja.

<sup>3</sup> Apú ca'ajná la'arí nacaje uncá quemachi paala. Raú pimá rinacú: "Pu'uhuaré la'ajeri ricá" que. Eyá picá ta, pu'uhuaré huani la'ajeri ca'ajná picá. E'iyonaja uncá pimalá pinacuhúa: "Pu'uhuaré la'ajeri nucá" que.

<sup>4</sup> Pu'uhuaré huani la'ajeri pi'imacachu, ¿meque ta pimacajla apú pinaquiyanajlo: "Piyurí pu'uhuaré pila'acare piliyó" que?

<sup>5</sup> ¡Pajlácachi huani picá ta! Piyurí pu'uhuaré pila'acare piliyó pamineco. Rejéchami pihue'epíjica méqueca apú inaquiyánajlo quemacana, riyurícaloje huejapa ñani pu'uhuaré rila'acare riliyó penaje.

<sup>6</sup> Chuhua apú nacú numá piño: Pipura'aniyo palani puráca'aloji nacú necá hua'até, uncá huani huátalaño Tupana. Apala napura'ó pu'uhuaré huani pinacu rijimaje. Iná a'acá cahuemí nojé murehua je'erúnajlo que caja ricá. Majojeja napiyácata richá te'erí aú. Que caja nala'acá iná, uncá huátalaño Tupana ja'apiyá jema'acana.

*Tupana a'acá inajlo nacaje yucuna marí:*  
(Lc 11.9-13; 6.31)

<sup>7</sup> 'Iquejá'a nacaje Tupana liyá. Raú ra'ajé ijlo ricá. Iculá caja Tupana liyá nacaje. Raú iphátaje ricá. Imá rijló, rijme'etachi ijlo nacaje apu. Raú rijme'etaje ijlo rapu.

<sup>8</sup> Riliyá nacaje quejá'ajeñojlo ra'á nacaje. Riliyá culájeño iphátaño nacaje. Rijló quemájeñojlo rijme'etá rapu.

<sup>9</sup> Uncá na calé a'arí ri'irijlo jipa, riquejá'acachu riliyá cujnú.

<sup>10</sup> Uncá caja na calé a'arí ri'irijlo jeí, riquejá'acachu riliyá jiña.

<sup>11</sup> Icó, pu'uhuaré la'ajeño, hue'epiño iyánijlo nacaje a'acana palani. A'acá iyánijlo nacaje, chaje Tupana a'acá quejá'año riliyajlo nacaje palani.

<sup>12</sup> 'Ila'á marí que: 'Ila'á palá ajopana ina'uqué, ihuátaca nala'acá icá que caja. Tupana puráca'alo, Moisesmi chu, ripuráca'alo ja'apátajeñomi chuna, quele lana'acare i'imacá, huacára'ari iná la'acá ñaqué caja.

*Jesús i'mari najló iyamá tamáca'aco iñe'epú yucuna marí que:*

<sup>13</sup> Iñe'epú naquiya iyamá eyá iñe'epú hua'aró. Apú camu'ujuni ñani. Apú chi'itaje. Ilé chi'itaje iñe'epú i'ijnari capichácajo ejo. Malaca'aphénaru richuhúa i'ijnacana. Cajrú ina'uqué hua'año richuhúa, ne'ejnacáloje richuhúa penaje.

<sup>14</sup> Eyá apú camu'ujuni ñani i'ijnari matajnaco iná i'imacá ejo. Ricá chuhua ihua'ó. Camu'ujuni rapunumacana. Huejápaja ina'uqué iphátaño ricá, ne'ejnacáloje richuhúa penaje. Calaca'apheni richuhúa i'ijnacana.

*Nacaje ina'uqué la'acare aú iná hue'epí mecajenaca necá. Riyucuna marí:*  
(Lc 6.43-44)

<sup>15</sup> 'Re pajlácachina. Nemá nanacuhúa: "Tupana puráca'alo ja'apátajeño huecá" que. A'aniya inacojó napuráca'alo. Namácana aú iná pechu i'imá nanacu: "Palájne'equena japi necá" que. E'iyonaja uncá huani ñaqué calé necá. Chapú péchuruna huani ta necá.

<sup>16</sup> Richa aú iná hue'epí mecajeca a'ahuaná palani, mecajeca pu'uhuarieni. Ñaqué caja iná hue'epica mecajenaca necá nacaje nala'acare aú. Uncá meño'ojó lucú arúca'ala cajmú icha penaje. Uncá caja cununá arúca'ala pipirí icha penaje.

<sup>17</sup> Palani a'ahuaná arúca'ari caja palani richa. Pu'uhuarieni a'ahuaná arúca'ari caja pu'uhuarieni richa.

<sup>18</sup> Uncá meño'ojó palani a'ahuaná arúca'ala pu'uhuaré a'ahuaná icha que caja. Uncá meño'ojó pu'uhuarieni a'ahuaná arúca'ala palani a'ahuaná icha que caja.

<sup>19</sup> Iná i'icacá paiji iná mená e'iyayá, uncá arúca'alare palani richa, iná ca'acáloje ricá quera'atani chojé penaje.

<sup>20</sup> Ñaqué caja necá Tupana puráca'alo ja'apátajeño e'iyohúa. Nacaje nala'acare aú ja iná hue'epí mecajenaca necá, pajlácachina necá ca'ajná, palá péchuruna ca'ajná necá.

*Uncá i'ijnaláño je'echú chojé yucuna marí:*  
(Lc 13.25-27)

<sup>21</sup> 'Ina'uqué naquiya quemaño nunacu: "Huahuacára'ajeri ricá" que. Nanuma chiyaja calé ne'iyajena quemaño. Eyá uncá na'alá nanacojó nupuráca'alo. Marí que i'imacaño uncá i'ijnalájeño je'echú chojé. Nora'apá huátaca que la'ajeño, necaja calé i'ijnajeño rejo.

<sup>22</sup> Tupana hu'ájica ina'uqué je'echú chojé huacajé, ne'iyajena quemájeño nojló: "Huahuacára'ajeri, huecá ja'apátano piyucuna ajopánajlo. Pipechu aú calé huacá'a jiñana pechu ajopana ina'uqué e'iyayá. Pipechu aú caja hualá'a cajrú nacaje uncá meño'ojó ina'uqué la'alare", que nemájica nojló rihuacajé.

<sup>23</sup> E'iyonaja calé numaje najló: "Uncá nujhua'atéjena calé icá. I'ijná maáreya, pu'uhuaré la'ajeño i'imacale".

*Iyamá pají la'ajeño yucuna marí:*

*(Mr 1.22; Lc 6.47-49)*

<sup>24</sup> Ina'uqué iphaño nuchaje nupuráca'alo jema'ajé. Nupuráca'alo a'ajeño nanacojó i'majeño palá. Chuhua nu'umajica yucu, ihue'epícaloje méqueca no'opiyá jema'ajeño la'acá palá najluhua raú penaje. Capechuni la'arí riñacaré i'ímacá que caja no'opiyá jema'ajeño la'acá palá nanacuhá raú. Marí que rila'acá riñacaré i'ímacá: Pamineco ritára'ata jipa naquiyá riñacaré pana, ritára'acoloje camachá penaje. Ricá nacú rila'á riñacaré i'ímacá.

<sup>25</sup> Cajrú juni ja'acó huacajé ta'aqueni riñaaca'alá iphaca riñacaré ja'apejé. Ta'aqueni huani ra'apaca riñacaré ja'apiyá. Cajrú huani carená i'ímacá. Uncá riñacaré cojno'olá raú, jipa nacú riñacaré pana tára'acole. Marí que rila'acale ricá palá, uncá ricapichalo raú. Ñaqué caja nupuráca'alo a'ajeño nanacojó la'acá nanacuhá palá, no'opiyá jema'ajeño ne'emacale.

<sup>26</sup> Eyá ajopana piño jema'año nupuráca'alo. E'iyonaja uncá na'alá nanacojó ricá. Uncá paala ne'emajica, uncá pachá nema'alá no'opiyá. Uncá pechu i'imalá la'acá riñacaré i'ímacá que caja nala'acá chapú necó raú. Marí que rila'acá riñacaré i'ímacá: Que'epé e'iyaja ritára'ata riñacaré pana. Rinácuja rila'á riñacaré.

<sup>27</sup> Cajrú juni ja'acó huacajé, ta'aqueni riñaaca'alá iphaca riñacaré ja'apejé. Cojlo'orí que'epé riñacaré pana ji'íluya. Cajrú huani carená i'ímacá. Raú riñacaré cojno'orí queee junápeje. Chapú huani ricapichaco raú. Caja quetana riyucuna.

<sup>28</sup> Caja marí que Jesús jehuíña'ataca ne'emacá. Ripuráca'alo jema'ajeño pechu i'imá: “Meque palá huani rehuíña'achiyaca huecá.

<sup>29</sup> Palá rihue'epica nacaje rehuíña'atacare nacú huecá.” Tupana puráca'alo nacú jehuíña'atajeño, rehuá i'ímacaño uncá hue'epilaño palá rinacojé rijlunami chojé.

## 8

*Jesús tejmo'ótaca pajluhuaaja ritami yucuna marí:*

*(Mr 1.40-45; Lc 5.12-16)*

<sup>1</sup> E caja Jesús huitúca'ari yenuri i'ihuátaya. Cajrú ina'uqué i'ijnacá rápumi chu.

<sup>2</sup> E caja pajluhuaaja ina'uqué i'ijnari Jesús ahua'ajé. Ritami ri'ímacá, rinapona naquiyana patáca'ataro i'ímacá. Caja riphá Jesús nacú. Re ritára'o ri'irúpachi aú rijimaje; rimá rijló:

—Hue'emacana, pihuátajica ee, pa'apata nuliyá nuyaripune.

<sup>3</sup> Raú Jesús sápari rinacu riyáte'ela aú. Rimá rijló:

—Je. Nuhuata ra'apátacana piliyá. Caja ripali'ichó pijló chuhua.

Marí que rimacá rijló, hua'até que rinapona pala'acó rijló.

<sup>4</sup> E Jesús quemari rijló:

—Pi'imaniya nuyucuna ajopánajlo. Pi'ijná sacerdote chaje, ramíchachi picá. Quéchami pa'ajé nacaje Tupánajlo, pinapona pali'ichácole. Moisesmi chu huacára'aca i'ímacá que pa'ajica rijló nacaje. Marí caje aú ina'uqué hue'epéjeño caja pinapona pala'acó pijló —que rimacá rijló.

*Jesús tejmo'ótaca pajluhuaaja Romano naquiyana hua'até sápari yucuna marí:*

*(Lc 7.1-10)*

<sup>5</sup> E caja Jesús i'ijnari ají que pajimila Capernaum ejo. Riqueño'ó pajimila e'iyajé iphácana. Ejéchami pajluhuaaja ina'uqué iphaca rahua'ajé. Romano naquiyana ri'ímacá. Surárana huacára'ajeri ri'ímacá. Riphá rahua'ajé.

<sup>6</sup> Rimá rijló:

—Hue'emacana, ritami huani nujhua'até sápari. Quehuini huani rinapona piyuque. Uncá meño'ojó ricahuitala; iqui'i huani ramaca quehuini yajhué. Nuñacaré chu ritami to'oró.

<sup>7</sup> —Ñaqué ricá —que Jesús quemacá—. Nu'ujichaca pijhua'até, nutejmo'óchiyachi pijló ricá.

<sup>8</sup> Raú surárana huacára'ajeri quemari rijló:

—Hue'emacana, uncá nuhuátala pimujlúca'aca nuñacaré chojé. Nopáña'aco huani no'opihuá pijló, nuchaje huani pi'ímacale. Maáreyaja pihuacára'a ritejmo'otaco. Raú ja ritejmo'otájico.

<sup>9</sup> Re caja nuhuacára'ajeño. Surárana huacára'ajeri caja nucá. Numacachu pajluhuaaja nanaquiyánajlo: “Pi'ijná ají ño'ojó” que, ri'ijná rejo. Numacachu apujlo: “Majó pi'ijná” que, ri'ijná nucá ejo. Nuhuacára'acachu nujhua'até sápari la'acá nacaje, rila'á nacaje numacá rijló que —que rimacá Jesusjlo.

<sup>10</sup> Marí que rimacá rijló aú Jesús pechu i'imá: “¡Meque palá huani ripechu Tupana nacú!”

E rimá rijhua'até chira'ajeñojlo:

—Jema'á marí: Caphí ripechu Tupana chojé, ra'acáloje riñaté penaje. Uncá nuphátala apú Israelmi chu laquénami naquiyana e'iyayá, ricá que huani péchuri.

<sup>11</sup> Cajrú ajopana ina'uqué i'imaño a'ajútayami chuna hua'até je'echú chu. Ajopana te'eré eyájena ne'emajica. Abrahami chu, Isaacmi chu, Jacobmi chu, quele hua'até ne'emajica je'echú chu.

<sup>12</sup> Eyá icá, judíona, Tupana i'ihuapari rijluhua a'ajútayami chuna i'ímacá, i'ímacáloje Tupana hua'atéjenu najhua'até penaje. E'iyonaja calé Tupana ca'ajeri cajrú inaquiyana ya'ajinaje calajeruni chojé. Re cajrú neyájica. Quehuini a'acuhuaná cajrú najma'ajica naí huá camachá —que Jesús quemacá najló.

<sup>13</sup> E caja Jesús quemari piño surárana huacára'ajeri lo:

—Chuhua pipa'ó. Caja pipechu i'ímá caphí nochojé, nutejmo'ótachi pijló ricá. Pipechu nacú ricá queja ri'ímacajica pijló —que Jesús quemacá rijló.

Marí que rimacá rijló. Hua'até que rijhua'até sáapajeri tejmo'otaco.

*Jesús tejmo'ótaca Pedro yajneru yucuna marí:*

*(Mr 1.29-31; Lc 4.38-39)*

<sup>14</sup> E caja Jesús i'ijnari Pedro ñacaré ojo. Rimujlúca'a riñacaré chojé, amari Pedro yajneru to'ocó. Rutami ru'umacá jelo'ocajo nacú.

<sup>15</sup> E risapa ruyáte'ela nacú. Raú jelo'ocajo mata'arí ruliyá. Ejéhami rócho'oco, rutamáca'atacaloje najló a'ajneji penaje.

*Jesús tejmo'ótaca cajrú natámina yucuna marí:*

*(Mr 1.32-34; Lc 4.40-41)*

<sup>16</sup> E caja najúhua'a re. E nahuá'a Jesús ojo cajrú ina'uqué. Nanaquiyana i'imaño natámina. Ajopana i'imaño re, jiñana pechu i'ímacárena e'iyá ne'emacá. Pajluhua ñani ripuráca'alo aú ja calé rica'á jiñana pechu ne'iyayá. Ñaqué caja ritejmo'ótaca natámina.

<sup>17</sup> Tupana puráca'alo ja'apátajeri mi chu, Isaíasmi chu quemacá que rila'acá natejmo'ótacana aú. Marí que rilana'acá riyucuna i'ímacá: “Ra'apátaje hualiyá huayaripune.”

*Meque Jesús quemacá huátaño rijhua'até i'ijnacánajlo yucuna marí:*

*(Lc 9.57-62)*

<sup>18</sup> Muní que ri'ijná piño ají que a'ajná ño'ojó. Amari cajrú ina'uqué jahuacaco rinacojé. Raú rimá ra'apiyatéjenajlo, nacuhúa'acaloje ricá caesa pa'anajo pitá penaje.

<sup>19</sup> E apú i'ijnari rahua'ajé rijló quemaje. Tupana puráca'alo nacú jehuñña'atajери ri'ímacá. Rimá rijló:

—Huehuñña'atajери, nuhuata pijhua'até i'ijnacana pi'ijnajica ehua.

<sup>20</sup> Jesús quemari rijló:

—Re camejérinajlo pucunaji, nacamátacaloje richu penaje. Cuphira'apánajlo re caja ñañacaré najló. Eyá nojló, uncá pucunaji i'ímalá, nuhuatána'acaloje richu penaje. Ina'uquéloje penaje i'ímacá nucá —que rimacá rijló.

<sup>21</sup> E apú ra'apiyateje quemari rijló:

—Huahuacára'ajeri, piyurí nupa'acó nuñacaré ojo pamineco. Nuhuata nora'apá tami sa'acana ritaca'ajica ejomi —que rimacá Jesusjlo.

<sup>22</sup> Jesús quemari rijló:

—Pi'ijná nujhua'até. Uncá hue'epiláño Tupana nacojé, necá sa'ajeño caja taca'acaño tami.

—Je —que.

*Jesús quemari carenajlo, ra'apaca piyá yucuna marí:*

*(Mr 4.35-41; Lc 8.22-25)*

<sup>23</sup> E caja Jesús huitúca'ari jita chojé ra'apiyatéjenu hua'até.

<sup>24</sup> Nacuhúa'aca quetana Jesús i'ímarí camátacajo nacú. Ejéhami mana'í chiyó carená i'ímacá nachá caphí huani. Carená yocola amo'oró jita chojé cajrú juni.

<sup>25</sup> Ejéhami napótaca Jesús. Nemá rijló:

—¡Huehuñña'atajери, pihue'epí huamu'ují! Chuhuaca huejaca.

<sup>26</sup> Aú Jesús quemari najló:

¿Naje cajrú iquero'ocó? Uncá caphí péchuruna calé icá nochojé.

E rácho'o. Raca'á carená, juni hua'até. Raú carená mata'aró, juni piya hua'até. Mana'í huani ri'ímacá rejomi.

<sup>27</sup> Marí caje aú ra'apiyatéjenu pechu i'ímá: “¡Meque piyuque huani rihue'epica!” Nemá pajlocaca:

—¿Na huani chi ricá? Ripuráca'alo aú carená, juni hua'até jema'arí ra'apiyá.

*Jesús ca'acá iyamá ina'uqué e'iyayá jiñana pechu yucuna marí:*

*(Mr 5.1-20; Lc 8.26-39)*



<sup>28</sup> E caja nephá pa'anajo pitá, Gerasa te'eré ejo. Amaño iyamá ina'uqué huaíchaca juca ya'ajnaajo. Támijimina ca'aquelana chiyá nephá. Jiñana pechu i'imaño ne'iyá. Raú ne'emá yuriná huani. Uncá na calé ja'apáqueri rehuá, chapú nala'ajica ina'uqué.

<sup>29</sup> Caja nephá nanacu. Cajrú nahuíyo'oca. Nemá Jesusjlo:

—¿Naje picahuíla'a huanacu? Jesús, Tupana I'irí picá. ¿E chi pila'ajica huecá chapú, uncá chiyó riphá rená chojé huajló? —que nemacá rijló.

<sup>30</sup> A'ajnaajo que cajrú je'eruna piracana chira'acó na'ajnehuá culacana nacú.

<sup>31</sup> Raú mahuó jiñana pechu la'acá ricá. Nemá Jesusjlo:

—Pica'ajica ee huecá, pihuacára'a huecá a'ajnáruna je'eruna e'iyajé.

<sup>32</sup> —Je —que Jesús quemacá najló.

Raú jiñana pechu jácho'oño ileruna ina'uqué e'iyayá. Mujlúca'año je'eruna piracana e'iyajé. Raú je'eruna jecho'oño ají que a'ajná ño'ojó. Yenuri ji'ihuátaya na'ó caesa acojé. Rejeja je'eruna capichaño piyuqueja junápeje.

<sup>33</sup> Marí que nala'acá aú nalamára'ajeño penájenami quero'oño cajrú. Aú necho'ó pajimila ejo riyucuna i'imagé najló. Nephá rejo. E ne'emá najló Jesús ca'acá jiñana pechu yucuna.

<sup>34</sup> E caja piyuque pajimila e i'imaño i'ijnaño rejo ramaje. Nephá rinacu. E nemá Jesusjlo:

—Chuhua pácho'o huate'eré eyá.

—Je.

## 9

*Camachá apú napona taca'acá i'imagá. Jesús tejmo'ótaca ricá yucuna marí:*

(Mr 2.1-12; Lc 5.17-26)

<sup>1</sup> E caja Jesús huitúca'ari jita chojé. Nacuhúa'a pa'anajo pitá riñacajela ejo. Nephá rejo.

<sup>2</sup> E nahuá'a Jesús ejo pajluhuaja ina'uqué. Camachá rinapona taca'acá i'imagá. Cama caje chu rito'ó. Nahuá'a ricá riloco'opani. Jesús hue'epiri caphí napechu i'imagá richojé, ritejmo'ótacaloje ricá penaje. Raú rimá rijló:

—Pipechu i'imá caphí. Caja nomicho pichaje, pu'uhuaré pila'acare liyá.

<sup>3</sup> Tupana puráca'alo nacú jehuíña'atajeño naquiyana i'imaño re caja. Marí que rimacá aú napechu i'imá: “¡Meque pu'uhuaré huani ta rimíchaca ta! Tupánaja calé amaro ina'uqué chaje pu'uhuaré nala'acare liyá. Uncá Tupana calé ricá.”

<sup>4</sup> Jesús hue'epiri méqueca napechu i'imagá rinacu. E rimá najló:

—¿Naje i'ijnataca ipéchuhua ilé que?

<sup>5</sup> Majopeja iná quemacajla apujlo: “Caja nomicho pichaje, pu'uhuaré pila'acare liyá.” Eyá puhuichani inajlo ricá, iná huacára'acaloje ritami jácho'oco, ra'apácaloje penaje. Tupánaja calé hue'epiri natámina tejmo'ótacana.

<sup>6</sup> Ina'uquéloje penaje i'imagá nucá. Tupana quemari nunacu, nomácoloje ina'uqué chaje, pu'uhuaré nala'acare liyá penaje. Nula'ajicare aú me'etení, ihue'epeje ñaque jo'ó nojló ricá —que rimacá najló.

E rimá camachá napona taca'acajlo:

—Pácho'o. Pijña'á picamané ñani pijhua'ató, pipa'achó.

<sup>7</sup> Ejéchami pila pila que rácho'oco. Ripa'ó riñacaré ejo.

<sup>8</sup> Namá ra'apaca. Aú naquero'ó. Palá napura'acó Tupana nacú, ra'acale Jesús ñaté, ritejmo'ótacaloje natámina penaje.

*Jesús quemari Matéojlo, ri'ijnacáloje rijhua'até ra'apiyateje penaje. Riyucuna marí:*

(Mr 2.13-17; Lc 5.27-32)

<sup>9</sup> E caja Jesús ja'apari piño a'ajná ño'ojó. Amari pajluhuaja ina'uqué yá'aco risápaca'alo la'acana nacú. Mateo rií. Liñeru ña'ajeri ina'uqué liyá ri'imagá ne'emacánajlo. Jesús amari ricá; rimá rijló:

—Pi'ijná nujhua'até.

—Je —que rimacá.

Raú rácho'o, ri'ijná rijhua'até.

<sup>10</sup> Quéchami Mateo ñacaré chu Jesús ajñari ra'ajnehuá cajrú ajopana ina'uqué hua'até. Cajrú liñeru ña'ajeño ne'emacánajlo yá'año caja rijhua'até. Ajopana, nemacárena nacú: “Uncá ina'uquélaruna necá” que, necá i'imaño caja re. Ra'apiyatéjena i'imaño caja re.

<sup>11</sup> E caja fariséona naquiyana amaño Jesús ajñaca ra'ajnehuá najhua'até. E nemá ra'apiyatéjenajlo:

—¿Naje chi jehuíña'atajeri ajñari ra'ajnehuá najhua'até? Liñeru ña'ajeño ne'emacánajlo, uncá ina'uquélaruna, quele hua'até rajná ra'ajnehuá.

<sup>12-13</sup> Jesús jema'arí méqueca nemacá najló. E rimá najló:

—Uncá peyajhuéruna i'ijnalaño pusána'ajeri amaje. Natáminaja calé i'ijnáño ramaje. Ñaqué caja ina'uquejlo nucá. Re ina'uqué, natámina que necá Tupánajlo, pu'uhuaré la'ajeño ne'emacale. Ne'iyajena pechu i'imá nanacuhúa: “Pu'uhuaré la'ajeño huecá” que. Nu'ujná majó Tupana yucuna i'imajé ilé que i'imacáñojlo, napajno'otácaloje napéchuhua pu'uhuaré nala'acare liyá Tupana ejo penaje, ne'emacáloje lamára'ataquejanami que Tupánajlo raú penaje. Eyá ajopana, napechu i'imá nanacuhúa: “Palá la'ajeño huecá” que. E'iyonaja uncá ñaqué calé necá. Uncá nu'ujnalá majó marí que i'imacáñojlo Tupana yucuna i'imajé.

Tupana puráca'alo lana'aquejami naquiyana quemari marí que ajopana nacú: “Icá a'año nojló pirajina nenócarena pu'uhuaré ina'uqué la'acare chaya. Richaje huani nuhuátaca ihue'epica ina'uqué mu'ují”, que Tupana quemacá nanacu i'imacá —que Jesús quemacá najló.— Ñaquele chuhua i'ijná, jehuíña'acoloje rinacu meque quemacánaca ricá penaje.

*Ne'etaó na'ajné liyá, napechu i'imacáloje Tupana nacuja penaje. Riyucuna naquejá'a Jesús liyá. Marí riyucuna:*

(Mr 2.18-22; Lc 5.33-39)

<sup>14</sup> E caja Juan bautizar la'ajeri ja'apiyatéjena iphaño Jesús nacú. Nemá rijló:

—¿Naje uncá pa'apiyatéjena i'italaño na'ajné liyá? Huecá i'itaño cajrú hua'ajné liyá. Fariséona ñaqué caja.

<sup>15</sup> Jesús quemari najló:

—Nahuá'acaco huacajé, necá nayucupé'acarena uncá i'italaño na'ajné liyá, ilé ruyajná penaje i'imacá najhua'até quetana. Ñaqué caja ricá no'opiyatéjenajlo. Najhua'até nu'umacá quetana uncá ne'etaló na'ajné liyá. Tupana huá'ajeri nucá naliyá. Rejomi ne'etajó na'ajné liyá —que Jesús quemacá najló.

*Jesús jehuíña'ataca necá, nayurícaloje jupichumi puráca'aloji huajé lanaquiya penaje. Aú ri'imá yucu najló marí que:*

<sup>16</sup> —Uncá na calé mata'arí a'arumacaji huajé naquiyana jupichumi tepé penaje. Re'iyayá ripácana aú jupichumi jiyó'otaro huajé liyá. Caja penaje richaje huani jiyó'otáqueja jupichumi a'arumacaji yurico.

<sup>17</sup> Uncá caja iná aco'olá nacaje jalá huajé amúra'atacanami jupichumi ra'acuná chojé, iná lámá'atacaloje ricá richu penaje. Camejeri ímami naquiyá la'acanami ricá ra'acuná. Ilé que iná la'acachu, huajé amúra'atacanami huapa'atari jupichumi ra'acuná, caja ñaataco ri'imacale. Ejeja ricapichó jupichumi ra'acuná hua'até. Eyá huajé ra'acuná chojé iná aco'ocachu huajé nacaje jalá amúra'atacanami, uncá rijiyó'otala ricá, camejeri ímami ñaacole rijhua'até —que Jesús i'imacá najló yucu.

*Jesús macápo'oca Jairo itu yucuna. Quecha apa'ahuelo tejmo'otaco Jesús a'arumacá nacú sapacana aú yucuna marí:*

(Mr 5.21-43; Lc 8.40-56)

<sup>18</sup> Jesús i'imari najló yucu ejé apú iphari rinacu. Judíona huacára'ajeño naquiyana ri'imacá. Riphá Jesús nacú. E rijláma'o ri'imá nacojé. Rimá rijló:

—Huajé nutu taquí'chaca. Pi'ijná nujhua'até nuñacaré ejo, pito'ochiyachi piyáte'ela runacojé, ruhuajácaloje rupéchuhua raú penaje.

<sup>19</sup> —Je —que rimacá rijló.

E ri'ijná rijhua'até. Ra'apiyatéjena i'ijnáño caja rijhua'até. Cajrú ina'uqué ja'apaño caja najhua'até.

<sup>20-21</sup> Eyá apa'ahuelo ja'apayo caja najhua'até. Rutami ru'umacá. Jirá ja'apáqueri runaquiya i'imajica. Caja iyamá iphata ji'imaji nacojé quele jarechí ru'umacá rutami rinacu. Rupechu i'imá: “Nusápajica ee ra'arumacá nacojé, nutejmo'otájico raú.” Aú ro'opá Jesús ápumi chu. Rusapa ra'arumacá ji'imá nacú.

<sup>22</sup> Ejéchami Jesús pajno'ocó ruchaje yacá'ajo; amari ilerú inanaru. Rimá rojló:

—Pipechu i'imá palá. Chuhua pitejmo'otájico, pipechu i'imacale caphí nochojé —que rimacá rojló.

Raú ja rutejmo'otó.

<sup>23</sup> E caja ri'ijná ajé que a'ajná ño'ojó. Iphari nahuacára'ajeri ñacaré ejo. Amari cajrú ina'uqué i'imacá re. Quehuirí caje chojé apho'ojeño i'imaño caja re. Támijimi sa'acana yale napho'ó quehuirí caje chojé. Re caja cajrú nahuinano la'ajeño i'imaño re. Cajrú namejé i'imacá; cajrú nala'acá nahuinano rucá.

<sup>24</sup> E caja Jesús quemari najló:

—I'ijná a'ajná ño'ojó. Uncá ilerú yuhualó taca'alacha. Rucamáchiyacoja calé.

Ne'echacá rinacu raú, nahue'epícale caja rutaca'acá i'imacá.

<sup>25</sup> E'iyonaja Jesús huacára'ari namujlúca'aca pají chiyá a'ajná ño'ojó. Quéchami rimujlúca'a támijimi i'imacare chu ucapú chojé. Ripatá rucá ruyáte'ela naquiyá. Raú rócho'o yá'ajo.

<sup>26</sup> Marí que rimacápo'oca ru'umacá. Ejomi cajrú huani riyucuna moto'ocá nate'eré ehuá.

*Jesús ja'apátaca naliyá mejlucaji yucuna marí:*

<sup>27</sup> E caja Jesús ja'apari a'ajná ño'ojó. E iyamá mejluruna i'ijnaño rápumi chu. Jahuíyo'oqueja nemáca rijló:

—Picá Tupana huacára'acare majó ina'uqué i'imatájeri penaje, pihue'epí huamu'ují.

<sup>28</sup> E caja Jesús mujlúca'ari pají chojé; necá rápumi chu. E Jesús quemari najló.

—¿E chí ipechu caphí nochojé, no'opátacaloje iliyá mejlucaji penaje?

—A'a, Hue'emacana —que nemacá rijló.

<sup>29</sup> E Jesús sapari nejlú nacú. Rimá najló:

—Ipechu i'imacá nochojé caphí loco'opáneje ri'imajé ijló.

<sup>30</sup> Eja mejlucaji ja'apari naliyá, palá namaca. E Jesús quemari najló:

—¡Pa! I'imaniya riyucuna ajopánajlo.

<sup>31</sup> Raú napa'ó. Palá Jesús la'acare necá yucuna ne'emá cajrú ina'uquejlo nañacajela ehuá.

*Jesús ca'acá jiñá pechu pajluhuaja manumarú e'iyayá, ripura'acóloje penaje. Riyucuna marí:*

<sup>32</sup> Caja mejluruna i'imacaño penájenami pa'añó. Nayámijo ajopana piño iphaño Jesús nacú. Nahuá'a najhua'ató apú; jiñá pechu i'imari re'iyá. Nacojé uncá meño'ojó ripura'aló.

<sup>33</sup> Jesús ca'arí jiñá pechu re'iyayá. Ejomi palá ripura'acó. Piyuque ramájeño quemáño: “Meque piyuque huani la'acá Jesús. Uncá huani huamala apú la'acá ñaque maare huate'eré nacú, Israelmi chu laquénami te'eré nacú.”

<sup>34</sup> Palá napura'acó rinacu. E'iyonaja ajopana, fariséona ne'emacá, quemáño najló:

—Jiñana huacára'ajeri calé a'arí ilé Jesús ñaté, rica'acáloje jiñana pechu ina'uqué e'iyayá penaje.

*Jesús hue'epica ripuráca'alo jema'ajeño mu'ují yucuna marí:*

<sup>35</sup> Jesús i'ijnaqueri apú pajimila, apú pajimila eyá que, rehuíña'atacaloje necá Tupana nacú penaje. Rehuíña'ataque necá nahuacáca'alo ñacarelana chu. Ri'imaqué Tupana i'imataca ina'uqué capichácajo liyá yucuna najló, ne'emacáloje rijhua'atéjena naquiayana ra'apiyá jema'acana aú penaje. Yucu ri'imaqué najló; hua'ató ritejmo'ótaque natámina piyuqueja nayaripune liyá. Quehuini yajhué amájeño ne'emajica; que'iyapé nayaripune i'imajica. Cajena necá ritejmo'ótaque.

<sup>36</sup> Jesús amaca aú cajrú huani ina'uqué rihue'epí namu'ují. Ujhuí péchuruna ne'emacá. Chapú caje yajhué amájeño caja ne'emacá. Ohuéjana, necó i'imacaño queja ne'emacá. Uncá namájeri i'imalá queja ne'emacá.

<sup>37</sup> Aú calé rimá ra'apiyatéjenajlo marí que:

—Jema'á marí: Re cajrú ina'uqué marí eja'ahuá chu, nema'ájla Tupana ja'apiyá, ajopana i'imaquela najló riyucuna. E'iyonaja uncá riyucuna i'imajeño i'imalá.

<sup>38</sup> Re necá huejápaja. Ipura'ó Tupana hua'até, rihuacára'acaloje ina'uqué riyucuna i'imajé ajopana, ajopánajlo que penaje —que rimacá najló.

## 10

*Jesús huacára'aca ra'apiyatéjena ajopana chaje, ajopana chaje que yucuna marí:*

(Mr 3.13-19; Lc 6.12-16)

<sup>1</sup> E caja Jesús quemari ra'apiyatéjenajlo, nahuacácaloje richaje penaje. Iyamá iphata ji'imaji nacojé quele ne'emacá. E nahuacó rinacojé. E ra'á najló Ripechu, naca'acáloje jiñana pechu ina'uqué e'iyayá raú penaje. Ra'á caja najló Ripechu, natejmo'ótacaloje natámina que'iyapé nayaripune liyá penaje. Natejmo'ótacaloje quehuini yajhué amájeño penaje ra'á najló Ripechu.

<sup>2</sup> Iyamá iphata ji'imaji nacojé quele rihuacára'acarena i'imacá. Marí quele ne'emacá: Simón. Apú rii Pedro. Andrés apú. Simón e'ehué ri'imacá. Santiago, re'ehué Juan hua'até. Zebedeo yaní ne'emacá.

<sup>3</sup> Ajopana piño: Felipe, Bartolomé, Tomás, Mateo, liñeru ña'ajeri ne'emacánajlo penájemi ri'imacá. Apú piño Santiago. Alfeo i'irí ricá. Apú Tadeo.

<sup>4</sup> Simón apú. Celote naquiayana ri'imacá. Caja penaje Judas Iscariote. Nenoca Jesús i'imacá huacajé, ricá huá'ari ripinana Jesús i'imacá ejo, napatacáloje ricá penaje. Marí quele ne'emacá ri'ihuapacárena rijluhua ne'iyayá, ne'emacáloje ra'apiyatéjena penaje.

*Jesús huacára'aca ra'apiyatéjena i'imacá Tupana yucuna ajopána, ajopánajlo que yucuna marí:*

(Mr 6.7-13; Lc 9.1-6)

<sup>5</sup> E caja Jesús huacára'ari ra'apiyatéjena marí que:

—I'ijnaniya ajopana te'eré ejo, uncá judíona calé te'eré ejo. I'ijnaniya caja pajimila ejo, Samaria te'eré nacú i'imagare.

<sup>6</sup> I'ijná Israelmi chu laquénami chájeja calé. Capichájeño necá Tupana liyá me'etení.

<sup>7</sup> Yehuicha Tupana i'imajica ina'uqué naquiyana huacára'ajeri. Riyucuna i'imá najló.

<sup>8</sup> Itejmo'óta caja natámina; imacápo'ota caja ina'uqué caja taca'acaño naquiyana; ipala'atá caja nanapona patáca'ataco najló; ica'á caja jiñana pechu ina'uqué e'iyayá. Marí que ila'ajica nupechu aú. Majopeja no'ocá ijló ricá, uncá rihuemí i'imalá. Naqué caja ila'ajica ina'uquejlo nacaje. Imaniya najló, na'acáloje ijlo rihuemí penaje.

<sup>9</sup> Ijña'aniya caja ijhua'ató liñeru.

<sup>10</sup> Ijña'aniya caja ijhua'ató itulané. Pajluhuaaja a'arumacá chuja i'ijnajica. Ijña'aniya caja ijhua'ató ji'ima'ulaji, icutihuaere caje. Ica'á ajeño najló nacaje, huemí na'ajé ijlo a'ajnejí.

<sup>11</sup> Iphájica ee pajimila ejo, iculaje palá péchuri ina'uqué ijluhua, iyurícoloje rijhua'até riñacaré chu penaje. Iyuró rijhua'ateja riñacaré chu re i'imajica quetana.

<sup>12</sup> Pají chojé mujlúca'acana aú ajalaca necá. Imá Tupánajlo, rila'acáloje napechu palá penaje.

<sup>13</sup> Palá péchuruna ne'emajica ee, imá Tupánajlo caja queja ri'imacáloje najló penaje. Uncá paala péchuruna ne'emajica ee, imá Tupánajlo ra'acá piyá nañaté.

<sup>14</sup> Uncaque pají chujena ca'ajná, pajimila eruna ca'ajná, huátaño ipuráca'alo jema'acana, iñaca'á ji'ima'ulá naquiyá mu'upé najimaje. Marí que ila'ajica ja'apájica reyá huacajé. Nahue'epícaloje pu'uhuaré la'ajeñoca necá raú, uncale nahuátala ipuráca'alo a'acana nana-cojó.

<sup>15</sup> Tupana huajájica pu'uhuaré la'ajeño, namanaicho la'ajeño huacajé, cajrú rihuajájica necá, uncá huátalaño icá. Pajimila Sodoma erúname chuna, pajimila Gomorra erúname chuna, quele rihuajaje caphí huani, pu'uhuaré la'ajeño huani ne'emacale. Nachaje iqu'i'ica rihuajájica necá, uncá huátalaño icá. Marí que Jesús huacára'aca ne'emacá.

*Chapú nala'acá Jesucristo ja'apiyá jema'ajeño yucuna marí:*

<sup>16</sup> E caja Jesús quemari piño marí que najló:

—Jema'á marí. Mayuchéruma icá. E'iyonaja nuhuacára'a icá chapú péchuruna ejo. Naquele i'imá capéchuruna i'imagá que najhua até. Mana'íja ila'acá ipéchuhua najhua até.

<sup>17</sup> Ihue'epinota marí que ri'imajica no'opiyá jema'ajeñojlo: Nemaje inacu: “Pu'uhuaré la'ajeño necá” que. Raú najña'ajica icá ihuacára'ajeño ejo. Jahuacáca'alo ñacarelana chu naña'atájica icá.

<sup>18</sup> Ya'ajná ajopana chaje huacára'ajeño ejé caja najña'ajé icá, nahuajácaloje icá re penaje. No'opiyá jema'ajeño i'imagá pachá, nahuajaje icá rejo. Palani ijlo marí, i'imacáloje najló nuyucuna rejo penaje. Najló, uncá judíona calé i'imagáojlo hua'até caja i'imajé nuyucuna.

<sup>19</sup> Najña'ajica ee icá ihuacára'ajeño ejo, nahuajácaloje icá penaje, ihuó la'aniyo méqueca imájica najló ja'apí. Riphájica rená chojé ijlo, ipura'acáloje ichayo penaje, Tupana quemájeri ijlo méqueca imájica najló.

<sup>20</sup> Uncá ipechu queja calé imájica najló. Jara'apá Pechu, Tupana Pechu aú imaje najló.

<sup>21</sup> Ne'iyajena a'ajeño nejena huani ajopánajlo, nenócaloje necá penaje, no'opiyá jema'ajeño ne'emacale. Ne'iyajena caja a'ajeño nayani ajopánajlo. Ne'iyajena caja a'ajeño nach'i'iná ajopánajlo, nenócaloje necá penaje. Marí que nala'ajica necá, no'opiyá jema'ajeño ne'emacale.

<sup>22</sup> Cajrú ina'uqué pechu i'imajica chapú inacu, no'opiyá jema'ajeño i'imagale. Uncá jácho'olaño no'opiyá jema'acana chíyá caja penaje ri'imajica ejená, uncá capichálajeño.

<sup>23</sup> Apala pajimila e icá i'imajeño. Nala'ajica ee chapú icá re, iñaajó reyá apú pajimila ejo, i'imacáloje nuyucuna caja najló rejo penaje. Itajátaca piyá piyuqueja pajimila Israelmi chu laquénami te'eré ehúa, núcá iphájeri majó. Ina'uquéjloje penaje i'imagá núcá, pa'ajero piño majó.

<sup>24</sup> Apú ina'uqué ja'apiyateje, uncá rehuíña'atajeri chaje calé ricá. Apú hua'até sápjari, uncá ricarihuate chaje calé ricá.

<sup>25</sup> Ajopana pechu i'imagá nehuíña'atajeri nacú, que caja napechu i'imagá ra'apiyá jehuíña'ajeño nacú. Ajopana pechu i'imagá nacarihuate nacú, que caja napechu i'imagá rijhua'até sápjajeño nacú. Jehuíña'atajeri nacá; Ihuacára'ajeri caja núcá. Nunacu nemá: “Jiñana huacára'ajeri ricá” que. Naqué caja nemájica pu'uhuaré inacu, nujhua'atéjena i'imagale.

<sup>26</sup> Ihuó la'aniyo ajopana ina'uqué ja'apejé. Me'echuje pu'uhuaré nala'acare me'etení. Piyuque nacaje ina'uqué la'acare me'echú, amájero ajopánajlo.

<sup>27</sup> Nacaje numacare nacú ijlo huecámica que, i'imá riyucuna pu'uhuacá cajrú ina'uquejlo.

<sup>28</sup> Iquero'oniyó ina'uqué nójeño piyá. Iná napónaja calé nenó. Eyá iná pechu uncá capichálajo raú. Tupana hue'epiri iná napona capichátacana. Rihue'epí caja iná ca'acana quera'atani uncá yacálare chojé. Ñaquele iquero'ó ripiyá.

<sup>29</sup> Iná huarúhua'a iyamá cupira'aphana mahuemíru huani maárohua. Mahuemíruna necá. E'iyonaja Jara'apá Tupana hue'epiri méquechamíca nataca'ajica.

<sup>30-31</sup> Cajrú cupira'aphana chaje huani íqui'ica rihuátaca icá. Tupana hue'epiri piyunqueja. Rihue'epí caja méqueleca iná ihuilá i'ímacá. Ra'á caja rinacojó iná. Ñaquele iquero'oniyó ajopana ina'uqué piyá.

*Iná apáña'aco piyá Jesús ja'apí yucuna marí:*  
(Lc 12.8-9)

<sup>32</sup> Re ca'ajná apú nujhua'ateje. Uncá rapáña'alo no'opí ajopana ina'uqué e'iyá. Rimá najló nunacu: "Rijhua'ateje nucá" que. Ñaque caja numájica rinacu Nora'apá, je'echú chu i'ímacárejo. Numaje rijló: "Nujhua'ateje ricá" que. Marí que caja numájica rijló piyuque ina'uqué nacú, uncá mícho'otálaño nuchaya ajopana ina'uqué e'iyá.

<sup>33</sup> Eyá apú nujhua'ateje ca'ajná apáña'aro no'opí ajopana ina'uqué e'iyá. Aú calé rimá najló nunacu: "Uncá rijhua'ateje calé nucá". Ñaque caja numájica rinacu Nora'apajlo, je'echú chu i'ímacárejo. Numaje rijló rinacu: "Uncá nujhua'ateje calé ricá". Marí que caja numájica rijló piyuque ina'uqué nacú, mícho'otaño nuchaya ajopana ina'uqué e'iyá.

*Jesús puráca'alo jimaje ajopana yúcha'aco yucuna marí:*  
(Lc 12.51-53; 14.26-27)

<sup>34</sup> Apala ipechu i'imá nunacu: "Ricá la'ajeri ina'uqué palá, nayúcha'aco piyá pachácaca". Ipechu i'imaniya ilé que. Uncá ilé que calé ri'imajica iná'uquejlo. Nupuráca'alo a'acana nanacojó jimaje chapú napechu i'imajica no'opiyá jema'ajeño nacú.

<sup>35</sup> Apala nupuráca'alo jimaje apú yúcha'aro rara'apajlo. Apala nupuráca'alo jimaje apa'ahuelo yúcha'ajeyo rolojlo. Apala nupuráca'alo jimaje ru'urinó yúcha'ajeyo ruyajnérujlo.

<sup>36</sup> Marí que ca'ajná ina'uqué i'imajica pajhua'atéchaca nejena hua'até nupuráca'alo jimaje. Iná ejena naquiyana i'imajeño chapú péchuruna iná nacú.

<sup>37</sup> Huátari rara'apá ca'ajná, raló ca'ajná, nuchaje íqui'ica, uncá na penaje calé nojló ricá, ri'ímacáloje nujhua'ateje penaje. Huátari ri'iri ca'ajná, ritu ca'ajná nuchaje, uncá na penaje calé nojló ricá, ri'ímacáloje nujhua'ateje penaje.

<sup>38</sup> Apala nenoje nujhua'atéjona naquiyana. Ihue'epíjica ee inacuhúa, uncá meño'ojó i'imalá nujhua'atéjona.

<sup>39</sup> Re ina'uqué, nahue'epí caí nanacuhúa. Nahuata pajimato ina'uqué pechu i'imacá palá nanacu. Caí nanacuhúa hue'epícaño ne'emacale, uncá nahuátala nujhua'atéjona i'imacana. Marí que hue'epícaño caí nanacuhúa capichájico Tupana liyá. Eyá ajopana, uncá hue'epílaño caí nanacuhúa ilé que, ne'emacáloje nujhua'atéjona penaje, i'imajeño matajnaco je'echú chu.

<sup>40</sup> Palá péchuruna no'opiyá jema'ajeño nacú, palá caja napechu nunacu. Huátari nucá, huátari caja Tupana, huacára'ari nucá majó.

<sup>41</sup> Ila'acachu nacaje apujlo, Tupana puráca'alo ja'apátajeri ri'imacale, palá ila'acá raú. Tupana a'ajica rijló palá rila'acare huemí, que caja ra'ajica ijlo rihuemí. Ila'acachu nacaje apujlo, palá la'ajeri ri'imacale, palá ila'acá raú. Tupana a'ajica rijló palá rila'acare huemí, que caja ra'ajica ijlo rihuemí.

<sup>42</sup> Apala apú la'arí apú palá, no'opiyá jema'ajeri naquiyana ri'imacale. Ra'á ca'ajná rijló juni ipe'ení, ri'iracáloje penaje. Marí que rila'acale ricá palá, Tupana a'ajeri rijló rihuemí. Marí que Jesús jehuíña'ataca ra'apiyatéjona i'ímacá.

## 11

*Juan bautizar la'ajeri huacára'aca ra'apiyatéjona naquiyana Jesús chaje yucuna marí:*  
(Lc 7.18-35)

<sup>1</sup> Jesús yuriri ra'apiyatéjona jehuíña'atacana nacú i'ímacá. Iyamá iphata ji'imaji nacojó quele ne'emacá. Ejomí ri'ijná piño apú, apú eyá que rehuá i'imacaño jehuíña'atacana nacú. Tupana yucuna i'imacana nacú ri'imá rehuá.

<sup>2</sup> Caja naca'á Juan ina'uqué huajáquelana chojé i'ímacá. E caja rema'á piyuque nacaje Jesús la'acare yucuna. Raú rihuacára'a ra'apiyatéjona naquiyana Jesús chaje, naquejá'acaloje rilíyá riyucuna penaje, rihue'epícaloje ricá raú penaje.

<sup>3</sup> E nephá rinacu, nemá rijló:

—Huahuacára'ajeri quemari pinacu: ¿Píca huani chí píca nemacare nacú i'ímacá, iphájeri majó ina'uqué i'imatájeri penaje? Apú ca'ajná huaícha. ¿Meque chí ricá? —que nemacá rijló.

<sup>4</sup> Jesús quemari najló:

—Ipa'ó Juan ejo, i'imichachi rijló riyucuna méqueca amíchaca nula'acá huajé. Nacaje nohuíña'atacare nacú yucuna hua'ató i'imajé caja rijló.

<sup>5</sup> Eco imá rijló marí que nunacu: “Mejluruna liyá ra'apata mejlucaji, namácaloje penaje. Uncá meño'ojó ja'apálaño rilamá'ata, na'apácaloje penaje. Nanapona patáca'atacaronajlo ripala'atá nanapona najló. Uncá jema'alaño liyá ra'apata caja me'ejhuicaje, nema'acáloje penaje. Támijimina naquiyana rimacápo'ó caja. Tupana i'imataca ina'uqué capichácajo liyá yucuna ri'imá camu'ují la'acañojlo. Marí que la'acana nacú ricá”, que imájica rijló nunacu.

<sup>6</sup> “Pu'ují péchuruna necá, uncá la'alaño ujhuí napéchuhua nuliya”, que imájica rijló —que Jesús quemacá najló.

<sup>7</sup> Je. E napa'ó. Ejomi Jesús i'imari ripuráca'alo jema'ajéñojlo Juan yucuna. Rimá najló marí que:

—Icá i'ijnaño pu'uteni meñaru chojé i'imacá Juan puráca'alo jema'ajé. Uncá ca'ajná i'ijnalá rejo i'imacá iyamá chuhua péchuri chaje. Uncá iyamá chuhua péchuri calé ricá.

<sup>8</sup> Uncá caja i'ijnalá ra'arumacá palani amaje. Uncá palá a'arumacaji i'imacare nacú calé ricá. Icó hue'epiño mecajenaca i'imaño palá a'arumacáruna. Nahuacára'ajeño ñacaré chiyájena necá.

<sup>9</sup> Apala ipechu i'imá rinacu: “Tupana puráca'alo ja'apátajeri ricá” que. Ricá jo'ó ri'imacá. Ajopana Tupana puráca'alo ja'apátajeñomi chuna chaje huani ricá.

<sup>10</sup> Ricá nacú Tupana quemari nojló i'imacá. Marí que ripuráca'alo ja'apátajerimi chu lana'acá riyucuna i'imacá:

Nucá huacára'ajeri pajluhuaja ina'uqué pitucumá.

Ricá quemájeri ina'uquejlo pipé, nalamá'atacaloje napéchuhua pu'uhuaré nala'acare liyá penaje, que Tupana quemacá Juan nacú, uncá chiyó ri'imá i'imacá.

<sup>11</sup> Jema'á marí: Uncá na i'imalá Juan chaje, i'imacá marí eja'ahuá chu huayámajo. Eyá je'echú chu uncá ñaqué calé ricá. Na'apejé i'imacá je'echú chu, i'imari Juan chaje. Je'echú churuna huacára'ajeri Tupana.

<sup>12</sup> Juan queño'ocá Tupana yucuna i'imacana eyá maárejecha, huechi cajrú ina'uqué huátaca Tupana hua'atéjena i'imacana. Napechu ejé nala'acá, ne'emacáloje rijhua'atéjena penaje.

<sup>13</sup> Tupana puráca'alo ja'apátajeñomi chuna, Moisesmi chu, quele lana'año ripuráca'alo patera chojé i'imacá. Ripuráca'alo lana'aquejami quemari marí que Tupana nacú: “Ricá i'imajeri ina'uqué huacára'ajeri penaje”. Marí que nemacá rinacu uncá chiyó Juan i'imá.

<sup>14</sup> Tupana puráca'alo quemari Elíasmi chu nacú: “Ricá pa'ajero piño majó. Tupana i'imajica ina'uqué huacára'ajeri penaje yámona riphaje”, que rimacá rinacu. Elías, quele rimacare nacú i'imacá, iphari majó. Juan, ricá po rimacare nacú, Elías que i'imacá, quele iphari majó. Apala ipechu i'imá: “Uncá ñaqué calé ricá”. E'iyonaja jema'á no'opiyá.

<sup>15</sup> Icó que'ejhuirínajlo numá, a'á inacojó ricá —que Jesús quemacá najló.

<sup>16</sup> E rimá piño najló:

—Ina'uqué i'imacáno me'etení, marí que necá: Yuhuaná queja necá. Yá'año le'ejepelaji ñacarelana chu cátaçajo nacú necá. E nahuá'a ajopana najhuáque'enajlo.

<sup>17</sup> Nemá najló: “Huapho'ó quehuiri chojé ijlo. E'iyonaja uncá arápa'ala. Huataní caja ijlo yájeje, ipechu la'acóloje camu'ují raú penaje. E'iyonaja uncá ipechu la'aló camu'ují raú. Uncá caja iyala raú”, que nemacá najló. Ñaqué caja ina'uqué naquiyana me'etení, majopeja aca'acá huamaná. Cayucújne'equena huani icá.

<sup>18</sup> Pamineco Juan i'imacá ijlo Tupana yucuna. Ri'itajico ra'ajné liyá, ripechu i'imacáloje Tupana nacuja penaje. Uncá caja ri'iraqué nacaje jalá amúra'atacanami. E'iyonaja ricá nacú imá: “Jiñá pechu hua'ateje ricá” que.

<sup>19</sup> Eyá nucá, ina'uquéjloje penaje i'imacá nucá. Ajopana ajñaca na'ajnehuá que caja nojñaca no'ojnehuá. Ñaqué caja nu'uracá nacaje jalá amúra'atacanami. Nunacu imá: “Cahuale'equé ricá, i'iracachi huani caja ricá. Uncá ina'uquélaruna huáque'ehue caja ricá”, que imacá nunacu. “Liñeru ña'ajeño ne'emacánajlo huáque'ehue caja ricá”, que imacá nunacu. Marí que aca'acá huamaná. E'iyonaja iná hue'epí nacaje Tupana la'acare, jácho'oro palá.

*Jesús aca'acá ina'uqué uncá jema'alaño Tupana ja'apiyá yucuna marí:  
(Lc 10.13-15)*

<sup>20</sup> Jesús la'aqueri cajrú nacaje, uncá meño'ojó ina'uqué la'alare caje. Cajrú pajimila ehua rila'aque ricá. E'iyonaja uncá napajno'otala napéchuhua pu'uhuaré nala'acare liyá Tupana ejo. Raú raca'á pajimila eruna maná, amaño rila'acá richaje íquica nacaje, uncá meño'ojó ina'uqué la'alare. Marí que rimacá nanacu:

<sup>21</sup> —Chapú huani ri'imajica pajimila Corazín erúnajlo. Chapú huani caja ri'imajica pajimila Betsaida erúnajlo. Cajrú huani nula'acá Tupana Pechu aú nacaje rehuá i'imacá,

uncá meño'ojó ina'uqué la'alare. E'iyonaja uncá nema'alá no'opiyá. Uncá napala'atala napéchuhua pu'uhuaré nala'acare liyá. Ñaqué caja Tupana la'aquea pajimila Tiro e, pajimila Sidón e i'ímacá, napajno'otajla napéchuhua pu'uhuaré nala'acare liyá Tupana ejo. Na'ájla nanacuhuá cotari caje na'arumacá penaje. Naca'ájla caja nachó siyá pa'ilá, ina'uqué hue'epicaloje caja napajno'otaca napéchuhua pu'uhuaré nala'acare liyá Tupana ejo raú penaje.

<sup>22</sup> Tupana huajájica pu'uhuaré la'ajeño, mananaicho la'ajeño huacajé, rihuajájica cajrú Corazín eruna, Betsaida eruna, quele. Cajrú rihuajájica pajimila Tiro erúnami chuna, Sidón erúnami chuna, quele, chapú la'ajeño ne'emacale. Richaje huani rihuajájica Corazín eruna, Betsaida eruna, quele.

<sup>23</sup> Eyá pajimila Capernaum e i'imacaño i'imaño piño marí que: Napechu i'imá nanacuhuá: “Je'echú chu i'imajícáño penájena huecá” que. E'iyonaja uncá ñaqué calé najló ri'imajica. Cahuacaje naca'ajé necá, nacapichácoloje penaje. Cajrú nula'acá Tupana Pechu aú nacaje rehuá i'ímacá, uncá meño'ojó ina'uqué la'alare caje. Tupana la'aquea ñaqué caja pajimila Sodoma ehua, ejo'ocaja pajimila i'imacajla rehuá me'etení.

<sup>24</sup> Tupana huajájica pu'uhuaré la'ajeño huacajé, pajimila Sodoma erúnami chuna chaje huani rihuajájica Capernaum eruna —que Jesús quemacá najló.

*Jesús pura'acó Tupana hua'até yucuna marí:*

*(Lc 10.21-22)*

<sup>25</sup> Marí que Jesús pura'acó Tupana hua'até i'ímacá:

—Nora'apá, eja'ahuá, je'echú, caje Mináricana picá. Palá pila'acá nucá, pila'acale ina'uqué naquiyana palá. Yuhuaná pechu, queja péchuruna necá. Pila'acale napechu palá, nahue'epí quehuácaje puráca'aloji numacare nacojé. Eyá cajrú jehuíña'acañojlo, capéchuruna jlo me'echuje jo'ó ricá.

<sup>26</sup> Nora'apá, caja queja pihuátaca najló ricá —que rimacá Tupánajlo.

<sup>27</sup> E rimá piño rema'ajéñojlo:

—Nora'apá quemari nojló piyuqueja puráca'aloji nacú. Uncá na i'imalá hue'epiri na huánica nucá Tupana i'irí. Nora'apá, ricaja calé hue'epiri naca nucá. Uncá caja na i'imalá hue'epiri na huánica Nora'apá. Nucá, Ri'irija calé hue'epiri naca ricá. Nucaja calé i'imari nuhuátacarenajlo riyucuna, nahue'epicaloje naca ricá penaje.

<sup>28</sup> Icó ihuátaca nacaje la'acana, ri'imacáloje palá Tupana nacú penaje. Laca'apheji ijlo ricá. Caja aya'ó rinacu. Ijló numá: Iyurí ichó nojló, nu'umacáloje iñaté a'ajeri penaje, ihuatána'acaloje laca'apheji liyá raú penaje.

<sup>29</sup> Ila'á nujhua'até nacaje nuhuacára'aca icá que. Jehuíña'o caja nupuráca'alo nacú nuliya. Uncá yurí calé nucá. Uncá caja nula'alá nocó hue'epiri que huani ijlo. Marí caje aú palá ipechu i'imajica.

<sup>30</sup> Nacaje nuhuátacare ila'acá nujhua'até, uncá laca'apheji calé ricá. Uncá caja aya'alajo rinacu.

## 12

*Jesús ja'apiyatéjona chira'aca huejapa trigo naquiyana huatána'acaje huacajé yucuna marí:*  
*(Mr 2.23-28; Lc 6.1-5)*

<sup>1</sup> Huatána'acaje huacajé Jesús ja'apari ají que iñe'epú chuhuá ra'apiyatéjona hua'até. Iñe'epú ja'apari ajopana mená e'iyohuá. Re'iyá cajrú trigo i'ímacá. Quehuí me'epeji i'ímacá ra'apiyatéjenajlo. Aú nachira'acó nacú najña'á huejapa trigo naquiyana. Natojro'ó nacápojo ricá, najñácaloje penaje.

<sup>2</sup> Fariséona naquiyana amaca aú nachira'aca trigo naquiyana nemá Jesusjlo:

—Piyacá'o. Chuhujá huatána'acaje huacajé. E'iyonaja ajona pa'apiyatéjona sapaño. Uncá nala'alá Moisesmi chu puráca'alomí quemacá que.

<sup>3</sup> E Jesús quemari najló:

—Icá hue'epiño méqueca Tupana puráca'alo lana'aquejami quemacá Davidmi chu nacú. Quehuí rijló me'epeji i'ímacá. Ñaqué caja me'epeji i'ímacá quehuí rijhua'até chira'acañojlo.

<sup>4</sup> A'acuhuaná namujlúca'a Tupana ñacaré chojé. Najña pan, Tupánajlo a'acanami ri'ímacá. Najña ricá, uncá nayurila ajopana ajña ricá. E'iyonaja najña ricá. Necaja calé, sacerdotena, ajñaño ricá.

<sup>5</sup> Ihue'epí caja méqueca Tupana puráca'alo, Moisesmi chu lana'acare, quemacá sacerdotena nacú. Rimá nanacu: “Uncá nahuatána'alaje huatána'acaje huacajé. Rihuacajé nala'á nasápaca'ala Tupana ñacaré chu. E'iyonaja calé uncá nala'alá pu'uhuaré raú”, que rimacá nanacu.

<sup>6</sup> Ñaquele numá ijlo: Re apú maare, Tupana ñacaré chaje ricá.

7 Marí que piño Tupana puráca'alo lana'acquéjami quemacá: “Icá a'año nojló pirajina nenócarena pu'uhuaré ila'acare chaya. Richaje huani ila'acá nuhuátacare caje, ina'uqué mu'ují hue'epícana aú”, que Tupana quemacá i'imacá. Uncá caja ihue'epila meque quemacánaca ricá. Ihue'epíquela meque quemacánaca ricá, uncá imalajla ajopana nacú majopeja: “Pu'uhuaré la'ajeño necá” que. Uncá la'alaño pu'uhuaré, necá nacú imá marí que.

8 Ina'uquéjloje penaje i'imacá nucá. Tupana quemari nunacu, numacáloje méqueca iná la'acá huatána'acaje huacajé penaje —que Jesús quemacá fariséona naquiyánajlo.

*Jesús lamá'ataca caja yáte'ela a'amitacó rijló yucuna marí:*  
(Mr 3.1-6; Lc 6.6-11)

9 E caja Jesús i'ijnari ají que a'ajná ño'ojó nahuacáca'alo ñacarelana chojé.

10 Re caja pajluhuaja ina'uqué i'imari najhua'até. Caja riyáte'ela a'amitaró rijló i'imacá. Re caja ajopana i'imaño. Nahuata Jesús nacú quemacana: “Pu'uhuaré la'ajeri ricá” que. Ñaquele nemá rijló:

—Chuhujá huatána'acaje huacajé. ¿E palani ca'ajná, uncá ca'ajná, riyáte'ela lamá'atacana chuhujá huatána'acaje huacajé? ¿Meque chí Tupana puráca'alo lana'acquéjami quemacá rinacu? —que nemacá Jesuslo.

11 Jesús quemari najló:

—Pajluhuaja ipirá ohueja i'imaquela, ja'arojla ulahuí juniphuni chojé huatána'acaje huacajé. Icó jácho'otajla ricá richiyá rihuacajé.

12 Ohueja chaje íqui'ica iná huátaca ina'uqué. Aú iná la'á palá necá huatána'acaje huacajé hua'ató —que rimacá najló.

13 E rimá yáte'ela a'amitarojlo:

—Piyá'atá nojló piyáte'ela.

Riya'ataca rijló ricá aú ja ripalá'ó. Palá riyurico raú, apojó pitari riyáte'ela que caja.

14 Marí que rila'acale ricá huatána'acaje huacajé, fariséona hue'epiño rinacu uncá ina'uquéleri que. E caja nácho'o nahuacáca'alo ñacarelana chiyá, napura'acóloje ajopana hua'até Jesús nócana nacú penaje.

*Nacaje Tupana puráca'alo ja'apátajerimi chu quemacá Jesús nacú júpimi que yucuna marí:*

15 Jesús hue'epiri napura'acó rinócana nacú. Aú calé ri'ijná reyá. Cajrú ina'uqué i'ijnáño rijhua'até. Natámina ritejmo'óta piyuque.

16 Rimá najló nemacá piyá ajopánajlo na huánica ri'imacá.

17 Tupana puráca'alo ja'apátajerimi chu, Isaíasmi chu, i'imari riyucuna jupejé i'imacá. Rimacá que rila'acá rehuá i'imacá. Ri'imá Jesús yucuna uncá chiyó riphá eja'ahuá nacojé. Marí que Tupana quemacá rinacu:

18 Nojló nacaje la'ajeri ricá.

Ajopana e'iyayá nu'uhuapá nujluhua ri'imacá.

Iqui'ija nuhuátacare ricá.

Pu'ují nupechu i'imacare nacú ricá.

Rijló no'ojé Nupechu.

Palá nula'acare ina'uqué nacú, ricá yucuna ri'imajé najló.

Ajopana jema'ajeño caja riyucuna, uncá judíona naquiyana calé necá.

19 Uncá raca'ácalajo ajopana hua'até.

Uncá caja rahuíyo'olaje ina'uquejlo.

Uncá mejrí calé ripuráca'alo i'imajica.

20 Ra'ajé chapú caje yajhué amájeño ñaté.

Ra'ajé caja ujhuí péchuruna ñaté.

Marí que rila'ajica, palá la'ajeño huacára'ajeri ri'imajica ejená.

Ejomi uncá pu'uhuaré la'acana i'imalaje.

Ejéchami palá ina'uqué i'imajica pajhua'atéchaca reyá a'ajná ño'ojó.

21 Piyuque ina'uqué eja'ahuá chu i'imajicaño pechu i'imajé caphí richojé, que Isaíasmi chu lana'acá riyucuna jupejé i'imacá.

*Nanaquiyana quemáño Jesús nacú: “Jiñá pechu hua'ateje ricá.” Riyucuna marí:*  
(Mr 3.20-30; Lc 11.14-23; 12.10)

22 Nahuá'a pajluhuaja ina'uqué Jesús ejo. Mejlurú huani ri'imacá. Uncá caja ripura'aló. Jiñá pechu i'imari caja re'iyá. Nahuá'a ricá Jesús ejo. E Jesús lamá'atari ricá. Ejéchami ripura'acó palá. Ramá caja reyá a'ajná ño'ojó.

23 Ramájeño pechu i'imá: “¡Meque piyuque huani rila'acá!” Nemá pajlocaca:

—¿Ricá chí quele jupichúnami quemacare nacú, huaícha majó ina'uqué i'imatájeri penaje?

24 Fariséona jema'año nemacá ilé que. Aú nemá najló:



—Beelzebú, jiñana huacára'ajeri pechu aú rica'á jiñana pechu ina'uqué e'iyayá.

<sup>25</sup> Jesús hue'epiri méqueca napechu i'ímacá rinacu. E rimá najló:

—Ajopana ina'uqué huacára'ajeri hua'atéjena nócaquelo pajhua'atéchaca, nacapichátajla pecohuácaca raú. Ñaque caja iná ejena nóquelo pajhua'atéchaca, nacapichátajla pecohuácaca raú.

<sup>26</sup> Ñaque caja ricá Satanás, Jiñá Chi'ináricanajlo. Jiñana pechu rijhua'atéjena. Rica'aquela necá ina'uqué e'iyayá, rila'ájla chapú ricó. Uncá meque rila'alajla rejomi, uncale rijhua'atéjena i'imalajla raú.

<sup>27</sup> Ica' calé quemano nunacu: “Beelzebú, jiñana huacára'ajeri pechu aú rica'á jiñana pechu ina'uqué e'iyayá”. Eta, ja'apiyatéjena ca'año caja jiñana pechu ina'uqué e'iyayá. ¿Ñaque caja chi'ímacá nanacu? Necá hue'epiño uncá paala ipechu.

<sup>28</sup> Nucá ca'arí jiñana pechu ina'uqué e'iyayá Tupana Pechu aú. Aú iná hue'epi' caja Tupana queño'ocá ina'uqué naquiyana huacára'ajeri i'ímacana.

<sup>29</sup> E Jesús i'mari yucu najló, nahue'epicaloje raú richá'ataca Jiñá Chi'ináricana penaje ri'imá najló yucu marí que:

—Uncá na calé mujlúca'ari catejmoni ina'uqué ñacaré chojé rinane ña'ajé riliyá. Apú richaje catejmuca ipháquela rinacu, ricá jepo'otárijla ricá. Quéchami rijña'atácajla rinane riliyá —que Jesús i'ímacá yucu najló.

<sup>30</sup> Rimá piño najló:

—Uncachu ina'uqué naquiyana huátalaño nucá, chapú napechu nunacu. Uncachu nala'alá ina'uqué palá nujhua'até, napajno'otá napechu Tupana liyá apojó.

<sup>31</sup> Tupana amaro ina'uqué chaje piyuqueja pu'uhuaré nala'acare liyá, namanaicho nala'acare liyá hua'ató. Pu'uhuaré nemacare nacú liyá hua'ató ramó nachaje. Eyá pu'uhuaré nemacare Tupana Pechu nacú, ricaja calé uncá ramalo nachaje riliyá.

<sup>32</sup> Ina'uquéjloje penaje i'ímacá nucá. Pu'uhuaré ina'uqué quemacare nunacu, Tupana amárojla nachaje, pu'uhuaré nemacare liyá. Eyá pu'uhuaré nemacare Tupana Pechu nacú, uncá Tupana amálajo nachaje riliyá. Ñaque ricá me'etení. Ñaque caja ri'imajica reyá a'ajná ño'ojó i'ímajícañojlo.

*Iná hue'epi ina'uqué nacojé mecajenaca necá nacaje nemacare nacú aú, nacaje nala'acare aú hua'ató. Riyucuna marí:*

(Lc 6.43-45)

<sup>33</sup> Palani inarí a'ahuaná arúca'ari palani richa. Pu'uhuarieni inarí a'ahuaná arúca'ari pu'uhuarieni caja richa. Richa aú iná hue'epi' a'ahuaná nacojé, palani ricá, pu'uhuarieni ca'ajná ricá. Ñaque caja ina'uqué.

<sup>34</sup> Pu'uhuaré péchuruna icá. Ñaque i'ímacale uncá meño'ojó imalá palá nacaje nacú. Iná pechu que caja iná quemacá nacaje nacú.

<sup>35</sup> Palá péchuri quemari palá nacaje nacú. Ripechu locópa'alaja rimá nacaje nacú palá. Eyá pu'uhuaré péchuri quemari pu'uhuaré nacaje nacú.

<sup>36</sup> Pa. Tupana quemájeri ina'uqué nacú mecajenaca necá. Rihucacajé rihuajáica pu'uhuaré pura'ajeño. Piyuqueja pu'uhuaré caje nemacare nacú chona rihuajaje necá.

<sup>37</sup> Iná puráca'alo aú Tupana quemájeri iná nacú mecajeca iná. Uncá pu'uhuaré pura'ajero calé iná i'ímajica ee, iná i'ímajó rihuajáica iná liyá. Pu'uhuaré pura'ajero iná i'ímajica ee, rihuajaje iná.

*Uncá ina'uquélaruna quemano Jesusjlo, rila'acáloje nacaje uncá meño'ojó ina'uqué la'alare penaje. Riyucuna marí:*

(Mr 8.12; Lc 11.29-32)

<sup>38</sup> E caja fariséona naquiyana, Tupana puráca'alo nacú jehuíña'atajeño naquiyana quele quemano marí que Jesusjlo:

—Pila'á huajló nacaje uncá meño'ojó ina'uqué la'alare, huahue'epichi picá raú.

<sup>39</sup> Jesús quemari najló:

—Uncá ina'uquélaruna, uncá huátalaño Tupana, cajena quemano nojló, nula'acáloje nacaje uncá meño'ojó iná la'alare penaje. Tupana la'arí Jonasmi chujlo nacaje júpimi i'ímacá. Tupana puráca'alo ja'apátajeri i'ímacá. Rila'acá rijló nacaje i'ímacá que caja rila'ajica piño nojló nacaje. Ricá aú ja calé ihue'epeje nucá. Uncá nula'alaje apú nacaje ijló, ihue'epichi nucá raú.

<sup>40</sup> Jiña cajruni ajmílo'ori Jonasmi chu i'ímacá. Rihuo' chu ri'imá hueji que cala quetana. Ñaque caja nu'umajica liri chu hueji que cala quetana. Ina'uquéjloje penaje i'ímacá nucá.

<sup>41</sup> Jonasmi chu i'mari Tupana yucuna Nínive e i'ímacáñomi chúnajlo i'ímacá. Aú napajno'otá napéchuhua pu'uhuaré nala'acare liyá Tupana ejo. Eyá maare nucá me'etení

ijhua'até. Jonasmi chu i'imacá chaje nucá, i'imari ijló Tupana yucuna. E'iyonaja unca ipa-jno'otala ipéchuha pu'uhuaré ila'acare liyá Tupana ejo raú. Rijimaje Nínive e i'imacáñomi chuna quemajeño inacu, Tupana huajácaloje icá penaje. Me'etení i'imacaño nacú nemaje rihuajáica ina'uqué huacajé.

<sup>42</sup> Júpimi apa'ahuelo i'imayo i'imacá. Cahuacajo te'ereruna i'imacánaru ru'umacá. Rucá i'ijnayo ya'ajnao Salomonmi chu chaje ripuráca'alo jema'ajé. Hue'epiri huani ri'imacale, ru'ujná rejo i'imacá. Eyá maare nucá me'etení ijhua'até. Salomonmi chu chaje hue'epica nucá. E'iyonaja unca a'alá inacojó nupuráca'alo. Rijimaje ne'emacánarumi cholo quemajeño inacu, Tupana huajácaloje icá penaje. Me'etení i'imacaño nacú rumaje rijló, rihuajáica ina'uqué huacajé.

*Jesús i'imari najló jiña pechu pa'acó yucuna, nahue'epícaloje raú ñaquejénaca necá, unca pachá nahuátala ricá. Marí que Jesús i'imacá najló yucu:*

(Lc 11.24-26)

<sup>43</sup> —Jiña pechu jácho'ocharo pajluhuaja ina'uqué e'iyayá. E ra'apicha te'erí macajreni nacuhá. Riculicha rijluhua pucunaji, rihuatána'acaloje richojé penaje. E'iyonaja unca riphátalacha ricá.

<sup>44</sup> E rimicha: “Nupa'ajícoja nuñacaremi ejo, ilé ina'uqué nócho'ocaro e'iyayá ejo. Aú ripi'ichó rapumí chuhá. Rimujlúqui'icha ina'uqué e'iyajé piño. Amíchari palani ri'imichaca. Lamá'ataquejami ri'imichaca rijló.

<sup>45</sup> Raú ri'ijichá piño ajopana jiñana pechu huá'aje. Iyamá cuhuá'ata quele rihuá'icha rijhuáque'ena penaje. Richaje chapújne'equenaca ne'emichaca. Necá piyuqueja mujlúqui'ichaño ilé ina'uqué e'iyajé, ne'emacáloje rihuacára'ajeño penaje. E caja penaje chapújne'equé huani ilé ina'uqué i'imichaca na'apiyá i'imacana aú. Júpimi ri'imacá chaje huani chapújne'equéca ri'imichaca na'apiyá —que Jesús i'imacá najló yucu. Ejomi rimá najló:

—Ñaque caja ri'imajica pu'uhuaré la'acáñojlo, me'etení i'imacáñojlo. Richaje ila'acá pu'uhuaré me'etení, uncale a'alá inacojó Tupana puráca'alo.

*Jesús jaló, rijmerémina, quele i'ijnacá Jesús amaje yucuna marí:*

(Mr 3.31-35; Lc 8.19-21)

<sup>46</sup> Pachu Jesús i'imari cajrú ina'uqué hua'até. Yucu ri'imá najló. E Jesús jaló, rijmerémina, quele iphaño rejo. Nahuata Jesús hua'até pura'acano. Huaca'apeja ne'emacá.

<sup>47</sup> E apú quemari Jesusjlo:

—Paló, pejena, quele iphíchaño. Huaca'apé necá. Nahuata pijhua'até pura'acano.

<sup>48</sup> Rimá rijló:

—¿Mecajena chi necá nojena, noló, quele?

<sup>49</sup> Aú riya'atá ra'apiyatéjena chaje.

—Mariruna nojló noló, nojena que i'imacaño.

<sup>50</sup> Nora'apá, je'echú chu i'imacare, huátaca que la'acaño, nojena que nojló necá. No'ohué que, no'ohueló que, noló que nojló necá.

## 13

*Nacaje icha ijí ejátajeri yucuna marí:*

(Mr 4.1-9; Lc 8.4-8)

<sup>1</sup> E caja Jesús jácho'oro pají chiyá. Ri'ijná ají que a'ajná ño'ojó Caésa turenaje. Re riyá'o.

<sup>2</sup> E cajrú ina'uqué jahuacaco rinacojé. Aú rihuituca'a jita chojé yá'ajo. Ajopana yuriño caesa turená, que'epé nacú.

<sup>3</sup> E caja rehuíña'ata necá cajrú nacaje nacú. Nacaje yucuna i'imacana nacú rehuíña'ata necá. E ri'imá najló yucu marí que:

—Pajluhuaja ina'uqué i'ijchari nacaje icha ijí ejátaje.

<sup>4</sup> Riqui'ichá richa ijí lamá'ataqueja te'erí jimahua. Rejátacana nacuja ri'ijichá. Richa ijí riqui'ichaje naquiyana ja'acharo iñe'epú chojé. E caja cupira'aphana iphíchaño rajmílo'otaje.

<sup>5</sup> Apú richa ijí riqui'ichaje naquiyana ja'acharo jipa nacojé. Huejápaja te'erí i'imichari rinacu. Quiñaja riphíchaca, huejapa te'erí i'imichácale rinacu.

<sup>6</sup> Camú moco'ochaca aú rimeríyi'icho, uncale ra'apare i'imalacha.

<sup>7</sup> Apú richa ijí riqui'ichaje naquiyana, ja'acharo pu'uhareni jimichi e'iyajé. Pu'uhareni jimichi iphíchari richa ijí rejáchijaje hua'até. Pu'uhareni jimichi tahuá'añachari ricá. Raú rihuajri'ichá re'iyajé.

<sup>8</sup> Eyá apú richa ijí naquiyana ja'acharo palani te'erí e'iyajé. Ilé iphíchari palá; ritahuá'icho palá; rarúqui'icha palá. Re'iyajé que apú richa ijí rejáchijaje arúqui'ichari richahuá cien

ca'alá. Re'iyajé que apú arúqui'ichari richahuá sesenta ca'alá. Re'iyajé que apú arúqui'ichari richahuá treinta ca'alá.

Marí que ri'imacá yucu najló. E rimá rema'ajéñojlo:

<sup>9</sup>—Icá que'ejhuirúnajlo numá: A'á inacajó riyucuna.

*Jesús quemari ne'iyajénajlo nájeca ri'imacá yucu ina'unquejlo. Riyucuna marí:*  
(Mr 4.10-12; Lc 8.9-10)

<sup>10</sup> Caja ri'imá najló yucu. Yámijo ra'apiyatéjena i'ijnaño Jesús ahua'ajé. Nemá rijló:

—¿Meca penaje pehuíña'ata ina'uqué nacaje nacú, nacaje yucuna i'imacana nacú?

<sup>11</sup> E Jesús quemari najló:

—Me'echuje ina'unquejlo méqueca Tupana la'acá, ina'uqué naquiyana i'imacáloje rihua'atéjena penaje. E'iyonaja Tupana la'arí ipechu palá, jema'acáloje penaje. Eyá ajopánajlo me'echuje jo'ó ricá.

<sup>12</sup> Quehuácaje puráca'aloji nanacajó a'ajeño hue'epéjeño richaje, richaje que rinacajé. Raú cajrú nahue'epíjica rinacajé. Uncá a'alaño nanacajó quehuácaje puráca'aloji, uncá hue'epílaño rinacajé. Ricá ñani nahue'epícare nacajé, capichájero naliyá.

<sup>13</sup> Nu'umá yucu najló, nohuíña'atacaloje necá Tupana nacú raú penaje. E'iyonaja uncá nahue'epila meque quemacánaca ricá riyucuna jema'acana aú. Uncá caja nahue'epila meque quemacánaca nacaje namácare aú.

<sup>14</sup> Tupana puráca'alo ja'apátajerimi chu. Isaíasmi chu i'imari riyucuna i'imacá. Caja queja najló ricá. Marí que rimacá nanacu i'imacá:

Jema'ajé riyucuna.

E'iyonaja uncá ihue'epíla meque quemacánaca ricá.

Icá amájeño nacaje.

E'iyonaja uncá ihue'epíla meque quemacánaca nacaje amácare.

<sup>15</sup> Marí que ri'imajica najló, nejnúcha'acole ra'apiyá jema'acana nacú.

Uncá riphálaje napechu nacajé palá.

Uncá caja nahue'epíla meque quemacánaca ricá.

Uncá caja nayuríla meque nachó, nulamá'atacaloje napechu penaje, que Tupana quemacá Isaíasmi chujlo i'imacá.

<sup>16</sup> Uncá ñaque calé ijlo ricá —que Jesús quemacá najló—. Palani ijlo ricá, yucu jema'acare iphácale ipechu nacajé. Icá hue'epíño meque quemacánaca nacaje amácare.

<sup>17</sup> Jema'á marí: Ñaquejlaca cajrú Tupana puráca'alo ja'apátajeño mi chuna, palá la'acaño quele, huátacajla nacaje amácana, amaca ricá me'etení que caja. E'iyonaja uncá meño'ojó namala ri'imacá rihuacajé. Ñaquejlaca nahuátacajla nupuráca'alo jema'acana, jema'acá ricá me'etení que caja. E'iyonaja uncá caja meño'ojó nema'alajla ñaque rihuacajé.

*Jesús quemari najló meque quemacánaca nacaje ijí ejátajeri yucuna.*  
(Mr 4.13-20; Lc 8.11-15)

<sup>18</sup> Jema'á, meque quemacánaca nacaje icha ijí ejátajeri yucuna.

<sup>19</sup> Tupana yucuna jema'ajeño naquiyana uncá hue'epílaño meque quemacánaca ricá. Nema'á riyucuna. E'iyonaja Satanás, Jiñá Chí'ináricana, ca'arí napechu naquiyá Tupana puráca'alo nema'acare. Richa ijí ja'acó iñe'epú chuhú que caja najló ricá.

<sup>20</sup> Eyá richa ijí naquiyana ja'aró jipa nacajé huejápaja te'erí i'imacare nacajé. Mequetánaja calé rijña'acá panacu riphaca ejomi. Ñaque caja ina'uqué naquiyánajlo ricá. Nema'á Tupana puráca'alo. Pu'ují napechu la'acó raú.

<sup>21</sup> Mequetánaja calé napechu i'imacá palá rinacu. Nahuátacale Tupana puráca'alo ja'apiyá i'imacana, ajopana ca'ajná la'año necá chapú. Napura'ó ca'ajná nanacu pu'uhuaré. Namá ca'ajná chapú caje yajhué. Marí caje aú nayurí naliyó ricá, uncale napechu i'imalá caphí najluhua.

<sup>22</sup> Eyá richa ijí naquiyana ja'aró caja pu'uhuarieni jimichi e'iyajé. Riphaca ejomi rihua'acá re'iyajé. Uncá rarúca'ala. Ñaque caja ina'uqué naquiyánajlo ricá. Nema'á Tupana puráca'alo. Naqueño'ó ra'apiyá i'imacana. E'iyonaja cajrú na'acá nanacajó nacaje marí eja'ahuá chu i'imacare. Napechu nacú ri'imá: "Palá hue'emajica cajrú liñeru hua'até, ñó'ope le'ejepelaji caje hua'até". E'iyonaja uncá ñaque calé ricá ina'unquejlo. Marí que péchuruna ne'emacale, uncá na'alá nanacajó Tupana puráca'alo, nala'acáloje palá ra'apiyá i'imacana aú penaje.

<sup>23</sup> Eyá richa ijí naquiyana ja'aró palani te'erí e'iyajé; riphá; ritahuá'o, rarúca'ala palá. Ñaque caja ina'uqué naquiyánajlo ricá. Nema'á Tupana puráca'alo; nahue'epí meque quemacánaca ricá; na'á nanacajó ricá. Raú nala'á palá ra'apiyá i'imacana aú. Richa ijí naquiyana arúca'ari richahuá cien ca'alá que, sesenta ca'alá que, treinta ca'alá que. Ñaque caja ricá Tupana

puráca'alo ja'apiyá i'imacáñojlo. Ne'iyajena la'año palá huani cajrú. Ra'apejé que ajopana la'acá palá —que Jesús jehuíña'ataca necá rinacu.

*Jesús i'imari najló jimichi, trigo, quele yucuna, nahue'epícaloje méqueca ina'uqué i'imacá eja'ahuá chu penaje. Ne'iyajena i'imaño palá la'acaño. Ne'iyajena i'imaño pu'uhuaré la'acaño. Marí caje penaje ri'imá riyucuna marí que najló:*

<sup>24</sup> —Ina'uqué naquiyana huacára'ajeri Tupana. Chuhua nu'umajica yucu ijlo, ihue'epícaloje rinacóje penaje. Apú ina'uqué i'ijchari trigo ejátaje ri'icacapere e'iyá. E caja riñapáchiya rejátacana.

<sup>25</sup> Lapi ricamáchiyo. Cháyomi apú i'ijchari ri'icacapere e'iyajé jimichi pu'uhuaré nojé ejátaje. Chapú péchuri rinacu ri'imíchaca. Rejáchiya ricá ejomi ripi'ichó.

<sup>26</sup> E caja trigo tahuá'icho ri'icacapere e'iyá. Ehuá rihuirulá li'ichaco, rarúca'acaloje richiyá penaje. E caja namicha cajrú jimichi re'iyá. Trigo ina que caja rina amácana.

<sup>27</sup> Marí que rijhua'até sápañeño amíchaca aú ne'eijchá riyucuna quejá'aje paminá liyá. Nemicha rijló: “Palani richa ijí pejátacare re'iyajé i'imacá. Eta, ¿méreyaca pu'uhuaereni jimichi iphala cajrú huani re'iyá”, que nemíchaca rijló.

<sup>28</sup> E paminá quemíchari najló: “Chapú péchuri ta nunacu ejátari re'iyohuá ricá.” E nemicha rijló: “¿E pihuátaca hue'ejnacá rero'otaje?”

<sup>29</sup> “Uncá” que rimíchaca najló. “Reja ri'imaláreja ñaqué. Apala jero'ó trigo naquiyana rijhua'ató.

<sup>30</sup> Reja ri'imareja,” que paminá quemacá najló rinacu. “Richá ña'acana iphájica rená chojé huacajé, nuhuacára'aje nujhua'até sápañeño pu'uhuaré nojé jimichi jero'otaje re'iyayá. Ejomi nepo'otaje ricá, nacára'atocaloje ricá penaje. Quéchami najña'ajé trigo icha, nalamá'atocaloje ricá riñacarelana chojé penaje,” que rimacá najló. Caja quetana riyucuna.

*Mostaza ijí yucuna marí:*

*(Mr 4.30-32; Lc 13.18-19)*

<sup>31</sup> Jesús i'imari piño najló yucu marí que:

—Ina'uqué naquiyana huacára'ajeri Tupana. Rijhua'atéjena huejápaja. Ehuá richaje, richaje que íqui'irunaca rijhua'atéjena i'imajica. Chuhua nu'umajica yucu ijlo, ihue'epícaloje méqueca ricá penaje. Mostaza ijí que ricá, ina'uqué ejátacare ne'ecacapere e'iyohuá.

<sup>32</sup> Capajé nojé huani rijí. E'iyonaja jíma'alami yenuna quetana ritahuá'aco. Ritahuá'aña apú nacaje icha ijí iná ejátacare. Ripana e'iyá cuphira'apana, camejérina cayuphéruna cajena la'año nañacaró.

*Jesús i'imari najló pan amúra'atajona yucuna, nahue'epícaloje raú méqueca ripuráca'alo moto'ojica ina'uqué e'iyohuá penaje.*

*(Lc 13.20-21)*

<sup>33</sup> Jesús i'imari piño najló apa'amá yucu marí que:

—Tupana i'imari ina'uqué naquiyana huacára'ajeri. Re rijhua'atéjena huejápaja. Ehuá richaje, richaje que íqui'irunaca ne'emajica. Chuhua nu'umajica apa'amá yucu, ihue'epícaloje rinacóje raú penaje. Inaana quechípa'año pan amúra'atajona harina hua'até. Raú harina anóro'otacanami piyuqueja amúra'ataro. Ñaqué caja Tupana yucuna jema'acó cajrú ina'uqué e'iyohuá, nema'acáloje ra'apiyá penaje, ne'emacáloje rijhua'atéjena raú penaje.

<sup>34</sup> Cajrú Jesús jehuíña'ataca necá nacaje nacú, yucu i'imacana aú. Yucu chuhuaaja rimacá najló nacaje nacú.

<sup>35</sup> Tupana puráca'alo ja'apátajerimi chu quemaqué rinacu que rehuíña'ataca ne'emacá. Marí que rilana'acá riyucuna papera chojé i'imacá:

Yucu chuhuaaja numaje najló nacaje nacú.

Nacaje me'echújeja i'imacare ina'uquejlo, ricá yucuna nu'umajé najló.

Me'echuje ri'imacá piyuque ina'uquejlo Tupana queño'ótaca eja'ahuá huacajé eyá maárejecha, que rimacá rinacu.

*Jesús quemari najló meque quemacánaca jimichi, trigo, quele yucuna marí:*

<sup>36</sup> E caja Jesús i'imari riyucuno ina'uquejlo. E rimujlúca'a pají chojé. E ra'apiyatéjena jahuacaño rahua'ajé. Nemá rijló:

—Pimá huajló meque quemacánaca jimichi, trigo quele yucuna pi'imichaje huajló.

<sup>37</sup> Jesús quemari najló:

—Ina'uquéjloje penaje i'imacá nucá. Palani nacaje icha ijí ejátajeri que caja nucá. Palani nupuráca'alo.

<sup>38</sup> Ri'icacapere que caja eja'ahuá. Trigo palani que caja Tupana ja'apiyá jema'ajeño. Pu'uhuaré jimichi que caja ina'uqué, Jíñá Ch'i'náricana hua'atéjena i'imacaño.

<sup>39</sup> Jíñá Chi'ináricana que caja chapú péchuri rinacu, ejátari pu'uhuarieni jimichi ri'icacapere e'iyajé. Eja'ahuá tajnájico huacajé que caja richa ña'acana iphaca rená chojé. Tupana hua'atéjena, je'echú chu i'imacaño, que caja richa ña'ajeño.

<sup>40</sup> Rimá najló: Richa ña'ajeño i'ijnáño pamineco pu'uhuarieni jimichi jahuacátaje, naca'acáloje ricá quera'atani chojé penaje. Ñaqué caja ri'imajica eja'ahuá tajnájico huacajé.

<sup>41-42</sup> Ina'uquéjloje penaje i'imacá nucá. Nucá huacára'ajeri nujhua'atéjena, je'echú chu i'imacaño, uncá ina'uquélaruna huá'aje. Pu'uhuaré la'acaño, namanaicho la'acaño, ñaqué la'acana aú namata ajopana, quele necá ne'ejnajé huá'aje. Nahuá'aje necá, naca'acáloje necá quera'atani chojé penaje. Re cajrú nahuíyo'ojica. Cajrú caja neyájica. Cajrú caja najma'ajica naí huá camachá, quehuini yajhué namájicale.

<sup>43</sup> Eyá Tupana huátaca que la'acaño, necá i'imajeño palá huani je'echú chu Nora'apá Tupana hua'até. Ica que'ejhuirúnajlo numá, jema'á numacare nacú —que Jesús quemacá najló.

*Nacaje cahuemí nojé apú iphátaca yucuna marí:*

<sup>44</sup> Jesús quemari piño najló marí que:

—Tupana ja'apiyá i'imacana palani huani inajlo. Cahuemí nojé huani nacaje ina'uqué huátacare najluhua que caja ricá. Apú ca'ajná iphátari apú i'icacapere e'iyá nacaje cahuemí nojé huani. Me'echú ri'imacá, sa'aquejami. Caja ramá ricá. E rapára'ata ricá rapumí chojé piño. Pu'ují huani ripechu i'imacá, riphátacale ricá. E ripa'ó riñacaré ejo. Ra'á ajopánajlo piyuqueja rinane. Ricá aú rácho'ota rijluhua liñeru, rihuarúhua'acaloje ri'icacapere paminá liyá raú penaje.

*Cahuemí nojé nacaje yucuna marí:*

<sup>45</sup> Jesús i'imari piño apa'amá yucu. Rimá najló:

—Tupana ja'apiyá i'imacana palani huani inajlo ricá. Nacaje íqui'i iná huátacare inajluhua que ricá inajlo. Apú ca'ajná, le'ejepelaji mináricana, i'ijnari palá nojé le'ejepelaji culácana nacú.

<sup>46</sup> E caja riphata ca'ajná nacaje rihuátacare, apú nacaje chaje rihuátaca ricá. Palá nojé, cahuemí nojé huani ricá. Raú ra'á piyuqueja rinane. Ricá huemí ra'á rijló liñeru, rihuarúhua'acaloje rijluhua ricá raú penaje.

*Nahuenare yucuna marí:*

<sup>47</sup> Ina'uqué naquiiana huacára'ajeri Tupana. Nahuenare naca'acare junápeje que caja ricá. Naca'á nahuenare junápeje. Raú que'iyapejena jíñana ja'año richojé.

<sup>48</sup> Cajrú na'acó nahuenare chojé. Ejéchami nachíra'aca ricá ají que juni turenajo, que'epé nacojé. Re nayá'o. Najña'á ne'iyayá palá nojena jíñana; naca'á nacuhú'alane chojé necá. Pu'uhuaréuna quehua nacupá ne'iyayá.

<sup>49</sup> Ñaqué caja ri'imajica ina'uquejlo eja'ahuá tajnájico huacajé. Tupana hua'atéjena, je'echú chiyájena, i'ijnajeño uncá ina'uquélaruna huá'aje. Pu'uhuaré la'ajeño, namanaicho la'ajeño, quele nahuá'aje ajopana ina'uqué e'iyayá, naca'acáloje necá quera'atani chojé penaje.

<sup>50</sup> Re cajrú nahuíyo'ojica. Cajrú neyájica. Cajrú najma'ajica naí hua, namájicale quehuini yajhué.

<sup>51</sup> E Jesús quemari najló:

—¿E ihue'epica meque quemacánaca numíchaje nacú ijló?

—A'a —que nemacá.

<sup>52</sup> E rimá najló:

—Tupana puráca'alo nacú jehuíña'atajeño a'acachu nanacójó nupuráca'alo, nahue'epí palá raú Tupana puráca'alo nacojé jupichumi, meyáleje hua'ató. Nacaje i'imacá paji minajlo que caja najló ricá. Re paji minajlo palá nojé nacaje jupichumi, huajé hua'até. Tupana puráca'alo nacú jehuíña'atajeño, no'opiyá jema'ajeño, hue'epiño jupichumi Tupana puráca'alo nacojé, meyáleje nacojé hua'até. Raú nahue'epí palá Tupana puráca'alo ja'apátacana ajopánajlo.

*Jesús i'ijnacá Nazaret ejo yucuna marí:*

(Mr 6.1-6; Lc 4.16-30)

<sup>53</sup> Marí que Jesús i'imacá yucu najló i'imacá. E caja ri'ijná reyá.

<sup>54</sup> Iphari rite'eré ejo. Re richape piño ríqueño'ó nehuíña'atacana Tupana nacú nahuacáca'alo ñacarelana chu. Ripuráca'alo jema'ajeño pechu i'imá: “¡Meque piyuque huani rihue'epílaca nacaje nacojé!” Nemá:

—¿Mere chi rehuíña'o piyuqueja puráca'aloji nacú? ¿Meque rihue'epica nacaje la'acana, uncá ina'uqué hue'epílare la'acana?

<sup>55</sup> Ilé mirapehua nacú sápjari i'irí ricá. María raló. Santiago, José, Simón, Judas, quele e'ehué ricá.

<sup>56</sup> Maare hue'iyá re'ehuelona ñacaré. Eta, ¿Meque rihue'epica piyuqueja puráca'aloji nacojé?

<sup>57</sup> Namána'apa ri'imacale, chapú nahuó i'imacá richá. Uncá na'alá nanacójó ripuráca'alo. E Jesús quemari najló:

—Piyuque ina'uqué iphaño Tupana puráca'alo ja'apátajeri ja'apí. Necaja calé rite'eré eruna, rejena, quele uncá iphálaño ra'apí.

<sup>58</sup> Uncá rila'alá cajrú nacaje rehuá, uncá meño'ojó iná la'alare. Uncá pachá napechu i'imalá caphí richojé.

## 14

*Méqueca nenoca Juan bautizar la'ajeri júpimi i'imacá yucuna marí:*

(Mr 6.14-29; Lc 9.7-9)

<sup>1</sup> Caja cajrú huani Jesús yucuna jema'acó rehuá i'imacá. Riyucuna iphari caja nahuacára'ajeri Herodes nacú. Galilea te'eré eruna i'imacana ri'imacá rihuacajé.

<sup>2</sup> E rimá rahua'á i'imacáñojlo marí que Jesús nacú:

—Juan bautizar la'ajeri ricá. Caja rimacápo'o. Penájemi ricá. Aú calé rihue'epí piyuque nacaje la'acana, uncá meño'ojó iná la'alare —que rimacá najló Jesús nacú.

<sup>3</sup> Ejo'ocaja Juanmi chu i'imacá huacajé Herodes huacára'ari rica'acana ina'uqué huajáquelana chojé i'imacá. Jepo'oqueja nayurí ricá richu. Marí que rila'acá ricá chapú riyajalo puráca'alo aú. Riyajalo í i'imari Herodías. Re'ehué, Felipe, yajalo ru'umacá pamineco.

<sup>4</sup> Rica'á riliyá rucá. Richona Juanmi chu aca'arí Herodes i'imacá. Rimá rijló:

—Pe'ehué yajalo penájerumi ilerú pi'imá hua'até. Uncá Tupana huátala iná la'acá ilé que —que rimacá rijló i'imacá.

<sup>5</sup> Rijimaje Herodes huátari rinócana. E'iyonaja riquero'ó ina'uqué piyá, palá napechu i'imacale Juan nacú. “Tupana puráca'alo ja'apátajeri ricá,” que napechu i'imacá rinacu.

<sup>6</sup> E caja Herodes iphátari rile'ejé jarechí. Aú caja rila'á fiesta. Cajrú riyucupéra'acarena ina'uqué iphaño rinacu. Aú rihuacára'a riyajalo itu arápa'aca najimaje piyuque. Aú rorápa'a rocó najimaje. Palá huani ri'imacá Herodes nacú.

<sup>7</sup> E rimá rojló:

—Piquejá'a nuliyá pihuátacare caje, no'ochí pijló ricá. Tupana hue'epiri quehuaca numacá.

<sup>8</sup> —Je —que rumacá.

E ru'ujná roló amaje pamineco.

—Marí que rimíchaca nojló. ¿Meque numájica rijló?

Aú rumá rojló:

—Eco pimá rijló, ra'acáloje pijló Juan bautizar la'ajeri huíla'aru pachiya chojé.

“Je” que.

E rupa'ó piño ropumí chuhúa rijló quemaje. Rumá rijló:

—Pa'á nojló Juan bautizar la'ajeri huíla'aru pachiya chojé.

<sup>9</sup> Aú camu'ují huani ripechu la'acó, Herodes pechu la'acó. E'iyonaja uncá meque rila'alá. Caja rimá rojló i'imacá: “No'ojé pijló pihuátacare caje. Tupana hue'epiri quehuaca numacá,” que rimacá rojló i'imacá. Ina'uqué, riyucupéra'acarena, jimaje que rimacá rojló. Ñaque i'imacale rihuacára'a na'acá rojló ri'imacá.

<sup>10</sup> Rihuacára'a ne'ejnacá ina'uqué huajáquelana chojé Juanmi chu núru'upi mata'ajé. Namata'á ricá.

<sup>11</sup> Quéchami nayá'ata rihuíla'arumi pachiya chojé. Ne'emata' rojló ricá. Ejomi ro'ó rolojlo ricá. Raú ruhue'epi caja nenóhaca ricá. Marí que nenoca Juanmi chu i'imacá.

<sup>12</sup> Nenoca ricá ejomí ra'apiyatéjenami i'ijnaño ina'uqué huajáquelana chojé ritami ña'ajé. Najña'á ritami. E nasa'á ricá. Ejomí ne'ejná riyucuna i'imajé Jesúslo.

*Jesús a'acá cinco mil ina'uejlo a'ajnejí yucuna marí:*

(Mr 6.30-44; Lc 9.10-17; Jn 6.1-14)

<sup>13</sup> Caja ne'emá Jesuslo riyucuna. E ri'ijná reyá ra'apiyatéjena hua'até. Necoja ne'ejnacá jita chuhúa a'ajná ño'ojó, ne'emacáloje necoja ajopana ina'uqué liyá penaje. E'iyonaja ajopana hue'epiño meño'ojoca ne'ejnacá. Cajrú pajimila i'imacá rehuá. Re i'imacáño i'ijnaño pe'iyoo'hua ají que ne'ejnacá ejo; iphaño natucumá.

<sup>14</sup> E caja narúca'o. E Jesús jácho'oro jita chiyá; amari cajrú huani ina'uqué. Rihue'epí namu'ují. Ritejmo'óta natámina nahuá'acarena rejo i'imacá.

<sup>15</sup> Natejmo'ótacana nacú najúhua'a. E ra'apiyatéjena i'ijnaño rahua'ajé; quemáño rijló:

—Caja huajúhui'ichaca. Uncá nañacaré i'imalá maárohua. Pihuacára'a necá pajimila ejo, nahuarúhua'acaloje a'ajnejí najluhua reyá penaje.

<sup>16</sup> E'iyonaja Jesús quemari najló:

—Uncá ne'ejnalaje. Ica a'ajeño najló a'ajnejí.

<sup>17</sup> Nemá rijló:

—Uncá a'ajnejí i'imalá maare, najñacaloje penaje. Pajluhua té'ela ca'alá pan maare, iyajmela jíñana hua'até. Queleja calé maare.

<sup>18</sup> Jesús quemari najló:

—Iji'ichá ricá majó.

—Je.

<sup>19</sup> E rihuacára'a ajopana yá'aco jimichi palani e'iyajé. Ejomi rijña'a'á ricápojo pajluhua té'ela ca'alá pan, iyajmela jíñana hua'até. E riyacá'o ají que je'echú chojé. Rimá Tupánajlo:

—Palá pili'ichaca huecá marí a'ajnejí aú.

E ritupa'á pan naquiyana. Riyupa'atá caja jíña naquiyana najló. Ejomi ra'á ra'apiyatéjenajlo ricá, natamáca'atocaloje ina'uquejlo ricá penaje.

<sup>20-21</sup> Piyuqueja necá ajñaño na'ajnehuá namano'ocá ejé. Cinco mil ca'ajná ne'emacá achiñana, ajñaño na'ajnehuá inaana, yuhuaná hua'até. Uncá nalapa'atala inaana, yuhuaná, quele. Najñaca na'ajnehuá ejomi ra'apiyatéjena huayo'oño rijlupemí yuricaró. Iyamá iphata ji'imaji nacojé ca'alá cuhuá'ala namano'otá pu'uteno raú.

*Jesús ja'apaca juni jimó yucuna marí:*

*(Mr 6.45-52; Jn 6.16-21)*

<sup>22</sup> E caja Jesús huacára'ari ra'apiyatéjena huitúca'aca jita chojé, nacuhuá'acaloje pa'anajo pitá ritucumá penaje. E caja rihuacára'a ina'uqué pa'acó.

<sup>23</sup> Caja napa'ó. E caja Jesús i'irari yenuri i'ihuátaje, ripura'acóloje Tupana hua'até penaje. Caja calajerúhuaca ne'emacá. Jesús i'imari ricoja.

<sup>24</sup> Ra'apiyatéjena i'imaño caesa pe'iyó leñacaje nacú. Carená ja'apari ají que najimajo caphí. Caja cajúru juni yoco'ocó. Riyocola ña'arí jita nacojé caphí.

<sup>25</sup> E caja ehujaja najme'tá. Luhuichipica ee Jesús i'ijnari nápumi chu. Juni jimó ra'apá.

<sup>26</sup> Ra'apiyatéjena amaca aú ricá hua'ichaca, cajúru naquero'ocó.

—¡Yee, ilé ina'uqué ñacami ta hua'icha! —que nahuíyo'oca.

<sup>27</sup> E Jesús quemari najló:

—Ipechu i'imá caphí. Iquero'oniyo, Jesús nucá —que rimacá najló.

<sup>28</sup> E Pedro quemari rijló:

—Picá pi'imajica ee, pihuacára'a no'opaca ñaque caja juni jimó pijimajo.

<sup>29</sup> —Majó pi'ijná —que rimacá rijló.

Aú Pedro jácho'oro jita chiyá juni jimaje. Riqueño'ó juni jimó ja'apácana ají que Jesús jimajo.

<sup>30</sup> Rimá: “¡Meque caphí huani ta carená!” Aú riquero'ó. Hua'ató que caja ra'acó junápeje. Eja rahuíyo'o:

—Pihue'epí numu'ují.

<sup>31</sup> Ejéchami Jesús patacá ricá ra'anapitá naquiyá. Rácho'ota junápiya ricá. Rimá rijló:

—¡Huejapa nochojé péchuri picá! ¿Naje piyuricha caphí nochojé i'amacana?

<sup>32</sup> E caja nahuitúca'aca jita chojé. Hua'ató que carená mata'acá.

<sup>33</sup> E jita chu i'imaño tára'año ne'erúpachi aú Jesús jimaje. Nemá rijló:

—Tupana i'irí jo'ó picá.

<sup>34</sup> Caja nacuhuá'a pa'anajo pitá, Genesaret te'eré ejo.

<sup>35</sup> Ina'uqué amaca aú Jesús na'apata riyucuna apú nacojé, apú nacojé que nate'eré ehua. Aú caja nahua'a cajúru natámina ri'imacá ejo.

<sup>36</sup> Natámina quemáño rijló, riyuricaloje nasápaca ra'arumacá ji'imá nacojé penaje. Piyuqueja rinacu sápageño tejmo'otaño raú.

## 15

*Na aú ca iná la'acá pu'uhuaré yucuna marí:*

*(Mr 7.1-23)*

<sup>1</sup> Ajopana iphaño Jesús nacú i'imacá. Fariséona, Tupana puráca'alo nacú jehuíña'atajeño, quele naquiyana ne'emacá. Jerusalén eyájena ne'emacá. Caja nephá rinacu; nemá rijló:

<sup>2</sup> —¿Naje uncá pa'apiyatéjena la'alaño peñahuilánami chuna quemajica que? Uncá nepala nayáte'ela chiyá najñaca na'ajnehuá piyá, peñahuilánami chuna la'ajica que caja.

<sup>3</sup> Jesús quemari najló:

—Eyá icá yuriño Tupana puráca'alo ja'apiyá i'amacana, ila'acáloje peñahuilánami chuna quemacá que penaje.

<sup>4</sup> Marí que Tupana quemacá: “Iphá ichi'iná ja'apí”. Pu'uhuaré pura'ajícaño nachi'iná nacú inoje”, que rimacá.

<sup>5</sup> Eyá me'etení maare nayani quemaño marí que nachi'inajlo: “Uncá meño'ojó no'olá ñaté liñeru aú. Caja no'ó Tupánajlo nuliñéroute”, que nemacá najló.

<sup>6</sup> Majopeja nemacá. Uncá nephala nachi'iná ja'apí raú. E'iyonaja uncá na calé imá najló. Caja majopéjari que ila'acá Tupana puráca'alo ijluhua, ila'acáloje peñahuilánami chuna puráca'alomi quemacá que penaje.

<sup>7</sup> Pajlácachina huani icá. Ica la'año icó palá la'ajeño que ina'uquejlo. E'iyonaja uncá ñaqueé calé icá. Palá huani Tupana puráca'alo ja'apátajerimi chu, Isaíasmi chu, i'imagá iyucuna júpimi i'imagá. Marí que rilana'acá patera chojé ri'imagá.

<sup>8</sup> Marí que Tupana quemacá ina'uqué nacú:

Mariruna ina'uqué pura'año palá nunacu nanuma chiyaja calé.

E'iyonaja nahuajhué nacú, uncá nahuátala nacú.

<sup>9</sup> Uncá na penaje calé nahuacano pajhua'atéchaca nahuacáca'alo ñacarelana chojé, nala'acáloje pu'ují napéchuhua nunacu penaje.

Peñahuilánami chuna puráca'alomi nacuja calé nehuiña'ata ina'uqué.

Tupana puráca'alo que japi ricá nehuiña'ata necá rinacu, que Tupana quemacá i'imagá.

<sup>10</sup> E Jesús quemari piño ina'uquejlo, ne'ejnacáloje rahua'ajé penaje. E rimá najló:

—Chuhua jema'a marí meque quemacánaca ricá:

<sup>11</sup> Iná numá chojé iná a'a' ajnejí, iná ajñácaloje ricá penaje. Uncá iná la'alá pu'uhuaré raú. Eyá iná numá chiyá iná pura'ó pu'uhuaré. Raú calé iná la'alá pu'uhuaré —que rimacá najló.

<sup>12</sup> E Jesús ja'apiyatéjena i'ijnáño Jesús ahua'ajé. Nemá rijló:

—Ilé pimíchaje nacú jimaje fariséona yúchi'ichaño pichá. ¿E pihue'epica ricá?

<sup>13</sup> Rimá najló:

—Nora'apá, je'echú chu i'imagare, capichátajeri piyuque ina'uqué uncá i'malaño rile'ejena.

<sup>14</sup> Reja ne'emareja ñaqueja. Caja uncá nahue'epila Tupana nacojé. Ñaquejena jehuiña'atajeño necá. Mejluruna que necá. Pajluhuaja mejlurú pacóro'otacachu apú mejlurú, pajñacani na'acó ulahuí chojé rijhua'até.

<sup>15</sup> E Pedro quemari rijló:

—¿Meque quemacánaca chi a'ajnejí ajñacana pimíchaje nacú?

<sup>16</sup> Jesús quemari rijló:

—¿Uncá caja chi pihue'epila?

<sup>17</sup> Iná a'a' iná numá chojé a'ajnejí, iná ajñácaloje penaje. Rihuitúca'a iná julá chojé. Caja penaje ra'apá iná e'iyayá.

<sup>18</sup> Eyá iná numá chiyá iná quemá naca je nacú, iná pechu nacú ri'imagá que. Pu'uhuaré péchuruna ina'uqué.

<sup>19</sup> Aú calé nala'a pu'uhuaré napechu locópa'alaja. Pu'uhuaré péchuruna ne'emacale, ina'uqué i'ijnatá napéchuhua pu'uhuareni nacú. Pu'uhuaré péchuruna ne'emacale, nenó ina'uqué. Pu'uhuaré péchuruna ne'emacale, achiñana, inaana quele la'año namanaicho pajhua'atéchaca. Pu'uhuaré péchuruna ne'emacale, nata'á ajopana liyá nanane. Pu'uhuaré péchuruna ne'emacale, majopeja napajlaca, nachapújra'aco ajopana nacú.

<sup>20</sup> Marí que la'acana aú ina'uqué la'año pu'uhuaré, namanaicho hua'até. Uncá iná la'alá pu'uhuaré, uncachu iná a'alá iná nacojé peñahuilánami chuna puráca'alo. Uncachu iná ipala iná yáte'ela chiyá, nemacá que, iná ajñaca iná a'ajnehuá piyá, uncá iná la'alá pu'uhuaré raú —que Jesús jehuiña'ataca necá.

*Ajopana te'eré eyájeru pechu i'imagá caphí Jesús chojé yucuna marí:*

(Mr 7.24-30)

<sup>21</sup> E caja Jesús i'ijnari reyá ají que Tiro, Sidón, quele te'eré ejo.

<sup>22</sup> Re pajluhuájaru i'imayo. Canaan te'eré eyájeru ru'umacá. Ru'ujná Jesús amaje, iphayo rahua'ajé. Jahuíyo'oqeja rumacá rijló:

—Hue'emacana, Tupana huacára'acare majó ina'uqué i'imatájeri penaje picá. Pihue'epí numu'ují. Jiñá pechu nutu e'iyá. Chapú caje yajhué romaca raú —que rumacá rijló.

<sup>23</sup> Uncá Jesús ja'ajipalá rojló. E ra'apiyatéjena i'ijnáño rahua'ajé. Nemá rijló:

—Pihuacára'a rupa'acó. Huápumi chu ro'opaca, cajú huani rohuíyo'oca.

<sup>24</sup> E Jesús quemari rojló:

—Tupana huacára'ari nucá majó Israelmi chu laquénami ñaté a'ajé. Capichájeño necá Tupana liyá. Necaja calé ñaté a'ajeri nucá —que rimacá rojló.

<sup>25</sup> E'iyonaja ru'ujná rijimaje. Rutára'o rijimaje ru'urúpachi aú. Rumá rijló:

—Hue'emacana, pa'a'á nuñaté.



<sup>26</sup> Rimá rojló:

—Uncá paala pan ña'acana Israelmi chu laquénami liyá, iná a'acáloje ricá ajopana te'eré eyájenajlo, yáhuinajlo penaje. (“Yáhuina” que judíona quemaqueño ajopana te'eré eyájena nacú.)

<sup>27</sup> —Que jo'ó, Hue'emacana —que rumacá rijló—, yáhuina ajñaño caja pan mujrumi te'erí e'iyajé ja'acó.

<sup>28</sup> Raú Jesús quemari rojló:

—¡Meque caphí huani pipechu nochojé! Pihuátaca queja ri'imajica pijló.

Marí que rimacá rojló a'apona que Jiña pechu jácho'oco rutu e'iyayá. Raú richuhuaja rutejmo'otaco.

*Jesús tejmo'ótaca cajrú natámina yucuna marí:*

<sup>29</sup> E caja Jesús i'ijnari reyá. Ra'apá ají que caesa turenó. Galilea caesa íi. E rácho'o yenuri i'ihuata nacú. Re riyá'ó.

<sup>30</sup> Yenuri i'ihuata nacú riyá'aco ejé cajrú ina'uqué iphaca rinacu. Nahuá'a najhua'ató cajrú natámina. Uncá meño'ojó ne'iyajena ja'apálaño palá. Mejluruna ajopana i'amacá. Ajopana piño uncá pura'alaño. Ajopana piño i'imaño apicháca'alona. Que'iyapejé nayaripune i'amacá najló. Marí que yaripune i'imañaño nahuá'a Jesús chaje. Nato'otaque necá ri'imá nacojé, ritejmo'ótacaloje necá penaje. Ritejmo'óta piyuqueja necá que'iyapejé nayaripune liyá.

<sup>31</sup> Uncá pura'alaño penájenami pura'año palá. Apicháca'alona i'imañaño penájenami pala'año palá. Uncá ja'apálaño palá penájenami ja'apaño caja palá. Mejluruna penájenami amaño caja palá. Marí cajé aú napechu i'imá: “¡Meque piyuque huani la'acá ricá!” Palá napura'acó Tupana nacú raú. Tupana, Israelmi chu pechu i'imagare chojé caphí, nacú napura'ó palá.

*Jesús a'acá cuatro mil ina'uquejlo a'ajnejí yucuna marí:*

(Mr 8.1-10)

<sup>32</sup> E caja Jesús huá'ari ra'apiyatéjenajlo, ne'ejnacáloje richaje penaje. Rimá najló:

—Nuhue'epí mariruna ina'uqué mu'ují. Caja hueji que cálichá nujhua'até necá. Caja na'ajné tajícharo. E'iyonaja uncá numalaje najló, napa'acóloje penaje. Apala uncá natejmú i'imalá, napa'acóloje me'epeji hua'até penaje.

<sup>33</sup> E ra'apiyatéjena quemaño rijló:

—Eta, ¿mere eyá chí huajña'ájla najló a'ajnejí? Iqui'iruna huani necá. Uncá nañacaré i'imalá maárohua.

<sup>34</sup> Rimá najló.

—¿Me ca'alá pan maare?

—Iyamá cuhuá'ata ca'alá, huejápaja jiñana le'epé hua'até —que nemacá rijló.

<sup>35</sup> E rihuacára'a nayá'aco te'erí e'iyajé.

<sup>36</sup> Quéchami rijña'acá ricápojo iyamá cuhuá'ata ca'alá pan, jiña hua'até. E rimá Tupánajlo:

—Palá pili'ichaca huecá marí a'ajnejí aú.

Quéchami ritupa'ataca pan naquiyana najló. Ra'á ra'apiyatéjenajlo ricá, natamáca'atacaloje ina'uquejlo penaje.

<sup>37-38</sup> Piyuqueja necá ajñaño rinaquiyana namano'ocá ejé. Cuatro mil achiñana ajñaño na'ajnehuá inaana, yuhuaná quele hua'até. Achiñánaja calé nalapa'atá i'amacá. Uncá nalapa'atala inaana, yuhuaná, quele. Piyuque necá ajñaño na'ajnehuá re. Quéchami nahuacata rijlupemí. Iyamá cuhuá'ata ca'alá cuhuá'ala namano'otá pu'uteno huánija rijlupemí aú.

<sup>39</sup> Nañapátaca na'ajnehuá ajñacana ejomi Jesús quemari najló napa'acóloje penaje. E rihuítuca'a jita chojé. Ne'ejná ají que Magadán te'eré ejo.

## 16

*Jesús aca'acá fariséona naquiyana, Tupana puráca'alo nacú jehuña'atajeño naquiyana, quele yucuna marí:*

(Mr 8.11-13; Lc 12.54-56)

<sup>1</sup> Fariséona naquiyana, Saducéona naquiyana, quele necá i'ijñaño Jesús amaje. Nephá rinacu. Nahuata Jesús nacú quemacana: “Uncá Tupana huacára'acare calé ricá.” Aú naculácató rinacu. Nemá rijló, rila'acáloje najló nacaje, Tupánaja calé hue'epicare la'acana.

<sup>2</sup> E rimá najló:

—Amácachu querani je'echú jimá lainchu, imá: “Puji'iní ri'imajica muni” que.

<sup>3</sup> Amácachu lapiyamí querani je'echú jimá juni suhuáca'ala hua'até cajrú, imá: “Uncá paala ri'imajica me'etení” que. Ica hue'epiño meque ri'imajica maárohua je'echú jimá

amácana aú. Eta, nacaje nula'acare e'iyohuá amácana aú uncá ihue'epila meque quemacánaca ricá.

<sup>4</sup> Pu'uhuaré la'acaño icá. Uncá huátalaño Tupana icá, quemañño nojló nula'acáloje nacaje, uncá meño'ojó ina'uqué la'alare penaje. Marí aú ja ihue'epeje nucá. Jonasmi chujlo Tupana la'arí nacaje i'ímacá. Rijló ri'ímacá que caja ri'ímajica piño nojló —que rimacá najló.

Raú ra'apaña necá.

*Jesús quemari ra'apiyatéjenajlo na'acá piyá nanacajó fariséona, saducéona, quele puráca'alo. Riyucuna marí:*

(Mr 8.14-21)

<sup>5</sup> Caja nacuhuá'a caesa pa'anajo pitá. Nephaca penaje ra'apiyatéjena hue'epiño uncá najña'alá pan najhua'ató.

<sup>6</sup> E caja Jesús quemari najló:

—Pa. Amá icó fariséona, saducéona, quele le'ejé pan amúra'atajona liyá.

<sup>7</sup> Raú ra'apiyatéjena quemañño pajlocaca necámica que:

—Marí que rimíchaca huajló, uncá pachá huajña'alacha pan.

<sup>8</sup> Jesús hue'epiri meque napechu i'ímacá. E rimá najló:

—¿Naje imá: “Uncá pan i'imalá huacapi”? ¡Meque huejápaja huani ipechu i'ímacá nochojé caphí!

<sup>9</sup> Uncá jo'ó ihue'epila mecajeca nucá. ¿Uncá chi ihue'epila meque itamáca'ataca pajluhua té'ela ca'alá pan i'ímacá, riphácaloje cinco mil ina'uqué nacajé penaje? ¿Me ca'alá cuhuá'ala imano'otá rijlupemí aú?

<sup>10</sup> ¿Uncá caja chi ihue'epila meque itamáca'ataca iyamá cuhuá'ata ca'alá pan i'ímacá, riphácaloje cuatro mil ina'uqué nacajé penaje? ¿Me ca'alá cuhuá'ala imano'otá rijlupemí aú?

<sup>11</sup> Numíchaca ijló i'imichaca: Pa. Amá icó fariséona, saducéona, quele le'ejé pan amúra'atajona liyá. Uncá nupura'aló pan nacú ilé que quemacana aú. ¿Naje uncá ihue'epilacha ricá? —que rimacá najló.

<sup>12</sup> Marí que rimacá najló aú nahue'epí uncá rimalá najló, namácaloje necó nale'ejé pan amúra'atajona liyá penaje. E'iyonaja rimá najló na'acá piyá nanacajó napuráca'alo, jema'acaro cajrú ina'uqué e'iyohuá.

*Pedro hue'epica naca ina'uqué Jesús i'ímacá yucuna marí:*

(Mr 8.27-30; Lc 9.18-21)

<sup>13</sup> E caja nephá Cesarea Filipo te'eré nacajé. E Jesús quemari ra'apiyatéjenajlo:

—Ina'uquéloje penaje i'ímacá nucá. ¿Meque ajopana ina'uqué quemacá nunacu?

<sup>14</sup> Nemá rijló:

—Ne'iyajena quemañño pinacu: “Juan bautizar la'ajeri ricá” que. Ajopana piño quemañño pinacu: “Elías ricá”. Ajopana piño quemañño: “Jeremías ca'ajná ricá”. Ajopana piño quemañño: “Apú Tupana puráca'alo ja'apátajeñomi chuna naquiyánami ca'ajná ricá”.

<sup>15</sup> Eyá Jesús quemari najló:

—Eta icá ta, ¿Meque imacá nunacu?

<sup>16</sup> Simón Pedro quemari rijló:

—Picá Tupana huacára'acare majó ina'uqué i'imatájeri penaje. Re Tupana. Uncá majopeja calé riyucuna. Re ricá, Ri'irí picá —que rimacá rijló.

<sup>17</sup> —Pedro, Jonás i'irí picá. Palá pihue'epica nucá —que Jesús quemacá—. Uncá ina'uqué liyá calé pihue'epí ricá. Nora'apá, je'echú chu i'ímacare, liyá pihue'epí ricá.

<sup>18</sup> Picá Pedro. Jipa quemacana pií. No'opiyá jema'ajeño i'ímajeño picá que caja caphí nochojé. Uncá taca'acaje chá'atalaje no'opiyá jema'ajeño. Matajnaco ne'emajica je'echú chu nujhua'até.

<sup>19</sup> Je'echú chu i'ímacaño huacára'ajeri Tupana. No'ojé pijló rinumaná me'etájona. Nacaje pep'o'ocare marí eja'ahuá chu i'ímajeri caja jepo'o'queja je'echú chu. Nacaje picaraca'acare marí eja'ahuá chu, i'ímajeri caja caráca'aqueja je'echú chu —que rimacá Pédrojlo.

<sup>20</sup> Ejomi rihuacára'a ne'emacá piyá ajopánajlo riyucuna. Uncá rihuátala nemacá ajopánajlo Tupana huacára'aca ricá ina'uqué i'imatájeri penaje.

*Jesús i'ímacá ritaca'ajica yucuna najló yucuna marí:*

(Mr 8.31-9.1; Lc 9.22-27)

<sup>21</sup> Ricá pumí chiyó Jesús quemari ra'apiyatéjenajlo meque nala'ajica ricá chapú. Rimá najló:

—Tupana huacára'ari nucá Jerusalén ejo. Re peñahuilana, sacerdotena, Tupana puráca'alo nacú jehuíña'atajeño, quele la'ajeño nucá chapú. Nenoje nucá. E'iyonaja hueji que cala i'ímajemí numacápo'oyo piño —que rimacá najló.

<sup>22</sup> E Pedro huá'ari Jesús apojó quemachi. Raca'á ricá, rimá rijló:

—Eco Tupana hue'epí pimu'ují. ¡Uncá huani nala'alaje ilé que picá!

<sup>23</sup> Raú Jesús pajno'oró riyámajo. E rimá Pédrojlo:

—¡Pa'apá nuliya, Satanás! Nunacu cahuíla'ajeri picá. Uncá Tupana pechu que calé pipechu. Ina'uqué pechu que caja pipechu.

<sup>24</sup> Ejomi rimá piño piyuque ra'apiyatéjenajlo:

—Marí que ricá ijlo, huátáño nujhua'atéjona i'ímacana: Nenoje ca'ajná icá, nujhua'atéjona i'ímacale jimaje. Ihue'epíniya inacuhúa. Jácho'oniyo caja nujhua'atéjona i'ímacana chiyá rijimaje.

<sup>25</sup> Ina'uqué naquiya hue'epiño caí nanacuhúa. Uncá nahuátala ajopana la'acá necá chapú. Ñaquele uncá ne'emalá nujhua'atéjona. Marí que i'ímacaño capichájeño Tupana liyá. Eyá uncá hue'epíalo caí nanacuhúa, ne'emacáloje nujhua'atéjona penaje, i'ímajeño matajnaco je'echú chu.

<sup>26</sup> Uncá na penaje calé inajlo, iná ña'aquele inajluhua piyuque nacaje marí eja'ahuá chu i'ímacare, iná capichácojla Tupana liyá rilanaquiya. Iná capichácochu Tupana liyá, uncá meño'ojó iná a'alá nacaje marí eja'ahuá chu i'ímacá, iná capichaco piyá Tupana liyá.

<sup>27</sup> Ina'uquéjloje penaje i'ímacá nucá. Eja'ahuá tajnájico huacajé, nucá huaícha piño majó Nora'apá hua'atéjona, je'echú chu i'ímacaño hua'até. Cajrú mejáma'atani huanacu que nuphájica majó. Rihuacajé no'ojé piyuqueja ina'uquejlo nacaje nala'acare huemí.

<sup>28</sup> Pa. Re e'iyajena maare, uncá chiyó itaca'á, icá amájeño nucá ina'uqué naquiya huacára'ajeri. Ina'uquéjloje penaje i'ímacá nucá —que rimacá najló.

## 17

*Jesús napona apiyácaco najimaje yucuna marí:*

*(Mr 9.2-13; Lc 9.28-36)*

<sup>1</sup> Marí que rimacá najló i'ímacá. E caja pajluhua cuhuá'ata que cala ejomi Jesús jácho'oro ipuré i'ihuátaje. Rihuá'a rijhua'ató Pedro, Santiago, re'ehué Juan, queleja rihuá'a rijhua'ató. Nephá rejo.

<sup>2</sup> Ejéchami Jesús jimá apiyácaco najimaje. Mejáma'atani, camú camaré que rijimá amaco. Jareni huani, mejáma'atani que huani ra'arumacá amaco rinacojé.

<sup>3</sup> Rijhua'até namá Moisesmi chu, Elíasmi chu, quele. Najhua'até ripura'ó.

<sup>4</sup> Raú Pedro quemari Jesusjlo:

—Hue'emacana, ¡meque palá huani huecá maare! Pihuátajica ee, huala'ajé hueji quele ca'apejé maare. Pajluhuala huala'ajé pijló, apalá Moisesjlo, apalá Elíasjlo.

<sup>5</sup> Marí que Pedro quemacá. Hua'ató que caja juni suhuáca'ala jareni itaca nachá. Re'iyayá Tupana quemari najló:

—Marí Nu'urí, ¡quí'ija nuhuátacare. Palá huani nupechu rinacu. Jema'a ra'apiyá —que rimacá najló.

<sup>6</sup> Marí que rimacá aú ra'apiyatéjona láma'año pajima'aló te'erí e'iyajé. Cajrú huani naquero'ocó.

<sup>7</sup> E Jesús i'ijnari nahua'ajé. Rituja'á necá huejápaja riyáte'ela aú.

—Jácho'o, ¡quero'oniyo —que rimacá najló.

<sup>8</sup> E nácho'o. Nayacá'o, uncá na namala. Ricaja calé, Jesús, namá.

<sup>9</sup> E caja nahuitúca'a ipuré naquiya. E Jesús quemari najló:

—Pa. I'imaníya huajé amíchaje yucuna ajopánajlo. Numacápo'ojico ejomi i'ímajé riyucuna ajopánajlo. Ina'uquéjloje penaje i'ímacá nucá.

<sup>10</sup> E ra'apiyatéjona quemáño rijló:

—Tupana puráca'alo nacú jehuíña'atajeño quemáño Elíasmi chu nacú: “Ricá huaícha majó pamíneo. Ricá Tupana huacára'ajicare majó ina'uqué i'imatájeri penaje tucumá riphaje”, que nemacá rinacu. ¿Naje chi nemá ilé que?

<sup>11</sup> Rimá najló:

—Que jo'ó ri'ímacá. Ripa'atácaloje piyuque nacaje rapumí chojé penaje riphá majó i'ímacá.

<sup>12</sup> Jema'a marí: Caja Elías iphari majó nutucumá i'ímacá. E'iyonaja uncá nahue'epila ricá ri'ímacá. Napechu queja nala'acá ricá chapú i'ímacá. Nucá piño nala'ajica chapú. Nucá, i'ímacá ina'uquéjloje penaje, ña'ajeri chapú caje yajhué panacu —que rimacá najló.

<sup>13</sup> Marí que rimacá aú ra'apiyatéjona hue'epiño rimacá Juan bautizar la'ajérimi chu nacú i'ímacá: “Caja Elías iphari majó i'ímacá,” que rimacá Juan bautizar la'ajérimi chu nacú i'ímacá.

*Taca'atácajo nacú pajluhuaaja hualijímaca i'imari ritami. Jesús ca'acá jiñá pechu re'iyayá yucuna marí:*

(Mr 9.14-29; Lc 9.37-43)

<sup>14</sup> E caja nephá ina'uqué nacojé. E pajluhuaaja nanaquiyana i'ijnari Jesús jimajo. Ritára'o ri'irúpachi aú rijimaje; rimá rijló:

<sup>15</sup> —Pihue'epí nu'urí mu'ují. Apú eyá, apú eyá que ritaca'ataco. Chapú caje yajhué huani ramaca raú. Apú eyá que ra'acó siyá chojé; apú eyá que ra'acó junápeje ca'ajná.

<sup>16</sup> Majó nuhuá'icha ricá pa'apiyatéjena chaje, natejmo'ótacaloje ricá penaje. Uncá meque nala'alacha ricá —que rimacá rijló.

<sup>17</sup> E Jesús quemari ra'apiyatéjenajlo:

—¡Meque uncá huani ipechu i'imalá Tupana chojé caphí! Pu'uhuaré la'acaño icá. ¿Me quetana júpica nuñña'ajica icá panacu? Ihuá'icha ricá majó —que rimacá najló.

<sup>18</sup> E nahuá'a ricá rijimajo. E Jesús aca'arí jiñá pechu re'iyá i'imacare. Raú rica'á ricá re'iyayá. Aú caja ritejmo'otó. Peyajhueni ri'imacá reyá a'ajná ño'ojó.

<sup>19</sup> Quéchami ra'apiyatéjena pura'año Jesús hua'até necámica que. Nemá rijló:

—¿Naje uncá meño'ojó huaca'alacha re'iyayá jiñá pechu?

<sup>20</sup> Rimá najló:

—Huejápaja ipechu i'imacale caphí Tupana chojé, uncá ica'alacha re'iyayá ricá. Jema'á mari: Camu'ujuni mostaza ijí. Naqué caja huejápaja ipechu i'imaquela Tupana chojé caphí, imajla marí que ipurejlo: “Patató a'ajná ño'ojó” que. Raú ratatojla a'ajná ño'ojó. Ipechu i'imajica ee caphí Tupana chojé, ila'ajé piyuqueja nacaje ñaqueé caja.

<sup>21</sup> Iná ca'acá ilé caje jiñá pechu ina'uqué e'iyayá yámona, iná pura'ó Tupana hua'até, iná i'itáó caja iná a'ajné liyá —que rimacá najló.

*Jesús i'imacá ritaca'ajica yucuna najló.*

(Mr 9.30-32; Lc 9.43-45)

<sup>22</sup> E caja Jesús ja'apiyatéjena jahuacaño rijhua'até Galilea te'eré e. Jesús quemari najló:

—Ina'uquéjloje penaje i'imacá nucá.

<sup>23</sup> Na'ajé nupinánajlo nucá, nenócaloje nucá penaje. Nenoje nucá. E'iyonaja hueji que cala i'imajemi numacápo'oyo piño nopumi chuhúa.

Marí que rimacá najló aú camu'ují huani napechu la'acó.

*Jesús a'acá liñeru Tupana ñacaré chojé penaje yucuna marí:*

<sup>24</sup> E caja Jesús iphari rijhua'atéjena hua'até Capernaum ejo. Re ajopana i'ijnaño Pedro chaje. Liñeru naquejá'a ina'uqué liyá Tupana ñacaré chojé penaje. E caja nephá Pedro nacú. Nemá rijló:

—¿Uncá chi jehuíña'atajeri a'alá liñeru Tupana ñacaré chojé penaje?

<sup>25</sup> —A'a, ra'á ricá —que Pedro quemacá.

E rimujlúca'a pají chojé. E Jesús quemari rijló:

—Pedro, ¿Meque pipechu marí nacú? ¿Na liyá chi nahuacára'ajeño, marí eja'ahuá chu i'imacáño, huacára'año liñeru ña'acana? ¿E nahuacára'aca rijña'acana najhua'atéjena liyá ca'ajná, ajopana te'eré eruna liyá ca'ajná?

<sup>26</sup> Pedro quemari rijló:

—Ajopana te'eré eyájena liyá najña'á ricá.

Jesús quemari rijló:

—Que jo'ó ricá. Uncá najhua'atéjena calé a'año najló liñeru.

<sup>27</sup> Uncá naje calé no'ó najló liñeru, Tupana hua'ateje nu'umacale. E'iyonaja calé no'ojé najló liñeru, napechu i'imacá piyá chapú nunacu. Naquele pi'ijná caesa ejo. Piqu'ichá ana'ajori junápeje. Chíra'ajeri pamineco, pijña'á ricá. Rinuma chu piphátaje liñeru. Naquejá'acare nuliya, piliya hua'até huemí locópa'ala ri'imajé. Quéchami pi'ijnajica najló ra'ajé.

—Je —que rimacá rijló.

## 18

*Nachá'atajeri yucuna marí:*

(Mr 9.33-37; Lc 9.46-48)

<sup>1</sup> Quéchami Jesús ja'apiyatéjena i'ijnaño Jesús ahua'ajé. Nemá rijló:

—¿Na chá'atari pijhua'atéjena e'iyayá nacaje la'acana aú.

<sup>2</sup> E Jesús huá'ari pajluhuaaja yuhuaajjlo. Rimá rijló:

—Majó pi'ijná.

E riphá nanacu. E rihuá'a ricá ne'iyá pe'iyoyá.

<sup>3</sup> E rimá ra'apiyatéjenajlo:

—Jema'a marí. Uncá yuhuaná la'alaño necó chá'atajeño que. Uncaja que ipajno'otá ipéchu hua chá'atacaje liyá, uncá i'imalaje nujhua'atéjéna.

<sup>4</sup>Uncá la'alá ricó chá'atajeri que huani, i'imari ajopana nujhua'atéjéna chaje. Marí yuhujá pechu i'ímacá rinacuhúa, que caja ripechu rinacuhúa.

<sup>5</sup>Apú ca'ajná huátari marí caje yuhujá, nujhua'ateje ri'imacale. Aú iná hue'epí rihuátaca caja nucá —que rimacá najló.

*Chapú huani ri'imajica najló, amátaño pu'uhuaré la'acana aú ajopana yucuna marí:*  
(Mr 9.42-48; Lc 17.1-2)

<sup>6</sup>'Chapú huani ri'imajica najló, amátaño no'opiyá jema'ajeño pu'uhuaré la'acana aú, namanaicho la'acana aú. Naca'aquela namátajeño junápeje, cajruni jipa jepo'oqueja nanúru'upi nacojé hua'ató, palani ri'imacajla najló. Marí que nala'acana i'imárijla palani, chapú caje yajhué namáicare ijlungami chojé.

<sup>7</sup>'Uncá huani paala marí eja'ahuá, cajrú nacaje i'imacale richu, ina'uqué la'acáloje pu'uhuaré raú penaje. Caja queja ri'imajica marí eja'ahuá chu. Chapú huani ri'imajica ileruna ina'uquejlo, a'año ajopánajlo nacaje ca'ajná, la'año nacaje ca'ajná, ajopana la'acáloje pu'uhuaré, namanaicho raú penaje.

<sup>8</sup>'Ñaqué i'imacale pila'á ca'ajná pu'uhuaré pila'acare piyáte'ela aú pachá, piyurí piliyó ricá. Pila'á ca'ajná pu'uhuaré meño'ojó pi'ijnacá pachá, piyurí piliyó ricá. Pimata'aquela pinaquiyó piyáte'ela ca'ajná, pi'imá ca'ajná, pica'acáloje ricá a'ajná ño'ojó penaje, palani ri'imacajla pijló. Pila'aquela marí que, pi'ijnacá piyá quera'atani uncá yacálaré chojé, palani ri'imacajla pijló.

<sup>9</sup>Pila'á ca'ajná pu'uhuaré nacaje pamácare pachá, piyurí piliyó ricá. Picahuícha'aquela pijló majó, pica'acáloje ricá a'ajná ño'ojó que penaje, palani ri'imacajla pijló. Pila'aquela marí que, pi'ijnacá piyá quera'atani uncá yacálaré chojé, palani ri'imacajla pijló.

*Ohueja capichaco yucuna marí:*  
(Lc 15.3-7)

<sup>10</sup>'Ipechu i'imaniya yuhuaná, no'opiyá jema'ajeño, nacú majopéjaruna que necá. Re nahua'aphena. Tupana hua'atéjéna, je'echú chiyájéna, necá nahua'aphena. Nora'apá, je'echú chu i'imacare, ahua'á i'imacaño necá.

<sup>11</sup>Ina'uquéjloje penaje i'ímacá nucá. Nu'umatácaloje no'opiyá jema'ajeño capichácajo liyá penaje, nuphá majó i'ímacá.

<sup>12</sup>'Re ca'ajná pajluhuaja ina'uqué. Cien ohuéjéna ripirana. Apala pajluhuaja nanaquiyana capicharo ajopana e'iyayá. Paminá amaca aú uncá ri'imalá ajopana hua'até, rimá: "¿Meque ca'ajná rila'acó?" que. Riyurijla ajopana noventa y nueve na'ajnehuá ajñacana nacú yenuri pu'uteni chu. Ra'apáñajla necá, riculácaloje ricá pajluhuaja nanaquiyana capichaco i'ímacá penaje.

<sup>13</sup>Riphátacana aú pu'ují ripechu i'ímacá rinacu. Ajopana chaje pu'ují ripechu i'ímacá capicharo nacú riphátacana aú.

<sup>14</sup>'Ñaqué caja, Jara'apá, je'echú chu i'imacare. Uncá caja rihuátala yuhuaná, ra'apiyá jema'ajeño naquiyana, capichaco.

*Puráca'aloji lamá'atacana yucuna marí:*  
(Lc 17.3)

<sup>15</sup>'Apú la'acachu picá chapú, pipurá'ó rijhua'até icámica que. Pimá rijló na aú ca rila'acá picá chapú. Ra'ajica ee pipurá'alo rinacojó, ri'imajó capichácajo liyá.

<sup>16</sup>Uncaja que ra'á rinacojé pipurá'alo, pihua'a pijhua'ató apú, ajopana iyamá ca'ajná, nema'acáloje méqueca rimacá pijló penaje. Raú ajopana hue'epéjeño caja méqueca rimacare nacú pijló.

<sup>17</sup>Uncaja que ra'á rinacojó pipurá'alo ajopana hua'até, pi'imá riyucuna Tupana ja'apiyá jema'ajeñojlo jahuacá'alo ñacarelana chu. Uncaja que ra'á rinacojó napurá'alo, ica'á e'iyayó ricá. Ihue'epi caja rinacu uncá jema'alara Tupana ja'apiyá que. Ihue'epi caja rinacu liñeru ña'ajeño ne'emacánajlo naquiyana que. Uncá ina'uqué huátalarena necá.

<sup>18</sup>Jema'a marí: Ileruna imacárena nacú, ihuajácaloje necá pu'uhuaré nala'acare chona penaje, caja queja Tupana quemacá nanacu ijhua'até. Ileruna amácarona chaje pu'uhuaré nala'acare liyá, ñaqué caja Tupana amaco ijhua'até nachaje.

<sup>19</sup>'Marí que ricá piño ijlo: Iyamá icá ca'ajná, ipechu i'imajé ca'ajná panacojéchaca que nacaje la'acana nacú. Aú ipura'ajó Tupana hua'até pajhua'atéchaca, ra'acáloje ifaté penaje. Nora'apá, je'echú chu i'imacare, a'ajeri ijlo nacaje iquejá'ajicare riliyá, panacojéchaca que ipechu i'imajica ee rinacu.

<sup>20</sup> Iyamá ca'ajná, hueji quele ca'ajná, no'opiyá jema'ajeño jahuacaño, napura'acóloje nujhua'até penaje, nahue'epícaloje nucá penaje. Raú nupechu i'imari caja najhua'até re —que Jesús quemacá najló.

<sup>21</sup> E Pedro i'ijnari Jesús ahua'ajé. Rimá rijló:

—Huehuíña'atajeri, apú la'acachu iná chapú metú que huani. ¿Meque pe iná amaco richaje? ¿Iyamá cuhuá'ata que pe ejé chi palani?

<sup>22</sup> —Uncá —que Jesús quemacá—. Uncá iná amalo nachaje iyamá cuhuá'ata que pe ejeja. Ñaqueja iná amaco nachaje.

*Apú uncá amalo apú chaje yucuna marí:*

<sup>23</sup> Ñaquele nujhua'atéjena amaño ajopana chaje, chapú nala'acare necá liyá. Chuhua nu'umajica yucu, ihue'epícaloje rinacojé raú penaje. Ne'emaacana i'imichari. Rijhua'até sápageño lehuérichaño rijló cajrú liñeru aú. Ñaquele rihuá'icha namaná, rilamá'atacaloje najhua'até nalehuérichaje rijló penaje.

<sup>24</sup> Caja rilamá'achiya ne'iyajena hua'até. Eyá apú rijhua'até sápageji iphíchari rinacu. Cajrú huani, íqui'i huani rílehuérichaca rijló.

<sup>25</sup> Uncá meque la'ajé ra'aláchajla rijló rílehuérichaje huemí. Aú ricarihuate quemíchari ajopana rijhua'atéjenajlo marí que: “Marí ina'uqué lehuérica nojló cajrú huani. Eco a'á ricá ajopánajlo rihuemí penaje, risápacaloje najhua'até re mahuemiru penaje. Ñaqueé caja a'ajica ajopánajlo rinane rihuemí penaje. Ñaqueé caja a'ajica riyajalo, riyani quele nahuemí penaje, nasápacaloje najhua'até mahuemiru penaje. Marí caje aú liñeru jácho'oroja rijló, rílehuéricare huemí penaje”, que rimíchaca najló.

<sup>26</sup> Marí que rimíchaca rinacu aú rijhua'até sápageji tári'icharo ri'irúpachi aú ricarihuate jimaje. Mahuoja rimíchaca rijló: “Nucarihuate, piyúcha'anuyo nuchá. Quéchamico no'ó pijló rihuemí”.

<sup>27</sup> Marí caje aú ricarihuate hue'epíchari rimu'ují. Ramó richaje. Rilamá'achiya rijló rílehuérichaje aú rijló. Caja uncá rílehuérilacha rijló reyá a'ajná ño'ojó.

<sup>28</sup> Rejéchami ra'apíchaca ricarihuate liyá. Mequetana i'imajemi ripháchiya piño apú. Ricá lehuérichari rijló huejápaja. Ricarihuate hua'até sápageji caja ri'imíchaca. Ramíchaca ricá ee ripachiya ricá rinúru'upi naquiyá camachá. Riqueño'ochá rinúru'upi ajño'ocana; rimicha rijló: “Chuhua pa'ajica nojló piyuque pilehuéricare ta”.

<sup>29</sup> Eja ritári'icho rijimaje ri'irúpachi aú. Mahuó rimíchaca rijló: “Piyúcha'anuyo nuchá. Quéchami no'ojica pijló rihuemí piyuqueja”.

<sup>30</sup> “Uncá” que rimíchaca. E ri'ijíchá ajopánajlo riyucuna i'imajé, naca'acáloje ricá ina'uqué huajáquelana chojé penaje. Nahuajácaloje ricá, ra'acáloje rijló rílehuéricare huemí penaje.

<sup>31</sup> Ajopana, ricarihuate hua'até sápageño, amíchaño meque nali'ichaca ricá. Chapú huani ri'imíchaca nanacu. Aú ne'ejichá riyucuna i'imajé nacarihuátejlo.

<sup>32</sup> Aú ja ricarihuate huá'ichari rimaná. Riphicha rinacu; rimicha rijló: “Meque picá ta nujhua'até sápageji, uncá huani ina'uquélarí ta. Nucá amícharo pichaje. Nulamá'achiya picá pilehuéricare aú. Mahuó pimíchaca aú nojló, nomicho pichaje pilehuéricare nojló chiyá.

<sup>33</sup> Palánijlaca pihue'epícajla quele lehueri pijló mu'ují, nuhue'epíchaca pimú'ují que caja”, que rimíchaca rijló.

<sup>34</sup> Iqui'ija huani ricarihuate yúchi'ichaco richá. Aú rihuacári'icha rihuajácana, ra'acá rijló cajrú huani rílehuéricare huemí ejená. Caja quetana riyucuna.

<sup>35</sup> Marí que Jesús i'imacá yucu. Caja penaje rimá:

—Ñaqueé caja Nora'apá, je'echú chu i'imacare, la'ajica necá, uncá amálaño ajopana chaje, chapú nala'acare necá liyá.

## 19

*Jesús jehuíña'atari necá, huá'acajeñoimi cupaca piyá naluna. Riyucuna marí:*

*(Mr 10.1-12; Lc 16.18)*

<sup>1</sup> Caja ri'imá najló yucu. Ejomi ri'ijná Galilea te'eré eyá ají que Judea te'eré ejo. Juni Jordán pa'anajo pitá ejé riphá.

<sup>2</sup> Cajrú ina'uqué chira'acó rijhua'até. Re ritejmo'óta natámina.

<sup>3</sup> Eyá fariséona naquiyana i'ijnáño Jesús chaje. Nahuata nacaje yucuna quejá'acana riliyá, namácaloje méqueca rimacá najló penaje. Nema'acáloje rinacu: “Majopeja ripajlaca” que penaje. E nemá rijló:

—¿E Tupana yurica iná cupaca iná yajalo, iná huátaca que?

<sup>4</sup> Rimá najló:

—Tupana puráca'alo lana'aquéjami amácare caja quemari marí que: “Tupana queño'ótaca eja'ahuá huacajé, riqueño'óta caja ina'uqué achiñá, inanaru hua'até”.

<sup>5</sup> “Ñaquele achiñá anúca'aro richi'iná liyá rihuá'acaco ejomi, ri'imacáloje riyajalo hua'até penaje. Ne'emajé pajhua'atéchaca pajluhua japi necá queja”, que ripuráca'alo lana'aquejami quemacá.

<sup>6</sup> Uncá iyamá ina'uqué calé huá'acajeñomi. Pajluhua japi necá queja necá pajhua'atéchaca. Marí que ri'imacale, uncá paala nayurica pecohuáca. Caja Tupana la'arí necá, ne'emacáloje pajluhua japi necá queja pajhua'atéchaca penaje —que rimacá najló.

<sup>7</sup> E nemá piño rijló:

—Eta, Moisesmi chu quemari: Iná yurijla iná yajalo, iná a'acachu rojló papera lana'aquejami. Richu iná quemá na pachaca iná yurica iná yajalo. ¿Na penaje chi rimá ilé que i'amacá? —que nemacá rijló.

<sup>8</sup> Rimá najló:

—Ijnú huani nema'acá Tupana ja'apiyá rihuacajé, a'acuhuaná nahuata naluna yurícana. Pamíneco chiyó uncá ñaque calé ri'imacá ina'uquejlo.

<sup>9</sup> Marí que numacá rinacu: Re ca'ajná apú yajalo, uncá rula'alá rumanaicho apú hua'até. Riyurícachu rucá, rihuá'acacoloje apa'ahuelo hua'até rulanaquiya penaje, rila'á rimanaicho raú. Apa'ahuelo hua'até la'acana queja caja ricá Tupánajlo. Apú ca'ajná huá'acaro riyajalo penájerumi hua'até. Ricá caja la'arí caja rimanaicho raú. Apa'ahuelo hua'até la'acana queja caja ricá Tupánajlo, apú yajalo jo'ó ru'umacale rijló —que Jesús quemacá najló.

<sup>10</sup> E caja ra'apiyatéjena quemáño rijló:

—Marí que ri'imacale, palani ca'ajná uncá iná huá'acalo.

<sup>11</sup> Jesús quemari najló:

—Uncá piyuque ina'uqué hue'epílaje meque quemacánaca numáicare nacú me'etení. Tupana a'ari ina'uqué naquiyaña ñaté, nahue'epícaloje ricá penaje. Necaja calé hue'epiño ricá.

<sup>12</sup> Re achiñana naquiyaña uncá paala necá, nahuá'acacoloje penaje. Ajopana piño i'imaño ñaque caja, ajopana pachá. Ajopana piño huátaño Tupana huátaca que la'acana hue'epicana natucumó. Aú calé uncá nahuá'acalo. Huátari marí numacare nacú jema'acana no'opiyá, jema'ajeri ricá —que Jesús quemacá najló.

*Jesús pura'acó palá yuhuaná nacú yucuna marí:*

*(Mr 10.13-16; Lc 18.15-17)*

<sup>13</sup> Ajopana huá'año Jesús ejo yuhuaná, rito'otacaloje riyáte'ela nanacojé penaje, ripura'acáloje Tupana hua'até nanacu penaje. E'iyonaja ra'apiyatéjena ahuiyo'oño najló richá, nahuá'aca piyá richaje necá.

<sup>14</sup> E Jesús quemari najló:

—Reja yuhuaná i'ijnareja nuchaje. Itániya napu najló. Yuhuaná que i'imacáño i'imaño caja Tupana hua'atéjena. Nahuacára'ajeri ricá.

<sup>15</sup> Rito'otaca riyáte'ela nanacu ejomi ri'ijná reyá.

*Cajrú le'ejepelari hualijímaca pura'acó Jesús hua'até yucuna marí:*

*(Mr 10.17-31; Lc 18.18-30)*

<sup>16</sup> Pajluhuaja hualijímaca i'ijnari Jesús amaje. Rimá rijló:

—Ina'uqué jehuíña'atajeri picá, palani picá —que rimacá rijló—. ¿Meque nula'acajla, nu'umacáloje matajnaco Tupana hua'até je'echú chu penaje?

<sup>17</sup> Jesús quemari rijló:

—¿Naje pimá nunacu: “Palani” que? Ricaja calé, Tupana, palani. Uncá palani calé ina'uqué. Pihuátajica ee matajnaco je'echú chu i'imacana, pila'á Tupana puráca'alo quemacá que.

<sup>18</sup> Raú ilé hualijímaca quemari rijló:

—¿Mecaje chi pimá nacú?

Jesús quemari rijló:

—Pinóniya ina'uqué; pila'aniya pimanaicho; pata'aniya; pipajlániya;

<sup>19</sup> piphá pichi'iná ja'api; pihuata ajopana ina'uqué pihuátaca picó que caja —que Jesús quemacá rijló.

<sup>20</sup> E rimá rijló:

—Caja nujuhuaco noma'a ra'apiyá maáreje cha. ¿Na yurico ejo'ocaja, nula'acáloje penaje?

<sup>21</sup> Jesús quemari rijló:

—Pihuátajica ee lámára'ataquejami que i'imacana Tupánajlo, pipa'ó piñacaré chojé. Eco pa'atá ajopánajlo pinane piyuqueja rihuemí aú, liñeru i'imacáloje pijló penaje. Quéchami pa'ajica piyuqueja piliñéroute camu'ují la'acáñojlo. Marí que la'acana aú nacaje palá nojé i'imajé pijló je'echú chu. Quéchami pipa'ajico piño majó, pi'ijnacáloje nujuhua'até no'opiyateje penaje.

<sup>22</sup> Marí que rimacá rijló aú camu'ují huani ripechu la'acó. Uncá ra'alá rinacójo ripuráca'alo, cajrú le'ejepelari ri'imacale. Aú caja ripa'ó.

<sup>23</sup> E Jesús quemari ra'apiyatéjenajlo:

—Jema'á marí. Puhuichani huani cajrú le'ejepelárunajlo nachó yurícana Tupánajlo, ri'imacáloje Nahuacára'ajeri penaje.

<sup>24</sup> Numá piño: Puhuichani caméllonajlo luhuirí aphú chiyá ja'apácana. Richaje puhuichaca cajrú le'ejepelárunajlo nachó yurícana Tupánajlo, ri'imacáloje Nahuacára'ajeri penaje.

<sup>25</sup> Marí que rimacá aú ra'apiyatéjena pechu i'imá: “Uncá huani ca'ajná Tupana i'imatala ina'uqué capichácajo liyá.” E nemá pajlocaca:

—¿Mecajena ca'ajná Tupana i'imatájeri rijluhua capichácajo liyá?

<sup>26</sup> E Jesús yacá'aro nachaje. Rimá najló:

—Uncá meño'ojó ina'uqué i'imatala necó capichácajo liyá. Tupánaja calé i'imatari ina'uqué capichácajo liyá. Ricá hue'epiri piyuqueja nacaje la'acana.

<sup>27</sup> E Pedro quemari rijló:

—Huahuacára'ajeri, huecá yuriño piyuqueja huanane, hue'ejnacáloje pijhua'até penaje. ¿Meque ri'imajica huajló, marí que huala'acale?

<sup>28</sup> Jesús quemari najló:

—Jema'á marí: Huajé eja'ahuá i'imajica piño. Rihuacajé nucá i'imajeri piyuque ina'uqué huacára'ajeri. Ina'uquéloje penaje i'imacá nucá. Palá huani nuhuacára'ajica ina'uqué rihua-cajé. Ica' caja, no'opiyatéjena, huacára'ajeño caja nujuhua'até. Re ñáca'ajori nahuacára'ajeñojlo. Iyamá iphata ji'imaji nacóje quele ricá. Ica' yá'ajeño richu, imacáloje icá'ana nacú mecaje-naca necá penaje. Iyamá iphata ji'imaji nacóje quele Israelmi chu laquénami a'ajútayami chuna i'imacá. Necá, icá'ana nacú imaje.

<sup>29</sup> Eyá marí que i'imacaño ina'uqué naquiyana me'etení, nala'acáloje nuhuacára'aca que penaje, ina'uqué naquiyana i'ijñañaño ñañacaré ca'ajná, nejena ca'ajná, nachí'iná ca'ajná, nate'eré ca'ajná. Nayani caja ñapácaño ca'ajná ne'ejnaña, nala'acáloje nuhuacára'aca que penaje. Palá huani ri'imajica marí que la'acáñojlo. Nío'ope caja Tupana a'ajica ñañaté. Tupana a'ajeri caja necá, ne'emacáloje matajnaco je'echú chu rijhua'até penaje.

<sup>30</sup> Re cajrú ina'uqué naquiyana, me'etení i'imacaño, napechu i'imá nanacuhua: “Ajopana chaje Tupana la'ajeri huecá palá” que. Uncá ñaque calé ri'imajica najló. Tupana la'ajeri necá ajopana chaje palá —que Jesús quemacá najló.

## 20

*Jesús i'imari najló apú hua'até sápageño yucuna, nahue'epícaloje Tupana hua'atéjena nacóje raú penaje.*

<sup>1</sup> Jesús quemari najló:

—Ina'uqué naquiyana huacára'ajeri Tupana. Chuhua nu'umajica yucu ijlo, ihue'epícaloje méqueca ricá penaje. Pajluhuaja ina'uqué i'imichari. Cajrú rimena i'imichaca. Re'iyá cajrú cajmú caje i'imichaca, epepi que rina i'imichaca. E lapiyami paminá i'ijichari ina'uqué culaje, nasápacaloje rimena e'iyá penaje.

<sup>2</sup> E ripháchiya huejápaja. Rimicha najló: “Ica' sápageño numena e'iyá. No'ojé ijlo pajluhuata denario isápaca'ala huemí”. “Je” que nemíchaca. E rihuacári'icha necá rimena e'iyajé sapaje.

<sup>3</sup> Quéchami pe'iyochá camú jácho'oco ee ramicha piño ajopana le'ejepelaji ñacarelana ahuá'a. Majopeja ne'emichaca.

<sup>4</sup> Necajlo rimicha: “T'ijná numena e'iyajé, isápichachi nujuhua'até richa ña'acana nacú. Palá no'ojica ijlo isápaca'ala huemí”, que rimíchaca najló. “Je” que nemíchaca. E ne'ejichá sapaje.

<sup>5</sup> Caápu'ucu ri'ijichá piño ina'uqué culaje; amíchari piño ajopana. Ñaque caja rimíchaca najló. Pe'iyochá camú to'ocó ee ri'ijichá piño; amíchari piño ajopana. Ñaque caja rimíchaca najló.

<sup>6</sup> E lainchu, las cinco riji'ichá piño le'ejepelaji ñacarelana ojo. Amíchari piño ajopana. Majopeja ne'emichaca. E rimicha najló: “¿Naje icapicháchiya hue'echú ca'alá, uncale isápalacha?” Nemicha rijló:

<sup>7</sup> “Uncá na calé a'achari huajló sápacaje”. E rimicha najló: “T'ijná numena e'iyajé, isápichachi nujuhua'até”. “Je”.

<sup>8</sup> E caja najúhui'icha. E paminá quemíchari rijhua'até sápageño amájerijlo: “Chuhuata pihua'icha necá majó, pilamá'atachi najló nasápaca'ala, pa'achi najló rihuemí. Ileruna, caja penaje iphíchacañojlo pilamá'ataje nasápaca'ala huemí pamineco. Natucumá iphíchacañojlo pilamá'ataje nasápaca'ala huemí caja penaje”, que rimíchaca rijló. “Je” que rimíchaca.



<sup>9</sup> E caja nephicha sápacajemi. Lainchu, las cinco, iphíchacañojlo ra'achá pajluhuata denario. Pajluhua cala sápacana huemí ejé ra'achá najló rihuemí.

<sup>10</sup> Ñaqué caja ra'achaca ajopánajlo, ajopánajlo que nasápaca'ala huemí. E'iyonaja necá, lapiyamí queño'ochácaño ajopana tucumá sápacana, necá pechu i'imichá: "Richaje japi ra'ajica hualjó rihuemí". E'iyonaja rejeja caja ra'achaca najló rihuemí.

<sup>11</sup> Raú naqui'ichá paminá maná.

<sup>12</sup> Nemicha: "Caja penaje iphíchacaño, sápicahaño pajluhuaja camú jená quetánaja calé. E'iyonaja ra'achá najló rihuemí rejeja caja. Ra'achaca hualjó rihuemí, que caja ra'achaca piño najló rihuemí. Huecá sápicahaño ima'á huaca i'imichaca. Ima'aní yajhué huaji'ichá panacu chuhujá quetana i'imichaca".

<sup>13</sup> Paminá jemí'ichari méqueca nemíchaca pajlocaca rinacu. Aú rimicha pajluhuaja nanaquiyánajlo: "Uncá nula'alacha icá chapú. Numicha ijlo i'imichaca: 'No'ojé ijlo pajluhuata denario'. Aú imicha: 'Je' que. Numíchaca ijlo queja nujhua'até sápacajeño amájeri a'achaca ijlo rihuemí".

<sup>14</sup> Chuhua pipa'ó ra'achaje pijló hua'até. Rejeja caja nuhuáchiyaca rihuemí a'acana caja penaje iphíchacañojlo.

<sup>15</sup> Nula'á nuhuátaca que nuliñérote hua'até. Uncá na calé jahuíyo'ori nojló richá. ¿Chapú chi pihuó nuchá mamejane no'ochaca najló ri'imichaca aú?" que paminá quemíchaca rijló. Caja quetana riyucuna.

<sup>16</sup> Marí que ri'imacá yucu najló. Ejomí rimá najló:

—Ñaqué caja Tupana la'acá rihuátaca que. Ajopana pechu i'imá ca'ajná nanacuhua: "Ajopana ja'apejé Tupana la'ajica huecá palá" que. Necá Tupana la'ajeri ajopana chaje palá je'echú chu. Eyá ajopana piño pechu i'imá ca'ajná nanacuhua: "Ajopana chaje Tupana la'ajica huecá palá" que. Necá Tupana la'ajeri ajopana ja'apejé palá je'echú chu.

*Jesús i'imari piño najló ritaca'ajica yucuna:*

*(Mr 10.32-34; Lc 18.31-34)*

<sup>17</sup> E caja Jesús ja'apari ají que Jerusalén ejo. Rapunana chu rihuá'a ra'apiyatéjena a'ajná ño'ojó quemachi ajopana ina'uqué liyá. Iyamá iphata ji'imaji nacojé quele ne'emacá. E rimá najló:

<sup>18</sup> —Chuhua hue'ejichaca Jerusalén ejo. Re na'ajé najló nucá. Ina'uquéjloje penaje i'imacá nucá. Na'ajé nucá nahuacára'ajeñojlo. Sacerdótena huacára'ajeño, Tupana puráca'alo nacú jehuñña'atajeño, quélejo na'ajé nucá, nenócaloje nucá penaje.

<sup>19</sup> Nenójica nucá yámona na'ajé nucá ajopana te'eré eyájenajlo. Necá la'ajeño namácaca nucá. Naña'ataje nucá. Caja penaje nacúhua'ataje nucá a'ahuaná apiyáccanami nacojé, nutaca'acáloje penaje. Eyá hueji que cala i'imajemí numacápo'oyo piño nopumí chuhua que rimacá najló rinacuhua.

*Santiago, Juan, quele jaló quejá'aca ruyánijlo nacaje Jesús liyá yucuna marí:*

*(Mr 10.35-45)*

<sup>20</sup> Ra'apiyatéjena naquiyana i'imaño Santiago, Juan, quele. Nara'apá íi i'imari Zebedeo. E caja naló i'ijnayo Jesús ahua'ajé najhua'até. Rutára'o ru'urúpachi aú rijimaje, ruquejá'acaloje nacaje rilijá penaje.

<sup>21</sup> E rimá rojló:

—¿Na pihuata?

Rumá rijló:

—Pi'imajica ee piyuque ina'uqué huacára'ajeri huacajé, pa'á nuyani pijhuaque'ena penaje, nayá'acaloje pahua'á penaje. Pajluhuaja ca'aña chojó pitá; apú pajrú chojó pitá.

<sup>22</sup> Jesús quemari rojló ruyánijlo hua'até:

—Uncá ihue'epila naca iquejá'aca nuliya. Chapú huani nala'ajica nucá. ¿E ijña'acajla panacu ricá, ñaqué caja nala'aquele icá chapú?

Nemá rijló:

—A'a, huajña'acárejla ricá panacu.

<sup>23</sup> Rimá najló:

—Quehuaca jo'ó. Nala'ajé icá chapú nala'ajica nucá que caja. E'iyonaja uncá nucá calé a'ajeri ina'uqué, nayá'acaloje nohua'á nuca'añane chojó pitá, nupajrone chojó pitá penaje. Tupana a'ajeri necá. Ricaja calé hue'epiri mecajenaca yá'ajeño nohua'á marí que —que rimacá najló.

<sup>24</sup> Ajopana, iyamá té'ela quele, ra'apiyatéjena jema'año méqueca nemacá rijló. Aú nayúcha'o nachá, Juan, Santiago, quele cha.

<sup>25</sup> E Jesús quemari najló, nahuacácoloje rahua'ajé penaje. Rimá najló:

—Caja ihue'epí ajopana te'eré huacára'ajeño nacojé. Najhua'atéjena minaná queja necá najhua'até. Caphí huani nachaje huacára'ajeño huacára'aca najhua'atéjena.

<sup>26</sup> Eyá ijlo uncá ñaqueé calé ri'imajica. Ihuata ca'ajná inaquiyana chá'atacana. A'ajeri inaquiyana ñaté, ricá chá'atari e'iyá.

<sup>27</sup> Ihuata ca'ajná inaquiyana chaje i'imacana. La'arí ricó inaquiyana hua'até sá'pajeri que, ricá i'imari ajopana chaje.

<sup>28</sup> Ina'uqué'loje penaje i'imacá nucá. Uncá nuphala majó i'imacá, ina'uqué la'acáloje nojlo nacaje penaje. Eyá nula'acáloje ina'uquejlo nacaje penaje, nu'ujná majó i'imacá. No'ojé nocó cajrú ina'uqué chaya penaje, ne'emacóloje capichácajo liyá raú penaje —que Jesús quemacá najló.

*Jesús ja'apátaca iyamá mejluruna liyá mejlucaji yucuna marí:*  
(Mr 10.46-52; Lc 18.35-43)

<sup>29</sup> Napunana chu na'apá pajimila Jericó e'yohuá. E caja naqueño'ó re'iyá ja'apácana. Cajrú huani ina'uqué ja'apaño Jesús apumí chuhuá.

<sup>30</sup> A'ajinare que ñe'epú ahua'á iyamá mejluruna huani yá'año. Ajopana quemáño najló:  
—Jesús ja'apácare chuhuá marí ñe'epú.

Eja nahuíyo'o. Nemá rijló:

—Huahuacára'ajeri, ina'uqué i'imatájeri penaje picá. Pihue'epí huamu'ují.

<sup>31</sup> Ajopana aca'año necá; nemá najló:

—Imanúma'o ta.

E'iyonaja richaje huani nahuíyo'oca raú. Nemá rijló:

—Huahuacára'ajeri, ina'uqué i'imatájeri penaje picá, pihue'epí huamu'ují.

<sup>32</sup> Raú Jesús tajnaro ñe'epú chojé. Rihuá'a najló, ne'ejnacáloje richaje penaje. Nephaca rinacu ee rimá najló:

—¿Meque ihuátaca nula'acá icá?

<sup>33</sup> Nemá rijló:

—Huahuacára'ajeri, pa'apata hualiyá mejlucaji, huamachi.

<sup>34</sup> Jesús hue'epirí namu'ují. Aú risapa nejlú nacú. Raú caja namá palá. E caja ne'ejná Jesús hua'até rápumi chu.

## 21

<sup>1</sup> E caja nephá Jerusalén nacojé. Pajimila Betfagé ejé nephá. Yenuri Olivos ja'apejé ricá pajimila. E Jesús huacára'ari iyamá ra'apiyatéjena cahuaruna cajena huá'aje.

<sup>2</sup> Rimá najló:

—I'ijná ají ño'ojó pajimila ejo huatucumajo. Re amaje cahuarú caje, a'aqueja mucuri. Ru'uri hua'até rucá. Eco icaráca'a rucá, ihuá'achi rucá ru'uri hua'até majó.

<sup>3</sup> Nemájica ee ijlo: “¿Naje chi icaráca'a rucá?” eco imá nunacu: “Huahuacára'ajeri huátari necá mequetánaja penaje. Quéchami huapa'atájica necá napumí chuhuá” —que Jesús quemacá najló.

—Je —que nemacá.

<sup>4</sup> Tupana puráca'alo ja'apátajerimi chu quemacá chojé riphá raú. Marí que rilana'acá riyucuna papera chojé i'imacá:

<sup>5</sup> Imá pajimila Jerusalén erúnajlo marí que:

Iyacá'o, Ihuacára'ajeri hua'icha pajimila e'iyajé majopéjari queja.

Cahuarú caje nacú ra'apá.

Cachini ña'ajeri ricá cahuarú, ra'apá nacú,

que rilana'acá riyucuna júpimi i'imacá.

<sup>6</sup> E caja ra'apiyatéjena i'ijná Jesús quemacá najló que la'ajé.

<sup>7</sup> Nahuá'a cahuarú caje, ru'uri hua'até Jesús ejo. E nayúma'a na'arumacá naquiayana cahuarú caje huajlé chojé. E caja Jesús jácho'oro rihuajlé chojé yá'ajo.

<sup>8</sup> Cajrú ina'uqué i'imacá re. Necá caja ayúma'año na'arumacá naquiayana ra'apaca ehua. Palá napechu i'imacale Jesús nacú, nala'acá marí que. Ajopana piño mata'año huejirí paná caje, naca'acáloje ricá ñe'epú chojé, palá ramácoloje raú penaje.

<sup>9</sup> Ritucumá i'ijnacaño jahuíyo'oño cajrú. Ñaqueé caja rápumi chu ja'apácaño jahuíyo'oca. Marí que nemacá Jesús nacú:

—Palani huani ricá. Palani ricá Tupana huacára'acare majó ina'uqué i'imatájeri penaje. Palánija Tupana —que nahuíyo'oca.

<sup>10</sup> Marí que Jesús iphaca pajimila Jerusalén e'iyajé. Raú cajrú ina'uqué jahuacaco richaje yacá'ajo. Nemá najló:

—¿Na chi cají?

<sup>11</sup> —Jesús ricá —que nemacá najló—, Tupana puráca'alo ja'apátajeri ricá. Pajimila Nazaret, Galilea te'erí nacú i'imacare, eyaje ricá —que nemacá najló.

*Jesús ja'apaca Tupana ñacaré chujena nacú yucuna marí:*

(Mr 11.15-19; Lc 19.45-48; Jn 2.13-23)

<sup>12</sup> E caja Jesús mujlúca'ari Tupana ñacaré chojé. E ra'apá richujena nacú. Nacaje a'ajeño, nacaje huarúhua'ajeño, quele nacú ra'apá richiyá piyuque. Ripajno'otá liñeru apiyácajeño mesané. Túcu'uchina piracana a'ajeño ñáca'aru ripajno'otá caja.

<sup>13</sup> E rimá najló:

—Tupana puráca'alo lana'aquejami quemari marí que: “Re nuñacaré, ina'uqué pura'acóloje nujhua'até richu penaje”. Marí que rimacá, e'iyonaja icá apichátaño ricá. Icó a'año ajopánajlo nacaje richu. Richuhuaaja ata'á necá. Ata'ajeño ñacaré que ijlo ricá —que rimacá najló.

<sup>14</sup> Tupana ñacaré chu ri'imacá ee, ajopana i'ijnaño Jesús ahua'ajé. Mejluruna ne'iyajena i'imacá. Ajopana nanaquiyana uncá ja'apáñaño palá. Re Jesús ja'apátari mejluruna liyá mejlucaji. Rilamá'ata caja uncá ja'apáñaño tajné najló. Aú na'apá palá.

<sup>15</sup> Eyá sacerdotena huacára'ajeño, Tupana puráca'alo nacú jehuíña'atajeño, quele amaño rila'acá cajrú nacaje uncá meño'ojó ina'uqué la'alare. Nema'á caja yuhuaná jahuíyo'oca Tupana ñacaré chu. Marí que nemacá Jesús nacú: “Palani huani ricá, Tupana huacára'acare majó ina'uqué i'imatájeri penaje.” Marí caje aú nayúcha'o.

<sup>16</sup> E nemá Jesusjlo:

—¿E pema'acá méqueca nemacá?

—A'a, noma'acare —que Jesús quemacá—. Tupana puráca'alo lana'aquejami quemari marí que:

Yuhuaná, capajáreruna nayani, quele pura'ajeño palá huani Tupana nacú.

Tupana puráca'alo lana'aquejami amácare i'imacá, quemari marí que nanacu i'imacá. ¿Uncá chi ihue'epila ricá? —que Jesús quemacá najló.

<sup>17</sup> E ra'apaña necá. Ri'ijná ají que pajimila Betania ejo. Re rajúhua'a; re ricamato.

*Jesús yerúca'aca a'ahuaná higuera chaje yucuna marí:*

(Mr 11.12-14, 20-26)

<sup>18</sup> Muni que lapiyami ripa'ó piño Jerusalén ejo. Rapunana chu quehuí rijló me'epeji i'imacá.

<sup>19</sup> Iñe'epú ahua'á a'ajnare que ramá a'ahuaná higuera. E ri'ijná rejo richa culaje, amari mecharú ri'imacá. Ripanaja calé i'imari rinacu. E Jesús quemari a'ahuanajlo.

—Caja queja pi'imajica mecharú.

Aú ja a'ahuaná la'aró cuhuichila que.

<sup>20</sup> Marí que ra'apiyatéjena amaca aú napechu i'imá: “¡Meque piyuque huani rila'acá!” E nemá Jesusjlo:

—¿Meque la'ajé chi rili'ichaco cuhuichila quiñaja huani?

<sup>21</sup> Jesús quemari najló:

—Jema'á marí: Caphí ipechu i'imajica ee Tupana chojé, ila'ajé ñaqueé caja, nuli'ichaca a'ahuaná higuera nacú que caja. Uncaja que ipechu i'imá: “Uncá rila'alaje nojló ricá” que, caja queja ri'imajica ijlo. Richaje puhuichá nojé ila'ajé nacaje, ipechu i'imajica ee Tupana chojé caphí. Imaje ca'ajná ipurejlo: “Patató, pica'á picó juni jalomi acojé” que. Caja queja ri'imajica ijlo.

<sup>22</sup> Piyuque nacaje iquejá'acare Tupana liyá rijhua'até pura'acano aú, ra'ajé ijlo ricá. Ipechu i'imajica ee caphí richojé ra'ajé ijlo ricá —que Jesús quemacá najló.

*Naquejá'a Jesús liyá riyucuna na puráca'alo aú ca rila'á nacaje. Riyucuna marí:*

(Mr 11.27-33; Lc 20.1-8)

<sup>23</sup> E caja Jesús mujlúca'ari piño Tupana ñacaré chojé. Rehuíña'ata ina'uqué Tupana nacú. E sacerdotena huacára'ajeño, peñahuilana, quele iphaño rinacu. Nemá rijló:

—¿Na puráca'alo aú chi pila'á nacaje? ¿Na huacára'ari picá rila'ajeri penaje?

<sup>24</sup> Jesús quemari najló:

—Ñaqueé caja nuquejá'ajica iliyá nacaje yucuna. Ja'ajipajica ee nojló, numaje ijlo na nuhuacára'ajeri.

<sup>25</sup> ¿Na puráca'alo aú chi Juanmi chu la'aqueri bautizar ina'uqué, Tupana puráca'alo aú ca'ajná ina'uqué puráca'alo aú ca'ajná? —que rimacá najló.

Raú napura'ó pajhua'atéchaca necámica que. Nemá pajlocaca:

—Huemaquela rijló. “Tupana puráca'alo aú” que, rimajla huajló: “¿Naje chi uncá jema'alá ra'apiyá?” que.

<sup>26</sup> Eyá huemaquela rijló: “Ina'uqué puráca'alo aú” que, mariruna ina'uqué yúcha'ajeñojla huachá raú. Napiyá huaquero'ó. Napechu i'imá Juanmi chu nacú: “Tupana puráca'alo ja'apátajeri ri'imacá” que. Marí que napura'acó pajhua'atéchaca necámica que.

<sup>27</sup> E nemá Jesúsjlo:

—Capí. Uncá huahue'epila na puráca'alo aú ca rila'aque bautizar ina'uqué.

—Ñaque uncá caja numalaje ijlo na puráca'alo aú ca nula'acá nacaje —que Jesús quemacá najló.

*Nema'acáloje Tupana ja'apiyá penaje, Jesús i'imari najló yucu:*

<sup>28</sup> Jesús quemari najló marí que:

—¿Meque ijlo marí yucu? Ina'uqué i'imichari. Iyamá riyani i'imichaño. E rimicha apú ri'irijlo: “Nu'urí, pi'ijná chuhua sapaje huamena e'iyajé”.

<sup>29</sup> “Uncá” que rimíchaca rijló. Júpichami ri'ijnachiya ripéchuhua a'ajná ño'ojó: “¿Naje chí numicha rijló ‘uncá’ que maapami?” Aú ri'ijichá sapaje.

<sup>30</sup> E rara'apá i'ijichari piño apú ri'irijlo quemaje: “Chuhua pi'ijná sapaje huamena e'iyajé”. “Je” que rimíchaca rijló. E'iyonaja uncá ri'ijnalacha sapaje.

<sup>31</sup> Marí que Jesús i'imacá najló yucu. Quéchami rimá najló:

—¿Mecaje chí la'arí rara'apá huátaca que?

E nemá rijló:

—Pamineco rihuacára'acare.

Raú Jesús quemari najló:

—Jema'á marí: Ñaque caja uncá ina'uquélaruna, liñeru ña'ajeño nahuacára'ajeñojlo, inaana namanaicho la'ajeño quele chá'ataca icá, nema'acale Tupana puráca'alo ja'apiyá, ne'emacáloje Tupana hua'atéjina raú penaje.

<sup>32</sup> Juan bautizar la'ajeri jehuñña'atari icá palá la'acana nacú i'imacá. E'iyonaja uncá jema'alá ra'apiyá. Eyá uncá ina'uquélaruna, liñeru ña'ajeño nahuacára'ajeñojlo, inaana namanaicho la'ajeño, quele jema'año ra'apiyá. Marí que amaca i'imacá. E'iyonaja uncá ipajno'otala ipéchuhua pu'uhuaré ila'acare iliyá Tupana ejo, jema'acáloje ra'apiyá penaje —que rimacá najló.

*Jesús i'imari najló yucu, apú hua'até sápageño yucuna, rehuñña'atacaloje necá chapú ina'uqué la'ajicare ricá nacú penaje.*

*(Mr 12.1-12; Lc 20.9-19)*

<sup>33</sup> —Jema'á apa'amá yucu. Pajluhuaja ina'uqué ejáchiyari cajmú caje ri'icacapere e'iyá. Jelepí rina i'imichari. Rili'ichá corral rinacu tujlá que rejátacare nacojé. Rili'ichá caja ralá apáca'aruna. Quéchami rili'ichaca rica'apé yenoje, richiyá rihua'aphena amácaloje ricá palá penaje. E caja riyuricha rijhua'até sápageño naquiyánajlo ri'icacapere, namácaloje rijló ricá penaje. E caja ri'ijichá ajopana te'eré ejo. Ri'ijichaca yámona rimicha najló: “Chuhua nu'ujichaca. Eco amá ricá palá. Cajmú naquiyana no'ojé ijlo rihuemí, amaca nojló ricá huemí”, que rimíchaca najló. Je. E ri'ijichá ya'ajnaje. Júpija ri'imichá ya'ajno.

<sup>34</sup> E caja richa ña'acana iphíchari rená chojé. Aú rihuacári'icha rijhua'até sápageño richa ña'acana rijló penaje.

<sup>35</sup> E ne'ejichá rcaloje rijló ricá penaje. E caja ri'ijichá ajopana te'eré ejo. Ri'ijichaca yámona rimicha najló: “Chuhua nu'ujichaca. Eco amá ricá ejo. Iphíchaño rimena amájeño nacú. Eta rimena amájeño pachíyaño necá. Naña'achiya apú nanaquiyana. Apú nenocho. Apú nanaquiyana cha naqui'ichá jipa.

<sup>36</sup> E paminá huacári'ichari piño ajopana rijhua'até sápageño rejo. Ajopana chaje íqui'iruna ne'emichaca, i'ijichaño rejo. Ñaque caja rimena amájeño li'ichaca necá chapú.

<sup>37</sup> Aú caja rihuacári'icha ri'irí rejo. Ripechu i'imichá: “Nephaje japi nu'urí ja'apí”.

<sup>38</sup> E'iyonaja nephicha na'apihuá rijló. Namicha ricá huaíchaca a'ajnare que. E nemicha pajlocaca: “Ílé ri'irí huaícha ta. Rijló rara'apá yuréjeri rimena, ri'imacáloje rijluhua penaje. I'ijná huenóchachi ricá, rimenami yurícoloje huajló penaje”.

<sup>39</sup> E caja riphicha nanacu. Eta napachiya ricá. Naji'ichá ricá rimena yámojo. Re nenocho ricá. Caja quetana riyucuna.

<sup>40</sup> Marí que Jesús i'imacá yucu najló. E rimá najló:

—¿Meque ca'ajná paminá la'ajica rimena amájeño, riphájica nanacu huacajé?

<sup>41</sup> Nemá rijló:

—Rinótajica necá, uncá ina'uquélaruna necá. Uncá rihue'epilaje namu'ují. E riyureje rimena ajopánajlo, ramájeño penaje. A'ajícaño rijló richa rijluhua penaje riphájica rená chojé huacajé, cajena ra'ajé rimena amájeño penaje.

<sup>42</sup> Jesús quemari najló:

—Caja ihue'epí mequeca Tupana puráca'alo lana'aquejami quemacá. Marí que rimacá nunacu:

Pajluhuaja ina'uqué i'imajeri.

Ne'iyajena quemájeño rinacu: “Uncá ina'uquélari ricá” que.

E'iyonaja ricá i'imajeri ajopana chaje.

Marí penaje Tupana a'ajeri ricá.

Palá huani nacaje Tupana la'acare, que ripuráca'alo lana'acquéjami quemacá.

<sup>43</sup> Ijló numá. Tupana jácho'otajeri icá rijhua'atéjena i'imacana chiyá. Ra'ajé piño ajopana ina'uqué rijhua'atéjena penaje apumí chojé. Ileruna la'ajeño rihuátaca que.

<sup>44</sup> Uncá jema'alaño no'opiyá, capichájeño Tupana liyá. Chapú huani ri'imajica najló. Uncá huátalaño nucá, amájeño chapú caje yajhué nupuráca'alo aú.

<sup>45</sup> Marí que Jesús quemacá najló i'imacá. Sacerdótena huacára'ajeño, fariséona, quele jema'año ripuráca'alo i'imacá. Yucu ri'imá najló. E'iyonaja nahue'epí rimacá nanacu raú meque la'ajéñoca necá.

<sup>46</sup> Ñaquele nahuata rijña'acana, nahuajácaloje ricá penaje. E'iyonaja calé naquero'ó ina'uqué piyá. Palá ajopana pechu i'imacá rinacu. "Tupana puráca'alo ja'apátajeri japi ricá," que napechu i'imacá Jesús nacú.

## 22

*Jesús i'mari najló yucu, fiesta ne'emacana la'acá yucuna, rehuíña'atacaloje necá Tupana nacú raú penaje.*

*(Lc 14.15-24)*

<sup>1</sup> Jesús jehuíña'atari piño necá. Yucu ri'imá najló. Rimá najló:

<sup>2</sup>—Chuhua nu'umajica yucu ijló, ihue'epícaloje mecajenaca ina'uqué naquiyana i'imajeño Tupana hua'até je'echú chu penaje. Pajluhua ina'uqué i'imichari. Ne'emacana ri'imichaca. Ri'iri huá'acaco huacajé rili'ichá fiesta.

<sup>3</sup> E caja rihuacári'icha rijhua'até sápageño riyucupéra'acarena huá'aje. Aú ne'ejichá nahuá'aje. E'iyonaja uncá nahuátalacha fiesta ja'apátacana rijhua'até. Aú napi'ichó riyucuna i'imajé rijló.

<sup>4</sup> Quéchami rihuacári'ichaca piño ajopana rijhua'até sápageño naquiyana riyucupéra'acarena huá'aje. Rimicha najló: "Marí que imájica najló nunacu: Caja moto'oqueja a'ajnejí. Caja nonó jema piracana pitacaño naquiyana, huajñácaloje ri'imi penaje. Nu'urí huá'acajero. Caja re huani nacaje lamá'ataqueja ripé me'etení. Chuhua i'ijná fiesta ja'apátaje nujhua'até, que imájica najló". "Je" que nemíchaca. E ne'ejichá najló quemaje.

<sup>5</sup> E'iyonaja uncá na'alacha napuráca'alo nanacojó. Apú nanaquiyana i'ijichari rimena e'iyajé sápage. Apú i'imichari le'ejepelaji a'ajé.

<sup>6</sup> Ajopana nanaquiyana li'ichaño chapú ne'emacana hua'até sápageño. Nenocha naquiyana.

<sup>7</sup> Marí caja aú ne'emacana yúchi'icharo cajrú. Aú rihuacári'icha rile'ejena surárana nacapichátacana, nótaño rijhua'até sápageñomi chuna i'imacá. Rihuacári'icha caja nacára'ataca pajimila nañacaré i'imacare e'iyá.

<sup>8</sup> Marí que nali'ichaca. E caja rimicha rijhua'até sápageñojlo: "Chuhua nu'urí huá'acajico. Caja lamá'ataqueja ripé piyuque nacaje. Uncá ina'uquélaruna necá, nuyucupéra'acarena pamíneco i'imacá.

<sup>9</sup> Ñaquele chuhua majopeja i'ijnacá iñe'epú chuhúa pajimila e'iyohuá, imíchachi ina'uquejlo, iphátaicarenajlo, ne'ejnacáloje majó fiesta ja'apátaje nujhua'até penaje", que rimíchaca najló.

<sup>10</sup> Aú ne'ejichá pajimila e'iyohuá, apú iñe'epú chuhúa, apú iñe'epú chuhúa que ina'uqué huá'aje. Aú nahuacáchiya necá palájne'equena, chapújne'equena hua'até ne'emacana ñacaré chojé. Caja namano'ochiya ucapú, najñácare chu na'ajnehuá.

<sup>11</sup> Ehuá ne'emacana iphíchaca namaje. Amíchari apú i'imíchaca najhua'até. Pu'uhuareni ra'arumacá i'imíchaca.

<sup>12</sup> E ne'emacana quemíchari rijló: "¿Meque pimujlúqui'ichaca majó majopeja pu'uhuareni pa'arumacá hua'até. Fiesta, huá'acacajo huacajé, uncá iná ja'apátala ricá pu'uhuareni iná a'arumacá hua'até. ¿Meque pimujlúqui'ichaca majó?" que rimíchaca rijló. Uncá ra'ajipalacha rijló.

<sup>13</sup> E ne'emacana quemíchari a'ajnejí tamáca'atajeñojlo: "Jepo'otá ricá ta ritajné naquiyá, ra'anapitá naquiyá hua'até. Quéchami iquí'ichaca ricá huaca'apoyo calajerúhuaca. Re ina'uqué iyájeño cajrú calajerúhuaca. Camachá najma'ajica naí hua re, namácale chapú caje yajhué", que rimíchaca najló.

<sup>14</sup> Marí que Jesús i'imacá yucu najló. E rimá najló:

—Tupana quemari cajrú ina'uquejlo, ne'emacáloje rijhua'atéjena penaje. E'iyonaja huejápaja necá ri'ihuapacárena ina'uqué e'iyayá.

*Liñeru na'acare ne'emacánajlo yucuna naquejá'a Jesús liyá. Riyucuna marí:  
(Mr 12.13-17; Lc 20.20-26)*

<sup>15</sup> E caja fariséona naquiyana pura'año pajhua'atéchaca meque nemájica Jesusjlo, rimacáloje najló nacaje nacú apojó ne'emacana liyá penaje. Nahuata quemacana rinacu: "Pu'uhuaré rimíchaca huajló" que, rimaquela apojó riliyá. E ne'ejná richaje.

<sup>16</sup> Nanaquiyana puráca'alo aú, Herodes hua'atéjena naquiyana puráca'alo aú caja ne'ejná Jesús chaje. E nemá rijló:

—Huehuíña'atajeri, huahue'epí quehuácaje pipuráca'alo. Nacaje Tupana huátacare iná la'acá nacú pehuíña'ata ina'uqué. Quehuaca nacaje pehuíña'atacare nacú. Re huahuacára'ajeño naquiyana, uncá paala najló pipuráca'alo. E'iyonaja uncá pa'alá pinacajó necá. Pajimato pehuíña'ata ina'uqué Tupana huátaca que la'acana nacú.

<sup>17</sup> Chuhuata pimá huajló méqueca pipechu marí nacú: Naquejá'a hualiyá liñeru, na'acáloje ricá hue'emacana Césarjlo penaje. Romano naquiyana ricá. ¿Meque chí pijló ricá? ¿E chí hua'acajla najló liñeru, naquejá'acare hualiyá hue'emacánajlo? ¿E chí palani hua'acajla najló ricá ca'ajná, uncá ca'ajná? —que nemacá rijló.

<sup>18</sup> Jesús hue'epiri naquejá'aca riyucuna, nahuátacale rimacá apojó ne'emacana liyá, nemacáloje rinacu: "Pu'uhuaré rimíchaca huajló" que penaje. Aú rimá najló:

—Pajlácachina icá. ¿Naje ihuata numacá ijlo nacaje nacú, imacáloje nunacu raú: "Pu'uhuaré rimíchaca" que penaje?

<sup>19</sup> Iya'atá nojló liñeru, iná a'acare iná i'ímacánajlo, nomachi.

—Je.

E na'á rijló pajluhuata.

<sup>20</sup> Jesús yacá'aro richaje. E rimá najló:

—¿Na jenami chí cari liñeru nacú? ¿Na í cari lana'aquejami rinacu?

<sup>21</sup> —Hue'emacana Cesar jenami quele rinacu. Ríí caja quele lana'aquejami rinacu —que nemacá rijló.

Rimá najló:

—A'á i'ímacánajlo quele liñeru rihuátacare. Ila'á caja Tupánajlo nacaje rihuátacare caje.

<sup>22</sup> Marí que rimacá aú najló napechu i'imá: "¡Meque capechú huani rimíchaca huajló!" E na'apaña ricá. Ne'ejná ají que a'ajná ño'ojó.

*Caja taca'acaño macápo'oco yucuna naquejá'a Jesús liyá. Riyucuna marí:  
(Mr 12.18-27; Lc 20.27-40)*

<sup>23</sup> Rihuacajé caja ajopana i'ijñaño piño Jesús amaje. Saducéona naquiyana ne'emacá. Necá quemáño caja taca'acaño nacú: "Uncá namacápo'olajo" que. Ñaqué i'imacale ne'ejná Jesús chaje rijhua'até pura'ajó. Nemá rijló marí que:

<sup>24</sup> —Huehuíña'atajeri, marí que Moisesmi chu puráca'almi quemacá: "Apú ca'ajná taca'añari riyajalo mayaniqueru. Palani re'ehuemi ra'apiyajé huá'acacojla riyajáloimi hua'até. Re'ehuemi chu yanimínami yurícoloje rapumí chojé raú penaje", que ripuráca'almi lana'aquejami quemacá.

<sup>25</sup> Ñaqué ricá. Maare pajluhuaja ina'uqué i'imari huajhua'até. Iyamá cuhuá'ata quele ne'emacá rejena hua'até. Pe'ejri ri'imacá, huá'acaro. Ejomi ritaca'á mayaniqueru. Rejomi ra'apejé i'imacá huá'acaro riyajáloimi hua'até.

<sup>26</sup> Ñaqué caja ricapichaco ruliyá mayaniqueru caja. Raú ra'apejé piño huá'acaro rujhua'até. Capicharo caja ruliyá mayaniqueru caja. Ají que iyamá cuhuá'ata quele necá huá'acaco rujhua'até i'imacá.

<sup>27</sup> Necá piyuque capichaño ruliyá mayaniqueru. E caja ehuaja nayajalo penájerumi capichayo nápumi chu.

<sup>28</sup> Eta, Tupana macápo'otajica caja taca'acaño huacajé, ¿na yajalo chí ruyuríjico rejéchami? Iyamá cuhuá'ata quele ina'uqué yajáloimi ru'umacá —que nemacá Jesusjlo.

<sup>29</sup> Jesús quemari najló:

—Uncá ihue'epila rinacajé, uncale ihue'epila méqueca Tupana puráca'alo lana'aquejami quemacá. Uncá caja ihue'epila nacaje Tupana hue'epiri la'acana nacajé.

<sup>30</sup> Caja taca'acaño macápo'ojico ejomi uncá pajhua'atéchaca huá'acajeñomi que calé ne'emajica re. Uncá caja nahua'acalajo piño pajhua'atéchaca. Tupana hua'atéjena, je'echú chu i'imacáño, que caja ne'emajica rihuacajé.

<sup>31</sup> Re caja taca'acaño macápo'oco yucuna, Tupana puráca'alo lana'aquejami e'iyá, ihue'epicare.

<sup>32</sup> Ricá quemari méqueca Tupana quemacá Moisesmi chujlo i'imacá. Rimá rijló: "Abraham, Isaac, Jacob, quele pechu i'imari nochojé caphí". Marí que rimacá nanacu rijló nataqui'ichami. Uncá ihue'epila meque quemacánaca ricá rimacare nacú. Uncá necá, caja taca'acaño, pechu i'imalajla richojé caphí. Eyá necá cajmuruna pechu i'imari richojé caphí —que rimacá najló, nahue'epícaloje raú caja taca'acaño naquiyana i'imacá cajmuruna je'echú chu penaje.

<sup>33</sup> Marí que rimacá najló. Aú napechu i'ímá: “¡Meque palá huani rehuíña'ataca ina'uqué!”

*Nacaje Tupana huátacare iná la'acá apú nacaje chaje yucuna marí:*

(Mr 12.28-34)

<sup>34</sup> Caja fariséona jema'año Jesús manúma'ataca saducéona yucuna. Raú nahuacaco necámica que.

<sup>35</sup> Pajluhuaja nanaquiyana i'imari Tupana puráca'alo nacú jehuíña'atajeri. Ricá huátari Jesús liyá nacaje yucuna quejá'acana, ramácaloje méqueca rimájica rijló penaje. Aú rimá rijló:

<sup>36</sup> —Huehuíña'atajeri, Tupana puráca'alo lana'acquéjami huacára'ari iná la'acá nacaje. ¿Na rihuata huala'acá apú rimacare nacú chaje íqui'ica?

<sup>37</sup> Jesús quemari rijló:

—Huahuacára'ajeri Tupana. Ricaja calé Iná Chi'ináricana. Pihuata íqui'ija Pihuacára'ajeri Tupana. Pihuajhué ricá. Pi'ijnatá caja pipéchuhua rinacu. Pehuíña'o caja nacaje nacú, ri'imacáloje palá rinacu penaje. Pila'á caja piyuqueja nacaje, ri'imacáloje palá rinacu penaje. Marí que pila'acá, pihuátacale ricá íqui'ija.

<sup>38</sup> Apú nacaje rihuacára'acare iná la'acá chaje íqui'ica rihuátaca iná la'acá marí que.

<sup>39</sup> “Pihuata caja íqui'ija piyuqueja ina'uqué pihuátaca picó que caja”. Apa'amá nacojé quemacana que caja marí.

<sup>40</sup> Ra'apiyá jema'acana aú iná la'á Tupana puráca'alo lana'acquéjami quemacá que. Moisesmi chu, ripuráca'alo ja'apátajeñomi chuna, quele lana'acare ri'imacá —que rimacá najló.

*Ricá Tupana huacára'acare ina'uqué i'imatájeri penaje yucuna riquejá'a naliyá. Riyucuna marí:*

(Mr 12.35-37; Lc 20.41-44)

<sup>41</sup> Rejo caja jo'ó jahuacácajo nacú fariséona naquiyana i'imacá.

<sup>42</sup> E Jesús quemari najló:

—¿Meque ipechu ricá Tupana huacára'acare ina'uqué i'imatájeri penaje nacú? ¿Na laquénami naquiyana chi ricá?

Nemá rijló:

—Davidmi chu laquénami naquiyana ricá.

<sup>43</sup> Jesús quemari najló:

—Tupana Pechu huacára'aca que, Davidmi chu lana'acá riyucuna papera chojé i'imacá. Davidmi chu quemari rinacu: “Nuhuacára'ajeri ricá”. Ñaquele uncá rilaquénami naquiyana huani calé ricá. Marí que rilana'acá riyucuna papera chojé i'imacá:

<sup>44</sup> Ina'uqué Huacára'ajeri huani Tupana. Ricá quemari Nuhuacára'ajerijlo:

“Palá huani nupechu pinacu.

Pi'imá Nahuacára'ajeri nujhua'até.

Maare pi'imajica nohua'á, nuchá'atajica chapú pinacu péchuruna ejená”, que rimacá.

<sup>45</sup> Davidmi chu quemari: “Nuhuacára'ajeri ricá”, ilé Tupana huacára'acare ina'uqué i'imatájeri penaje nacú. Ñaquele uncá rilaquénami naquiyana huani calé ricá nemacare nacú —que rimacá najló.

<sup>46</sup> Uncá nahue'epila méqueca rapiyacacana. Reyá a'ajná ño'ojó nahuó la'aró ra'apí nacaje yucuna quejá'acana nacú riliyá.

## 23

*Jesús aca'acá fariséona, Tupana puráca'alo nacú jehuíña'atajeño, quele maná yucuna marí:*

(Mr 12.38-40; Lc 11.37-54; 20.45-47)

<sup>1</sup> E caja Jesús quemari ra'apiyatéjenajlo, ajopana ina'uquejlo hua'até marí que:

<sup>2</sup> —Tupana puráca'alo nacú jehuíña'atajeño, fariséona, quele pechu i'imá marí que nanacuhúa: “Huecaja calé hue'epiño palá meque quemacánaca Tupana puráca'alo, Moisesmi chu lana'acare i'imacá”. Nehuíña'ata icá rinacu.

<sup>3</sup> Jema'á napuráca'alo ja'apiyá. Pa. Amániya naliyá nacaje nala'acá que. Palani puráca'aloji i'ijnacá nanumá chiyá. E'iyonaja uncá ñaque calé nala'acá nacaje.

<sup>4</sup> Nahuacára'a ina'uqué la'acá nacaje puhuichani huani. Uncá meño'ojó iná la'alá ricá. E'iyonaja nahuacára'a rila'acana. Eyá necá, uncá la'alaño huejápaja nacaje najhua'até.

<sup>5</sup> Piyuque nala'acare nacaje, nala'á ina'uqué amácaloje necá penaje. Napulá nacojé, na'anapitá nacojé, quele nepo'ó Tupana puráca'alo lana'acquéjami naquiyana. Apojó na'arumacá ajopana ina'uqué liyá. Ajopana a'arumacá chaje huaphereca na'arumacá, ajopana amácaloje necá ajopana ina'uqué e'iyayá penaje.

<sup>6</sup> Najñácachu na'ajnehuá ajopana ina'uqué hua'até, nahuata palá nojé ñáca'ajori najluhua. Ajopana chá'atajeño que nayá'aco nahuacáca'alo ñacarelana chu.

<sup>7</sup> Nahuata caja ina'uqué íphaca na'apí. Nahuata caja najalaca necá palá, nachira'acochu pajimila nacuhuá. Nahuata caja nemacá najló: "Huehuíña'atajeri" que.

<sup>8</sup> 'Thuátaniya ina'uqué quemacá inacu: "Huehuíña'atajeri" que. Ejena queja icá pajhua'atéchaca. Re pajluhuaaja calé Jehuífña'atajeri penaje. Nucá Jehuífña'atajeri penaje nucá. Tupana huacára'acare majó i'imacá nucá.

<sup>9</sup> Imaniya caja ina'uqué nacú: "Jara'apaji" que. Re ricá pajluhuaaja, je'echú chu, Jara'apá huani.

<sup>10</sup> Imaniya caja apú nacú: "Huahuacára'ajeri ricá" que. Nucaja calé Ihuacára'ajeri. Tupana huacára'ari nucá majó i'imacá Ihuacára'ajeri huani penaje.

<sup>11-12</sup> Iná pechu i'imacachu iná nacuhuá marí que: "Nucá chá'atari ajopana" que, Tupánajlo iná i'imá ajopana ja'apejé. Iná pechu i'imacachu iná nacuhuá marí que: "Ajopana chá'ataño nucá" que, Tupánajlo iná i'imá ajopana chá'atajeri. Ajopana ñaté a'ajeri, chá'atajeri ricá Tupánajlo —que Jesús quemacá najló.

<sup>13</sup> 'Chapú huani ri'imajica Tupana puráca'alo nacú jehuíña'atajeñojlo, fariséonajlo, quele me'etení i'imacáñojlo. Necá la'año necó palá la'ajeño que ina'uqué ijlu chu. E'iyonaja uncá ñaqué calé necá. Pajlácachina necá. Netá rapu ina'uquejlo, ne'emacá piyá Tupana hua'atéjena raú penaje. Uncá Tupana hua'atéjena naquiyana calé necá, uncá caja nahuátala ajopana ina'uqué jema'acá ra'apiyá.

<sup>14</sup> 'Chapú huani ri'imajica Tupana puráca'alo nacú jehuíña'atajeñojlo, fariséonajlo, quele me'etení i'imacáñojlo. Pajlácachina necá. Napajlá caja ihuacajilomina hua'até, nata'acáloje naliyá nañacaré penaje. Eyá napura'ó júpija Tupana hua'até, palá ina'uqué pechu i'imacáloje nanacu raú penaje. Marí que nala'acare chona, ajopana chaje huani Tupana huajáica necá.

<sup>15</sup> 'Chapú huani ri'imajica Tupana puráca'alo nacú jehuíña'atajeñojlo, fariséonajlo, quele me'etení i'imacáñojlo. Pajlácachina necá. Necá i'ijnáño a'ajná ajopana, ajopana que te'eré ojo. Re ca'ajná pajluhuaaja nanaquiyana jema'arijla napuráca'alo ja'apiyá. Aú nacuhuá'a juni jalomi, nehuíña'atacaloje ricá napuráca'alo nacú penaje. Iqui'ija napichátaca ricá napuráca'alo aú Tupana ja'apiyá jema'acana liyá, ri'ijnacáloje najhua'até quera'atani, uncá yacálare chojé penaje. Ricá ina'uqué nehuíña'atacare, chá'atari necá richapucha aú, nehuíña'atacale ri'imacá.

<sup>16</sup> 'Chapú huani ri'imajica najló. Mejluruna que necá. Nahuata ina'uqué jehuíña'atacana. E'iyonaja uncá nahue'epila quehuácaje puráca'aloji nacojé. Marí que nemacá: "Iná quemacachu: 'Quehuaca nula'ajica numacá que', Tupana ñacaré íí a'acana aú, uncá iná pajlala, uncachu iná la'alá iná quemacá que. E'iyonaja iná quemacachu: 'Quehuaca nula'ajica ricá', oro íí a'acana aú, Tupana ñacaré chu i'imacare íí a'acana aú, iná pajlá, uncachu iná la'alá ñaqué ricá", que nehuíña'ataca ina'uqué majopeja.

<sup>17</sup> ¡Meque uncá huani napechu i'imalá najló! ¡Uncá huani nahue'epila! Oro nayá'atacare Tupana ñacaré chojé, palani ricá re ri'imacale.

<sup>18</sup> Necá caja quemáño: "Iná quemacachu: 'Quehuaca nula'ajica nacaje numacá que', mesa íí a'acana aú, Tupana ñacaré chu i'imacare íí a'acana aú, uncá iná pajlala, uncachu iná la'alá iná quemacá que", que nemacá.

<sup>19</sup> ¡Meque uncá huani napechu i'imalá najló! ¡Uncá huani nahue'epila! Nacaje nayá'atacare mesa nacú, palani ricá, Tupánajlo a'acanami ri'imacale. Mesa nacú ri'imacale, palani ricá.

<sup>20</sup> Iná quemacachu: "Marí que nula'ajica mesa íí a'acana aú", iná quemá caja rinacu yá'aco nacú raú.

<sup>21</sup> Iná a'acachu Tupana ñacaré íí, apú hue'epícaloje quehuaca iná quemacá penaje, iná quemá caja Tupana nacú, richu Tupana i'imacale.

<sup>22</sup> Iná quemacáchu: "Quehuaca nula'ajica nacaje", je'echú íí a'acana aú, iná quemá caja Tupana nacú raú, richu ri'imacale.

<sup>23</sup> 'Chapú huani ri'imajica Tupana puráca'alo nacú jehuíña'atajeñojlo, fariséonajlo, quele me'etení i'imacáñojlo. Pajlácachina necá. Iyamá té'ela ca'ala richa, nacaje nejátacare ícha naquiyana na'á Tupánajlo pajluhua'ala. Majopéjari quemachi ripuráca'alo na'á nanacajó. E'iyonaja uncá na'alá nanacajó Tupana puráca'alo, Moisesmi chu lana'acare i'imacá. Rimá nanacu, nala'acáloje palá penaje, nahue'epícaloje caja ajopana ina'uqué mu'ují penaje. Rimá caja nanacu, napechu i'imacáloje caphí Tupana chojé penaje. Marí caje la'acana uncá na'alá nanacajó. Tupana huátari nala'acá marí que ricá apú nacaje nala'acare hua'ató.

<sup>24</sup> Ina'uqué jehuíña'atajeño necá. E'iyonaja uncá huani hue'epílaño necá. Huejapa ñani uncá quemachi paala i'imacare, nahuata ca'acana nanaquiyó. E'iyonaja calé pu'uhuaré huani nala'acare, uncá nahuátala ca'acana nanaquiyó.

<sup>25</sup> 'Chapú huani ri'imajica Tupana puráca'alo nacú jehuíña'atajeñojlo, fariséonajlo, quele me'etení i'imacáñojlo. Pajlácachina huani necá. Majopeja caja nala'acá nanacuhuá palá



la'acaño que. E'iyonaja pu'uhuaré péchuruna necá. Nata'á ajopana ina'uqué nacaje aú. Canactújne'equena huani necá.

<sup>26</sup> Uncá nahue'epila pu'uhuaré nala'acare nacojé. Mejluruna que necá. Pamineco iná ca'á iná naquiyó pu'uhuaré iná la'acare, iná pechu la'acóloje palá raú penaje. Aú iná la'á palá.

<sup>27</sup> 'Chapú huani ri'imajica Tupana puráca'alo nacú jehuíña'atajeñojlo, fariséonajlo, quele me'etení i'ímacáñojlo. Támijimina ca'aquelana ina'uqué e'ejataño jareni aú, ramácoloje palá raú penaje. Palani ramaco. E'iyonaja re richu pu'uhwareni támijimina.

<sup>28</sup> Ñaqué caja necá. Palájne'equena que iná amaca necá. E'iyonaja pu'uhwareni napechu ne'iyá. Pajlácachina huani necá. E'iyonaja nala'á necó palá la'ajeño que ina'uqué ijlú chu.

<sup>29</sup> 'Chapú huani ri'imajica Tupana puráca'alo nacú jehuíña'atajeñojlo, fariséonajlo, quele me'etení i'ímacáñojlo. Pajlácachina necá. Nahuacára'a nala'acá Tupana puráca'alo ja'apátajeñoimi chuna tami pajré. Nachi'inami chuna nócarename chuna tami pajré nahuacára'a la'acana. Nahuacára'a caja natára'ataca jipa rahua'á, ina'uqué pechu capicháñaca piyá necá, palájne'equena huani ne'emacá.

<sup>30</sup> Nemá nanacuhua: "Hue'emaquela huachi'inami chuna i'ímaqué huacajé, uncá hua'alajla nañaté nenócana aú".

<sup>31</sup> Marí que nemacá. Caja nahue'epí nachi'inami chuna naquiyánami necá. Nachuhua ja'apácaño necá.

<sup>32</sup> Nala'ajica que caja nala'acá.

<sup>33</sup> 'Chapújne'equena huani necá. Uncá ina'uquélaruna necá. Marí que ne'emacale, uncá huani ne'emalajo quera'atani uncá yacálaré chiyá.

<sup>34</sup> Ne'iyajé nuhuacára'aje piño ajopana Tupana puráca'alo ja'apátajeño. Cajrú hue'epícaño ne'emajica. Palá nehuíña'atajica necá. Cajena nuhuacára'aje piño ne'iyajé. E'iyonaja calé nenoe nanaquiyana i'ahuaná apiyácacaname nacojé cúhua'ataqueja. Ajopana piño naña'ataje nahuacáca'alo ñacarelana chu. Apú pajimila nacojé, apú pajimila nacojé que nala'ajica necá chapú.

<sup>35</sup> Júpimi que na'ajútayami chuna nóqueño necá palájne'equena i'ímajicaño. Abelmi chu nócana aú riqueño'ó najló i'ímacá. Ajopana, ajopana que nenójica palájne'equena. Caja penaje nenó Zacaríasmi chu. Berequíasmí chu i'írí ri'ímacá. Tupana ñacaré chu, mesa yámajo nenó ri'ímacá ucapú ahua'á. Marí que nenoca ri'ímacá. Palájne'equena ne'emajica nenójicarena. Tupana huajájeri chapújne'equena me'etení i'ímacaño ajopana nócarena i'ímacá chona.

<sup>36</sup> Pu'uhuaré la'acaño, me'etení i'ímacaño, rihuaajaje richona ñaqué caja. Marí que huani najló ri'ímajica.

*Jesús iyari pu'uhuaré la'acáñoimi chuna hua'até, Jerusalén e i'ímacáñoimi chuna hua'até. Riyucuna marí:*

*(Lc 13.34-35)*

<sup>37</sup> Marí que Jesús quemacá Jerusalén e i'ímacáñoimi chuna nacú:

—Tupana huacára'aqueri ripuráca'alo ja'apátajeñoimi chuna Jerusalén erúnami chúnajlo i'ímajica. Nenoque nanaquiyana. Nanaquiyana cha naca'aque jipa. Pulapé nuhuátacajla nahuacátacana no'opiyá jema'ajeño penaje. Capere jahuacátaca ruyani ruyuphé ja'apejé que caja nuhuátaca nahuacátacana, ne'emacáloje no'opiyá jema'ajeño penaje. E'iyonaja uncá nahuátala.

<sup>38</sup> Chuhua uncá na calé i'ímajeri najhua'até namájeri penaje. Meñaru namájica nucá.

<sup>39</sup> Caja numá nanacu: "Uncá namálaje nucá" que. Nemájica ee nunacu marí que: "Palani ricá Tupana huacára'acare majó i'ímacá", ejéchami namájica piño nucá —que rimacá Jerusalén e i'ímacáñoimi chuna nacú i'ímacá.

## 24

*Nacajya'atájica Tupana ñacaré yucuna marí:*

*(Mr 13.1-2; Lc 21.5-6)*

<sup>1</sup> E caja Jesús jácho'oro Tupana ñacaré chiyá. Riqueño'ó ja'apácaje. E ra'apiyatéjena i'ijnaño rijhua'até pura'ajó Tupana ñacaré nacú.

<sup>2</sup> E rimá najló:

—Jema'á marí: Tupana ñacaré, amácare me'etení, jipa naquiyá la'acaname, uncá i'ímalaje maare. Aquijñojo ajopana chapú péchuruna, caya'atájeño ricá. Ejomi uncá pajluhuaja ñani jipa yurilajo pachácaca —que rimacá najló.

*Jesús quemari najló méqueca ri'imajica eja'ahuá chu, eja'ahuá capichájico yámona. Riyucuna marí:*

(Mr 13.3-23; Lc 21.7-24; 17.22-24)

<sup>3</sup> E ne'ejná yenuri ejo. Olivos yenuri íí. E Jesús yá'aro. Ra'apiyatéjena i'ijnaño rahua'ajé. Me'echú queja nemacá rijló marí que:

—¿Méquechamica ri'imajica pimíchaje nacú huajló? ¿Na aú chi ina'uqué hue'epeje pipa'ajico piño majó jená? ¿Na aú chi ina'uqué hue'epeje eja'ahuá capichájico jená?

<sup>4</sup> Jesús quemari najló:

—Jema'aniya ajopana puráca'alo ja'apiyá, napajlájicare aú ijhua'até.

<sup>5</sup> Iqui'iruna ina'uqué iphájeño. Na'ajé núí, neí hua penaje. “Ricá Tupana huacára'acare majó ina'uqué i'imatájeri penaje nucá”, que nemájica nanacuhúa apú, apú que. Napajlájica najhua'até. Cajrú ina'uqué jema'ajeño na'apiyá.

<sup>6</sup> Eyá yucu i'imajé marí que: “Chuhua nenócaco pajhua'atéchaca”. Ajopana nacú nemaje: “Yehuicha naqueño'ocá pajhua'atéchaca nócacano”. Marí que yucu i'imajica rihuacajé. Iquero'oniyó raú. Caja queja ri'imajica. Uncá jo'ó eja'ahuá tajnálajo nenócajico huacajé.

<sup>7</sup> Ajopana te'eré eruna nócajeño ajopana te'eré eyájena hua'até. Ajopana i'amacana hua'atéjena nócajeño ajopana i'amacana hua'atéjena hua'até. Cajrú ina'uqué taca'ajica me'epejí nacú rihuacajé. Cajrú huani natami caje nójica ina'uqué. Cajrú caja te'erí ñaca'ajico apú eyá, apú eyá que rihuacajé.

<sup>8</sup> Marí caje aú naqueño'ojé chapú caje yajhué ña'acana panacu.

<sup>9</sup> Najña'ajé icá, nala'acáloje icá chapú penaje. Nenoje icá. Chapú caja nahuó i'imajica ichá, no'opiyá jema'ajeño i'imacale.

<sup>10</sup> Cajrú nujhua'atéjena jácho'ojico no'opiyá i'amacana chiyá. Chapú napechu i'imajica panacuhuácaca raú. Nemaje panacuhuácaca ajopánajlo, nala'acáloje necá chapú penaje.

<sup>11</sup> Rihuacajé caja cajrú pajlácachina i'imajica. Nemaje nanacuhúa: “Tupana puráca'alo ja'apátajeño huecá” que. Raú cajrú ina'uqué jema'ajeño na'apiyá. Napajlaje najhua'até.

<sup>12</sup> Cajrú caja nala'ajica pu'uhuaré rihuacajé. Marí caje aú no'opiyá jema'ajeño jácho'ojico íqui'i pecohuácaca huátacana chiyá. Ñaque caja nácho'ojico íqui'i nuhuátacana chiyá.

<sup>13</sup> Uncá yurilajeño Tupana puráca'alo ja'apiyá i'amacana nataka'ajica ejená, necá Tupana i'imatájeri capichájo liyá.

<sup>14</sup> Tupana huátari ina'uqué huacára'ajeri i'amacana, ne'emacáloje palá penaje. Ne'ejnajé riyucuna i'imajé ajopánajlo, ajopánajlo que piyuque eja'ahuá chuhúa. Marí caje aú piyuqueja ina'uqué ajopana te'eré eruna, ajopana te'eré eruna que jema'ajica riyucuna. Piyuqueja ina'uqué jema'ajicaja riyucuna, ejéchami riphájica rená chojé, eja'ahuá tajnácoloje penaje.

<sup>15</sup> Natára'ataje nacaje pu'uhuareni huani Tupana ñacaré chojé. Tupana puráca'alo ja'apátajerimi chu, Daniel, i'imari riyucuna júpimi que. (Marí papera amájeñojlo numá: Ihue'epí meque quemacána ricá.)

<sup>16</sup> Natára'ataje nacaje pu'uhuareni Tupana ñacaré chojé. Marí que amájica ee ricá, icá Judea te'eré eruna ñaajeño ipuré e'iyajé.

<sup>17</sup> Rihuacajé ca'ajná e'iyajena i'imajeño pají i'ihuata chu. Pu'ucuja iñaajico reyá. Uncá imujlúca'alaje pají chojé nacaje ña'ajé pamineco.

<sup>18</sup> Apala e'iyajena i'imajeño imena e'iyá. Ica' caja ñaajeño pu'ucuja. Uncá caja ipa'alajo ñacaré chojé a'arumacaji ña'ajé pamineco.

<sup>19</sup> Chapú huani ri'imajica canupana inaánajlo rihuacajé. Chapú huani caja ri'imajica inaana cayaniquerunajlo. Re caja jo'ó i'iracaño chu'uchú nayani, quélejo ri'imajica chapú rihuacajé.

<sup>20</sup> Ipura'ó Tupana hua'até, ri'imacá piyá ipe'ení iñaajico huacajé. Ipura'ó caja rijhua'até, ri'imacá piyá huatána'acaje huacajé iñaajico huacajé.

<sup>21</sup> Rihuacajé cajrú ina'uqué amájica chapú caje yajhué. Tupana queño'orí piyuque eja'ahuá la'acana huacajé reyá maárejecha, uncá chapú caje huani i'imalá ñaque eja'ahuá chu. Uncá caja chapú caje huani i'imalaje ñaque reyá a'ajná ño'ojó.

<sup>22</sup> Tupana huitúca'atjeri najló rená, ri'imacá piyá júpija huani najló. Iqui'ija rihuátaca ina'uqué, ri'ihuapacárena rijluhua ajopana ina'uqué e'iyayá. Najló rihuitúca'ataje rená. Uncáquela rihuitúca'atalajla rená najló, uncá na calé i'imarojla capichájo liyá.

<sup>23</sup> Nemájica ijlo: “Iyacá'ó, ilé ina'uqué Tupana huacára'acare majó ina'uqué i'imatájeri penaje ricá”. Marí que nemájica ee ijlo, jema'aniya na'apiyá. Nemájica ee ijlo: “Iyacá'ó, a'ajna ricá”, jema'aniya caja na'apiyá.

<sup>24</sup> Cajrú ina'uqué i'imajeño. Majopeja napajlájica. Apú, apú que nemájica nanacuhúa: “Nucá Tupana huacára'acare majó ina'uqué i'imatájeri penaje”. Ajopana caja quemájeño nanacuhúa: “Huecá ja'apátajlo Tupana puráca'alo ina'uquejlo ra'apiyá que”. Nala'ajica caja cajrú nacaje uncá meño'ojó iná la'alare. Nená que'ená queja ri'imajica najló. Marí

caje aú ina'uqué a'ajeño nanacójo napuráca'alo. Cajrú napajlájica najhua'até. Tupana hua'atéjéna hua'ató caja nahuata pajlácana. E'iyonaja uncá meño'ojó napajlala najhua'até, uncale nema'alaje na'apiyá.

<sup>25</sup> Marí que ri'imajica. Uncá chiyó ri'imá ñaqué, numá ijlo rinacu.

<sup>26</sup> Ñaquele nemájica ee nunacu marí que ijlo: "Re ricá ya'ajná pu'uteni meñaru chu, amicha ricá", i'ijnaniya rejo ramaje. Uncá nucá calé ri'imajica. Nemájica ee: "Re ricá ucapú chu, amicha ricá", jema'aníya caja na'apiyá.

<sup>27</sup> Pichaní camaré patacá que je'echú chiyá que caja ina'uqué amájica nucá huaíchaca majó. Ina'uquéjloje penaje i'imacá nucá.

<sup>28</sup> Méreca nujhua'atéjéna i'imajeño, eyaja Tupana hua'atéjéna huá'ajeño necá.

*Jesús pa'ajico piño majó yucuna marí:*

*(Mr 13.24-37; Lc 21.25-33; 17.26-30, 34-36)*

<sup>29</sup> Ina'uqué amájeño cajrú huani chapú caje yajhué i'imajica. Rihuacajé uncá camú camaré i'imalaje. Uncá caja queri camaré i'imalaje. Ihuijina caje ja'ajeño je'echú chiyá. Piyuque nacaje je'echú chu i'imacare ñaca'ajero.

<sup>30</sup> Ejéchami namájica nucá huaíchaca je'echú chiyá majó. Ina'uquéjloje penaje i'imacá nucá. Namájica aú nucá huaíchaca, cajrú neyájica. Piyuqueja ina'uqué ajopana, ajopana que iyájeño. Namaje nucá huaíchaca juni suhuáca'ala e'iyohuá. Piyuque ina'uqué huacára'ajeri penaje nuphaje majó. Cajrú mejáma'atani i'imajica nohua'ó, hua'até nuphaje.

<sup>31</sup> Cajrú luhuiluhú caje mejé i'imajica. Ejéchami nuhuacára'ajica nujhua'atéjéna, je'echú chiyájéna, i'ijnacá ina'uqué huá'aje. Ina'uqué, nu'uhupacárena nujluhua ajopana ina'uqué e'iyayá, huá'aje ne'ejnaje. Piyuqueja huani eja'ahuá e'iyayá nahuá'aje necá.

<sup>32</sup> Ihue'epí nuphajica majó nacojé. Caja ihue'epí a'ahuná higuera nacojé. Ri'iché pitúca'ari, ripaná moto'ocáloje rinaquiyá penaje. Ri'iché pitúca'aca aú iná hue'epí jarechí iphaca rená chojé.

<sup>33</sup> Ñaqué caja ihue'epíjica nupa'ajico majó nacojé. Amájica aú nacaje numíchaje nacú, ihue'epeje yehuicha riphaca rená chojé caja penaje.

<sup>34</sup> Jema'á marí: Marí que ri'imajica ina'uqué tajnájico yámona.

<sup>35</sup> Je'echú, eja'ahuá hua'até tajnájero. E'iyonaja calé uncá nupuráca'alo tajnálajo. Numacá rinacu queja nacaje i'imajica.

<sup>36</sup> 'Uncá na calé hue'epiri méquechamíca ri'imajica numíchaje nacú. Na huacajeca ri'imajica, na camú jenaca ri'imajica, uncá nacú quemacana i'imalá méquechamíca que ri'imajica. Tupana hua'atéjéna, je'echú chu i'imacaño, uncá hue'epílaño méquechamíca ri'imajica. Nucá, Tupana i'irí, uncá caja hue'epila ricá. Ricaja calé, Tupana, hue'epiri méquechamíca ri'imajica.

<sup>37</sup> Noémi chu i'imacá huacajé que caja ri'imajica nupa'ajico yámona. Ina'uquéjloje penaje i'imacá nucá.

<sup>38</sup> Noémi chu i'imacá huacajé, Tupana huacára'ari cajrú juni ja'acó, pu'uhuaré la'ajeño capichácolaje racojé penaje. Uncá chiyó cajrú juni ja'acó, ina'uqué la'aqueño marí que: Na'ajnehuá ajñacana nacú, nacaje jalá i'iracana nacú ne'emaqué. Na'aque caja nayani pajlocaca, nahuá'acacoloje penaje. Marí caje nacuja ne'emaqué Noémi chu mujlúca'aca rihuapúruna chojé ejená.

<sup>39</sup> Uncá nahue'epila nacapichaco jená. Cajrú huani juni ja'acó i'imacá. Ricá acojé nacapichó i'imacá. Ñaqué caja ri'imajica ina'uquejlo nupa'ajico yámona. Uncá caja nahue'epílaje nuphaca. Ina'uquéjloje penaje i'imacá nucá.

<sup>40</sup> Nupa'ajico majó huacajé, nujhua'atéjéna, je'echú chu i'imacaño, huá'ajeño nujhua'atéjéna, eja'ahuá chu i'imacaño. Ajopana e'iyayá nahuá'aje necá. Nupa'ajico huacajé, iyamá ina'uqué ca'ajná i'imajeño namena e'iyá. Nujuhua'atéjéna, je'echú chiyájéna, huá'ajeño pajluhuaja nanaquiyana. Apú yuréjero, uncá jema'alá no'opiyá.

<sup>41</sup> Rihuacajé caja iyamá inaana tujla'ajeño nacaje pajñacani ca'ajná, nacaje tujláca'aruna chu. Nahuá'aje pajluhuájaruja, nujhua'atéjeru ru'umacale. Apa'ahuelo yuréjeyo, uncá jema'alayo no'opiyá.

<sup>42</sup> 'Timá ilere lámá'ataquejami que pu'uhuaré ila'acare liyá nupé. Uncá ihue'epílaje méquechamíca nupa'ajico piño majó.

<sup>43</sup> Jema'á marí: Paminá hue'epíquela méquechamíca ata'ajeri iphaca nacaje ata'ajé riñacaré chiyá lapí, uncá ricamátalojla. Cajmuni ri'imajla ramaca riphaca ejená. Uncá riyurilajla rimujlúca'aca riñacaré chojé nacaje ata'ajé.

<sup>44</sup> Ñaqué caja ilamá'ataca ipéchuhua nupé. Uncá caja ihue'epílaje noná. Mana'í chiyó nuphájica inacu majó.

*Jesús i'imari najló yucu, rehuíña'atacaloje necá palá la'acana nacú penaje. Riyucuna marí: (Lc 12.41-48)*

<sup>45</sup> Re ca'ajná apú hua'até sápaferi. Ricarihuete huátari ca'ajná ya'ajnao i'ijnacana. Aú riyuricha ricá a'ajnejí tamáca'atajeri penaje, ritamáca'atacaloje rijhua'até sápafeñojlo a'ajnejí riphaca rená chojé ejéchami. La'ari risápaca'alo palá, jema'ari ra'apiyá. Capechuni ricá.

<sup>46</sup> Pala ricarihuete iphari rinacu huajátacajo. Amari rila'acá palá rihuacára'aca ricá que. Palá ricarihuete la'ajica ricá raú.

<sup>47</sup> Ra'ajé ricá ca'ajná piyuqueja rinane amájeri penaje.

<sup>48</sup> Eyá uncá ina'uquélari ri'imaquela, rimajla marí que ricarihuete nacú ya'ajná jo'ó ri'imaqué huacajé: “Meque júpja huani nucarihuete malá'ataca ricó rehuá. Uncá riphálaje quíñaja”.

<sup>49</sup> Raú ca'ajná riqueño'ójla ricarihuete hua'até sápafeño la'acana chapú. Cajrú ra'ajnehuá ajñacana nacú ri'imacajla. Cajrú cahuí caje i'iracana nacú ri'imacajla ajopana yuhuéra'achona hua'até.

<sup>50</sup> Huajátacajo ricarihuete ipháquela rinacu, rihuajácajla ricá íqui'ija huani.

<sup>51</sup> Rihuacára'ajla ricá ya'ajnae, rijña'acáloje chapú caje yajhué panacu pajlácachina hua'até penaje. Re caja riyajla cajrú. Rajma'ajla raí hua cajrú. quehuini yajhué a'acuhuaná.

## 25

*Jesús i'imari najló iyamá té'ela quele ináyana yucuna, rehuíña'atacaloje necá raú penaje.*

<sup>1</sup> 'Ina'uqué naquiyana huacára'ajeri penaje Tupana. Chuhua nu'umajica ijlo yucu, ihue'epícaloje rinacojé raú penaje. Iyamá té'ela quele ináyana i'ijichaño lapí ajopana huá'acaco ojo. Nacamare i'imichari nacapi. Nacaje jilá aú nacamaré lucúni'icharo. Ne'ejichá ru'uhuapánipe huátaje, ne'ejnacáloje rijhua'até penaje.

<sup>2</sup> Ajopana, pajluhua té'ela quele caja i'imichaño capéchuruna. Pajluhuaaja té'ela quele ináyana naquiyana i'imichaño mapéchuruna.

<sup>3</sup> Necá ji'ichaño nacamareja najhua'ató. Uncá najña'alacha najhua'ató nacaje jilá, naco'ocáloje rapumí chojé ritajnájico ee penaje.

<sup>4</sup> Eyá capechúrúna ji'ichaño nacamaré, nacamaré jilá huíluru chu najhua'ató.

<sup>5</sup> E caja ne'ejichá rihuátaje. Nahuáchiya ricá. Uncá riphálacha. Nahuáchiya ricá. Uncá. Júpja rimalá'achiyaca ricó. Caja ehuaaja tapú nóchari necá. E caja ehuaaja nacamáchiyo. Matámiruna que ne'emichaca reyá.

<sup>6</sup> Lapi nenaji que nemi'ichá pajluhuaaja jahuíyo'oca: “Ilé huaícha. I'ijná, amíchachi chuhua ricá”.

<sup>7</sup> Aú nácho'ochó piyuque. Nalamá'achiyá nacamaré.

<sup>8</sup> Ejéchami mapéchuruna quemíchaca capéchurunajlo: “A'á huajló huejapa icamaré jilá naquiyana. Yehuíchaja huacamaré yacaca”.

<sup>9</sup> E'iyonaja capechúrúna quemíchaño najló: “Uncá hua'alaje ijlo rinaquiyana. Hua'aquela ijlo rinaquiyana, uncá riphálajla huanacojé. I'ijná ra'aque'lana ojo, ihuarúhua'achi ijluhua ricá reyá,” que nemíchaca najló.

<sup>10</sup> Aú ne'ejichá rihuarúhua'aje. A'apona ru'uhuapánipe iphíchaca. Ji'ichaño nacamaré jilá najluhua najhua'ató, necaja calé mujlúqui'ichaño rijhua'até pají chojé nahuá'acaco amaje. Namujlúqui'ichaca ejomi richahuíji'icha pají numaná.

<sup>11</sup> Quéchami ajopana ináyana iphíchaca piño. Nemá paminajlo: “Paminá, pijme'etá huajló rinumaná”.

<sup>12</sup> E'iyonaja rimicha najló: “Uncá huani nuhue'epila mecajenaca icá”. Caja quetana riyucuna.

<sup>13</sup> E Jesús quemari yucu jema'ajéñojlo:

—Ijló caja numá. I'imá capéchuruna, lámá'ataquejami que ipechu i'imacáloje nupé penaje. Uncá ihue'epilaje mequechamaca nuphájica. Ina'uquéjloje penaje i'imacá nucá.

*Nacarihuete a'ari rijhua'até sápafeñojlo liñeru. Riyucuna Jesús i'imari najló marí que, rehuíña'atacaloje necá rinacojé penaje.*

*(Lc 19.11-27)*

<sup>14</sup> 'Ina'uqué naquiyana huacára'ajeri penaje Tupana. Chuhua nu'umajica yucu ijlo, ihue'epícaloje nupa'acó piño majó nacojé raú penaje. Pajluhuaaja ina'uqué i'imichari. Rihuáchiya ya'ajnae ajopana te'eré ojo i'ijnacana. Ri'ijichaca yámona rihuá'icha rijhua'até sápafeño maná. Nephicha rinacu. E ra'achá najló riliñerute naquiyana, nala'acáloje nacaje raú ri'imacá rejo quetana.

<sup>15</sup> Pajluhuaájalo ra'achá cincuenta mil. Apujlo ra'achá veinte mil. Apujlo ra'achá diez mil. Nahue'epica nacaje nacojé loco'opáneje ra'achaca najló liñeru. Palá hue'epicajlo ra'achá

cajru liñeru. Ra'apejé péchurijlo ra'achá ra'apejeja caja liñeru. Marí que ra'achaca najló liñeru ri'ijichaca yámona. Quéchami ri'ijichaca ají que a'ajná ño'ojó ajopana te'eré ejo.

<sup>16</sup> Ricá, ra'achájeilo cincuenta mil, huarúhui'ichari nacaje, rijña'acáloje rejé caja liñeru.

<sup>17</sup> Ñaqué caja apú li'ichaca ra'achájeilo veinte mil, ricá huarúhui'ichari nacaje, riphátacaloje veinte mil caja richaje.

<sup>18</sup> Eyá ricá, ra'achájeilo diez mil, ricá si'ichari rile'ejé te'eré e'iyajé.

<sup>19</sup> Júpija nacarihuate i'imichaca rehuá ajopana te'eré nacú. E caja ehujaja ripi'ichó rapumí chuhúa, ramácaloje rijhua'até sápañeño ra'achájenajlo liñeru penaje. Rihuata hue'epícana méqueca nala'acá liñeru hua'até.

<sup>20</sup> Ricá ra'achájeilo cincuenta mil, i'ijichari ramaje pamineco. E ra'achá rijló liñeru ra'achaje rijló júpimi que. Richaje ra'achá rijló liñeru ricánichaje hua'ató. Rimicha rijló: "Nucarihuate, picá a'arí nojló cincuenta mil i'imacá. Caja nucana richaje ñaqueja caja cincuenta mil caja. Pa, marí ricá".

<sup>21</sup> "Je. Ñaqué ricá", que ricarihuate quemíchaca rijló. "Palani huani picá. Palá pisápaca nujhua'até. Caja pila'á palá huejápaja aú. Chuhua no'ojica pijló richaje huani, pila'acáloje nacaje raú penaje. Pimujlúca'a majó, pi'imachi queyajupa nujhua'até", que rimíchaca rijló.

<sup>22</sup> A'ajná ño'ojó chami pani apú rijhua'até sápañeri iphíchari piño rinacu. Ra'achájeilo veinte mil ri'imíchaca. Riphicha rinacu, rimicha rijló: "Nucarihuate, picá a'arí nojló veinte mil i'imacá. Caja nucana richaje veinte mil caja. Pa. Marí ricá".

<sup>23</sup> "Je. Ñaqué ricá", que ricarihuate quemíchaca. "Palani huani picá. Palá pisápaca nujhua'até. Caja pila'á palá ujú caje ñani aú. Chuhua no'ojica pijló richaje huani, pila'acáloje nacaje raú penaje. Pimujlúca'a majó, pi'imachi queyajupa nujhua'até", que rimíchaca rijló.

<sup>24</sup> E caja penaje apú rijhua'até sápañeri iphíchari rinacu. Ra'achájeilo diez mil júpimi que. Riphicha ricarihuate nacú. Rimicha rijló: "Nucarihuate, nucá hue'epiri pihuacára'aca caphí ina'uqué. Pihuacára'a nejátaca pijló nacaje, richa i'imacáloje pijluhua penaje. Uncá pisápala pimena e'iyá. E'iyonaja re nacaje re'iyayá pijló penaje.

<sup>25</sup> Aú nuquero'ó pipiyá. A'acuhuaná nusa'á piliñérite te'eré e'iyajé me'echú. Pa, ricá cari", que rimíchaca rijló.

<sup>26</sup> Ricarihuate quemíchari rijló: "¡Meque uncá huani ina'uquéleri ta picá! Maliyaru huani picá ta. Pihue'epícare mecajeca nucá. Pihue'epícare caja nejátaca nojló nacaje, richa i'imacáloje nujluhua penaje. Pihue'epícare caja uncá nusápala numena e'iyá. E'iyonaja re nacaje re'iyayá nojló penaje.

<sup>27</sup> Caja pihue'epícare marí caje nucá. Pihuacára'aqueja liñeru lamá'atacana liñeru ñacarelana chojé, naya'atajla ajopánajlo ricá, nacánacaloje richaje raú penaje. Ají que la'acana aú pipa'atácjla nojló nuliñérite, richaje hua'até", que rimíchaca rijló.

<sup>28</sup> E rimicha re i'imíchacañojlo: "Ijña'á riliyá liñeru, a'achí cien mil i'imacare cápjlo ricá.

<sup>29</sup> Cajru nacaje i'imacárena cápjlo no'ojé richaje. Uncá na i'imalárena capi liyá, nujña'ajé huejapa nacaje i'imacare nacapi.

<sup>30</sup> Iqui'ichá ilé nujhua'até sápañeri, maliyaru, ají que calajeruni chojé. Re cajru neyájica, cajru najma'ajica naí hua, namájicale chapú caje yajhué", que rimíchaca najló. Caja quetana riyucuna.

*Eja'ahuá tajnájico huacajé Jesús quemájeri piyuque ina'uqué nacú, méqueca nala'acana nacaje nala'acare jimaje. Riyucuna marí:*

<sup>31</sup> Jesús quemari piño marí que najló:

–Ina'uquéloje penaje i'imacá nucá. Aquijñojo nucá huaícha piño majó piyuque ina'uqué huacára'ajeri penaje. Cajru nujhua'atéjena, je'echú chiyájena, i'imajica nohua'á. Ajopana chaje huacára'ajeri nu'umajica rihuacajé.

<sup>32</sup> Piyuqueja ina'uqué eja'ahuá chu i'imacaño, ajopana te'eré eyájena, ajopana te'eré eyájena que, necá jahuacájeño nujimaje. Quéchami nutamáca'atajica necá ne'iyayá. Ohuéjana lamára'ajeri tamáca'ataca ohuéjana cahuayana piracana e'iyayá, que caja nutamáca'atajica necá paliyácaca.

<sup>33</sup> Nutamáca'ataje nujhua'atéjena, palá la'acaño, pu'uhuaré la'acaño e'iyayá. Nujhua'atéjena, palá la'acaño, palá nupechu i'imajica nanacu. Necá i'imajeño ca'añá chojé pitá nohua'á. Eyá necá, pu'uhuaré la'ajeño, chapú nupechu i'imajica nanacu. Pajru chojé pitá ne'emajica nohua'á.

<sup>34</sup> E nucá, Nahuacára'ajeri, quemájeri marí que no'opiyá jema'ajéñojlo, nuca'añare chojé pitá i'imajícañojlo numaje:

–Palá huani Tupana, Nora'apá, la'acá icá. Chuhua i'imajica palá huani nujhua'até je'echú chu. Ijlo penaje Tupana lamá'atari ricá. Tupana queño'ótaca eja'ahuá huacajé, caja queja lamá'ataquejami ri'imacá ijloje penaje.

<sup>35</sup> Quehuí nojló me'epejí i'imaqué, icá a'aqueño nojló a'ajnejí. Nunúru'upi chu macára'ataco i'ímá huacajé, icá caja a'aqueño nojló i'iracaje. Ajopana te'eré eyaje que nu'umaqué ijhua'até huacajé, icá caja quemáño nojló, nu'umacáloje iñacaré chu ijhua'até penaje.

<sup>36</sup> Camu'ují nula'aqué a'arumacaji nacú huacajé, icá caja a'aqueño nojló ricá. Nutami nu'umaqué huacajé, icá caja i'ijnaqueño nuchaje. Ina'uqué huajáquelana chu nu'umaqué huacajé, icá caja i'ijnaqueño nuchaje —que numájica najló.

<sup>37</sup> E palá nupechu i'ímárena nacú quemájeño nojló marí que:

—Huahuacára'ajeri, ¿Mérohuacaje hua'acá pijló a'ajnejí, quehuí me'epejí i'imaqué pijló huacajé, pimá nacú? ¿Mérohuacaje hua'acá pijló i'iracaje, pinúru'upi chu macára'ataco huacajé?

<sup>38</sup> ¿Mérohuacaje huemaqué pijló, pi'ímáloje huañacaré chu huajhua'até penaje, ajopana te'eré eyaje que pi'imaqué huacajé huajhua'até? ¿Mérohuacaje hua'aqué pijló a'arumacaji, camu'ují pila'aqué huacajé a'arumacaji nacú?

<sup>39</sup> ¿Mérohuacaje hue'ejnaqué pichaje, pitami pi'imaqué huacajé? ¿Mérohuacaje hue'emacá pichaje, ina'uqué huajáquelana chu pi'imaqué huacajé? —que nemájica nojló.

<sup>40</sup> Eyá nucá, Nahuacára'ajeri, quemájeri najló:

—Jema'á marí: Marí que ila'ajica palá no'opiyá jema'ajeño naquiyana i'imajica. Ajopana ja'apejena ca'ajná ne'emajica. Palá ila'ajica necá i'imajica. Ñaqué caja ila'ajica nucá palá raú —que numájica najló, jema'año no'opiyajlo.

<sup>41</sup> Eyá ajopánajlo, uncá jema'alaño no'opiyajlo, nucá ina'uqué huacára'ajeri, quemájeri marí que:

—Ja'apá nuliya. Caja Tupana yerúca'acarena chaje icá. I'ijná quera'atani uncá yacálare chojé. Caja lamá'ataqueja ricá Jiñá Chi'ináricanajlo, rijhua'atéjenajlo hua'até.

<sup>42</sup> Quehuí nojló me'epejí i'imaqué huacajé, uncá a'aqué nojló a'ajnejí i'ímá. Nunúru'upi chu macára'ataco huacajé, uncá caja a'aqué nojló juni i'imajica.

<sup>43</sup> Ajopana te'eré eyaje que nu'umaqué huacajé ijhua'até, uncá caja imaqué nojló, nu'umacáloje iñacaré chu ijhua'até penaje. Camu'ují nula'aqué huacajé a'arumacaji nacú, uncá caja a'aqué nojló a'arumacaji. Nutami nu'umaqué huacajé, uncá caja i'ijnaqué nuchaje. Ina'uqué huajáquelana chu nu'umaqué huacajé, uncá caja i'imalá nuchaje —que numájica najló, uncá jema'alaño no'opiyajlo.

<sup>44</sup> E necá caja quemájeño nojló marí que:

—¿Mérohuacaje uncá hua'alá pijló a'ajnejí, quehuí pijló me'epejí i'imaqué huacajé? ¿Mérohuacaje uncá hua'alá pijló i'iracaje, pinúru'upi chu macára'ataco huacajé? ¿Mérohuacaje uncá huemaqué pijló, pi'ímáloje huañacaré chu huajhua'até penaje, ajopana te'eré eyaje que pi'imaqué huacajé huajhua'até? ¿Mérohuacaje uncá hua'aqué pijló a'arumacaji camu'ují pila'aqué huacajé a'arumacaji nacú? ¿Mérohuacaje uncá hue'ejnaqué pichaje, pitami pi'imajica huacajé? ¿Mérohuacaje uncá hue'ejnala pichaje pi'imaqué huacajé ina'uqué huajáquelana chu? —que nemájica nojló rihuacajé.

<sup>45</sup> E nucá, ina'uqué huacára'ajeri, quemájeri najló:

—Jema'á marí: Uncá ila'alá palá no'opiyá jema'ajeño naquiyana. Ajopana ja'apejena ca'ajná ne'emajica. Uncá ila'alá necá palá i'ímá. Raú ñaqué caja ila'acá nucá —que numájica najló, uncá jema'alaño no'opiyajlo.

<sup>46</sup> Marí que numájica najló ejomi na'apájica nuliya, ne'ejnacáloje nahuajáquelana ojo penaje. Matajnaco ne'emajica re. Eyá ajopana, palá la'ajeño, i'ijnajeño je'echú chojé, ne'emacáloje caja re matajnaco penaje.

## 26

*Nahuacára'ajeño pura'acó pajhua'atéchaca Jesús nócana nacú yucuna marí:  
(Mr 14.1-2; Lc 22.1-2; Jn 11.45-53)*

<sup>1</sup> Caja Jesús i'imari najló yucu. Ejomi rimá ra'apiyatéjenajlo marí que:

<sup>2</sup> —Caja ihue'epí apacala hua'apátajica fiesta, Pascua ríi. Ina'uquéloje penaje i'ímá núcá. Rihuacajé na'ajé núcá ajopánajlo, nacúhua'atacaloje núcá a'ahuaná apiyácanami nacojé penaje —que rimacá najló.

<sup>3</sup> E caja cajrú ajopana jahuacaco sacerdotena huacára'ajeño ñacaré cópeje. Sacerdotena huacára'ajeño, Tupana puráca'alo nacú jehuíña'atajeño, peñahuilana, quele necá jahuacaño Caifás ñacaré cópeje. Sacerdotena huacára'ajeri huani ricá Caifás i'ímá.

<sup>4</sup> Re napura'ó pajhua'atéchaca Jesús nacú. Nahuata rijhua'até pajlácana, najña'acáloje ricá, nenócaloje ricá penaje. Ricá nacú napura'ó pajhua'atéchaca.

<sup>5</sup> E nemá:

—Uncá huajña'alaje ricá fiesta e'iyá. Ñaquejlaca cajrú ina'uqué yúcha'acojla huachá raú.

*Apa'ahuelo aco'ocá nacaje jilá Jesús huilá e'iyajé yucuna marí:*

*(Mr 14.3-9; Jn 12.1-8)*

<sup>6</sup> Betania e Jesús i'imari. Simón hua'até ri'imacá riñacaré chu. Napona patáca'ataro penájami ri'imacá.

<sup>7</sup> Rijhua'até ri'imá. Na'ajnehuá ajñacana nacú ne'emacá ee apa'ahuelo ña'ayó nacaje jilami Jesús jimajo. Huiluru chu ri'imacá. Jipa alabastro naquiyá la'acanamí huiluru i'imacá. Pu'umé jamarí nacaje jilami i'imacá. Marí rujña'á Jesús jimajo. E roco'ó rihuilá e'iyajé ricá.

<sup>8</sup> Marí caje aú ra'apiyatéjena yúcha'año ruchá. Nemá pajlocaca:

—¿Naje majopeja huani ta rucupíchaca ricá!

<sup>9</sup> Cahuemini huani ilé caje jilá. Ro'oquela ajopánajlo ricá, na'ájla rojló cajrú liñeru. Ricá aú ro'ójla camu'ují la'acaño ñaté. Marí que la'acana i'imajla palani —que napura'acó pajhua'atéchaca.

<sup>10</sup> Jesús hue'epiri méqueca nemacá runacu. Aú rimá najló:

—¿Naje chi iqu'i'ichá pu'ují caje rupechu naquiyá? Palá ruli'ichaca nucá raú.

<sup>11</sup> Ihuátajica ee camu'ují la'acaño ñaté a'acana, re necá ijhua'até ñaqueja. Eyá nucá, unca nu'umalaje ijhua'até ñaqueja.

<sup>12</sup> Pu'umé jamarí quejilani roco'ochá nunacojé. Aú rulamá'achiya nunapona, nasa'ajica nucá huacajé penaje.

<sup>13</sup> Jema'á marí: Tupana i'imatari ina'uqué capichácajo liyá. Ne'ejnajé riyucuna i'imajé ajopana, ajopánajlo que. Ne'emajé caja méqueca ruli'ichaca nucá huajé yucuna najló, napechu capicháñaca piyá rucá penaje —que Jesús quemacá najló.

*Judas a'acá ripinánajlo Jesús yucuna marí:*

*(Mr 14.10-11; Lc 22.3-6)*

<sup>14</sup> E caja Judas i'ijnari sacerdoténa huacára'ajeño hua'até pura'ajó. Iyamá iphata ji'imaje nacojé quele Jesús ja'apiyatéjena naquiyana ri'imacá.

<sup>15</sup> Rimá rijló:

—¿Merejé pa'ajica nojló liñeru, no'ojica ee ijlo Jesús?

Aú na'á rijló treinta parata cahuemí nojé. Pa'u queta queri quetana iná sápara huemí ejé que ri'imacá.

<sup>16</sup> Reyá a'ajná ño'ojó Judas quejila'ari Jesús, ramácaloje méqueca ra'acajla najló ricá.

*Jesús ajñari ra'ajnehuá ra'apiyatéjena hua'até nenoca ricá yámona. Riyucuna marí:*

*(Mr 14.12-25; Lc 22.7-23; Jn 13.21-30; 1 Co 11.23-26)*

<sup>17</sup> E caja naqueño'ó fiesta ja'apátacana. Riqueño'ojica quehuá najñajica pan mamúra'atacanaru. E ra'apiyatéjena i'ijnano Jesús ahua'ajé. Nemá rijló:

—¿Mere chi pihuata huala'acá fiesta pascua a'ajnená?

<sup>18</sup> Rimá najló:

—I'ijná a'ajná ño'ojó pajimila ejo. Amájica ee apú, imaje rijló: “Huehuíña'atajeri quemíchari pinacu, caja riphicha rená chojé, nomácaloje chapú caje yajhué penaje. Piñacaré chu noññaje no'ojnehuá no'opiyatéjena hua'até”, que imájica rijló nunacu.

<sup>19</sup> E caja ra'apiyatéjena i'ijnano ají que a'ajná ño'ojó. Nala'á Jesús quemacá najló que. Nala'á fiesta pascua a'ajnená.

<sup>20</sup> Lapichami najñá na'ajnehuá Jesús hua'até. Iyamá iphata ji'imaji nacojé quele ra'apiyatéjena i'imaño rijhua'até.

<sup>21</sup> Najñaca na'ajnehuá nacú rimacá najló:

—Marí que ri'imajica: Pajluhuaja inaquiyana maare, a'ajeri nucá nupinánajlo.

<sup>22</sup> Marí que rimacá aú camu'ují napechu la'acó. Nemá rijló pajehuémichaca que:

—¿Nucá chi quele pimá nacú?

<sup>23</sup> Jesús quemari najló:

—Ajñari ra'ajnehuá nujhua'até marí paratú chiyá, ricá numá nacú, a'ajeri nucá nupinánajlo.

<sup>24</sup> Ina'uquéloje penaje i'imacá nucá. Nala'ajica nucá chapú Tupana puráca'alo lana'aquejami quemacá que nunacu. E'iyonaja calé chapú huani ri'imajica rijló a'ajeri nucá nupinánajlo. Uncáquela rimoto'ójla i'imacá, palani ri'imacajla rijló. Raú unca Tupana huajálajla ricá cajrú huani.

<sup>25</sup> Aú Judas, ripinánajlo a'ajeri, quemari Jesusjlo:

—Huehuíña'atejeri, ¿Nucá chi quele pimá nacú?

—A'a, picá —que Jesús quemacá rijló.

<sup>26</sup> Najñaca na'ajnehuá ee Jesús ña'arí pan ricápojo. Rimá Tupánajlo:

—Palá pila'acá huecá marí pan aú.

Ejomi ritupa'á rinaquiyana. E ritamáca'ata ra'apiyatéjenajlo pan tupa'aqueja. Rimá najló:

—Ajñá ricá. Nunapona ricá.

<sup>27</sup> Quéchami rijña'acá piño chiyela ricápojo. Cajmú epepi inarí icha jalá amúra'atacanami i'imari richu. Rimá Tupánajlo:

—Palá pila'acá huecá marí cajmú caje jalá aú.

E rimá ra'apiyatéjenajlo:

—Marí i'irá. A'á ijluhua ricá piyuque, i'irachi ricá.

<sup>28</sup> Nura ricá. Nura i'ijnajeri nophú chiyá ina'uqué chaya penaje. Marí caje aú Tupana amájero cajrú ina'uqué chaje, pu'uhuaré nala'acare liyá. Nura palamane Tupana la'ajeri ina'uqué nacú palá.

<sup>29</sup> Uncá nu'uralaje cajmú epepi inarí icha jalá ijhua'até marí eja'ahuá chu piño. Nu'urajé piño ricá ijhua'até Nora'apá hua'até je'echú chu. Rihucacajé nu'urajé apú caja jalá ijhua'até re —que Jesús quemacá ra'apiyatéjenajlo.

*Pedro micho'otaca Jesús chaya yucuna marí:*

(Mr 14.26-31; Lc 22.31-34; Jn 13.36-38)

<sup>30</sup> Caja penaje nataní Tupana yale. Ejomi ne'ejná yenuri Olivos ejo.

<sup>31</sup> E Jesús quemari najló:

—Ñaanó pani ipechu la'ajó piyuque ujhuí nuliya. Ja'apáñaje nucá. Marí que Tupana puráca'alo lana'aquejami quemacá huanacu: “Nonoje ohuéjana lamára'ajeri naliya. Raú macajmálaja ohuéjana ñaajico”, que rimacá huanacu.

<sup>32</sup> Nenoje nucá. Numacápo'ojico ejomi nu'ujnajé Galilea ejo itucumá —que rimacá najló.

<sup>33</sup> E Pedro quemari rijló:

—Ajopana pechu ca'ajná la'ajero ujhuí piliya. Eyá nucá, nupechu uncá la'alajo ujhuí piliya.

<sup>34</sup> Jesús quemari rijló:

—Numá pijló, marí lapí capere yaca'acá piyá pimicho'otájicaja nuchaya hueji que pe —que rimacá rijló.

<sup>35</sup> Pedro quemari rijló:

—Nenoje ca'ajná nucá pijhua'até raú. E'iyonaja calé uncá numicho'otálaje pichaya.

Ajopana ra'apiyatéjena quemañe ñaqueé caja.

*Ne'ejná apucunaji ejo. Rií Getsemaní. Riyucuna marí:*

(Mr 14.32-42; Lc 22.39-46)

<sup>36</sup> E caja Jesús i'ijnari ra'apiyatéjena hua'até Getsemaní ejo. Ñaqueja ne'ejnajica rejo i'imajica. E rimá najló:

—Maare iyá'o. Ihuata nucá, nupura'acó Tupana hua'até a'ajná ño'ojó quetana.

—Je —que.

<sup>37</sup> E rihua'a a'ajná ño'ojó quemachi rijhua'ató Pedro, Juan, Santiago, queleja. Zebedeo yaní necá Juan, Santiago. Rihua'a necá a'ajná ño'ojó quemachi. Ejéchami ripechu la'acó apú que; camu'ují huani ripechu la'acó.

<sup>38</sup> Rimá najló:

—Camu'ují huani nupechu. Uncá meño'ojó nujña'alá panacu. Caja rimajáqui'icha nuhua-jhué. Iyuró maare. Pa. I'imá cajmuruna nujhua'até; icamátaniyo.

—Je —que nemacá.

<sup>39</sup> E Jesús ja'apáñari necá a'ajná ño'ojó pani. Re rito'ó pajima'aló te'erí e'iyá. Ripura'ó Tupana hua'até, rimá rijló:

—Nora'apá, pihuátajica ee, pa'apata nuliya chapú caje yajhué nomájacare ñaanó pani. Pila'aníya nuhuátaca que. Pihuátaca que pila'acá —que rimacá Tupánajlo.

<sup>40</sup> E rácho'o. Ripa'ó piño ra'apiyatéjena amaje. Amari nacamátaco. Rimá Pédrojlo:

—¿Uncá meño'ojó chí pi'imaláchajla cajmuni nujhua'até pajluhua camú jená quetana?

<sup>41</sup> I'imá cajmurúnajica. Ipura'ó Tupana hua'até ila'acá piyá pu'uhuaré. Re ricá iná pechu nacú, iná la'acáloje palá penaje. E'iyonaja calé uncá meño'ojó iná iphátala palá la'acana iná icó —que rimacá najló.

<sup>42</sup> E ri'ijná piño Tupana hua'até pura'ajó. Rimá piño rijló:

—Nora'apá, pihuátajica ee pa'apata nuliya chapú caje yajhué nomájacare ñaanó pani. Pila'á pihuátaca que nucá.

<sup>43</sup> E ripa'ó piño ra'apiyatéjena amaje. Amari nacamátaco piño. Caja tapú chá'atari necá.

<sup>44</sup> Ejéchami uncá rapótala necá. Caja ripa'ó piño Tupana hua'até pura'ajó. Hueji que pe la'acá ñaqueja caja rimacá rijló.

<sup>45</sup> E ripa'ó piño ra'apiyatéjena amaje. Rimá najló:

—¿Ejo'ocaja chí icamátaco maare? ¿Huatána'acaje nacuja chí icá? Ihuatána'a. Caja riphicha rená chojé. Ina'uquéloje penaje i'imagá nucá. Chuhua na'ajica nucá pu'uhuaré la'acáñojlo.

<sup>46</sup> Chuhua jácho'o, i'ijná hue'ejnachí. Caja ilé huaícha, a'ajeri nucá pu'uhuaré la'ajéñojlo.



*Napatacá Jesús yucuna marí:**(Mr 14.43-50; Lc 22.47-53; Jn 18.2-11)*

<sup>47</sup> Jesús pura'acó ra'apiyatéjena hua'até ejé Judas iphaca rinacu. Iyamá iphata ji'imaje nacojé quele ra'apiyatéjena naquiyana ri'imacá. Riphá rinacu cajrú ajopana ina'uqué hua'até. Sajalu caje, cuyúhua'ala caje hua'até nephá rinacu. Sacerdótena huacára'ajeño, peñahuilana, quele puráca'alo aú ne'ejná rejo ripataje.

<sup>48</sup> Judas a'arí ripinánajlo Jesús. Maapami que rimacá rijhua'até i'ijnacáñojlo mecajeca ricá. Rimá najló marí que i'imacá:

—Pu'uhuacá nuchiño'ojica rijimá chiyá, ricá ipataje —que rimacá rijhua'até i'ijnacáñojlo maapami que.

<sup>49</sup> E caja riphá Jesús nacú. Rajalaca Jesús. Rimá rijló:

—Huehuíña'atajeri —que.

Ejéchami richiño'ocá rijimá chiyá.

<sup>50</sup> Jesús quemari rijló:

—Nujhuáque'ehue, ¿naje pi'ijichá?

Eja netá Jesús cha; patañó ricá.

<sup>51</sup> Ejéchami pajluhuaja ra'apiyatéjena naquiyana jero'ocá risajálune ra'aruná chiyá. Ricá aú ricá'á apú i'ijhuí. Sacerdótena huacára'ajeri hua'até sápaajeri ri'imacá.

<sup>52</sup> Aú Jesús quemari rijló:

—Pipa'atá ra'arú chojé pisajálune. Sajalu aú nócaño capichájeño raú.

<sup>53</sup> Nuhuátaquela, numacajla Nora'apajlo, raú rihuacára'ajla setenta mil rijhua'atéjena je'echú chiyá majó. Necá mejñátañojla nucá naliyá.

<sup>54</sup> E'iyonaja marí que rila'aquela, uncá ri'imalajla Tupana puráca'alo lana'aquéjami quemacá que nunacu. Richuhúa ne'ejnataca ricá me'etení nala'acare aú —que rimacá rijló.

<sup>55</sup> E rimá ajopánajlo:

—Caja i'ijichá majó nujña'ajé sajalu hua'até, cuyúhua'ala caje hua'até. Meque ata'acachi que huani ila'acá ijluhua nucá. Hue'echú ca'alá queja nu'umajícano Tupana ñacaré chu ina'uqué jehuíña'atacana nacú. E'iyonaja uncá ijña'alá nu'umacá rihuacajé.

<sup>56</sup> Marí que ila'acá nucá me'etení yucuna, Tupana puráca'alo ja'apátajeñomi chuna lana'año papera chojé i'imacá —que rimacá najló.

Ejéchami piyuque ra'apiyatéjena ja'apáñaca Jesús. Neñaó reyá.

*Naculácataco Jesús nacú yucuna marí:**(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> E caja najña'á Jesús ají que ya'ajná Caifás ñacaré ejo. Sacerdótena huacára'ajeri huani Caifás i'imacá. Riñacaré chojé Tupana puráca'alo nacú jehuíña'atajeño, peñahuilana, quele jahuacáño rijhua'até i'imacá. Rejo najña'á Jesús i'imacá.

<sup>58</sup> Eyá Pedro ja'apari juca quemachi Jesús ápumi chu. Nahuacára'ajeri huani ñacaré cópeje riphá. E rimujlúca'a corral chojé. Re riyá'o policíana hua'até, ramácaloje reyá méqueca nala'ajica Jesús penaje.

<sup>59</sup> Caja najña'á Jesús rejo. Re sacerdótena huacára'ajeño, peñahuilana, quele i'imaño ajopana hua'até. Necá culaño ajopana pajlácachina, nemacáloje Jesús nacú: “Pu'uhuaré la'ajeri ricá” que penaje, nenócaloje ricá richona penaje.

<sup>60</sup> Cajrú ina'uqué quemáño rinacu: “Pu'uhuaré la'ajeri ricá” que. E'iyonaja uncá nahue'epila méqueca rinacu quemacana pu'uhuaré, nenócaloje ricá richona penaje. Majojeja napajlájica rinacu. E caja ehuaja iyamá ina'uqué i'ijñaño najimaje rinacu quemaje.

<sup>61</sup> Nemá najló:

—Marí que ilé ina'uqué quemacá rinacuhúa: “Nucá cajya'atárijla Tupana ñacaré. Hueji que cala i'imajemi nula'ájla piño rapumí chuhúa ricá” —que nemacá najló.

<sup>62</sup> Marí caje aú sacerdótena huacára'ajeri huani tára'aro. Rimá Jesúslo:

—¿Uncá chi papiyácalaje pinacójo necá? ¿Meque ricá quele nemíchaca aú pinacu?

<sup>63</sup> Uncá Jesús ja'ajipalá rijló. Raú sacerdótena huacára'ajeri quemari rijló:

—Tupana, ricá cajmuni, puráca'alo aú numá pijló, pimacáloje nojló quehuaca penaje. ¿E chi picá quele Tupana huacára'acare majó ina'uqué i'imatáajeri penaje? ¿Tupana i'irí chi picá?

<sup>64</sup> Jesús quemari rijló:

—A'a, ilé que pimíchaca nunacu queja nucá. Ina'uquéjloje penaje i'imacá nucá. Ica amájeño nucá Tupana ahua'á. Piyuque la'acá Tupana. Rijhua'até nuhuacára'aje ina'uqué. Ica amájeño nupa'acó piño majó je'echú chiyá jumi suhuáca'ala e'iyohúa —que rimacá rijló.

<sup>65</sup> Marí caje aú sacerdótena huacára'ajeri yúcha'aro íqui'ija huani. A'acuhuaná rijjiyo'otá ra'arumacahua. Rimá ajopánajlo:

—Ilé ta puri'icharo pu'uhuaré huani ta Tupana nacú. Uncá na penaje calé huaculá ajopana, ne'emacáloje huajló méqueca rila'acá pu'uhuaré yucuna penaje. Caja huemi'ichá méqueca rimíchaca ta pu'uhuaré huani Tupana nacú.

<sup>66</sup> ¿Meque ijló quele?

Nemá rijló:

—Pihuacára'a rinócana richona.

<sup>67</sup> E natupá nahui Jesús jimá chojé. Ajopana ña'atá ricá. Ajopana ña'año pajimaya ricá. Apára'ataqueja a'arumacaji aú rijlú i'imacá.

<sup>68</sup> Nemá rijló:

—Ricá Tupana huacára'acare majó ina'uqué i'imatájeri penaje pi'imajica ee, pimá huajló naca ji'ichari picá pajimaya, ají que nala'acá namácaja ricá.

*Pedro micho'otaca Jesús chaya yucuna marí:*

(Mr 14.66-72; Lc 22.56-62; Jn 18.15-18, 26-27)

<sup>69</sup> Marí que nala'acá Jesús ee Pedro i'imari huaca'apé yá'acajo nacú. E apa'ahuelo i'ijnayo Pedro ahua'ajé. Pají chiyá sápaajeyo ru'umacá. Rumá rijló:

—Nuhue'epí ilé Jesús, Galilea eyaje, hua'ateje picá.

<sup>70</sup> E'iyonaja Pedro micho'otari richaya. Rimá rojló ajopana e'iyá:

—Uncá huani nuhue'epila méqueca pimacá nojló.

<sup>71</sup> Raú ra'apá ají que corral numaná ejo. Ejéchami apa'ahuelo quemacá piño ajopana re yá'acañojlo.

—Ilé chira'aró caja Jesús, ilé Nazaret eyaje, hua'até.

<sup>72</sup> Ñaqué caja Pedro micho'otaca piño richaya.

—Tupana hue'epiri quehuácaca numacá: Uncá nomána'apa calé ricá.

<sup>73</sup> Mequetánaja i'imajémija ajopana piño iphaño Pedro ahua'ajé. Nemá rijló:

—Rijhua'atéjena naquiyana picá. Pa. Napura'acó rite'eré ehuá que caja pipura'acó.

<sup>74</sup> Marí caje aú Pedro quemari najló:

—Nuhuata Tupana huajaca nucá, uncachu numalá quehuaca. Uncá huani ta nomána'apa calé ricá.

Ejéchami capere yaca'acá.

<sup>75</sup> Raú riphá ripechu nacojé méqueca Jesús quemacá rinacu maapami que. Rimá rijló i'imacá: “Capere yaca'acá piyá, picá micho'otájeri nuchaya hueji que pe caja.” Rema'acá aú capere yaca'acá, Pedro i'ijnari reyá. Supejeno riyaca.

## 27

*Nahuá'aca Jesús Pilato ejo yucuna marí:*

(Mr 15.1; Lc 23.1-2; Jn 18.28-32)

<sup>1</sup> E caja najme'etá. Re i'imacaño pechu i'imá réjenohuanija Jesús nócana nacú. Sacerdótena huacára'ajeño, peñahuilana, quele huátaño Jesús nócana.

<sup>2</sup> E nepo'otá ra'anapitá panacojéchaca. Nahuá'a ricá nate'eré eyá huacára'ajeri ejo. Poncio Pilato rií i'imacá.

*Judas noca ricó yucuna marí:*

<sup>3</sup> Judas a'arí ripinánajlo Jesús maapami que i'imacá. Ramaca aú nahuátaca Jesús nócana chapú rihuó i'imacá richó. E ri'ijná piño liñeru pa'ataje najló, maapami que na'acare rijló. Na'á rijló liñeru i'imacá, rihuá'acaloje necá Jesús i'imacá ejo penaje. E riphá nanacu. Sacerdótena huacára'ajeño, peñahuilana, quele nacú riphá.

<sup>4</sup> E rimá najló:

—Marí liñeru, uncá huani paala nuli'ichaca ricá. Uncá la'alare pu'uhuaré quele. E'iyonaja calé ihuata rinócana. Chapú huani nuli'ichaca ricá ijló ra'acana aú —que Judas quemacá najló.

Aú nemá rijló:

—Pijloja calé chapú ricá. Huajló uncá ñaqué calé ricá.

<sup>5</sup> Aú ja ricá á huichá liñeru Tupana ñacaré chojé. Marí caje aú ra'apá reyá, rinócaloje ricó penaje. Racúhua'ataca ricó rinúru'upi naquiyá. Marí queja Júdasmí chu noca ricó.

<sup>6</sup> Sacerdótena huacára'ajeño huayo'oño rilíñerutemi ricá'acare Tupana ñacaré chojé. E nemá:

—Ina'uqué nócana huemí cari. Chapú huala'acajla hualamá'ataquela ra'acuna'acá chojé ricá marí Tupana ñacaré chu.

<sup>7</sup> Napura'ó pajhua'atéchaca rinacu, méqueca rila'acana nacú. Ñaqué i'imacale nahuarúhua'a támijimina sa'aquélana pucuna raú, nasa'acáloje ajopana te'eré eyájena

támina rejé penaje. Pajluhuaja pucapé ipújeri le'ejé ri'imacá. Ricá liyá nahuarúhua'a te'erí rapucuna penaje.

<sup>8</sup>Maárejecha nemá rapucuna nacú: Jirá pucuna ricá.

<sup>9</sup>Tupana puráca'alo ja'apátajerimi chu, Jeremíasmí chu, quemacá que júpimi nala'acá raú. Marí que rilana'acá riyucuna papera chojé i'imacá. "Israelmí chu laquénami naquiñana a'ajeño apujlo treinta parata, cahuemí nojé, ra'acáloje najló ricá rihuemí penaje.

<sup>10</sup>Rihuemí aú nahuarúhua'aje rapucuna pajluhuaja pucapé ipújeri liyá. Tupana quemacá nojló que nala'ajica," que rilana'acá papera chojé riyucuna i'imacá.

*Jesús tára'aco Pilato jimaje yucuna marí:*

*(Mr 15.2-5; Lc 23.3-5; Jn 18.33-38)*

<sup>11</sup>E caja nahuá'a Jesús nate'eré eyá huacára'ajeri ejo. E rimá Jesusjlo:

—¿Judíona i'imacana chi picá?

Jesús quemari rijló:

—A'a, núcá núcá, pimacá queja.

<sup>12</sup>Sacerdótena huacára'ajeño, peñahuilana, quele arucátaño Jesús rijló. E'iyonaja uncá Jesús apiyácala necá.

<sup>13</sup>Raú nahuacára'ajeri, Pilato, quemari rijló:

—¿Uncá chi pihue'epila méqueca nemacá pinacu: "Pu'uhuaré la'ajeri picá" que?

<sup>14</sup>Uncá Jesús ja'ajipalá rijló. Raú ne'emacana pechu i'imá:

—¿Na ta chi caji numajlo?

Aú uncá meño'ojó rihue'epila méqueca rila'acana.

*Nemá Jesús nacú, nenócaloje ricá penaje. Riyucuna marí:*

*(Mr 15.6-20; Lc 23.13-25; Jn 18.38-19.16)*

<sup>15</sup>Fiesta pascua huacajé queja Pilato jácho'otajicano ina'uqué huajáquelana chiyá pajluhuaja ina'uqué. Ricá nahuátajicare jácho'otacana, rácho'otaque najló.

<sup>16</sup>Rihuacajé apú i'imari ina'uqué huajáquelana chu. Piyuque ina'uqué amána'apa ri'imacá. Ríi i'imari Barrabás.

<sup>17</sup>Caja nahuacó i'imacá. Aú Pilato quemari najló:

—¿Mecaje ihuátaca nócho'otaca ijlo, Barrabás ca'ajná? Ricá nemacare nacú: "Tupana huacára'acare majó" que, ¿ricá chi nócho'otaje ijlo?

<sup>18</sup>Marí que rimacá najló, rihue'epicale chapú nahuó i'imacá Jesús cha. Cajrú ina'uqué pechu i'imacá Jesús nacú palá. Ricá jimaje chapú nahuacára'ajeño huo i'imacá Jesús cha. Ñaqué i'imacale nahuá'a ri'imacá rejo, rihuacára'acaloje rinócana penaje.

<sup>19</sup>Re ne'emacana yá'aro, rimacáloje najló méqueca rila'acana. Ehuá riyajalo huacára'aca rijló puráca'aloji. Rumá rijló:

—Pácho'ota ilé Jesús. Reja ri'imareja. Uncá la'alá meque ricá ina'uqué. Lapi nutapúni'icha ricá. Cajrú huani nucahuilí'ichaco raú.

Marí que puráca'aloji quemacá, riyajalo huacára'acare rijló.

<sup>20</sup>Caja Pilato quemari najló i'imacá: "¿Mecaje ihuata nócho'otaca ijlo, Jesús ca'ajná, Barrabás ca'ajná?" Raú sacerdoteña huacára'ajeño, peñahuilana, quele ca'átaño cajrú ina'uqué e'iyajé, nemacáloje rijló marí que penaje: "Pácho'ota huajló Barrabás. Pihuacára'a Jesús nócana."

<sup>21</sup>E ne'emacana quemari piño najló:

—Chuhuata, imá nojló mecajeca ihuata nócho'otaca ijlo.

Nemá rijló:

—Pácho'ota huajló Barrabás.

<sup>22</sup>Rimá najló:

—¿Eta meque chi nula'ajica Jesús, ricá nemacare nacú, Tupana huacára'acare majó?

Nemá rijló:

—Pihuacára'a rinócana a'ahuaná apiyácanami nacojé acúhua'ataqueja.

<sup>23</sup>Raú Pilato quemari najló:

—¿Naje ta ihuata rinócana? ¿Na ta chi rila'á pu'uhuaré?

Raú nahuíyo'o piño rijló:

—Pihuacára'a racúhua'atacana a'ahuaná apiyácanami nacojé.

<sup>24</sup>Pilato amari caja nejnúcha'aco rijló Jesús jácho'otacana nacú. Ramá caja yehuíchaja nenócano pajhua'atéchaca rijimaje. Aú rihuacára'a najña'acá rijló juni pachiya chojé. Najimaje ripá riyáte'ela chiyá, nahue'epicaloje raú uncá ripachá calé rinócana. E rimá najló:

—Uncá nuhuacára'alaje ilé nócana. Uncá la'alare pu'uhuaré ricá. Ijloja calé ilé que rila'acana.

<sup>25</sup>Aú piyuque necá quemáño rijló:

—Rinócana i'imajeri huapachá, huayani pachá hua'até.

<sup>26</sup> Marí caje aú Pilato jácho'otari najló Barrabás. Ejomi rihuacára'a naña'ataca Jesús. E riyurí najló Jesús, nenócaloje ricá penaje. Riyurí najló ricá, nacúhua'atacaloje ricá a'ahuaná apiyácacanamí nacojé penaje.

<sup>27</sup> Quéchami ne'emacana le'ejena surárana ña'acá Jesús ne'emacana ñacaré ejo. Re nahuacata surárana, re i'imacano piyuque Jesús ahua'ajé.

<sup>28</sup> Ejomi nacá'a ra'arumacá rinaquiyá. Namácaja penaje na'acá rinacojé ipirálucuni a'arumacaji. Nahuacára'ajeño a'ajicare nanacuhuá caje caja ri'imacá.

<sup>29</sup> Nachipúca'ata caja rihuila'aru nacojé tujripí. Na'á caja ijijila ca'añá riyáte'ela chojó pumitá, ricutihuafe penaje. Caje na'á ricápeje. Ejomi natára'no ne'erúpachi aú rijimaje. Namácaja nala'acá ricá; nemá rijló:

—Judíona i'imacana, ¿Picá?

<sup>30</sup> Natupá nahui rijimá chojé. E najña'á ijijila ricápiya, naña'acáloje ricá pehuila'aruya raú penaje.

<sup>31</sup> E nayurí namácaja rila'acana. E naca'á piño a'arumacaji ipirálucuni rinaquiyá. Na'á piño rinacojé ra'arumacá. Ejomi najña'á ricá, nacúhua'atacaloje ricá a'ahuaná apiyácacanamí nacojé penaje.

*Nacúhua'ataca Jesús a'ahuaná apiyácacanamí nacojé yucuna marí:*

*(Mr 15.21-32; Lc 23.26-43; Jn 19.17-27)*

<sup>32</sup> A'ahuaná apiyácacanamí rihuacúla'apa que Jesús ja'apaca najhua'até. Nácho'oco ee pajmíla e'iyayá, nephata apú ina'uqué. Cirene eyaje ri'imacá. Simón rí i'imacá. Ricá nahuacára'a a'ahuaná apiyácacanamí huáco'ocana Jesús chaya.

<sup>33</sup> Ne'ejná ají que a'ajná ño'ojó. E nephá rinóquelana ejo. Ina'uqué huila'arumi aphinami que na'acá rapucuna íi. Napura'acó chu na'á ríi Gólgota que.

<sup>34</sup> Rejo nephá. Re na'á Jesúslo i'iracaje. Cajmú caje jalá amúra'atacanami, quechípa'aqueja nacaje jalá ípísiní hua'até. Jesús atá'ari ricá, uncá rí'iralá ricá.

<sup>35</sup> E nacúhua'ata ricá a'ahuaná apiyácacanamí nacojé. Ipháqueja itapuhua aú nacúhua'ata ricá. Ejomi surárana cátaño nacaje nacú, namácaloje méqueca natamáca'atajica najluhua ra'arumacami penaje. Tupana puráca'alo ja'apátajerimi chu quemacá rinacu que nala'acá ri'imacá. Marí que rilana'acá riyucuna papera chojé i'imacá: "Natamáca'ataje najluhua no'orumacami. Nacaje nacú cátacano aú nahue'epeje ritamáca'atacana najluhua."

<sup>36</sup> Caja natamáca'ata najluhua ra'arumacá rimacá rinacu i'imacá que. Ejomi nayá'o. Rihua'aphena ne'emacá.

<sup>37</sup> E nacúhua'ata Jesús cha lana'aquejami. Ricá quemari na chona nenoca ricá. Marí que lana'aquejami quemacá: "Marí Jesús, judíona i'imacana ricá."

<sup>38</sup> Rejé caja nacúhua'ata ajopana iyamá. Rahua'ayá iyáma'ajo pumitana nacúhua'ata necá. Ata'acáchina ne'emacá.

<sup>39</sup> Rahua'ayá ja'apájicaño pura'aqueño rinacu pu'uhuaré. Nañaca'aque nehuila'aru rijló.

<sup>40</sup> Nemá rijló:

—Yee, picá quemari pinacuhá: "Nucá caya'atájeri Tupana ñacaré. Hueji que cala i'imajemi nula'ajé piño rapumí chuhua'á ricá". Chuhuata pi'imatá picó. Tupana l'irí pi'imajica ee, pihuitúca'a a'ahuaná apiyácacanamí naquiyá.

<sup>41</sup> Ñaque caja ajopana la'ajica namácaja ricá. Sacerdótena huacára'ajeño, Tupana puráca'alo nacú jehuíña'atajeño, fariséona, peñahuilana, quele ne'emacá, la'año namácaja ricá. Nemá pajlocaca:

<sup>42</sup> —Meque calé ta ri'imataca ajopana capichácajo liyá i'imacá. Eta, ricó uncá meño'ojó ri'imatala. Israelmi chu laquénami huacára'ajeri ri'imajica ee, rihuitúca'aje a'ahuaná apiyácacanamí naquiyá. Marí que huamájica ee rila'acá, huema'ajé ra'apiyá.

<sup>43</sup> Caphí Tupana chojé péchuri ricá. Tupana huátacare ri'imaquela, Tupana i'imatárijla ricá, rimacale rinacuhá: "Tupana l'irí nucá" que —que nemacá rinacu.

<sup>44</sup> Ata'acáchina nacúhua'atacarena Jesús ahua'á, necá caja pura'año pu'uhuaré Jesús nacú.

*Jesús taca'acá yucuna marí:*

*(Mr 15.33-41; Lc 23.44-49; Jn 19.28-30)*

<sup>45</sup> E caja lapí que i'imari nachá piyuque eja'ahua'á chu. Caápu'ucu eyá pe'iyochami camú to'ocó quetana ne'emacá calajerúhuaca.

<sup>46</sup> Pe'iyochami camú to'ocó ee Jesús jahuíyo'ori caphí huaní. Napura'acó chu rimá:

—Elí, Elí, ¿lama sabactani?

Marí que quemacánaca rimacá: Tupana, nupechu i'imacare chojé caphí, ¿na penaje piyurí nucá?

<sup>47</sup> Re i'imacaño naquiyana jema'año rahuíyo'oca. E nemá:

—Ilé huá'ari Tupana puráca'alo ja'apátajeri, Elíasmi chujlo.

<sup>48</sup> Raú pajluhuaaja nanaquiyana jecho'ótari i'iracaje rijló. Rejata nacaje jamára'apani cajmú caje jalá amúra'atacanami acú. Quéchami repo'ocá ijijila lupucuje nacojé ricá. Ricá aú ra'á rijló ricá, ri'iracáloje re'iyayá ricá penaje.

<sup>49</sup> Raú ajopana quemañó rijló:

—Reja ri'imareja. Huamajjla, apala Elíasmi chu iphájeri majó ri'imataje.

<sup>50</sup> E Jesús jáhuyio'ori piño caphí huani caja penaje. Ejé ritaca'á i'ímacá.

<sup>51</sup> Hua'ató que ya'ajná Tupana ñacaré chu a'arumacají jiyó'ocó pe'iyohuá paliyácaca. Apalá ucapú penaje racúhua'o re. Rijiyó'ó yenuya ají que cahuacaje. Caja iyamá que riyurico. Ritaca'acá aú caja te'erí ñaca'aró. Raú caja jipa cajruni e'echataro paliyácaca.

<sup>52-53</sup> Raú caja támijimina ca'aquelana chiyá támijimina chaya me'etátaco. Rihuacajé Tupana macápo'otari cajrú ina'íqué júpimi que taca'acaño. Caphí péchuruna Tupana chojé ne'emacá. Jesucristo macápo'oco ejomi ne'ejná Jerusalén ejo, Tupana le'ejé pajimila ejo. Caja pu'uhuacá nachira'acó rehuá. Cajrú ina'íqué amaño nachira'acó rehuá i'ímacá.

<sup>54</sup> Ritaca'acá apucuna e surárana huacára'ajeri i'imari ajopana surárana hua'até. Jesús hua'aphena ne'emacá. Ritaca'acá aú namá te'erí ñaca'acá, jipa e'echataro caje. Cajrú huani naquero'ocó raú. Nemá pajlocaca:

—Tupana i'irí jo'ó quele táqui'ichari.

<sup>55</sup> Cajrú inaana i'ímacá a'ajnare que. Júcayaja nayacá'o rejo. Necá i'ijnáño Galilea eyá ají que Jerusalén ejo rijhua'até i'ímacá. Riñaté a'ajeño ne'emacá rihuacajé.

<sup>56</sup> María Magdalena i'imayo najhua'até. Apa'ahuelo María i'imayo caja najhua'até. Santiago, Juan, quele jaló i'imayo caja najhua'até. Quele nanaquiyana i'ímacá najhua'até.

<sup>57</sup> E caja najúhua'a. E José i'ijnari Pilato amaje. Cajrú le'ejepelari José i'ímacá. Arimatea eyaje ri'ímacá. Jesús ja'apiyá jema'ajeri caja ri'ímacá.

<sup>58</sup> Ricá penaje i'ijnari Pilato ejo, riquejá'acaloje Jesús tami riliyá penaje. E Pilato yuriri rijló ritami.

<sup>59</sup> Raú ripa'ó ritami huitúca'ataje. Rihuitúca'ata ritami. Ejomi ripilá'á palá nojé a'arumacají ritami nacú.

<sup>60</sup> Támijimi to'otáquelana chojé ri'ijnatá ritami. Huajé ichácanami jipa i'ímacá. Rijluhua rihuacára'a richácana i'ímacá. Ricá chojé rito'otá Jesús tami. Caja penaje netá cajruni jipa aú rinumaná. Ejomi ripa'ó.

<sup>61</sup> A'ajnare que riloco'opani María Magdalena, apa'ahuelo María, quele yá'añó.

*Jesús tami hua'aphena i'ímacaño yucuna marí:*

<sup>62</sup> Caja a'ajnejí lamá'atacana huacajé ja'apari. Muní que sacerdotena huacára'ajeño, fariséona, quele i'ijnáño Pilato amaje.

<sup>63</sup> Nemá rijló:

—Riphicha huapechu nacojé méqueca ilé pajlácachi quemacá rinacuhúa. Cajmuni ri'ímacá huacajé rimá rinacuhúa: “Nenoje nucá. Eyá hueji que cala i'imajemi n-macápo'oyo nopumí chuhúa”.

<sup>64</sup> Ñaquele pihuacára'a surárana rejo, ne'emacáloje ritami hua'aphena hueji que cala quetana penaje. Pihuacára'a necá, ne'emacáloje rihua'aphena penaje, ra'apiyatéjenami i'ijnacá piyá ritami ata'ajé. Nata'aquela ritami, caja nemacajla rinacu: “Caja rimacápo'o” que. Marí que nala'aquela, napajlácare yucuna jema'acojla cajrú huani —que nemacá Pilátajlo.

<sup>65</sup> E Pilato quemari najló:

—I'ijná rejo, ileruna surárana naquiyana i'ijnajeño ijhua'até, ne'emacáloje rihua'aphena penaje, ajopana mujlúca'aca piyá rejo —que rimacá najló.

—Je —que nemacá rijló.

<sup>66</sup> Aú ne'ejná rejo. Nachúta'a inimú jipa netacare rinumaná nacojé. Raú nahue'epijla, apú cahuitáquela ricá, rimujlúca'acaloje richojé rimicho'ojneja penaje. Caja penaje nayurí cajrú surárana re rihua'aphena penaje.

## 28

*Jesús macápo'oco yucuna marí:*

(Mr 16.1-8; Lc 24.1-12; Jn 20.1-10)

<sup>1</sup> Caja huatána'acaje huacajé ja'apari i'ímacá. Muní que najme'etaca. Sápacaje queño'ocó huacajé ri'ímacá. E María Magdalena, apa'ahuelo María, quele i'ijnáño piño támijimi to'otáquelana ejo.

<sup>2</sup> Manaí chiyó caphí huani te'erí ñaca'acó na'apiyá. Re'iyohuá que pajluhua Tupana hua'atéjeri huitúca'aca je'echú chiyá jipa jatataje rinumaná eyá. Ratatá jipa reyá. Ejomi riyá'o rinacu.

<sup>3</sup> Mejáma'atani huani que ramaco, pichaní camaré que. Jaré nojé huani ra'arumacá i'ímacá.

<sup>4</sup> Marí que surárana, támijimi hua'aphena, amaca aú cajrú huani naquero'ocó. Cajrú caja nacurúca'aca raú. Matámiru queja nato'ocó te'erí e'iyá re.

<sup>5</sup> E inaana iphaño rejo. E Tupana hua'atéjeri, je'echú chiyaje, quemari najló:

—Iquero'oniyo. Nuhue'epí i'ijichaca majó Jesús tami amaje, ricá nacúhua'atacare a'ahuaná apiyácacanamí naquiyá i'ímacá.

<sup>6</sup> Uncá ri'imalá maare. Caja rimacápo'ocho. Rimacá rinacuhá queja rimacápo'ocho. Imujlúca'a majó, amachi rapucunamí.

—Je —que nemacá.

<sup>7</sup> E rimá piño najló:

—Chuhua ipa'ó quiñaja, i'imichachi ra'apiyatéjenajlo riyucuna. Caja rimacápo'ocho. Caja ri'ijichá natucumá Galilea ejo, que i'imajica najló riyucuna. Caja numicha ijló —que Tupana hua'atéjeri quemacá najló.

<sup>8</sup> Aú pherú queja inaana pa'acó jecho'oquelo reyá. Quero'ocajo nacuja ne'emacá. Hua'ató que pu'ují napechu i'ímacá raú. Necho'ó ají que a'ajná ño'ojó riyucuna i'imajé ra'apiyatéjenajlo.

<sup>9</sup> E napunana chu Jesús ya'ataró najló. Rajalaca necá. Aú ne'ejná Jesús ahua'ajé. Pu'ují napechu i'ímacá rinacu, aú najláma'o ri'imá nacojé. Namahuílo'o ricá ritajné naquiyá.

<sup>10</sup> E rimá najló:

—Iquero'oniyo. I'ijná, i'imichachi nuyucuna nojénajlo. Imicha najló ne'ejnachi Galilea ejo. Re namaje nucá.

—Je —que nemacá.

*Méqueca surárana quemacá najló yucuna marí:*

<sup>11</sup> Caja inaana i'ijnaño riyucuna i'imajé ajopánajlo. A'apona surárana, rihua'aphena i'imacaño, i'ijnaño pajimila ejo riyucuna i'imajé sacerdoténa huacára'ajeñojlo.

<sup>12</sup> Riyucuna jema'acana aú Sacerdoténa huacára'ajeño i'ijnaño peñahuilana hua'até rinacu pura'ajó. Panacójéchaca que napechu i'ímacá méqueca nala'ajica nacú. Eyá na'á suráranajlo cajrú liñeru, ne'emacá piyá riyucuna ajopánajlo.

<sup>13</sup> E nemá suráranajlo:

—Marí que imájica ajopánajlo: “Lapí huacamátaco cháyomi ra'apiyatéjenami i'imaño rata'ajé”.

<sup>14</sup> Huacára'ajeri jema'ajica ee riyucuna, huacá pura'ajeño ichaya, rihuátajica ee ihuajácana uncá pachá i'imalá rihua'aphena palá —que Sacerdoténa huacára'ajeño quemacá najló.

<sup>15</sup> E na'á najló liñeru. Ejómi nahuacára'aca riyucuna i'imacana que ne'emacá riyucuna reyá a'ajná ño'ojó. “Ra'apiyatéjena ata'año ritami,” que nemájica rinacu. Eyá maárejecha ñaqueja riyucuna. Ejo'ocaja judíona naquiyana quemáño ñaqueé rinacu.

*Jesús a'acá ra'apiyatéjena ripuráca'alo ja'apátajeño penaje yucuna marí:*

*(Mr 16.14-18; Lc 24.36-49; Jn 20.19-23)*

<sup>16</sup> Caja ra'apiyatéjena jema'año rimacápo'oco yucuna. Aú ne'ejná Galilea ejo, yenuri Jesús quemacare nacú najló ejo. Pajluhuaja iphata ji'imaji nacojé quele ne'emacá.

<sup>17</sup> E nephá Jesús nacú. Pu'ují caje aú ne'ejnataca napéchuhua Jesús nacú ramácana aú. Ne'iyajena pechu i'imá: “¿Ricá huani chi ricá, apú ca'ajná?”

<sup>18</sup> E Jesús i'ijnari nahua'ajé. E rimá najló:

—Caja Tupana a'arí nucá Ihucára'ajeri penaje, piyunque marí eja'ahuá chu, je'echú chu i'imacaño huacára'ajeri penaje ra'á caja nucá.

<sup>19</sup> Ñaquele numá ijló: Eco i'ijná ajopana te'eré ejo, ajopana te'eré ejo que nupuráca'alo ja'apátacana nacú piyunqueja ina'uquejlo rehuá. Raú ne'iyajena jema'ajeño no'opiyá, ne'emacáloje nujhua'atéjena penaje. Re Nora'apá Tupana, nucá Ri'iri, Tupana Pechu, quele. Hua'apiyá ne'emajica aú ila'á bautizar necá.

<sup>20</sup> Jehuínna'ata caja necá, na'acáloje nupuráca'alo nanacójó piyunqueja penaje. Nucá i'imajeri ijhua'até hua'ajini huani eja'ahuá tajnájico ejená. Uncá nuyurílafe icó icá —que Jesús quemacá najló. Caja quetana riyucuna.

## SAN MARCOS

### Introducción:

Piyuque ina'uqué hue'epícaloje mecajeca Jesucristo i'ímacá penaje, San Marcos lana'arí riyucuna papera chojé i'ímacá. San Pedro liyá ca'ajná rema'a riyucuna palá i'ímacá. Ricá i'ímari Jesucristo ja'apiyatéjena naquiyana i'ímacá. Riliyá San Marcos jema'arí riyucuna i'ímacá. Rejomi rilana'a riyucuna papera chojé, riyurícoloje ajopánajlo, ajopánajlo que penaje.

*Juan bautizar la'ajeri iphaca Tupana yucuna i'ímacá najló yucuna marí:*  
(Mt 3.1-12; Lc 3.1-9, 15-17; Jn 1.19-28)

<sup>1-2</sup> Marí yucu, Jesucristo yucuna. Palani huani riyucuna, Tupana la'acale iná palá ripalamane aú. Tupana l'írí huani ricá, Jesucristo. Palani huani riyucuna. Júpimi uncá chiyó riphá majó marí eja'ahuá nacojé i'ímacá, apú queño'orí riyucuna i'ímacana ripiyá. Ríí i'ímari Isaias. Tupana puráca'alo ja'apátajeri rí'ímacá. Júpimi, uncá chiyó Tupana huacára'a Rí'írí majó marí eja'ahuá nacojé i'ímacá, rí'imá rijló riyucuna. Marí que Isaiasmi chu lana'acá riyucuna:

Nuhuacára'aje apú ina'uqué pitucumá, rí'ímacáloje piyucuna ina'uquejlo penaje. Ricá quemájeri najló, nalamá'atacaloje napéchuhua pijló pipé penaje.

<sup>3</sup> Nema'ajé pajluhuaja ina'uqué jahuíyo'oca pu'uteni meñaru chu.

Marí que rimájica ina'uquejlo: "Chuhua ilamá'ataca ipéchuhua palá Huahuacára'ajeri jlo.

Ipajno'otá caja ipéchuhua pu'uhuaré ila'acare liyá," que rimájica najló. Marí que Tupana i'ímacá Rí'írí jlo Juan yucuna, uncá chiyó Juan i'ímá.

<sup>4</sup> E caja ehujaja rímacare nacú iphari rená chojé. Juan i'ímari i'ímacá. Rí'íjná pu'uteni meñaru chojé. Re rila'aque bautizar ina'uqué naquiyana. Rí'ímaqué Tupana yucuna najló, marí que rimájica najló:

— Chuhua ipajno'otá ipéchuhua Tupana ejo, pu'uhuaré ila'acare liyá, imanaicho ila'acare liyá. Raú Tupana amájero ichaje pu'uhuaré ila'acare liyá. Ejomi nula'ajé bautizar icá —que rimájica najló.

<sup>5</sup> Piyuque ina'uqué, Judea te'eré e'iyohuá i'ímacácaño, i'íjnaqueño ripuráca'alo jema'ajé. Ñaque caja pajimila Jerusalén e i'ímacaño i'íjnajica rejo. Re nema'aque ripuráca'alo. Eyá ne'emajica ee pu'uhuaré nala'ajicare yucuna Tupánajlo, Juan la'aqueri bautizar necá juni Jordán acojé.

<sup>6</sup> Juan a'arumacá i'ímari camello chijné naquiyá la'acanami. Rihuachaphila i'ímari camejeri ímami naquiyá la'acanami. Ra'ajné i'ímaqueri caja'ayuna caje, munumunú jalá caje.

<sup>7</sup> Tupana yucuna rí'ímaqué ina'uquejlo, rímaqué najló:

— Nopumí chojé apú iphájeri. Iqui'í huani nuphácare ja'apí ricá, nuchaje huani rí'ímacale.

<sup>8</sup> Nucá la'arí bautizar icá juni aú, eyá ricá a'ajeri ina'uquejlo Tupana Pechu.

*Juan la'acá bautizar Jesucristo yucuna marí:*  
(Mt 3.13-17; Lc 3.21-22)

<sup>9</sup> Juan i'ímacá pu'uteni meñaru chu huacajé, Jesús jácho'oro pajimila Nazaret eyá, rí'íjnacáloje Juan chaje penaje. E caja rí'íjná, iphari Juan nacú. Re Juan la'arí bautizar ricá juni Jordán acojé.

<sup>10</sup> Rila'acá bautizar ricá ejomi Jesús jácho'oro junápiya. Ejéchami riyacá'aco je'echú chojé, amari je'echú je'echataco. Ricá chiyá ramá Tupana Pechu huitúca'aca ají que majó. Túcu'uchi huitúca'aca nacaje nacojé que rihuitúca'aca ají que Jesús nacojé.

<sup>11</sup> Ejéchami Tupana quemacá marí que rijló je'echú chiyá:

— Picá Nu'urí. Iqui'íja nuhuátacare picá. Pu'ují huani nupechu pinacu —que rimacá Jesusjlo.

*Jiñá Ch'i'náricana huátari Jesús e'iyajé ca'átacana, rila'acáloje pu'uhuaré penaje. Marí riyucuna:*

(Mt 4.1-11; Lc 4.1-13)

<sup>12</sup> Rila'acá bautizar rí'ímacá ejomi Tupana Pechu huacára'ari Jesús ya'ajnaje pu'uteni meñaru chojé. Aú rí'íjná rejo.

<sup>13</sup> Re rí'imá ricoja iyamá ina'uqué le'ejé que cala quietana. Re caja camejérina i'ímacá. Re rí'ímacá huacajé, Jiñá Ch'i'náricana iphari Jesús nacú. Rihuata re'iyajé ca'átacana, rila'acáloje pu'uhuaré penaje. E'iyonaja uncá rema'alá ra'apiyá. Rihuacajé caja Tupana hua'atéjena, je'echú chiyájena, iphaño rejo Jesús ñaté a'ajé.

*Jesús queño'ocá risápaca'ala la'acana yucuna marí:*

*(Mt 4.12-17; Lc 4.14-15)*

<sup>14</sup> Naca'acá Juan ina'uqué huajáquelana chojé yámijo Jesús i'ijnari Galilea te'eré ejo. Re ri'imá Tupana i'mataca ina'uqué capichácajo liyá yucuna najló, nema'acáloje ra'apiyá penaje, ne'emacáloje rijhua'atéjéna raú penaje.

<sup>15</sup> Rimaqué najló:

—Caja riphá rená chojé ijló, Tupana i'ímacáloje Ihuacára'ajeri penaje. Mequetánaja i'imajemi yuriro huatucumá, Tupana i'ímacáloje ina'uqué naquiyana huacára'ajeri penaje. Chuhua ipajno'otá ipéchuhua pu'uhuaré ila'acare liyá, imanaicho ila'acare liyá hua'ató. Tupana i'imatari ina'uqué capichácajo liyá. Ipechu i'imá caphí richojé, raú ri'imataje icá capichácajo liyá —que rimájica najló.

*Jesús quemari pa'u quele jiña ña'ajéñojlo, ne'ejnacáloje rijhua'até ra'apiyatéjéna penaje. Riyucuna marí:*

*(Mt 4.18-22; Lc 5.1-11)*

<sup>16</sup> E caja Jesús chira'aró ají que caesa turenahua. Galilea caesa íi. Re ramá Pedro, re'ehué Andrés hua'até. Jiña ña'ajeño huená chojé nacú sápañeño ne'emacá. Nahuenare naca'acá ejé riphá nanacu.

<sup>17</sup> E rimá najló:

—I'ijná nujhua'até. Jiña ña'acana nacú sápañeño icá. Eyá chuhua no'ojica ijló apú sápacaje. Ihuá'aje nojló ina'uqué, ne'emacáloje no'opiyá jema'ajeño penaje —que rimacá najló.

<sup>18</sup> Marí que rimacá najló aú nayurí nahuenare nacápiya. E caja ne'ejná rijhua'até.

<sup>19</sup> Reyá Jesús ja'apari piño a'ajná ño'ojó pani. Re ramá Santiago, re'ehué Juan hua'até. Nara'apá íi i'imari Zebedeo. Netane chu ne'emá nahuenare lamá'atana nacú.

<sup>20</sup> Ramá necá. E rimá Santiago, Juan, quelejo:

—I'ijná nujhua'até.

Raú caja ne'ejná Jesús hua'até. Ja'apáñaño nara'apá, najhua'até sápañeño, quele. Necá yuriño netane chu.

*Jiña pechu i'ímacá pajluhuaja ina'uqué e'iyá yucuna marí:*

*(Lc 4.31-37)*

<sup>21</sup> E caja nephá pajimila Capernaum ejo. Nale'ejé huatána'acaje huacajé Jesús i'ijnari nahuacáca'alo ñacarelana chojé. Richu rehuíña'ata necá Tupana nacú.

<sup>22</sup> “¡Meque palá huani rehuíña'atalaca huecá!” que ripuráca'alo jema'ajeño pechu i'ímacá rinacu. Palá rihue'epica nacaje nacoje rehuíña'atacare nacú. Tupana puráca'alo nacú jehuíña'atajeño, rehuá i'ímacaño, uncá hue'epílaño palá rijlunami chojé.

<sup>23</sup> Re caja apú i'imari nahuacáca'alo ñacarelana chu. Jiña pechu i'imari re'iyá. E rahuíyo'oco rimacá marí que Jesúsjo:

<sup>24</sup> —Jesús, Nazaret eyaje ¿naje picahuíla'a huanacu? ¿E piphaca majó huacapichátaje? —que rimacá rijló—. Nomána'apa picá. Ilé uncá la'alá pu'uhuaré picá. Tupana i'ímacá e eyaje caja picá —que jiña pechu i'ímacare re'iyá quemacá rijló.

<sup>25</sup> —Pimanúma'o, pácho'o ilé ina'uqué e'iyayá —que Jesús quemacá rijló.

<sup>26</sup> Eta jiña pechu curúca'atari caphí huani ilé ina'uqué napona. Cajrú jiña jahuíyo'oca. Hua'ató que rácho'oco re'iyayá.

<sup>27</sup> “¡Meque piyuque huani rila'acá cari!” que ramájeño pechu i'ímacá Jesús nacú. Nemá pajlocaca:

—¡Meque piyuque huani rila'alaca cari! Huajé huani huajló ripuráca'alo. Raú ja calé rihuacára'a jiñana pechu jácho'oco ina'uqué e'iyayá. Nema'á ra'apiyá —que nemacá pajlocaca.

<sup>28</sup> Marí que rila'acá ejomi cajrú riyucuna jema'acó Galilea te'eré e'iyohuá piyuque.

*Jesús tejmo'ótaca Pedro yajneru yucuna marí:*

*(Mt 8.14-15; Lc 4.38-39)*

<sup>29</sup> E caja nácho'o nahuacáca'alo ñacarelana chiyá. Ejomi Jesús i'ijnari Pedro, Andrés, quele ñacaré ejo. Santiago, Juan, quele i'ijnáño caja najhua'até.

<sup>30</sup> Re Pedro yajneru to'oyó jelo'ocajo nacú. E nemá Jesusjo:

—Rutamí rucá.

<sup>31</sup> Raú ri'ijná rohua'ajé. Ripatá rucá ruyáte'ela naquiyá, rácho'ota rucá. Hua'ató que jelo'ocajo mata'acá ruliyá. Rejomí rutamáca'ata najló a'ajnejí.

*Jesús tejmo'ótaca cajrú natámina yucuna marí:*

*(Mt 8.16-17; Lc 4.40-41)*

<sup>32</sup> E caja najjúhua'a. Camú ja'acó ee, cajrú ina'uqué huá'año natámina Jesús i'ímacá ejo. Jiñana pechu i'ímacarena e'iyá ne'iyajéna i'ímacá. Nahuá'a necá rejo piyuqueja.

<sup>33</sup> Ehuá piyuque pajimila eruna jahuacaco pají numanaje.



<sup>34</sup> Re ritejmo'óta cajrú natámina. Que'iyapejé nayaripune rica'atá nanaquiyá. Ajopana ina'uqué e'iyayá rica'á jiñana pechu. Uncá Jesús yurila jiñana pechu pura'acó, namána'apa ri'imacale.

*Jesús i'imacá Tupana yucuna najló nate'eré Galilea e yucuna marí:*  
(Lc 4.42-44)

<sup>35</sup> E muni que, lapiyami luhuichipica ee, Jesús jácho'oro. Ri'ijná ají que pajimila yámojo, ri'imacáloje ricoja re penaje. Re ripura'ó Tupana hua'até.

<sup>36</sup> A'apona que Simón i'ijnacá ricalaje rijhuáque'ena hua'até.

<sup>37</sup> E caja ehuaja nephata ricá. E nemá rijló:

—Piyuque ina'uqué culaño picá me'etení.

<sup>38</sup> Raú Jesús quemari najló:

—Chuhua i'ijná hue'ejnachi apú eyá, apú eyá que nu'umichachi caja Tupana yucuna najló. Ricá penaje nu'ujná majó —que rimacá najló.

<sup>39</sup> E ri'ijná piyuque Galilea te'eré e'iyohuá. Nahuacáca'alo ñacarelana chojé, apalá chojé, apalá chojé que ri'ijnajica Tupana yucuna i'imajé najló. Rica'aqué caja cajrú jiñana pechu ina'uqué e'iyayá.

*Jesús tejmo'ótaca pajluhuaja ritami yucuna marí:*  
(Mt 8.1-4; Lc 5.12-16)

<sup>40</sup> E caja apú iphari Jesús nacú. Ritami ri'imacá, napona patáca'ataro ri'imacá. Riphaca Jesús nacú ee ritára'o ri'irúpachi aú rijimaje. Rimá rijló:

—Pihuátajica ee, pa'apata nuliyá nuyaripune.

<sup>41</sup> Aú Jesús hue'epiri camu'ují rinacu. Risapa rinacu riyáte'ela aú, rimá rijló:

—Je, nuhuata ra'apátacana piliyá. Caja ripali'ichó pijló.

<sup>42</sup> Marí que rimacá rijló, hua'até que rinapona pala'acó rijló.

<sup>43</sup> E Jesús huacára'ari ricá sacerdote amaje.

<sup>44</sup> Rimá rijló:

—Pema'á, pi'imaniya nuyucuna ajopánajlo. Pi'ijná sacerdote chaje, ramíchachi picá. Quéchami pa'ajica Tupánajlo nacaje, pinapona pali'ichaco aú. Moisesmi chu huacára'aca i'imacá que pa'ajica Tupánajlo nacaje. Marí caje aú ina'uqué hue'epéjeño caja palani chuhuaque pinapona, pi'imacáloje piño najhua'até penaje —que Jesús quemacá rijló.

<sup>45</sup> —Je.

E ri'ijná reyá. E'iyonaja ri'imá riyucuna piyuque ina'uquejlo, riphátacarenajlo. Pachá uncá meño'ojó Jesús i'ijnalá pajimila e'iyajé, cajrú huani ina'uqué huátacale ramácana. Raú riyuró ya'ajná pu'uteni meñaru chu. Uncá nañacaré i'imalá rehuá. Rejeja ne'ejnaqué cajrú ramaje. Apú eyá, apú eyá que ne'ejnajica richaje.

## 2

*Jesús tejmo'ótaca pajluhuaja ina'uqué, napona taca'arí camachá yucuna marí:*  
(Mt 9.1-8; Lc 5.17-26)

<sup>1</sup> Meque cala i'imajemi Jesús pa'aró piño Capernaum ejo. Riphaca rejo yucuna moto'orí rehuá cajrú. Yucu i'imari:

—Caja riphicha majó, pachu ricá me'etení.

<sup>2</sup> Raú cajrú huani ina'uqué i'ijnacá richaje. Pu'uté nahuacaco pachaje. Rinumanahua, ricópihua hua'ató nahuacó cajrú. Uncá meque la'ajé ajopana mujlúca'ala richojé. Pají chu Jesús i'imari Tupana yucuna najló.

<sup>3</sup> Ehuá pa'u quele achiñana iphaca rejo. Cuhuana nacú nahuáco'o pajluhuaja ritami, camachá napona taca'acá ri'imacá.

<sup>4</sup> Cajrú huani ina'uqué tami yá'aco ricópihua. Nanacojé uncá meño'ojó nephala Jesús ahua'ajé. Raú ne'ejrá pají i'ihuátaje. Pu'ucuja to'otacánami nañacaré i'ihuata i'imacá rehuá. Reyá najiy'o'otá pají ji'ihuátaya Jesús loco'opániya. Richiyá nahuitúca'ata ritami ají que Jesús ahua'ajé.

<sup>5</sup> Jesús hue'epiri caphí napechu i'imacá richojé, ritejmo'ótacaloje ricá penaje. Raú rimá ritámijlo:

—Caja nomicho pichaje pu'uhuaré pila'acare liyá —que rimacá rijló.

<sup>6</sup> Tupana puráca'alo nacú jehuíña'atajeño naquiyana i'imaño caja re. Marí que rimacá aú napechu i'imá:

<sup>7</sup> “¡Meque pu'uhuaré huani ta rimíchaca! Tupánaja calé amaro ina'uqué chaje pu'uhuaré nala'acare liyá. Uncá Tupana calé ricá,” que napechu i'imacá rinacu.

<sup>8</sup> Jesús hue'epiri napechu i'imacá ilé que rinacu. Aú rimá najló:

—¿Naje ilé que huani ipechu nunacu?

<sup>9</sup> Majopeja iná quemacajla apujlo: “Caja nomicho pichaje, pu'uhuaré pila'acare liyá”. Eyá puhuichani inajlo, iná huacára'acaloje ritami jácho'oco, ra'apácaloje penaje. Tupánaja calé hue'epiri natámina tejmo'ótacana —que rimacá najló—.

<sup>10</sup> Ina'uquéjloje penaje i'ímá nucá. Tupana quemari nunacu, nomácaloje ina'uqué chaje, pu'uhuaré nala'acare liyá penaje. Nula'ajicare aú me'etení, ihue'epeje quehuaca jo'ó nojló ricá —que rimacá najló.

E rimá camachá naponataca'acá i'imacajlo:

<sup>11</sup> —Pijló numá, chuhua pácho'o. Pijña'a picamané pijhua'ató, pipa'achó.

<sup>12</sup> Ejéhami ritami jácho'oco pila pila que. Nejlú chuhua' ra'apá. Raú ramájeño pechu i'ímá Jesús nacú: “¡Meque piyuque huani la'acá ricá!” Palá napura'acó Tupana nacú, ra'acale Jesús ñaté. Nemá pajlocaca:

—Uncá huani huamala apú la'acá marí rila'acá que caja.

*Jesús quemacá Matéojlo, ri'ijnacáloje rijhua'até ra'apiyateje penaje yucuna marí:*  
(Mt 9.9-13; Lc 5.27-32)

<sup>13</sup> E caja Jesús i'ijnari piño caesa turenajo. Riphá rejo. Reje cajrú ina'uqué jahuacaco piño rinacojé. Aú rehuíña'ata necá re.

<sup>14</sup> Rehuíña'ataca necá ejomi ri'ijná chira'ajó ají que a'ajná ño'ojó. Amari Mateo yá'aco risápaca'ala la'acana nacú. Liñeru riquejá'a ina'uqué liyá, ra'acáloje ricá ne'emacánajlo penaje. Alfeo i'iri ri'ímá. Ramá riyá'aco. E Jesús quemari rijló:

—Pi'ijná nujhua'até.

—Je —que rimacá.

Raú rácho'o, ri'ijná rijhua'até.

<sup>15</sup> E caja Mateo ñacaré chu Jesús ajñari ra'ajnehuá cajrú ajopana ina'uqué hua'até. Cajrú ajopana liñeru ña'ajeño ne'emacánajlo yá'áño caja rijhua'até. Ajopana, nemacárena nacú: “Uncá ina'uquélaruna necá” que, hua'até caja riyá'o. Cajrú marí cajena chira'acó rijhua'até rihuacajé. Jesús ja'apiyatéjena i'imaño caja re.

<sup>16</sup> Tupana puráca'alo nacú jehuíña'atajeño naquiayana i'imaño fariséona. Necá amaño Jesús ajñaca ra'ajnehuá ileruna ina'uqué hua'até. Aú nemá ra'apiyatéjenajlo:

—¿Naje chi jehuíña'atajeri ajñari ra'ajnehuá ileruna hua'até? Ne'iyajena uncá ina'uquélaruna necá. Liñeru ña'ajeño ne'emacánajlo necá ajopana.

<sup>17</sup> Jesús jema'arí nemacá marí que najló. Aú rimá najló:

—Uncá peyajhuéruna i'ijnalaño pusána'ajeri amaje. Natáminaja calé i'ijnaño ramaje. Ñaqueé caja ina'uquejlo nucá. Re ina'uqué, natámina que necá Tupánajlo, pu'uhuaré la'ajeño ne'emacale. Ne'iyajena pechu i'ímá nanacuhua: “Pu'uhuaré la'ajeño huecá” que. Nu'ujná majó Tupana yucuna i'ímajé ilé cajénajlo, napajno'otácaloje napéchuhua pu'uhuaré nala'acare liyá penaje, ne'emacáloje lamára'ataquejami que Tupánajlo raú penaje. Eyá ajopana, napechu i'ímá nanacuhua: “Palá la'ajeño huecá” que. E'iyonaja uncá ñaqueé calé necá. Uncá nu'ujnalá majó ilé cajénajlo riyucuna i'ímajé —que Jesús quemacá najló.

*Naquejá'aca Jesús liyá a'ajnejí liyá i'itacano yucuna marí:*  
(Mt 9.14-17; Lc 5.33-39)

<sup>18</sup> Juan ja'apiyatéjena, fariséona ja'apiyatéjena, quele i'itacó na'ajné liyá huacajé, ajopana iphaño Jesús nacú. Nemá rijló:

—Juan ja'apiyatéjena i'itaño na'ajné liyá; fariséona ja'apiyatéjena, ñaqueé caja. Eyá pa'apiyatéjena ta uncá i'italaño na'ajné liyá —que nemacá rijló.

<sup>19</sup> Jesús quemari najló:

—Nahuá'acaco huacajé, necá nayucupé'acarena, uncá i'italaño na'ajné liyá, ilé ruyajná penaje i'ímá najhua'até quetana.

<sup>20</sup> Ñaqueé caja ricá no'opiyatéjenajlo. Najhua'até nu'umacá quetánaja uncá ne'etaló na'ajné liyá. Tupana huá'ajeri nucá naliyá, rejomi ne'etajó na'ajné liyá —que Jesús quemacá najló.

*Jesús jehuíña'ataca necá, nayurícaloje jupichumi puráca'aloji huajé lanaquiya penaje. Aú ri'ímá yucu najló marí que:*

<sup>21</sup> —Uncá na calé mata'arí a'arumacaji huajé naquiayana jupichumi tepé penaje. Re'iyayá ripácana aú jupichumi jiyo'otaro huajé liyá. Caja penaje richaje huani jiyo'otáqueja jupichumi a'arumacaji yurico.

<sup>22</sup> Uncá caja iná aco'olá nacaje jalá huajé amúra'ataca jupichumi ra'acuná chojé, iná lamá'atacaloje ricá richu penaje. Camejeri ímami naquiayá la'acanami ricá ra'acuná. Ilé que iná la'acachu huajé amúra'ataca huapa'atari jupichumi ra'acuná, caja ñaataco ri'ímacale. Ejeja ricapichó jupichumi ra'acuná hua'até. Eyá huaje ra'acuná chojé iná aco'ocachu huajé nacaje jalá amúra'atanami, uncá rijyo'otala ricá, camejeri ímami ñaacole rijhua'até —que

Jesús i'ímacá najló yucu, nayurícaloje naliyó jupichumi puráca'aloji, ripuráca'alo lanaquiya penaje.

*Jesús ja'apiyatéjena chíra'aca huejapa trigo naquiya huatána'acaje huacajé yucuna marí:*  
(Mt 12.1-8; Lc 6.1-5)

<sup>23</sup> Huatána'acaje huacajé Jesús ja'apari ají que iñe'epú chuhúa ra'apiyatéjena hua'até. Iñe'epú ja'apari ajopana mená e'yohuá. Re'iyá cajrú trigo i'ímacá. Na'apaca re'iyohuá nacuhua ja ra'apiyatéjena ña'año huejapa rinaquiya. Natojro'ó nacápojo ricá, najñácaloje ricá penaje.

<sup>24</sup> Raú fariséona quemáño Jesusjlo:

—¡Piyacá'ol! Chuhujá huatána'acaje huacajé. E'iyonaja cajona pa'apiyatéjena sapaño. Uncá nala'alá Moisesmi chu puráca'alomí quemacá que.

<sup>25</sup> Aú rimá najló:

—Icá hue'epiño méqueca Tupana puráca'alo lana'aquejami quemacá Davidmi chu nacú. Mari que rila'acá Abiatar mi chu i'ímacá sacerdoténa huacára'ajeri huacajé: Quehuí rijló me'epejí i'ímacá. Ñaqué caja quehuí me'epejí i'ímacá rijhua'até i'ímacáñojlo.

<sup>26</sup> A'acuhuaná Davidmi chu mujlúca'ari Tupana ñacaré chojé pan ajñaje, Tupánajlo a'acanami ri'ímacá. Moisesmi chu puráca'alomí quemari rinacu, ajopana ajñaca piyá ricá. Necaja calé, sacerdoténaja calé ajñaño ricá. E'iyonaja Davidmi chu ajñari ricá. Ra'á caja rijhua'até i'ímacáñojlo rinaquiya —que rimacá najló.

*Ri'imá piño najló huatána'acaje huacajé yucuna marí que:*

<sup>27</sup> —Uncá huatána'acaje huacajéjlo penájeja calé Tupana queño'ótari ina'uqué i'ímacá. Nahuatána'acaloje najlhuua nasápaca'ala liyá penaje calé Tupana huacára'ari nahuatána'aca huatána'acaje huacajé.

<sup>28</sup> Ina'uquéjloje penaje i'ímacá nucá. Tupana quemari nunacu, numacáloje méqueca iná la'acá huatána'acaje huacajé penaje —que Jesús quemacá fariséona naquiyanajlo.

### 3

*Jesús lamá'ataca caja yáte'ela a'amitacó rijló yucuna marí:*

(Mt 12.9-14; Lc 6.6-11)

<sup>1</sup> E apú huatána'acaje huacajé piño Jesús mujlúca'ari nahuacáca'alo ñacarelana chojé. Re apú i'imari najhua'até. Caja riyáte'ela a'amitaró rijló i'ímacá.

<sup>2</sup> Re caja ajopana i'ímaño. Necá quejila'año Jesús, namácaloje méqueca rila'acá penaje. Rilamá'ataquela ricá huatána'acaje huacajé, nemajla rinacu: “Pu'uhuaré la'ajeri ricá” que.

<sup>3</sup> E Jesús quemari riyáte'ela a'amitarojlo:

—Pácho'o majó huajimajo.

<sup>4</sup> E rimá ajopánajlo:

—¿Meque iná la'acá huatána'acaje huacajé? ¿Meque chi Tupana puráca'alo lana'aquejami quemacá rinacu? ¿E chi palani iná la'acá palá ca'ajná, chapú ca'ajná huatána'acaje huacajé? ¿E chi palani iná i'imatacá ina'uqué capichácajo liyá ca'ajná, nacapichátacana ca'ajná huatána'acaje huacajé? —que rimacá najló.

E'iyonaja uncá na'ajipalá rijló.

<sup>5</sup> Raú riyacá'ol nachaje yuríque'ela. Camu'ují ripechu la'acó najhua'até, ijnú nahuátacale ina'uqué mu'ují hue'epícana. E rimá riyáte'ela a'amitarojlo:

—Piya'atá nojló piyáte'ela.

Riya'ataca rijló ricá aú ja ripala'ó. Ripa'ó rapumí chuhúa júpimi ri'ímacá que caja.

<sup>6</sup> Raú fariséona naquiya jácho'oño nahuacáca'alo ñacarelana chiyá, napura'acóloje Herodes hua'atéjena hua'até Jesús nócana nacú penaje. Ritejmo'ótacale ina'uqué huatána'acaje huacajé chona nahuata rinócana.

*Cajrú ina'uqué jahuacaco caesa turenajo yucuna marí:*

<sup>7</sup> E caja Jesús i'ijnari ra'apiyatéjena hua'até ají que caesa turenajo. Cajrú huani ina'uqué i'ijnajlo rijhua'até. Ne'iyajena i'ímaño Galilea eyájena. Ajopana i'ímaño Judea eyájena.

<sup>8</sup> Ajopana piño i'ímaño Jerusalén eyájena. Ajopana piño i'ímaño Idumea eyájena. Ajopana piño i'ímaño Jordán pa'anajo pumitá eyájena. Ajopana piño i'ímaño Tiro eyájena. Ajopana piño i'ímaño Sidón eyájena. Iquí'iruna huani ne'emacá. Necá i'ijnajlo ramaje, nema'acale piyuque nacaje Jesús la'acare yucuna.

<sup>9</sup> Cajrú huani nahuacaco Jesús nacojé. Aú rimá ra'apiyatéjenajlo:

—Iji'ichá nojló jita, ina'uqué majra'acá piyá nucá.

—Je —que.

<sup>10</sup> Caja ritejmo'óta cajrú natámina i'ímacá. Aú ajopana natámina jara'año rinacojé, nasápacaloje rinacu penaje, natejmo'ocóloje raú penaje.

<sup>11</sup> Ajopana e'iyá jiñana pechu i'imaño. Jiñana pechu amaca aú Jesús, ina'uqué ne'emacárena e'iyá tára'aqueño ne'erúpachi aú rijimaje. Nahuíyo'oco nemájica rijló:

—Picá Tupana i'irí.

<sup>12</sup> Aú Jesús huacára'ari necá caphí, ne'emacá piyá riyucuna ajopánajlo.

*Jesús a'acá iyamá iphata ji'imaji nacojé quele achiñana ra'apiyatéjena penaje yucuna marí:*  
(Mt 10.1-4; Lc 6.12-16)

<sup>13</sup> Eyá Jesús i'ijnari yenuri i'ihuátaje. Reyá i'imajemi rihuá'a ina'uejeljo rihuátacarenajlo. Aú ne'ejná rejo.

<sup>14</sup> Iyamá iphata ji'imaji nacojé quele achiñana ne'emacá. E rimá najló:

—Chuhua icá i'imajeño no'opiyatéjena. Nuhucára'aje icá Tupana yucuna i'imajé ajopana, ajopánajlo que penaje.

<sup>15</sup> Nupechu aú icá'ajé jiñana pechu ajopana ina'uqué e'iyayá —que rimacá najló.

<sup>16</sup> Marí quele ne'emacá ra'acárena ra'apiyatéjena penaje: Simón. Rapiyaca rii, ra'á rii Pedro.

<sup>17</sup> Apú i'imari Santiago, re'ehué Juan hua'até. Zebedeo yaní ne'emacá. Jesús a'arí neí Boanerges. “Ina'uqué catejmúruna pichaní que catejmuca”, que quemacana neí napura'acó chu.

<sup>18</sup> Ajopana piño i'imaño: Andrés, Felipe, Bartolomé, Mateo, Tomás, Santiago, quele. Apú Santiago ri'imacá; Alfeo i'irí ri'imacá. Ajopana piño i'imaño: Tadeo, Simón, quele. Simón i'imari cananista naquiyana.

<sup>19</sup> Eyá caja penaje Judas Iscariote. Nenoca Jesús huacajé, ricá huá'ari ripinana Jesús i'imacá ejo, napatacaloje ricá penaje. Marí quele ne'emacá ri'ihuapacárena rijluhua ne'iyayá, ne'emacáloje ra'apiyatéjena penaje.

*Ina'uqué naquiyana quemañó Jesús nacú: “Jiñá pechu i'imacare e'iyá ricá.” Riyucuna marí:*  
(Mt 12.22-32; Lc 11.14-23; 12.10)

<sup>20</sup> Ejomi Jesús i'ijnari pají chojé ra'apiyatéjena hua'até. Richape piño cajrú ina'uqué jahuacaco rejé Jesús chaje. Nanacajé uncá meño'ojó Jesús, ra'apiyatéjena, quele ajñalaño na'ajnehuá.

<sup>21</sup> Riyucuna iphari rejena nacú. Aú ne'ejná ripa'ataje. Yucu i'imá rehuá: “Caja rehuji'ticho.”

<sup>22</sup> Tupana puráca'alo nacú jehuíña'atajeño naquiyana, Jerusalén eyájena ne'emacá, quemañó Jesús nacú marí que:

—Jiñana huacára'ajeri íí Beelzebú. Jesús e'iyá ripechu. Ñaquele rihuacára'a ajopana jiñana pechu jácho'oco ina'uqué e'iyayá.

<sup>23</sup> E Jesús huá'ari najló, ne'ejnacáloje rahua'ajé penaje. E ri'imá yucu najló, rehuíña'atacaloje necá raú penaje. Rimá najló:

—¿Meque la'ajé chi jiñana huacára'ajeri, Satanás, ca'acajla rinaquiyana ina'uqué e'iyayá?

<sup>24</sup> Ajopana huacára'ajeri hua'atéjena nócaquelo pajhua'atéchaca, nacapichátajla pecohuácaca raú.

<sup>25</sup> Ñaqué caja iná ejena nócaquelo pajhua'atéchaca, nacapichátajla caja pecohuácaca raú.

<sup>26</sup> Ñaqué caja ricá Jiñá Chi'ináricanajlo. Jiñana pechu rijhua'atéjena necá. Rica'aquele necá ina'uqué e'iyayá, rila'ájla chapú ricó raú. Uncá meque rila'alajla rejomi, uncale rijhua'atéjena i'imalajla raú.

<sup>27</sup> Uncá meño'ojó ina'uqué matejmurú mujlúca'ala catejmuni ina'uqué ñacaré chojé rinane ña'ajé riliyá. Apú richaje catejmuca ipháquela rinacu, ricá jepo'otaríjla ricá. Quéchami rijña'atácajla rinane riliyá.

Marí que Jesús i'imacá yucu najló, nahue'epícaloje raú richá'ataca Jiñá Chi'ináricana penaje. Rimá piño najló:

<sup>28</sup> —Tupana amaro ina'uqué chaje piyuqueja pu'uhuaré nala'acare liyá, namanaicho nala'acare liyá hua'ató. Pu'uhuaré nemacare nacú liyá hua'ató ramó nachaje.

<sup>29</sup> Eyá pu'uhuaré nemacare Tupana Pechu nacú, ricaja calé uncá ramálajo nachaje riliyá. Caja queja ne'emajica hua'ajini huani. Uncá nachaje amácana i'imalaje.

<sup>30</sup> Marí que Jesús quemacá najló, Tupana puráca'alo nacú jehuíña'atajeño pura'acole pu'uhuaré rinacu. Tupana Pechu i'imacare re'iyá aú rica'á jiñana pechu ina'uqué e'iyayá. E'iyonaja nemá rinacu: “Jiñá pechu i'imacare re'iyá, aú rica'á necá ne'iyayá.”

*Jesús jaló i'ijnacá rijmerénami hua'até Jesús amaje yucuna marí:*  
(Mt 12.46-50; Lc 8.19-21)

<sup>31</sup> Pachu Jesús i'imari cajrú ina'uqué hua'até. E Jesús jaló, rijmerénami, quele i'ijnaño rejo ramaje. Iphaño pají cópeje. E nemá apujlo:

—Pimá rijló, ri'ijnachi majó.

—Je —que.

<sup>32</sup> Cajrú ina'uqué yá' año Jesús hua'até pachu. E nemá rijló:

—Piyacá'o, paló iphíchayo paji cópeje pijmerénami hua'até. Nahuata pijhua'até pura'acano.

<sup>33</sup> Rimá najló:

—¿Mecajena chi necá nojena, noló, quele?

<sup>34</sup> E riyacá'o rahua'á yá'acaño tujlá que chaje. Rimá najló:

—Iyacá'o. Mariruna ina'uqué noló, nojena que i'imacaño necá nojló.

<sup>35</sup> Tupana huátaca que la'acaño, necá nojena que nojló. No'ohué que, no'ohueló que, noló que nojló necá —que Jesús quemacá najló.

## 4

*Nacaje icha ijí ejátajeri yucuna marí:*

(Mt 13.1-9; Lc 8.4-8)

<sup>1</sup> Ejomi ri'ijná piño caesa turenajo. Reje cajrú huani ina'uqué jahuacaño piño rinacojé. Iqui'iruna ne'emacale, rihuitúca'a jita chojé yá'ajo. Ajopana yuriño que'epé nacú. E caja rehuíña'ata necá cajrú Tupana puráca'alo nacú.

<sup>2</sup> Nacaje yucuna i'imacana nacú rehuíña'ata necá rinacu. Ehuá Jesús i'imacá yucu najló marí que:

<sup>3</sup> —Jema'á. Pajluhuaja ina'uqué i'ijichari nacaje icha ijí ejátaje. Riqui'ichá richa ijí te'erí lamá'ataqueja jimahua.

<sup>4</sup> Rejátacana nacú ri'ijichá. Richa ijí, riqui'ichaje naquiyana, ja'acharo iñe'epú chojé. E caja cupira'aphana iphíchaño rajmúlo'otaje.

<sup>5</sup> Apú richa ijí, riqui'ichaje naquiyana, ja'acharo jipa nacojé. Huejápaja te'erí i'imichari rinacu. Quiñaja riphíchaca, huejápaja te'erí i'imichácale rinacu.

<sup>6</sup> Camú moco'ochaca aú rimeriyi'icho, uncale ra'apare i'imalacha.

<sup>7</sup> Apú richa ijí, riqui'ichaje naquiyana, ja'acharo pu'uhuareni jimichi e'iyajé. Pu'uhuareni jimichi iphíchari nacaje icha ijí rejáchiyaje hua'até. Pu'uhuareni jimichi tahuá'añachari ricá. Raú rihuaji'ichá re'iyajé. Aú calé uncá rarúca'alacha.

<sup>8</sup> Eyá apú richa ijí, riqui'ichaje naquiyana, ja'acharo palani te'erí e'iyajé. Ilé calé iphíchari palá. Palá caja rarúqui'ichaca. Re'iyajé ejátacanami icha i'imari treinta ca'alá. Apú arúqui'ichari richahuá sesenta ca'alá. Apú arúqui'ichari piño richahuá cien ca'alá. Caja quetana riyucuna.

<sup>9</sup> Marí que ri'imacá yucu najló. Ejomi rimá rema'ajéñojlo:

—Icá que'ejhuirúnajlo numá: A'á inacojó riyucuna.

*Jesús quemari ne'iyajénajlo nájeca ri'imacá yucu ina'unquejlo. Riyucuna marí:*

(Mt 13.10-17; Lc 8.9-10)

<sup>10</sup> Jesús i'imacá ee ricó apojó, riyucuna jema'ajeño naquiyana i'ijnáño richaje riyucuna quejá'aje riliyá. Iyamá iphata ji'imaje nacojé quele ra'apiyatéjena i'imaño caja najhua'até. Nemá rijló:

—¿Meque quemacana chi quele yucu pi'imichaje huajló?

<sup>11</sup> E rimá najló:

—Me'echuje ina'unquejlo méqueca Tupana la'acá, ina'uqué naquiyana i'imacáloje rihua'atéjena penaje. Chuhua icá ihue'epíjica rinacojé. Eyá ajopana, uncá nujhua'atéjena calé necá, uncá hue'epílajeño rinacojé. Najló yucu queja ricá.

<sup>12</sup> Tupana puráca'alo ja'apátajeri chu i'imari riyucuna júpimi i'imacá. Rimacá nanacu que necá. Marí que ri'imacá riyucuna i'imacá:

Namaje nacaje. E'iyonaja uncá nahue'epílaje meque quemacánaca nacaje namáicare.

Nema'ajé riyucuna. E'iyonaja uncá nahue'epílaje meque quemacánaca ricá.

Ripháquela napechu nacojé, napajno'otácajla napéchuhua Tupana ejo pu'uhuaré nala'acare liyá.

Raú ramojla nachaje pu'uhuaré nala'acare liyá —que rimacá riyucuna i'imacá.

*Jesús quemaca najló meque quemacánaca nacaje icha ijí ejátajeri yucuna marí:*

(Mt 18.18-23; Lc 8.11-15)

<sup>13</sup> E rimá piño najló:

—Uncachu ihue'epila meque quemacánaca cari yucu, uncá caja ihue'epílaje meque quemacánaca apa'amá yucu nu'umáicare ijló —que rimacá najló—. Marí que quemacánaca ricá:

<sup>14</sup> Tupana yucuna i'imajeri que caja nacaje icha ijí ejátajeri.

<sup>15</sup> Ri'imá Tupana yucuna cajrú ina'uquejlo. Ne'iyajena jema'año riyucuna. E'iyonaja Jiñá Chi'ináricana ca'arí napechu naquiyá Tupana puráca'alo nema'acare. Richa ijí naquiyana ja'acó iñe'epú chojé, que caja najló ricá.

<sup>16</sup> Eyá richa ijí naquiyana ja'aró jipa nacojé, huejapa te'erí i'imagare nacojé. Mequetánaja calé rijña'acá panacu riphaca ejomi. Ñaque caja ina'uqué naquiyánajlo ricá. Nema'á Tupana puráca'alo, pu'ují napechu la'acó raú.

<sup>17</sup> Mequetánaja calé napechu i'imagá palá ripuráca'alo nacú. Nahuátacale Tupana puráca'alo ja'apiyá i'imagana, ajopana ca'ajná la'año necá chapú. Napura'ó ca'ajná nanacu pu'uhuaré. Namá ca'ajná chapú caje yajhué. Marí caje aú nayurí naliyó ricá, uncale napechu i'imalá caphí najluhua.

<sup>18</sup> Eyá richa ijí naquiyana ja'aró caja pu'uhuarieni jimichi e'iyajé. Riphaca ejomi rihuaja'acá re'iyajé. Uncá rarúca'ala. Ñaque caja ina'uqué naquiyánajlo ricá. Nema'á Tupana puráca'alo; naqueño'ó ra'apiyá i'imagana.

<sup>19</sup> E'iyonaja cajrú na'acá nanacojé nacaje marí eja'ahuá chu i'imagare. Cajrú nacaje huátacana najluhua nahue'epí natucumó. Napechu nacú ri'imá: "Palá hue'emajica cajrú liñeru hua'até, ñó'ope le'ejepelaji caje hua'até". E'iyonaja uncá ñaque calé ricá ina'uquejlo. Marí que péchuruna ne'emacale, uncá na'alá nanacojé Tupana puráca'alo, nala'acáloje palá ra'apiyá i'imagana aú penaje.

<sup>20</sup> Eyá richa ijí naquiyana ja'aró caja palani te'erí e'iyajé. Ricá iphari palá; ritahuá'ó; rarúca'a palá. Ñaque caja ina'uqué naquiyánajlo ricá. Nema'á Tupana puráca'alo; na'á caja nanacojé ricá. Raú nala'á palá ra'apiyá i'imagana aú. Richa ijí naquiyana arúca'ari richahuá treinta ca'alá, sesenta ca'alá, cien ca'alá que. Ñaque caja ricá Tupana puráca'alo ja'apiyá i'imagáñojlo. Ne'iyajena la'año palá huejápaja. Richaje, richaje que ajopana la'acá palá —que ra'apátaca najló riyucuna.

*Iná camaré yucuna marí:  
(Lc 8.16-18)*

<sup>21</sup> Rimá piño najló:

—Iná lucúna'acachu iná camaré, uncá iná yá'atala ricá me'echú i'ichí lájma'ataqueja ja'apejé. Uncá caja iná yá'atala ricá iná camané ja'apejé. Yenu iná yá'ata ricá, ripatacáloje palá iná camaré penaje.

<sup>22</sup> Re Tupana puráca'alo naquiyana me'etení, me'echuje ricá ina'uquejlo. Quéchami nahue'epíjica rinacojé.

<sup>23</sup> Jema'á, icá que'ejhuiruna —que rimacá najló.

<sup>24-25</sup> Rimá piño najló:

—Jema'á palá Tupana puráca'alo. A'ajeño nanacojé ricá pechu rila'ajé palá, nahue'epícaloje richaje, richaje que rinacojé penaje. Eyá necá uncá a'alaño nanacojé ricá, Tupana ca'ajeri naliyá huejápaja nahue'epícare rinacojé.

*Jesús i'imari najló nacaje ejátacanami tahuá'aco yucuna, nahue'epícaloje me'echuje inajlo méqueca Tupana la'acá nacaje penaje. Riyucuna marí:*

<sup>26</sup> Jesús quemari piño najló:

—Ina'uqué naquiyana huacára'ajeri Tupana. Chuhua nu'umajica yucu ijlo, ihue'epícaloje rinacojé raú penaje: Apú i'ijnari nacaje icha ijí ejátaje te'erí lamá'ataqueja e'iyajé.

<sup>27</sup> Lapi ricamato, lapiyami rapó risápaca'ala nacojé. Muni, muni que ñaqueja hua'até ricá. Hua'até que nacaje rejátacare iphaca, tahuá'aro ríjlo. Uncá rihue'epila naca tahuá'ataca ricá.

<sup>28</sup> Te'erija calé tahuá'atarí ricá. Pamineco rihuiriulá jeño'orí. Ricá huicho'oró ripaná penaje. Ejomi rihuí jeño'orí, ricá chiyá richa jeño'orí caja. E caja penaje richa iphari rená chojé, paminá ña'acáloje richa penaje.

<sup>29</sup> Raú ri'ijná richa ña'ajé. Caja quetana riyucuna.

*Jesús i'imari najló mostaza ijí yucuna nahue'epícaloje méqueca rijhua'atéjena ñaté a'acó richaje, richájeno que penaje. Riyucuna marí:*

*(Mt 13.31-32; Lc 13.18-19)*

<sup>30</sup> Jesús i'imari piño najló yucu marí que:

—Ina'uqué naquiyana huacára'ajeri Tupana. Re rijhua'atéjena huejápaja. Ehuá richaje, richaje que íqui'irunaca necá rijhua'atéjena. Chuhua nu'umajica yucu ijlo, ihue'epícaloje méqueca ricá penaje.

<sup>31</sup> Mostaza ijí que ricá, iná ejátacare iná i'icacapere e'iyá. Capajé nojé huani ríj. Uncá apú i'imalá ra'apejé marí eja'ahuá chu.

<sup>32</sup> Rejátacana ejomi riqueño'ó íphácaje. Richaje, richaje que ritahuá'aco. Jíma'alami yenua quetana ritahuá'aco. Cajrú nojé caja ri'iché. Ripaná e'iyá cupira'aphana, camejérina cayuphéruna, cajena la'año nañacaró re'iyá.

<sup>33</sup> Marí que Jesús jehuíña'atajica necá cajrú Tupana nacú yucu i'ímacana aú. A'ajná nahue'epjica ricá ejená, ri'ímaqué najló yucu.

<sup>34</sup> Necámica que ne'emajica ra'apiyatéjena hua'até ee rihuicho'oqué piyuque riyucuna najló.

*Jesús quemari carenajo, ra'apaca piyá yucuna marí:*

(Mt 8.23-27; Lc 8.22-25)

<sup>35</sup> E caja najúhua'a. Raú rimá ra'apiyatéjenajo:

—I'ijná, huacuhúa'achi caesa pa'anajo pitá.

—Je —que nemacá.

<sup>36</sup> Ne'emá nayucuno ina'uquejlo. Ejomi ra'apiyatéjena huitúca'año jita chojé, Jesús yá'acaro chu chojé nahuitúca'a. E naqueño'ó caesa cuhuá'acana pa'anajo pitá. Cha'apá ajopana, ajopana que cuhuá'año caja netane chu najhua'até.

<sup>37</sup> Pe'iyojechá nacuhúa'aca ricá. Ejéchami mana'í chiyó carená noca necá caphí huani. Carená yoco'orí juni na'apiyá, amo'oró jita chojé cajrú juni. Ujú caje chiyó ne'ajacajla.

<sup>38</sup> E'iyohúa que Jesús camátaco ri'ipala chu. Rihuíla'aru ja'apí ja'ajona e'iyá ricamato. Huajé naqueño'ocá ejácaje ee napótaca ricá.

—Huehuíña'atajeri —que nemacá—. ¿Uncá chi pa'alá pinacojó huacapichaco chuhuaca?

<sup>39</sup> E Jesús jácho'oro, raca'á carená, rimá carenajo:

—Pa'apániya.

Júnijlo rimá:

—Piyoco'oniyó.

Raú uncá carená ja'apala. Hua'ató que uncá juni yoco'oló. Mana'íja ri'ímacá reyá.

<sup>40</sup> E rimá ra'apiyatéjenajo:

—¿Naje chi i'quero'ochó? ¿Uncá jo'ó chi ipechu i'imalá caphí nochojé? —que rimacá najló.

<sup>41</sup> Quero'ocajo nacú jo'ó ne'emacá. E nemá pajlocaca:

—¿Na ca'ajná cari? Carená, juni hua'até jema'arí ra'apiyá.

## 5

*Jesús ca'acá apú ina'uqué e'iyayá jiñana pechu yucuna marí:*

(Mt 8.28-34; Lc 8.26-39)

<sup>1</sup> E caja nephá caesa pa'anajo pitá, Gerasa te'eré ejo.

<sup>2</sup> E Jesús jácho'oro jita chiyá. Ejéchami apú ina'uqué iphaca rinacu. Jiñá pechu i'imari re'iyá. Támijimina ca'aquelana, jipa e'iyá i'ímacare, chiyá riphá.

<sup>3</sup> Támijimina ca'aquelánaja i'imari rapucuna.

<sup>4</sup> Catejimuni huani ri'ímacá. Pulapé nepo'otajla ricá curete aú. E'iyonaja rimata'á curete ta rinacojó. Uncá repo'ojona i'imalá; uncá caja na calé jepo'otárijla ricá. Na'aqué caja pejru'uhúa ra'anapitá nacojé, ritajné nacojé hua'ató. Rimajáca'ataque rinacojó ricá, rijítaminoja yuríquero raú. Uncá na i'ímaqué ritejmu'e'ehué; uncá na calé chá'ataqueri ricá.

<sup>5</sup> Hue'echú ca'alá queja, lapí hua'ató richira'acó ahuíyo'ocaje nacú ipuré e'iyohúa, támijimina ca'aquelana e'iyohúa hua'ató. Rituja'aqué ricó jipa aú. Ricá penaje iphari Jesús nacú.

<sup>6</sup> Ramaca aú Jesús júcaya recho'ó riloco'opani. Riphá rinacu ee ritára'o ri'irúpachi aú rijimaje.

<sup>7-8</sup> E Jesús quemari jiñá péchu re'iyá i'ímacárejlo:

—Pácho'o re'iyayá.

Cajrú rahuíyo'oca raú, rimá rijló:

—Jesús, Tupana I'irí picá. Tupana je'echú churí i'irí picá. ¿Naje picahuíla'a nunacu? Pijló numá: Pila'aniya chapú nucá, uncá paala Tupánajlo ricá —que rimacá Jesusjlo.

<sup>9</sup> Jesús quemari rijló:

—¿Na pií?

—Nuí íqui'iruna, íqui'iruna hue'emacale.

<sup>10</sup> Mahuó rimacá Jesusjlo, rihuacára'aca piyá necá reyá.

<sup>11</sup> A'ajnare que cajrú je'eruna piracana chira'acó yenuri nacuhúa na'ajnehuá culácana nacú.

<sup>12</sup> Raú jiñana pechu quemano rijló:

—A'ajnáruna e'iyajé pihuacára'a huecá.

<sup>13</sup> —Je —que Jesús quemacá najló.

Raú jiñana pechu jácho'oño ilé ina'uqué e'iyayá, ja'año je'eruna piracana e'iyajé. Dos mil je'eruna ne'emacá. Jiñana pechu ja'acó aú ne'iyajé necho'ó ají que a'ajná ño'ojó. Yenuri ji'ihuátaya na'ó caesa acojé. Rejeja nacapichó piyuqueja junápeje.

<sup>14</sup> Marí caje aú nalamáara'ajeño penájemina ñaaño reyá. Ne'emá riyucuna pajimila erúnajlo, ajopana rehuá i'imañaño hua'até. Raú cajrú ina'uqué i'ijnacá rejo ramaje.

<sup>15</sup> E nephá Jesús nacú. Amaño ilé ina'uqué Jesús jácho'otacare e'iyayá jiñana pechu. Re riyá'o Jesús hua'até. Ca'arumacani ri'imacá; palá ripechu i'imaçá. Marí que namaca aú ricá naquero'ó ripiyá.

<sup>16</sup> Re i'imañaño amaño maapami que Jesús jácho'otaca jiñana pechu re'iyayá. Namá caja je'eruna capichaco junápeje. Necá penájena i'imaño riyucuna huajé iphácañojlo.

<sup>17</sup> E caja nemá Jesusjlo:

—Pácho'o huate'eré naquiyá.

—Je —que rimacá.

<sup>18</sup> E rihuitúca'a jita chojé. Ejéchami jiñana pechu i'imaçare e'iyá penájemi quemacá rijló mahuó:

—Nu'ujná pijhua'até.

<sup>19</sup> —Uncá pi'ijnalaje nujhua'até —que Jesús quemacá rijló—. Pipa'ó piñacaré ejo, pi'imaçaloje pejena hua'até penaje. Palá huani Tupana li'ichaca picá. Cajrú rihue'epíchaca pimu'ují. Eco pi'imá riyucuna najló —que rimacá rijló.

<sup>20</sup> —Je —que rimacá.

E ripa'ó. Riqueño'ó riyucuna i'imaçana rite'eré ehuájenajlo. Re'iyohuá iyamá té'ela quele pajimila i'imaçá. Re ri'imá palá Jesús la'acare ricá yucuna najló. Riyucuna jema'ajeño pechu i'imá Jesús nacú: “¡Meque piyuque huani rila'acá!”

*Jesús macápo'oca Jairo itu yucuna. Quecha apa'ahuelo tejmo'otaco Jesús a'arumacá nacú sápacana aú yucuna marí:*

*(Mt 9.18-26; Lc 8.40-56)*

<sup>21</sup> E caja Jesús cuhuá'ari jita chu ají que rapumí chuhua piño caesa pa'anajo pitá. Narúca'aco ejé cajrú ina'uqué jahuaçano rinacojé.

<sup>22</sup> E apú iphari rinacu, Jairo rií i'imaçá. Nahuacáca'alo ñacarelana chiyá huacára'ajeri ri'imacá. Riphá rinacu. E rijláma'o ri'imá nacojé.

<sup>23</sup> Rimá rijló:

—Aquíchajeru huani nutu, yehuíchaja rupechu capichaco. Pi'ijná nujhua'até nuñacaré ejo, pito'ochiyachi piyáte'ela runacojé, ru'umacáloje raú penaje —que rimacá rijló.

<sup>24</sup> —Je —que Jesús quemacá rijló.

E ri'ijná rijhua'até. Cajrú ina'uqué i'ijnáño rápumi chu. Cajrú namajra'acá ricá.

<sup>25</sup> Najhua'até caja apa'ahuelo ja'apayo, rutami ru'umacá. Iyamá iphata ji'imaji nacojé quele jarechí quietana ru'umacá rutami. Jirá ja'apáqueri runaquiyá.

<sup>26</sup> Caja cajrú pusána'ajeño atá'añojla rupusána'acana. Cajrú huani rujña'ajica quehuini yajhué panacu raú. Rucá á ruliñerute piyuqueja, napusána'acaloje rucá penaje. E'iyonaja ñaqueja hua'até ru'umacá. Richaje, richájeno que romájica quehuini yajhué.

<sup>27</sup> Ehuá ne'emacá rojló Jesús yucuna. Aú ru'ujná ramaje. Ajopana hua'até ro'opá rápumi chu. Eyá rusapa ina'uqué ihuami chiyá ra'arumacá ji'imá nacú.

<sup>28</sup> Rupechu i'imá: “Nusápajica ee ra'arumacá nacú, nutejmo'otajo raú.”

<sup>29</sup> E rusapa rinacu. Hua'ató que jirá ja'apácare runaquiyá mata'acó runacojé. Caja peyajhueru ru'umacá rejeja. Raú ruhue'epí runapona tejmo'otaco rojló.

<sup>30</sup> Jesús hue'epiri ritejmo'ótaca rucá ripechu aú ja. Raú ripajno'ó riyámojo nachaje yacá'ajo. Rimá najló:

—¿Na sápitchari no'orumacá nacú?

<sup>31</sup> E ra'apiyatéjena quemáño rijló:

—¿Uncá chi piñue'epilacha cajrú ina'uqué majri'ichaca picá? ¿Eta naje chi pimá nanacu?: “¿Na sápitchari no'orumacá nacú?”

<sup>32</sup> Jesús yacá'aro ne'iyohuá piyuqueja, ramácaloje naca sápari ra'arumacá nacú.

<sup>33</sup> Ilerú inanaru hue'epiyo caja rutejmo'otaco. Aú ru'ujná riloco'opani quero'ocajo nacú. Cajrú rucurúcaca. E rutára'o ru'urúpachi aú rijimaje. E ru'umá rijló riyucuna piyuqueja. Aú Jesús quemari rojló:

<sup>34</sup> —Caja pitejmo'ochiyo chuhua, pipechu i'imaçale caphí nochojé. Pipechu i'imichá nunacu: “Ricá ja'apátajeri nutami caje nuliyá” que. Aú calé pitejmo'ochiyo. Chuhua pi'ijná palá ca'ajno. Caja pitejmo'ochiyo piyaripune liyá —que rimacá rojló.

<sup>35</sup> Marí que rimacá rojló ee ajopana iphaño Jairo nacú. Riñacaré eyá nahuacára'a ne'emacá. Nephá rinacu. E nemá rijló:

—Caja pitu taquíchayo; caja rupechu capiícharo. Uncá na penaje calé picahuíla'a Jesús Huehuíña'atajери nacú ruchaya —que nemacá rijló.

<sup>36</sup> Uncá Jesús a'alá rinacojó napura'acó. Rimá nahuacáca'alo ñacarelana chiyá huacára'ajerijlo:



<sup>37</sup> —Pila'aniya picó camu'ují. Pila'á pipéchuhua caphí nochojé.

E rimá ajopánajlo:

—I'ijnaniya nujhua'até, maáreja iyuró.

Pedro, Santiago, re'ehué Juan, queleja rihuá'a rijhua'ató.

<sup>38</sup> E caja nephá riñacaré ejo, amaño cajrú ina'uqué i'imacá re. Cajrú namejé i'imacá. Nahuinano la'acana nacú cajrú neyaca rucá.

<sup>39</sup> E rimujlúca'a rejo, rimá najló:

—¿Naje ila'á ihuainano cajrú huani maare? ¿Naje chi iyá rucá? Uncá rutaca'alacha, rucamáchiyojoja calé —que rimacá najló.

<sup>40</sup> Raú ne'echá rinacu. E Jesús quemari najló piyuque, namujlúca'acaloje a'ajná ño'ojó penaje. Rihuá'a rijhua'ató rora'apami, rolomi, rijhuáque'ena, queleja rihuá'a rijhua'ató. E namujlúca'a ucapú támijimi i'imacare chojé.

<sup>41</sup> E ripatá rucá ruyáte'ela naquiyá. Rimá támijimijlo:

—Talita cumi —que.

Napura'acó chu rimá rojló: “Yuhualó, pijló numá, pácho'o.”

<sup>42</sup> Raú ja rócho'o; ruchira'ó. Iyamá iphata ji'imaji nacojé quele jarechí ru'umacá. Rijhua'até i'imacaño pechu i'imá rinacu: “¡Meque piyuque huani rila'acá!”

<sup>43</sup> Raca'acó rimacá najló nemacá piyá rimacápo'oca rucá yucuna ajopánajlo. E rimá najló: —A'á rojló a'ajnejí.

## 6

*Jesús i'ijnacá Nazaret ejo yucuna marí:  
(Mt 13.53-58; Lc 4.16-30)*

<sup>1</sup> E caja Jesús pa'aró ra'apiyatéjena hua'até ají que rite'eré ejo. Riphá rejo.

<sup>2</sup> E nale'ejé huatána'acaje huacajé rehuíña'ata necá Tupana nacú nahuacáca'alo ñacarelana chu. Cajrú ripuráca'alo jema'ajeño i'ijnataca napéchuhua rinacu. Nemá rinacu:

—¿Na liyá chi rihue'epí piyuqueja nacaje nacojé? ¿Na a'arí rijló ripechu? ¿Meque ca'ajná rihue'epí piyuque nacaje la'acana uncá meño'ojó iná la'alare? —que nemacá rinacu.

<sup>3</sup> Nemá piño pajlocaca:

—Mirapehua nacú sápaperi ricá. María raló. Santiago, José, Judas, Simón, quele e'ehué ricá. Maare hue'iyá re'ehuelona ñacaré —que nemacá pajlocaca.

Namána'apa ri'imacale, ijnú nema'acá ra'apiyá.

<sup>4</sup> E Jesús quemari najló:

—Piyuque ina'uqué iphaño Tupana puráca'alo ja'apátajeri ja'apí. Necaja calé rite'eré eruna, rejena, riñacaré chiyájena, quele uncá iphálaño ra'apí —que rimacá najló.

<sup>5</sup> Uncá Jesús la'alá cajrú nacaje rehuá uncá meño'ojó iná la'alare. Rito'otá riyáte'ela huejápaja ina'uqué natámina nacú. Raú ja natejmo'otó.

<sup>6</sup> Uncá rehuájena pechu i'imalá caphí richojé. Raú Jesús pechu i'imá: “¿Naje ca'ajná ají que huani napechu?” Raú ri'ijná reyá apú eyá, apú eyá que nehuíña'atacana nacú.

*Jesús huacáca'aca ra'apiyatéjena i'imacá Tupana yucuna ajopánajlo, ajopánajlo que yucuna marí:*

*(Mt 10.5-15; Lc 9.1-6)*

<sup>7</sup> E rahuacata iyamá iphata ji'imaji nacojé quele ra'apiyatéjena, ritamáca'atacaloje necá iyamano huánija najhuáque'ehue hua'até, ne'ejnacáloje apú eyá, apú eyá que penaje. Ra'á caja najló péchuji, naca'acáloje jiñana pechu ina'uqué e'iyayá raú penaje.

<sup>8</sup> Ne'ejnacá yámona rimá najló marí que:

—Ijña'aniya nacaje ijhua'ató. Icutihuáreja calé ijña'ajé caja ijhua'ató. Ijña'aniya ijhua'ató a'ajnejí, itulané, liñeru, caje macá.

<sup>9</sup> Que'ema'ulárana i'ijnajé, pajluhua a'arumacaji chuja calé i'ijnajé.

<sup>10</sup> Iphájica ee pajmíla ejo, apú quemajeri ca'ajná ijlo, iyurícoloje rijhua'até riñacaré chu penaje. Iyuró rijhua'até re i'imajica quetana.

<sup>11</sup> Apala uncá nahuátalaje icá, uncá caja ca'ajná nahuátalaje ipuráca'alo jema'acana. Marí que ri'ulájica ee ijlo, iñaca'á ji'ima'ulá naquiyá mu'upé najló reyá jácho'ocano aú. Nahue'epícaloje raú napachojé nacapichájico penaje. Numá ijlo marí que ri'imajica: Tupana huajájica pu'uhuaré la'ajeño, namanaicho la'ajeño huacajé, cajrú rihuajájica ilé cajena, uncá pachá nahuátala icá. Cajrú rihuajájica Sodoma erúnami chuna. Ñaque caja rihuajájica Gomorra erúnami chuna. Pu'uhuaré la'ajeño huani ne'emacale, rihuajaje necá. Nachaje íqui'ica rihuajájica necá, uncá huátalajeño icá —que Jesús quemacá najló.

<sup>12</sup> E caja ne'ejná Tupana yucuna i'imajé ajopana, ajopánajlo que. Ne'emá najló riyucuna, napajno'otácaloje napéchuhua pu'uhuaré nala'acare liyá, namanaicho nala'acare liyá penaje.

<sup>13</sup> Naca'á caja cajrú jiñana pechu ina'uqué e'iyayá. Na'á caja nacaje jilami cajrú natámina napona nacú. Raú natejmo'otó.

*Meque Herodes i'ijnataca ripéchuhua Jesús nacú yucuna marí:  
(Mt 14.1-12; Lc 9.7-9)*

<sup>14</sup> Caja cajrú huani Jesús yucuna jema'acó rehuá i'imacá. Riyucuna iphari caja ne'emacana Herodes nacú. Raú rimá:

—Juan Bautizar la'ajeri quele nemá nacú. Caja rimacápo'o. Aú calé rihue'epí piyuque nacaje la'acana.

<sup>15</sup> Ajopana quemaño rinacu:

—Ricá Elías. (Tupana puráca'alo ja'apátajeri Elíasmi chu i'imacá)

Ajopana piño quemaño rinacu:

—Tupana puráca'alo ja'apátajeri ricá. Júpimi i'imacaño naquiyana que caja ricá.

<sup>16</sup> Jesús yucuna jema'acana aú Herodes quemari rinacu:

—Juan Bautizar la'ajeri ricá, núru'upi nuhuacára'acare mata'acana i'imacá. Ricá penájemi macápo'oro piño —que rimacá rinacu.

*Mequeca nenoca Juanmi chu júpimi i'imacá yucuna marí:*

<sup>17</sup> Ejo'ocaja Juanmi chu i'imacá huacajé, Herodes huacára'ari rica'acana ina'uqué huajáquelana chojé. Jepo'oqueja nayurí ricá richu. Marí que rila'acá ricá chapú riyajalo puráca'alo aú. Riyajalo íi i'imari Herodías. Re'ehué, Felipe, yajalo ru'umacá pamineco. Rica'á riliyá rucá.

<sup>18</sup> Richona Juan aca'arí Herodes i'imacá. Rimá rijló:

—Pe'ehué yajalo penájerumi ilerú pi'imá hua'até. Uncá Tupana huátala iná la'acá ilé que.

<sup>19</sup> Rijimaje Herodías yúcha'ayo Juan cha. Ruhuata rinócana. E'iyonaja Herodes itari rapu rojló.

<sup>20</sup> Herodes quero'oró Juan piyá, rihue'epícale palá huani rema'acá Tupana ja'apiyá. Ñaquele Herodes huátari rimejñatacana ruliya. Ri'ijnaqué ripuráca'alo jema'ajé; huechi ripechu i'imajica ripuráca'alo jema'acana nacú. E'iyonaja ricahuíla'aco rinacojé.

<sup>21</sup> E caja ehuaja riphá rená chojé riyajalo Herodíasjlo. Herodes iphátari rila'ejé jarechí. Aú caja rila'á fiesta rijluhua. Rihuacára'a rijhua'até sápageño la'acá cajrú a'ajnejí palá nojé. Cajrú rijhua'até huacára'ajeño, surárana huacára'ajeño, ajopana Galílea eruna chaje i'imacaño, quele necá ajñaño na'ajnehuá rijhua'até.

<sup>22</sup> Re ne'emá na'ajnehuá ajñacana nacú rijhua'até. E'iyohuá que Herodías itu iphaca arápa'aje najimaje. Palá huani ri'imacá Herodes nacú, piyuque ajopana rijhua'atéjena quele nacú ri'imá palá. Aú Herodes, ne'emacana, quemari rojló:

—Piquejé'a nuliya nacaje pihuátacare caje, no'ochí pijló ricá.

<sup>23</sup> Tupana hue'epiri quehuaca numacá. Nacaje piquejé'ajicare nuliya no'ojé pijló ricá. Pe'iyojé nacaje nujhua'atéjena capi ejé no'ojé pijló ricá —que rimacá rojló.

<sup>24</sup> Raú rócho'o reyá riyucuna i'imajé rolojlo.

Rumá rojló:

—Amí, ají que rimíchaca nojló. ¿Na nuquejé'aje riliyá?

—Pimá rijló, ra'achí pijló Juan Bautizar la'ajeri huíla'aru.

—Je —que.

<sup>25</sup> E pherú que rupa'acó ropumí chuhuá ne'emacana chaje. Rumá rijló:

—Pa'á nojló me'etení Juan Bautizar la'ajeri huíla'aru pachiya chojé —que rumacá rijló.

<sup>26</sup> Camu'ují huani ripechu la'acó raú. E'iyonaja uncá meque rila'alajla. Caja rimá rojló ajopana jimaje: “No'ojé pijló pihuátacare caje. Tupana hue'epiri quehuaca numacá.” Ñaquele uncá rihuátala apojó la'acana.

<sup>27</sup> E caja ne'emacana huacára'ari pajluhua surara Juan núru'upi mata'ajé.

<sup>28</sup> E ri'ijná ina'uqué huajáquelana chojé. Mata'arí Juan núru'upi. Riyá'ata rihuíla'arumi pachiya chojé. Ejomí ri'imatá Herodías ítujo ricá. Rucá ja'apátayo rolojlo ricá, raú ruhue'epí caja nenoca ri'imacá.

<sup>29</sup> E caja Juanmi chu ja'apiyatéjenami jema'año nenoca ricá yucuna. Aú ne'ejná ritami ña'ajé, nato'otácaloje ritami támijimina to'otáquelana chojé penaje.

*Jesús a'acá cinco mil ina'unquejlo a'ajnejí yucuna marí:*

*(Mt 14.13-21; Lc 9.10-17; Jn 6.1-14)*

<sup>30</sup> E caja necá, Jesús huacára'acarena i'imacá, pa'año napumí chuhuá. Piyuque nacaje rehuá nala'acare yucuna ne'emá rijló. Piyuque nacaje nehuíña'atacare nacú yucuna ne'emá caja Jesusjlo.

<sup>31</sup> Cajrú huani ina'uqué i'ijnajica nachaje palanaquíyacaca que. Nanacojé uncá meño'ojó najñala na'ajnehuá. E Jesús quemari ra'apiyatéjenajlo:

—I'ijná, hue'ejnachi a'ajná ño'ojó, hue'emacáloje huecámica que re penaje, ihuatána'acaloje mequetánaja rejo penaje —que rimacá najló.

<sup>32</sup> E ne'ejná necámica que jita chu, ne'emacáloje juca ajopana ina'uqué liyá penaje.

<sup>33</sup> E'iyonaja cajrú ina'uqué amaño ne'ejnacá. Nahue'epí meño'ojoca ne'ejnacá; namá re caja Jesús i'ijnacá najhua'até. Aú necho'ó mata'aqueja pe'iyoo'hua nápumi chu. Cajrú pajimila i'imacá rehuá. Re i'imacaño jecho'oño caja najhua'até. Nephá punumaje chojé Jesús, ra'apiyatéjena, quele piyá.

<sup>34</sup> E caja narúca'o. Jesús jácho'oco jita chiyá aú ramá cajrú ina'uqué. Rihue'epí namu'ují. Ohuéjana, uncá namájeri i'imalárena, que ne'emacá. Ñaquele rehuíña'ata necá cajrú nacaje nacú.

<sup>35</sup> Ehuá najúhua'aca. E Jesús ja'apiyatéjena i'ijnáño rahua'ajé, nemá rijló:

—Caja huajúhui'ichaca. Uncá nañacaré i'imalá maárohua.

<sup>36</sup> Pihuacára'a necá maárohua ñacaré i'imacaño ojo, pajimila ojo hua'até, nahuarúhua'acaloje a'ajnejí najluhua reyá penaje —que nemacá rijló.

<sup>37</sup> E'iyonaja Jesús quemari ra'apiyatéjenajlo:

—Icá a'ajeño najló a'ajnejí.

Aú nemá rijló:

—¿E pihúataca hue'ejnacá a'ajnejí huarúhua'aje najló? Iqui'ija huani rihuemí jácho'ojico huajló.

<sup>38</sup> Jesús quemari najló:

—¿Me ca'alá pan maare nacapi? amíchacajla.

—Je.

E nephá piño napumí chuhúa, nemá rijló:

—Re maare pajluhua té'ela ca'alá pan, iyajmela ñani jíñana.

<sup>39</sup> E Jesús huacára'ari piyuque ina'uqué yá'aco jimíchi palá noyé e'iyajé. Rihuacára'a nanaquiyana yá'aco pajhua'atéchaca apojó, apojó que.

<sup>40</sup> Aú nayá'oco cien quéleno, ajopana yá'aco cincuenta quéleno. Marí que nayá'aco i'imacá.

<sup>41</sup> E Jesús ña'arí ricápojo pajluhua té'ela ca'alá pan, iyajmela ñani jíñana hua'até. E riyacá'oco yenoje je'echú chojé, rimá Tupánajlo:

—Palá pili'ichaca huecá marí a'ajnejí aú.

Rejomi ritupa'á pan. Riyupa'atá caja najló iyajmela jíñana. Ejomi ra'á ra'apiyatéjenajlo ricá, natamáca'atacaloje piyuque ina'uquejlo ricá penaje.

<sup>42</sup> Necá ajñaño na'ajnehuá piyuqueja namano'ocá ejená.

<sup>43</sup> Rejomi ra'apiyatéjena jahuacátaño rijlupemí yurícaro. Nahuayo'otá pan lupemí, jíña lupemí hua'até. Iyamá iphata jí'imaji nacojé ca'alá cuhuá'ala namano'otá pu'uteno raú.

<sup>44</sup> Cajrú huani ne'emacá ajñaño na'ajnehuá re. Cinco mil achíñana i'imaño re.

*Jesús ja'apaca juni jimó yucuna marí:*

*(Mt 14.22-27; Jn 6.16-21)*

<sup>45</sup> E caja Jesús huacára'ari ra'apiyatéjena huitúca'aca jita chojé, nacuhúa'acaloje caesa pa'anajo pitá Betsaida ojo penaje. Rihuacára'a necá ritucumó, ejomi rihuacára'a ajopana pa'acó.

<sup>46</sup> E Jesús i'imari riyucuno najló. Quéchami ri'ijnacá ají que yenuri ojo Tupana hua'até pura'ajó.

<sup>47</sup> E lapí necá, jita chu i'imacaño, i'imaño caesa pe'iyó. Na'apona que Jesús i'imacá ricó yenuri i'ihuata.

<sup>48</sup> Ramá naleñaca caphí huani, carená ja'apácale caphí ají que najimajo. E luhuíchipica ee ricuhúa'a nápumi chu, iphari naloco'opani a'ajnare que. Majopeja richira'acó juni jimó. Rihuata nahua'ayá ja'apácana pamineco.

<sup>49</sup> Namaca aú ra'apaca juni jimahua íqui'i nahuíyo'oca. Napechu i'imá: “Yee, ina'uqué ñacami japi huaícha.”

<sup>50</sup> Caja piyuque jita chu i'imacaño amaño ricá. Iqui'ija huani naquero'ocó raú. E rimá najló:

—Caphí ila'acá ipéchuhua. Jesús nucá, iquero'onioyo —que rimacá najló.

<sup>51</sup> Ejéchami rihuitúca'aca jita chojé natu'uhueje. Hua'ató que carená yurica ja'apácaje. Aú napechu i'imá: “¡Meque piyuque huani rila'acá!”

<sup>52</sup> Marí que napechu i'imacá rinacu, uncale nahue'epila méqueca rila'acá a'ajnejí nacú maapami que. Ijnú napechu i'imacá rihue'epícana nacú.

*Jesús tejmo'ótaca natámina Genesaret e yucuna marí:*

*(Mt 14.34-36)*

<sup>53</sup> Caja ehujaja nephá pa'anajo pitá, Genesaret te'eré ojo. Re nacutá netane.

<sup>54</sup> Nácho'oco jita chiyá pe'iyojó ee ina'uqué amaño Jesús. Namána'apa ri'imacá.

<sup>55</sup> Raú necho'ó re'iyohuá natámina ña'acana nacú. Nahuáco'o necá cuhuana nacú meño'ojoca ri'ijnacué ejo. Rehuájena quemaqueño najló meño'ojoca ricá. Aú necá i'ijnaqueño rápumi chu.

<sup>56</sup> Richira'acó pajimila cajruni nacuhuá, pajimila camu'ujini nacuhuá, riyámojo hua'ató. Ri'ijnajica ejo nato'otaque natámina le'ejepelaji ñacarelana e'iyohuá. Nemaqué Jesúslo, riyuricaloje nasápaca ra'arumacá ji'imá nacú penaje. Piyuque rinacu sápageño tejm'o'taqueño raú.

## 7

*Na aú ca iná la'acá pu'uhuaré yucuna marí:*

*(Mt 15.1-20)*

<sup>1</sup> E caja fariséona naquiyana jahuacaño Jesús nacojé. Tupana puráca'alo nacú jehuíña'atajeño i'imaño caja najhua'até. Jerusalén eyájena ne'emacá.

<sup>2</sup> Necá amaño Jesús ja'apiyatéjona naquiyana ajñaca na'ajnehuá. Uncá nepala nayáte'ela chiyá pamineco, peñahuilánami chuna quemájica que.

<sup>3</sup> Uncachu fariséona ipala nayáte'ela chiyá pamineco cajrú, peñahuilánami chuna quemájica que, uncá najñaque na'ajnehuá. Piyuque ajopana judíona la'aqueño ñaqueja caja.

<sup>4</sup> Nephácachu le'ejepelaji ñacarelana eyá nañacaré chojé, nepaque cajrú nayáte'ela chiyá pamineco. Rejomi najñaque na'ajnehuá. Cajrú apú nacaje nala'ajica nach'i'ínami chuna quemacá najló que. Majojeja nepájica nachiyélane chiyá, napero'ojlone chiyá, ne'eté chiyá caje macá. Ñaqueja caja nepájica napero'ojlone palani sereni naquiyá la'acanamí chiyá.

<sup>5</sup> E caja fariséona, Tupana puráca'alo nacú jehuíña'atajeño, quele iphaño Jesús nacú. Nemá rijló:

—¿Naje chi uncá ja'apiyatéjona la'alaño peñahuilánami chuna quemájica que? Uncá nepala nayáte'ela chiyá najñaca na'ajnehuá piyá, peñahuilánami chuna la'ajica que caja —que nemacá rijló.

<sup>6</sup> E rimá najló:

—Pajlácachina huani icá. Icó la'año icó palá la'ajeño que ajopana ijlló chu. E'iyonaja uncá ñaque calé icá. Palá huani Tupana puráca'alo ja'apátajerimi chu, Isaíasmi chu, i'imacá iyucuna júpimi que. Marí que rilana'acá papera chojé iyucuna rihuacajé:

Marí que Tupana quemacá ina'uqué nacú:

Mariruna ina'uqué pura'año palá huani nunacu nanuma chiyaja calé.

E'iyonaja nahuajhué nacú, uncá nahuátala nucá.

<sup>7</sup> Uncá na penaje calé nahuacono pajhua'atéchaca nahuacáca'alo ñacarelana chojé, nala'acáloje pu'ují napéchuhua nunacu penaje.

Peñahuilánami chuna puráca'almi nacuja calé nehuíña'ata huani ina'uqué.

Tupana puráca'alo ricá japi que nehuíña'ataca necá rinacu, que ripuráca'alo lana'aquejami quemacá, Isaíasmi chu lana'acare i'imacá.

<sup>8</sup> Jesús quemari piño najló:

—Icó yuriño Tupana puráca'alo a'acana inacojó, ila'acáloje peñahuilánami chuna quemacá que rilanaquiya penaje. Peñahuilánami chuna la'ajica que caja ila'acá cajrú nacaje. Majojeja ipaca ipero'ojlone chiyá, ichiyélane chiyá caje macá.

<sup>9</sup> Palá ihue'epica Tupana puráca'alo yurícana iliyó, ila'acáloje peñahuilánami chuna quemacá que penaje.

<sup>10</sup> Marí que Moisesmi chu quemacá nayani nacú i'imacá: “Iphá ichi'iná ja'apí. Eyá pura'ajero pu'uhuaré richi'iná nacú, inoje”, que rimacá najló rihuacajé.

<sup>11</sup> Eyá icá me'etení uncá a'alaño inacojó ricá. Re nayani naquiyana maárohua, quemaño marí que nach'i'inajlo: “Uncá meño'ojó hua'alá iñaté liñeru aú. Caja hua'alá Tupánajlo hualíñérite”, que nemacá najló.

<sup>12</sup> Majojeja nemacá, uncale nephala nachi'iná ja'apí. E'iyonaja icá uncá quemalaño najló, nephaca piyá na'apihuá nach'i'inajlo.

<sup>13</sup> Marí que la'acana aú uncá a'alá inacojó Tupana puráca'alo. Cajrú nacaje ila'acá ñaqueja caja ricá. Peñahuilánami chuna puráca'almi ja'apátacana nacuja ihue'epí itucumó. Apujlo, apujlo que, i'imacá riyucuna. Yuhuanajlo hua'ató que i'imacá riyucuna. Uncá huani paala ricá —que rimacá najló.

<sup>14</sup> Ejomi Jesús quemari ajopana ina'uquejlo, nahuacácoloje rahua'ajé penaje. Raú nahuacó rejo. E rimá najló:

—Chuhua jema'á marí meque quemacánaca ricá:

<sup>15</sup> Iná numá chojé iná a'a'ajnejí, iná ajñácaloje ricá penaje. Uncá iná la'alá pu'uhuaré raú. Eyá iná numá chiyá iná pura'ó pu'uhuaré. Raú calé iná la'a' pu'uhuaré.

<sup>16</sup> Icó que'ejhuiruna, jema'á meque quemacánaca numacare nacú ijlló —que rimacá najló.

<sup>17</sup> Ejomi Jesús ja'apáñari necá, mujlúca'ari pají chojé. Re ra'apiyatéjena quemáño rijló:

—¿Meque ricá quele pimíchaca nacú huajló?

<sup>18</sup> Rimá najló:

—¿Uncá caja chi ihue'epila? ¿Uncá chi ihue'epila a'ajnejí a'ajñacana nacojé? Iná numá chojé iná a'á a'ajnejí, iná ajñácaloje penaje. Uncá iná la'alá pu'uhuaré raú.

<sup>19</sup> Uncá a'ajnejí pachá calé iná la'á pu'uhuaré. Rihuitúca'a iná huo chojé. Caja penaje ra'apá iná e'iyayá. (Marí que rimacá aú rimá piyuque a'ajnejí nacú: Palani ricá, iná ajñácaloje penaje.)

<sup>20</sup> Rimá piño ra'apiyatéjenajlo:

—Uncá iná la'alá pu'uhuaré a'ajnejí a'acana iná numá chojé aú. Eyá iná numá chiyá iná quemá nacaje nacú iná pechu nacú rí'amacá que. Pu'uhuaré péchuruna iná'uqué. Aú calé nala'á pu'uhuaré napechu queja. Ricá pachá pu'uhuaré la'ajeño iná'uqué.

<sup>21</sup> Napechu locópa'alaja iná'uqué la'acá nacaje. Pu'uhuaré péchuruna ne'emacale, ne'ejnatá napéchuhua, nala'acáloje pu'uhuaré raú penaje. Pu'uhuaré péchuruna iná'uqué i'amacale, nala'á namanaicho pajhua'atéchaca. Pu'uhuaré péchuruna iná'uqué i'amacale, nenó pecohuácaca.

<sup>22</sup> Pu'uhuaré péchuruna iná'uqué i'amacale, nata'á ajopana liyá nanane. Pu'uhuaré péchuruna iná'uqué i'amacale, nahuata ajopana le'ejé nacaje najluhua. Pu'uhuaré péchuruna iná'uqué i'amacale, nala'á chapú huani. Pu'uhuaré péchuruna iná'uqué i'amacale, uncá iná'uquélaruna necá. Pu'uhuaré péchuruna ne'emacale, chapú nahuó i'amacá nachá'atajeño cha. Pu'uhuaré péchuruna ne'emacale, nachapújra'o ajopana nacú. Pu'uhuaré péchuruna iná'uqué i'amacale, nala'á necó hue'epiño que huani. Pu'uhuaré péchuruna ne'emacale, nala'á namanaicho.

<sup>23</sup> Iná'uqué pechu nacuja calé manaíchaji la'acana. Ricá aú nala'á pu'uhuaré najluhua. Pachá pu'uhuaré la'ajeño necá —que Jesús i'amacá najló riyucuna.

*Ajopana te'eré eyájeru pechu i'amacá caphí Jesús chojé yucuna marí:*

(Mt 15.21-28)

<sup>24</sup> E caja Jesús i'ijnari reyá ají que Tiro, Sidón, quele te'eré ejo. Riphá rejo. E rimulúca'a pají chojé, ajopana iná'uqué amaca piyá ricá. E'iyonaja uncá meño'ojó rimicho'oló naliyá.

<sup>25-26</sup> Apa'ahuelo jema'ayó riyucuna. Ajopana te'eré eyájeru ru'umacá. Rutu e'iyá jiñá pechu i'imari. Rucá iphayo Jesús nacú. E rujláma'o rí'imá nacojé, rumá rijló:

—Pila'á nojló nacaje. Pica'á jiñá pechu nutu e'iyayá.

<sup>27</sup> Raú rimá rojló:

—Uncá paala pan ña'acana Israelmi chu laquénami liyá, iná a'acáloje ajopana te'eré eyájenajlo, yáhuinajlo penaje.

(“Yáhuina” que judíona quemájica ajopana te'eré eyájena nacú.)

<sup>28</sup> —Que jo'ó Hue'emacana —que rumacá rijló— yáhuina ajñaño caja pan mujrumi te'erí e'iyajé ja'acó.

<sup>29</sup> Raú Jesús quemari rojló:

—Palá huani pimíchaca nojló. Chuhua pipa'ó piñacaré ejo. Caja jiñá pechu ícharo pitu e'iyayá.

<sup>30</sup> Ejomi rupa'ó ruñacaré ejo; iphayo; amayo rutu to'ocó mana'íja rucamané chu. Caja jiñá pechu jácho'oro ro'iyayá i'amacá.

*Jesús lamá'ataca me'ejhuirú, manumarú i'amacare, yucuna marí:*

<sup>31</sup> Jesús i'imari pajimila Tiro yámojo. E caja rácho'o reyá. Ra'apá piño ají que pajimila Sidón yámojo. Iyamá té'ela quele pajimila i'amacá rehuá. Rahua'ayá ra'apá, iphari caésa turenaje. Galilea na'acá rií.

<sup>32</sup> Rejé ajopana huá'año pajluhuaja me'ejhuirú. Ricaja caja i'imari manumarú. Nephá Jesús nacú. E nemá rijló, rilamá'atacaloje ricá penaje.

<sup>33</sup> E Jesús huá'ari ricá a'ajná ño'ojó que iná'uqué liyá. E rarúca'a riyatehuana me'ejhuirú i'ijhuí chojé. Ejomi ratupá rahui riyatehuana nacojé. Raú risapa me'ejhuirú lená nacú.

<sup>34</sup> Rejomi riyacá'ó yenoje je'echú chojé. Ra'amá re'iyohuá. E rimá:

—Efata.

Marí que rimacá napura'acó chu: “Pijme'etó” que.

<sup>35</sup> Reyá a'ajná ño'ojó palá rema'acá, palá caja ripura'acó.

<sup>36</sup> E Jesús quemari najló, ne'emacá piyá riyucuna ajopánajlo. Marí que rihucára'ajica ee necá, richaje na'apátaque riyucuna ajopánajlo.

<sup>37</sup> Piyuque riyucuna jema'ajeño quemáño:

—Palá huani rila'acá piyuque nacaje. Me'ejhuiruna rilamá'ata, nema'acáloje penaje. Manumaruna rilamá'ata caja, napura'acóloje penaje.

## 8

*Jesús a'acá cuatro mil ina'uquejlo a'ajnejí yucuna marí:*

(Mt 15.32-39)

<sup>1</sup> E apú huacajé cajú huani ina'uqué jahuacaco piño Jesús nacojé. Júpija ne'emacá rijhua'até. Caja ehuaa na'ajné tajnáñari necá. Ñaquele Jesús huá'ari ra'apiyatéjenajlo, ne'ejnacáloje richaje penaje. E rimá najló:

<sup>2</sup> —Nuhue'epí mariruna ina'uqué mu'ují. Caja hueji que cálicha nujhua'até necá. Caja na'ajné tajícharo.

<sup>3</sup> Nuhuacára'ajica ee napa'acó me'epejí hua'até, uncá natejmú iphálaje, nephácaloje nañacaré ejo penaje. Re ya'ajnájajena ne'iyá —que rimacá najló.

<sup>4</sup> E ra'apiyatéjena quemáño rijló:

—Eta, ¿mere eyá chí huajña'ajé najló a'ajnejí. Iqui'iruna huani necá. Uncá nañacaré i'imalá maárohua.

<sup>5</sup> Rimá najló:

—¿Me ca'alá pan maare?

—Iyamá cuhuá'ata ca'alaja —que nemacá rijló.

<sup>6</sup> E rihuacára'a ajopana yá'aco te'erí e'iyajé. Ejomi rijña'á ricápojo iyamá cuhuá'ata ca'alá pan. E rimá Tupánajlo:

—Palá pili'ichaca huacá marí a'ajnejí aú.

Quéchami ritupa'ataca pan naquiyana. Ra'á ra'apiyatéjenajlo ricá, natamáca'atacaloje ina'uquejlo penaje. E natamáca'ata najló ricá.

<sup>7</sup> Re caja huejápaja jíñana le'epé i'imacá. Rinacu rimá caja Tupánajlo:

—Palá pili'ichaca huacá marí jíñana aú.

Rejomi rihuacára'a ritamáca'atacana najló ñaqueja caja.

<sup>8-9</sup> Piyuqueja ina'uqué ajñaño rinaquiyana namano'ocó ejé. Cuatro mil ina'uqué ca'ajná ne'emacá, ajñaño na'ajnehuá re. Rejomi nahuacata rijlupemí yurícaro. Iyamá cuhuá'ata ca'alá cuhuá'ala namano'otá pu'uteno raú.

<sup>10</sup> Najña na'ajnehuá ejomi Jesús quemari najló, napa'acóloje penaje. E rihuitúca'a jita chojé ra'apiyatéjena hua'até. Reyá ne'ejná ají que a'ajná ño'ojó Delmanuta te'eré ejo.

*Fariséona quemáño Jesusjlo, rila'acáloje nacaje Tupánaja calé la'acare. Napechu i'imá ca'ajná: “Uncá meño'ojó rila'alá ricá.” Ríyucuna marí:*

(Mt 16.1-4; Lc 12.54-56)

<sup>11</sup> E caja fariséona iphaño Jesús nacú. Nahuata rijhua'até aca'ácacano. Majopeja nemacá rijló, rila'acáloje najló nacaje, Tupánaja calé hue'epicare la'acana penaje. Nahuata rila'acá najló rená que'ená penaje.

<sup>12</sup> Raú ra'amá re'iyohuá, rimá najló:

—¿Naje chí ina'uqué, me'etení i'imacaño, huátaño nula'acá najló nacaje, Tupánaja calé hue'epicare la'acana? Uncá nula'alaje nacaje ijlo noná que'ená penaje —que rimacá.

<sup>13</sup> Raú ra'apaña necá, huitúca'ari jita chojé. E nacuhuá'a caesa pa'anajo pitá.

*Jesús quemari ra'apiyatéjenajlo, na'acá piyá fariséona puráca'alo nanacójó yucuna marí:*

(Mt 16.5-12)

<sup>14</sup> Ra'apiyatéjena pechu capicháñari pan ña'acana najhua'ató. Re jita chu pajlúhua'ala ñani i'imari nale'ejé.

<sup>15</sup> Nacuhuá'aca nacú Jesús quemari najló marí que:

—Pa. Amá icó fariséona, Herodes, quele le'ejé pan amúra'atajona liyá.

<sup>16</sup> Raú ra'apiyatéjena quemáño pajlocaca:

—Jema'á méqueca rimíchaca huajló, uncá pachá huajña'alacha huajhua'ató pan.

<sup>17</sup> Jesús hue'epiri méqueca nemacá. Aú rimá najló:

—¿Naje imá: “Uncá pan i'imalá huacapi” que? ¿Uncá jo'ó chí ihue'epila mecajeca ina'uqueca núcá ijhua'até? ¿Uncá chí riphala ipechu nacojé? ¿Ejo'ocaja chí ijnú ipechu rihue'epicana nacú?

<sup>18</sup> Quejluruna icá. E'iyonaja uncá amala. Que'ejhuiruna caja icá. E'iyonaja uncá jema'alá.

<sup>19</sup> ¿Uncá chí ihue'epila meque nutupa'ataca pajlúhua té'ela ca'alá pan, riphácaloje cinco mil ina'uqué nacojé penaje? ¿Me ca'alá cuhuá'ala imano'otá rijlupemí aú? que rimacá najló.

Nemá rijló:

—Iyamá iphata ji'imaji nacojé ca'alá cuhuá'ala huamano'otá pu'uteno.

<sup>20</sup> E rimá piño najló:

—Apú huacajé ñaque caja nula'acá. Nutupa'atá iyamá cuhuá'ata ca'alá pan, riphácaloje cuatro mil ina'uqué nacojé penaje. ¿Me ca'alá cuhuá'ala imano'otá rijlupemí aú?

Nemá rijló:

—Iyamá cuhuá'ata ca'alá cuhuá'ala huamano'otá rijlupemí aú pu'uteno.

<sup>21</sup> Rimá najló:

—¿Uncá huani chí ihue'epila mecajeca ina'uqueca nucá, la'arí ilé que?

*Betsaida e Jesús ja'apátaca mejlucaji mejlurú liyá yucuna marí:*

<sup>22</sup> E caja nephá Betsaida ejo. Re ajopana huá'año apú Jesús ejo. Mejlurú huani ri'imacá. Nephá Jesús nacú. E nemá rijló:

—Pila'á huajló nacaje. Pa'apata marí ina'uqué liyá mejlucaji.

—Je —que rimacá.

<sup>23</sup> E ripatá mejlurú riyáte'ela naquiyá. Rihuá'a ricá pajimila yámojo. Re ratupá rahui rijlú chojé. Ejomi rito'otá riyáte'ela rinacu. E rimá rijló:

—¿E chí pamaca nacaje chuhua?

<sup>24</sup> E riyacá'ojla ají que, rimá rijló:

—A'ahuaná chira'acó queja nomaca ina'uqué chira'acó.

<sup>25</sup> Jesús sápari piño rijlú chojé riyáte'ela aú. Ejomi riyacá'o piño. Rejéchami palá huani ramaca piyuque nacaje.

<sup>26</sup> Raú Jesús quemari rijló:

—Chuhua pipa'ó piñacaré chojé. Apú ehua' pipa'ó, pa'apániya ta pajimila e'iyohuá. Pi'imaniya caja nuyucuna pajimila erúnajlo —que rimacá rijló.

—Je.

*Pedro hue'epica naca ina'uqueca Jesús i'imacá yucuna marí:*

*(Mt 16.13-20; Lc 9.18-21)*

<sup>27</sup> Re cajrú pajimila Cesarea Filipino te'eré e'iyohuá. Apú eyá, apú eyá que Jesús ja'apaca ra'apiyatéjena hua'até. Nachira'acó nacú rimá ra'apiyatéjenajlo:

—¿Meque ajopana ina'uqué quemacá nunacu?

<sup>28</sup> E nemá rijló:

—Ne'iyajena quemaño pinacu: “Juan Bautizar la'ajeri ricá”. Ajopana piño quemaño pinacu: “Eliás ricá”. Ajopana piño quemaño pinacu: “Tupana puráca'alo ja'apátajeñomi chuna naquiyana ca'ajná ricá”.

<sup>29</sup> Jesús quemari najló:

—Icá ta ¿meque imacá nunacu?

Pedro quemari rijló:

—Tupana huacára'acare majó ina'uqué i'imatájeri penaje picá.

<sup>30</sup> Raú Jesús quemari najló:

—Pa. I'imaniya nuyucuna ajopánajlo.

*Jesús quemacá najló méqueca ritaca'ajica yucuna marí:*

*(Mt 16.21-28; Lc 9.22-27)*

<sup>31</sup> Ejomi rimá najló marí que:

—Ina'uquéjloje penaje i'imacá nucá. Peñahuilana, sacerdotena huacára'ajeño, Tupana puráca'alo nacú jehuíña'atajeño, quele uncá huani huátalaño nucá. Napuráca'alo aú ajopana la'ajeño nucá chapú. Nujña'ajé cajrú chapú caje yajhué panacu. Nenoje nucá. E'iyonaja calé hueji que cala i'imajemi numacápo'oyo piño —que rimacá najló.

<sup>32</sup> Marí que rimacá najló palá, nahue'epicaloje penaje. Ejomi Pedro huá'ari ricá a'ajná ño'ojó que. E raca'á ricá, rimá Jesusjlo:

—Uncá na pachá calé nala'ajé picá ilé que.

<sup>33</sup> Jesús pajno'oró ají que riyámojo, yacá'aro ajopana ra'apiyatéjena chaje. Eyá raca'á Pedro; rimá rijló:

—¡Pa'apá nuliya Jiñá Chi'ináricana! Uncá Tupana pechu que calé pipechu. Ina'uqué pechu queja pipechu.

<sup>34</sup> Ejomi rahucata ra'apiyatéjena ajopana ina'uqué hua'até rahua'ajó, Rimá najló:

—Marí que rica ijlo, huátano nujhua'atéjena i'imacana. Nenoje ca'ajná icá, nujhua'atéjena i'imacale. E'iyonaja calé jácho'oniyó nujhua'atéjena i'imacana chiyá raú. Ihue'epiniya caja inacahuá.

<sup>35</sup> Ina'uqué naquiyana hue'epiño caí nanacahuá. Uncá nahuátala ajopana la'acá necá chapú. Ñaquele uncá ne'emalá nujhua'atéjena. Marí que i'imacaño capichájeño Tupana liyá. Eyá uncá hue'epiño caí nanacahuá, ne'emacáloje nujhua'atéjena penaje, i'imajeño matajnaco je'echú chu. Uncá hue'epiño caí nanacahuá, na'apátacaloje nuyucuna ajopánajlo penaje, i'imajeño matajnaco je'echú chu.

<sup>36</sup> Iná ña'aquele inajluhua piyuque nacaje eja'ahuá chu i'imacare, uncá na penaje calé ri'imajla inajlo, iná capichácojla Tupana liyá rilanaquiya.

<sup>37</sup> Iná capichácochu Tupana liyá, uncá meño'ojó iná a'alá nacaje marí eja'ahuá chu i'ímacá, iná capichaco piyá Tupana liyá.

<sup>38</sup> Re ina'uqué, napáña'o no'opí pu'uhuaré la'ajeño, me'etení i'ímacaño, e'iyá. Ñaqué caja napáña'aco nupuráca'alo ja'apí ne'iyá. Nupa'ajico je'echú chiyá majó huacajé, ñaqué caja nopáña'ajico na'apí. Ina'uquéloje penaje i'ímacá nucá. Piyuque ina'uqué huacára'ajeri penaje nuphaje je'echú chiyá majó rihuacajé. Nora'apá hua'atéjena, je'echú chu i'ímacaño, quele iphájeño nujhua'até. Cajrú mejáma'atani huanacu que, huephájica majó.

## 9

<sup>1</sup> Jesús quemari piño najló:

—Hue'epí marí: Tupana i'imajeri ina'uqué naquiyana huacára'ajeri. Ripechu aú nala'ajica cajrú nacaje rihuacára'aca que. Ri'imajica penaje ejo'ocaja inaquiyana i'imajeño marí eja'ahuá chu rihuacajé.

*Jesús napona apiyácaco najimaje yucuna marí:*

*(Mt 17.1-13; Lc 9.28-36)*

<sup>2</sup> Marí que rimacá najló rihuacajé. E caja pajluhua cuhuá'ata que cala ejomi Jesús jácho'oro ipuré i'íhuátaje. Rihuá'a rijhua'até Pedro, Santiago, re'ehué Juan, queleja rihuá'a rijhua'até. Nephá rejo. Ejéhami Jesús jimá apiyácaco najimaje.

<sup>3</sup> Jareni huani, mejáma'atani que huani ra'arumacá amaco rinacojé. Uncá na i'ímalá marí eja'ahuá chu ipácajla a'arumacaji e'iyayá, ri'ímacáloje ñaqué caja jareca penaje.

<sup>4</sup> Mana'í chiyó Moisesmi chu, Elíasmi chu, quele ja'año rejé pu'uhuacá. Napura'ó Jesús hua'até.

<sup>5</sup> E Pedro quemari Jesúslo:

—Huehuíña'atajeri, jmeque palá huani huecá maare! Huala'ajé hueji quele ca'apejé maare. Pajluhuala huala'ajé pijló, apalá Moiseslo, apalá Elíaslo —que rimacá rijló.

<sup>6</sup> Marí que rimacá rijló majopeja rimacáchojonaja calé, cajrú riquero'ocole ajopana rijhuáque'ena hua'até. Uncá rihue'epila méqueca rijló quemacana.

<sup>7</sup> Marí que Pedro quemacá rijló i'ímacá. Ejéhami juni suhuáca'ala itaca nachá. Re'iyohuá Tupana quemari najló.

—Marí Nu'urí, íqui'íja nuhuátacare. Jema'á ra'apiyá —que rimacá najló.

<sup>8</sup> Eyá mana'í chiyó nayacá'o rejo. Uncá na namala re. Ricaja calé Jesús namá.

<sup>9</sup> E caja nahuítuca'a ipuré naquiyá. Napa'acó nacú Jesús quemari najló:

—Pa. I'imaniya huajé amíchaje yucuna ajopánajlo. Numacápo'ojico ejomi i'imajé riyucuna ajopánajlo. Ina'uquéloje penaje i'ímacá nucá.

<sup>10</sup> Nema'á ra'apiyá, uncá ne'emalá riyucuna ajopánajlo. Napura'ó pajhua'atéchaca necámica que rimacare rinacuhá najló nacú. Nemá pajlocaca:

—Rimicha rinacuhá: “Numacápo'oyo piño”. ¿Meque quemacana chí cari?

<sup>11</sup> E ra'apiyatéjena quemáño rijló:

—Tupana puráca'alo nacú jehuíña'atajeño quemáño Elíasmi chu nacú: “Ricá huaícha majó ritucumá, Tupana huacára'ajicare ina'uqué i'ímatájeri penaje tucumá”. ¿Naje chí nemá ílé que?

<sup>12-13</sup> Rimá najló:

—Que jo'ó ricá. Caja Elías iphari majó nutucumá i'ímacá, rila'acáloje nacaje nupé penaje. E'iyonaja uncá ina'uqué huátalaño ri'ímacá. Tupana puráca'alo lana'aquéjami quemacá rinacu queja nala'acá chapú ri'ímacá. Eyá nucá piño, ina'uquéloje penaje i'ímacá nucá. Tupana puráca'alo lana'aquéjami quemacá que nunacu, que caja nala'ajica nucá chapú. Chapú nahuó nuchá —que rimacá najló.

*Jesús ca'acá jiñá pechu yuhuají e'iyayá yucuna marí:*

*(Mt 17.14-21; Lc 9.37-43)*

<sup>14</sup> E caja nephá piño ajopana ra'apiyatéjena nacú. Amaño cajrú ina'uqué najhua'até. Tupana puráca'alo nacú jehuíña'atajeño, ra'apiyatéjena, quele aca'ácaño pajhua'atéchaca.

<sup>15</sup> Nephá nanacu a'ajnáreje que. Ejéhami piyuque ina'uqué amaca Jesús huaíechaca. Pu'ují napechu la'acó raú. Aú necho'ó rijimajo rajalácaje.

<sup>16</sup> E caja Jesús quemari ra'apiyatéjena re yurícañojlo:

—¿Na jimaje aca'ácaco pajhua'atéchaca?

<sup>17</sup> Uncá chiyó na'ajipá rijló apú quemari rijló:

—Huehuíña'atajeri, majó pichaje nuhuá'icha nu'urí. Re jiñá pechu re'iyá. Nacojé uncá meño'ojó ripura'aló.

<sup>18</sup> Jiñá pechu noca ee ricá, ra'ó caphí huani cahuacaje te'erí e'iyajé. Cajrú quemu'ureni jeño'ocá rinuma chiyá. Camachá caja rajma'acá raí huá. Po'oló rinapona yuríco raú. Caja



numicha pa'apiyatéjenajlo, naca'acáloje jiña pechu re'iyayá penaje. E'iyonaja unca meño'ojó naca'alacha ricá re'iyayá —que rimacá rijló.

<sup>19</sup> E Jesús quemari ra'apiyatéjenajlo:

—¡Meque unca huani ipechu i'imalá Tupana chojé caphí! ¿Me quetana júpica nu'umajícajla ijhua'até? —que rimacá najló.

E rimá piño ajopánajlo:

—Ihuá'icha majó ilé yuhuaij.

—Je —que nemacá.

<sup>20</sup> E nahuá'a ricá rejo. Jiña pechu amaca aú Jesús ricurúca'ata caphí huani ilé yuhuaij ri'imacare e'iyá. Raú ra'ó cahuacaje te'erí e'iyajé. Pila, pila que ripilácaco. Hua'até que quemu'ureni jeño'ocá majó rinuma chiyá.

<sup>21</sup> E Jesús quemari rara'apajlo;

—¿Mequetánicha júpica ricá rijhua'até?

—Rijyuhuaócoja riqueño'ó rijló.

<sup>22</sup> Pulapé jiña pechu ca'acá ricá siyá chojé, junápeje, ricapichátacaloje ricá penaje. ¿E pila'acajla huajló nacaje? —que rimacá Jesusjlo—. Pihue'epí huamu'ují, pa'á huañaté.

<sup>23</sup> Jesús quemari rijló:

—Pipechu i'imagica ee caphí Tupana chojé, rila'acáloje nacaje pijló penaje, rila'ajé pijló nacaje. Tupana la'ajeri piyuque nacaje caphí richojé péchurunajlo.

<sup>24</sup> Raú caphí yuhuaij jara'apá quemacá Jesusjlo:

—Caphí nupechu Tupana chojé. Pa'á nuñaté, nupechu i'imacáloje richaje richojé caphí penaje.

<sup>25</sup> Jesús amaca aú cajrú ina'uqué jecho'ocó majó que, raca'á jiña pechu. Rimá jiña péchujlo:

—Pipachá manumarú ricá, me'ejhuirú caja ricá. Chuhua pácho'o re'iyayá; pipa'aniyo piño re'iyajé —que rimacá rijló.

<sup>26</sup> Raú jiña pechu jahuíyo'ori. Ricurúca'ata caphí huani yuhuaij. Raú rácho'o re'iyayá. Riyurí matámiru que. Piyuque ramájeño quemañó rinacu:

—Caja ritaquí'ichá.

<sup>27</sup> E'iyonaja Jesús patarí riyáte'ela naquiyá ricá. Riyá'ata ricá. Ejomi ritára'o. Palani ri'imacá reyá a'ajná ño'ojó.

<sup>28</sup> E caja Jesús mujlúca'ari pají chojé. Necámica que ne'emacá ra'apiyatéjena hua'até. E nemá rijló:

—¿Naje chi unca meño'ojó huaca'alacha re'iyayá jiña pechu?

<sup>29</sup> Jesús quemari najló:

—Rica'acana piyá iná i'itacó iná a'ajné liyá. Iná pura'ó caja Tupana hua'até. Marí que la'acana aú ja calé iná ca'á ilé caje jiña pechu apú e'iyayá.

*Jesús quemari piño najló méqueca ritaca'ajica yucuna marí:*

*(Mt 17.22-23; Lc 9.43-45)*

<sup>30</sup> E caja ne'ejná reyá. Na'apá ají que Galilea te'eré e'iyohuá. Rimicho'ojneja Jesús huátaca ra'apiyatéjena hua'até ja'apácana, rehuíña'atacaloje necá penaje.

<sup>31</sup> Rimá najló:

—Ina'uquéjloje penaje i'imacá nucá. Na'ajé nucá ajopánajlo, nenócaloje nucá penaje. Nenoje nucá. E'iyonaja hueji que cala i'imajemi numacápo'oyo piño nopumí chuhuá —que rimacá najló.

<sup>32</sup> Uncá riphala napechu nacojé meque quemacánaca ricá. Uncá caja naquejá'ala riyucuna riliyá, nahuó la'acole ra'apejé.

*Nachá'atajeri yucuna marí:*

<sup>33</sup> E caja nephá pajimila Capernaum ejo. Re namujlúca'a pají chojé. Ejomi Jesús quemari najló:

—¿Na nacú ipurí'ichó huachirí'ichaco nacú?

<sup>34</sup> Uncá na'ajipalá rijló, napáña'aco a'acuhuaná. Naca chá'atari ne'iyayó nacaje la'acana aú jimaje naca'ácaco pajhua'atéchaca.

<sup>35</sup> E Jesús yá'aro. Rejomi rahuacata necá rahua'ajó. Iyamá iphata ji'imaji nacojé quele ra'apiyatéjena i'imacá.

E rimá najló:

—Apú pechu i'imari ca'ajná rinacuhuá: “Ajopana ja'apejé nucá” que. Marí que péchuri chá'atari ajopana. Piyuque ajopana ñaté a'ajeri, ricá chá'atari ajopana.

<sup>36</sup> Eyá rihuá'a pajluhuaja yuhuaij ne'iyajé. Riyá'ata ricá ricuyú nacojé. E rimá piño najló:

<sup>37</sup> —Apú ca'ajná huátari marí caje yuhuaij, nujhua'ateje ri'imacale. Raú caja rihuata nucá. Rihuátacachu nucá, rihuata caja Tupana, huacára'acare nucá majó —que rimacá najló.

*Uncá la'alá chapú huecá, la'arí huecá palá. Riyucuna marí:*

*(Mt 10.42; Lc 9.49-50)*

<sup>38</sup> E caja Juan quemari Jesusjlo:

—Huehuíña'atajeri, huamá apú ca'acá jiñana pechu ajopana ina'uqué e'iyayá. Pipuráca'alo aú rica'á necá ne'iyayá. Uncá huanaquiyana calé ricá. Aú calé huemá rijló: “Pila'aniya ilé que”.

<sup>39</sup> Jesús quemari najló:

—Uncá paala imacá rijló raú. Apú ca'ajná la'arí nacaje uncá meño'ojó iná la'alare nupuráca'alo aú. Ilé que i'imacá uncá pura'aló nunacu pu'uhuaré.

<sup>40</sup> Uncachu ina'uqué la'alá chapú huecá, nala'á huecá palá —que rimacá najló—.

<sup>41</sup> Jema'á marí: Apala apú la'arí apú palá, no'opiyá jema'ajeri ri'imacale. Ra'á ca'ajná rijló juni, ri'iracáloje penaje. Marí que rila'acale ricá palá, Tupana a'ajeri rijló rihuemí.

*Chapú huani ri'imajica najló, amátaño ajopana pu'uhuaré la'acana aú yucuna marí:*

*(Mt 18.6-9; Lc 17.1-2)*

<sup>42</sup> Chapú huani ri'imajica najló, amátaño no'opiyá jema'ajeño pu'uhuaré la'acana aú, namanaicho la'acana aú. Naca'aque la'acana namátajeño junápeje, cajruni jipa jepo'oqueja nanúru'upí nacojé hua'ató, palani ri'imacajla najló chapú caje yajhué namájacare ijlnunami chojé.

<sup>43</sup> Ñaque i'imacale pila'á ca'ajná pu'uhuaré nacaje pila'acare piyáte'ela aú pachá, piyurí piliyó ricá. Pimata'aque la'acana pinaquiyó piyáte'ela, pica'acáloje ricá a'ajná ño'ojó penaje, palani ri'imacajla pijló. Uncá na aú calé pila'ájla pu'uhuaré piyáte'ela aú. Pila'aque la'acana marí que, pi'ijnacá piyá quera'atani uncá yacálore chojé, palani ri'imacajla pijló.

<sup>44</sup> Re uncá jamu'unana taca'alá; uncá caja quera'atani yacala.

<sup>45</sup> Pila'á ca'ajná pu'uhuaré meño'ojó pi'ijnacá pi'imá aú pachá, piyurí piliyó ricá. Pimata'aque la'acana pinaquiyó pi'imá, pica'acáloje ricá a'ajná ño'ojó penaje, palani ri'imacajla pijló. Uncá pi'ijnalajla pu'uhuaré la'ajé raú. Pila'aque la'acana marí que, pi'ijnacá piyá quera'atani uncá yacálore chojé, palani ri'imacajla pijló.

<sup>46</sup> Re uncá jamu'unana taca'alá; uncá caja quera'atani yacala.

<sup>47</sup> Pila'á ca'ajná pu'uhuaré nacaje pamácare pijlú aú pachá, piyurí piliyó ricá. Pica'ahuicha'aque la'acana pijlú majó, pica'acáloje ricá a'ajná ño'ojó que penaje, palani ri'imacajla pijló. Pila'aque la'acana marí que, pi'ijnacá piyá quera'atani uncá yacálore chojé, palani ri'imacajla pijló.

<sup>48</sup> Re uncá jamu'unana taca'alá; uncá caja quera'atani yacala.

<sup>49</sup> Piyuque piraji nacára'atacare Tupánajlo, na'á yuquirá re'iyajé pamineco.

<sup>50</sup> Yuquirá, palani rica'acana a'ajnejí e'iyajé. E'iyonaja rila'acochu uhui'ichí, uncá meño'ojó nala'alá ca'ajparé rapumí chuhua'á piño ricá. Yuquirá i'imacá a'ajnejijlo, que caja icá ajopana ina'uquejlo, ila'acachu necá palá. Ila'á palá pecohuáca.

## 10

*Jesús jehuiña'ataca necá, huá'acajeñomi cupaca piyá naluna yucuna marí:*

*(Mt 19.1-12; Lc 16.18)*

<sup>1</sup> E caja Jesús jácho'oro Capernaum eyá. Ri'ijná ají que Judea te'eré ejo. Iphari juni Jordán pa'anajo pumitá ejé. Rejé cajrú ina'uqué jahuacaco piño rinacojé. Richape piño rehuíña'ata necá.

<sup>2</sup> E caja fariséona naquiyana iphaño rinacu. Nahuata nacaje yucuna quejá'acana riliyá, namácaloje méqueca rapiyáca najló ricá penaje. E nemá Jesusjlo:

—¿E Tupana yurica iná cupaca iná luna iná huátaca que?

<sup>3</sup> E rimá najló:

—¿Meque chi Moisesmi chu quemacá rinacu?

<sup>4</sup> Nemá rijló:

—Ricá quemari: Iná yurijla iná yajalo, iná a'acachu rojló papera lana'aquejami. Richu iná quemá na pachaca iná yurica iná yajalo. Raú iná yuricajla rucá —que nemacá rijló.

<sup>5</sup> Rimá najló:

—Ijnu' huaní nema'acá Tupana ja'apiyá rihuacajé. A'acuhuaná nahuata naluna yuricana. Raú riyurí najló rinacojé, nayuricaloje naluna penaje.

<sup>6</sup> Tupana queño'ótaca eja'ahuá huacajé, riqueño'óta caja ina'uqué i'imacá. Achiñá, inanaru hua'até riqueño'óta ne'emacá.

<sup>7</sup> Ñaquele achiñá anúca'aro richi'iná liyá rihuá'acaco ejomi, ri'imacáloje riyajalo hua'até penaje.

<sup>8</sup> Ne'emajé pajhua'atéchaca pajluhua japi necá queja. Uncá iyamá ina'uqué que calé necá huá'acajeñomi. Pajluhua japi necá queja necá pajhua'atéchaca.

<sup>9</sup> Marí que ri'imacale, uncá paala nayurica pecohuácaca. Caja Tupana la'arí necá, ne'emacáloje pajluhua japi necá queja pajhua'atéchaca penaje —que rimacá najló.

<sup>10</sup> E caja namujlúca'a pají chojé. Re ra'apiyatéjéna quemañó rijló:

—¿Meque quemacana chí quele pimíchaje nacú huajé?

<sup>11</sup> Rimá najló:

—Apú yurícachu riyajalo, rihuá'acacoloje apa'ahuelo hua'até rulanaquiya penaje, la'arí rimanaicho raú. Apa'ahuelo hua'até la'acana queja caja Tupánajlo ricá.

<sup>12</sup> Ñaqué caja apú lanaquiya ca'ajná riyajalo yurica ruyajná. Rula'á rumanaicho raú. Apú hua'até la'acana queja caja Tupánajlo ricá.

*Jesús pura'acó palá yuhuaná nacú yucuna marí:*

*(Mt 19.13-15; Lc 18.15-17)*

<sup>13</sup> Ajopana huá'año Jesús ejo yuhuaná, rito'otácaloje riyaté'ela nanacojé penaje, ripura'acóloje Tupana hua'até nanacu penaje. E'iyonaja ra'apiyatéjéna jahuíyo'oño najló richá, nahuá'aca piyá richaje necá.

<sup>14</sup> Marí caje aú Jesús yúcha'aro nachá. Rimá najló:

—Reja yuhuaná i'ijnareja nuchaje. Jahuíyo'oníya napiyá. Yuhuaná que i'imacaño i'imaño caja Tupana hua'atéjéna. Nahuacára'ajeri ricá.

<sup>15</sup> Ihue'epí marí: Yuhuaná huátaño Tupana nañaté a'ajeri penaje. Uncachu ajopana ina'uqué pechu i'malá ñaqué rinacu, uncá meño'ojó ne'emalá Tupana hua'atéjéna, namujlúca'acaloje je'echú chojé penaje —que rimacá najló.

<sup>16</sup> E caja rihuá'a yuhuaná pajluhuano queja ritu'uhuejo. Rito'otá riyaté'ela nanacu. Ripura'ó Tupana hua'até nanacu, rila'acáloje necá palá penaje.

*Cajrú le'ejepelari pura'acó Jesús hua'até yucuna marí:*

*(Mt 19.16-30; Lc 18.18-30)*

<sup>17</sup> E caja Jesús queño'orí ja'apácaje ají que a'ajná ño'ojó. Hua'ató que apú iphaca jecho'oquelo rinacu. Ritára'o ri'irúpachi aú rijimaje. Rimá rijló:

—Huehuíña'atajeri, palani picá. ¿Meque nula'acajla, nu'umacáloje matajnaco je'echú chu raú penaje?

<sup>18</sup> Jesús quemari rijló:

—¿Naje pimá nunacu: “palani” que? Ricaja calé, Tupana, palani. Eyá ina'uqué uncá palani calé necá —que rimacá rijló—.

<sup>19</sup> Caja pihue'epí méqueca Tupana puráca'alo lana'aquejami quemacá. Uncá rihuátala iná noca ina'uqué. Uncá caja rihuátala achiñá, inanaru, quele, la'acá namanaicho pajhua'atéchaca. Uncá caja rihuátala iná ata'acá nacaje. Uncá caja rihuátala iná pajlaca ina'uqué hua'até. Uncá caja rihuátala iná pajlácaca, iná ña'acáloje nacaje apú liyá penaje. Uncá caja rihuátala iná iphaca iná ja'apihua iná chí'inajlo. Rihuata iná iphaca na'apí palá —que Jesús quemacá rijló.

<sup>20</sup> Rimá rijló:

—Huehuíña'atajeri, caja nujuhuaco noma'á ra'apiyá i'imacá maáreje cha.

<sup>21</sup> Raú Jesús yacá'aro richaje. Iqui'ija rihuátaca ricá. Rimá rijló:

—Re pajluhuaja ñani nacaje yuriro pitucumá, pila'acáloje penaje. Pipa'ó piño piñacaré ejo. Eco pa'atá ajopánajlo pinane piyuqueja liñeru aú. Quéchami pa'ajica piyuqueja piliñérite camu'ují la'acáñojlo. Marí que la'acana aú nacaje palá nojé i'imajé pijló je'echú chu. Quéchami pi'ijnajica piño majó, pi'ijnacáloje nujuhua'até penaje. Pi'ijnajica ee nujuhua'até, apala nenoje picá a'ahuaná apiyáccanami nacú acúhua'ataqueja. E'iyonaja pi'ijná nujuhua'até —que Jesús quemacá rijló.

<sup>22</sup> Marí que rimacá rijló aú camu'ují huani ripechu la'acó. Uncá ra'alá rinacojó ripuráca'alo, cajrú le'ejepelari ri'imacale. Aú caja ripa'ó.

<sup>23</sup> Jesús yacá'aro riyámojo ra'apiyatéjéna chaje. Rimá najló:

—Puhuichani huani cajrú le'ejepelárunajlo nachó yurícana Tupánajlo, ri'imacáloje Nahuacára'ajeri penaje —que rimacá najló.

<sup>24</sup> Raú cajrú ra'apiyatéjéna i'ijnataca napéchuhua rimacare nacú. Jesús quemari piño najló:

—Nujhuáque'ena, caphí ne'iyajena pechu nale'ejé le'ejepelaji chojé. Puhuichani najló nachó yurícana Tupánajlo, ri'imacáloje Nahuacára'ajeri penaje.

<sup>25</sup> Puhuichani caméllólo luhuirí aphú chiyá ja'apácana. Richaje puhuichaca cajrú le'ejepelárunajlo nachó yurícana Tupánajlo, ri'imacáloje Nahuacára'ajeri penaje.

<sup>26</sup> Marí que rimacá aú ra'apiyatéjéna quemañó pajlocaca:

—¿Mecajena ca'ajná Tupana i'imatájeri rijluhua capichácajo liyá?

<sup>27</sup> Raú Jesús yacá'aro nachaje, rimá najló:

—Uncá meño'ojó ina'uqué i'imatala necó capichácajo liyá. Tupánaja calé i'imatari ina'uqué capichácajo liyá. Ricaja calé hue'epiri piyuqueja nacaje la'acana.

<sup>28</sup> E Pedro quemari Jesusjlo:

—Huahuacára'ajeri, huecá yuriño piyuqueja huanane, hue'ejnacáloje pijhua'até penaje.

<sup>29</sup> Jesús quemari najló:

—Jema'á marí: Nala'acáloje nuhuacára'aca que penaje, ina'uqué naquiayana i'ijnáñaño nañacaré ca'ajná, nejena ca'ajná, nach'i'iná ca'ajná, nate'eré ca'ajná. Ne'ejnañaá ca'ajná nayani caja ñapácaño. Marí caje nayurí nayámajo nojló, na'apátacaloje Tupana puráca'alo ajopánajlo penaje.

<sup>30</sup> Palá huani ri'imajica marí que la'acáñojlo. Nño'ope Tupana a'ajica nañaté nacaje la'acana aú marí eja'ahuá chu. Nañacaré, nejena, nate'eré caje macá chaje palaca nacaje i'imajeri najló. Ajopana ca'ajná la'ajeño necá chapú nupuráca'alo jimaje. Caja penaje ne'emajica je'echú chu Tupana hua'até matajnaco.

<sup>31</sup> 'Re cajrú ina'uqué naquiayana, me'etení i'imacaño, napechu i'imá nanacuhúa: "Ajopana chaje Tupana la'ajeri huecá palá". Tupana la'ajeri necá ajopana ja'apejé palá. Re caja cajrú ina'uqué naquiayana, me'etení i'imacaño, napechu i'imá nanacuhúa: "Ajopana ja'apejé Tupana la'ajeri huecá palá". Marí cajena Tupana la'ajeri ajopana chaje palá—que Jesús quemacá najló.

*Jesús quemari piño najló méqueca ritaca'ajica yucuna marí:*

*(Mt 20.17-19; Lc 18.31-34)*

<sup>32</sup> E caja Jesús ja'apari ra'apiyatéjena hua'até ají que yenojo, Jerusalén ejo. Jesús ja'apari natucumá. Ra'apiyatéjena i'ijnataño cajrú napéchuhua rimacare nacú. Ajopana, nápumi chu ja'apácaño, i'imaño quero'ocajo nacú. Eyá a'ajná ño'ojó que na'apaca. E Jesús huá'ari iyamá íphata j'i'imagi nacojé quele ra'apiyatéjena a'ajná ño'ojó pani ajopana liyá, rimacáloje najló méqueca ajopana la'ajica ricá chapú penaje.

<sup>33</sup> Rimá najló:

—Jema'á, ina'uquéloje penaje i'imacá nucá. Chuhua hue'ejichaca yenojo Jerusalén ejo. Re sacerdoteña huacára'ajeño; re caja Tupana puráca'alo nacú jehuíña'atajeño. Najló ajopana a'ajeño nucá. Nemaje nunacu, nenócaloje nucá penaje. Ejomi na'ajé nucá ajopánajlo. Uncá judíona calé necá.

<sup>34</sup> Necá la'ajeño namácaja nucá. Naña'ataje nucá; natupaje nahui nunacojé; nenoje nucá. E'iyonaja hueji que cala i'imagemi numacápo'oyo piño nopumí chuhúa—que rimacá najló.

*Santiago, Juan, quele quejá'aca nacaje Jesús liyá yucuna marí:*

*(Mt 20.20-28)*

<sup>35</sup> Ra'apiyatéjena naquiayana i'imaño Santiago, Juan, quele. Nara'apá íi i'imari Zebedeo. E ne'ejná Jesús ahua'ajé, nemá rijló:

—Huehuíña'atajери, huahuata pila'acá huajló nacaje.

<sup>36</sup> Rimá najló:

—¿Na ihuata nula'acá íjló?

<sup>37</sup> Nemá rijló:

—Pi'imajica ee piyuqueja ina'uqué huacára'ajeri huacajé, piyuri huecá pahua'á yá'ajeño penaje. Pajluhuaja yá'ajero ca'añá chojó pitá. Apú yá'ajero pajrú chojó pitá.

<sup>38</sup> Jesús quemari najló:

—Uncá ihue'epila naca iquejá'aca nuliya. Chapú huani nala'ajica nucá. ¿E ijña'acajla chapú caje yajhué panacu, nala'aquela ícá chapú ñaqué caja?

<sup>39</sup> Nemá rijló:

—A'a, huajña'acárejla panacu ricá.

Jesús quemari najló:

—Quehuaca jo'ó. Nala'ajé ícá chapú, nala'ajica nucá que caja. Ijña'ajica chapú caje yajhué panacu, nujña'ajica ricá panacu que caja.

<sup>40</sup> E'iyonaja uncá nucá calé a'ajeri ina'uqué, nayá'acaloje nuca'añare chojó pitá, nupajrure chojó pitá penaje. Tupana a'ajeri necá. Ricaja calé hue'epiri mecajenaca yá'ajeño nohua'á marí que—que rimacá najló.

<sup>41</sup> Ajopana, iyamá té'ela quele ra'apiyatéjena jema'año méqueca napura'acó rijhua'até. Aú nayúcha'o Santiago, Juan, quele cha.

<sup>42</sup> E Jesús quemari najló, nahuacácolaje rahua'ajé penaje. Rimá najló:

—Caja ihue'epí ajopana te'eré eyájena huacára'ajeño nacojé. Najhua'atéjena minaná queja necá najhua'até. Caphí huani nachaje huacára'ajeño huacára'aca najhua'atéjena.

<sup>43</sup> Eyá íjló uncá ñaqué calé ri'imajica. Ihuata ca'ajná inaquiayana chaje i'imacana. La'ari ricó inaquiayana hua'até sápaajeri que, ricá i'imari ajopana chaje.

<sup>44</sup> Thuata ca'ajná inaquiayana chá'atacana. Pamineco i'imá piyuque ina'uqué ñaté a'ajeño.

<sup>45</sup> Ina'uquéjloje penaje i'imacá nucá. Uncá nuphala majó ina'uqué la'acáloje nojló nacaje penaje. Nucá i'ijnari majó, nula'acáloje ina'uquejlo nacaje penaje. No'ojé nocó cajrú ina'uqué chaya penaje, ne'emacóloje capichácajo liyá raú penaje —que Jesús quemacá najló.

*Jesús ja'apátaca mejlucaji Bartimeo liyá yucuna marí:*

(Mt 20.29-34; Lc 18.35-43)

<sup>46</sup> Ñe'epú chuhua' na'apá pajimila Jericó e'yohuá. Jesús ja'apiyatéjena, cajrú ina'uqué hua'até ja'apaño Jesús hua'até. Náchoco pajimila e'iyá ee nephata apú ina'uqué. Mejlurú huani ri'imacá. Re riyá'lo ñe'epú turená liñeru quej'acana nacú ajopana ina'uqué liyá. Rií i'imari Bartimeo. Timeo i'irí ri'imacá.

<sup>47</sup> Re nephata ricá, nemá rijló:

—Jesús, Nazaret eyaje, ja'apácare chuhua' marí ñe'epú.

Eja rahuíyo'o, rimá:

—Jesús, ina'uqué i'imatájeri penaje picá. Pihue'epí numu'ují —que rimacá rijló.

<sup>48</sup> Raú cha'apá ina'uqué aca'añó ricá. Nemá rijló:

—¡Pimanúma'o ta!

Aú richaje huani rahuíyo'oca. Rimá piño:

—Jesús, ina'uqué i'imatájeri penaje picá. Pihue'epí numu'ují.

<sup>49</sup> Raú Jesús tajnaro ñe'epú chojé. Rimá ajopánajlo:

—Majó ihuá'icha ricá.

Aú ne'ejná Bartimeo huá'aje, nemá rijló:

—Caphí pila'acá pipéchuhua. Pácho'o; rihuá'icha pimaná.

—Je —que rimacá.

<sup>50</sup> Raú ricá'á ripayétane rinaquiyo. Quiñaja rácho'oco, i'ijnari Jesús jimajo.

<sup>51</sup> E Jesús quemari rijló:

—¿Meque pihuátaca nula'acá picá?

—Huehuíña'atajeri, pa'apata nuliya mejlucaji, nomachi —que rimacá rijló.

<sup>52</sup> Jesús quemari rijló:

—Chuhua pi'ijná. Caja pi'imichó mejlucaji liyá, pipechu i'imacale caphí nochojé.

Ejéchami mejlucaji ja'apaca riliyá. E ri'ijná Jesús hua'até rápumi chu.

## 11

*Jesús iphaca Jerusalén e'iyajé yucuna marí:*

(Mt 21.1-11; Lc 19.28-40; Jn 12.12-19)

<sup>1</sup> E caja ehujaja nephá Jerusalén nacojé. Pamineco na'apá pajimila Betfagé ahua'ayá. Ejomi na'apá piño pajimila Betania ahua'ayá. Iphaño yenuri ja'apejé. Yenuri ii Olivos. Rejé nephá. Ejéchami Jesús huacára'aca iyamá ra'apiyatéjena naquiayana pajimila ejo. Rimá najló:

<sup>2</sup> —I'ijná ají ño'ojó pajimila ejo huatucumajo. Iphájicaja reyo ee, amaje cahuarú caje i'irí a'aqueja mucuri. Uncá jo'ó na ja'apala rinacu. Eco icaráca'a ricá, ihuá'ichachi ricá majó.

<sup>3</sup> Nemájica ee ijlo: “¿Naje chí icaráca'a ricá?” imaje najló: “Huahuacára'ajeri huátari ricá mequetánaja penaje. Quéchami huapa'atájica piño ricá rimucú chojé”, que imájica najló.

—Je —que nemacá rijló.

<sup>4</sup> E caja ne'ejná ají que a'ajná ño'ojó pajimila ejo. Rimacá najló que nephátaca cahuarú caje a'aqueja mucuri. Re ritára'o rinumaná ahua'á, ñe'epú punumacana. Nephá rejé. E nacaráca'a ricá.

<sup>5</sup> Rahuá'á lapa'acaño quemano najló:

—¿Meque ila'acá ricá quele? ¿Naje ta icaráca'a ricá?

<sup>6</sup> E nemá najló Jesús quemacá najló i'imacá que. Aú nayurí najló ricá.

<sup>7</sup> E nahuá'a ricá Jesús ejo. Nephá Jesús nacú. E nayúma'a na'arumacá naquiayana cahuarú huajlé chojé. E Jesús yá'aro re'iyajé. Quéchami ra'apaca cahuarú caje nacú ají que ñe'epú chuhua.

<sup>8</sup> Cajrú ina'uqué i'imacá re. Necá caja ayúma'año na'arumacá naquiayana ra'apaca ehua. Ajopana piño mata'año huejiri huirulá paná caje, naca'acáloje ricá ñe'epú chojé ripé penaje, palá ramácoloje penaje.

<sup>9</sup> Ritucumá ja'apácaño, rápumi chu ja'apácaño, quele jahuíyo'oño. Nala'á riyájlepana. Marí que nemacá jahuíyo'oqueja Jesús nacú:

—Palani huani ricá Tupana huacára'acare majó.

<sup>10</sup> Palá huani rihuacára'ajica huecá. Davidmi chu huacára'ajica hua'ajútayami chuna i'imacá que caja rihuacára'ajica huecá. Palani Tupana, je'echú churí —que nahuíyo'oca.

<sup>11</sup> Marí que Jesús iphaca Jerusalén e'iyajé. E rimujlúca'a Tupana ñacaré chojé. Ripalamata piyuque nacaje re i'imacare richu. Caja najúhua'a. Aú ri'ijná ají que Betania ejo ra'apiyatéjena hua'até.

*Jesús yerúca'aca a'ahuaná higuera chaje yucuna marí:*  
(Mt 21.18-19)

<sup>12</sup> Muni que nácho'oco Betania eyá, napa'acóloje Jerusalén ejo penaje. Iñe'epú chu quehuí Jesúslo me'epejí i'imagá.

<sup>13</sup> A'ajnare que ramá paijí higuera tára'aco. E ri'ijná rejo richa culaje ripaná e'iyohuá. Riphá ra'apejé, amari mecharú ri'imagá. Ripanaja calé i'imari rinacu. Uncá jo'ó riphala rarúca'aca jená chojé.

<sup>14</sup> E rimá a'ahuanajlo:

—Maáreya huatucumá uncá na calé ajñájeri picha i'imajica.

Ra'apiyatéjena jema'añó méqueca rimacá a'ahuanajlo.

*Jesús ja'apaca Tupana ñacaré chiyájena nacú yucuna marí:*  
(Mt 21.12-17; Lc 19.45-48; Jn 2.13-22)

<sup>15</sup> E nephá piño Jerusalén ejo. E rimujlúca'a piño Tupana ñacaré chojé. E riqueño'ó richiyájena nacú ja'apacana. Nacaje a'ajeño, nacaje huarúhua'ajeño, quele nacú ra'apá richiyá piyuque. Ripajno'otá liñeru apiyácajeño mesané. Túcu'uchina pircana a'ajeño ñáca'aru ripajno'otá caja.

<sup>16</sup> Rejomí uncá riyurila najña'acá najhua'ató nacaje Tupana ñacaré chojé.

<sup>17</sup> E rehuíña'ata necá, rimá najló:

—Tupana puráca'alo lana'aquejami quemari marí que: “Re nuñacaré piyuqueja ina'uquéloje penaje, napura'acóloje nujhua'até richu penaje”, que rimacá. E'iyonaja icá apichátaño ricá. Icó a'año ajopánajlo nacaje richu. Richuhuaaja ata'á necá. Ata'ajeño ñacaré que ijlo ricá —que rimacá najló.

<sup>18</sup> E caja sacerdotena huacára'ajeño, Tupana puráca'alo nacú jehuíña'atajeño, quele jema'año ra'apaca nanacu yucuna. Aú ne'ejnatá napéchuhua, nahue'epícaloje meque la'ajémica nenócajla ricá. Nahuata rinócana. E'iyonaja naquero'ó ajopana piyá. Caja piyuqueja ajopana ina'uqué pechu i'imari pu'ují rinacu, rehuíña'atacale necá palá huani.

<sup>19</sup> E caja najúhua'a. Raú Jesús jácho'oro piño pajimila eyá.

*Nephátaca higuera cuhuichilami yucuna marí:*  
(Mt 21.20-22)

<sup>20</sup> Muni que lapiyami na'apá piño paijí higuera ahua'ayá. Amaño caja rila'acó cuhuichila que, piyuque ra'apare hua'ató.

<sup>21</sup> Ricá ahua'ayá na'apá. Ejéchami riphaca Pedro pechu nacojé lalemi que Jesús yerúca'aca richaje. Aú rimá Jesúslo:

—Huehuíña'atajeri, pamá higuera paca'acare. Caja rila'ó cuhuichila.

<sup>22</sup> Jesús quemari najló:

—Tupana la'arí nacaje caphí péchuruna richojejlo.

<sup>23</sup> Jema'á marí: Iná quemacá ee cari ipurejlo: “Pácho'o. Pica'á picó juni jalomi acojé”. Caja queja ri'imajica la'acana caphí Tupana chojé péchurunajlo. Uncachu iná pechu i'imalá caphí Tupana chojé iná quemá ca'ajná: “Uncá ri'imalaje ñaque”. Uncá caja rila'acana i'imalaje raú.

<sup>24</sup> Ñaquele numá ijlo: Iquejá'ajica ee nacaje Tupana liyá, ipechu i'imagé caphí richojé. Raú ra'ajé ijlo ricá.

<sup>25</sup> Ipura'acó aú Tupana hua'até, amó ina'uqué chaje chapú nala'acare icá liyá. Raú ñaque caja Jara'apá, je'echú chu i'imagé, amájero ichaje ila'acare pu'uhuaré liyá.

<sup>26</sup> Uncaja que amó apú chaje chapú rila'acare icá liyá, uncá caja Jara'apá, je'echú chu i'imagé, amalo ichaje pu'uhuaré ila'acare liyá —que Jesús quemacá najló.

*Na puráca'alo aú ca Jesús la'acá nacaje nahuátaca hue'epícana. Riyucuna marí:*  
(Mt 21.23-27; Lc 20.1-8)

<sup>27</sup> E caja nephá piño Jerusalén ejo. E Jesús mujlúca'ari piño Tupana ñacaré chojé. Ejéchami sacerdotena huacára'ajeño, Tupana puráca'alo nacú jehuíña'atajeño, peñahuilana, quele jahuacaco Jesús nacojé.

<sup>28</sup> E nemá rijlo:

—¿Na puráca'alo aú chi pila'á nacaje? ¿Na huacára'ari picá rila'ajeri penaje? —que nemacá rijlo.

<sup>29</sup> Jesús quemari najló:

—Ñaque caja nuquejá'ajica iliyá nacaje yucuna. Ja'ajipajica ee nojló, numaje ijlo naca nuhuacára'ajeri.

<sup>30</sup> Rimá najló:

—¿Na puráca'alo aú chi Juanmi chu la'aqueri bautizar ina'uqué, Tupana puráca'alo aú ca'ajná, ina'uqué puráca'alo aú ca'ajná? Ja'ajipá nojló chuhua —que rimacá najló.

<sup>31</sup> Raú napura'ó pajhua'atéchaca necámica que. Nemá pajlocaca:

—Huemáquela rijló: “Tupana puráca'alo aú Juan la'aqueri bautizar ina'uqué” que, rimajla huajló: “¿Naje chi uncá jema'alá ra'apiyá?”

<sup>32</sup> Eyá huemáquela rijló: “Ina'uqué puráca'alo aú” que, mariruna ina'uqué yúcha'ajeñojla huachá raú —que napura'acó pajhua'atéchaca.

Raú naquero'ó ilé que quemacana piyá rijló, ajopana pechu i'imacale Juanmi chu nacú: “Tupana puráca'alo ja'apátajeri ri'imacá.”

<sup>33</sup> Aú calé nemá Jesusjlo:

—Capí, uncá huahue'epila na puráca'alo aú ca rila'aqué bautizar ina'uqué.

Jesús quemari najló:

—Ñaqué uncá caja numalaje ijló, na puráca'alo aú ca nula'acá nacaje —que Jesús quemacá najló.

## 12

*Jesús i'imari najló apú hua'até sápageño yucuna, nahue'epícaloje méqueca nala'ajica ricá chapú penaje.*

(Mt 21.33-46; Lc 20.9-19)

<sup>1</sup> Marí que Jesús i'imacá yucu najló:

—Pajluhuaja ina'uqué ejáchiyari cajmú caje ri'icacapere e'iyohuá. Rejomí rili'ichá corral tujlá que pajimájehaca rejáchiyaje nacojé. Rili'ichá caja ralá apáca'aruna. Quéchami rili'ichaca rica'apé yenoje, richiyá rihua'aphena amácaloje ricá palá penaje. E caja riyuricha rijhua'até sápageño naquiyánajlo ri'icacapere, namácaloje rijló ricá penaje. Ri'ijichaca ya'ajnao yámona rimicha najló: “Chuhua nu'ujichaca. Eco amá ricá palá. Cajmú naquiyana no'ojé ijló rihuemí, amaca nojló ricá huemí”, que rimíchaca najló. E ri'ijichá ya'ajnaje. Júpjia ri'imichaca ya'ajno.

<sup>2</sup> E caja ehuaaja richa ña'acana iphíchari rená chojé. Aú paminá huacári'ichari rijhua'até sápageño i'ijnacá rimena amájeño chaje, rijña'acáloje richa rijló penaje.

<sup>3</sup> Aú ri'ijichá a'ajná ño'ojó rimena amájeño chaje. Iphíchari nanacu. Eta rimena amájeño pachíyaño ricá; naña'achia ricá. Ejomi nahuacári'icha ripa'acó majopeja.

<sup>4</sup> Rejomí paminá huacári'ichari piño apú rijhua'até sápageño rejo. Ñaqué caja nali'ichaca ricá chapú huani. Naqui'ichá jipa richá cajrú. Nenocha pehuíla'aruya ricá jipa aú. Cajrú raphumí yurichaco rihuíla'aru nacú raú. Ripa'ó caja majopeja.

<sup>5</sup> E rihuacári'icha piño apú. Ricá nenocha. Rejomí rihuacári'icha ajopana, ajopana que. Ñaqué caja nali'ichaca chapú ajopana rihuacári'ichajena rejo. Ne'iyajena naña'achia, ne'iyajena nenocha.

<sup>6</sup> Eyá ejo'ocaja pajluhuaja yurícharo. Ri'irí huani ri'imichaca. Iqui'ija rihuátacare ri'imichaca. Caja penaje rihuacári'icha ricá nachaje. Ripechu i'imichá nanacu: “Nu'urí cari, ¿nephaje chi ra'api?”

<sup>7</sup> E'iyonaja nephicha na'apihuá rijló. Rimena amájeño amíchaca aú ricá huaíchaca nemá pajlocaca:

—Ilé ta ri'irijlo paminá yuréjeri rimena, ri'imacáloje rijluhua penaje. I'ijná huenóchachi ricá, rimenami yurícaloje huajló penaje —que nemacá pajlocaca.

<sup>8</sup> E caja riphicha nanacu. Eta napachia ricá; nenocha ricá. Rimena yámojo naqui'ichá ritami. Caja quetana riyucuna.

<sup>9</sup> Marí que Jesús i'imacá yucu najló. Ejomi rimá najló:

—Marí que paminá la'ajica rimena amájeño: Riphaje nacapichátaje. Ejomi riyureje rimena ajopánajlo ramájeño penaje —que rimacá najló.

<sup>10</sup> Jesús quemari piño najló:

—Caja ihue'epí méqueca Tupana puráca'alo lana'aquéjami quemacá. Marí que rimacá nunacu:

Pajluhuaja ina'uqué i'imajeri.

Ne'iyajena quemájeño rinacu:

“Uncá ina'uquélari ricá” que.

E'iyonaja ricá i'imajeri ajopana chaje.

<sup>11</sup> Marí caje penaje Tupana a'ajeri ricá.

Palá huani nacaje Tupana la'acare, que Tupana puráca'alo lana'aquéjami quemacá.

<sup>12</sup> Uncá paala Jesús puráca'alo i'imacá ne'iyajénajlo. Yucu ri'imá najló. E'iyonaja nahue'epí nanacu rimacá raú meque la'ajeñooca necá. Aú nahuata ripatacana, nahuajácaloje ricá penaje. E'iyonaja naquero'ó ajopana ina'uqué piyá. Aú na'apaña ricá. Ne'ejná ají que a'ajná ño'ojó.

*Liñeru na'acare ne'emacánajlo yucuna naquejá'aca Jesús liyá yucuna marí:*  
(Mt 22.15-22; Lc 20.20-26)

<sup>13</sup> E caja ajopana i'ijnaño Jesús hua'até pura'ajó, namácaloje méqueca rimacá ne'emacana nacú. Nahuata rinacu quemacana: "Pu'uhuaré rimíchaca huajló" que.

<sup>14</sup> Fariséona nanaquiyana, Herodes hua'atéjena naquiyana, quele puráca'alo aú ne'ejná Jesús chaje. E nemá rijló:

—Huehuíña'atajeri, huahue'epí quehuácaje pipuráca'alo. Nacaje Tupana huátacare iná la'acá caje nacú pehuíña'ata ina'uqué. Quehuácaje nacaje pehuíña'atacare nacú. Re huahuacára'ajeño naquiyana, uncá paala najló pipuráca'alo. E'iyonaja uncá pa'alá necá pinacajó. Pajimato pehuíña'ataca ina'uqué Tupana huátaca que la'acana nacú. Chuhua pimá huajló méqueca pipechu marí nacú: Naquejá'a hualiyá liñeru, na'acáloje ricá hue'emacana Césarjlo penaje. Romano naquiyana ricá. ¿E palani hua'acajla najló liñeru ca'ajná, uncá ca'ajná? —que nemacá rijló.

<sup>15</sup> Jesús hue'epiri naquejá'aca riyucuna riliyá, nahuátacale rimacá apojó ne'emacana liyá, nemacáloje rinacu: "Pu'uhuaré rimacá" que penaje. Aú rimá najló:

—¿Naje ihuata numacá ijlo nacaje nacú, imacáloje nunacu: "Pu'uhuaré rimíchaca huajló" que penaje? Iya'atá nojló liñeru, iná a'acare iná i'ímacánajlo, nomachi ricá.

<sup>16</sup> Je. E na'á rijló pajluhuata. Jesús yacá'aro richaje. E rimá najló:

—¿Na jenami chi cari liñeru nacú? ¿Na íí lana'aquejami rinacu?

Nemá rijló:

—Hue'emacana Cesar jenami quele rinacu. Ríí caja quele lana'aquejami rinacu —que nemacá rijló.

<sup>17</sup> Aú Jesús quemari najló:

—A'á i'ímacana Césarjlo quele liñeru rihuátacare. Ila'á caja nacaje Tupánajlo rihuátacare caje.

Marí que rimacá aú najló napechu i'imá: "¡Meque capechú huani rimíchaca huajló!"

*Caja taca'acaño macápo'oco yucuna naquejá'a Jesús liyá. Riyucuna marí:*  
(Mt 22.23-33; Lc 20.27-40)

<sup>18</sup> Ajopana piño i'ijnaño Jesús amaje. Saducéona naquiyana ne'emacá. Necá quemaqueño caja taca'acaño nacú: "Uncá namacápo'olajo" que. Necá penájena i'ijnaño Jesús amaje. Nemá rijló:

—19 Huehuíña'atajeri, marí que Moisesmi chu puráca'alami lana'aquejami quemacá: "Apú ca'ajná taca'añari riyajalo mayaniqueru. Palani re'ehuemi ra'apiyajé huá'acacojla riyajáloami hua'até, re'ehuemi chu yanimínami yurícoloje rapumí chojé raú penaje", que ripuráca'alami lana'aquejami quemacá.

<sup>20</sup> Ñaque ricá: Maare pajluhuaja ina'uqué i'imari huajhua'até. Iyamá cuhuá'ata quele ne'emacá rejena hua'até. Achiñana huánija ne'emacá. Pe'ejí ri'imacá huá'acaro. Ritaca'añá rucá mayaniqueru.

<sup>21</sup> Rejomi ra'apiyajé i'imacá huá'acaro piño riyajáloami hua'até. Ñaque caja ricapichaco ruliyá mayaniqueru caja. Raú re'ehué pe'iyorí huá'acaro piño rujhua'ateja caja. Ñaque caja ricapichaco ruliyá mayaniqueru caja.

<sup>22</sup> Ají que iyamá cuhuá'ata quele necá huá'acaco rujhua'até i'imacá. Necá piyuque capichaño ruliyá mayaniqueru. Caja penaje nayajáloami capichayo nápumi chu i'imacá.

<sup>23</sup> Eta, Tupana macápo'otajica ina'uqué caja taca'acaño huacajé ¿na yajalo chí ruyuríjico rejéchami? Iyamá cuhuá'ata quele ina'uqué yajáloami ru'umacá —que nemacá Jesusjlo.

<sup>24</sup> Jesús quemari najló:

—Uncá ihue'epila rinacajé, uncale ihue'epila meque Tupana puráca'alo lana'aquejami quemacá. Uncá caja ihue'epila nacaje Tupana hue'epícare la'acana nacajé.

<sup>25</sup> Caja taca'acaño macápo'ojico ejomi uncá pajhua'atéchaca huá'acajeñomi calé ne'emajica je'echú chu. Uncá caja nahuá'acalajo piño pajhua'atéchaca. Tupana hua'atéjena, je'echú chu i'imacá, que caja ne'emajica rihuacajé.

<sup>26</sup> Re riyucuna, caja taca'acaño macápo'oco yucuna, Tupana puráca'alo lana'aquejami e'iyá. Ica'á caja hue'epiño riyucuna nacajé. Ricá quemari méqueca Tupana pura'acó jíma'alami cára'aco e'iyayá Moisesmi chu hua'até i'imacá. Rimá rijló marí que: "Abraham, Isaac, Jacob, quele pechu i'imari caphí nochojé".

<sup>27</sup> Uncá caja taca'acaño pechu i'imalajla caphí Tupana chojé. Eyá necá cajmuruna pechu i'imari richojé caphí. Cajmuruna ne'emacale je'echú chu rimá Abrahami chu, Isaacmi chu, Jacobmi chu, quele nacú: "Caphí napechu nochojé". Uncá ihue'epila naca quehuaca —que rimacá najló.



*Nacaje Tupana huátacare iná la'acá apú nacaje chaje yucuna marí:*

*(Mt 22.36-40)*

<sup>28</sup> E caja pajluhuaja Tupana puráca'alo nacú jehuíña'atajeri i'ijnari Jesús hua'até pura'ajó. Rema'á méqueca napura'acó pajhua'atéchaca i'ímacá. Rihue'epi Jesús quemacá palá najló. Aú ri'ijná rahua'ajé, riquejá'acaloje riliyá nacaje yucuna penaje. E rimá rijló:

—Tupana huacára'ari iná la'acá cajrú nacaje. ¿Na rihuata huala'acá i'mari apú nacaje chaje huani?

<sup>29</sup> Jesús quemari rijló:

—Marí que Tupana puráca'alo lana'aquėjami quemacá: “Huahuacára'ajeri Tupana. Ricaja calé i'mari Iná Chi'ináricana.

<sup>30</sup> Pihuata íqui'ija Pihuacára'ajeri, Tupana. Pihuañué ricá. Pi'ijnatá caja pipéchuhua rinacu. Pehuíña'o caja nacaje nacú, ri'ímacáloje palá rinacu penaje. Pila'á caja piyuqueja nacaje, ri'ímacáloje palá rinacu penaje. Marí que pila'acá, pihuátacale ricá íqui'ija”. Apú nacaje rihuacára'acare iná la'acá chaje rihuátaca iná la'acá marí que.

<sup>31</sup> Apa'amá rimacare nacú, ra'apejé quemachi ricá, quemari marí que: “Thuata íqui'ija piyuqueja ina'uqué pihuátaca picó que caja”. Richaje huani Tupana huátaca iná la'acá marí que —que Jesús quemacá rijló.

<sup>32</sup> Tupana puráca'alo nacú jehuíña'atajeri quemari Jesusjlo:

—Huehúña'atajeri, quehuaca jo'ó ilé pimíchaca. Palá pimíchaca huajló. Ricaja calé, Tupana, Iná Huacára'ajeri, Iná Chi'ináricana caja ricá.

<sup>33</sup> Palani iná huátaca ricá íqui'ija. Palani caja iná huejhué ricá. Palani caja iná jehuíña'o nacaje nacú, ri'ímacáloje palani rijló penaje. Palani caja iná i'ijnataca iná péchuhua rinacu. Palani caja iná la'acá nacaje, ri'ímacáloje palani rijló penaje. Marí que iná la'acá, iná huátacale ricá íqui'ija. Eyá apú, palani caja iná huátaca íqui'ija piyuque ina'uqué iná icó que caja. Apa'amá ripuráca'alo chaje huani iná a'á iná nacojó ricá. Pirajina nacára'atacare Tupánajlo chaje palaca ricá. Nacaje iná a'acare majopeja Tupánajlo chaje palaca ricá —que rimacá rijló.

<sup>34</sup> Jesús amari capechú rimacá rijló. Aú rimá rijló:

—Yehuicha pipechu íphaca, Tupana i'ímacáloje pihuacára'ajeri penaje.

Reyá a'ajná ño'ojó uncá ajopana quejá'alaño nacaje yucuna riliyá, nahuó la'acole ra'apejé nacaje yucuna quejá'acana riliyá.

*Ricá Tupana huacára'acare ina'uqué i'imatájeri penaje yucuna riquejá'a naliyá. Riyucuna marí:*

*(Mt 22.41-46; Lc 20.41-44)*

<sup>35</sup> E caja Jesús jehuíña'atari necá Tupana ñacaré chu. Rimá najló:

—Tupana huacára'ari pajluhuaja majó ina'uqué i'imatájeri penaje. ¿Naje chi Tupana puráca'alo nacú jehuíña'atajeño quemaño rinacu: “Davidmi chu laquénami naquiyana ricá” que?

<sup>36</sup> Tupana Pechu quemacá que, Davidmi chu lana'acá riyucuna papera chojé marí que i'ímacá:

Ina'uqué Huacára'ajeri huani Tupana. Ricá quemari Nuhuacára'ajerijlo:

“Palá huani nupechu pinacu.

Pi'imá Nuhuacára'ajeri nujhua'até.

Maare pi'imajé nohua'á, nuchá'atajica chapú pinacu péchuruna ejená”, que rimacá.

<sup>37</sup> Jesús quemari piño najló:

—Davidmi chu quemari: “Nuhuacára'ajeri ricá”, ilé Tupana huacára'acare majó ina'uqué i'imatájeri penaje nacú. Ñaquele uncá rilaquénami naquiyana huani calé ricá nemacare nacú —que rimacá najló.

Iqui'iruna ina'uqué jema'año Jesús puráca'alo. Palá napechu i'ímacá ripuráca'alo nacú.

*Jesús aca'acá Tupana puráca'alo nacú jehuíña'atajeño maná yucuna marí:*

*(Mt 23.1-36; Lc 11.37-54; 20.45-47)*

<sup>38</sup> Jesús jehuíña'atari necá. E rimá najló marí que:

—Ihue'epi mecajenaca huani Tupana puráca'alo nacú jehuíña'atajeño. Huaphereni na'arumacá chu nahuata chira'acajo. Nahuata caja ina'uqué ajalácaca necá palá, nachira'acochu ne'yohuá. Le'ejepelaji ñacarelana e'yohuá na'apaca ee, ñaque caja nahuátaca najalácaca necá palá.

<sup>39</sup> Nahuata caja ajopana tucumá yá'acano nahuacáca'alo ñacarelana chu. Ñaque caja nale'ejé fiesta huacajé.

<sup>40</sup> Napajlaca najhua'até aú nata'á inaana ihuacajlómoma liyá ñañacaré. Eyá majopeja napura'acó júpija Tupana hua'até, palá ina'uqué pechu i'ímacáloje nanacu raú penaje. Marí que nala'acare chona, ajopana chaje huani Tupana huajáica necá.

*Ihuacajilomi a'acá liñeru yucuna marí:*

*(Lc 21.1-4)*

<sup>41</sup> E caja Jesús yá'aro Tupana ñacaré chu. Liñeru a'acuná ahua'á riyá'o. Ramá ina'uqué ca'acá liñeru richojé. Cajrú liñeruteruna i'imacaño ca'año cajrú liñeru richojé.

<sup>42</sup> Eyá ramá caja pajluhuájaru ihuacajilomi. Camu'ují la'acayo ru'umacá. Ruca'á iyamata ñani liñeru richojé. Huejápaja huani rahuacaco.

<sup>43</sup> E Jesús huá'ari ra'apiyatéjenajlo, ne'ejnacáloje rahua'ajé penaje. Rimá najló:  
—Jema'á marí: Ilerú inanaru, ihuacajilomi rucá. Camu'ují la'acayo caja rucá. Ilé liñeru, huejápaja ruqui'ichaje richojé aú ruchá'achiya ajopana. Raú ruli'ichá palá ajopana chaje.  
<sup>44</sup> Ajopana qui'ichaño naliñéroute lupemí richojé. Eyá rucá qui'ichayo piyuque ruliñéroute richojé. A'ajnejí huarúhua'ajona penaje ri'imichácajla —que rimacá najló.

## 13

*Nacajya'atájica Tupana ñacaré yucuna Jesús i'imari najló. Riyucuna marí:*

*(Mt 24.1-2; Lc 21.5-6)*

<sup>1</sup> Jesús jácho'oro Tupana ñacaré chiyá. Aú pajluhuaja ra'apiyatéjeri quemari rijló:

—Huehuiña'atajari, pamala marí Tupana ñacaré. Jipa naquiyá la'acanami ricá. ¡Meque palani huani ricá!

<sup>2</sup> Jesús quemari rijló:

—Tupana ñacaré pamácare me'etení, jipa naquiyá la'acanami ricá. Uncá ri'imalaje maare. Aquijñojo ajopana, chapú péchuruna, cajya'atájeño piyuqueja ricá. Ejomi uncá pajluhuaja ñani jipa yurilajo pacháca —que rimacá rijló.

*Jesús quemari najló méqueca ri'imajica eja'ahuá chu, eja'ahuá capichájico piyá. Riyucuna marí:*

*(Mt 24.3-28; Lc 21.7-24; 17.22-24)*

<sup>3</sup> E Jesús i'ijnari yenuri Olivos ejo. Re ri'ihuata nacú riyá'o Tupana ñacaré ejo pumitá. E caja Pedro, Santiago, Juan, Andrés, quele i'ijnaño Jesús chaje. Necámica que ne'emacá re. E nemá rijló:

<sup>4</sup> —Pimá huajló méquechamica ri'imajica quele pimíchaje nacú huajló. ¿Na aú chi ina'uqué hue'epéjeño méquechamica riphájica rená chojé? —que nemacá rijló.

<sup>5</sup> Jesús quemari najló:

—Jema'aniya ajopana ja'apiyá; napajlájica ijhua'até.

<sup>6</sup> Iqui'iruna ina'uqué iphájeño. Na'ajé nú, neí hua penaje. Apú, apú que nemájica nanacuhúa: “Ricá Tupana huacára'acare majó ina'uqué i'imatájeri penaje nucá”, que nemájica nanacuhúa. Napajlájica najhua'até raú. Cajrú ina'uqué jema'ajeño na'apiyá.

<sup>7</sup> Marí que nemájica ijlo: “Nenócaco pajhua'atéchaca maárohua que, ya'ajnárohua que”, iquero'oniyó raú. Caja queja ri'imajica. Uncá jo'ó eja'ahuá tajnájajo nenócájico huacajé.

<sup>8</sup> Ajopana te'eré eruna nócajeño ajopana te'eré eyájena hua'até. Ajopana huacára'ajeri hua'atájena nócajeño ajopana huacára'ajeri hua'atájena hua'até. Cajrú te'eri ñaca'ajico apú eyá, apú eyá que rihuacajé. Cajrú caja ina'uqué taca'ajica me'epejí nacú rihuacajé. Marí caje aú ina'uqué queño'ojeño chapú caje yajhué ña'acana panacu.

<sup>9</sup> Ihue'epí méqueca nala'ajica ricá. Najña'ajé icá ihuacára'ajeño ejo, no'opiyá jema'ajeño i'imacale. Naña'ataje icá ina'uqué jahuacá'alo ñacarelana chu. Itára'ajo caja ihuacára'ajeño jimaje, ajopana, ajopana que jimaje, naculácatacoloje inacu penaje. Marí que nala'ajica icá, no'opiyá jema'ajeño i'imacale. Marí caje aú i'imajé nuyucuna najló.

<sup>10</sup> Tupana i'imatájeri ina'uqué capichácajo liyá. Rená tajnaco piyá ne'emajé riyucuna piyuqueja ina'uqué eja'ahuá chu i'imacáñojlo.

<sup>11</sup> Najña'ajica icá ihuacára'ajeño ejo huacajé, ihuó la'aniyo méqueca imájica najló piyá. Tupana Pechu quemájeri ijlo méqueca imájica najló, riphájicaja rená chojé ijlo. Uncá imalaje najló ipechu queja. Ripechu aú Tupana quemájeri ijlo méqueca imájica nacaje nacú najló —que Jesús quemacá najló.

<sup>12</sup> Ne'iyajena ina'uqué a'ajeño nejena chapú nanacu péchurunajlo, nenócaloje necá penaje. Nachi'iná naquiyana a'ajeño najló nayani, nenócaloje necá penaje. Nayani naquiyana a'ajeño najló nachi'iná, nenócaloje necá penaje, que ne'iyajena la'ajica rihuacajé.

<sup>13</sup> Piyuqueja ina'uqué pechu i'imajé inacu chapú, jema'acale no'opiyá. Uncájica ee jácho'o Tupana puráca'alo ja'apiyá i'imacana itaca'ajica ejená, Tupana i'imatájeri icá capichácajo liyá.

<sup>14</sup> Danielmi chu i'imari Tupana puráca'alo ja'apátajeri i'imacá. Ricami chu lana'arí marí que papera chojé i'imacá: “Amájica ee nacaje pu'uhureni huani tára'aco Tupana ñacaré chu, icá Judea te'eré eruna ñaajeño ipuré e'iyajé. (Marí papera amájeño, ihue'epí meque quemacána ricá.)

<sup>15</sup> Rihuacajé ca'ajná e'iyajena i'imajeño pají i'ihuata chu. Pu'ucuja iñaajico reyá. Uncá imujlúca'alaje pají chojé nacaje ña'ajé pamineco.

<sup>16</sup> Apala e'iyajena i'imajeño imena e'iyá. Ica' caja ñaajeño pu'ucuja. Uncá caja ipa'alaje iñacaré chojé a'arumacaji ña'ajé pamineco.

<sup>17</sup> Chapú huani ri'imajica canupana inaánajlo rihuacajé. Chapú huani caja ri'imajica inaana cayaniquerunajlo. Ejo'ocaja i'iracaño chu'uchú nayani, quelejlo ri'imajé chapú rihuacajé.

<sup>18</sup> Cajrú iñaajico rihuacajé. Ipura'ó Tupana hua'até, ri'imacá piyá ipe'ení i'imajica huacajé.

<sup>19</sup> Rihuacajé cajrú ina'uqué ña'ajica chapú caje yajhué panacu. Tupana queño'ótaca eja'ahuá huacajé eyá uncá ina'uqué amálaño chapú caje yajhué, cajrú huani ri'imajica rihuacajé que caja. Uncá caja ri'imajaje ñaque reyá a'ajná ño'ojó.

<sup>20</sup> Tupana huitúca'atajeri najló rená, ri'imacá piyá júpija huani najló. Iqui'ija rihuátaca ina'uqué, ri'ihuapacárena rijluhua ajopana ina'uqué e'iyayá. Najló rihuitúca'ataje rená. Uncáquela rihuitúca'atajla rená najló, uncá na calé i'imarolja.

<sup>21</sup> Nemájica ijlo: "Iyacá'o, maare ricá Tupana huacára'acare majó ina'uqué i'imatájeri penaje". Marí que nemájica ee ijlo, jema'aníya na'apiyá. Nemájica ee ijlo: "Iyacá'o, a'ajnare ricá" que, jema'aníya caja na'apiyá.

<sup>22</sup> Cajrú ina'uqué i'imajica, majopeja napajlájica. Majopeja nemájica apú, apú que nanacuhú: "Nucá Tupana huacára'acare majó ina'uqué i'imatájeri penaje". Ajopana caja quemájeño nanacuhú: "Huecá ja'apátaño Tupana puráca'alo ina'unquejlo ra'apiyá que". Nala'ajé caja cajrú nacaje uncá meño'ojó iná la'alare nená que'ená penaje, ina'uqué jema'acáloje nanacojó napuráca'alo penaje. Cajrú napajlájica najhua'até. Tupana ja'apiyá jema'ajeño hua'até caja nahuata pajlácana. Uncá meño'ojó napajlálaje najhua'até, uncale nema'alaje na'apiyá.

<sup>23</sup> Ihue'epí numacare nacú. Uncá chiyó ri'imá ñaque nu'umá riyucuna ijlo —que rimacá najló.

*Jesús pa'ajico piño majó yucuna marí:*

*(Mt 24.29-35, 42, 44; Lc 21.25-36)*

<sup>24</sup> Ina'uqué amájeño cajrú huani chapú caje yajhué i'imajica. Rihuacajé uncá camú camaré i'imajaje. Uncá caja queri amálajo, uncá ricamaré i'imajaje.

<sup>25</sup> Ihuijrina caje ja'ajeño je'echú chiyá. Piyuque nacaje je'echú chu i'imacare ñaca'ajero.

<sup>26</sup> Ejéchami namájica nucá huaíchaca juni suhuáca'ala e'iyohuá. Ina'unquejloje penaje i'imacá nucá. Piyuque ina'uqué huacára'ajeri penaje nuphaje majó rihuacajé. Cajrú mejáma'atani i'imajica nohua'ó, hua'até nuphaje.

<sup>27</sup> Nuphájica penaje nuhuacára'aje nujhua'atéjena je'echú chiyájena, ina'uqué huá'aje. Ina'uqué, nu'uhuapacárena nujluhua ajopana ina'uqué e'iyayá, huá'aje ne'ejnaje. Piyuqueja huani eja'ahuá e'iyayá nahuá'aje necá.

<sup>28</sup> Ihue'epí nupa'ajico nacojé. Caja ihue'epí a'ahuná higuera nacojé. Ri'iché pitúca'ari, ripaná moto'ocáloje rinaquiya penaje. Ri'iché pitúca'aca aú iná hue'epí jarechí iphaca rená chojé.

<sup>29</sup> Ñaque caja ihue'epíjica nupa'ajico majó nacojé. Amájica aú piyuque nacaje numíchaje nacú, ihue'epeje yehuicha riphaca rená chojé caja penaje.

<sup>30</sup> Jema'a marí: Marí que ri'imajica ina'uqué tajnájico yámona.

<sup>31</sup> Je'echú, eja'ahuá hua'até tajnájero. E'iyonaja calé uncá nupuráca'alo tajnálajo. Numacá rinacu queja nacaje i'imajica.

<sup>32</sup> Uncá na calé hue'epiri méquechamica nupa'ajico piño je'echú chiyá majó. Uncá caja Tupana hua'atéjena je'echú churuna, hue'epílaño noná. Ricaja calé Nora'apá, Tupana, hue'epiri noná.

<sup>33</sup> Tímá nupé maare. Ipura'ó Tupana hua'até. Uncá ihue'epílaje méquechamica nupa'ajico piño majó.

<sup>34</sup> Marí que ricá: Apú i'ijnari ca'ajná ya'ajnaje. Riyurí riñacaré. Ri'ijnacá yámona rimá rijhua'até sápa'ajeñojlo, nala'acáloje rijló nacaje, ya'ajná ri'imacá quietana penaje. Apujlo, apujlo que rimacá najló, nala'acáloje nacaje rihuátacare caje penaje. Pají hua'aphejlo rimá, rihuátacaloje ricá penaje. Ejomi ri'ijná ya'ajnaje.

<sup>35</sup> Jesús quemari piño najló:

—Ihuata nucá maare. Uncá ihue'epila méquechamica nupa'ajico majó. Nuphaje lapí ca'ajná, lapí jenaji que ca'ajná, capere apoca ee ca'ajná nuphaje, lapiyamí ca'ajná nuphaje. Uncá iná hue'epila méquechamica nuphájica.

<sup>36</sup> Apala quiñaja ca'ajná nupa'ajico. Uncá paala nomájica icá majopeja, uncá nuhuátacana nacú calé.

<sup>37</sup> Numá ijló, ihuátacaloje nucá penaje. Ñaque huánija numacá piyuque ina'uquejlo, nahuátacaloje nucá nuphájica majó ejena penaje —que Jesús quemacá najló.

## 14

*Nahuacára'ajeño pura'acó pajhua'atéchaca Jesús nócana nacú yucuna marí:*  
(Mt 26.1-5; Lc 22.1-2; Jn 11.45-53)

<sup>1</sup> Iyamá cala yuriro natucumá nale'ejé fiesta ja'apejé. Nale'ejé fiesta íi i'imari Pascua. Rihuacajé najñaque pan mamúra'atacanaru. E caja sacerdotena huacára'ajeño, Tupana puráca'alo nacú jehuíña'atajeño, quele i'ijnataño napéchuhua méqueca napajlácajla Jesús hua'até, najña'acáloje ricá mana'í chíyó penaje. Nenócaloje ricá penaje, napura'ó pajhua'atéchaca.

<sup>2</sup> E nemá pajlocaca:

—Uncá paala ripatacana fiesta e'iyá. Ñaque huala'aquela ricá, cajrú ina'uqué yúcha'acojla huachá raú.

*Apa'ahuelo aco'ocá nacaje jilá Jesús huilá e'iyajé yucuna marí:*  
(Mt 26.6-13; Jn 12.1-8)

<sup>3</sup> Pajimila Betania e Jesús i'imari Simón ñacaré chu. Napona patáca'ataro penájemi Simón i'imacá. Rijhua'até Jesús ajñari ra'ajnehuá riñacaré chu. Na'ajnehuá ajñacana nacú ne'emacá ee, apa'ahuelo iphayo Jesús ahua'ajé. Huíluru i'imari rucapi. Jipa alabastro naquiyá la'acanami ri'imacá i'imari rucapi. Pu'uté richu nacaje jilá i'imacá, nardo ríí. Ricá huani ri'imacá; pu'umé huani jamarí ri'imacá. Cahuemini huani caja ri'imacá. E ruphá Jesús ahua'ajé. Rumajáca'ata ricá, rujme'etácaloje richaya penaje. Quéchami roco'ocá ricá piyuque Jesús huilá e'iyajé.

<sup>4</sup> Marí caje aú, ajopana re i'imacaño, yúcha'año ruchá. Nemá pajlocaca:

—¡Naje majopeja huani ta rucupíchaca ricá!

<sup>5</sup> Cahuemini huani ilé caje jilá. Ro'oquela ajopánajlo ricá, na'ájla rojló rihuemí cajrú huani liñeru, ro'ocáloje camu'ují la'acaño ñaté raú penaje —que nemacá pajlocaca.

Cajrú naca'acá rumaná.

<sup>6</sup> Aú Jesús quemari najló:

—Reja ru'umareja. ¿Naje chi iqui'ichá pu'ují caje rupechu naquiyá? Palá ruli'ichaca nucá raú.

<sup>7</sup> Ihuátajica ee camu'ují la'acaño ñaté a'acana, re necá ijhua'até ñaqueja. Eyá nucá, uncá ñaqueja huani calé nu'umajica ijhua'até —que rimacá najló.

<sup>8</sup> Rimá piño najló:

—Rupechu locópa'ala ruli'ichaca nucá palá. Roco'ochá nardo jilá nuhuilá e'iyajé. Raú rulamá'achiya nunapona. Nato'otájica nutami támijimina to'otáquelana chójé huacajé penaje ri'imajé.

<sup>9</sup> Jema'á marí: Tupana i'imatari ina'uqué capichácajo liyá. Ne'ejnajé riyucuna i'imajé ajopana, ajopánajlo que. Ne'emajé caja huajé ruli'ichaje nucá yucuna najló, napechu capicháñaca piyá rucá penaje —que Jesús quemacá najló.

*Judas a'acá ripinánajlo Jesús yucuna marí:*  
(Mt 26.14-16; Lc 22.3-6)

<sup>10</sup> E caja Judas i'ijnari sacerdotena huacára'ajeño chaje. Iyamá iphata ji'imaje nacojé quele Jesús ja'apiyatéjena naquiyana ri'imacá. E ri'ijná namaje. Rimá najló meque la'ajémica ra'acajla najló Jesús.

<sup>11</sup> Ri'imacá aú riyucuna najló, palá napechu i'imacá rinacu. E nemá rijló:

—Hua'ajé pijló liñeru, pa'ajica ee huañaté ripatacana aú.

—Je.

Reyá a'ajná ño'ojó Judas quejílari Jesús, ramácaloje méqueca ra'acajla najló ricá.

*Jesús ajñaca ra'ajnehuá ra'apiyatéjena hua'até nenoca ricá yámona yucuna marí:*  
(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> E caja naqueño'ó fiesta ja'apátacana. Riqueño'ojico huacajé najñaque pan mamúra'atacanaru. Nenoque caja ohuéjane yaní Tupánajlo fiesta a'ajnená penaje. E caja naqueño'ó fiesta ja'apátacana. E caja ra'apiyatéjena quemaño Jesusjlo:

—¿Meño'ojó chi huala'ajé pijló fiesta a'ajnená?

<sup>13</sup> E Jesús quemari iyamá ra'apiyatéjenajlo marí que:

—I'ijná a'ajná ño'ojó pajimila ejo. Re iphácajo apú hua'até. Juni rihuacúla'apa que iphájica ricá.

<sup>14</sup> Eco i'ijná rápumi chu, imujlúca'achi rijhua'até pají chojé. Eco imá pají minajlo marí que: "Huehuiña'atajeri quemichari pinacu: ¿Mere ucapú, huajñácaloje pascua a'ajnená richojé no'opiyatéjéna hua'até penaje?" que imájica rijló nunacu.

<sup>15</sup> Raú riya'ataje ijló ucapú ñópo'ojlo lamá'ataqueja yenú. Piyuque huani nacaje i'imajica lamá'ataqueja richu. Ricá chu ila'ajé huajló a'ajnejí —que rimacá najló.

<sup>16</sup> Aú ne'ejná pajimila ejo. Amaño ucapú i'imacá Jesús quemacá que najló. Richu nala'á pascua a'ajnená.

<sup>17</sup> Calajerúchami Jesús i'ijnari rejo iyamá iphata ji'imaje nacojé quele ra'apiyatéjéna hua'até. Nephá rejo.

<sup>18</sup> E najñá na'ajnehuá. Najñaca na'ajnehuá ee rimá najló:

—Jema'á marí: Re maare pajluhuaaja inaquiyana, ajñari ra'ajnehuá nujhua'até. Ricá a'ajeri nupinánajlo nucá —que rimacá najló.

<sup>19</sup> Raú camu'ují napechu la'acó.

—¿Nucá chí quele pimá nacú? —que nemacá rijló pajehuémichaca.

<sup>20</sup> Jesús quemari najló:

—Iyamá iphata ji'imaji nacojé quele icá no'opiyatéjéna. Pajluhuaaja inaquiyana a'ajeri nucá nupinánajlo. Ilé janóro'otari pan nuparatune chu nujhua'até, ricá numá nacú.

<sup>21</sup> Ina'uquejloje penaje i'imacá nucá. Nutaca'ajé Tupana puráca'alo lana'aquejami quemacá que nunacu. E'iyonaja calé chapú huani ri'imajica rijló a'ajeri nucá nupinánajlo. Uncáquelela rimoto'ójla i'imacá, palani ri'imacajla rijló. Raú uncá Tupana huajálajla ricá cajrú huani —que Jesús quemacá najló.

<sup>22</sup> Najñaca na'ajnehuá ee Jesús ña'arí pan ricápojo. Ejomi rimá Tupánajlo:

—Palá pila'acá huecá marí pan aú.

Ejomi ritupa'á rinaquiayana. E ritamáca'ata najló pan yupa'aqueja. Rimá najló:

—Ijña'á cari, nunapona ricá.

<sup>23</sup> Quéchami rijña'acá chiyela caje ricápojo. Epepí inarí cajmú icha jalá amúra'atacanami i'imari richu. Rimá Tupánajlo:

—Palá pila'acá huecá marí cajmú jalá aú.

Rejomi ra'apata ra'apiyatéjenajlo ricá. Piyuque necá i'iraño rinaquiayana.

<sup>24</sup> Rimá najló:

—Nura ricá. Nura i'ijnajeri nophú chiyá ina'uqué chaya penaje. Marí caje aú Tupana amájero cajrú ina'uqué chaje, pu'uhuaré nala'acare liyá.

<sup>25</sup> Jema'á marí: Uncá hue'eralaje jepepí inarí cajmú jalá ijhua'até marí eja'ahuá chu piño. Tupana hua'até hue'emajica ee je'echú chu, nu'uraje apú caja jalá ijhua'até re —que rimacá najló.

<sup>26</sup> Eyá caja penaje nataní Tupana yale. Ejomi ne'ejná yenuri Olivos ejo.

*Jesús quemari Pedro nacú: "Picá micho'otájeri nuchaya ñaano pani." Riyucuna marí: (Mt 26.30-35; Lc 22.31-34; Jn 13.36-38)*

<sup>27</sup> E Jesús quemari najló:

—Ñaano pani ipechu la'ajó piyuque ujhú nuliya. Ja'apáñaje nucá. Marí que Tupana puráca'alo lana'aquejami quemacá huanacu: "Nonoje ohuéjéna lamára'ajeri naliya. Raú macajmálajla neñaajico", que rimacá huanacu.

<sup>28</sup> Nenoje nucá. Numacápo'ojico ejomi nu'ujnajé Galilea ejo itucumá —que rimacá najló.

<sup>29</sup> E Pedro quemari rijló:

—Piyuque ajopana ca'ajná ja'apáñajeño picá. Eyá nucá, uncá ta no'opáñalaje picá —que rimacá rijló.

<sup>30</sup> Jesús quemari rijló:

—Jema'á marí: Ñaano lapí, capere yaca'ajica piyá iyamá pe, pimicho'otájicaja nuchaya hueji que pe —que rimacá rijló.

<sup>31</sup> Caphí Pedro quemacá:

—Nenoje ca'ajná nucá pijhua'até. E'iyonaja calé uncá numicho'otálaje pichaya raú—que rimacá Jesúsjo.

Ajopana ra'apiyatéjéna quemano ñaque caja.

*Jesús pura'acó Tupana hua'até Getsemaní e yucuna marí: (Mt 26.36-46; Lc 22.39-46)*

<sup>32</sup> E caja nephá Getsemaní ejo. Apucunaji íí Getsemaní. E Jesús quemari ra'apiyatéjenajlo:

—Maare iyá'ó, nupura'acó Tupana hua'até a'ajná ño'ojó quetana.

—Je —que.

<sup>33</sup> Rihua'á a'ajná ño'ojó rijhua'ató Pedro, Santiago, Juan, queleja. E caja apú que huani Jesús pechu la'acó rejo. Camu'ují huani rila'acá rinacuhá rejéchami i'imacá.

<sup>34</sup> E rimá najló:

—Camu'ují huani nupechu me'etení, nutaca'ajícale. Uncá meño'ojó nujña'alá panacu. Quehuí huani nojló ricá nuhuajhué naquiyá. Iyuró maare cajmuruna que, icamátaniyo — que rimacá najló.

<sup>35</sup> E ra'apaña necá a'ajná ño'ojó pani. Re rito'ó pajima'aló te'erí e'iyá. Ripura'ó Tupana hua'até. Rimá Tupánajlo, ri'imatácaloje ricá chapú caje yajhué ramájacare ñaano pani liyá penaje. Palani ri'imaquela Tupánajlo rihuata ri'imatácajla ricá richiyá.

<sup>36</sup> Rimá rijló marí que:

—Pa'ayú, picá hue'epiri piyuque huani nacaje la'acana. Pihuátajica ee pa'apata nuliya chapú caje yajhué nomájacare ñaano pani. Pila'aniya nuhuátaca que; pihuátaca que pila'acá — que rimacá Tupánajlo.

<sup>37</sup> E ripa'ó piño nachaya, amari nacamátaco. Rimá Pédrojlo:

—Simón Pedro ¿Picamáchiyaco chí? ¿Uncá meño'ojó chí pi'imaláchajla nujhua'até cajmuni pajluhua camú jená quetana?

<sup>38</sup> I'imá cajmúruna, ipura'ó Tupana hua'até, ila'acá piyá pu'uhuaré. Re ricá iná pechu nacú, iná la'acáloje palá raú penaje. E'iyonaja calé uncá meño'ojó iná la'alá palá iná icoja — que rimacá najló.

<sup>39</sup> E ri'ijná piño Tupana hua'até pura'ajó. Ñaqueja caja rimacá rijló.

<sup>40</sup> Ripa'ó piño nachaya, amari nacamátaco piño. Caja tapú chá'atari necá. Riphá nachaya. Uncá nahue'epila méqueca nemacajla rijló.

<sup>41</sup> E ripa'ó piño Tupana hua'até pura'ajó. Ejomi ripa'ó piño nachaya. Caja hueji que pe la'acá. E rimá najló:

—Chuhua icamato; ihuatána'a; caja chuhua. Caja riphicha rená chojé nojló. Ina'uquéjloje penaje i'imacá nucá. Chuhua na'ajica chapú la'acáñojlo nucá — que rimacá najló—.

<sup>42</sup> Jácho'o, chuhua i'ijná hue'ejnachi. Caja ilé huaicha a'ajeri nucá pu'uhuaré la'ajéñojlo.

*Napatacá Jesús yucuna marí:*

(Mt 26.47-56; Lc 22.47-53; Jn 18.2-11)

<sup>43</sup> Jesús pura'acó najhua'até ejé Judas iphari rinacu. Iyamá iphata ji'imaji nacojé quele naquiyana ri'imacá. Riphá rinacu cajú iná'uqué hua'até. Sajalu caje, cuyúhua'ala caje hua'até nephá nanacu. Sacerdótena huacára'ajeño, Tupana puráca'alo nacú jehuíña'atajeño, peñahuilana, quele puráca'alo aú ne'ejná rejo ripataje.

<sup>44</sup> Maapami que Judas a'acá rijhua'até i'ijnacáñojlo jenaji, nahue'epícaloje mecajeca napatájica penaje. Rimá najló marí que i'imacá:

—Pu'uhuacá nuchiño'ojica rijimá chiyá, ricá ta ipataje. Eco ijña'á ricá ijlú chuhua — que rimacá rijhua'até i'ijnacáñojlo maapami que.

<sup>45</sup> E caja riphá rinacu. E rajalaca Jesús. Rimá rijló:

—Huehuíña'atajeri — que.

Ejéchami richiño'ocá rijimá chiyá.

<sup>46</sup> Eja napatá Jesús, najña'acáloje ricá penaje.

<sup>47</sup> Ejéchami apú, re i'imacare, jero'ocá risajálune ra'aruná chiyá. Ricá aú rica'á apú i'ijhuí. Sacerdótena huacára'ajeri hua'até sápa jeri ri'imacá, ri'ijhuí rica'á.

<sup>48</sup> E Jesús quemari najló:

—Caja i'ijichá majó nujña'ajé sajalu hua'até, cuyúhua'ala hua'até. Meque ata'acachi que huani ila'acá ijluhua nacú.

<sup>49</sup> Hue'echú ca'alá queja nu'umajica ijhua'até Tupana ñacaré chu jehuíña'atacana nacú. E'iyonaja uncá ijña'alá nu'umacá rihuacajé. Mari que ila'acá nucá me'etení Tupana puráca'alo lana'aquejami quemacá nunacu que — que rimacá najló.

<sup>50</sup> Ejéchami piyuqueja ra'apiyatéjena ja'apáñaca Jesús. Neñaó reyá.

*Pajluhuaja hualijimaca ñaacó yucuna marí:*

<sup>51</sup> E caja najña'á Jesús. Nápumi chu apú hualijimaca ja'apari najhua'até. A'arumacaji mapíra'aqueja rinacu que ra'apaca nápumi chu. E napatajla ricá.

<sup>52</sup> Napatacá ricá ra'arumacá naquiyá. Aú ja riñaó richiyá a'ajná ño'ojó ma'arumacarú. Ra'arumacámija calé yuriro nacápeje.

*Jesús tára'aco nahuacára'ajeño jimaje yucuna marí:*

(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> E najña'á Jesús sacerdótena huacára'ajeri ojo. Riñacaré chojé sacerdotena huacára'ajeño, ajopana peñahuilana, Tupana puráca'alo nacú jehuíña'atajeño, quele jahuacaño rijhua'até richojé.

<sup>54</sup> E caja Pedro ja'apari juca pani Jesús ápumi chu. Iphari sacerdótena huacára'ajeri ñacaré cópeje. Re riyá'o pají hua'aphena i'imacáño hua'até ja'anapacaje nacú siyá ji'ílá.

<sup>55</sup> Pachu sacerdotena huacára'ajeño i'imaño piyuque judíona huacára'ajeño hua'até. Re napura'ó Jesús nacú, nahue'epícaloje na aú ca rila'acá pu'uhuaré rijluhua i'ímáca, nenócaloje ricá richona penaje. Uncá nahue'epila na aú ca rila'acá pu'uhuaré.

<sup>56</sup> Cajrú ina'uqué pajlaño rinacu. Majopeja nemacá rinacu: "Pu'uhuaré la'ajeri ricá" que. Que'iyapé narucátaca najló ricá; uncá pajluhua chuhuaa calé narucata ricá.

<sup>57</sup> Ne'iyajena pajlaño Jesús nacú majopeja. Nemá najló:

<sup>58</sup> —Marí que ilé ina'uqué quemacá rinacuhúa: "Nucá cajya'atárijla Tupana ñacaré ina'uqué la'acare i'ímáca. Hueji que cala i'imajemi nula'ájla piño rapumí chuhúa ricá. Uncá ina'uqué calé la'acare ri'imajica.

<sup>59</sup> Uncá caja richuhúa calé nemacá rinacu.

<sup>60</sup> Marí caje aú sacerdotena huacára'ajeri tára'aro ne'iyá. Rimá Jesusjlo:

—¿Uncá chi papiyácala pinacajó necá? ¿Meque chi ricá quele nemá nacu? —que rimacá rijló.

<sup>61</sup> Uncá ra'ajipalá rijló. Raú sacerdotena huacára'ajeri quemari piño rijló:

—¿Picá chi picá, quele Tupana huacára'acare majó ina'uqué i'imatájeri penaje? ¿Ilé palani Tupana l'irí huani chi picá?

<sup>62</sup> Jesús quemari rijló:

—A'a, ilé pimíchaca nunacu queja nucá. Ina'uquéjloje penaje i'ímáca nucá. Icó amájeño nucá Tupana ahua'á. Piyuque la'acá Tupana. Rijhua'até nu'umajé ina'uqué huacára'ajeri. Icó amájeño nupa'acó piño majó je'echú chiyá juni suhuáca'ala e'iyohuá —que rimacá rijló.

<sup>63</sup> Marí caje aú sacerdotena huacára'ajeri yúcha'aro íqui'ija huani. A'acuhuaná rijjiyo'otá ra'arumacahua, rimá ajopánajlo:

—Ilé ta puri'icharo pu'uhuaré huani ta Tupana nacú. Uncá na penaje calé huaculá ajopana, nemacáloje huajló na aú ca rila'acá pu'uhuaré penaje.

<sup>64</sup> Caja huemi'ichá méqueca rimíchaca huajló pu'uhuaré huani Tupana nacú. ¿Meque huala'ajica ricá richona? —que rimacá najló.

Raú piyuqueja ina'uqué quemañó rinacu, nenócaloje ricá penaje.

<sup>65</sup> E ne'iyajena atupaño nahui Jesús nacojé. Napára'a rijimá, naña'á ricá. Ejomi nemá rijló:

—¿E pihue'epícajla naca ji'ichaca picá?

Ñaqué caja pají hua'aphena ña'ataca ricá pajimaya nayáte'ela aú.

*Pedro micho'otaca Jesús chaya yucuna marí:*

*(Mt 26.69-75; Lc 22.56-62; Jn 18.15-18, 25-29)*

<sup>66</sup> Marí que nala'acá Jesús ee, Pedro i'imari nañacaré copi ajopana hua'até. E caja apa'ahuelo iphayo nanacu. Sacerdotena huacára'ajeri hua'até sáapajeyo ru'umacá.

<sup>67</sup> Ruphá nanacu, amayo Pedro ja'anapacá. Raú ruyacá'ó richaje. E rumá rijló:

—Nuhue'epí ilé Jesús, Nazaret eyaje, hua'ateje picá.

<sup>68</sup> E'iyonaja Pedro micho'otari richaya, rimá rojló:

—Uncá nomána'apa calé ricá, uncá huani ta nuhue'epila na nacuca pimacá nojló.

E ra'apá ají que corral numaná ejo. Ejéhami capere yaca'acá.

<sup>69</sup> Rejomi romá piño ricá. E rumá re i'ímacánajlo:

—Ilé Jesús, Nazaret eyaje, hua'ateje ricá.

<sup>70</sup> Pedro micho'otari piño richaya. Mequetánaja i'imajemi re i'ímacánó quemañó piño Pédrojlo:

—Rijhua'atájena naquiyana jo'ó picá. Galilea eyaje ricá; reyaje caja picá. Napura'acó rite'eré ehua' que caja pipura'acó. Raú huahue'epí reyájeca picá —que nemacá rijló.

<sup>71</sup> Marí caje aú Pedro quemari najló caphí:

—Nuhuata Tupana huajaca nucá, uncaja que numá quehuaca: Uncá huani ta nomána'apa calé ricá imá nacú nojló.

<sup>72</sup> Ejéhami capere yaca'acá piño. Iyamá pe la'acá. Hua'ató que riphaca Pedro pechu nacojé Jesús quemacare nacú rijló maapami que. Rimá rijló i'ímáca: "Capere yaca'ajica piyá iyamá pe, picá micho'otájeri nuchaya hueji que pe caja."

Marí que riphaca Pedro pechu nacú rema'acá aú capere yaca'acá piño. Aú supejeno riyaca.

## 15

*Najña'acá Jesús Pilato ejo yucuna marí:*

*(Mt 27.1-2, 11-14; Lc 23.1-5; Jn 18.28-38)*

<sup>1</sup> Muní que najme'eté piño. Sacerdotena huacára'ajeño, ajopana peñahuilana, Tupana puráca'alo nacú jehuíña'atajeño, quele jahuacaño piño ajopana judíona huacára'ajeño hua'até. Napura'ó pajhua'atéchaca Jesús nacú. E nepo'otá Jesús a'anapitá panacójéchaca. Ejomi nahuá'a ricá nate'eré eyá huacára'ajeri ejo. Pilato ríi i'ímáca. Rijló na'á ricá.

<sup>2</sup> E Pilato quemari Jesusjlo:

—¿Judíona i'ímacana chi picá?

—A'a, nucá nucá pimacá nunacu queja —que Jesús quemacá rijló.

<sup>3</sup> E sacerdotena huacára'ajeño arucátaño Jesús Pilátujo.

—Cajrú rila'acá pu'uhuaré rijluhua —que nemacá rijló Jesús nacu.

<sup>4</sup> E Pilato quemari piño rijló:

—¿Uncá chi papiyácalaje necá pinacójó? Caja pemi'ichá cajrú narucátaca picá nojló —que rimacá Jesúsjlo.

<sup>5</sup> Uncá Jesús ja'ajipalá rijló. Raú Pilato pechu i'ímari: “¿Na ta chi caji numajlo?”

*Nemá Jesús nacú, nenócaloje ricá penaje. Riyucuna mari:*

*(Mt 27.15-31; Lc 23.13-25; Jn 18.38-19.16)*

<sup>6</sup> Fiesta pascua huacajé queja Pilato jácho'otajica ina'uqué huajáquelana chiyá pajluhuaja ina'uqué. Ricá nahuátajicare, rácho'otaque najló.

<sup>7</sup> Rihuacajé apú i'ímari ina'uqué huajáquelana chu ajopana hua'até. Ríi i'ímari Barrabás. Júpimi que ricá, rijhuáque'ena, quele noño ina'uqué, nenócaco ne'emacana hua'até huacajé.

<sup>8</sup> E caja riphá rená chojé ne'emacánajlo, rácho'otalaloje pajluhuaja ina'uqué huajáquelana chiyá penaje. Aú ajopana iphaño Pilato nacú rijló quemaje.

<sup>9</sup> E Pilato quemari najló:

—¿E ihuátaca nócho'otaca ijló judíona i'ímacana?

<sup>10</sup> Marí que rimacá najló, rihue'epícale chapú sacerdotena huacára'ajeño huo i'ímacá Jesús cha, richá'atacale necá ripechu aú. Naqué i'ímacale najña'á rejo ri'ímacá.

<sup>11</sup> Caja sacerdotena huacára'ajeño ca'átaño ina'uqué e'iyajé pamineco, nemachi Pilátujo, rácho'otalaloje Barrabás najló penaje.

<sup>12</sup> E Pilato quemari najló:

—¿Meque nula'ajica ricá imá nacú: “Judíona i'ímacana ricá”?

<sup>13</sup> Aú nahuíyo'o cajrú, nemá rijló:

—Pihuacára'a rinócana a'ahuaná apiyácanami nacojé jacúhua'ataqueja.

<sup>14</sup> Pilato quemari najló:

—¿Naje ta ihuata rinócana? ¿Na ta chi rila'á pu'uhuaré?

Aú richaje nahuíyo'oca:

—Pihuacára'a racúhua'atacana a'ahuaná apiyácanami nacú —que nahuíyo'oca.

<sup>15</sup> Aú Pilato jácho'otari najló Barrabás, rihuátacale napechu i'ímacá rinacu palá. E rihuacára'a Jesús ña'atácana. Ejomi ra'á suráranajlo ricá, nacúhua'atalaloje ricá a'ahuaná apiyácanami nacojé penaje.

<sup>16</sup> E najña'á Jesús ne'emacana ñacaré cópeje. Re nahuacata piyuque huani surárana re i'ímacaño.

<sup>17</sup> Nala'acáloje namácaja penaje, na'á rinacojé ipirálucuni a'arumacaji. Ne'emacana a'ajicare rinacuhúa caje ri'ímacá na'á rinacu. Nachipúca'ata caja rihuila'aru nacojé tujripi.

<sup>18</sup> Ejomi najalaca ricá.

—Judíona i'ímacana ¿picá? —que nemacá rijló.

<sup>19</sup> Ne'ecá rihuila' isijila ina aú pehuila'aruya. Natupá caja nahui rinacojé, natára'o caja ne'erúpachi aú rijimaje; nacúhua'ata nehuila'aru rijló.

<sup>20</sup> Marí que nala'acá nacátajohua ricá i'ímacá. E naca'á piño ra'arumacá ipirálucuni rinaquiyá. Rejomi na'á piño apú ra'arumacá rinacojé. E najña'á Jesús, nacúhua'atalaloje ricá a'ahuaná apiyácanami nacojé penaje.

*Nacúhua'ataca Jesús a'ahuaná apiyácanami nacojé yucuna mari:*

*(Mt 27.32-44; Lc 23.26-43; Jn 19.17-27)*

<sup>21</sup> Na'apá ají que a'ajná ño'ojó. Re nephata apú ina'uqué, pajmilla yámojo nephácaca rijhua'até. Ríi i'ímari Simón. Sirene eyaje ri'ímacá. Alejandro, Rufo, quele jara'apá ri'ímacá. Ricá nahuacára'a Jesús chaya a'ahuaná apiyácanami huáco'ocana.

<sup>22</sup> E najña'á Jesús ají que rinóquelana ejo. “Ina'uqué huila'arumi aphinami,” que na'ajica ina'uqué nóquelana íi. Napura'acó chu na'á ríi Gólgota que. Rejo najña'á Jesús i'ímacá.

<sup>23</sup> Re na'á Jesusjlo i'iracaje. Cajmú caje jalá amúra'atacanami, pusana caje hua'até quechípa'acanami ri'ímacá. Mirra pusana íi. Na'á rijló ricá, ri'iracáloje ricá penaje. E'iyonaja uncá ri'iralá ricá na'apiyá.

<sup>24-25</sup> E caja ehujaja nacúhua'ata ricá a'ahuaná apiyácanami nacojé ipháqueja itapuhua aú. Pe'iyochami camú jácho'oco ee, nacúhua'ata ricá. Ejomi surárana cátaño nacaje nacú, namácaloje méqueca natamáca'ataca najluhua ra'arumacami penaje.

<sup>26</sup> E nacúhua'ata lana'aquejami Jesús cha. Ricá quemari na chónaca nenoca ricá. Marí que lana'aquejami quemacá rinacu: “Marí Jesús, judíona i'ímacana ricá.”



<sup>27</sup> Rejé caja nacúhua'ata ajopana iyamá. Rahua'á iyáma'ajo pumitá nacúhua'ata necá. Ata'acáchina ne'emacá.

<sup>28</sup> Marí que nacúhua'atacana Jesús rahua'á aú nala'á ricá Tupana puráca'alo lana'aquejami quemacá que. Rimá Jesús nacú: "Uncá ina'uquélaruna naquiyana que namájica ricá."

<sup>29</sup> Rahua'ayá ja'apájicaño la'aqueño namácaya ricá. Nañaca'aque nehuíla'aru rijló, nemá rijló:

—Yee, picá quemaqueri pinacuhúa: "Nucá cajya'atájeri Tupana ñacaré. Hueji que cala i'imagemi nula'ajé piño rapumi chuhúa ricá".

<sup>30</sup> Chuhuata pi'imatá picó. Pihuitúca'a a'ahuaná apiyácacanamí naquiyá —que nemacá Jesúsjo.

<sup>31</sup> Ñaque caja sacerdotena huacára'ajeño, Tupana puráca'alo nacú jehuíña'atajeño, quele la'ajica namácaya Jesús. Nemá pajlocaca:

—¡Meque calé ta ri'imataca ajopana capichácajo liyá i'imacá! Eta ricó uncá meño'ojó ri'imatala!

<sup>32</sup> Ajopana quemañó rinacu: "Tupana huacára'acare majó ina'uqué i'imatájeri penaje ricá. Israélmí chu laquénami huacára'ajeri ricá", que nemacá rinacu. Rihuitúca'ajica ee a'ahuaná apiyácacanamí naquiyá, caphí huapechu i'imajica richojé, ri'imacáloje Hue'ematajeri penaje —que nemacá Jesús nacú.

Ñaque caja ata'acáchina, nacúhua'atacarena Jesús ahua'á, pura'acó pu'uhuaré Jesús nacú.

*Jesús taca'acá yucuna marí:*

*(Mt 27.45-56; Lc 23.44-49; Jn 19.28-30)*

<sup>33</sup> E caja caápu'ucu i'imari nachá. Ejéchami calajeruni, lapí que i'imacá nachá piyuqueja eja'ahuá chu. Caápu'ucu eyá pe'iyochami camú to'ocó quetana ne'emacá calajerúhuaca.

<sup>34</sup> Pe'iyochami camú to'ocó ee, Jesús jahuíyo'ori caphí huani. Napura'acó chu rimá:

—Eloi, Eloi ¿lama sabactani?

Marí que quemacánaca ricá: "Tupana, nupechu i'imacare chojé caphí ¿na penaje piyurí nucá?"

<sup>35</sup> Re i'imacaño jema'año rahuíyo'oca. Aú nemá pajlocaca:

—Jema'á. Ilé huá'ari Tupana puráca'alo ja'apátajeri, Elíasmí chujlo.

<sup>36</sup> Raú pajluhuaja jecho'ótari i'iracaje rijló. Rejata nacaje jamára'apani cajmú caje jalá amúra'atacanami acú. Quéchami repo'ocá ijijila lucupuji nacojé ricá. Ricá aú ra'á rijló ricá, Jesús i'iracáloje re'iyayá ricá penaje. Rimá ajopánajlo:

—Huahuátaco pamíneco, huamáijla, apala Elíasmí chu, iphájeri rihuitúca'ataje.

<sup>37</sup> E Jesús jahuíyo'ori piño caphí huani caja penaje. Ejé ritaca'á.

<sup>38</sup> Hua'ató que caja a'arumacaji, Tupana ñacaré chu cúhua'aco, jiyi'ocó pe'iyohuá paliyácaca. Apalá acapú penaje que ri'imacá. Rijiyó'ó yenuya ají que cahuacaje. Caja iyamá que riyurico.

<sup>39</sup> Caja Jesús taca'arí. Rijimaje surárana huacára'ajeri tára'aro. Romano naquiyana ri'imacá. Cien ríle'ejena surárana i'imacá. Ricá jema'arí Jesús jahuíyo'oca; ramá caja ritaca'acá. E rimá:

—Tupana i'irí jo'ó quele táqui'ichari.

<sup>40</sup> Cajrú inaana i'imacá a'ajnare que. Júcayaja nayacá'o rejo. Nanaquiyana i'imaño María Magdalena, Salomé, María, quele. Apa'ahuelo ru'umacá María. Santiago, José, quele jaló ru'umacá. José i'imari rijmeremi.

<sup>41</sup> Necá inaana a'aqueño Jesús ñaté Galilea te'eré e ri'imaqué huacajé. Necá caja i'ijnáño rijhua'até Jerusalén ejo i'imacá. Necá penájenami i'imaño re cajrú ajopana inaana hua'até.

*Nato'otaca Jesús tami támijimi to'otáquelana chojé yucuna marí:*

*(Mt 27.57-61; Lc 23.50-56; Jn 19.38-42)*

<sup>42</sup> E caja najúhua'a. A'ajnejí lamá'atacana huacajé e'iyá ne'emacá. Muní que nale'eje huatána'acaje huacajé i'imacá.

<sup>43</sup> Ñaquele José i'ijnari Pilato, nahuacára'ajeri, amaje. Arimatea eyaje José i'imacá. Rihue'epí Tupana i'imajica ina'uqué naquiyana huacára'ajeri penaje. Aú ri'imá rihuátacana nacú. Ricá José i'ijnari Pilato chaje Jesús tami quejá'aje rilíyá, rito'otácaloje ritami támijimi to'otáquelana chojé penaje. E riphá rinacu. Riquejá'a rilíyá Jesús tami.

<sup>44</sup> Raú Pilato pechu i'imá: "¿Caja chí ritaquí'ichá?" E rihuá'a surárana huacára'ajeri maná. E caja riphá rinacu. E Pilato quemari rijló:

—¿Caja chí ritaquí'ichá?

<sup>45</sup> Surárana huacára'ajeri quemari rijló:

—A'a, caja ritaquí'ichá.

Aú Pilato yuriri Josejlo Jesús tami, rijña'acáloje ricá penaje.

<sup>46</sup> E José i'ijnari palá nojé a'arumacaji huarúhua'aje. Rihuarúhua'aca ricá ejomi ripa'ó Jesús tami huitúca'ataje. E ripila'á a'arumacaji ritami nacuhúá. Ejomi rijña'á ritami támijimi to'otáquelana ejo. Rito'otá ritami richojé. Jipa ichácanami ri'imacá. Ricá chojé rito'otá ritami. Caja penaje ratatá cajruni jipa rinumanaje. Raú ritá rinumaná.

<sup>47</sup> Eyá a'ajnare que María Magdalena, María José jaló, quele huojítaño ricá, namácaloje mérejecca rito'otaca ritami penaje.

## 16

*Jesús macápo'oco yucuna marí:*

(Mt 28.1-10; Lc 24.1-12; Jn 20.1-10)

<sup>1</sup> Caja nale'ejé huatána'acaje huacajé ja'apari i'imacá. Caja najúhua'a. Aú María Magdalena, Salomé, María, Santiago jaló ru'umacá, quele i'ijñaño pusana huarúhua'aje. Pu'umé jamarí pusana i'imacá. Naca'acáloje ricá Jesús tami nacojé penaje nahuarúhua'a ricá.

<sup>2</sup> E caja sápacaje queño'ocó huacajé lapiyami, huajé camú jeño'ocá ee, ne'ejná ritami i'imacá ejo.

<sup>3</sup> Ne'ejnacá ehúa nemá pajlocaca:

—¿Na jatatájeri huajló jipa támijimi numaná eyá?

<sup>4</sup> E nayacá'o rejo jucaya. Amaño caja jipa i'imacá jatatáquejami. Imujulá nojé ri'imacá.

<sup>5</sup> Nephá rejo. E namujlúca'a ulahuí chojé, amaño pajluhuaja hualijímaca yá'aco ritami nato'otácare pucunami chu. Ca'aña ejo pumitá riyá'o. Je'echú chiyaje ri'imacá. Jareni, huaphereni ra'arumacá i'imacá. Namaca ricá aú naquero'ó.

<sup>6</sup> E rimá najló:

—Iquero'onioy nupiyá. Nuhue'epí i'ijichaca majó Jesús, Nazaret eyaje, tami amaje. Ricá nacúhua'atacare a'huana' apiyácanami naquiyá i'imacá, ricá iculá. Uncá ri'imalá maare. Caja rimacápo'ocho. Iyacá'o, amachi meñaru rapucunami —que rimacá najló.

<sup>7</sup> Rimá piño najló:

—Chuhua ipa'ó, i'imichachi riyucuna ra'apiyatéjenajlo. Marí que imájica rinacu najló, Pédrojlo hua'até: “Caja ri'ijichá itucumá Galilea ejo. Rejo amaje ricá, rimacá ijló i'imacá que”. Marí que imájica najló —que rimacá najló.

—Je —que nemacá.

<sup>8</sup> E nácho'o ulahuí chiyá. Quero'ocajo nacú cajrú nacurúca'aca. Ñaquele neñaó reyá. Uncá ne'emalá riyucuna ajopánajlo na'apaca ehúa, naquero'ocó a'acuhuaná.

*Jesús ya'ataró María Magdalénajlo yucuna marí:*

(Jn 20.11-18)

<sup>9</sup> Sápacaje queño'ocó huacajé, jareni jácho'oco ee, Jesús macápo'oro liri chiyá i'imacá. Pamineco huani riyá'ató María Magdalénajlo. Ro'iyayá rica'á iyamá cuhuá'ata quele jiñana pechu i'imacá. Rojló riyá'ató pamineco i'imacá.

<sup>10</sup> Riyá'atacó rojló ejomi ru'ujná riyucuna i'imajé Jesús ja'apiyatéjenajlo. Necá amaño chapú caje yajhué Jesús taca'añácale necá. Cajrú neyaca ricá, e'iyá ruphá nanacu riyucuna i'imajé najló.

<sup>11</sup> Rumá najló:

—Caja rimacápo'ocho, nomicha ricá —que rumacá najló.

E'iyonaja uncá nema'alá ro'opiyá.

*Jesús ya'atacó iyamá ajopánajlo yucuna marí:*

(Lc 24.13-35)

<sup>12</sup> Ya'ajná Jesús ya'ataró piño iyamá ajopánajlo, pu'uteni e'iyohuá nachira'acó ee.

<sup>13</sup> Rejomi necá caja pa'año piño napumi chuhúá riyucuna i'imajé nanaquiyánajlo. E'iyonaja uncá caja nema'alá na'apiyá.

*Jesús a'acá ra'apiyatéjena ripuráca'alo ja'apátajeño penaje yucuna marí:*

(Mt 28.16-20; Lc 24.36-49; Jn 20.19-23)

<sup>14</sup> Pajluhua iphata ji'imaji nacojé quele ra'apiyatéjena i'imaño na'ajnehuá ajñacana nacú. Rejé riyá'ató piño najló, raca'á necá. Uncá pachá nema'alá ajopana ja'apiyá, amaño ri'imacá rimacápo'oco ejomi.

<sup>15</sup> E rimá najló:

—Tupana i'imatari ina'uqué capichácajo liyá. Eco i'ijná ajopana te'eré ejo, ajopana te'eré ejo que riyucuna i'imajé najló.

<sup>16</sup> Tupana i'imatájeri necá, jema'ajeño ra'apiyá. Nema'ajica ra'apiyá ejomi nala'ajé necá bautizar. Eyá necá, uncá jema'alaño ra'apiyá, Tupana huajájeri necá.

<sup>17</sup> Marí que no'opiyá jema'ajeño la'ajica nacaje nahue'epéjona penaje: Nupuráca'alo aú naca'ajé jiñana pechu ina'uqué e'iyayá. Napura'ajó me'echuje puráca'aloji chu, uncá nema'alare chu napura'ajico.

<sup>18</sup> Napatájica ee jeína puhuiruna i'imajícaño, uncá meque nala'alajo raú. Ne'eraje ca'ajná nacaje jalá puhuini, uncá caja meque nala'alajo raú. Nato'otaje nayáte'ela natámina nacú. Raú natejmo'otajo —que rimacá najló.

*Jesús jácho'oco je'echú chojé yucuna marí:  
(Lc 24.50-53)*

<sup>19</sup> Marí que Nahuacára'ajeri Jesús quemacá najló. Ejomi Tupana huá'ari ricá ají que je'echú chojé. Palá Tupana pechu rinacu. Tupana hua'atéjena Huacára'ajeri ricá rijhua'até re.

<sup>20</sup> E caja ra'apiyatéjena i'ijnaqueño apú eyá, apú eyá que riyucuna i'imajé ajopánajlo. Tupana i'imataca ina'uqué capichácajo liyá Jesucristo palamane aú, yucuna ne'emaqué najló. Nahuacára'ajeri Jesucristo a'aqueri nañaté nacaje la'acana aú. Raú calé nala'aqué nacaje uncá meño'ojó iná la'alare caje. Nená que'ená penaje ri'imaqué. Raú ajopana hue'epíqueño quehuácaca napuráca'alo i'imajica. Caja quetana riyucuna.

## SAN LUCAS

*San Lucas lana'ari Jesucristo yucuna papera chojé marí que i'imacá:*

<sup>1</sup> Eco palá pijló, Teófilojo:

Cajrú ina'uqué maárohua huátaño Jesucristo yucuna lana'acana papera chojé. Maárohua hue'iyohuá ri'imajica huacajé yucuna nahuata lana'acana papera chojé palá.

<sup>2</sup> Piyuqueja nacaje rila'ajicare caje amájeño, necá i'imaqueño riyucuna najló i'imajica. Aú nalana'á papera chojé riyucuna i'imacá. Jesucristo queño'ocá risápaca'ala la'acana huacajé ne'emá rijhua'até. Piyuque nacaje rehuíña'atajicare nacú necá nema'aque ra'apiyá. Necá penájenami ja'apátaqueño riyucuna ajopánajlo, ajopánajlo que. Huajló hua'ató piyuqueja na'apátaque riyucuna.

<sup>3</sup> Eyá nucá piño quejá'ari palá riyucuna ajopana ina'uqué liyá i'imacá. Piyuqueja riyucuna nuquejá'a palá, rijyuhucami yucuna hua'ató.

<sup>4</sup> Ñaquele, Teófilo, nuhuata riyucuna lana'acana piyuqueja palá pijló, pihue'epícaloje palá quehuácage puráca'aloji nacojé raú penaje. Caja nohuíña'ata picá rinacu i'imacá, pihue'epícaloje rinacojé palá raú penaje.

*Tupana hua'atéjeri, je'echú chiyaje, i'ijnacá Zacarías chaje yucuna marí:*

<sup>5</sup> Herodes i'imacá judíona i'imacana huacajé, apú sacerdote i'imari. Ríi i'imari Zacarías. Sacerdótena íi i'imari Abías. Nanaquiyana caja ri'imacá. Riyajalo íi i'imari Elisabet. Júpimi que Aaronmi chu i'imacá sacerdote. Rilaquénami naquiyana ru'umacá.

<sup>6</sup> Palá Tupana pechu i'imajica Zacarías nacú riyajalo nacú hua'até. Nema'aque Tupana ja'apiyá palá. Piyuque ripuráca'alo lana'aquejami quemacá que nala'ajicano i'imajica. Aú calé uncá meño'ojó ajopana ina'uqué quemalá nanacu: "Pu'uhuaré la'ajeño necá", que.

<sup>7</sup> Uncá nayani i'imalá, mehuacú riyajalo i'imacale. Rihuacajé caja peñahuilana huani ne'emacá.

<sup>8</sup> Zacarías i'imari sacerdote. Risápaca'ala rila'aque Tupánajlo. Pajehuémichaca nala'ajica ricá ajopana hua'até. Ñaquele rihuacajé ricá, rijhua'aque'ena, quele la'año ricá.

<sup>9</sup> Tupana ñacaré chu ne'emá. E caja nahuacára'a rimujlúca'aca ucapú chojé, ricára'acaloje a'ahuaná icá reyá i'imajemi penaje.

<sup>10</sup> Ricára'aca a'ahuaná icá quetánaja ajopana ina'uqué pura'acó Tupana hua'até apalá ucapú chu.

<sup>11</sup> E'iyohuá queja Tupana hua'atéjeri, je'echú chiyaje, ya'atacó Zacaríaslo i'imacá. Re mesa caje i'imari. Jipa naquiyá la'acanamí ri'imacá. Ricá nacú nacára'aque a'ahuaná icá. Ca'añá chojó pitá mesa nacojé, Tupana hua'atéjeri, je'echú chiyaje, iphari.

<sup>12</sup> E Zacarías amari ritára'aco. Rinacojé ripechu capicháñari risápaca'ala, cajrú huani riquero'ocole.

<sup>13</sup> Ejéchami Tupana hua'atéjeri, je'echú chiyaje, pura'acó rijhua'até. Rimá rijló:

—Zacarías, piquero'oniyó, Tupana jema'arí pipura'acó rijhua'até. Chuhua ra'ajica piñaté. Marí que ri'imajica pijló: Ilerú piyajalo huá'ajeyo ru'urí. Ñaquele pa'ajé rií Juan.

<sup>14</sup> Pu'ují huani pipechu i'imajica rimoto'ojica aú. Ñaquele caja cajrú ajopana pechu i'imajica pu'ují raú.

<sup>15</sup> Palá huani Tupana pechu i'imajica pi'irí nacú. Uncá ri'iralaje nacaje jalá amúra'atacanami. Tupana Pechu i'imajeri re'iyá rimoto'ojica ejéchami.

<sup>16</sup> Ri'imajé Tupana yucuna cajrú Israelmi chu laquénamijlo, napajno'otácaloje napéchuhua Tupana ejo raú penaje, nahue'epícaloje piño Tupana raú penaje. Iná huacára'ajeri huani ricá.

<sup>17</sup> Ricá Tupana huacára'ajicare ina'uqué i'imatájeri penaje, tucumá ra'apátaje Tupana puráca'alo ina'unquejlo. Caphí Elíasmi chu pechu i'imajica Tupana puráca'alo ja'apátacana nacú ina'unquejlo. Ricá pechu i'imacá que caja pi'irí pechu i'imajica ra'apátacana nacú. Ra'apátaje ina'unquejlo Tupana puráca'alo, nayani pechu pala'acóloje nachí'iná hua'até raú penaje. Uncá jema'alaño Tupana ja'apiyá, jema'acáloje Tupana ja'apiyá penaje ri'imajé ina'unquejlo riyucuna —que Tupana hua'atéjeri, je'echú chiyaje, quemacá Zacaríaslo i'imacá.

<sup>18</sup> E Zacarías quemari rijló:

—¿Na aú chí nuhue'epeje quele pimíchaca nojló? Phíyu'uque huani nucá, phíyu'uqueru caja nuyajalo. Uncá meño'ojó huayani i'imalá.

<sup>19</sup> Aú Tupana hua'atéjeri quemari rijló:

—Gabriel, Tupana hua'atéjeri nucá. Ricá huacári'ichari nucá majó pichaje, nu'umacáloje pijló riyucuna penaje. Palani huani riyucuna.

<sup>20</sup> Uncá pachá pema'alá nupuráca'alo no'opiyá, pi'imajé manumarú a'ajná pi'irí moto'ojica ejená. Numíchaca pijló queja pi'irí i'imajica. Riphájica rená chojé huacajé pi'irí moto'ojeri —que Tupana hua'atéjeri, je'echú chiyaje, quemacá rijló.

<sup>21</sup> Je'echú chiyaje pura'acó Zacarías hua'até quetana ajopana ina'uqué huátaca ricá. Apalá chu ne'emá. Napechu i'imá: “¿Na rila'alá júpija huani richu.”

<sup>22</sup> E caja ehujaja Zacarías jácho'oro richiyá. Reyá a'ajná ño'ojó uncá meño'ojó ripura'aló. Riyáte'ela aú ja ripura'ó najhua'até, manumarú ri'imacale. Raú nemá rinacu:

—Nápaja ca'ajná ya'achiyaro rijló ucapú chu, li'ichari ricá ají que —que nemacá.

<sup>23</sup> E caja riphá rená chojé, apú sápacaloje Tupana ñacaré chu rapumí chojé penaje. Aú ripa'ó riñacaré ejo.

<sup>24</sup> E caja riyajalo i'imayo canupá. Aú caja uncá rócho'olo ñañacaré chiyá pajluhua té'ela queta queri quetana.

<sup>25</sup> Pu'ují rupechu i'imacá, canupá ru'umacale. Rumá: “Caja marí que Tupana la'acá nucá palá, ajopana ina'uqué iphácaloje no'opí raú penaje. Uncá nephala no'opí mehuacú nu'umaqué huacajé.”

*Tupana hua'atéjeri, je'echú chiyaje, i'ijnari María chaje, ri'imacáloje Jesús moto'ocáyucuna rojló penaje. Riyucuna marí:*

<sup>26</sup> Elisabet i'imacá canupá pajluhua cuhuá'ata queta queri quetana huacajé, Tupana huacára'ari ricaja caja Gabriel je'echú chiyá pajimila Nazaret ejo. Galilea te'eré nacú ricá pajimila.

<sup>27</sup> Rejo Tupana huacára'ari ricá María chaje. Inaya jo'ó María i'imacá rihuacajé. Uncá jo'ó ruhuá'acalo rihuacajé i'imacá. Napura'ó rinacu José hua'até, nahuá'acacoloje pajhua'atéchaca penaje. José i'imari Davidmi chu laquénami naquiyana. Júpimi que Davidmi chu i'imacá ne'emacana.

<sup>28</sup> E caja Tupana hua'atéjeri, je'echú chiyaje, iphari María nacú. Rimá rojló:

—Pajalácaje nu'ujichá majó. Palá huani Tupana pechu pinacu. Piñaté a'ajeri ricá. Palá huani caja Tupana la'ajica picá. Ajopana inaana chaje huani rila'acá picá palá —que rimacá Maríajlo.

<sup>29</sup> Marí que rimacá aú rojló rupechu i'imá: “¿Meque chi caji rimíchaca nacú nojló? ¿Naje chi rimicha nojló a'ajná que huani?”

<sup>30</sup> E Tupana hua'atéjeri quemari piño rojló:

—María, pihue'epíniya pijluhua, palá Tupana pechu pinacu.

<sup>31</sup> Chuhuaca canupá pi'imajica, pi'irí i'imajeri achiñá. Eco pa'á ríí Jesús.

<sup>32</sup> Palá huani rila'ajica íqui'iruna ina'uqué nacú. Nemaje rinacu: “Tupana l'irí ricá” que. “Ajopana chaje huani huacára'ajeri i'irí ricá”, que nemájica rinacu. Tupana a'ajeri ricá ne'emacana penaje, Davidmi chu i'imacá ne'emacana, que caja ri'imacáloje penaje.

<sup>33</sup> Israelmi chu laquénami huacára'ajeri ri'imajica. Uncá ritajnálajo i'imajica, uncá rácho'olajo richiyá —que rimacá rojló.

<sup>34</sup> Eyá rumá rijló:

—¿Meque ca'ajná pimíchaca nojló? Uncá jo'ó nu'umalá achiñá hua'até.

<sup>35</sup> Rimá rojló:

—Tupana Pechu i'imajeri pijhua'até. Ricá queñótajeri pi'irí pihuo'ó chu. Marí caje aú pi'irí i'imajeri Tupana l'irí.

<sup>36</sup> Ñaqué caja pe'ehueló Elisabet i'irí i'imajica. “Mehuacú rucá” que nemacá runacu i'imacá. E'iyonaja caja canupá rucá. Pajluhua cuhuá'ata queta queri cha rucá me'etení. Phíyu'uquero huani rucá, e'iyonaja canupá rucá Tupana palamane.

<sup>37</sup> Tupana hue'epiri piyuque huani nacaje la'acana —que rimacá rojló.

<sup>38</sup> —Ñaqué ricá —que María quemacá rijló—. Pimíchaca que nojló queja ri'imajica nojló. Tupana huátaca que la'ajeyo nacú.

Marí cajé aú Tupana hua'atéjeri, je'echú chiyaje, pa'aró piño je'echú chojé.

*María i'ijnayo Elisabetmi cholo chaje yucuna marí:*

<sup>39</sup> E caja María i'ijnayo tu'ujné ají que apú pajimila ejo. Judea te'eré nacú, yenuri e'iyohuá pajimila i'imacá, ejo ru'ujná.

<sup>40</sup> Rughá rejo, rumujlúca'a Zacarías ñacaré chojé. E rojalaca Elisabet.

<sup>41</sup> Raú ru'urí ñani cahuitari rohuó chu. Tupana Pechu i'imari rujhua'até cajrú i'imacá.

<sup>42</sup> Raú caphí rumacá Maríajlo:

—Tupana la'arí picá palá. Ajopana inaana chaje huani rila'acá picá palá. Ñaqué caja rila'ajica pi'irí i'imajicare palá huani.

<sup>43</sup> Nuhuacára'ajeri jaló penájeru picá. ¡Meque palá huani pili'ichaca nucá majó nuchaje i'ijnacana aú!

<sup>44</sup> Pajaláquichaca nucá aú, nu'urí ñani cahuichíyari nohuó chu, pu'ují ripechu i'imichácale —que Elisabet quemacá Maríaajo.

<sup>45</sup> Rumá piño rojló:

—Pa'acale pinacójo Tupana puráca'alo, rimacare pinacu i'imacá, pu'ují pipechu la'acó raú. Huahuacára'ajeri Tupana quemacá pinacu queja ri'imajica pijló.

<sup>46</sup> María quemayo rojló:

—Pu'ují huani nupechu Tupana nacú,

<sup>47</sup> ri'imatájicale nucá capichácajo liyá.

<sup>48</sup> Palá nupechu, rihue'epícale nucá.

Majopéjaru queja nucá.

Rijló sápaeyo nucá.

Chuhua ina'uqué quemájica nunacu:

“Meque palá huani Tupana la'acá rucá” que.

<sup>49</sup> Palá huani jo'ó Tupana la'acá nucá.

Tupana hue'epiri piyuqueja nacaje la'acana palá.

Palani huani ricá.

Uncá meño'ojó rila'alá pu'uhuaré.

<sup>50</sup> Rihue'epí piyuque ra'apí iphájeño mu'ují ñaqueja.

<sup>51</sup> Piyuque huani la'ajeri ricá.

Re ina'uqué naquiyana, íqui'i nala'acá necó hue'epiño que huani.

Necá pechu rapichata, nala'acá piyá nahuátaca que —que rumacá—.

<sup>52</sup> Nahuacára'ajeño huani rácho'otaje ne'emacana caje chiyá.

Ajopana ja'apejé i'imajícaño rila'ajé palá.

<sup>53</sup> Ña'ajeño me'epeji panácujlo ra'ajé nacaje palani.

Cajrú le'ejepeláruna rihuacára'aje a'ajná ño'ojó majopeja. Uncá na i'imalaje nacapi.

<sup>54</sup> Tupana le'ejena ina'uqué Israelmi chu laquénami.

Necá ñaté ra'ajé, rihue'epícale namu'ují.

<sup>55</sup> Tupana hue'epiri namu'ují rimacá que najló i'imacá.

Uncá riyurila Abrahami chu mu'ují hue'epicana i'imacá.

Ñaque caja rihue'epíca rilaquénami mu'ují piño —que María quemacá Tupana nacú.

<sup>56</sup> María yuriyo Elisabet hua'até hueji queta queri quetana. Quéchami rupa'acó piño ropumi chuhua.

*Juan Bautizar la'ajeri moto'ocá yucuna marí:*

<sup>57</sup> E caja Elisabet iphayo roná chojé, ru'urí moto'ocáloje penaje. Ejéchami caja ruhua'a ru'urí.

<sup>58</sup> Pu'ují nañacaré ahua'á i'imacaño, nejena, cajena pechu la'acó raú, Tupana la'acale palá huani rucá. Aú ne'ejná ruchaje ruyáješana la'ajé.

<sup>59</sup> E caja hueji que cuhua'ata que cala i'imajemi rimoto'ocá ejomi ne'ejná queráco'ope chu'uhuere chinuma mata'ajé. Nahuata ríi a'acana rara'apá íi que caja.

<sup>60</sup> E'iyonaja raló quemayo najló:

—Uncá hua'alaje rara'apá íi ríi. Hua'ajé ríi Juan.

<sup>61</sup> E nemá rojló:

—¿Naje chí pa'á ríi Juan? Uncá pejena naquiyana íi i'imalá Juan —que nemacá rojló.

<sup>62</sup> Ejéchami naca'acá nayáte'ela queráco'ope jara'apajlo, namácaloje naca ra'acá ríi penaje.

<sup>63</sup> Raú riquejá'a naliyá papera, riyá'atacaloje najló ríi richojé penaje. E caja riyá'ata najló: ríi Juan. Aú ajopana pechu i'imá: “¿Meque chí ricá caje?”

<sup>64</sup> Ejéchami Zacarías lená huicho'ocó, ripura'acóloje penaje. E palá huani ripura'acó Tupana nacú.

<sup>65</sup> Raú rahua'á ñacaré i'imacaño quero'oño. Marí caje ejomi Juan moto'ocá yucuna jema'aró cajrú rehua. Judea te'eré ehuájena, yenuri e'iyohuá i'imacaño, necá piyuqueja jema'año caja riyucuna.

<sup>66</sup> Piyuque riyucuna jema'ajeño i'ijnataño napéchuhua rinacu cajrú. Nemá pajlocaca: “¿Méqueca penaje rimoto'ó quele queráco'ope?” Que nemacá rinacu, nahue'epícale Tupana a'ajica riñaté cajrú huani.

*Zacarías pura'acó palá Tupana nacú yucuna marí:*

<sup>67</sup> Tupana Pechu i'imari queráco'ope jara'apá, Zacarías hua'até cajrú. Tupana huacára'aca ripuráca'alo que ripura'acó. Aú marí que rimacá:

<sup>68</sup> Palani Tupana. Israelmi chu laquénami huacára'ajeri ricá.

Rile'ejena ina'uqué caja huecá.

Huachi'ináricana caja ricá.

Chuhua ri'imatájica huecá capichácajo liyá.

<sup>69</sup> Ra'ajé huajló pajluhua ja ina'uqué hue'ematájeri penaje.

Piyuque la'ajeri ri'imajica.

Davidmi chu la'aqueri Tupana huátajica que.

Rilaquemi ri'imajica.

<sup>70</sup> Riyucuna Tupana i'imaqueri ripuráca'alo ja'apátajeñomi chúnajlo júpimi que.

<sup>71</sup> Rimá najló huanacu marí que i'imacá:

“Nu'umataje necá napinana liyá.

Chapú péchuruna nanacu liyá hua'ató nu'umataje necá,” que rimacá huanacu i'imacá.

<sup>72</sup> Rimá caja huachi'inami chuna nacú marí que i'imacá: “Nuhue'epeje imu'ují. Uncá mapéchuru calé nucá numacare ijló nacú. No'ojé iñaté,” que rimacá najló.

<sup>73</sup> Rimá caja hua'ajútami chu, Abrahami chujlo nacaje rila'ajícare nacú.

<sup>74</sup> Rijló rimá huanacu i'imacá, ri'imatácaloje huecá huapinana liyá penaje. Raú huala'ajé nacaje rijló. Uncá hue'emalaje quero'ocajo nacú raú.

<sup>75</sup> Marí que rila'ajica huecá palá, rihuátaca que la'acaño hue'emacáloje raú penaje.

Palá la'ajeño hue'emajica raú, hue'emajica quietana.

Marí que la'ajícáno hue'emajica palá raú, que Zacarías quemacá Tupana nacú.

<sup>76</sup> Ejomi Zacarías quemari marí que ri'iri ñanijlo i'imacá:

—Nu'urí ñani, picá i'imajeri Tupana puráca'alo ja'apátajeri penaje.

Ajopana huacára'ajeño huacára'ajeri, Tupana.

Ricá puráca'alo ja'apátajeri pi'imajé.

Picá i'ijnajeri Huahuacára'ajeri huani tucumá riyucuna i'imajé ina'unquejlo, napala'atácaloje napéchuhua pu'uhuaré nala'acare liyá ripé penaje.

<sup>77</sup> Pi'imajé riyucuna ina'unquejlo, huahue'epícaloje Tupana amaco huachaje pu'uhuaré huala'acare, huamanaicho huala'acare liyá penaje.

Marí caje aú hue'emacáloje capichácajo liyá penaje.

<sup>78</sup> Tupana huajhuena huani ina'uqué piyuqueja.

Ñaquele rihue'epí huamu'ují.

Ñaque i'imacale huajé chuhúa hue'emajica maare eyá a'ajná ño'ojó.

<sup>79</sup> Uncá meño'ojó ina'uqué i'imatala necó capichácajo liyá.

Chuhua nahue'epíjica re apú Ne'ematájeri penaje.

Ricá caja la'ajeri huapechu palá, hue'emacáloje palá pajhua'atéchaca ripalamana aú penaje —que Zacarías quemacá Tupana Pechu ja'apiyá que.

<sup>80</sup> Eyá ricá queráco'ope tahuá'aro i'imacá. Ehuá riñapaca tahuá'acajo. Cajrú ripechu i'imacá rijluhua. Pu'uteni meñaru chuja ri'imaqué. Ehuá riphaca rená chojé i'imacá, ra'apátacaloje Tupana puráca'alo yucuna ajopana ina'unquejlo penaje. Quetánaja ri'imacá pu'uteni meñaru chu.

## 2

*Jesús moto'ocá yucuna marí:*

*(Mt 1.18-25)*

<sup>1</sup> Jesús moto'ocá huacajé nahuacára'ajeri huani íi i'imari Augusto. Ricá huacára'ari ina'uqué lapa'atácana piyuqueja.

<sup>2</sup> Apú piño i'imari Siria te'eré eyájena huacára'ajeri i'imacá. Ríi i'imari Cirenio. Ri'imacá nahuacára'ajeri huacajé naqueño'ó piyuque ina'uqué lapa'atácana.

<sup>3</sup> Raú pajluhuano que napa'acó nachí'inami chuna ñacajelami ojo, nayá'atocaloje neí papera chojé penaje.

<sup>4</sup> Aú José jácho'oro pajimila Nazaret eyá. Galilea te'eré nacú Nazaret. Reyá ri'ijná ají que ya'ajnaje Judea te'eré ojo; iphari pajimila Belén ojo. Re ne'emacana, Davidmi chu, moto'orí i'imacá. Rilaquénami naquiyana José i'imacá. Ñaquele José i'ijnari Belén ojo i'imacá.

<sup>5</sup> José iphari rejo María, riyajalo penaje i'imacayo hua'até. Canupá ru'umacá i'ijnayo rijhua'até, nayá'atocaloje neí papera chojé penaje.

<sup>6</sup> Belén e ne'emacá ee María iphayo roná chojé i'imacá, ruhuá'acaloje ru'urí penaje.

<sup>7</sup> Re ru'urí moto'orí. I'imari ru'urí, pamineco huani ri'imacá. E ropo'otá ricá ñani ritóca'aru aú. Ejomi roto'otá ricá pirajina a'ajné a'acuná chojé. Pirajina ñacarelana chuja nayuró, uncale napucuna i'imalá, nacamatácaloje pají chu penaje.

*Tupana hua'atájena, je'echú chiyájena, ya'atacó ohuéjana hua'aphé i'imacáñojlo yucuna marí:*

<sup>8</sup> Belén ahua'á ajopana i'imaño pu'uteni chu lapí. Ohuéjana hua'aphé i'imacáño ne'emacá.

<sup>9</sup> E mana'í chiyó pajluhua ja Tupana hua'atájeri, je'echú chiyaje, ya'atacó najló. Hua'ató que cajrú camareji patacá nanacójé. Cajrú naquero'ocó raú.

<sup>10</sup> E rimá najló:

—Iguero'oniyo. Palani yucu nupháchiya majó ijló, piyuqueja ina'uqué pechu i'imacáloje pu'ují raú penaje.

<sup>11</sup> Huajé queráco'ope moto'ochaca Belén e. Davidmi chu ñacajelami ricá pajimila Belén. Ina'uqué huacára'ajeri huani penaje ricá moto'ochari huajé. Tupana huacári'ichari ricá majó ina'uqué i'imatájeri penaje.

<sup>12</sup> Mari que amájica ricá: Pirajina a'ajné a'acuná chu rito'ojó jepo'otácanami ritóca'aru aú. Pu'uhucá amájica ricá mari que, ihue'epeje ricá numacare nacú ijló —que Tupana hua'atéjeri, je'echú chiyaje, quemacá najló.

<sup>13</sup> Rejéchami caja cajrú ajopana Tupana hua'atéjena ya'atacá najló. Ají que je'echú chiyá nahuitúca'aca apú ahua'ajé. E palá huani napura'acó Tupana nacú. Nemá najló:

<sup>14</sup> ¡Palani huani nacaje Tupana la'acare!

Yenú, je'echú chu, ricá Tupana.

Ina'uqué, marí eja'ahuá chu i'imacaño, pu'ují ripechu i'imacárena nacú, necá i'imajeño palá pajhua'atéchaca, que nemacá Tupana nacú najló.

<sup>15</sup> Ejomi Tupana hua'atéjena pa'año napumí chuhua' je'echú chojé. E caja ohuéjana hua'aphé i'imacaño quemano pajlocaca:

—I'ijná hue'ejnachí Belén ejo, huamíchajla méqueca ricá Huahuacára'ajeri quemíchaje nacú.

—Je —que.

<sup>16</sup> Aú ne'ejná peyajhué rejo, iphaño nanacu, amaño María, José, quele re. Namá caja queráco'ope ñani to'ocó pirajina a'ajné a'acuná chu.

<sup>17</sup> Namá ricá. Ejomi ne'emá queráco'ope yucuna najló Tupana hua'atéjeri, je'echú chiyaje, quemacá najló i'imacá que.

<sup>18</sup> Riyucuna jema'ajeño pechu nacú ri'imá: “¡Meque piyuque huani Tupana la'acá!”

<sup>19</sup> María pechu nacuja ri'imá nemácare nacú.

<sup>20</sup> E caja ohuéjana hua'aphé i'imacaño pa'año piño napumí chuhua'. Palá huani napura'acó Tupana nacú, namácale Tupana í'irí i'imacá. Tupana hua'atéjeri quemacá najló i'imacá queja caja namaca ri'imacá. Namá caja Tupana hua'atéjena, je'echú chiyájena. Aú napura'ó Tupana nacú palá.

*Nahuá'aca Jesús yuhuacami Tupana ñacaré ejo yucuna marí:*

<sup>21</sup> Hueji que cuhuá'ata que cala ne'emacá queráco'ope moto'ocá ejomi namata'á rich-inuma. Na'á ríi Jesús. Caja Tupana hua'atéjeri, je'echú chiyaje, quemari María'ajlo uncá chiyó rimoto'ó: “Eco pa'á ríi Jesús” que.

<sup>22</sup> E caja riphá rená chojé, José, riyajalo María, quele la'acáloje Moisesmi chu puráca'almi quemacá que penaje, ne'emacáloje lamá'ataqueja Tupánajlo raú penaje. Aú ne'ejná Jerusalén ejo. Nahuá'a queráco'ope najhua'ató, na'acáloje Tupánajlo ricá re penaje.

<sup>23</sup> Tupana puráca'alo lana'aquejami quemari queráco'opena chí'iná nacú, na'acáloje Tupánajlo naqueráco'opetena, achíñana, pamineco moto'ocaño penaje, ne'emacáloje Tupánajlo penaje. Aú calé ne'ejná rejo mari que la'ajé.

<sup>24</sup> Ne'ejná caja nacaje a'ajé Tupánajlo. Ripuráca'alo lana'aquejami quemari caja huajé í'irí moto'ocaño chí'iná nacú, na'acáloje iyamá ucu'ucúrina, iyamá caja túcu'uchina hua'até Tupánajlo penaje. Mari que la'ajé penaje ne'ejná rejo.

<sup>25</sup> Re apú ina'uqué i'imari Jerusalén e. Ríi i'imari Simeón. Palájne'equé huani ina'uqué ri'imacá. Palá caja ripechu i'imacá Tupana nacú. Rihue'epí Tupana huacára'ajica pajluhuaja ina'uqué, Israelmi chu laquénami i'imatájeri penaje. Ricá huátacana nacú ri'imaqué. Tupana Pechu i'imari Simeón hua'até.

<sup>26</sup> Caja Tupana Pechu quemari rijló:

—Pamaje ricá Tupana huacára'acare majó ina'uqué i'imatájeri penaje. Pitaca'ajica yámona pamaje ricá.

<sup>27</sup> E caja Tupana Péchujá caja quemari rijló, ri'ijnacáloje Tupana ñacaré ejo penaje. Aú ri'ijná rejo. E riphá pajñacani Jesús chí'iná hua'até. Rejo ne'ejná i'imacá, nala'acáloje Tupana puráca'alo lana'aquejami quemacá que penaje.

<sup>28</sup> Ramaca queráco'ope aú Simeón huá'ari ricápojo ricá. E ripura'ó palá Tupana nacú. Mari que rimacá Tupánajlo:

<sup>29</sup> Nuhuacára'ajeri huani, Tupana, chuhua nutaca'ajica mana'íja.

Caja nomicha ricá pimacare nacú nojló.

Pihuátaca que la'ajeri nucá.

<sup>30</sup> Caja nomicha ricá i'imatájeri ina'uqué capichácajo liyá.

<sup>31</sup> Piyuque ina'uqué i'imatájeri penaje pa'acare ri'imacá.

<sup>32</sup> Palá rila'ajicare aú ajopana ina'uqué, uncá judíona calé necá, hue'epéjeño mecajeca picá, Tupana.



Palá caja napechu i'imajica huanaquiyana nacú, Israelmi chu laquénami nacú, huanaquiyana ri'imacale, i'imatájeri ina'uqué capichácajo liyá, que Simeón quemacá Tupánajlo.

<sup>33</sup> Marí que rimacá rinacu. Aú José, Jesús jaló, quele pechu i'imá: “¡Meque palá huani rimíchaca queráco'ope ñani nacú!”

<sup>34</sup> Eyá Simeón quemari Tupánajlo, rila'acáloje necá palá penaje. E rimá piño marí que Mariajlo:

—Marí caje penaje ri'imajé, quele queráco'ope: Rinacojé cajrú Israelmi chu laquénami capichájico Tupana liyá, uncá pachá nema'alaje ra'apiyá. Richojeja caja íqui'iruna i'imajó capichácajo liyá. Rinacojé caja ina'uqué hue'epéjeño mecajeca Tupana. Cajrú caja ina'uqué uncá huátalajeño ricá.

<sup>35</sup> Pu'uhuaré huani napura'ajico rinacu. Raú iná hue'epí necá mecajenaca necá —que rimacá rojló—. Chapú nala'ajicare penaje ricá. Camu'ují huani pipechu la'ajico raú. Cajrú pihuajhué majáca'ajico raú —que Simeón quemacá rojló.

<sup>36</sup> Re caja apa'ahuelo inanaru i'imayo. Tupana puráca'alo ja'apátajeyo ru'umacá. Ruí i'imayo Ana. Fanuelmi chu itumilomi ru'umacá. Aser runamana íi i'imacá. Caja phíyu'uqueru huani ru'umacá. Inaya jo'ó ru'umaqué huacajé ruhuá'aco i'imacá. Iyamá cuhuá'ata quele jarechí quetánaja ru'umacá ruyajnamí chu hua'até i'imacá. Ejéchami ritajnáñaca ru'umacá.

<sup>37</sup> Caja ihuacajilomi ruyurico reyá. Caja ochenta y cuatro jarechí quetana ru'umacá ihuacajilomi rihuacajé. Uncá rócho'oloja Tupana ñacaré chiyá; richuja ru'umaqué hue'echú quetana, lapí quetana. Tupana nacuja rupechu i'imaqué; rijhua'até pura'acano nacú ru'umaqué; ro'ojné liyá i'itacano nacuja caja ru'umaqué.

<sup>38</sup> Rucá penájerumi ru'umacá, iphayo Jesús chí'iná nacú Tupana ñacaré chu. Pamineco rumá Tupánajlo: “Palá pila'acá huecá” que. Ejomi ru'umá rohua'á i'imacáñojo queráco'ope Jesús yucuna. Necá huátaño Tupana huacára'aca apú ina'uqué, Jerusalén e i'imacáño i'imatájeri penaje. Necajlo ru'umá riyucuna.

*Napa'acó piño napumí chuhúa yucuna marí:*

<sup>39</sup> E caja Jesús chí'iná ñapátaño rila'acana Tupana puráca'alo lana'aquejami quemacá que. E nácho'o Jerusalén eyá. Napa'ó piño napumí chuhúa pajimila Nazaret ejo. Galilea te'eré nacú ri'imacá.

<sup>40</sup> Re Jesús tahuá'aro i'imacá. Ehuá richaje, richaje que ripechu i'imacá rijlúhua. Cajrú ripechu i'imacá. Palá huani Tupana la'ajica ricá.

<sup>41</sup> E caja fiesta iphari rená chojé. Fiesta íi i'imari Pascua. Aú Jesús chí'iná i'ijnáño Jerusalén ejo fiesta ja'apátaje ajopana ina'uqué hua'até. Jarechí queja ne'ejnajícano rejo ra'apátaje.

<sup>42</sup> Iyamá iphata j'iimaji nacojé quele jarechí Jesús i'imacá rihuacajé. Ne'ejná rejo rijhua'até fiesta ja'apátaje richape. Re ne'emá meque cálaja.

<sup>43</sup> Fiesta tapúrenami napa'ó piño napumí chuhúa. Jesús yuriro Jerusalén e. Uncá richi'iná hue'epílaja riyurico re.

<sup>44</sup> Napechu i'imá: “Ajopana hua'até japi ricá.” Ají que na'apaca pajluhua cala quetana. Ejéchami namaca rapumí. Aú naqueño'ó ricolácana nejena e'iyohuá, rijhuáque'ena e'iyohuá, quele.

<sup>45</sup> Uncá nephátala ricá. Raú napa'ó piño napumí chuhúa ají que Jerusalén ejo ricolaje.

<sup>46</sup> Caja ehuaja hueji que cala la'acá nacú nephata ricá. Nephata ri'imacá Tupana ñacaré chu. Re riyá'o Tupana puráca'alo nacú jehuíña'atajeño hua'até. Napuráca'alo jema'acana nacú riyá'o nahua'á. Riquejá'a caja naliyá riyucuna.

<sup>47</sup> Ajopana jema'año Jesús quejá'aca riyucuna. Aú napechu i'imá rinacu: “¡Meque capechuni huani ricá! Palá riquejá'aca riyucuna, palá caja rapiyácaca necá,” que napechu i'imacá rinacu.

<sup>48</sup> E richi'iná amaño ricá najhua'até. Raú nejlú jeño'oró richaje. E raló ajalaca ricá, rumá rijló:

—Nu'urí, ¿naje pila'á huecá ilé que? Caja huahuó qui'icharo para'apá hua'até piculácana nacú —que rumacá rijló.

<sup>49</sup> Jesús quemari najló:

—¿Na penaje iculá nucá? ¿Uncá chi ihue'epila maare nucá, nula'acáloje Nora'apá huani quemacá que penaje? —que rimacá najló.

<sup>50</sup> Marí caje aú uncá nahue'epila meque quemacánaca ricá rimacare nacú najló.

<sup>51</sup> Raló pechu nacuja ri'imá. Aú caja ripa'ó najhua'até ají que Nazaret ejo. Palá rema'ajica richi'iná ja'apiyá.

<sup>52</sup> Palá ritahuá'aco. Ehuá richaje, richaje que ripechu i'ímacá rijluhua i'ímacá. Palá Tupana pechu i'ímacá rinacu; ñaqué caja ina'uqué pechu i'ímacá rinacu.

### 3

*Juan Bautizar la'ajeri i'ímacá Tupana yucuna ina'uquejlo yucuna marí:*  
(Mt 3.1-12; Mr 1.1-8; Jn 1.19-28)

<sup>1</sup> Nahuacára'ajeri huani íi i'imari Tiberio. Caja pajluhua té'ela quele iphata ji'imaji nacojé quele cha jarechí ri'ímacá nahuacára'ajeri rihuacajé. Rihuacajé caja Poncio Pilato i'imari Judea te'eré eyájena huacára'ajeri. Herodes i'imari Galilea te'eré eruna huacára'ajeri. Re'ehué, Felipe, i'imari Iturea te'eré eruna, Traconite te'eré eruna, quele huacára'ajeri. Lisanías i'imari Abilinia te'eré eyájena huacára'ajeri rihuacajé.

<sup>2</sup> Anás, Caifás, quele i'ímaño sacerdotena huacára'ajeño. Marí que ne'emacá rihuacajé. Ehuá pu'uteni meñaru chu Tupana a'arí Juanjlo ripuráca'alo, ra'apátacaloje ricá ina'uquejlo penaje. Zacaríasmi chu i'irimi Juan i'ímacá.

<sup>3</sup> E caja Juan i'ijnari ají que juni Jordán cha ñacajélarunajlo riyucuna i'ímajé. Rimaqué najló:

—Ipajno'otá ipéchuhua Tupana ejo pu'uhuaré ila'acare liyá, imanaicho ila'acare liyá. Raú Tupana amájero ichaje riliyá. Ipajno'otájica ee ipéchuhua, nula'ajé icá bautizar —que rimájica najló.

<sup>4</sup> Júpimi que Isaíasmi chu, Tupana puráca'alo ja'apátajeri ri'ímacá, lana'arí riyucuna papera chojé marí que:

Nema'ajé pajluhuaja ina'uqué jahuíyo'oca pu'uteni meñaru chu.

Marí que rimájica ina'uquejlo: “Chuhua ipala'ataca ipéchuhua palá Huahuacára'ajeri jlo.

Ipajno'otá caja ipéchuhua pu'uhuaré ila'acare liyá.

<sup>5</sup> Piyuque ina'uqué, nahuacára'ajeño, ajopana hua'até pala'atájeño napéchuhua palá ripé.

Piyuque pu'uhuaré ila'acare, imanaicho ila'acare hua'ató, iyurí iliyó ricá, i'ímacáloje palá Tupánajlo raú penaje.

Marí que ipala'atájica ipéchuhua ripé.

<sup>6</sup> Tupana huacára'ajeri majó pajluhuaja, ri'imatácaloje ina'uqué capichácajo liyá penaje.

Piyuque ina'uqué jema'ajeño riyucuna”, que Isaíasmi chu lana'acá riyucuna papera chojé i'ímacá.

<sup>7</sup> E caja cajrú ina'uqué i'ijnacá Juan ejo, rila'acáloje necá bautizar penaje. Ne'iyajena uncá yurílaño pu'uhuaré la'acana naliyo, i'ijnáño caja najhua'até, rila'acáloje necá bautizar penaje. Nephá rinacu. E rimá najló:

—Pajlácachina ta icá. Iqui'í huani Tupana huajájica pu'uhuaré la'acáño. ¿Na quemari ijlo, i'ímacáloje riliyá penaje?”

<sup>8</sup> Ila'á palá, iná hue'epícaloje raú caja iyurica iliyó pu'uhuaré ila'acare penaje. Imaniya caja inacuhá: “Abrahami chu laquénami huecá. Ñaquele lamá'ataqueja huecá Tupánajlo.” Uncá ñaqué calé ricá ijlo. Uncá Tupana i'imatálaje icá capichácaje liyá raú. Tupana huátaquela, rehuíña'atajla marí jipa, ri'ímacáloje Abrahami chu laquénami penaje.

<sup>9</sup> Iná la'á iná peruné iré, iná i'icatácaloje paijí mecharú iná mená e'iyayá penaje. Rimacára'aco ejomi iná cára'ata ricá piyuqueja ra'apare. Ñaqué caja Tupana huajájica ina'uqué naquiyana. Rihuajaje namanaicho la'ajeño, pu'uhuaré la'ajeño, cajena rihuajaje marí que.

<sup>10</sup> Raú ina'uqué quemáño Juanjlo:

—Eta, ¿Meque huala'acajla, hue'emacáloje lamá'ataqueja que Tupánajlo raú penaje?

<sup>11</sup> Rimá najló:

—Marí que ila'ajica: Iyamá icamichare i'ímajica ee, a'á uncá camichare i'ímalájejló apú. Ca'ajneruna i'ímajica ee, a'á uncá a'ajnejí i'ímalájejló ile'ejé naquiyana —que rimacá najló.

<sup>12</sup> E caja liñeru ña'ajeño ne'emacánajlo i'ijnáño caja Juan ejo. Ne'ejná rejo, rila'acáloje bautizar necá penaje. Nephaca rinacu ee nemá rijló:

—Huehuíña'atajleri, ¿Meque huala'ajica, hue'emacáloje lamá'ataqueja que Tupánajlo penaje?

<sup>13</sup> Rimá najló:

—Ica'aníya ina'uqué liyá cajrú liñeru. Ilé ihuacára'ajeri quemacá ijlo ejé ijña'á naliyá ricá —que rimacá najló.

<sup>14</sup> Surárana naquiyana quemáño caja rijló:

—¡Eta huecá! ¿Meque huala'ajica?

Rimá najló:

—Ila'aníya chapú ajopana, ijña'acáloje naliyá nacaje ijluhua penaje. Imaniya caja majopeja nanacu: “Pu'uhuaré nala'acá” que, na'acáloje ijlo liñeru, multa huemí raú penaje. Ipechu i'íma palá liñeru hua'até na'acare ijlo isápaca'ala huemí penaje —que rimacá najló.

<sup>15</sup> Uncá nahue'epila palá na penájeca Juan i'imacá. Napechu i'imá rinacu: "Apala ricá ca'ajná Tupana huacára'acare majó ina'uqué i'imatájeri penaje."

E Juan quemari najló:

<sup>16</sup> —Nucá la'arí bautizar ina'uqué juni aú, napajno'otácale napéchuhua Tupana ejo, pu'uhuaré nala'acare liyá. Raú ajopana ina'uqué hue'epiño mecajenaca necá. Ricá penaje nula'á bautizar necá. Nopumí chojé apú iphájeri. Iqui'i huani nuphaca ja'apí ricá, nuhaje huani ri'imacale. Ricá a'ajeri ina'uquejlo Tupana Pechu, naca'acáloje pu'uhuaré nala'acare naliyo raú penaje. Ricaja caja huajájeri ina'uqué, pu'uhuaré la'ajeño, namanaicho la'ajeño, eja'ahuá tajnájico huacajé.

<sup>17</sup> Nopumí chojé iphájica la'ajeri trigo a'arú ca'ajeño la'acá que caja. Te'erí ichajona caja aú nácho'ota ricá, carená apho'ocáloje ra'arú re'iyayá penaje. Quéchami paminá lamá'ataca riñacarelana chojé richa. Ra'arumi ricupá quera'atani uncá yacálaré chojé. Mari que caja nopumí chojé iphájica huajájica ina'uqué e'iyohuá. Palá la'ajeño i'imajeño rijhua'até. Eyá pu'uhuaré la'ajeño, namanaicho la'ajeño, rica'ajé quera'atani uncá yacálaré chojé —que Juan quemacá najló i'imacá.

<sup>18</sup> Mari que Juan i'imajica najló Tupana i'imataca ina'uqué capichácajo liyá yucuna. Cajrú ripuráca'alo yucuna ri'imajica najló.

<sup>19</sup> Re'iyohuá queja Juan aca'acá ne'emacana, Herodes, ricá'acale rijmeremi liyá riyajalo. Herodías ruí i'imacá. Rochona Juan aca'arí ri'imacá. Apú rimanaicho rila'acare chona, pu'uhuaré rila'acare chona hua'até raca'á ricá.

<sup>20</sup> E'iyonaja uncá Herodes a'alá rinacojó ricá. Caja ehujaja ricá'á Juan ina'uqué huajáquelana chojé. Mari que rila'acana aú rila'á rijluhua nacaje cajrú huani.

*Juan la'acá bautizar Jesús yucuna marí:*

*(Mt 3.13-17; Mr 1.9-11)*

<sup>21</sup> Uncá chiyó naca'á Juan ina'uqué huajáquelana chojé, rila'aque bautizar cajrú ina'uqué. Jesús hua'ató rila'á bautizar. Jesús iphari rinacu i'imacá, rila'acáloje ricá bautizar penaje. E Jesús pura'aró Tupana hua'até. Ejéchami je'echú je'echataco.

<sup>22</sup> Ricá chiyá Tupana Pechu huitúca'ari aji que majó. Túcu'uchi huitúca'aca que huitúca'aca Jesús nacojó. Túcu'uchi que ramácano i'imacá. E Tupana quemari marí que Jesusjlo je'echú chiyá:

—Picá Nu'urí, íqui'ija nuhuátacare, pu'ují huani nupechu pinacu —que rimacá rijló.

*Jesús a'ajútayami chuna yucuna marí:*

*(Mt 1.1-17)*

<sup>23</sup> Jesús queño'ocá rara'apá puráca'alo ja'apátacana huacajé ri'imá treinta jarechí ca'ajná. Ina'uqué quemaqueño rinacu: "José i'irí ricá" que, rilamára'acale ri'imacá. José i'imari Elimi chu i'irimi.

<sup>24</sup> Elimi chu i'imari Matatmi chu i'irimi. Matatmi chu i'imari Levimi chu i'irimi. Levimi chu i'imari Mélquimi chu i'irimi Mélquimi chu i'imari Jánami chu i'irimi. Jánami chu i'imari Josemi chu i'irimi.

<sup>25</sup> Josemi chu i'imari Matatíasmi chu i'irimi. Matatíasmi chu i'imari Amosmi chu i'irimi. Amosmi chu i'imari Nahumi chu i'irimi. Nahumi chu i'imari Eslimi chu i'irimi. Eslimi chu i'imari Nagaimi chu i'irimi.

<sup>26</sup> Nagaimi chu i'imari Maatmi chu i'irimi. Maatmi chu i'imari Matatíasmi chu i'irimi. Matatíasmi chu i'imari Semeimi chu i'irimi. Semeimi chu i'imari Josemi chu i'irimi. Josemi chu i'imari Judami chu i'irimi.

<sup>27</sup> Judami chu i'imari Joanami chu i'irimi. Joanami chu i'imari Résami chu i'irimi. Résami chu i'imari Zarobabelmi chu i'irimi. Zarobabelmi chu i'imari Salatielmi chu i'irimi. Salatielmi chu i'imari Nérimi chu i'irimi.

<sup>28</sup> Nérimi chu i'imari Mélquimi chu i'irimi. Mélquimi chu i'imari Adimi chu i'irimi. Adimi chu i'imari Cosami chu i'irimi. Cosami chu i'imari Elmodami chu i'irimi. Elmodami chu i'imari Ermi chu i'irimi.

<sup>29</sup> Ermi chu i'imari Josuémi chu i'irimi. Josuémi chu i'imari Eliezermi chu i'irimi. Eliezermi chu i'imari Jorimi chu i'irimi. Jorimi chu i'imari Matatmi chu i'irimi.

<sup>30</sup> Matatmi chu i'imari Levimi chu i'irimi. Levimi chu i'imari Simeónmi chu i'irimi. Simeónmi chu i'imari Judami chu i'irimi. Judami chu i'imari Josemi chu i'irimi. Josemi chu i'imari Jonanmi chu i'irimi. Jonanmi chu i'imari Eliaquimi chu i'irimi.

<sup>31</sup> Eliaquimi chu i'imari Meleami chu i'irimi. Meleami chu i'imari Mainanmi chu i'irimi. Mainanmi chu i'imari Matátami chu i'irimi. Matátami chu i'imari Natanmi chu i'irimi.

<sup>32</sup> Natanmi chu i'imari Davidmi chu i'irimi. Davidmi chu i'imari Isámi chu i'irimi. Isámi chu i'imari Obedmi chu i'irimi. Obedmi chu i'imari Boozmi chu i'irimi. Boozmi chu i'imari Salmonmi chu i'irimi. Salmonmi chu i'imari Naasonmi chu i'irimi.

<sup>33</sup> Naasonmi chu i'imari Aminadabmi chu i'irimi. Aminadabmi chu i'imari Admin chu i'irimi. Admin chu i'imari Esromi chu i'irimi. Esromi chu i'imari Faresmi chu i'irimi. Faresmi chu i'imari Judami chu i'irimi.

<sup>34</sup> Judami chu i'imari Jacobmi chu i'irimi. Jacobmi chu i'imari Isaacmi chu i'irimi. Isaacmi chu i'imari Abrahami chu i'irimi. Abrahami chu i'imari Taremi chu i'irimi. Taremi chu i'imari Nacormi chu i'irimi.

<sup>35</sup> Nacormi chu i'imari Serugmi chu i'irimi. Serugmi chu i'imari Ragaumi chu i'irimi. Ragaumi chu i'imari Pelegmi chu i'irimi. Pelegmi chu i'imari Hebermi chu i'irimi. Hebermi chu i'imari Salami chu i'irimi.

<sup>36</sup> Salami chu i'imari Cainánmi chu i'irimi. Cainánmi chu i'imari Arfasadmi chu i'irimi. Arfasadmi chu i'imari Semi chu i'irimi. Semi chu i'imari Noémi chu i'irimi. Noémi chu i'imari Lamecni chu i'irimi.

<sup>37</sup> Lamecni chu i'imari Matusalenmi chu i'irimi. Matusalenmi chu i'imari Enocmi chu i'irimi. Enocmi chu i'imari Jaredmi chu i'irimi. Jaredmi chu i'imari Mahalaleelmi chu i'irimi. Mahalaleelmi chu i'imari Cainánmi chu i'irimi.

<sup>38</sup> Cainánmi chu i'imari Enosmi chu i'irimi. Enosmi chu i'imari Setmi chu i'irimi. Setmi chu i'imari Adanmi chu i'irimi. Tupana queño'ótacare Adanmi chu i'imacá.

## 4

*Jiñá Ch'i'náricana huátari Jesús e'iyajé ca'átacana, rila'acáloje pu'uhuaré penaje. Marí riyucuna:*

(Mt 4.1-11; Mr 1.12-13)

<sup>1</sup> Caja Juan la'arí bautizar Jesús juni Jordán acojé i'imacá. Reyá ra'apá ají que a'ajná ño'ojó. Caja Tupana Pechu ja'apiyá Jesús i'imacá. Ricá huacára'ari ricá ají que a'ajná ño'ojó pu'uteni meñarú chojé.

<sup>2</sup> Re ri'imá iyamá ina'uqué le'ejé que cala quietana. Marí quietana uncá rajñala ra'ajnehuá. Caja quehuí rijló me'epeji i'imacá.

<sup>3</sup> Ejéchami Jiñá Ch'i'náricana iphaca Jesús nacú. Rihuata re'iyajé ca'átacana, rila'acáloje pu'uhuaré raú penaje. E rimá rijló:

—¿Quehuaca chi Tupana I'irí picá? Nuhue'epícaloje ñaque picá penaje, pihuacára'a marí jipa jehuíña'aco a'ajnejí penaje.

<sup>4</sup> Uncá Jesús jema'alá ra'apiyá. Rimá rijló:

—Marí que Tupana puráca'alo lana'aquejami quemacá: “Uncá a'ajnejí aú ja calé iná i'imá. Piyuqueja Tupana puráca'alo ja'apiyá jema'acana aú iná i'imá —que Jesús quemacá rijló.

<sup>5</sup> E Jiñá Ch'i'náricana huá'ari piño ricá ipuré i'ihuátaje. Yenoje huani ri'imacá. Reyá riyá'atá rijló ajopana te'eré, ajopana te'eré que. Piyuque marí eja'ahuá chu i'imacaño ñacajela riyá'atá rijló richuhuaja ipuré i'ihuátaya.

<sup>6</sup> Reyá i'imajemi rimá Jesusjlo:

—No'ojé pijló piyuqueja ina'uqué te'eré, pi'imacáloje ne'emacana penaje. Reyá caja piyuque nacaje yuréjero pijló marí eja'ahuá chu i'imacare. Nojló a'acanami ri'imacale, no'ó ricá nuhuátacarenajlo.

<sup>7</sup> Piphájica ee no'opí, pitára'o ee pi'irúpachi aú nujimaje. E no'ojé pijló nate'eré piyuqueja —que Jiñá Ch'i'náricana quemacá Jesusjlo.

<sup>8</sup> Raú Jesús quemari rijló:

—Tupana puráca'alo lana'aquejami quemari marí que: “Piphá Tupana ja'apija. Iná huacára'ajeri huani ricá. Ricá ja'apiyaja calé iná jema'á palá”, que Tupana puráca'alo lana'aquejami quemacá —que Jesús quemacá rijló.

<sup>9</sup> Quéchami Jiñá Ch'i'náricana huá'aca piño ricá Jerusalén ejo. Re rihuá'a ricá Tupana ñacaré i'ihuátaje yenoje. Re rimá rijló:

—Tupana I'irí pi'imajica ee, peño'ó maáreya cahuacaje te'erí e'iyajé.

<sup>10</sup> Pu'uhuacá Tupana I'irí pi'imajica ee, uncá meque pila'alajo. Marí que Tupana puráca'alo lana'aquejami quemacá rinacu:

Tupana huacára'ari rijhua'atéjena, je'echú chiyájena, a'acá nanacojó iná.

<sup>11</sup> Necá pataño iná ja'apí, iná la'acó piyá quehuí jipa nacojé ja'acano aú, que ripuráca'alo lana'aquejami quemacá rinacu —que Jiñá Ch'i'náricana quemacá Jesusjlo.

<sup>12</sup> Raú Jesús quemari rijló:

—Apa'amá caja Tupana puráca'alo lana'aquejami quemari marí que: “Pila'aniya pimanai-cho, pamachi méqueca Pihuacára'ajeri Tupana a'acá piñaté raú”.

<sup>13</sup> Jiñá Ch'i'náricana amárijla Jesús, rica'átacaloje re'iyajé penaje. E'iyonaja uncá rema'alá ra'apiyá. Aú ra'apá riliyá mequetánaja.

*Jesús queño'ocá risápaca'ala la'acana Galilea te'eré e yucuna marí:*

*(Mt 4.12-17; Mr 1.14-15)*

<sup>14-15</sup> E caja Jesús pa'aró piño Galilea te'eré ejo. Tupana Pechu quemájica que rila'ajica nacaje. Rehuíña'ataque ina'uqué Tupana nacú nahuacáca'alo ñacarelana chu. Apalá chojé, apalá chojé que rehuíña'atajica necá rehuá. Piyuque ina'uqué rehuá i'imagjácaño pura'aqueño rinacu palá. Cajrú riyucuna jema'acó piyuque nate'eré ehúa.

*Jesús i'imacá Nazaret e yucuna marí:*

*(Mt 13.53-58; Mr 6.1-6)*

<sup>16</sup> E Jesús i'ijnari Nazaret ejo. Re ritahuá'o i'imacá. E huatána'acaje huacajé ri'ijná piño richape nahuacáca'alo ñacarelana chojé. E ritára'o, ripura'acóloje Tupana puráca'alo lana'aquėjami hua'até najló penaje.

<sup>17</sup> Na'á rijló Tupana puráca'alo lana'aquėjami, Isaíasmi chu lana'acare i'imacá. Tupana puráca'alo ja'apátajeri Isaíasmi chu i'imacá. E rijme'etá papera, iphátari puráca'aloji ricá chu quemari marí que:

<sup>18</sup> Nujhua'até Tupana Pechu. Tupana a'arí nojló ricá, nu'umacáloje palani yucu uncá hue'epílaño Tupana nacojejlo penaje. Uncá huani nahue'epila ricá.

Rihuacára'a caja nucá, nupala'atácaloje camu'ují péchurunajlo napechu penaje.

Tupana jácho'otari ina'uqué pu'uhuaré la'acana chiyá.

Rihuacára'a caja nucá riyucuna i'imajé najló.

Rihuacára'a caja nucá, no'opátacaloje mejluruna liyá mejlucaji penaje.

Rihuacára'a caja nucá, nu'umatácaloje ina'uqué chapú nala'ajeño liyá penaje.

<sup>19</sup> Rihuacára'a caja nucá, nu'umacáloje ina'uquejlo palá Tupana la'ajicare necá yucuna penaje, que ripuráca'alo lana'aquėjami quemacá, ripura'acaro hua'até.

<sup>20</sup> Riñapátacaja rijhua'até pura'acano ee Jesús itari papera. Ra'á nahuacáca'alo ñacarelana chiyá sápaajerijlo ricá. Ejomi riyá'o. Piyuque nahuacáca'alo ñacarelana chu i'imacaño yacá'año richaje.

<sup>21</sup> Raú ri'imá riyucuna najló, rimá najló:

—Chuhua Tupana puráca'alo lana'aquėjami, huajé nupuri'ichajo hua'até, iphíchari rená chojé, ñaque ri'imacáloje penaje. Rimacá que ri'imajica e'iyohúa chuhua —que rimacá najló.

<sup>22</sup> Palá huani napechu i'imacá Jesús nacú; palá caja napechu i'imacá ripuráca'alo nacú. Ne'iyajena quemáño pajlocaca:

—¿Uncá chí José i'irí calé ricá?

<sup>23</sup> E Jesús quemari najló:

—Imaje ca'ajná nojló, nula'acáloje ijlo nacaje penaje. Apú a'acáloje rená que'ená ijlo penaje, imá rijló: “Pusána'ajeri picá. Eco pitejmo'óta picó”, que imacá apujlo maárohua. Ñaque ca'ajná imaje nojló. Imaje nojló ca'ajná marí que: “Caja huema'á riyucuna, nacaje pila'acare pajimila Capernaum e pi'imaqué huacajé. Chuhua pila'á maare pite'eré nacú piño ñaque caja, que ca'ajná imájica nojló” —que Jesús quemacá najló.

<sup>24</sup> Rimá piño najló:

—Jema'á marí: Ina'uqué iphaño Tupana puráca'alo ja'apátajeri ja'apí. Eyá rite'eré eruna uncá iphálaño ra'apí.

<sup>25</sup> Elíasmi chu i'imacá Tupana puráca'alo ja'apátajeri huacajé, cajrú Israelmi chu laquénami naquiayana, inaana, i'imaño ihuacajilomina. Rihuacajé uncá juni ja'aló hueji quele jarechí, eyá apú pe'iyojé quetana. Raú cajrú huete'eré ehúa i'imajícañomi chuna ña'ajica me'epejí panacu.

<sup>26</sup> Uncá Tupana huacára'ala Elíasmi chu ihuacajilomina ñaté a'acana, huete'eré e i'imacaño. Rihuacára'a ricá apa'ahuelo ejo, rimacápo'ocaloje rojló ru'urí penaje. Ajopana naquiayana ru'umacá. Pajimila Sarepta e ruñacaré i'imacá. Sidón ahua'á ricá pajimila.

<sup>27</sup> Eyá apú i'imari piño. Tupana puráca'alo ja'apátajeri ri'imacá. Rií i'imari Eliseo. Ñaque caja cajrú natámina i'imacá Israel te'eré ehúa rihuacajé. Nanapona naquiayá patáca'ataro najló, nacú ne'emaqué natámina. Uncá Eliseo tejmó'ótala ne'emacá. Ricaja calé, Naamanmi chu, ritejmo'óta i'imacá. Ajopana te'eré, Siria eyaje ri'imacá. Ricaja calé i'imaró ritami caje liyá —que Jesús i'imacá riyucuna najló, nahue'epicaloje raú uncá ñataté a'acana i'imalaje najló penaje.

<sup>28</sup> Marí que rimacá aú piyuque nahuacáca'alo ñacarelana chujena yúcha'año richá raú.

<sup>29</sup> A'acuhuaná nácho'o Jesús pataje. Yenuri ja'apí pajimila i'imari i'imacá. Napatá ricá. E nachíra'a ricá ají que pajimila yámojo yenuri i'ihuátaje, naca'acáloje ricá ají que cahuacaje ri'ihuátaya penaje.

<sup>30</sup> E'iyonaja Jesús ja'apáñari necá ne'iyayá. Rejomi ri'ijná reyá.

*Jiñá pechu i'imacá pajluhuaja ina'uqué e'iyá yucuna marí:*

(Mr 1.21-28)

<sup>31</sup> Jesús ja'apari reyá, ri'ijná ají que pajimila Capernaum ejo. Galilea te'eré nacú ricá pajimila. Re rehuíña'ata ina'uqué Tupana nacú huatána'acaje huacajé.

<sup>32</sup> “Meque palá huani rehuíña'ataca huecá. Palá huani rihue'epica rinacojé,” que napechu i'imacá rinacu.

<sup>33</sup> Re caja nahuacáca'alo ñacarelana chu apú i'imari najhua'até. Jiñá pechu i'imari re'iyá. E rahuíyo'o.

<sup>34</sup> Rimá Jesusjlo:

—Jesús, Nazaret eyaje, ¿naje picahuíla'a huanacu? ¿E piphaca majó huacapichátaje? Nomána'apa caja picá. Ilé uncá la'alá pu'uhuaré picá. Tupana i'imacá e eyaje caja picá — que jiñá pechu i'imacare re'iyá quemacá rijló.

<sup>35</sup> —Pimanúma'o, pácho'o ilé ina'uqué e'iyayá —que Jesús quemacá rijló.

Ejéhami jiñá pechu ca'acá ilé ina'uqué cahuacá te'erí e'iyajé najimaje. Hua'ató rácho'o re'iyayá. Uncá rila'alá ina'uqué chapú re'iyayá jácho'ocano aú.

<sup>36</sup> “¡Meque piyunque huani rila'alaca cari!” que ramájeño pechu i'imacá Jesús nacú.

Nemá pajlocaca:

—¡Meque palá huani ripuráca'alo! Raú ja calé jiñana pechu jácho'oro ina'uqué e'iyayá —que nemacá pajlocaca.

<sup>37</sup> Marí que rila'acá ejomi cajrú Jesús yucuna jema'acó rehuá.

*Jesús tejmo'ótaca Pedro yajneru yucuna marí:*

(Mt 8.14-15; Mr 1.29-31)

<sup>38</sup> E caja Jesús jácho'oro nahuacáca'alo ñacarelana chiyá. I'ijnari ají que Simón Pedro ñacaré ejo. Re Simón Pedro yajneru i'imayo rutami jelo'ocajo nacú. E nemá Jesusjlo:

—Rutami rucá.

<sup>39</sup> Raú ri'ijná rohua'ajé tára'ajo. Rihucára'a jelo'ocajo ja'apaca ruliya. Raú ja calé rimata'á ruliya. Ejéhami rócho'oco, rutamáca'atacaloje najló a'ajnejí penaje.

*Jesús tejmo'ótaca cajrú natámina yucuna marí:*

<sup>40</sup> E caja najúhua'a re. Camú ja'acó ee, nahuá'a piyunque natámina Jesús ejo. Que'iyapejé nayaripune i'imacá nanacu. Jesús to'otari nanacojé riyáte'ela apú nacojé, apú nacojé que. Raú piyunqueja necá tejmo'otaño.

<sup>41</sup> Ne'iyajena e'iyá jiñana pechu i'imá. Necá caja rica'á ne'iyayá. Raú nahuíyo'o, nemá rijló:

—Tupana I'irí picá.

Jesús quemari najló, ne'emacá piyá riyucuna. Uncá riyurila napura'acó, nahue'epícale Tupana huacára'acare ri'imacá, ina'uqué i'imatájeri penaje.

*Jesús i'imacá Tupana yucuna Galilea ehuañenajlo yucuna marí:*

(Mr 1.35-39)

<sup>42</sup> E muní que lapiyami Jesús i'ijnari ají que pajimila yámojo, ri'imacáloje ricoja re penaje. E'iyonaja naculá ricá. Caja ehuaja nephata ricá, nemá rijló:

—Pi'ijnáñaniya huecá, maáreja piyuró huajhua'até.

<sup>43</sup> Jesús quemari najló:

—Tupana i'imatari ina'uqué capichácajo liyá, ne'emacáloje rijhua'atájena raú penaje. Palani riyucuna. Nu'ujnajé apú pajimila nacojé, apú pajimila nacojé que riyucuna i'imajé najló. Ricá penaje Tupana huacára'ari nucá majó —que Jesús quemacá najló.

<sup>44</sup> E ra'apá ají que Galilea te'eré e'iyohuá. Nahuacáca'alo ñacarelana chojé, apalá chojé, apalá chojé que ri'ijnajica Tupana yucuna i'imacana nacú najló.

## 5

*Najña'acá cajrú jiñana Jesús puráca'alo aú yucuna marí:*

(Mt 4.18-22; Mr 1.16-20)

<sup>1</sup> Apú huacajé piño Jesús i'imari caesa turená e. Genesaret e ricá caesa. E caja ina'uqué jahuacaño rejé cajrú Tupana puráca'alo jema'ajé. Raú cajrú nachipúca'aca Jesús nacojé.

<sup>2</sup> E Jesús amari iyáma'acu jita cúhua'aco caesa acú, que'epé nacú. Meñaru richiyá i'imacá. Caja jiña ña'ajeño jácho'oño, nepácaloje nahuenare e'iyayá penaje.

<sup>3</sup> E caja Jesús huitúca'ari pajlúhua'acu jita chojé. Pedro jítane ri'imacá. E riyá'o richu. E rimá rijló:

—Para'á ricá pe'iyojó quemachi.

—Je.

Ñaquele richiyá i'imajemi rehuíña'ata ina'uqué Tupana puráca'alo nacú.

<sup>4</sup> Riñapata nehuíña'atacana ejomi rimá Pédrojlo:

—Chuhua pa'apata pitane juniphuni loco'opani. Reyá i'majemi ica'ajé ihuenare juniphuni chojé pihuaque'ena hua'até, ijña'acáloje jíñana richojé penaje —que rimacá rijló.

<sup>5</sup> Aú Pedro quemari rijló:

—Huehuíña'atajери, caja huajme'echiya huahuenare ca'acana nacú. Uncá huani ta huajña'alacha. Pihuacári'ichacale rica'acana, nuca'ajica piño ricá junápeje —que rimacá Jesúslo.

<sup>6</sup> E caja Pedro, rijhuaque'ena, quele ña'año ritane ají que rimacá rijló ejo. Reyá naca'á nahuenare junápeje. Ejéchami cajrú huani jíñana ja'acó richojé. Jíñana ja'apiyá nahuenare queño'orí mata'atácajo.

<sup>7</sup> Najhuaque'ena i'imaño apa'acú jita chu. E naca'á nayáte'ela najló, ne'ejnacáloje nañaté a'ajé penaje. Aú ne'ejná rejo, nácho'otacaloje jíñana najhua'até penaje. Nephá nanacu, chíra'año jíñana najhua'até majó jita chojé. Namano'otá iyáma'acu jita ño'po'ojlo jíñana aú. Ujú caje chiyó iyáma'acu netane ja'acojla na'apiyá junápeje. Jíñana cachicha ca'arijla netane na'apiyá.

<sup>8</sup> Simón Pedro amari cajrú huani jíñana tami yá'aco jita chu. Marí caje aú ritára'o ri'irúpachi aú Jesús jimaje, piyuqueja hue'epica nacaje la'acana ri'imacale. E rimá rijló:

—Pa'apá nuliya, uncá ina'uquélari nu'umacale.

<sup>9</sup> Pedro quero'oró ramaca aú cajrú jíñana. Ñaque' caja rijhuaque'ena quero'ocó rijhua'até.

<sup>10</sup> Santiago, Juan, quele quero'oño' caja rijhua'até ñaque' caja. Simón Pedro huáque'ena ne'emacá, Zebedeo yaní. Nara'apá í i'imari Zebedeo. Pedro quero'ocó aú Jesús quemari rijló:

—Piquero'oniyó, marí eyá a'ajná ño'ojó ñaque' pihua'ajica nojló ina'uqué, ne'emacáloje nujhua'atéjena penaje —que rimacá rijló.

<sup>11</sup> Ejomi nachíra'a netane pe'iyojó, juni turenajo. Ejomi ne'ejná Jesús hua'até. Reja na'apaña piyuqueja nanane.

*Jesús tejmó'ótari ritami, napona naquiyá patáca'ataro ri'imacá. Riyucuna marí:*

*(Mt 8.1-4; Mr 1.40-45)*

<sup>12</sup> Jesús i'imacá pajimila e huacajé apú iphari rinacu. Ritami ri'imacá, napona patáca'ataro ri'imacá. Ramaca aú Jesús, ritára'o ri'irúpachi aú rijimaje. Racúhua'ata rihuá'aru ají que te'erí jimaje. E rimá rijló:

—Hue'emacana, pihuatájica ee, pa'apata nuliya nuyaripune.

<sup>13</sup> Raú Jesús sápari rinacu riyáte'ela aú. Rimá rijló:

—Je. Nuhuata ra'apátacana pijló. Caja ripali'ichó pijló chuhua.

Marí que rimacá rijló, hua'até que rinapona pala'acó rijló.

<sup>14</sup> —Pi'imaniya nuyucuna ajopánajlo —que Jesús quemacá rijló—. Chuhua pi'ijná sacerdote chaje, ramíchachi picá. Quéchami pa'ajica Tupánajlo nacaje, pinapona pall'ichácole. Moisesmi chu puráca'alomi lana'aquejami quemacá que pa'ajica Tupánajlo nacaje. Marí caje aú ina'uqué hue'epéjejo caje rinapona pala'acó —que Jesús quemacá rijló.

<sup>15</sup> Je. Raú ri'ijná sacerdote ejo. Ejéchami cajrú ina'uqué jema'acá riyucuna. Raú calé cajrú huani ina'uqué i'ijnacá Jesús puráca'alo jema'ajé. Ajopana piño i'ijnáño richaje, rica'acáloje nayaripune nanaquiyá ñaque' caja penaje. Caja queja la'acana nacú ri'imajica. Cajrú nephájica rinacu i'imajica.

<sup>16</sup> Ñaquele Jesús i'ijnáña'aqueri necá mequetánaja. Ri'ijnaque meñaru chojé Tupana hua'até pura'ajó.

*Jesús tejmó'ótaca pajluhuaaja. Camachá rinapona taca'acá i'imacá. Riyucuna marí:*

*(Mt 9.1-8; Mr 2.1-12)*

<sup>17</sup> Apú huacajé piño Jesús jehuíña'atari cajrú ina'uqué Tupana nacú. Najhua'até fariséona naquiyana yá'año Tupana puráca'alo nacú jehuíña'atajeño hua'até. Apú pajimila eyájena, apú pajimila eyájena que ne'emacá. Ne'iyajena i'imaño Galilea te'eré eyájena; ajopana i'imaño Judea te'eré eyájena; ajopana i'imaño Jerusalén eyájena. Quele i'imaño Jesús jehuíña'atacarena hua'até. Tupana palamane aú Jesús tejmó'ótaqueri cajrú natámina.

<sup>18</sup> E caja ajopana piño iphaño rejo. Achiñana huánija ne'emacá. Necá huáco'oño cuhuana nacú pajluhuaaja ritami rejo. Camachá rinapona taca'acá i'imacá. Nahuata rijña'acana pají chojé, nato'otacaloje ricá Jesús jí'imá nacojé penaje, ritejmó'otacaloje ricá penaje.

<sup>19</sup> E'iyonaja uncá mere eyaca calé namujlúca'atajla ricá pají chojé. Caja namano'otá pají Jesús i'imacare chu. Aú ne'ejrá pají i'ihuátaje. Pu'ucuja to'otácanami nañacaré i'ihuata i'imacá rehuá. Ricá i'ihuátaje ne'ejrá. Reyá najjiyo'otá ri'ihuata. Ricá chiyá nahuitúca'ata ritami ina'uqué e'iyajé Jesús ahua'ajé.

<sup>20</sup> Jesús hue'epiri caphí napechu i'imacá richojé, ritejmó'otacaloje ritami penaje. Raú rimá ritámijlo:

—Caja nomicho pichaje, pu'uhuaré pila'acare liyá.

<sup>21</sup> Mari que rimacá aú Tupana puráca'alo nacú jehuíña'atajeño, Fariséona, quele pechu i'imá: “¿Nata quele pura'aró pu'uhuaré huani Tupana nacú? Uncá na calé amaro iná chaje pu'uhuaré iná la'acare liyá. Ricaja cale, Tupana, amaro iná chaje pu'uhuaré iná la'acare liyá. Uncá Tupana calé ricá,” que napechu i'imacá.

<sup>22</sup> Jesús hue'epiri méqueca napechu i'imacá rinacu. Aú rimá najló:

—¿Naje chi i'ijnataca ilé que ipéchuhua?

<sup>23</sup> Majopeja iná quemacajla apujlo: “Caja nomicho pichaje, pu'uhuaré pila'acare liyá”. Eyá puhuichani inajlo ricá, iná huacára'acaloje ritami jácho'oco, ra'apácaloje penaje. Tupánaja calé hue'epiri natámina tejmo'ótacana —que rimacá najló—.

<sup>24</sup> Ina'uquéjloje penaje i'imacá nucá. Tupana quemari nunacu, nomácoloje ina'uqué chaje, pu'uhuaré nala'acare liyá penaje. Me'etení nula'ajicare aú ihue'epeje ñaque jo'ó nojló ricá —que rimacá najló.

E rimá camachá naponataca'acajlo:

—Chuhua pácho'o. Pa'apá. Pijña'á picamané pijhua'ató, pipa'achó.

<sup>25</sup> Ejéchami pila pila que rácho'oco nejlú chuhua. Rijña'á rijhua'ató ricamané, rito'ocaro chu i'imacá. E ripa'ó ají que riñacaré ejo. Palá ripura'acó Tupana nacú.

<sup>26</sup> Rácho'oco aú ramájeño pechu i'imá Jesús nacú: “¡Meque piyuque huani rila'alaca cari!” Nemá pajlocaca:

—¡Meque palá huani huamíchaca rila'acá quele!

*Jesús quemari Matéojlo, ri'ijnacáloje rijhua'até penaje yucuna mari:*

*(Mt 9.9-13; Mr 2.13-17)*

<sup>27</sup> E caja Jesús ja'apari piño a'ajná ño'ojó. Amari pajluhuaja ina'uqué yá'aco risápaca'ala la'acana nacú. Mateo rií i'imacá. Liñeru rijña'á ina'uqué liyá ne'emacánajlo. Ricá i'imari risápaca'ala. E Jesús iphari rinacu, rimá rijló:

—Pi'ijná nujhua'até.

—Je —que rimacá.

<sup>28</sup> Raú rácho'o, ri'ijná Jesús hua'até. Ra'apaña piyuque rinane.

<sup>29</sup> Quéchami Mateo huacára'ari cajrú a'ajnejí la'acana, ajopana ajñácaloje na'ajnehuá Jesús hua'até riñacaré chu penaje. Raú cajrú ina'uqué jahuacaco riñacaré chojé. Cajrú caja liñeru ña'ajeño ne'emacánajlo yá'año re Jesús hua'até na'ajnehuá ajñacana nacú. Re caja ajopana yá'año rijhua'até.

<sup>30</sup> Re caja Fariséona i'imaño Tupana puráca'alo nacú jehuíña'atajeño hua'até. Necá aca'año Jesús ja'apiyatéjena, nemá najló:

—¿Naje chi ajñá a'ajnehuá liñeru ña'ajeño hue'emacánajlo hua'até, uncá ina'uquélaruna, quele hua'até?

<sup>31</sup> E Jesús quemari najló:

—Uncá peyajuéruna i'ijnalaño pusána'ajeri amaje. Natáminaja calé i'ijnano ramaje.

<sup>32</sup> Ñaque caja ina'uquejlo nucá. Re ina'uqué, natámina que necá Tupánajlo, pu'uhuaré la'ajeño ne'emacale. Ne'iyajena pechu i'imá nanacuhúa: “Pu'uhuaré la'ajeño huecá” que. Nu'ujná majó Tupana yucuna i'imajé ilé cajénajlo, napajno'otácaloje napéchuhua pu'uhuaré nala'acare liyá, ne'emacáloje lamára'ataquejanami que Tupánajlo raú penaje. Eyá ajopana, napechu i'imá nanacuhúa: “Palá la'ajeño huecá” que. E'iyonaja uncá ñaque calé necá. Uncá nu'ujnalá majó ilé cajénajlo riyucuna i'imajé —que Jesús quemacá najló.

*Napura'acó Jesús hua'até a'ajnejí liyá i'itacano nacú yucuna mari:*

*(Mt 9.14-17; Mr 2.18-22)*

<sup>33</sup> E caja ajopana quemaño Jesusjlo:

—Metú que queja Juan ja'apiyatéjena, fariséona ja'apiyatéjena, quele i'itacó na'ajné liyá, napechu i'imacáloje Tupana nacuja raú penaje. Metú que queja caja napura'acó Tupana hua'até. Eyá pa'apiyatéjena, ñaqueja ajñácaño na'ajnehuá.

<sup>34</sup> Jesús quemari najló:

—Nahuá'acaco huacajé, necá nayucupéra'acarena, uncá i'italaño na'ajné liyá, ilé ruyajná penaje i'imacá re najhua'até quetana.

<sup>35</sup> Ñaque caja ricá no'opiyatéjenajlo. Najhua'até nu'umacá quetana uncá ne'etaló na'ajné liyá. Tupana huá'ajeri nucá naliyá. Rejomí ne'etajó na'ajné liyá —que Jesús quemacá najló.

*Jesús jehuíña'ataca necá, nayurícaloje jupichumi puráca'aloji huajé lanaquiya penaje. Aú ri'imá yucu najló mari que:*

<sup>36</sup> —Uncá na calé mata'arí a'arumacaji huajé naquiya jupichumi tepé penaje. Re'iyayá ripácana aú jupichumi jiyo'otáro huajé liyá. Caja penaje richaje huani jiyo'otáqueja jupichumi a'arumacaji yurico.



<sup>37</sup> Uncá caja iná aco'olá nacaje jalá huajé amúra'atacanami jupichumi ra'acuná chojé, iná lamá'atacaloje ricá richu penaje. Camejeri imami naquiyá la'acanami ricá, ra'acuná. Ilé que iná la'acachu huajé amúra'atacanami huapa'atari jupichumi ra'acuná, caja ñaataco ri'imacale. Ejeja ricapichó jupichumi ra'acuná hua'até.

<sup>38</sup> Eyá huajé ra'acuná chojé iná aco'ocachu huajé nacaje jalá amúra'atacanami, uncá rijiy'o'tala ricá, huajé ra'acuná camejeri imami ñaacole rijhua'até —que Jesús i'imacá najló yucu—.

<sup>39</sup> Uncá na calé huátari nacaje jalá i'iracana meyale amúra'atacanami, nemacale jupichumi amúra'atacanami nacú: “Marí caje palani. Ricá chá'atari huajé amúra'atacanami” —que rimacá najló, uncale ne'iyajena huátalaño huajé Tupana puráca'alo ja'apiyá jema'acana.

## 6

*Jesús ja'apiyatéjena chíra'aca huejapa trigo naquiyana huatána'acaje huacajé yucuna marí:*  
(Mt 12.1-8; Mr 2.23-28)

<sup>1</sup> Huatána'acaje huacajé Jesús ja'apari ají que iñe'epú chuhua' ra'apiyatéjena hua'até. Iñe'epú ja'apari ajopana mená e'iyohuá. Re'iyá cajrú trigo i'imacá. Na'apaca re'iyohuá nacuhuaja ra'apiyatéjena chíra'año huejapa trigo naquiyana. Natojro'ó nacápihua ricá, najñacaloje penaje.

<sup>2</sup> Fariséona naquiyana ja'apaño caja najhua'até. Ra'apiyatéjena chíra'año trigo naquiyana. Eyá nemá najló:

—Chuhua'á huatána'acaje huacajé, e'iyonaja isapa. Uncá ila'alá Moisesmi chu puráca'alomi lana'aquejami quemacá que.

<sup>3</sup> E Jesús quemari najló:

—Icá hue'epiño méqueca Tupana puráca'alo lana'aquejami quemacá Davidmi chu nacú. Quehuí rijló me'epejí i'imacá. Ñaque' caja quehuí me'epejí i'imacá rijhua'até i'imacáñojlo.

<sup>4</sup> A'acuhuaná Davidmi chu mujlúca'ari Tupana ñacaré chojé pan ajñaje. Tupánajlo a'acanami ri'imacá. Moisesmi chu puráca'alomi quemari rinacu, ajopana ajñaca piyá ricá. Necaja calé, sacerdotenaja calé ajñaño ricá. E'iyonaja Davidmi chu ajñari ricá. Ra'á caja rijhua'até i'imacáñojlo rinaquiyana. Marí que David la'acá i'imacá.

<sup>5</sup> Ina'uquéloje penaje i'imacá nucá. Tupana quemari nunacu, numacáloje méqueca iná la'acá huatána'acaje huacajé penaje —que Jesús quemacá fariséona naquiyánajlo.

*Jesús lamá'ataca caja yáte'ela a'amitacó rijló yucuna marí:*  
(Mt 12.9-14; Mr 3.1-6)

<sup>6</sup> Apú huatána'acaje huacajé piño Jesús mujlúca'ari nahuacáca'alo ñacarelana chojé. Re rehuíña'ata necá Tupana nacú. Re caja najhua'até pajluhuaja ina'uqué i'imari. Caja riyáte'ela ca'añá ejo pitá a'amitaró rijló i'imacá.

<sup>7</sup> Re caja Tupana nacú puráca'alo jehuíña'atajeño, fariséona, quele i'imacá. Necá quejila'año Jesús, namácaloje rilamá'ataca ricá ca'ajná, uncá ca'ajná, huatána'acaje huacajé. Rilamá'atacana aú nemajla rinacu: “Pu'uhuaré la'ajeri ricá.”

<sup>8</sup> Jesús hue'epiri méqueca napechu i'imacá rinacu. Aú rimá yáte'ela a'amitárojlo:

—Pácho'o majó huajimajo.

Raú rácho'o, ri'ijná najimaje.

<sup>9</sup> E rimá ajopánajlo:

—¿Meque chi iná la'acá huatána'acaje huacajé? ¿Meque chi Tupana puráca'alo lana'aquejami quemacá rinacu? ¿E chi palani iná la'acá palá ca'ajná, chapú ca'ajná huatána'acaje huacajé? ¿E chi palani iná i'imataca ina'uqué capichácajo liyá ca'ajná, ina'uqué capichátacana ca'ajná huatána'acaje huacajé? —que rimacá najló.

E'iyonaja uncá na'ajipalá rijló.

<sup>10</sup> Raú Jesús yacá'aro nachaje, rahua'á i'imacáño tujlá que chaje. E rimá rijló:

—Piya'atá nojló piyáte'ela.

Riya'ataca rijló ricá aú ja ripala'ó. Ripa'ó rapumí chuhua'á júpimi ri'imacá que caja.

<sup>11</sup> Raú ajopana yúcha'año cajrú Jesús cha. Naqueño'ó rinacu pura'acano, nahue'epicaloje méqueca nala'ajica ricá penaje.

*Jesús a'acá iyamá iphata ji'imaji nacojé quele achiñana rijhua'que'ena penaje yucuna marí:*  
(Mt 10.1-4; Mr 3.13-19)

<sup>12</sup> E caja Jesús jácho'oro yenuri i'ihuata nacojé, reyá i'imajemi ripura'acóloje Tupana hua'até penaje. Re ripura'ó Tupana hua'até pajluhuaja lapí quietana.

<sup>13</sup> Najme'taca ee rihuá'a ra'apiyatéjenajlo, ne'ejnacáloje richaje penaje. Ejomi ri'ihuapá ne'iyayá iyamá iphata ji'imaji nacojé quele achiñana, ne'emacáloje rihuacára'acarena penaje.

<sup>14</sup> Marí quele ne'emacá ri'ihuapacárena rijluhua: Simón. Ra'á rijló apú rií Pedro. Apú íi i'mari Andrés. Simón e'ehué ri'imacá. Ajopana i'imaño: Santiago, Juan, Felipe, Bartolomé, Mateo, Tomás, Santiago, quele. Apú Santiago ri'imacá. Alféomi chu i'irimi ri'imacá. Apú i'mari Simón. Ricá i'mari cananista naquiyana.

<sup>16</sup> Apú i'mari Judas. Santiago e'ehué ri'imacá. E caja penaje i'imacá Judas Iscariote. Nenoca Jesús i'imacá huacajé, ricá huá'ari ripinana Jesús i'imacá ejo, napatacaloje ricá penaje. Marí quele ne'emacá ri'ihuapacárena rijluhua ne'iyayá, ne'emacáloje ra'apiyatéjena penaje.

*Jesús jehuñña'ataca cajrú ina'uqué Tupana nacú yucuna marí:*  
(Mt 4.23-25)

<sup>17</sup> E caja Jesús huitúca'ari yenuri i'ihuata naquiyá ra'apiyatéjena hua'até. Tajnaño paláma'atani chojé. Re cajrú ina'uqué i'imacá ajopana, ajopana que. Nanaquiyana i'imaño Judea te'eré eyájena. Ajopana piño i'imaño pajimila Jerusalén eyájena, quele ne'emacá. Juni cha re iyamá pajimila. Apú íi Tiro, apú íi Sidón. Ricá pajimila i'ihuami chu ñacajélaruna i'imaño caja re najhua'até. Piyuque necá i'ijnaño rejo Jesús puráca'alo jema'ajé. Natámina i'imacaño i'ijnaño caja richaje, ra'apátacaloje nayaripune naliyá penaje.

<sup>18</sup> Ne'iyajena e'iyá jiñana pechu i'imacá. Rica'á ne'iyayá jiñana pechu.

<sup>19</sup> Ajopana natámina sápaño rinacu. Necá ritejmo'óta ripechu aú ja. Ñaquele piyuque natámina i'imacaño huátaño Jesús nacú sápacana, natejmo'otácoloje raú penaje.

*Palá ri'imajica ne'iyajénajlo; eyá ajopánajlo ri'imajé chapú. Riyucuna marí:*  
(Mt 5.1-12)

<sup>20</sup> Jesús iphari palámatani chojé. E riyacá'o ra'apiyatéjena chaje. Rimá najló:

—Re ina'uqué, nemá Tupánajlo: “Pa'á huañaté, huala'acáloje pihuátaca que penaje. Uncá meño'ojó huala'alá huecó pihuátaca que”. Marí que quemacáñojlo ri'imajé palá, Tupana i'imacale nahuacára'ajeri.

<sup>21</sup> Palani huani inajlo, huechi iná huátacachu Tupana huátaca que la'acana. Aú Tupana a'ajeri iná ñaté rila'acana aú. Palani huani ina'uqué camu'ují napechu i'imacachu me'etení, necá i'ichajeño i'imajica.

<sup>22</sup> Apala chapú ca'ajná ajopana ina'uqué pechu inacu, no'opiyá jema'ajeño i'imacale. Rijimaje ca'ajná nala'ajé itejena. Pu'uhuaré ca'ajná napura'ajico inacu. “Uncá ina'uquélaruna necá,” que ca'ajná nemájica inacu, no'opiyá jema'ajeño i'imacale. Palani ri'imajica ijlo marí que nala'ajica ee icá chapú, no'opiyá jema'ajeño i'imacale. Ina'uquéjloje penaje i'imacá nucá.

<sup>23</sup> Marí que nala'ajica ee icá, ipechu i'imá pu'ují ijluhua. Aú arápa'aje jeño'oqueja, palani huani nacaje i'imajicale ijlo je'echú chu. Ñaque caja a'ajútayami chuna naquiyana la'ajica chapú Tupana puráca'alo ja'apátajeñoimi chuna i'imajica.

<sup>24</sup> Chapú huani ri'imajica ijlo, cajrú le'ejepelájerunajlo. Marí eja'ahuá chu i'imacá quetánaja calé pu'ují ipechu i'imajica.

<sup>25</sup> Chapú huani ri'imajica ijlo, cajrú a'ajnejí i'imacárenajlo. Ica'ña'ajeño me'epejí panacu.

Chapú huani ri'imajica ijlo, me'etení i'ichacáñojlo. Ica'iyájeño, camu'ují ipechu i'imajicale.

<sup>26</sup> Apala cajrú ina'uqué pura'año inacu palá me'etení, uncale jema'alá no'opiyá. Chapú huani ri'imajica ijlo Tupana huajáica ina'uqué huacajé. Ñaque caja ichi'inami chuna naquiyana pura'acó palá pajlácachina nacú. Majojepe ne'iyajena quemájica nanacuhua: “Tupana puráca'alo ja'apátajeño huecá” que. Necá nacú ichi'inami chuna pura'aqueño palá.

*Ihuátacaloje íqui'ija chapú péchuruna inacu penaje yucuna marí:*  
(Mt 5.38-48; 7.12)

<sup>27</sup> Nupuráca'alo jema'ajéñojlo numá: Ihuata íqui'ija chapú péchuruna inacu. Ila'á caja palá necá.

<sup>28</sup> “Uncá ina'uquélaruna necá”, que ca'ajná nemájica inacu. Ipura'ó Tupana hua'até chapú la'acaño icá nacú.

<sup>29</sup> Naña'ajica ee icá pajimaya pajluhuáta'ama, ipajno'otá najló apojó pitari, naña'achí icá reyá ñaque caja. Najña'ajica ee icamichare iliyá, ra'apeje hua'ató a'á najló ricá.

<sup>30</sup> Nemájica ee ijlo, iyurícaloje najló nacaje penaje, iyurí najló ricá. Najña'ajica ee iliyá nacaje, imaniya najló, napa'atácaloje ijlo ricá penaje.

<sup>31</sup> Ila'á ajopana ina'uqué palá, ihuátaca nala'acá icá que caja.

<sup>32</sup> Ihuátacachu íqui'ija necaja calé, huátaño caja icá íqui'ija, uncá Tupana a'alaje ijlo rihuemí, uncale ila'alá palá raú. Ñaque caja uncá ina'uquélaruna huátaca íqui'ija palá péchuruna nanacu.

<sup>33</sup> Palá ca'ajná ila'acá ina'uqué, la'año caja icá palá. Necaja calé ila'acachu palá, uncá Tupana a'alaje ijló rihuemí, uncale ila'alá palá. Uncá ina'uquélaruna necá caja la'año ñaqué caja.

<sup>34</sup> Iya'atájica ee liñeru najloja calé, pa'atájeño ijló ricá rapumí chojé, uncá Tupana a'alaje ijló rihuemí, uncale ila'alá palá. Uncá ina'uquélaruna caja la'año ñaqué.

<sup>35</sup> Thuata íqui'ija chapú péchuruna inacu. Ila'á necá palá. Iya'atá najló liñeru. Ipechu i'imaníya nanacu: “¿Napa'ataje chi nojló ricá rapumí chojé?” Marí que nala'acana aú Tupana a'ajeri ijló palá ila'acare huemí. Ajopana chaje huani huacára'ajeri ricá Tupana. Ricá la'arí palá necá, uncá quemalaño rijló: “Palá pila'acá nucá” que. Rila'á caja palá chapú péchuruna rinacu. Ñaqué la'acaño i'imaño riyani.

<sup>36</sup> Ihue'epí ajopana ina'uqué mu'ují, Tupana hue'epica namu'ují que caja.

<sup>37</sup> Imaníya majopeja ina'uqué nacú: “Pu'uhuaré la'acaño necá” que. Raú uncá caja Tupana quemalaje inacu: “Pu'uhuaré la'acaño necá” que. Amó ajopana chaje, pu'uhuaré nala'acare icá liyá. Raú Tupana amájero caja ichaje pu'uhuaré ila'acare liyá.

<sup>38</sup> A'á ajopánajo nacaje. Raú Tupana a'ajeri caja ijló nacaje. Cajrú ra'ajica ijló, uncá huejapaja calé ra'ajica ijló. Uncá rinaquiyánaja calé ra'ajé ijló, piyunque ra'ajé ijló nacaje. Ajopánajo a'acá nacaje, que caja Tupana a'ajica ijló nacaje —que Jesús quemacá najló.

<sup>39</sup> Ri'imá piño marí yucu najló:

—Uncá meño'ojó apú mejlurú paco'otala apú mejlurú caja. Ripaco'otaquela ricá, pajñacánija na'acojla ulahuí chojé.

<sup>40</sup> Uncá huajé jehuíña'acaño iphátala nehuíña'atajeri pechu. Riñapátacaja nehuíña'atacana ejomi nephátaca nehuíña'atajeri pechu —que rimacá najló.

<sup>41</sup> Rimá piño najló marí que:

—Apú ca'ajná la'arí nacaje uncá quemachi paala. Raú pimá ca'ajná rinacu: “Pu'uhuaré la'ajeri ricá” que. Eyá picá ta, pu'uhuaré huani la'ajeri ca'ajná picá. E'iyonaja uncá pimalá pinacuhúa: “Pu'uhuaré la'ajeri nucá” que.

<sup>42</sup> Pu'uhuaré huani la'ajeri pí'imacachu, ¿meque ta pimacajla apú pinaquiyánajo: “Piyurí pu'uhuaré pila'acare piliyó” que? ¡Pajlácachi huani picá! Piyurí pu'uhuaré pila'acare piliyó pamineco. Ejéhami pihue'epíjica méqueca apú inaquiyánajo quemacana, riyurícaloje huejapa ñani pu'uhuaré rila'acare riliyó penaje.

*Nacaje ina'uqué la'acare aú iná hue'epí mecajenaca necá. Riyucuna marí:*

*(Mt 7.17-20; 12.34-35)*

<sup>43</sup> Uncá meño'ojó palani inarí a'ahuaná arúca'ala pu'uhuaré inarí icha que caja. Uncá meño'ojó caja pu'uhuaré inarí a'ahuaná arúca'ala palani inarí icha que caja.

<sup>44</sup> Richa aú iná hue'epí mecajeca a'ahuaná palani, mecajeca pu'uhuaré. Uncá meño'ojó cuncuná icha arúca'ala pipirí icha que caja. Uncá caja lucú arúca'ala cajmú icha que caja.

<sup>45</sup> Ñaqué caja iná hue'epica mecajenaca ina'uqué napuráca'alo aú. Palá péchuri pura'aró palani puráca'aloji nacú. Ri'ijnataca ripéchuhua palani nacaje nacú, que caja rimacá palá nacaje nacú. Eyá pu'uhuaré péchuri pura'aró pu'uhuaré puráca'aloji nacú. Ri'ijnataca ripéchuhua pu'uhuaré caje nacú que caja rimacá pu'uhuaré nacaje nacú.

*Iyamá paji la'ajeño yucuna marí:*

*(Mt 7.24-27)*

<sup>46</sup> Jesús quemari piño najló:

—¿Naje imá nunacu: “Hue'emacana” que? E'iyonaja uncá jema'alá no'opiyá.

<sup>47</sup> Ne'iyajena i'ijnáño nuchaje nupuráca'alo jema'ajé. Nupuráca'alo a'ajeño nanacójó i'imajeño palá. Chuhua nu'umajica ijló yucu, ihue'epicaloje méqueca no'opiyá jema'ajeño la'acá palá najlulhua raú penaje.

<sup>48</sup> Capechuni la'ari riñacaró i'imacá que caja no'opiyá jema'ajeño la'acá palá nanacuhúa raú. Marí que rila'acá riñacaré i'imacá: Pamineco jipa naquiyá ritára'ata riñacaré pana, ritára'acoloje camachá penaje. Ricá nacú rila'á riñacaré i'imacá. Cajrú juni ja'acó huacajé, ta'aqueni riñaca'alá iphaca riñacaré ja'apejé. Ta'aqueni huani ra'apaca riñacaré ja'apiyá. E'iyonaja uncá riñacaré cojno'olá raú, jipa nacú riñacaré pana tára'acole. Marí que rila'acale ricá palá, uncá ricapichalo raú. Ñaqué caja nupuráca'alo a'ajeño nanacójó la'acá palá nanacuhúa, no'opiyá jema'ajeño ne'emacale.

<sup>49</sup> Eyá ajopana piño jema'año nupuráca'alo. E'iyonaja uncá na'alá nanacójó ricá. Uncá paala ne'emajica, uncá pachá nema'alá no'opiyá. Apú la'acá riñacaré i'imacá que caja nala'acá chapú necó raú. Marí que rila'acá riñacaré i'imacá: que'epé e'iyaja ritára'ata riñacaré pana. Rinácuja rila'á riñacaré. Cajrú juni ja'acó huacajé, ta'aqueni riñaca'alá iphaca riñacaré ja'apejé. Raú riñacaré cojno'orí queee junápeje. Chapú huani ricapichaco raú. Caja quetana riyucuna.

## 7

*Jesús tejmo'ótaca romano naquiyana hua'até sápa jeri yucuna marí:*  
(Mt 8.5-13)

<sup>1</sup> Re Jesús jehuíña'atari ne'emacá Tupana nacú. Ejomi ri'ijná ají que pajimila Capernaum ejo.

<sup>2</sup> Re apú romano naquiyana i'imari. Surárana huacára'ajeri ri'imacá. Ritami huani, aquichaje huani, rijhua'até sápa jeri i'imacá. Iqui'ija rihuátacare ri'imacá.

<sup>3</sup> E'iyohuá que yucu iphaca ricarihuate nacú: "Jesús iphíchari majó" que. Raú rihuá'a Jesús maná, ri'ijnacáloje rejo rijhua'até sápa jeri tejmo'ótaje penaje. Rihuacára'a peñahuilana rihuá'aje. Judíona naquiyana ne'emacá.

<sup>4</sup> Aú ne'ejná, iphaño Jesús nacú. Iqui'i nahuátaca ri'ijnacá najhua'até, ritejmo'ótacaloje nahuacára'ajeri hua'ateje penaje. Aú nemá rijló:

—Palájne'equ huani huahuacára'ajeri. Ñaquele palani pa'acá riñaté.

<sup>5</sup> Iqui'ija rihuátaca huacá'ana. Aú calé ra'á liñeru najló i'imacá, nala'acáloje huahuacáca'alo ñacarelana penaje —que nemacá Jesusjlo.

<sup>6</sup> Raú Jesús i'ijnari najhua'até. Na'apá ají que a'ajná ño'ojó. Juca pani ne'emacá riñacaré ahua'á ee, nahuacára'ajeri huacára'ari iyamá rijhua'até i'imacáno Jesús jimajo. Palá pechu i'imacáno rinacu ne'emacá. Chocé rihuacára'a Jesús jimajo. Rimá najló:

—Marí que imájica nunacu rijló: "Hue'emacana, uncá nuhuátala pinacu cahuíla'acana. Uncá caja nuhuátala pimujlúca'aca nuñacaré chojé, nuchaje huani huacára'ajeri pi'imacale. Nopáña'aco huani no'opihuá pijló.

<sup>7</sup> Aú calé uncá nu'ujnalá nocó pijhua'até pura'ajó. Iléreyaja calé pihuacára'a ritejmo'otaco. Raú ja ritejmo'otájico.

<sup>8</sup> Re caja nuhuacára'ajeño. Surárana huacára'ajeri caja nucá. Numacachu apujlo: 'Pi'ijná ají ño'ojó' que, ri'ijná rejo. Numacachu apujlo: 'Majó pi'ijná' que, ri'ijnano caja nucá ejo. Nuhuacára'acachu nujhua'até sápa jeri la'acá nacaje, rila'á nacaje numacá rijló que —que rimacá najló, na'apátacaloje Jesusjlo ricá penaje.

<sup>9</sup> E caja ne'ejná Jesús jimajo. Nemá rijló nahuacára'ajeri quemacá najló que. Aú Jesús pechu i'imá rinacu: "¡Meque palá huani ripechu Tupana nacú. Caphí ripechu richojé, ra'acáloje riñaté penaje." E riyacá'o riyámojo, rápumi chu chira'ajeño chaje. Rimá najló:

—Caphí ripechu Tupana chojé, ra'acáloje riñaté penaje. Uncá nuphátala apú Israelmi chu laquénami naquiyana e'iyayá ripechu que péchuri —que Jesús quemacá najló.

<sup>10</sup> Reyá napa'ó piño napumí chuhua' nahuacára'ajeri ñacaré ejo. Amaño caja rijhua'até sápa jeri tejmo'otaco.

*Jesús macápo'oca ihuacajlomi i'irí yucuna marí:*

<sup>11</sup> Rejomi Jesús i'ijnari ají que a'ajná ño'ojó pajimila ejo. Pajimila íi i'imari Naín. Ra'apiyatéjena, cajrú ajopana hua'até, i'ijnáno caja rijhua'até.

<sup>12</sup> E caja riphá pajimila nacojé. Amari nahuáco'oco támijimi caichama chu támijimina ca'aquelana ejo. Cajrú pajimila eruna ja'apaño najhua'até. Ihuacajlomi i'irí tajnáñari ru'umacá. Ricaja calé, pajluhuaja ru'urí i'imacá.

<sup>13</sup> Jesús amari ruyaca ru'urí tami hua'até. Aú rihue'epí runacu camu'ují. E rimá rojló:

—Piyániya.

<sup>14</sup> E ri'ijná caichama ahua'ajé. Eyá risapa rinacu. Raú rihuáco'ojeño tajnaño. E Jesús quemari támijimijlo:

—Hualijímaca, pácho'o.

<sup>15</sup> Aú ja taca'arí penájemi jácho'oro yá'ajo. Ejéchami riqueño'oca pura'acajo. E Jesús a'arí ralolo ricá.

<sup>16</sup> Marí que namaca aú piyuque re i'imacáno quero'oño. Palá napura'acó Tupana nacú. Ne'iyajena quemáño marí que pajlocaca:

—Ajopana Tupana puráca'alo ja'apátajeño chaje cari huajhua'até. Caja Tupana iphari majó ríle'ejena ina'uqué ñaté a'ajé —que nemacá pajlocaca.

<sup>17</sup> Cajrú huani Jesús yucuna jema'acó Judea te'eré e'iyohuá. Rahua'á i'imacáno, ajopana te'eré e'iyohuá hua'ató, riyucuna jema'acó i'imacá.

*Juan bautizar la'ajeri huacára'aca iyamá ra'apiyatéjena Jesús i'imacá ejo yucuna marí:*  
(Mt 11.2-19)

<sup>18</sup> Juan ja'apiyatéjena i'imaño Juanjlo piyuque nacaje Jesús la'acare yucuna. Aú rimá iyamá nanaquiyánajlo, ne'ejnacáloje Jesús amaje penaje.

<sup>19</sup> Rimá najló:

—Eco iquejá'a nojló riyucuna riliyá. Imicha rijló marí que: “¿Picá chi picá nemacare nacú, iphájeri majó ina'uqué i'imatájeri penaje? Apú ca'ajná huaícha. ¿Meque chi ricá?” que imájica rijló —que Juan quemacá najló.

—Je.

<sup>20-21</sup> Raú ne'ejná ají que a'ajná ño'ojó. Iphaño Jesús nacú. Iqui'iruna natámina tejmo'ótacana nacú ri'imá. Ra'apata natámina naquiyá nayaripune. Rica'á caja jiñana pechu cajrú ina'uqué e'iyayá. Ra'apata caja me'jlucaji mejluruna liyá. Marí caje la'acana nacú ri'imacá ee nephá rinacu. E nemá rijló:

—Juan Bautizar la'ajeri huacári'ichari huecá majó. Rimicha pinacu: “¿Picá huani chi picá nemá nacú i'imacá, iphájeri majó ina'uqué i'imatájeri penaje? Apú ca'ajná huaícha. ¿Meque chi ricá?” que rimíchaca pinacu —que nemacá rijló.

<sup>22</sup> E Jesús quemari najló:

—Ipa'ó rejo, i'imichachi Juanlo riyucuna méqueca amíchaca nula'acá huajé. Nacaje nohuíña'atacare nacú yucuna hua'ató i'imajé caja rijló. Eco imá rijló marí que nunacu: “Mejluruna liyá ra'apata mejlucaji, namácaloje penaje. Uncá meño'ojó ja'apálaño ril-amá'ata, na'apácaloje penaje. Nanapona patáca'atacaronajlo ripala'atá palá huani nanapona najló. Me'ejhuiruna liyá ra'apata caja me'ejhuí caje, nema'acáloje reyá penaje. Támijimina naquiyana rimacápo'o caja. Camu'ují la'acáñojlo ri'imá Tupana i'imataca ina'uqué capichácajo liyá yucuna”, que imájica rijló nunacu.

<sup>23</sup> “Pu'ují péchuruna necá uncá huani la'alaño ujhuí napéchuhua nuliyá”, que imájica Juanlo —que rimacá najló.

—Je —que nemacá.

<sup>24</sup> E napa'ó. Ejomi Jesús i'imari ripuráca'alo jema'ajéñojlo Juan yucuna. Rimá najló marí que:

—Icá i'ijnaqueño pu'uteni meñaru chojé Juan puráca'alo jema'ajé. ¿Naje chi i'ijnaqué rejo? ¿E i'ijnacá iyamá chuhua péchuri chaje? Uncá iyamá chuhua péchuri calé ricá.

<sup>25</sup> ¿Palá a'arumacari amaje chi i'ijnaqué richaje? Uncá palá nojé a'arumacari calé ricá. Icá hue'epiño palá a'arumacáruna nacojé. Nahuacára'ajeño ñacaré chiyájena necá.

<sup>26</sup> Eta ¿naje chi i'ijnaqué ramaje? ¿Amácaloje Tupana puráca'alo ja'apátajeri penaje chi i'ijnaqué ramaje? Ricá jo'ó ri'imacá. Tupana puráca'alo ja'apátajeri penájemi ricá.

<sup>27</sup> Ricá nacú Tupana puráca'alo lana'aquejami quemari marí que:

Nucá huacára'ajeri pajluhuaja ina'uqué pitucumá.

Ricá quemájeri ina'uquejlo pipé, napala'atácaloje napéchuhua pu'uhuaré nala'acare liyá penaje, que Tupana quemacá ri'irijlo Juan nacú uncá chiyó ri'imá i'imacá.

<sup>28</sup> Jema'á marí: —que Jesús quemacá—. Uncá na i'imalá huayámojo Tupana puráca'alo ja'apátajeríomi chuna e'iyayá, chá'atari Juan. Eyá je'echú chu uncá ñaque calé ricá. Na'apejé i'imacá je'echú chu, chá'atari Juan. Je'echú churuna huacára'ajeri Tupana.

<sup>29</sup> Juan i'imacá Tupana yucuna ina'uquejlo huacajé, cajrú ina'uqué jema'año ripuráca'alo. Liñeru ña'ajeño ne'emacánajlo hua'ató jema'año caja ripuráca'alo. Necá a'año nanacojé Tupana puráca'alo. Ñaque caja ajopana i'imacá. Aú calé Juan la'arí necá bautizar.

<sup>30</sup> Eyá fariséona naquiyana, Tupana puráca'alo nacú jehuíña'atajeño naquiyana, quele uncá huátalaño nacaje Tupana la'acare a'acana nanacojé. Aú calé uncá nemalá Juanlo, rila'acáloje bautizar necá penaje —que Jesús i'imacá najló riyucuna.

Rimá piño najló marí que:

<sup>31-32</sup> —Marí que i'imacaño ina'uqué me'etení: Yuhuaná queja necá. Yá'año le'ejepelaji ñacarelana chu cátaçajo nacú necá. E nahuá'a ajopana najhuáque'enajlo. Nemá najló: “Huapho'ó quehuirí chojé ijlo. E'iyonaja uncá jarápa'ala. Huatani caja ijlo yáleje, ipechu la'acáloje camu'ují raú penaje. E'iyonaja uncá ipechu la'aló camu'ují raú. Uncá caja iyala raú”, que nemacá najló. Ñaque caja ina'uqué naquiyana la'acá me'etení, majopeja aca'acá huamaná. Cayucújne'equena huani icá.

<sup>33</sup> Pamíneco Juan i'imacá ijlo Tupana yucuna. Ri'itajico ra'ajné liyá, ripechu i'imacáloje Tupana nacuja penaje. Uncá caja ri'iraqué nacaje jalá amúra'atacanami. E'iyonaja ricá nacú imá: “Jiñá pechu re'iyá” que.

<sup>34</sup> Eyá nucá, ina'uquejloje penaje i'imacá nucá. Ajopana ajñaca na'ajnehuá que caja nojñaca no'ojnehuá. Ñaque caja nu'uracá nacaje jalá amúra'atacanami. Nunacu imá: “Cahuale'equé huani ricá. I'iracachi ricá. Uncá ina'uquélaruna huáque'ehue caja ricá. Liñeru ña'ajeño ne'emacánajlo huáque'ehue caja ricá”, que imacá nunacu.

<sup>35</sup> E'iyonaja calé Tupana ja'apiyá jema'ajeño hue'epiño nacaje Tupana la'acare nacojé.

*Jesús i'imacá Simón ñacaré chu yucuna marí:*

<sup>36</sup> Pajluhuaaja fariséona naquiyana quemari Jesusjlo, ri'ijnacáloje ra'ajnehuá ajñaje ri-jhua'até penaje. Raú ri'ijná rejo. Riyá'o ra'ajnehuá ajñacana nacú rijhua'até.

<sup>37</sup> Ricaja caja pajimila e apa'ahuelo i'imayo ñuju'uqueru, manai péchuru. Rucá jema'ayó Jesús ajñaca ra'ajnehuá fariséona naquiyana hua'até yucuna. Aú calé ru'ujná rejo, iphayo Jesús nacú. Huúluru i'imari rucapi. Jipa alabastro naquiyá la'acanamí huúluru i'imacá rucapi. Nacaje jilami, pu'umé jamarí, i'imari richu.

<sup>38</sup> Rucá iphayo Jesús huajlé chojé hua'até que ruyaca. E rujláma'o ri'imá nacojé. Rojata ri'imá rujlú jalá aú. Quéchami rolácaca rinaquiyá ruhuilá aú. Quéchami ruchíño'ocá ri'imá naquiyá. Ejomi roco'ó nacaje jilá, pu'umé jamarí, ri'imá nacojé.

<sup>39</sup> Ilé fariséona naquiyana, yucupé'acare Jesús i'imacá, amari méqueca rula'acá ri'imacá. Aú ripechu i'imá: "Tupana puráca'alo ja'apátajeri ri'imaquela, rihue'epícajla mecajeruca quelerú inanaru ta, ñuju'uqueru, uncá ina'uquélaru ta rucá." Jesús hue'epiri méqueca ri'ijnataca ripéchuhua rinacu.

<sup>40</sup> Aú Jesús quemari rijló:

—Simón, nuhuata nacaje nacú quemacana pijló.

—Je. Pimá nojló, Huehuíña'atajari —que rimacá.

<sup>41</sup> Jesús i'imari rijló yucu marí que:

—Iyamá ina'uqué i'imichaño. Lehuérichaño nacarihuátejlo cajrú huani. Apú lehuérichari rijló íqui'ija huani liñeru aú. Risápacajla iyamá jarechí quetana, ra'atácaloje rilehuéricare rijló huemí penaje. Apú lehuérichari rijló huejápaja quemachí. Ricá sápacajla iyamata queri quetánaja, ra'atácaloje rilehuéricare huemí penaje.

<sup>42</sup> Uncá meño'ojó na'alacha rijló liñeru nalehuérichaje huemí. Aú nacarihuate lamá'achiyari necá raú.

Marí que ri'imacá rijló yucu. Ejomi rimá Simonjlo:

—Iyamá ne'emacá. ¿Mecaje pechu i'imari richaje huani pu'ují rinacu?

<sup>43</sup> —Capí. Apala ilé lehuérichari cajrú huani rijló, pechu i'imichari pu'ují huani rinacu —que Simón quemacá.

—Que jo'ó —que Jesús quemacá rijló.

<sup>44</sup> Eyá Jesús yacá'aro apa'ahuelo chaje. Rimá Simonjlo:

—¿E pamaca marirú? Nuphíchaca piñacaré chojé aú uncá pa'alacha nojló juni, nupácaloje nu'umá naquiyá raú penaje. Eyá marirú ejáchiyayo nu'umá rujlú jalá aú. Quéchami roláquichaca ricá ruhuilá aú.

<sup>45</sup> Uncá caja pajalácalacha nucá nujimá chiyá chiño'ocana aú. Eyá marirú iphíchayo, chíño'ochayo nu'umá naquiyá cajrú. Nu'umá naquiyá chíño'ocana nacuja rucá me'etení.

<sup>46</sup> Uncá caja paco'olacha nacaje jilá nuhuilá e'iyajé. Eyá marirú ac'o'ochayo nu'umá nacojé nacaje jilá, pu'umé jamarí.

<sup>47</sup> Marí que ruli'ichaca nuyálepána, nomácole ruchaje cajrú huani rumanaicho rula'acare liyá, pu'uhuaré rula'acare liyá. Ñaquele pu'ují huani rupechu nunacu. Re ca'ajná ajopana. Nala'á pu'uhuaré huejápaja. Nomó nacaje pu'uhuaré nala'acare liyá. Necá penaje la'año huejápaja caja nuyálepána. Huejápaja caja pu'ují napechu nunacu —que Jesús quemacá Simonjlo.

<sup>48</sup> E Jesús quemari rojló:

—Caja nomicho pichaje pimanaicho pila'acare liyá, pu'uhuaré pila'acare liyá.

<sup>49</sup> Raú rijhua'até yá'acaño naquiyana quemáño pajlocaca:

—¿Naca ca'ajná ricá? Amaro iná chaje iná manaicho iná la'acare liyá, pu'uhuaré iná la'acare liyá.

<sup>50</sup> Jesús quemari piño rojló:

—Caja Tupana i'imachiyari picá capichácajo liyá, pipechu i'imacale caphí nochojé. Pipechu i'imá nunacu: "Ricá amaro iná chaje pu'uhuaré iná la'acare liyá". Chuhua pi'ijná palá ca'ajno.

## 8

*Inaana a'acá Jesús ñaté yucuna marí:*

<sup>1</sup> E caja apú huacajé piño Jesús ja'apari ají que a'ajná ño'ojó apú pajimila nacojé, apú pajimila nacojé que. Pajimila cajruni nacojé, pajimila camu'ujuni nacojé que ra'apaca Tupana yucuna i'imacana nacú. Tupana i'imatari ina'uqué capichácajo liyá, ne'emacáloje rijhua'atéjéna raú penaje. Riyucuna ri'imaqué najló. Ra'apiyatéjéna i'ijnáño caja rijhua'até. Iyamá iphata ji'imaji nacojé quele ne'emacá.

<sup>2</sup> Inaana naquiyana i'ijnáño caja rijhua'até. Rica'acárena ne'iyayá jiñana pechu nanaquiyana i'imacá. Necá i'ijnáño caja rijhua'até. Ñaque caja ajopana ritejmo'otacarena

i'ijñaño rihhua'até. Quele necá chira'año rihhua'até. Apa'ahuelo i'imayo María Magdalena. Jesús ca'acáreru e'iyayá iyamá cuhuá'ata quele jiñana pechu i'imacayo ru'umacá.

<sup>3</sup> Apa'ahuelo i'imayo Juana. Cuza yajalo ru'umacá. Cuza i'imari Herodes hua'até sápa jeri. Apa'ahuelo i'imayo Susana. Ajopana i'imaño caja najhua'até. Cha'apá ne'emacá. Necá piyuque a'aqueño Jesús ñaté. Na'aqueñ ríjló, ra'apiyatéjenajlo hua'até a'ajnejí majopeja nale'ejó aú.

*Nacaje icha ijí ejátajeri yucuna marí:*

(Mt 13.1-9; Mr 4.1-9)

<sup>4</sup> E caja cajrú ina'uqué jahuacaco Jesús nacojé. Apú pajimila eyá, apú pajimila eyá que nephaca rinacu. Cajrúchami ina'uqué jahuacaco rejé i'imacá. E ri'imá najló yucu, rehuíña'atacaloje necá Tupana nacú raú penaje. Marí riyucuna:

<sup>5</sup> –Pajluhuaaja ina'uqué i'ijichari nacaje icha ijí ejátaje. Riqui'ichá richa ijí te'erí lamá'ataqueja jimahua. Rejátacana nacuja ri'ijichá. Richa ijí riqui'ichaje naquiyana ja'acharo iñe'epú chojé. Richuhúa ina'uqué ja'apaño richó. E caja cupira'aphana iphíchaño rajmílo'oje.

<sup>6</sup> Apú richa ijí riqui'ichaje naquiyana ja'acharo jipa nacojé. Huejápaja te'erí i'imichari rinacu. Riphíchaca ejomi rimeríyi'icho, uncale isani te'erí i'imalá jipa nacú.

<sup>7</sup> Apú richa ijí riqui'ichaje naquiyana ja'acharo pu'uhuaeni jimichi e'iyajé. Pu'uhuaeni jimichi iphíchari nacaje icha ijí rejáchiyaje hua'até. Pu'uhuaeni jimichi tahuá'añachari ricá. Raú rihuajri'ichá re'iyajé.

<sup>8</sup> Eyá apú richa ijí naquiyana ja'acharo palani te'erí e'iyajé. Ilé iphíchari palá. Palá ritahuá'ichaco. Palá caja rarúqui'ichaca; que'iyapé rarúqui'ichaca. Re'iyajé arúqui'ichari cien ca'alá.

Marí que Jesús i'imacá yucu najló. Ejomi caphí rimacá najló:

–Icá que'ehuirúnajlo numá, a'á inacojó riyucuna.

*Jesús quemari ne'iyajéjenajlo nájeca ri'imacá yucu ina'unquejlo. Riyucuna marí:*

(Mt 13.10-17; Mr 4.10-12)

<sup>9</sup> Caja ri'imá najló yucu. Ejomi ra'apiyatéjena quemañ ríjló:

–¿Meque quemacánaca chí cari yucu pi'imichaje huajló huajé?

<sup>10</sup> Rimá najló:

–Me'echuje ina'unquejlo méqueca Tupana la'acá, ina'uqué naquiyana i'imacáloje rihua'atéjena penaje. E'iyonaja Tupana la'arí ipechu palá, jema'acáloje penaje. Eyá ajopánajlo me'echuje jo'ó ricá. Nu'umá yucu najló, nohuíña'atacaloje necá Tupana nacú raú penaje. E'iyonaja uncá nahue'epila meque quemacánaca ricá riyucuna jema'acana aú. Uncá caja nahue'epila meque quemacánaca nacaje namácare.

*Jesús jehuíña'ataca necá riyucuna nacú yucuna marí:*

<sup>11</sup> E rimá najló:

–Marí que quemacánaca ricá: Richa ijí rica'acare te'erí jimahua rejátacana nacú, Tupana puráca'alo na'apátacare ina'unquejlo que caja ricá.

<sup>12</sup> Richa ijí naquiyana ja'aró iñe'epú chojé. Ñaque caja riyucuna jema'ajeño naquiyánajlo ricá. Nema'á riyucuna. E'iyonaja Jiñá Ch'i'ináricana ca'arí napechu naquiyá Tupana puráca'alo nema'acare. Rica'á napechu naquiyá ricá, napechu i'imacá piyá caphí Tupana chojé ne'emátajeri penaje.

<sup>13</sup> Eyá richa ijí naquiyana ja'aró jipa nacojé, huejapa te'erí i'imacare nacojé. Mequetánaja calé ríjña'á panacu riphaca ejomi. Ñaque caja ina'uqué naquiyánajlo ricá. Nema'á Tupana puráca'alo. Pu'ují napechu la'acó raú. Mequetánaja calé napechu i'imacá palá rinacu. Nahuátacale Tupana puráca'alo ja'apiyá i'imacana, ajopana ca'ajná la'año necá chapú. Napura'ó ca'ajná nanacu pu'uhuaré. Namá ca'ajná chapú caje yajhué. Marí caje aú nayurí naliyó ricá, uncale napechu i'imalá caphí najluhua.

<sup>14</sup> Eyá richa ijí naquiyana ja'aró caja pu'uhuaeni jimichi e'iyajé. Riphaca ejomi rihuaja'acá re'iyajé. Uncá rarúca'ala. Ñaque caja ina'uqué naquiyánajlo ricá. Nema'á Tupana puráca'alo. Naqueño'ó ra'apiyá i'imacana. E'iyonaja cajrú na'acá nanacojó nacaje marí eja'ahuá chu i'imacare. Ñó'ope liñeru, le'ejepelaji, caje macá nahuacata najluhua. Ricá nahue'epí natucumó. Marí que péchuruna ne'emacale, uncá na'alá nanacojó Tupana puráca'alo, nala'acáloje palá ra'apiyá i'imacana aú penaje.

<sup>15</sup> Eyá richa ijí naquiyana ja'aró palani te'erí e'iyajé. Riphá, ritahuá'o, rarúca'ala palá. Ñaque caja ina'uqué naquiyánajlo ricá. Nema'á Tupana puráca'alo, nahue'epí caja meque quemacánaca ricá, na'á caja nanacojó ricá. Uncá caja naya'aló ra'apiyá i'imacana nacú. Raú calé nala'á palá ra'apiyá i'imacana aú.

*Iná camaré yucuna marí:*

(Mr 4.21-25)

<sup>16</sup> Iná lucúna'acachu iná camaré, uncá iná yá'atala ricá i'ichi lájma'ataqueja ja'apejé. Uncá caja iná yá'atala ricá iná camané ja'apejé. Yenú iná yá'ata ricá, pají chojé mujlúca'ajeño amácaloje ricamare chojé penaje.

<sup>17</sup> Re Tupana puráca'alo naquiyana me'etení, me'echuje ricá ina'uquejlo. Quéchami nahue'epíjica rinacojé.

<sup>18</sup> Ñaquele jema'á palá. Ra'apiyá jema'ajeño pechu rila'ajé palá, nahue'epícaloje richaje, richaje, que rinacojé penaje. Eyá necá, uncá jema'alaño ra'apiyá, naliyá Tupana ña'ajeri ricá huejápaja nahue'epicare nacojé. Napechu i'imá nanacuhúa: "Huahue'epicare ricá" que. E'iyonaja uncá ñaque' calé napechu nacú ricá.

*Jesús jaló, rijmerémina, quele i'ijnacá Jesús amaje yucuna marí:*

(Mt 12.46-50; Mr 3.31-35)

<sup>19</sup> Pachu Jesús i'imari cajrú ina'uqué hua'até. E Jesús jaló, rijmerémina, quele iphaño rejo. Nahuata rijhua'até pura'acano. Cajrú ina'uqué nacojé uncá meño'ojó nephala rinacu.

<sup>20</sup> E apú quemari Jesusjlo:

—Paló iphíchayo pejena hua'até. Nahuá'icha pimaná, pi'ijnacáloje rejo penaje.

<sup>21</sup> E Jesús quemari najló:

—Re ina'uqué, nema'á nupuráca'alo. Nala'á caja numacá que. Necá calé nojena que, noló que.

*Jesús quemari carenajlo, ra'apaca piyá yucuna marí:*

(Mt 8.23-27; Mr 4.35-41)

<sup>22</sup> Muni que Jesús huitúca'aca jita chojé ra'apiyatéjena hua'até. Rimá najló:

—I'ijná huacuhúa'achi caesa pa'anajo pitá.

Aú nacuhúa'a.

<sup>23</sup> Nacuhúa'aca nacú Jesús camátaro. Ejéchami mana'í chiyó carená i'imacá nachá caphí huani. Carená yocola amo'oró jita chojé cajrú juni. Ujú caje chiyó na'acojla junápeje raú.

<sup>24</sup> Yehuíchami na'acó junápeje napótaca Jesús, nemá rijló:

—Huehuíña'atajери, chuhuaca huejaca.

Raú Jesús jácho'oro. Raca'á carená, juni hua'até. Raú carená mata'aró, juni piya hua'até. Uncá huani riyoco'oló rejomi.

<sup>25</sup> E rimá ra'apiyatéjenajlo:

—¿Naje chi uncá ipechu i'imalá caphí nochojé?

Quero'ocajo nacú ne'emá. Napechu i'imá: "¡Meque piyuque huani rihue'epica!"

Nemá pajlocaca:

—Ripuráca'alo aú carená, juni hua'até jema'ari ra'apiyá.

*Jesús ca'acá apú e'iyayá jiñana pechu yucuna marí:*

(Mt 8.28-34; Mr 5.1-20)

<sup>26</sup> E caja nephá pa'anajo pitá, Gerasa te'eré ejo. Galilea te'eré loco'opani ricá.

<sup>27</sup> Narúca'o. E Jesús jácho'oro jita chiyá. E apú ina'uqué iphari rinacu. Pajimila eyaje ri'imacá. Caja júpicha Jiñana pechu i'imacare re'iyá ri'imacá. Aú richira'acó ma'arumacaru i'imajica. Uncá caja ri'imaqué pají chu. Támijimina ca'aquelana ehujaja ri'imaqué.

<sup>28</sup> Ricá iphari Jesús nacú. Ramaca aú Jesús, rijláma'o ri'imá nacojé. Caphí rimacá rijló:

—¿Naje picahuíla'a nunacu? Tupana, je'echú churí i'irí picá. Jesús picá. Pijló numá, pila'aníya nucá chapú huani me'etení.

<sup>29</sup> Marí que rimacá Jesusjlo i'imacá, Jesús quemacale jiñá péchujlo, ra'apácaloje re'iyayá penaje. Pulapé jiñá pechu patajica ilé ina'uqué. Yurí huani ri'imajica raú. Ñaquele na'á ajopana ramájeri penaje i'imacá. Nepo'otá ricá curete aú riyate'ela naquiyá, ri'imá naquiyá hua'até. E'iyonaja rimata'atá curete. Ejomi jiñá pechu huá'ari ricá ají que pu'uteni meñaru chojé. Re Jesús iphátari ri'imacá.

<sup>30</sup> E Jesús quemari rijló:

—¿Na píí?

—Nuí íqui'iruna.

Marí que rimacá rijló, íqui'iruna jiñana pechu i'imacale re'iyá.

<sup>31</sup> Jiñana pechu quemáño Jesusjlo:

—Pihuacára'aníya huecá ulahuí uncá tajáca'alo i'imalá chojé.

<sup>32</sup> A'ajnare que cajrú je'eruna pircana chira'año yenuri nacuhúa na'ajnehuá culacana nacú. Mahuó jiñana pechu la'acá ricá. Nemá rijló:

—A'ajnaruna je'eruna e'iyajé pihuacára'a huecá.

—Je —que Jesús quemacá najló.



<sup>33</sup> Raú jiñana pechu jácho'oño re'iyayá je'eruna piracana e'iyajé. Jiñana ja'acó aú ne'iyajé je'eruna jecho'oño ají que a'ajná ño'ojó. Yenuri ji'ihuátaya na'ó ají que caesa acojé. Rejeja nacapichó piyuqueja junápeje.

<sup>34</sup> Nalamára'ajeño penájenami amaca aú nacapichaco neñaó reyá. Ne'emá riyucuna rehuá i'imañañojlo, pajimila erúnajlo hua'até.

<sup>35</sup> Raú ne'ejná ramaje, iphaño Jesús nacú. Amaño ilé ina'uqué, jiñana pechu i'imaicare e'iyá penájemí. Re riyá'o Jesús ji'ilá. Ca'arumacani ri'imacá. Palá caja ripechu i'imaquí. Marí que namaca aú ricá naquero'ó.

<sup>36</sup> Re i'imañaño amaño maapami que Jesús ca'acá jiñana pechu re'iyayá. Necá penájena i'imaño huajé iphácañojlo riyucuna.

<sup>37</sup> Piyuqueja Gerasa te'eré ehuájena quero'oño Jesús piyá cajrú, aú nemá rijló:

—Pácho'o huate'eré naquiyá.

—Je —que rimacá.

E Jesús huitúca'ari piño jita chojé, ripa'acóloje penaje.

<sup>38</sup> Ejéchami, rica'acare e'iyayá jiñana pechu penájemí, huátaca mahuó Jesús hua'até i'ijnacana. E'iyonaja Jesús quemari rijló:

<sup>39</sup> —Pipa'ó piñacajela ejo, pi'imacáloje méqueca Tupana la'acá palá picá yucuna najló rehuá penaje.

—Je —que rimacá.

E ripa'ó. Ri'ijná piyuque pajimila nacuhá riyucuna i'imañana nacú najló.

*Jesús macápo'oca Jairo itu yucuna. Quecha apa'ahuelo tejmo'otaco Jesús a'arumacá nacú sápacana aú yucuna marí:*

*(Mt 9.18-26; Mr 5.21-43)*

<sup>40</sup> E caja Jesús iphari piño rapumí chuhúa caesa pa'anajo pitá. Pu'ují napechu i'imaquí namaca aú ricá. Re ne'emá rihuátacana nacú.

<sup>41</sup> E caja apú iphari rinacu. Jairo rií i'imaquí. Nahuacáca'alo ñacarelana chiyá huacára'ajeri ri'imacá. Riphá Jesús nacú. E rijláma'o Jesús ji'imá nacojé, rimá rijló:

—Pila'á nojló nacaje. Pi'ijná nuñacaré ejo, pitejmo'óchiyachi nutu nojló.

<sup>42</sup> Aquíchajeru huani rucá. Uncá apa'ahuelo i'imalá, rucaja calé pajluhuájaru nutu. Iyamá iphata ji'imaji nacojé quele jarechicha rucá —que rimacá rijló.

Aú Jesús i'ijnari rijhua'até. Cajrú ajopana i'ijnáño caja rijhua'até. Cajrú netaca Jesús cha.

<sup>43</sup> Najhua'até caja apa'ahuelo ja'apayo, rutami caja ru'umacá. Jirá ja'apáqueri runaquiyá. Caja iyamá iphata ji'imaji nacojé quele jarechí quietana ru'umacá rijhua'até. Ruca'aque piyuque ruliñerute rupusána'acana huemí. E'iyonaja ñaqueja hua'ateja ru'umaqué.

<sup>44</sup> Ro'opá najhua'até. E ru'ujná ají que ina'uqué ihuami chiyá Jesús loco'opani. Rutejmo'ocóloje penaje, rusapa ra'arumacá ji'imá nacú. Rejeja jirá ja'apácare runaquiyá mata'aró.

<sup>45</sup> E Jesús quemari najló:

—¿Na sápitchari nunacu?

—Uncá nucá calé —queja nemacá piyuqueja.

Eyá Pedro quemari rijló:

—Huehuíña'atajeri, cajrú ina'uqué ichiyaca pichá. Eta pimá: “¿Na sápitchari nunacu?” que.

<sup>46</sup> Jesús quemari najló:

—Nápajaca sápitchayo nunacu. Nuhue'epí nutejmo'óchiyaca pajluhuájaru inanaru nupechu aú.

<sup>47</sup> Sápayo rinacu pechu i'imá: “Caja rihue'epicha méqueca nucá.” Cajrú rucurúcaca hua'até ru'ujná rijimajo. Rutára'o ru'urúpachi aú rijimaje. Re piyuque i'imañaño ahua'á ru'umá riyucuna rijló nájeca rusápaca ra'arumacá nacú. Rumá caja najló méqueca rutejmo'otaco raú.

<sup>48</sup> E Jesús quemari rojló:

—Caja pitejmo'ochiyo, pipechu i'imacale caphí nochojé. Pipechu i'imichá nunacu: “Ricá tejmo'ótajeri nucá” que. Aú calé pitejmo'ochiyo. Chuhua pi'ijná ca'ajno, pipechu i'imá palá.

<sup>49</sup> Marí que rimacá rojló ee apú iphari nanacu. Jairo ñacaré chiyaje ri'imacá. Rimá Jáirojlo:

—Caja pitu taqui'ichayo. Caja rupechu capícharo. Uncá na penaje calé picahuíla' Huehuíña'atajeri nacú ruchaya.

<sup>50</sup> Jesús jema'arí méqueca rimacá rijló. Aú rimá Jáirojlo:

—Pihuó ca'aniyo, pila'á pipéchuhua caphí nochojé. Pitu i'imajeyo.

<sup>51-53</sup> E na'apá piño, iphaño riñacaré ejo, amaño cajrú nahuinano la'ajeño i'imaquí re. Cajrú nala'acá nahuinano rucá. E Jesús quemari najló:

—Iyániya rujhua'até. Uncá rutaca'alacha, rucamáchijacoja calé.

Raú ne'echá rinacu, nahue'epícale caja rutaca'acá i'ímacá. E rimujlúca'a támijimi i'ímacare ucapú chojé. Uncá riyurila ajopana mujlúca'aca rijhua'até. Pedro, Santiago, Juan, rora'apami, rolomi, quele ja calé riyurí mujlúca'aca rijhua'até.

<sup>54</sup> E Jesús iphari támijimi ahua'ajé, patarí rucá ruyáte'ela naquiyá. Caphí rimacá támijimijlo:

—Yuhualó, pácho'o.

<sup>55</sup> Raú ja rócho'o. E Jesús quemari ajopánajlo:

—A'á rojló a'ajnejí, rojñachi.

<sup>56</sup> Ruchi'iná pechu i'ímá: “¡Meque piyuque huani la'acá ricá!” E rimá najló:

—Pa. I'imaniya riyucuna ajopánajlo.

## 9

*Jesús huacára'aca ra'apiyatéjena i'ímacá Tupana yucuna ajopánajlo, ajopánajlo que yucuna marí:*

(Mt 10.5-15; Mr 6.7-15)

<sup>1</sup> E caja Jesús quemari ra'apiyatéjenajlo, nahuacácoloje rinacojé penaje. Iyamá iphata j'i'imaji nacojé quele ne'emacá. E nahuacó rinacojé. E ra'á najló pechuij, naca'acácoloje jiñana pechu ina'uqué e'iyayá raú penaje. Raú caja natejmo'ótacaloje natámina que'iyapejé nayaripune chiyá penaje.

<sup>2</sup> Rihuacára'a necá, ne'emacácoloje Tupana yucuna ajopánajlo penaje, Tupana i'ímacácoloje nahuacára'ajeri penaje. Rihuacára'a caja necá, natejmo'ótacaloje natámina penaje.

<sup>3</sup> Rimá najló:

—Majopeja i'ijnajica. Ijña'aniya inane ijhua'ató, icutihuare, itulané, a'ajné, liñeru, caje. Pajluhuaaja a'arumacá chuja i'ijnajé.

<sup>4</sup> Pajimila e iyuró apú hua'até riñacaré chu. Rijhua'ateja iyurejo re i'imajica quetana.

<sup>5</sup> Uncájica ee pajimila eruna huátaño icá re, iñaca'á j'i'ima'ulá naquiyá mu'upé najimaje jácho'ojico reyá huacajé. Nahue'epícaloje raú pu'uhuaré la'ajéñoca necá, uncale nahuátala icá —que rimacá najló.

—Je —que nemacá.

<sup>6</sup> Aú nácho'o reyá. Ne'ejná aji que a'ajná ño'ojó apú eyá, apú eyá que. Ne'emá Tupana i'imataca ina'uqué capichácajo liyá yucuna najló. Natejmo'óta caja natámina.

*Méqueca Herodes pechu i'ímacá Jesús nacú yucuna marí:*

(Mt 14.1-12; Mr 6.14-29)

<sup>7</sup> Piyuque nacaje Jesús la'acare rehuá yucuna jema'acó cajrú rehuá. Nahuacára'ajeri Herodes jema'arí caja riyucuna. Ne'iyajena quemaño Jesús nacú:

—Juan ca'ajná ricá. Caja rimacápo'o rapumí chuhua' piño.”

Marí caje aú uncá Herodes hue'epila na huánica Jesús i'ímacá.

<sup>8</sup> Ajopana piño quemaño Jesús nacú:

—Tupana puráca'alo ja'apátajeri, Elíasmi chu, macápo'ocaro penájemi ricá. Ricá quele iphari majó.

Ajopana piño quemaño rinacu:

—Pajluhuaaja Tupana puráca'alo ja'apátajeñomi chuna naquiyana ricá, macápo'ocaro.

<sup>9</sup> Eyá Herodes quemari rinacu:

—Nucá huacára'ari Juanmi chu núru'upi mata'acana i'ímacá. Eta, ¿nata quele nemá nacú: “Piyuque huani la'acá ricá?”

Ñaqué i'ímacale rihuata huani Jesús amácana.

*Jesús a'acá cinco mil ina'uquejlo a'ajnejí yucuna marí:*

(Mt 14.13-21; Mr 6.30-44; Jn 6.1-14)

<sup>10</sup> E caja necá, Jesús huacára'acarena i'ímacá, pa'año piño napumí chuhua'. Piyuqueja nacaje nala'acare rehuá yucuna ne'emá Jesusjlo. E rihuá'a necá aji que pajimila Betsaida ejo, ne'emacácoloje necó re penaje.

<sup>11</sup> E'iyonaja ajopana ina'uqué hue'epiño meño'ojoca ri'ijnacá. Aú ne'ejná nápumi chu, iphaño nanacu. Re rehuíña'ata necá Tupana nacú, nahuátacaloje ricá nahuacára'ajeri penaje. Ritejmo'óta caja natámina i'ímacaño.

<sup>12</sup> E caja najúhua'a. E ra'apiyatéjena, iyamá iphata j'i'imaji nacojé quele, i'ijnáño Jesús ahua'ajé. Nemá rijló:

—Pihuacára'a necá pajimila ejo, ajopana ñacaré ejo hua'até, nahuarúhua'acaloje a'ajnejí najluhua reyá penaje, naculácaloje camátacajo pucuna rejo penaje. Maare ta uncá na i'ímalá najló —que nemacá rijló.

<sup>13</sup> E'iyonaja rimá najló:

—Icá a'ajeño najló a'ajnejí.

Nemá rijló:

—Pajluhua té'ela ca'alá pan maare iyajmela jíñana hua'até, queleja calé maare. ¿E pihuátaca hue'ejnacá a'ajnejí huarúhua'aje najló? ¡Iqui'iruna huaní ina'uqué maare! —que nemacá rijló.

<sup>14</sup> Cinco mil ca'ajná achiñana i'imaño re. Inaana, yuhuaná, quele i'imaño caja re najhua'até. E Jesús quemari ra'apiyatéjenajlo:

—Imá najló, nayá'acoloje pajhua'atéchaca cincuéntano, cincuéntano queja penaje.

<sup>15</sup> —Je —que nemacá rijló.

E nemá najló, nayá'acoloje penaje.

<sup>16</sup> Ejomi Jesús ña'arí ricápojo pajluhua té'ela ca'alá pan, iyajmela jíñana hua'até. E riyacá'ó je'echú chojé, rimá Tupánajlo:

—Palá pila'acá huecá marí a'ajnejí aú.

Ejomi ritupa'atá najló pan. Riyupa'atá caja jíña jepo'oná najló. Ra'á ra'apiyatéjenajlo ricá, natamáca'atacaloje najló ricá penaje.

<sup>17</sup> Piyuqueja necá ajñaño na'ajnehuá namano'ocá ejé. Ejomi ra'apiyatéjena jahuacátaño rijlupemí yurícaro. Iyamá iphata jí'imaji nacojé ca'alá cuhuá'ala namano'otá pu'uteno raú.

*Pedro hue'epica naca ina'uqué Jesús i'imacá yucuna marí:*

*(Mt 16.19; Mr 8.27-29)*

<sup>18</sup> E apú huacajé piño Jesús i'imari ra'apiyatéjena hua'até necámica que. Re ripura'ó Tupana hua'até. Ejomi rimá najló:

—¿Meque ajopana ina'uqué quemacá nunacu?

Nemá rijló:

<sup>19</sup> —Ne'iyajena quemano pinacu: “Juan Bautizar la'ajeri ricá” que. Ajopana piño quemano pinacu “Elías ricá” que. Ajopana piño quemano pinacu: “Tupana purá'alo ja'apátajeñomi chuna naquiyánami macápo'ocaro ricá”, que nemacá pinacu.

<sup>20</sup> E Jesús quemari najló:

—Eta icá ta, ¿meque imacá nunacu?

Pedro quemari rijló:

—Tupana huacára'acare majó ina'uqué i'imatájeri penaje picá.

<sup>21</sup> Jesús quemari najló:

—A'a. Pa. Imaniya ajopánajlo nuyucuna naca nucá.

*Jesús i'imacá ritaca'ajica yucuna najló yucuna marí:*

*(Mt 16.20-28; Mr 8.30-9.1)*

<sup>22</sup> Quéchami rimacá najló:

—Ina'uquéloje penaje i'imacá nucá. Nujña'ajé cajrú chapú caje yajhué panacu. Peñahuilana, sacerdotena huacára'ajeño, Tupana nacú jehuíña'atajeño, quele uncá huani huátalaño nucá. Chapú nala'ajica nucá. Nahuacára'aje nonócana. E'iyonaja hueji que cala i'imajemi ejomi numacápo'oyo piño nopumí chuhuá —que rimacá najló.

<sup>23</sup> E rimá piyuque najló:

—Marí que ricá ijlo, huátalaño nujhua'atéjena i'imacana. Nenoje ca'ajná icá, nujhua'atéjena i'imacale. Hue'echú ca'alá queja ca'ajná ri'imajica ijlo marí que. Ihue'epíniya inacahuá; jácho'oníyo caja nujhua'atéjena i'imacana chiyá rijimaje.

<sup>24</sup> Re ina'uqué naquiyana nahue'epí caí nanacahuá. Uncá nahuátala ajopana la'acá necá chapú. Ñaquele uncá ne'emalá nujhua'atéjena. Marí que i'imacaño capichájeño Tupana liyá. Eyá uncá hue'epílaño caí nanacahuá, ne'emacáloje nujhua'atéjena penaje, i'imajeño matajnaco je'echú chu.

<sup>25</sup> Iná ña'aquela inajluhua piyuque nacaje eja'ahuá chu i'imacare, uncá na penaje calé ri'imajla inajlo, iná capichácojla Tupana liyá rilanaquiyá.

<sup>26</sup> Re ina'uqué, napáña'o no'opí ajopana ina'uqué e'iyá. Ñaque caja napáña'aco nupurá'alo ja'apí ne'iyá. Nupa'ajico je'echú chiyá majó huacajé, ñaque caja nopáña'ajico na'apí. Ina'uquéloje penaje i'imacá nucá. Piyuque ina'uqué huacára'ajeri penaje nuphájica je'echú chiyá majó. Nora'apá hua'atéjena, je'echú chu i'imacaño, quele hua'até nuphaje. Cajrú mejáma'atani i'imajica huanacu.

<sup>27</sup> Tupana i'imajeri ina'uqué naquiyana huacára'ajeri. Re e'iyajena maare, amájeño rijhua'atéjena la'acá rihuacára'aca que. Ri'imajica penaje ejo'ocaja inaquiyana i'imajica marí eja'ahuá chu rihuacajé —que rimacá najló.

*Jesús napona apiyácaco najimaje yucuna marí:*

*(Mt 17.1-8; Mr 9.2-8)*

<sup>28</sup> Marí que rimacá najló i'amacá. E caja hueji que cuhuá'ata que cala quetana ca'ajná ne'emacá re. Ejomi Jesús jácho'oro ipuré i'ihuátaje Tupana hua'até pura'ajó. Rihuá'a rijhua'ató Pedro, Santiago, Juan, quele.

<sup>29</sup> E caja nephá rejo. Jesús pura'acó Tupana hua'até ee rijimá apiyácaro. Jareni huani, sereni que ra'arumacá apiyácaco rijhua'ató.

<sup>30-31</sup> Mana'í chiyó iyamá ina'uqué ja'acó rejé pu'uhuacajé cajrú mejáma'atani hua'até. Pajluhuaia i'imari Moisesmi chu, apú i'imari Elíasmi chu. E napura'ó Jesús hua'até chapú caje yajhué rijña'ajicare panacu Jerusalén e. Méqueca nenójica ricá re Tupana pechu nacú ri'amacá que, nacú napura'ó pajhua'atéchaca.

<sup>32</sup> A'apona que tapú chá'ataca Pedro, rijhua'atéjena quele. E'iyonaja uncá nacamátalo. Aú namá cajrú mejáma'atani Jesús nacú. Naqué caja namaca mejáma'atani iyamá ina'uqué tára'aco rijhua'até nacú.

<sup>33</sup> Ejéchami ina'uqué, iyamá i'imacaño, capichaco Jesús ahua'ayá sujhúí que. Ejéchami Pedro quemacá Jesusjlo:

—Huehuíña'atajeri jmeque palá huecá maare! I'ijná huala'achí hueji quele ca'apejé maare, pajluhuaia pijló, apalá caja Moisesjlo, apalá caja Elíasjlo —que rimacá rijló.

Majopeja rimacáchojonaja calé rimacá. Uncá rihue'epila na penájeca rimacá marí que.

<sup>34</sup> Marí que Pedro quemacá. Ejéchami juni suhuáca'ala itaca nachá. E naquero'ó.

<sup>35</sup> Re'iyá caja Tupana quemari najló:

—Ílé nu'urí, íqui'ija nuhuátacare ricá. Jema'á ra'apiyá —que rimacá najló.

<sup>36</sup> Marí que rimacá najló ejomi Jesusja calé namá. E napa'ó. Uncá ne'emaqué ajopánajlo riyucuna. Napechu nacuja ri'imaqué.

*Jesús ca'acá jiñá pechu pajluhuaia yuhuaí e'iyayá yucuna marí:*

*(Mt 17.14-21; Mr 9.14-29)*

<sup>37</sup> Nahuitúca'a ipuré naquiya i'amacá. E muní que cajrú ina'uqué iphaño Jesús nacú.

<sup>38</sup> E pajluhuaia nanaquiyaana quemari caphí Jesusjlo marí que:

—Huehuíña'atajeri, pila'á nojló nacaje. Pamicha caji nu'urí. Pajluhuaia ñani ricá.

<sup>39</sup> Re jiñá pechu re'iyá. Richá'atacachu ricá, cajrú rahuíyo'oca. Hua'ató que ritaca'ataco. Raú quemu'ureni jeño'ocá rinuma chiyá. Quehuí huani jiñá pechu la'acá ricá. Uncá rihuátána'atala ricá quehuini chiyá.

<sup>40</sup> Caja numíhajla pa'apiyatéjenajlo, naca'acáloje jiñá pechu re'iyayá penaje. E'iyonaja uncá meño'ojó naca'alacha ricá re'iyayá —que rimacá Jesusjlo.

<sup>41</sup> E Jesús quemari najló:

—¡Meque uncá huani ipechu i'imalá nochojé caphí! Pu'uhuaré la'acaño icá. ¿Me quetana júpica nujña'ajica panacu icá? ¿Me quetana júpica nu'umacajla ijhua'até, ihue'epícaloje rinacajé nuliya penaje?

E rimá rara'apajlo:

—Majó pihuá'icha pi'irí.

—Je —que.

<sup>42</sup> Rihuá'a ri'irí Jesús jimajo. Eja jiñá pechu cojno'ótari pajimó yuhuaí te'erí e'iyajé. Hua'ató que ritaca'ataco. Eyá Jesús aca'arí jiñá pechu. Rica'á re'iyayá ricá. Ejomi palánija ri'amacá. E rimá rara'apajlo:

—Marí pi'irí.

<sup>43</sup> Ramájeño pechu i'imá Jesús nacú: “¡Meque piyuque huani rila'acá Tupana Pechu aú!”

*Jesús i'amacá ritaca'ajica yucuna najló yucuna marí:*

*(Mt 17.22-23; Mr 9.30-32)*

Ina'uqué i'ijnataño napéchuhua Jesús la'acare nacú. E Jesús quemari ra'apiyatéjenajlo:

<sup>44</sup> —Jema'á marí palá. Ipechu capicháñaniya marí: ina'uquéjloje penaje i'amacá nucá. Na'ajé ajopana ina'uquejlo nucá, nala'acáloje chapú nucá nahuátaca que penaje —que rimacá najló.

<sup>45</sup> E'iyonaja uncá nahue'epila meque quemacánaca rimacare rinacuhua najló. Me'echuje ri'amacá najló. Uncá caja naquejá'ala rilíya riyucuna, nahuó la'acole ra'apejé.

*Nachá'atajeri yucuna marí:*

*(Mt 18.1-5; Mr 9.33-37)*

<sup>46</sup> E caja ra'apiyatéjena aca'acaño pajhua'atéchaca naca chá'atari ne'iyayó nacaje la'acana aú. Rijimaje naca'ácaco pajhua'atéchaca.

<sup>47</sup> Jesús hue'epiri méqueca napechu i'amacá. Aú rihuá'a pajluhuaia yuhuaí rejo. Ritára'ata ricá rahua'ajó.

<sup>48</sup> E rimá najló:

—Re ca'ajná apú, ra'á marí caje yuhuají ñaté, nujhua'ateje ri'imacale. Raú iná hue'epí íqui'ija rihuátaca caja nucá Nora'apá hua'até. Ilé huacára'ari nucá majó. Re ina'uqué naquiyana, uncá la'alaño nanacuhúa hue'epiño que. “Ajopana ñaté a'ajeño huecá”, que napechu nanacuhúa. Palani nojló ilé que péchuruna. Necá chá'ataño ajopana nujhua'atéjéna.

<sup>49</sup> E Juan quemari rijló:

—Huehuíña'atajeri, a'ajná ño'ojó huamá apú ca'acá jiñana pechu ajopana ina'uqué e'iyayá. Pipuráca'alo aú rica'á ne'iyayá jiñana pechu. Uncá huaquiyana calé ricá. Aú huahuíyo'orijló richá.

<sup>50</sup> Jesús quemari rijló:

—Uncá paala imacá rijló ñaqué. Uncachu apú la'alá huecá chapú, rila'á huecá palá. Huanquiyana ricá.

*Jesús aca'acá Santiago, Juan, quele yucuna marí:*

<sup>51</sup> Yehuicha riphaca rená chojé, Jesús jácho'ocoloje je'echú chojé penaje. Ñaquele rila'á caphí ripéchuhua, ri'ijnacáloje Jerusalén ejo penaje.

<sup>52</sup> Ñaquele rihuacára'a ajopana iyamá ritucumó Samaria te'eré ejo, ne'ejnacáloje pají culaje najluhua pajimila ejo penaje. Nacamátacoloje richu rapunana chu penaje.

<sup>53</sup> Aú ne'ejná rejo pají culaje. E'iyonaja uncá re i'imacáño huátalaño Jesús. Rihuátaca pachá Jerusalén ejo i'ijnacana uncá nahuátala ricá.

<sup>54</sup> E napa'ó. Ne'emá najló riyucuna. Aú Santiago, Juan, quele, ra'apiyatéjéna ne'emacá, quemáño Jesusjlo:

—Huahuacára'ajeri, ¿e pihuátaca huacapichátaca necá quera'atani je'echú chiyaje aú? Júpimi Eliásmi chu huacára'ari quera'atani ja'acó je'echú chiyá ajopana cha. ¿Ñaque caja chi pihuátaca huacapichátaca necá?

<sup>55</sup> Raú Jesús yacá'aro nachaje. Raca'á necá, rimá najló:

—Uncá ihue'epila méqueca ipechu apojó huani.

<sup>56</sup> Uncá ilé caje penaje calé nu'ujná majó. Uncá nucapichátacaloje ina'uqué penaje calé nu'ujná majó. Nu'umatácaloje ina'uqué capichácajo liyá penaje nu'ujná majó. Ina'uquéjloje penaje i'imacá nucá —que Jesús quemacá najló:

E ne'ejná apú pajimila ejo.

*Apú huátaca Jesús hua'até i'ijnacana yucuna marí:*

*(Mt 8.19-22)*

<sup>57</sup> Na'apá ají que iñe'epú chuhúa ajopana hua'até. E apú quemari Jesusjlo:

—Huahuacára'ajeri, nuhuata pijhua'até i'ijnacana meño'ojoca pi'ijnajica ejo.

Jesús quemari rijló:

<sup>58</sup> —Re camejérinajlo pucunaji, nacamatácaloje richu penaje. Cuphira'apánajlo re caja nañacaré najló. Eyá nojló, uncá pucunaji i'imalá, nuhuatána'acaloje richu penaje. Ina'uquéjloje penaje i'imacá nucá —que rimacá rijló.

<sup>59</sup> E Jesús quemari apujlo:

—Pi'ijná nujhua'até.

Aú rimá rijló:

—Nuhuata nuñacaré ejo pa'acano pamineco. Nuhuata nora'apá tami sa'acana ritaca'ajica ejomi —que rimacá Jesusjlo.

<sup>60</sup> Jesús quemari rijló:

—Uncá hue'epiño Tupana nacojé, necá sa'ajeño caja taca'acaño tami. Pijló numá, pi'ijná, pi'imacáloje Tupana yucuna ajopana ina'uquejlo penaje, ne'emacáloje rijhua'atéjéna penaje ra'apiyá jema'acana aú penaje.

<sup>61</sup> E apú piño quemari Jesusjlo:

—Nuhuata pijhua'até i'ijnacana. Pamineco piyurí nupa'acó nuñacaré ejo, nu'umacáloje nuyucuno nojénajlo penaje.

<sup>62</sup> Jesús quemari rijló:

—Apú ca'ajná queño'orí nuhuátaca que la'acana hue'epicana ritucumó. E'iyonaja pajñacani rihuata jo'ó nacaje la'acana rijluhua rihuátaca que. Ilé que i'imacáño uncá i'imalájeño Tupana hua'atéjéna naquiyana.

## 10

*Jesús huacára'aca setenta ina'uqué i'ijnacá apú eyá, apú eyá que yucuna marí:*

<sup>1</sup> E caja Jesús i'ihuapari achiñana ne'iyayá iyamano que, rihuacára'acaloje necá ritucumá penaje. Rihuata cajrú pajimila ejo i'ijnacana. Rejo rihuacára'a necá ritucumó. Setenta ne'emacá piño.

<sup>2</sup> E rimá najló marí que:

—Re cajrú huani ina'uqué marí eja'ahuá chu, nema'ájla Tupana ja'apiyá, ajopana i'imaquela riyucuna najló. E'iyonaja calé uncá riyucuna i'imajeño i'imalá. Re necá huejápaja. Ipura'ó Tupana hua'até, rihuacára'acaloje ina'uqué riyucuna i'imajé ajopánajlo, ajopánajlo que penaje.

<sup>3</sup> Chuhua i'ijná. Mayuchéruna icá. E'iyonaja nuhuacára'a icá pu'uhuaré péchuruna ejo.

<sup>4</sup> Ijña'aníya ijhua'ató liñeru, itulané, ji'ima'ulá caje. Imalá'ataniya icó iñe'epú chuhúa ajopana ajalácana nacú.

<sup>5</sup> Imujlúca'ajica ee pají chojé, ajalácaje necá. Marí que imájica ile pají chiyájenajlo: “Eco Tupana la'á ipechu palá.”

<sup>6</sup> Palá péchuruna ne'emajica ee, ipura'ó nanacu Tupana hua'até, rila'acáloje necá palá penaje. Eyá chapú péchuruna ne'emajica ee, ipura'ó Tupana hua'até nanacu, rila'acá piyá necá palá.

<sup>7</sup> Palá péchuruna i'imajícaño ñacaré chu iyurejo najhua'até. Ajñaje a'ajnehuá na'ajicare ijlo. I'irajé caja i'iracaje na'ajicare ijlo. Icó la'ajeño najló nacaje. Ñaquele isápaca'ala huemí que caja ijlo a'ajnejí. Iná sápacachu apujlo, ra'á inajlo iná sápacaca'ala huemí. Iphájica ee palá péchuruna ñacaré chojé, re iyuró najhua'até. I'ijnaniya apú chojé, apú chojé que.

<sup>8</sup> Iphaje ca'ajná apú pajimila ejo; palá ca'ajná napechu i'imajica inacu. Najhua'até iyuró. Ajñaje caja a'ajnejí na'ajicare ijlo.

<sup>9</sup> Natámina i'imajica ee re, itejmo'ótaje caja necá. Marí que imájica najló: “Mequetánaja i'imajemí Tupana i'imajeri ina'uqué naquiyana huacára'ajeri”.

<sup>10</sup> Iphaje ca'ajná apú pajimila ejo; chapú ca'ajná napechu i'imajica inacu. Marí que ne'emajica ee, ja'apaje pajimila nacuhuá. Marí que imájica najló:

<sup>11</sup> “Mu'upé patacaro hue'emá nacú marí pajimila naquiyaje, hualaca hue'emá naquiyá ricá ijimaje, ihue'epícaloje raú pu'uhuaré il'acá, uncale ihuátala huecá”, que imájica najló. Imaje caja najló: “Ihue'epí marí: Mequetana i'imajemí Tupana i'imajeri ina'uqué naquiyana huacára'ajeri”, que imájica najló.

<sup>12</sup> Tupana huajájica pu'uhuaré la'ajeño, namanaicho la'ajeño huacajé, rihuajaje ilé pajimila eruna cajrú, uncá pachá nahuátala icá. Iqui'i rihuajájica pajimila Sodoma erunami chuna pu'uhuaré nala'acare pachá. Richaje rihuajájica necá uncá huátalajeño icá —que Jesús quemacá rihuacára'acarenajlo.

*Jesús aca'acá ina'uqué uncá jema'alaño Tupana ja'apiyá yucuna marí:  
(Mt 11.20-24)*

<sup>13</sup> Marí que Jesús quemacá pajimila eruna nacú i'imacá:

—Chapú huani ri'imajica Corazín erúnajlo. Ñaque caja ri'imajica Betsaida erúnajlo. Cajrú huani nula'acá Tupana Pechu aú nacaje uncá meño'ojó iná la'alare rehuá i'imacá. Ñaque caja Tupana la'aque la pajimila Tiro e, pajimila Sidón e i'imacá, napajno'otácajla napéchuhua raú pu'uhuaré nala'acare liyá. Na'ájla nanacuhuá cotari caje na'arumacá penaje. Naca'ájla caja nachó siyá pa'ilá, ina'uqué hue'epícaloje caja napajno'otaca napéchuhua pu'uhuaré nala'acare liyá raú penaje.

<sup>14</sup> Tupana huajájica pu'uhuaré la'ajeño, namanaicho la'ajeño huacajé, rihuajaje cajrú Corazín eruna, Betsaida eruna, quele. Cajrú rihuajájica pajimila Tiro erunami chuna, Sidón erunami chuna, quele, pu'uhuaré la'ajeño huani ne'emacale. Chaje huani rihuajájica Corazín eruna, Betsaida eruna, quele.

<sup>15</sup> Eyá pajimila Capernaum e i'imacaño i'imaño piño marí que. Napechu i'imá nanacuhuá: “Je'echú chu i'imajícaño penájena huecá” que. E'iyonaja uncá ñaque calé ri'imajica najló. Cahuacaje naca'ajé necá, nacapichácoloje penaje —que Jesús quemacá pajimila eruna naquiyana nacú.

<sup>16</sup> E Jesús quemari ra'apiyatéjenajlo:

—Ja'apátaje ca'ajná ajopánajlo nupuráca'alo. Pu'uhuacá nema'ajica ja'apiyá, nema'ajé caja no'opiyá. Eyá uncá huátalajeño icá, uncá caja huátalajeño nucá. Uncá huátalaño nucá, uncá caja huátalaño Nora'apá Tupana. Ricá huacára'ari nucá majó.

*Jesús huacára'acarena pa'acó napumí chuhúa yucuna marí:*

<sup>17</sup> Jesús huacára'ari setenta ina'uqué apú eyá, apú eyá que i'imacá. Necá penájenami pa'año piño napumí chuhúa. Pu'ují napechu i'imacá. E nemá Jesusjlo:

—Hue'emacana, pipuráca'alo aú jiñana pechu jema'año hua'apiyá, huaca'acáloje necá ajopana ina'uqué e'iyayá penaje —que nemacá rijló.

<sup>18</sup> Jesús quemari najló:

—Nucá amari Jiña Chi'ináricana ja'acó je'echú chiyá i'imacá. Pichaní camaré ja'acó que caja ra'acó cauacaje.

<sup>19</sup> Nucá chá'atari ina'uquejlo Jiñá Chi'ináricana. Jeí ajma'ajica ee icá, unca na ila'alajo raú. Ipijí i'irajica ee icá, unca caje ila'alajo raú.

<sup>20</sup> Pu'ují ipechu me'etení, ica'acale jiñana pechu ina'uqué e'iyayá. Ipechu i'maniya pu'ují raú ja calé. Ipechu i'imá caja pu'ují, i'imájicale Tupana hua'até je'echú chu. Caja lana'aquejami ú ripapérane chu, re i'imajeño penájena i'imacale —que rimacá najló.

*Pu'ují Jesús pechu i'imacá yucuna marí:*  
(Mt 11.25-27; 13.16-17)

<sup>21</sup> Ejéhami Tupana Pechu la'acá Jesús pechu pu'ují. Aú rimá Tupánajlo:  
—Nora'apá, Huahuacára'ajeri huani picá. Eja'ahuá, je'echú, caje minaricana caja picá. Palá pila'acá nucá, pila'acale ina'uqué naquiya palá. Yuhuaná pechu queja napechu, uncale nala'alá necó hue'epiño que necá. Pila'acale napechu palá, nahue'epi nacaje numacare nacojé. Eyá cajrú jehuíña'acañojlo, capéchurunjlo me'echuje jo'ó ricá. Caja queja pihuátaca najló r'i'ímá —que rimacá Tupánajlo.

<sup>22</sup> Rimá piño rema'ajéñojlo:  
—Nora'apá quemari nojló piyuqueja puráca'aloji nacú. Unca na calé hue'epiri na huánica nucá, Tupana i'irí. Nora'apá, Tupana, ricaja calé hue'epiri mecajeca nucá. Ñaque caja unca na calé hue'epica na huánica Nora'apá, Tupana. Nucá, Ri'irija calé hue'epiri mecajeca ricá. Nucaja calé i'imari nuhuátacarenajlo riyucuna, nahue'epicaloje naca ricá penaje —que rimacá.

<sup>23</sup> Eyá Jesús pajno'oró ají que ra'apiyatéjena ejo. Najloja calé rimá marí que:  
—¿Meque palá huani ijló, amácale nacaje nula'acare e'iyohuá!

<sup>24</sup> Ñaquejlaca cajrú Tupana puráca'alo ja'apátajeñomi chuna, ne'emacánami chuna, quele huátacajla nacaje amácana ne'emaqué eja'ahuá chu huacajé. E'iyonaja unca meño'ojó namala ricá rihuacajé i'imacá. Ñaquejlaca nahuátacajla nupuráca'alo jema'acana jema'acá ricá que caja. E'iyonaja unca caja nema'alajla ñaque rihuacajé —que Jesús quemacá najló.

*Samaria eyaje la'acá palá huani apú ina'uqué yucuna marí:*

<sup>25</sup> E caja pajluhuaja Tupana puráca'alo nacú jehuíña'atajери iphari Jesús nacú. Rihuata nacaje yucuna quej'acana riliyá, ramácaloje méqueca rimájica rijló penaje. Aú rimá rijló:  
—Huehuíña'atajери, ¿meque nula'acajla, nu'umacáloje matajnaco je'echú chu raú penaje?

<sup>26</sup> E Jesús quemari rijló:  
—¿Meque chi Tupana puráca'alo lana'aquejami quemacá? ¿Meque chi pipechu rinacu?

<sup>27</sup> Tupana puráca'alo nacú jehuíña'atajери quemari rijló:  
—Marí que Tupana puráca'alo lana'aquejami quemacá: “Huahuacára'ajeri Tupana. Ricaja calé Iná Chi'ináricana. “Pihuata íqui'ija ricá. Pihuajhué ricá. Pi'ijnatá caja pipéchuhua rinacu. Pehuíña'o caja nacaje nacú, r'i'imacáloje palá rinacu penaje. Pila'á caja piyuqueja nacaje, r'i'imacáloje palá rinacu penaje. Marí que pila'acá, pihuátacale ricá íqui'ija. Pihuata caja íqui'ija piyuque ina'uqué, pihuátaca picó que caja —que rimacá Jesúslo.

<sup>28</sup> Eyá Jesús quemari rijló:  
—Palá pa'ajpichaca nojló. Richuhuaaja caja pila'ajica ñaque, pi'imacáloje matajnaco je'echú chu raú penaje —que rimacá rijló.

<sup>29</sup> Tupana nacú jehuíña'atajери pechu i'imari rinacuhúa: “Palá la'ajeri nucá” que. Raú rimá piño Jesúslo:

—¿Mecajena ina'uqué iná huátaca íqui'ija, iná icó que caja?

<sup>30</sup> Raú Jesús i'imari marí yucu rijló:  
—Pajluhuaja ina'uqué jácho'ocharo Jerusalén eyá. T'ijichari cahuacajo pajimila Jericó ejo. Iñe'epú chuhua ra'apicha. Ehuá ajopana ata'acáchina ípháquichaño rijhua'até. Re nachi'iyá riliyá rinane piyuque ra'arumacá hua'ató. Cajrú naña'achiyaca ricá rinane chona. E na'apicha piño. Rejeja nayuricha ritami iñe'epú turenaje. Ujú caje chiyoja ritaqui'ichácajla.

<sup>31</sup> E ricaja caja iñe'epú chuhua apú ina'uqué ja'apíchari ají que ritami loco'opani. Sacerdote r'i'imichá. Ramicha ritami to'ocó. E ra'apicha pu'ucuja rahua'ayá.

<sup>32</sup> E apú ja'apíchari piño ricaja caja iñe'epú chuhua. Levítami chu laquénamí naquiya r'i'imichaca. Nañaté a'ajeri r'i'imichá Tupana ñacaré chu. Ricá ja'apíchari ají que, amíchari ritami to'ocó re. Riyacá'icho richaje mequetánaja; ejomi ra'apicha piño.

<sup>33</sup> E apú piño i'ijichari ricaja caja iñe'epú chuhua. Samaria te'eré eyaje r'i'imichaca. Ricá hue'epíchari rinacu camu'ují ramíchaca aú ritami to'ocó.

<sup>34</sup> Ritajicho ritami nacojé. Eyá caja ripusáni'icha ricá. Raco'ochá nacaje jilami raphú chojé. Raco'ochá piño nacaje jalá amúra'atacanami richojeja caja. Ejomi repo'ochiya ricá a'arumacaji jítami aú. Ejomi rácho'ochiya ricá ají que richahuarute janapeje. Rinacu rihuá'icha ricá ají que a'ajná ño'ojó apú ñacaré chojé. Re rihuojíchiya ricá.

<sup>35</sup> E muní que ri'ijnacá yámona, ra'achá pají mináricanajlo liñeru. Rimicha rijló: “Eco pihuojita cari ina'uqué, ritami. Marí chaje liñeru pica'ajica ee rinacóje, nunacuhá nupa'ataje pijló ricá rapumí chojé”, que rimíchaca rijló. Caja quetana riyucuna.

<sup>36</sup> Marí caje aú Jesús quemari piño Tupana puráca'alo nacú jehuíña'atajerijlo:

—Hueji quele ne'emacá amaño ritami to'ocó. Chapú ata'acáchina la'acare ri'imacá. ¿Mecaje chí huátari ricá íqui'ija rihuátaca ricó que caja?

<sup>37</sup> Aú Tupana puráca'alo nacú jehuíña'atajeri quemari rijló:

—Ílé hue'epiri rinacu camu'ují, huátari ricá rihuátaca ricó que caja.

Jesús quemari rijló:

—Chuhua pi'ijná. Eco pila'á ajopana ina'uqué palá. Rila'acá ricá palá que caja pila'ajica necá palá ca'ajno —que Jesús quemacá rijló.

*María, Marta, quele yucuna marí:*

<sup>38</sup> Jesús ja'apari ají que a'ajná ño'ojó ra'apiyatéjena hua'até. E caja nephá pajimila ejo. Re apa'ahuelo i'imayo. Ruí i'imari Marta. Rucá huátayo Jesús i'ijnacá nachaje nañacaré chojé. Raú Jesús i'ijnari rejo.

<sup>39</sup> Marta e'ehuelo i'imayo. María ruí i'imacá. Rucá yá'ayo Jesús ji'ilá, roma'acáloje ripuráca'alo penaje.

<sup>40</sup> Eyá Marta cahuíla'ayo rusápaca'ala nacojé. Aú ru'ujná Jesús ahua'ajé; rumá rijló:

—Huehuíña'atajeri, ¿Meque pijló quelerú? Uncá ro'olá nuñaté. Nuchaja ruyurí huasápaca'ala aú. Pihuacára'a ro'ocá nuñaté —que rumacá Jesusjlo.

<sup>41</sup> Jesús quemari rojló:

—Marta, ¿naje cajrú huani picahuíla'aco cajrú nacaje nacojé? Mahuó huani pila'acá picó rinacóje.

<sup>42</sup> Re nacaje palánija inajlo apú ijlnami chojé. Marirú hue'epiyo mecajeca ricá. Rucá jema'ayó nupuráca'alo. Uncá na calé quemájeri rojló, roma'acá piyá nupuráca'alo —que rimacá rojló.

## 11

*Jesús jehuíña'ataca necá Tupana hua'até pura'acano nacú yucuna marí:*

(Mt 6.9-15; 7.7-11)

<sup>1</sup> Apú huacajé Jesús pura'aró piño Tupana hua'até. Riyurí caja rijhua'até pura'acano ee pajluhuaaja ra'apiyatéjeri quemari rijló:

—Huahuacára'ajeri, pehuíña'ata huecá Tupana hua'até pura'acano nacú. Juanmi chu jehuíña'atajica ra'apiyatéjenami que caja pehuíña'ataca huecá.

<sup>2</sup> Jesús quemari najló:

—Ipura'ajico ee Tupana hua'até marí que imájica rijló:

Huara'apá, je'echú chu i'imacare.

Palájne'equé huani picá.

Piyuqueja ina'uqué huacára'ajeri penaje picá.

Huahuata caja pi'imacá Huahuacára'ajeri.

Huahuata caja ina'uqué la'acá maare eja'ahuá chu nacaje pihuátaca que, je'echú chu nala'acá que caja.

<sup>3</sup> Pa'á huajló a'ajnejí chuhuaaja, huajñácaloje penaje.

<sup>4</sup> Pamó huachaje pu'uhuaré huala'acare liyá, huamaco ajopana chaje chapú nala'acare huecá liyá que caja.

Piyuríniya nacaje a'acá huame'é rijluhua, huala'acá piyá pu'uhuaré raú.

Pi'imatá caja huecá pu'uhuaré la'ajeño huacára'ajeri liyá.

Marí que ipura'ajico Tupana hua'até —que Jesús quemacá najló.

<sup>5</sup> Jesús quemari piño ra'apiyatéjenajlo:

—Apú ca'ajná i'ijnari lapí jenaji que, palá péchuri rinacu ejo, a'ajnejí quejá'aje riliyá. Riphá rejo. E rimá rijló: “Majó nu'ujichá a'ajnejí chaya”.

<sup>6</sup> Huajé nuteló iphíchaca nunacu. Ya'ajnyaya ri'ijichá majó. Uncá no'ojné i'imalá, no'ocáloje rijló penaje”, que ca'ajná rimacá rijló.

<sup>7</sup> Raú ca'ajná rimá rijló riñacaré chiyá: “Picahuíla'aníya nunacu. Nucamátaco huani nuyani hua'até maare. Caja chahuíña'aqueja pají numaná. Uncá meño'ojó nócho'olo pijló nacaje a'ajé me'etení”, que ca'ajná rimacá rijló.

<sup>8</sup> Jesús quemari piño najló:

—Numá ijlo, apala uncá rácho'olajo quiñaja rijló nacaje a'ajé, palá péchuri rinacu ri'imacale. Mahuó rila'aquejami rácho'oyo piyuque nacaje rihuátacare a'ajé rijló.



<sup>9</sup> Ñaquele numá ijló, iquejá'a nacaje Tupana liyá. Raú ra'ajé ijló ricá. Iculá caja Tupana liyá nacaje. Raú iphátaje ricá. Imá caja rijló, rijme'etachi ijló nacaje apu. Raú rijme'etaje ijló rapu.

<sup>10</sup> Riliyá nacaje quejá'ajeñojlo ra'á nacaje. Riliyá culájeño iphátaño nacaje. Rijló quemájeñojlo rijme'etá rapu.

<sup>11</sup> Uncá na calé a'arí ri'irijlo jipa, riquejá'acachu riliyá cujnú. Uncá caja na calé a'arí ri'irijlo jeí, riquejá'acachu riliyá jiña.

<sup>12</sup> Uncá caja na calé a'arí ri'irijlo ipijí, riquejá'acachu riliyá capérejhué.

<sup>13</sup> Ica, pu'uhuaré la'ajeño, hue'epiño iyánijlo nacaje a'acana palani. Eta, Jara'apá, je'echú chu i'imagare, hue'epiri ichaje huani nacaje palani a'acana rijhua'atéjenajlo. Ra'á riliyá quejá'ajeñojlo Ripechu.

*Nanaquiyana quemáño Jesús nacú: "Jiñá pechu hua'ateje ricá." Riyucuna marí:  
(Mt 12.22-30; Mr 3.20-27)*

<sup>14</sup> Jesús ca'arí jiñá pechu apú ina'uqué e'iyayá i'imagá. Jiñá pechu nacojé uncá meño'ojó ripura'aló. Rica'acá ricá re'iyayá ejomi ripura'acó palá. Marí que ajopana amaca aú napechu i'imá Jesús nacú: "¡Meque piyuque huani rila'acá!"

<sup>15</sup> Eyá ajopana piño quemáño marí que rinacu: "Beelzebú, jiñana huacára'ajeri ricá. Ripechu aú ricá'á jiñana pechu ina'uqué e'iyayá."

<sup>16</sup> Ajopana piño huátaño ratá'acana. Nahuata rila'acá nacaje Tupánaja calé hue'epicare la'acana caje. Rená que'ená penaje nahuata rila'acá najló ricá, nahue'epichi ricá raú.

<sup>17</sup> Jesús hue'epiri méqueca napechu nacú ri'imagá. Nemá rinacu i'imagá: "Jiñana huacára'ajeri pechu aú ricá'á jiñana pechu ina'uqué e'iyayá." Aú rimá najló:

—Ajopana ina'uqué huacára'ajeri hua'atéjena nócaquelo pajhua'atéchaca, nacapichátajla pecohuáaca raú. Iná ejena nócaquelo pajhua'atéchaca, ñaque caja nacapichátajla pecohuáaca raú.

<sup>18</sup> Ñaque caja ricá Jiñá Chi'ináricanajlo. Jiñana pechu rijhua'atéjena. Rica'aquela rijhua'atéjena ina'uqué e'iyayá, rila'ájla ricó chapú raú. Uncá meque rila'alajla rejomi, uncale rijhua'atéjena i'imalajla raú. Marí que numacá ijló, imacale nunacu: "Beelzebú, jiñana huacára'ajeri pechu aú ricá'á jiñana pechu ina'uqué e'iyayá."

<sup>19</sup> Marí que imacá nunacu. ¿Ñaque caja chi imacá ja'apiyatéjena nacú? Necá caja ca'año jiñana pechu ina'uqué e'iyayá. Necá caja hue'epiño uncá paala ipechu.

<sup>20</sup> Tupana Pechu aú ja calé nuca'á jiñana pechu ina'uqué e'iyayá. Ñaquele marí caje aú iná hue'epi caja Tupana queño'ocá ina'uqué naquiyana huacára'ajeri i'imacana.

<sup>21</sup> E Jesús i'imari yucu najló, nahue'epicaloje raú richá'ataca Jiñá Chi'ináricana. Rimá najló: —Catejmuni ina'uqué amácachu riñacaré rilecare ricapi que, uncá na calé ata'arí rinane riliyá.

<sup>22</sup> Apú richaje catejmuca iphari ca'ajná rinacu. Ricá ca'ajná ca'arí rilecare riliyá, ri'imagare chojé caphí. Aú richá'ata ricá. Richá'ataca ricá ejomi rijña'atá rinane. Quéchami ritamáca'ataca ajopánajlo ricá.

Marí que Jesús i'imagá yucu najló, nahue'epicaloje raú ricá chá'ataca Jiñá Chi'ináricana penaje.

<sup>23</sup> Rimá piño najló:

—Uncachu ina'uqué naquiyana huátala nucá, chapú napechu nunacu. Uncachu nala'alá ina'uqué palá nujhua'até, napajno'otá napechu Tupana liyá apojó.

*Jesús i'imari najló jiñá pechu pa'acó piño apú ina'uqué e'iyajé yucuna. Raú rimá nanacu ñaquejena necá, uncá pachá nahuátala ricá. Marí que Jesús i'imagá najló yucu:*

*(Mt 12.43-45)*

<sup>24</sup> —Jiñá pechu jácho'ocharo pajluhuaja ina'uqué e'iyayá. E ra'apicha te'erí macajreni nacuhá. Riculicha rijluhua pucunaji, rihuatána'acaloje richojé penaje. E'iyonaja uncá riphátalacha ricá. E rimicha: "Nupa'ajicoja nuñacaremi ejo, ilé ina'uqué nócho'ocaro e'iyayá ejo".

<sup>25</sup> Aú ripi'ichó rapumí chuhá. Rimujlúqui'icha re'iyajé piño. Amíchari palani ri'imichaca, lamá'ataquejami ri'imichaca rijló.

<sup>26</sup> Raú ri'ijichá piño ajopana jiñana pechu huá'aje. Iyamá cuhuá'ata quele rihuá'icha rijhuáque'ena penaje. Richaje chapújne'equenaca ne'emichaca. Necá piyuqueja mujlúqui'ichaño ilé ina'uqué e'iyajé, ne'emacáloje rihuacára'ajeño penaje. E caja penaje chapújne'equé huani ilé ina'uqué i'imichaca na'apiyá i'imacana aú. Júpimi ri'imagá chaje huani ri'imichá chapújne'equé. Caja quetana riyucuna.

*Naca la'arí iná pechu pu'ují yucuna marí:*

<sup>27</sup> Marí que Jesús i'ímacá yucu cajrú ina'uquejlo i'ímacá. Ejomi pajluhuájaru inanaru jahuíyo'oyo rijló. Marí que rumacá rijló:

—¡Meque pu'ují ilerú pechu, huá'ayo pi'ímacá, lamára'ayo pi'ímacá! —que rumíchaca rijló raló nacú.

<sup>28</sup> E Jesús quemari rojló:

—Mariruna pu'ují péchuruna: jema'año Tupana puráca'alo, hua'até a'año nanacojó ricá. Necá cajena pu'ují péchuruna.

*Nahuata Jesús la'acá najló nacaje, nahue'epichi ricá raú. Riyucuna marí:  
(Mt 12.38-42; Mr 8.12)*

<sup>29</sup> Richaje, richaje que ina'uqué jahuacaco Jesús nacojó i'ímacá. E rimá najló marí que:

—¡Meque uncá huani ina'uquélaruna mariruna ina'uqué naquiyana me'etení i'ímacaño! Nemá nojló, nula'acáloje nacaje najló Tupánaja calé hue'epicare la'acana. E'iyonaja uncá nula'alaje ijló ricá. Júpimi Tupana la'acá Jonasmi chujlo nacaje. Rila'acá rijló nacaje i'ímacá que caja rila'ajica piño nojló nacaje. Ricá aú ja calé ihue'epeje nucá.

<sup>30</sup> Tupana la'arí Jonasmi chujlo nacaje, Nínive e i'ímacañomi chuna hue'epichi ricá raú. Ina'uquéjloje i'ímacá penaje nucá. Tupana la'ajeri caja nojló nacaje, ina'uqué me'etení i'ímacaño hue'epichi nucá raú.

<sup>31</sup> Júpimi apa'ahuelo i'imayo i'ímacá. Cahuacá i'ímacaño i'ímacánaru ru'umacá. Rucá i'ijnayo ya'ajnajo Salomonmi chu chaje ripuráca'alo jema'ajé. Hue'epiri huani ri'imacale, ru'ujná rejo i'ímacá. Eyá maare nucá me'etení ijhua'até, Salomonmi chu chaje hue'epica nucá. E'iyonaja uncá a'alá inacojó nupuráca'alo. Rijimaje ne'emacánarumi cholo quemajeyo inacu, Tupana huajácaloje icá penaje. Me'etení i'ímacaño nacú rumaje rijló rihuaájica ina'uqué huacajé.

<sup>32</sup> Naqué caja Jonasmi chu i'ímacá. Ricá i'mari Tupana yucuna Nínive e i'ímacañomi chúnajlo i'ímacá. Aú napajno'otá napéchuhua pu'uhuaré nala'acare liyá Tupana ejo. Eyá maare nucá me'etení ijhua'até. Jonasmi chu i'ímacá chaje nucá, i'mari ijló Tupana yucuna. E'iyonaja uncá ipajno'otala ipéchuhua pu'uhuaré ila'acare liyá Tupana ejo raú. Rijimaje Nínive e i'ímacañomi chuna quemájeño inacu, Tupana huajácaloje icá penaje. Me'etení i'ímacaño nacú nemaje rijló rihuaájica ina'uqué huacajé.

*Jesús i'mari najló camareji yucuna, iná hue'epicaloje palá la'acana nacojó raú penaje. Riyucuna marí:*

*(Mt 5.15; 6.22-23)*

<sup>33</sup> Iná lucúna'acachu iná camaró, uncá iná yá'atala ricá me'echuje chojé. Uncá caja iná yá'atala ricá i'ichilá lájma'ataqueja ja'apejé. Yenú iná yá'ata ricá, piyuque pachu i'ímacaño amácaloje palá ricamaré chojé penaje.

<sup>34</sup> Iná pechu loco'opánija iná la'acá nacaje. Palá iná pechu i'ímacachu, iná hue'epica caja piyuque nacaje la'acana palá. Uncachu iná pechu i'imalá palá, uncá caja iná hue'epila naca la'acana palá. Chapú huani nacaje i'ímacá inajlo raú.

<sup>35</sup> Pa. Pihue'epí méqueca pipechu. Apala uncá palani calé pipechu. Pipechu i'imá ca'ajná pinacuhá: “Palani japi nupechu nujluhua.”

<sup>36</sup> Pichuhuaje pi'ímacachu palá péchuri, piyuque nacaje pila'acare i'mari palani caja ina'uquejlo. Iná amá palá nacaje ricamaré chojé, que caja ajopana ina'uqué amaca palani ricá pila'acare.

*Jesús aca'acá fariséona, Tupana puráca'alo nacú jehuíña'atajeño, quele yucuna marí:  
(Mt 23.1-36; Mr 12.36-40; Lc 20.45-47)*

<sup>37</sup> Jesús ñapátari yucu i'ímacana najló. Ejomi pajluhuaja fariséona naquiyana quemari Jesusjlo:

—Pi'ijná nujhua'até nuñacaré ejo, pajñachi pa'ajnehuá rejo nujhua'até.

—Je —que rimacá.

Aú ri'ijná rijhua'até. Rimujlúca'a riñacaré chojé. Re riyá'o, rajñácaloje ra'ajnehuá penaje.

<sup>38</sup> Ilé fariseo amari uncá Jesús ipala riyáte'ela chiyá rajñaca ra'ajnehuá piyá peñahuilánami chuna quemacá que. Raú rípechu i'imá: “¿Naje chí rila'á ají que huani? Uncá paala.”

<sup>39</sup> E Jesús quemari rijló:

—Apú ca'ajná ipari ripararune huajlé naquiyá, ripá ca'ajná ri'iracú huajlé naquiyá caje. Eta richiyá uncá ripala. Naqué caja icá fariséona. Ica ipaño iyáte'ela chiyá, inapona naquiyá caje. E'iyonaja uncá lámá'ataqueja calé ípechu Tupánajlo. Aú calé ihuata ijluhua piyuque nacaje ña'acana. Chapú ila'acá ina'uqué, ijña'acáloje naliyá nacaje ijluhua penaje.

<sup>40</sup> Mapéchuruna huani icá. Tupana la'arí nacaje piyuqueja i'ímacá. Rila'á iná pechu; rila'á caja iná napona.

<sup>41</sup> A'á camu'ují la'acáñojlo nacaje, i'ímacáloje palá la'acáño raú penaje.

<sup>42</sup> '¡Meque chapú huani ri'imajica ijló, icá fariséonajlo! Iyamá té'ela quele a'ajnejí punité ejátacare naquiyana icá a'año pajluhuaja Tupánajlo. Raú ca'ajná ipechu i'imá inacuhá: "Palá la'acaño huecá" que. Uncá paala ila'acá, uncale ihuátala Tupana íqui'ija. Uncá caja ila'alá palá ajopana ina'uqué. Chuhua ila'á palá. Ihuata caja Tupana íqui'ija. Marí que la'acana, ricá a'acáreno rijló hua'ató, palani Tupánajlo.

<sup>43</sup> ¡Meque chapú huani ri'imajica ijló, fariséonajlo! Ihuata ajopana ina'uqué pechu i'imacá inacu: "Ajopana chaje i'imacaño necá" que. Ñaquele ihuata natucumá yá'acano jahuacáca'alo ñacarelana chu. Ihuata caja ina'uqué ajalaca icá palá ja'apaca aú le'ejepelaji ñacarelana e'iyohuá.

<sup>44</sup> Chapú huani ri'imajica ijló Tupana puráca'alo nacú jehuíña'atajeñojlo, quele me'etení i'imacañojlo. Pajlácachina huani icá. Icó la'año icó palá la'ajeño que ina'uqué ijlú chu. E'iyonaja uncá ñaque calé icá. Ajopana ina'uqué pechu i'imá inacu: "Palájne'equena japi necá" que. E'iyonaja chapújne'equena icá. Re ca'ajná támijimina ca'aquelana majopeja. Uncá ina'uqué hue'epilaño ri'imacá re. Raú na'apá re'iyohuá. Uncá nahue'epila támijimina ca'aquelánaca ricá. Ñaque caja icá ina'uqué e'iyohuá. Uncá caja nahue'epila chapújne'equena icá –que Jesús quemacá najló.

<sup>45</sup> Eyá apú Tupana puráca'alo nacú jehuíña'atajeri quemari Jesusjlo:

–Huehuíña'atajeri, ilé que pimíchaca aú pimicha huanacu: "Pu'uhuaré la'ajeño necá" que.

<sup>46</sup> Jesús quemari rijló.

–Que jo'ó ricá. ¡Chapú huani ri'imajica ijló, Tupana puráca'alo nacú jehuíña'atajeñojlo! Chapú ri'imajica ijló, ila'acale pu'uhuaré mari que: Icó huacára'año ajopana, nala'acáloje nacaje puhuichani huani penaje. Nacaje uncá meño'ojó iná la'alare caje, ihuacára'a nala'acá ricá. Eyá icá, uncá huani la'alaño nacaje najhua'até. Huejápaja ñani uncá caja ila'alá najhua'até –que rimacá najló.

<sup>47</sup> ¡Meque chapú huani ri'imajica ijló! ihuacára'acale nala'acá támijimina ca'aquelana palá nojé, naca'acáloje Tupana puráca'alo ja'apátajeñomi chuna aphinami richojé penaje. Ichi'inami chuna noño ne'emacá.

<sup>48</sup> Ilé que la'acana aú ina'uqué hue'epiño palani ijló chapú ichi'inami chuna la'acare i'imacá. Necá noño ne'emacá. Chuhuaca icá la'año naphinami ñacarelana –que Jesús quemacá najló.

<sup>49</sup> Hue'epícachi huani Tupana. Ñaquele rimá marí que inacu júpimi i'imacá: "Nuhuacára'aje nachaje nupuráca'alo ja'apátajeño, ne'iyajena nenoje. Ne'iyajena caja nala'ajé chapú", que Tupana quemacá inacu i'imacá júpimi.

<sup>50</sup> Rimacá que rihuacára'aca necá i'imacá. Necami chuna, ichi'inami chuna noño i'imacá. Tupana huajájeri icá, chapú ichi'inami chuna la'acare i'imacá chona. Eja'ahuá queño'ocó eyá madrejecha huecá. Re'iyá nenócarena chona rihuajaje pu'uhuaré la'acaño, me'etení i'imacaño.

<sup>51</sup> Abelmi chu nócana aú riqueño'ó najló i'imacá. Pumí chiyó ajopana piño, ajopana piño que nenoca ne'emacá. Caja penaje nenócare i'imari Zacaríasmi chu. Tupana ñacaré copi, mesa yámojo ucapú ahua'á nenó ri'imacá. Numá ijló, Tupana huajájeri pu'uhuaré la'acaño, me'etení i'imacaño, necá ichi'inami chuna nócarena chona.

<sup>52</sup> ¡Chapú huani ri'imajica ijló, Tupana puráca'alo nacú jehuíña'atajeñojlo, me'etení i'imacañojlo! Tupana puráca'alo quemari méqueca ri'imataca iná capichácajo liyá. Uncá jehuíña'atala ina'uqué palá rinacu. Raú uncá nahue'epila rinacojé. Uncá caja ihue'epila rinacojé. Aú calé itá rapu ajopánajlo, nahue'epica piyá rinacojé –que Jesús quemacá najló.

<sup>53</sup> Marí que rimacá aú. Tupana puráca'alo nacú jehuíña'atajeño, fariséona, quele yúcha'año richaje, ri'imacale najló ilé que nanacu. Ejomi namaque chapú ricá. Riqueño'ó reyá ja'apácana.

<sup>54</sup> Ejéchami naculácataco rinacu, nemacáloje rinacu: "Pu'uhuaré la'ajeri ricá" que, rimacale nanacu: "Uncá paala nala'acá" que.

## 12

*Jesús jehuíña'atari necá nema'acá piyá pajlácachina puráca'alo ja'apiyá. Riyucuna marí:*

<sup>1</sup> Cajrú huani ina'uqué jahuacáño i'imacá. Mil chaje ne'emacá. Caja napayaca pe'emáchaca. E Jesús quemari ra'apiyatéjenajlo:

–Ihue'epí méqueca fariséona la'acá necó palá la'ajeño que. E'iyonaja pu'uhuaré la'ajeño necá.

<sup>2</sup> Piyuque nacaje yucuna me'echú i'imacare me'etení, ajopana hue'epéjeño rinacojé. Piyuque nacaje me'echú i'imacare me'etení, amájero caja.

<sup>3</sup> Nacaje imacare nacú apujlo lapí, nema'ajica riyucuna hue'echú, camú camaré japi. Nacaje imacare nacú apujlo ri'ijhuí chojé cachuhua ucapú itaqueja chu, riyucuna ne'emajé caphí ajopánajlo nahuacáca'alo ejé —que rimacá najló.

*Na piyaca iná quero'ocó yucuna marí:  
(Mt 10.26-31)*

<sup>4</sup> E Jesús quemari piño najló:

—Ijló numá, iquero'oniyó ina'uqué nójeño piyá. Iná napónaja calé nenó. Eyá iná pechu uncá meque nala'alá.

<sup>5</sup> Numaje ijlo na piyaca iná quero'ocó: iquero'ó Tupana piyá. Ricá huá'ari iná péchumi. Rihue'epí caja iná ca'acana quera'atani uncá yacálare chojé. Ñaquele iquero'ó ripiyá.

<sup>6</sup> 'Mahuemiru iná huarúhua'aca maárohua iyamá cupira'aphana. Mahuemíruna huani necá. E'iyonaja Tupana amari necá palá.

<sup>7</sup> Cajrú cupira'aphana chaje huani íqui'ica rihuátaca iná. Rihue'epí iná nacú piyuqueja. Rihue'epí piyuque iná ihuilá nacojé méquelaca ricá. Ra'á caja rinacojó iná. Ñaquele iquero'oniyó ina'uqué nójeno piyá —que Jesús quemacá najló.

*Iná apáña'aco piyá Jesús ja'apí yucuna marí:  
(Mt 10.32-33; 12.32; 10.19-20)*

<sup>8</sup> Jesús quemari piño najló:

—Re ca'ajná apú nujuhua'ateje, uncá rapáña'alo no'opí ajopana ina'uqué e'iyá. Rimá najló nunacu: “Rijhua'ateje nucá” que. Ñaqueé caja numájica ilé nacú Tupana hua'atéjena, je'echú churúnajlo. Numaje caja najló: “Nujhua'ateje ricá”. Marí que caja numájica rijló piyuque ina'uqué nacú, uncá micho'otáláño nuchaya ajopana ina'uqué e'iyá.

<sup>9</sup> Eyá apú nujuhua'ateje ca'ajná apáña'aro no'opí ajopana ina'uqué e'iyá. Aú calé rimá najló marí que nunacu: “Uncá rijhua'ateje calé nucá”. Ñaqueé caja numájica rinacu, Tupana hua'atéjena, je'echú churúnajlo. Numaje najló: “Uncá nujuhua'ateje calé ricá”. Marí que caja numájica rijló piyuque ina'uqué nacú, micho'otaño nuchaya ajopana ina'uqué e'iyá.

<sup>10</sup> 'Ina'uquéjloje penaje i'imacá nucá. Pu'uhuaré ina'uqué quemacare nunacu liyá, Tupana amárojla nachaje. Eyá pu'uhuaré nemacare Tupana Pechu nacú, uncá Tupana amálojo nachaje ripachá.

<sup>11</sup> 'Nujhua'atéjena i'imacale, ajopana ña'ajeño ca'ajná icá najhua'ató jahuacáca'alo ñacarelana chojé. Ihuacára'ajeño jimaje ca'ajná nahuá'aje icá, nahuajácaloje icá penaje. Maare que ri'imajica ee ijlo, ihuó la'anioy na'apejé méqueca ipura'ajico najhua'até ichayo.

<sup>12</sup> Riphájicaja rená chojé ijlo quéchami ipura'ajico ichayo. Ejéchami Tupana quemájica ijlo méqueca imájica najló —que Jesús quemacá najló.

*Apú quemari Jesusjlo, rilamá'atacaloje rijló chapú caje puráca'aloji penaje. Riyucuna marí:*

<sup>13</sup> Cajrú ina'uqué i'imaño re. E apú quemari Jesusjlo:

—Huehuíña'atajeri, pimicha no'ohuejlo, ra'achí nojló nule'ejé penaje i'imacajla, huara'apami chu yurícare huajló i'imacá.

<sup>14</sup> Jesús quemari rijló:

—Uncá na calé a'arí nucá puráca'aloji lamá'atajeri penaje. Uncá caja nacaje tamáca'atajeri penaje calé nucá —que rimacá rijló.

<sup>15</sup> E Jesús quemari piño najló piyuque:

—Re ina'uqué piyuque nacojéruna, camejéne'equena huani necá. Ma'aquéruna caja necá. Najlúhuaja nacaje ña'acana nahue'epí natucumó. Ileruna ihue'epeje ichó, i'imacá piyá necá que caja. Uncá cajrú iná le'ejé nacaje aú calé iná i'imacá matajnaco —que rimacá najló.

*Jesús i'imari najló cajrú le'ejepelari yucuna:*

<sup>16</sup> Eyá Jesús i'imari yucu najló marí que, rehuíña'atacaloje necá rinacu penaje:

—Pajluhuaja ina'uqué i'imichari. Cajrú le'ejepelari ri'imichaca. Cajrú huani ajñacaje i'imichaca rimena e'iyohuá, rijña'acáloje reyaje rijluhua richá penaje.

<sup>17</sup> Marí caje aú ri'ijnachiya ripéchuhua marí que: “¿Meque nula'alájica a'ajnejí? Nuhue'epí uncá riphálaje riñacarelana chojé, nulamá'atacaloje ricá richu penaje”, que ri'ijnachíyaca ripéchuhua.

<sup>18</sup> E caja marí que riphíchaca ripechu nacú: “Palani ca'ajná nucajya'atácajla piyuque riñacarelana, nula'acáloje apú richaje ñópo'ojloca rapumi chojé penaje. Richojé nulamá'ataje piyuque a'ajnejí nuñña'ajicare numena e'iyayá, nunane hua'ató.

<sup>19</sup> Nuñapátajicaja ricá numaje: 'Chuhua re cajrú a'ajnejí nucapi. Júpja ri'imajica'. Ñaquele chuhua nuhuatána'ajica nusápaca'ala liyá. Nojñaje cajrú no'ojnehuá. Yuhuéra'acajo nacú nu'umajé. Queyajúpani caja nu'umajica, que ri'imajica nojló”, que ripechu i'imichaca.

<sup>20</sup> E'iyonaja Tupana quemíchari rijló: “Uncá huani ina'uquélari ta picá. Chuhujá lapí pitaca'ajica. ¿Eta, nacaje pilamá'atacare pijluhua, najlo chi riyurejo?” que Tupana quemíchaca rijló. Caja quetana riyucuna.

<sup>21</sup> Jesús quemari piño najló:

—Ñaque caja ri'imajica ina'uquejlo, cajrú huátacaño najluhua nacájejo. Uncá na i'imalaje najló je'echú chu —que rimacá najló.

*Tupana a'acá rinacójó rijhua'atéjéna yucuna marí:*  
(Mt 6.25-34)

<sup>22</sup> E Jesús quemari ra'apiyatéjenajlo:

—Ñaquele numá ijlo, ipechu i'imaniya marí que ajñacaje nacú: “Uncá na i'imalaje ca'ajná hualjó, huajñacaloje penaje. Huataca'ajica me'epeji nacú ca'ajná”. Ipechu i'imaniya caja ñaque caja a'arumacaji nacú. Ihuó ca'aniyo rinacu.

<sup>23</sup> Tupana palamane iná cajmuchá inajlo, iná napona hua'até. A'ajnejí, a'arumacaji, quele chaje iná cajmuchá, iná napona hua'até.

<sup>24</sup> Ihue'epí cupira'aphana nacojé. Uncá nejátala nacaje icha ijí, najña'acáloje richa najluhua penaje. Uncá caja a'ajnejí ñacarelana i'imalá najló, nalamá'atacaloje najluhua a'ajnejí richojé penaje. Tupánaja calé a'arí najló ajñacaje. Cupira'aphana chaje íqui'ica Tupana huátaca ícá.

<sup>25</sup> Iná huo ca'acocho nacaje nacú, uncá ra'alá iná ñaté, iná i'imalacáloje richaje júpica marí eja'ahuá chu penaje.

<sup>26</sup> Uncá caja ihue'epila méqueca la'acana, i'imalacáloje richaje júpica marí eja'ahuá chu penaje. Majopéjari ricá. Eta çnaje ihuó ca'aró apú nacaje nacú?

<sup>27</sup> Ihue'epí caja a'ahuaná ihuí nacojé. Uncá risápala. Uncá caja riña'alá rijluhua a'arumacaji, ra'acáloje rinacuhúá penaje. E'iyonaja richá'ata a'arumacaji ripalacha aú. Cajrú huani le'ejepelari, ne'emacánami chu, Salomonmi chu i'imalá. E'iyonaja uncá richá'atala a'ahuaná ihuí palá nojé ra'arumacá aú.

<sup>28</sup> Mequetánajloje penaje calé a'ahuaná ihuí. Chuhujá que iná amaca ricá, muní que rihuijño'oco. E'iyonaja palá amácanami ricá Tupana palamane. A'ahuaná ihuí chaje ra'ajica rinacójó ícá, a'arumacaji i'imalacáloje ijlo penaje. ¡Meque huejápaja huani ipechu Tupana chojé caphí!

<sup>29</sup> Tupana a'arí rinacójó ícá. Ñaquele ihuó ca'aniyo nacaje nacú. Imaniya: “¿Na huajñaje? ¿Na hue'erajé?” que.

<sup>30</sup> Necá, uncá hue'epílaño Tupana nacojé, ricaja calé nahue'epí natucumó. Eyá Tupana hue'epiri ícá, ra'acáloje ijlo nacaje ila'acare nacú camu'ují penaje.

<sup>31</sup> Ihue'epí itucumó pamineco Tupana huacára'aca que la'acana, rihuátaca que la'acana caje. Raú ra'ajé ijlo a'ajnejí, a'arumacaji, caje macá.

*Palá la'acana aú Tupana a'ajeri ra'apiyá jema'ajéñojlo nacaje je'echú chu. Ríyucuna marí:*  
(Mt 6.19-21)

<sup>32</sup> Nujhua'atéjéna, huejápaja ícá. Iquero'onioyo. Nora'apá quemari inacu, i'imalacáloje rijhua'até je'echú chu penaje. Palani rijló marí que ila'acana palá.

<sup>33</sup> Eco a'atá piyuque inane ajopana ina'uquejlo rihuemí penaje. Ejomi a'ajé camu'ují la'acáñojlo liñeru. Marí que la'acana aú Tupana a'ajeri ijlo nacaje je'echú chu i'imalajica huacajé. Re uncá nacaje tajnálajo iliyá. Uncá caja ata'acáchina mujlúca'alajeño richojé nacaje ata'ajé. Uncá caja pi'iréjéna apichátalaje iliyá nacaje.

<sup>34</sup> Iná i'ijnatá iná péchuhua nacaje íqui'i iná huátacare nacú. Iná huátacachu íqui'i nacaje je'echú chu i'imalcare, iná i'ijnatá caja iná péchuhua rinacu. Eyá iná huátacachu íqui'ija nacaje marí eja'ahuá chu i'imalcare, iná i'ijnatá caja iná péchuhua rinacu.

*Jesucristo pa'ajero piño majó. Iná i'imalacáloje lamá'ataquejami ripé penaje yucuna marí:*

<sup>35-36</sup> E Jesús quemari piño najló:

—Marí que caja i'imalajica nupé. Nacarihuate i'ijnari ca'ajná lapí ajopana chaje nahuá'acaco amaje. Rejomi rajná ca'ajná ra'ajnehuá najhua'até queyajupa. Re ri'imalá quetana rijhua'até sápageño huátaca ricá. Lucúna'aqueja nacamaré que nahuátaca ricá. Ca'arumacáruna que nahuátaca ricá. Namaca ricá huaíchaca aú najme'etá rijló pají numaná.

<sup>37</sup> Palá rila'acá necá, i'imaño ripé lamá'ataqueja rihuátacana nacú. Rihuacára'a najñaca na'ajnehuá ra'apiyá. Pu'ují napechu i'imalá raú.

<sup>38</sup> Apala riphá lapí jenaji que ca'ajná, apala riphá lapihúá ca'ajná. E'iyonaja riphata rijhua'até sápageño cajmuruna rihuátacana nacú. Raú rila'á necá palá. Pu'ují napechu i'imalá raú.

<sup>39-40</sup> Ina'uquéjloje penaje i'imalá nucá. Nucaja caja pa'ajero piño majó. Ñaque ilamá'ataca palá ipéchuhua maare nupé. Uncá ihue'epílaje méquechamica nuphájica. Apú ca'ajná

mujlúca'ari apú ñacaré chojé nacaje ata'ajé. Paminá hue'epíquela méquechamica riphácajla, uncá riyurilajla rimujlúca'aca riñacaré chojé. Ñaqué caja ijlló rí'imagica. Uncá caja ihue'epilaje noná. Huajátacajo nuphájica majó ichaje —que Jesús quemacá najló.

*Pajluhuaja sápa'jari la'arí palá. Apú la'arí chapú. Riyucuna marí:*  
(Mt 24.45-51)

<sup>41</sup> E Pedro quemari Jesús'jlo:

—¿Mecajena necá pimíchajena nacú hua'jlló yucu chu, huátajeño picá? ¿Huanacu chi pimicha ca'ajná, piyuqueja ina'uqué nacú pimicha ca'ajná?

<sup>42</sup> Jesús quemari rijló:

—Re ca'ajná apú hua'até sápa'jari. Capechuni ricá. Ñaquele rila'á palá. Rihuacára'ajeri i'ijnacá yámona, ra'á ricá riñacaré chiyá huacára'ajeri penaje. Ricá caja riyuri piño a'ajnejí tamáca'atajari penaje, ritamáca'atcaloje rijhua'até sápa'jeñojlo a'ajnejí penaje.

<sup>43</sup> E caja ricarihuate i'ijnari ají que ya'ajnae. Júpija huani rí'imagá rejo. E caja ehua'aja ripa'ó rapumí chuhua. Iphari rijhua'até sápa'jari nacú. Amari rila'acá palá rihuacára'aca ricá que.

<sup>44</sup> Aú ricarihuate la'arí ricá palá. Ra'á ricá piyuque rinane amá'jari penaje.

<sup>45</sup> Eyá uncá ina'uqué'ari rí'imaquela, rimajla marí que ricarihuate nacú ya'ajná jo'ó rí'imaqué huacajé: “¡Meque júpija huani nuhuacára'ajeri malá'ataca ricó rehuá!” Marí que ripechu i'imagajla aú riquéño'ó'jla ricarihuate hua'até sápa'jeño ña'atácana, achiñana, inaana hua'até. Cajrú ra'ajnehuá a'ijnacana nacú rí'imagá. Cajrú i'iracaje i'iracana nacú caja ca'ajná rí'imagajla. Yuhuéra'acajo nacú ca'ajná rí'imagá.

<sup>46</sup> Huajátacajo ricarihuate ipháquela rinacu marí que rila'acá e'iyá ee, rihuajajla ricá íqui'i huani. Ajopana, uncá jema'alaño nahuacára'ajeri ja'apiyá, hua'até rijña'ájla chapú caje panacu.

<sup>47</sup> Re ca'ajná apú hua'até sápa'jari. Rihue'epí palá naca ricarihuate huátaca rila'acá. E'iyonaja uncá rema'alá ra'apiyá. Uncá caja riculá rila'ajona, rila'acáloje ricá raú penaje. Marí que rila'acá aú ricarihuate ña'atá'jari ricá cajrú huani.

<sup>48</sup> Re ca'ajná apú, uncá rihue'epila palá naca ricarihuate huátaca rila'acá. Aú rila'á ricá menáhuaca, uncá paala rila'acá. Marí caje chona nahuajá iná. E'iyonaja huejápaja calé rihuajaca ricá. Apú ca'ajná hue'epiri palá quemachi nacaje rihuacára'ajeri huátacare la'acana nacojé. Ripechu locópa'ala rihuacára'ajeri huátaca rila'acá ricá. Apú ca'ajná hue'epiri huejápaja rihuacára'ajeri huátacare la'acana nacojé. Ripechu locópa'ala caja rihuacára'ajeri huátaca rila'acá rijló nacaje.

*Jesús puráca'alo jimaje ajopana yúcha'aco yucuna marí:*

<sup>49</sup> Nucá i'ijnari majó Tupana Pechu a'ajé ina'uqué naquiyánajlo. Palani rí'imaquela nojló, ñaqué rí'imagajla me'etení.

<sup>50</sup> Nujña'ájica chapú caje panacu aquijñojo. Camu'ují nu'ujnataca nupéchuhua a'ajná nuphájica richojé ejená.

<sup>51</sup> Apala ipechu i'ímá nunacu marí que: “Ricá la'ajeri palá ina'uqué pechu, nayúcha'aco piyá pachácaca.” Ipechu i'imaniya ilé que. Uncá ilé que calé rí'imagajla ina'uquejlo. Nupuráca'alo a'acana nanacojé jimaje chapú napechu i'imagajla no'opiyá jema'ajeño nacú.

<sup>52</sup> Maare eyá a'ajná ño'ojó ina'uqué pechu i'imagé chapú panacuhuacaca. Marí que ca'ajná rí'imagajla. Apú ca'ajná i'imagajla riyajalo hua'até. Re ca'ajná hueji quele riyani. Pajluhua té'ela quele necá piyuque riyani hua'até. Hueji quele nanaquiyana pechu i'imagé ca'ajná iyamá nacú chapú. Eyá iyamá pechu i'imagé ca'ajná hueji quele nacú chapú.

<sup>53</sup> Nupuráca'alo ja'apiyá jema'ajeño jimaje rara'apá pechu ca'ajná i'imagé rí'irí nacú chapú. Rí'irí pechu ca'ajná i'imagé chapú rara'apá nacú. Chapú ca'ajná roló pechu i'imagajla rutu nacú. Rutu pechu ca'ajná i'imagé roló nacú chapú. Ruyajneru pechu ca'ajná i'imagé chapú ru'urinó nacú. Ru'urinó pechu ca'ajná i'imagé chapú ruyajneru nacú. Marí que ne'emajica pajhua'atéchaca, nanaquiyana a'acale nanacojé nupuráca'alo —que Jesús quemacá najló.

*Uncá nahue'epila mecajeca Jesús i'imagá. Riyucuna marí:*  
(Mt 16.1-4; Mr 8.11-13)

<sup>54</sup> Jesús quemari piño najló:

—Amaca aú juni suhuáca'ala huaícha camú to'ocó ejo, imá nacú: “Juni ja'ajero majó”. Imacá queja ra'acó.

<sup>55</sup> Carená apho'ocá aú rihuilaphe ejo, imá nacú: “Ima'aní penaje i'imagajla”. Imacá queja ima'aní moco'ocá maare.

<sup>56</sup> ¡Pajlácachina icá! Ica la'año icó palá la'ajeño que ina'uqué ijlló chuja. E'iyonaja uncá ñaqué calé icá. Ica hue'epiño méquechamica juni ja'ajico je'echú chojé yacá'acano aú. Ñaqué

caja ihue'epica nacaje nacojé te'erí chaje yacá'acano aú. Eta, maare nucá ijhua'até me'etení. E'iyonaja uncá ihue'epila na penájeca Tupana huacára'aca nucá majó —que Jesús quemacá najló.

*Ina'uqué lámá'atacaloje puráca'aloji pajhua'atéchaca necó penaje yucuna marí:*  
(Mt 5.25-26)

<sup>57</sup> Jesús quemari piño najló:

—Ilamá'ata puráca'aloji icó pajhua'atéchaca.

<sup>58</sup> Apú ca'ajná quemari pinacu: “Pu'uhuaré la'ajeri ricá” que, uncá pachá pa'alá pilehuéricare huemí rijló. Raú ca'ajná rihuata pihua'acana ihuacára'ajeri chaje, rilamá'atacaloje pijhua'até ricá penaje. Rihua'ajica ee picá, pilamá'atajla ricá rijhua'até iñe'epú chuhua'ja'apácana nactú, rihua'aca piyá picá ihuacára'ajeri ejo. Rihua'aque la picá rejo, ra'apátajla picá policíajlo. Ricá piño ca'aríjla picá ra'apiyá ina'uqué huajáquelana chojé.

<sup>59</sup> Numá pijló, uncá pácho'olajla richiyá. Pa'atájla pilehuéricare huemí rijló, quéchami pácho'ojla richiyá.

## 13

*Ina'uqué pajno'otácaloje napéchuhua pu'uhuaré nala'acare liyá penaje yucuna marí:*

<sup>1</sup> E caja re i'imacaño naquiyana i'imaño yucu Jesusjlo. Méqueca Pilato noca ajopana ina'uqué yucuna ne'emá rijló. Nemá rijló:

—Cajrú huani Pilato nóta ca'acá. Galilea eyájena ne'emacá. Pu'uhuaré nala'acare chaya nenó Tupánajlo napirana naquiyana i'imacá. Marí que nala'acá aú Pilato huacára'ari nenótacana. Quéchami riquechípa'a nérami napiránami chuna írami hua'até —que nemacá Jesusjlo.

<sup>2</sup> Jesús quemari najló:

—Apala ipechu i'imá necá Pilato nóta carena nacu: “Ajopana chaje pu'uhuaré la'ajeño ne'emacá. Pachá marí que nala'acó”.

<sup>3</sup> Uncá richona calé nacapichó. Uncájica ee ipajno'otá ipéchuhua pu'uhuaré ila'acare liyá Tupana ejo, ñaque caja icapichájico.

<sup>4</sup> Siloé e pají i'imari. Yenoje ri'imacá. Manaí chiyoya ricojno'ocó i'imacá. Hueji que cuhua'ata quele iphata jí'imaji nacojé quele ina'uqué cha ricojno'ó i'imacá. Aú nacapichó piyunqueja. Ipechu nacú ri'imá ca'ajná: “Ajopana Jerusalén eruna chaje ne'emacá pu'uhuaré la'ajeño. Pachá nacapichó ilé que”.

<sup>5</sup> Numá ijlo, uncá richona calé nacapichó. Uncájica ee ipajno'otá ipéchuhua pu'uhuaré ila'acare liyá, ñaque caja icapichájico —que Jesús quemacá najló.

*Uncá Tupana yúcha'alo quiñaja ina'uqué cha. Jesús jehuíña'atacaloje necá rinacu penaje ri'imá najló pají mecharú yucuna marí que:*

<sup>6</sup> Marí que Jesús i'imacá najló yucu:

—Apú i'imichari. Rimena e'iyá pajluhuánaja pají tári'icharo. Higuera rií i'imichaca. Rihue'epíchaca aú rená, ri'ijichá richa ña'ajé. Iphíchari rejo. E riculicha ripaná e'iyohuá richa, amíchari uncá richa i'imalacha.

<sup>7</sup> Aú rimícha rimena e'iyá sápaajerijlo: “Pa. Caja hueji quele jarechí quetana i'imajemi nu'ujnacá majó richa culaje. E'iyonaja uncá richa ta i'imalá. Eco pi'icá ricá. Uncá na penaje calé mecharú ta tára'aro numena e'iyá majopeja”, que paminá quemíchaca rijló.

<sup>8</sup> E'iyonaja rijhua'até sápaajeri quemíchari rijló: “Reja ri'imareja pajluhuaja jarechí quetana ejo'ocaja. Eco nuchá ri'ilaya, nuca'achí a'ahuaná, jimichí tami caje patáca'alomi ri'ilaje.

<sup>9</sup> Raú ca'ajná rarúca'aje. Nacaja que rarúca'a, eco pihuacára'a nuca'acá ricá”, que rimíchaca ricarihuátejlo. Caja quetana riyucuna.

*Jesús tejmo'ótaca pajluhuájaru inanaru huatána'acaje huacajé yucuna marí:*

<sup>10</sup> E caja huatána'acaje huacajé Jesús jehuíña'atari ina'uqué nahuacáca'alo ñacarelana chu.

<sup>11</sup> Re ajopana ina'uqué hua'até pajluhuájaru inanaru i'imayo. Dieciocho jarechí quetánicha ru'umacá rutami caje hua'até. Pajluhuaja jíña'achu pechu i'imari rujhua'até. Ricá la'arí rutami rucá. Cúhua'acano ro'opájica. Rinacojé uncá meño'ojó rutára'alo pu'ucú.

<sup>12</sup> Jesús amaca aú rucá, rihua'a rojló. Aú ru'ujná rahua'ajé. E rimá rojló:

—Caja ta pitami caje ja'apáchiyari pliyá.

<sup>13</sup> E rito'otá riyáte'ela runacojé ají que. Raú ja rutára'o pu'ucú. Ejéchami rupura'acó palá Tupana nacú.

<sup>14</sup> E'iyonaja nahuacáca'alo ñacarelana chiyá huacára'ajeri yúcha'aro Jesús cha, ritejmo'ótacale ina'uqué huatána'acaje huacajé. Raú rimá ajopana ina'uquejlo:

—Re pajlujhua cuhuá'ata que cala iná la'acáloje iná sápacala re'iyá penaje. Re'iyá icá, itámina, i'ijnajeño richaje, ritejmo'ótacaloje icá penaje. Eyá huatána'acaje huacajé uncá inahuaja jiñá pechu i'imari'uqué tejmo'ótacana i'imajaje.

<sup>15</sup> Raú Jesús quemari rijló:

—¡Pajlácachina ta icá! Ica la'año icó palá la'ajeño que huani ina'unquejlo. E'iyonaja uncá ñaqué calé icá. Ipirá, jema piracana ca'ajná, cahuarú ca'ajná i'imaquela nañacarelana chu huatána'acaje huacajé, ihuá'ajla caja necá richiyá une'é chuhúa juni i'irajé.

<sup>16</sup> Eyá marirú, Abrahami chu laquélomi rucá. Dieciocho jarechí quetánicha ro'opaca cúhua'acano. Jiñá Chi'ináricana huacára'ari rutami caje rojló, ru'umacáloje rutami rinacu penaje. Ñaquele palani ra'apátacana ruliyá huatána'acaje huacajé —que rimacá najló.

<sup>17</sup> Marí que rimacá aú rapaña'ata chapú péchuruna rinacu nacú. Ajopana ina'uqué pechu i'imá pu'ují rijhua'até namaca aú palá huani ritejmo'ótaca rucá.

*Mostaza icha ijí yucuna marí:*

(Mt 13.31-32; Mr 4.30-32)

<sup>18</sup> Jesús i'imari piño najló yucu marí que:

—Ina'uqué naquiyana huacára'ajeri Tupana. Re rijhua'atéjena huejápaja. Ehuá richaje, richaje que nañaté a'ajico. Chuhua nu'umajica yucu ijlo, ihue'epicaloje méqueca ricá penaje.

<sup>19</sup> Mostaza icha ijí que ricá, ina'uqué ejátacare ne'ecacapere e'iyohuá. Capajé nojé huani richa ijí. E'iyonaja jima'alami yenuna quetana ritahuá'aco. Ripana e'iyá cupira'aphana, camejérina cayuphéruna, quele la'año nañacaró.

*Pan amúra'atajona yucuna marí:*

(Mt 13.33)

<sup>20</sup> Jesús quemari piño najló:

—Ina'uqué naquiyana huacára'ajeri Tupana. Re rijhua'atéjena huajápaja. Ehuá richaje, richaje que nañaté a'ajico. Chuhua nu'umajica ijlo apa'amá yucu, ihue'epicaloje rinacajé raú penaje.

<sup>21</sup> Inaana quechípa'año harina pan amúra'atajona hua'até. Raú harina anóro'otacanamí amúra'ataro piyuqueja. Ñaque caja Tupana puráca'alo jema'acó cajrú ina'uqué e'iyohuá, nema'acáloje ra'apiyá penaje, ne'emacáloje rijhua'atéjena raú penaje —que Jesús quemacá najló.

*Ujú caje ñani rinumaná yucuna marí:*

(Mt 7.13-14, 21-23)

<sup>22</sup> Jerusalén ejo i'ijnacana nacuja Jesús ja'apari cajruni pajimila, camu'ujuni pajimila, quele e'iyohuá. Marí que ja'apácana nacú rehuíña'ata ina'uqué Tupana nacú.

<sup>23</sup> E apú quemari Jesuslo:

—Hue'emacana ¿huejápaja chi ina'uqué Tupana i'imatájeri capichácajo liyá?

Raú Jesús quemari rijló, ajopánajlo hua'até:

<sup>24</sup> —Ila'á caphí ipéchuhua, imujlúca'achi ujú caje ñani rinumaná chiyá je'echú chojé. Numá ijlo, cajrú ina'uqué atá'ajica richiyá mujlúca'acana. E'iyonaja uncá meño'ojó namujlúca'alaje richiyá.

<sup>25</sup> Pají miná que caja Tupana. Ricá jácho'ojero rinumaná itaje. Rejomi icá queño'ojeño jahuacácano huaca'apeje rinumaná ahua'ajé. E ihuá'aje rijló, rijme'etácaloje ijlo rinumaná penaje. Imaje rijló: “Huahuacára'ajeri, pijme'etá huajló rinumaná”. Raú rimaje ijlo: “Uncá nuhue'epila mere eyájenaca icá”.

<sup>26</sup> Ejéchami imájica piño rijló: “Huajñaque hua'ajnehuá pijhua'até. Hue'eraque caja nacaje jalá pijhua'até i'imajica. Picá caja jehuíña'ataqueri hueca pajimila e”, que imájica rijló.

<sup>27</sup> E'iyonaja rimaje piño ijlo: “Caja numicha ijlo: ‘Uncá nuhue'epila mere eyájenaca icá.’ I'ijná nuliya a'ajná ño'ojó, pu'uhuaré la'ajeño icá” que rimájica.

<sup>28</sup> Tupana hua'atéjena i'imajeño rijhua'até je'echú chu. Abrahami chu, Isaacmi chu, Jacobmi chu, piyuque Tupana puráca'alo ja'apátajeñomi chuna, quele i'imajeño caja re. Amájica ee necá re, cajrú iyájica. Cajrú caja ajma'atájica aí hua. Necá i'imajeño richu, je'echú chu. Eyá icá i'imajeño cupáquejanami que huaca'apé naliyá.

<sup>29</sup> Ina'uqué, ajopana, ajopana que piyuqueja marí eja'ahuá chu i'imacaño, i'imajeño je'echú chu Tupana hua'até.

<sup>30</sup> Ajopana ina'uqué ja'apejé i'imacaño me'etení i'imajeño ajopana chaje rejo —que Jesús quemacá najló.

*Jesús iyaca pu'uhuaré la'ajcañomi chuna hua'até yucuna marí:*

(Mt 23.37-39)

<sup>31</sup> Jesús jehuíña'ataca necá ee fariséona naquiyana iphaño rinacu. E nemá rijló:

—Pi'ijná maare eyá, Herodes huátacale pinócana.



32-33 Jesús quemari najló:

—Chuhuajá, muní hua'até nu'umajé jiñana pechu ca'acana ina'uqué e'iyayá nacú. Hua'ató nutejmo'ótajica natámina. Apacala nuñapátajica ricá. Marí caje la'acana nacú nu'ujnajé Jerusalén ejo. Jerusalén e nenono Tupana puráca'alo ja'apátajeño. Uncá nenola necá apú pajimila nacú. Ñaqué caja nenójica nucá rejo. Chuhua ipa'ó, imíchachi riyucuna Heródesjlo —que Jesús quemacá najló.

34 Marí que Jesús quemacá Jerusalén e i'ímacáñomi chuna nacú:

—Tupana huacára'aqueri ripuráca'alo ja'apátajeñomi chuna Jerusalén erúnami chúnajlo i'imajica. Nanaquiyana nenoque i'imajica. Nanaquiyana cha naca'aqué jipa. Pupalapé nuhuátacajla nahuacátacana, ne'emacáloje no'opiyá jema'ajeño penaje. Capere jahuacátaca ruyani ruyuphé ja'apejé que caja nuhuátaca nahuacátacana, ne'emacáloje no'opiyá jema'ajeño penaje. E'iyonaja uncá nahuátala.

35 Chuhua uncá na calé i'imajeri najhua'até namájeri penaje. Meñaru namájica nucá. Caja numá nanacu: “Uncá namálaje nucá”. Nemájica ee nunacu marí que: “Palani ricá Tupana huacára'acare majó i'ímacá”, ejéchami namájica nucá piño —que rimacá Jerusalén e i'ímacaño nacú i'imacá.

## 14

*Jesús tejmo'ótaca pajluhuaaja ritami yucuna marí:*

1-2 Apú huatána'acaje huacajé Jesús i'ijnari apú fariséona huacára'ajeri ñacaré ejo ra'ajnehuá ajñaje. Re caja apú i'imari. Ritami ri'imacá. Ra'anapítá, ritajné hua'até jenátaro. Nacú ri'imá ritami. Ajopana re i'ímacaño yacá'año Jesús chaje, namácaloje méqueca rila'ajica ricá huatána'acaje huacajé penaje.

3 Tupana puráca'alo nacú jehuña'atajeño, fariséona, quele ne'emacá. E Jesús quemari najló:

—¿Meque chi Moisesmi chu puráca'alomi lana'aquéjami quemacá natámina tejmo'ótacana nacú? ¿E iná la'acá chapú necá natejmo'ótacana aú huatána'acaje huacajé? —que Jesús quemacá rijló.

4 Uncá na'ajipalá rijló. Raú ripatá ritami riyáte'ela naquiyá. Ritejmo'óta ricá, rimá rijló:

—Chuhua pi'ijná palá ca'ajno.

5 E rimá najló:

—Re ca'ajná ulahuí juni phuni. Re caja juni richu. Icahuarute ca'ajná, jematé ca'ajná, ja'aquelo richojé huatána'acaje huacajé. ¿E jácho'otacajla ricá richiyá rihuacajé?

6 Raú namanúma'o.

*Jesús quemari najló nala'acá piyá necó chá'atajeño que huani yucuna marí:*

7 Apú quemari ajopánajlo, ne'ejnacáloje richaje penaje. Re ne'emá rijhua'até riñacaré chu. E Jesús amari necá paminá yucupéra'acarena. Palá nojé ñáca'ajori naculá najluhua. Raú rimá najló:

8-10 —Apala nayucupéra'aje icá, i'ijnacáloje nahuá'acaco a'ajnená ajñaje najhua'até penaje. Iphájica ee rejo, iyá'aniyo palá nojé ñáca'ajori chu. Apala nahuata ricá apujlo, ichaje naaloje nahuá'acaco a'ajnená ajñaje najhua'até penaje. Majopéjaruna le'ejé ñáca'ajori chojé iyá'ajo pamineco. Raú ca'ajná paminá iphari inacu. Rimá ca'ajná ijlo: “Nujhuáque'ena, a'ajná chu iyá'icho palani ñáca'ajori chojé, nuhuátacarenajlo penaje quele ñáca'ajori”. Raú ijhua'até yá'ajicaño pechu i'imajé inacu palá.

11 Iná pechu i'ímacachu iná nacuhá marí que: “Nucá chá'atari ajopana ina'uqué”, Tupánajlo iná i'imá ajopana ja'apejé. Iná pechu i'ímacachu marí que iná nacuhá: “Ajopana chá'ataño nucá”, Tupánajlo iná i'imá ajopana chá'atajeri —que Jesús quemacá najló.

12 E Jesús quemari piño paminajlo:

—Pihuacára'ajica ee a'ajnejí la'acana ajopana ina'uquejlo, piyucupéra'aniya pihuátacarena, pejena, pahua'á ñacajelaruna, cajrú le'ejepeláruna i'ímacarena, cajena. Pimaniya ilé cajénajlo, najñácaloje na'ajnehuá pijhua'até penaje. Quéchami nemájica caja pijló, pajñácaloje pa'ajnehuá najhua'até penaje. Marí que la'acana aú apiyácaje pajhua'atéchaca.

13 Marí cajénajlo pimá, najñachi na'ajnehuá pijhua'até: Pimá camu'ují la'acañojlo, apicháca'alo moto'ocáñojlo, uncá meño'ojó ja'apálaño palajlo, mejlurúnajlo, quelejlo pimá, najñachi na'ajnehuá pijhua'até.

14 Marí que la'acana aú Tupana la'ajeri picá palá. Uncá meño'ojó napiyácala picá ñaqué la'acana aú. Tupana macápo'otajica palá la'ajéñomi chuna huacajé, ra'ajé pijló palá pila'acare huemí —que Jesús quemacá rijló.

*Tupana quemari ina'uquejlo, ne'emacáloje rijhua'at'éjena penaje. Jesús i'imari najló yucu, nahue'epicaloje rinacojé raú penaje. Marí riyucuna:*

(Mt 22.1-10)

<sup>15</sup> Na'ajnehuá ajñacana nacú ne'emá re. Rahua'á yá'aco jema'arí méqueca rimacá apujlo. Aú rimá Jesúslo:

—Pu'ují péchuruna ne'emajica, ajñájeño na'ajnehuá Tupana hua'até je'echú chu.

<sup>16</sup> Raú Jesús i'imari rijló yucu marí que:

—Apú huacári'icha ajopana, nayucupéra'acaloje cajrú ina'uqué penaje.

<sup>17</sup> Ehuá caja na'ajnehuá ajñacana iphíchari rená chojé. Raú rihuacári'icha rijhua'até sápjari riyucupéra'acarenajlo quemaje. Rimicha rijló: “Pimicha najló: ‘Caja a'ajnejí ñapíchari. Chuhua i'ijná rejo, ajíchachi a'ajnehuá’, que pimájica najló.” “Je.”

<sup>18</sup> Aú ri'ijichá apú chojé, apú chojé que riyucuna i'imajé najló. E'iyonaja ijnú nahuáchiyaca rejo i'ijnacana. Pamineco riphíchaje nacú quemíchari rijló: “Huajé nuhuarúhui'ichaca apú liyá rimena. Ricá nuhuata amácana me'etení. Ñaquele uncá nu'ujnalaje rejo”, que rimíchaca rijló.

<sup>19</sup> E ra'apícha piño apú chaje. Ricá quemíchari rijló: “Nuhuarúhui'icha iyamá té'ela quele jémana piraana. Chuhuaca nuhuata natá'acana, nomácaloje méqueca nachíra'aca nacaje penaje. Ñaquele rihuátaniya núcá ca'ajná”, que rimíchaca rijló.

<sup>20</sup> Apú quemíchari piño rijló: “Huajé huani nuhuá'aquichaco. Ñaquele uncá meño'ojó nu'ujnalá rejo”.

<sup>21</sup> “Uncá nu'ujnalaje”, que huánija nemíchaca rijló piyucue. Raú rijhua'até sápjari pi'icharo ricoja rihuacára'ajeri ñacaré ejo. Ri'imichá riyucuna rijló, meque nemíchaca rijló yucuna. Raú paminá yúchi'icharo nachá. E rimicha rijhua'até sápjarijlo: “Chuhua quiñaja pi'ijnacá apojó pajimila e'iyohuá. Chi'itaje iñe'epú chuhua, ujú caje ñani iñe'epú chuhua hua'até pi'ijnajé. Pihuá'icha majó camu'ují la'acaño, apíchaca'alo moto'ocaño, uncá meño'ojó ja'apálaño palá, mejluruna, quele pihuá'aje majó”, que rimíchaca rijló.

<sup>22</sup> Raú ri'ijichá piño ajopana huá'aje. Ne'ejichá rijhua'até cajrú. Ejomi rijhua'até sápjari quemíchari rijló: “Caja nulí'ichá pimíchaca que. Re ejo'ocaja pucunaji ajopánajlo”.

<sup>23</sup> Rihuacára'ajeri quemíchari rijló: “Pi'ijná piño ilé iñe'epú chuhua, to'ocó pajimila yámojo chuhua. Pimicha ajopana ina'uquejlo, ne'ejnachi majó, namano'otachi nuñacaré.

<sup>24</sup> Numá pijló, ileruna nuyucupéra'acarena pamineco i'imacá, uncá huani najñálaje na'ajnehuá nujhua'até maare”, que rimíchaca rijhua'até sápjarijlo —marí que Jesús i'imacá yucu najló.

*Jesucristo hua'at'éjena huátacaloje íqui'ica Jesús ajopana chaje penaje yucuna marí:*

(Mt 10.37-38)

<sup>25</sup> E caja Jesús ja'apari ají que a'ajná ño'ojó. Iqui'iruna ina'uqué ja'apaño rijhua'até. E ripajno'ó ají que riyámojo, rimá najló:

<sup>26</sup> —Huátaño nujhua'atéjena penaje i'imacana, ijlo numá: Ihuata núcá íqui'ija ajopana chaje. Ihuata núcá íqui'ija ichi'íná chaje. Ihuata caja núcá íqui'ija iyajalo chaje, iyani quele chaje. Ihuata caja núcá íqui'ija ejena chaje. Ihuata caja núcá íqui'ija icó chaje. Uncaja que ihuata núcá íqui'ija ileruna chaje, uncá meño'ojó i'imalá nujhua'atéjena.

<sup>27</sup> Apala nenoje ca'ajná nujhua'atéjena. Ihue'epíjica ee inacuhá, uncá meño'ojó i'imalá nujhua'atéjena.

*Iná i'ijnatácaloje iná péchuhua palá pamineco méqueca inajlo rijhua'ateje i'imacana, penaje ri'imá najló yucu marí que:*

<sup>28</sup> Apú huátari ca'ajná pají la'acana. Pamineco ri'ijnatá ripéchuhua, ramácaloje mérejeca rihuemí jácho'ojico rijló. Raú rihue'epí riliñérute iphaca riñapátacana loco'opani ca'ajná, uncá ca'ajná.

<sup>29</sup> Uncachu ri'ijnatala ripéchuhua palá, rica'á ca'ajná piyucue riliñérute jipa ayúma'acana ra'apí huemí. Rejomi uncá riliñérute i'imalá, riñapátacaloje ricá penaje. Ajopana ina'uqué amájica ee ritára'aco mañapátacananu, ne'echajica rinacu.

<sup>30</sup> Nemaje rinacu: “Riqueño'ó pají la'acana, e'iyonaja uncá riliñérute iphala rilocópa'ala”, que nemájica rinacu.

<sup>31</sup> Ñaque caja apú i'ijnatala ripéchuhua. Ajopana ina'uqué huacára'ajeri i'ijnari rile'ejena surárana hua'até najhua'até nócajo. Veinte mil rile'ejena surárana hua'até ri'ijná. Apú le'ejé diez mil. Caja ne'emá rijló nayucuna: “Chuhua necá huaícha ijhua'até nócajo”. Raú ri'ijnatá ripéchuhua: “¿E huachá'atacajla necá diez mil surárana hua'até ca'ajná, uncá ca'ajná?”

<sup>32</sup> Rimá ca'ajná: “Uncá meño'ojó huachá'atalaje necá, íqui'iruna necá”. Marí que ripechu i'imajica ee, palani apú huacára'acana rejo rijhua'até pura'ajó, ya'ajná jo'ó ri'imanoja

rile'ejena surárana hua'até. Palani rijhua'até pura'acano, naqueño'ocá piyá pajhua'atéchaca nócacano. Marí que ri'ijnataca ripéchuhua palá.

<sup>33</sup> Ñaque caja ricá piyuque ina'uquejlo, huátaño nujhua'atéjena i'amacana. Pamineco ne'ejnatá palá napéchuhua méqueca nahuátaca la'acana nacú. Uncaja que nahuata piyuque nacaje yuricana, ne'emacáloje nujhua'atéjena penaje, uncá meño'ojó ne'emalá nujhua'atéjena —que Jesús quemacá najló.

*Yuquira i'amacá a'ajnejilo que caja Jesucristo ja'apiyá jema'ajeño i'amacá ajopana ina'uquejlo, nala'acachu necá palá. Riyucuna marí:*

(Mt 5.13; Mr 9.50)

<sup>34</sup> Yuquira, palani rica'acana a'ajnejí e'iyajé. E'iyonaja rila'acochu uhui'ichí, uncá meño'ojó iná pa'atala rapumí chuhua' ricá, rila'acóloje cajipareni penaje.

<sup>35</sup> Uncá na penaje calé ricá uhui'ichini. Te'erí e'iyajé rica'acana, uncá caja paala. Uncá ra'alá te'erí ñaté. Nacaje mujrumi e'iyajé rica'acana, uncá caja paala. Ricupácanaja palani. Jema'á icá que'ejhuiruna —que Jesús quemacá najló.

## 15

*Ohueja capichaco yucuna marí:*

(Mt 18.10-14)

<sup>1</sup> Cajrú liñeru ña'ajeño ne'emacánajlo jahuacaño Jesús nacú tujlá que ripuráca'alo jema'ajé. Ajopana jahuacaño caja rahua'ajé. Necá nacú ajopana quemaqueño: “Uncá ina'uquélaruna necá” que.

<sup>2</sup> E fariséona, Tupana puráca'alo nacú jehuíña'atajeño hua'até amaño natára'aco Jesús ahua'á. Raú nachapújra'o Jesús nacú. Nemá pajlocaca:

—Pa, Uncá ina'uquélaruna hua'até ricá. E'iyonaja uncá meque rimalá raú. Rajñá caja ra'ajnehuá najhua'até —que nemacá Jesús nacú.

<sup>3</sup> Raú Jesús i'imari najló yucu marí que, rehuíña'atacaloje necá penaje.

<sup>4</sup> —Pajluhuaja ina'uqué i'imichari. Ripirana i'imichaño cien ohuéjana. E caja pajluhuaja nanaquiyana capiícharo i'imichaca. Aú riyuricha ajopana, riculácaloje ricá penaje. Riculicha ricá a'ajná ripháchiyaca ricá ejená.

<sup>5</sup> Caja ehuaja ripháchiyaca ricá. Riqui'ichá ricá rihuacúla'apajo. Pu'ují ripechu i'imichaca, ripháchiyacale ricá.

<sup>6</sup> E caja riphicha riñacaré ejo. Quéchami rahuacáchiya ina'uqué palá ripechu i'amacárena nacú, riñacaré ahua'ájena hua'até. E rimicha najló: “Tímá queyajupa nujhua'até. Caja nupháchiya nupirá, ile capiícharo”, que rimíchaca najló. Caja quetana riyucuna.

<sup>7</sup> E Jesús quemari piño najló:

—Numá ijlo ñaque caja calé je'echú churuna pechu i'amacá pu'ují pajluhuaja ina'uqué nacú, pajno'otari ripéchuhua pu'uhuaré rila'acare liyá nacú. Eyá ajopana, re cajrú necá. Napechu i'imá nanacuhua: “Palá la'acaño huecá Tupánajlo”. E'iyonaja uncá ñaque calé necá. Marí que napechu i'amacale, uncá napajno'otala napéchuhua pu'uhuaré nala'acare liyá. Uncá pu'ují calé je'echú churuna pechu i'amacá nanacu —que Jesús quemacá najló.

*Liñeru capichaco yucuna marí:*

<sup>8</sup> E ri'imá piño apa'amá yucu najló marí que:

—Pajluhuájaru inanaru i'imichayo. Iyamá té'ela queta ruliñérite i'imichaca. Pajluhuata rinaquiyana capiícharo ruliyá. Aú rulucúni'icha rucamaré. Roláquicha ruñacaré chiyá a'ajná ripháchiyaca ricá ejená.

<sup>9</sup> Ripháchiya ricá ejomi rohuacáchiya ina'uqué, palá rupechu i'amacárena nacú, ruñacaré ahua'ájena hua'até. Rumicha najló: “Tímá queyajupa nujhua'até. Caja nupháchiya nuliñérite naquiyana capiíchajo”, que rumíchaca najló. Caja quetana riyucuna.

<sup>10</sup> Jesús quemari piño najló:

—Pu'ují rupechu i'amacá, ruphátacale ruliñérite. Numá ijlo, ñaqueja caja Tupana hua'atéjena, je'echú churuna, pechu i'amacá pu'ují pajluhuaja rimanaicho la'ajeri nacú, pajno'otari ripéchuhua rimanaicho rila'acare liyá nacú.

*Jesús i'imari najló pajluhuaja hualijímaca ja'apaca rara'apá liyá yucuna, ina'uqué hue'epícaloje raú méqueca Tupana pechu i'amacá nanacu, pajno'otala napéchuhua Tupana ejo nacú.*

<sup>11</sup> Jesús i'imari piño yucu najló marí que:

—Pajluhuaja ina'uqué i'imichari. Riyani i'imichaño iyamá.

<sup>12</sup> E caja rijmeremí quemíchari rara'apajo: “Pa'ayú, chuhuata pa'á nojló piliñérite naquiyana, le'ejepelaji naquiyana, caje macá pimacare nacú nojló júpimi i'amacá”, que

rimíchaca rijló. “Je” que. Aú nale'ejó, nale'ejó que ritamáca'achiyari riyánijlo riliñéroute naquiyana, le'ejepelaji caje.

<sup>13</sup> E caja mequetánaja ri'imichaca. Eyá rijmeremi jahuacáchiyari rile'ejé le'ejepelaji piyuque. E caja ri'ijichá ají que ya'ajnae ajopana te'eré ejo. Reyá majopeja ricupátajica riliñéroute rehuá. Uncá huani paala rila'ajica rehuá.

<sup>14</sup> E caja ehuaa riliñéroute tajnáñari ricá. Hua'até uncá caja a'ajnejí i'imalacha rehuá rihuacajé. E naqueño'ochá me'epijí nacú taca'acana. Ñaqueé caja riqueño'ochaca me'epejí ña'acana panacu.

<sup>15</sup> A'acuhuanaja ri'ijichá sápacaje culaje rijluhua. Aú reyaje a'achari rijló sápacaje. Je'eruna piracana lamára'acana nacú ri'imichá.

<sup>16</sup> A'ajnejí mujrumi cupácanami caje najicha ra'apiyá. Cacáme'e ri'imichá na'ajné ajñacana nacú, uncale na'alacha rijló a'ajnejí.

<sup>17</sup> E caja ehuaa ri'ijnachiyá ripéchuhua marí que: “Ya'ajná, pa'ayú hua'até sápageño ajñaño na'ajnehuá cajrú. Uncá caja a'ajnejí tajnáña necá. Maere ta nutaca'acá me'epijí nacú.

<sup>18</sup> Ñaquele nupa'ajico rejo, pa'ayú ejo. Nuphájica ee reje numaje rijló marí que: “Pu'uhuaré huani nula'acá Tupana. Ñaqueé caja nula'acá picá chapú.

<sup>19</sup> Uncá ina'uquélari nucá. Ñaquele uncá pi'irí calé nu'umajé. Pijhua'até sápageji nu'umajé, que numájica rijló”, que ri'ijnachiyá ripéchuhua.

<sup>20</sup> Raú rácho'ocho reyá, ripa'acóloje ají que ya'ajnae rara'apá ñacaré ejo penaje. E ra'apicha ya'ajnae. Juca ri'imanoja rara'apá amíchari ricá huaíchaca majó. Rihue'epicha camu'ují rinacu, aú recho'ochó rijimajo, iphíchari rinacu. E rimahuílo'ochá ricá, richiño'ochá rijimá chiyá.

<sup>21</sup> Ejéchami ri'irí quemíchaca rara'apajlo: “Pa'ayú, pu'uhuaré huani nula'acá Tupana. Ñaqueé caja nula'acá picá. Uncá ina'uquélari nucá. Ñaquele uncá pi'irí calé nu'umajé,”

<sup>22</sup> E'iyonaja uncá rara'apá jema'alacha ra'apiyá. Rimicha rijhua'até sápageñojlo: “Quiñaja iji'ichaca majó a'arumacaji patá nojé, a'achí nu'urí nacú ricá. Iji'ichá caja anillo, a'achí ricá riyatehuana nacojé. Iji'ichá caja ji'ima'ulaji, a'achí ri'imá nacojé ricá.

<sup>23</sup> Ejomi ihuá'icha majó jema piracana i'irí pe'iyochá tahuá'aco, cajrú pitacó; inochi ricá, huajñachi ri'imi. Queyajupa huajñájica hua'ajnehuá pajhua'atéchaca.

<sup>24</sup> Taca'arí que ri'imacá nuliyá quele nu'urí iphíchari. Capicharo que ri'imacá nuliyá. Caja nupháchiya chuhua ricá”, que rimíchaca rijhua'até sápageñojlo.

Ri'irí iphíchaca aú queyajúparuna ne'emichaca pajhua'atéchaca.

<sup>25</sup> Ma'apona re'ehué pe'ejí iphíchari namena e'iyayá. Iphíchari riñacaré cópeje, jemi'ichari cajrú nataníchaca, narápi'ichaca.

<sup>26</sup> Aú rihuá'icha apú rara'apá hua'até sápagejijlo. Rimicha rijló: “¿Meque chi nala'acá quele?”

<sup>27</sup> Rimicha rijló: “Pijmeremi iphíchari. Aú para'apá huacári'ichari huenoca jema piracana i'irí pe'iyochá tahuá'aco, cajrú pitacó, riphíchacale rinacu palá, peyajhuení”, que rimíchaca rijló.

<sup>28</sup> Aú re'ehué pe'ejí yúchi'icharo, uncá rihuátalacha pají chojé mujlúca'acana. Raú rara'apá i'ijichari rijhua'até pura'ajó, rimujlúca'acaloje pají chojé penaje.

<sup>29</sup> Rimicha rara'apajlo: “Picá hue'epiri mequetana júpica nusápaca pijhua'até maere. Palá noma'acá pa'apiyá. E'iyonaja uncá na pa'aqueé nojló, nu'umacáloje nujhuaque'ena hua'até queyajupa raú penaje. Cahuayá piracana pa'aquele nojló i'imacá, palani ri'imacajla nojló.

<sup>30</sup> Eyá quele pi'irí ta iphíchari. Caja ricupata piyuqueja piliñéroute inaana ñuju'uquena nacojé. E'iyonaja rijló ta pihucári'icha jema piracana i'irí cajrú pitacó nócana riphíchaca aú”, que rimíchaca rara'apajlo.

<sup>31</sup> Aú rara'apá quemíchari rijló: “Nu'urí, nujhua'ateja huani picá. Re piyuque nacaje i'imacare nucapi, pile'ejé huánija ricá.

<sup>32</sup> Chuhuaca palani hue'emajica queyajupa pajhua'atéchaca pijmeremi iphíchaca aú. Caja ri'imá nuliyá taca'arí que. Chuhua nupháchiya taca'arí i'imacá penájemi. Capicharo que ri'imacá nuliyá. Caja nupháchiya chuhua ricá”, que rimíchaca rijló. Caja quetana riyucuna.

## 16

*Uncá paala apú la'acá ricarihuate yucuna marí:*

<sup>1</sup> Jesús i'imari marí yucu ra'apiyatéjenajlo:

–Pajluhuaa ina'uqué i'imichari cajrú le'ejepelari. Apú i'imichari ra'apiyateje. E caja ajopana iphichaño ricarihuate nacú. Nemicha rijló: “Pa. Uncá paala pa'apiyateje la'acá picá. Ricupata majopeja piliñéroute, pinane hua'ató”.

<sup>2</sup> Raú ricarihuate huá'ichari rimaná. Riphicha rinacu. E rimicha rijló: “¿Picá chi nemá nacú la'arí uncá paala?” Chuhua pa'á nojló papera piyá'atacare chojé nalehuéricare najló, nahuarúhua'acare huerní caje. Caja quetana pi'imacá no'opiyateje”, que rimíchaca rijló.

<sup>3</sup> Raú ra'apiyateje pechu i'imá: “Chuhuata, ¿Meque nula'ajica ta? Chuhua nucarihuate jácho'otajica nucá. ¿Na nacú ca'ajná sápacana i'imajeri palani najló? Uncá nutejmu íphala te'erí ichacana locópa'ala. Eyá liñeru quejá'acana ajopana ina'uqué liyá, uncá paala nojló. Nopáña'o riquejá'acana ja'api.

<sup>4</sup> Aa, caja nupechu iphíchari nujuhua chuhua. Nuhue'epí méqueca nula'ajica, ajopana ina'uqué pechu i'imacáloje nunacu palá raú penaje. Raú nemaje nojló, nu'umacáloje nahua'até ñañacaré chu penaje. Nucarihuate jácho'otajicaja nucá ejomi najhua'até nu'umajé”, que ripechu i'imichaca.

<sup>5</sup> Ñaquele rahuacáchiya piyuque necá lehuériño ricarihuátejlo. Pamineco íphácajlo rimá: “¿Méreje pilehuérica huacarihuátejlo?”

<sup>6</sup> Rimicha rijló: “Nulehuérica rijló cien canecas pu'uteno huánija olivos jilá aú”. Raú ra'apiyateje quemichari rijló: “Chuhua cincuéntaja pilehuérica rijló. Piyá'o quiñaja, piyá'atachi pipapérane chojé cincuéntaja nulehuérica rijló”. “Je” que.

<sup>7</sup> E apujlo rimicha: “Picá ta, ¿méreje pilehuérica rijló?” “Quinientos bultos ca'alá nulehuérica rijló ricá harina penaje aú”, que rimíchaca. E ra'apiyateje quemichari rijló: “Chuhua pilehuérica rijló cuatro cientos bultos”. Marí que rilamá'achiyaca nalehuéricare.

<sup>8</sup> E caja ehuaja riyucuna iphíchari ricarihuate nacú. Raú ripechu i'imá: “¡Meque capechuni ta quele uncá ina'uquélarí ta!” Caja quetana riyucuna.

E Jesús quemari najló:

—Quehuaca, necá uncá jema'alaño Tupana ja'apiyá, capechúruna necá nanaquiayana hua'até pajlácana aú. Raú nachá'ata Tupana ja'apiyá jema'ajeño.

<sup>9</sup> Uncá numalá ijlo, ila'acáloje nacaje pajlácaje aú, palá inacu péchuruna i'imacáloje raú marí eja'ahuá chu penaje. Ilé que la'acana aú uncá iná i'imalaje matajnaco je'echú chu.

<sup>10</sup> Iná huacára'a ca'ajná apú la'acá inajlo huejápaja nacaje, iná amácaloje méqueca rila'acá ricá penaje. Rila'acachu palá ricá, raú iná hue'epí ñaqueé caja rila'ajica piño cajrú nacaje palá. Re ca'ajná apú piño, ripajlaca ca'ajná iná hua'até huejápaja. Raú caja iná hue'epí ripajlájica piño iná hua'até cajrú.

<sup>11</sup> Uncachu pila'alá palá nacaje hua'até marí eja'ahuá chu i'imacare, uncá caja pila'alaje palá nacaje Tupana huátaca que.

<sup>12</sup> Uncachu ila'alá palá ajopana nane hua'até, uncá caja Tupana a'alaje ijlo nacaje ijluhua penaje.

<sup>13</sup> Tupana i'imacachu iná huajhué, uncá iná huajhué calé liñeru. Liñeru i'imacachu iná huajhué, uncá iná huajhué calé Tupana. Iná hue'epícachu liñeru jahuacátacana inajluhua iná tucumó, uncá iná hue'epila Tupana huátaca que la'acana iná tucumó. Uncá meño'ojó iná pechu i'imalá iyamá chuhúa —que Jesús quemacá najló.

<sup>14</sup> Marí que rimacá aú fariseóna i'ichaño rinacu, íqui'i nahuátacale liñeru.

<sup>15</sup> E Jesús quemari najló:

—Icá la'año icó palájne'equena que ina'uquejlo, napechu i'imacáloje palá inacu penaje. E'iyonaja Tupana hue'epirí mecajenaca icá. Ina'uqué nemacárena nacú: “Palájne'equena huani necá” que, apala uncá huani Tupana huátalarena ca'ajná necá.

<sup>16</sup> Jesús quemari piño najló:

—Tupana puráca'alo, Moisesmi chu lana'acare, yuriro piyuque ina'uquejlo. Ñaqueé caja ripuráca'alo, ripuráca'alo ja'apátajeñomi chuna lana'acare, yuriro caja najló. Juanmi chu i'imacá ejená riyuró najló. Tupana i'imatari pamineco ina'uqué capichácaje liyá, ne'emacáloje rijhua'atéjena raú penaje. Juanmi chu queño'orí riyucuna i'imacana ina'uquejlo. Chuhua cajrú ina'uqué la'acá napechu ejé, ne'emacáloje Tupana hua'atéjena raú penaje.

<sup>17</sup> Piyuque nacaje Tupana puráca'alo lana'acuéjami quemacare nacú i'imajeri rimacá que. Uncá ri'imalaje apojó. Eja'ahuá capichájero. Je'echú capichájero caja. E'iyonaja uncá ripuráca'alo capichálajo. Rimacá rinacu queja ri'imajica. Ñaqueé caja ripuráca'alo ñani quemacá que rinacu, queja ri'imajica.

*Ina'uqué cupaca piyá naluna yucuna marí:*

*(Mt 19.1-12; Mr 10.1-12)*

<sup>18</sup> Jesús quemari piño najló:

—Apú yurícachu riyajalo, rihuá'acacoloje apa'ahuelo hua'até, la'arí rimanaicho raú. Apa'ahuelo hua'até la'acana queja caja ricá Tupánajlo. Apú ca'ajná huá'acaro riyajálo, riyurícareru penaje hua'até. Ricá caja la'arí rimanaicho raú. Apa'ahuelo hua'até la'acana queja caja ricá Tupánajlo, apú yajalo jo'ó ru'umacale rijló —que Jesús quemacá najló.

*Cajrú le'ejepelari, Lázaro, quele yucuna marí:*

<sup>19</sup> Jesús i'imari piño yucu najló marí que:

—Pajluhuaaja ina'uqué i'imichari. Cajrú le'ejepelari ri'imichaca. Palá nojé ra'arumacá ra'aque rinacuhúa. Hue'echú ca'alá queja rajñajica ra'ajnehuá cajrú. Palá nojé, cahuemí nojé a'ajnejí ajñacana nacuja ri'imaqué. Piyuque huani nacaje i'imichaca ricapi.

<sup>20</sup> Eyá re caja apú ina'uqué i'imichari. Rií i'imichari Lázaro. Camu'ují la'acá ri'imichaca. Cajrú huani musumusuna i'imichaca rinacu. Cajrú le'ejepelari ñacaré numaná nacú riyá'ajico te'erí e'iyá.

<sup>21</sup> Rimesané naquiyá cajrú a'ajnejí mujrumi cujrúca'ajica. Cacáme'e ri'imajica rajñacana nacú ra'apiyá, rimano'ocáloje raú penaje. Rejé nayahuitena ipháqueño rinacu raphú chiyá apíro'oje.

<sup>22</sup> E caja camu'ují la'acá taqui'ichari. Quéchami Tupana hua'atéjena, je'echú chiyájena, huá'ichaño ripéchumi ají que je'echú chojé, Abraham i'imacá ejo. Ejomi cajrú le'ejepelari taqui'ichari caja. E nasi'ichá ritami.

<sup>23</sup> Pu'uhuaré la'ajeño, namanaicho la'ajeño péchumi i'imari apojó. Rejo ripéchumi i'ijichari. Chapú caje yajhué riji'ichá panacu re. Aú riyacá'icho ají ño'ojó. Juca ramicha Abraham, rijhua'até Lázaro i'imichari.

<sup>24</sup> E rihuá'icha Abrahamjlo, rimicha rijló: “Chuchú, Abraham, pihue'epí numu'ují. Pihuacára'a majó ilé Lázaro, riyá'achi riyatehuana manáure juni acojé, riyacátacaloje nulená raú penaje. Iqui'i huani nomaca ima'aní yajhué maare siyá chu”, que rimíchaca rijló.

<sup>25</sup> E'iyonaja Abraham quemíchari rijló: “Nulaqué, picá hue'epiri méqueca nacaje piyuque huani i'imacá picapi, cajmuni pi'imaqué huacajé. Eyá Lázaro i'imari uncá huani paala rihuacajé. Chuhua palánija ricá maare. Eyá picá amari chapú caje yajhué. Caja queja pijló ricá.

<sup>26</sup> Uncá meque huala'alá. Cajrú huani te'erí mata'acá, ricá itari huapu paliyácaca. Ñaquele uncá meño'ojó iná cuhuá'ala pa'anajo pitá maare eyá. Uncá caja iná cuhuá'ala ilé ño'ojó majó”, que rimíchaca rijló.

<sup>27</sup> Eyá cajrú le'ejepelari quemíchari piño rijló: “Chuchú, Abraham, pila'á nojló nacaje. Pihuacára'a Lázaro nora'apami ñacaré ejo.

<sup>28</sup> Re nojénami, pajluhuaa té'ela quele necá. Pihuacára'a ricá rejo, ri'imacáloje riyucuna najló penaje, ne'ejnacá piyá majó. Maare iná amaca chapú caje yajhué”, que rimíchaca rijló.

<sup>29</sup> E'iyonaja Abraham quemíchari rijló: “Re nacapi Tupana puráca'alo lana'aquejami, Moisesmi chu lana'acare ina'uquejlo i'imacá. Re caja nacapi Tupana puráca'alo lana'aquejami, ra'apátajeñomi chuna lana'acare i'imacá. Ra'apiyá jema'acana aú palá ri'imajica najló”.

<sup>30</sup> E cajrú le'ejepelari quemíchari rijló: “Que jo'ó, chuchú. E'iyonaja pu'uhuacá pajluhuaaja caja taca'arí penájemi i'ijnaquela najló riyucuna i'imajé, napajno'otajla napéchuhua pu'uhuaré nala'acare liyá”, que rimíchaca rijló.

<sup>31</sup> Aú rimicha piño rijló: “Moisesmi chu, Tupana puráca'alo ja'apátajeñomi chuna, quele lana'año Tupana puráca'alo patera chojé i'imacá, ina'uqué a'acáloje nanacojó ricá. Uncaja que nema'a ra'apiyá, uncá caja nema'alaje pajluhuaaja taca'arí penájemi macápo'oco ja'apiyá”, que rimíchaca rijló. Caja quetana riyucuna.

## 17

*Chapú huani ri'imajica najló, a'año ajopana ñaté pu'uhuaré la'acana aú. Riyucuna marí: (Mt 18.6-7, 21-22; Mr 9.42)*

<sup>1</sup> Jesús quemari ra'apiyatéjenajlo:

—Re marí eja'ahuá chu nacaje ina'uquejlo, uncá paala. Raú nala'á pu'uhuaré. Re ca'ajná ina'uqué. Nala'á nacaje ca'ajná, na'á nacaje ca'ajná no'opiyá jema'ajénojo, nala'acáloje pu'uhuaré raú penaje. Chapú huani ri'imajica najló, na'acale nañaté raú.

<sup>2</sup> Naca'aguela necá junápeje, cajruni jipa jepo'ocana nanúru'upi nacojé hua'até, palani ri'imacajla najló. Ilé que nala'aguela necá, i'imárijla palani, chapú caje yajhué namájacare ijlnunami chojé.

Eyá Jesús quemari piño marí que najló:

<sup>3</sup> —Ihue'epinoja marí: Iná e'ehué la'ajica ee chapú iná, iná aca'á ricá. Ripajno'otájica ee ripéchuhua pu'uhuaré rila'acare liyá, iná amó richaje.

<sup>4</sup> Apala iyamá cuhuá'ata que pe pajluhuaaja cala japi rila'acá iná chapú. Rila'á iná chapú quehuá ca'ajná rimacá inajlo: “Uncá nula'alaje piño picá chapú” que. Rimájica inajlo que pe iná amájico richaje —que Jesús quemacá najló.

*Tupana a'arí iná ñaté, iná pechu i'imacá aú caphí Tupana chojé. Riyucuna marí:*

<sup>5</sup> Jesús ja'apiyatéjena quemáño Jesúsjlo:

—Pa'á huañaté, huapechu i'imachi caphí Tupana chojé, ra'acáloje huañaté nacaje la'acana aú penaje.

<sup>6</sup> Eyá Jesús quemari najló:

—Camu'ujuni mostaza icha ijí. E'iyonaja yenuna rina tahuá'aco. Ñaqué caja huejápaja ñani ipechu i'imaquela caphí Tupana chojé, imajla marí a'ahuanaajlo marí que: “Pero'ó picó te'erí e'iyayá, panúca'atachi picó juni jalomi acojé”. Marí que quemacana aú, rema'ájla ja'apiyá —que Jesús quemacá najló.

*Apú hua'até sápjajeri yucuna marí:*

<sup>7</sup> Jesús quemari piño najló:

—Re ca'ajná apú hua'até sápjajeri. E lainchu ca'ajná riphá ricarihuate nacú. Te'erí moto'ótacana nacú risapa ca'ajná. Ripirana lamára'acana nacú ca'ajná risapa. Riphá rinacu lainchu. ¿Meque ca'ajná ricarihuate quemacajla rijló? “Majó pi'ijná. Piyá'icho, pajñachi pa'ajnehuá”. ¿Marí que chi rimacajla rijló?

<sup>8</sup> Uncá ilé que calé rimacajla rijló. Marí que rimacajla rijló: “Chuhua pimoto'ó nojló a'ajnejí, nojñachi no'ojnehuá. Pilamá'ata picó. Nojñaca no'ojnehuá quetana pi'imajica nohua'á, pa'apátacaloje nojló nacaje nuhuátajicare penaje. Nujehuémico pajña pa'ajnehuá”, que rimacajla rijló.

<sup>9</sup> Uncá caja rimalajla rijhua'até sápjajerijlo: “Palá pili'ichaca nucá” que, rijhua'até sápjajeri ri'imacale.

<sup>10</sup> Ñaqué caja ijló ricá. Ila'acá aú Tupana huátaca que, imá inacuhuá marí que: “Majopeja rijhua'até sápjajeño huecá. Rihuacára'aca que la'ajeño huecá”.

*Jesús tejmó'ótaca iyamá té'ela quele natámina yucuna marí:*

<sup>11</sup> E caja Jesús i'ijnari ají que a'ajná ño'ojó. Rihuata Jerusalén ejo i'ijnacana, aú ra'apá ají que iñe'epú chuhúa. Samaria te'eré, Galilea te'eré ihuami chuhúa iñe'epú to'ocó.

<sup>12</sup> Ricá chuhúa ra'apá. Iphari apú pajimila nacojé. Re riphá iyamá té'ela quele ina'uqué ahua'ajé. Natámina ne'emacá. Napona patáca'ataro najló, nacú ne'emá natami. E juca ri'imanoja nahuá'aca Jesusjlo.

<sup>13</sup> Nemá rijló:

—Jesús, Huehuíña'atajeri, pihue'epí camu'ují huanacu —que nemacá rijló.

<sup>14</sup> Jesús amaca aú necá rimá najló:

—I'ijná, iya'achíyachi icó sacerdotenajlo —que rimacá najló.

E caja ne'ejná ají que a'ajná ño'ojó. Na'apaca nacuja caja natejmó'otó.

<sup>15</sup> Pajluhuaja hue'epiri caja ritejmó'otaco. Samaria eyaje ri'imacá. Raú ripa'ó rapumí chuhúa. Jahuíyo'oqueja rimacá Tupana nacú:

—iMeque palá huani Tupana li'ichaca nucá!

<sup>16</sup> E riphá Jesús nacú. E ritára'o ri'irúpachi aú Jesús jimaje. Racúhua'ata rihuila'aru ají que cahuacaje. E rimá Jesúsjlo:

—Palá huani pili'ichaca nucá.

Samaria eyaje ri'imacá, quemari rijló marí que.

<sup>17</sup> Raú Jesús quemari rahua'á i'imacáñojlo:

—Iyamá té'ela quele ina'uqué tejmó'ochíyaño. Eta, ¿mere chi ajopana? Pa'u que cuhuá'ata quele yurichaño, uncá iphálachaño.

<sup>18</sup> Ricaja calé pajluhuaja pi'icharo Tupánajlo quemaje: “Palá pili'ichaca nucá” que. Ajopana te'eré eyaje ricá.

<sup>19</sup> E Jesús quemari ritejmó'ótacarejlo:

—Pácho'o, pi'ijná. Peyajhueni picá chuhua, caphí pipechu i'imichaca aú nochojé pitejmo'ochiyo —que rimacá rijló.

*Méquechamica Tupana i'imajica ina'uqué huacára'ajeri yucuna marí:*

(Mt 24.23-28, 36-41)

<sup>20</sup> E fariséona naquiyana quemaño Jesusjlo:

—¿Méquechamica Tupana i'imajica piyuque ina'uqué huacára'ajeri?

Jesús quemari najló:

—Ina'uqué naquiyana huacára'ajeri Tupana me'etení. Uncá pu'uhucá calé iná amaca rihuacára'aca rijhua'atéjena.

<sup>21</sup> Uncá marí que quemacana i'imalaje: “Maare rihuacára'aca necá. A'ajnare rihuacára'aca necá”. Re rijhua'atéjena maare e'iyohuá me'etení —que rimacá najló.

<sup>22</sup> E rimá ra'apiyatéjenajlo:

—Ina'uquéloje penaje i'imacá nucá. Ijhua'até nucá me'etení. Aquijñojo uncá nu'umalaje ijhua'até. Rihuacajé ihuátaje nu'umacá ijhua'até, me'etení nu'umacá ijhua'até que caja.

Nu'umaquela ijhua'até aquiññojo pajluhua cála, palánija ri'imacajla ijlo. E'iyonaja calé uncá nu'umalaje ijhua'até.

<sup>23</sup> Nemaje ca'ajná ijlo nunacu marí que i'imajica: "Maare ricá". Ajopana quemajeño ca'ajná: "A'ajnare ricá." I'ijnaniya nuculaje, i'ijnaniya caja najhua'até.

<sup>24</sup> Ina'uquejloje penaje i'imacá nucá. Pichaní camaré patacá que je'echú jimaya majó, que caja namájica nuphaca majó, nuphájica noná chojé huacajé.

<sup>25</sup> Pamineco nujña'ajé chapú caje yajhué panacu. Ina'uqué, me'etení i'imacaño, la'ajeño nucá chapú.

<sup>26</sup> Eyá aquiññojo nuphájica majó huacajé, Noémi chu i'imacá huacajé que caja ri'imajica nupa'ajico piyá. Ina'uquejloje penaje i'imacá nucá.

<sup>27</sup> Noémi chu i'imaqué huacajé, Tupana huacára'ari cajrú juni ja'acó, pu'uhuaré la'ajeño capichácoloje racojé penaje. Uncá chiyó cajrú juni ja'acó, ina'uqué la'aqueño marí que: Na'ajnehuá ajñacana nacú, nacaje jalá i'iracana nacú ne'emaqué. Huá'acacajo nacú ne'emaqué. Na'aqueé caja nayani pajlocaca, nahuá'acacoloje penaje. Marí caje nacú ne'emaqué. E'iyá Noémi chu mujlúca'ari rihuapúrune chojé. Ejéchami mana'í chiyó nacapichaco.

<sup>28</sup> Ñaqueé caja ina'uqué la'ajica Lotmi chu i'imaqué huacajé. Najñaque na'ajnehuá; ne'eraqué nacaje jalá; nahuarúhua'aque nacaje paliyácaca; nejátaque nacaje icha ijí ne'ecacapere e'iyá; nala'aqueé nañacaró. Caje nacú ne'emaqué. Mana'í chiyoja nacapichaco, uncá nahue'epila nacapichaco jená.

<sup>29</sup> Lotmi chu jácho'oco pajimila Sodoma eyá huacajé, cajrú quera'atani cujúca'aca majó je'echú chiyá azufre hua'até. Cajrú ricujúca'aca pajimila eruna cha. Raú piyuqueja necá capichaño.

<sup>30</sup> Ñaqueé caja ri'imajica piño ina'uquejlo yehuicha nupa'ajico yámona. Uncá caja nahue'epilaje nuphájica majó jená. Ina'uquejloje penaje i'imacá nucá.

<sup>31</sup> Rihuacajé ca'ajná e'iyajena i'imajeño pají j'i'ihuata chu. Inane i'imajé ca'ajná pají chu. Ihuitúca'aniya rijña'ajé richiyá. Rihuacajé ca'ajná e'iyajena i'imajeño imena e'iyá. Ipa'aniyo piño iñacaré chojé.

<sup>32</sup> Ihue'epí méqueca Lotmi chu yajálomi cholo capichaco, ruyacá'acole ruyámojo pachá, rucapichó i'imacá.

<sup>33</sup> Ñaqueé caja ijlo ricá me'etení. Huátari ricó mejñátacana, capichájero nuliyá. Uncá hue'epila rinacuhua, ri'imacáloje nujhua'ateje penaje, i'imajeri nujhua'até.

<sup>34</sup> Nuphájica huacajé, apala iyamá camátajeño pajluhua cama chu. Nujhua'atéjona, je'echú chiyájena, huá'ajeño pajluhua nanaquiyana, nujhua'ateje ri'imacale. Apú yuréjero, uncá no'opiyá jema'ajeri calé ri'imacale.

<sup>35</sup> Rihuacajé caja iyamá inaana tujla'ajeño pajñacani ca'ajná nacaje tujláca'aruna chu. Nahuá'aje pajluhua'jaruja, nujhua'atéjeru ru'umacale. Apa'ahuelo yuréjeyo, uncá jema'alayo no'opiyá.

<sup>36</sup> Rihuacajé caja iyamá achiñana i'imajeño ca'ajná namena e'iyá. Nahuá'aje pajluhua nanaquiyana, nujhua'ateje ri'imacale. Apú yuréjero, uncá jema'alá no'opiyá —que Jesús quemacá najló.

<sup>37</sup> Raú nemá rijló:

—¿Meño'ojó ri'imajé quele pimá nacú?

Aú Jesús quemari najló:

—Meño'ojó nujhua'atéjona i'imajica ejo, reyá nahuá'aje necá ne'iyayá.

## 18

*Ihuacajlomi i'ijnacá puráca'aloji lámá'atajери chaje yucuna marí:*

<sup>1</sup> E Jesús i'imari yucu najló, rehuíña'atacaloje necá penaje, nayurica piyá Tupana hua'até pura'acano, nala'acó piyá ujhuí rijhua'até pura'acano nacú.

<sup>2</sup> Penaje ri'imá marí yucu najló marí que:

—Pajluhuaja ina'uqué i'imichari. Puráca'aloji lámá'atajери ina'uquejlo ri'imichaca. Pajimila e riñacaré i'imichaca. Uncá riphálacha Tupana ja'apí, uncá caja riphálacha ina'uqué ja'apí.

<sup>3</sup> Ricaja caja pajimila e apa'ahuelo i'imichayo. Ihuacajlomi ru'umichaca. Apú li'ichari chapú rucá, aú metuque ru'ujichacano riyucuna i'imajé rijló. Mahuó ruli'ichaca ricá, rilamá'atacaloje rojló ricá penaje.

<sup>4</sup> Ruphaque rinacu. E'iyonaja uncá ra'alá rinacójó rucá. Júpija uncá rihuátalacha rilamá'atacana rojló. E caja ehuaja ripechu i'imichá marí que: "Uncá nuphala Tupana ja'apí, uncá caja nuphala ina'uqué ja'apí.



<sup>5</sup> E'iyonaja no'ojé ilerú ihuacajilomi ñaté, rucahuíla'acale huani nunacu. Nupura'ajó ruchaya, ru'ujnacá piyá metuque huani majó, roya'átaca piyá nucá", que ripechu i'imichaca —que Jesús i'imacá yucu.

<sup>6</sup> Ejomi Jesús quemari piño najló:

—Uncá ina'uquélari ilé puráca'aloji lamá'atajeri i'imacá. E'iyonaja rimá: “No'ojica ruñaté” que.

<sup>7</sup> Eyá Tupana, quiñaja ra'ajica nañaté, necá ri'ihuapacárena ajopana ina'uqué e'iyayá. Nacaje riliyá quejá'ajeño necá. Hue'echú, lapí hua'ató nemá rijló, ra'acáloje nañaté penaje. Uncá cachuhua calé ra'ajica nañaté.

<sup>8</sup> Quiñaja ra'ajica nañaté. Marí que ijló ricá. E'iyonaja nupa'ajico majó huacajé, apala uncá nuphátalaje caphí Tupana chojé péchuruna. Ina'uquéloje penaje i'imacá nucá.

*Iyamá ina'uqué pura'acó Tupana hua'até yucuna marí:*

<sup>9</sup> Marí que ina'uqué naquiayana pechu i'imacá nanacuhuá: “Ajopana chaje nucá. Ajopana ina'uqué uncá ina'uquélaruna necá,” que napechu i'imacá nanacuhuá.

Ñaquele Jesús i'imari apa'amá yucu najló, rehuíña'atacaloje necá Tupana nacú raú penaje. Marí yucu ri'imá najló i'imacá:

<sup>10</sup> —Iyamá ina'uqué i'ijichaño Tupana ñacaré chojé Tupana hua'até pura'ajó. Apú i'imichari fariséona naquiayana. Apú i'imichari liñeru ña'ajeri ne'emacánajlo.

<sup>11</sup> E fariseo puri'icharo Tupana hua'até. Marí que rimíchaca rijluhua: “Tupana, palá pila'acá nucá. Re ina'uqué, uncá ina'uquélaruna necá. Re caja piro'oquéjona. Re caja calúyana nacú cahuíla'ajeño. Uncá ñaquejé calé nucá. Raú palá pila'acá nucá. Uncá caja ilé tára'aro caje calé nucá. Liñeru ña'ajeri hue'emacánajlo ricá.

<sup>12</sup> Nucá i'itaró no'ojné liyá iyamá peno que pajluhuaaja sápacaje japi, pipechu i'imacáloje nunacu palá raú penaje. Marí queno nula'acá liñeru nucánacare aú: Iyamá té'ela queta naquiayana no'ó pijló pajluhuátano”, que rimíchaca Tupana hua'até pura'acano aú.

<sup>13</sup> Eyá liñeru ña'ajeri ne'emacánajlo tári'icharo juca pani ajopana ahua'ayá. Rihuó li'icharo je'echú chojé yacá'acano piyá. Ritujli'ichá ricó ri'icú chiyá riyáte'ela aú, ujhuí ripechu i'imichácale rinacuhuá. E marí que rimíchaca Tupánajlo: “Tupana, pihue'epí numu'ují. Pu'uhuaré la'ajeri nucá. Uncá ina'uquélari caja nucá”, que rimíchaca rijló. Maáreje riyucuna tajnaro.

<sup>14</sup> Ejomi Jesús quemari piño najló:

—Liñeru ña'ajeri ne'emacánajlo pa'aró riñacaré chojé. Palá Tupana pechu i'imacá rinacu. Eyá apú, fariséona naquiayana, uncá Tupana pechu i'imalá rinacu palá. Uncá paala Tupánajlo, iná pechu i'imacachu iná nacuhuá marí que: “Nucá chá'atari ajopana” que. Raú Tupánajlo iná i'imá ajopana ja'apejé. Iná pechu i'imacachu iná nacuhuá: “Ajopana chá'ataño nucá” que. Tupánajlo iná i'imá ajopana chaje raú —que Jesús quemacá najló.

*Jesús pura'acó palá yuhuaná nacú yucuna marí:*

*(Mt 19.13-15; Mr 10.13-16)*

<sup>15</sup> Ajopana huá'año Jesús ejo yuhuaná, rito'otácaloje riyáte'ela nanacu penaje. Ra'apiyatéjona amaca aú nahuá'aca necá rejo nahuíyo'o najló richá, nahuá'aca piyá yuhuaná Jesús ejo.

<sup>16</sup> E'iyonaja Jesús huá'ari yuhuanajlo, ne'ejnacáloje richaje penaje. E rimá ra'apiyatéjenajlo:

—Reja yuhuaná i'ijnareja nuchaje. Itániya napu, ne'ejnacá piyá nuchaje. Yuhuaná que i'imacálo i'imaño caja Tupana hua'atéjona. Nahuacára'ajeri ricá.

<sup>17</sup> Ihue'epí marí: Uncá meño'ojó ina'uqué i'imalá Tupana hua'atéjona, uncachu napechu i'imalá yuhuaná pechu que caja rinacu. Yuhuaná huátaño Tupana nañaté a'ajeri penaje. Uncachu ajopana ina'uqué huátalaño Tupana nañaté a'ajeri penaje, uncá meño'ojó ne'emalá rijhua'atéjona, namujlúca'acaloje je'echú chojé penaje —que rimacá najló.

*Cajrú le'ejepelari hualijimaca pura'acó Jesús hua'até yucuna marí:*

*(Mt 19.16-30; Mr 10.17-31)*

<sup>18</sup> Pajluhuaaja nahuacára'ajeño naquiayana quemari Jesusjlo:

—Ina'uqué jehuíña'atajeri picá. Palani picá —que rimacá—. ¿Meque nula'acajla, nu'umacáloje Tupana hua'até matajnaco je'echú chu raú penaje?

<sup>19</sup> Jesús quemari rijló:

—¿Naje pimá nunacu: “Palani” que? Ricaja calé, Tupana, palani. Uncá palani calé ina'uqué.

<sup>20</sup> Caja pihue'epí méqueca Tupana puráca'alo lana'aquéjami quemacá. Uncá rihuátala achiñá, inanaru hua'até la'acá namanaicho pajhua'atéchaca. Uncá caja rihuátala iná noca ina'uqué. Uncá caja rihuátala iná ata'acá nacaje. Uncá caja rihuátala iná pajlaca ina'uqué

hua'até. Uncá caja rihuátala iná iphaca iná ja'apihuá iná chi'inajlo. Rihuata iná iphaca na'apí palá —que Jesús quemacá rijló.

<sup>21</sup> E rimá rijló:

—Caja nujuhuaco noma'á ra'apiyá maáreje cha.

<sup>22</sup> Marí que rimacá aú rijló Jesús quemari rijló:

—Re pajluhuaja ñani nacaje yuriro pitucumá, pila'acáloje palá raú penaje. Eco pa'atá ajopánajlo piyuque pinane rihuemí aú. Rejomi pitamáca'ata piyuqueja piliñéroute camu'ují la'acáñojlo. Marí que la'acana aú cajú nacaje, palá nojé i'imagé pijló je'echú chu. Quéchami pipa'ajico piño majó, pi'ijnacáloje nujhua'até no'opiyateje penaje —que Jesús quemacá rijló.

<sup>23</sup> Marí que rimacá rijló aú camu'ují huani ripechu la'acó rinane hua'até. Uncá ra'alá rinacajó ripuráca'alo, cajú le'ejepelari ri'imacale.

<sup>24</sup> Jesús amari camu'ují ripechu i'imacá. Raú rimá ajopánajlo:

—Puhuichani huani cajú le'ejepelárunajlo nachó yurícana Tupánajlo, ri'imacáloje

nahuacára'ajeri penaje.

<sup>25</sup> Puhuichani caméllajlo luhuirí aphú chiyá ja'apácana. Richaje puhuichaca cajú le'ejepelárunajlo nachó yurícana Tupánajlo, ri'imacáloje nahuacára'ajeri penaje.

<sup>26</sup> Raú ripuráca'alo jema'ajeño quemáño pajlocaca:

—¿Mecajena ca'ajná Tupana i'imatájeri rijluhua capichácajo liyá?

<sup>27</sup> E Jesús quemari najló:

—Uncá meño'ojó ina'uqué i'imatala necó capichácajo liyá. Tupánaja calé i'imatari ina'uqué capichácajo liyá.

<sup>28</sup> E Pedro quemari rijló:

—Huahuacára'ajeri, huecá yuriño piyuqueja huanane, hue'ejnacáloje pijhua'até penaje.

<sup>29</sup> Jesús quemari rijló, ajopánajlo hua'até:

—Nala'acáloje nuhuacára'aca que penaje, ina'uqué naquiyana yuriño nañacaré ca'ajná. Uncá nahuá'acalo ca'ajná. Ne'ejnañája nejena ca'ajná, nachí'iná ca'ajná, nate'eré ca'ajná, nala'acáloje nuhuacára'aca que penaje. Nayani caja ñapácaño ca'ajná ne'ejnañaá, nala'acáloje nuhuacára'aca que raú penaje.

<sup>30</sup> Palá huani ri'imajica marí que la'acáñojlo. Ñó'ope caja Tupana a'ajica nañaté. Tupana a'ajeri caja necá, ne'emacáloje matajnaco je'echú chu rijhua'até penaje —que Jesús quemacá najló.

*Jesús quemacá rinacuhú najló méqueca ritaca'ajica yucuna marí:  
(Mt 20.17-19; Mr 10.32-34)*

<sup>31</sup> Jesús huá'ari ra'apiyatéjena juca pani ajopana ina'uqué liyá. E rimá najló:

—Chuhua hue'ejnajica Jerusalén ejo. Re nala'ajé nucá chapú. Tupana puráca'alo ja'apátajeñomi chuna quemacá chojé nuphaje. Ina'uquéloje penaje i'imacá nucá.

<sup>32</sup> Re na'ajé nucá ajopánajlo, uncá judíonajlo calé. Necá la'ajeño namácaja nucá. Napura'ajó nunacu pu'uhuaré. Natupaje caja nahui nunacajé.

<sup>33</sup> Naña'ataje caja nucá. Quéchami nenójica nucá. E'iyonaja hueji que cala i'imajemi numacápo'ojó piño nopumí chuhua —que rimacá najló.

<sup>34</sup> Ra'apiyatéjena uncá hue'epílaño meque quemacánaca rimacá najló. Me'echuje ri'imacá najló, uncá riphala napechu nacú.

*Jesús ja'apátaca pajluhuaja mejlurú liyá mejlucaji yucuna marí:  
(Mt 20.29-34; Mr 10.46-52)*

<sup>35</sup> E caja Jesús iphari pajmíla Jericó nacajé. Re iñe'epú turená pajluhuaja ina'uqué yá'aro, riquejá'acaloje liñeru ina'uqué liyá rijluhua penaje, mejlurú ri'imacale.

<sup>36</sup> E rema'á cajú ina'uqué ja'apaca rahua'ayá iñe'epú chuhua. Raú rimá najló:

—¿Naje cajú huánijle ina'uqué ja'apaca maárohua?

<sup>37</sup> Nemá rijló:

—Jesús, Nazaret eyaje, ja'apácare chuhua marí iñe'epú —que nemacá rijló.

<sup>38</sup> Raú jahuíyo'oqueja rihuá'aca rijló. Rimá rijló:

—Jesús, ina'uqué i'imatájeri Tupánajlo penaje picá. Pihue'epí numu'ují.

<sup>39</sup> Jesús tucumá ja'apájeño aca'año ricá:

—¡Pimanúma'o ta! —que nemacá rijló.

E'iyonaja richaje huani rahuíyo'oca raú:

—Ina'uqué i'imatájeri Tupánajlo penaje picá. Pihue'epí numu'ují —que rihuá'aca Jesúsjo.

<sup>40</sup> Raú Jesús tajnaro rejé. Rimá najló, nahuá'acaloje ricá rahua'ajé penaje. Riphaca rinacu ee rimá rijló:

<sup>41</sup> —¿Meque pihuátaca nula'acá picá?

Mejlurú quemari rijló:

—Huahuacára'ajeri, pa'apata nuliyá mejlucaji, nomachi.

<sup>42</sup> Jesús quemari rijlól:

—Piyacá'ó chuhua. Caja pi'imichó mejlucaji chiyá, pipechu i'imichácale nunacu: “Ríca ja'apátajeri nuliya mejlucaji”. Aú no'opáchiya piliya ricá.

<sup>43</sup> Ejéhami mejlurú penájemi amaca palá. Aú ri'ijná Jesús hua'até. Palá ripura'acó Tupana nacú. Ñaqué caja Jesús hua'até chira'ajeño pura'acó Tupana nacú palá.

## 19

### *Zaqueo yucuna marí:*

<sup>1</sup> E caja Jesús iphari pajimila Jericó e'iyajé. E ra'apá ají que pajimila e'iyohuá.

<sup>2</sup> Re pajluhuaja ina'uqué i'imari. Liñeru miná huani ri'imacá. Ríi i'imari Zaqueo. Liñeru ña'ajeño ne'emacánajlo huacára'ajeri ri'imacá.

<sup>3</sup> Eyá caja Zaqueo huátari Jesús amácana. E'iyonaja cajrú huani ina'uqué chipúca'ari Jesús nacú tujlá que. Huajáca'alami Zaqueo i'imacá. Ñaquele uncá meño'ojó ramala ne'iyayá Jesús.

<sup>4</sup> Ñaquele recho'ó ají que a'ajná ño'ojó natucumajo. I'ijrari a'ahuná nacuhuá, ramácaloje ricá reyá i'imajemi penaje. A'ahuná íi i'imari sicómoro. Ricá nacuhuá ri'ijrá. Jesús apu ahua'á ritára'ó i'imacá.

<sup>5</sup> Jesús iphari riloco'opani. Aú riyacá'ó richaje, amari ripato'ocó a'ahuná nacú. E rimá rijlól:

—Zaqueo, quiñaja pihuitúca'aca majó. Chuhujá nuyurejo pijhua'até piñacaré chu.

<sup>6</sup> Raú rihuitúca'a cara cara que a'ahuná naquiya. E rimá Jesusjlo, ri'ijnacáloje rijhua'ató riñacaré chojé penaje. Pu'ují rihuó i'imacá richá.

<sup>7</sup> Ajopana amaca aú Jesús i'ijnacá rijhua'até nachapújra'aco Jesús nacú. Nemá rinacu:

—Chuhua ri'ijchaca uncá ina'uquélari hua'até, ri'imacáloje rijhua'até riñacaré chu penaje —que nemacá rinacu.

<sup>8</sup> E caja mequetánaja ne'emacá riñacaré chu. E Zaqueo tára'aro, rimá Jesusjlo:

—Pema'á, pe'iyoyé nunane naquiya no'ojé camu'ují la'acáñojlo. Júpimi nupajlaque ajopana ina'uqué hua'até, nujña'acáloje nujluhua naliñérote naquiya penaje. Chuhua nupa'atájica piño najlól naliñérote. Pajluhuata papera nujña'acárena liyajlo nupa'ataje pa'u queta richaje rapumí chojé. Ñaqué huánija nupa'atájica najlól liñeru rapumí chojé —que rimacá Jesusjlo.

<sup>9</sup> Raú Jesús quemari rijlól:

—Chuhujá piñacaré chu maare Tupana i'imachiyari picá rijluhua capichácajo liyá. Abrahami chu laquemi picá.

<sup>10</sup> Ina'uquéloje penaje i'imacá nucá, nu'ujná majó nu'umatácaloje ina'uqué capichácajo liyá penaje —que rimacá rijlól.

*Apú a'arí rijhua'até sápageñojlo liñeru. Riyucuna Jesús i'imari najlól, rehuíña'atacaloje necá nacaje nacú raú penaje.*

*(Mt 25.14-30)*

<sup>11</sup> Na'apaca nacú Jesús i'imari najlól yucu. Yehuicha nephaca Jerusalén ejo. E rijhua'até chira'ajeño pechu i'imá: “Yehuíchaja riphaca rená chojé, Tupana i'imacáloje piyuque ina'uqué huacára'ajeri penaje”. Ñaqué i'imacale Jesús i'imari najlól yucu, nahue'epícaloje rinacajé raú penaje.

<sup>12</sup> Marí que ri'imacá yucu najlól:

—Pajluhuaja ina'uqué i'imichari nahuacára'ajeño i'irí. Ricá i'ijichari ya'ajnaje ajopana te'eré ejo, na'acáloje rejo ricá necó huacára'ajeri penaje. Rejomí rihuáchiya rapumí chuhua pa'acano.

<sup>13</sup> Ri'ijichaca yámona rihuá'icha rijhua'até sápageño maná. Iyamá té'ela quele ne'emichaca. Necá maná rihuá'icha. Raú ne'ejichá rejo. Riyámona ritamáca'achiyaca najlól cajrú liñeru apujlo, apujlo que. Réjenohuaja ra'achacá najlól ricá. E rimicha najlól: “Caja no'ochá ijlo liñeru. Raú ijña'ajé ijluhua richaje nu'umajica rejo quetana”, que rimíchaca najlól. “Je”.

<sup>14</sup> Ejomi ri'ijichá ají que a'ajná ño'ojó. Uncá huani rite'eré eruna naquiya huátalacha ricá. Chapú napechu i'imichaca rinacu. Raú nahuacári'icha ajopana ina'uqué rapumí chu rijlól quemaje: “Uncá huahuátala picá hue'emacana penaje”.

<sup>15</sup> E caja ya'ajná na'achá ricá rite'eré eruna huacára'ajeri penaje. Ejomi ripi'ichó rite'eré ejo. E caja riphicha piño nanacu rapumí chuhua. E rihuá'icha rijhua'até sápageño maná. Ra'acárenajlo liñeru i'imacá maná rihuá'icha. Rihuáchiya riliñérote yucuna quejá'acana naliyá, apú liyá, apú liyá que, ramácaloje mérejeja nacánaca liñeru raú penaje.

<sup>16</sup> Pamineco iphíchaca rinacu quemíchari rijlól: “Huahuacára'ajeri, diez mil pesos pa'á nojlól i'imacá. Raú nucana richaje cien mil pesos”.

<sup>17</sup> Ne'emacana quemíchari rijló: "A'a, palani. Palani nujhua'até sápa jeri picá. Palá pila'acá huejápaja aú. Ñaquele chuhua no'ojica picá ne'emacana penaje. Iyamá té'ela quele pajimila chiyájena huacára'ajeri penaje no'ojé picá".

<sup>18</sup> Rejomi apú piño iphíchari rinacu. Rimicha rijló: "Huahuacára'ajeri, diez mil pesos pa'á nojló i'ímacá. Raú nucana cincuenta mil pesos richaje".

<sup>19</sup> Rimicha rijló: "Pajluhua té'ela quele pajimila chiyájena huacára'ajeri penaje no'ojé picá".

<sup>20</sup> Eyá apú piño iphíchari rinacu. Rimicha rijló: "Marí piliñé rute. Palá nulamá'ataca pijló ricá nulejuné chu jepo'otá queja.

<sup>21</sup> Nuquero'ó pipiyá, caphí pihuacára'acale ina'uqué. Pihuacára'a nejátaca pijló nacaje icha ijí, richa i'ímacáloje pijluhua penaje. Uncá pisápala pimena e'iyá, e'iyonaja re nacaje pile'eje pacá penaje", que rimíchaca rijló.

<sup>22</sup> Raú ne'emacana quemíchari rijhua'até sápa jeri: "¡Meque uncá huani ina'uquéleri ta picá quele!" Ilé pimíchaca nunacu aú iná hue'epí uncá huani paala pila'acá. Marí pihue'epí quehuaca: caphí nuhuacára'aca ina'uqué. Pihue'epí care caja nejátaca nojló nacaje icha ijí, richa i'ímacáloje nujuhua penaje. Pihue'epí care caja uncá nusápala numena e'iyá. E'iyonaja re nacaje nule'eje pacá penaje re'iyayá.

<sup>23</sup> Caja pihue'epí marí caje nucá. Eta, ¿naje uncá pihuacára'ala ricá liñeru ñacarelana chojé, na'acáloje liñeru ñaté penaje? Naya'atajla ajopánajlo ricá, richaje quemachi napa'atajla pijló ricá. Marí que pila'aquela, aú pipa'atajla nojló piño nuliñé rute richaje hua'até", que rimíchaca rijló.

<sup>24</sup> Raú rimicha re i'ímichácañojlo: "Ijñá'á riliyá riliñé rute, a'achí ilé cánari cien miljlo ricá".

<sup>25</sup> Nemicha rijló: "Hue'emacana, caja cajrú riliñé rute, cien mil ricapi".

<sup>26</sup> Raú ne'emacana quemíchari najló: "Numá ijlo, cajrú nacaje i'ímacárena cápajlo no'ojé richaje. Uncá na i'ímalárena capi liyá, nujña'ajé huejapa nacaje i'ímacare nacapi", que nahuacára'ajeri quemíchaca najló.

<sup>27</sup> E rimicha piño najló: "Chuhua re chapú péchuruna nunacu. Uncá nahuátala nucá ne'emacana penaje. Chuhua ihuá'icha necá majó, inochi necá nujimaje", que rimíchaca najló —que Jesús i'ímacá yucu najló.

*Jesús iphaca Jerusalén e'iyajé yucuna marí:*

*(Mt 21.1-11; Mr 11.1-11; Jn 12.12-19)*

<sup>28</sup> Jesús i'ímarí najló yucu marí que i'ímacá. Ejomi ra'apá natucumá Jerusalén ejo.

<sup>29</sup> E riphá iyamá pajimila nacojé a'ajná ño'ojó. Yenuri Olivos ja'apí ricá pajimila, rejé nephá. Ejé chami rihuacára'aca iyamá ra'apiyatéjena pajimila ejo.

<sup>30</sup> Rimá najló:

—I'ijná ají ño'ojó pajimila ejo huatucumajo. Re amaje cahuarú caje i'irí a'aqueja mucuri. Uncá jo'ó na ja'apá lare nacú ricá. Ricá icaráca'a. Quéchami ihuá'aca ricá majó.

<sup>31</sup> Nemájica ee ijlo: "¿Naje chí icaráca'a ricá?" imaje najló: "Huahuacára'ajeri huátari ricá mequetánajloje penaje" —que Jesús quemacá najló.

—Je —que nemacá.

<sup>32</sup> Aú ne'ejná ají que a'ajná ño'ojó natucumajo. Amaño cahuarú caje i'irí a'aqueja mucuri. Jesús quemacá que namaca ricá.

<sup>33</sup> E nacaráca'a ricá. Ejé chami paminana quemacá najló:

—¿Naje ta icaráca'a quele?

<sup>34</sup> Nemá najló:

—Huahuacára'ajeri huátari ricá.

—Je, ñaque ricá. Icaráca'a ricá.

<sup>35</sup> Aú nahuá'a ricá Jesús ejo. Nayúma'a na'arumacá naquiyana cahuarú huajlé chojé. E nácho'ota Jesús rihuajlé chojé yá'ajo.

<sup>36</sup> E Jesús ja'apari rinacu. Cajrú ina'uqué i'ímacá re. Necá caja ayúma'año na'arumacá naquiyana ra'apaca ehuá. Palá napechu i'ímacale Jesús nacú, nala'á ilé que.

<sup>37</sup> Ají que na'apaca Jerusalén nacojé. E caja nephá yenuri Olivos queño'ca'ala ejé. Re piyuque ra'apiyá jema'ajeño, rijhua'até ja'apájeño ne'emacá, jahuíyo'oño cajrú, pu'ují napechu i'ímacale Jesús nacú. Caja namá Jesús la'acá cajrú nacaje palani huani, nacaje uncá meño'ojó iná la'alare caje. Raú napura'ó Tupana nacú palá.

<sup>38</sup> Marí que nemacá jahuíyo'oqueja Jesús nacú:

—Palani huani Hue'emacana, Tupana huacára'acare majó. Pu'ují je'echú chu i'ímacaño pechu rinacu. Palani huánija Tupana —que nemacá rinacu jahuíyo'oqueja.

<sup>39</sup> Re caja najhua'até fariséona naquiyana i'ímacá. Nema'acá aú nahuíyo'oca marí que, nemá Jesusjlo:

—Huehuíña'atajeri, pihuacára'a pijhua'atéjena nahuíyo'oca piyá.

<sup>40</sup> Jesús quemari najló:

—Numaquela najló, nanúma'acoloje penaje, napumí chojé jipa jahuíyo'ojla caja —que rimacá najló.

<sup>41</sup> E caja Jesús iphari Jerusalén nacojé. Pajimila amácana aú riyá pajimila e i'imaçaño hua'até.

<sup>42</sup> Rimá pajimila e i'imaimila e i'imaçaño nacú marí que:

—Nahue'epíquela me'etení na ina'uqueca la'arí iná pechu palá, palani ri'imacajla najló. Me'echuje jo'ó najló naca nucá. Uncá jo'ó nahue'epila.

<sup>43</sup> Aquijñojo napinana jahuacátaje marí pajimila nacojé. Chipu, chipu que nahuacájico rinacojé. Netaje napu, nácho'oco piyá richiyá.

<sup>44</sup> Nacapichátajica piyuque pajimila eruna; nacajya'at riyá pajimila e i'imaaje caja pajimila piyuqueja; uncá nayurílaje pajluhuaja ñani jipa pachácaca. Marí que nala'ajica necá, uncá pachá nahue'epila méquechamíca Tupana i'imaçá najhua'até, ri'imatácaloje necá capichácajo liyá penaje —que Jesús quemacá Jerusalén eruna nacú.

*Jesús ja'apaca Tupana ñacaré chujena nacú yucuna marí:*

*(Mt 21.12-17; Mr 11.15-19; Jn 2.13-22)*

<sup>45</sup> Nephá pajimila ejo. Ejomi Jesús mujlúca'ari Tupana ñacaré chojé. E ra'apá richujena nacú. Nacaje a'ajeño, nacaje huarúhua'ajeño, necá i'imaño re. Necá nacú ra'apá richiyá.

<sup>46</sup> E rimá najló:

—Tupana puráca'alo lana'aquejami quemari marí que: “Re nuñacaré ina'uqué pura'acóloje nujhua'até richu penaje”, que rimacá. E'iyonaja icá apichátajo ricá. Icó a'año ina'uquejlo nacaje richu rihuemí aú. Richuhuaja ata'á necá. Ata'ajeño ñacaré que ijló ricá —que rimacá najló.

<sup>47</sup> Hue'echú ca'alá queja Jesús jehuíña'atajica necá Tupana ñacaré chu. Sacerdoténa huacára'ajeño, Tupana puráca'alo nacú jehuíña'atajeño, pajimila eruna huacára'ajeño, quele i'imaño re. Ne'ejnatá napéchuhua rinacu méqueca nenócajla ricá.

<sup>48</sup> Uncá napechu iphala rilocópa'ala, huechí cajrú ina'uqué jema'acale ripuráca'alo.

## 20

*Nahuata naca i'imari Jesús huacára'ajeri yucuna hue'epícana. Riyucuna marí:*

*(Mt 21.23-27; Mr 11.27-33)*

<sup>1</sup> Apú huacajé Jesús i'imari piño Tupana ñacaré chu. Re rehuíña'ata ina'uqué Tupana nacú. Tupana i'imataca ina'uqué capichácajo liyá yucuna ri'imá najló. E'iyohuá que sacerdoténa huacára'ajeño, Tupana puráca'alo nacú jehuíña'atajeño, peñahuilana, quele iphaño rinacu.

<sup>2</sup> Nemá rijló:

—Chuhua pimá huajló, na puráca'alo aú ca pila'á nacaje. ¿Na quemari pijló, pila'acáloje ricá penaje?

<sup>3</sup> Jesús quemari najló:

—Ñaque caja nuquejájica iliyá nacaje yucuna, i'imacáloje nojló riyucuna penaje. Eco ja'ajipá nojló.

<sup>4</sup> ¿Na puráca'alo aú chi Juanmi chu la'aqueri bautizar ina'uqué, ina'uqué puráca'alo aú ca'ajná, Tupana puráca'alo aú ca'ajná?

<sup>5</sup> Raú napura'ó pajhua'atéchaca necámica que. Nemá pajlocaca:

—¿Meque huemájica rijló? Huemáquela rijló, “Tupana puráca'alo aú que”, rimajla huajló: “¿Naje chí uncá jema'alá ra'apiyá i'imaçá?” que.

<sup>6</sup> Eyá huemaquela rijló: “Ina'uqué puráca'alo aú rila'á nacaje” que, aú maare i'imaçaño yúcha'añojla huachá. Naca'ájla jipa huachá rijimaje. Tupana puráca'alo ja'apátajeri Juanmi chu i'imaçá, que napechu rinacu —que napura'acó pajhua'atéchaca necámica que.

<sup>7</sup> E nemá Jesusjlo:

—Capí. Uncá huahue'epila na puráca'alo aú ca Juanmi chu la'aqueri bautizar ina'uqué.

<sup>8</sup> —Ñaque uncá caja numalaje ijló na puráca'alo aú ca nula'acá nacaje —que Jesús quemacá najló.

*Jesús i'imari apú hua'até sápañeño yucuna, rehuíña'atacaloje necá chapú nala'ajicare ricá nacú raí penaje.*

<sup>9</sup> E Jesús i'imari najló yucu, rehuíña'atacaloje necá raú penaje. Rimá najló:

—Pajluhuaja ina'uqué ejáchiyari cajmú caje ri'icacapere e'iyá. Jelepí inarí cajmú i'imichaca. Quéchami riyuríchaca rijhua'até sápañeño naquiyánajlo ri'icacapere, namácaloje rijló ricá penaje. E caja ri'ijichá ajopana te'eré ejo. Ri'ijichaca yámona rimicha najló: “Chuhua nu'ujichaca. Eco amá ricá palá. Cajmú naquiyana no'ojé ijlo rihuemí, amaca nojló ricá huemí”, que rimíchaca najló. “Je” que. E ri'ijichá ya'ajnaje. Jújipa ri'imichaca ya'ajno.

<sup>10</sup> E caja richa ña'acana iphíchari rená chojé. Aú paminá huacári'ichari rijhua'até sápa jeri richa ña'acana rijló penaje. E ri'ijichá rejo, iphíchari nanacu. Eta, rimena amájeño i'icachíyaño rihuúlá. Ejomi nahuacári'icha ripa'acó majopeja.

<sup>11</sup> Rejomi paminá huacári'ichari piño apú rijhua'até sápa jeri rejo. Ñaqueé caja nali'ichaca ricá. Chapú huani nali'ichaca ricá, ne'ecachiya rihuúlá. Ejomi nahuacári'icha ripa'acó majopeja caja.

<sup>12</sup> Ejomi paminá huacári'ichari piño apú rejo. Ñaqueé caja nali'ichaca ricá chapú. Quehuí nali'ichaca rinacu. Quéchami naqui'ichaca ritami rimena yámojo.

<sup>13</sup> Raú paminá pechu i'imá: “¿Meque nula'ajica? Palani ca'ajná nuhuacára'acajla rejo nu'urí, iqui'ija nuhuátacare. Ricá ja'apí ca'ajná nephajla”, que ripechu i'imichaca.

<sup>14</sup> Raú rihuacári'icha ri'iri rejo. Rimena amájeño amíchaño ricá huaíchaca a'ajnareje cha que, nemícha pajlocaca: “Ilé ri'irí huaícha. Rijló rara'apá yuréjeri rimena. I'ijná huenóchachi ricá, rimenami yuricolaje huajló penaje”, que nemíchaca pajlocaca.

<sup>15</sup> E caja riphicha nanacu. Eta napachiya ricá; naji'ichá ricá rimena yámojo. Re nenocha ricá —que Jesús i'imacá yucu najló.

E Jesús quemari najló:

—Marí que paminá la'ajica rimena amájeño.

<sup>16</sup> Riphaje nacapichátaje. Quéchami ra'ajica ajopánajlo rimena, ramájeño penaje —que rimacá najló.

Raú ripuráca'alo jema'ajeño quemáño Jesusjlo:

—Ri'imaniya ilé que huajló.

<sup>17</sup> Aú Jesús yacá'aro nachaje, rimá najló:

—Marí que Tupana puráca'alo lana'aquejami quemacá nunacu i'imacá:

Pajluhuaja ina'uqué i'imajeri.

Ne'iyajena quemájeño rinacu: “Uncá ina'uquéleri ricá” que.

E'iyonaja ricá i'imajeri ajopana chaje, que rimacá nunacu.

<sup>18</sup> Necá, uncá jema'alaño no'opiyá, capichájeño Tupana liyá. Chapú huani ri'imajica najló. Uncá huátalaño nucá, amájeño chapú caje yajhué nupuráca'alo aú —que Jesús quemacá najló.

<sup>19</sup> Ejéchami sacerdotena huacára'ajeño, Tupana puráca'alo nacú jehuíña'atajeño, quele huátaca Jesús patacana. Yucu ri'imá najló i'imacá. E'iyonaja nahue'epí rimacá nanacu raú meque la'ajéñoca necá. Ñaquele nahuata ripatacana, nahuajácaloje ricá penaje. E'iyonaja calé naquero'ó ina'uqué piyá marí la'acana aú.

<sup>20</sup> Raú nahuacára'a riquejíla'ajeño rejo rijhua'até pura'ajó. Chapú rinacu péchuruna ne'emacá. E'iyonaja calé nala'á necó palájne'equena que caja rijló. Nahuata Jesús liyá yucu jema'acana, nema'acáloje méqueca rimájica apojó ne'emacana liyá penaje. Aú nahuata rijña'acana ne'emacana ojo, rihuajácaloje ricá penaje.

*Liñeru na'acare ne'emacánajlo yucuna naquejá'aca Jesús liyá yucuna marí:*

*(Mt 22.15-22; Mr 12.13-17)*

<sup>21</sup> E caja riquejíla'ajeño iphaño rinacu. Nemá rijló:

—Huehuíña'atajeri, huahue'epí quehuácage pipuráca'alo. Quehuaca nacaje pehuíña'atacare nacú. Picá hue'epiri méqueca ina'uqué pechu i'imacá. Re huahuacára'ajeño naquiayana, uncá paala najló pipuráca'alo. E'iyonaja uncá pa'alá necá pinacojó. Pajimato pehuíña'ataca ina'uqué Tupana huátaca que la'acana nacú.

<sup>22</sup> Chuhuata pimá huajló méqueca pipechu marí nacú. Naquejá'a hualiyá liñeru, na'acáloje ricá hue'emacana Césarjlo penaje. Romano naquiayana ricá. ¿Meque chí pijló ricá? ¿E chí hua'acajla najló liñeru, naquejá'acare hualiyá hue'emacánajlo? ¿Echi palani hua'acajla najló ricá ca'ajná, uncá ca'ajná?

<sup>23</sup> Jesús hue'epiri na penájeca naquejá'aca riyucuna, nemacáloje rinacu: “Pu'uhuaré rimíchaca huajló,” que penaje. Aú rimá najló:

—¿Naje ihuata numacá ijlo nacaje nacú, imacáloje nunacu: “Pu'uhuaré rimíchaca huajló”, que penaje.

<sup>24</sup> Iya'atá nojló liñeru naquejá'acare iliyá i'imacánajlo, nomachi ricá.

Aú naya'atá rijló ricá. E rimá najló:

—¿Na jenami chí cari liñeru nacú? ¿Na íi cari lana'aquejami rinacu?

Nemá rijló:

—Hue'emacana César jenami rinacu. Ríi caja rinacu —que nemacá rijló.

<sup>25</sup> Jesús quemari najló:

—A'á Césarjlo quele liñeru rihuátacare. Ila'á caja Tupánajlo nacaje rihuátacare —que rimacá najló.

<sup>26</sup> Marí que naquejá'aca riyucuna ajopana ina'uqué e'iyá. Marí que rimacá aú uncá meño'ojó nemalá: "pu'uhuaré rimíchaca pinacu" que ne'emacánajlo. Raú namanúma'o. Napechu i'imá: "¡Meque capechú huani rimíchaca huajlól!"

*Caja taca'acaño macápo'oco yucuna naquejá'a Jesús liyá. Riyucuna marí:*  
(Mt 22.23-33; Mr 12.18-27)

<sup>27</sup> Quéchami saducéona naquiyana i'ijnacá piño Jesús amaje. Necá quemaño caja taca'acaño nacú: "Uncá namacápo'olajo." Ñaque i'imacale ne'ejná Jesús chaje rijhua'até pura'ajó. E nemá rijló:

<sup>28</sup> —Huehuíña'atajери, marí que Moisesmi chu puráca'alomi lana'aquejami quemacá: "Apú ca'ajná taca'añari riyajalo mayaniqueru. Palani re'ehuemi ra'apiyajé huá'acacojla riyajálomi hua'até, re'ehuemi chu yanimínami yurícoloje rapumí chojé raú penaje", que ripuráca'alomi lana'aquejami quemacá.

<sup>29</sup> Ñaque ricá. Pajluhua ina'uqué i'imari. Iyamá cuhuá'ata quele ne'emacá rejena hua'até. Pe'ejí ri'imacá huá'acaro. Ejomi ritaca'á mayaniqueru.

<sup>30</sup> Rejomi ra'apiyajé i'imacá huá'acaro riyajálomi hua'até. Ñaqueja caja ricapichaco ruliyá mayaniqueru caja.

<sup>31</sup> Raú re'ehué pe'iyorí huá'acaro piño rujhua'até. Ricapichó caja ruliyá mayaniqueru caja. Ají que iyamá cuhuá'ata quele necá huá'acaro rujhua'até i'imacá. Caja queja nacapichaco ruliyá mayaniqueru.

<sup>32</sup> Caja penaje nayajálomi capichayo nápumi chu.

<sup>33</sup> Eta, Tupana macápo'otajica piyuque ina'uqué caja taca'acaño huacajé, ¿na yajalo chi ruyurijico rejéchami? Iyamá cuhuá'ata quele ina'uqué yajálomi ru'umacá —que nemacá Jesusjlo.

<sup>34</sup> Raú Jesús quemari najló:

—Marí eja'ahuá chu achiñana, inaana, quele huá'acaño pajhua'atéchaca. Eyá je'echú chu i'imajeño, uncá ñaque calé ne'emajica rejo je'echú chu.

<sup>35</sup> Tupana macápo'otajeri ra'apiyá jema'ajéñomi chuna, ne'emacáloje je'echú chu penaje. Re uncá pajhua'atéchaca huá'acajeñomi calé ne'emajica. Uncá caja nahuá'acalajo piño pajhua'atéchaca re. Uncá caja na'alaje nayani, nahuá'acacoloje pajhua'atéchaca penaje.

<sup>36</sup> Re uncá natajnálajo. Ne'emajé Tupana hua'atéjena, je'echú chu i'imacaño, que caja. Uncá taca'alájeño penájena ne'emajé; Tupana yani ne'emajé, Tupana macápo'otajicale necá.

<sup>37</sup> Ñaque caja Moisesmi chu puráca'alomi lana'aquejami quemacá caja taca'acaño macápo'oco nacú. Jíma'alami cára'aco e'iyayá Tupana quemari Moisesmi chujlo marí que i'imacá: "Abraham, Isaac, Jacob, quele pechu i'imá nochojé caphí".

<sup>38</sup> Uncá meño'ojó caja taca'acaño pechu i'imalá Tupana chojé caphí. Necaja calé cajmuruna pechu i'imá richojé caphí. Cajmuruna, capéchuruna necá Tupana hua'até i'imacaño —que Jesús quemacá najló, nahue'epícaloje raú caja taca'acaño rijhua'atéjena i'imacá cajmuruna je'echú chu penaje.

<sup>39</sup> E Tupana puráca'alo nacú jehuíña'atajeño naquiyana quemaño rijló:

—Palá pimíchaca rinacu, Huehuíña'atajери.

<sup>40</sup> Ejomi uncá ajopana quejá'alajo nacaje yucuna riliyá. Nahuó la'aró ra'apejé nacaje yucuna quejá'acana nacú.

*Jesús i'imari najló ricá Tupana huacára'acare ina'uqué i'imatájeri penaje yucuna. Riyucuna marí:*

(Mt 22.41-46; Mr 12.35-37)

<sup>41</sup> E Jesús quemari najló:

—Ricá, Tupana huacára'acare ina'uqué i'imatájeri penaje, nacú nemá: "Davidmi chu laquénami naquiyana ricá". ¿Naje chi nemá ilé que rinacu?

<sup>42</sup> Papera Salmos chu, iná iphata méqueca Davidmi chu quemacá rinacu i'imacá. Marí que rimacá:

Ina'uqué huacára'ajeri huani Tupana. Ricá quemari Nuhuacára'ajerijlo marí que:

"Palá huani nupechu pinacu.

Pi'imá Nuhuacára'ajeri nujhua'até.

<sup>43</sup> Maare pi'imajica nohua'á, nuchá'atajica chapú pinacu péchuruna ejená", que rimacá.

<sup>44</sup> Jesús quemari piño:

—Davidmi chu quemari ricá Tupana huacára'acare ina'uqué i'imatájeri penaje nacú: "Nuhuacára'ajeri ricá" que. Ñaquele uncá Davidmi chu laquénami naquiyana huani calé ricá nemacare nacú —que rimacá najló.

*Jesús aca'acá Tupana puráca'alo nacú jehuíña'atajeño maná yucuna marí:*  
(Mt 23.1-36; Mr 12.38-40; Lc 11.37-54)

<sup>45</sup> Jesús pura'aró nacaje nacú ra'apiyatéjema hua'até. Ajopana i'imaño re caja, jema'año caja méqueca rimacá najló. Rimá najló:

<sup>46</sup> —Ihue'epínoja Tupana puráca'alo nacú jehuíña'atajeño. Ila'aniya nala'acá que caja. Huaphereni na'arumacá chu nahuata chira'acajo. Na'apaca le'ejepelaji ñacarelana e'iyohuá ee, nahuata ina'uqué ajalácaca necá palá. Ajopana chá'atajeño que nayá'aco nahuacáca'alo ñacarelana chu. Ñaque caja nahuatáca ajopana tucumá yá'acano nale'ejé fiesta huacajé.

<sup>47</sup> Napajlaca caja ihuacajilomina hua'até, nata'acáloje naliyá nañacaré penaje. Uncá nephala na'apí. Eyá majopeja napura'acó júpija Tupana hua'até, palá ina'uqué pechu i'amacáloje nanacu raú penaje. Marí que nala'acare chona, ajopana chaje huani Tupana huajájica necá.

## 21

*Ihuacajilomi a'acá liñeru yucuna marí:*

(Mr 12.41-44)

<sup>1</sup> Jesús i'imari Tupana ñacaré chu. Re ramá cajrú liñeru minana ca'acá liñeru ra'acuná chojé.

<sup>2</sup> Eyá ramá caja apa'ahuelo ihuacajilomi. Camu'ují la'acayo ru'umacá. Ruca'á iyamata ñánija parata richojé. Huejápaja huani rahuacaco.

<sup>3</sup> Raú Jesús quemari rahua'á i'amacáñojlo:

—Jema'á marí, ilerú inanaru, ihuacajilomi rucá. Camu'ují la'acayo caja rucá. Ilé liñeru huejápaja ruqui'ichaje richojé aú ruchá'achiya ajopana. Raú ruli'ichá palá ajopana chaje.

<sup>4</sup> Ajopana qui'ichaño naliñérute lupemí richojé. Eyá ilerú, camu'ují la'acayo, qui'ichayo piyuque ruliñérute richojé. A'ajnejí huarúhua'ajona penaje ri'imichácajla —que rimacá najló.

*Jesús quemari najló méqueca nacajya'atájica Tupana ñacaré yucuna marí:*

(Mt 24.1-2; Mr 13.1-2)

<sup>5</sup> Ra'apiyatéjema naquiyana pura'año Tupana ñacaré nacú. Nemá rinacu:

—Meque palani huani ricá. Meque palá nojé jipa naquiyana la'acanamí ricá. Palani caja nacaje pato'oró rinacu, na'acare Tupánajlo —que nemacá rinacu.

<sup>6</sup> E Jesús quemari najló:

—Quele Tupana ñacaré amácare me'etení, uncá i'imalaje maare. Aquijñojo ajopana chapú péchuruna cajya'atájeño piyuqueja ricá. Ejomi uncá pajluhuaña ñani jipa yurílaño pachácaca —que rimacá najló.

*Jesús quemari najló méqueca ri'imajica eja'ahuá chu, yehuicha eja'ahuá capichájico piyá. Riyucuna marí:*

(Mt 24.3-28; Mr 13.3-23)

<sup>7</sup> Nemá Jesúsjlo:

—Huehuíña'atajari, ¿méquechamíca ri'imajica quele pimíchaje nacú huajló? ¿Na aú chí ina'uqué hue'epeje méquechamíca riphájica rená chojé? —que nemacá rijló.

<sup>8</sup> Jesús quemari najló:

—Jema'aniya ajopana puráca'alo ja'apiyá, napajlájicare aú ijhua'até. Iqui'iruna ina'uqué iphájeño. Na'ajé nuí, nef hua penaje. “Ricá Tupana huacára'acare majó ina'uqué i'imatájeri penaje nucá. Caja noná iphari rená chojé”, que nemájica nanacuhua apú, apú que. Pa. I'ijnaniya ilé cajena hua'até.

<sup>9</sup> Yucu i'imagé marí que: “Chuhua nenócaco pajhua'atéchaca”. Ajopana nacú nemaje: “Nenócaco pajhua'atéchaca necámica que”. Marí que yucu i'imagíca rihuacajé. Pa. Iquero'oníyo raú. Caja queja ri'imajica. Uncá jo'ó eja'ahuá tajnálajo rihuacajé —que rimacá najló.

<sup>10</sup> Rimá piño najló:

—Ajopana te'eré eruna nócajeño ajopana te'eré eyájena hua'até. Ajopana i'amacana hua'atéjema nócajeño ajopana i'amacana hua'atéjema hua'até.

<sup>11</sup> A'apona que cajrú te'erí ñaca'ajico apú eyá, apú eyá que rihuacajé. Cajrú caja ina'uqué taca'ajica me'epejí nacú rihuacajé apú eyá, apú eyá que. Cajrú huani natamí caje nójica ina'uqué. Je'echú chíyá amaje cajrú nacaje. Ricá quero'ótaje ijló.

<sup>12-14</sup> Marí que ri'imajica piyá, nala'ajé icá chapú. Napataje icá, najña'ajé icá jahuacáca'alo ñacarelana chojé. Re nemaje inacu: “Pu'uhuaré la'ajeño necá” que. Ejomi naca'ajé icá ina'uqué huajáquelana chojé. Najña'ajé icá i'amacánana ojo. Nachaje huacára'ajeño ojo hua'ató najña'ajé icá, narucátacaloje rijló icá majopeja penaje. Marí que nala'ajica icá chapú, no'opiyá jemaaté, i'ijnatániya ipéchuhua: “¿Marí que chí huapura'ajico huachayo, nahuajaca piyá huecá?”



<sup>15</sup> Nucá a'ajeri ijló puráca'aloji. Raú capechú imájica najló, nmacá piyá inacu: “Napa-  
jlaca” que.

<sup>16</sup> Ñaqué caja ejena naquiyana la'ajica icá chapú. Ichi'iná ca'ajná, ejena naquiyana  
ca'ajná, e'ehuelona naquiyana ca'ajná, ijhuáque'ena naquiyana ca'ajná a'ajeño icá  
ajopánajlo, chapú inacu péchurunajlo. Necá nójeño inaquiyana.

<sup>17</sup> Piyuqueja ina'uqué huo i'imajica ichá chapú, jema'acale no'opiyá.

<sup>18</sup> Uncá na calé ila'ajico.

<sup>19</sup> Uncájica ee jácho'o no'opiyá jema'acana chiyá, Tupana i'imatájeri icá capichácajo liyá.

<sup>20</sup> Pu'uhuacá amájica cajrú surárana itaca pajimila Jerusalén cha, aú ihue'epeje me-  
quetánaja i'imajemi nacajya'ataje pajimila.

<sup>21</sup> Aú Judea te'eré eyájena ñaajeño ipuré e'iyajé. Jerusalén eruna jácho'ojeño reyá. Pu'uteni  
chu i'imájicaño uncá pa'alájeño piño pajimila ejo. Marí que ila'ajica.

<sup>22</sup> Huajácaje queja ri'imajica rihuacajé. Tupana puráca'alo lana'aquejiami quemacá que  
rinacu, que ri'imajica rihuacajé.

<sup>23</sup> Chapú huani ri'imajica canupana inaánajlo rihuacajé. Chapú huani caja ri'imajica  
inaana cayaniquerunajlo, re caja jo'ó i'iracaño chu'uchú nayani. Cajrú ina'uqué amájica  
chapú caje yajhué rihuacajé ite'eré ehuá. Cajrú Tupana huajájica mariruna ina'uqué.

<sup>24</sup> Nenójica ne'iyajena nócacajo e'iyá. Ajopana najña'ajé, naca'acáloje necá ina'uqué  
huajáquelana chojé penaje. Ina'uqué huajáquelana chu ne'emajé ajopana te'eré nacú,  
ajopana te'eré nacú que. Ajopana cajya'atájeño pajimila Jerusalén, uncá judíona naquiyana  
calé necá. Tupana yurica najló ricá quetánaja nala'ajica marí que.

*Jesús pa'ajico piño majó yucuna marí:*

*(Mt 24.29-35, 42-44; Mr 13.24-37)*

<sup>25</sup> Jesús quemari piño najló marí que:

—Apojó camú, querí, ihuujina caje amajo rihuacajé. Cajrú caja juni jalomi mejé i'imajica;  
cajrú huani riyocola i'imajica. Raú piyuque eja'ahuá chu i'imájicaño quero'ojeño.

<sup>26</sup> Cajrú ne'emajica quero'ocajo nacú. Nahue'epeje eja'ahuá i'ímacá capichácajo nacú.  
Jimaje napojlo'ojó. Piyuque nacaje je'echú chu i'ímacare ñaca'ajero.

<sup>27</sup> Marí que ri'imajica ee namájica nucá iphaca majó juni suhuáca'ala e'iyohuá.  
Ina'uquéjloje penaje i'ímacá nucá. Piyuque ina'uqué huacára'ajeri penaje nuphaje majó.  
Cajrú mejáma'atani i'imajica nohua'ó. Marí caje hua'ató nuphaje.

<sup>28</sup> Amájica ee nacaje i'ímacá numacá que ijló me'etení, ila'á ipéchuhua caphí. Mequetánaja  
yuréjero ijló. Rejomi Tupana i'imatájeri icá capichácajo liyá —que Jesús quemacá najló.

<sup>29</sup> Jesús jehuíña'atari necá piño marí que:

—Caja ihue'epí a'ahuaná nacojé, a'ahuaná higuera nacojé hua'até.

<sup>30</sup> Ri'iché pitúca'ari, ripaná moto'ocáloje rinaquiyá penaje. Ri'iché pitúca'aca aú iná  
hue'epí yehuicha jarechí iphaca rená chojé.

<sup>31</sup> Ñaqué caja ihue'epíjica nupa'ajico majó nacojé. Amájica aú nacaje numíchaje nacú,  
ihue'epeje yehuicha riphaca rená chojé, Tupana i'ímacáloje piyuque ina'uqué huacára'ajeri  
penaje.

<sup>32</sup> 'Jema'á marí. Ricá numíchaje nacú ijló i'imajeri re caja ina'uqué i'ímanoja.

<sup>33</sup> Je'echú, eja'ahuá hua'até tajnájero. E'iyonaja calé uncá nupuráca'alo tajnálajo. Numacá  
rinacu queja nacaje i'imajica.

<sup>34</sup> 'Pa. I'maniya cajrú a'ajnehuá ajñacana nacú. I'maniya caja quehuini caje i'iracana  
nacú. Ihuó ca'anioy caje nacaje marí eja'ahuá chu i'ímacare hua'até. Apala huajátacajo  
ri'imajica numíchaje nacú ijló.

<sup>35</sup> Mahue'epícanaru camejérina ja'acó napatáca'aruna chojé. Ñaqué caja ri'imajica piyuque  
huani ina'uquejlo, eja'ahuá chu i'ímacáñojlo. Huajátacajo nu'umajica nachá.

<sup>36</sup> I'imá nupé maare. Ipura'ó Tupana hua'até hue'echú ca'alá queja, i'ímacáloje chapú  
caje i'ímacare liyá penaje, itára'acoloje nujimaje rejomi penaje. Ina'uquéjloje penaje  
i'ímacá nucá —que Jesús quemacá najló.

<sup>37</sup> Hue'echú Jesús jehuíña'ataque necá Tupana ñacaré chu. Lapi ri'ijnacqué yenuri Olivos  
ejo. Re ri'imaqué lapi.

<sup>38</sup> Lapiyamí ca'alaja cajrú ina'uqué i'ijnajica Tupana ñacaré chojé ripuráca'alo jema'ajé.

## 22

*Nahuátaca Jesús patacana yucuna marí:*

*(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Yehuíchaja nale'ejé fiesta iphaca rená chojé rihuacajé. Rihuacajé caja najñaque pan  
mamúra'atacanaru. Pascua nale'ejé fiesta íí i'ímacá.

<sup>2</sup> Re sacerdotena huacára'ajeño i'imaño. Tupana puráca'alo nacú jehuífña'atajeño i'imaño caja najhua'até re. Necá pura'año pajhua'atéchaca méqueca nenójica Jesús. Nahuata rinócana. E'iyonaja naquero'ó ajopana ina'uqué piyá.

<sup>3</sup> Eyá Jiñá Chi'ináricana pechu ja'aró Judas Iscariote e'iyajé. Iyamá iphata ji'imaji nacojé quele Jesús ja'apiyatéjena naquiayana ri'imacá.

<sup>4</sup> Ejomi Judas i'ijnari aji que sacerdotena huacára'ajeño amaje. Tupana ñacaré chiyá huacára'ajeño i'imaño caja re najhua'até. Najhua'até ripura'ó méqueca ra'acajla najló Jesús.

<sup>5</sup> Ri'imacá aú riyucuna najló palá napechu i'imacá rinacu. Nemá rijló:

—Hua'ajé pijló liñeru, pi'imichácale riyucuna huajló.

<sup>6</sup> —Je —que rimacá najló.

Reyá a'ajná ño'ojó Judas quejila'ari Jesús, ramácaloje méqueca ra'acajla najló ricá, necó ne'emacá ee.

*Jesús ajñaca fiesta a'ajnená ra'apiyatéjena hua'até yucuna marí:*

*(Mt 26.17-29; Mr 14.12-25; Jn 13.21-30; 1 Co 11.23-26)*

<sup>7</sup> E caja nale'ejé fiesta pascua iphari rená chojé. Rihuacajé queja najñájica pan mamúra'atacanaru. Rihuacajé caja nenoque caja ohueja i'iri pu'uhuaré nala'ajicare chaya.

<sup>8</sup> E caja Jesús quemari Pedro, Juan, quelejlo marí que:

—I'ijná ili'ichachi huajló fiesta a'ajnená.

<sup>9</sup> Nemá rijló:

—¿Meño'ojó chi huala'ajé ricá?

<sup>10</sup> Jesús quemari najló:

—I'ijná a'ajná ño'ojó pajmilla ejo. Iphájica ee re'iyajé, iphátaje pajluhuaja ina'uqué. Juni rihuacúla'apa que iphátajica ricá. Eco i'ijná rápumi chu, ijmúlúca'aje pají chojé rijhua'até.

<sup>11</sup> Ejomi imaje pají minajlo marí que: “Huehuífña'atajeri quemíchari pinacu: ¿Mecaje chi ucapú, huajñaje chu hua'ajnehuá, pascua a'ajnená, no'opiyatéjena hua'até, que rimíchaca pinacu”, que imájica rijló nunacu.

<sup>12</sup> Raú riyá'ataje ijló ñopo'ojlo ucapú yenú. Piyuque huani nacaje i'imajica lamá'ataqueja richu. Ricá chu ila'ajé a'ajnejí —que rimacá najló.

<sup>13</sup> Je. E ne'ejná pajmilla ejo. Amaño ucapú i'imacá Jesús quemacá que najló. Richu nala'á pascua a'ajnená.

<sup>14</sup> E caja na'ajnehuá ajñacana iphari rená chojé. E caja Jesús ajopana ra'apiyatéjena hua'até iphaño rejo. E Jesús yá'aro, rajñácaloje pascua a'ajnená ra'apiyatéjena hua'até penaje.

<sup>15</sup> E Jesús quemari najló:

—Iqui'i nuhuátaca marí pascua a'ajnená ajñacana ijhua'até, nutaca'ajica yámona.

<sup>16</sup> Numá ijló, uncá nojñálaje piño ricá ijhua'até. Ohueja i'iri nócana ina'uqué chaya ricá renami. Eyá nucá, quehuaca penaje taca'ajeri ina'uqué chaya, no'opiyá jema'ajeño i'imacáloje nujhua'atéjena raú penaje. Ñaqueja caja la'aquejami ri'imajica ee, nojñájica piño ricá ijhua'até —que rimacá najló.

<sup>17</sup> E rijña'á chiyela ricápojo, cajmú jepení inarí ricá jalá i'imari richu. Rimá Tupánajlo:

—Palá pila'acá huecá marí cajmú jalá aú.

E rimá ra'apiyatéjenajlo:

—Marí i'irá. A'á ijluhua ricá piyuque, i'irachi ricá.

<sup>18</sup> Numá ijló, uncá nu'uralaje piño marí caje jalá ijhua'até. Tupana i'imajica ina'uqué naquiayana huacára'ajeri huacajé, nu'uraje piño ijhua'até ricá —que rimacá najló.

<sup>19</sup> Ejomi rijña'á piño pan ricápojo. Rimá Tupánajlo:

—Palá pila'acá huecá marí pan aú.

Ejomi ritupa'á rinaquiayana. E ritamáca'ata ra'apiyatéjenajlo pan tupa'aqueja, najñácaloje ricá penaje. Rimá najló:

—Ajñá ricá. Marí nunapona no'ocare taca'acájejo ijló penaje. Marí que ajñájicano ricá, ipechu capicháñaca piyá nucá.

<sup>20</sup> Ñaque caja rimacá ralá nacú najñaca na'ajnehuá ejomi. Rimá najló:

—Marí chiyela chu re ralá. Nura aco'ojeri nophú chiyá nutaca'ajica aú ina'uqué chaya. Marí caje aú Tupana amájero cajrú ina'uqué chaje, pu'uhuaré nala'acare liyá. Marí que Tupana la'ajica ijlojé penaje, iyurícolaje ripalamane penaje.

<sup>21</sup> E rimá piño najló:

—Re pajluhuaja inaquiayana maare, a'ajeri nucá nupinánajlo.

<sup>22</sup> Ina'uquéloje penaje i'imacá nucá. Nucá taca'ajeri, Tupana pechu nacú ri'imacá que. E'iyonaja calé chapú huani ri'imajica a'ajeri nucá nupinánajlo —que rimacá najló.

<sup>23</sup> Raú nemá pajlocaca:

—¿Mecaje huanaquiayana ricá, huátari ra'acana ripinánajlo rimá nacú huajló?

*Nachá'atajeri yucuna marí:*

<sup>24</sup> Eyá ra'apiyatéjéna pura'ño pajhua'atéchaca piño apú nacú. Mecajeca ne'iyayá i'imari nachá'atajeri, ricá nacú napura'ó pajhua'atéchaca.

<sup>25</sup> E Jesús quemari najló:

—Re ajopana te'eré eruna huacára'ajeño. Caphí huani nahuacára'aca najhua'atéjéna. Raú nachaje huacára'ajeño quemáño nanacu: “Ina'uquéjloje penaje nala'á nacaje”.

<sup>26</sup> E'iyonaja uncá ñaqué caja calé ijló ricá. Re ca'ajná pajluhuaja inaquiyana, apú ñaté, apú ñaté que a'ajeri ricá. Ricaja calé i'imárijla ichá'atajeri penaje.

<sup>27</sup> Ajopana huacára'ajeño ca'ajná yá'ño na'ajnehuá ajñacana nacú. Najñaca na'ajnehuá quietana najhua'até sápaajeño ja'apátaño najló nacaje nahuátacare caje. Eyá maare nucá me'etení ijhua'até ihuacára'ajeri penaje. E'iyonaja calé ijhua'até sápaajeri que nucá ijhua'até. Nucá la'arí ijló nacaje.

<sup>28</sup> Icá i'imaño nujhua'até capinaca. Chapú caje yajhué nomácare hua'ató icá i'imaño nujhua'até.

<sup>29</sup> Ñaquele no'ojé icá ajopana ina'uqué huacára'ajeño penaje. Nora'apá a'acá nucá ina'uqué huacára'ajeri penaje, que caja no'ojica icá ajopana huacára'ajeño penaje.

<sup>30</sup> Icá ajñáajeño a'ajnehuá nujhua'até ajopana nujhua'atéjéna hua'até je'echú chu. Re ñaque'ajori nahuacára'ajeñojlo penaje. Ricá chojé iyá'ajo. Re iyamá iphata jí'imaje nacojé quele Israelmi chu laquénami a'ajútayami chuna l'imacá. Nalaquénami nacú imaje méqueca nala'acana l'imajica. Nacaje nala'acare marí eja'ahuá chu ne'emacá quietana, nacú imaje meque ricá, palá nala'acá ca'ajná, uncá ca'ajná.

*Uncá chiyó Pedro micho'otari Jesús chaya, Jesús i'imari rijló riyucuna. Riyucuna marí:*  
(Mt 26.31-35; Mr 14.27-31; Jn 13.36-38)

<sup>31</sup> E Jesús quemari Pédrojlo ajopana hua'até:

—Pedro, pema'á. Jiña Chí'ináricana huátari rijluhua icá. Rica'átaje e'iyajé, ila'acáloje pu'uhuaré rihuátaca que penaje. Iná jeyo'ó trigo, iná cupácaloje re'iyayá pu'uhuaré nojé rimujrumi penaje. Ñaqué caja Jiña Chí'ináricana huátaca icupácana Tupana liyá pu'uhuaré la'acana aú —que rimacá najló.

<sup>32</sup> Eyá rimá Pédrojlo:

—Caja nupura'ó Tupana hua'até pinacu, pipechu la'acó piyá ujhuí nuliya. Mequetánaja calé pipechu la'ajico apú que nuliya. Ejomi pipajno'otájica pipéchuhua nucá ejo piño. Ejéchami pa'ajica pinacajó no'opiyá jema'ajeño, nayurica piyá naliyó nupuráca'alo —que rimacá rijló.

<sup>33</sup> Pedro quemari rijló:

—Huahuacára'ajeri, apala naca'ajé nucá ina'uqué huajáquelana chojé pijhua'até, apala nenaje ca'ajná nucá pijhua'até. Uncá huani ta nuyuríraje picá raú.

<sup>34</sup> Jesús quemari rijló:

—Pedro, numá pijló, ñaano pimicho'otájica nuchaya. Capere yaca'ajica piyá, pimi-cho'otájicaja nuchaya hueji que pe —que rimacá rijló.

<sup>35</sup> Jesús quemari piño najló marí que:

—Nuhuacára'a i'ijnacá queráma'aque apú pajimila naquiyá, apú pajimila naquiyá que apú huacajé i'imacá. Uncá ijña'alá ijhua'até ilinérute, ra'aruná caje. I'ma'ulaje caje uncá caja ijña'alá. ¿E chi ila'acá camu'ují nacaje nacú rihuacajé?

Nemá rijló:

—Uncá —que.

<sup>36</sup> Rimá najló:

—Chuhua ijña'ajica ijhua'ató ihuajure, itulané caje, ilinérute caje macá. Uncá sajalú i'imalare capi, a'ajeri ra'arumacá naquiyana, rihuárúhua'acalaje rijluhua sajalú raú penaje.

<sup>37</sup> Ilé que numacá ijló, nala'ajicale nucá chapú chuhuaca. Tupana puráca'alo lana'aquejiami quemacá nunacu que nala'ajica nucá chapú. Marí que rimacá nunacu: “Nala'ajé ricá uncá ina'uquélaruna naquiyana que”. Tupana puráca'alo lana'aquejiami quemacá que nunacu que piyuque nacaje i'imajica —que rimacá najló.

<sup>38</sup> E nemá rijló:

—Huahuacára'ajeri, re maare iyamata sajalú.

Rimá najló:

—Reja ri'imare ñaqueja.

*Jesús pura'acó Tupana hua'até Getsemaní e yucuna marí:*  
(Mt 26.36-46; Mr 14.32-42)

<sup>39</sup> E caja Jesús jácho'oro. Ri'ijná piño yenuri ejo, ri'ijnaquela ejo. Yenuri íí Olivos. Ra'apiyatéjéna ja'apaño rápumi chu rijhua'até.

<sup>40</sup> E caja nephá rejo. E Jesús quemari ra'apiyatéjenajlo:

—Ipura'ó Tupana hua'até maare, ila'acá piyá pu'uhuaré.

<sup>41</sup> E ri'ijná a'ajná ño'ojó pani naliyá. Iná ca'á huayajrú quetana júcaca ri'ijná naliyá. Rejé ritára'o ri'irúpachi aú. Ripura'ó Tupana hua'até.

<sup>42</sup> Rimá rijló:

—Pa'ayú, pihuátajica ee pi'imatá nucá chapú caje yajhué nomájicare chiyá ñaano pani. Pila'aníya nuhuátaca que, pila'á pihuátaca que —que rimacá Tupánajlo.

<sup>43</sup> Ejéchami pajluhuaaja Tupana hua'atéjeri, je'echú chiyaje, ya'atacá rijló, ra'acáloje riñaté penaje.

<sup>44</sup> Camu'ují huani Jesús pechu la'acó. Raú mahuó riquejá'aca ricó Tupana liyá. Cajrú riñaphina i'ijnacá. Rira naquiyana i'ijnari caja rijhua'ató. Imujulá nojé quemachi ratupátaco te'erí e'iyajé.

<sup>45</sup> Ripura'ó Tupana hua'até. Ejomi rácho'o. Ri'ijná ra'apiyatéjéna i'imacá ejo, amari mana'ija nacamátao. Camu'ují huani napechu i'imacá, aú quiñaja tapú chá'atari necá. A'acuhuanaja nacamato.

<sup>46</sup> E Jesús quemari najló:

—¿Naje icamáchíyo? Jácho'o chuhua. Ipura'ó Tupana hua'até ila'acá piyá pu'uhuaré, nacaje a'acá piyá ime'é rijluhua.

*Najña'acá Jesús, nahuajácaloje ricá penaje yucuna marí:*

*(Mt 26.47-56; Mr 14.43-50; Jn 18.2-11)*

<sup>47</sup> Jesús pura'aró najhua'até. E'iyohuá queja cajrú ina'uqué iphaca nanacu. Judas ja'apari natucumá. Ricá i'imari iyamá iphata ji'imaji nacojé quele ra'apiyatéjéna naquiyana. E caja ri'ijná Jesús jimajo rijimá chiyá chiño'ojé.

<sup>48</sup> Raú Jesús quemari rijló:

—Judas, ¿Nujimá chiyá chiño'ocana aú chi pa'ajé nupinánajlo nucá? Ina'uquéjloje penaje i'imacá nucá —que rimacá Júdasjlo.

<sup>49</sup> Eyá ajopana, Jesús hua'até i'imacaño, amaño nephaca cajrú. Aú nemá Jesúsjlo:

—Huahuacára'ajeri, ¿Hua'apata chi nanacu sajalú aú?

<sup>50</sup> Eta pajluhuaaja Jesús hua'atéjeri mata'arí apú i'ijhuí matá. Sacerdótena huacára'ajeri hua'até sápa'eri ri'imacá. Ca'añá chojó pitari ri'ijhuí rica'á.

<sup>51</sup> E Jesús quemari najló:

—Reja ne'emareja. Itaca'aníya nanacu.

Eyá Jesús sápari ri'ijhuí pucunami chu. Hua'ató que ri'ijhuí pata'acó piño rapumí chuhua.

<sup>52</sup> Marí quele ina'uqué iphaño Jesús ña'ajé i'imacá: sacerdótena, Tupana ñacaré chiyá huacára'ajeño, ajopana peñahuilana cajena, quele ne'emacá. E Jesús quemari piyuque rijña'ajé i'ijnacáñojlo:

—I'ijchá majó nujña'ajé sajalú hua'até, cuyjúhua'ala, quele hua'até. ¡Meque ata'acachi que huani ila'acá ijluhua nucá!

<sup>53</sup> Hue'echú ca'alá queja nu'umajica ijhua'até Tupana ñacaré chu jehuñá'atacana nacú. E'iyonaja uncá ijña'alá nu'umacá rihuacajé. Chuhuaca riphíchaca rená chojé ijlo, ila'acáloje nucá jiná Chí'ináricana huacára'aca que penaje —que rimacá najló.

*Pedro micho'otaca Jesús chaya yucuna marí:*

*(Mt 26.57-58, 69-75; Mr 14.53-54, 66-72; Jn 18.12-18, 25-27)*

<sup>54</sup> Eja napatá Jesús, najña'acáloje ricá penaje. Nahuá'a ricá ají que sacerdótena huacára'ajeri ñacaré ejo. Pedro i'ijnari caja najhua'até. Juca pani richira'acó naliyá. Nephá rejo.

<sup>55</sup> Re napho'otá siyá pe'iyó nañacaré copejé. Rejé Pedro iphari nanacu. Nayá'o tujlá que siyá ji'ilá na'anapacá ri'ilá. Pedro yá'aro caja re najhua'até.

<sup>56</sup> Re apa'ahuelo i'imayo. Pají chiyá sápa'eyo ru'umacá. Rucá amayo Pedro yá'aco najhua'até siyá camaré chojé. E ruyacá'o richaje, rumá najló:

—Ilé yá'aro ijhua'até, Jesús hua'ateje ricá —que rumacá najló Pedro nacú.

<sup>57</sup> E'iyonaja Pedro micho'otari richaya. Rimá rojlo:

—Uncá nomána'apa calé quele pimá nacú nojló.

<sup>58</sup> Mequetánaja i'imajemi apú amari piño ricá. Rimá rijló:

—Nuhue'epí Jesús huáque'ena naquiyánaca picá.

Aú rimá rijló:

—Uncá huani ta nanaquiyana calé nucá.

<sup>59</sup> Pajluhuaaja camú quetana i'imajemi apú quemari piño najló:

—Rijhua'atéjéna naquiyana jo'ó ricá quele. Galilea eyaje Jesús. Reyaje caja quele yá'aro siyá ji'ilá —que rimacá najló.

<sup>60</sup> Aú Pedro quemari rijló:

—Uncá huani ta nuhue'epila naca quele pimá nacú najló.

Marí que Pedro quemacá. Ejéchami capere yaca'acá.

<sup>61</sup> Hua'até que Jesús pajno'ocó riyámajo, amari Pedro a'ajnare que. Aú riphá Pedro pechu nacojé méqueca Jesús quemacá rinacu maapami que. Rimá rijló i'ímacá najló:

—Rijhua'atéjena naquiyana jo'ó ricá quele. Galilea eyaje Jesús. Reyaj: “Ñaano pani pimicho'otaje nuchaya. Capere yaca'ajica piyá, pimicho'otájicaja nuchaya hueji que pe.”

<sup>62</sup> Marí que riphaca ripechu nacojé aú Pedro i'ijnari reyá. Supejeno riyaca.

<sup>63</sup> Ra'ápona apalá chu Jesús i'imari. Re rihua'aphé i'imacaño la'año namácaja ricá. Naña'atá caja ricá.

<sup>64</sup> Napára'aca yami rijimá naña'atá ricá pajimaya. Quéchami nemacá rijló:

—¿E pihue'epicajlale. Galilea eyaje Jesús. Reyaj naca ña'achíyari picá?

<sup>65</sup> Cajrú napura'acó rinacu pu'uhuaré. Nacátajohua queja nala'acá ri'ímacá.

*Jesús tára'aco nahuacára'ajeño jimaje yucuna marí:*

*(Mt 26.59-66; Mr 14.55-64; Jn 18.19-24)*

<sup>66</sup> E caja muní que lapiyami nahuacó cajrú rejé. Peñahuilana, sacerdotena huacára'ajeño, Tupana puráca'alo nacú jehuíña'atajeño, quele jahuacaño rejé. E nahuá'a Jesús najimaje, nemá rijló:

<sup>67</sup> —¿Picá chi quele Tupana huacára'acare majó ina'uqué i'imatájeri penaje? Chuhua pimá huajló.

Aú rimá najló:

—Numájica ee á'a que ijló, uncá jema'alaje no'opiyá.

<sup>68</sup> Nuquejá'ajica ee nacaje yucuna iliyá, uncá caja i'imalaje nojló riyucuna. Uncá caja jácho'otalaje nucá.

<sup>69</sup> Ina'uquéjloje penaje i'ímacá nucá. Nucá i'imajeri Tupana hua'até huacára'ajeri penaje. Tupana hue'epiri piyuqueja nacaje la'acana —que rimacá najló.

<sup>70</sup> Nemá piño rijló:

—¿Picá chi Tupana I'irí?

Jesús quemari najló:

—A'a, ímacá que nucá Tupana I'irí.

<sup>71</sup> Raú nemá ajopánajlo:

—Uncá naje calé huemá ajopánajlo, ne'emacáloje huajló riyucuna penaje. Caja huemí'ichá méqueca rimacá huajló. Pu'uhuaré huani ripura'acó Tupana nacú.

## 23

*Jesús tára'aco Pilato jimaje yucuna marí:*

*(Mt 27.1-2, 11-14; Mr 15.1-5; Jn 18.28-38)*

<sup>1</sup> Raú piyuque necá jácho'oño. Najña'á Jesús ají que ne'emacana ejo. Ne'emacana íi i'imari Pilato. Rejo najña'á ri'ímacá.

<sup>2</sup> Re narucata Jesús rijló. Nemá majopeja Pilátajlo marí que Jesús nacú:

—Marí ina'uqué ca'átari huanaquiyana e'iyajé, nayúcha'acoloje hue'emacana cha raú penaje. Rimá najló na'acá piyá liñeru naquejá'acare hue'emacanjlo. Romano eyaje ricá. Rimá caja rinacuhá: “Cristo nucá”. I'ímacana penaje nucá quemacánaca Cristo —que nemacá rinacu Pilátajlo.

<sup>3</sup> E Pilato quemari Jesúsjlo:

—¿Judíona i'ímacana chí picá?

Jesús quemari rijló:

—A'a, nucá nucá pimacá queja.

<sup>4</sup> E Pilato quemari sacerdotena huacára'ajeñojlo, ajopana ina'uquejlo hua'até marí que:

—Uncá marí ina'uqué la'alá pu'uhuaré. Uncá na pachá calé huahujá ricá.

<sup>5</sup> E'iyonaja natára'o caphí rijló. Nemá piño rinacu:

—Pu'uhuaré la'ajeri ricá. Rica'áta piyuque Judea te'eré nacuruna e'iyajé, nayúcha'acoloje hue'emacana cha raú penaje. Piyuque huate'eré nacuhá richira'acó ina'uqué jehuíña'atacana nacú. Galilea te'eré eyá riqueno'ó chira'acajo, iphari maáreje.

<sup>6</sup> Marí que nemacá aú Pilato quemari najló:

—¿Galilea eyaje chí ricá?

<sup>7</sup> Nemá rijló:

—A'a.

Aú rihuacára'a Jesús ña'acana Herodes ejo. Galilea te'eré eyá huacára'ajeri ri'ímacá. Rihuacajeja caja ri'ímacá Jerusalén e.

<sup>8</sup> E caja nahuá'a ricá Herodes ejo. Nephá rinacu. Herodes amaca aú Jesús pu'ují ripechu i'ímacá, rihuátacale ramácana júpimi que i'ímacá. Caja rema'á riyucuna meque la'ajérica

ri'imacá. Ñaquele rihuata rila'acá nacaje uncá meño'ojó ina'uqué la'alare caje. Ramácaloje penaje rihuata rila'acá ricá.

<sup>9</sup> Aú calé riquejá'a cajrú nacaje yucuna Jesús liyá. E'iyonaja uncá huani Jesús ja'ajpalá rijló.

<sup>10</sup> Re caja sacerdotena huacára'ajeño i'imaño, Tupana puráca'alo nacú jehuíña'atajeño hua'até. Necá arucátaño piño cajrú Jesús rijló. Nemá rinacu:

—Uncá huani ina'uqué'ari ricá. Cajrú huani rila'acá pu'uhuaré.

Marí que napajlaca rinacu majopeja.

<sup>11</sup> Herodes, rila'ejena surárana hua'até pura'año Jesús nacú majopeja. Nacátajohua que nala'acá ricá najluhua. Na'á rinacójé a'arumacaji palá nojé, ne'emacana a'acare rinacuhúa caje. Eyá nahuacára'a piño rijña'acana rapumi chuhua Pilato ejo. Aú napa'atá ricá.

<sup>12</sup> Rihuacajé Pilato, Herodes, quele amaño pecohuácaca. Júpimi que napechi i'imajica chapú panacuhuácaca.

*Nahuacára'aca Jesús nócana yucuna marí:*

(Mt 27.15-26; Mr 15.6-15; Jn 18.39-19.16)

<sup>13</sup> E caja Pilato jahuacátari sacerdotena huacára'ajeño, ajopana nahuacára'ajeño hua'até, quele. Rahuacata caja ajopana ina'uqué najhua'até.

<sup>14</sup> Rimá najló:

—Marí ina'uqué iji'ichá majó. Imicha rinacu: “Cajrú rica'átaca ina'uqué e'iyajé, nayúcha'acoloje ne'emacana cha penaje”. Uncá ñaque calé ricá. Caja naquejá'icha riliyá riyucuna ijimaje. Ñaquele nuhue'epí uncá rila'alá pu'uhuaré ilé imíchaca rinacu que.

<sup>15</sup> Herodes hue'epiri caja uncá rila'alá pu'uhuaré. Ñaquele rihuacári'icha piño ricá majó, uncale rila'alá pu'uhuaré, nenócaloje ricá penaje.

<sup>16</sup> Chuhua nuhuacára'ajica ra'apátacana a'ajná ño'ojó, ñaña'atácaloje ricá penaje. Ejomi nócho'otaje ricá —que Pilato quemacá najló.

<sup>17</sup> Ilé fiesta huacajé queja Pilato jácho'otajica ina'uqué huajáquelana chiyá pajluhuaja ina'uqué, rácho'otaje najló judíona huátajicare caje.

<sup>18</sup> Rihuátajla Jesús jácho'otacana najló. I'imaqué e'iyonaja pajñacani nahuíyo'oca, nemá rijló:

—Pihuacára'a Jesús nócana, pácho'ota huajló Barrabás.

<sup>19</sup> (Júpimi que ri'imacá marí que: Ne'iyajena huátaño ne'emacana ca'acana. Aú nenoco ajopana hua'até pajimila e'yohuá. Barrabás i'imari caja najhua'até. Nócacajo e'yohuá que Barrabás noca ina'uqué. Richona naca'á ricá ina'uqué huajáquelana chojé. Ñaquele re ri'imá richu rihuacajé.) Ricá nacú nemá Pilátoljo, rácho'otacaloje najló ricá penaje.

<sup>20</sup> Pilato huátarijla huani Jesús jácho'otacana. Raú ripura'ó piño najhua'até.

<sup>21</sup> E'iyonaja richaje nahuíyo'oca rijló. Nemá rijló:

—Pihuacára'a racúhua'atacana a'ahuaná apiyácacanamí nacojé. Pihuacára'a racúhuatacana a'ahuaná apiyácacanamí nacojé. Marí que huani nahuíyo'oca rijló.

<sup>22</sup> Pilato pura'aró piño najhua'até, caja hueji que pe la'acá. Rimá najló:

—¿Na ta chi rila'á pu'uhuaré? Uncá na calé rila'á pu'uhuaré rijluhua. Caja nuquejá'icha riliyá riyucuna. Uncá na pachá calé nuhuacára'a rinócana. Ñaquele nuhuacára'ajicaja riña'atácana. Quéchami nócho'otajica iliyá ricá —que rimacá najló.

<sup>23</sup> Raú richaje huani nahuíyo'oca. Nemá piño rijló, rihuacára'acaloje racúhua'atacana a'ahuaná apiyácacanamí nacojé penaje. Piyuque ina'uqué, sacerdotena huacára'ajeño, quele jahuíyo'oño cajrú huani. Ejéchami caja nahuíyo'ocare chá'ataca Pilato.

<sup>24</sup> Aú ripechu i'imá: “I'matare ta. Nahuátaca que nala'ajica ricá.”

<sup>25</sup> E rácho'ota najló Barrabás. Nahuátacare jácho'otacana ri'imacá. Rinó ina'uqué i'imacá, nenócalo i'imacá huacajé, naca'acáloje ne'emacana penaje. Marí que rila'acá chona naca'á ri'imacá ina'uqué huajáquelana chojé. Ricá penájemi nahuata jácho'otacana. E Pilato jácho'otari najló ricá. Ejomi ra'á najló Jesús, nala'acáloje ricá nahuátaca que penaje.

*Nacúhua'ataca Jesús a'ahuaná apiyácacanamí nacojé yucuna marí:*

(Mt 27.32-44; Mr 15.21-32; Jn 19.17-27)

<sup>26</sup> E caja nahuá'a Jesús ají que a'ajná ño'ojó, nacúhua'atacaloje ricá a'ahuaná apiyácacanamí nacojé rejo penaje. E'yohuá queja apú iphaca pajimila yámojo. Ríi i'imari Simón. Pajimila Cirene eyaje ri'imacá. Ricá nahuacára'a Jesús chaya a'ahuaná apiyácacanamí huáco'ocana.

<sup>27</sup> Cajrú ina'uqué ja'apaño rápumi chu. Cajrú inaana quele ja'apaño najhua'até. Cajrú neyaca rijhua'até. Cajrú nahuíyo'oca, camu'ují huani napechu i'imacale.

<sup>28</sup> Jesús amari neyaca cajrú rijhua'até. Aú rimá najló:

—Inaana, Jerusalén eyájena, iyániya nujhua'até. Iyá ijluhua, iyánijlo hua'até.

<sup>29</sup> Aquijñojo ina'uqué amájeño caja chapú caje yajhué. Rihuacajé ina'uqué quemájeño inaana mayaniquéruna nacú marí que: “Meque palani najló, mayaniquéruna ne'emacale”.

<sup>30</sup> Rihuacajé caja nemaje ipurejlo: “Pa'ó huachá” que. Nemaje caja yenúrijlo: “Papára'ata huecá” que.

<sup>31</sup> Chuhua nahuajáica nucá huejápaja. Uncá pu'uhuaré la'ajeri calé nucá. E'iyonaja nahuajáica nucá. Eyá pu'uhuaré la'ajeño, ileruna nahuajaje cajrú huani.

<sup>32</sup> Nahuá'a caja ajopana iyamá rijhua'até, nenócaloje necá rijhua'até penaje. Uncá ina'uquélaruna huani ne'emacá.

<sup>33</sup> E caja nephá nenóquelana ejo, yenuri ejo. Yenuri nemá nacú: “Ina'uqué huíla'aru aphinami ricá” que. Rejé nephaca ee nacúhua'ata Jesús a'ahuaná apiyácacaname nacú ipháqueja itapuhua aú. Ñaqué caja nacúhua'ataca necá ajopana, iyamá nahuá'acarena rijhua'até. Apú nacojé, apú nacojé que nacúhua'ataca necá Jesús ahua'á. Apú cúhua'aro Jesús ahua'á ca'aña chojó pitá, apú pajrú chojó pitá. Marí que nacúhua'ataca ne'emacá.

<sup>34</sup> Jesús nacúhua'ataca ee, rimá Tupánajlo marí que:

—Nora'apá, chuhua pamó nachaje, uncale nahue'epila na penájeca nala'acá nucá chapú marí que.

Nacúhua'ataca ricá ejomi surárana cátaño nacaje nacú, namácaloje méqueca natamáca'atajica najluhua Jesús a'arumacami penaje.

<sup>35</sup> Cajrú ina'uqué i'ímaca re, yacá'año Jesús chaje. Nahuacára'ajeño, ajopana hua'até, la'año namácaja ricá. Nemá rinacu:

—Ri'imatá ajopana ina'uqué capichácajo liyá. Chuhua huamáijla ri'imataca ricó ñaqué caja. Ilé Tupana huacára'acare majó ri'imajica ee, ri'imataje ricó capichácajo liyá —que nemacá Jesús nacú.

<sup>36</sup> Ñaqué caja surárana la'acá namácaja Jesús. Ne'ejná rahua'ajé. Na'á rijló nacaje jalá pu'uhua'areni amúra'atacanami, ri'iracáloje penaje.

<sup>37</sup> Nemá rijló:

—Judíona i'ímacana pi'imajica ee, pi'imataje picó.

<sup>38</sup> Jesús cha nacúhua'ata lana'aquejami. Nalana'á ricá griego pura'acó chu, latín pura'acó chu, hebreo pura'acó chu hua'até. Marí que lana'aquejami quemacá rinacu: “Judíona i'ímacana ricá.”

<sup>39</sup> Pajluhuaaja pu'uhuaré la'ajeri cúhua'aro Jesús ahua'á. Ricá caja pura'aró rinacu pu'uhuaré, rimá rijló:

—Ilé Tupana huacára'acare majó ina'uqué i'imatájeri penaje pi'imajica ee, pi'imatá picó, huecá hua'ató capichácajo liyá.

<sup>40-41</sup> Raú apú, apojó pitá cúhua'aco, aca'arí ricá. Rimá rijló:

—¿Uncá chi piquero'oló Tupana piyá? Pu'uhuaré la'ajeño huecá. Pachá nahuacára'a huenócana. Pu'uhuaré huala'acare pachá huamá chapú caje yajhué me'etení. Marí que huala'acana palani. Eyá marí ina'uqué uncá la'alá pu'uhuaré. E'iyonaja calé ramá chapú caje yajhué huajhua'até —que rimacá rijló.

<sup>42</sup> Eyá rimá Jesusjlo:

—Pihue'epí nucá, pi'imajica ee piyuque ina'uqué huacára'ajeri.

Aú Jesús quemari rijló:

<sup>43</sup> —Pijló numá, chuhua'á pi'imajé nujhua'até palá péchuruna péchumi i'ímaca ejo.

*Jesús taca'acá yucuna marí:*

*(Mt 27.45-56; Mr 15.33-41; Jn 19.28-30)*

<sup>44</sup> E caja caápu'ucu i'imari nachá. Ejéchami camú camaré yacaca. Lapí que, ri'imacá rejéchami piyuque nate'eré ehuá. Caápu'ucu eyá pe'iyochami camú to'ocó quetana ne'emacá calajerúhuaca.

<sup>45</sup> Pe'iyochami camú to'ocó i'ímaca. Ejéchami ya'ajná Tupana ñacaré chu a'arumacaji jiyo'ocó pe'iyohuá paliyácaca. Apalá ucapú penaje racúhua'o re. Yenuya rijiyó'ó ají que cahuacaje. Caja iyamá que riyurico.

<sup>46</sup> E caja Jesús jahuíyo'ori, rimá Tupánajlo:

—Nora'apá, pijló nuyurí nupechu.

Marí que rimacá aú caja ritaca'á i'ímaca.

<sup>47</sup> Surárana huacára'ajeri i'imari re. Romano naquiyana ri'ímaca. Ricá amari Jesús taca'acá. Palá ripura'acó Tupana nacú, rimá Jesús nacú:

—Palá la'ajeri jo'ó ricá taqui'ichari.

<sup>48</sup> Cajrú huani ina'uqué i'ímaño re, amaño Jesús taca'acá. Ejomi napa'ó. Camu'ují huani napechu i'ímaca, chapú nala'acale Jesús. Aú natujla'á necó ne'ecú chiyá.

<sup>49</sup> Palá péchuruna i'ímacaño Jesús nacú yuriño ejo'ocaja rahua'á. Najhua'até caja inaana naquiyana i'ímaño. Ne'ejná rijhua'até Galilea eyá Jerusalén ejo i'ímaca. Necá penájenami

ne'emacá. Re ne'emacá juca pani Jesús liyá i'ímacá. Reyá namá méqueca nenoca Jesús i'ímacá.

*Nato'otaca Jesús tami támijimi to'otáquelana chojé yucuna marí:*  
(Mt 27.57-61; Mr 15.42-47; Jn 19.38-42)

<sup>50</sup> Apú i'imari. Ríi i'imari José. Pajimila Arimatea eyaje ri'ímacá. Judíona huacára'ajeño naquiyana ri'ímacá.

<sup>51</sup> Uncá ajopana nahuacára'ajeño pechu que calé ripechu i'ímacá Jesús nócana nacú. Uncá paala rijló marí que rila'acana i'ímacá. Rihue'epí Tupana i'imajica ina'uqué naquiyana huacára'ajeri penaje. Aú ri'imá rihuátacana nacú.

<sup>52</sup> E José i'ijnari Pilato amaje, riquejá'acaloje riliyá Jesús tami penaje. E rimá rijló "a'a" que.

<sup>53</sup> Aú ri'ijná Jesús tami huitúca'ataje. Rihuitúca'ataca ritami ejomi rimapíra'a rinacu palá nojé a'arumacaji. Quéchami rito'otaca ritami támijimi to'otáquelana chojé. Huajé jipa e'iyá ichácanami ri'ímacá. Uncá jo'ó nato'otala ajopana tami richojé. Ricá chojé nato'otá Jesús tami i'ímacá.

<sup>54</sup> A'ajnejí lamá'atacana huacajé e'iyá ne'emacá. Lainchu chami nale'ejé huatána'acaje huacajé iphari rená chojé. Yehuicha riphaca rená chojé rihuacajé.

<sup>55</sup> Rihuacajé caja inaana i'imaño támijimi to'otáquelana ejo, amaño méqueca nato'otaca Jesús tami richojé. Jesús jácho'oco Galilea eyá huacajé, necá, ajopana hua'até i'ijnáño caja rijhua'até Jerusalén ejo. Necá penájena amaño nato'otaca Jesús tami richojé.

<sup>56</sup> Ejomi napa'ó. Nalamá'ata pusana, pu'umé jamarí caje, na'acáloje ricá Jesús tami nacú penaje. Caja nale'ejé huatána'acaje huacajé iphari rená chojé. Aú nahuatána'a Tupana puráca'alo lana'aquejami quemacá que.

## 24

*Jesús macápo'oco yucuna marí:*  
(Mt 28.1-10; Mr 16.1-8; Jn 20.1-10)

<sup>1</sup> Sápacaje queño'ocó huacajé inaana i'ijnáño piño támijimi to'otáquelana ejo. Lapiyami, camú jeño'ocá ee, ne'ejná rejo i'ímacá. Najña'á najhua'ató pusana pu'umé jamarí, nalamá'atacare i'ímacá.

<sup>2</sup> E caja nephá rejo, amaño jipa i'ímacá jatatáqueja rinumaná eyá.

<sup>3</sup> Aú namujlúca'a ulahuí chojé, ritami i'ímacare chojé. Amaño uncá Jesús Nahuacára'ajeri tami i'imalá richu.

<sup>4</sup> Raú cajrú naquero'ocó. Napechu i'imá: "¿Méqueje carí?" Ejéchami namaca iyamá achiñana, je'echú chiyájena, tára'aco nahua'á. Jareni, sereni hua'até que na'arumacá i'ímacá.

<sup>5</sup> Marí caje aú íqui' huani inaana quero'ocó. Aú najláma'o ne'emá nacojé. E achiñana, je'echú chiyájena, quemáño najló:

—¿Naje iculá quele cajmuni támijimina e'iyohuá?

<sup>6</sup> Uncá Jesús i'imalá maare. Caja rimacápo'ocho. Galilea e ri'ímacá huacajé ri'imá ijló riyucuna i'ímacá. Caja ihue'epí méqueca rimacá rinacuhuá ijló i'ímacá.

<sup>7</sup> Rimá ijló: "Ina'uquejloje penaje i'ímacá nucá. Na'ajé nucá pu'uhuaré la'ajéñojlo. Ejomi nenoje nucá a'ahuaná apiyácacanami nacojé. Hueji que cala i'imajemi numacápo'ojo piño nopumí chuhuá", que Jesús quemacá ijló rinacuhuá i'ímacá —que je'echú chiyájena quemacá najló.

<sup>8</sup> Marí que nemacá aú najló riphá napechu nacojé. Ejéchami nahue'epica ñaque huani Jesús quemacá najló i'ímacá.

<sup>9</sup> Raú napa'ó, iphaño Jesús ja'apiyatéjena nacú. Pajluhuaja iphata ji'imaji nacojé quele ne'emacá. Ne'emá najló Jesús macápo'oco yucuna ajopana ina'uquejlo hua'ató.

<sup>10</sup> Marí quele ne'emacá inaana, i'imaño riyucuna Jesús ja'apiyatéjajlo: María Magdalena, Juana, María, Santiago jaló ru'umacá, ajopana inaana hua'até, quele i'imaño rimacápo'oco yucuna najló.

<sup>11</sup> E'iyonaja uncá nema'alá na'apiyá. "Majopeja japi napura'acó huajhua'até," queja napechu i'ímacá.

<sup>12</sup> Apala uncá ñaque calé ca'ajná Pedro pechu i'ímacá. Ricá jácho'oro, recho'ó ají que a'ajná ño'ojó támijimi to'otáquelana ejo, iphari rejo. E riyacá'o ulahuí chojé, amari meñaru ri'ímacá. A'arumacaji José mapíra'acare rinacu i'ímacá, yá'aro apojó pumitá. Marí que ramaca aú ripa'ó piño rapumí chuhuá. Cajrú ri'ijnataca ripéchuhua.

*Jesús iphácaco najhua'até Emaús apunana chu yucuna marí:*  
(Mr 16.12-13)



<sup>13</sup> Rihuacajé caja iyamá ina'uqué i'ijnaño ají a'ajná ño'ojó pajimila Emaús ejo. Pajluhuaja iphata ji'imaji nacojé quele quilómetros quetana júcaca Jerusalén eyá ri'imacá.

<sup>14</sup> Na'apaca nacú napura'ó pajhua'atéchaca Jesús nacú méqueca nala'acá ri'imacá.

<sup>15</sup> E'iyohuá que Jesús iphácaco najhua'até. Reyá ra'apá najhua'até.

<sup>16</sup> Namá ricá. Apojó ri'imacá nejlú chu, nahue'epica piyá Jesús huani ri'imacá.

<sup>17</sup> E Jesús quemari najló:

—¿Na nacú chi ipuri'ichó maare ja'apíchaca nacú? ¿Naje i'ijnatá camu'ují ipéchuhua?

Marí que rimacá najló aú natajné iñe'epú chu.

<sup>18</sup> E apú quemari rijló, Cleofas ríi ri'imacá, rimá rijló:

—Piyuque ina'uqué maárohua hue'epiño méqueca ri'imacá Jerusalén e i'imacá. Caja cajrú riyucuna jema'acó piyuque Jerusalén ehua. ¿Picaja calé chi uncá jema'alá riyucuna?

<sup>19</sup> Jesús quemari najló:

—¿Meque chi ri'imacá rehuá?

Nemá rijló:

—Nazaret eyaje, Jesusmi chu i'imacá. Tupana puráca'alo ja'apátajeri ri'imacá. Palá huani rila'ajica ina'uqué; palá huani caja rehuíña'atajica ina'uqué Tupana nacú. Aú calé piyuque ina'uqué pechu i'imaqué palá rinacu. Ñaqué caja Tupana pechu i'majica rinacu.

<sup>20</sup> E'iyonaja sacerdotena huacára'ajeño, ajopana huahuacára'ajeño, quele a'año ricá ajopánajlo, nenócaloje ricá penaje. Nacúhua'ata ri'imacá a'ahuaná apiyácacanamí nacú i'imacá. Nephá ricá itapuhua aú riyáte'ela yá'aca eyá. Ejomi nacúhua'ata ricá.

<sup>21</sup> Huapechu i'imá caphí richojé, ri'imatácaloje huecá, Israelmi chu laquénami, ajopana te'eré eyájena liyá penaje. Caja hueji que cálichá huecá nenoca ricá ejomi.

<sup>22</sup> Huanaquiyana, inaana, i'imichaño riyucuna huajló, meñaru namíchaca ulahuí chiyá yucuna. Aú huapechu i'imichá: “¡Meque piyuque huani rila'acá!” Ne'ejichá támijimi to'otáquelana ejo lapiyami, camú jeño'ochaca ee.

<sup>23</sup> Iphichaño rejo, amíchaño uncá ri'imalá richu. Aú napi'ichó riyucuna i'imajé huajló. Nemicha huajló: “Huamicha Tupana hua'atéjéna, je'echú chiyájéna, ya'achiyaco huajló. Necá quemíchaño huajló 'Cajmuni Jesús,' que inaana i'imichaca huajló riyucuna.

<sup>24</sup> Ejomi huajhuáque'ena naquiyana i'ijichaño piño támijimi to'otáquelana ejo. Inaana quemíchaca que namíchaca ricá. Uncá caja namálacha Jesús —que nemacá Jesusjlo.

<sup>25</sup> Jesús quemari najló:

—Ñaqué caja Tupana puráca'alo ja'apátajeñomi chuna lana'acá riyucuna papera chojé i'imacá. ¡Meque ijnú huani jema'acá napuráca'alomi ja'apiyá! ¡Meque uncá huani ipechu i'imalá ijlo!

<sup>26</sup> Ricá, Tupana huacára'acare majó ina'uqué i'imatájeri penaje, amari chapú caje yajhué. Caja queja ri'imacá Tupana pechu nacú, nala'acáloje ñaqué ricá penaje ri'ijnacá yámona je'echú chojé. Ejomi ri'ijnacáloje je'echú chojé, ri'imacáloje Tupana hua'até rijhua'até huacára'ajeri penaje. Marí caje penaje ramá chapú caje yajhué i'imacá —que rimacá najló.

<sup>27</sup> Rimá najló méqueca Tupana puráca'alo lana'aquejami quemacá rinacu. Tupana puráca'alo Moisesmi chu lana'acare eyá riqueño'ó riyucuna i'imacana najló pamineco. Ejomi ra'apata piño najló riyucuna, Tupana puráca'alo ja'apátajeñomi chuna lana'acare i'imacá. Marí que ri'imacá najló riyucuna.

<sup>28</sup> E caja nephá pajimila nacojé. Rejeja ajopana huátaño i'ijnacana. Eyá Jesús quemari majopeja najló: “No'opíchaca” que.

<sup>29</sup> Nemá rijló:

—Maare piyuró huajhua'até. Caja huajúhui'ichaca huani, calajerú chaje majó.

—Je, ñaqué ricá.

Aú Jesús mujlúca'ari pají chojé najhua'até.

<sup>30</sup> E caja nayá'ó pajhua'atéchaca, najñácaloje na'ajnehuá penaje. Ejéhami Jesús ña'acá pan ricápojo. Rimá Tupánajlo:

—Palá pila'acá huecá marí pan aú.

Ritupa'á najló rinaquiyana. E ra'á najló ricá.

<sup>31</sup> Ejéhami nejlú me'etaco rinacojé, amaño Jesusca ri'imacá. Ejeja rimicho'ó naliyá.

<sup>32</sup> Aú nemá pajlocaca:

—Chuhua huahue'epí naca la'arí pu'ují huani huapechu ra'apíchaca huajhua'até iñe'epú chuhua quetana. Palá ra'apáchiyaca huajló Tupana puráca'alo. Jesús ri'imichaca, puri'icharo huajhua'até. Ñaquele pu'ují huapechu i'imichaca —que nemacá pajlocaca.

<sup>33</sup> Rejéhami napa'acó piño Jerusalén ejo. Nephá ajopana nacú. Jesús ja'apiyatéjéna i'imari pajluhuaja iphata ji'imaji nacojé quele. Necá i'imaño ajopana najhuáque'ena hua'até re. Nanacu nephá.

<sup>34</sup> E caja re i'imacaño quemañó najló:

—Quehuaca jo'ó Jesús macápo'ocharo. Simón Pedro amíchari ricá.

<sup>35</sup>—Que jo'ó ricá. Ñaqué caja huamíchaca ricá i'imichaca —que huajé iphácaño quemacá najló.

Aú ne'emá najló méqueca ripura'acó najhua'até ñe'epú chuhúa yucuna. Nemá caja najló méqueca nejlú me'etaco rinacóje, ritamáca'ataca aú pan najló.

*Jesús ya'atacó ra'apiyatéjenajlo yucuna marí:*

*(Mt 28.16-20; Mr 16.14-18; Jn 20.19-23)*

<sup>36</sup>Marí que ne'emacá riyucuna najló. Ejéchami Jesús ya'atacó najló mana'í chiyó rejé. Rajalaca necá. E rimá najló:

—I'imá palá pajhua'atéchaca.

<sup>37</sup>Cajrú riquero'ótaca najló raú. Napechu i'imá rinacu: “Ina'uqué ñacami japi ricá” que.

<sup>38</sup>E Jesús quemari najló:

—¿Naje chí iquero'ochó? ¿Uncá chí ihue'epila Jesusca nucá?

<sup>39</sup>Amá nuyáte'ela yá'aca, nu'umá hua'até itapuhua aphumi. Jesús nucá. Isápicha nunacu, ihue'epícaloje palá ricá raú penaje. Uncá ina'uqué ñacami napona i'imalá iná napona que caja. Uncá caja raphina i'imalá. Uncá ñaqué calé nucá. Re nunapona amácare me'etení —que rimacá najló.

<sup>40</sup>Ejomi riya'atá najló riyáte'ela yá'aca, ri'imá hua'até.

<sup>41</sup>Pu'ují huani napechu la'acó raú. Cajrú ne'ejnataca napéchuhua rinacu. E'iyonaja napechu i'imá: “Apala uncá ricá calé ricá.” Aú Jesús quemari najló:

—¿E chí maare a'ajnejí, nojñachi?

<sup>42</sup>E na'á rijló jiña a'amitaqueja jepo'oná, munumunú jalá hua'até.

<sup>43</sup>E rijña'á naliyá ricá. Rajñá ricá najimaje.

<sup>44</sup>Ejomi rimá najló:

—Ihue'epí méqueca nala'acá nu'umacá. Riyucuna nu'umá ijlo nu'umacá ijhua'até huacajé. Numá ijlo méqueca Tupana puráca'alo lana'aquejami quemacá nunacu i'imacá. Ricá Moisesmi chu lana'acare i'imacá, Tupana puráca'alo ja'apátajeñomi chuna lana'acare. Ricá numá nacú ijlo i'imacá. Tupana puráca'alo lana'aquejami iná iphácare papera Salmos chu, numá caja nacú ijlo i'imacá. Ripuráca'alo lana'aquejami quemacá que nunacu, queja nala'acá numa'acá. Tupana huacára'ari ri'imacáloje marí que penaje —que rimacá najló.

<sup>45</sup>Ejomi rila'á napechu palá, nahue'epícaloje Tupana puráca'alo lana'aquejami nacoje raú penaje.

<sup>46</sup>Rimá piño najló:

—Marí que Tupana puráca'alo lana'aquejami quemacá nunacu uncá chiyó nuphá eja'ahuá nacoje i'imacá: “Ricí Tupana huacára'ajicare majó ina'uqué i'imatájeri penaje, taca'ajeri. Hueji que cala i'imajemi rimacápo'oyo piño”, que rimacá nunacu i'imacá.

<sup>47</sup>Eyá marí que rimacá piño inacu: “Ripuráca'alo aú ne'emajé riyucuna piyuque ajopana te'eré i'imacáñojo. Ne'emajé riyucuna najló, napajno'otácaloje napéchuhua Tupana ejo pu'uhuaré nala'acare liyá penaje. Raú Tupana amájero nachaje pu'uhuaré nala'acare liyá, penaje ne'emajé riyucuna najló. Jerusalén e i'imacáñojo ne'emajé riyucuna pamineco, ejomi ajopánajlo, ajopánajlo, que ne'emajica riyucuna piyuque ina'uquejlo”, que Tupana puráca'alo lana'aquejami quemacá inacu —que Jesús quemacá najló.

<sup>48</sup>Eyá rimá piño najló:

—Icá i'imajeño riyucuna ajopana ina'uquejlo.

<sup>49</sup>Nucá huacára'ajeri e'iyajé Tupana Pechu, Nora'apá quemacare nacú i'imacá. Jerusalén e iyurejo Tupana Pechu iphájica inacu ejená. Reyá a'ajna'á ño'ojó caja caphí ipechu i'imajica riyucuna i'imacana nacú —que rimacá najló.

*Tupana huá'aca Jesús je'echú chojé yucuna marí:*

*(Mr 16.19-20)*

<sup>50</sup>Ejomi rihua'a necá pajmilla eyá ají que Betania ejo. Re rácho'ota ra'anapítá. Rimá Tupánajlo, rila'acáloje necá palá penaje.

<sup>51</sup>E'iyohuá que rácho'oñaca necá ají que je'echú chojé.

<sup>52</sup>Ajopana tára'año mequetánaja mana'í, pu'ují napechu i'imacale rinacu. E napa'ó piño Jerusalén ejo. Pu'ují huani napechu i'imacá.

<sup>53</sup>Hue'echú ca'alá queja nahuacájico Tupana ñacaré chojé, ne'emacáloje Tupánajlo palá rila'acare necá yucuna penaje. Maáreje riyucuna tajnaro.

## SAN JUAN

### *Jesucristo yucuna marí:*

<sup>1-2</sup> Uncá chiyó eja'ahuá i'ímá huacajé, Jesucristo i'imari. Nacaje Tupana pechu nacú i'ímácare yucuna i'imajeri ricá. Tupana pechu que caja ripecchu. Tupana queño'ótaca nacaje huacajé, Jesucristo i'imari rijhua'até re.

<sup>3</sup> Jesucristo hua'até Tupana queño'ótari piyuqueja nacaje i'ímáca.

<sup>4</sup> Jesucristo a'arí inajlo cajmuchaji, iná i'ímácaloje matajnaco je'echú chu raú penaje. Rilamá'ata caja iná pechu palá, iná hue'epícaloje quehuácage puráca'aloji raú penaje.

<sup>5</sup> Rica'á iná liyá pu'uhuaré iná la'acare, iná manaicho iná la'acare caje. Uncá meño'ojó pu'uhuaré la'acana i'ímála rijhua'até. Marí caje penaje Jesucristo.

<sup>6</sup> Apú queño'orí riyucuna i'ímacana. Rií i'imari Juan. Tupana huacára'ari ricá, ri'ímácaloje Jesucristo yucuna najló penaje.

<sup>7</sup> Uncá chiyó riphá nanacu, Juanmi chu i'imari najló Jesucristo yucuna, nema'acáloje ra'apiyá penaje. Iná pechu lámá'atajeri Jesucristo, rehuíña'atacale iná quehuácage puráca'aloji nacú.

<sup>8</sup> Uncá Juanmi chu calé lámá'atari ina'uqué pechu i'ímáca. Uncá meño'ojó rilamá'atala napechu, nahue'epícaloje quehuácage puráca'aloji nacojé raú penaje. Riyucúnaja calé ri'ímá najló.

<sup>9</sup> Eyá nacaje Jesucristo la'acare aú ina'uqué hue'epiño mecajeca huani Tupana. Ñaque caja nahue'epica mecajeca ricá ripuráca'alo rehuíña'atacare nacú necá aú. Ricá iphari marí eja'ahuá chojé i'ímáca, rilamá'atacaloje piyuqueja ina'uqué pechu palá penaje. Quehuácage puráca'aloji aú rila'á napechu palá.

<sup>10</sup> Ricá, Jesucristo i'imari marí eja'ahuá chu i'ímáca. Ina'uqué ri'ímáca. Ricá queño'ótari eja'ahuá i'ímáca. E'iyonaja uncá ina'uqué, eja'ahuá chu i'ímacaño, hue'epiñaño na ina'uqueca ri'ímáca.

<sup>11</sup> Riphá eja'ahuá nacojé riqueño'ótacare penájemi nacojé. E'iyonaja ricá'ana, judíona, uncá huátalaño ri'ímáca.

<sup>12</sup> Ne'iyajena que huaja calé huátalaño ri'ímáca. Napechu i'ímá richojé caphí, ri'imatácaloje necá capichácajo liyá penaje. Nanácuja calé Tupana quemari, ne'emacáloje riyani penaje.

<sup>13</sup> Uncá iná chí'inajlo que calé iná moto'ocá Tupánajlo, iná i'ímácaloje riyani naquiyana penaje. Riyani i'imaño Tupana Pechu aú. Uncá ina'uqué pechu queja calé ne'emacá riyani. Tupánaja calé quemari ina'uqué naquiyana nacú, ne'emacáloje riyani penaje.

<sup>14</sup> Jesucristo i'imari ina'uqué i'ímáca marí eja'ahuá chu. Majó riphá i'ímáca, ri-moto'ocáloje ina'uqué que caja penaje. Ina'uqué ri'ímáca maare huajhua'até. Huamácare ri'ímáca. Rihuajhuena huecá. Rehuíña'ataque ina'uqué quehuácage puráca'aloji nacú. Huamájica rila'ajica palá huani ina'uqué. Tupana l'irí huani ricá; pajluhuaja calé Ri'irí. Ri'irí ri'ímacale, Tupana a'arí riñaté, rila'acáloje piyuque nacaje penaje.

<sup>15</sup> Juanmi chu i'imaqueri Tupana l'irí yucuna ina'uquejlo i'imajica. E caja ehujaja ramá ricá. Ejomi rimá najló marí que:

—Rica po numá nacú ijlo i'ímáca: "Pajluhuaja iphájeri majó nopumí chojé. Ricá i'imajeri nuchaje huani. Uncá chiyó na i'ímá, ricaja calé i'imari pamineco".

<sup>16</sup> Palá huani Jesucristo la'acá huecá ripalamane aú. Piyuqueja ina'uquéloje penaje nacaje rila'acare.

<sup>17</sup> Tupana huacára'ari ina'uqué i'ímáca palá pajhua'atéchaca. Riyucuna Moisesmi chu i'imari ina'uquejlo i'ímáca. Uncá pachá iná la'alá rihuacára'aca que Tupana huajájeri iná. Eyá Jesucristo, ricá i'imari piño riyucuna. Iqui'ija huani Tupana huátaca ina'uqué yucuna ri'ímá huajló. Quehuácage puráca'aloji nacú ripura'ó huajhua'até.

<sup>18</sup> Uncá na calé amari Tupana i'ímáca. Ri'irí huani, pajluhuaja ricá. Rara'apá pechu que caja ripecchu. Ricá i'imari huajló riyucuna. Ri'ímá riyucuna huajló, Tupana ahua'á huani ri'ímacale.

### *Juan pura'acó palá Jesús nacú yucuna marí:*

(Mt 3.11-12; Mr 1.7-8; Lc 3.15-17)

<sup>19</sup> Judíona naquiyana i'imaño pajmíla Jerusalén e. Reyá nahuacára'a ajopana ina'uqué i'ijnacá Juan i'ímáca ejo, naquejá'acaloje riliyá riyucuno penaje. Nahuata hue'epicana na ina'uqueca ri'ímáca, penaje nahuacára'a necá rejo. Sacerdótene naquiyana, levítana naquiyana, quele nahuacára'a Juan i'ímáca ejo.

<sup>20</sup> E nephá rinacu, nemá rijló:

—¿Rica chí Tupana huacára'acare majó ina'uqué i'imatájeri penaje?

Rimá najló pu'ucuja:

—Uncá capichácajo liyá ina'uqué i'imatájeri calé nucá. Uncá nucá calé Tupana huacára'acare je'echú chiyá majó —que rimacá najló.

<sup>21</sup> Nemá riyló:

—¡Eta! ¿Na chi picá? ¿Ilé Tupana puráca'alo ja'apátajeri Elías chi picá?

—Uncá. Uncá ricá calé nucá —que Juan quemacá najló.

Nemá piño riyló:

—¿Picá chi ilé Tupana puráca'alo ja'apátajeri nemáicare nacú, iphájeri majó aquiijño?

—Uncá caja ricá calé nucá —que rimacá najló.

<sup>22</sup> Nemá piño riyló:

—¿Na ina'uqueca huani chi picá? Huahuacára'ajeño quejá'ajeño hualiyá piyucuna. Chuhua pimá huajló méqueca pimacá pinacuhúa.

<sup>23</sup> Raú Juan quemari najló marí que rinacuhúa:

—Nucá jahuíyo'ori ina'uquejlo pu'uteni chu. Marí que numacá najló: “Chuhua ilráca'alo ja'apátajeri nemáicare nacú, ipamá'ata ipéchuhua pu'uhuaré ila'acare liyá Huahuacára'ajeri pe penaje”. Marí que caja Isaiásmi chu quemacá nunacu i'imacá —que rimacá najló.

<sup>24</sup> Fariséona huacára'acarena ne'emacá, quejá'año riyucuno riliyá.

<sup>25</sup> Nemá piño riyló:

—Uncá capichácajo liyá ina'uqué i'imatájeri calé picá. Uncá caja Elías calé picá. Uncá caja Tupana puráca'alo ja'apátajeri calé picá, Tupana huacára'acare majó i'imacá. ¡Eta! ¿Naje ta pila'á bautizar ina'uqué?

<sup>26</sup> Aú Juan quemari najló:

—Nucá la'arí bautizar ina'uqué juni aú. Re apú hue'iyá, uncá ihue'epila na ina'uqueca ricá.

<sup>27</sup> Ricá iphájeri nopumí chojé. Iqui'i huani nuphácare ja'apí ricá, nuchaje huani ri'imacale.

<sup>28</sup> Marí que napura'acó pajhua'atéchaca pajimila Betania e. Juni Jordán pa'anajo pitá pajimila i'imari. Rejeja Juan la'aqueri bautizar ina'uqué.

<sup>29</sup> E caja Jesús chiraró rehuá. Ramaca aú ricá rimá marí que rinacu:

—Ohuéjana i'irí huenono Tupánajlo pu'uhuaré huala'acare chaya. Iyacá'o, ricá huani penaje huaichaca, Tupana a'ajicare ina'uqué chaya penaje ricá. Nenoje ricá, rica'acáloje pu'uhuaré huala'acare huanaquiyá raú penaje.

<sup>30</sup> Ricá po ilé numá nacú ijlo i'imacá. Marí que numacá ijlo i'imacá: “Apú iphájeri majó nopumí chojé”. Nuchaje huani ricá. Uncá chiyó na i'imá, ricaja calé i'imari”.

<sup>31</sup> Uncá caja nuhue'epila na ina'uqueca ri'imacá. Majó nu'ujná; nula'á bautizar ina'uqué juni aú. Nu'umá caja riyucuna Israelmi chu laquénamijlo, nahue'epicaloje ricá Tupana huacára'acare majó nacojé penaje —que Juan quemacá najló.

<sup>32</sup> E caja Jesús iphari Juan nacú. Ri'imá najhua'até mequetánaja re. E Juan la'arí ricá bautizar. Ejomi Juan quemari ajopánajlo:

—Nomicha Tupana Pechu huitúca'aca je'echú chiyá majó. Túcu'uchi huitúca'aca que rihuitúqui'ichaca Jesús nacojé. E caja riyuricho rijhua'até.

<sup>33</sup> Uncá caja nuhue'epila pamineco na ina'uqueca ri'imacá, i'ijnari majó. Tupana huacára'ari nula'acá bautizar ina'uqué. Ricá quemari nojló marí que i'imacá: “Pu'uhuacá pamájica Nupechu huitúca'aca pajluhuaja ina'uqué e'iyajé. Aú pimaje: ‘¿Ricá chi a'ajeri Tupana Pechu ina'uquejlo?’ ” que Tupana quemacá nojló rinacu i'imacá.

<sup>34</sup> Caja nomicha chuhua rimacare nacú nojló i'imacá. Ñaquele chuhua numá rinacu: “Tupana i'irí ricá” —que Juan quemacá najló.

*Necá Jesús huá'acarena pamineco ra'apiyatéjena penaje yucuna marí:*

<sup>35</sup> E muní que piño Juan i'imari re, iyamá ra'apiyatéjena hua'até.

<sup>36</sup> E ramá Jesús ja'apaca a'ajnaire que. Aú rimá rijhua'atéjenajlo:

—Iyacá'o, amá ilé ja'apaca. Ohueja i'irí huenono Tupánajlo pu'uhuaré huala'acare chaya. Ricá huani penaje ilé. Tupana a'ajeri ina'uquejlo ricá ina'uqué chaya, nenócaloje ricá pu'uhuaré ina'uqué la'acare chaya penaje.

<sup>37</sup> Marí que rimacá aú ra'apiyatéjena naquiyana, iyamá, i'ijnáño Jesús ápumi chu.

<sup>38</sup> E Jesús yacá'aro riyámajo; amari na'apaca rápumi chu. Aú rimá najló:

—¿Na iculá?

Nemá riyló:

—Huehuíña'atajeri, ¿mere que chi picá?

<sup>39</sup> Jesús quemari najló:

—I'ijná nujhua'até, amíchachi mere que nucá.

Raú ne'ejná rijhua'até; iphaño rejo; amaño mere queca ri'imacá. Caja pe'iyochá camú to'ocó. Aú rejé najúhua'a rijhua'até.

<sup>40</sup> Iyamá necá jema'año méqueca Juanmi chu quemacá Jesús nacú i'imacá. Ejomi ne'ejná Jesús hua'até. Pajluhuaaja nanaquiyana í i'imari Andrés; Simón e'ehué ri'imacá.

<sup>41</sup> Ricá penaje i'ijnari pu'ucuja re'ehué Simón culaje. E ramá ricá; rimá rijló:

—Caja huamicha ricá Tupana huacára'acare majó ina'uqué i'imatájeri penaje.

<sup>42</sup> E Andrés huá'ari Simón ají que a'ajná ño'ojó Jesús i'imacá ejo. E Jesús yacá'aro richaje, rimá rijló:

—Simón pií; Jonás i'irí picá. Chuhua no'ojica pií Pedro. (Jipa que quemacánaca Pedro napura'acó chu.)

*Jesús huá'aca Felipe, Natanael, quele ra'apiyatéjena penaje yucuna marí:*

<sup>43</sup> E muní que Jesús huátari Galilea te'eré ejo i'ijnacana. Ri'ijná ají que a'ajná ño'ojó, amari Felipe.

<sup>44</sup> Pajimila Betsaida eyaje ri'imacá. Ricá pajimila eyájena caja Andrés, Pedro, quele i'imacá. Jesús amari Felipe. E rimá rijló:

—Pi'ijná nujhua'até, pi'imacáloje no'opiyateje penaje.

—Je —que rimacá.

<sup>45</sup> E Felipe i'ijnari Natanael culaje. E ramá ricá. A'ahuaná ja'apí riyá'ó. E rimá rijló:

—Nucá, ajopana hua'até, amíchaño ilé ina'uqué Tupana puráca'alo lana'aquéjami quemacare nacú. Moisesmi chu lana'arí riyucuna i'imacá. Ñaqueé caja Tupana puráca'alo ja'apátajeñomi chuna lana'acá riyucuna i'imacá. Jesús, José i'irí, ricá nemáicare nacú. Nazaret eyaje ricá —que rimacá rijló.

<sup>46</sup> Aú Natanael quemari rijló:

—Uncá meño'ojó ri'imalajla palájne'eque, Nazaret eyaje ri'imacale.

Felipe quemari rijló:

—Pi'ijná nujhua'até, pamíchachi ricá.

—Je —que rimacá rijló.

Aú ri'ijná rijhua'até rejo. Iphaño Jesús nacú.

<sup>47</sup> Jesús amaca aú ricá huaíchaca rimá rinacu marí que:

—Ilé huaícha majó, Israelmi chu laquéname naquiyana ricá, Tupana huátacare ricá. Uncá na hua'até calé pajlaca ricá.

<sup>48</sup> E Natanael quemari rijló:

—¿Meque la'ajé chí pihue'epí nucá?

Jesús quemari rijló:

—Uncá chiyó Felipe huá'ichari picá majó, nomicha piyá'ichaco a'ahuaná ja'apí.

<sup>49</sup> Raú Natanael quemari rijló:

—Huehuíña'atajeri, picá Tupana i'irí. Israelmi chu laquéname huacára'ajeri penaje caja picá.

<sup>50</sup> Jesús quemari rijló:

—Meque majopeja huani pipechu li'ichaco nochojé caphí, numíhacale pijló: “A'ahuaná ja'apí nomicha piyá'ichaco”. Richaje huani nula'ajica nacaje, uncá meño'ojó ina'uqué la'alare. Picá amájeri méqueca nula'ajica ricá —que rimacá rijló.

<sup>51</sup> E Jesús quemari piño rahua'á i'imacáñojlo:

—Jema'á marí: Ica amájeño nula'ajica cajrú nacaje, Tupana hua'atéjena, je'echú chu i'imacaño, i'ijnajícale majó nuñaté a'ajé.

## 2

*Jesús jehuíña'ataca juni cajmú caje jalá que caja yucuna marí:*

<sup>1-2</sup> Hueji que cala ejomi Jesús i'imari pajimila Caná ejo. Galilea te'eré nacú ricá pajimila. Nayucupé'era'á ricá, ra'apiyatéjena hua'até, namácaloje apú huá'acaco penaje, nacajmo'ocóloje najhua'até penaje. Aú ne'emá rejo cajrú ina'uqué hua'até. Raló, María, i'imayo caja najhua'até. E caja nacajmóca'alo iphari rená chojé.

<sup>3</sup> Re'iyá ne'eracala tajnáñari necá. Raú Jesús jaló quemayo Jesusjlo:

—Caja hue'eracala tajícharo.

<sup>4</sup> E Jesús quemari rojló:

—¿Naje pi'imichá riyucuna nojló? Uncá jo'ó noná iphala rená chojé.

<sup>5</sup> E'iyonaja rumá pají chiyá sápageñojlo:

—Ila'á piyuqueja rimájica ijlo que.

—Je —que nemacá.

<sup>6</sup> Pajluhua cuhuá'ata ca'alá i'ichí i'imari re. Jipa naquiyá la'acanamí ri'imacá. Judíona lamá'ataca napéchuhua pu'uhuaré nala'acare liyá huacajé naco'ó juni ricá i'ichí chojé. Pajlúhua'ala i'ichí ña'arí juni, cincuenta litros ca'ajná, setenta litros ca'ajná.

<sup>7</sup> E caja Jesús quemari pají chiyá sáapajeñojlo:

—Ipitá juni i'ichí chojé pu'uteno ri'imajica ejená.

—Je —que nemacá.

Aú namano'otá ricá pu'uteno huaja.

<sup>8</sup> E Jesús quemari najló:

—Chuhua amo'ó i'ichí chiyá huejápaja, a'achachi ricá huayucupé'ra'ajerijlo.

—Je —que nemacá.

Aú namo'ó rinaquiyana; ne'ejnatá rijló ricá.

<sup>9</sup> E nayucupé'ra'ajeri atá'ari ricá. Juni jehuña'atacanami, cajmú caje jalá amúra'atacanami que caja ri'imacá. Uncá rihue'epila mere eyaca najña'acá ricá. Pají chiyá sáapajeño, queleja hue'epiño riyucuna, namo'ocale ri'imacá. Ri'irá rinaquiyana huajápaja. E rihuá'a huá'acaro penaje maná. Riphá rijimaje.

<sup>10</sup> E rimá rijló:

—Piyuque ina'uqué a'año pamineco palá nojé i'iracaje. Ritajnaco aú na'á najló apú i'iracaje majopéjari quemachi caja penaje. Eyá picá, a'arí caja penaje patá nojé i'iracaje —que rimacá rijló.

<sup>11</sup> Marí que Jesús queño'ocá nacaje la'acana, uncá meño'ojó ina'uqué la'alare. Galilea te'eré nacú pajimila Caná. Re riqueño'ó nacaje la'acana marí que huajé. Juni riqueño'óta cajmú caje jalá amúra'atacanami que caja ri'imacá. Raú ina'uqué hue'epiño piyuque hue'epica ricá. Raú caja ra'apiyatéjena hue'epiño Tupana huacára'acare majó ri'imacá.

<sup>12</sup> Marí que rila'acá ejomi ri'ijná ají que pajimila Capernaum ejo. Raló, rejena, ra'apiyatéjena, quele i'ijnaño caja rijhua'até. Re ne'emá meque cálaja.

*Jesús ja'apaca Tupana ñacaré chujena nacú yucuna marí:*

*(Mt 21.12-13; Mr 11.15-18; Lc 19.45-46)*

<sup>13</sup> Yehuicha nephaca fiesta jená chojé i'imacá. Pascua fiesta í. Marí caje aú Jesús i'ijnari Jerusalén ejo.

<sup>14</sup> Iphari Tupana ñacaré chojé. Re ramá ina'uqué a'acá ajopánajlo pirajina, nacánacaloje liñeru raú najluhua penaje. Jémana piracana, ohuéjana, túcu'uchina piracana, caje macá na'á najló. Ramá caja re liñeru apiyácajeño yá'aco. Liñeru napiyaca ina'uquejlo i'imacá.

<sup>15</sup> Marí que ramaca aú rila'á naña'atájona penaje tupajuma naquiyá. Eta, ra'apá nanacu Tupana ñacaré chiyá. Ra'apá caja nacajena nacú, jémana piracana, ohuéjana, quele. Ra'apá caja ina'uqué re i'imacaño nacú. E caja ri'ijná liñeru apiyácajeño ahua'ajé. Eta, rica'á huichá naliñé'ute naliyá te'erí e'iyajé. Rejomi ripajno'otá namesané.

<sup>16</sup> Túcu'uchina piracana a'ajéñojlo rimá:

—Imujlúca'ata necá huaca'apoyo. Ila'aniya Nora'apá ñacaré le'ejepelaji ñacarelana que — que rimacá najló.

<sup>17</sup> Ra'apiyatéjena amaño méqueca ra'apaca nanacu Tupana ñacaré chiyá. Raú riphá napechu nacojé méqueca Tupana puráca'alo lana'aquéjami quemacá rinacu: “Iqui'i nuhuátaca ina'uqué iphaca Tupana ñacaré ja'apí,” que rimacá rinacu.

<sup>18</sup> E mequetana i'imajemi judíona naquiyana quemano Jesúsjlo:

—¿Na ca'ajná huacári'ichari pila'acá maapami pili'ichaje caje? ¿Na aú chi huahue'epeje picá?

<sup>19</sup> Jesús quemari najló:

—Icayja'atá marí Tupana ñacaré. Eyá hueji que cala i'imajemi nócho'otaje piño ricá rapumí chuhúá —que rimacá najló.

<sup>20</sup> Aú nemá rijló:

—Cuarenta y seis jarechí quetana naca'acá rila'acana nacú. ¡Eta! ¿Picá chi jácho'otajeri ricá hueji que cala i'imajemi? —que nemacá Jesúsjlo.

<sup>21</sup> Rinapona nacú Jesús quemari najló “Tupana ñacaré” que. Uncá nahue'epila méqueca rimacá najló i'imacá rihuacajé.

<sup>22</sup> Ritaca'acá ejomi rimacápo'o piño i'imacá. Ejéchami ra'apiyatéjena hue'epica méqueca rimacá rinacuhúá i'imacá. Raú nala'á quehuaca que Tupana puráca'alo lana'aquéjami quemacá que. Ñaque caja nala'á quehuaca que Jesús puráca'alo, rimajicare nacú najló i'imajica.

*Jesús hue'epica ina'uqué pechu yucuna marí:*

<sup>23</sup> Fiesta pascua huacajé Jesús i'imari Jerusalén e. E'iyá cajrú ina'uqué jema'año ra'apiyá, namácale rila'acá cajrú nacaje.

<sup>24</sup> E'iyonaja Jesús hue'epiri necá. Uncá ra'apiyá jema'ajeño huani calé ne'emacá.

<sup>25</sup> Uncá naje calé apú quemari rijló ajopana ina'uqué nacú, rihue'epícale piyuqueja napechu.

### 3

*Jesús pura'acó Nicodemo hua'até yucuna marí:*

<sup>1</sup> Pajluhuaja ina'uqué i'imari. Ríi i'imari Nicodemo. Fariseo naquiyana ri'imacá. Judíona huacára'ajeño naquiyana caja ri'imacá.

<sup>2</sup> E caja Nicodemo l'ijnari Jesús chaje lapí. Riphá rinacu. E rimá Jesusjlo:

—Huehuíña'atajeri, huahue'epí Tupana huacára'aca picá majó huehuíña'atajeri penaje. Cajrú huani nacaje pila'acá uncá meño'ojó iná la'alare. Uncá meque la'ajé iná la'alá pila'acá que. Tupana a'acale piñaté, pila'á piyuque huani nacaje. Nacaje palani huani pila'acare aú huahue'epí Tupana huacára'aca picá majó —que rimacá rijló.

<sup>3</sup> E Jesús quemari rijló:

—Pema'á marí: Uncachu iná moto'olaje piño, uncá Tupana hua'ateje calé iná —que rimacá rijló.

<sup>4</sup> Nicodemo quemari rijló:

—Eta, ¿Meque la'ajé chí iná moto'ójla piño, caja phíyu'que iná i'imacachu? Uncá meño'ojó calé iná pa'ójla iná jaló huo chojé piño, iná moto'ocáloje huajé piño penaje —que rimacá rijló.

<sup>5</sup> Jesús quemari rijló:

—Pema'á marí: Uncachu iná moto'olá piño juni aú, Tupana pechu aú, iná i'imacáloje Tupana i'irí raú penaje, uncá meño'ojó iná iphala Tupana i'imacá ejo. Rijhua'até i'imacáño huacára'ajeri ricá.

<sup>6</sup> Ina'uqué yaní moto'oño; ina'uqué naquiyánaja necá. Eyá ina'uqué i'imaño piño Tupana yaní Ripechu queño'ocá aú najhua'até i'imacana.

<sup>7</sup> Piquechíra'ataniya pipéchuhua íqui'í huani numacá aú ina'uqué nacú, namoto'ocáloje huajé que caja penaje.

<sup>8</sup> Carená apho'orí rihuátaca ejo. Iná jema'á rimejé. E'iyonaja uncá iná hue'epila mere eyaca riqueno'ótaco. Uncá caja iná hue'epila meño'ojoca ra'apaca. Naqué caja uncá iná hue'epila méqueca Tupana Pechu ja'acó ina'uqué e'iyajé, ne'emacáloje Tupana yaní raú penaje —que Jesús quemacá Nicodémojlo.

<sup>9</sup> Nicodemo quemari rijló:

—¿Meque chí quele pimá nacú nojló.

<sup>10</sup> Aú Jesús quemari rijló:

—Cajrú pehuíña'ataca Israelmi chu laquénami. ¿Uncá chí pihue'epila meque numacare nacú pijló?

<sup>11</sup> Pema'á marí: Palá nu'umichaca riyucuna pijló. Huecá, Tupana hua'até, hue'epiño nacaje huapura'acaro nacojé. Nacaje huamácare nacú huapura'ó. E'iyonaja uncá na calé inaquiyana a'año huapurá'alo inacojó.

<sup>12</sup> Uncá puhuichani calé ijló nacaje nacojé hue'epícana marí eja'ahuá chu i'imacare. E'iyonaja numacachu rinacu ijlo, uncá caja jema'alá no'opiyá. ¿Meque ca'ajná jema'acajla no'opiyá, nu'umaquela ijlo nacaje je'echú chu i'imacare yucuna.

<sup>13</sup> Uncá na calé jácho'oro je'echú chojé i'imacá. Nucaja calé huitúca'ari reyá majó i'imacá. Nucá i'imaqueri rehuá. Ina'uquélloje i'imacá nucá —que Jesús quemacá rijló.

<sup>14</sup> Rimá piño rijló:

—Júpimi, Moisesmi chu i'imacá huacajé, Moisesmi chu tára'atari a'ahuná i'imacá. Ya'ajná pu'uteni meñaru chu ritára'ata ri'imacá. Rinacu jeí jenami pato'oró. Pejru'uhuá caje naquiyá la'acanami jeí jenami i'imacá. Naqué caja natára'atajica piño apaná a'ahuná. Nucá i'imari ina'uquélloje penaje, cúhua'ajero rinacu, nutaca'acáloje ina'uqué chaya penaje.

<sup>15</sup> Raú caphí nochoje péchuruna i'imajeño matajnaco je'echú chu.

<sup>16</sup> Iqui'ija huani Tupana huátaca ina'uqué. Naquele rihuacára'a Ri'irí huani majó eja'ahuá chojé i'imacá. Pajluhuaja huani Ri'irí. Iná pechu i'imacachu caphí richojé, ri'imatá iná capichácajo liyá, iná i'imacáloje matajnaco rijhua'até je'echú chu raú penaje.

<sup>17</sup> Uncá Tupana huacára'ala Ri'irí eja'ahuá chojé i'imacá, rihuajácaloje ina'uqué penaje. Rihuacára'a ricá majó, ri'imatácaloje ina'uqué Tupánajlo capichácajo liyá penaje. Richojé ina'uqué i'imajeño capichácajo liyá.

<sup>18</sup> Caphí iná pechu i'imacachu Tupana l'irí chojé, uncá Tupana huajálaje iná. Uncachu iná pechu i'imalá caphí richojé, Tupana huajájeri iná. Uncá pachá iná la'alá quehuaca que rimacare Ri'irí nacú rihuajaje iná.

<sup>19</sup> Tupana huajájeri ina'uqué uncá pachá napechu i'imalá caphí Jesucristo chojé ne'ematajeri penaje. Rihuajaje necá, uncale nahuátala ricá. Quemari ina'uquejlo quehuacaje puráca'aloji nacú, uncá nahuátala ricá. Richaje nahuata pajlácachi ja'apiyá

jema'acana. Richaje caja nahuátaca pu'uhuaré la'acana. Cajaja nahuata najluhua, pu'uhuaré la'ajeño ne'emacale.

<sup>20</sup> Namanaicho la'ajeño, pu'uhuaré la'ajeño, quele uncá huani huátalaño quehuácage puráca'aloji. Uncá huani nahuátala rema'acana, pu'uhuaré nala'acare i'imacá piyá najló pu'uhuaá.

<sup>21</sup> Eyá palá la'acaño, necá huátalaño quehuácage puráca'aloji jema'acana. Nahuata ra'apiyá i'imacana. Raú Tupana a'arí ñañaté nacaje nala'acare aú. Aú calé ajopana amaño nala'acá palá huani ra'apiyá jema'acana aú.

*Méqueca Juan Bautizar la'ajeri quemacá Jesucristo nacú yucuna marí:*

<sup>22</sup> Apú huacajé piño Jesús i'ijnari ra'apiyatéjena hua'até aji que Judea te'eré ejo. Re ri'imá najhua'até. Ra'apiyatéjena la'año bautizar ina'uqué i'imacá.

<sup>23</sup> Ma'apona que Juan la'acá bautizar ina'uqué Enón e. Pajimila Salim ahua'á ricá. Re Juan la'aqueri bautizar ina'uqué, cajrú juni i'imajícale re. Rejo cajrú ina'uqué i'ijnajica, rila'acáloje bautizar necá penaje.

<sup>24</sup> Marí que la'acana nacú Juan i'imaqué rehuá, uncá chiyó naca'á ri'imacá ina'uqué huajáquelana chojé.

<sup>25</sup> E apú huacajé Juan ja'apiyatéjena naquiyana aca'acaño judíona naquiyana hua'até. Apojó nemacá paliyácaca bautizar la'acana nacú. Jimaje naca'ácaco pajhua'atéchaca.

<sup>26</sup> Marí caje aú ne'ejná riyucuna i'imajé Juanjlo. Nephá rinacu. E nemá rijló:  
—Huehuíña'atajari, Jordan pa'ajnao pumitá hue'emacá huacajé, pajluhuaja ina'uqué iphari pinacu. Pimá huajló i'imacá na ina'uqueca ri'imacá. Chuhua ricá penájemi huacára'ari ra'apiyatéjena, nala'acáloje bautizar ina'uqué penaje. Chuhua piyuqueja ina'uqué i'ijnáño richaje, ra'apiyatéjena la'acáloje bautizar necá penaje —que nemacá rijló.

<sup>27</sup> Raú Juan quemari najló:

—Uncá na calé la'arí palá nacaje, uncachu Tupana a'alá iná ñaté.

<sup>28</sup> Icó jema'año méqueca numacá nunacuhá i'imacá. Palá numacá ijlo nunacuhá: “Uncá nucá calé Tupana huacára'acare majó ina'uqué i'imatájeri penaje. Ritucumaja calé Tupana huacára'ari nucá riyucuna i'imajé ina'uquejlo”, que numacá ijlo nunacuhá i'imacá.

<sup>29</sup> Nahuá'acaco huacajé, pajluhuaja achiñá huá'acaro riyajalo penaje hua'até. Patari ricá, jema'arí rimacare nacú. Pu'ují ripechu la'acó raú. Naqué caja pu'ují nupechu, cajrú ina'uqué i'imacale Jesucristo hua'até.

<sup>30</sup> Palani nuchaje, nuchaje que ri'imajica ina'uquejlo. Lanáquiya majopéjari queja nu'umajica najló —que Juan quemacá najló.

*Je'echú chiyaje Jesucristo. Riyucuna marí:*

<sup>31</sup> Ajopana ina'uqué chaje huani ricá, iphari je'echú chiyá majó i'imacá. Marí eja'ahuá chujena majopéjaruna necá. Marí eja'ahuá chu i'imacana nacú napura'ó. Eyá iphaca je'echú chiyá majó, pura'aró nacaje ramácare nacú Tupana i'imacá e.

<sup>32</sup> Ripuráca'alo rema'acare re nacú hua'ató ripura'ó. Ajopana chaje huani ricá. E'iyonaja uncá na calé jema'arí ripuráca'alo ja'apiyá.

<sup>33</sup> Jema'arí je'echú chiyaje puráca'alo ja'apiyá, quemari Tupana puráca'alo nacú: “Quehuácage ricá.”

<sup>34</sup> Tupana huacára'ari Jesucristo i'imacá, ra'apátacaloje ripuráca'alo ina'uquejlo penaje. Tupana a'arí rijló Ripechu, rihue'epícaloje Tupana hue'epica que caja raú penaje.

<sup>35</sup> Tupana huajhué Ri'iri. Ra'á rijló piyuque nacaje.

<sup>36</sup> Iná pechu i'imacachu capí Tupana l'irí chojé, iná i'imajica hua'ajini huani rijhua'até je'echú chu raú, uncá iná tajnálojo. Uncachu iná jema'alá Tupana l'irí ja'apiyá, uncá ra'alá inajlo cajmuchaji. Uncachu ra'alá inajlo cajmuchaji, uncá iná i'imalaje matajnaco je'echú chu. Uncá pachá iná jema'alá ra'apiyá, chapú huani Tupana huajáica iná.

## 4

*Jesús pura'acó pajluhuájaru Samaria eyájeru hua'até yucuna marí:*

<sup>1</sup> Marí que yucu iphaca fariséona nacú i'imacá:

“Juan ja'apiyatéjena chaje íqui'ica Jesús ja'apiyatéjena. Richaje caja íqui'irunaca rila'acá bautizar ina'uqué,” que yucu i'imacá.

<sup>2</sup> Uncá quehuaca calé nemacá. Uncá Jesús la'alá bautizar ina'uqué. Necaja calé, ra'apiyatéjena, la'año bautizar necá.

<sup>3</sup> Jesús hue'epica aú fariséona jema'acá riyucuna, rácho'o Judea te'eré eyá, ripa'acóloje Galílea te'eré ejo penaje.

<sup>4</sup> E caja Jesús ja'apari ají que Samaria te'eré e'iyohuá.



<sup>5</sup> Riphá pajimila Sincar nacojé. Te'erí Jacobmi chu a'acare ri'irimi chujlo, Josemi chujlo i'imacá, ahua'ajé riphá.

<sup>6</sup> Re juni jamo'oquelana i'imacá. "Jacobmi chu jamo'oquelánami," que na'acá ríí. Rejé Jesús iphari. Caja raya'ó ja'apácaje nacú, raú rihuatána'a juni jamo'oquelana ahua'á. Rejé caápu'ucu i'imari nachá.

<sup>7-8</sup> **Aú ra'apiyatéjena i'ijnáño pajimila ejo a'ajnejí huarúhua'aje. Yámijo pajluhuájaru inanaru iphayo rejé juni amo'ojé. Samaria eyájeru ru'umacá. E Jesús quemari rojló:**

—Pa'á nojló juni, nu'urachi.

<sup>9</sup> Raú rumá rijló:

—¿Meque la'ajé chi piquejá'a nulyá juni, Judíona naquiyana pi'imacale? Samaria eyájeru nucá —que rumacá rijló.

(Ijñu ruhuátaca rijló juni a'acana. Aú rumá rijló ilé que. Júpimi nachí'inami chuna nócaño pajhua'atéchaca i'imacá. Aú chapú napechu i'imacá panacuhúacaca judíona, Samaria eruna, hua'até.)

<sup>10</sup> Jesús quemari rojló:

—Uncá pihue'epila naca Tupana a'acá inajlo. Pihue'epíquela na ina'uqueca nucá, piquejá'ajla nulyá juni. Raú no'ójla pijló juni. Juni no'ocare ina'uquejlo a'arí cajmuchaji najló, natajnaco piyá raú —que rimacá rojló.

<sup>11</sup> Rumá rijló:

—Eta uncá na i'imalá picapi. ¿Na aú chi pamo'ojé nojló juni? Ya'ajná riphuta chu ricá. ¿Meque la'ajé ca'ajná pamo'ójla nojló cari juni, a'acare inajlo cajmuchaji, iná i'imacáloje matajnaco raú penaje? —que rumacá rijló.

<sup>12</sup> Rumá piño rijló'uqueca nucá, piquejá'ajla nulyá juni. Raú no'ójla pijló juni. Juni no'ocare ina'uquejlo a'arí cajmuchaji najló, natajnaco piyá:

—Chuchumi chu, Jacobmi chu, yuriri huajló marí juni amo'oquelana i'imacá. Ricami chu, riyánimi chuna, ripiránami chuna quele i'iraqueño richiyá. Palá huani rila'acá huecá raú. ¿Richaje chi pila'ajica huecá palá nacaje aú? —que rumacá rijló.

<sup>13</sup> Rimá rojló:

—Iná i'iracachu marí chiyá juni, rejomi maca'aní iná i'irataca piño juni.

<sup>14</sup> Eyá ilé juni no'ocare, uncá iná núru'upi chu macára'atalajo piño raú. Juni amo'oquelana uncá tajnáro que caja iná e'iyá ilé cajmuchaji no'ocare ina'uquejlo. Raú iná i'imacá matajnaco —que rimacá rojló.

<sup>15</sup> Raú rumá rijló:

—Eco pa'á nojló ilé caje juni, nu'ujnacá piyá majó piño juni amo'ojé. Uncá caja nunúru'upi chu macára'atalajo piño raú —que rumacá rijló.

<sup>16</sup> Jesús quemari rojló:

—Chuhua pipa'ó piño piñacaré ejo, pihua'íchachi piyajná majó —que rimacá rojló.

<sup>17</sup> Raú rumá Jesúslo:

—Uncá na i'imalá nuyajná.

Rimá rojló:

—Quehuaca jo'ó pimá nacú nojló.

<sup>18</sup> Pajluhua té'ela quele achíñana hua'até pi'imacá. A'ajná pi'imacare hua'até me'etení, uncá piyajná huani calé ricá. "Uncá na i'imalá nuyajná", que pimíchaca nojló. Quehuaca jo'ó pimíchaca nojló i'imichaca —que rimacá rojló.

<sup>19</sup> Aú rumá rijló:

—Chuhua nuhue'epí Tupana puráca'alo ja'apátajeri picá.

<sup>20</sup> Huachi'inami chuna, Samaria erúnami chuna ne'emacá, i'ijnaqueño ca'ajno ipuré ejo, napechu i'imacáloje pu'ují Tupana nacú re penaje. Eyá icá, judíona, quemano Jerusalén ejo iná i'ijnacá, iná pechu i'imacáloje pu'ují Tupana nacú penaje —que rumacá rijló.

<sup>21</sup> Jesús quemari rojló:

—Pema'á no'opiyá. Rihuacajé huaícha pu'ují iná pechu i'imacá Tupana nacú majopeja. Uncá iná i'ijnalaje ipuré ejo; uncá caja iná i'ijnalaje Jerusalén ejo.

<sup>22</sup> Icá Samaria eruna pechu i'imá Tupana nacú pu'ují. E'iyonaja uncá ihue'epila naca ricá. Eyá huecá, judíona, hue'epiño naca ricá. Pajluhuaja huanaquiyana i'imatájeri ina'uqué capichácajo liyá. Raú huahue'epí naca ricá.

<sup>23</sup> Tupana Pechu ja'apiyá que iná pechu i'imacá rinacu pu'ují. Marí palani. Ripechu aú caja iná hue'epí naca ricá. Marí que Ripechu ja'apiyá i'imacaño pechu i'imacá pu'ují rinacu me'etení. Ñaque caja ri'imajica najló.

<sup>24</sup> Uncá Tupana naponá i'imalá. Re ripechu; uncá iná amálare ricá. Ñaquele iná pechu aú ja iná pechu i'imá pu'ují rinacu. Marí que Tupana huátaca ina'uqué pechu i'imacá pu'ují rinacu —que rimacá rojló.

<sup>25</sup> —Nuhue'epí pajluhuaaja ina'uqué huaíchaca. Tupana huacára'ajeri ricá majó ina'uqué i'imatájeri penaje. Riphájica huacajé ri'imajé palá huani Tupana yucuna huajló piyuqueja —que rumacá Jesúsjlo.

<sup>26</sup> Jesús quemari rojló:

—Nucá po quele pimá nacú, iphari majó. Hua'até pipura'ó me'etení.

<sup>27</sup> Ejéchami ra'apiyatéjena íphaca Jesús nacú, amaño ripura'acó rujhua'até. Napechu nacuja nemá: “¿Naje chi ripura'ó ilerú inanaru hua'até?” E'iyonaja uncá nemalá rojló: “¿Na pihuata?” que. Nahuata rijló quemacana: “¿Naje pipura'ó rujhua'até?” E'iyonaja nahuó la'aró ripiyá.

<sup>28</sup> Nephaca aú nanacu ruhuitúca'ata ru'utelá te'erí e'iyajé. Ejomi rupa'ó ají que pajimila ejo riyucuna i'imajé ajopánajlo. Rumá najló:

<sup>29</sup> —I'ijná nujhua'até, amíchachi pajluhuaaja ina'uqué a'ajnae ricá. Piyuque nuyucuno ri'imichá nojló i'imichaca. Apala ricá ca'ajná Tupana huacára'acare majó i'imacá; ina'uqué i'imatájeri capichácajo liyá penaje ca'ajná ricá —que rumacá najló.

<sup>30</sup> Aú nácho'lo pajimila eyá; i'ijnáño rujhua'até Jesús i'imacá ejo.

<sup>31</sup> Re'iyohuá que Jesús ja'apiyatéjena quemacá rijló:

—Huehuíña'atajeri, chuhua pajñá pa'ajnehuá.

<sup>32</sup> Rimá najló:

—Re a'ajnejí nojló, nojñácaloje penaje. Uncá ihue'epila naca ricá.

<sup>33</sup> Raú nemá pajlocaca.

—¿Na ca'ajná a'achari rijló a'ajnejí?

<sup>34</sup> Jesús quemari najló:

—Nula'acá aú Nuhuacára'ajeri huátaca que, a'ajnejí que caja nojló ricá. Rihuacára'a nula'acá nacaje. Nuñapátaca aú rila'acana, a'ajnejí que caja nojló ricá.

<sup>35</sup> Nacaje ina'uqué ejátacare huajé que, nemá nacú: “Pa'u queta queri i'imajemi richa i'imajé huajló. Quetana hue'echú ca'alá i'imajica huajló, que nemacá. Eyá nucá quemari: imaniya, “Re cajrú hue'echú ca'alá ina'uquejlo, nema'acáloje Tupana yucuna penaje”. Numá ijlo, re cajrú ina'uqué, nema'ájla Tupana ja'apiyá me'etení, ne'emaquela najló riyucuna.

<sup>36</sup> Ina'uqué jema'acachu Tupana ja'apiyá riyucuna jema'acana aú, Tupana a'ajeri riyucuna i'imajéñojlo rihuemí. Palá nala'acá necá riyucuna i'imacana najló aú. Tupana ja'apiyá jema'ajeño ne'emacale, ne'emajica matajnaco je'echú chu raú. Ajopana ca'ajná queño'oño riyucuna i'imacana uncá jema'alaño riyucúnajlo. Raú naqueño'ó Tupana nacojé hue'epicana. Pumí chiyó ajopana piño ca'ajná i'imaño Tupana yucuna najló. Rihuacajé ca'ajná nema'á ra'apiyá. Tupana a'ajeri riyucuna i'imajéñojlo rihuemí, palá nala'acare huemí. Rihuacajé napechu i'imajé pu'ují.

<sup>37</sup> Apa'amá puráca'aloji quemari marí que: “Apú ejátari nacaje icha ijí. Richa i'imacá ee apú caja ña'arí richa”.

<sup>38</sup> Nuaqué caja ri'imajica ijlo. Nuhuacára'aje i'ijnacá riyucuna i'imajé ajopánajlo. Ajopana jehuíña'atacarena necá penájenami ne'emajica. I'imajica aú nuyucuna najló, nema'ajé no'opiyá, ajopana jehuíña'atacale ne'emacá nunacu ipiyá. Ñaquele napalamane aú na'ajé nanacojé ipuráca'alo —que Jesús quemacá ra'apiyatéjenajlo.

<sup>39-40</sup> E caja ilerú inanaru íphayo piño rejo pajimila eruna hua'até. Ru'umá riyucuna najló. Raú cajrú pajimila eyájena i'ijnáño rujhua'até Jesús ejo. Nahue'epí Tupana huacára'aca Jesús i'imacá, rumacale najló: “Piyuque nuyucuno ri'imichá nojló i'imichaca” que.

Caja nephá Jesús nacú. E nemá rijló:

—Piyuró huajhua'até maare.

Aú ripa'ó najhua'até; riyuró najhua'até iyamá cala quetana.

<sup>41</sup> Ri'imá najló Tupana puráca'alo yucuna. Ehuá cajruca hue'epiño Tupana huacára'acare ri'imacá. Ripuráca'alo huani jema'acana aú nahue'epí ricá ri'imacá.

<sup>42</sup> E nemá ilerú inanárulo:

—Pi'imacale aú huajló riyucuna, huahue'epí Tupana huacára'aca ricá majó. Chuhua uncá raú ja calé huahue'epica ricá. Caja huemí'ichá ripura'acó Tupana nacú. Caja huahue'epicha ricá huani Tupana huacára'acare majó eja'ahuá chojé i'imacá, ri'imatácaloje ina'uqué capichácajo liyá penaje —que nemacá rojló.

*Jesús tejmo'ótaca nahuacára'ajeri i'irí yucuna marí:*

<sup>43</sup> Iyamá cala i'imajemi Jesús jácho'oro Samaria te'eré eyá. Ra'apá ají que yenojo Galilea te'eré ejo.

<sup>44</sup> Uncá riyurilo rite'eré ehua i'imacá, uncale nephala ra'apí rehuá. Rimá rinacuhá marí que: “Tupana puráca'alo ja'apátajeri te'eré eruna uncá íphálaño ra'apí.” Aú calé uncá riyurilo rehuá.

<sup>45</sup> E caja riphá Galilea te'eré ejo. Namaca áu ricá palá napechu i'ímacá rinacu, nanaquiyana amána'apa ri'ímacale. Jerusalén e na'apátaca fiesta huacajé namá rila'acá ina'uqué e'iyayá cajú naca je, uncá meño'ojó iná la'alare.

<sup>46</sup> Caja Jesús iphari rejo. Richira'ó ají que nate'eré e'iyohuá. Tajnaro pajimila Caná ejé. Re riqueño'óta júpimi que juni cajmú caje jalá amúra'atacanami que caja penaje i'ímacá. Reje riphá. Ya'ajná quemachi re apú pajimila, rií Capernaum. Re pajluhua ina'uqué i'ímari. Ne'emacana hua'até sápa jeri ri'ímacá. Ritami ri'irí i'ímacá.

<sup>47</sup> E caja yucu i'ímari: “Jesús jácho'ocharo Judea te'eré eyá. Iphíchari huajé majó Galilea te'eré nacojé”. Rema'acá áu riyucuna ri'ijná ají que Jesús amaje. Riphá rinacu; rajalaca ricá. E rimá rijló:

—Aquíchaje huani nu'urí. Yehuíchaja huani ripechu capichaco. Pila'á nojló naca je. Pi'ijná nujhua'até, pitejmo'óchiyachi nojló ricá —que rimacá Jesusjlo.

<sup>48</sup> Áu Jesús quemari rijló:

—Uncá ipechu i'ímalá nochojé caphí, uncájica ee amá naca je nula'acare, uncá meño'ojó ina'uqué la'alare caje. ¿Que chí ricá? —que rimacá rijló.

<sup>49</sup> Raú ne'emacana hua'até sápa jeri quemari rijló:

—Quiñaja pi'ijnacá nujhua'até, nu'urí pechu capichaco piyá.

<sup>50</sup> Jesús quemari rijló:

—Pipa'ó piñacaré ejo. Caja chuhua peyajhueni pi'irí.

Rema'á ra'apiyá. Áu caja ripa'ó ají que riñacaré ejo.

<sup>51</sup> Rijhua'até sápa jeño amaca áu ricá huaíchaca ne'ejná rijimaje. Nephácaco pajimájechaca rijhua'até. E nemá rijló:

—Caja pi'irí tejmo'otaro.

<sup>52</sup> Áu rimá najló:

—¿Méreje chami camú to'ocó ee ritejmo'otó i'ímacá?

Nemá rijló:

—Lalemí, huajé camú to'ocó ee, jelo'ocajo ja'apari riliyá.

<sup>53</sup> Raú rihue'epí pajñacani ritejmo'otaco Jesús quemacá áu: “Caja chuhua peyajhueni pi'irí” que. Ritejmo'ótacale ri'irí ya'ajná, caphí ripechu i'ímacá Jesucristo chojé. Ñaque caja riyajalo, riyani, quele pechu i'ímacá caphí richojé.

<sup>54</sup> Marí que ritejmo'ótaca ri'irí i'ímacá. Raú rila'á piño naca je uncá meño'ojó iná la'alare. Iyamá pe rila'acá naca je uncá meño'ojó ina'uqué la'alare Galilea te'eré ejo riphaca ejomi. Judea te'eré eyá ri'ijná rejo i'ímacá.

## 5

### *Betesda e Jesús tejmo'ótaca pajluhua ja ritami yucuna marí:*

<sup>1</sup> Judíona la'año fiesta Jerusalén e i'ímacá. Raú Jesús pa'aró rejo.

<sup>2</sup> Pajimila nacú corral jipa naquiyá la'acanamí chipúca'ari. Rinumaná i'ímari cha'apá. Re apú rinumaná i'ímari nemaque nacú: “Ohuéjana le'ejé ricá” Rahua'á juni yá'aro, rií Betesda. Marí que na'acá rií napura'acó chu, hebreo pura'acó chu. Juni cha pají yá'aro. Jipa naquiyá la'acanamí ri'ímacá. Pajluhua té'ela quele juni tujré i'ímacá.

<sup>3</sup> Juni turená nacú cajú natámina pitacó. Que'iyapejena ne'emacá. Ne'iyajena i'ímaño mejluruna; ne'iyajena uncá meño'ojó ja'apáña palá; ne'iyajénajlo nanapona taca'átaro. Re juni turená natámina pitacó. Juni yoco'ocó nahuátaque, ri'íma jícale marí que:

<sup>4</sup> Apala, apala queja juni yoco'ocó. Tupana hua'atéjeri, je'echú chiyaje, huitúca'aqueri rejo juni yoco'ótaje. Pajluhua natámina naquiyana huitúca'aqueri racojé ajopana piyá riyoco'ocó quetana, riyoc'ocola tejmo'ótari ricá riyaripune liyá.

<sup>5</sup> Re ne'iyá apú ritami i'ímari. Treinta y ocho quele jarechí quetana ri'ímacá ritami.

<sup>6</sup> E caja Jesús iphari rejo, amari rito'ocó re. Rihue'epí júpicha huani ri'ímacá ritami caje hua'até. Áu rimá rijló:

—¿E pihuátaca tejmo'otácajo?

<sup>7</sup> Áu ritami quemari Jesusjlo:

—A'a. E'iyonaja uncá na i'ímalá, rihuitúca'atacaloje nucá juni acojé riyoco'ocó quetana penaje. Nuhuitúca'ajla racojé. E'iyonaja quiñaja apú huitúca'aca racojé nupiyá —que rimacá rijló.

<sup>8</sup> Jesús quemari rijló:

—Pácho'o; pa'apachi; pijña'á picamané pijhua'ató.

<sup>9</sup> Ejéchami ritami caje ja'apaca riliyá. Raú rácho'o; rijña'á ricamané rijhua'ató; ra'apá reyá. Nale'ejé huatána'acaje huacajé i'ímari rihuacajé.

<sup>10</sup> E judíona quemáño ritami penájemijlo:

—¿Uncá chi pema'alá Tupana ja'apiyá? Chuhujá huatána'acaje huacajé. E'iyonaja piñña'á picamané.

<sup>11</sup> E rimá najló:

—Tejmo'óchiyari nucá quemíchari nojló: “Pa'apá, piñña'á picamané pijhua'ató” que.

<sup>12</sup> Nemá rijló:

—¿Na ta chi quemíchari pijló ilé que?

<sup>13</sup> Uncá ra'ajpalá najló. Uncá rihue'epila naca tejmo'ótaca ricá, cajrú ina'uqué e'iyohuá ri'imacale. Jesús ja'apíchami, aú uncá ramala ricá ne'iyohuá.

<sup>14</sup> Quéchami Jesús íphácaco ricá penájemi hua'até Tupana ñacaré chu. E rimá rijló:

—Pamá, caja pitejmo'ochiyo. Chuhua caja peyajhueni picá. Maare eyá huatumó pila'aniya piño nacaje uncá Tupana huátalare caje. Pila'ajica ee nacaje uncá rihuátalare caje, richaje huani pila'ajico chapú reyá a'ajná ño'ojó —que rimacá rijló.

<sup>15</sup> Eyá ricá penájemi i'ijnari riyucuna i'imajé judíona naquiyánajlo. Rimá najló:

—Jesús, ricá tejmo'óchiyari nucá —que rimacá najló.

<sup>16</sup> Marí caje aú judíona naquiyana huátaño Jesús la'acana chapú, ritejmo'ótacale ritami nale'ejé huatána'acaje huacajé.

<sup>17</sup> Raú ne'ejná riyucuna quejá'aje Jesús liyá. Jesús quemari najló:

—Nora'apá la'arí nacaje palani. Ñaquele nucá caja la'arí nacaje ñaqueé caja —que rimacá najló.

<sup>18</sup> Marí que rimacá aú richaje nayúcha'aco richá. Iqui'i nahuátaca rinócana i'imacá. Uncá paala najló ri'imacá, ritejmo'ótacale ina'uqué nale'ejé huatána'acaje huacajé. Chapú huani caja ri'imacá nanacu, rimacale Tupana nacú: “Nora'apá ricá” que. Marí que quemacana aú rila'á ricó Tupana queja caja.

*Naca huacára'ari Tupana I'irí la'acá nacaje yucuna marí:*

<sup>19</sup> E caja Jesús quemari najló:

—Jema'á marí: Nucá, Ri'irí, uncá meño'ojó nula'alá nacaje nocó. Nora'apá ja'apiyá que nula'acá nacaje. Rila'acá nacaje, que caja nula'acá.

<sup>20</sup> Nora'apá huajhué nucá. Ñaquele rimá nojló nacaje nacú, nuhue'epicaloje rila'acana nacojé penaje. Rimaje piño nojló nacaje nacú, nula'acáloje penaje. Apú nacaje nula'acare chaje ri'imajica. Marí que ipechu i'imajica nunacu raú: “Meque piyuque huani la'ajeri ricá” que.

<sup>21</sup> Nora'apá hue'epiri ina'uqué caja taca'acaño macápo'otacana. Nucá, Ri'irí, hue'epiri ñaqueé caja cajmuchaji a'acana nuhuátacarenajlo.

<sup>22</sup> Uncá Tupana calé quemajeri ina'uqué nacú mecajenaca necá: palá la'acaño ca'ajná, pu'uhuaré la'acaño ca'ajná. Caja ra'á nucá, numacáloje nanacu mecajenaca necá penaje.

<sup>23</sup> Marí penaje ra'á nu'umacá, piyuque ina'uqué pechu i'imacáloje nunacu palá penaje. Nora'apá nacú napechu i'imacá, que caja napechu i'imacáloje nunacu penaje ra'á nu'umacá. Uncachu ina'uqué pechu i'imalá palá nunacu, uncá caja napechu i'imalaje palá Tupana nacú. Ricá huacára'ari nucá majó i'imacá.

<sup>24</sup> Jema'á marí: A'ajeño nanacajó nupuráca'alo i'imajeño matajnaco je'echú chu. Nuhucára'ajeri Tupana. Caphí richojé péchuruna i'imajeño matajnaco re. Marí que ri'imajica ee íjló, uncá Tupana huajálaje icá. Caphí Tupana chojé péchuruna icá i'imajica ee, icá ja'apájeño capichácajo chíyá cajmuchaji chojé.

<sup>25</sup> Jema'á marí: Tupana I'irí nucá. Caja riphá rená chojé capichájeño penájenajlo, nema'acáloje nupuráca'alo penaje. Ra'apiyá jema'ajéñojlo Tupana a'ajeri huajé cajmuchaji, ne'emacáloje raú hua'ajini huani je'echú chu penaje.

<sup>26</sup> Inajlo cajmuchaji a'ajeri Nora'apá, Tupana. Rimá caja nunacu ñaqueé caja, no'ocáloje ina'uquejlo cajmuchaji penaje, ne'emacáloje matajnaco je'echú chu raú penaje.

<sup>27</sup> Ina'uquéloje penaje i'imacá nucá. Ñaquele ra'á nucá, numacáloje ina'uqué nacú méqueca ne'emajica. Rihuajaje necá, uncá la'alaño palá. Marí penaje ra'á nu'umacá.

<sup>28</sup> Ipechu i'imaniya nunacu: “Meque piyuque huani péchuri ricá” que. Rihuacajé huaícha caja taca'acaño jema'ajeño nupuráca'alo.

<sup>29</sup> Palá la'acáñomi chuna macápo'ojeño, ne'emacáloje matajnaco je'echú chu penaje. Pu'uhuaré la'acáñomi chuna macápo'ojeño caja, najña'acáloje chapú caje yajhué panacu penaje —que Jesús quemacá najló.

*Iná hue'epica quehuácaca Jesús puráca'alo yucuna marí:*

<sup>30</sup> Jesús quemari piño najló:

—Uncá nula'alá nacaje nupechu queja. Noma'á Nora'apá ja'apiyá. Rihuacára'aca nucá queja nula'acá nacaje. Palani nacaje nula'acare, uncale nula'alá ricá nupechu queja. Nora'apá huacára'aca queja nula'acá nacaje. Ricá huacára'ari nucá majó i'imacá.

<sup>31</sup> Noco numaquela nunacuhúa, apala imacajla nunacu: “Uncá quehuaca calé rimacá rinacuhúa”.

<sup>32</sup> Re apú. Ricá caja quemari nunacu numacá que caja. Raú nuhue'epí quehuácaca ricá.

<sup>33</sup> Icó huacára'año inaquiyana riyucuna quejá'aje Juan liyá i'imacá. Quehuaca rimacá nunacu i'imacá.

<sup>34</sup> Uncá na penaje calé nojló ina'uqué puráca'alo. E'iyonaja numá ijló marí que, iyurícaloje ichó nojló, nu'umatácaloje icá capichácajo liyá raú penaje.

<sup>35</sup> Palani inajlo iná camaró lucúna'aqueja lapí, ripatacáloje iná camaré palá penaje. Ñaque caja Juan puráca'alo i'imacá ijló, quehuaca rimacale ijló. Pu'ují ipechu i'imacá ripuráca'alo nacú mequetánaja.

<sup>36</sup> Juan i'imari nuyucuna i'imacá. Cajrú ina'uqué jema'año nuyucuna raú. Richaje íqui'ica nema'acá nuyucuna nacaje nula'acare aú. Nora'apá palamane aú calé nula'á ricá. Raú ina'uqué hue'epiño Nora'apá huacára'aca nucá majó i'imacá.

<sup>37</sup> Nora'apá Tupana huacára'ari nucá majó i'imacá. Ricá caja huacára'ari ajopana lana'acá ina'uquejlo nuyucuna patera chojé i'imacá. Uncá jema'alá Tupana i'imacá yucu ijló; uncá caja amala ricá.

<sup>38</sup> Uncá caja ripuráca'alo i'imalá ipechu nacú, uncale ipechu i'imalá caphí nochojé. Tupana huacára'acare majó nucá.

<sup>39</sup> Marí que ipechu Tupana puráca'alo lana'aquėjami nacú: “Tupana puráca'alo quemari inajlo rinacu, méqueca iná la'acajla, iná i'imacáloje hua'ajini huani je'echú chu raú penaje”, que ipechu i'imacá rinacu. Marí que ipechu i'imacale rinacu, icá jehuíña'año Tupana puráca'alo lana'aquėjami nacú cajrú. Tupana puráca'alo, jehuíña'atacare nacú, quemari jo'ó nunacu.

<sup>40</sup> E'iyonaja calé uncá i'ijnalá majó nuchaje cajmuchaji chaya, i'imacáloje hua'ajini huani je'echú chu raú penaje.

<sup>41</sup> Uncá nukulala ajopana ina'uqué, napura'acóloje nunacu palá majopeja penaje.

<sup>42</sup> Nuhue'epí uncá ihuajhué calé Tupana.

<sup>43</sup> Tupana huacára'ari majó nucá ripuráca'alo aú. Aú calé nu'ujná majó. E'iyonaja uncá jema'alá no'opiyá. Apala apú iphájeri majó ripechu queja. Majopeja ripajlájica ca'ajná ijhua'até. Ricá ja'apiyá ca'ajná jema'ajé.

<sup>44</sup> Uncá meño'ojó i'imalá no'opiyá jema'ajeño, ihuátacale ina'uqué pura'acó inacu palá. Uncá ihuátala napura'acó pu'uhuaré inacu nupuráca'alo jimaje. Uncá ihue'epila itucumó Tupana huátaca que la'acana, rimacáloje inacu palá penaje. Marí que ri'imacale ijló, uncá jema'alá no'opiyá.

<sup>45</sup> Ipechu i'imaniya nunacu marí que: “Ricá quemájeri Tupánajlo pu'uhuaré huala'acare nacú, Tupana huajácaloje huecá penaje”. Uncá nucá calé quemájeri inacu. Tupana puráca'alo Moisesmi chu lana'acare i'imacá, chojé ipechu i'imá caphí. E'iyonaja calé uncá ila'alá rihuacára'aca que. Pachá Tupana huajájeri icá.

<sup>46</sup> Jema'aquela Tupana puráca'alo ja'apiyá, Moisesmi chu lana'acare i'imacá, que caja jema'acajla no'opiyá. Moisesmi chu lana'ari nuyucuna i'imacá.

<sup>47</sup> Uncaja que jema'á puráca'aloji ja'apiyá Moisesmi chu lana'acare, uncá caja jema'alaje nupuráca'alo ja'apiyá —que Jesús quemacá judíonajlo.

## 6

*Jesús a'acá pajluhua té'ela quele mil ina'uquejlo a'ajnejí yucuna marí:  
(Mt 14.13-21; Mr 6.30-44; Lc 9.10-17)*

<sup>1</sup> Jesús pura'aró najhua'até i'imacá. Quéchami ricuhúa'aca caesa pa'anajo pitá. Galilea caesa íi. Ricá caja caesa na'á rií Tiberias.

<sup>2</sup> Cajrú ina'uqué i'ijnacá rápumi chu, namácale rila'acá cajrú nacaje uncá meño'ojó ina'uqué la'alaré caje. Cajrú namájicano ritejmo'ótaca ina'uqué natámina i'imajícaño.

<sup>3-4</sup> Rihuacajé yehuicha judíona le'ejé fiesta iphaca rená chojé. Jesús cuhua'ari pa'anajo pitá. E nácho'o yenuri chuhúa, iphaño yenuri i'ihuátaje. Re riyá'o ra'apiyatéjena hua'até.

<sup>5</sup> E Jesús pajno'oró riyámojo yacá'ajo, amari cajrú ina'uqué huaíchaca. Yehuicha nephátaca necá, aú rimá rijhua'ateje Felípejo.

—¿Mere eyá huahuarúhua'aje a'ajnejí ileruna huaíchañojo penaje?

<sup>6</sup> Marí que rimacá rijló, rema'acáloje méqueca rimacá rijló penaje. Caja Jesús hue'epiri méqueca rila'ajica a'ajnejí najló.

<sup>7</sup> E Felipe quemari rijló:

—Hue'ejnaquela a'ajnejí huarúhua'aje dos cientos denarios aú, uncá riphálajla piyuque nanacojé, najñácaloje huejápajano rinaquiyana penaje —que rimacá rijló.

<sup>8</sup> Re caja apú ra'apiyateje i'imari re rijhua'até. Ríi i'imari Andrés; Pedro e'ehué ri'imacá. E rimá Jesúslo:

<sup>9</sup> —Re maare pajluhua yuhuají. Ricapi pajluhua té'ela ca'alá pan; ricapi caja iyajmela jíñana. Queleja maare. Uncá meño'ojó riphala Iqui'iruna ina'uqué nacojé —que rimacá rijló.

<sup>10</sup> Jesús quemari ra'apiyatéjenajlo:

—Chuhua imicha najló, nayá'acoloje piyuqueja penaje.

Cajrú jimichi palá nojé i'imacá rehuá. E piyuqueja nayá'o re'iyajé. Iqui'iruna ne'emacá. Achiñánaja calé nalapa'atá; cinco mil ca'ajná ne'emacá.

<sup>11</sup> E Jesús ña'arí ricápojo pajluhua té'ela ca'alá pan. Quéchami ripura'acó Tupana hua'até. Rimá rijló:

—Palá pili'ichaca huecá marí pan aú.

Ejomi ra'á ra'apiyatéjenajlo pan, natamáca'atacaloje ricá piyuque ina'uqué yá'añojlo penaje. Pan rila'acá que caja rila'acá jíñana. E caja najná ñó'ope na'ajnehuá nahuátaca ejé, namano'ocá ejé.

<sup>12</sup> Rejomi Jesús quemari ra'apiyatéjenajlo:

—Chuhua ihuayo'ochá rijlupemí ilé yurícharo, nacupaca piyá ricá.

—Je —que nemacá.

<sup>13</sup> Raú ne'emá rijlupemí huayo'ojé. Namano'otá iyamá iphata jí'imaji nacojé ca'alá cuhuá'ala pu'uteno huánija a'ajnejí lupemí aú.

<sup>14</sup> Caja namá riqueño'otaca a'ajnejí i'imacá. Raú rila'á nacaje uncá meño'ojó ina'uqué la'alare caje. Marí que rila'acá ejomi nemá pajlocaca:

—Tupana puráca'alo ja'apátajeri jo'ó ricá. Caja queja ri'imacá Tupana pechu nacú, riphácaloje marí eja'ahuá chojé penaje —que nemacá pajlocaca Jesús nacú.

<sup>15</sup> Jesús hue'epirí méqueca napechu nacú ri'imacá, na'acáloje ricá tejmuji aú ne'emacana penaje. Raú ri'ijnáñá necá. Rácho'o piño ipuré i'ihuátaje, ri'imacáloje ricoja re penaje.

*Jesús ja'apaca juni jimahua yucuna marí:*

(Mt 14.22-27; Mr 6.45-52)

<sup>16</sup> E caja najúhua'a. Raú Jesús ja'apiyatéjena i'ijnáño caesa turenaje.

<sup>17</sup> Huitúca'año jita chojé. Naqueño'ó caesa cuhuá'acana, nahuata pajimila Capernaum ejo pa'acano. E caja najúhua'a huani caesa chu, na'apá calajerúhuaca. Uncá jo'ó Jesús iphala nanacu rejé i'imacá.

<sup>18</sup> Nacuhua'aca ee cajrú carená queño'ocá ja'apácaje nachá. Raú cajrú juni yoco'ocó.

<sup>19</sup> Caja nacuhua'a cinco quilómetros ca'ajná, seis quilómetros quetana ca'ajná. Ejéchami namaca Jesús huaíchaca majó naloco'opani. Juni jimó richira'ó. Namaca ricá huaíchaca aú naquero'ó.

<sup>20</sup> Rimá najló:

—Iquero'oniyo, Jesús nucá.

<sup>21</sup> Raú nemá rijló, rihuitúca'acaloje jita chojé natu'ujhuevo penaje. Rihuitúca'a richojé. Hua'ató que nephaca punumaje chojé, nahuátaca i'ijnacana ejo nephá.

*Ina'uqué culaca Jesús yucuna marí:*

<sup>22</sup> Ina'uqué naquiyana yuriño pa'anajo pitá i'imacá. Nahue'epí Jesús ja'apiyatéjena cuhuá'aca jita chuhua. Caja penaje i'imacá re, ricá chu nacuhua'a i'imacá. Nahue'epí caja uncá Jesús cuhuá'ala najhua'até i'imacá.

<sup>23</sup> E'iyohuá que ajopana ina'uqué iphaca jita chuhua rejé. Pajimila Tiberias eyájena ne'emacá. Najnáca pan lalemi que ejé nephá. Re Jesús quemari Tupánajlo: “Palá pila'acá huecá pan aú” i'imacá. Ejomi najná ricá. Rejé nephá.

<sup>24</sup> Amaño Jesús, ra'apiyatéjena, quele uncá i'imalaño re. Aú nahuitúca'a piño netane chojé, cuhuá'año Capernaum ejo Jesús culaje.

*A'ajnejí que caja inajlo Jesús, iná i'imacáloje ripalamane je'echú chu penaje yucuna marí:*

<sup>25</sup> E caja nephá caesa pa'anajo pitá. Re nephata Jesús. E nemá rijló:

—Huehuíña'atajери, ¿Méquechami piphíhaca majó?

<sup>26</sup> Jesús quemari najló:

—Numá ijlo a'ajnejí chaya i'ijichá majó, ajnácale a'ajnehuá lalemi imano'ocá ejé. Uncá i'ijnalacha majó nuchaje, ihue'epícale naca nucá, la'arí nacaje uncá meño'ojó ina'uqué la'alare caje. Noná que'ená nula'á raú.

<sup>27</sup> Ihue'epíniya itucumajo a'ajnejí ña'acana ijluhua. Majopeja ricapichaco inajlo. Iná ajná iná a'ajnehuá, iná i'imacáloje raú penaje. A'ajnejí que caja inajlo Tupana Pechu. Tupana quemari nunacu, no'ocáloje Ripechu ina'uquejlo, ne'emacáloje matajnaco je'echú chu raú penaje. Ihue'epí itucumó Tupana Pechu ja'apiyá i'imacana —que Jesús quemacá najló.

<sup>28</sup> Nemá piño rijló:

—¿Meque iná la'acá, iná la'acáloje Tupana huátaca que penaje?

<sup>29</sup> Rimá najló:

—Tupana huátari ipechu i'ímacá caphí nochojé, nu'umatácaloje icá capichácajo liyá penaje. Rihuacára'acare majó nucá —que Jesús quemacá najló.

<sup>30</sup> Nemá piño rijló:

—Pila'á piño huajló nacaje uncá meño'ojó ina'uqué la'alare, huamácaloje penaje, huapechu i'ímacáloje caphí pichojé raú penaje. ¿Na ca'ajná pila'ajé piño huajló?

<sup>31</sup> Hua'ajútayami chuna i'imajica pu'uteni meñaru chu huacajé najñaque a'ajnejí. Ríí i'imari maná. “A'ajnejí Tupana huacára'ajicare najló je'echú chiyá ri'imajica”, que Tupana puráca'alo lana'aquejami quemacá rinacu. Pila'á ñaque caja huajló, huapechu i'ímacáloje pichojé caphí raú penaje —que nemacá Jesusjlo.

<sup>32</sup> E rimá najló:

—Numá ijlo uncá je'echú chiyaje huani calé a'ajnejí Moisesmi chu a'aqueri najló. Je'echú chiyaje huani a'ajnejí Nora'apá huacára'acare ijlo i'ímacá.

<sup>33</sup> Nucá Tupana huacára'acare majó, a'arí cajmuchaji ina'uquejlo, ne'emacáloje matajnaco je'echú chu raú penaje. Marí caje a'ajnejí Tupana a'arí ina'uquejlo me'etení —que rimacá najló.

<sup>34</sup> Aú nemá rijló:

—Hue'emacana, pa'á huajló hue'echú ca'alá queja ilé a'ajnejí pimacare nacú.

<sup>35</sup> Eyá Jesús quemari najló:

—Nucá ilé caje a'ajnejí. Nucaja calé a'arí huajé cajmuchaji ina'uquejlo, ne'emacáloje matajnaco je'echú chu raú penaje. Uncá quehuí calé me'epejí huajé ajñacaño na'ajnehuajlo. Uncá caja huajé que i'iracaño juni nuru'upi chu macára'atalo. Ñaque caja caphí nochojé péchurunajlo nucá. Uncá na i'imalá capuhuini no'opiyá jema'ajéñojlo, napechu i'ímacá piyá pu'ují raú.

<sup>36</sup> Caja numá inacu: “Uncá jema'alaje no'opiyá” que. Caja amá nacaje nula'acare. E'iyonaja calé uncá jema'alá no'opiyá.

<sup>37</sup> Tupana a'arí nojló ina'uqué no'opiyá jema'ajéño penaje. Necá jema'año no'opiyá. Uncá nócho'otalaje necá nule'ejena ina'uqué e'iyayá.

<sup>38</sup> Uncá nu'ujnalá majó je'echú chiyá, nula'acáloje nuhuátaca que penaje. Nu'ujná majó, nula'acáloje Nuhuacára'ajeri huátaca que penaje.

<sup>39</sup> Nuhuacára'ajeri Tupana. Uncá rihuátala ina'uqué, ra'acarena nojló, capichaco riliyá. Pajluhuaja nanaquiyana, uncá caja rihuátala ricapichaco riliyá. Ñaquele rihuata numacápo'otaca nule'ejena caja taca'acaño i'ímacá. Marí que ri'imajica caja penaje eja'ahuá íphájica rená chojé huacajé.

<sup>40</sup> Nora'apá Tupana, huátari piyuqueja ina'uqué hue'epica naca nucá. Rihuata caja napechu i'ímacá caphí nochojé. Uncá tajnálajeño penájena cajena ina'uqué je'echú chu. Nucá macápo'otajeri necá, caja taca'acaño, eja'ahuá íphájicaja rená chojé caja penaje huacajé —que Jesús quemacá najló.

<sup>41</sup> E caja judíona naquiyana queño'oño rimaná aca'acana, rimacale najló rinacuhá: “Nucá huitúca'ari je'echú chiyá majó. A'ajnejí queja caja nucá ina'uquejlo.”

<sup>42</sup> Aú nemá pajlocaca:

—¿Uncá chí José i'irí calé ricá Jesús? Huamána'apa rara'apá, raló, quele. ¡Eta, meque rimacá rinacuhá: “Nucá huitúca'ari je'echú chiyá majó!” —que napura'acó pajhua'atéchaca rinacu.

<sup>43</sup> E Jesús quemari najló:

—Aca'aníya numaná pajhua'atéchaca.

<sup>44</sup> Nora'apá calé la'arí ina'uqué pechu palá, nema'acáloje no'opiyá penaje. Necaja calé jema'año no'opiyá. Eja'ahuá íphájicaja caja penaje rená chojé huacajé numacápo'otaje no'opiyá jema'ajéño mi chuna.

<sup>45</sup> Tupana puráca'alo lana'aquejami, ricá ripuráca'alo ja'apátajeño mi chuna lana'acare i'ímacá, quemari marí que: “Tupana jehuíña'atajeri piyuque ina'uqué”, que rimacá. Ra'apiyá jema'ajéño, ileruna huátajeño nucá nahuacára'ajeri penaje.

<sup>46</sup> Uncá na calé amari Tupana. Nucaja calé amari ri'ímacá, reyaje nu'umacale.

<sup>47</sup> Jema'á mari: Caphí nochojé i'ímacaño i'imajeño matajnaco je'echú chu.

<sup>48</sup> A'ajnejí palamane ina'uqué i'ímaño eja'ahuá chu. A'ajnejí que caja nucá ina'uqué naquiyánajlo. Nupalamane ne'emajica matajnaco je'echú chu.

<sup>49</sup> A'ajútayami chuna ajñaqueño a'ajnejí, pu'uteni chu ne'emaqué huacajé. Ricá a'ajnejí íí i'imari maná. Uncá ne'emalá matajnaco raú.

<sup>50</sup> A'ajnejí numacare nacú ijlo íphari je'echú chiyá. Iná huátacachu inajluhua ricá, uncá iná tajnálajo raú je'echú chu.

<sup>51</sup> Nucá a'ajnejí, iphácare je'echú chiyá. Cajmuni nucá. Ajñari marí a'ajnejí naquiyana i'imajeri hua'ajini huani je'echú chu. A'ajnejí no'ojicare, nunapona ricá, no'ocare ina'uquéjloje penaje, ne'emacáloje hua'ajini huani raú je'echú chu penaje —que Jesús quemacá najló i'imacá.

<sup>52</sup> Marí que rimacá jimaje judíona naquiyana aca'ácaño pajhua'atéchaca. Ne'iyajena quemaño ajopánajlo.

—¿Meque la'ajé chí ra'ájla huajló rinapona naquiyana, huajñácaloje ricá penaje?

<sup>53</sup> Eyá Jesús quemari piño najló:

—Jema'á marí: Ina'uquéjloje penaje i'imacá nucá. Uncá ca'ajná ihuátala nunapona ajñacana. Uncá caja ca'ajná ihuátala nura i'iracana. Marí que ri'imajica ee ijlo, uncá cajmunchaji i'imalaje ijlo, i'imacáloje hua'ajini huani je'echú chu raú penaje.

<sup>54</sup> Nunapona ajñájeño, nura i'irajeño, i'imajeño matajnaco je'echú chu. Nucá macápo'otajeri ilé cajena taca'acaje chiyá, eja'ahuá capichájico huacajé.

<sup>55</sup> A'ajnejí huani nunapona; i'iracaje huani nura.

<sup>56</sup> Huátáño najlulhua ricá, i'imaño nujuáque'ena. Ñaque caja najhuáque'ehue nucá.

<sup>57</sup> Nora'apá huacára'ari nucá majó i'imacá. Uncá tajnácajo penaje calé Nora'apá. Ricá a'arí nojló cajmunchaji; ripalamane nucá. Nupalamane piño nunapona ajñájeño, nura i'irajeño, i'imajeño matajnaco je'echú chu.

<sup>58</sup> A'ajnejí numacare nacú ijlo iphari je'echú chiyá i'imacá. Uncá ilé a'ajnejí que calé ricá, peñahuilánami chuna ajñájacare. Uncá ne'emalá matajnaco raú. Ajñari a'ajnejí numacare nacú, i'imajeri matajnaco je'echú chu —que Jesús quemacá najló.

<sup>59</sup> Marí que Jesús jehuíña'ataca ne'emacá rinacu. Nahuacáca'alo ñacarelana chu, pajimila Capernaum e, rehuíña'ata ne'emacá.

*Cajmunchaji yucuna marí:*

<sup>60</sup> Marí que rehuíña'ataca necá rinacu. Raú cajrú ra'apiyá jema'ajeño quemaño pajlocaca: —¿Meque ne'echuje huani caji rimíchaje nacú huajló! Uncá meño'ojó iná a'alare jená palá. Uncá meño'ojó iná a'alá iná nacojó ricá.

<sup>61</sup> Ripechu aú ja Jesús hue'epiri naca'acá rimaná rimacare chona. Raú rimá najló:

—¿Uncá paala chí ijlo quele numíchaje nacú ijlo?

<sup>62</sup> Piyuque ina'uquéjloje penaje i'imacá nucá. ¿Meque ca'ajná ipechu la'acojla, amáquela nucá jácho'ocojla je'echú chojé, nu'umacáloje júpimi nu'umacá ejo penaje?

<sup>63</sup> Tupana Pechu a'arí cajmunchaji inajlo, iná i'imacáloje hua'ajini huani ripalamane je'echú chu penaje. Apú naponá ajñacana uncá a'alá cajmunchaji inajlo, iná i'imacáloje matajnaco raú penaje. Ipechu i'imacáloje palá nochojé, penaje nupuráca'alo. I'imacáloje matajnaco je'echú chu raú penaje ricá.

<sup>64</sup> Re e'iyajena maare, uncá caphí calé ipechu nochojé —que rimacá najló.

Jesús hue'epiri mecajenaca pechu uncá i'imalá richojé caphí. Uncá chiyó nachira'ó rijhua'até rihue'epí mecajenaca ne'emacá. Rihue'epí caja mecajeca a'ajeri ricá ripinánajlo i'imajica.

<sup>65</sup> Rimá piño najló:

—Caja numá ijlo i'imacá, uncá na calé jema'arí no'opiyá, uncachu Nora'apá Tupana la'alá napechu palá, nema'acáloje no'opiyá raú penaje —que rimacá najló.

<sup>66</sup> Rejeja cajrú ra'apiyá jema'ajeño yuriño ra'apiyá jema'acana. Reyá a'ajná ño'ojó uncá nachira'aló Jesús hua'até.

<sup>67</sup> Eyá Jesús quemari iyamá iphata ji'imaji nacojé quele ra'apiyatéjenajlo marí que:

—¿Ñaque caja chí ja'apáñajica nucá?

<sup>68</sup> Aú Pedro quemari rijló:

—Hue'emacana, uncá meño'ojó hue'ejnañáalaja picá, hue'emacáloje apú ina'uqué ja'apiyatéjena penaje. Pipuráca'alo aú huahue'epí méqueca iná la'acá, iná i'imacáloje matajnaco je'echú chu raú penaje.

<sup>69</sup> Caphí huapechu pichoje. Huahue'epí Tupana huacára'aca picá majó i'imacá. Tupana i'irí huani picá. Ricá uncá tajnácajo penaje calé i'imacá, i'irí picá —que Pedro quemacá Jesusjlo.

<sup>70</sup> Jesús quemari najló:

—Nucá i'ihuapari nujlulhua icá ajopana ina'uqué e'iyayá. Iyamá iphata ji'imaji nacojé quele icá. E'iyonaja calé re pajlulhuaja inaquiyana, Jiñá Ch'i'ináricana hua'ateje ricá —que rimacá najló.

<sup>71</sup> Rimacare nacú i'imari Judas Iscariote. Apú Simón i'irí ri'imacá. Nenoca Jesús huacajé ricá a'arí ripinánajlo ri'imacá. Iyamá iphata ji'imaji nacojé quele Jesús ja'apiyatéjena naquiyana ri'imacá.



## 7

*Uncá Jesús ejena pechu i'imalá caphí richojé yucuna marí:*

<sup>1</sup> Marí caje ejomi Jesús ja'apari piño Galilea te'eré e'iyohuá. Uncá rihuátala Judea te'eré ejo i'ijnacana, judíona naquiyana re i'imacaño, huátacale rinócana. Aú uncá ri'ijnalá rejo.

<sup>2</sup> Rihuacajé yehuíchaja judíona le'ejé fiesta iphaca rená chojé. Peñahuilánami chuna la'aqueño naca'apé que caja nala'ajicano naca'apó nale'ejé fiesta huacajé.

<sup>3</sup> Ehuá Jesús merénami quemacá Jesusjlo:

—Piyuríniyo maare. Pi'ijná chuhua Judea te'eré ejo, pa'apiyá jema'ajeño, rehuájena, amácaloje méqueca pila'ajica nacaje rehuá penaje.

<sup>4</sup> Iná huátacachu piyuque ina'uqué hue'epica iná la'acare nacojé, uncá micho'ojneji calé iná la'acá ricá. Piyuque hue'epica picá nacaje la'acana. Ñaquele pila'ajé ricá, piyuque ina'uqué amácaloje ricá penaje —que nemacá rijló.

<sup>5</sup> Uncá caja Jesús merénami hue'epílaño na ina'uqueca huani Jesús i'imacá.

<sup>6</sup> E Jesús quemari najló:

—Uncá jo'ó riphala rená chojé nojló, nu'ujnacáloje rejo penaje. Eyá icá, uncá ñaqueé caja calé ijlo ricá. Ihuátaca que ila'acá nacaje.

<sup>7</sup> Ina'uqué, uncá jema'alaño Tupana ja'apiyá, ileruna pechu uncá i'imalá chapú inacu. Eyá nucá, napechu i'imacare nacú chapú nucá, numacale nacaje nala'acare nacú: “Uncá paala nala'acá” que.

<sup>8</sup> Ñaquele icaja i'ijnajeño fiesta ja'apátaje. Nucá uncá i'ijnalaje ijhua'até. Uncá jo'ó riphala rená chojé palá nojló —que rimacá najló.

<sup>9</sup> Aú riyuró Galilea te'eré nacú.

*Jesús i'ijnacá fiesta ja'apátaje najhua'até yucuna marí:*

<sup>10</sup> E caja Jesús merénami i'ijnajeño fiesta ja'apátaje. Júpichami Jesús i'ijnacá nápumi chu me'echú.

<sup>11</sup> Fiesta e'iyá judíona naquiyana culaño Jesús i'imacá. Nemá pajlocaca:

—¿Mere ca'ajná ricá?

<sup>12</sup> Cajrú re i'imacaño pura'acó Jesús nacú. Ne'iyajena quemaño rinacu: “Palájne'equé huani ricá.” Ajopana quemaño: “Uncá palájne'equé calé ricá. Majopeja pajlácata ricá ina'uqué hua'até.”

<sup>13</sup> Palá rinacu péchuruna uncá pura'alaño rinacu cajrú ajopana ina'uqué hua'até, naquero'ocole nahuacára'ajeño judíona piyá.

<sup>14</sup> Pe'iyochami na'apátaca fiesta. Ejéchami Jesús mujlúca'aca Tupana ñacaré chojé. E riqueño'ó nehuíña'atacana Tupana nacú.

<sup>15</sup> E judíona pechu i'imá: “¡Meque piyuque huani rihue'epícala!” Nemá pajlocaca:

—¿Meque la'ajé chi rihue'epica piyuque nacaje nacojé? Uncá ri'imalá jehuíña'ajo.

<sup>16</sup> Jesús quemari najló:

—Nohuíña'atacare nacú icá, uncá nupuráca'alo calé ricá. Ilé huacára'ari nucá majó, puráca'alo ricá.

<sup>17</sup> Tupana huátaca que la'acaño hue'epíño na liyájeca nupuráca'alo. Nahue'epí Tupana liyaje nupuráca'alo. Uncá nule'ejé calé ricá.

<sup>18</sup> Apú ca'ajná pura'aró ripechu queja, rihuátacale ajopana ina'uqué pechu i'imacá rinacu palá. Eyá rihuacára'ajeri huátaca que pura'ajero, huátari ina'uqué pechu i'imacá palá Rihuacára'ajeri Tupana nacú. Quehuácage puráca'alori ricá, uncá ripajjala.

<sup>19</sup> Moisesmi chu yuriri ijlo Tupana puráca'alo lana'aquejami i'imacá. E'iyonaja uncá na calé jema'ari ra'apiyá —que Jesús quemacá najló.

Eyá Jesús quemari piño najló:

—¿Naje chí ihuata nonócana?

<sup>20</sup> Aú nemá rijló:

—¿Na huátari pinócana? Jiñá pechu pe'iyá, ñaquele pimá ilé que.

<sup>21</sup> Jesús quemari najló:

—Nula'á nacaje palani e'iyá i'imacá. Raú ipechu nacú ri'imá: “¡Meque piyuque huani rila'acá!” Huatána'acaje huacajé nula'á ri'imacá. Pachá ipechu i'imá nunacu chapú.

<sup>22</sup> Moisesmi chu quemari júpimi i'imacaño nacú, namata'acáloje queráco'opena chinuma penaje. Ica la'año ñaqueé caja napumí chojé. Moisesmi chu puráca'alomi aú imata'á queráco'opena chinuma. Riphácachu rená chojé huatána'acaje huacajé, imata'á caja nachinuma.

<sup>23</sup> Ila'acáloje Moisesmi chu puráca'alomi quemacá que penaje, imata'á nachinuma huatána'acaje huacajé hua'ató. Eta, ¿Naje iyúcha'o nuchá i'imacá, nutejmo'ótacale ritami huatána'acaje huacajé i'imacá? Piyuque rinapona nutejmo'óta i'imacá.

<sup>24</sup> Apala amá ina'uqué la'acá nacaje. Ramácana aú ipechu nacú ri'imá ca'ajná: "Pu'uhuaré rila'acá, uncá paala ricá". Uncachu iná hue'epila palá ricá, uncá iná quemalá rinacu: "Pu'uhuaré rila'acá" que. Pamineco iná quejá'a riyucuna palá, iná hue'epícaloje na penájeca rila'acá ricá —que Jesús quemacá najló.

*Jesús quemari rinacuhúa mere eyájeca ri'imacá yucuna mari:*

<sup>25</sup> E caja Jerusalén eyájena naquiyana quemañó ajopánajlo marí que Jesús nacú:

—¿Uncá chí ricá calé naculá, nenócaloje ricá penaje?

<sup>26</sup> E'iyonaja maare ta ricá. Cajrú ina'uqué e'iyá ri'imá yucu huajló. Uncá meque huahuacára'ajeño la'alá ricá. Napechu i'imá ca'ajná rinacu: "Ricá Tupana huacára'acare majó ina'uqué i'imatájeri penaje ricá", que ca'ajná napechu rinacu.

<sup>27</sup> E'iyonaja uncá ñaque calé ricá. Huahue'epí mere eyájeca ricá. Eyá ricá Tupana huacára'ajicare majó ina'uqué i'imatájeri penaje, uncá iná hue'epílaje mere eyájeca ri'imajica —que napura'acó pajhua'atéchaca rinacu.

<sup>28</sup> Tupana ñacaré chu Jesús i'imari ina'uqué jehuíña'atacana nacú. Rema'acá aú napura'acó rinacu, rimá najló caphí marí que:

—Ipechu i'imá nunacu: "Huamána'apa japi ricá" que. "Huahue'epí mere eyájeca ricá", que ipechu i'imacá nunacu. Uncá nupechu queja calé nu'ujnacá majó. Pajluhuaja chuhúa péchuri, ricá huacára'ari núcá majó. Quehuácaje puráca'aloji chuhúa rila'acá nacaje. Uncá ihue'epila naca ricá.

<sup>29</sup> Nucá amari ricá, reyá nócho'o i'imacá. Ricá huacára'ari núcá majó i'imacá —que Jesús quemacá najló, nahue'epícaloje raú Tupana huacára'acare majó ri'imacá.

<sup>30</sup> Raú nahuata Jesús ña'acana, nahuajácaloje ricá penaje. E'iyonaja uncá na calé patarí ricá. Uncá jo'ó riphala rená chojé rijló. Ñaquele uncá nala'alajla ricá chapú rihuacajé.

<sup>31</sup> Cajrú ina'uqué pechu i'imá Jesús nacú marí que: "Ricá Tupana huacára'acare majó ina'uqué i'imatájeri penaje ricá. Uncá na chá'atalajla ricá nacaje la'acana aú. Caja ra'á palá huajló rená que'ená, huahue'epícaloje ricá raú penaje," que napechu i'imacá rinacu.

*Nahuacára'aca policiana patacá Jesús yucuna mari:*

<sup>32</sup> Fariséona naquiyana jema'año napura'acó pajhua'atéchaca Jesús nacú. Palá napura'acó rinacu. Aú necá, sacerdoténa huacára'ajeño, quele huacára'año policiana patacá Jesús, naca'acáloje ricá calajeruni chojé penaje. E ne'ejná ri'imacá ejo.

<sup>33</sup> Re ri'imá ina'uqué jehuíña'atacana nacú. Marí que rimacá piyuque ina'uquejlo:

—Mequetánaja calé nu'umajica ijhua'até maárohua. Quéchami nupa'ajico Nuhuacára'ajeri ejo.

<sup>34</sup> Rejomi iculaje nucá. Uncá meño'ojó amálaje nucá, uncale i'ijnalaje nu'umajica ejo —que rimacá najló.

<sup>35</sup> Raú judíona naquiyana quemañó pajlocaca:

—¿Meño'ojó ca'ajná ri'ijnajé, rimá nacú huajló? Apala ri'ijnajé huanaquiyana judíona chaje, ajopana te'eré nacú i'imacaño ejo. Rejo ca'ajná ri'ijnajé, rehuíña'atacaloje necá penaje.

<sup>36</sup> Rimicha huanacu: "Iculaje nucá. E'iyonaja uncá meño'ojó amálaje nucá, uncale i'ijnalaje nu'umajica ejo." ¿Meque quemacana ca'ajná rimíchaca marí que i'imíchaca? —que nemacá pajlocaca.

*Ina'uquejlo cajmunchaji a'ajeri yucuna mari:*

<sup>37</sup> Yehuicha fiesta tajnaco huacajé nala'á cajrú huani fiesta caja penaje. Ehuá Jesús jácho'oco najimaje. E caphí rimacá najló:

—Re ca'ajná e'iyajena maare, huátaño cajmunchaji ja'apiyá i'imacana, i'imacáloje matajnaco je'echú chu raú penaje. Inúru'upi chu macára'ataco aú ihuata juni i'iracana. Que caja ihuátajica ee cajmunchaji ja'apiyá i'imacana, i'ijná majó nuchaje, no'ochí ijlo ricá.

<sup>38</sup> Caphí nochojé péchuruna e'iyá re cajmunchaji, juni amo'oquelana uncá tajnalo que ricá najló. Raú caphí nochojé péchuruna i'imajica matajnaco je'echú chu. Marí que Tupana puráca'alo lana'aquejami quemacá —que Jesús quemacá najló.

<sup>39</sup> Tupana Pechu nacú rimá najló i'imacá. Caphí Jesucristo chojé péchurunajlo Tupana a'arí Ripechu. Jesús i'imacá riyucuna najló huacajé, uncá jo'ó ra'alá ina'uquejlo Ripechu i'imacá. Jesucristo jácho'oro je'echú chojé yámijo riqueño'ó Ripechu a'acana caphí Jesucristo chojé péchurunajlo.

*Uncá panacóchéchaca que calé napechu i'imacá Jesús nacú yucuna mari:*

<sup>40</sup> Ripuráca'alo jema'ajeño naquiyana quemañó marí que Jesús nacú:

—Tupana puráca'alo ja'apátajeri ricá, peñahuilánami chuna quemáicare nacú: "Huaícha majó" que. Ricá penaje ricá.

<sup>41</sup> Ajopana quemañó marí que rinacu:

—Tupana huacára'ari ricá majó, ri'imatácaloje ina'uqué capichácajo liyá penaje.

Ajopana piño quemano rinacu:

—¿Uncá ca'ajná Tupana huacára'acare majó ina'uqué i'imatájeri penaje calé ricá. Galilea eyaje ricá, quele nemá nacú. Aú huahue'epí uncá ricá calé ricá, ina'uqué i'imatájeri penaje.

<sup>42</sup> Marí que Tupana puráca'alo lana'aquejami quemacá rinacu: “Davidmi chu laquéname naquiyana ri'imajica. Pajimila Belén eyaje ri'imajica. Ricá caja pajimila eyaje Davidmi chu i'imacá”, que ripuráca'alo lana'aquejami quemacá rinacu —que nemacá najló rinacu.

<sup>43</sup> Uncá rejenohuaja calé napechu i'imacá pajhua'atéchaca.

<sup>44</sup> Ne'iyajena huátaño Jesús ña'acana, naca'acáloje ricá calajeruni chojé penaje. E'iyonaja uncá na calé ña'arí ri'imacá.

*Uncá nahuacára'ajeño pechu i'imalá caphí Jesús chojé yucuna marí:*

<sup>45</sup> E caja policiana pa'año piño napumi chuhua. Fariséona, sacerdotena huacára'ajeño, quele huacára'año ne'emacá, napatacaloje Jesús penaje, naca'acáloje ricá calajeruni chojé penaje. Nephá nanacu i'imacá. Uncá Jesús i'imalá najhua'até. Aú nemá najló:

—¿Naje chi ipi'ichó majó majopeja? Uncá ijña'alacha majó Jesús.

<sup>46</sup> Aú policiana quemano najló:

—Uncá huahuátala rihuá'acana, palá rehuíña'atacale ina'uqué. Uncá na i'imalá ñaque palá pura'acó, palá ripura'acó que —que nemacá najló.

<sup>47</sup> Eyá fariséona quemano najló:

—¿Ñaque caja chi jema'acá pajlácachi ja'apiyá ajopana jema'acá que caja?

<sup>48</sup> Uncá huahuacára'ajeño naquiyana, fariséona naquiyana, quele jema'alaño ilé ta ja'apiyá.

<sup>49</sup> Uncá hue'epílaño Tupana puráca'alo lana'aquejami quemacá que, necaja calé jema'año ra'apiyá. Tupana huajájeri necá, uncá pachá nahue'epíla méqueca ripuráca'alo quemacá —que nemacá najló.

<sup>50</sup> Nicodemo i'imari caja najhua'até. Fariséona naquiyana ri'imacá. Ricá i'imari Jesús chaje lapí júpimi que. Penájeri i'imari najhua'até, napura'acóloje Jesús huajácana nacú penaje. E rimá ajopánajlo:

<sup>51</sup> —Uncá paala huahuajácajla apú majopeja, uncachu huahue'epila na aú ca rila'acá rijluhua pu'uhuaré. Uncá caja huahuajala ricá, uncájica ee huayurí ripura'acó richayo pamineco. Marí que hue'emacana puráca'alo lana'aquejami quemacá —que rimacá najló.

<sup>52</sup> Aú nemá rijló:

—Galilea eyájena pechu que pipechu ta. Majopeja i'imacaño i'imaño rehua. Eco pehuíña'o Tupana puráca'alo lana'aquejami nacú. Raú pihue'epeje méqueca rinacóje. Uncá Tupana puráca'alo ja'apátajeri i'imalajla Galilea eyaje —que nemacá Nicodémajlo.

*Inanaru ñuju'uqueru yucuna marí:*

<sup>53</sup> E caja pajluhuano que napa'acó nañacaré chojé.

## 8

<sup>1</sup> Jesús i'ijnari ají que a'ajná ño'ojó yenuri Olivos ojo.

<sup>2</sup> E muní que lapiyami Jesús pa'aró Tupana ñacaré ojo. Piyuque ina'uqué re i'imacaño jahuacaño rejé richaje. E riyá'o, riqueño'ó nehuíña'atacana Tupana nacú.

<sup>3</sup> Ehuá Tupana nacú jehuíña'atajeño, fariséona, quele huá'año pajluhuájaru inanaru ina'uqué e'iyajó. Caluyo ru'umacá. E'iyonaja nephata ru'umacá rujlapu hua'até la'acana nacú.

<sup>4</sup> E nemá Jesusjlo:

—Huehuíña'atajeri, marirú inanaru ta caluyo rucá. Huajé huamíchaca rula'acá rujlapu hua'até.

<sup>5</sup> Moisesmi chu puráca'alo lana'aquejami quemari huanacu, huenócaloje ñaque la'ajeño jipa ca'acana nachá aú penaje. Marí que Moisesmi chu puráca'alo lana'aquejami huacára'aca huecá. Eyá pijló ta, ¿Meque rinacóje? —que nemacá rijló.

<sup>6</sup> Majopeja nemacá rijló, namácaloje méqueca rimacá raú penaje. Napechu i'imá: “Apala rimaje apojó huajló.” Aú nemajla rinacu: “Pu'uhuaré ripura'acó” que, narucátacaloje ricá nahuacára'ajeñojlo penaje. E caja Jesús acúhua'aro. Riqueño'ó lana'acaje te'erí jimá riyatehuana aú.

<sup>7</sup> Pulapé nemacá ñaque huani rijló. Aú rácho'o tára'ajo pu'ucú, rimá najló:

—Re ca'ajná pajluhuaja maare hue'iyá uncá la'alá pu'uhuaré. Uncá caja rihue'epila rimanaicho la'acana. Ricá ca'ajeri ruchá jipa pamineco —que rimacá najló.

<sup>8</sup> E racúhua'o piño, te'erí jimá lana'ajé.

<sup>9</sup> Rimacá aú najló marí que nahue'epí méqueca nala'acá chapú ajopana. Namanai-cho nala'acare i'imacá iphari napechu nacóje. Raú naqueño'ó pa'acajo pajluhuano,

pajluhuano que. Peñahuilana queño'oñó pa'acajo pamineco. Apú, apú que napa'ataco piyuqueja. Jesusja calé yuriro ricoja ilerú inanaru hua'até.

<sup>10</sup> Ejéchami Jesús jácho'oco piño tára'ajo pu'ucú. E riyacá'c rahua'ó, amari uncá na i'imalá. Rucaja calé ramá. E rimá rojló:

—¿Mere necá quemáño pinacu: “Uncá ina'uquélaru rucá” que? ¿Uncá chi na ca'alacha jipa pichá?

<sup>11</sup> Rumá rijló:

—Hue'amacana, uncá na ca'alacha jipa nuchá.

Jesús quemari rojló:

—Nucá, uncá caja ca'alaje jipa pichá. Chuhua pa'apá. ¡Pema'á! Pila'aniya piño pimanaicho ca'ajno.

*Ina'uqué pechu lamá'atajeri Jesucristo. Riyucuna marí:*

<sup>12</sup> E caja Jesús pura'aró piño ajopana ina'uqué hua'até. Rimá najló:

—Nucá lamá'atari ina'uqué pechu, nahue'epícaloje palá Tupana nacojé raú penaje. Raú ne'emajé hua'ajini huani je'echú chu —que Jesús quemacá najló i'imacá.

<sup>13</sup> E faríseona quemáño rijló:

—Picá pura'aró pinacuhua. Uncá naje calé iná pura'ó ilé que iná nacuhua. Uncá quehuaca calé quele pimacare pinacuhua.

<sup>14</sup> Raú Jesús quemari najló marí que:

—Quehuaca jo'ó numacare nunacuhua. Nupura'ó jo'ó nunacuhua, nuhue'epícale mere eyájeca nucá. Nuhue'epí caja meño'ojoca nu'ujnajica. Eyá icá, uncá hue'epílaño mere eyájeca nucá. Uncá caja ihue'epila meño'ojoca nu'ujnajica.

<sup>15</sup> Ica quemáño ajopana ina'uqué nacú ipechu queja, uncá ihue'epila palá. Eyá nucá, uncá ñaque calé numacá majopeja nacaje ina'uqué la'acare nacú.

<sup>16</sup> Numacachu ina'uqué nacú mecajenaca necá, numacá que necá. Uncá numalá nupechu queja nanacu. Nora'apá huacára'ari nucá majó i'imacá. Ricá hua'até huemacá ñaqueja caja nacaje nacú.

<sup>17</sup> Moisesmi chu puráca'alo lana'aquejami quemari marí que: “Ñaque caja iyamá ina'uqué quemacachu nacaje nacú, iná jema'á napuráca'alo ja'apiyá”, que rimacá i'imacá.

<sup>18</sup> Iyamá huecá quemáño ñaque nunacu. Nucá quemari nunacuhua mere eyájeca nucá. Nora'apá quemari ñaqueja caja nunacu. Ricá huacára'ari nucá majó i'imacá —que Jesús quemacá najló i'imacá.

<sup>19</sup> Eyá nemá rijló:

—¿Mere chi para'apá?

Jesús quemari najló:

—Uncá ihue'epila na ina'uqueca nucá. Uncá caja ihue'epila naca Nora'apá. Ihue'epíquela na ina'uqueca nucá, ñaque caja ihue'epícala naca Nora'apá —que Jesús quemacá najló.

<sup>20</sup> Marí que Jesús jehuíña'ataca necá Tupana ñacaré chu. Pu'uhucá riyá'aco caichama ahua'á, nalamá'atacare chojé liñeru ahua'á. E'iyonaja uncá na calé patarí ricá, naca'acáloje ricá calajeruni chojé penaje. Uncá jo'ó que riphala rená chojé rijló, ritaca'acáloje ina'uqué chaya penaje. Aú calé uncá meño'ojó nala'alá ricá chapú.

*“Uncá meño'ojó i'ijnalaje nu'ujnajica ejo,” que Jesús quemacá najló. Riyucuna marí:*

<sup>21</sup> E caja Jesús quemari piño najló marí que:

—Nu'ujnajica maare eyá, ejomi iculaje nucá. Uncá amálaje nucá. Pu'uhuaré ila'acare hua'atoja icapichajo. Uncá ichaje amácano i'imalaje. Nu'ujnajica ejo, uncá meño'ojó i'ijnalaje —que rimacá najló.

<sup>22</sup> Raú judíona naquiyana quemáño pajlocaca:

—Apala rinójica ca'ajná ricó. Ñaquele rimá huanacu, uncá meño'ojó hue'ejnajaje ri'ijnajica ejo.

<sup>23</sup> Jesús quemari piño najló:

—Maárohua cahuacájena naquiyana icá. Je'echú chiyaje nucá. Marí eja'ahuá chujena icá. Eyá nucá, uncá marí eja'ahuá chujena naquiyana calé nucá.

<sup>24</sup> Ñaque i'imacale numá inacu: Uncá ichaje amácano i'imalaje pu'uhuaré ila'acare liyá, uncalle jema'alá no'opiyá numacare nunacuhua. Pachá icapichajo pu'uhuaré ila'acare hua'atoja —que rimacá najló.

<sup>25</sup> Raú nemá rijló:

—¿Na ina'uqueca picá?

Jesús quemari najló:

—Caja numá ijlo. Nuqueño'ocá jehuíña'atacana huacajé numá nunacuhua ijlo.

<sup>26</sup> Re cajrú nacaje numacáloje rinacu penaje, ihue'epícaloje pu'uhuaré ila'acare nacojé raú penaje. Huacára'ari núcá majó quemari quehuácaje puráca'aloji nacú. Noma'á ra'apiyá puráca'aloji no'opátacare ina'uquejlo —que Jesús quemacá najló.

<sup>27</sup> Tupana, Rara'apá nacú rimacá najló. E'iyonaja uncá judíona hue'epílaño na nacua rimacá najló.

<sup>28</sup> Ñaquele Jesús quemari najló:

—Ina'uquejloje penaje i'imacá núcá. Acúhua'atajica ee núcá a'ahuaná apiyácanami nacojé, ihue'epeje na ina'uqueca núcá. Ihue'epeje caja uncá nula'alá nuhuátaca queja. Ihue'epeje caja Nora'apá huacára'aca que numacá nacaje nacú.

<sup>29</sup> Huacára'ari núcá majó i'imacá, nujhua'até caja ricá. Uncá Nora'apá yurila nocó huani núcá, nula'acale hua'ajini huani nacaje rihuátaca que —que Jesús quemacá najló.

<sup>30</sup> Marí que rimacá aú cajrú ina'uquejlo jema'acá ra'apiyá.

<sup>31</sup> Caja ne'iyajena jema'año ra'apiyá, judíona ne'emacá. E rimá ra'apiyá jema'ajéñojlo marí que:

—Uncaja que iyurí nupuráca'alo a'acana inacojó, nujhua'atéjena jo'ó icá.

<sup>32</sup> Ihue'epí méqueca quehuácaje puráca'aloji quemacá, raú Tupana a'ajeri inaté, i'imacá piyá pu'uhuaré la'acana nacú. Raú i'imajó pu'uhuaré la'acaño huacára'ajeri liyá —que rimacá najló.

<sup>33</sup> Eyá ajopana piño quemano rijló:

—Abrahami chu laquénami huecá. Uncá na calé huahuacára'ajeri. Eta, ¿meque pimacá huanacu, hue'emacóloje pu'uhuaré la'ajeño huacára'ajeri liyá penaje?

<sup>34</sup> Jesús quemari najló:

—Jema'á marí: Namanaicho yá jema'ajéñojlo marí la'ajeño, pu'uhuaré la'ajeño, necá la'año nahuacára'ajeri huátaca que. Ricapi necá. Mahuemiru nacarihuate hua'até sápageño que caja necá.

<sup>35</sup> Sápari mahuemiru ricarihuate hua'até, uncá yurilajo hua'ajini huani riñacaré chu rijhua'até. Ri'irija calé yuréjero ra'apiyá hua'ajini huani rejena hua'até.

<sup>36</sup> Ñaque caja nojló ricá. Tupana i'irí núcá. Nu'umatájica ee icá ihuacára'ajeri liyá, uncá i'imalaje rijhua'atéjena. Raú uncá ila'alaje pu'uhuaré rihuátaca que reyá a'ajná no'ojó. Tupana yaní i'imajé raú.

<sup>37</sup> Caja nuhue'epí Abrahami chu laquénamica icá. E'iyonaja ihuata nonócana, uncale ihuátala nupuráca'alo a'acana inacojó.

<sup>38</sup> Nora'apá huacára'aca que numacá ijlo nacaje nacú. Ñaque caja imacá nacaje nacú jara'apá huacára'aca que caja —que Jesús quemacá najló.

<sup>39</sup> Raú nemá rijló:

—Abrahami chu i'imari huajló huara'apá que. Rilaquénami huecá.

Jesús quemari najló:

—Abrahami chu naquiyánami i'imaquela, ila'ájla rila'ajica que caja.

<sup>40</sup> Quehuaca numacá ijlo: Ripuráca'alo noma'acare Tupana jara'apiyá, ricá no'opata ijlo. E'iyonaja ihuata nonócana. Uncá huani Abrahami chu la'aque ilé que huani.

<sup>41</sup> Re apú jara'apá. Ricá la'arí nacaje, ñaque caja i'ijnataca rápumi chu ricá —que Jesús quemacá najló.

Nemá rijló:

—Huecá hue'epiño naca huara'apá, uncá majopeja mano'ocaño yaní que calé huecá. Cahue'epícanami huara'apá, Tupana ricá —que nemacá rijló.

<sup>42</sup> Eyá Jesús quemari najló:

—Tupana i'imaquela jara'apá, ihuátajla núcá íqui'ija. Tupana i'imacá eyá nu'ujná majó i'imacá. Ñaquele maare núcá me'etení. Uncá nu'ujnalá majó nupechu queja; Tupánaja calé huacára'ari núcá majó i'imacá.

<sup>43</sup> Uncá meño'ojó jema'alá numacare nacú ijlo, uncá ihuátala nupuráca'alo jema'acana. Ñaquele uncá jema'alá ricá.

<sup>44</sup> Jiñá Ch'i'náricana, ricá jara'apá. Rijhua'atéjena icá. Ripachu nacú que caja ila'acá nacaje. Ina'uque nójeri ricá, Jiñá Ch'i'náricana. Caja queja ri'imacá riqueño'ocó huacajé. Uncá riyahua'achilo quehuácaje puráca'aloji hua'até. Uncá huani rimalá quehuácaje puráca'aloji nacú. Ripura'acochu, majopeja ripajlaca, ri'imacale richuhuájeja pajlácachi. Pajlácachina jara'apá huani ricá; pajlácachina huacára'ajeri caja ricá.

<sup>45</sup> Quehuaca numacale ijlo, uncá jema'alá no'opyá.

<sup>46</sup> Uncá pu'uhuaré la'ajeri calé núcá. Aú calé uncá na inaquiyana i'imalá maare, amari nula'acá pu'uhuaré. Quehuaca numacá ijlo. ¿Naje uncá jema'alá no'opyá?

<sup>47</sup> Tupana hua'atéjena jema'año Tupana puráca'alo ja'apiyá. Uncá Tupana hua'atéjena calé icá. Ñaque i'imacale uncá ihuátala ra'apiyá jema'acana —que Jesús quemacá najló.

*Uncá chiyó Abrahami chu i'imá, Jesucristo i'imari. Riyucuna marí:*

<sup>48</sup> Eyá judíona naquiyana quemaño Jesusjlo:

—Huemá pinacu i'imacá: “Samaría eyaje ricá. Jiñá pechu i'imacare e'iyá ricá”, que huemacá pinacu i'imacá. Quehuaca jo'ó huemacá pinacu.

<sup>49</sup> Jesús quemari najló:

—Uncá jiñá pechu i'imalá no'iyá. Nula'á nacaje, ina'uqué pechu i'imacáloje palá Tupana nacú raú penaje. E'iyonaja calé chapú ipechu nunacu.

<sup>50</sup> Uncá nucá calé quemari ina'uqué nacú, napechu i'imacáloje nunacu palá penaje. Re ricá apú, quemari nunacu. Ricá caja quemájeri ina'uqué nacú mecajenaca rijló necá. Nanaquiyana i'imajeño rijhua'até. Eyá ajopana rihuañaje.

<sup>51</sup> Jema'á marí: Uncá tajnácajo penájena calé nupuráca'alo ja'apiyá jema'ajeño i'imajica.

<sup>52</sup> Marí caje aú judíona naquiyana quemaño rijló:

—Quehuaca huani huahue'epica jiñá pechu pe'iyá. Abrahami chu tajnaro i'imacá. Piyuqueja Tupana puráca'alo ja'apátajeñomi chuna taca'ataño caja i'imacá. Eyá picá ta quemari pipuráca'alo nanacojó a'ajeño nacú: “Uncá tajnácajo penájena calé necá” que.

<sup>53</sup> Ajopana chaje huani Abrahami chu i'imacá. Ricá tajnaro i'imacá. ¿Abrahami chu chaje huani chi picá? Ñaqueé caja Tupana puráca'alo ja'apátajeñomi chuna tajnátaco piyuque i'imacá. ¿Meque ca'ajná pipechu pinacuhúa? —que nemacá rijló.

<sup>54</sup> Aú rimá najló:

—Nocó numaquela nunacuhúa palá, uncá na penaje calé ricá ijlo. Ica quemaño Nora'apá nacú: “Huachí'inaricana ricá”. Ricá caja quemari nunacu palá.

<sup>55</sup> Uncá ihue'epila naca Tupana. Nucá calé amari ri'imacá. Numaquela rinacu: “Uncá nomálaré ricá” que, pajlácachina naquiyana nu'umacajla icá que caja. Quehuaca, nucá amari ri'imacá. No'ó nunacojó nacaje rimacare nacú.

<sup>56</sup> A'ajútami chu, Abrahami chu, hue'epiri eja'ahuá chojé iphájeri penaje nu'umacá. Raú pu'ují ripechu i'imacá, rihue'epícale marí que ri'imajica. Ñaquele pu'ují huani ripechu i'imacá raú —que Jesús quemacá najló.

<sup>57</sup> Judíona quemaño piño rijló:

—Uncá jo'ó cincuenta jarechí cha calé picá. Eta, ¿meque la'ajé chi pamácajla Abrahami chu i'imacá?

<sup>58</sup> Jesús quemari najló:

—Jema'á marí: Nucá i'imari pamineco, uncá chiyó Abrahami chu i'imá —que Jesús quemacá najló.

<sup>59</sup> Marí cajé aú najña'á jipa nacápojo, naca'acáloje ricá Jesús cha penaje. E'iyonaja Jesús ata'aró napiyá. E rácho'o Tupana ñacaré chiyá; ne'iyohuaja que ra'apaca. E caja ri'ijná ají que a'ajná ño'ojó nehuami chuhúa que.

## 9

*Jesús a'acá pajluhuaja mejlurú huánijlo amácaje yucuna marí:*

<sup>1</sup> E caja Jesús ja'apari ají que a'ajná ño'ojó. Re ramá apú ina'uqué. Mejlurú huani ri'imacá. Apicháca'aloja rimoto'ocá i'imacá.

<sup>2</sup> E caja ra'apiyatéjena quemaño Jesúsjlo:

—Huehuíña'atajeri, ¿Naje ca'ajná rimoto'ó apicháca'alo? ¿Na la'arí pu'uhuaré, ricá ca'ajná, richí'íná ca'ajná?

<sup>3</sup> —Uncá pu'uhuaré rila'acare pachá calé rimoto'ó ilé que i'imacá —que Jesús quemacá najló—. Uncá caja richí'íná la'alaño pu'uhuaré. Uncá ricá calé apichátari ricá. Ina'uqué amácaloje me'etení méqueca Tupana la'ajica palá huani penaje, rimoto'ó mejlurú i'imacá.

<sup>4</sup> Hue'echú ca'alá japi queja iná la'acá iná sápacala. Lapí uncá meño'ojó iná sácala iná sápacala nacú. Hue'echú ca'alá japi queja huajló ricá, nu'umacale maare. Ñaquele palani tu'ujné huala'acá Nuhucára'ajeri sápacala.

<sup>5</sup> Nu'umacá marí eja'ahuá chu quetana nula'acá nacaje, ina'uqué hue'epícaloje Tupana nacóje raú penaje —que rimacá najló.

<sup>6</sup> Marí que rimacá najló i'imacá. Ejomi ratupá rahui te'erí e'iyajé. Quéchami riquechípa'aca rahui te'erí hua'até. Quéchami ripato'otaca te'erí quechípa'acanami mejlurú huani ijlú chojé.

<sup>7</sup> Ejomi rimá mejlurujlo:

—Chuhua pi'ijná a'apitaquélaji ojo, pipíchachi pijlú chiyá.

—Je —que rimacá.

Aú ri'ijná ají que a'ajná ño'ojó, iphari a'apitaquélaji ojo. Siloé na'acá ríí. “Huacára'acare” que Siloé que quemacana napura'acó chu. E caja riphá rejo. E ripá rijlú chiyá juni aú. Ejomi ripa'ó riñacaré chojé. Quejluni riphaca nanacu.

<sup>8</sup> Riñacaré ahua'á i'imacaño amaño quejluni ricá, mejlurú penájemi. Mejluruja namájicano ri'imajica. Namaca aú ricá quejluni nemá pajlocaca:

—¿Uncá chi ricá calé quele yá'aqueero ina'uqué liyá liñeru quejá'acana nacú?

<sup>9</sup> Ne'iyajena quemañó rinacu:

—A'a, ricá jo'ó quele.

Ajopana piño quemañó rinacu:

—Uncá ricá calé ricá. Ricá que huani amácanami ilé.

Aú mejlurú penájemi quemari najló:

—Nucá po mejlurú penájemi, imacare nacú.

<sup>10</sup> E nemá rijló:

—Eta, ¿meque la'ajé chi pamá me'etení?

<sup>11</sup> Rimá najló:

—Re pajluhuaia ina'uqué, Jesús na'acá rií, ricá li'ichari nucá marí que: Riquechípi'icha te'erí rahui hua'até. Quéchami ripato'ochiyaca ricá nujlú chojé. Rejomi rimicha nojló: “Chuhua pi'ijná a'apitaqueélaji, Siloé ejo, pipíchachi pijlú chiyá”, que rimíchaca nojló. Je. Raú nu'ujichá rejo. Nupicha nujlú chiyá. Ejéchami nomíchaca palá —que mejlurú penájemi quemacá najló.

<sup>12</sup> Nemá rijló:

—¿Mere chi ricá, quele ina'uqué pimá nacú?

—Capí, uncá nuhue'epila —que rimacá najló.

*Fariséona quejá'acare riyucuno mejlurú penájemi liyá yucuna marí:*

<sup>13</sup> Eyá nahuá'a mejlurú penájemi fariséona i'imacá ejo.

<sup>14</sup> Jesús la'acá te'erí quechípa'acanami rahui hua'até huacajé, i'imari nale'ejé huatána'acaje rihuacajé.

<sup>15</sup> E nephá fariséona nacú. Necá caja quejá'año mejlurú penájemi liyá riyucuna. Nemá rijló:

—¿Meque pili'ichaca, pamácaloje penaje?

E rimá najló:

—Pajluhuaia pato'ochiyari nujlú chojé te'erí rahui hua'até quechípa'aquejami. Quéchami nu'ujichaca nujlú chiyá ipaje. Nupicha nujlú chiyá, ejéchami nomíchaca. Ñaquele palá nomaca me'etení.

<sup>16</sup> Raú fariséona naquiyana quemañó ajopánajlo:

—Uncá Tupana hua'ateje calé ricá ja'apáchiyari ricá mejlucaje chiyá. Pamá méqueca rilí'ichaca; risápicha huatána'acaje huacajé. Uncá rema'alá Tupana puráca'alo, Moisesmi chu lana'acare i'imacá, ja'apiya.

Ajopana piño quemañó rinacu:

—Pu'uhuaré la'ajeri ri'imaquela, uncá meño'ojó rila'alajla nacaje uncá meño'ojó ina'uqué la'alare.

Marí caje aú uncá rejenohuaia calé napechu i'imacá rinacu.

<sup>17</sup> Marí que napechu i'imacá aú naquejá'a piño mejlurú penájemi liyá riyucuna. Nemá rijló:

—Picá ta ¿meque pijló quele ja'apáchiyari picá mejlucaje chiyá?

E rimá najló:

—Nojló ricá Tupana puráca'alo ja'apátajeri —que rimacá najló.

<sup>18</sup> Judíona naquiyana pechu nacú ri'imá: “Majojeja ripajlaca ta. Uncá mejlurú huani calé ri'imacá.” Raú nahuá'a richi'iná maná. E nephá rejé nanacu.

<sup>19</sup> E nemá najló:

—¿I'irí chi carí nemá nacú mejlurú ricá? ¿Meque la'ajé chi ramaca me'etení?

<sup>20</sup> Raú richi'iná quemañó najló:

—Huahue'epí marí hue'erí moto'ocá mejlurú i'imacá.

<sup>21</sup> Uncá huahue'epila méqueca rila'acá, ramácaloje penaje. Uncá caja huahue'epila na ina'uqueca ja'apáchiyaca rilíyá mejlucaji. Caja phíyu'ueque cha ricá. Iquejá'a rilíyá riyucuna, ri'imachi ijló riyucuna —que richi'iná quemacá najló.

<sup>22</sup> Marí que richi'iná quemacá najló, nahuó la'acole judíona naquiyana ja'apejé. Caja nahuacára'ajeño quemañó ina'uquejlo marí que i'imacá: “Imájica ee Jesús nacú, ‘Tupana huacára'acare majó ricá’ que, uncá huayurila ijló jahuacácajo huahuacáca'alo ñacarelana chojé.”

<sup>23</sup> Richi'iná huo la'acole judíona naquiyana ja'apejé nemá najló: “Iquejá'a rilíyá riyucuna, caja phíyu'ueque cha ricá” que.

<sup>24</sup> E caja judíona naquiyana huá'año piño mejlurú penájemi maná. Raú ri'ijná piño rejo, iphari nanacu. E nemá rijló:

—Chuhua pi'imá riyucuna hualjó quehuaca, Tupana jimaje que pi'imacá que pi'imacá riyucuna. Huahue'epi quele ina'uqué ja'apáchiyari picá mejlucaji chiyá, uncá ina'uquéleri ta ricá —que nemacá rijló.

<sup>25</sup> E rimá najló:

—Uncá nuhue'epila mecajeca ina'uqué ricá; uncá ina'uquéleri ca'ajná ricá, palájne'equé ca'ajná ricá. Ricaja calé nuhue'epi, ra'apáchiya nuliyá mejlucaji. Uncá huani nomala i'imacá; me'etení caja nomaca palá.

<sup>26</sup> Nemá piño rijló:

—¿Meque huani rilí'ichaca picá i'imichaca? ¿Meque ra'apáchiyaca piliyá mejlucaji?

<sup>27</sup> Rimá najló:

—Caja nu'umichá ijló riyucuna. Uncá huani jema'alá no'opiyá. ¿Naje ta iquejá'a metú que huani riyucuna nuliyá? ¿E ihuátaca rijhua'atéjéna i'imacana?

<sup>28</sup> Raú napura'ó pu'uhuaré rinacu. Nemá rijló:

—Picá ta jema'ajeri ra'apiyá. Eyá hueca jema'año Moisesmi chu puráca'alomi ja'apiyá.

<sup>29</sup> Huahue'epi Tupana pura'acó Moisesmi chu hua'até i'imacá. Eyá ilé pimacare nacú huajló, uncá huahue'epila mere eyájeca ina'uqué ricá.

<sup>30</sup> Marí caje aú mejlurú penájemi quemari najló:

—¡Meque apú caje huani quele imá nacú! Uncá ihue'epila mere eyájeca ricá. ¿Meque la'ajé calé ta ra'apáchiya nuliyá mejlucaje?

<sup>31</sup> Huahue'epi uncá Tupana a'alá rinacojó pu'uhuaré la'acaño puráca'alo, napura'acochu rijhua'até. Eyá ajopana iphaño ra'api. Rihuátaca que la'ajeño necá. Napura'acochu rijhua'até, ra'á rinacojó napuráca'alo. Ra'á nañaté raú.

<sup>32</sup> Uncá huani nemalá apú nacú: “Ricá ja'apátari mejlurú moto'ocá liyá mejlucaji”.

<sup>33</sup> Uncáquela Tupana hua'ateje ri'imalá, uncá na calé rila'ájla —que rimacá najló.

<sup>34</sup> Raú nemá mejlurú penájemijlo:

—Picá ta moto'orí uncá ina'uquéleri penaje i'imacá. Uncá picá ta calé huehuíña'atajeri, pehuíña'atacaloje huecá Tupana nacú penaje —que nemacá rijló.

Marí caje aú naca'á ricá ne'iyayó nahuacáca'alo ñacarelana chiyá. Reyá a'ajná ño'ojó uncá nahuátala ri'ijnacá nachaje nahuacáca'alo ñacarelana chojé.

*Uncá jema'alaño Tupana ja'apiyá mejluruna que caja necá Tupánajlo. Marí riyucuna:*

<sup>35</sup> Marí que nala'acá ri'imacá. Jesús hue'epiri méqueca naca'acá mejlurú penájemi nahuacáca'alo ñacarelana chiyá. E caja a'ajnare que riphácaco rijhua'até. E rimá rijló:

—¿E chí pipechu caphí Tupana i'irí chojé?

<sup>36</sup> Rimá rijló:

—Pimá nojló na ina'uqueca ricá, nupechu i'imachi caphí richojé.

<sup>37</sup> Jesús quemari rijló:

—Nucá po quele numá nacú. Hua'até pipura'ó me'etení.

<sup>38</sup> Marí que rimacá aú mejlurú penájemi tára'aro ri'irúpachi aú Jesús jimaje. E rimá rijló:

—Nuhuacára'ajeri, caphí nupechu chuhua pichojé.

<sup>39</sup> E Jesús quemari piño rahua'á i'imacáñojlo:

—Re ina'uqué naquiyana mejluruna que necá Tupánajlo. Nemá nanacuhuá: “Pu'uhuaré la'acaño huecá”. Ne'emá riyucuna Tupánajlo. Raú ramó nachaje pu'uhuaré nala'acare liyá, ne'emacáloje quejluruna que Tupánajlo raú penaje. Eyá ajopana i'imaño quejluruna que najluehua me'etení. “Uncá huala'alá pu'uhuaré”, que nemacá nanacuhuá. Ñaquele uncá Tupana amalo nachaje pu'uhuaré nala'acare liyá. Raú nayuró mejluruna que Tupánajlo. Marí caje i'imacáloje pu'uhua'acá ina'uquejlo penaje nu'ujná majó i'imacá —que rimacá najló.

<sup>40</sup> Fariséona naquiyana i'imaño Jesús ahua'á. Marí que rimacá aú nemá rijló:

—¿Mejluruna que caja chí huecá?

<sup>41</sup> Raú Jesús quemari najló:

—Ihue'epíquela inacuhuá mejluruna que, uncá Tupana huajálajla icá pu'uhuaré ila'acare pachá. E'iyonaja calé ihue'epi inacuhuá palá la'acaño que, ñaquele pu'uhuaré ila'acare yuriro ijhua'ató. Pachá Tupana huajájeri icá —que Jesús quemacá najló.

## 10

*Jesús i'imari najló yucu, rehuíña'atacaloje necá Tupana nacú raú penaje. Riyucuna marí:*

<sup>1</sup> E caja Jesús quemari najló:

—Jema'á marí: Apú ca'ajná uncá mujlúca'ala ohuéjana corral numaná chojé, piro'oqueji ricá, ata'acachi ricá. Rijjiyo'otá ca'ajná ricá, chiyá rimujlúca'a richojé.

<sup>2</sup> Eyá rinumaná chiyá mujlúca'aca, ohuéjana miná ricá. Nalamára'ajeri ricá.



<sup>3</sup> Rinumaná hua'aphé me'etari nalamára'ajerijlo rinumaná, rimujlúca'acaloje richojé penaje. Rile'ejena ohuéjana hue'epiño nalamára'ajeri núru'upi mejé méqueca rihuá'aca najló. Rihuá'a najló neí aú. Marí que rihuá'aca najló aú neño'ó corral chiyá riloco'opani.

<sup>4</sup> Rihuá'a necá corral chiyá, ejomi ra'apá natucumá. Rile'ejena ohuéjana, quele ja'apaño rápumi chu rihhua'até, nema'acale nalamára'ajeri núru'upi mejé.

<sup>5</sup> Uncá ne'ejnalá apú ápumi chu, uncale namána'apa calé ricá. Neñaacoja ripiyá, nahue'epícale uncá nalamára'ajeri calé ricá. Rinúru'upi mejé aú nahue'epí ricá —que Jesús quemacá najló.

<sup>6</sup> Marí que Jesús i'imacá najló yucu i'imacá. E'iyonaja uncá nahue'epila meque quemacána ricá.

*Jesús lamára'ataca huecá palá yucuna marí:*

<sup>7</sup> E Jesús quemari piño najló:

—Jema'á marí: Rinumaná chiyá ohuéjana mujlúca'año corral chojé. Rinumaná que caja nucá ina'unquejlo. Nupalamane aú namujlúca'aje Tupana i'imacá ejo.

<sup>8</sup> Piyucú nutucumá iphácaño huátaño ina'uqué najluhua najhua'atéjena penaje. Piro'oquéjena necá; ata'acáchina caja necá. Uncá Tupana ja'apiyá jema'ajeño a'alaño nanacójó napurá'alo.

<sup>9</sup> Rinumaná que caja ina'unquejlo nucá, nupalamane aú ina'uqué mujlúca'ajeño Tupana i'imacá ejo. A'ajeño necó nojló, ne'emacáloje nujhua'atéjena penaje, necá nu'umataje capichácajo liyá. Ohuéjana lamára'ajeri amari palá ripirana. Rihuá'a necá na'ajné ejo, najñácaloje najluhua ricá penaje. Ñaqué caja nomaca palá nujhua'atéjena chapú nala'acá piyá. Nacaje nala'acare camu'uji nacú, no'ó najló ricá.

<sup>10</sup> 'Piro'oqueji iphari, rata'acáloje penaje, rinócaloje penaje. Ricapichátacaloje nacaje penaje riphá. Eyá nucá, uncá ñaqué calé. Nucá iphari majó nupechu a'ajé ijlo, palá huani i'imacáloje marí eja'ahuá chu raú penaje. I'imacáloje caja matajnaco je'echú chu raú penaje.

<sup>11</sup> Palá lamára'aca ohuéjana que nucá ina'unquejlo. Palá lamára'aca ohuéjana a'arí ricó capichácajojo ripirana chaya, rimejñátacaloje necá penaje.

<sup>12</sup> Ohuéjana lamá'ajeri hua'até sápara sápari, rijña'acáloje rijluhua risápaca'ala huemí penaje. Ohuéjana amácana nacú apala ramá yahui jeño'ocá ne'iyajé. Aú riñaó reyá, uncá paminá calé ri'imacale. Marí caje aú yahui ja'aró ohuéjana e'iyajé, jeño'ótano macajmala necá.

<sup>13</sup> Rihhua'até sápari ñaaró. Uncá ra'alá ricó capichácajojo nachaya, rimejñátacaloje necá penaje. Ricánacaloje liñeru rijluhua penájeja calé risapa.

<sup>14-15</sup> Uncá ñaqué calé nucá nule'ejena ina'uqué hua'até. Palá nomaca necá. Nora'apá hue'epiri nucá; nucá hue'epiri caja Nora'apá. Ñaqué caja nuhue'epica nule'ejena ina'uqué. Necá hue'epiño caja nucá. Nucá taca'ajeri nachaya.

<sup>16</sup> Re caja ajopana ina'uqué, nule'ejena penájena necá. Uncá jo'ó nujhua'atéjena calé necá me'etení. Nuhuá'aje najló piño, ne'emacáloje nujhua'até penaje. Necá jema'ajeño no'opiyá, raú nohuacátaje necá ajopana nujhua'atéjena hua'até pajlúhua'ó chojé. Nucá, pajluhuaja, amájeri necá.

<sup>17</sup> 'Nora'apá huátari nucá íqui'ija, nutaca'ajícale nujhua'atéjena ina'uqué chaya. Nutaca'ajica ejomi numacápo'oyo piño.

<sup>18</sup> Ajopana ina'uqué nójeño nucá. Uncá meque nala'alajla nucá, uncáquela no'olajla nocó taca'acájeje. Nuhuata nochó yurícana najló, nenócaloje nucá penaje. Caja Nora'apá quemari nunacu, nutaca'acáloje penaje. Rimá caja nunacu, numacápo'ocoloje penaje. Caja queja Nora'apá quemacá nojló i'imacá —que Jesús quemacá najló.

<sup>19</sup> Marí que rimacá aú uncá panacójéhaca calé judíona pechu i'imacá rinacu.

<sup>20</sup> Iqui'iruna ina'uqué quemaño ajopana nanaquiyánajlo:

—¿Naje a'á ripurá'alo inacójó? Jiñá pechu ta re'iyá. Jehuñíami ta ricá.

<sup>21</sup> Eyá ajopana quemaño marí que rinacu:

—Jiñá pechu i'imaquela re'iyá, uncá meño'ojó ripura'alojla ripura'acó que caja. Uncá caja jiñá pechu e'iyari ja'apátala mejlucaji ina'uqué liyá —que nemacá Jesús nacú.

E caja na'apá paliyáca.

*Uncá judíona naquiyana huátalaño Jesús i'imacá yucuna marí:*

<sup>22</sup> Yahuijá e'iyá ne'emá rihuacajé. Jerusalén e na'apata fiesta i'imacá. Júpimi que nachí'inami chuna ñapátaño Tupana ñacaré la'acana rapumi chojé. Chapú nanacu péchuruna cajya'ataño pamineco i'imacare. Rihue'epícana penaje nala'áno fiesta.

<sup>23</sup> Jesús caja ja'apátari fiesta najhua'até i'imacá. E Jesús chira'aró Tupana ñacaré cópíhua. Ricopi richira'acaro chuhua nemá nacú: “Salomón copi ricá.” Rehua Jesús chira'aró.

<sup>24</sup> Ejechami judíona naquiyana jahuacaco rinacójé tujlá que pajimájechaca. E nemá rijló:

—¿Méquetana júpica pimicho'otájica hualiyá na ina'uqueca picá? Picá Tupana huacára'acare majó pi'imajica ee, píma huajló pu'ucuja pinacuhúa, huahue'epichi picá.

<sup>25</sup> Raú Jesús quemari najló:

—Caja numá ijló i'imacá. E'iyonaja uncá jema'alá no'opiyá. Nora'apá a'arí nuñaté, nula'acáloje nacaje uncá meño'ojó apú la'alare penaje. Nacaje nula'acá aú ina'uqué hue'epiño nalá, Tupana huacára'acareca nucá.

<sup>26</sup> E'iyonaja calé uncá huani jema'alá no'opiyá. Uncá nule'ejena ina'uqué calé icá. Ñaquele uncá jema'alá no'opiyá. Caja numá ijló rinacu apú huacajé i'imacá.

<sup>27</sup> Nuhua'atéjena a'año nupuráca'alo nanacojó. Nuhue'epí mécajenaca ina'uqué nu-jhua'atéjena. Nema'á no'opiyá.

<sup>28</sup> Najló calé no'ó cajmuchaji, ne'emacáloje matajnaco je'echú chu raú penaje. Uncá nacapichálajo. Uncá na calé ña'ajeri nucápiya caphí péchuruna nochojó.

<sup>29</sup> Nora'apá Tupana a'arí nojló ina'uqué; nule'ejena penájena necá. Ricá chá'atari piyuqueja ajopana. Ñaquele uncá na calé ña'ajeri necá ricápiya.

<sup>30</sup> Panacojéchaca que huani huécá Nora'apá hua'até —que Jesús quemacá najló.

<sup>31</sup> Marí que rimacá jimaje judíona naquiyana huátaño rinócana. Nahuata jipa ca'acana richá, nenócaloje ricá raú penaje.

<sup>32</sup> E Jesús quemari najló:

—Nula'á cajrú nacaje palani ijimaje, Nora'apá a'acale nuñaté i'imacá. ¿Mecaje apú nula'acare chona ihuata nonócana jipa aú? —que rimacá najló.

<sup>33</sup> Raú judíona naquiyana quemañó rijló:

—Uncá na pila'acare chona calé huaca'ajé jipa pichá. Pu'uhuaré pipura'acó Tupana nacú. Richona huaca'ajé pichá jipa. Ina'uqué jo'ó picá, e'iyonaja pila'á pinacuhúa Tupana que huani —que nemacá rijló.

<sup>34</sup> Aú Jesús quemari najló:

—Tupana puráca'alo lana'aquejami quemari marí que inacu: “Tupana que icá”, que rimacá.

<sup>35</sup> Tupana puráca'alo quemacá que caja ricá. Uncá meño'ojó ri'imalá apojó. Riyuricarenajlo ripuráca'alo nacú rimá: “Tupana que necá”.

Ñaquele uncá naje calé imá nunacu: “Pu'uhuaré la'ajeri ricá” que.

<sup>36</sup> Tupana a'arí nucá, rihuacára'acaloje nucá majó penaje. E'iyonaja, imá nunacu: “Pu'uhuaré ripura'acó Tupana nacú,” numacale ijlo nunacuhúa: “Tupana l'irí nucá” que. ¿Naje imá nunacu: “Pu'uhuaré ripura'acó” que?

<sup>37</sup> Uncachu nula'alá Nora'apá Tupana quemacá que, jema'aniya no'opiyá.

<sup>38</sup> Nula'á nacaje rihuátaca que. E'iyonaja uncá jema'alá no'opiyá. Nula'á Tupana huátaca que. Ila'á quehuaca ricá no'opiyá. Raú ihue'epeje panacojéchaca huani huapechu rijhua'até.

<sup>39</sup> Marí que rimacá aú nahuata piño rijña'acana, naca'acáloje ricá calajeruni chojé penaje. E'iyonaja Jesús i'imaró naliyá.

<sup>40</sup> E caja Jesús cuhuá'ari ají que juni Jordán pa'anajo pitá piño. Juan la'ajica bautizar ina'uqué i'imacá ejo riphá. Re riyuró.

<sup>41</sup> E cajrú ina'uqué i'ijnacá rejo ramaje. Marí que ramájeño quemacá pajlocaca:

—Uncá Juan la'aque nacaje uncá meño'ojó iná la'alare i'imacá. Nacaje rimacare Jesús nacú i'imacá quehuaca ricá —que nemacá.

<sup>42</sup> Ñaquele re cajrú ina'uqué pechu i'imacá caphí Jesucristo chojé.

## 11

*Jesús macápo'oca Lázaromi chu yucuna marí:*

<sup>1</sup> Pajluhuaja ina'uqué i'imari. Rif i'imari Lázaro; pajimila e ri'imacá. Pajimila í Betania. Re caja María, Marta, quele ñacaré i'imacá re. Ne'ehué i'imari Lázaro.

<sup>2</sup> María, Lázaro e'ehueló, la'ayó Jesús marí que i'imacá: Roco'ó pu'umé jamari jilá Jesús j'i'imá nacojé i'imacá. Rejomi rolaca ricá ruhuilá aú rinaquiyá. Marí que rula'acá i'imacá. Rucá penájerumi María i'imacá.

<sup>3</sup> Eyá caja Marta, María, quele e'ehué la'aró ritami i'imacá. Raú re'ehuelona huacára'año Jesusjlo yucu rapunana chu. Marí que nemacá rinacu:

—Hue'emacana, ricá íqui'ija pihuátacare la'aró ritami. Aquíchaje huani ricá me'etení —que nahuacára'aca riyucuna Jesusjlo.

<sup>4</sup> Aú Jesús quemari najló:

—Uncá ritajnálajo ritami caje nacú. Tupana hue'epiri piyuqueja nacaje la'acana. Nucá, Ri'irí, hue'epiri ñaque caja piyuqueja nacaje la'acana. Ina'uqué jema'acáloje riyucuna penaje, rila'ó ritami i'imacá —que rimacá najló.

<sup>5</sup> Palá huani Jesús pechu i'imajica nanacu. Marta, ro'ohueló, ne'ehué Lázaro, quele nacú ripechu i'imaqué palá.

<sup>6</sup> Caja ne'emá rijló riyucuna: “Aquíchaje huani Lázaro,” que nemacá rijló rinacu i'amacá.

E'iyonaja rejo'ocaja jo'ó riyuró iyamá cala quetana.

<sup>7</sup> Quéchami rimacá ra'apiyatéjenajlo:

—Chuhua i'ijná hue'ejnachi piño Judea te'eré ejo.

<sup>8</sup> Raú ra'apiyatéjena quemáño rijló:

—Huehuíña'atajeri, meyale judíona huátaño jipa ca'acana pichá re i'amacá, nenócaloje picá raú penaje. ¿Rejo chi pihuátaca pa'acajo?

<sup>9</sup> E Jesús quemari najló:

—Re mejáma'atani iyamá iphata ji'imaji nacojé quele camú jená quetana pajluhuaja hue'echú. Iná ja'apácachu hue'echú ca'alá japi, uncá iná ji'imá huar'aló nacaje nacojé, mejáma'atani chuhúa iná ja'apácale.

<sup>10</sup> Majojeja iná ja'apácachu lapí iná ja'ó, uncale mejáma'atani i'imalá —que rimacá najló.

(Marí que quemacánaca ricá rimacare nacú: Re hue'echú ca'alá nojló, nula'acáloje nusápaca'ala penaje. Uncá jo'ó riphala noná chojé, nenócaloje nucá penaje.)

<sup>11</sup> Rejomi Jesús quemari ra'apiyatéjenajlo:

—Ricá, íqui'ija huahuátacare, Lázaro, camáchiyaró. Chuhua nu'ujichaca rapótaje —que rimacá najló.

<sup>12</sup> Eyá ra'apiyatéjena quemáño rijló:

—¿Meque quemacánaca chi quele pimá nacú: “Ricamáchiyaco” que? Raú ritejmo'otajlo. ¿Marí que quemacana chi ricá?

<sup>13</sup> Marí que Jesús huátaca ra'apiyatéjenajlo quemacana nacú i'amacá: “Caja Lázaro taca'arí” que.

—E'iyonaja ra'apiyatéjena pechu nacú ri'imá: “Ricamáchiyaco japi, iná camátaco lapí que”.

<sup>14</sup> E pu'ucuja Jesús quemacá najló:

—Caja Lázaromi chu taca'arí.

<sup>15</sup> Pu'ují nupechu, uncale hue'emalá rejo i'amacá. Palani caja ijlo ricá, ihue'epícaloje na la'ajérica nucá raú penaje. Chuhua i'ijná huamíchachi ricá —que rimacá najló.

<sup>16</sup> Raú Tomás, iyamá moto'ocaño naquiyana ri'amacá, quemari rijhuáque'enajlo:

—I'ijná hue'ejnachi rijhua'até rejo, huataca'acáloje rijhua'até rejo penaje.

<sup>17</sup> E caja ne'ejná; iphaño rejo. E ne'emá Lázaromi chu yucuna Jesúsjlo. Nemá rijló:

—Pa'u que cálicha huecá nasa'acá ritami ejomi —que nemacá rijló.

<sup>18</sup> Jerusalén ahua'á pajimila Betania. Iyamá quilómetros eyá, apú quilometro pe'iyojé quetana júcaca reyá ricá.

<sup>19</sup> Cajrú huani judíona i'imaño Marta, María, quele chaje. Napechu pala'ataje ne'ejná rejo, namácale chapú caje yajhué ne'ehuemi chu tajnaco pumí chiyá.

<sup>20</sup> Nemá najló: “Jesús huaícha” que. Aú Marta i'ijnayo ají que a'ajná ño'ojó rijimajo. María, ro'ohueló, yuriyo nañacaré chu.

<sup>21</sup> E caja Marta iphayó Jesús nacú, rumá rijló:

—Pi'imaquela naare, uncá no'ohuemi chu taca'alajla.

<sup>22</sup> E'iyonaja nuhue'epí Tupana la'acá pijló piyuque nacaje piquejá'acare riliyá —que rumacá Jesusjlo.

<sup>23</sup> Jesús quemari rojló:

—Pe'ehuemi chu macápo'ojero piño.

<sup>24</sup> Aú Marta quemayo rijló:

—A'a, nuhue'epicare jo'ó quele pimá nacú. Piyuque ina'uqué caja taca'acaño macápo'ojico huacajé, rimacápo'oyo najhua'até. Eja'ahua íphájica caja penaje rená chojé huacajé, quéchami rimacápo'oyo piño —que rumacá Jesusjlo.

<sup>25</sup> Eyá Jesús quemari piño rojló:

—Ina'uqué caja taca'acaño macápo'otajeri nucá. Ina'uquejlo cajmuchiá a'ajeri caja nucá. Ina'uqué taca'año. E'iyonaja caphí péchuruna nochojé i'imajeño piño —que rimacá rojló—.

<sup>26</sup> Marí que ricá cajmurúnajlo: Nayurícachu nachó nojló, nu'umatácaloje necá Tupánajlo penaje, uncá huani natajnálajo. ¿E chi marí que pijló ricá? —que rimacá rojló.

<sup>27</sup> —A'a, Nu'umacana —que rumacá—. Nuhue'epí Tupana huacára'aca picá majó

Hue'ematájeri penaje. Tupana I'irí picá. Caja queja Tupana pechu nacú ri'amacá, pi'amacáloje marí eja'ahua chu penaje —que rumacá rijló.

*Jesús iyaca Lázaromi chu yucuna marí:*

<sup>28</sup> E caja Marta pa'ayó María maná huá'aje. Me'echú rumacá rojló:

—Caja Jesús íphíchari. Rihua'ícha pimaná.

<sup>29</sup> Marí que rumacá aú María jácho'oyo, i'ijnayo ají que Jesús amaje.

<sup>30</sup> Ejo'ocaja ri'imá pajmíla ahua'ája. Marta iphátaca ri'imacá eja.

<sup>31</sup> Ruñacaré chu i'imacaño amaño María jácho'oco. Namá ro'opaca peyajhué a'ajná ño'ojó. Ruñacaré chu ne'emá najhua'até, napala'atácaloje napechu penaje. Namaca aú ru'ujnacá ají que a'ajná ño'ojó ne'ejná rópumi chu. Napechu i'imá: "Támijimina ca'aquelana ejo japi ru'ujchaca ro'ohuemi chu iyaje."

<sup>32</sup> E caja María iphayo Jesús i'imacá ejo. E rutára'o ru'urúpachi aú Jesús ji'imá nacojé. E rumá rijló:

—Pi'imaquela maare, uncá no'ohuemi chu tajnálojla —que rumacá rijló.

<sup>33</sup> Raú Jesús ja'amari re'iyohuá. Ramá ruyaca cajrú. Ñaque caja ramaca rujhua'até i'ijnacaño iyaca. Aú camu'uji huani ripechu la'acó najhua'até.

<sup>34</sup> —¿Méreje que nato'otaca Lázaroni chu tami? —que rimacá najló.

—Pi'ijná huajhua'até, pamíchachi ritami.

—Je —que.

<sup>35</sup> E caja nephá rejo. E Jesús iyari Lázaroni chu.

<sup>36</sup> Raú judíona quemano pajlocaca:

—Pa. Meque íqui'ija huani rihuátaca Lázaroni chu i'imacá.

<sup>37</sup> Ne'iyajena quemano rinacu marí que:

—Ríca lamá'atari mejluruna, namácaloje palá penaje. ¿Uncá meño'ojó chi rila'alajla nacaje i'imacá, Lázaroni chu taca'acá piyá? —que nemacá rinacu.

<sup>38</sup> Riyúcha'aco a'acuhuaná Jesús ja'amari re'iyohuá. E ri'ijná támijimi a'acuna ahua'ajé. Ulahuí chu, jipa e'iyá ritami to'oró. Caja netá támijimi cha cajruni jipa aú i'imacá.

<sup>39</sup> E Jesús quemari najló:

—Jatachiya jipa ají ño'ojó pani rinumaná eyá.

Raú Marta, Lázaroni chu e'ehuelomí, quemayo Jesusjlo:

—Yee, apala pu'uhuareni ca'ajná rama yá'aco richu. Caja pa'u que cálichá huecá ritaca'acá i'imacá ejomi —que rumacá rijló.

<sup>40</sup> E'iyonaja Jesús quemari rojló:

—Caja numícha pijló maapami: "Caphí pipechu i'imajica ee Tupana chojé, pamájica Tupana la'acá palá huani" —que rimacá rojló.

<sup>41</sup> E caja natatá jipa rinumaná eyá. E Jesús yacá'aro je'echú chojé. Rimá Tupánajlo:

—Nora'apá, palá pili'ichaca nucá, pema'acale nupura'acó pijhua'até.

<sup>42</sup> Nuhue'epí hua'ajini pema'acá nupura'acó pijhua'até. Mariruna ina'uquéjloje penaje nupura'ó pijhua'até me'etení, nahue'epícaloje pihuacára'acare nucá majó i'imacá —que rimacá Tupánajlo.

Marí queja calé rimacá rijló i'imacá.

<sup>43</sup> Ejomi rahuíyo'oco rimacá:

—Lázaro, chuhua pácho'o majó liri chiyá. Pi'ijná majó —que rahuíyo'oca támijimijlo i'imacá.

<sup>44</sup> Aú ja Lázaro jácho'oro majó. Riyáte'ela, ri'imá, quele i'imari mapíra'ataqueja a'arumacaji jítami aú. Apára'aqueja rijimá i'imacá a'arumacaji aú. E Jesucristo quemari najló:

—Chuhua ihuicho'otá rinaquiyá ríca, ra'apachi.

—Je —que.

E nahuicho'otá ríca. Ejomi ra'apá.

<sup>45</sup> Jesús macápo'ori Lázaro i'imacá. Marí caje aú cajrú judíona pechu i'imacá caphí Jesús chojé. María hua'até i'ijnacaño ne'emacá. Jesús macápo'oca Lázaro amájeño ne'emacá.

<sup>46</sup> Quéchami ne'iyajena i'ijnacá ají que fariséona naquiyana amaje, ne'emacáloje méqueca namaca Jesús macápo'oca Lázaro yucuna najló penaje. E caja nephá nanacu. E ne'emá najló riyucuna.

<sup>47</sup> Fariséona, sacerdotena huacára'ajeño, quele i'imaño re. Ne'emá najló riyucuna. Ejomi nahuacaco nachaje huacára'ajeño hua'até. E nanaquiyana quemano ajopánajlo:

—¿Meque ta huala'ajica quele ca'ajná ina'uqué? Cajrú rila'acá nacaje uncá meño'ojó ina'uqué la'alare. Ina'uqué pechu i'imacáloje caphí richojé raú penaje rila'á ríca.

<sup>48</sup> Uncájica ee huetá rapu rilíyá, piyuque ina'uqué pechu i'imajla caphí richojé. Marí cajé jimaje ca'ajná Roma eyájena huacára'ajeño la'ajeño huecá chapú. Nahuacára'aje ca'ajná surárana majó, nacapichátacaloje huecá penaje. Tupana ñacaré hua'ató ca'ajná nacapichátaje —que nemacá najló.

<sup>49</sup> Apú i'imari najhua'até. Rii i'imari Caifás. Sacerdotena huacára'ajeri ri'imacá rihuacajé. Na'á ri'imacá, ri'imacáloje nahuacára'ajeri pajluhuaja jarechí quetana penaje. E rimá najló:

—Uncá huani ihue'epila ta.

<sup>50</sup> Pajluhuaja ina'uqué taca'ajeri huachaya, huacapichaco piyá piyuque huani. Marí palani huajló —que rimacá najló.

<sup>51</sup> Uncá ripechu queja calé Caifás quemacá marí que. Ri'imacáloje nahuacára'ajeri pajluhua ja jarechí quetana penaje na'á ri'imacá. Nahuacára'ajeri ri'imacale, Tupana quemari rijló rinacu. Raú rihue'epí Jesús taca'ajica Israelmi chu laquénami chaya.

<sup>52</sup> Rihue'epí caja uncá nacháyaja calé ritaca'ajé. Tupana hua'atéjina penájena chaya caja ritaca'ajé. Ajopana te'eré nacú i'imaña cajena hua'ató chaya ritaca'ajé. Tupana hua'atéjina i'imañaloje pajluhua ja pi necá que pajhua'atéchaca raú penaje.

<sup>53</sup> Ñaque i'imacale reyá a'ajná ño'ojó judíona huacára'ajeño pura'año pajhua'atéchaca, nahue'epícaloje méqueca nenócaja Jesús penaje.

<sup>54</sup> Marí caje aú uncá Jesús ja'apala pu'uhucá huani judíona e'iyohuá. Rácho'o nate'eré eyá, Judea te'eré eyá. I'ijnari ají que a'ajná ño'ojó apú pajmíla Efraín ejo. Pu'uteni chu ricá pajmíla. Re riyuró ra'apiyatéjina hua'até.

<sup>55</sup> E caja yehuicha nephaca fiesta la'acana ja'apejé. Pascua fiesta íi i'imacá. Marí caje aú cajrú ina'uqué i'ijñaño Jerusalén ejo, nalamá'atacaloje napéchuhua Tupánajlo penaje. Uncá chiyó fiesta iphá rená chojé, nalamá'atano napéchuhua Tupánajlo, napechu i'imacáloje palá raú Tupana nacú penaje.

<sup>56</sup> Cajrú ne'emacá Jerusalén e. E caja naculá Jesús re. Tupana ñacaré chu ne'iyajena pura'año pajhua'atéchaca Jesús nacú. Nemá apujlo, apujlo que:

—¿Meque pipechu nacú ricá? ¿E ri'ijnajica majó fiesta ja'apátaje, uncá ca'ajná?

<sup>57</sup> Caja fariséona, sacerdotena huacára'ajeño, quele quemaño piyuqueja ina'uquejlo marí que i'imacá:

—Amájica ee Jesús, eco i'imá riyucuna huajló, huapachiyachi ricá.

## 12

*Pajluhuájaru inanaru aco'ocá nacaje jilá Jesús ji'imá nacojé yucuna marí:*  
(Mt 26.6-13; Mr 14.3-9)

<sup>1</sup> Pajluhua cuhuá'ata que cala yuriro napé, nephácaloje nale'ejé fiesta ja'apejé penaje. Pascua fiesta íi. E caja Jesús i'ijnari ají que Betania ejo. Lázaro, Jesús macápo'ocare i'imacá, ricá ñacajela ejo ri'ijná.

<sup>2</sup> Riñacaré chu nala'á a'ajnejí Jesús piyana i'imacá. Raú ne'ejná reja na'ajnehuá aññaje. Marta tamáca'atayo najló a'ajnejí. Ajopana ajñaño caja na'ajnehuá re najhua'até. Ne'iyá Lázaro i'imari.

<sup>3</sup> Caja ne'emá na'ajnehuá aññacana nacú. E'iyohuá que María i'ijnacá Jesús jimajo. Nacaje jilá i'imari rucapi pe'iyó litro que. Pu'umé jamarí ri'imacá; nardo, nacaje jilá íi i'imacá. Cahuemini huani ri'imacá. E caja María aco'oyó ricá Jesús ji'imá nacojé. Ejomi rumacára'a ricá ruhuilá aú. Rama moco'oró piyuque pají chuhuá.

<sup>4</sup> Re caja Judas Iscariote i'imari. Simonmi chu i'irimí ri'imacá; Jesús ja'apiyatéjina nauquiyana ri'imacá. Ricá a'arí Jesús pinánajlo ricá, nenoca ri'imacá huacajé. Ri'imá najhua'até. Ramaca aú rula'acá ilé que, rimá ajopánajlo:

<sup>5</sup> —Cahuemini huani ta cari. Trescientos denarios rihuemí. ¿Naje uncá ro'olá ajopánajlo ricá, rujña'acáloje rujluhua liñeru penaje, ro'ocáloje camu'ují la'acaño ñaté raú penaje? — que rimacá najló.

<sup>6</sup> Majopeja Judas quemacá ilé que runacu, ata'acachi ri'imacale. Uncá rihue'epila camu'ují la'acaño mu'ují i'imacá. Jesús ja'apiyatéjina liñéroute lamá'atajeri ri'imacá. E'iyonaja uncá rilamá'ataque najló ricá; rata'aqueno rijluhua rinaquiyana.

<sup>7</sup> Marí que rimacá aú Jesús quemari rijló:

—Reja ru'umare. Rulamá'ata nacaje jilá nasa'ajica nutami huacajé penaje.

<sup>8</sup> Camu'ují la'acaño i'imajeño ijhua'até ñaqueja. Eyá nucá, uncá nu'umalaje ijhua'até ñaqueja huani maare —que rimacá najló.

*Nahuátaca Lázaro nócana yucuna marí:*

<sup>9</sup> Yucu i'imari: “Jesús i'ijnari Betania ejo” que. Cajrú judíona jema'año riyucuna. Aú ne'ejná reja Jesús amaje. Nahuata caja Lázaro amácana, ricá Jesús macápo'ocare i'imacá.

<sup>10</sup> Ñaquele sacerdotena huacára'ajeño pechu nacú ri'imá, nenócaloje Lázaro penaje.

<sup>11</sup> Jesús macápo'oca ricá ejomi cajrú judíona pechu i'imacá caphí Jesús chojé. Rilanaquiya nayurí sacerdotena huacára'ajeño ja'apiyá jema'acana. Marí caje jimaje nahuata Lázaro nócana i'imacá.

*Jesús iphaca Jerusalén e'iyajé yucuna marí:*

(Mt 21.1-11; Mr 11.1-11; Lc 19.28-40)

<sup>12</sup> Caja cajrú ina'uqué i'ijnacá Jerusalén ejo fiesta la'ajé. Pascua fiesta íi. Nahue'epí muní que Jesús iphájica pajmíla e'iyajé.

<sup>13</sup> Raú ne'ejná re'iyohuá huejirí huirulá mata'acana nacú. Ejomi nácho'o pajmilla eyá; i'ijnáño ají que a'ajná ño'ojó rijimajo; iphácaño rijhua'até iñe'epú chu. Marí que nahuíyo'otaca ricá:

—Palájne'equé huani Tupana je'echú churí. Palájne'equé huani caja ricá Tupana huacára'acare majó. Palani huani Israelni chu laquénami huacára'ajeri —que nahuíyo'otaca ricá.

<sup>14</sup> E caja Jesús iphátari cahuarú caje. E reño'ó ranapeje yá'ajo, ra'apácaloje rinacu pajmilla ejo penaje. Raú rila'á Tupana puráca'alo lana'aquejami quemacá rinacu i'imacá que. Marí que lana'aquejami quemacá Jerusalén nacú i'imacá:

<sup>15</sup> Jerusalén eruna, iquero'oníyo.

Icá amájeño lhuacára'ajeri iphaca majó cahuarú caje nacú.

<sup>16</sup> Rihuacajé Jesús ja'apiyatéjena uncá hue'epilaño meque quemacánaca marí que rimacá rinacu. Nacúhua'ataca Jesús a'ahuaná apiyácanami nacú i'imacá ejomi nahue'epí ricá. Nahue'epí caja Tupana puráca'alo lana'aquejami quemacá rinacu i'imacá marí que. Jupichúnami lana'año riyucuna marí que i'imacá. Ricá chuhuaja ri'imá i'imacá.

<sup>17</sup> Jesús macápo'oca Lázaro huacajé cajrú ina'uqué i'imacá rijhua'até. Nema'á rahuíyo'oca rijló, rácho'ocoloje majó liri chiyá penaje. Jesús macápo'oca ricá amájeño i'imaño riyucuna ajopánajlo, ajopánajlo que.

<sup>18</sup> Aú ne'ejná Jesús ejo, nahue'epícale rila'acá nacaje uncá meño'ojó ina'uqué la'alare.

<sup>19</sup> E Jesús ja'apari cahuarú caje nacú. E fariséona amaño ricá iphaca pajmilla e'iyajé cajrú ina'uqué hua'até. Raú napura'ó pajhua'atéchaca necámica que. Nema'á pajlocaca:

—Chuhua nacá meque huala'alá. Iyacá'o, rijhua'até huánija chuhua ina'uqué.

*Griégona naquiyana culaca Jesús yucuna marí:*

<sup>20</sup> Cajrú ina'uqué i'ijnáño Jerusalén ejo i'imacá, napechu i'imacáloje pu'ují Tupana nacú fiesta huacajé penaje. Re caja griégona naquiyana i'imaño.

<sup>21</sup> E ne'ejná apú Jesús ja'apiyateje ahua'ajé, Felipe ahua'ajé. Pajmilla Betsaida eyaje ri'imacá. Galilea te'eré nacú ricá pajmilla. Nephá Felipe nacú. E nema'á rijló:

—Pila'á huajló nacaje. Pihuá'a huecá Jesús ejo, huahuata ramácana.

<sup>22</sup> Raú Felipe i'ijnari riyucuna i'imajé Andresjlo. Ejomi necá iyamá i'ijnáño riyucuna i'imajé Jesusjlo.

<sup>23</sup> E ne'emá riyucuna rijló. Jesús quemari najló:

—Caja riphá rená chojé, Tupana la'acáloje nucá ajopana chaje huani penaje. Ina'uquéloje penaje i'imacá nucá.

<sup>24</sup> Jema'á marí: Uncachu iná ejátala nacaje icha ijí, pajluhuaja riyurico ricoja. Eyá iná ejátacachu ricá te'erí e'iyajé, ricapichaco queja rila'acó. Quéchami riphaca. Pajluhuaja rijí naquiyá iphaca, ricá a'arí cajrú richahuá. Naqué caja nucapichájico, cajrú nujhua'atéjena i'imacáloje raú penaje.

<sup>25</sup> Re ina'uqué, hue'epiño caí nanacuhá. Nahuata pajimato ina'uqué pechu i'imacá palá nanacu. Aú calé uncá nahuátala nujhua'atéjena i'imacana. Marí que hue'epiáño caí nanacuhá capichájéño Tupana liyá. Eyá uncá hue'epilaño caí nanacuhá ilé que, i'imajeño matajnaco je'echú chu nujhua'até.

<sup>26</sup> Nojló nacaje la'ajeño jema'año no'opiya. Ne'emajé caja nu'umajica ejo nujhua'até. Palá huani Nora'apá la'ajica necá, la'año nojló nacaje —que Jesús quemacá najló.

*Jesús i'imacá ritaca'acá yucuna najló yucuna marí:*

<sup>27</sup> —Chuhua nomájica chapú chaje yajhué. ¿Meque numájica Nora'apajlo rinacu? ¿E numájica rijló: “Pi'imatá nucá chapú caje i'imajicare nunacu liyá?” Uncá numalaje ilé que rijló. Ricá penaje huani nuphá majó i'imacá —que rimacá najló.

<sup>28</sup> E ripura'ó Tupana hua'até. Rimá rijló:

—Pa'ayú, pila'á nacaje ina'uqué pechu i'imacáloje palá pinacu raú penaje.

Ejéchami re i'imacaño jema'acá Tupana pura'acó rijhua'até je'echú chiyá majó. Rimá Jesusjlo:

—Caja nula'á nacaje palani, ina'uqué pechu i'imacáloje palá nunacu raú penaje. Chuhua piño nula'ajica apú nacaje, napechu i'imacáloje pu'ují nunacu raú penaje —que Tupana quemacá rijló.

<sup>29</sup> Ina'uqué, re i'imacaño, jema'año ripura'acó rijhua'até. Uncá nema'alá ricá palá. Ne'iyajena quemano ajopánajlo:

—¿Pichaní chí majáqui'icharo?

Ajopana quemano rinacu:

—Tupana hua'atéjeri, je'echú chiyaje, puri'icharo rijhua'até je'echú chiyá.

<sup>30</sup> E caja Jesús quemari najló:

—Uncá nojló penaje calé rimicha ilé que nojló. Ijló penaje rimicha ilé que.

<sup>31</sup> Chuhua Tupana huajájica nucá ina'uqué chaya. Pu'uhuaré nala'acare chona, namanai-cho nala'acare chona, rihuajaje nucá. Reyá a'ajná ño'ojó uncá Jiñá Ch'i'ináricana i'imalaje nahuacára'ajeri.

<sup>32</sup> Nacúhua'ataje nucá a'ahuaná apiyácacanamí nacojé. Rejomí nulamá'ataje cajrú ina'uqué pechu, ne'emacáloje nujhua'atéjena raú penaje —que rimacá najló.

<sup>33</sup> Marí que rimacá aú ina'uqué hue'epiño méqueca ritaca'ajica.

<sup>34</sup> Raú nemá rijló:

—Huema'á napura'acó Tupana puráca'alo lana'aquėjami hua'até huajló, ricá Moisesmi chu lana'acare i'imacá. Ricá quemari ina'uqué i'imatájeri nacú: “Uncá tajnácajo penaje calé ricá”, que rimacá. E'iyonaja picá quemari pinacuhúa: “Nacúhua'ataje nucá a'ahuaná apiyácacanamí nacojé. Nucá i'imari ina'uquéloje penaje”. Pitaca'ajé a'ahuaná apiyácacanamí nacú. Uncá ca'ajná picá calé picá, Tupana puráca'alo lana'aquėjami quemacare nacú.

<sup>35</sup> Jesús quemari najló:

—Nula'á nacaje e'iyohúa. Nohuíña'ata caja icá palá Tupana nacú, ihue'epícaloje Tupana nacojé raú penaje. Mequetánaja nu'umajica ijhua'até. Jema'á no'opiyá icapichaco piyá Tupana liyá. Necá uncá jema'alaño no'opiyá, uncá hue'epílaño meño'ojoca ne'ejnajica.

<sup>36</sup> Nunacojé ihue'epí Tupana nacojé. Ipechu i'imá nochojé caphí nu'umacá ijhua'até quetana maare. Raú i'imajé nujhua'atéjena —que Jesús quemacá najló.

E ri'ijnaña necá; rata'ó napiyá.

*Judiona quemáño nájeca uncá napechu i'imalá caphí Jesús chojé. Riyucuna marí:*

<sup>37</sup> Jesús la'arí cajrú nacaje uncá meño'ojó ina'uqué la'alare. E'iyonaja uncá ina'uqué pechu i'imalá caphí richojé.

<sup>38</sup> Isaíasmi chu quemacá nanacu júpimi que, ñaqueja ne'ejnataca ricá. Tupana puráca'alo ja'apátajeri ri'imacá. Marí que rilana'acá riyucuna i'imacá:

“Hue'emacana, uncá na'alaje nanacojé huapuráca'alo.

Namaje meque piyuque huánica Tupana la'acá.

<sup>39</sup> E'iyonaja uncá na'alaje nanacojé huapuráca'alo,” que rilana'acá i'imacá.

Isaíasmi chu lana'arí apa'amá piño marí que:

<sup>40</sup> “Tupana la'ajeri necá mejluruna que penaje.

Rila'ajé caja necá ijnú, nahue'epica piyá meque quemacánaca nacaje rila'acare.

Marí que rila'ajica necá, nayurica piyá necó Tupánajlo, rilamá'atacaloje napechu raú penaje,” que rilana'acá júpimi que i'imacá.

<sup>41</sup> Marí que Isaíasmi chu quemacá i'imacá, rihue'epícale meque cajrú huánica Jesús la'ajica nacaje. Aú calé ri'imá riyucuna najló i'imacá.

<sup>42</sup> Cajrú judiona naquiayana pechu i'imacá caphí Jesucristo chojé i'imacá. Nahuacára'ajeño naquiayana pechu hua'ató i'imari caphí richojé. E'iyonaja uncá ne'emalá riyucuna ajopana ina'uquejlo, naquero'ocolo fariséona piyá, Uncá ne'emalá riyucuna ajopánajlo, fariséona ca'acá piyá necá nahuacáca'alo ñacarelana chiyá. Nahue'epíquela Jesucristo ja'apiyá jema'ajeño ne'emacá, naca'ajla necá richiyá.

<sup>43</sup> Nahuata Tupana pechu i'imacá palá nanacu. E'iyonaja richaje íqui'ica nahuátaca ajopana ina'uqué pechu i'imacá palá nanacu.

*Tupana huajájica necá uncá a'alaño nanacojé Jesús puráca'alo yucuna marí:*

<sup>44</sup> E caja mejri Jesús quemacá marí que najló:

—Caphí ina'uqué pechu i'imacachu nochojé, caphí caja napechu Nora'apá chojé raú. Huacára'ari nucá majó ricá.

<sup>45</sup> Nomájeño amána'apa nucá. Necá caja amána'apa ricá huacára'ari nucá majó.

<sup>46</sup> Nohuíña'ata icá quehuacaje puráca'aloji nacú. Marí caje penaje nuphá eja'ahuá chojé i'imacá, caphí nochojé péchuruna i'imacá piyá pajlácaje puráca'aloji ja'apiyá. Nuphá majó, ne'emacá piyá pu'uhuaré la'acana nacú.

<sup>47</sup> Apala ina'uqué jema'año nupuráca'alo. E'iyonaja uncá na'alá nanacojé ricá. Uncá nucá calé huajájeri necá richona. Uncá nuphala majó ina'uqué huajájeri penaje. Nu'umatácaloje necá capichácajo liyá penaje nuphá majó i'imacá.

<sup>48</sup> Riphájicaja rená chojé caja penaje huacajé, Tupana huajájeri necá, unca pachá ina'uqué a'alaño nupuráca'alo nanacojé. Uncá huátalaño nucá, uncá caja a'alaño nupuráca'alo nanacojé, cajena rihuajaje.

<sup>49</sup> Uncá nupura'alo nupachu queja. Nora'apá, Nuhuacára'ajeri, huacára'ari nupura'acó nacaje nacú. Rihuacára'a caja nohúña'ataca ina'uqué rinacu.

<sup>50</sup> Iná hue'epícaloje Nora'apá puráca'alo nacojé, iná hue'epí méqueca iná la'acá, iná i'imacáloje matajnaco je'echú chu raú penaje. Ñaquele numá ijlo nacaje nacú Nora'apá huacára'aca que —que Jesús quemacá najló.

## 13

*Jesús ipacá ra'apiyatéjema ji'imá naquiyá yucuna marí:*

<sup>1</sup> Pajluhua cala yuriro ejo'ocaja natucumá, nephácaloje nale'ejé fiesta chojé penaje. Pas-cua fiesta íi. Jesús hue'epiri yehuicha riphaca rená chojé, rácho'ocoloje marí eja'ahuá chiyá penaje, ri'imacáloje Rara'apá hua'até penaje. Ñaqueja Jesús huátaca íqui'ija ra'apiyatéjema maare eja'ahuá chu ri'imacá quetana. Ri'ijnacá yámona rila'á piño nacaje najló, nahue'epícaloje raú íqui'ica rihuátaca necá penaje. Riyucuna marí:

<sup>2</sup> E caja apú huacajé piño, lainchu Jesús, ra'apiyatéjema hua'até ajñaño na'ajnehuá. Judas Iscariote i'imari caja najhua'até. Simonmi chu i'irimi ri'imacá. Najñaaca na'ajnehuá ee, Jiñá Ch'i'ináricana pechu ja'aró Judas e'iyajé. Raú ripechu la'aró apú que, ra'acáloje ripinánajlo Jesús penaje.

<sup>3</sup> Jesús hue'epiri Rara'apá a'arí ri'imacá, ri'imacáloje piyuque ajopana chaje huacára'ajeri penaje. Rihue'epícare caja Tupana eyá riphaca, rejo ripa'ajico piño.

<sup>4</sup> E caja najña na'ajnehuá ra'apiyatéjema hua'até. E'iyohuá que Jesús jácho'oco. Rica'á richáyaje ra'arumacá rinaquiyó. Ejomi repo'ó ricó rihuachaphí chiyá tohuaya aú.

<sup>5</sup> Rejomi raco'ó juni pachiya chojé. Quéchami riqueño'ocá ra'apiyatéjema ji'imá naquiyá ipacana. Ripá ne'emá naquiyá pajluhuano que. Ñaqué caja rimacára'aca ne'emá rihuachaphí chiyaje tohuaya aú.

<sup>6</sup> Ehuá riphaca Pedro ji'ilaje. Ripajla ri'imá naquiyá. Aú Pedro quemari rijló:

—Nuhuacára'ajeri, ¿E pihuátaca nu'umá naquiyá ipacana?

<sup>7</sup> Jesús quemari rijló:

—Me'etení uncá pihue'epila méqueca nula'acá. Rejomi pihue'epeje ricá —que rimacá Pédrojlo.

<sup>8</sup> Aú Pedro quemari rijló:

—Uncá pipalaje nu'umá naquiyá.

Jesús quemari rijló:

—Uncaja que nupá pi'imá naquiyá, uncá caja pi'imalaje nujhua'ateje.

<sup>9</sup> Raú Simón Pedro quemari rijló:

—Nuhuacára'ajeri, pipá nu'umá naquiyá, nuyáte'ela chiyá, nuhuíla'aru naquiyá, quele — que rimacá Jesusjlo.

<sup>10</sup> Jesús quemari najló:

—Hujé a'apitacá uncá naje calé ra'apitajla piño. Ri'imá naquiyaja ipacana palani, piyuqueja rinapona i'imacáloje mapisaru raú penaje. Ñaqué caja nula'acá ina'uqué pechu. Nuca'á pu'uhuareni napechu naquiyá, ne'emacáloje palá péchuruna raú penaje. Caja nuca'á ipechu naquiyá pu'uhuaré ila'acare. Palá péchuruna ícá chuhuaca. Pajluhuaja calé maare huajhua'até, uncá palá péchuri calé ricá. Pu'uhuaré la'ajeri jo'ó ricá —que Jesús quemacá najló.

<sup>11</sup> Rihue'epí mecajeca a'ajica ripinánajlo ricá. Aú calé rimá: “Pajluhuaja calé uncá palá péchuri calé ricá. Pu'uhuaré la'ajeri jo'ó ricá.”

<sup>12</sup> Jesús ñapátari ne'emá naquiyá ipacana. Ejomi ra'á rinacuhuá ra'arumacá richaje. Ejomi riyá'ó piño najhua'até. E rimá najló:

—¿E ihue'epica na nacuca nohuíña'achiya ícá ji'imá naquiyá ipacana aú?

<sup>13</sup> Ícá quemaño nunacu: “Huehuíña'atajeri” que, “Hue'emacana” que. Marí que nunacu quemacana palani, ñaqué nu'umacale.

<sup>14</sup> Jehuíña'atajeri nucá; ihuacára'ajeri caja nucá. E'iyonaja nupicha ji'imá naquiyá. Ijhua'até sápa'ajeri queja nuli'ichaca nunacuhuá. Marí que caja ila'ajica pecohuácaca. Ipajica pe'emáchaca naquiyá.

<sup>15</sup> Caja amicha méqueca nuli'ichaca palá, ñaqué caja ila'acáloje raú penaje.

<sup>16</sup> Jema'á marí: Iná sápacachu apujlo, uncá iná carihuate chaje calé iná i'imacá. Iná sápacare hua'até, ricá i'imari iná chaje.

<sup>17</sup> Caja ihue'epí meque quemacánaca numacare nacú ijlo. Ila'ajica ee ricá i'imajé palá.

<sup>18</sup> Uncá piyuque inaquiayana calé numá nacú. Nuhue'epí mecajenaca nu'uhuapacárena nujluhua. Re pajluhuaja, Tupana puráca'alo lana'aquejami quemacá rinacu queja ri'imajica. Marí que rimacá rinacu: “Ajñari ra'ajnehuá nujhua'até, chapú ramaca nucá”.

<sup>19</sup> Numacare nacú, numá nacú ijlo ri'imajica yámona. Ri'imajica ee, ihue'epeje Tupana huacára'acare majó nucá.

<sup>20</sup> Jema'á marí: Ina'uqué huátajica ee íqui'ija nujhua'atéjema, necá caja huátajeño nucá. Huátajeño nucá, huátajeño caja Nuhuacára'ajeri —que Jesús quemacá najló.

*Jesús quemari Judas nacú: “Ricá a'ajeri nupinánajlo nucá.” Riyucuna marí: (Mt 26.20-25; Mr 14.17-21; Lc 22.21-23)*



<sup>21</sup> Marí que rimacá najló ejomi camu'ují huani ri'ijnataca ripéchuhua. Raú pu'ucuja rimacá najló:

—Jema'á marí: Re pajluhuaja inaquiyana maare huajhua'até, ricá a'ajeri nupinánajlo nucá.

<sup>22</sup> Marí que rimacá najló aú ra'apiyatéjena ijlú jeño'otaro pachájecaca. Uncá nahue'epila mecajeca nanaquiyana rimacare nacú.

<sup>23</sup> Jesús ja'apiyateje, íqui'ija rihuátacare, i'imari Jesús ahua'á najñaca na'ajnehuá quetana.

<sup>24</sup> Marí que rimacá aú Simón Pedro ca'arí riyáte'ela rijló, riquejá'acaloje riyucuna riliyá penaje, mecajeca ricá rimá nacú a'ajeri ripinánajlo ricá.

<sup>25</sup> Raú ratató rahua'ajé huani. E rimá Jesúsjlo:

—¿Mecaje ricá pimicha nacú, a'ajeri pipinánajlo picá?

<sup>26</sup> Jesús quemari rijló:

—Chuhua nonóro'otajica pan marí jalá acojé. Quéchami no'ojica ricá a'ajeri nucá nupinánajlo. Aú ihue'epeje: “¿Ricá chi ricá?” —que rimacá rijló.

E ranóro'ota pan ralá acojé. Quéchami ra'acá Judas Iscariótejlo ricá. Simonmi chu i'irimi Judas i'imagá.

<sup>27</sup> Judas ña'arí pan anóro'otaquejami riliyá. Quéchami Jiñá Chi'ináricana pechu ja'acó Judas pechu e'iyajé. E Jesús quemari rijló:

—Nacaje pila'ajicare, quiñaja pila'acá ricá.

<sup>28</sup> Ajopana, rijhua'até ajñáucá caño na'ajnehuá, uncá hue'epiláño nájeca rimacá rijló ilé que.

<sup>29</sup> Judas i'imari naliñéroute lamá'atajeri i'imagá. Aú ne'iyajena pechu i'imá: “Apala Jesús huátari rihuarúhua'aca huajló nacaje, hua'apátacaloje fiesta raú penaje. Rihuata ca'ajná ra'acá camu'ují la'acáñojlo liñeru,” que napechu i'imagá.

<sup>30</sup> Judas ña'acá pan anóro'otaquejami Jesús liyá ejomi ri'ijná reyá. Caja lapichá i'imari nachá.

*Rihucára'aca nala'acá nacaje huajé yucuna marí:*

<sup>31</sup> Caja Judas i'ijnari reyá i'imagá. Quéchami Jesús quemacá najló:

—Ina'uquéjloje penaje i'imagá nucá. Chuhua cajrú ina'uqué hue'epíjica palá la'ajérica nucá. Ñaque caja nahue'epíjica meque palá huani Tupana la'acá ina'uqué nupalamane.

<sup>32</sup> Ina'uquéjloje penaje i'imagá nucá. Nacaje nula'acá aú ina'uqué pechu i'imá palá Tupana nacú. Chuhua Tupana la'ajica nacaje, ina'uqué pechu i'imachi palá caja nunacu raú. Yehuíchaja rila'ajica ricá numacare nacú.

<sup>33</sup> Nujhua'atéjena, chuhua uncá nu'umalaje júpija ijhua'até maare eja'ahuá chu. Ica culájeño nu'umajica. Numacá judíonajlo i'imagá que caja numacá ijló. Uncá meño'ojó i'ijnalaje nu'ujnajica ejo me'etení.

<sup>34</sup> Chuhua nuhuacára'a ila'acá nacaje, huajé numacá rinacu: Ihuata íqui'ija pecohuácaca. Iqui'ija nuhuátaca icá que caja ihuátaca pecohuácaca.

<sup>35</sup> Iqui'ija ihuá pechu i'imá palá Tupana nacútaca pecohuácaca aú piyuque ina'uqué hue'epéjeño nujhua'atéjenaca icá —que Jesús quemacá najló.

*Pedro micho'otaca Jesús chaya yucuna marí:*

*(Mt 26.31-35; Mr 14.27-31; Lc 22.31-34)*

<sup>36</sup> E Pedro quemari Jesusjlo:

—¿Hue'amacana, meño'ojó chi pi'ijnajé me'etení?

Jesús quemari rijló:

—Nu'ujnajica ejo, uncá meño'ojó pi'ijnalaje nujhua'até me'etení. Nópumi chu pi'ijnajé rejo.

<sup>37</sup> Pedro quemari rijló:

—Nu'umacana, ¿naje uncá meño'ojó nu'ujnalá pijhua'até me'etení pi'ijnajica ejo? Apala nenoje nucá, pijhua'ateje nu'umacale. E'iyonaja calé nuhuata pijhua'até i'ijnacana —que Pedro quemacá rijló.

<sup>38</sup> Raú Jesús quemari rijló:

—¿E chi quehuaca pimacá nojló? Numá pijló, pimicho'otájica nuchaya hueji que pe uncá chiyó capere yaca'á —que rimacá rijló i'imagá.

## 14

*Jesusja calé huá'aca iná Tupana ejo yucuna marí:*

<sup>1</sup> Ipechu i'imaniya camu'ují. Ipechu i'imá Tupana chójé caphí, nochojé quele.

<sup>2</sup> Re cajrú pucunaji Nora'apá i'imagá e, ina'uqué i'imagáloje re penaje. Uncá numalajla ijló, uncáquela ri'imajajla ñaque. Ñaquele nu'ujnajé pucunaji lamá'ataje ipé penaje.

<sup>3</sup> Nu'ujnajé itucumá apucuna lamá'ataje ipé. Quéchami nupa'ajico piño majó ihuá'aje nujhua'ató, i'ímacáloje rejé nujhua'até penaje.

<sup>4</sup> Icó hue'epiño meño'ojoca nu'ujnajica maare eyá. Ihue'epí caja méqueca iná la'acá, iná i'ijnacáloje rejo penaje —que Jesús quemacá najló.

<sup>5</sup> Aú Tomás quemari rijló:

—Hue'emacana, uncá huahue'epila meño'ojoca pi'ijnajica. ¿Meque la'ajé chi iná hue'epícajla rejo i'ijnacana nacojé?

<sup>6</sup> Jesús quemari rijló:

—Tupana ejo ina'uqué huá'ajeri nucá. Quehuácaje puráca'aloji yucuna i'imajeri caja nucá. Uncá tajnácajo penaje calé cajmuchaji a'ajeri nucá. Uncá na calé i'ijnajeri Nora'apá ejo. Caphí péchuruna nochojé, queleja i'ijnajeri Nora'apá ejo.

<sup>7</sup> Ihue'epíquela na ina'uqueca nucá, ihue'epijla caja naca Tupana. Chuhuaca ihue'epica naca ricá; caja amá ricá —que rimacá najló.

<sup>8</sup> Raú Felipe quemari rijló:

—Hue'emacana, piya'atá huajló Para'apá, huamachi ricá, palá huapechu i'ímacáloje raú penaje.

<sup>9</sup> Jesús quemari rijló:

—Felipe, ijhua'até po nucá júpicha huani. ¿Uncá chi pihue'epila na ina'uqueca nucá? Amari nucá, amari caja Nora'apá, Tupana. Eta, ¿Naje pimá nojló ilé que?

<sup>10</sup> Nora'apá pechu que caja nupechu; nupechu que caja ripechu. Pajluhuaaja pechu que caja huapechu rijhua'até. Uncá nuliyoja calé numacá nacaje nacú ijló. Nora'apá pechu que caja nupechu. Ñaquele rihuacára'a nula'acá nacaje rihuátacare caje.

<sup>11</sup> Nora'apá pechu que caja nupechu; nupechu que caja ripechu. Jema'á no'opiyá. Uncaja que jema'á no'opiyá numacá que nunacuhá, jema'á no'opiyá amácale nula'acá cajrú nacaje uncá meño'ojó ina'uqué la'alare caje.

<sup>12</sup> Jema'á mari: Ina'uqué pechu i'imajica ee nochojé caphí, necá caja la'ajeño nacaje nula'acá que caja. Nuchaje nala'ajica nacaje, nu'ujnajícale Nora'apá ejo.

<sup>13</sup> Iquejá'a nacaje nuliya nupuráca'alo aú, e no'ojé ijló ricá. Nucá, Tupana l'irí, la'ajeri nacaje ijló, ina'uqué hue'epícaloje raú piyuque nacaje la'ajérica Nora'apá, Tupana.

<sup>14</sup> Piyuque nacaje iquejá'aje nuliya nupuráca'alo aú, no'ojé ijló ricá —que Jesús quemacá najló.

*Jesús i'imari najló Tupana Pechu yucuna.*

<sup>15</sup> E Jesús quemari piño najló:

—Íqui'ija ihuátacachu nucá, a'ajé inacojó nupuráca'alo.

<sup>16</sup> Nucá quemájeri Nora'apajlo, rihuacára'acaloje apú piño majó penaje. Ri'ímacáloje ijhua'até hua'ajini huani ipechu pala'atájeri penaje, iñaté a'ajeri penaje.

<sup>17</sup> Tupana Pechu ricá numá nacú. Ricá jehuíña'atajeri ina'uqué quehuácaje puráca'aloji nacú. Uncá Tupana a'alaje uncá jema'alaño ra'apiyajlo Ripechu, uncalle nahue'epila ricá. Icaja calé hue'epiño ricá, ri'ímacale ijhua'até. Ri'imajé caja e'iyá hua'ajini huani.

<sup>18</sup> Uncá nuyuríla je icá cupáquejanami que maare. Nupa'ajó piño majó, nu'umacáloje ijhua'até penaje.

<sup>19</sup> Mequetana i'imajemi uncá ajopana ina'uqué amálajeño nucá. Necá, uncá jema'alaño no'opiyá numá nacú. Icaja calé amájeño piño nucá. Icó i'imajeño hua'ajini huani nujhua'até, uncá tajnácajo penaje calé nu'umacale.

<sup>20</sup> Tupana Pechu i'imajica e'iyá huacajé ihue'epeje Tupana hua'ateje nucá. Ihue'epeje nujhua'até icá, nu'umacá ijhua'até que caja.

<sup>21</sup> Iná hue'epí mecajenaca huátaño nucá íqui'ija. Nahue'epí nupuráca'alo nacojé. Rimacá que la'acaño caja necá. Marí cajena huátaño nucá íqui'ija. Tupana huátari caja íqui'ija necá, huátaño nucá íqui'ija. Ñaque caja nuhuátajica necá íqui'ija. Nula'ajé napechu palá, nahue'epícaloje na ina'uqueca nucá raú penaje —que rimacá najló.

<sup>22</sup> —E Judas (uncá Judas Iscariote calé ri'ímacá), quemari rijló:

—Hue'emacana, pila'ajé huapechu palá, huahue'epichi na ina'uqueca picá. Eyá necá uncá jema'alaño pa'apiyá ¿naje uncá pila'alaje napechu palá ñaque caja? —que rimacá rijló.

<sup>23</sup> Jesús quemari rijló:

—Íqui'ija huátaca nucá, a'arí nupuráca'alo rinacojó. Nora'apá hua'até huajhué caja ricá. Raú nucá, Nora'apá hua'até huajhué caja ricá. Raú, nucá, Nora'apá hua'até i'imaño rijhua'até.

<sup>24</sup> Uncá huátala nucá íqui'ija, uncá caja a'alá rinacojó nupuráca'alo. Nupuráca'alo jema'acare, uncá nule'ejé calé ricá. Huacára'ari nucá majó le'ejé ricá.

<sup>25</sup> Marí que numacá ijló nacaje nacú me'etení, nu'umacá maárohua ijhua'até quetana.

<sup>26</sup> Nora'apá huacára'ajeri ijló Ripechu nupuráca'alo aú, ra'acáloje iñaté penaje, ri-pala'atácaloje ipechu penaje. Ricá jehuíña'atajeri icá piyuque nacaje nacú. Rilá'ajé ipechu palá, ihue'epícaloje nacaje nacojé numacare nacú ijló penaje.

<sup>27</sup> Nula'á ipechu palá, ihuó ca'acó piyá nacaje hua'até. Ipechu i'imacáloje nupechu que caja, penaje nula'á ipechu palá. Uncá nula'alá ipechu uncá jema'alaño Tupana ja'apiyá la'acá ajopana pechu que caja. Ila'aniya ipéchuha ujhui nacaje nacú. Iquero'onioyo caja.

<sup>28</sup> Nu'ujnañáajica icá; quéchami nupa'ajico piño majó, nu'umacáloje ijhua'até penaje. Caja nu'umá ijló nupa'ajico Nora'apá ejo yucuna. Iqui'ija ihuátaquela nucá, pu'ují ipechu i'imacajla riyucuna jema'acana aú. Pu'ují ipechu i'imacajla, nuchaje huani Nora'apá i'imacale.

<sup>29</sup> Uncá chiyó ri'imá ñaque, nu'umá riyucuna ijló. Ri'imajica quéchami, ipechu i'imacáloje caphí nochojé raú penaje nu'umá ijló riyucuna.

<sup>30</sup> Uncá nupura'alajo cajrú ijhua'até me'etení. Uncá jema'alaño no'opiyá, huacára'ajeri huaícha chuhua. Uncá nuchá'atajeri calé ricá.

<sup>31</sup> Nucá la'arí Nora'apá huacára'aca que, ina'uqué hue'epícaloje raú íqui'ija nuhuátaca Nora'apá. Chuhuaca jácho'o, hue'ejnachí maáreya —que Jesús quemacá ra'apiyatéjenajlo.

## 15

### *Cajmú ina, ri'iché hua'até yucuna marí:*

<sup>1</sup> Marí que Jesús jehuíña'ataca ra'apiyatéjena:

—Cajmú ina i'imacá ri'ichejlo que caja nucá ijló. Rina lamára'atajeri que caja Nora'apá.

<sup>2</sup> Cajmú arúca'ari rihuirulá chiyá ri'iché naquiyá. Ri'iché que caja nojló nujhua'atéjena. Uncá la'alaño Nora'apá huátaca que, ri'iché mecharú que caja nojló necá. Iná ca'acá rihuina quechani e'iyayá, que caja Nora'apá ca'acá ajopana ina'uqué e'iyayá necá, uncá la'alaño rihuátaca que. Eyá Nora'apá huátaca que la'ajeño, ri'iché quechani que caja necá rijló. Nora'apá ca'arí pu'uhuaré nala'acare palá la'acaño liyá, richaje nala'acáloje palá penaje. Iná ca'acá pu'uhuaré caje quechani e'iyayá, que caja Nora'apá ca'acá palá la'acaño pechu naquiyá pu'uhuaré nala'acare. Marí que ricá rihuina quechani e'iyayá, que caja Nora'apá ca'acá ajopana ina'uqué e'iyayá necá, uncá la'alaño rihuátaca que. Eyá Nora'apá la'acá, richaje, richaje que nala'acáloje palá raú penaje.

<sup>3</sup> Caja Nora'apá ca'arí inaquiyá pu'uhuaré ila'acare, a'acale inacojé nupuráca'alo.

<sup>4</sup> Iyuríniya nujhua'até i'imacana, nu'umacáloje ijhua'até iñaté a'ajeri penaje. Uncá meño'ojó cajmú arúca'ala richa ri'iché naquiyá ricoja, uncachu ri'iché i'imalá rinaquiyá. Ñaque caja ijló ricá. Uncá meño'ojó ila'alá Nora'apá huátaca que ipechu queja. Nucá a'ajeri iñaté rihuátaca que la'acana aú, uncacha que jácho'o nujhua'atéjena i'imacana chiyá.

<sup>5</sup> Pají ina i'imacá ri'ichejlo que caja ijló nucá. Ri'iché i'imacá rínajlo que caja nojló icá. Pajhua'atéchaca que huala'acachu nacaje ijhua'até, palá huani ila'acá nacaje Nora'apá huátaca que raú. Uncá meque la'ajé ila'alá nacaje rihuátaca que ipechu queja. No'ojica ee iñaté, ila'ajé nacaje rihuátaca que.

<sup>6</sup> Nujhua'atéjena naquiyana jácho'ojico ee nujhua'atéjena i'imacana chiyá, ne'emajé cupáquejanami que nuliyá. A'ahuaná i'ichemí, júpimi que namata'acare, que caja ne'emajica. Ne'emajica ri'ichemi macajreni que najña'acare, nacupácaloje ricá siyá chojé penaje.

<sup>7</sup> Uncájica ee jácho'o nujhua'atéjena i'imacana chiyá, iquejá'aje nacaje nuliyá ihuátacare caje, e no'ojé ijló ricá. Uncájica ee jácho'o nupuráca'alo ja'apiyá i'imacana chiyá, no'ojé ijló nacaje iquejá'acare nuliyá.

<sup>8</sup> Ina'uqué pechu i'imá palá Nora'apá nacú namaca aú ila'acá palá. Raú caja nahue'epí nujhua'atéjena huani icá.

<sup>9</sup> Iqui'ija Nora'apá huátaca nucá. Ñaque caja nuhuátaca icá. Iyuríniya no'opiyá jema'acana, nuhuátacaloje icá íqui'ija ñaqueja penaje.

<sup>10</sup> A'ajica ee inacojé nupuráca'alo, nuhuajhuénaja i'imajica ñaqueja. Ñaque caja nojló ricá; noma'á Nora'apá ja'apiyá. Aú calé ñaqueja rihuajhué nucá.

<sup>11</sup> Marí que numacá ijló, ihue'epícaloje rinacojé penaje, ipechu i'imacáloje pu'ují raú penaje. Nupechu i'imacá pu'ují que caja ipechu i'imacáloje raú penaje numá ijló.

<sup>12</sup> Marí que nuhuacára'aca icá me'etení: Ihuata íqui'ija pecohuácaca. Iqui'ija nuhuátaca icá ejeja ihuátaca pecohuácaca.

<sup>13</sup> Apú taca'arí ca'ajná ina'uqué rihuajhuena chaya, ne'emacáloje capichácajo liyá raú penaje. Raú iná hue'epí quehuácaca rihuajhuena necá. Uncá meño'ojó iná la'alá palani nacaje richaje palaca iná huajhuénajlo.

<sup>14</sup> Iqui'ija nuhuátaca icá, ila'acachu nuhuacára'aca que.

<sup>15</sup> Uncá apú hua'até sápageño que calé icá nojló. Apú hua'até sápageño uncá hue'epílaño méqueca nacarihuatē pechu nacú nacaje. Ñaquele uncá numalá inacu: “Nujhua'até sápageño” que. Numá inacu: “Íqui'ija nuhuátacarena icá” que. Ñaquele numá ijló piyuque nacaje Nora'apá quemacare nacú nojló.

<sup>16</sup> Uncá i'ihuapala ijluhua núcá, nu'umacáloje ihuacára'ajeri penaje. Nucá i'ihuapari nujluhua icá ajopana ina'uqué e'iyayá, ila'acáloje piyuque huani nacaje Nora'apá huátaca que penaje. Marí caje aú uncá nacaje ila'acare palá capichálajo. Ñaquele Nora'apá a'ajeri ijló piyuque nacaje, iquejá'ajicare riliyá nupuráca'alo aú.

<sup>17</sup> Marí que calé nuhuacára'aca icá me'etení: Ihuata íqui'ija pecohuácaca —que Jesús quemacá najló.

*Ina'uqué uncá jema'alaño Tupana ja'apiyá uncá huátalaño Jesús, rijhua'atéjēna quele. Riyucuna marí:*

<sup>18</sup> Jesús quemari piño najló:

—Apala ina'uqué, uncá jema'alaño Tupana ja'apiyá, pechu i'imajica inacu chapú. Jema'á marí: Ñaqué caja napechu i'imacá nunacu ipiyá.

<sup>19</sup> Uncá Tupana ja'apiyá jema'ajeño calé i'imaquela, nahuátajla icá íqui'i. Nahuátaca nanaqiyana que caja nahuátacajla icá. E'iyonaja calé núcá i'ihuapari nujluhua icá ne'iyayá. Ñaquele chapú nahuó ichá raú, uncale i'imalá necá que caja.

<sup>20</sup> Ihue'epí meque numacá ijló i'imacá. Numá ijló: “Iná sápacare hua'até, ricá i'imari iná chaje”. Nala'á núcá chapú; ñaqué caja nala'ajica icá chapú. Ne'iyajena jema'año nupuráca'alo ja'apiyá; ñaqué caja ne'iyajena jema'ajica ipuráca'alo ja'apiyá.

<sup>21</sup> Uncá jema'alaño Nora'apá ja'apiyá la'ajeño icá chapú, jema'acale no'opiyá. Uncá nahue'epila naca Nuhuacára'ajeri. Aú calé nala'á chapú icá.

<sup>22</sup> “Uncáquela nu'umalajla najló pu'uhuaré nala'acare yucuna, uncá nahue'epilajla rina-cojé. Caja nu'umá najló riyucuna. Chuhua uncá meño'ojó nemalá nanacuhá marí que: “Uncá huahue'epila rinacojé” que.

<sup>23</sup> Chapú ina'uqué pechu i'imacachu nunacu, ñaqué caja chapú napechu Nora'apá nacú.

<sup>24</sup> Nula'á ne'iyá nacaje uncá apú hue'epílae la'acana. Raú nahue'epicajla naca núcá. E'iyonaja uncá nahuátala núcá. Uncá caja nahuátala Nora'apá. Aú pu'uhuaré la'acaño necá.

<sup>25</sup> Tupana puráca'alo, Moisesmi chu lana'acare quemacá que nanacu, queja necá. Marí que rimacá nanacu: “Uncá na calé nula'á, nayúcha'acoloje nuchá penaje. E'iyonaja nayúcha'ajo nuchá”.

<sup>26</sup> “Nuhuacára'aje ijló Nora'apá Pechu. Ripechu quemari ina'uquejlo quehuácaje puráca'aloji nacú. Iñaté a'ajeri penaje caja ricá. Ipechu pala'atájeri penaje caja ricá. Ripechu i'imajeri ijló nuyucuna riphájica majó penaje.

<sup>27</sup> Ica'á caja i'imajeño nuyucuna ajopánajlo. Nuqueño'ocá ina'uqué jehuíña'atacana huacajé eyá maárejecha icá nujhua'até. Ñaquele i'imajé nuyucuna ajopana, ajopánajlo que —que Jesús quemacá ra'apiyatéjenajlo i'imacá.

## 16

<sup>1</sup> E Jesús quemari piño najló marí que:

—Marí que numacá ijló me'etení, iyurica piyá no'opiyá jema'acana quéchami.

<sup>2</sup> Uncá nayurílae jahuacaco najhua'até jahuacáca'alo ñacarelana chojé. Aquijñajo i'imajica huacajé marí que napechu i'imajica inacu: “Nenócana aú huala'á Tupana huátaca que”.

<sup>3</sup> Marí que nala'ajica icá chapú, uncale nahue'epila naca Nora'apá. Uncá caja nahue'epila naca núcá.

<sup>4</sup> Numá ijló rinacu me'etení, caja queja ri'imajica ee, riphaje ipechu nacojé.

*Tupana Pechu sápacá'ala yucuna marí:*

—Iqueño'ocá nujhua'até chiracano huacajé eyá maárejecha, uncá nu'umalá ijló riyucuna, nu'umacale ijhua'até.

<sup>5</sup> Nu'ujnajé chuhua, nu'umacáloje Nora'apá hua'até penaje. Ricá huacára'ari núcá majó i'imacá. Uncá na inaquiyana quemalá nojló: “¿Meño'ojó pi'ijnajé?” que.

<sup>6</sup> Nuhue'epí camu'ují huani ipechu li'ichaco, numíchaca aú ijló marí que.

<sup>7</sup> Jema'á marí: Palani ri'imajica ijlojé penaje, nu'ujnañájica icá ee. Uncáquela nu'ujnalajla maáreya, uncá Tupana Pechu iphájlajla majó iñaté a'ajeri penaje, ipechu pala'atájeri penaje. Ñaquele nu'ujnajé rejo. Reyá i'imajemi nuhuacára'aje ricá majó.

<sup>8</sup> Riphájica penaje rica'átaje ina'uqué e'iyajé, nahue'epicaloje raú pu'uhuaré la'ajéñoca necá penaje. Rehuíña'ataje caja ina'uqué, nahue'epicaloje Tupana i'imacá nañaté a'ajeri penaje, nala'acáloje palá raú penaje ripalamane. Méqueca Tupana huajájica pu'uhuaré la'ajeño, nacú rimaje caja ina'uquejlo.

<sup>9</sup> Rimaje caja najllo, nahue'epicaloje raú pu'uhuaré la'ajéñoca necá, uncale napechu i'imalá caphí nochojé.

<sup>10</sup> Rimaje caja najllo, nahue'epicaloje méqueca palá la'acana penaje. Marí que ri'imajica ijlló, nu'ujnajicale Nora'apá ejo. Uncá amálaje nucá maárohua.

<sup>11</sup> Caja Tupana chá'atari Jiñá Chi'ináricana. Tupana huajájeri ricá, rijhua'atéjena hua'até. Tupana Pechu quemájeri ina'uquejlo, nahue'epicaloje méqueca iná la'acá, iná i'imalóloje Tupana huajálica ina'uqué liyá penaje —que Jesús i'imalá Tupana Pechu yucuna najllo.

<sup>12</sup> 'Re caja jo'ó apú, cajúru nacaje nuhuátacare quemacana nacú ijlló. E'iyonaja uncá meño'ojó jema'alá piyuque huani me'etení.

<sup>13</sup> Quehuácaje puráca'aloji nacú pura'ajero Tupana Pechu. Riphálica penaje rehuíña'atajica icá piyuqueja quehuácaje puráca'aloji nacú. Uncá ripura'alajo ripechu queja ijhua'até. Nora'apá ja'apiyá queja rimálica nacaje nacú. Nacaje i'imalácare yucuna ri'imalé ijlló.

<sup>14</sup> Tupana Pechu la'ajeri ipechu palá, ipechu i'imalóloje palá nunacu raú penaje. Marí que rila'ajica ipechu, ra'apátajicale ijlló nupuráca'alo no'opiyá.

<sup>15</sup> Palani puráca'aloji aú nemá Nora'apá nacú; ñaque caja nemacá nunacu. Ñaquele numá ijlló, Tupana Pechu ja'apátajeri ijlló nupuráca'alo no'opiyá.

*Chapú caje yajhué namaje. Ricá ejomi napechu i'imalé pu'ují. Riyucuna marí:*

<sup>16</sup> 'Mequetana i'imalémi uncá amálaje nucá maárohua, nu'ujnajicale Nora'apá i'imalá ejo. Eyá mequetana i'imalémi amaje piño nucá —que Jesús quemacá ra'apiyatéjenajlo.

<sup>17</sup> Marí caje aú ra'apiyatéjena quemáño pajlocaca:

—¿Meque quemacana cari rimíchaje nacú huajlló: “Mequetana i'imalémi uncá amálaje nucá, quéchami mequetana i'imalémi amaje piño nucá?” Eyá rimicha piño: “Nu'ujnajé Nora'apá i'imalá ejo”. ¿Meque chi cari rimíchaje nacú huajlló?

<sup>18</sup> ¿Meque quemacánaca ca'ajná rimíchaca: “Mequetánaja i'imalémi?” que. Uncá riphálacha huapechu nacojé —que nemacá pajlocaca.

<sup>19</sup> Jesús hue'epiri nahuátaca riyucuna quejá'acana riliyá. Raú rimá najllo:

—Caja numicha ijlló: “Mequetana i'imalémi uncá amálaje nucá maárohua. Rejomi mequetana i'imalémi amaje piño nucá maare”. ¿Riyucuna chi iquejá'aca paliyáca? —que rimacá najllo—.

<sup>20</sup> Jema'á marí: Icó iyájeño nu'umajica. Camu'ují ipechu la'ajico nuyámijo. Eyá ajopana, uncá nupa'alaño Tupana ja'apiyá, necá péchua calé i'imalé pu'ují. Icaja calé pechu i'imalé camu'ují. Chapú caje ja'apálica iliyá ejomi ipechu i'imalé piño pu'ují.

<sup>21</sup> Inanaru huá'aca ru'urí huacajé romá quehuini yajhué. Rimoto'ocá ejomi caja riquiyá ja'apari ruliya. Pu'ují rupechu la'acó romaca aú ru'urí.

<sup>22</sup> Ñaque caja ri'imaléca ijlló. Me'etenija calé amálica chapú caje yajhué. Nutaca'ajica ejomi numacápo'ojó piño. Ejomi nupa'ajó piño majó amaje. Ejéchami caja pu'ují huani ipechu i'imaléca. Uncá meque nala'alaje icá, ipechu i'imalá piyá pu'ují.

<sup>23</sup> Rihuacajé uncá iquejá'alaje nacaje yucuna nuliya. Jema'á marí: Nupuráca'alo aú Nora'apá a'ajeri ijlló piyuque nacaje iquejá'ajicare riliyá.

<sup>24</sup> Maárejecha uncá jo'ó iquejá'ala nacaje Nora'apá liyá nupuráca'alo aú. Iquejá'aje riliyá nacaje. E ra'ajé ijlló ricá, pu'ují ipechu i'imalóloje raú penaje —que Jesús quemacá najllo.

*Jesucristo chá'ataca Jiñá Chi'ináricana yucuna marí:*

<sup>25</sup> E Jesús quemari piño najllo marí que:

—Yucu caje nu'umá ijlló, nohuíña'ataloje icá nacaje nacú penaje. Aquijñojo i'imaléca huacajé uncá nohuíña'atalaje icá yucu caje aú. Pu'ucuja nu'umajica Nora'apá yucuna ijlló.

<sup>26</sup> Rihuacajé iquejá'aje nacaje Nora'apá liyá nupuráca'alo aú. Uncá numalaje rijlló, ra'acáloje ijlló nacaje penaje.

<sup>27</sup> Icó icó quejá'ajica riliyá nacaje, rihuátacale icá íqui'ija. Icó huajhué nucá. Icó hue'epiño nuphaca Tupana eyá i'imalá. Aú calé Nora'apá huajhuena icá.

<sup>28</sup> Nora'apá ahua'yá nócho'o i'imalá, nu'ujnacáloje marí eja'ahuá chojé penaje. Chuhua nócho'ojico marí eja'ahuá chiyá, nupa'acóloje Nora'apá ejo penaje —que rimacá najllo.

<sup>29</sup> Raú ra'apiyatéjena quemáño rijlló:

—Chuhua ta pu'ucuja pi'imalá riyucuna huajlló. Uncá pi'imalá yucu caje huajlló, pehuíña'ataloje huecá penaje.

<sup>30</sup> Chuhua huahue'epí picá hue'epica piyuqueja nacaje nacojé. Uncá naje calé apú quemari pijllo nacaje nacú. Aú calé huemá pinacu, Tupana eyaje picá —que nemacá rijlló.

<sup>31</sup> Jesús quemari najllo:

—¿Chuhua chi a'acá inacojó nupuráca'alo?

<sup>32</sup> Caja riphicha rená chojé. Napatálica ee nucá, macajmala itamáca'atajico paliyáca. Iyureje nucá nocoja. E'iyonaja uncá nuyurílojo nocoja, Nora'apá i'imalémi nujhua'até.

<sup>33</sup> Marí que numacá ijló, ipechu i'imacáloje palá raú penaje. Maare eja'ahuá chu iná ña'acá chapú caje panacu. Rihuacajé ila'ajé ipéchuha caphí nochojé. Raú ipechu i'imajé palá re'iyá. Palá ipechu i'imacá, nuchá'atacale ijló Jiñá Chi'ináricana. Pu'uhuaré la'acaño huacára'ajeri ricá —que Jesús quemacá ra'apiyatéjenajlo.

## 17

*Jesús pura'acó Tupana hua'até ra'apiyatéjena nacú yucuna marí:*

<sup>1</sup> Marí que Jesús quemacá najló i'imacá. Ejomi riyacá'o je'echú chojé. E rimá marí que Tupánajlo:

—Pa'ayú, caja riphicha rená chojé pimacare nacú nojló i'imacá. Pila'á nucá palá, ina'uqué hue'epícaloje raú nupalamane aú ne'emajica palá penaje. Raú caja nahue'epeje pipalamane aú ne'emajica palá.

<sup>2</sup> Picá a'arí nucá, Pi'irí, piyuque ina'uqué huacára'ajeri penaje, no'ocáloje najló cajmuchaji penaje, ne'emacáloje matajnaco raú penaje. Ina'uqué pa'acárena nojló, i'imacáñojlo no'ojé ricá.

<sup>3</sup> Hue'epiño huecá pijhua'até, i'imajeño matajnaco huajhua'até je'echú chu. Picá, pajluhuaja calé iná Chi'ináricana. Pihuacára'acare majó nucá.

<sup>4</sup> Nacaje nula'acare marí eja'ahuá chu aú ina'uqué hue'epiño picá. Caja nuñapata piyuque nacaje la'acana pihuacára'aca nucá que.

<sup>5</sup> Nu'umajica pahua'á quéchami pa'á nucá, nu'umacáloje picá que caja cajruni penaje. Uncá chiyó eja'ahuá i'imacá huacajé, cajruni nu'umacá pahua'á.

<sup>6</sup> Pi'ihuapá pijluhua ina'uqué ajopana e'iyayá i'imacá, pa'acáloje nojló necá njhua'atéjena penaje. Caja nula'á napechu palá, nahue'epícaloje raú naca picá penaje. Caja chuhua pijhua'atéjena necá. Picá a'arí nojló ne'emacá. Necá a'año nanacajó pipuráca'alo.

<sup>7</sup> Caja nahue'epí picá a'acá nuñaté piyuque nacaje nula'acare aú. Piyuque nacaje numacare nacú ina'uquejlo no'opata najló pa'apiyá.

<sup>8</sup> Pipuráca'alo noma'acare pa'apiyá, no'opata najló ricá. Nema'á ra'apiyá. Raú nahue'epí pihuacára'acare reyá majó nu'umacá.

<sup>9</sup> Picá a'arí nojló ina'uqué naquiyana, ne'emacáloje nujhua'atéjena penaje. Numá pijló nanacu, pa'achí nañaté, pijhua'atéjena caja ne'emacale. Necá nacuja calé numá pijló, pa'acáloje nañaté penaje. Eyá ajopana, uncá pa'apiyá jema'ajeño calé necá, uncá numalá pijló, pa'acáloje nañaté penaje.

<sup>10</sup> Piyuqueja nujhua'atéjena, pijhua'atéjena caja necá. Huajhua'atéjena necá piyuqueja. Palá huajhua'atéjena pechu nunacu, nupalamane ne'emacale.

<sup>11</sup> Caja chuhua uncá nu'umalaje marí eja'ahuá chu. Necaja calé, huajhua'atéjena, yuréjeño maare. Nucá pa'ajero, nu'umacáloje pijhua'até penaje. Pa'ayú, uncá la'alare pu'uhuaré picá, pipechu aú ja pa'á pinacajó necá. Rejenohuaja huapechu pijhua'até. Ñaqué caja napechu i'imacáloje penaje, pa'á pinacajó necá.

<sup>12</sup> Marí eja'ahuá chu nu'umacá quetana no'ocá nunacajó necá pa'acárena nojló. Pipalamane aú no'ó nunacajó necá. Numejñata necá. Uncá na calé nanaquiyana pa'acárena nojló capicháero ne'iyayá. Re pajluhuaja, ricaja calé, capicháero ne'iyayá. Ñaqué penaje rimoto'ó i'imacá. Ricapichajo piliyá, pipuráca'alo lana'aquejami quemacá rinacu queja ricapichájico piliyá.

<sup>13</sup> Chuhua nu'ujnajica ilé pi'imacá ejo. Numá pijló marí que, ejo'ocaja nucá najhua'até maare. Marí numá nacú, pu'ují huani napechu i'imacáloje nupechu que caja raú penaje.

<sup>14</sup> No'opata najló pipuráca'alo. Nupechu que caja napechu. Uncá ajopana ina'uqué pechu que calé nupechu. Ajopana ina'uqué, uncá hue'epiño picá, numá nacú. Chapú napechu nujhua'atéjena nacú, uncá pachá napechu i'imalá napechu que caja.

<sup>15</sup> Uncá numalá pijló, pihuá'acaloje nujhua'atéjena marí eja'ahuá chiyá penaje. Numá pijló, pamácaloje naliyá Jiñá Chi'ináricana penaje, nala'acá piyá pu'uhuaré, namanaicho caje.

<sup>16</sup> Uncá ajopana ina'uqué pechu que calé nupechu. Uncá caja napechu que calé nujhua'atéjena pechu. Nupechu que caja péchurana necá nujhua'atéjena.

<sup>17</sup> Quehuaca pipuráca'alo. Pila'á necá palá raú, nala'acáloje pihuátaca que penaje.

<sup>18</sup> Picá huacára'ari nucá, ina'uqué uncá hue'epiño picá e'iyajé, nu'umacáloje piyucuna najló penaje. Ñaqué caja nuhuacára'aca ne'ejnacá ina'uqué e'iyajé, uncá hue'epiño picá e'iyajé, piyucuna i'imajé najló.

<sup>19</sup> Najlojé penaje no'ó nocó pijló, na'acáloje caja necó pijló penaje, nahue'epícaloje natucumó pihuátaca que la'acana penaje.

<sup>20</sup> Numá pijló, pa'achí mariruna ñaté. Uncá necaja calé numá nacú pijló. No'opiyá jema'ajeño i'imajicaño penájena numá caja nacú. Nema'ajé no'opiyá me'etení i'imacaño puráca'alo jema'acana áu.

<sup>21</sup> Numá pijló, eco pa'á nañaté, napechu i'imachi rejenohuaja pajhua'atéchaca. Ne'emacáloje pajluhuaja yaní queja pajhua'atéchaca penaje. Pipechu que caja nupechu. Nupechu que caja péchuri picá. Pa'ayú, pa'á nañaté, napechu i'imachi huapechu que caja. Raú ajopana ina'uqué hue'epéjeño pihuacára'aca nu'umacá.

<sup>22</sup> Picá la'arí nucá palá. Raú ajopana ina'uqué hue'epiño pu'ují pipechu nunacu. Ñaqueé caja nula'acá necá palá, ajopana ina'uqué hue'epicaloje raú pu'ujica nupechu nanacu. Marí que nula'acá necá, napechu i'imacáloje rejenohuaja penaje. Rejenohuaja caja huapechu pajhua'atéchaca. Napechu i'imacáloje ñaqueé caja penaje, nula'á necá palá.

<sup>23</sup> Najhua'até nucá; nujhua'até caja picá. Marí que huecá, ne'emacáloje huajhua'atéjena penaje. Marí caje áu ajopana ina'uqué hue'epiño pihuacára'acare nu'umacá. Nahue'epí caja raú iquí'ija huani pihuátaca necá, pihuátaca nucá que caja.

<sup>24</sup> Nora'apá, picá a'arí necá nojló, ne'emacáloje caphí péchuruna nochojé penaje. Nuhuata ne'emacá nujhua'até aquiñño je'echú chu, namácaloje meque palá huani pila'acá nucá penaje. Uncá chiyó piqueño'óta eja'ahuá, piyuqueja nacaje hua'ató, pihuata nucá iquí'ija i'imacá. Áu calé pila'á palá nucá i'imacá.

<sup>25</sup> Nora'apá, palani huani picá. Ina'uqué, uncá jema'alaño pa'apiyá, uncá hue'epilaño naca picá. Nucá hue'epiri naca picá. No'opiyatéjena hue'epiño caja pihuacára'acare majó nucá.

<sup>26</sup> Nula'á napechu palá, nahue'epicaloje palá raú naca picá penaje. Ñaqueja nula'ajica napechu palá, iquí'ija nahuátacaloje pecohuácaca penaje. Iquí'ija pihuátaca nucá que caja nahuátajica pecohuácaca iquí'ija, Nupechu i'imacáloje ne'iyá raú penaje —marí que Jesús pura'acó Tupana hua'até i'imacá.

## 18

*Najña'acá Jesús yucuna marí:*

*(Mt 26.47-56; Mr 14.43-50; Lc 22.47-53)*

<sup>1</sup> Caja marí que Jesús pura'acó Tupana hua'até i'imacá. Quéchami ri'ijnacá ra'apiyatéjena hua'até ají que ina'atana pa'anajo pitá. Ina'atana íi Cedrón. A'ahuaná ejátaquejami i'imari re. Rejo Jesús i'ijnari richape ra'apiyatéjena hua'até.

<sup>2</sup> Rejo nahuacácono ra'apiyatéjena hua'até. Júdasja calé uncá i'imalá re najhua'até. Ajopana hua'até ri'imá, ra'acáloje Jesús ripinánajlo penaje. Rihue'epí ne'ejnacá rejo, áu rihua'á ripinana rejo.

<sup>3</sup> E caja cajrú ajopana ina'uqué iphaño nanacu Judas hua'até. Cajrú surárana, policíana, quele hua'até riphá i'imacá. Sacerdótena huacára'ajeño, fariséona, quele puráca'alo áu ne'ejná rejo rijhua'até i'imacá. Nalecare hua'até nephá rejo. Cajrú nacamaré, jepé caje i'imacá nacapi.

<sup>4</sup> Caja Jesús hue'epíchami na penájeca ne'ejnacá. Ñaquele nephaca nanacu áu ri'ijná najimajo. Rimá najló:

—¿Na iculá?

<sup>5</sup> Nemá rijló:

—Jesús, Nazaret eyaje, ricá huaculá.

Jesús quemari najló:

—Nucá po Jesús.

Ripinánajlo a'ajeri, Judas, i'imari caja najhua'até.

<sup>6</sup> Rimá najló: “Nucá po Jesús” que, raú na'ató te'erí e'iyajé rijjimaya.

<sup>7</sup> Jesús quemari piño najló:

—¿Na iculá?

Nemá piño:

—Jesús, Nazaret eyaje, ricá huaculá.

<sup>8</sup> Raú Jesús quemari najló:

—Caja numicha ijlo, nucá po quele imá nacú. Nucá iculájica ee, iyurí no'opiyatéjena, ne'ejnachi nahuátaca ejo —que rimacá najló.

—Je —que.

<sup>9</sup> Rimacá que nanacu Tupánajlo maapami que caja ri'imacá najló. Marí que rimacá rijló nanacu i'imacá: “Uncá na calé nanaquiyana pa'acárena nojló capichájero ne'iyayá.” Ñaquele rimá najló, nayuricaloje ra'apiyatéjena, ne'ejnacáloje nahuátaca ejo penaje.

<sup>10</sup> Pedro i'imari caja re. Sajalu caje cúhua'aro rinacu. Ramaca áu marí que nala'acá Jesús rero'ó risajálune ra'aruná chiyá. Ricá áu rica'á pajluhuaja i'ijhuí. Ca'añá chojó pitari ri'ijhuí

rimata'á matá. Rimata'acare i'ijhuí íí i'imari Malco. Sacerdótena huacára'ajeri hua'ateje ri'imacá.

<sup>11</sup> Caja rimata'á ri'ijhuí. Raú Jesús quemari Pédrojlo:

—Pipa'atá ra'arú chojé pisajálune. Re Nora'apá pechu nacú ricá, nujña'acáloje chapú caje panacu penaje. Ñaquele nujña'ajeja panacu ricá —que rimacá rijló.

*Jesús tára'aco sacerdótena huacára'ajeri jimaje yucuna marí:*

(Mt 26.57-58; Mr 14.53-54; Lc 22.54)

<sup>12</sup> Surárana i'imaño re nahuacára'ajeri hua'até. Judíona le'ejena policiana i'imaño caja re. Caja napatá Jesús, nahuajácaloje ricá penaje. Nepo'otá ricá.

<sup>13</sup> E caja nahuá'a ricá aji que Anás ñacaré ejo. Caifás yana'ajú ri'imacá. Caifás i'imari sacerdótena huacára'ajeri rihuacájé.

<sup>14</sup> Ricá, Caifás, quemari marí que judíona naquiyánajlo i'imacá: “Pajluhuaja ina'uqué taca'ajeri huachaya, huacapichaco piyá piyuque huani. Marí palani huajló,” que rimacá i'imacá. Ricá ñacaré ejo nahuá'a Jesús i'imacá.

*Pedro micho'otaca Jesús chaya yucuna marí:*

(Mt 26.69-70; Mr 14.66-68; Lc 22.55-57)

<sup>15</sup> Simón Pedro, apú Jesús ja'apiyateje hua'até, ja'apaño juca quemachi Jesús ápumi chu. Ne'ejná aji que Anás ñacaré ejo. E apú i'ijnari aji que riñacaré cópeje, Jesús ahua'ajé. Pu'ucuja rimujlúca'aca rejé, sacerdótena huacára'ajeri amána'apa ri'imacale.

<sup>16</sup> Pedro ta uncá mujlúca'ala rijhua'até. Corral yámojoja ritajno. Aú apú Jesús ja'apiyateje i'ijnari rinumaná hua'apheru hua'até pura'ajó rinacu. Rimá rojló:

—Pijme'etá rijló rapu, rimujlúca'achi.

—Je —que rumacá.

Rujme'etá rapu. Aú Pedro mujlúca'ari richojé.

<sup>17</sup> Quéchami rinumaná hua'apheru quemacá Pédrojlo:

—¿Ile ina'uqué napatacare ja'apiyateje chi picá?

Pedro quemari rojló:

—Uncá ra'apiyateje calé nucá.

<sup>18</sup> Ehuá ipe'ení noca necá. Aú nahuacára'ajeri hua'até sápageño, policiana cajena, apho'otáno siyá. Rilucúna'lo palá. Quéchami na'anapacá rahua'á Pedro hua'até.

*Sacerdótena huacára'ajeri culácataco Jesús nacú yucuna marí:*

(Mt 26.59-66; Mr 14.55-64; Lc 22.66-71)

<sup>19</sup> Sacerdótena huacára'ajeri queño'orí nacaje yucuna quejá'acana Jesús liyá. Rimá rijló:

—¿Mecajena chi pa'apiyatéjena? ¿Na nacú chi pehuíña'ata ina'uqué? —que rimacá rijló.

<sup>20</sup> Jesús quemari rijló:

—Íqui'iruna ina'uqué e'iyá nupura'ó nacaje nacú. Capinaca nohuíña'atajica ina'uqué nahuacá'alo ñacarelana chu, Tupana ñacaré chu hua'ató. Meño'ojoca judíona jahuacácono ejé nohuíña'ataque necá. Uncá numicho'ojneja calé numájica najló nacaje nacú.

<sup>21</sup> ¿Naje piquejé'a nacaje nohuíña'atacare necá nacú yucuna nuliyá? Piquejé'a riyucuna nupurá'alo jema'ajeño liyá. Necá quemájeño pijló na nacuca nohuíña'ataque necá. Necá hue'epiño méqueca numacá —que Jesús quemacá rijló.

<sup>22</sup> Pajluhuaja policía tára'aro Jesús ahua'á. Tupana ñacaré hua'aphé ri'imacá. Marí que Jesús quemacá aú rijló riña'á Jesús pajimaya riyáte'ela aú. Rimá rijló:

—¿Ile que chi iná a'ajipacá sacerdótena huacára'ajerijlo?

<sup>23</sup> Jesús quemari rijló:

—Pimá nojló mecajeca purá'aloji numíchaje nacú uncá paala i'imichaca pijló. Palá numíchaca. Uncá naje calé piji'ichá nucá pajimaya —que rimacá rijló i'imacá.

<sup>24</sup> E caja Anás huacára'ari nahuá'aca Jesús jepo'oqueja Caifás ejo. Caifás i'imari sacerdótena huacára'ajeri rihuacájé.

*Pedro micho'otaca piño Jesús chaya yucuna marí:*

(Mt 26.71-75; Mr 14.69-72; Lc 22.58-62)

<sup>25</sup> Naculácataco Jesús nacú, a'apona que Pedro a'anapacá ajopana hua'até. E nemá rijló:

—¿Uncá chi ile ina'uqué ja'apiyateje calé picá?

—Uncá nucá calé ra'apiyateje —que rimacá najló.

Rimicho'otá Jesucristo chaya.

<sup>26</sup> Re caja apú i'imari. Sacerdótena huacára'ajeri hua'até sápageji ri'imacá. Pedro mata'acare i'ijhuí ejena naquiyana ri'imacá. E rimá Pédrojlo:

—¿Uncá chi nomálacha picá ya'ajná a'ahuaná ejátaquelana ejo?

<sup>27</sup> Pedro micho'otari piño richaya. Ejéchami capere yaca'acá.



*Jesús tára'aco Pilato jimaje yucuna marí:*

*(Mt 27.1-2, 11-14; Mr 15.1-5; Lc 23.1-5)*

<sup>28</sup> E caja nahuá'a Jesús Caifás ñacaré eyá ají que nachaje huacára'ajeri ñacaré ejo. E naqueño'ó me'etácaje. Uncá judíona mujlúca'alaño nachaje huacára'ajeri ñacaré chojé, ajopana te'eré eyaje ri'imacale. Aú uncá paala najló richojé mujlúca'acana. Namujlúca'aquela richojé, uncá na calé i'imarijla najló palani que, najñácaloje pascua a'ajnená penaje. Aú calé uncá namujlúca'ala richojé.

<sup>29</sup> Marí caja aú Pilato jácho'oro riñacaré chiyá najhua'até pura'ajó. E rimá najló:

—¿Pu'uhuaré la'ajeri chi ricá ihuá'ichaje majó?

<sup>30</sup> Nemá rijló:

—Uncáquela ri'imajla uncá ina'uquélari, uncá huajña'aláchajla ricá majó.

<sup>31</sup> Rimá najló:

—Ihuá'a ricá ichajo, amáijla na pachá ihuátaca rihuajácana. Ile'ejeé lana'acquéjami huacára'aca que ca'ajná ihuajaca ricá —que Pilato quemacá najló.

Judíona quemañó rijló:

—Palani rinócana, uncá ina'uquélari ri'imacale. E'iyonaja uncá nayurila huecá, judíona, huenócaloje ricá penaje —que nemacá rijló.

<sup>32</sup> Jesús quemari ra'apiyatéjenajlo rinacuhá maapami que méqueca nenójica ricá. Marí que nala'acá aú ri'imá Jesús quemacá que.

<sup>33</sup> E caja Pilato pa'aró piño riñacaré chojé. Reyá i'imajemi rihuá'a Jesús maná. Nahuá'a ricá rejo. E Pilato quemari rijló:

—¿Judíona i'imacana chi picá?

<sup>34</sup> E Jesús quemari rijló:

—¿Pipechu queja chi pimacá nojló ilé que, ajopana ca'ajná i'imaño nuyucuna pijló?

<sup>35</sup> Pilato quemari rijló:

—Uncá judíona naquiyana calé nucá, ne'emacáloje piyucuna nojló penaje. Inaquiyana judíona, sacerdotena huacára'ajeño, quele huá'ichaño picá majó. ¿Pila'acale pu'uhuaré chi, nahuá'icha picá majó?

<sup>36</sup> Jesús quemari rijló:

—Uncá nahuacára'ajeri penaje calé nucá marí eja'ahuá chu. Maare nuhuacára'aquela ina'uqué, nujhua'atéjena nóquichoja nuchaya, na'acá piyá judíonajlo nucá. E'iyonaja uncá nahuacára'ajeri penaje calé nucá marí eja'ahuá chu —que rimacá rijló.

<sup>37</sup> Eyá Pilato quemari rijló:

—¿E chi quehuaca ne'emacana huani picá?

Jesús quemari rijló:

—Ilé pimacá nunacu queja nucá. Nucá huitúca'ari marí eja'ahuá chojé i'imacá. Maare nomoto'ó i'imacá, numacáloje ina'uquejlo quehuácaje puráca'aloji nacú penaje. Quehuácaje puráca'aloji ja'apiyá jema'ajeño huátaño nupuráca'alo jema'acana no'opiya.

<sup>38</sup> Raú Pilato quemari rijló:

—¿Na ta chi quele quehuácaje puráca'aloji pimá nacú? —que rimacá rijló.

*Nahuacára'aca nenoca ricá yucuna marí:*

*(Mt 27.15-31; Mr 15.6-20; Lc 23.13-25)*

Marí que Pilato pura'acó Jesús hua'até. Ejomi ri'ijná piño huaca'apojo judíona hua'até pura'ajó. E rimá najló:

—Uncá na calé rila'á pu'uhuaré, huahuajácaloje ricá penaje.

<sup>39</sup> Pascua fiesta huacajé queja ihuátaca nócho'otaca pajluhuaja ina'uqué calajeruni chiyá ijló. ¿E ihuátaca nócho'otaca ijló judíona i'imacana penaje?

<sup>40</sup> Marí que rimacá aú najló cajrú nahuíyo'oca rijló piyunqueja. Nemá rijló:

—¡Uncá ricá ta calé! Pácho'ota huajló Barrabás —que nahuíyo'oca rijló.

Piro'oqueji Barrabás i'imacá.

## 19

<sup>1</sup> Eyá Pilato huacára'ari surárana ña'ataca Jesús. Aú nahuá'a ricá apojó, naña'atácaloje ricá penaje. Naña'atá ricá.

<sup>2</sup> Ejomi surárana a'año rihuíla'aru nacojé tujripi chipúca'atacanami. Na'á rinacojé a'arumacaji ipirálucuni quemachi.

<sup>3</sup> Quéchami ne'ejnajica rahua'ajé rajalácaje. Marí que najalácajica ricá majopeja:

—Judíona i'imacana, ¿picá?

Re'iyá caja naña'atá ricá pajimaya nayáte'ela aú.

<sup>4</sup> E caja Pilato jácho'oro piño riñacaré chiyá. E rimá najló:

—Nuhúa'icha piño ricá majó ijimaje. Nuhuata ihue'epica uncá rila'alá pu'uhuaré, nuhuajácaloje ricá penaje.

<sup>5</sup> E Jesús mujlúca'ari majó najimaje. Tujripi chipúca'atacanami i'imari rihuila'aru nacú. A'arumacaji ipirálcuni quemachi, ne'emacana a'acare rinacuhúa, i'imari caja rinacu. E Pilato quemari najló:

—Iyacá'o marí ina'iqué chaje.

<sup>6</sup> Namaca aú ricá, sacerdotena huacára'ajeño, policiana, quele ja'año jahuíyo'oje. Nemá rijló:

—Chuhua pihuacára'a racúhua'atacana a'ahuaná apiyácanami nacojé. Pihuacára'a racúhua'atacana a'ahuaná apiyácanami nacojé —que huánija nahuíyo'oca.

Raú Pilato quemari najló:

—Uncá nuhue'epila na chónaca nuhuacára'acajla rinócana. Icó ta ña'ajeño ricá icó, acúhua'atacaloje ricá a'ahuaná apiyácanami nacojé penaje.

<sup>7</sup> Judíona naquiyana quemáño rijló:

—Rila'acale ricó Tupana I'irí que, pachá huenoje ricá. Huapuráca'alo lana'aquejami quemari huanacu, huenócaloje ina'iqué quemáño nanacuhúa: “Tupana I'irí nucá” que —que nemacá rijló.

<sup>8</sup> Rejéchami cajrú Pilato quero'ocó.

<sup>9</sup> Raú ripa'ó piño riñacaré chojé Jesús hua'até pura'ajó. E rimá rijló:

—¿Mere eyaje picá?

Uncá ra'ajipalá rijló.

<sup>10</sup> Pilato quemari piño rijló:

—¿Naje chi uncá pa'ajipalá nojló? ¿Uncá chi pihue'epila ne'emacánaca nucá. Nuhuátaquela nuhuacára'acajla pacúhua'atacana a'ahuaná apiyácanami nacojé ca'ajná, nócho'otacajla ca'ajná picajla naliyá?

<sup>11</sup> Jesús quemari rijló:

—Uncáquela Tupana yuríajla pihuacára'aca nula'acana ilé que, uncá meño'ojó nala'alajla nucá chapú. Ñaquele ricá, Judas, a'acare pijló nucá, la'arí chapú pichaje huani —que rimacá rijló.

<sup>12</sup> Raú ri'ijnatá ripéchuhua meque ca'ajná rácho'otacajla ricá naliyá. E'iyonaja cajrú huani judíona jahuíyo'oca rijló. Nala'á mahuó ricá; nemá rijló:

—Pácho'otajica ee ricá, chapú pipechu i'imajica romano te'eré eyaje huacára'ajeri nacú. Huahuacára'ajeri caja ricá. Jesús la'arí rinacuhúa huahuacára'ajeri que. Aú huahue'epí chapú ripechu romano te'eré eyaje huacára'ajeri nacú —que nemacá Pilátojo.

<sup>13</sup> Marí que nemacá aú, Pilato huacára'ari piño Jesús huá'acana huaca'apoyo. E Pilato yá'aro ñáca'ajori chu. Re rimaqué ina'iqué nacú méqueca nahuajájica necá. Riyá'aquelo íí i'imari Gabata hebreo pura'acó chu. Marí que quemacánaca ricá: “Jipa ayúra'atacanami” que quemacánaca ricá napura'acó chu.

<sup>14</sup> Pajlhuua cala yuriro natucumá nale'ejé fiesta Pascua queño'ocóloje penaje. Yehuíchami caápu'ucu chami Pilato quemari judíonajlo:

—Marí i'imacana.

<sup>15</sup> Raú nahuíyo'o rijló:

—¡Rinócana palani! ¡Rinócana palani! ¡Pihuacára'a racúhua'atacana a'ahuaná apiyácanami nacojé! —que nahuíyo'otaca rijló i'imacá.

Pilato quemari najló:

—¿E chi ihuátaca nuhuacára'aca i'imacana jacúhua'atacana a'ahuaná apiyácanami nacojé? E sacerdotena huacára'ajeño quemáño rijló:

—Romano naquiyana huacára'ajeri, huahuacára'ajeri caja ricá. Ricaja calé, pajlhuuaja, hue'emacana. Uncá na apú i'imalá.

<sup>16</sup> Marí caje aú Pilato a'arí najló Jesús. E najña'á ricá, nacúhua'atacaloje ricá a'ahuaná apiyácanami nacojé penaje.

*Nacúhua'ataca Jesús a'ahuaná apiyácanami nacojé yucuna marí:*

*(Mt 27.32-44; Mr 15.21-32; Lc 23.26-43)*

<sup>17</sup> A'ahuaná apiyácanami rihuacúla'apa que Jesús i'ijnacá najhua'até. Ne'ejná ají que a'ajná ño'ojó yenuri ejo. Ina'iqué huila'arumi aphinami que yenuri amácano. Gólgota ríí napura'acó chu, hebreo pura'acó chu. E caja nephá rejo.

<sup>18</sup> Rejé nacúhua'ata ri'imacá a'ahuaná apiyácanami nacojé. Rahu'á iyámaja pumitanó nacúhua'ata ajopana.

<sup>19</sup> E caja Pilato lana'arí marí que: “Jesús, Nazaret eyaje ricá. Judíona i'imacana ricá.” Ejomi napato'otá lana'aquejami Jesús chaje.

<sup>20</sup> Pajmíla ahua'á nacúhua'ata Jesús i'imacá. Ñaquele cajrú judíona rehuá ja'apácaño amaño méqueca lana'aquejami quemacá. Rilana'á ri'imacá, hebreo pura'acó chu, griego pura'acó chu, latín pura'acó chu. Hueji quele pura'acó chu rilana'á ri'imacá.

<sup>21</sup> E sacerdotena huacára'ajeño, judíona naquiyana ne'emacá, quemañó Pilátoljo:

—Uncá paala pilani'ichaje: “Judíona i'imacana ricá”, que pilani'ichaca ricá. Marí que rilana'acana palani: “Rimá rinacuhá: ‘Judíona i'imacana nucá’ que”.

<sup>22</sup> Aú Pilato quemari najló:

—Caja queja nuhuáchiyaca rilana'acana. Caja queja riyuríjico.

<sup>23</sup> Pa'u quele surárana acúhua'ataño Jesús i'imacá. Nacúhua'ata ricá ejomi najña'á ra'arumacami, natamáca'atacaloje najluhua ricá penaje. Ra'arumacami huaphereni, richaje rica'ajícarenó rinacuhá, richuhá ña'acanami ri'imacá.

<sup>24</sup> E surárana quemañó pajlocaca:

—Uncá huajíyo'otálaje ricá, huatamá'atacaloje huachó ricá penaje. Palani huacátajico nacje nacú, chá'atajeri huecá ña'ajeri rijluhua ricá —que napura'acó ra'arumacami nacú.

Marí que nala'acá aú nala'á Tupana puráca'alo lana'aquejami quemacá nanacu i'imacá que. Marí que rimacá: “Natamáca'atajica no'orumacami najluhua. Nacaje nacú cátacono aú nahue'epeje ritamáca'atacana najluhua.” Rimacá júpimi rinacu i'imacá queja surárana la'acá ri'imacá.

<sup>25</sup> Jesús jaló, ro'ohueló hua'até, i'imaño a'ahuaná apiyácacanamí ahua'á. Jesús acúhua'acaro nacú ahua'á ne'emá. Re caja María, Cleofas yajalo, i'imayo. María Magdalena i'imayo caja najhua'até.

<sup>26</sup> Re Jesús jaló tára'ayo ra'apí pajluhuaaja ra'apiyateje hua'até. Ricá íqui'ija rihuátacare ri'imacá. Jesús amaca aú rutára'aco ra'apiyateje hua'até, rimá rojló marí que rinacu:

—Chuhuaca ricá i'imajeri pi'irí que.

<sup>27</sup> Quéchami rimá ra'apiyatéjelo:

—Rucá i'imajeyo paló que chuhuaca.

—Je —que rimacá.

Reyá a'ajná ño'ojó ruyuró ilé ra'apiyateje ñacaré chu.

*Jesús taca'acá yucuna marí:*

*(Mt 27.45-56; Mr 15.23-41; Lc 23.44-49)*

<sup>28</sup> Marí que Jesús quemacá najló i'imacá. Caja rihue'epí riñapátaca risápaca'ala la'acana. E rimá marí que:

—Macajreni nunúru'upi chu.

Marí que rimacá aú rimá Tupana puráca'alo lana'aquejami quemacá rinacu que.

<sup>29</sup> Re i'ichilá i'imari pajlúhua'ajlu. Cajmú caje jalá ñapátacanamí i'imari richu. Ca'amani ri'imacá. “Macajreni nunúru'upi chu” que rimacá aú, nejata nacaje jamára'apani ralá aú. Ejomi napatacá yenoje ricá isíjila ina aú, Jesús i'iracáloje ricá re'iyayá penaje.

<sup>30</sup> Jesús i'irari re'iyayá ricá. Quéchami rimacá marí que:

—Caja nuñapáchiya nusápaca'ala.

Ejéchami racúhua'ataca rihuíla'aru. Ejé caja ritaca'á i'imacá.

*Pajluhuaaja surara jo'ocá Jesús e'iyajé huejucú aú yucuna marí:*

<sup>31</sup> E caja judíona naquiyana i'ijnaño Pilato amaje. Nemá rijló, rihuacára'acaloje surárana yupa'ataca a'ahuaná apiyácacanamí naquiyá acúhua'acaño tajné penaje, nataka'acáloje quiñaja raú penaje. Quéchami najña'acáloje natami reyá penaje. Uncá nahuátala natami acúhua'aco re muni que ejená. Muni que i'imari huatána'acaje huacajé. Rihuacajé aú fiesta queño'oró. Ñaquele apú huacajé chaje nephaca ra'apí.

<sup>32</sup> E Pilato huacára'ari surárana rejo natajné yupa'ataje. Nephá rejo. Nayupa'atá apú tajné paminco, ejomi apú piño. Nacúhua'atacarena Jesús ahua'á ne'emacá.

<sup>33</sup> Ejomi ne'ejná Jesús ahua'ajé, amaño maapami que cha ritaca'acá. Aú calé uncá nayupa'atala ritajné.

<sup>34</sup> E'iyonaja calé pajluhuaaja surara jo'orí re'iyajé huejucú aú ripara'alá ja'apiyá. Raú rírami juni hua'até aco'oró richiyá.

<sup>35-37</sup> Uncá nayupa'atala ritajné. Tupana puráca'alo lana'aquejami quemacá rinacu queja nala'acá ricá. Marí que rimacá rinacu: “Uncá nayupa'atálaje ritajné.” Apa'amá e'iyá rimá piño marí que: “Namaje piño ricá penájemi najo'ocare e'iyajé.”

Nucá, Juan, lana'arí riyucuna ijló. Nomácale méqueca nala'acá ri'imacá. Aú nuhue'epí quehuaca ricá. Nala'acá nohua'á ri'imacá que huani nu'umacá riyucuna. Ila'acáloje quehuaca que ricá penaje nu'umá ijló riyucuna.

*Nato'otaca Jesús tami támijimi to'otáquelana chojé yucuna marí:*

*(Mt 27.57-61; Mr 15.42-47; Lc 23.50-56)*

<sup>38</sup> Marí que nala'acá ri'imacá. Caja surárana yupa'ataño ajopana Jesús ahua'á i'imacaño tajné i'imacá. Ejomi apú i'ijnari ritami quejá'aje Pilato liyá, rito'otácaloje ricá liri caje chojé penaje. Ríí i'imari José. Pajimila Arimatea eyaje ri'imacá. Jesús ja'apiyá jema'ajeri ri'imacá. E'iyonaja uncá ri'imalá riyucuna ajopánajlo, riquero'ocolo judíona naquiyana piyá. Ricá penájemi i'ijnari Pilato chaje Jesús tami quejá'aje riliyá. Pilato quemari: "Je" que. Aú ri'ijná Jesús tami ña'ajé.

<sup>39</sup> Nicodemo i'ijnari caja rijhua'até riñaté a'ajeri penaje. Júpimi que Nicodemo iphaca Jesús nacú lapí i'imacá, ripura'acóloje rijhua'até penaje. Ricá penájemi i'ijnari José hua'até riñaté a'ajeri penaje. Rijña'á rijhua'ató pusana caje, pu'umé jamarí. Aloe ríí. Treinta jenari rijña'á i'imacá. Mirra quechípa'acanami hua'até ri'imacá.

<sup>40</sup> E caja José, Nicodemo, quele huitúca'ataño Jesús tami. Na'á pusana, pu'umé jamarí, a'arumacaji jítami e'iyajé. Quéchami napila'ataca a'arumacaji jítami aú ritami. Marí queja judíona la'ajica támijimina nacú.

<sup>41</sup> Nacúhua'ataca Jesús apucuna ahua'á a'ahuaná ejátaquelana i'imacá. Re jipa ichácanami i'imari ucapú que, nato'otácaloje támijimina richojé penaje. Huajé ichácanami ri'imacá, uncá jo'ó nato'otálare chojé támijimina ri'imacá.

<sup>42</sup> Richojé nato'otá Jesús tami, rahua'á ri'imacale. Yehuicha judíona le'ejé huatána'acaje huacajé iphaca rená chojé. Ñaquele rejoja najña'á ri'imacá.

## 20

*Jesús macápo'oco yucuna marí:*

*(Mt 28.1-10; Mr 16.1-8; Lc 24.1-12)*

<sup>1</sup> Sápacaje queño'ocó huacajé, lapiyami huani, María Magdalena i'ijnayo támijimi to'otáquelana ejo. Luhuichipica iná me'etaca ee, ru'ujná rejo. Ruphá rahua'ajé a'ajnáreje que, amayo caja jipa i'imacá jatátáqueja rinumanaya.

<sup>2</sup> Raú rupa'ó jecho'oquelo ropumí chuhua'á riyucuna i'imajé Pédrojlo, apú Jesús ja'apiyateje hua'atejlo. Iquí'ija Jesús huátacare ri'imacá apú. E ruphá nanacu. E rumá najló:

—¿Meño'ojó pajacá naji'ichá hue'emacánami chu tami? Uncá ri'imalá támijimi to'otáquelana chu. Uncá nuhue'epila meño'ojoca naji'ichaca ritami —que rumacá najló.

<sup>3</sup> Marí caje aú Pedro, rijhua'aque'ehue, quele jácho'oño, ne'ejnacáloje támijimi to'otáquelana ejo penaje.

<sup>4</sup> Jecho'oquelo ne'ejnacá rejo. Apú Jesús ja'apiyateje ja'apáñari Pedro jecho'ocajo aú.

<sup>5</sup> Riphá rejo. E acúhua'acano riyacá'aco richojé. Amari a'arumacaji jítami pitacó re, napila'acare rinacu i'imacá. Rinumaná chiyaja calé riyacá'o; uncá rimujlúca'ala richojé.

<sup>6</sup> Júpichami Pedro iphari rihuajlé chojé. Pu'ucuja ilé mujlúca'aca richojé. Ricá amari caja a'arumacaji jítamija pitacó re.

<sup>7</sup> A'arumacaji napára'atacare aú Jesús jimami yá'aro apojó pitá. Uncá apú a'arumacaji jítami ahua'á calé ri'imacá. Apojó riyá'o riliyá, palá nótanami pachácaca.

<sup>8</sup> E caja apú Jesús ja'apiyateje, pamineco iphácare rejo, mujlúca'ari caja richojé. Meñaru ramaca richiyá. Raú rihue'epí quehuaca Jesús macápo'oco i'imacá.

<sup>9</sup> Tupana puráca'alo lana'aquejami quemari rinacu marí que i'imacá: "Hueji que cala i'imajemi ritaca'ajica ejomi rimacápo'oyo rapumí chuhua'á." Rihuacajé uncá jo'ó nahue'epila meque quemacánaca ricá.

<sup>10</sup> Caja iyamá Jesús ja'apiyatéjena naquiyana amaño meñaru Jesús. Aú napa'ó nañacaré ejo.

*Jesús ya'atacó María Magdalénajlo yucuna marí:*

<sup>11</sup> Reja María yuriyo támijimi to'otáquelana ahua'á. Rahua'ája ru'umá iyacaje nacú. E'iyohuá que rocúhua'aco ají que, ruyacá'acoloje richojé penaje.

<sup>12</sup> E romá iyamá je'echú chiyájena, Tupana hua'atéjena, yá'aco Jesús tami apumí chu. Jaré nojé na'arumacá i'imacá. Apú yá'aro Jesús huíla'arumi i'imacá ejo, apú ri'imami i'imacá ejo.

<sup>13</sup> Ejéchami Tupana hua'ateje quemacá rojló:

—¿Naje piyá?

Raú rumá najló:

—Caja naji'ichá Nu'umacánami chu tami. Uncá nuhue'epila meño'ojoca naji'ichaca ricá —que rumacá najló.

<sup>14</sup> Marí que rumacá aú rupajno'ó yacá'ajo, amayo Jesús tára'aco ruhuajlé chu. E'iyonaja uncá ruhue'epila Jesusca ri'imacá.

<sup>15</sup> E Jesús quemari rojló:

—¿Naje piyá? ¿Na piculá?

Rupechu i'imá rinacu: "A'ahuaná ejátaquelana e'iyá sápa jeri japi ricá." Ñaquele rumá rijló:

—Picá ca'ajná ji'ichari ritami maare eyá. Chuhua pimá nojló meño'ojoca piji'ichá ritami, nu'ujnacáloje rijña'ajé penaje.

<sup>16</sup> Ejéchami Jesús ajalácaca rucá:

—María —que.

Raú rupajno'ó ruyámojo richaje yacá'ajo, amayo Jesusca ri'imacá. Raú rumá marí que napura'acó chu:

—¡Rabuní!

(“Nohuíña'atajeri”, que quemacánaca Raboni.)

<sup>17</sup> Jesús quemari rojló:

—Pisápaniya nunacu. Uncá jo'ó nu'ujnalá Nora'apá i'imacá ejo. Chuhua pipa'ó, pi'imichachi nuyucuna no'opiyatéjenajlo. Nojena que huani necá nojló. Chuhua Nora'apá ejo nu'ujichaca; Jara'apá caja ricá. Nuchi'ináricana ricá; Ichi'ináricana caja ricá —que rimacá rojló.

<sup>18</sup> Ejomi María Magdalena i'ijnayo riyucuna i'imajé ra'apiyatéjenajlo. Ru'umá najló méqueca romaca Nahuacára'ajeri Jesús yucuna. Méqueca rimacá rojló yucuna ru'umá caja najló.

*Jesús ya'atacó ra'apiyatéjenajlo yucuna marí:*

(Mt 28.16-20; Mr 16.14-18; Lc 24.36-49)

<sup>19</sup> Rihucacajé caja lapí, sápacaje queño'ocó huacajé, Jesús ja'apiyatéjena jahuacaño nañacaré chu. Chahuíña'queja que rinumaná i'imacá, naquero'ocole judíona naquiyana piyá. E majopeja re'iyayaja Jesús mujlúca'aca nañacaré chojé nachaje. Ne'iyajé ritára'o; rajalaca necá; rimá najló:

—Ipechu i'imá palá.

<sup>20</sup> Marí que rimacá ejomi, riya'atá najló itapuhua cupijneremi riyáte'ela yá'aca e'iyá. Riya'atá caja najló ripara'alá ja'apiyá huejucú cupijneremi. Pu'ují huani napechu i'imacá Ne'emacana amácana aú.

<sup>21</sup> Rejomi Jesús quemari piño najló:

—Ipechu i'imá palá. Nora'apá huacára'aca nucá que nacaje la'acana nacú, que caja nuhuacára'aca icá.

<sup>22</sup> Ejomi rapho'ó nachaje. E rimá najló:

—Ijña'á ijluhua Tupana Pechu.

<sup>23</sup> Amájico ee ina'uqué chaje pu'uhuaré nala'acare liyá, uncá napachaje i'imalaje. Uncájica ee amó nachaje pu'uhuaré nala'acare liyá, napachaje yuréjero najhua'atoja —que rimacá najló.

*Huajé Tomás amaca Jesús rimacápo'oco ejomi yucuna marí:*

<sup>24</sup> Pajluhuaja Jesús ja'apiyateje ii i'imari Tomás. “Iyamá moto'ocaño naquiyana ricá,” que nemacá rinacu. Uncá ri'imalá najhua'até re Jesús ya'atacó najló ee.

<sup>25</sup> Riphaca nanacu ejomi ne'emá rijló riyucuna, nemá rijló:

—Hue'emacana i'imichari majó huachaje.

Raú Tomás quemari najló:

—Uncá noma'alá ja'apiyá. Uncájica ee nomá itapuhua cupijneremi riyáte'ela yá'aca e'iyá, uncá nuhue'epila quehuácaca imacá nojló. Uncájica ee nusapa riyáte'ela yá'aca e'iyá, ripara'alá ja'apiyá ricupijneremi chu, uncá noma'alá ja'apiyá —que rimacá najló.

<sup>26</sup> Pajluhuaja sápacaje i'imacá ejomi Jesús ja'apiyatéjena jahuacaño piño pají chojé. Tomás i'imari caja najhua'até re. Jesús mujlúca'ari piño ne'iyajé. Chahuíña'aqueja pají numaná i'imacá. E'iyonaja rimujlúca'a re'iyayá. E rajalaca necá; rimá najló:

—Ipechu i'imá palá.

<sup>27</sup> Ejéchami rimacá Tomasjlo:

—Pisapa piyatehuana aú nucupijneremi chu. Pamá nuyáte'ela yá'aca. Pácho'ota caja piyáte'ela majó pisápachi nupara'alá ja'apiyá nucupijneremi nacú. Pipechu i'imaniya nunacu: “Uncá ricá calé namácare i'imacá”. Pema'á na'apiyá.

<sup>28</sup> Ejéchami Tomás quemacá:

—Nuhuacára'ajeri, Nuchi'ináricana.

<sup>29</sup> Jesús quemari rijló:

—Tomás, chuhua pihue'epí cajmuni jo'ó nucá, pamácale nucá. Palani najló, hue'epiño ejo'ocaja nucá, uncá namala nucá. E'iyonaja nahue'epí ejo'ocájaca nucá —que rimacá rijló.

*Juan quemari na penájeca rilana'acá marí yucu papera chojé i'imacá.*

<sup>30</sup> Jesús la'arí cajrú apú nacaje, apú nacaje que, uncá meño'ojó apú la'alare. Rahua'á hue'emanoja rila'ajícana ricá. Uncá nulana'alá piyuque huani riyucuna marí papera chojé. Rinaquiyánaja calé nulana'á.

<sup>31</sup> Maáreje calé nulana'á riyucuna, ihue'epícaloje raú quehuaca Jesús, Tupana huacára'acare majó ri'imacá. Ihue'epícaloje raú Tupana I'irica ricá penaje nulana'á riyucuna. Caphí ipechu i'imacá aú richojé, ra'ajé ijlo cajmuchaji, i'imacáloje matajnaco je'echú chu raú penaje. Marí caje ihue'epícaloje penaje nulana'á riyucuna.

## 21

*Jesús ya'atacó iyamá cuhuá'ata quele ra'apiyatéjenajlo yucuna marí:*

<sup>1</sup> Apú huacajé piño Jesús ya'ataró piño ra'apiyatéjenajlo. Caesa e ne'emacá. Caesa íí Tiberias.

<sup>2</sup> Marí quele i'imaño re: Simón Pedro, Tomás, ricá nemá nacú: “Iyamá moto'ocaño naquiyana ricá” que. Natanael i'imari re caja najhua'até. Pajmilla Caná eyaje ri'imacá. Galilea te'eré pajmilla nacú ricá. Zebedeo yaní i'imaño re caja. Iyamá ajopana Jesús ja'apiyatéjena naquiyana i'imaño caja najhua'até. Marí quele ne'emacá i'imaño re.

<sup>3</sup> E caja Simón Pedro quemari najló:

—Nuhuenare ca'ajé junápeje nu'ujichá.

Raú ajopana quemáño rijló:

—Hue'ejnáje caja pijhua'até. Aú ne'ejná, nahuitúca'a jita chojé. Pajluhua lapí quetana ne'emacá nahuenare ca'acana nacú. Uncá na ñani najña'alá.

<sup>4</sup> Naqueño'ocá me'etácaje ee, Jesús iphari juni turenaje. Ra'apiyatéjena uncá hue'epílaño na ina'uqueca ri'imacá.

<sup>5</sup> E rimá najló:

—¿Uncá chi ijña'alacha jiña?

—Uncá huani huajña'alacha.

<sup>6</sup> —Chuhua ica'á ihuenare ca'aña chojó pitá. Aú ijña'ajé jiñana —que rimacá najló.

Aú naca'á ricá ca'aña chojó pitá. Echéhami cajrú huani jiñana ja'acó richojé. Uncá natejmú iphala nalocópa'ala, nachíra'acaloje necá netane chojé penaje.

<sup>7</sup> Ehuá Jesús ja'apiyateje, íqui'ija rihuátacare, quemari Pédrojlo:

—¡Huahuacára'ajeri ricá!

Marí que rimacá aú Pedro a'arí ra'arumacá rinacuhá richaje, maapami que rica'acare rinaquiyó ri'imacá. Ejomi reño'ó jita chiyá junápeje; i'ihuapari juni turenajo.

<sup>8</sup> Ajopana Jesús ja'apiyatéjena arúca'año juni turenaje. Nachíra'a nahuenare ají que juni turenajo jita hua'ató. Pu'uté jiñana mano'otaca ricá. Uncá júcaje calé ne'emá riturenaya, cien metros quetana ca'ajná ne'emacá a'ajná ño'ojó riturená ahua'ayá.

<sup>9</sup> Narúca'aco ejomi nácho'o jita chiyá pe'iyojó. E namá siyá lucúna'aco. Re pajluhuaja jiña to'oró richá a'amitacajo nacú pan hua'até.

<sup>10</sup> E caja Jesús quemari najló:

—Íji'ichá majó jiñana naquiyana, huajé jji'ichájena.

<sup>11</sup> Aú Simón Pedro huitúca'ari jita chojé. Richíra'a nahuenare ají que que'epé nacojé. Cajrú nojana jíñana i'imaño nahuenare chu. Ciento cincuenta y tres jíñana ne'emacá. Cajrú huani ne'emacá richu. E'iyonaja uncá nacachicha jiyo'olá nahuenare.

<sup>12</sup> E Jesús quemari najló:

—I'ijná huajñachi hua'ajnehuá.

—Je —que nemacá.

Ra'apiyatéjena huo la'aró ra'apejé. Aú calé uncá na quemalá rijló: “¿Na chi picá?” que. Caja nahue'epí Nahuacára'ajeri ri'imacá.

<sup>13</sup> Quéchami Jesús i'ijnacá siyá ahua'ajé. Rijña'a'á ricápojo pan, ritamáca'ata najló ricá. Quéchami rijña'acá piño jiña, ritamáca'atcaloje najló ricá penaje.

<sup>14</sup> Caja hueji que pe cha Jesús ya'atacá ra'apiyatéjenajlo, rimacápo'oco ejomi.

*Jesús pura'acó Simón Pedro hua'até yucuna marí:*

<sup>15</sup> Nañapátaca na'ajnehuá ajñacana ejomi Jesús quemari Pédrojlo:

—Simón, Jonás i'irí picá. ¿E pihuátaca nucá íqui'ija, mariruna pihuátaca chaje íqui'ica?

—A'a, Nu'umacana —que rimacá —picá hue'epiri nuhuátaca picá.

Jesús quemari piño rijló:

—Eco pehuíña'ata ina'uqué, huajé jema'acaño no'opiyá, nupuráca'alo nacú.

<sup>16</sup> Iyamá pe la'acá Jesús quemari piño rijló:

—Simón, Jonás i'irí picá. ¿E pihuátaca nucá íqui'ija?

Pedro quemari rijló:

—A'a, Nu'umacana, picá hue'epiri nuhuátaca picá.

Rimá piño rijló:

—Eco pehuíña'ata no'opiyá jema'ajeño nupuráca'alo nacú.

<sup>17</sup> Hueji que pe la'acá nacú rimá piño rijló ñaque caja:

—Simón, Jonás i'irí picá. ¿E pihuátaca nucá?

Ejéchami Pedro pechu la'acó camu'ují, metú que huani rimacale rijló: “E pihuátaca nucá íqui'ija?” que.

Rimá rijló:

—Nu'umacana, picá hue'epiri piyuqueja nacaje nacojé. Picá hue'epiri caja nuhuátaca picá.

Jesús quemari rijló:

—Eco pehuiña'ata no'opiyá jema'ajeño nupuráca'alo nacú.

<sup>18</sup> Pema'á marí. Hualijímaca pi'imacá huacajé, picó pa'ajícano pinacuhúa pa'arumacá. Pi'ijnacué pihuátaca ejo. Caja phíyu'uque huani pi'imajica ee, ajopana ña'ajeño pa'anapitá ta'arare. Nepo'otaje picá; najña'ajé picá uncá pihuátalare ejo i'ijnacana —que Jesús quemacá Pédrojlo.

<sup>19</sup> Marí que quemacana aú rimá Pedro nacú méqueca ritaca'ajica aquíññojo que. Caja queja nala'acá ricá phíyu'uque ri'imacá huacajé. Tupana palamane aú Pedro la'arí nacaje Tupana huátaca que. Richona chapú rinacu péchuruna noño ri'imacá.

E caja rimá Pédrojlo méqueca nenójica ricá. Quéchami rimacá piño rijló:

—Pácho'oniyo no'opiyá jema'acana chiyá.

*Jesús ja'apiyateje, íqui'ija rihuátacare yucuna marí:*

<sup>20</sup> E caja na'apá ají que a'ajná ño'ojó. E Pedro pajno'oró ají que riyámojo yacá'ajo; amari ra'apiyateje, íqui'ija Jesús huátacare, ja'apaca nápumi chu. Ricá penájemi i'imari Jesús ahua'á najñaca Pascua a'ajnená pajhua'atéchaca huacajé. Ricá quemari Jesúsjlo rihuacajé: “Nu'umacana, ¿na a'ajeri picá pipínánajlo?”

<sup>21</sup> Pedro amaca aú richira'acó nápumi chu, rimá Jesúsjlo:

—Nu'umacana, ¿llé ta, meque ritaca'ajica?

<sup>22</sup> Jesús quemari rijló:

—Apala nuhuata ri'imacá marí eja'ahuá chu majó nupa'ajico ejená. Uncá naje calé nu'umá pijló riyucuna. Ricaja calé numá pijló: Pácho'oniyo no'opiyá jema'acana chiyá — que rimacá Pédrojlo.

<sup>23</sup> Júpichami riyucuna moto'ótaco Jesucristo hua'atéjena e'iyohuá. “Uncá ritaca'alaje” que. E'iyonaja uncá ñacué calé Jesús quemacá i'imacá. Rimá: “Apala nuhuata ri'imacá marí eja'ahuá chu majó nupa'ajico ejená. Uncá naje calé nu'umá pijló riyucuna” —que rimacá Pédrojlo i'imacá.

<sup>24</sup> Nucá po amarí numá nacú ijlo. Palá nulana'acá riyucuna ijlo marí papera chojé. Nucá, ajopana hua'até hue'epiño marí numá nacú quehuaca ricá.

<sup>25</sup> Re cajrú apú nacaje, apú nacaje que, Jesús la'acare i'imacá. Iná huátaquela riyucuna lana'acana papera chojé, uncá pucunaji i'imalajla papérajlo marí eja'ahuá chu, cajrú huani riyucuna i'imacale. Marí que ca'ajná ri'imacajla nuhue'epica.

Maáreje riyucuna tajnaro.

## LOS HECHOS

*Nacaje necá, Jesucristo huacára'acarena, la'acá yucuna marí:*

<sup>1</sup> Nuteló Teófilo, apú huacajé nuhuacára'a pijló papera. Richu nu'umá pijló Jesucristo yucuna. Nacaje rila'ajicare, nacaje rehuíña'atajicare nacú, caje yucuna nu'umá pijló i'ímacá. Pajimato nu'umacá riyucuna pijló. Riqueño'ocá eja'ahuá chu i'ímacana aú nuqueño'ó riyucuna i'ímacana pijló.

<sup>2</sup> Richuhuaaja nu'ujnatá ricá rácho'oco maáreya je'echú chojé ejená. Rejená nu'umá riyucuna. Jesús i'ímacá marí eja'ahuá chu huacajé, ri'ihuapá rijluhua ina'uqué ajopana e'iyayá. Ri'ihuapá necá rijluhua, ne'emacáloje rihuacára'acarena penaje. Rácho'oco je'echú chojé yámona rehuíña'ata necá naca nala'ajicare nacú. Tupana Pechu quemacá rijló que caja rimacá najló.

<sup>3</sup> Nenoca Jesucristo huacajé rijña'á chapú caje yajhué panacu i'ímacá. Ritaca'acá ejomi rimacápo'o piño rapumí chuhúa. Ejomi ri'ijná ra'apiyatéjéna chaje. Cajrú rila'acá ne'iyohúa nacaje, nahue'epicaloje cajmuni ri'ímacá raú penaje. Pulapé namaca ri'ímacá. Ri'imá najhua'até iyamá ina'uqué le'ejé que cala rimacápo'oco ejomi. Méqueca Tupana huacára'aca ina'la'acá nacaje, nacú ripura'ó najhua'até rihuacajé.

*Jesús quemari najló: "Nuhuacára'aje ijló Tupana Pechu." Riyucuna marí:*

<sup>4</sup> Ejo'ocaja Jesucristo i'ímacá ra'apiyatéjéna hua'até huacajé rimá najló marí que:

—Jácho'oniyo marí pajimila Jerusalén eyá. Ihuata maare. Nora'apá huacára'ajica ijló ricá rimacare nacú, quetana ihuátaca maare. Caja nu'umá riyucuna ijló i'ímacá —que rimacá najló.

<sup>5</sup> E rimá piño najló:

—Juanmí chu la'aqeri bautizar ina'uqué juni aú. Eyá nucá a'ajeri ijló Tupana Pechu meque cala i'imajemí. Marí que nula'ajica bautizar ina'uqué —que rimacá najló.

*Jesús jácho'oco je'echú chojé yucuna marí:*

<sup>6</sup> E caja nahuacó piño Jesús hua'até yenuri i'ihuátaje. E nemá rijló:

—Hue'emacana, ¿chuhua chí pa'ajica pajluhuaaja Israelmí chu laquénami naquiyana hue'emacana penaje, hue'emacana i'ímacáloje júpimi ri'ímacá que caja penaje? —que nemacá rijló.

<sup>7</sup> E Jesús quemari najló:

—Re Nora'apá pechu nacuja calé ricá. Uncá rimalaje ina'uquejlo méquechemica ri'imajica. Uncá rinacu quemacana i'malaje ijló marí quéchami ri'imajica.

<sup>8</sup> Eyá marí que ri'imajica ijló: Nucá a'ajeri ijló Tupana Pechu. Caphí ipechu i'imajica raú. Quéchami i'imajica nuyucuna ajopánajlo, ajopánajlo que. Jerusalén ehuá i'ímacáñojlo i'imajé nuyucuna. Icó ja'apájeño piyuque Judea te'eré nacuhúa, piyuque Samaria te'eré nacuhúa hua'ató, nuyucuna i'ímacana nacú. Ya'ajnao huani i'ijnajeño nuyucuna i'imajé ajopánajlo, ajopánajlo que —que rimacá najló.

<sup>9</sup> Marí queja calé rimacá najló riyámona caja penaje. Ejéchami rácho'oñaca necá je'echú chojé. Nayacá'anoja richaje rácho'oñaca necá. Rácho'o ají que yenoje je'echú chojé. Juni suhuáca'ala e'iyajé ricapichó. Ricá pumí chiyó uncá namala ricá piño.

<sup>10</sup> Nayacá'o rápumi chu ají que je'echú chojé. Hua'ató que iyamá ina'uqué ya'atacó najló. Tupana hua'atéjéna, je'echú chiyájéna, ne'emacá. Nalapa'ó nahua'á. Jaré nojé na'arumacá i'ímacá.

<sup>11</sup> E nemá najló:

—Galilea eyájéna, ¿Naje ilapa'ó maare, je'echú chojé yacá'acano nacú? Ilé Jesús jácho'oñachari icá je'echú chojé, ricá huaícha piño majó. Amíchaca rácho'oco, que caja rihuitúca'ajica piño majó —que nemacá najló.

*Júdasmi chu apumí chojé na'acá Matías yucuna marí:*

<sup>12</sup> E caja nahuitúca'a yenuri i'ihuátaya. Olivos na'acá yenuri íí. Jerusalén ahua'á ricá. Iyajmela eja'ahuá e'iyohúa quetana júcaca ricá Jerusalén ahua'ayá. Nahuitúca'a ri'ihuátaya. Reyá napa'ó ají que Jerusalén ejo.

<sup>13</sup> Iphaño pajimila e'iyajé. Apú quemari najló i'ímacá, nayurícaloje najhua'até penaje. Riñacaré chojé nephá. E nácho'o yenoje ucapú chojé. Marí quele nanaquiyana i'ímacá: Pedro, Santiago, Juan, Andrés, Felipe, Tomás, Bartolomé, Mateo, apú Santiago. Rara'apá íí i'imari Alfeo. Apú íí i'imari Simón, cananista naquiyana ri'ímacá. Judas apú, Judas e'ehué Santiago. Marí quele nanaquiyana i'ímacá.



<sup>14</sup> Yenoje ucapú chojé nahuacó, napura'acóloje Tupana hua'até penaje. Re caja ajopana jahuacaño najhua'até. Jesús merénami, ralomi, ajopana inaana, quele jahuacaño caja rejé najhua'até.

<sup>15</sup> E caja apú huacajé piño nahuacó. Ciento veinte quele ca'ajná ne'emacá piyuqueja re. E Pedro tára'aro, rimá Jesús ja'apiyá jema'ajéñojlo marí que:

<sup>16</sup> —Nojena, Tupana Pechu i'imarí Júdasmí chu yucuna Davidmí chujlo i'imacá. Riyucuna rilana'á patera chojé i'imacá. Tupana puráca'alo lana'aquejami naquiyana ricá. Rimacá rinacu que Júdasmí chu la'acá i'imacá. Rihuá'a Jesús pinana Jesús i'imacá ejo, ra'acáloje najló ricá penaje.

<sup>17</sup> Huajhuáque'e ri'imacá. Huala'ajica nacaje que caja rila'ajícano nacaje huajhua'até i'imajica.

<sup>18</sup> Na'á rijló liñeru, rila'acáloje pu'uhuaré raú rijluhua penaje. Chapú rila'acá ejomí ripa'atá najló naliñerutemi. Uncá rihuátala rejéchami ricá. Riliñerutemi aú nahuarúhua'a te'erí, nasa'acáloje támijimina re'iyajé penaje. Júdasmí chu pa'ataca najló naliñerutemi ejomí rinó ricó marí que: Cajrú te'erí mata'acá lupucuya racúhua'ata ricó panúru'upiya. Ricachicha aú ripapí mata'arí ra'apiyá. Aú ra'ó ají que pe'ehuato cahuacaje. Caja ripajára'o re'iyajó. Piyuque ri'ijñepichimi hua'ató jeño'otaro majó re'iyayá. Marí que rinoca ricó i'imacá.

<sup>19</sup> Jerusalén eyájena jema'acá aú riyucuna na'á ilé te'erí íi Acéldama. Marí que Acéldama quemacana napura'acó chu: “Jirá pucunami ricá” que.

<sup>20</sup> Marí que Tupana puráca'alo lana'aquejami Salmos quemacá rinacu: Riñacaremí yuréjero maminariru que.

Meñaru richu i'imajica.

Apú yuréjero rapumí chojé risápaca'alami nacú sapajeri, que Tupana puráca'alo lana'aquejami quemacá rinacu.

<sup>21</sup> Pedro quemarí piño najló:

—Re maare huajhua'até huajhuáque'ena, hua'acáloje pajluhuaja nanaquiyana Júdasmí chu apumí chojé penaje. Capinaca ne'emacá huahua'á Jesús i'imacá huajhua'até huacajé.

<sup>22</sup> Juanmí chu la'acá bautizar Jesucristo huacajé naqueño'ó huajhua'até i'imacana. Chuhuata hua'ajica pajluhuaja nanaquiyana, ri'imacáloje Jesucristo yucuna ajopana, ajopánajlo que huajhua'até penaje. Ra'apátacaloje rimacápo'oco yucuna ajopana, ajopánajlo que penaje hua'ajé ricá. Amari Jesucristo, rimacápo'oco ejomí penájemi, ricá hua'ajé rapumí chojé —que Pedro quemacá najló i'imacá.

<sup>23</sup> Raú nahuá'a ne'iyayá iyamá. Apú íi i'imarí Matías. Apú íi i'imarí José Justo (apú ríi i'imarí caja Barsabás). Quele iyamá nahuá'a ne'iyayá.

<sup>24</sup> Rejomí napura'ó Tupana hua'até. Marí que nemacá rijló:

—Hue'emacana, pu'uhuacá pijló piyuqueja ina'uqué pechu. Chuhuaca pimá huajló mecajeca pihuata huajhuáque'ehue penaje.

<sup>25</sup> Jesucristo huacára'acarena huecá. Huajhua'até risapaje Júdasmí chu apumí chojé. Pu'uhuaré rila'acá aú rácho'o richiyá i'imacá. Ri'ijná chapú caje yajhué amáquelana pucuna chojé. Pu'uhuaré la'ajéñojloja calé ricá pucunaji —que nemacá Tupánajlo.

<sup>26</sup> Ejomí naca'á nacaje jítami lana'aquejami nacuri, namácaloje mecajeca yurico najhua'até penaje. E ra'ó Matíasjlo. Marí caje aú na'á Matías Jesucristo huacára'acarena huáque'ehue penaje. Rijhua'até ne'emá piño iyamá iphata j'i'imahe nacojé quele.

## 2

### *Tupana Pechu ja'acó Jesucristo ja'apiyá jema'ajeño e'iyajé yucuna marí:*

<sup>1</sup> E caja nale'ejé fiesta iphari rená chojé najló. Pentecostés ríi. Rihuacajé Jesucristo ja'apiyá jema'ajeño jahuacaño piño pají chojé.

<sup>2</sup> E mana'í chiyó nema'acá cajrú huani mejeji queñótaco je'echú chiyá. Ehuá nema'acá rimejé huitúca'aca majó je'echú chiyá. Ehuá puhua'ajné huani rimejé ja'acó majó. Carená mejé que rimejé i'imacá juu que. Ehuá rimejé ja'acó nañacaré chojé, piyuqueja. Ucapú ne'emacare chu chojé hua'ató rimejé ja'aró.

<sup>3</sup> Rejéchami namaca quera'atani ya'atacó najló. Ina'uqué lená lé'epequeno namaca ricá. Ejomí ritamáca'ato nehuíla'aru chaje. Apú huíla'aru chaje, apú huíla'aru chaje que ritamáca'ataco.

<sup>4</sup> Ejéchami Tupana Pechu ja'acó ne'iyajé. Raú naqueño'ó me'echuje puráca'aloji chu pura'acano. Uncá nema'alare chu napura'ó. Tupana Pechu huacára'aca que napura'acó.

<sup>5</sup> Rihuacajé íqui'iruna judíona i'imaño Jerusalén e. Cajrú péchuruna Tupana nacú ne'emacá. Ñaquele ne'ejná rejo i'imacá. Ajopana te'eré eyájena, ajopana te'eré eyájena que ne'emacá.

<sup>6</sup> E cajrú nema'acá namejé a'ajnare que, hueru, hueru, hueru que. Aú ne'ejná rejo yacá'ajo. Jahuacaño nachaje cajrú. Nema'á napura'acó napura'acó chu. Aú nemá: “¡Meque piyuque huani!” Piyuqueja necá jema'año pajluhuano pajluhuano queja napura'acó napura'acó chu. Napura'acó nate'eré ehuá que caja napura'acó i'amacá.

<sup>7</sup> Aú napechu i'imá nanacu: “¿Meque necá, cajona?” E nemá pajlocaca:

—Galilea eyájena necá piyuqueja. Huapura'acó pajno'oró paliyáaca.

<sup>8</sup> E'iyonaja piyuque huecá jema'año napura'acó huapura'acó chu. Huapura'acó hu-ate'eré nacú que caja napura'acó. ¿Meque chi ricá?

<sup>9</sup> Re Partia eyájena maare. Re caja Media eyájena, Elam eyájena, Mesopotamia eyájena, Judea eyájena, Capadocia eyájena, Ponto eyájena, Asia eyájena,

<sup>10</sup> Frigia eyájena, Panfilia eyájena, Egipto eyájena, ajopana Africa eyájena, Cirene eyájena necá. Re caja Roma eyájena maare hue'iyá, maárohua ñañacaré. Ne'iyajena judíona necá. Eyá ajopana uncá judíona calé necá, e'iyonaja calé napuráca'alo ja'apiyá necá najhua'até.

<sup>11</sup> Re caja maare Creta eyájena, Arabia eyájena. E'iyonaja piyuqueja huecá jema'año méqueca nemacá huajló. Nacaje palani huani Tupana la'acare yucuna ne'emá huajló. Huapura'acó chu huánija huema'á riyucuna —que nemacá pajlocaca.

<sup>12</sup> Marí caje aú cajrú huani ne'ejnataca napéchuhua rinacu. Nemá pajlocaca:

—¿Meque la'ajé chi nema'acá huapura'acó? Huemi'ichá napura'acó richu.

<sup>13</sup> Ajopana la'año ne'echajno necá. Nemá nanacu:

—Mahuirúque'echana ta necá.

*Pedro i'amacá riyucuna najló yucuna marí:*

<sup>14</sup> E caja Pedro tára'aro. Ñaque caja ajopana Jesucristo huacára'acarena tára'aco rijhua'até. Pajluhua iphata ji'imaji nacojé quele ne'emacá, tára'año Pedro hua'até. Caphí Pedro quemacá najló marí que:

—Judea ehuájena, piyuque icá maare Jerusalén ehuá i'imacaño, jema'á numájicare nacú ijlo chuhua, ihue'epícaloje ricá penaje.

<sup>15</sup> ¿Meque chi ipechu huanacu? “Mahuirúque'echana ca'ajná necá” que. Uncá mahuirúque'echana calé caja ajopana Jesucristo huacára'acarena tá huecá. Uncá na calé yuhuéra'aro me'etení que cha. Lapiyami jo'ó majó. Pa'u que cuhuá'ata quele camú jená me'etení —que rimacá najló—.

<sup>16</sup> Uncá ta huayuhuéra'alo. Amaca me'etení quele Joelmi chu quemacare nacú i'amacá. Tupana puráca'alo ja'apátajerimi chu ri'amacá. Marí que rimacá rinacu i'amacá:

<sup>17</sup> Marí que Tupana quemacá:

Eja'ahuá iphájica ee rená chojé, ritajnácaloje penaje huacajé, no'ojé Nupechu cajrú ina'uquejlo.

Ra'apiyá que iyani ja'apátajeño nupuráca'alo ajopana, ajopánajlo que.

Iná amaca iná tapú que nacaje, que hualijímacana amájica nacaje ya'atajico najló.

Peñahuilana tapúna'aca cháyomi numaje nacaje nacú najló.

<sup>18</sup> No'opiyá jema'ajeñojlo no'ojé Nupechu rihuacajé.

Raú na'apátaje nupuráca'alo ajopana, ajopánajlo que, que Tupana quemacá i'amacá.

<sup>19</sup> Je'echú chu nuqueñótaje cajrú nacaje palá nojé, uncá iná amálare caje.

Ñaque caja marí eja'ahuá nacú nuqueñótajica nacaje, ihue'epícaloje quehuaca ricá nu-  
macare nacú penaje.

Marí que amájica: Jirá caje, quera'atani caje amaje.

Cajrú isa amájica juni suhuáca'ala que.

Caje macá amaje rihuacajé eja'ahuá nacú.

<sup>20</sup> Uncá caja camú patalaje majó rihuacajé.

Querani queri jimá i'imajica rihuacajé.

Marí queja ri'imajica Paminaricana huani iphájica piyá majó.

Riphájica ejomi palani nacaje i'imajica reyá a'ajná ño'ojó.

<sup>21</sup> Iná quemacachu Tupánajlo, ri'imatácaloje iná capichácajo liyá penaje, ri'imatá iná, que Joelmi chu lana'acá Tupana puráca'alo papera chojé i'amacá.

<sup>22</sup> Pedro quemari piño najló:

—Israelmi chu laquénami, numájicare nacú ijlo, jema'á no'opiyá ricá. Jesús i'imari Nazaret eyaje i'amacá. Tupana la'arí ricá palá. Aú rila'á cajrú nacaje i'amacá, uncá meño'ojó iná hue'epílare la'acana caje. Marí caje aú ra'á huajló rená que'ená, huahue'epícaloje ricá raú penaje. Cajrú nacaje uncá iná amálare hua'ató rila'á, Tupana a'acale riñaté rila'acana aú i'amacá. Caja ihue'epí méqueca rila'acá i'amacá. Maárohua hue'iyohuá rila'á ri'amacá —que rimacá najló—.

<sup>23</sup> Ihue'epí caja méqueca na'acá ijlo ri'amacá. Ejomi ihuacára'a ajopana ina'uqué acúhua'ataca ricá a'ahuaná apiyácanami nacojé i'amacá. Ihuacára'a chapújne'equena noca

ri'imacá. Ilé que rila'acana i'imari Tupana pechu nacú i'imacá. Uncá chiyó ri'imá ñaque, Tupana hue'epiri ají que ila'ajica ricá.

<sup>24</sup> Nenó ri'imacá. E'iyonaja Tupana macápo'ori Jesús rapumí chuhua. Ri'imatá ricá taca'acaje chiyá. Uncá meño'ojó taca'acaje capichátala ricá.

<sup>25</sup> Hue'emacánami chu, Davidmi chu, i'imari Jesucristo yucuna, uncá chiyó Jesucristo iphá mari eja'ahuá chojé i'imacá. Marí que rimacá Jesús apumí chojé que:

Nuhue'epí re Nuhucára'ajeri nujhua'até hua'ajini huani.

Rahua'á nucá rijhua'até.

Ñaquele uncá na calé la'ajeri camu'ují nupechu.

<sup>26</sup> Marí caje la'arí pu'ují nupechu.

La'arí pu'ují nupechu yucuna nu'umá ajopánajlo. Nuhue'epí caja palá nunapona i'imajica nutaca'ajica ejomi,

<sup>27</sup> uncale piyurílaje nupéchumi támijimina ca'aquelana ejé.

Uncá caja piyurílaje ilé, íqui'ija pihuátacare, napona apichaco.

<sup>28</sup> Pipa'ataje nojló cajmuchaji, palá nu'umacáloje raú penaje.

Pu'ují huani nupechu i'imajica nu'umajica pijhua'até huacajé, que Davidmi chu lana'acá Jesucristo yucuna i'imacá.

<sup>29</sup> —Chuhua nojena —que Pedro quemacá—. Chuhua nu'umajica pu'ucú hue'emacánami chu yucuna, Davidmi chu yucuna. Caja ritaca'á júpimi i'imacá. Nasa'á ritami. Rejo'ocaja risa'aquélanami maare.

<sup>30</sup> Davidmi chu i'imari Tupana puráca'alo ja'apátajeri i'imacá. Ñaquele rihue'epí na ina'uqueca Tupana quemacare nacú rijló i'imacá. Tupana quemari rijló: “Nuhucára'aje ina'uqué i'imatájeri penaje apú. Pilaquénamí naquiyana ri'imajé. Ricá i'imajeri ne'emacana pi'imacá que caja”.

<sup>31</sup> Uncá chiyó ri'imá, Tupana i'imari riyucuna Davidmi chujlo. Ñaquele ri'imá Jesucristo macápo'oco yucuna i'imacá rimacá aú marí que:

Nuhue'epí caja palá nunapona i'imajica nutaca'ajica ejomi, uncale piyurílaje nupéchumi támijimina ca'aquelana ejé.

Uncá caja piyurílaje ilé, íqui'ija pihuátacare, napona capichaco, que rimacá.

<sup>32</sup> Tupana macápo'ori Jesús i'imacá. Ejomi hueca amaño ricá —que Pedro quemacá najló.

<sup>33</sup> —Caja Tupana huá'ari Jesucristo, ri'imacáloje rijhua'até penaje. Palá ripechu i'imacale rinacu, rahua'á ricá me'etení. Tupana a'arí rijló Ripechu rimacá rijló i'imacá que. Huajló piño Jesucristo a'achari huajló Tupana Pechu huajé. Ñaquele Tupana Pechu quemíchaca huajló que huapuri'ichaco, jemi'ichaje —que Pedro quemacá najló—.

<sup>34</sup> Uncá jo'ó Davidmi chu napónami jácho'olo je'echú chojé rihuacajé i'imacá. Ñaquele Davidmi chu quemari marí que i'imacá:

Nuhucára'ajeri quemari Nu'umacánajlo:

“Maare nohua'á piyuró, palá nupechu nacú pi'imacale.

<sup>35</sup> Nuchá'atajica chapú pinacu péchuruna ejená, pi'imajé nohua'á,” que rimacá rijló.

<sup>36</sup> Pedro quemari piño najló:

—Ihue'epí marí palá, icá Israélmí chu laquénamí: Icó acúhua'ataño Jesús a'ahuaná apiyácacanamí nacojé i'imacá. Tupana huacára'acare majó ri'imacá. Piyuqueja ina'uqué huacára'ajeri penaje ra'á ricá. Hue'emátajeri penaje caja ra'á ri'imacá —que Pedro quemacá najló.

<sup>37</sup> Marí que rimacá aú ripuráca'alo jema'ajeño pechu la'aró camu'ují. Cajrú ne'ejnataca napéchuhua rejéchami. Aú nemá Pédrojlo, ajopana Jesucristo huacára'acarenajlo hua'até nemá:

—Huejena, ¿chuhua meque hual'ajica?

<sup>38</sup> E Pedro quemari najló:

—Pajluhuano, pajluhuano que ipajno'otaca ipéchuhua Tupana ejo pu'uhuaré ila'acare liyá, imanaicho ila'acare liyá. Raú Tupana amájero ichaje pu'uhuaré ila'acare liyá, imanaicho ila'acare liyá hua'ató. Rejomí nala'ajé bautizar icá, Jesucristo ja'apiyá jema'ajeño i'imacale. Marí que ila'ajica ee Tupana a'ajeri ijlo Ripechu —que Pedro quemacá najló.

<sup>39</sup> E rimá piño najló:

—Júpimi Tupana quemari: “No'ojé Nupechu ina'uquejlo” que. Chuhua ra'ajica ijlo Ripechu rimacare nacú i'imacá. Iyani me'etení i'imacáñojlo hua'ató ra'ajé Ripechu. Rejomí i'imajicáñojlo ra'ajé caja Ripechu. Piyuqueja ina'uqué Tupana i'ihuapacárenajlo ra'ajé Ripechu —que Pedro quemacá najló.

<sup>40</sup> Marí caje nacú rimá najló apa'amá puráca'aloji nacú hua'até. Rejomí rimá piño najló:

—Pu'uhuaré huani péchuruna ina'uqué maárohua. Ila'á ipéchuhua apojó naliyá, Tupana huajaca piyá icá. Ñaquejlaca rihuajácajla icá rihuajájica necá que caja —que rimacá najló.

<sup>41</sup> Raú cajrú ina'uqué jema'año ripuráca'alo ja'apiyá i'imacá. Tres mil ina'uqué ne'emacá, jema'año Jesucristo ja'apiyá rihuacajé. Necá nala'á bautizar. Rejomi nahuacácono ajopana Jesucristo ja'apiyá jema'ajeño hua'até.

<sup>42</sup> Jesucristo huacára'acarena jehuíña'ataqueño necá. Napuráca'alo ja'apiyá i'imacana nahue'epique natucumó. Palá ne'emajica pajhua'atéchaca. Nahuacaco Tupana hua'até pura'ajó i'imajica. Ejomi najñaque na'ajnehuá pajhua'atéchaca. Marí que ne'emajica pajhua'atéchaca.

*Jesucristo ja'apiyá jema'ajeño, pamineco i'imacaño, yucuna marí:*

<sup>43</sup> Jesucristo huacára'acarena la'aqueño cajrú nacaje, uncá meño'ojó iná la'alare. Tupana Pechu a'aqueri nañaté. Raú piyuque ina'uqué, rehuá i'imacaño, i'ijnataño cajrú napéchuhua nanacu, namácale cajrú huani nala'acá nacaje.

<sup>44</sup> Pajluhuaja pechu queja piyuqueja Jesucristo ja'apiyá jema'ajeño pechu i'imajica. Nayuríjica nacaje pajlocaca piyuque i'imajica.

<sup>45</sup> Nanane naquiyana na'aque ajopánajlo. Liñeru aú napiyácaque najhua'até ricá. Rejomi natamáca'ataque liñeru camu'ují la'ajicañojlo. Nacaje nala'ajicare nacú camu'ují ejeja na'aque najló liñeru, nahuarúhua'acaloje najluhua nacaje raú penaje.

<sup>46</sup> Hue'echú ca'alá queja nahuacaco Tupana ñacaré chojé i'imajica. Ajopana ñacaré chojé, ajopana ñacaré chojé que najñájica na'ajnehuá. Queyajupa najñájica na'ajnehuá pajhua'atéchaca. Ñaque huánija napechu i'imajica pajhua'atéchaca. Ñaque huánija ne'emajica pajhua'atéchaca piyuqueja.

<sup>47</sup> Palá napura'ajico Tupana nacú i'imajica. Piyuqueja ajopana ina'uqué pechu i'imaqué palá nanacu. Hue'echú ca'alá queja Tupana Pechu jahuacátajica najhua'até ajopana ina'uqué. Ramájicarona chaje pu'uhuaré nala'acare liyá, necá penájenami ne'emajica.

### 3

*Natejmo'ótaca apicháca'alo penaje yucuna marí:*

<sup>1</sup> E apú huacajé Pedro, Juan, quele i'ijnajlo aji que Tupana ñacaré chojé. Hueji quele chojé cha camú to'ojico ee, namujlúca'aqueno Tupana ñacaré chojé rijhua'até pura'ajó.

<sup>2</sup> Hue'echú ca'alá queja pajluhuaja ritami yá'acono re. Apicháca'alo rimoto'ó i'imacá, uncá meño'ojó ra'apala. Ñaquele najña'aque ricá Tupana ñacaré ejo. Re nayurique ricá Tupana ñacaré numaná ahua'ajé. “Rinumaná jimáreni”, que na'acá rinumaná íi. Re riyá'aco liñeru queja'acana nacú rijluhua, Tupana ñacaré chojé mujlúca'ajicaño liyá.

<sup>3</sup> E Pedro, Juan, quele mujlúca'año Tupana ñacaré chojé. E ramá necá. Aú riquejía'aliyá liñeru.

<sup>4</sup> Ejéchami Pedro, Juan hua'até yacá'aco richaje. E Pedro quemari rijló:

—Piyacá'o majó huachaje.

<sup>5</sup> Aú riyacá'o nachaje. Ripechu i'imá:

—¿Na'acáloje chí nojló liñeru penaje ca'ajná nemá nojló ilé que?

<sup>6</sup> Pedro quemari rijló:

—Uncá nuliñérite i'imalá. E'iyonaja calé marí que no'ojica piñaté. Jesucristo, Nazaret eyájemi, hue'epiri pitejmo'ótacana. Ñaquele numá pijló ripuráca'alo aú: Pácho'o, pa'apachi.

<sup>7</sup> Ejomi Pedro patarí ricá riyáte'ela ca'aña naquiyá. Rácho'ota ricá. Hua'ató que rita'arare ña'acó ri'ipucu chiyá, ra'apácaloje penaje.

<sup>8</sup> Aú jeño'oqueja rácho'oco, ejomi richira'ó. Eyá rimujlúca'a Tupana ñacaré chojé najhua'até. Jeño'oqueja ra'apaca najhua'até. Palá huani ripura'acó Tupana nacú.

<sup>9</sup> Eja piyuque richu i'imacaño amaño ra'apaca. Nema'á ripura'acó palá Tupana nacú.

<sup>10</sup> Namaca aú ra'apaca napechu i'imá: “¿Meque chí ra'apácajla?” Namána'apa ri'imacá. Namájicare yá'aco rinumaná ahua'á, liñeru queja'acana nacú ri'imacá.

*Pedro i'imacá rapicháca'alo penájemi yucuna najló yucuna marí:*

<sup>11</sup> Namaca aú ra'apaca piyuqueja ina'uqué jahuacaño jecho'oquelo richaje. Ejo'ocaja apicháca'alo penájemi patarí Pedro a'arumacá naquiyá, Juan a'arumacá naquiyá hua'até. Re ne'emá ucapú cajruni chu. Ucapú íi Salomón. Richojé piyuqueja ina'uqué jahuacaño nachaje.

<sup>12</sup> Pedro amari ina'uqué jahuacaco rejé cajrú. Aú rimá najló.

—Nojena, ¿naje aji que ipechu huanacu? ¿Naje chí iyacá'o huachaje? Apala marí que ca'ajná ipechu huanacu: “Napechu aú ca'ajná natejmo'óchiya apicháca'alo penájemi. Iqui'i Tupana nacú péchuruna ca'ajná necá. Raú natejmo'óchiya apicháca'alo penájemi”, que ca'ajná ipechu huanacu.

<sup>13</sup> Uncá huecá calé tejmó'óchiyaño ricá. Tupana, ricaja calé tejmó'óchiyari ricá. Uncá huecá calé —que rimacá najló—. Huachi'inami chuna pechu i'imaqué caphí Tupana chojé.

Abrahami chu, Isaacmi chu, Jacobomi chu, quele pechu i'imaqué caphí richojé i'imajica. Ricá Tupana tejmo'óchiyari caji amá tára'aco. Palá huani Tupana la'acá Ri'irí Jesucristo i'imacá, ina'uqué hue'epícaloje raú ajopana chaje huani ricá. Ica huá'año ricá ihuacára'ajeri ejo i'imacá. Pilato huátari ri'imatácana iliyá. E'iyonaja uncá ihuátala ri'imataca ricá.

<sup>14</sup> Uncá ihuátala quele, palájne'equé huani. Uncá huani hue'epilare pu'uhuaré la'acana ricá. Uncá imalá Pilátalo i'imacá, rácho'otacaloje ricá penaje. Ricá huátari rácho'otacana i'imacá. E'iyonaja ihuata rácho'otaca ijlo apú, nori ina'uqué penájemi ri'imacá. Ricá rácho'ota ijlo ihuátaca que.

<sup>15</sup> Eyá ipuráca'alo aú nenó Jesús i'imacá. Cajmuchaji a'ajeri inajlo ricá. Ricá nenó ipuráca'alo aú i'imacá. E'iyonaja Tupana macápo'ori ricá rapumí chuhúa piño. Huecá amaño ricá, rimacápo'oco ejomi —que Pedro quemacá najló—.

<sup>16</sup> Ricá, Jesús, tejmo'óchiyari marí ina'uqué. Caphí huapechu i'imichaca richojé, ritejmo'otacaloje ricá penaje. Raú marí tára'aro tejmo'ochiyaro. Caja ihue'epí na ina'uqueca ricá. Caphí huapechu i'imichácale Jesús chojé, marí ina'uqué tejmo'ochiyaro huajló i'imichaca. Ñaquele amá ricá peyajhueni me'etení —que ri'imacá najló riyucuna.

<sup>17</sup> —Nojena, nuhue'epí marí que ri'imacá: Ica, ihuacára'ajeño, quele noca Jesús huacajé, uncá ihue'epila rinacojé i'imacá. Aú ipechu ja'aró rinócana ejo.

<sup>18</sup> Jesús nócana aú ila'á quele, Tupana quemacare rinacu júpimi i'imacá. Uncá chiyó riphá marí eja'ahuá chojé i'imacá ri'imá riyucuna. Tupana puráca'alo ja'apátajeñomi chuna quemañó marí que rinacu i'imacá: “Ricá, Tupana huacára'ajicare majó, ña'ajeri chapú caje yajhué panacu i'imajica”, que nemacá rinacu i'imacá.

<sup>19</sup> Chuhua ipajno'otá ipéchuha pu'uhuaré, imanaicho ila'acare liyá Tupana ejo. Raú Tupana ca'ajeri pu'uhuaré ila'acare iliyá. Palá huani rila'ajica icá raú. Pu'ují caja ipechu i'imajica raú.

<sup>20</sup> Rihuacára'aje piño Jesús ichaje majó. Júpimija Tupana quemari rinacu, ri'imacáloje ina'uqué i'imatájeri penaje.

<sup>21</sup> Je'echú chu Jesucristo me'etení. Reja ri'imajica. Tupana pa'atájeri piyuqueja nacaje eja'ahuá chu i'imacá, ri'imacáloje piño júpimi ri'imacá que caja penaje. Quetana ri'imajica re. Tupana i'imari riyucuna ripuráca'alo ja'apátajeñomi chúnajlo i'imacá. Palájne'equena ne'emacá. Júpimi ne'emacá. Rimacá najló i'imacá queja caja ri'imajica.

<sup>22</sup> Marí que Moisesmi chu quemacá hua'ajútayami chúnajlo Jesucristo nacú: “Ihuacára'ajeri Tupana huacára'ajeri apú e'iyajé ripuráca'alo ja'apátajeri penaje. Ica'ana naquiyana ri'imajica. Rihuacára'ajica ricá rihuacára'aca nacá que caja. Ñaquele jema'á ra'apiyá nacaje piyuque rimajicare nacú ijlo.

<sup>23</sup> Uncá pachá iná jema'alá ricá Tupana puráca'alo ja'apátajeri ja'apiyá, numacare nacú, Tupana ca'ajeri iná rila'ejena ina'uqué liyá. Iná capichájico raú”, que Moisesmi chu quemacá rinacu júpimi i'imacá. Pedro quemari piño najló marí que:

<sup>24</sup> —Ñaque huánija piyuque ajopana Tupana puráca'alo ja'apátajeñomi chuna i'imajica Jesús yucuna. Piyuqueja necá, Samuelmi chu, rapumí chojena, quele i'imaqueño caja palá riyucuna. Jesús, ricá huamácare i'imacá, yucuna ne'emaque.

<sup>25</sup> Nacaje i'imajicare yucuna, Tupana i'imaqueri ripuráca'alo ja'apátajeñomi chúnajlo i'imajica. Ri'imacare najló yucuna, ricá yuriro piño ijlo. Tupana quemari hua'ajútayami chúnajlo nacaje rila'ajicare nacú, rila'acáloje icá palá raú penaje. Ñaque i'imacale Tupana quemari Abrahami chujlo marí que i'imacá: “Nucá la'ajeri piyuqueja ina'uqué palá. Pilaquénami e'iyá ri'imajé, la'ajeri palá huani ina'uqué i'imajica”.

<sup>26</sup> Tupana macápo'ori Ri'irí i'imacá. Ichaje rihuacára'a ricá pamineco, rila'acáloje icá palá huani raú penaje. Piyuqueja icá yuricaloje pu'uhuaré la'acana iliyó raú penaje —que Pedro quemacá najló.

## 4

*Pedro, Juan, quele tára'aco nahuacára'ajeño jimaje yucuna marí:*

<sup>1</sup> Ejo'ocaja Pedro, Juan hua'até pura'año ina'uqué hua'até. E'iyohúa queja ajopana iphaca nanacu. Sacerdótena ne'emacá. Tupana ñacaré hua'aphena huacára'ajeri, saducéona, quele iphaño caja najhua'até.

<sup>2</sup> Pedro, Juan, quele jehuíña'ataño ina'uqué Jesucristo nacú. Ne'emá najló rimacápo'oco yucuna. Aú nahue'epí caja taca'acaño macápo'ojico ñaque caja. Marí caje jimaje sacerdotena, najhua'até iphácaño, quele yúcha'año Pedro, Juan, quele cha.

<sup>3</sup> Aú nahuá'a necá reyá, naca'acáloje necá calajeruni chojé penaje. E naca'á necá calajeruni chojé. Najúhua'acale, uncá nahuátala rilamá'atacana rihuacajé. Richu ne'emá iná me'etaca quetana.

<sup>4</sup> Iqui'iruna ina'uqué jema'año Pedro pura'acó maapami que. Cajrú nanaquiayana a'año ripuráca'alo nanacojó, ne'emacáloje Jesucristo ja'apiyá jema'ajeño penaje. Cajrú Jesucristo hua'atájena ñiaté a'acó naú. Achiñánaja calé nalapa'atá, cinco mil ne'emacá.

<sup>5</sup> E muní que cajrú nahuacaco piño rejé. Judíona huacára'ajeño, peñahuilana, Tupana nacú jehuíña'atajeño, quele jahuacaño rejé. Piyuqueja necá jahuacaño Jerusalén ejo i'imacá.

<sup>6</sup> Re caja Anás i'imari najhua'até. Sacerdótena huacára'ajeri ri'imacá. Caifás, Juan, Alejandro, quele i'imaño re caja najhua'até. Sacerdótena huacára'ajeri ejena ne'emacá.

<sup>7</sup> E caja nahuacára'a nahuá'aca Pedro, Juan hua'até rejo. Aú nahuá'a necá ne'iyajó, nemá najló:

—¿Na a'arí ijló péchui, itejmo'ótacaloje ilé ina'uqué raú penaje? ¿Na puráca'alo aú chi ila'á ilé que? —que nemacá najló i'imacá.

<sup>8</sup> E Pedro ja'ajipari najló. Tupana Pechu huacára'aca que rimacá najló marí que:

—Huahuacára'ajeño, peñahuilana,

<sup>9</sup> iquejá'a hualiyá apicháca'alo penájemi yucuna, ihue'epícaloje naca tejmó'ótaca ricá penaje —que rimacá najló—.

<sup>10</sup> Chuhua nu'umajica riyucuna ijló, icá, icá'ana, quele hue'epícaloje riyucuna penaje. Marí que ritejmo'otaco: Jesucristo, Nazaret eyájemi, palamane aú ritejmo'otó. Naquele amá quele tára'aco ijimaje peyajhueni. Ricá Jesús ihuacára'a acúhua'atacana a'ahuaná apiyácanami nacojó i'imacá. Re ritaca'á. Rejomi Tupana macápo'ori piño ricá. Ricá penájemi tejmó'ótari ricá —que Pedro quemacá najló—.

<sup>11</sup> Tupana puráca'alo lana'aquejami quemari rinacu marí que i'imacá:

Ricá ina'uqué, nemáicare nacú:

“Uncá ina'uquéleri” que, ricá Tupana a'ajeri, ri'imacáloje ajopana chaje huani penaje, que rimacá.

Jesús quele rimá nacú i'imacá.

<sup>12</sup> Uncá apú ina'uqué i'imalá iná i'imatájeri penaje. Uncá Tupana a'alá apú ina'uqué marí eja'ahuá chu, ri'imatácaloje ina'uqué penaje. Ricaja calé Jesús, pajluhuaja, i'imatájeri huecá capichácajo liyá Tupánajlo —que Pedro quemacá najló.

<sup>13</sup> Nahuacára'ajeño amaño Pedro, Juan, quele pechu i'imacá caphí najhua'até pura'acano nacú. Nahue'epí caja uncá nehuíña'alo jehuíña'acajo ñacarelana chu i'imacá. Raú napechu i'imá: “¿Meque ají que huani chi necá?” Echéchami riphaca napechu nacojó: “Jesús huáque'ena ne'emacá” que.

<sup>14</sup> Namá caja ilé ina'uqué, natejmo'ótacare i'imacá, tára'aco re najhua'até. Ñaque i'imacale uncá meño'ojó nemalá nanacu: “Majopeja napajlaca” que.

<sup>15</sup> Raú nahuacára'a necá ne'iyayá a'ajná ño'ojó, napura'acóloje nanacu necámica que penaje.

<sup>16</sup> E nemá pajlocaca:

—¿Meque huala'ajica ca'ajnárona ina'uqué? Nala'á nacaje uncá meño'ojó iná la'alore caje. Caja piyuqueja Jerusalén eruna jema'año riyucuna. Uncá meño'ojó huemalá nanacu: “Majopeja pajlácaño necá” que —que nemacá nanacu—.

<sup>17</sup> Marí que huala'ajica ajopana jema'acá piyá riyucuna: Huemaje najló marí que: “I'imajica ee Jesucristo yucuna ajopana ina'uquejlo, huahuajaje icá richona”, que huemájica najló.

—Je —que.

<sup>18</sup> E nahuá'a piño namaná. Nephá nanacu. E nemá najló:

—Chuhua i'imaniya ajopana ina'uquejlo Jesucristo yucuna. Pamá, jehuíña'ataniya caja necá rinacu —que nemacá najló.

<sup>19</sup> E'iyonaja Pedro, Juan hua'até quemáño najló:

—Tupana huacára'ari hue'emacá riyucuna ajopana, ajopánajlo que. Eyá icá quemáño huajló hue'emacá piyá riyucuna. ¿Mecaje chi palani Tupánajlo ihue'epica? ¿Ja'apiyá jema'acana ca'ajná; Tupana ja'apiyá jema'acana ca'ajná?

<sup>20</sup> Uncá meño'ojó huayurila riyucuna i'imacana. Huamá Jesús la'acá cajrú nacaje, huema'á caja ri'imacá yucu cajrú huani. Riyucuna hua'apátaje ajopánajlo, ajopánajlo que —que nemacá najló.

<sup>21</sup> Raú nahuacára'ajeño quemáño piño najló:

—Uncaja que jema'á hua'apiyá, ripachá huahuajaje icá.

Marí caje aú nayuri necá, nácho'ocoloje ne'iyayá penaje. Uncá na chona i'imalá, nahuajácaloje necá penaje. Piyuqueja rehuá i'imacaño pura'año palá Tupana nacú, apicháca'alo penájemi tejmó'otácale i'imacá. Aú calé uncá nahuajala necá.

<sup>22</sup> Ricá, natejmo'ótacare Jesucristo palamane aú, i'imari iyamá ina'uqué le'ejé quele jarechí i'imacá.

*Jesucristo ja'apiyá jema'ajeño pura'acó Tupana hua'até yucuna marí:*

<sup>23</sup> E caja nayurí Pedro, Juan, quele jácho'oco reyá. E napa'ó aji que a'ajná ño'ojó najhua'atájena i'imacá ejo. Iphaño nanacu. E ne'emá najló riyucuna. Nemá najló méqueca sacerdotena huacára'ajeño, peñahuilana, quele quemacá nanacu i'imacá.

<sup>24</sup> Ne'emá najló riyucuna. Ejomi piyuque necá pura'año Tupana hua'até. Nemá rijló marí que:

—Hue'emacana, Paminá huani picá. Picaja calé queño'ótari piyuqueja nacaje i'imacá. Picá la'arí je'echú, piyuqueja nacaje re'iyohuá i'imacare hua'ató. Ñaque caja eja'ahuá pila'acá, piyuqueja nacaje richuhuá i'imacare hua'ató. Piyuqueja juni, caje macá picá huánija la'arí ricá. Piyuqueja racuhuá i'imacaño nacajena pila'acarena caja necá.

<sup>25</sup> Davidmi chu jema'arí pipuráca'alo pa'apiyá i'imacá. Pipechu aú pimá rijló nacaje nacú. Riyucuna rilana'á papera chojé i'imacá. Marí que pimacá rijló i'imacá:

¿Naje ajopana ina'uqué yúcha'ajeño Nahuacára'ajeri cha?

Napechu nacú ri'imajica, nacapichátacaloje ricá penaje.

E'iyonaja uncá napechu iphálaje rilocópa'ala.

<sup>26</sup> Nahuacára'ajeño jahuacájeño.

Nala'ajé chapú napéchuhua rijló.

Chapú caja napechu i'imajica Tupana nacú.

Ri'irí, rihuacára'ajicare ina'uqué i'imatájeri penaje, nacú caja napechu i'imajé chapú, que pimacá rijló i'imacá.

<sup>27</sup> 'Quehuaca jo'ó ricá pimacare nacú rijló i'imacá. Marí pajimila e nahuacó meyáleje. Herodes, Poncio Pilato, ajopana te'eré eyájena, quele jahuacaño rihuacajé maare. Ñaque caja, huecá'ana, Israelmi chu laquénami naquiyana, jahuacaco najhua'até i'imacá. Chapú nahuó i'imacá Pi'irí Jesús cha. Uncá rihue'epila pu'uhuaré la'acana. Pihuátaca que huani la'ajeri ricá. Pa'acare ina'uqué i'imatájeri penaje ricá.

<sup>28</sup> Penaje nenó i'imacá. Aú nala'á quele pipechu nacú ri'imacá que.

<sup>29</sup> Chuhua Hue'emacana Tupana, pihue'epí meque nemíchaca huanacu i'imichaca. Nahuata huahuajácana. Majojeja pijhua'até sápaajeño jo'ó huecá. Pila'á huapechu caphí, huaquero'ocó piyá piyucuna i'imacana piyá ajopana, ajopánajlo que.

<sup>30</sup> Huemá caja pijló, pitejmo'ótacaloje natámina maárohua pipechu aú penaje. Pi'irí, Jesús, uncá hue'epila pu'uhuaré la'acana. Pihuátaca que huani la'ajeri ricá. Eco pihuacára'a rila'acá nacaje hue'iyá, uncá meño'ojó iná la'alare, ajopana ina'uqué hue'epícaloje pinacojé raú penaje —marí que napura'acó Tupana hua'até i'imacá.

<sup>31</sup> E caja nañapata Tupana hua'até pura'acano. Ejéchami napucuna ne'emacare chu ñaca'acó na'apiyá. Ejomi ne'ejná reyá. Tupana Pechu ja'apiyá que huani nala'ajica piyuque nacaje. Tupana Pechu i'imaqueri nahuacára'ajeri. Caphí napechu i'imajica Tupana puráca'alo yucuna i'imacana nacú ajopana, ajopánajlo que.

*Piyuque nanane nayuríjica pajlocaca yucuna marí:*

<sup>32</sup> Panacojéchaca que péchuruna Jesucristo ja'apiyá jema'ajeño i'imajica. Uncá na calé quemaqueri rinane nacú: “Nule'ejé huani ricá” que. Piyuqueja nanane caje nayurique pajlocaca.

<sup>33</sup> Tupana a'aqueri Jesucristo huacára'acarena ñaté, caphí napechu i'imacáloje raú penaje. Raú ne'emá namácare i'imacá yucuna ajopana, ajopánajlo que. Nahuacára'ajeri, Jesucristo, macápo'oco yucuna ne'emaque najló. Palá huani Tupana la'ajica necá piyuqueja.

<sup>34</sup> Ñaquele uncá na calé ne'iyohuá la'aqueri camu'ují nacaje nacú, marí que ri'imacale: Cajrú mená i'imajicaño a'aqueño ajopánajlo namena liñeru aú. Ñaque caja pají minaná a'ajica ajopánajlo nañacaré liñeru aú.

<sup>35</sup> Quéchami ne'ejnatájica liñeru Jesucristo huacára'acarena ejo, natamáca'atacaloje ricá camu'ují la'acáñojlo penaje. Camu'ují nala'ajica nacaje nacú ejeja na'aqué najló liñeru.

<sup>36</sup> Re najhua'até apú ina'uqué i'imari. Levimi chu laquénami naquiyana ri'imacá. Rií i'imari José. Chipre te'eré eyaje ri'imacá. Tupana huacára'acarena a'año rií apú Bernabé. “Iná pechu pala'atájeri que,” quemacánaca rií Bernabé napura'acó chu.

<sup>37</sup> Ricá a'arí rimena liñeru aú. Ejomi ri'imatá ricá Jesucristo huacára'acarena ejo.

## 5

*Ananíasmi chu, Saframi cholo quele yucuna marí:*

<sup>1</sup> Apú i'imari, ricá caja a'arí rimena naquiyana liñeru aú. Rií i'imari Ananías. Riyajalo íi i'imari Safira. Na'á rijló liñeru rimena huemí.

<sup>2</sup> Ejomi rijña'á liñeru naquiyana rijluhua. Apú liñeru naquiyana ri'ijnatá Jesucristo huacára'acarena ejo. Riyajalo hue'epiyo caja méqueca ri'imacá ripechu nacú, ripajlálacaloje

Pedro hua'até penaje. “Na'acare rijló liñeru rimena huemí, ricá japi ra'apata nojló,” que rihuátaca Pedro pechu i'ímacá rinacu.

<sup>3</sup> E caja riphá Pedro nacú. Ra'á rijló liñeru. Aú Pedro quemari rijló:

—Ananías, Jiñá Ch'i'náricana ca'átari pe'iyajé, pipajlácaloje Tupana Pechu hua'até penaje. Pijña'a'á marí liñeru naquiyana pijluhua i'ímacá. E'iyonaja calé pimicha nojló: “Piyuque no'opáchiya pijló ricá” que. ¿Naje ilé que huani picá?

<sup>4</sup> Uncá chiyó pa'á pimena pile'ejé jo'ó ri'ímacá. Pijluhua caja liñeru i'ímacá na'acare pijló rihuemí. E'iyonaja nojló pimicha: “Piyuqueja no'ochiyaca pijló ricá” que. Uncá piyuqueja calé pa'achaca nojló ricá. ¿Meque chi ipechu ja'achaco huajhua'até pajlacana chojé? Uncá huajhua'ateja calé pipajlichaca raú. Pipajlichaca caja Tupana hua'até raú —que Pedro quemacá rijló.

<sup>5</sup> Marí que rimacá rijló aú Ananías cojno'orí te'erí e'iyajé. Caja ricaja ritaca'acá. Marí caja aú riyucuna jema'ajeño quero'oño cajrú huani.

<sup>6</sup> Ritaca'acá ejomi hualijimacana i'ijnáño ritami ña'ajé reyá. E namapíra'a a'arumacaji aú támijimi nacú. Quéchami najña'acá ritami huaca'apoyo, nasa'acáloje ricá penaje.

<sup>7</sup> Hueji quele camú jená quetana ja'apaca. Ejéchami riyajálo mi iphaca rapumí chojé. Uncá ruhue'epila méqueca ruyajnamí chu la'acó maapami que rupiyá.

<sup>8</sup> E caja Pedro quemari rojló:

—Pimá nojló palá. ¿E chi marí piyuqueja iménami huemí? Chuhua pimá nojló.

—A'a —que rumacá—. Ilere piyuqueja rihuemí.

<sup>9</sup> Pedro quemari piño rojló:

—¿Meque chi ipechu nacú i'imichaca, ipajlácaloje Tupana Pechu hua'até penaje? Piyajnamí chu tami sa'ajeño huaicha me'etení. Huaca'apeje cha necá huaicha. Chuhua ñaqueé caja najña'ajica pitami.

<sup>10</sup> Marí que rimacá aú rojló rutami cojno'ó piño Pedro ji'imá nacojé matámiru. Hua'ató que ruyajnamí chu tami sa'ajeño mujlúca'aca pachoyo, amaño rutami to'ocó piño. E najña'á piño rutami. Nasa'á rutami ruyajnamí chu tami ahua'á.

<sup>11</sup> Marí que nacapichaco aú piyuque Jesucristo ja'apiyá jema'ajeño quero'oño. Ñaqueé caja ajopana riyucuna jema'ajeño quero'ocó raú.

*Palá nala'acá cajrú ina'uqué e'iyohuá yucuna marí:*

<sup>12-15</sup> Piyuque Jesucristo ja'apiyá jema'ajeño jahuacaco Tupana ñacaré chojé i'imajica. Ucapú ñopo'ojlo chojé nahuacaco i'imajica. Rii i'imari Salomón ucapure. Uncá ajopana jahuacalo najhua'até richojé i'imajica, nahuó la'ajícole najhua'até jahuacácano piyá. E'iyonaja calé palá piyuque ina'uqué pechu i'imajica nanacu. Ehuá cajruca ina'uqué jema'acá Jesucristo ja'apiyá. Cajrú achiñana, inaana, quele jema'año ra'apiyá. Caja íqui'iruna Jesucristo ja'apiyá jema'ajeño i'ímacá najhua'até. Jesucristo huacára'acarena la'aqueño cajrú nacaje ina'uqué e'iyohuá, uncá meño'ojó iná la'alare caje. Nala'aqueé piyuque nacaje ina'uqué e'iyohuá, nahue'epicaloje mecajeca Tupana raú penaje.

Tupana ñacaré ahua'á napitaqué cajrú natámina iñe'epú chuhua. Napitaqué necá cama chu, Pedro ja'apáicano ehuá, riñaacá ja'acóloje ne'iyajena nacojé penaje, natejmo'otácaloje raú penaje.

<sup>16</sup> Jerusalén ahua'á cajrú pajimila. Reyá íqui'iruna ina'uqué i'ijnaqueño Jerusalén ejo i'imajica. Nahuá'aque caja rejo natámina. Jiñá pechu i'imajicarena e'iyá cajena nahuá'aque rejo. Jesucristo huacára'acarena tejmo'ótaqueño natámina piyuqueja. Jiñá pechu i'imajicarena e'iyá naca'aqueé ricá ne'iyayá.

*Chapú nala'acá Jesucristo huacára'acarena yucuna marí:*

<sup>17</sup> Ehuá sacerdotena huacára'ajeri pechu i'ímacá Jesucristo huacára'acarena nacú chapú. Palá huani ina'uqué pechu i'ímacá nanacu aú chapú nahuó i'ímacá nachá. Ñaqueé caja rijhua'até i'ímacá huo i'ímacá chapú nachá. Saduceóna naquiyana ne'emacá.

<sup>18</sup> E caja nahuacára'a Jesucristo huacára'acarena huá'acana, naca'acáloje necá calajeruni chojé penaje. Aú najña'á ne'emacá. Naca'á necá rehuájena le'ejé ina'uqué huajáquelana chojé.

<sup>19</sup> E lapí Tupana hua'atéjeri, je'echú chiyaje, me'etari nachaya. E rihuá'a necá huaca'apoyo. Rimá najló:

<sup>20</sup> —I'ijná a'ajná ño'ojó Tupana ñacaré chojé. Eco i'imá Jesucristo ja'apiyá i'ímacana yucuna najló.

—Je —que nemacá.

<sup>21</sup> Muní que lapiyami namujlúca'aca Tupana ñacaré chojé. E naqueño'ó ina'uqué je-huíña'atacana Tupana puráca'alo nacú.

Na'apona que sacerdotena huacára'ajeri, rijhua'atéjena, quele jahuacaco apalá chojé. Rahuacata Israelmi chu laquénami huacára'ajeño, peñahuilana ne'emacá. Quele necá



jahuacaño pajhua'atéchaca i'imacá. E caja nahuacára'a policíana ina'uqué huajáquelana ejo, nahuá'acaloje Jesucristo huacára'acarena richiyá rejo penaje.

<sup>22</sup> E ne'ejná, iphaño rejo, amaño meñaru ina'uqué huajáquelana chu. Uncá namala necá richu. Aú napa'ó piño nayámojo riyucuna i'imajé nahuacára'ajeñojlo. E nephá piño nanacu, nemá najló.

<sup>23</sup> —Hue'emichá rejo. Marí que huamíchaca ricá: Itaqueja palá, chahuíña'aqueja rinumaná i'imichaca. Ejo'ocaja rihua'aphena lapi'ichaño rinumaná ahua'á. E huajme'echiya ricá, amíchano uncá na i'imalachá richu. Meñaru huamíchaca richu —que nemacá najló.

<sup>24</sup> Sacerdótena huacára'ajeri, Tupana ñacaré hua'aphena huacára'ajeri, sacerdótena, quele i'imaño re. Ne'emá najló riyucuna. Raú napechu quechíra'aro cajrú huani najló. Nemá: “¿Meque ca'ajná necá quele?”

<sup>25</sup> Ejéchami apú iphaca nanacu. Rimá najló:

—Ieruna ina'uqué, ica'acárena ina'uqué huajáquelana chojé, a'ajná Tupana ñacaré chu necá me'etení. Cajrú nehuíña'ataca ina'uqué richu —que rimacá najló.

<sup>26</sup> Raú Tupana ñacaré hua'aphena huacára'ajeri, policíana hua'até i'ijnaño rejo nahuá'aje. Uncá tejmuji calé policíana huá'aca ne'emacá, naquero'ocole ina'uqué piyá. Napechu i'imá: —Huala'ajica ee chapú necá, apala ajopana ca'ajeño huachá jipa.

<sup>27</sup> E caja nahuá'a Jesucristo huacára'acarena rejo. Nahuacára'ajeño huani jimaje nahuá'a necá. E sacerdótena huacára'ajeri quemari najló:

—Huahuíyo'ojló Jesucristo yucuna i'imacana cha.

<sup>28</sup> E'iyonaja piyuqueja Jerusalén eruna jema'año riyucuna, jehuíña'atacare nacú necá. Hua'até ica quemáño huanacu: “Necá noño Jesucristo i'imacá. Napachá ricá”, que imacá huanacu —que rimacá najló i'imacá.

<sup>29</sup> Eyá Pedro, ajopana Jesucristo huacára'acarena hua'até, quemáño najló:

—Huajló Tupana ja'apiyá jema'acana palani. Tupana huacára'ari huecá, hue'emacáloje Jesucristo yucuna ajopana, ajopánajlo que penaje. Eyá ica quemáño huajló hue'emacá piyá riyucuna ajopánajlo. Ñaqué i'imacale uncá paala huajló ja'apiyá jema'acana.

<sup>30</sup> Ica po huacára'año nacúhua'ataca Jesús a'ahuaná apiyáccanami nacojé i'imacá. Marí que inoca ri'imacá. E'iyonaja Tupana, huachí'namí chuna pechu i'imaqué chojé caphí, ricá macápo'ori ricá i'imacá.

<sup>31</sup> Rejomi Tupana a'arí ricá, ri'imacáloje ajopana ina'uqué chaje penaje. Palá ripechu i'imacá rinacu. Rijhuáque'ehue caja ricá. Ina'uqué huacára'ajeri penaje caja Tupana a'arí ri'imacá. Ina'uqué i'imatájeri penaje caja ra'á Jesucristo i'imacá. Marí caje penaje ra'á ri'imacá, huapajno'otácaloje huapéchuhua pu'uhuaré huala'acare liyá Tupana ejo penaje. Tupana amácolaje huachaje raú penaje. Marí que huajló ricá, Israelmi chu laquénamijlo.

<sup>32</sup> Ilé numíchaje nacú, huahue'epí quehuaca ricá —que rimacá—. Tupana Pechu caja quemari ñaqué caja rinacu. Tupana a'arí Ripechu piyuque ra'apiyá jema'ajeñojlo —que rimacá najló.

<sup>33</sup> Marí que rimacá aú najló nayúcha'ó Iqui'ija huani nachá. Richona nahuata nenótacana.

<sup>34</sup> E'iyonaja re apú nahuacára'ajeño naquiyana i'imari najhua'até. Fariséona naquiyana ri'imacá. Tupana puráca'alo nacú jehuíña'atajeri caja ri'imacá. Piyuque ina'uqué pechu i'imari rinacu palá. Ríi i'imari Gamaliel. E rimá policíanjlo:

—Ihua'á necá huaca'apoyo mequetánaja.

—Je —que nemacá rijló.

Aú nahuá'a necá huaca'apoyo.

<sup>35</sup> Ejomi rimá re jahuacácañojlo marí que:

—Israelmi chu laquénami, i'ijnatá ipéchuhua me'etení palá méqueca ihuátaca nala'acana. Tupana huátaca que la'acaño ca'ajná necá. Napechu queja la'acaño ne'emajica ee, ríco nacaje nala'acare capichájico.

<sup>36</sup> Ihue'epí júpimi que apú ina'uqué i'imacá. Ripechu queja la'ajicare ri'imajica. Ríi i'imari Teudas. Ricá la'aqueri rinacuhá hue'epiri que huani. Rijhua'atéjena i'imaño cajrú. Cuatrocientos ejé ca'ajná ne'emacá. Ajopana noño ricá naliyá. Rejomi piyuque rijhua'atéjenami tamáca'ataño piyuqueja paliyáca. Rejeja piyuque nacaje rila'acare capicharo, nacaje rehuíña'atacare nacú i'imacá, capicharo caja rijhua'ató —que rimacá najló—.

<sup>37</sup> Ñaqué caja apú i'imacá nalapa'ataca piyuque ina'uqué huacajé. Ríi i'imari Judas. Galilea te'eré eyaje ri'imacá. Cajrú rijhua'atéjena i'imacá. Ñaqué caja nenoca ri'imacá; ñaqué caja rijhua'atéjenami tamáca'ataco paliyáca.

<sup>38</sup> Ñaquele numá ijlo me'etení reja ne'emareja, ileruna Jesucristo huacára'acarena. Reja nala'areja napechu nacú ri'imacá que. Napechu aú ja nacaje nala'acare, rícoja ricapichájico.

<sup>39</sup> E'iyonaja Tupana ja'apiyá que nala'acá nacaje, uncá meño'ojó icá apichátalaje ricá chapú nala'acana atú. ¡Pamá! Ila'ajica pu'uhuaré. Nacaje Tupana huacára'acare la'acana ca'ajná ihuata apichátacana —que Gamaliel quemacá najló.

<sup>40</sup> —Ñaque ricá —que nemacá.

Nahue'epí quehuaca rimacá najló. Aú nahuá'a Jesucristo huacára'acarena rejo piño. E nemá najló:

—Chuhua i'imaníya Jesucristo yucuna ajopánajlo.

E nemá policíanjlo, naña'atácaloje necá penaje. Aú naña'atá necá. E caja ehujaja nayurí ne'ejnacá reyá.

<sup>41</sup> E ne'ejná reyá. Pu'ují napechu i'imacá, Tupana yurícale najña'acá chapú caje panacu. Najña'á chapú caje yajhué panacu Jesucristo ja'apiyá jema'ajeño nema'acale. Pu'ují caja napechu i'imacá, palá Tupana pechu i'imacale nanacu, marí que ri'imacáloje najló penaje.

<sup>42</sup> E caja napa'ó. E'iyonaja uncá nayurila Jesucristo yucuna i'imacana ajopánajlo. Uncá caja nayurila ina'uqué jehuíña'atacana Jesucristo puráca'alo nacú. Hue'echú ca'alá queja nehuíña'atajica ina'uqué Tupana puráca'alo nacú Tupana ñacaré chu. Nañacaré chu ñaque caja nehuíña'atajica necá.

## 6

*Na'acá iyamá cuhuá'ata quele achiñana d'ajnejí tamáca'atajeño penaje yucuna marí:*

<sup>1</sup> Ehuá richaje íqu'ica Jesucristo ja'apiyá jema'ajeño i'imacá. Judíona ne'emacá. Ne'iyajena pura'aqueño griego pura'acó chu. Ajopana pura'aqueño napura'acó chu, hebreo pura'acó chu. Eyá griego pura'acó chu pura'ajeño aca'año hebreo pura'acó chu pura'ajeño maná. Nemá nanacu marí que:

—Hue'echú ca'alá queja natamáca'ataca aú huajló a'ajnejí, uncá rejenohuaja calé natamáca'ataca huajló ricá. Huanaquiyana ihuacajlominajlo na'á huejápaja. Eyá nanaquiyana ihuacajlominajlo na'á ñó'ope —que nemacá nanacu.

<sup>2</sup> Ñaquele iyamá iphata j'i'imaji nacojé quele Jesucristo huacára'acarena jahuacátaño rejé piyuque necá. Piyuqueja Jesucristo ja'apiyá jema'ajeño nahuacata rejé. E nemá najló:

—Uncá huani paala huayurica Tupana puráca'alo yucuna i'imacana ajopánajlo, ajopánajlo que, huatamáca'atacaloje ijlo a'ajnejí penaje —que nemacá najló—.

<sup>3</sup> Ñaquele i'ihuapajé e'iyayó iyamá cuhuá'ata quele ina'uqué. Marí cajena i'ihuapajé e'iyayó: Piyuque ina'uqué quemacárena nacú: “Palájne'equena necá” que. Palá Tupana Pechu ja'apiyá jema'ajeño ne'emajica. Piyuque hue'epícaño nacaje nacojé ne'emajica caja. Marí que i'imacaño ijña'ajé e'iyayó. Quéchami a'ajica necá ijluhua a'ajnejí tamáca'atajeño penaje —que nemacá najló—.

<sup>4</sup> Eyá huecá hue'epéjeño huatucumó Tupana hua'até pura'acano nacú. Tupana puráca'alo jehuíña'atacana nacú hua'ató nahue'epeje huatucumó —que nemacá najló i'imacá.

<sup>5</sup> —Je, ñaque ricá —que nemacá piyuqueja.

E nahuá'a ne'iyayó iyamá cuhuá'ata quele ina'uqué a'ajnejí tamáca'atajeño penaje. Nahuá'a ne'iyayó Esteban. Caphí huani ripechu i'imajica Jesucristo chojé. Tupana Pechu huacára'ajica que huani rila'ajica nacaje piyuque. Rejomi nahuá'a ne'iyayó Felipe, Prócoro, Niconor, Timón, Parmenas, quele. Eyá caja penaje nahuá'a ne'iyayó Nicolás. Antioquía eyaje ri'imacá. Uncá judío naquiyana calé ri'imacá. E'iyonaja napuráca'alo ja'apiyaja ri'imá najhua'até.

<sup>6</sup> Caja nahuá'a necá ne'iyayó. Quéchami nahuá'aca necá Jesucristo huacára'acarena jimaje. E nato'otá nayáte'ela ne'ehuata chojé. Ejomi napura'ó Tupana hua'até. Marí que na'acá necá a'ajnejí tamáca'atajeño penaje.

<sup>7</sup> Ehuá cajrú huani ina'uqué jema'acá Tupana puráca'alo i'imacá. Cajrú Jerusalén ehujajena jema'acá Jesucristo ja'apiyá rihuacajé. Cajrú sacerdotena hua'ató jema'acá ra'apiyá.

*Najña'acá Esteban nahuacára'ajeño ejo yucuna marí:*

<sup>8</sup> Palá huani Tupana la'ajica Esteban i'imajica. Tupana palamane aú Esteban la'aqueri cajrú nacaje uncá meño'ojó iná la'alore, ina'uqué hue'epícaloje mecajeca Tupana raú penaje.

<sup>9</sup> Eyá nahuacáca'alo ñacarelana chiyájena i'imaño. Nanaquiyana huacáca'alo ñacarelana íí i'imari Mahuemiru Sápacaño Jácho'otacanami. Richiyájena i'imaño Cirene eyájena, Alejandría eyájena. Apalá chiyájena i'imaño Cilicia eyájena, Asia te'eré eyájena, quele i'imaño richiyájena. E caja ne'iyajena aca'año Esteban.

<sup>10</sup> Uncá nahue'epila rapiyácaana palá, capechú ripura'acole najhua'até. Tupana Pechu huacára'aca que rimájica najló.

<sup>11</sup> E caja na'á ajopánajlo liñeru, napajlácaloje Esteban nacú penaje. Marí que nemacá rinacu majopeja:

—Huema'á ripura'acó pu'uhuaré huani Moisesmi chu nacú. Ñaqué caja ripura'acó Tupana nacú pu'uhuaré.

<sup>12</sup> Marí que nemacá rinacu aú piyuque rehuájena yúcha'año Esteban cha. Ñaqué caja peñahuilana, Tupana puráca'alo nacú jehuíña'atajeño pechu i'ímacá rinacu chapú. Aú nechó'ó rejo, napatá ricá. E najña'á ricá ají que nachaje huacára'ajeño ejo.

<sup>13</sup> Namicho'ojneja nahuacára'aca ajopana pajlaca Esteban nacú. Aú nemá marí que rinacu nahuacára'ajeñojlo:

—Uncá huani marí ina'uqué yurila rilíyo pu'uhuaré pura'acano. Ñaqué caja ripura'acó pu'uhuaré marí palani huani Tupana ñacaré nacú. Ñaqué caja rimacá pu'uhuaré Tupana puráca'alo, Moisesmi chu lana'acare nacú.

<sup>14</sup> Huema'á caja rimacá marí que: “Jesús, Nazaret eyájemi, cajya'atájeri marí Tupana ñacaré. Rapiyácajica piyuque nacaje Moisesmi chu jehuíña'atacare nacú huachi'inami chuna i'ímacá” —que napajlaca rinacu nahuacára'ajeño hua'até.

<sup>15</sup> Raú piyuqueja nahuacára'ajeño, ajopana, re yá'acaño najhua'até, quele yacá'año Esteban chaje. Amaño apojó rijimá apiyácaco Tupana hua'atéjeri, je'echú chiyaje, jimá que.

## 7

*Esteban pura'acó richayo yucuna marí:*

<sup>1</sup> E sacerdotena huacára'ajeri quemari Estébanjlo.

—¿Quehuaca chi nemacá pinacu?

<sup>2</sup> —Nojena —que Esteban quemacá—. Jema'á marí: Tupana, ilé palani huani, pura'aró hua'ajútami chu, Abrahami chu hua'até i'ímacá. Rihuacajé ejo'ocaja Abrahami chu i'imari Mesopotamia te'eré nacú. Uncá chiyó ri'imá Harán te'eré nacú, Tupana i'imari richaje i'ímacá.

<sup>3</sup> Tupana quemari rijló marí que: “Chuhua pa'apaña pejena. Pácho'o pite'eré naquiyá, pi'ijnacáloje ají que ya'ajnaje penaje. Te'erí nuya'atáicare pijló ejo pi'ijnajé”, que Tupana quemacá rijló i'ímacá.

<sup>4</sup> Raú rácho'o rite'eré eyá, Caldea te'eré eyá. Ri'ijná ají que ya'ajnaje pajimila Harán ejo. Re ri'ímacué. Re rara'apami chu tajnaro i'ímacá. Rejomí Tupana huá'ari Abrahami chu ají que majó. Marí te'erí hue'emacare nacú ejo rihuá'a ri'ímacá.

<sup>5</sup> Uncá Tupana a'alá rijló marí te'erí pamineco rite'erehua penaje. Uncá caja ra'alá rijló huejápaja ñani te'erí i'ímacá. Rimá rijló marí que i'ímacá: “No'ojé pijló ricá pite'erehua penaje. Pitaca'ajica ejomi piyanimínamijlo riyurejo”. Marí que Tupana quemacá rijló mayaniqueru ri'ímacá rihuacajé.

<sup>6</sup> Tupana quemari caja rijló rilaquénami nacú marí que i'ímacá: “Ajopana te'eré nacú ne'emajé. Re ajopana huacára'ajeño nasápaca najhua'até caphí mahuemíru. Chapú huani nala'ajica necá ajopana, ajopana que cuatrocientos jarechí quietana”.

<sup>7</sup> Tupana quemari piño marí que chapú nala'ajeño nacú: “Nuhuajaje necá, huacára'ajeño pilaquénami sápara najló mahuemíru. Rejomí nayureje necá, nácho'ocoloje reyá penaje. Nephájica ee marí te'erí nacojé nephaje no'opí”, que Tupana quemacá Abrahami chujlo nanacu i'ímacá.

<sup>8</sup> Tupana quemari Abrahami chujlo nacaje rila'ajicare nacú rijhua'até. Rihue'epéjona penaje rihuacára'a naqueráco'opetena chu'uhuere chinuma mata'acana. Nahue'epícaloje raú ñaqué caja ri'imajica Tupana quemacá que penaje.

E caja ehujaja Abrahami chu i'irí moto'orí i'ímacá. Ra'á ríi Isaac. Hueji que cuhuá'ata que cala huacajé rara'apá mata'arí richu'uhuere chinuma. Pumí chiyá Isaacmi chu i'irí i'ímacá. Na'á ríi Jacob. Ñaqué caja Isaacmi chu la'acá ricá. Jacobmi chu yaní i'ímaño piño. Iyamá iphata ji'imaji nacojé quele riyani i'ímacá. Achiñana huánija ne'emacá. Ñaqué caja Jacobmi chu mata'ajica riyani chu'uhuere chinuma queráco'opena ne'emajica huacajé. Iyamá iphata ji'imaji nacojé quele riyani i'ímacá. Nanacojé iyamá iphata ji'imaji nacojé quele huanamana huecá.

<sup>9</sup> Hua'ajútayami chuna i'ímaño Jacobmi chu laquénami i'ímacá. Nahuó i'ímaqué chapú ne'ehuemi chu, Josemi chu, cha. Aú na'á ajopana ina'uquejlo ricá rihuemí aú, nahuá'acaloje ricá Egipto te'eré ejo penaje. Re risápaque apú hua'até. Uncá ra'aque rijló rihuemí. E'iyonaja Tupana a'aqueri riñaté cajrú rehuá.

<sup>10</sup> Ri'imatá ricá chapú caje yajhué amácana chiyá. Ra'á caja rijló péchují, ri'imacáloje capechuni nahuacára'ajerijlo raú penaje. Raú ripechu i'imari palá Josemi chu nacú. Egipto i'ímacana nacú nemaqué Faraón que. Palá Faraón pechu i'ímacá rinacu. Aú calé ra'á

ricá nahuacára'ajeri penaje. Piyuqueja rite'eré eruna, riñacaré chiyájena, quele huacára'ajeri penaje ra'á ri'imacá.

<sup>11</sup> E caja cajrú Egipto te'eré ehuájena ña'acá me'epejí panacu. Canaan te'eré nacú ñaqué caja. Cajrú najña'ajica me'epejí panacu rehuá i'imajica. Hua'ajútayami chúnajlo, uncá caja a'ajnejí i'imaqué palá najló rihuacajé.

<sup>12</sup> E Jacobmi chu jema'arí nemacá: "Re a'ajnejí Egipto te'eré nacú". Raú rihuacára'a riyánimi chuna i'ijnacá rejo. Hua'ajútayami chuna ne'emacá. E ne'ejná rejo a'ajnejí huarúhua'aje. Huajé calé ne'ejnacá rejo i'imacá. Nephá rejo, nahuarúhua'a najluhua ño'ope a'ajnejí. Rejomi napa'ó rijhua'até nañacajela ejo.

<sup>13</sup> Re ne'emá mequetana. Caja ehuaja na'ajné tajnaro piño. E caja ne'ejná piño Egipto ejo. Iyamá pe la'acá nacú ne'ejnacá rejo. Rihuacajé Josemi chu quemari najló: "Nucá po José. E'ehué nucá", que rimacá najló i'imacá. Faraónmi chu amari caja rejena. Raú rihue'epi na naquiyanaca Josemi chu i'imacá.

<sup>14</sup> Quéchami Josemi chu huacára'aca rara'apami chu, Jacobmi chu, huá'acana rejo, piyuque rejénami chuna hua'até. Raú ne'ejná rejo. Setenta y cinco ne'emacá piyuqueja.

<sup>15</sup> E caja Jacobmi chu i'ijnari Egipto te'eré ejo; re riyuró; re ritaca'á. Re caja piyuque riyanimínami taca'año. Hua'ajútayami chuna, júpimi i'imacáñomi chuna, tajñaño re caja i'imacá.

<sup>16</sup> Júpija natami i'imacá re. Rejomi najña'á naphinami ají que Siquem ejo. Re naca'á naphinami támijimina apucuna chojé. Abrahami chu huarúhua'acare i'imacá chojé naca'á naphinami. Rihuarúhua'a te'erí támijimina ca'aquela pucuna penaje. Hamormi chu yanimínami liyá rihuárúhua'a ricá. Siquem e ne'emacá, re ra'á najló liñeru rihuemí.

<sup>17</sup> Tupana quemari Abrahami chujlo: "No'ojé pijló te'erí. Pilaquénamijlo riyurejo". Rinacu rimá júpimi i'imacá. Ehuá yehuicha riphaca rená chojé, ri'imacáloje rimacá rinacu i'imacá que penaje. Egipto te'eré e Abrahami chu laquénami moto'oño cajrú.

<sup>18</sup> E caja ehuaja apú i'ímari Egipto eruna i'imacana. Uncá ramala Josemi chu i'imacá.

<sup>19</sup> Ripajlaque huecá'ana hua'até; chapú huani rila'ajica hua'ajútayami chuna. Rihuacára'aque naqueráco'opetena cupátacana naliyá, nataca'acáloje penaje.

<sup>20</sup> Ne'iyohuá queja Moisesmi chu moto'ocá i'imacá. Palá Tupana pechu i'imacá rinacu. Richi'inami chuna lamára'año ricá hueji queta queri quetana nañacaré chu.

<sup>21</sup> E caja riphá najló rica'acana chojé. Nayurí ricá ne'emacana ne'eré chu. Re ne'emacana itu iphátayo ricá, rulamára'a ricá ru'urihuá penaje.

<sup>22</sup> Ñaqué i'imacale Moisesmi chu jehuíña'aro piyuqueja Egipto puráca'alo nacú. Palá ripura'acó; palá caja rila'ajica piyuque nacaje.

<sup>23</sup> Iyamá ina'uqué le'ejé quele jarechí ri'imacá huacajé, huechí rihuátaca ricá'ana chaje i'ijnacana. Israelmi chu yanimínami ne'emacá.

<sup>24</sup> Raú ri'ijná nachaje; iphari nanacu. E ramá apú Egipto naquiyanana la'acá chapú huani apú ricá'ana. Aú ri'ijná rejo rimejñátaje riliyá. E rinó ilé Egipto naquiyanana. "Caja nupuri'ichó rila'ejé jacumi nacú", que Moisesmi chu pechu i'imacá rinacu.

<sup>25</sup> Mari que rila'acá aú rimá: Apala marí que nucá'ana pechu i'imajica nunacu: "Ricá ca'ajná Tupana huacára'acare majó, ri'imacáloje huecá Egipto naquiyanana liyá penaje". E'iyonaja uncá ñaqué calé napechu i'imacá rinacu.

<sup>26</sup> Muní que piño ri'ijná nachaje. Amari iyamá ricá'ana tujla'ácaco pajhua'atéchaca. Rihuata natamáca'atacana paliyácaca, nayurícaloje pajhua'atéchaca nócacano. E rimá najló: "Ejena huánija icá. ¿Naje ta ila'á chapú pecohuácaca ejena hua'até?"

<sup>27</sup> Eta apú jara'arí Moisesmi chu. Ricá penaje queño'orí najló nócacajo. Rimá rijló: "¿Na ta a'arí picá ta huahuacára'ajeri penaje?"

<sup>28</sup> ¿Pihuata chi nonócana, lallemi pinoca Egipto naquiyanana que caja?" que rimacá rijló.

<sup>29</sup> Raú ripechu i'imá: "Apala na'atacana paliyácaca, nayurícaloje pajhua'atéchaca nócacano. E rimá najló: "Ejena huánrucátaje nucá hue'emacánajlo". Aú Moisesmi chu ñaaró reyá. I'ijnari ají que ya'ajnaje, Madián te'eré ejo. Rejé ritajno ajopana te'eré nacú; re ri'imaqué ajopana ina'uqué hua'até, re rihuá'aco i'imacá. Iyamá riyani i'imacá rjuhua'até.

<sup>30</sup> "Rehuá ri'imá iyamá ina'uqué le'ejé quele jarechí quetana. Ya'ajná pu'uteni e'iyohuá ipuré i'ímari. Sinaí na'á ipuré í. Rehuá richira'acÉ rimá najló: "Ejena huáno huacajé ipuré ja'apejó, pajluhuaja Tupana hua'atéjeri, je'echú chiyaje, ya'ataró rijló i'imacá. Ramá cajrú quera'atani lucúna'aco jima'alami caje e'iyayá. Re'iyá je'echú chiyaje tára'aro.

<sup>31</sup> Moisesmi chu amaca aú ricá, ripechu i'imá: "¿Na chi caji?" Aú ri'ijná rahua'ajé, ramácaloje na huánica ri'imacá penaje. Ejéchami Tupana ajalaca ricá re'iyayá, rimá rijló:

<sup>32</sup> "Tupana nucá. Pa'ajútayami chuna pechu i'imacare chojé caphí nucá. Abraham, Isaac, Jacob, quele pechu i'ímari nochojé caphí", que rimacá rijló i'imacá. Raú Moisesmi chu quero'oró cajrú. A'acuhuaná ricurúcaca. Rihuó la'aró rejo yacá'acano piyá.

<sup>33</sup> E Tupana quemari piño rijló: “Pica’á pi’ima’ulá pi’imá naquiyó me’etení. Ilé te’erí pitára’aco e, palani ricá, nu’umacale maare”, que rimacá rijló.

<sup>34</sup> “Nomá nala’acá chapú huani nule’ejena ina’uqué. Re necá Egipto te’eré nacú. Caja noma’á neyaca cajrú. Aú nuhuitúqui’icha majó ne’emataje. Ñaquele chuhua nuhuacára’ajica picá Egipto te’eré ejo”, que Tupana quemacá rijló.

<sup>35</sup> Marí que Esteban ja’apátaca najló riyucuna. Rimá piño:

—Júpimi que uncá nahuátala Moisesmi chu i’imacá nahuacára’ajeri penaje. Nemá rijló: “¿Na ta a’arí picá huahuacára’ajeri penaje?” Ricá penájemi, uncá nahuátalare i’imacá, Tupana a’arí nahuacára’ajeri penaje. Ra’á caja ricá ne’ematájeri penaje, ri’imatácaloje necá Egipto eruna liyá penaje. Tupana hua’ateje, je’echú chiyaje, huacára’ari Moisesmi chu i’imacá. Riya’ató rijló quera’atani e’iyá, jíma’alami e’iyá riya’ató rijló i’imacá. Marí que Tupana huacára’aca Moisesmi chu i’imacá —que Esteban quemacá najló.

<sup>36</sup> “Moisesmi chu huá’ari hua’ajútayami chuna Egipto eyá i’imacá. Rila’á Tupana Pechu aú cajrú nacaje uncá meño’ojó iná la’alare caje. Raú nahue’epí mecajeca Tupana i’imacá. Rila’á ricá Egipto te’eré ehua, juni jalomi querálani cha hua’ató. Iyamá ina’uqué le’ejé quele jarechí quetana ne’emacá pu’uteni e’iyá riya’ató rijló i’imacá. Marí que Tupana huacára’aca Moisesmi chu i’imacyohuá i’imacá. Rihuacajé caja rila’aque Tupana Pechu aú nacaje uncá meño’ojó iná la’alare.

<sup>37</sup> Moisesmi chu quemari Israelmi chu laquénamijlo marí que: “Tupana huacára’ajeri majó pajluhuaja ina’uqué ripuráca’alo ja’apátajeri penaje. Icó’ana naquiyana ri’imajica. Nucá rihuacára’aca que, que caja rihuacára’ajica ricá. Ñaquele jema’ajé ra’apiyá piyuque nacaje rimajícara’aca Moisesmi chu i’imace nacú ijló”, que Moisesmi chu quemacá najló i’imacá.

<sup>38</sup> Moisesmi chu huá’ari Israelmi chu laquénami ya’ajná pu’uteni meñaru e’iyohuá. Sinaí nacojé hua’ajútayami chuna jahuacaño rijhua’até i’imacá. Ipuré íi Sinaí. Ricó ri’ijná ri’ihuátaje. Re Moisesmi chu pura’aró Tupana hua’ateje, je’echú chiyaje, hua’até. Rejomi ripa’ó rapumí chuhuá. Ra’apata riyucuna rijhua’atéjenajlo. Rijña’á Tupana hua’ateje liyá Tupana puráca’alo, piyuqueja ina’uqué i’imacáloje ra’apiyá penaje. Ricá penájemi yuriro caja huajlojépu’uteni meñaru e’iyohuá. Sinaí nacojé hua’ajútayami chuna jahuacaño rijhua’até i’imacá. Ipuré íi Sinaí. Ricó ri’ijná ri’ihuátaje. Re Moisesmi chu pura’aró Tupana hua’ateje, je’echú chiyaje, hua’até. Rejomi ripa’ó rapumí chuhuá. Ra’apata riyucuna rijhua’atéjenajlo. Rijña’á Tupana hua’ateje penaje.

<sup>39</sup> E’iyonaja cale uncá hua’ajútayami chuna jema’aqueño Moisesmi chu ja’apiyá i’imajica. Uncá caja nahuátala ri’imacá. Nahuata napumí chuhuá pa’acano Egipto ejo.

<sup>40</sup> Moisesmi chu malá’aco ipuré i’ihuata nacú huacajé, nemá Aaronmi chujlo marí que: “Ilé Moisés huá’ari huacá Egipto eyá i’imacá. Uncá huahue’epila méqueca ca’ajná rila’acó. Uncá ri’imalá maare huajhua’até. Ñaquele chuhuaca pila’á huajló nacaje jenami, ri’imacáloje huachí’ináricana que caja huajló penaje, rihuá’acaloje huacá hue’ejnajica ejo penaje”. “Je” que rimacá najló.

<sup>41</sup> Raú nala’á nacaje jenami najluhua, ri’imacáloje nachí’ináricana que caja najló penaje. Jema piracana i’irí que ramácana i’imacá. Nenó napirana naquiyana, na’acáloje ri’ími pechu rijló penaje. Aú nacajmo’ó, pu’ují napechu i’imacale renami nala’acare nacú.

<sup>42</sup> Marí caje aú Tupana yúcha’aro nachá, chapú huani nala’acale ri’imacá. Ripachá Tupana cupari ne’emacá; riyurí napura’acó nahuátaca que. Marí que nala’acá aú nala’á Tupana puráca’alo lana’aquejami quemacá que. Marí que Tupana puráca’alo ja’apátajeñomi chuna lana’acá nayucuna papera chojé i’imacá:

Israelmi chu laquénami, icá i’imaño pu’uteni meñaru e’iyohuá iyamá ina’uqué le’ejé quele jarechí quetana.

Rihuacajé uncá nojló calé inó ipirana naquiyana, iphácaloje no’opí raú penaje.

<sup>43</sup> Ijña’aque ijhua’ató pají jenami.

Richu Moloc jenami i’imacá.

Ijló ana puráca’alo lana’aquejami quemacá que. Marí que Tupana puráca’alo ja’apátajeñomi chuna lana’acá nayucuna papera chojé i’imacá:

Israelmi chu laquénami, icá i’imaño pu’uteni meñaru e’iyohuá iyamá ina’uqué le’ejé quele jarechí Moloc i’imari ichi’ináricana que.

Renfán caja i’imari ichi’ináricana que caja ijló.

Rile’ejé ihuiri nacú ipura’acó palá i’imajica.

Renami ila’acare nacú ipura’acó palá, pu’ují ipechu i’imajicale rinacu.

Marí caje pachá nucupaje icá, que Tupana quemacá nanacu.

Ya’ajnaje pajimila Babilonia yámojo chapú inacu péchuruna huá’ajeño icá,

que Tupana puráca’alo ja’apátajeñomi chuna lana’acá papera chojé riyucuna i’imacá.

<sup>44</sup> Esteban quemari piño:

—Ya'ajná pu'uteni meñaru chu ne'emacá huacajé, hua'ajútayami chuna ña'aqueño nahua'ató pirajina ímami nahuacáca'alo ñacarelana penaje. Tupana ya'atari Moisesmi chujlo rila'acana i'ímacá. Ñaqué nala'acá ri'ímacá. Richu nalamá'ata Tupana puráca'alo. Jipa nacú lana'aquejami ri'ímacá.

<sup>45</sup> Ejomi jupichúnami yuriño hua'ajútayami chúnajlo ricá nahuacáca'alo ñacarelana penaje. Najló nayuri ri'ímacá. Moisesmi chu tajnaro i'ímacá. Rapumí chojé Josuémi chu i'ímari nahuacára'ajeri. Josuémi chu i'ímacá nahuacára'ajeri huacajé, najña'á najhua'ató ri'ímacá. Josuémi chu huá'ari necá majó, ne'emacáloje maare penaje. Ajopana ina'uqué te'eremi mari huate'eré i'ímacá. Tupana jácho'otari maárohua i'ímacáñomi chuna maáreya pamineco, napucunami i'ímacáloje penaje. Maáreje pirajina ímami naquiyá la'acanami ja'apejé nahuacaco. Davidmi chu i'ímacá ne'emacana huacajé ejená nahuacaco ra'apejé.

<sup>46</sup> Palá Tupana pechu i'ímajica Davidmi chu nacú. Rihuata Tupana ñacaré la'acana Tupánajlo. Tupana, Jacobmi chu pechu i'ímacare chojé caphí, i'ímacáloje richu penaje.

<sup>47</sup> E'iyonaja uncá rila'alá ricá. Ri'íri, Salomonmi chu, la'arí ricá.

<sup>48</sup> Uncá riñacaré huani calé ri'ímacá. Ajopana chaje huani huacára'aca ricá, Tupana. Uncá ri'ímalajla pají, ina'uqué la'acare, chu. Marí que Tupana puráca'alo ja'apátajerimi chu, Isaíasmi chu, lana'acá riyucuna i'ímacá:

<sup>49</sup> Je'echú chu nucá.

Richiyá nuhuacára'a no'opiyá jema'ajeño.

Camu'ujini nojló eja'ahuá.

Ñaqué i'ímacale uncá meño'ojó nala'alá nojló pají.

Uncá pajluhuaja pucunaji chuja calé nucá, que Tupana quemacá.

<sup>50</sup> Nucaja calé la'arí piyuqueja nacaje i'ímacá, que Tupana quemacá ripuráca'alo ja'apátajerimi chujlo i'ímacá —que Esteban quemacá najló.

<sup>51</sup> Eyá rimá piño najló:

—Ijnúcha'ajeño huani icá ta. Uncá huani jema'alá Tupana ja'apiyá. Re ina'uqué uncá hue'epílaño Tupana nacojé. Meque ilé que huani caja icá. Hua'ajútayami chuna chuhuaja caja i'ijnataca nacaje la'acana. Ne'emajica i'ímajica queja caja icá me'etení. Uncá caja jema'alá Tupana Pechu ja'apiyá.

<sup>52</sup> Hua'ajútayami chuna la'aqueño chapú piyuque Tupana puráca'alo ja'apátajeñomi chuna i'ímajica. Júpimi, uncá chiyó Jesús iphá majó huacajé, ne'emaqué riyucuna. Tupana huátaca que la'ajeri Jesús. Ricá yucuna ne'emaqué najló. E'iyonaja nenoque riyucuna i'ímajeño i'ímajica. E caja ehuaja ricá nemájacare nacú, iphari majó i'ímacá. E'iyonaja icá huacára'año ripatacana i'ímacá. Quéchami ihuacára'a rinócana.

<sup>53</sup> Ripiyá Tupana huacára'ari majó rijhua'atéjena, je'echú chiyájena i'ímacá, na'acáloje hua'ajútayami chúnajlo Tupana puráca'alo penaje. Necá piño yuriqueño ricá caja nayan-íminamijlo. Eyá maárejechami riyurico huajló. E'iyonaja calé uncá huani jema'alá ra'apiyá —que Esteban quemacá najló.

*Nenoca Esteban yucuna marí:*

<sup>54</sup> Marí que rimacá nanacu aú nahuajhué majáca'aro rijló penaje. Iqui'í huani nayúcha'aco Esteban cha. Najma'á naí hua camachá rila'ejé pacá, nenócaloje ricá penaje.

<sup>55</sup> Tupana Pechu i'ímari Esteban huacára'ajeri huani. E riyacá'o ají que je'echú chojé. Amari palani camareji i'ímacá Tupana nacojé, hua'até ramá Jesús tára'aco Tupana ahua'á ca'aña chojé pumitá.

<sup>56</sup> E rimá najló:

—¡Amá! me'etáqueja nomaca je'echú. Ricá i'ímacá ina'uquéjloje penaje, nomá tára'aco Tupana ahua'á ca'aña chojé pumitá —que Esteban quemacá najló.

<sup>57</sup> Nema'acá piyá ripura'acó, cajúru nahuíyo'oca. Netá caja ne'ejhuihuá nayatehuana aú. Eta, piyuqueja necá jecho'oño pajña'acani Esteban nacojé.

<sup>58</sup> Napatá ricá; nachíra'a ricá ají que pajimila yámojo. Re naca'á jipa richá, nenócaloje ricá raú penaje. Jipa ca'ajeño yuriño na'arumacá naquiyana apú hualijímaca hua'até, ri'ímacáloje rihua'aphé penaje. Saulo ríi i'ímacá.

<sup>59</sup> Naca'acá jipa Esteban cha quetana ripura'acó Tupana hua'até. Marí que rimacá rijló:

—Nuhuacára'ajeri, Jesucristo, chuhua pijña'á nupechu —que rimacá rijló.

<sup>60</sup> Ejomi ritára'o ri'irúpachi aú. E caphí rahuiyo'oca, rimá Tupánajlo:

—Nuhuacára'ajeri, pamó nachaje chapú nala'acare nucá liyá —que rimacá rijló caja penaje.

Ejéchami caja ritaca'acá.

## 8

*Chapú Saulo la'acá Jesucristo ja'apiyá jema'ajeño yucuna marí:*

<sup>1-3</sup> Caja nenó Estébanmi chu i'imacá. Re achifiana i'maño. Cajrú péchuruna Tupana nacú ne'emacá. Necá sa'año Estébanmi chu tami. Cajrú neyaca rijhua'até. Eyá Saulo pechu i'imari pu'ují nenócale ri'imacá.

E rihuacajé naqueño'ó chapú la'acana cajrú. Chapú huani nala'ajica Jesucristo ja'apiyá jema'ajeño. Jerusalén ehuájena ne'emacá. Ñaqueé caja Saulo la'ajica chapú Jesucristo ja'apiyá jema'ajeño. Rihuajla'ajica necá ñañacaré chojé. Ajopana ñacaré chojé, ajopana ñacaré chojé que rihuajla'ajica ne'iyajé. Richíra'aque necá ñañacaré chiyá achifiana, inaana hua'até. Ejomi rica'aque necá calajérumi chojé. Marí caje aú cajrú Jesucristo ja'apiyá jema'ajeño ñaacó macajmala. Ajopana te'eré ejo, ajopana te'eré ejo que natamáca'ataco. Judea te'eré ejo, Samaria te'eré ejo hua'ató neñaó i'imacá. Piyuqueja huani neñaataco i'imacá. Jesucristo huacára'acarenaja calé yuriño Jerusalén e.

*Jesucristo yucuna ne'emacá Samaria te'eré ehuájenajlo yucuna marí:*

<sup>4</sup> Caja Jesucristo ja'apiyá jema'ajeño ñañaó Jerusalén eyá i'imacá. Ajopana te'eré ejo, ajopana te'eré ejo que natamáca'ataco. Rehuá caja ne'emaqué Tupana i'imataca ina'uqué capichácajo liyá yucuna najló.

<sup>5</sup> Apú nanaquiyana i'imari. Rií i'imari Felipe. Ri'ijná ají que Samaria te'eré ejo. Re ritajno pajimila e; re ri'imaqué Jesucristo yucuna najló.

<sup>6</sup> Cajrú ina'uqué jahuacaco ripuráca'alo jema'ajé. Palá nema'ajica ripuráca'alo ra'apiyá. Namá caja Felipe la'acá Tupana Pechu aú cajrú nacaje uncá meño'ojó iná la'alare.

<sup>7</sup> Felipe ca'aqueri caja jiñana pechu cajrú ina'uqué e'iyayá. Jiñana jahuíyo'oqueño nácho'oco ne'iyayá aú. Natámina i'imajícaño Felipe tejmo'ótaqueri caja. Ajopana napona taca'arí camachá najló; ajopana uncá meño'ojó ja'apálaño palá. Marí cajena ritejmo'ótaque rihuacajé.

<sup>8</sup> Aú pu'ují huani napechu i'imajica rehuá, rila'ajícale cajrú nacaje uncá meño'ojó iná la'alare.

<sup>9</sup> Re caja apú i'imari. Rií i'imari Simón. Marí'ichú ri'imacá. Júpija ri'imacá rehuá. Rila'aque rinacuhá najló cajrú hue'epica que. Ripajlaque Samaria eruna hua'até, rimaqueé najló:

—Ajopana chaje huani hue'epica nucá. Uncá na i'imalá nucá que —que ripajlájica rinacuhá najló.

<sup>10</sup> Piyuqueja ina'uqué jema'aqueño Simón ja'apiyá palá. Majojeja i'imacaño jema'aqueño ra'apiyá. Ñaqueé caja nahuacára'ajeño jema'ajica ra'apiyá. Marí que nemájica rinacu:

—Ricaja calé piyuque huani la'acá. Tupana pechu que huani ca'ajna ripechu —que nemájica rinacu.

<sup>11</sup> Na'aqueé ripuráca'alo nanacajó. Caja júpimi que riqueño'ocá lahuícho'ocaje najló rehuá. Marí caje aú ne'emaqué pajlájica puráca'aloji ja'apiyá.

<sup>12</sup> E caja Felipe i'imari Tupana puráca'alo yucuna najló rehuá. Jesucristo palamane Tupana i'imatari ina'uqué capichácajo liyá, ne'emacáloje rijhua'atéjena raú penaje. Riyucuna ri'imaqué najló, raú nema'á ra'apiyá. Ejomi nala'á bautizar necá, inaana, achifiana hua'até.

<sup>13</sup> Ñaqueé caja Simón quemacá rinacuhá:

—Caphí nupechu Jesucristo chojé, ri'imatácaloje nucá capichácajo liyá raú penaje —que rimacá rinacuhá.

Aú nala'á bautizar ricá. Ejomi ri'ijnaqueé Felipe hua'até. Ramaque Felipe la'acá Tupana Pechu aú cajrú nacaje uncá meño'ojó iná la'alare caje, ina'uqué hue'epicaloje mecajeca Tupana raú penaje. Palani huani Simonjlo nacaje rila'ajicare i'imajica.

<sup>14</sup> E caja Jesucristo huacára'acarena, Jerusalén e i'imacaño, jema'año Samaria eruna yucuna. Marí que yucu iphaca nanacu: “Cajrú nanaquiyana jema'acá Tupana puráca'alo ja'apiyá.” Raú nahuacára'a Pedro, Juan, quele rejo namaje.

<sup>15</sup> E ne'ejná reyá; ja'apaño ají que a'ajná ño'ojó; iphaño nanacu. E napura'ó Tupana hua'até nanacu, Tupana Pechu yurícolaje najhua'até penaje.

<sup>16</sup> Caja uncá Tupana Pechu i'imalá najhua'até pamineco. Bautizarúnaja calé ne'emacá. Nala'á necá bautizar, Nahuacára'ajeri Jesucristo ja'apiyá jema'ajeño ne'emacale. E'iyonaja calé uncá Tupana Pechu i'imalá ne'iyá.

<sup>17</sup> E caja Pedro, Juan hua'até pura'año Tupana hua'até nanacu. Nato'otá caja nayáte'ela nanacajé. Marí caje aú Tupana Pechu ja'aró ne'iyajé.

<sup>18</sup> Simón amari Jesucristo huacára'acarena to'otaca nayáte'ela nanacojé, hua'até que Tupana Pechu ja'acó ne'iyajé. Marí que ramaca aú rihuata najló liñeru a'acana, na'acáloje rijló pechují rila'acáloje ñaqué penaje.

<sup>19</sup> Rimá Pédrojlo, Juanjlo hua'até:

—A'á nojló pechují, noto'otachi nuyáte'ela ne'ehuata chojé, Tupana Pechu ja'acóloje ne'iyajé raú penaje.

<sup>20</sup> Eyá Pedro quemari rijló:

—Palani Tupana capichátacajla piliñérote pijhua'atoja. ¡Meque pipechu nacú ca'ajná ricá! “Iná huarúhua'ajla liñeru aú nacaje Tupana a'acare majopeja”. ¿Que chi pipechu rinacu?

<sup>21</sup> Uncá pijló calé marí que la'acana. Uncá huani paala Tupánajlo ilé pipechu nacú ricá que —que rimacá rijló—.

<sup>22</sup> Pipajno'otá pipéchuhua pu'uhuaré pila'acare liyá. Pipura'ó caja Tupana hua'até. Apala ramajo pichaje pu'uhuaré pi'ijnachíyaca pipéchuhua liyá —que rimacá rijló—.

<sup>23</sup> Nuhue'epí mecajeca ina'uqué picá. Chapú pihuó i'ímacá ajopánajlo, ajopánajlo que, nachá'atacale picá. Pichuhuájeja picá pu'uhuaré la'ajeri. Uncá meño'ojó piyurila pu'uhuaré la'acana piliyó —que Pedro quemacá Simonjlo.

<sup>24</sup> Aú Simón quemari najló:

—Ipura'ó Tupana hua'até nuchaya, nu'umacóloje chapú caje pimíchaje nunacu liyá penaje —que rimacá najló.

<sup>25</sup> E caja Pedro, Juan, quele ñapátaño Tupana puráca'alo yucuna i'ímacana Samaria erúnajlo. Ne'emá Jesús yucuna najló, namácare penájemi yucuna ne'emá najló.

Ejomi napa'ó. Tupana puráca'alo yucuna i'ímacana nacuja napa'ó napumí chuhua. Ne'emá meque Tupana i'imataca iná capichácajo liyá yucuna ajopánajlo, ajopánajlo que. Apalá chojé, apalá chojé que napa'acó riyucuna i'ímacana nacú. Ají que nachira'ajico cajrú pajmíla e'iyohuá, Samaria te'eré e'iyohuá i'ímacare. Tupana puráca'alo yucuna i'ímacana nacuja napa'acó. E caja ehuaaja nephá napumí chuhua piño Jerusalén ejo.

*Felipe pura'acó Etiopía eyaje hua'até yucuna marí:*

<sup>26</sup> Pajluhuaja Tupana hua'atéjeri, je'echú chiyaje, iphari Felipe nacú. Rimá Felípejlo:

—Chuhua pi'ijná ají que cahuacajo. Ilé iñe'epú i'ijnari Jerusalén eyá ají que meñaru chuhua pajmíla Gaza ejo, ricá chuhua pi'ijnajé —que rimacá rijló.

—Je —que rimacá.

<sup>27</sup> E Felipe i'ijnari ají que a'ajná ño'ojó, rimacá rijló que ejo. Iñe'epú chu ramá pajluhuaja ina'uqué ja'apaca ritucumá. Etiopía eyaje ri'ímacá; ne'emacánaru ja'apiyatéjeri ri'ímacá; ruliñérote lamá'atajeri ri'ímacá. Ri'ijná Jerusalén ejo i'ímacá, ripechu i'ímacáloje pu'ují Tupana nacú rejo penaje.

<sup>28</sup> Ricá penájemi pa'aró piño rapumí chuhua i'ímacá. Pe'iyooúa ja'apaca chu ra'apá, cahuaruna chíra'año ra'apiyá ricá. Ra'apaca nacú ripura'ó Tupana puráca'alo lana'aquejami hua'até. Isaiasmí chu lana'acare ri'ímacá. Tupana puráca'alo ja'apátajeri Isaiasmí chu i'ímacá.

<sup>29</sup> E Felipe iphari rahua'ajé i'ímacá, ejéchami Tupana Pechu quemacá Felípejlo:

—Pi'ijná rápumi chu, pipháchiyachi quele pe'iyooúa ja'apaca, chíra'aró pitucumó.

—Je —que rimacá.

<sup>30</sup> Aú recho'ó rápumi chu, iphátari ricá. Jema'arí ripura'acó papera hua'até, Isaiasmí chu lana'acare i'ímacá. E rimá rijló:

—¿E chi pihue'epica meque quemacánaca quele lana'aquejami pipura'ó hua'até?

<sup>31</sup> —Uncá —que rimacá—. ¿Meque la'ajemi chi nuhue'epicajla ricá? Riyucuna ja'apátajeri i'imaquela nojló, nuhue'epijla ricá. Pácho'o majó, huamachi pijhua'até marí papera. Maare piyá'o nohua'á.

—Je —que rimacá.

<sup>32</sup> Marí que Tupana puráca'alo lana'aquejami ramácare quemacá Jesucristo nacú:

Ohueja najña'acá que caja najña'ajica apú ina'uqué, nenócaloje ricá penaje.

Uncá ohueja i'irí huá'ala ralójlo, napiro'ocachu richijné.

Ñaqué caja uncá meque calé rimájica najló.

<sup>33</sup> Nala'ajé namácaja ricá.

Uncá na penaje calé nala'ajica chapú ricá.

Uncá nayurilaje ajopana pura'acó richaya.

Uncá na calé i'ímajeri chapú huani nala'ajicare ricá yucuna ajopánajlo.

Nenoje ricá.

Raú uncá ri'imalaje marí eja'ahuá chu ina'uqué hua'até, que Tupana puráca'alo lana'aquejami quemacá, ricá ripura'ó hua'até i'ímacá.

<sup>34</sup> Caja Felipe yá'aro rahua'á. E Etiopía eyaje quemari rijlo:



—Chuhua pi'imá nojló riyucuna. ¿Na nacú Tupana puráca'alo ja'apátajeri quemacá marí que? ¿Rinacuhúa ca'ajná rimá, apú nacú ca'ajná?

<sup>35</sup> E Felipe queño'orí riyucuna ja'apátacana rijló. Papera ramácare huajé eyá que riqueño'ó Jesucristo yucuna i'imacana rijló. Rejomi ri'imá caja riyucuna, apa'amá Tupana puráca'alo lana'aquéjami quemacare nacú.

<sup>36</sup> Riyucuna ri'imá rijló palá. Hua'ató que na'apaca juni ahua'ayá. Ejéhami Etiopía eyaje quemacá Felípejo:

—Piyacá'o, re juni maare. ¿E pila'acajla bautizar nucá racojé?

<sup>37</sup> Felipe quemari rijló:

—A'a, caphí pipechu i'imajica ee Jesucristo chojé, ri'imacáloje Pi'imatájeri penaje, nula'ajé bautizar picá.

Rimá rijló:

—Ñaque nupechu, nuhue'epí Tupana i'irí Jesucristo.

<sup>38</sup> Rejé rihuacára'a cahuaruna tajnaco. E Felipe, Etiopía eyaje, quele huitúca'año junápeje. Re Felipe la'arí bautizar ricá.

<sup>39</sup> Ejomi nácho'o junápiya. Ejéhami Tupana Pechu micho'ocá riliyá Felipe. Rejomi uncá Etiopía eyaje amala piño ricá. Pu'ují ripecchu que ra'apaca piño ají que ñe'epú chuhúa.

<sup>40</sup> Eyá Tupana Pechu ña'arí Felipe ají que pajimila ejo. Pajimila í i'imari Azoto. E ri'ijná rehuá Tupana yucuna i'imacana nacú. Cajrú pajimila ejo ri'ijná riyucuna i'imajé najló. Méqueca Tupana i'imataca iná capichácajo liyá yucuna ri'imaqué najló. Riyucuna i'imacana nacuja ri'ijnaqué. Ya'ajnaje pajimila Cesarea ejená ri'ijná riyucuna i'imajé.

## 9

*Tupana apiyácaca Saulo pechu yucuna marí:*

<sup>1</sup> Eyá ya'ajná Saulo la'aqueri chapú Jesucristo ja'apiyá jema'ajeño. Rihuata nacapichátacana. Ñaque i'imacale ri'ijná Sacerdótena huacára'ajeri chaje.

<sup>2</sup> Riquejía a riliyá rinacojé, ri'ijnacáloje pajimila Damasco ejo penaje. Ripuráca'alo aú rihuata nahuacáca'alo ñacarelana ejo i'ijnacana, riculácaloje Jesucristo ja'apiyá jema'ajeño ne'iyayá penaje. Rijña'acáloje ne'iyayá necá achiñana, inaana hua'até, rihuá'acaloje necá ají que Jerusalén ejo penaje. Rica'acáloje necá ina'uqué huajáquelana chojé rejo penaje.

<sup>3</sup> E caja naculácana chaya riqueño'ó pajimila Damasco ejo i'ijnacana. Ñe'epú chuhúa ra'apá, Damasco ahua'a chami ri'imacá. Ejéhami caphí huani camareji patacá je'echú chiyá majó riloco'opani.

<sup>4</sup> Eja Saulo cojno'orí ají que te'erí e'iyajé. Ejéhami Jesucristo quemacá rijló:

—Saulo, ¿naje pila'á chapú nucá? Chapú pila'acá no'opiyá jema'ajeño; raú caja pila'á nucá chapú —que rimacá rijló.

<sup>5</sup> Aú Saulo quemari rijló:

—¿Na ina'uqueca chi picá?

E rimá rijló:

—Nucá Jesús, pila'acare chapú. Chapú caja pila'acá picó raú.

<sup>6</sup> Raú cajrú Saulo quero'ocó, cajrú ricurúcaca raú. Rimá rijló:

—Nu'umacana, ¿na chi pihuata nula'acá?

Rimá rijló:

—Pácho'o, pi'ijnachi pajimila ejo. Re pamaje no'opiyá jema'ajeri pajluhuaaja. Ricá quemájeri pijló naca nuhuátaca pila'acá.

<sup>7</sup> Saulo huáque'ena quero'oño caja cajrú, nema'acale Jesucristo pura'acó rijhua'até aú. E'iyonaja calé uncá namala ricá.

<sup>8</sup> E caja Saulo jácho'oro te'erí e'iyayá. Ejéhami riyacá'acojla. E'iyonaja uncá meño'ojó ramala. Ñaquele rijhuáque'ena paco'otaño ricá ají que pajimila Damasco ejo.

<sup>9</sup> E nephata ricá pajimila ejo, rejé nayurí ricá. Hueji que cala quetana ri'imacá re, uncá meño'ojó ramala. Uncá caja rajñaque ra'ajnehuá; uncá caja ri'iralá juni caje.

<sup>10</sup> Eyá ricá caja pajimila e, Damasco e, apú i'imari. Jesucristo ja'apiyá jema'ajeri ri'imacá. Rií i'imari Ananías. Apalá pají chu ri'imacá. Rejé Jesús ya'ataró ritapú que rijló rihuacajé. Rihuá'a rijló:

—¡Ananías!

E ra'ajipá rijló:

—Nuhuacára'ajeri, maare nucá —que rimacá.

<sup>11</sup> Jesús quemari rijló:

—Pácho'o, pi'ijnachi ñe'epú chuhúa. Ca'añá ejo pitari na'acá rií. Piphájica penaje Judas ñacaré ejo, pimaje najló marí que: “¿Mere chi Saulo, Tarso eyaje ricá? Tupana hua'até ripura'ó.

<sup>12</sup> Marí que rijlú chu la'acó me'etení. Ramá apú ina'uqué huaíchaca riloco'opani. Ríí Ananías. Ramá ricá mujlúca'aca ucapú rí'imacare chu chojé. Ramá caja rito'otaca riyáte'ela rinacojé, ramácaloje piño raú penaje", que pimájica najló —que rimacá Ananíasjlo.

<sup>13</sup> Marí que rimacá aú, Ananías quemari rijló:

—Nu'umacana, cajrú ina'uqué i'imacá Saulo yucuna nojló. Nemá nojló rinacu méqueca rila'acá chapú huaní pa'apiyá jema'ajeño, Jerusalén e i'imacaño.

<sup>14</sup> Chuhuaca ricá huaícha majó. Sacerdótena huacára'ajeri huacára'ari rí'ijnacá majó, rijña'acáloje piyuque huecá, rica'acáloje huecá ina'uqué huajáquelana chojé penaje. Huecá, pijhua'até pura'ajeño, rihuata la'acana chapú —que rimacá rijló.

<sup>15</sup> Eyá Jesús quemari rijló:

—Pi'ijná. Caja nu'uhupá nujlhua Saulo ajopana ina'uqué e'iyayá, rí'imacáloje nuyucuna ajopana te'eré erúnajlo penaje. Rí'imajé nuyucuna ne'emacánajlo, Israelmi chu laquénamijlo, cajénajlo rí'imajé nuyucuna.

<sup>16</sup> Nucá quemájeri rijló méqueca rijña'ajica chapú caje panacu maare eyá ají ño'ojó huatucumó. No'opiyá jema'ajeri rí'imacale, nala'ajica ricá chapú —que rimacá Ananíasjlo.

<sup>17</sup> Raú Ananías i'ijnari ají que a'ajná ño'ojó Saulo i'imacá ojo. Riphá rinacu; rito'otá riyáte'ela rinacojé; rimá rijló:

—Nujmeremí, Saulo, Hue'emacana Jesucristo, huacári'ichari nucá majó pichaje. Pi'ijnacá majó huacajé, iñe'epú chu ripura'ó pijhua'até i'imacá. Ricá huacári'ichari nucá majó pichaje. Ripuráca'alo aú no'ojé pijló amácaje, pamácaloje penaje. Ra'acáloje caja pijló Tupana Pechu penaje rihuacári'icha nucá majó —que rimacá rijló.

<sup>18</sup> Ejéchami jiña a'ajú que ja'acó Saulo ijlú chiyá. Ejomi ramá palá, rácho'o. Ejomi nala'á bautizar ricá.

<sup>19</sup> Rejomi rajña ra'ajnehuá, raú caja ritejmo'otó piño. E caja riyuró júpija quemachi Damasco e. Ajopana Jesucristo ja'apiyá jema'ajeño, Damasco eruna, hua'até rí'imá re.

*Saulo i'imacá Jesucristo yucuna Damasco e yucuna marí:*

<sup>20</sup> E caja Saulo queño'orí Jesucristo yucuna i'imacana nahuacáca'alo ñacarelana chu. Rimá Jesús nacú:

—Tupana l'irí ricá —que rimacá rinacu.

<sup>21</sup> Piyuque ripuráca'alo jema'ajeño pechu i'imá: “¿Méquechi ricá?”

Napura'ó pajhua'atéchaca rinacu, nemá rinacu:

—Ricá capichátaqueri Jesucristo ja'apiyá jema'ajeño Jerusalén e i'imajica. Ñaqué penaje rí'ijná majó, rijña'acáloje necá tejmuji, ra'acáloje necá sacerdótena huacára'ajeñojlo penaje. ¡Eta chuhua, meque ca'ajná ripechu! —que nemacá rinacu.

<sup>22</sup> Ehuá richaje, richaje que Saulo pechu i'imacá Tupana puráca'alo yucuna i'imacana nacú. Palá rí'imajica najló Jesucristo yucuna, nahue'epicaloje raú Jesucristo i'imacá Tupana l'irí penaje. Damasco ehua cajrú judíona i'imacá, quechíra'aqueja que napechu i'imacá raú.

*Saulo i'imacó judíona naquiyana liyá yucuna marí:*

<sup>23</sup> Júpija quemachi Saulo i'imacá rehuá najhua'até. Ehuá ajopana judíona pura'acó rinacu pajhua'atéchaca, nenócaloje ricá penaje.

<sup>24</sup> E'iyonaja Saulo jema'arí riyucuna. Hue'echú quetana, lapí quetana hua'ató na'ó ripé pajmíla numaná ahua'á, nenócaloje ricá penaje.

<sup>25</sup> Pajmíla nacú corral yenoje chipúca'ari. Jipa naquiyá la'acanami rí'imacá. E lapí Jesucristo ja'apiyá jema'ajeño huitúca'ataño Saulo cuhuá'ala caje cajruni chu, ají que corral yámojo. Marí queja rí'imacó ripinana liyá.

*Saulo i'imacá Jerusalén ojo yucuna marí:*

<sup>26</sup> E caja Saulo iphari Jerusalén ojo. Re rihuata Jesucristo ja'apiyá jema'ajeño hua'até jahuacácano. E'iyonaja naquero'ó ripiyá.

—Jesucristo ja'apiyá jema'ajeri ricá chuhuaca —que ajopana quemacá najló i'imacá rinacu.

E'iyonaja uncá nema'alá na'apiyá.

<sup>27</sup> E caja apú nanaquiyana a'arí Saulo ñaté. Ríí i'imari Bernabé. Ricá huá'ari ricá Jesucristo huacára'acarena ojo. Rimá najló:

—Ya'ajná iñe'epú chuhua Saulo amari Jesús i'imacá. Re ripura'ó rijhua'até. Ejomi rí'ijná Damasco ojo. Re rí'imá Jesucristo yucuna najló. Caphí ripechu i'imacá ripuráca'alo yucuna i'imacana nacú najló, Jesucristo a'acale riñaté —que rimacá najló i'imacá.

<sup>28</sup> —Ñaqué ricá.

E caja Saulo yuríro Jerusalén e. Jesucristo huacára'acarena huáque'ehue rí'imacá.

<sup>29</sup> Caphí ripechu i'imajica Jesucristo yucuna i'amacana nacú. Ripura'ó caja judíona naquiyana hua'até, griégona pura'acó chu pura'ajeño ne'emacá. Jesucristo yucuna jimaje naca'ácaco pajhua'atéchaca. Nayúcha'o richá, aú nahuata rinócana.

<sup>30</sup> E'iyonaja Jesucristo hua'atéjena naquiyana jema'año riyucuna, aú nahuá'a ricá apú pajmíla ejo. Cesarea pajmíla íí. Reyá nahuacára'a ri'ijnacá Tarso ejo. Apú pajmíla íí Tarso.

<sup>31</sup> Rihuacajé uncá na calé rehuá la'arí Jesucristo ja'apiyá jema'ajeño chapú. Judea te'eré ehuá, Galilea te'eré ehuá, Samaria te'eré ehuá hua'até, uncá nala'alá necá chapú. Richaje, richaje que napechu i'imajica Tupana chojé caphí. Hue'echú ca'alá queja napechu iphájica Tupana puráca'alo nacojé hue'epícana. Tupana Pechu a'aqueri ra'apiyá jema'ajeño ñaté, ajopana ina'uqué jema'acáloje Jesucristo ja'apiyá najhua'até penaje.

*Pedro tejmo'ótaca Eneas yucuna marí:*

<sup>32</sup> E caja Pedro i'ijnari apú pajmíla eyá, apú pajmíla eyá que. Jesucristo ja'apiyá jema'ajeño chaje ri'ijnacu. Ri'ijná caja pajmíla Lida ejo, Jesucristo ja'apiyá jema'ajeño amaje.

<sup>33</sup> Re riphata apú ina'uqué. Rií i'imari Eneas. Ritami ri'imacá. Caja hueji que cuhuá'ata quele jarechí quetana rito'ocó cama chu. Caja taca'átaqueja que rinapona i'imacá.

<sup>34</sup> E Pedro quemari rijló:

—Eneas, me'etení Jesucristo tejmo'ótaca picá. Chuhua pácho'o; pilamá'ata picamané.

Ejéchami Eneas jácho'oco; peyajhueni ri'imacá.

<sup>35</sup> Ejomi piyuque Lida eruna amaño ritami penájemi peyajhueni. Ñaqué caja Sarón eruna amaca ricá. Raú napajno'otá napéchuhua Tupana ejo, nema'acáloje Jesucristo ja'apiyá penaje.

*Pedro macápo'oca Dorcas yucuna marí:*

<sup>36</sup> E rihuacajé pajluhuájaru inanaru i'imayo. Jesucristo ja'apiyá jema'ajeño ru'umacá. Pajmíla Jope e ruñacaré i'imacá. Ruí i'imari Tabita. Apú ruí i'imari Dorcas griégona pura'acó chu. Rucá la'aqueyo palá ajopana ina'uqué nacú. Palá rula'ajica camu'ují la'acaño nacú.

<sup>37</sup> Pedro i'imacá pajmíla Lida e huacajé, rula'ó rutami. Ricá rutami caje nacú rutaca'á. Na'apitataca rutami ejomi nácho'ota rutami yenoje ucapú chojé.

<sup>38</sup> Ejo'ocaja Pedro i'imari nácho'oco ucapú Lida e. Pajmíla Jope ahua'á ricá. Jesucristo ja'apiyá jema'ajeño hue'epiño ejo'ocaja Pedro i'imacá re. Aú nahuacára'a iyamá achiñana rejo, nahuá'acáloje rimaná penaje. Nephá rinacu. E nemá Pédrojlo:

—Chuhua pi'ijná huajhua'até Jope ejo, pimalá'ataniya picó maare.

—Je —que rimacá.

<sup>39</sup> E Pedro i'ijnari najhua'até. Nephá nanacu. E nahuá'a Pedro ucapú támijimi i'imacare chu chojé. E ramá cajrú inaana jahuacaco rejé. Ihuacajilomina ne'emacá. Cajrú neyaca rucami cholo. Naya'atá Pédrojlo a'arumacaji, camichá caje rucujípa'acare najló i'imacá.

<sup>40</sup> E Pedro huacára'ari nácho'oco ucapú chiyá. Quéchami ritára'aco ri'irúpachi aú rutami ahua'á. Ripura'ó Tupana hua'até, rimacápo'ocaloje rucá penaje. Ejomi riyacá'o ají que támijimi cháje, rimá támijimijlo:

—Tabita, pácho'o. Raú rujlú me'etaro; amayo Pedro. Aú rócho'o chí'ilá que.

<sup>41</sup> E ripatá rucá ruyáte'ela naquiyá, rácho'ota rucá. Ejomi rihua'a Jesucristo ja'apiyá jema'ajeñojlo, ihuacajilominajlo hua'até. Rimá najló:

—Amá, chuhua cajmurú rucá —que Pedro quemacá najló.

<sup>42</sup> Marí que rumacápo'oca i'imacá. Cajrú riyucuna moto'ocá pajmíla eruna e'iyohuá. Raú íquí'iruna ina'uqué pechu i'imá caphí Jesucristo chojé, ri'imatácaloje necá capichácao liyá penaje.

<sup>43</sup> Pedro i'imari rehuá meque cálaja. Simón hua'até ri'imá re. Simón sápaqueri pirajina ímami nacú, quele risápaca'ala i'imacá. Rijhua'até ri'imá.

## 10

*Cornelio huá'aca Pedro maná yucuna marí:*

<sup>1</sup> Pajluhuaja ina'uqué i'imari. Rií i'imari Cornelio. Cesarea e ri'imacá. Pajmíla íí Cesarea. Cien surárana huacára'ajeri ri'imacá. Italia eyájena ríle'ejena surárana i'imacá.

<sup>2</sup> Cajrú ripechu i'imacá Tupana nacú. Ñaqué caja riyani, riyajalo pechu i'imacá. Uncá judíona calé ne'emacá. E'iyonaja ra'aqué cajrú liñeru judíona naquiyánajlo, camu'ují la'acaño ne'emacá. Cajrú caja ripura'acó Tupana hua'até.

<sup>3</sup> E caja Tupana hua'até pura'acano nacú ri'imá riñacaré chu. Pe'iyochá camú to'ocó ee, pajluhuaja je'echú chiyaje ya'ataró rijló. Palá Cornelio amaca riphaca rinacu. E je'echú chiyaje huá'ari rijló:

—Cornelio —que.

<sup>4</sup> Aú riyacá'o Tupana hua'atéjeri chaje. Cajrú riquero'ocó raú. Rajalaca ricá. E rimá rijló:

—¿Naje pi'ijichá?

Je'echú chiyaje quemari rijló:

—Tupana hue'epiri picá; rema'á caja pipura'acó rijhua'até. Ramá caja palá pila'acá camu'ují la'acaño nacú.

<sup>5</sup> Chuhua pihuacára'a pijhua'atéjena naquiyaana i'ijnacá pajimila Jope ejo Pedro maná huá'aje.

<sup>6</sup> Ricá quemajeri pijló méqueca pila'ajica nacú. Simón, ilé camejeri ímami nacú sápaperi, hua'até ricá. Juni jalomi cha riñacaré yá'aro —que rimacá rijló.

—Je —que rimacá.

<sup>7</sup> E caja Tupana hua'atéjeri, je'echú chiyaje, pa'aró. Ejomi Cornelio huá'ari iyamá rijhua'até sápaperi maná. Rihuá'a caja apú surara maná; Cajrú péchuri Tupana nacú ri'imacá; palá Cornelio pechu huatána'aca rinacóje.

<sup>8</sup> Rihuá'a namaná. E nephá rinacu. E ri'imá piyuque ramácare yucuna najló. Ejomi rihuacára'a necá pajimila Jope ejo.

<sup>9</sup> E muní que na'apá ají que ya'ajnae, iñe'epú chuhua' na'apaca. E caja ehujaja nephá pajimila Jope nacóje. Ma'apona que Pedro jácho'oco paji i'ihuata chojé, ripura'acóje Tupana hua'até penaje. To'otáqueja paji i'ihuata i'imacá nañacajela ehua. Ri'ihuata chu ri'imá, rejé caápu'ucu i'imari nachá.

<sup>10</sup> E quehuí rijló me'epejí i'imacá; maca'aní rihuátaca ra'ajnehuá ajñacana. Namoto'ocá rijló a'ajnejí quetana nacaje queñótaró rijló chu iná tapúna'aca que.

<sup>11</sup> Ramá je'echú me'etaco rijló. Pumí chiyó ramá nacaje a'arumacaji lé'equé, chítaje huani ri'imacá. Ramá rihuitúca'aca ají que majó riloco'opani. Pa'u quele rimanáure naquiya' rapumí'ocuéjami ri'imacá, huitúca'ari riloco'opani.

<sup>12</sup> A'arumacaji chu ramá que'iyapejena camejérina, pirajina, caje. Pa'u quele tajnéruna, jeína caje, cupira'aphana caje, piyuqueja ramaca nacajena.

<sup>13</sup> E rema'á Tupana quemacá rijló:

—Pácho'o, Pedro, pinochi pijluhua camejeri, pajñácaloje ri'ími penaje.

<sup>14</sup> E'iyonaja Pedro quemari rijló:

—Uncá, Nuhuacára'ajeri. Uncá huani nojñala ri'ími pimacare nacú. Uncá ajñacajena penaje calé necá. Peñahuilana quemáño marí cajena nacú huajñaca piyá ri'ími.

<sup>15</sup> Tupana quemari piño rijló:

—Camejérina, pirajina, numacárena nacú: “Palani ajñacajena necá”, pimaniya nanacu: “Uncá ajñacajena penaje calé necá”.

<sup>16</sup> Hueji que pe Tupana quemacá rijló ñaque huánija. Ejomi a'arumacaji pa'aró piño rapumí chuhua' je'echú chojé.

<sup>17</sup> Raú cajrú Pedro i'ijnataca ripéchuhua na penájeca ramaca ilé que. E'iyohuá que Cornelio huacára'acarena iphaca pajimila e'iyajé. E nemá apujlo:

—¿Mere chí Simón ñacaré?

—A'ajnae ricá —que rimacá najló.

E caja nephá corral numaná ejé.

<sup>18</sup> E caphí nemacá:

—¿E chí Pedro maare?

<sup>19</sup> Re caja jo'ó Pedro i'ijnatari ripéchuhua ramácare nacú. E Tupana Pechu quemari rijló:

—Piyacá'no, hueji quele ina'uqué iphíchaño majó. Pamaje ne'ejichá majó.

<sup>20</sup> Pácho'o chuhuaca; pihuitúca'a nachaje; eco pi'ijná najhua'até. Pimaniya nanacu: “Uncá nucá'ana calé necá; uncá nu'ujnalaje najhua'até” que. Pi'ijná najhua'até, nuhuacára'acale necá majó pihua'aje —que rimacá rijló.

—Je —que rimacá.

<sup>21</sup> Raú Pedro huitúca'ari nachaje. Rimá najló:

—¿Na penaje i'ijichá majó? ¿Nomaje chí i'ijichá majó?

<sup>22</sup> —A'a —que nemacá—. Huahuacára'ajeri, Cornelio, huacára'ari huecá majó pamaje, aú hue'ejná majó. Paláñe'equé huani ricá, huahuacára'ajeri. Cajrú caja ripechu Tupana nacú. Palá caja piyuque judíona pechu rinacu, cajrú nahuátacare ricá. Meyale pajluhuaja Tupana hua'atéjeri, je'echú chiyaje, ya'ataró rijló. Ricá quemari rijló, rihuá'acaloje pimaná penaje. Pimacáloje rijló nacaje nacú penaje rihuá'a pimaná —que nemacá rijló.

<sup>23</sup> —Ñaque ricá. Ijmulúca'a majó; maare icamátajo nujuhua'até; munico hue'ejná —que rimacá najló.

—Je —que nemacá.

E muní que Pedro i'ijnacá najhua'até. Ajopana Jesucristo ja'apiyá jema'ajeño i'ijnaño caja rijhua'até. Pajimila Jope eyájena ne'emacá.

<sup>24</sup> E apacala que i'ímacá huacajé nephá pajimila Cesarea ejo. Rená huacajé Cornelio jahuacátari ina'uqué rihuátacarena riñacaré chojé. Necá, rejena, quele i'ímaño re piyuque. Pedro huátacana nacú ne'emá re.

<sup>25</sup> Caja ehuaja Pedro iphari nanacu a'ajnáreje que. Ramaca aú ricá huaíchaca Cornelio i'ijnari rijimajo. Ritára'o ri'irúpachi aú rijimaje, pu'ují ripechu i'imacale Pedro nacú.

<sup>26</sup> E Pedro quemari rijló:

—Pácho'o. Ina'uqué caja nucá, ilé picá que caja nucá —que rimacá rijló.

<sup>27</sup> Ejomi ra'apata ricá riñacaré ejo. Pedro pura'aró rijhua'até richira'acó nacú. E caja namujlúca'a rijhua'até pají chojé. Pedro amari cajú ina'uqué richu, uncá judíona calé ne'emacá.

<sup>28</sup> E Pedro quemari najló:

—Caja ihue'epí méqueca huapuráca'alo lana'aquejami quemacá icá'ana nacú. Uncá judíona calé i'imacaño nacú rimá. “Uncá paala huahuacaco najhua'até”, que peñahuilana quemacá huajló icá'ana nacú. E'iyonaja Tupana ya'atarí nojló nacaje. Aú nuhue'epí uncá rihuátala nomaca icá ujuuí, ajopana icá'ana hua'até. Uncá caja rihuátala numacá inacu: “Huahuejáputenami necá” que.

<sup>29</sup> Ñaqué i'imacale nu'ujná najhua'até, nemacá aú nojló Cornelio nacú: “Huahuacára'ajeri huá'ari pimaná” que. Uncá na calé numá najló. Pu'ucuja numacá najló: “Je” que. Nu'ujichá majó najhua'até. Chuhua pimá nojló na chaya pihuá'a numaná —que Pedro quemacá rijló.

<sup>30</sup> E Cornelio quemari rijló:

—Maare nu'umá nuñacaré chu me'etení que chami. Pa'u que cálicha huecá rejomi. No'ojné liyá i'itacano nacuja nu'umacá. Lainchu nupura'ó Tupana hua'até, ejéchami pajluhuaja ina'uqué ya'atacá nojló. Mejáma'atani queja ra'arumacá i'imacá.

<sup>31</sup> E rimá nojló: “Cornelio, Tupana hue'epiri picá. Rema'á caja pipura'acó rijhua'até; ramá caja palá pila'acá camu'ují la'acaño.

<sup>32</sup> Chuhua pihuacára'a pijhua'atéjena naquiyana pajimila Jope ejo, nahuá'acaloje Pedro maná penaje. Simón, ilé pirajina ímami nacú sápaajeri, hua'até ricá. Juni jalomi cha riñacaré yá'aro. Pedro quemáajeri pijló nacaje pila'ajicare nacú”, que rimacá nojló i'imacá.

<sup>33</sup> Ñaqué i'imacale tu'ujné nuhuacára'aca necá ca'ajno pihuá'aje. Palá pili'ichaca huecá majó i'ijnacana aú. Tupana amari huecá maare. Chuhua huahuata pi'imacá huajló yucu, Tupana huacára'aca que pi'imacá huajló yucu —que rimacá Pédrojlo.

*Pedro i'imacá Tupana yucuna Cornelio ñacaré chu yucuna marí:*

<sup>34</sup> Raú Pedro queño'ori pura'acajo. Rimá najló:

—Chuhua nuhue'epica Tupana huátaca pajimato ina'uqué. Uncá ripechu la'aló ujuuí ne'iyajena nacú. Tupánajlo piyuqueja ina'uqué.

<sup>35</sup> Re ina'uqué ajopana te'eré nacú, ajopana te'eré nacú que, iphaño Tupana ja'apí, la'año rihuátaca que. Palánija rijló necá, la'año rihuátaca que.

<sup>36</sup> Tupana yuriri Israelmi chu laquénamijlo ripuráca'alo i'imacá. Ripuráca'alo lana'aquejami quemari huajló Jesucristo nacú. Jesucristo lámá'atari huapechu, palá huapechu i'imacáloje Tupana nacú raú penaje. Piyuqueja ina'uqué huacára'ajeri penaje ricá.

<sup>37</sup> Caja jema'á riyucuna méqueca ri'imacá judíona te'eré ehua huajhua'até i'imacá yucuna. Pamineco Juanmi chu i'imacá. Ricá i'imari Tupana puráca'alo yucuna ina'uquejlo i'imacá. Rila'aque caja bautizar nanaquiyana. Pumí chiyó Jesucristo i'imari Tupana yucuna najló Galilea te'eré ehua.

<sup>38</sup> Nazaret eyaje ri'imacá. Caja ihue'epí Tupana a'acá rijló Ripechu, raú rihue'epique piyuqueja nacaje la'acana. Palá huani rila'ajica ina'uqué raú. Ritejmo'ótaque necá, Jiñá Chí'ináricana la'ajicarena natami. Marí que rila'ajica palá, Tupana a'ajicale riñaté.

<sup>39</sup> Huecá amaño piyuque nacaje Jesús la'acare Judea te'eré ehua, Jerusalén ehua hua'até. Chapú péchuruna acúhua'ataño ricá a'ahuná apiyácanami nacú, ritaca'acáloje rinacóje penaje.

<sup>40</sup> Reje ritaca'á i'imacá. E'iyonaja Tupana macápo'ori ricá hueji que cala ritaca'acá ejomi. Aú calé huamá piño ricá.

<sup>41</sup> Uncá piyuqueja calé ina'uqué amaca ricá rimacápo'oco ejomi; huecaja calé amaño ricá. Caja júpimi que Tupana i'ihuapari rijluhua huecá ina'uqué e'iyayá, hue'emacáloje ajopánajlo, ajopánajlo que huamácare yucuna penaje. Taca'arí penájemi macápo'ocaró, hua'até huajná hua'ajnehua. Hue'emá rijhua'até.

<sup>42</sup> Rihuacára'a huecá ripuráca'alo ja'apátacana nacú ajopánajlo, ajopánajlo que. Tupana a'arí Ri'iri Jesucristo, rihuajácaloje namanaicho la'ajeño, pu'uhuaré la'ajeño penaje. Camuruna, caja taca'acaño hua'até rihuajaje. Marí caje yucuna rihuacára'a hue'emacá ajopánajlo, ajopánajlo que.

<sup>43</sup> Júpimi que piyuque Tupana puráca'alo ja'apátajeñomi chuna quemaño marí que Jesús nacú: "Iná pechu i'ímacachu richojé caphí, ri'imatácaloje iná Tupánajlo penaje, Tupana amaro iná chaje pu'uhuaré iná la'acare liyá raú. Jesucristo palamane aú ramó iná chaje."

*Tupana Pechu ja'aró ajopana e'iyajé. Uncá judíona calé ne'emacá. Marí riyucuna:*

<sup>44</sup> Rejo'ocaja jo'ó Pedro pura'aró najhua'até. E'iyohuá que Tupana Pechu ja'acó Pedro puráca'alo jema'ajeño e'iyajé.

<sup>45</sup> Re caja Jesucristo ja'apiyá jema'ajeño i'ímaño, Judíona ne'emacá. Pedro hua'até nephá rejo i'ímacá. Marí que namaca aú napechu nacú i'ímá: "¿Méquejele necá? Tupana a'arí najló Ripechu. E'iyonaja uncá huecá'ana judíona calé necá," que napechu i'ímacá nanacu.

<sup>46</sup> Marí que napechu i'ímacá nanacu napura'acole me'echuje puráca'aloji chu. Me'echuje caja ri'ímacá richu pura'ajéñojlo. Palá huani napura'acó Tupana nacú richu.

<sup>47</sup> E Pedro quemari najló:

—Palani huala'acá bautizar necá. Caja Tupana a'achari najló Ripechu, ra'acá huajló ricá que caja.

<sup>48</sup> E rihuacára'a nala'acá bautizar necá, Jesucristo ja'apiyá jema'ajeño ne'emacale. E caja nemá Pédrojlo:

—Piyuró huajhua'até mequetánaja, meyaque ca'ajná pipa'ajico.

—Je —que rimacá najló.

Marí que Pedro i'ímacá najhua'até i'ímacá.

## 11

*Pedro pa'acó Jerusalén ejo yucuna marí:*

<sup>1</sup> E yucu iphari Jesucristo huacára'acarena nacú. Ajopana Jesucristo ja'apiyá jema'ajeño jema'año caja riyucuna. Judea te'eré ehuaéjona i'ímacaño ne'emacá. Marí que yucu i'ímacá: "Ajopana te'eré ehuaéjona, uncá judíona calé necá, jema'año caja Tupana ja'apiyá."

<sup>2</sup> E caja Pedro pa'aró Jerusalén ejo. Jesucristo ja'apiyá jema'ajeño rehuá i'ímacaño, judíona ne'emacá, necá aca'año rimaná.

<sup>3</sup> E riphá nanacu. Nemá rijló:

—¿Naje pi'ijná ajopana ñacaré chojé? Uncá judíona calé ileruna pi'ijná chaje. ¿Naje chi pajná pa'ajnehuá najhua'até i'ímacá?

<sup>4</sup> Aú Pedro i'imari richuhuaja riyucuna najló.

<sup>5</sup> Rimá najló:

—Pajimila Jope e nu'umaqué huacajé, nupura'ó Tupana hua'até. Ehuá nacaje ya'atacó nojló iná amaca iná tapú que. Nomá nacaje a'arumacaji lé'equé, chítaje huani ri'ímacá. Pa'u quele rimanáure naquiya jepo'oquejami que ri'ímacá. Nomá rihuituca'aca je'echú chiyá aji que majó noloco'opani.

<sup>6</sup> Nuyacá'o richojé, nomácaloje palá naca i'ímacá richu penaje. Nomá que'iyapejena camejérina, pirajina i'ímacá richu. Pa'u quele tajneruna ne'emacá. Nomá caja jeína, cupira'aphana. Marí cajena nomá richu.

<sup>7</sup> Ejéhami Tupana quemacá nojló: "Pedro, pácho'o, pinochi pijluhua camejeri, pajnácaloje ri'ími penaje".

<sup>8</sup> E'iyonaja numá rijló: "Nuhuacára'ajeri, uncá huani ta nojñala ri'ími pimacare nacú: 'Uncá ajñácajena penaje calé necá'. Peñahuilana quemaño marí cajena nacú huajñaca piyá ne'ími".

<sup>9</sup> E Tupana quemari piño nojló: "Camejérina, pirajina hua'até numacárena nacú: 'Palani ricá pajnácaloje penaje', pimaniya nanacu: 'Uncá ajñácajena penaje calé necá'".

<sup>10</sup> Hueji que pe Tupana quemacá nojló ñaqueja caja. Ejomi piyuqueja nomácarena pa'año piño napumí chuhua aji que je'echú chojé.

<sup>11</sup> Mequetana i'imajemi hueji quele achíñana iphaño rejo. Nucá naculá. Pajimila Cesarea eyájena ne'emacá. Reyá nahuacára'ajeri huacára'ari necá nukulaje.

<sup>12</sup> Caja nephá nunacu. Ejéhami Tupana Pechu quemacá nojló: "Eco pi'ijná najhua'até. Pimaniya nanacu: 'Uncá nucá'ana calé necá, uncá nu'ujnalaje najhua'até' que", que rimacá nojló. Aú hue'ejná najhua'até. Mariruna nujuháque'ena, tára'año nohua'a me'etení, i'ijñaño caja nujuhá'até i'ímacá. Iyamá cuhuá'ata quele hue'emacá. Piyuqueja huecá mujlúca'año riñacaré chojé.

<sup>13</sup> Ejomi Cornelio i'imari huajló yucu, ramácare riñacaré chu yucuna. Ramá pajluhuaja Tupana hua'atéjeri, je'echú chiyaje, ya'atacó rijló i'ímacá. Ricá penaje quemari rijló: "Piñhuacára'a pijhua'atéjona naquiya pajimila Jope ejo Pedro maná huá'aje.

<sup>14</sup> Ricá quemájeri ijlo méqueca ila'ajica, Tupana i'imatácaloje picá, pejena, quele capichácajo liyá raú penaje", que Tupana hua'atéjeri quemacá Cornéiojlo i'ímacá. Marí que ri'ímacá nojló riyucuna.

<sup>15</sup> E caja nu'umá najló Jesucristo yucuna. Nuqueño'ochami riyucuna i'imagana najló Tupana Pechu ja'acó ne'iyajé. Júpimi ra'acó hue'iyajé que caja ra'acó ne'iyajé.

<sup>16</sup> Ejéchami riphaca nupechu nacú Huahuacára'ajeri Jesucristo quemacare nacú i'imagá. Rimá huajló i'imagá: “Juan la'arí bautizar ina'uqué juni aú. Eyá núcá a'ajeri ina'uquejlo Tupana Pechu”, que rimacá huajló i'imagá.

<sup>17</sup> Caphí huapechu Jesucristo chojé, ri'imatácaloje huecá raú Tupánajlo penaje. Ñaquele Tupana a'arí huajló Ripochu i'imagá; ñaqueé caja ra'acá najló Ripochu. Marí que nu'umacá najhua'até. Tupánaja calé huacára'ari nu'ujnacá nachaje. Uncá naje calé nula'á apojó que Tupana huátacare liyá —que Pedro quemacá najló.

<sup>18</sup> Marí que rimacá, Jesucristo ja'apiyá jema'ajeñojlo. Jerusalén e i'imagáño ne'emacá, aca'año rimaná penájenami ne'emacá. Marí cajé aú nayurí Pedro nacú culácatacano. Palá napura'acó Tupana nacú, nemá pajlocaca:

—Ñaqueé caja Tupana la'acá palá ajopana, uncá judiona calé necá, e'iyonaja rila'á necá palá. Tupana huátari napala'ataco napéchuha pu'uhuaré nala'acare liyá, ne'emacáloje matajnaco rijhua'até raú je'echú chu penaje —que nemacá pajlocaca.

*Antioquia e Jesucristo ja'apiyá jema'ajeño jahuacaco yucuna marí:*

<sup>19</sup> Nenoca Estébanmi chu huacajé naqueño'ó ajopana la'acana chapú. Piyuque Jesucristo ja'apiyá jema'ajeño nala'á chapú reyá a'ajná ño'ojó. Marí que nala'acale necá chapú, ne'iyajena ñaaño ya'ajnafe Fenicia te'eré ejo. Ajopana piño ñaaño Chipre te'eré ejo. Ajopana piño ñaaño pajmilla Antioquia ejo. Rehuá ne'emaqué Tupana i'imatataca iná capichácajo liyá yucuna judionajlo. Najloja calé ne'emaqué riyucuna; uncá ne'emaqué riyucuna ajopánajlo, napechu i'imagale nanacu: “Uncá najlojé penaje calé riyucuna.”

<sup>20</sup> E caja Chipre eyájena, Cirene eyájena, quele i'ijnaño apú pajmilla ejo. Rií i'imari Antioquia. Re ne'emaqué Jesucristo yucuna najló. Méqueca Jesucristo i'imatataca iná capichácajo liyá yucuna ne'emaqué najló rehuá. Uncá judiona calé ne'emacá.

<sup>21</sup> Tupana a'aqueri ripuráca'alo yucuna i'imajeño ñaté, na'apátacaloje ajopana ina'uquejlo palá ripuráca'alo penaje. Aú cajrú ina'uqué jema'año Jesucristo ja'apiyá.

<sup>22</sup> E caja Jesucristo ja'apiyá jema'ajeño, Jerusalén e i'imagáño, jema'año riyucuna. Aú nahuacára'a Bernabé i'ijnacá pajmilla Antioquia ejo.

<sup>23</sup> Ri'ijná rejo, amari palá huani Tupana la'acá necá rehuá. Pu'ují huani ripechu la'acó raú. E rila'á nenacú, caphí napechu i'imagáloje Jesucristo ja'apiyá jema'acana nacú penaje.

<sup>24</sup> Palájne'equeni huani Bernabé i'imagá. Tupana Pechu quemajica que rila'ajica piyuque nacaje. Caphí huani ripechu i'imajica Jesucristo chojé, ra'acáloje riñaté palá la'acana aú penaje. Cajrú ina'uqué jema'ajica Tupana ja'apiyá ri'imajica najhua'até huacajé.

<sup>25</sup> Ñaquele Bernabé i'ijnari ají que Tarso ejo Saulo culaje. Re riphata ricá. E rihuá'a ricá rijhua'ató Antioquia ejo.

<sup>26</sup> Re ne'emá pajluhua jarechí quietana. Jesucristo ja'apiyá jema'ajeño hua'até ne'emaqué. Nehuía'ata cajrú ina'uqué Tupana puráca'alo nacú. Ajopana Antioquia eruna quemaqueño Jesucristo ja'apiyá jema'ajeño nacú: “Jesucristo hua'atéjena necá” que. Rejoja naqueño'ó neí a'acana marí que.

<sup>27</sup> Ehuá Tupana puráca'alo ja'apátajeño naquiyana iphaca Antioquia ejo. Jerusalén eyájena ne'emacá.

<sup>28</sup> Pajluhuaaja nanaquiyana í i'imari Agabo. E caja nahuacó Jesucristo ja'apiyá jema'ajeño hua'até. E Agabo tára'aro ne'iyá. Tupana Pechu quemari rijló, rimacáloje nacaje nacú najló penaje. Aú rimá najló:

—Cajrú me'epiji i'imajica najló Judea te'eré nacú —que rimacá najló i'imagá.

Ñaqueé caja ri'imagá najló Claudio i'imagá nahuacára'ajeri huani huacajé.

<sup>29</sup> Caja ri'imá najló riyucuna. Raú Jesucristo ja'apiyá jema'ajeño, Antioquia ehuá i'imagáño, pura'año pajhua'atéchaca, nahuacátacaloje liñeru najló penaje. Nahuacára'acaloje ricá Judea te'eré ejo penaje. Nahuarúhua'acaloje najluhua'ajneji raú penaje. Jesucristo ja'apiyá jema'ajeño ne'emacá najhua'até, aú nahuacata najló liñeru. Naliñerute i'imagá nacapi queja na'acá ricá najlojé penaje.

<sup>30</sup> Marí que nahuacáta hua'até liñeru. Ejomi nahuacára'a Judea te'eré ehuájenajlo ricá. Bernabé, Saulo, quele nualé nahuacára'a ricá, na'acáloje ricá Jesucristo ja'apiyá jema'ajeño huacára'ajeñojlo penaje. Ejomi necá tamáca'ataño camu'ují la'acáñojlo ricá.

## 12

*Nenó Santiágo mi chu. Ejomi naca'á Pedro calajeruni chojé. Marí riyucuna:*

<sup>1</sup> Rihuacajé ne'emacana i'imari Herodes. Rihuacára'a rijhua'atéjena surárana la'acá chapú Jesucristo ja'apiyá jema'ajeño. Raú nala'á ne'iyajena chapú.

<sup>2</sup> Rihuacajé rihuacára'a caja Santiágoni chu nócana najo'ojohua aú. Juan e'ehué Santiagomi chu i'imacá.

<sup>3</sup> Herodes amari ilé que rila'acana i'imacá palá judíona naquiyánajlo. Ñaquele rihuacára'a piño Pedro ña'acana, naca'acáloje ricá calajeruni chojé penaje. Rihuata caja rila'acana chapú. Fiesta huacajé e'iyohuá naca'a ri'imacá richojé. Nale'ejé fiesta huacajé najñaque pan mamúra'atacanaru.

<sup>4</sup> E naca'a Pedro calajeruni chojé. Herodes huacára'ari surárana i'imacá rihua'aphena, riñaacó piyá. Dieciseís ne'emacá piyuque. Pa'u queleño que ne'emacá rihua'aphena pajehuémichaca. Herodes pechu nacú ri'imá Pedro huá'acana cajrú ina'uqué e'iyajé fiesta ja'apaca ejomi, nala'acáloje ricá chapú penaje.

<sup>5</sup> Pedro i'imari calajeruni chu i'imacá. Palá huani rihua'aphena amaca ricá riñaacó piyá. Ma'apona que Jesucristo ja'apiyá jema'ajeño pura'acó Tupana hua'até rinacu ya'ajná apalá pají chu. Mahuó nala'acá necó, napura'acóloje Tupana hua'até rinacu penaje.

*Tupana jácho'otaca Pedro calajeruni chiyá yucuna marí:*

<sup>6</sup> Herodes pechu nacú rihuá'acana i'imacá muní que cajrú ina'uqué e'iyajé, nala'acáloje ricá chapú penaje. E lapí Pedro camátaro. Iyamá surárana ihuami chuhuá ri'imá jepo'oqueja iyajmela curete aú. Ajopana surárana lapa'año rinumaná ahua'a. Ina'uqué nahuajácarena hua'aphena ne'emacá.

<sup>7</sup> E mana'í chiyó Tupana hua'atéjeri, je'echú chiyaje, ya'atacá rijló. Cajrú camareji patacó ina'uqué huajáquelana chojé. E Tupana hua'atéjeri tujla'ari Pedro papara'alaya. Apótano ricá, rimá rijló:

—Quiñaja pácho'oco.

Hua'ató que curete caráca'aco ricoja Pedro a'anapitá naquiyá.

<sup>8</sup> —Camachá pa'acá pihuachaphila, pa'a caja pi'ima'ulá —que rimacá Pédrojlo.

—Je —que rimacá.

Aú ra'a rihuachaphilo, ri'ima'ulá caje.

—Chuhua pa'a richaje pa'arumacá pinacuhú, pi'ijnachi nujhua'até.

—Je —que rimacá.

<sup>9</sup> E Pedro i'ijnari rápumi chu. Ripechu i'imá: “¿Nutapú chi ricá? Uncá ca'ajná quehuaca calé nomácare me'etení,” que ripechu i'imacá.

<sup>10</sup> Na'apaña rihua'aphena, surárana, majó pitá i'imacaño. Ñaque caja na'apañaca ajopana. Caja penaje nephá rinumaná huani nacojé. Pejru'uhua naquiyá la'acanamí ri'imacá. Iñe'epú i'imacá ejo pitá rijme'etó. Rinacojé nephaca aú ja rijme'etó ricoja napiyá najló, na'apácaloje richiyá penaje. Reyá caja na'apá pajñacani ají que iñe'epú chuhuá. Richuhuá na'apá, iphaño apú iñe'epú nacojé. Ejéchami Tupana hua'atéjeri i'ijnañaaca ricá. Pedro yuriro ricoja.

<sup>11</sup> Ejéchami ripechu iphaca quehuaca cari. Aú rimá:

—Chuhua nuhue'epí quehuaca jo'ó ricá nomíchaje. Tupana huacári'ichari majó pajluhuaja rijhua'atéjeri je'echú chiyá, ri'imatácaloje nucá Herodes liyá penaje. Chapú judíona naquiyana huátaca nula'acana liyá hua'ató ri'imachiya nucá. Penaje rihuacári'icha ricá majó nuchaje —que rimacá.

<sup>12</sup> Marí caje aú Pedro i'ijnatari ripéchuhua rinacu. E ri'ijná ají que María ñacaré ejo. Juan Marcos jaló María i'imacá. Ruñacaré chojé nahuacó cajrú, napura'acóloje re Tupana hua'até Pedro nacú penaje.

<sup>13</sup> E Pedro iphari corral numanaje, amari chahuíña'aqueja rinumaná i'imacá. Aú rihuá'a najló reyaja. E pajluhuájaru inaya i'ijnayo, romácaloje naca huá'aca najló penaje. Rode ruí i'imacá.

<sup>14</sup> Roma'a rihuá'aca. Ruhue'epí Pedro núru'upi ri'imacá. E'iyonaja uncá ru'ujnalá rinumaná me'etaje rijló. Pu'ují huani rupechu i'imacale, rupa'ó jecho'oquelo ropumí chuhuá pachaje ajopánajlo riyucuna i'imajé. Rumá najló:

—Caja Pedro iphíchari majó. Corral numaná ritára'o me'etení —que rumacá najló.

<sup>15</sup> —¡Meque pehuíji'ichaco quele!

—Uncá nohuíji'ichaco calé, quehuaca numacá.

—¿Ricá huani chí ricá pamíchaca? Je'echú chiyaje, rihua'aphé, ca'ajná pamicha tára'aco —que nemacá rojló raú.

<sup>16</sup> E'iyohuá que Pedro huá'aca piño najló. E caja ehuaja ne'ejná rapu me'etaje. Amaño ricá ri'imacá. Aú naquero'ó.

<sup>17</sup> E Pedro jácho'otari ra'anapitá, namanúma'acoloje penaje. Ejomi ri'imá najló meque Tupana jácho'otaca ricá ina'uqué huajáquelana chiyá yucuna. Ejomi rimá najló:

—Eco i'imá riyucuna Santiágojlo, ajopana huanaquiyánajlo hua'até.

—Je —que nemacá.



E ri'ijná piño apojó.

<sup>18</sup> Muni que najme'etaca ee surárana amaño meñaru Pedro ina'uqué huajáquelana chiyá. Uncá huani nahue'epila méreca ri'imacá. Cajrú nahuíyo'oca pajlocaca raú.

<sup>19</sup> E caja Herodes huacára'ari naculaca Pedro. Naculá ricá. E'iyonaja uncá huani nephátala ri'imacá. Aú Herodes quejá'ari rihua'aphena liyá riyucuna. Uncá nahue'epila méqueca rapiyáacana. Aú rihuacára'a nenótacana. Ejomi Herodes jácho'oro Judea te'eré eyá. I'ijnari pajimila Cesarea ejo. Rejo riyuró.

*Herodes taca'acá yucuna marí:*

<sup>20</sup> Re ri'imacá. E caja ajopana iphaño rejo. Pajimila Tiro, pajimila Sidón hua'até eyájena ne'emacá. Cha'apá ne'emacá. Pajñacani ne'ejnacá rejo, napura'acóloje ne'emacana Herodes hua'até penaje. Júpimi que Herodes hua'atéjena huacára'ajica a'ajnejí najló. E caja ehuaja nayuri rihuacára'acana najló, Herodes yúcha'acole nachá. Ñaquele napura'ó apú hua'até pamineco. Ne'emacana Herodes ñacaré chiyá sápjari ri'imacá. Ríi i'imari Blasto. Ricá hua'até napura'ó, ripura'acóloje Herodes hua'até nachaya penaje. Nahuata ripalá'ataca ripéchuhua palá najhua'até raú penaje, rihuacára'acaloje piño najló a'ajnejí riñacajela eyá penaje.

<sup>21</sup> E Heródes a'ari najló rená, ripura'acóloje najhua'até penaje. E caja riphá rená chojé. Huacajé ra'á palá nojé ra'arumacá rinacuhúá. Ne'emacánaja calé a'acare nanacuhúá caje ra'á rinacuhúá. Ejomi ri'ijná yá'ajo ají que nahuacára'ajeri ñáca'aru chu. E riqueño'ó yucu i'imacana najló.

<sup>22</sup> Ehuá cajrú ina'uqué jahuíyo'otaca ricá, nemá rinacu:

—Uncá huecá que calé ricá, Tupánaja queja ricá quele pura'aró —que nahuíyo'otaca ricá.

<sup>23</sup> Ejéchami pajluhuaja Tupana hua'atéjeri, je'echú chiyaje, huacára'aca rijló tami caje, rila'acóloje ritami penaje. Nemá rinacu: “Tupana que ricá quele pura'aró.” Pachá Tupana hua'atéjeri huacára'ari rijló támicaje. E'iyonaja uncá rihuacára'ala nemacá piyá ñaque rinacu. E caja jamu'unana ajñátaño rinapona. Ricá nacú ri'imá ritami. Caja ehuaja ritaca'á rinacu.

<sup>24</sup> Cajrú ina'uqué jema'año Tupana puráca'alo yucuna rihuacajé. Apú eyá, apú eyá que na'apájica riyucuna i'imacana nacú.

<sup>25</sup> E caja Bernabé, Saulo, quele iphaño Jerusalén ejo. Na'á peñahuilánajlo liñeru. Ejomi napa'ó piño Antioquía ejo napumi chuhúá. Nahuá'a najhua'ató apú. Ríi i'imari Juan Marcos.

## 13

*Bernabé, Saulo, quele i'ijnacá Jesucristo yucuna i'imajé ajopánajlo, ajopánajlo que yucuna marí:*

<sup>1</sup> Jesucristo ja'apiyá jema'ajeño, Antioquía e i'imacaño, naquiyana ja'apátaño Tupana puráca'alo ajopana naquiyánajlo. Ajopana naquiyana caja jehuíña'ataño necá Tupana puráca'alo nacú. Marí quele nanaquiyana i'imacá: Bernabé, Simón Negro, Lucio, Cirene te'eré eyaje ri'imacá. Apú nanaquiyana i'imari Manaén. Ricá tahuá'aro ne'emacánami, Heródesmi chu hua'até i'imacá. Eyá apú i'imari, Saulo ríi i'imacá. Nanaquiyana caja ri'imacá.

<sup>2</sup> Eyá apú huacajé nahuacó piño, ne'ejnatácaloje napéchuhua Tupana nacú pajhua'atéchaca penaje. Hua'até ne'etacó na'ajné liyá, Tupana nacuja napechu i'imacáloje penaje. Ehuá Tupana Pechu quemacá najló:

—Ihuacára'a Bernabé, Saulo hua'até e'iyayó, na'apátachi Jesucristo yucuna ajopánajlo, ajopánajlo que. Ricá no'ó najló nasápaca'ala penaje me'etení —que rimacá najló.

<sup>3</sup> Napura'acó Tupana hua'até, ne'etacó caja na'ajné liyá. Ejomi nato'otá Bernabé, Saulo, quele nacojé nayaté'ela, Tupana a'acáloje nañaté penaje. Ejomi nahuacára'a necá reyá Jesucristo yucuna i'imajé ajopánajlo, ajopánajlo que.

*Chipre te'eré e Bernabé, Saulo, quele i'imaño Jesucristo yucuna rehuá i'imacáñojlo. Riyucuna marí:*

<sup>4</sup> Caja Tupana Pechu huacára'ari ne'ejnacá. E na'apá Seleucia pajimila ejé. Reyá nacuhúá'a huapuru chu Chipre te'eré ejo.

<sup>5</sup> E caja narúca'o napunuma chojé. Pajimila Salamina ejo nephá. Re naqueño'ó Tupana puráca'alo yucuna i'imacana judíonajlo nahuacáca'alo ñacarelana chu. Apú i'ijnari caja najhua'até, nañaté a'ajeri penaje. Ríi i'imari Juan Marcos.

<sup>6</sup> Reyá na'apá piño. Apú eyá, apú eyá que ne'ejnajica Jesucristo yucuna i'imacana nacú. Ají que ne'ejnacá piyunque nate'eré nacuhúá. E caja nephá Pafos ejo. Apú pajimila íi Pafos. Re apú i'imari, Barjesús ríi i'imacá. Apú ríi i'imari Elimas. Judíona ja'á ri'imacá, mari'ichú ri'imacá. Majojeja ripalájica ina'uqué hua'até rinacuhúá; rimaqué najló marí que:

—Tupana puráca'alo ja'apátajeri nucá —que rimájica rinacuhúá.

<sup>7</sup> Ne'amacana hua'ateje ri'imacá. Ne'amacana íi i'imari Sergio Paulo. Capechuni huani ri'imacá. E ne'amacana huá'ari Bernabé, Saulo, quele maná, ne'amacáloje Jesucristo yucuna rijló penaje.

<sup>8</sup> Aú ne'ejná rejo riyucuna i'imajé rijló. E'iyonaja ricá mari'ichú cahuíla'ari Bernabé, Saulo, quele nacú. Ricahuíla'a nanacu ne'amacana pechu i'imacá piyá Jesucristo chojé caphí.

<sup>9</sup> Saulo, apú rií Pablo, i'imari Bernabé huáque'ehue. Tupana Pechu huacára'ajica ricá que rila'ajica nacaje. Ne'emajla Jesucristo yucuna ne'amacánajlo. E'iyonaja mari'ichú cahuíla'ari nanacu. Aú Pablo yacá'aro richaje.

<sup>10</sup> E rimá rijló:

—Pajlácachi huani picá ta; chapújne'equeni huani caja picá; Jiñá Chi'ináricana hua'ateje caja picá. Ñaquele chapú pipechu nacaje palani nacú. Tupana puráca'alo, palani ricá. E'iyonaja picá ta jehuíña'atari ina'uqué majopeja pajlácaje nacú, nema'acá piyá Tupana puráca'alo ja'apiyá penaje. ¿Naje chi uncá piyurila piliyó ilé caje? —que rimacá rijló—.

<sup>11</sup> Chuhuata Tupana huajálica picá ta. Pijlú yacájeri; uncá pamálaje mejáma'atani; meque cálaja pi'imajica mejlurú —que rimacá rijló.

Ejéchami caja huani rijlú yacaca. Majopeja ripijátaca ají ño'ojó, ají ño'ojó que, apú paco'otácaloje ricá penaje.

<sup>12</sup> Marí que ne'amacana amaca aú ripechu i'imá: “¡Meque palani huani Tupana puráca'alo!” Ejéchami rila'acá quehuaca Tupana puráca'alo. Rihuata Tupana ja'apiyá jema'acana, ri'imacáloje Ri'imatájeri penaje.

*Pablo, Bernabé, quele pa'acó Antioquía ejo yucuna marí:*

<sup>13</sup> E Pablo, rijhuáque'ena, quele huitúca'año huapuru chojé. E nácho'o Pafos eyá; i'ijñaño ají que a'ajná ño'ojó pajmíla Perge ejo. Panfilia te'eré nacú ricá pajmíla. Rejé nephá. Re najhuáque'ehue, Juan Marcos, ja'apáñari necá, ripa'acóloje ají que Jerusalén ejo penaje.

<sup>14</sup> Ejomi na'apá piño. Nácho'o Perge eyá; i'ijñaño ají que Antioquía ejo. Pisidia te'eré nacú Antioquía. E nale'ejé huatána'acaje huacajé namujlúca'a nahuacáca'alo ñacarelana chojé. E nayá'o.

<sup>15</sup> E apú pura'aró Tupana puráca'alo lana'aquėjami hua'até najló. Tupana puráca'alo ja'apátajeñomi chuna lana'acare, hua'até ripura'ó najló. Riñapata najló rijhua'até pura'acano. Rejomi nahuacáca'alo ñacarelana chíyá huacára'ajeño quemáño apujlo:

—Chuhua pimá Pablo, Bernabé hua'atejlo, nemachi huajló nahuátacare nacú quemacana.

—Je —que rimacá najló.

E rimá najló nemacá que.

<sup>16</sup> Raú Pablo tára'aro. Ricá'á najló riyáte'ela namanúma'acoloje raú penaje. E rimá najló:

<sup>17</sup> —Israelmi chu laquénami, Tupana ja'apí iphájeño, jema'á numájica ijló me'etení. Israélmí chu laquénami huacá. Huapechu nacuja Tupana. Tupana huá'ari hua'ajútayami chuna ajopana ina'uqué e'iyayá i'imacá. Palá rila'ajica ne'emajica. Aú cajrú namoto'ojica Egipto te'eré nacú. Ajopana te'eré nacú ne'emaqué rihuacajé. Tupana la'aqueri ne'iyohuá cajrú nacaje uncá meño'ojó iná la'alare caje. Marí caje aú ja rihuá'a reyá ne'emacá.

<sup>18</sup> Iyamá ina'uqué le'ejé quele jarechí quetana ne'emacá pu'uteni meñaru e'iyohuá. Pu'uhuaré nala'acare rehuá rihuacajé, Tupana ña'arí panacu.

<sup>19</sup> Tupana capichátari Canaan te'eré ehuájena i'imacá. Iyamá cuhuá'ata quele nanámama i'imacá. Necá piyuque i'imacá, ricapichata ra'acáloje nate'eremi hua'ajútayami chúnajlo penaje.

<sup>20</sup> Cuatrocientos cincuenta jarechí e'iyohuá ra'aqueno ne'iyajena nahuacára'ajeño penaje. Ilé que nahuacára'ajeño i'imacá Samuelmi chu i'imacá ejená. Samuelmi chu i'imari Tupana puráca'alo ja'apátajeri i'imacá.

<sup>21</sup> Rihuacajé ina'uqué huátano Tupana a'acá najló pajluhua ja ne'emacánahua penaje, rihuacára'acaloje necá piyuqueja penaje. Aú Tupana a'arí Saulmi chu ne'amacana penaje. Cismi chu i'irimí Saulmi chu i'imacá. Benjaminmi chu yanimínami naquiyana ri'imacá. Iyamá ina'uqué le'ejé quele jarechí quetana Saulmi chu i'imacá nahuacára'ajeri.

<sup>22</sup> Rejomi Tupana jácho'otari ricá. Ra'á Davidmi chu ne'amacana rapumí chojé. Marí que Tupana quemacá Davidmi chu nacú i'imacá: “Marí Isái i'irí, David, palá nupechu rinacu, rila'acale piyuque nacaje nuhuátacare caje”.

<sup>23</sup> Pajluhua ja Davidmi chu laquemi Jesús. Tupana a'arí Jesús Israelmi chu laquénami i'imatájeri penaje. Tupana arucari ina'uejlo pajluhua ja, ri'imacáloje Ne'ematajéri penaje. Jesús nacú rimá najló i'imacá.

<sup>24</sup> Uncá chíyó Jesús queño'ó ina'uqué jehuíña'atacana Tupana nacú, Juanmi chu i'imari Tupana puráca'alo yucuna najló pamineco. Rimaqué najló, napala'atácaloje napéchuhua pu'uhuaré nala'acare liyá penaje. Ejomi rila'ajica necá bautizar.

<sup>25</sup> Uncá chiyó Juanmi chu ñapata risápaca'ala, rimá najló marí que: “Marí que ca'ajná ipechu nunacu: ‘Ricá Tupana huacára'acare majó, ina'uqué i'imatájeri penaje ricá'. Uncá ricá calé nucá. Nopumí chojé apú ina'uqué iphájeri. Ricá Tupana huacára'acare majó ina'uqué i'imatájeri penaje ricá. Iqui'i huani nuphácare ja'apí ricá. Majopéjeri huani nucá nujluhua, nuchaje huani ri'imacale”, que Juanmi chu quemacá najló.

<sup>26</sup> Reyá Pablo quemari piño najló:

—Abrahami chu laquénamí icá. Tupana ja'apí iphájeño e'iyajena maare. Tupana i'imatari iná capichácajo liyá. Riyucuna yuriro caja ijloje penaje.

<sup>27</sup> Jerusalén eruna, nahuacára'ajeño hua'até, uncá hue'epílaño na ina'uqueca Jesús i'imacá. Uncá caja nahue'epila meque quemacánaca Tupana puráca'alo lana'aquejami. Uncá caja nahue'epila meque quemacánaca Tupana puráca'alo, ra'apátajeñomi chuna lana'acare i'imacá. Huatána'acaje huacajé queja nahuacaco, napura'acóloje ripuráca'alo lana'aquejami hua'até penaje. E'iyonaja calé uncá nahue'epila rinacojé. Ñaqué i'imacale nahuacára'a surárana noca Jesús. Rinócana aú nala'á Tupana puráca'alo ja'apátajeñomi chuna quemacá que nanacu.

<sup>28</sup> Uncá na calé Jesús la'arí pu'uhuaré i'imacá, nenócaloje ricá richona penaje. E'iyonaja calé nemá Pilátujo, rihuacára'acaloje rinócana penaje.

<sup>29</sup> Tupana puráca'alo lana'aquejami quemacá que nenoca ri'imacá. Nacúhua'ata ricá a'ahuaná apiyácanami nacojé. Re ritaca'á i'imacá. Ejomi nahuitúca'ata ritami rinaquiya. Quéchami najña'á ritami támijimina to'otaquelana ejo. Richojé nato'otá ritami. Marí que nala'acá ri'imacá.

<sup>30</sup> E'iyonaja Tupana macápo'ori Jesús rapumí chuhúa.

<sup>31</sup> Ejomi ne'iyajena amaño piño Jesús. Ri'imá najhua'até júpíja. Ri'ijnacá Galilea eyá Jerusalén ejo huacajé cajrú rijhuáque'ena i'imacá. Necá penájenami amaño ricá rimacápo'oco ejomi. Chuhuaca necá penájenami caja i'imaño riyucuna ajopánajlo, ajopánajlo que.

<sup>32</sup> Ñaquele huecá piño ja'apátajo riyucuna ijlo me'etení. Palani riyucuna hue'emacare ijlo me'etení. Ricá yucuna Tupana i'imari hua'ajútayami chúnajlo i'imacá. Uncá chiyó Tupana huacára'a Jesús majó marí eja'ahuá nacojé i'imacá, piyá ri'imá riyucuna najló i'imacá.

<sup>33</sup> Eyá huecá nalaquénamijlo ri'imacá pu'uhuacá. Tupana i'imari méqueca nenójica ricá yucuna najló i'imacá. Rihuacajé rimá Jesús nacú: “Numacápo'oje piño ricá rapumí chuhúa”. Caja richuhúa ri'imá huajhua'até. Júpimi que rimacare nacú najló que rimacápo'oca ricá. Pápera Salmo iyamá chu iná iphata riyucuna. Marí que rimacá rinacu: “Chuhua ina'uqué hue'epíjica picá, Nu'urí picá. Nahue'epeje caja nucá Para'apá”.

<sup>34</sup> Tupana quemari Jesús nacú i'imacá. “Uncá rinapona apichálajo; rimacápo'oyo piño”. Marí que rimacá piño rijló i'imacá: “Palá huani nula'ajica picá. Numacá que David nacú, queja nula'ajica picá”, que rimacá rijló i'imacá.

<sup>35</sup> Apa'amá pápera Salmo quemari méqueca Jesús quemacá Rara'apajlo i'imacá. Rimá marí que: “Uncá piyurilaje nunapona apichaco. Pijhua'até sápa jeri nucá, íqui'ija pihuátacare, nucá”, que rimacá rijló i'imacá.

<sup>36</sup> Uncá ñaqué calé rimacá Davidmi chu nacú. Davidmi chu i'imacá ne'emacana huacajé, rila'aque Tupana huátaca que. Caja penaje ritajno. Nato'otá ritami richi'inami chuna tami ahuajé. Rejé ritami apicharo.

<sup>37</sup> Eyá Jesús napona uncá apichalo, Tupana macápo'ocale ri'imacá —que Pablo quemacá najló.

<sup>38</sup> Rimá piño najló:

—Nojena, ihue'epí marí: Jesucristo chojé Tupana amaro iná chaje pu'uhuaré iná la'acare liyá.

<sup>39</sup> Eyá Tupana puráca'alo lana'aquejami, Moisesmi chu lana'acare i'imacá, uncá meño'ojó ri'imatala iná capichácajo liyá Tupánajlo. Chuhuaca Tupana i'imatari iná capichácajo liyá, caphí iná pechu i'imacachu Ri'irí Jesucristo chojé. Raú ja calé ramó iná chaje pu'uhuaré iná la'acare liyá.

<sup>40</sup> Ri'imaniya ijlo Tupana puráca'alo ja'apátajeñomi chuna quemacá que ne'iyajena ina'uqué nacú. Marí que nalana'acá riyucuna pápera chojé i'imacá. Tupana quemari najló marí que i'imacá:

<sup>41</sup> Jema'á, icá uncá jema'alaño no'opiyajlo numá.

I'ichajeño nunácujlo hua'ató numá: Capichájeño penájena icá, uncale jema'alá no'opiyá.

Nucá, Tupana, la'ajeri nacaje palani huani e'iyayá.

E'iyonaja uncá jema'alaje no'opiyá.

Ne'emajica riyucuna ijlo. E'iyonaja uncá huani jema'alaje quehuácaje puráca'aloji na'apiyá, que Tupana quemacá ne'iyajena nacú.

Marí que Pablo i'ímacá riyucuna najló i'ímacá.

<sup>42</sup> Ejomi Pablo jácho'oro rijhuáque'ena hua'até nahuacáca'alo ñacarelana chiyá. E ajopana, uncá judíona calé ne'emacá, quemañó najló:

—Ja'apata piño huajló riyucuna apú huatána'acaje huacajé.

—Je —que nemacá najló.

<sup>43</sup> E caja ajopana jácho'oño nahuacáca'alo ñacarelana chiyá. Cajrú judíona ja'apaño Pablo, Bernabé, quele ápumi chu. Ñaquele caja ajopana, uncá judíona calé ne'emacá, ja'apaca caja nápumi chu. Uncá judíona calé ne'emacá, e'iyonaja judíona puráca'alo ja'apiyá ne'emá najhua'até. E Pablo, Bernabé, quele pura'año piño najhua'até nayurica piyá Jesucristo ja'apiyá jema'acana. Nemá caja najló nayurica piyá Tupana palamane ja'apiyá i'ímacana.

<sup>44</sup> E apú huatána'acaje huacajé nahuacó piño. Piyuque pajimila eruna jahuañaño richojé najhua'até, nema'acáloje Tupana puráca'alo yucuna penaje. Mequeleja i'ímaño uncá jahuañaño najhua'até.

<sup>45</sup> Eyá ajopana judíona amaño cajrú huani ina'uqué jahuañaco i'ímacá. Aú chapú nahuó i'ímacá Pablo cha. Ñaquele nemá najló rinacu: “Majopeja ta ripajlaca ta.” Napura'ó caja pu'uhuaré rinacu.

<sup>46</sup> E Pablo, Bernabé, quele i'íjñaño najhua'até pura'ajó. Caphí napechu i'ímacá najhua'até pura'acano nacú. Pablo quemari najló:

—Palani hue'emajla Tupana puráca'alo yucuna ijlo pamineco, judíona i'ímacale. E'iyonaja calé uncá huani ihuátala ra'apiyá jema'acana. Ñaquele i'ímacale uncá i'ímalaje Tupana hua'até matajnaco. Ñaquele chuhuaca hua'apíchaca iliyá, hue'emacáloje Tupana puráca'alo yucuna ajopánajlo penaje. Uncá judíona calé naquiyánajlo hue'emajé riyucuna chuhua.

<sup>47</sup> Marí que huala'ajica, Tupana huacára'acale hue'emacá riyucuna ajopánajlo penaje. Marí que rimacá nojló i'ímacá:

No'ó picá, pi'ímacáloje nupuráca'alo yucuna piyuque ajopana te'eré ehuájénajlo penaje.

Nu'umataje nupuráca'alo ja'apiyá i'ímacaño nujlhuua capichácajo liyá, que Tupana quemacá nojló —que Pablo quemacá najló.

<sup>48</sup> Ne'iyajena, uncá judíona calé ne'emacá, jema'año Pablo puráca'alo. Pu'ují napechu la'acó raú, nemá najló:

—Palani huani huajló Tupana puráca'alo.

Rihuacajé íqui'iruna ina'uqué pechu i'ímacá Jesucristo chojé caphí, ri'imatácaloje necá capichácajo liyá Tupánajlo penaje. Caja Tupana hue'epiri ricá penájena ne'emacá, ne'emacáloje matajnaco rijhua'até je'echú chu penaje.

<sup>49</sup> Ne'emaqué riyucuna i'ímacana nacuja. Piyuque nate'eré e'yohuá ne'ejnajica riyucuna i'ímacana nacú cajrú ina'uquejlo.

<sup>50</sup> E'iyonaja judíona naquiyana pura'año Pablo, Bernabé, quele nacú pu'uhuaré. Peñahuilana, inaana, quele hua'até napura'ó nanacu pu'uhuaré. Palá rehuájena pechu i'ímajica ileruna inaana nacú. Cajrú napechu i'ímajica judíona puráca'alo nacú. E caja judíona naquiyana ca'átaño ne'iyajé, nayúcha'acoloje najhua'até Pablo, Bernabé, quele cha penaje. Ñaquele caja naca'átaca nahuacára'ajeño e'iyajé najhua'até. Aú rehuájena la'año chapú necá. Caja ehuaja nácho'ota necá nate'eré eyá.

<sup>51</sup> Ne'ejnacá reyá yámona, Pablo, Bernabé, quele ñaca'año mu'upé ne'ema'ulá naquiyá najimaje. Nahue'epéjona penaje nala'á ilé que. Raú pajimila eruna hue'epí uncá huani paala nala'acá necá, uncale nahuátala ne'emacá rehuá. E caja ne'ejná reyá ají que apú pajimila ejo. Pajimila íí i'ímarí Iconio. Rejo ne'ejná.

<sup>52</sup> Pu'ují huani Jesucristo ja'apiyá jema'ajeño pechu i'ímajica rehuá. Tupana Péchujá calé i'ímaqueri Nahuacára'ajeri rehuá.

## 14

### *Iconio e Pablo, Bernabé, quele i'ímacá yucuna marí:*

<sup>1</sup> E caja nephá Iconio ejo. E Pablo, Bernabé, quele mujlúca'año judíona jahuañaca'alo ñacarelana chojé. Palá ne'emacá Tupana yucuna najló richu, raú cajrú judíona jema'año Jesucristo ja'apiyá. Ñaquele caja cajrú ajopana jema'acá ra'apiyá, uncá judíona calé ne'emacá.

<sup>2</sup> Eyá ajopana judíona naquiyana uncá jema'alaño Jesucristo ja'apiyá. Aú naca'áta ajopana e'iyajé, uncá judíona calé ne'emacá. Ne'iyajé naca'áta nayúcha'acoloje najhua'até Jesucristo hua'atéjona cha penaje.

<sup>3</sup> E'iyonaja Pablo, Bernabé, quele yuriño re júpija najhua'até. Caphí napechu i'ímajica Jesucristo chojé. Ñaquele caphí napechu i'ímajica Jesucristo yucuna i'ímacana nacú najló.

Ne'emaqué ina'uquejlo riyucuna méqueca íqui'ica Tupana huátaca ina'uqué yucuna. Tupana a'aqueri nañaté, nala'acáloje nacaje uncá meño'ojó iná la'alare penaje. Raú ina'uqué hue'epíqueño quehuaca ricá nemájacare nacú.

<sup>4</sup> Marí cajé aú pajimila ehua' i'imaña pechu pajno'oró paliyácaca. Ne'iyajena pechu i'imaqueri palá judíona naquiyana nacú. Ajopana pechu i'imaqueri palá Pablo, Bernabé, quele nacú. Nanacu que'iyapé napechu i'ima'acá. Jesucristo huacára'acarena Pablo, Bernabé, quele i'ima'acá.

<sup>5</sup> E caja judíona naquiyana, ajopana uncá judíona calé naquiyana, nahuacára'ajeño, quele pura'año pajhua'atéchaca Pablo, Bernabé, quele nacú, nala'acáloje necá chapú penaje. Panacójéchaca que napechu i'ima'acá ñaque' nala'acana nacú. Pamineco nahuata nanacu pajlácana íqui'iruna ina'uqué e'iyá, nayúcha'acoloje najhua'até nachá raú penaje. Ejomi nahuata jipa ca'acana nachá.

<sup>6</sup> Ehua' Pablo, Bernabé, quele jema'acá riyucuna. Aú neña'ó reyá, ne'ejná ají que Licaonia te'eré ejé. Reyá ne'ejná piño ají que pajimila Litra ejé. Reyá na'apá piño pajimila Derbe ejé. Marí queja nachira'acó nate'eré nacuhúa.

<sup>7</sup> Ne'emaqué méqueca Tupana i'imataca iná capichácajo liyá yucuna najló rehuá.

*Litra e naca'acá jipa Pablo cha yucuna marí:*

<sup>8</sup> Litra e apú ina'uqué i'imari. Uncá meño'ojó ra'apala. Pajlúhua'o chuja riyá'aco i'imajica, apicháca'alo rí'ima'acale.

<sup>9</sup> E caja rema'á Pablo puráca'alo. Ehua' Pablo yacá'aco richaje. Amari ripechu i'ima'acá caphí Tupana chojé, ritejmo'ótacaloje ricá penaje.

<sup>10</sup> Aú caphí rimacá rijló:

—Pácho'o, pu'ucú pitára'aco.

Raú pila, pila que rácho'oco tára'ajo. Ejéchami palá ra'apaca.

<sup>11</sup> Rehuájena amaño Pablo tejmo'ótaca ricá. Aú nahuíyo'o marí que:

—Huachí'ináricana huitúca'año majó —que nahuíyo'oca Licaonia pura'acó chu.

<sup>12</sup> Zeus, Hermes, quele i'imaño nachí'ináricana que najló. Ñaquele majopeja na'acá Bernabé í Zeus que. Eyá rijhuáque'ehue Pablo, na'á rii Hermes que, napechu i'ima'acale nanacu: “Huachí'ináricana japi necá” que. Pablo pura'aró i'ima'acá. Ñaquele na'á rii Hermes que.

<sup>13</sup> Pajluluhaaja, namacare nacú: “Huachí'ináricana” que, í i'imari Zeus. Ina'uqué iphácaloje ra'apí penaje nala'á riñacarelana i'ima'acá. Pajimila numaná ahua'á rí'ima'acá. Re caja nale'ejé sacerdote i'ima'acá. Ripechu i'imá: “Huachí'ináricana iphíchaño majó japi que. Raú rihuá'a rejo jémana piracana, achí'ana huánija ne'emacá. Rí'ijnatá caja a'ahuaná ihu' rejo, repo'ótacaloje jémana núru'upi nacojé ricá penaje. Ejomi nahuata jémana nócana, na'acáloje napechu Pablo, Bernabé, quelejlo penaje. Marí que nahuátaca nala'acana, napechu i'ima'acale nanacu: “Huachí'ináricana japi necá” que.

<sup>14</sup> E'iyonaja Bernabé, Pablo, quele jema'año riyucuna. Jesucristo huacára'acarena ne'emacá. Uncá paala najló ilé que la'acana i'ima'acá. A'acuhuaná najiyó'ó na'arumacahua, ajopana hue'epícaloje raú uncá paala nala'acá ñaque'. E caja necho'ó ina'uqué e'iyajé, nahuíyo'oco nemacá najló:

<sup>15</sup> —¿Naje ipechu nacú ilé que la'acana? Ina'uqué caja huecá, ilé icá que caja huecá. Hue'ejná majó ijlo quemaje, iyurícaloje iliyó ilé la'acana penaje. Uncá na penaje calé ricá. Re pajluluhaaja calé Iná Chí'ináricana, Tupana ricá. I'ima'acáloje ra'apiyá penaje, hue'emá ijlo riyucuna. Cajmuni Tupana, Iná Chí'ináricana. Uncá majopeja yucu que calé riyucuna. Tupana la'arí je'echú i'ima'acá. Richu i'ima'acá rila'acare caja. Rila'á caja eja'ahua'. Nacaje i'ima'acare richu, rila'acare caja. Juni jalomi, rila'acare caja. Puyunqueja nacajena i'imaño racú, rila'acárena caja.

<sup>16</sup> Júpimi que piyuque ina'uqué la'aqueño napechu queja. Tupana ña'aqueri necá panacu rihuacajé.

<sup>17</sup> E'iyohuá palá Tupana la'ajica piyuque ina'uqué. Raú riyá'atá huajló mecajeca ricá. Rihuacára'a juni ja'acó. Ritahuá'ata caja huajló piyuque huejátacare hue'ecacapere e'iyá, a'ajnejí i'ima'acáloje huajló raú penaje. Palá huapechu i'ima'acáloje raú penaje —que rimacá najló.

<sup>18</sup> Marí que nemacá najló. E'iyonaja uncá nema'alá na'apiyá. Nahuata jo'ó jémana piracana nócana najló, pu'ují napechu i'ima'acale nanacu. Ñaquele nemá nanacu: “Huachí'ináricana necá” que.

<sup>19</sup> Re'iyohuá queja judíona naquiyana iphaca rejo. Pajimila Antioquía eyájena ne'iyajena i'ima'acá. Ajopana i'imaño Iconio eyájena. Napechu i'imá chapú Pablo nacú. E naca'áta ina'uqué e'iyajé cajrú, nayúcha'acoloje richá penaje. Nema'á napuráca'alo na'apiyá. Raú

cajrú ina'uqué ca'acá jipa Pablo cha, nenócaloje ricá raú penaje. E napechu i'imá rinacu: "Caja huenocha ricá" que. Aú nachíra'a ritami te'eré e'iyohuá ají que pajimila yámojo.

<sup>20</sup> Rejeja nayurí ritami. E Jesucristo ja'apiyá jema'ajeño jahuacaño ritami nacojé tujlá que. Aú rihuajá piño ripéchuhua. Ripa'ó piño rapumí chuhuá pajimila e'iyajé. E muní que rácho'oco reyá Bernabé hua'até. Ne'ejná ají que a'ajná ño'ojó pajimila Derbe ejo.

<sup>21</sup> Derbe e ne'emá méqueca Tupana i'imataca iná capichácajo liyá yucuna najló. Raú cajrú ina'uqué jema'año Jesucristo ja'apiyá. Reyá napa'ó piño napumí chuhuá Litra ejé. Reyá ne'ejná piño Iconio ejé. Reyá napa'ó piño Antioquía ejo.

<sup>22</sup> Re napura'ó Jesucristo ja'apiyá jema'ajeño hua'até, caphí napechu i'imacáloje Jesucristo ja'apiyá jema'acana nacú penaje. Napura'ó najhua'até nayurica piyá ra'apiyá jema'acana. Nemaqué najló:

—Ne'iyajena ina'uqué la'año iná chapú, iná jema'acachu Jesucristo ja'apiyá. Marí queja iná ña'acá chapú caje panacu, iná i'imacáloje Tupana i'imacá ejo penaje. Rehuájena huacára'ajeri ricá —que nemájica najló.

<sup>23</sup> Ne'ejnajica ehuá ne'epaqué ne'iyayá achiñana naquiyana Jesucristo hua'atéjona huacára'ajeño penaje. Pamineco ne'etacó na'ajné liyá; ejomi napura'acó Tupana hua'até; ejomi na'aqué necá Tupánajlo. Caphí napechu i'imajicare chojejlo na'aqué necá.

*Pablo, Bernabé, quele pa'acó Antioquía ejo yucuna marí:*

<sup>24</sup> E caja na'apá piño. Na'apá ají que Pisidia te'eré e'iyohuá, iphaño Panfilia te'eré ejo.

<sup>25</sup> Pajimila Perge e na'apata Tupana puráca'alo yucuna najló. Ejomi na'apá piño pajimila Atalia ejé.

<sup>26</sup> Reyá nahuitúca'a huapuru chojé, i'ijnaño ají que a'ajná ño'ojó Antioquía ejo. Reyá Pablo, Bernabé, quele jácho'oño pamineco júpimi i'imacá. Ne'ejná reyá i'imacá, ne'emacáloje Tupana puráca'alo yucuna ajopánajlo, ajopánajlo, que penaje. Nácho'oco reyá huacajé, Jesucristo ja'apiyá jema'ajeño pura'año nanacu Tupana hua'até i'imacá. Tupana a'acáloje necá rinacójo penaje, rihuajhuena ne'emacale. Napura'ó caja Tupana hua'até, ra'acáloje nañaté nasápaca'ala la'acana aú penaje. Marí que nala'acá nácho'oco reyá huacajé i'imacá. E caja ehujaja necá penájemi pa'año piño napumí chuhuá. Caja nañapata nasápaca'ala la'acana rehuá i'imacá.

<sup>27</sup> Caja ehujaja nephá pajimila Antioquía ejo. E nahuacata Jesucristo ja'apiyá jema'ajeño. Ne'emá najló riyucuna, méqueca Tupana a'acá nañaté Jesucristo yucuna i'imacana aú. Nemá caja najló méqueca Tupana la'ajica ajopana te'eré ehujajena pechu palá, napechu i'imacáloje caphí Jesucristo chojé raú penaje. Uncá judíona calé ne'emacá. Riyucuna ne'emá najló piyuqueja.

<sup>28</sup> E caja Pablo, Bernabé, quele yuriño júpija Jesucristo ja'apiyá jema'ajeño hua'até re.

## 15

*Pablo, Bernabé, quele i'ijnacá Jerusalén ejo yucuna marí:*

<sup>1</sup> E rihuacajé ajopana iphaño Antioquía ejo. Judea te'eré eyájena ne'emacá. E naqueño'ó Jesucristo ja'apiyá jema'ajeño jehuíña'atacana nacaje nacú. Maríque nemájica najló i'imajica:

—Uncaja que imata'á queráco'opena chu'uhuere chinuma, Moisesmi chu quemacá que, uncá Tupana i'imatálaje icá capichácajo liyá —que rimacá najló.

<sup>2</sup> E Pablo, Bernebé, quele quemaño najló:

—Uncá quehuaca calé quele imá nacú.

Marí caje jimaje cajrú huani naca'ácaco pajhua'atéchaca. Uncá huani napechu pala'aló. Ñaqué i'imacale Jesucristo hua'atéjona huacára'año Pablo, Bernabé, ajopana nanaquiyana hua'até Jerusalén ejo, re napura'acóloje Jesucristo huacára'acarena hua'até rinacu penaje. Napura'acóloje caja Jesucristo hua'atéjona huacára'ajeño hua'até rinacu rejo penaje nahuacára'a necá rejo.

<sup>3</sup> E Jesucristo ja'apiyá jema'ajeño, Antioquía e i'imacá, huacára'año Pablo, Bernabé quele rejo. Ajopana nanaquiyana hua'até nahuacára'a necá Jerusalén ejo. Aú nácho'oco reyá, ja'apaño ají que Fenicia te'eré e'iyohuá. Samaria te'eré e'iyohuá hua'até na'apá. Nephájica nanacu quehuá ne'emajica riyucuna najló. Méqueca ajopana jema'acá Tupana ja'apiyá yucuna ne'emajica najló. Uncá judíona calé necá nemaqué nacú najló. Marí que nemájica nanacu:

—Caja nayurí peñahuilánami chuna puráca'alo ja'apiyá i'imacana. Chuhuaca Jesucristo ja'apiyá jema'ajeño necá —que nemájica najló nanacu.

Pu'ují ajopana Jesucristo ja'apiyá jema'ajeño pechu la'acó riyucuna jema'acana aú.

<sup>4</sup> E caja Pablo, Bernabé, quele iphaño Jerusalén ejo. Jesucristo ja'apiyá jema'ajeño, Jesucristo huacára'acarena, peñahuilana, quele i'ijnaño najalácaje. Pu'ují napechu la'acó

namaca aú necá. Ejéchami nahuacaco rejé. E Pablo, Bernabé, quele i'imaño riyucuna najló méqueca Tupana a'ajica nañaté ripuráca'alo ja'apátacana aú ajopánajlo, uncá judíona calejlo na'apata riyucuna i'imacá. Ne'emá caja riyucuna méqueca naca'ácaco Antioquía e, queráco'opena chinuma mata'acana jimaje.

<sup>5</sup> Najhua'até caja fariséona nauquiyana jahuacaño. Judíona ne'emacá; Jesucristo ja'apiyá jema'ajeño caja ne'emacá. E'iyonaja uncá nayurila naliyó júpichumi puráca'aloji. Nema'acá aú napuráca'alo natára'lo pe'iyojé ne'iyajé, nemá najló:

—Palani jo'ó namata'acá queráco'opena chinuma, Moisesmi chu huacára'aca i'imacá que. Uncájica ee nala'á ñaque, uncá huani paala —que nemacá ajopana Jesucristo ja'apiyá jema'ajeño nacú, uncá judíona calé nacú nemá.

<sup>6</sup> Marí caje aú Jesucristo huacára'acarena jahuacaño piño peñahuilana hua'até. Napura'ó pajhua'atéchaca rinacu, nalamá'atacaloje ricá penaje.

<sup>7</sup> Júpija napura'acó pajhua'atéchaca rinacu. E caja Pedro tára'aro ne'iyá, rimá najló:

—Nojena, ihue'epí júpimi que Tupana huacára'aca nucá e'iyayá, nu'umacáloje riyucuna ajopánajlo penaje. Méqueca Tupana i'imataca iná capichácajo liyá yucuna nu'umá najló, nema'acáloje Jesucristo ja'apiyá raú penaje. Uncá judíona calé necá nu'umacárenajlo riyucuna.

<sup>8</sup> Tupana hue'epiri méqueca iná pechu. Nema'á ra'apiyá. Aú calé ra'á najló Ripecu, ra'acá hualjlo Ripecu que caja. Raú iná hue'epí palá caja ripecu nanacu.

<sup>9</sup> Tupana pechu huanacu, que caja ripecu nanacu. Ñaque huánija piyuque ina'uqué rijló. Rica'á pu'uhuaré nala'acare nanaquiyá, caphí napechu i'imacale Jesucristo chojé, ri'imacáloje Ne'emátajeri penaje —que Pedro quemacá najló.

<sup>10</sup> Rimá piño najló:

—Tupana la'arí necá palá huani. Uncá paala ca'ajná ijlo quele. ¿Naje ihuata nala'acá cajrú nacaje puhuichani? Uncá meño'ojó huachi'inami chuna la'alaño júpichumi puráca'aloji quemacá que, puhuichani ri'imacale najló. Ñaque caja huecá me'etení, uncá caja meño'ojó huema'alá ra'apiyá.

<sup>11</sup> Ñaquele uncá na penaje calé najló ricá, ne'emacáloje ra'apiyá penaje. Uncá na calé huala'á, Tupana i'imatácaloje huecá capichácajo liyá penaje. Jesucristo palamane aú ja calé Tupana i'imatari huecá rijluhua capichácajo liyá. Ñaque caja ri'imataca capichácajo liyá uncá judíona calé nauquiyana —que Pedro quemacá najló.

<sup>12</sup> Marí caje aú piyuque ina'uqué re i'imacaño manúma'año. E Bernabé, Pablo, quele pura'año piño. Necá i'imaqueño ajopana hua'até, uncá judíona calé ne'emajica. Caja júpimi que naqueño'ó nachaje i'ijnacana. Cajrú nala'ajica nacaje Tupana Pechu ja'apiyá que ne'iyohuá. Nacaje uncá meño'ojó iná la'alare, caje nala'ajica ra'apiyá que, ina'uqué hue'epícaloje meque la'ajérica Tupana raú penaje.

<sup>13</sup> Riyucuna ne'emá najló. Ejomi Santiago piño quemari najló marí que:

—Nojena, jema'á nupuráca'alo.

<sup>14</sup> Caja Pedro i'imichari huajló riyucuna méqueca Tupana queño'ocá ajopana te'eré ehujéna la'acana palá. Ri'ihuapá caja rijluhua nanaquiyana ne'iyayá, ne'emacáloje ríle'ejena ina'uqué penaje.

<sup>15</sup> Richuhuaja caja Tupana puráca'alo ja'apátajeñomi chuna lana'acá papera chojé riyucuna. Marí que nemacá i'imacá:

<sup>16</sup> Tupana quemari rinacuhá marí que: Marí caje ejomi nupa'ajó piño.

Nacaje nula'ajica aú Davidmi chu laquénami hue'epéjeño piño nucá.

Caja nayurí no'opiyá jema'acana i'imacá.

<sup>17</sup> Nacaje nula'ajica aú piyuque ajopana te'eré ehujéna, jema'ajeño riyucuna, nemacáloje nojló, nu'umacáloje Nahuacára'ajeri penaje. Nujhua'atéjena penájena ne'emajica.

<sup>18</sup> Caja júpimi que Tupana la'arí pu'uhuacajé riyucuna ina'uquejlo, que ripuráca'alo lana'aquejami quemacá.

<sup>19</sup> Eyá Santiago quemari piño najló:

—Ñaquele numá nanacu, uncá huecá'ana calé necá numá nacú: Huahuacára'aniya nala'acá nacaje puhuichani. Caja nayurí naliyó nachí'inami chuna puráca'alo ja'apiyá i'imacana, nala'acáloje Tupana huátaca que penaje.

<sup>20</sup> Palani ca'ajná huahuacára'ajica najló puráca'aloji marí caje penaje: Najñaca piyá a'ajnejí nato'otácare majopeja nacaje jenami nacojé, nemacare nacú: “Huachi'inárica marí”. Huemaje caja najló achíñana, inaana, quele la'acá piyá namanaicho pajhua'atéchaca. Ñaque caja uncá najñálaje ri'ími, ejo'ocaja jirá i'imacare e'iyá. Ñaque caja uncá najñálaje rírami.

<sup>21</sup> Maárejeja huahuacára'ajica nala'acá. Caja nahue'epicare marí que la'acana nacú, ne-huíña'atacale ne'emacá rinacu. Pajimila queja rehuá re judíona le'ejé ina'uqué jahuacáca'alo ñacarelana. Huatána'acaje huacajé queja nahuacaco richojé, napura'acáloje Tupana

puráca'alo lana'aquejami hua'até ina'uquejlo penaje. Moisesmi chu lana'acare i'ímacá hua'até napura'ó najló. Júpimi que naqueño'ocá marí que la'acana —que Santiago quemacá najló.

<sup>22</sup> Palani marí que la'acana i'ímacá najló piyuque. Re Jesucristo huacára'acarena i'ímaño, nahuacára'ajeño, quele i'ímaño caja najhua'até. Ñaque caja ajopana Jesucristo ja'apiyá jema'ajeño i'ímacá re. Najló piyuque nacaje Santiago quemacare nacú i'ímari palánija. Eyá caja nahuá'a iyamá achiñana ne'iyayá, nahuacára'acaloje ne'e'jnacá Pablo, Bernabé, quele hua'até Antioquía ejo penaje. Jesucristo ja'apiyá jema'ajeño huacára'ajeño naquiayana ne'emacá. Apú ii i'ímari Judas Barsabás. Apú ii i'ímari Silas.

<sup>23</sup> Najhua'até nahuacára'a papera. Marí que napuráca'alo lana'aquejami quemacá:

“Huejena, uncá judíona naquiayana calé i'ímacaño icá. Eco palá ijlo ca'ajno. Antioquía ehuájena, Siria te'eré ehuájena, Cilicia te'eré ehuájena, quele nacú huemá: Eco palá ijlo ca'ajno. Jesucristo huacára'acarena, Jesucristo ja'apiyá jema'ajeño huacára'ajeño maare, piyuque Jesucristo ja'apiyá jema'ajeño maárohua i'ímacaño, quele quemáño inacu: ‘Eco palá najló’.

<sup>24</sup> Marí que nemacá huajló i'ímacá: ‘Ina'uqué iphaño maare eyá inacu cahuíla'aje ca'ajno. Uncá huapuráca'alo aú calé ne'e'jnacá ca'ajno i'ímacá. Nahuacára'a icá, imata'acáloje queráco'opena chinuma. Nahuacára'a caja, ila'acáloje Moisesmi chu puráca'alomi quemacá que penaje’, que nemacá huajló nanacu.

<sup>25</sup> Ñaquele huahuacára'a iyamá huanaquiayana i'íjncá ichaje Pablo, Bernabé, quele hua'até. Iqu'i'ija huahuatácarena Bernabé, Pablo, quele.

<sup>26</sup> Necá i'íjñaño apú eyá, apú eyá queja Jesucristo yucuna i'ímajé ina'uquejlo. Riyucuna i'ímacana chaya na'apá chapú nanacu péchuruna e'iyohuá. Nahuata nenócana, Jesucristo ja'apiyá jema'ajeño ne'emacale.

<sup>27</sup> Najhua'até huahuacára'a Judas, Silas, quele ichaje. Necá ja'apátajeño ijlo richuhuaaja riyucuna.

<sup>28</sup> Uncá huahuacára'ala ila'acá cajú nacaje puhuichani huani. Marí que la'acana palani huajló. Palani caja Tupana Péchujlo ñaque la'acana. Ñaquele marí papera huahuacára'a ijlo. Richu hualana'á nacaje, ila'acáloje penaje. Ricaja calé huahuacára'a ila'acá.

<sup>29</sup> Marí que huahuacára'aca ila'acá: Ajñaniya ri'ími nato'otácare nacaje jenami nacojé, nemacare nacú: ‘Huachi'ináricana jenami marí’. Ajñaniya caja rírami. Ajñaniya caja ri'ími, jirá i'ímacare e'iyá. Achiñá, inanaru, hua'até uncá la'alájeño namanaicho pajhua'atéchaca. Maárejeja huahuacára'a ila'acá. Jema'ajica ee ra'apiyá, palá i'ímajica. Eco palá i'ímacá ilérohua. Maare ejená ritajicho,” que napuráca'alo lana'aquejami quemacá.

<sup>30</sup> E caja nahuacára'a Judas, Silas, quele i'íjncá Pablo, Bernabé, quele hua'até. Pu'ucuja ne'e'jnacá Antioquía ejo. E caja nephá rejo. Reje nahuacata piyuque Jesucristo ja'apiyá jema'ajeño. Quéchami na'acá najló papera ajopana huacára'acare najló i'ímacá.

<sup>31</sup> E napura'ó papera hua'até. Pu'ují napechu la'acó napuráca'alo aú.

<sup>32</sup> Re Judas, Silas, quele yuriño najhua'até. Tupana púrcaca'alo ja'apátajeño ne'emacá. Napura'ó cajú Jesucristo ja'apiyá jema'ajeño hua'até, napechu i'ímacáloje ñaqueja Jesucristo ja'apiyá jema'acana nacú penaje. Nehuñá'ata caja necá, nahue'epícaloje richaje, richajeno que Tupana ja'apiyá jema'acana nacojé raú penaje.

<sup>33</sup> Meque cálaja Silas, Judas, quele i'ímacá najhua'até. E caja nemá najló:

—Caja i'ímá mequetánaja huachaje. Chuhua ipa'ó piño ihuacára'ajeño ejo. Eco Tupana la'á ipachu palá iñe'epú chuhua —que nemacá najló.

<sup>34</sup> E'iyonaja Silas pechu i'ímá:

—Uncá nupa'alajo, maáreja nuyurejo najhua'até.

Aú caja riyuró re najhua'até.

<sup>35</sup> Rehuaja caja Pablo, Bernabé, quele yuriño Antioquía e. Pablo, Bernabé, ajopana Jesucristo hua'atéjena, quele jehuíña'ataqueño ina'uqué re Tupana puráca'alo nacú. Na'apátaque Tupana puráca'alo yucuna rehuá i'ímajícañojlo.

*Pablo i'íjncá piño Tupana yucuna i'ímajé ajopánajlo, ajopánajlo que yucuna marí:*

<sup>36</sup> Caja ne'emá rehuá júpija najhua'até. E caja Pablo quemari Bernabejlo:

—I'íjncá hue'e'jnachi piño Jesucristo ja'apiyá jema'ajeño chaje. Júpimi hue'emacárenajlo Jesucristo yucuna ejo hue'e'jnaje piño, huamíchajla méqueca necá rehuá —que rimacá rijló.

<sup>37</sup> E'iyonaja Bernabé huátari apú huá'acana najhua'ató najhuáque'ehuehua penaje. Ríi i'ímari Juan Marcos.

<sup>38</sup> E'iyonaja uncá paala Pablo pechu nacú ri'ímacá. Rimá Bernabejlo:

—Uncá paala huahua'acajla ricá huajhua'até, ra'apáñacale hue'emacá Panfilia te'eré e hue'emacá huacajé. Riyurí huañaté a'acana Tupana puráca'alo yucuna i'ímacana aú —que Pablo quemacá rijló.



<sup>39</sup> Bernabé huátari huani rihuá'acana najhua'ató. E'iyonaja uncá Pablo huátala. Rijimaje naca'ácaco cajrú pajhua'atéchaca. Raú na'apá paliyácaca. Eyá Bernabé huá'ari rijhua'ató Juan Marcos. E caja nahuitúca'a huapuru chojé. Ne'ejná ají que Chipre te'eré ejo.

<sup>40</sup> Eyá Pablo i'ijnari caja reyá. Pamineco rihuá'a Silas ne'iyayá, rijhua'que'ehuehua penaje. Ne'ejnacá yámona Jesucristo ja'apiyá jema'ajeño pura'año Tupana hua'até nanacu. Nemá Tupánajlo, ramácaloje necá nala'acá piyá chapú rehuá ja'apácana nacú penaje. Nayurí necá Tupánajlo. Ricá a'arí rinacójó necá, rijhuajhuena i'imacaño ne'emacale. Quéchami na'apaca reyá.

<sup>41</sup> Na'apá ají que a'ajná ño'ojó Siria te'eré e'iyohuá. Ejomi na'apá Cilicia te'eré e'iyohuá. Rehuá napura'acó Jesucristo ja'apiyá jema'ajeño hua'até, ñaqueja napechu i'imacáloje Jesucristo ja'apiyá jema'acana nacú penaje.

## 16

*Timoteo i'ijnari Pablo, Silas, quele hua'até najhua'que'ehue penaje. Riyucuna marí:*

<sup>1</sup> E Pablo, Silas, quele iphaño piño Derbe ejé. Reyá ne'ejná Listra ejo. Re apú Jesucristo ja'apiyá jema'ajeri i'imari. Ríi i'imari Timoteo. Raló i'imayo judíona ja'aló. Jesucristo ja'apiyá jema'ajeyo caja ru'umacá. Griégona ja'a rara'apá i'imacá.

<sup>2</sup> Ajopana Jesucristo ja'apiyá jema'ajeño, Listra e i'imacaño, pura'año palá Timoteo nacú. Ñaque caja Iconio ehua'ajena pura'acó rinacu palá.

<sup>3</sup> Pablo huátari Timoteo apú rijhua'que'ehue penaje. Aú rimata'á richinuma pamineco, judíona, na'apaca ehua' i'imacaño, pechu i'imacá piyá rinacu: "Uncá Tupana hua'ateje calé ricá" que. Caja judíona, rehuá i'imacaño, hue'epiño rara'apá i'imacá griégona ja'a. Aú napechu i'imajla ilé que rinacu. Rihuata rihuá'acana najhua'ató. Timoteo quemari: "Je" que.

<sup>4</sup> E ri'ijná najhua'até ají que ya'ajnaje. Ne'ejnajica ehua' na'apátajica Jesucristo ja'apiyá jema'ajeñojlo riyucuna, méqueca nemacá nacaje nacú Jerusalén e i'imacá. Jesucristo huacára'acarena, Jesucristo hua'atéjona huacára'ajeño, Jerusalén e i'imacaño, quele lana'año papera chojé nacaje méqueca nahuatácare nala'acá. Ricá yucuna na'apátaque ajopánajlo, ajopánajlo que.

<sup>5</sup> Apú pajimila ejo, apú pajimila ejo que ne'ejnajica riyucuna i'imacana nacú. Marí caje aú richaje, richájeno que Jesucristo hua'atéjona pechu i'imacá Jesucristo chojé caphí. Hue'echú ca'alá queja ajopana piño jema'ajica Jesucristo ja'apiyá huajé que. Najhua'até richaje íqui'ica Jesucristo hua'atéjona i'imajica.

*Pablo amaca ina'uqué ya'atacó rijló yucuna marí:*

<sup>6</sup> E caja na'apá piño ají que Frigia te'eré e'iyohuá. Ejomi na'apá piño Galacia te'eré e'iyohuá. Re'iyohuá na'apá pu'ucuja, uncale Tupana Pechu yurila ne'emacá Tupana puráca'alo yucuna rehuájajlo. Asia te'eré nacojena ne'emacá.

<sup>7</sup> E caja nephá Mísia te'eré nacojé. Rejé napechu i'imá: "Chuhua hue'ejnajica Bitinia te'eré ejo." E'iyonaja Jesús Pechu quemari najló: "T'ijnaniya rejo."

<sup>8</sup> Raú na'apá pu'ucuja Mísia te'eré ahua'ayá, huitúca'año ají que pajimila punuma chojé. Pajimila íi i'imari Troas.

<sup>9</sup> Rejé natajnó. E lapí Pablo amari ina'uqué ya'atacó rijló iná amaca iná tapú queja. Ramá pajluhuaja ina'uqué tára'aco, Macedonia eyaje ri'imacá. E rimá rijló:

–Pila'á huajló nacaje; pi'ijná majó Macedonia te'eré ejo; pa'achí huañaté maare –que rimacá rijló ritapú queja.

<sup>10</sup> Quéchami Pablo i'imacá huajló riyucuna. Ñaquele hua'ó huanane lamá'ataje, hue'ejnacáloje Macedonia te'eré ejo penaje. Nucá, Lucas, lana'arí marí papera chojé, i'ijnari caja najhua'até. Huahue'epí quehuaca jo'ó Tupana huátaca hue'ejnacá rejo. Tupana i'imatari iná capichácajo liyá, hue'emacáloje riyucuna rehuá i'imacáñajlo penaje, rihuata hue'ejnacá rejo.

*Pajimila Filipos e Pablo, Silas, quele i'imacá yucuna marí:*

<sup>11</sup> Troas e huahuitúca'a huapuru chojé. Hue'ejná ají que íqui'ini paranácuhua ejé. Ríi i'imari Samotracia. Reyá hua'apá piño. Muní caje chu huephá pajimila Neápolis ejé.

<sup>12</sup> E hua'apá piño ají que pajimila Filipos ejo. Romano naquiyana huánija i'imaño ricá pajimila e'iyá júpimi. Apú pajimila chaje rehuá que ricá. Re hue'emá meque cálaja.

<sup>13</sup> E caja huatána'acaje huacajé hua'apá pajimila yámojo. Re huephá juni turenaje, rejé judíona naquiyana jahuacaño Tupana hua'até pura'ajó. Rejé huephá nanacu. Inaana huánija i'imaño re. Rejé huayá'ó najhua'até. Re hue'emá Tupana puráca'alo yucuna najló.

<sup>14</sup> Pajluhuájaru nanaquiyana íi i'imari Lidia. Pajimila Tiatira eyájeru ru'umacá. Le'ejepelaji, a'arumacaji palá nojé, ipiráluco nojé, ro'oqué ajopana ina'uquejlo liñeru aú.

Ricá i'imaqué rusápaca'ala. Cajrú caja rupechu i'imajica Tupana nacú. Roma'á Pablo i'ímacá Jesucristo yucuna najló. E'iyohuá que Tupana a'acá ruñaté, roma'acáloje Pablo puráca'alo ja'apiyá penaje.

<sup>15</sup> Rejomi nala'á bautizar rucá. Ruñacaré chujena hua'até nala'á rucá bautizar. Ejomi rumá huajló:

—Jesucristo ja'apiyá jema'ajeyo nucá. Ihue'epíjica ee quehuaca numacá, i'ijná nujhua'até nuñacaré ejo, i'imachi nujhua'até mequetánaja nuñacaré chu —que rumacá huajló.

Iqui'i ruhuátaca hue'ejnacá rujhua'até, aú hue'ejná rujhua'até rejo.

<sup>16</sup> Apú huacajé piño hue'ejnajla Tupana hua'até napura'acó ejo. E huephata pajluhuájaru inanaru iñe'epú chu. Jiñá pechu i'imari ro'iyá. Jiñá pechu a'aqueri ruñaté, ruhue'epícaloje ajopana ina'uqué tucumá najló raú penaje. Majojeja rusápajica rucarihuátana hua'até. Ina'uqué naquiyana a'aqueño rucarihuátanajlo liñeru, ruhue'epícaloje natucumá najló raú penaje. Marí que nacánajica cajrú liñeru najluhua.

<sup>17</sup> Huephata rucá, penájeja ro'opaca huápumi chu. Pablo i'imari caja huajhua'até. Huápumi chu ruchira'acó jahuíyo'ocaje nacú. Marí que rumájica huanacu:

—Ajopana chaje huani Tupana. Rijhua'atéjena mariruna ina'uqué. Tupana i'imataca ina'uqué capichácajo liyá yucuna ne'emajica ijlo —que rohuíyo'ojica huápumi chu chira'acano nacú.

<sup>18</sup> Júpija rohuíyo'oca ñaqueja huani. Caja ehuaja roya'áta Pablo jahuíyo'ocaje aú. Aú ripajno'ó riyámojo ruchaje yacá'ajo. E rimá jiñá pechu ro'iyá i'ímacárejlo:

—Jesucristo puráca'alo aú nuhuacára'a pácho'oco ro'iyayá.

Marí caje aú jiñá pechu jácho'oro ro'iyayá.

<sup>19</sup> E caja rucarihuátana hue'epiño caja jiñá pechu jácho'oco ro'iyayá i'ímacá. Nahue'epí caja uncá meño'ojó nacánala najluhua liñeru rupechu aú reyá a'ajná ño'ojó. Marí caje chona napatá Pablo, Silas, quele. Najña'á necá ají que le'ejepeleji ñacarelana ejo. Re nahuacára'ajeño i'ímaño. Necá ejo najña'á ne'emacá.

<sup>20</sup> Na'á necá nahuacára'ajeñojlo, nemá najló:

—Judíona necá. Cajrú huani nacahuíla'aca ina'uqué nacú maárohua.

<sup>21</sup> Apú caje huani napuráca'alo nemacare nacú. Uncá caja huapechu que calé napechu. Ñaquele uncá meño'ojó huecá, Romano naquiyana, jema'alá napuráca'alo ja'apiyá —que nemacá najló.

<sup>22</sup> Marí caje aú cajrú ina'uqué yúcha'año Pablo, Silas, quele cha. E nahuacára'ajeño huacára'año naca'acá nanaquiyó na'arumacá. Ejomi nahuacára'a naña'atácana a'ahuaná aú.

<sup>23</sup> Cajrú naña'ataca necá. Ejomi naca'á necá ina'uqué huajáquelana chojé. Nemá nahua'aphejlo:

—Palá pihuojítaca necá, neñáajica picá.

—Je —que rimacá najló.

<sup>24</sup> Napuráca'alo aú nahua'aphé ca'arí necá ina'uqué huajáquelana chojé. Caja penaje i'ímacá ucapú chojé ritá nachá. Ne'epucu chojé ra'á mirapehua caje ne'epucu patajona penaje.

<sup>25</sup> E caja lapí jenaje que Pablo, Silas, quele pura'año Tupana hua'até. Nataní caja Tupana yale. Ajopana, re i'ímacaño ina'uqué huajáquelana chu, jema'año natanica.

<sup>26</sup> E caja mana'í chiyó te'erí ñaca'acó na'apiyá cajrú. Raú cajrú nahuajáquelana cujúca'ataco piyuqueja, hua'ató rinumaná piyuque me'etátaco raú. Nahuajácarena i'ímacaño richu jecho'oqueja ne'emacá curete aú. Hua'ató caja curete huicho'otaco nanaquiyá. Huicho'oquėjami curete patacó nanacu.

<sup>27</sup> Ejéchami nahua'aphé apoca, amari me'etátaqueja rinumaná i'ímacá. Aú rero'ó rijo'ojohua rinacu cúhua'aco, rinócaloje ricó raú penaje. Ina'uqué nahuajácarena ñaajico pachá, ne'emacana nóqueri nahua'aphé. Ramaca aú me'etátaqueja rinumaná ripechu i'imá: "Caja neicho, chuhua nonójica nocó."

E rinojla ricó rijo'ojohua aú.

<sup>28</sup> Ejéchami Pablo jahuíyo'oca rijló:

—Pa. Pinóniya ta picó. Rejo'ocaja jo'ó huecá maare.

<sup>29</sup> E nahua'aphé quemari apujlo, rijña'acáloje rijló ricamaré penaje. Ra'á rijló ricá. E jecho'oquelo rimujlúca'aca Pablo, Silas, quele chaje. Cajrú ricurúcaca riquero'ocó aú. E rijláma'o ne'emá nacojé.

<sup>30</sup> Ejomi rácho'o, rihua'a necá huaca'apoyo. E rimá najló:

—¿Meque iná la'acá, Tupana i'imatácaloje iná capichácajo liyá penaje?

<sup>31</sup> Nemá rijló:

—Pipechu i'imá Jesucristo chojé caphí, ri'imatachi picá capichácajo liyá. Raú Tupana i'imatájeri picá rijluhua. Ñaqué caja ricá piyajálojo, piyánijlo, hua'ató —que nemacá rijló.

<sup>32</sup> E Pablo, rijhuáque'ehue, quele i'ijnaño rijhua'até riñacaré ejo. Re ne'emá Tupana puráca'alo yucuna rijló, rijhua'atéjenajlo, quele.

<sup>33</sup> E caja lapihuá i'imari nachá. E nahua'aphé ipari Pablo, Silas, quele naña'atácare necá aphumi chiyá pamineco. Ejomi nala'a bautizar ricá, riyajalo, riyani, quele.

<sup>34</sup> E rihuá'a piño necá riñacaré chojé, ra'á najló a'ajnejí. Pu'ují ripechu i'imacá, ra'acale ricó Jesucristojlo maapami que, ri'imatácaloje ricá capichácajo liyá penaje. Ñaqué caja riyajalo, riyani, quele pechu i'imacá pu'ují Jesucristo nacú.

<sup>35</sup> E muní que, lapiyami, nahuacára'ajeño huacára'año policiana nahua'aphé amaje, nemacáloje rijló riyurícaloje Pablo, Silas, quele jácho'oco richiyá penaje.

<sup>36</sup> Aú ne'ejná rejo rijló quemaje. Ejomi nahua'aphé quemari Páblojlo:

—Huahuacára'ajeño quemíchaño nunacu: “Eco pácho'ota necá ina'uqué huajáquelana chiyá”. Ñaquele, chuhua i'ijná palá. Palá i'imajica ca'ajno —que rimacá rijló.

<sup>37</sup> E'iyonaja Pablo quemari policianajlo:

—Romano naquiyana huecá. E'iyonaja calé naña'atá hue'emacá majopeja cajrú ina'uqué e'iyá. Uncá caja napura'aló pajhua'atéchaca pamineco, nahue'epícaloje na chónaca nahua-jaca huecá penaje. Manaí chiyó huani nahuajaca ta hue'emacá. Naca'á hue'emacá ina'uqué huajáquelana chojé majopeja huani. Eta chuhuata nahuata huácho'otacana nami-cho'ojneja. Uncá huani ta nala'alaje ilé que. Necó ne'ejnajica majó huácho'otaje ina'uqué huajáquelana chiyá —que rimacá najló.

<sup>38</sup> Raú policiana i'ijnaño Pablo puráca'alo yucuna i'imajé nahuacára'ajeñojlo. Nemacá aú nanacu: “Romano naquiyana necá” que, naquero'ó.

<sup>39</sup> E ne'ejná ina'uqué huajáquelana ejo. Nemá Páblojlo, Sílasjlo hua'até:

—Uncá huani paala huala'acá icá. Amó huachaje chapú huala'acare icá liyá.

Nahuacára'a nácho'oco ina'uqué huajáquelana chiyá. Nemá najló:

—Ila'á huajló nacaje. Jácho'oco chuhua marí pajimila eyá —que nemacá najló.

<sup>40</sup> E caja Pablo, Silas, quele jácho'oño ina'uqué huajáquelana chiyá. Ejomi ne'ejná ají que Lidia ñacaré ejo. Re napura'ó Jesucristo hua'atéjena hua'até, caphí napechu i'imacáloje Jesucristo ja'apiyá jema'acana nacú penaje. Ejomi na'apá piño reyá.

## 17

*Pablo, Silas, quele i'imacá Tesalónica ejo yucuna marí:*

<sup>1</sup> E ne'ejná ají que ya'ajnae. Iyamá pajimila na'apaña pamineco. Rií i'imari Anfípolis, apú íí i'imari Apolonía. E caja nephá Tesalónica ejo. Pajimila ne'ejnacá ejo íí i'imari Tesalónica. Re judíona jahuacáca'alo ñacarelana i'imacá.

<sup>2</sup> Ricá chape Pablo i'ijnari piño rejo nale'ejé huatána'acaje huacajé. Hueji quele huatána'acaje huacajé queja ri'ijnajica rejo nehuiña'ataje Tupana puráca'alo nacú.

<sup>3</sup> Rimacá najló marí que:

—Tupana puráca'alo lana'aquejami quemari: “Tupana huacára'ajeri majó apú ina'uqué i'imatájeri penaje ri'imajica. Rijña'ajé chapú caje panacu. Rejomi ritaca'ajica. Rejomi rimacápo'ojico piño”, que Tupana puráca'alo lana'aquejami quemacá rinacu. Ñaqué ri'imacá Jesucristojlo, ricá numacare nacú nijló. Tupana huacára'acare majó, ina'uqué i'imatájeri penaje ricá —que Pablo quemá jica najló.

<sup>4</sup> Raú judíona naquiyana jema'año Jesucristo ja'apiyá. Ejomi nahuacaco Pablo, Silas hua'até. Ñaqué caja cajrú griégona jema'acá Jesucristo ja'apiyá. Cajrú Tupana nacú péchuruna ne'emacá. Cajrú caja inaana i'imaño najhua'até. Palá piyuque ina'uqué pechu i'imacárena nacú ne'emacá. Griégona naquiyana ne'emacá, necá caja jema'año Jesucristo ja'apiyá.

<sup>5</sup> Eyá ajopana judíona naquiyana i'imaño, uncá Jesucristo ja'apiyá jema'ajeño calé ne'emacá. Chapuja nahuó i'imajica Jesucristo ja'apiyá jema'ajeño cha. Raú nahuacata ne'iyayá ajopana, chapújne'equena ne'emacá. Majopeja nachíra'acó pajimila e'iyohuá. Judíona puráca'alo aú ne'ejná cajrú ajopana jahuacátacana nacú. Majopeja napajláica cajrú ina'uqué hua'até, nayúcha'acoloje Pablo, Silas, quele cha penaje. Marí caje aú íqui'i nayúcha'aco nachá. Jasón a'atarí Pablo, Silas, quele riñacaré chu. Aú nahuajla'á ají que riñacaré chojé, naculácaloje Pablo, Silas, quele, najña'acáloje necá íqui'iruna ina'uqué e'iyajé penaje.

<sup>6</sup> E'iyonaja uncá nephátala necá richu. Aú nachíra'a Jasón, ajopana Jesucristo hua'atéjena hua'até, ají que nahuacára'ajeño ejo. E nahuíyo'ona najló marí que:

—Pablo, Silas, quele ca'átaño ina'uqué e'iyajé pu'uhwareni puráca'aloji aú. Caja queja nala'acá necá ne'ejnacá ehuá. Caja nephicha majó —que nahuíyo'oca najló.

<sup>7</sup> Nemá piño najló:

—Jasón hua'até necá ta. Piyuque necá uncá jema'alaño huahuacára'ajeri huani ja'apiyá. Nemá rinacu: “Re apú huahuacára'ajeri, Jesús ricá. Ajopana chaje huani ricá”, que nemacá ina'uquejlo —que chapújne'equena quemacá nanacu najló.

<sup>8</sup> Marí caje aú nahuacára'ajeño, piyuque ina'uqué hua'até yúcha'año íqui'ija Pablo, Silas, quele cha.

<sup>9</sup> E najña'á liñeru Jasón, rijhua'atéjena, quele liyá. Nemá najló:

—Pablo, Silas, quele jácho'ojico ee maáreya, ejomi huapa'atájica ijlo iliñérute —que nemacá najló.

Ejomi nahuacára'ajeño yuriño Jasón, rijhua'atéjena pa'acó.

*Pablo, Silas, quele i'ímácá Berea ejo yucuna marí:*

<sup>10</sup> E caja lapí Jesucristo ja'apiyá jema'ajeño huacára'año Pablo, Silas, quele reyá. Nahuacára'a ne'ejnacá pajmilla Berea ejo. E ne'ejná ají que a'ajná ño'ojó, iphaño rejo. Pu'ucuja na'apaca judíona jahuacáca'alo ñacarelana chojé.

<sup>11</sup> Pu'ují re i'ímacaño pechu i'ímácá Tupana puráca'alo jema'acana nacú. Tesalónica eruna pechu chaje napechu i'ímácá rema'acana nacú. Huechi caja nema'acá Tupana puráca'alo. Hue'echú ca'alá queja napura'ajico Tupana puráca'alo lana'aquejami hua'até, nahue'epícaloje quehuacáca Pablo quemacá najló penaje.

<sup>12</sup> Ñaqué i'ímacale cajrú judíona, griégona, quele jema'año Jesucristo ja'apiyá. Ne'iyajena, inaana, achiñana, quele i'imaño ajopana chaje péchuruna. Necá jema'año caja Jesucristo ja'apiyá.

<sup>13</sup> E caja judíona naquiyana, Tesalónica eruna ne'emacá, jema'año riyucuna: “Berea e Pablo i'mari Tupana puráca'alo yucuna rehuájénajlo,” que yucu i'ímácá. Aú ne'ejná rejo ina'uqué hua'até pajlaje, nayúcha'acoloje Pablo cha penaje.

<sup>14</sup> Aú tu'ujné Jesucristo hua'atéjena huacára'aca Pablo i'ijnacá ají que juni jalomi turenajo. Silas, Timoteo, queleja yuriño Berea e.

<sup>15</sup> E ajopana huá'año Pablo ají que ya'ajnaje pajmilla Atenas ejo. Rejo nephá i'ímácá. E Pablo quemari najló:

—Chuhua ipa'ó apumí chuhuá. Eco imá Silasjlo, Timotéojlo, quele, ne'ejnachi quiñaja nópumi chu majó.

—Je —que nemacá.

Aú napa'ó napumí chuhuá najló quemaje.

*Atenas e Pablo i'ímácá yucuna marí:*

<sup>16</sup> Atenas e Pablo huátari Silas, Timoteo, quele. Re ricahuíla'o, ramácale cajrú nacaje jenamí tára'aco pajmilla e'iyohuá. Nachi'ináricana que ri'ímácá najló. Marí que ramaca ricá aú ricahuíla'o rinacójé, uncá huani paala ri'ímácá rijló.

<sup>17</sup> Naqué i'ímacale ripura'ó judíona hua'até Tupana nacú nahuacáca'alo ñacarelana chu. Ripura'ó caja ajopana hua'até, quemacaño Tupana nacú: “Huachi'ináricana ricá” que. Hue'echú ca'alá queja nahuarúhua'ajica ehua' ripura'ó ina'uqué hua'até Tupana nacú.

<sup>18</sup> Ne'iyajena, re i'ímacaño, jehuíña'año epicúreos puráca'alo nacú. Ajopana jehuíña'año estoicos puráca'alo nacú. Necá queño'oño Pablo hua'até pura'acano. Ne'iyajena pura'año rinacu pajhua'atéchaca, nemá pajlocaca:

—¿Meque ca'ajná rimájica huajló quele pura'acacho huani?

Ajopana piño quemañlo pajlocaca:

—Apala ajopana ina'uqué chi'ináricana yucuna ca'ajná ri'imajé huajló.

Marí que nemacá rinacu, ri'imajícale Jesús yucuna najló. Caja taca'acaño macápo'oco yucuna ri'imaqué caja najló.

<sup>19</sup> E caja nahuá'a ricá ají que yenuri ejo. Yenuri íi i'mari Areópago. Rejé cajrú nacaje nacú hue'epíjicaño jahuacáqueño nacaje nacú quemaje. E caja nephá rejo, nemá Páblojlo:

—¿Na chi quele pipura'ó nacú ina'uqué hua'até? Huajé huani huajló ricá, huahuata rema'acana.

<sup>20</sup> Nacaje pimacare nacú huajló, apojó huani huajló ricá. Huahuata rihue'epícana meque quemacánaca ricá —que nemacá rijló i'ímácá.

<sup>21</sup> Atenas eruna naquiyana huátaño huajé puráca'aloji jema'acana ca'ajná, huajé puráca'aloji nacú quemacana ca'ajná. Ricaja calé nahue'epique natucumó. Ñaqué caja ajopana te'eré eyájena, re i'ímacaño, hue'epica natucumó.

<sup>22</sup> Re yenuri Areópago e ne'emá. E Pablo tára'aro ne'iyá, rimá najló:

—Atenas eruna, caja nomá cajrú ipechu nacaje nacú, Tupana que ijlo nacaje ipechu i'ímacare nacú.

<sup>23</sup> Maárohua nuchira'acó. Cajrú nomaca itára'aco i'irúpachi aú rapucuna chu, iphálóje ichi'ináricana ja'apí raú penaje. Re'iyohuá nomaca pajluhua nacaje jenami tára'aco. Marí que rinacu lana'aquéjami quemacá: "Re ca'ajná chi'ináricanaji uncá huahue'epílare nacojé. Rijló marí jenami", que rinacu lana'aquéjami quemacá. Que jo'ó ricá. Re apú chi'ináricanaji imá nacú: "Uncá huahue'epílare nacojé" que. Re ricá Chi'ináricanaji Tupana. Ricá yucuna nu'umajica ijlo me'etení. Tupana rií Huachi'ináricana.

<sup>24</sup> Tupana, ricá huánija la'arí piyuqueja eja'ahuá i'imacá. Piyuqueja nacaje i'imagare richu, rilá'acare caja. Paminá huani ricá. Rile'ejé huánija eja'ahuá, je'echú caje piyuque nacaje. Uncá nacaje jenami ñacarelana chu calé ricá. Uncá caja pají, ina'uqué la'acare, chu calé ricá.

<sup>25</sup> Uncá caja na huani calé capuhuini Tupánajlo. Ñaquele uncá na penaje calé ina'uqué la'año rijló nacaje. Ricaja calé a'arí ina'uquejlo piyuque nacaje. Ra'á huajló cajmuchaji, caésaji, quele. Ricaja calé a'arí huajló nacaje piyuqueja.

<sup>26</sup> Ina'uqué iyamá, achiña inanaru hua'até riqweño'ótacarena pamineco huani i'imacá, laquénami huecá piyuqueja marí eja'ahuá chu. Rihuacára'a caja ina'uqué i'imacáloje piyuque eja'ahuá chu penaje. Ra'á piyuque ina'uquejlo te'erí nate'erehua penaje, ne'emacáloje rinacu penaje. Ñaque caja ra'acá ajopánajlo, ajopánajlo que nená, namoto'ocáloje penaje.

<sup>27</sup> Tupana a'arí piyuqueja ina'uquejlo napechu, naculácaloje ricá raú penaje. Nahue'epícaloje caja rinacojé raú penaje. Uncá culacaje calé huajló Tupana, re ricá huahua'á.

<sup>28</sup> Tupana palamane huecá, huachira'ó maárohua, hualá'a nacaje ripalamane aú. Marí que inaquiayana quemacá i'imacá: "Tupana naquiayana huecá, riqweño'ótacale hue'emacá", que nemacá. Poetas naquiayana ne'emacá.

<sup>29</sup> Quehuaca jo'ó Tupana, Huachi'ináricana. Eyá nacaje jenami, oro naquiayá la'acanami, serení naquiayá la'acanami, nacaje jipa naquiayá la'acanami, uncá huachi'ináricana calé nacaje jenami. Napechu queja ina'uqué la'acá renami. Ipechu i'imaniya nacaje jenami nacú: "Huachi'ináricana ricá" que.

<sup>30</sup> Uncá na calé Tupana la'arí ina'uqué pamineco i'imacaño, pu'uhuaré nala'acare pachá. Uncá rihuajaque ne'emajica, mapechúrúna jo'ó ne'emajica rinacu huacajé. Ñaquele nala'á apojó. Eyá chuhuaca rihuacára'a ina'uqué, napajno'ótacáloje napéchuhua pu'uhuaré nala'acare liyá Tupana nacojé penaje.

<sup>31</sup> Caja Tupana a'arí rená, rihuajácaloje ina'uqué pu'uhuaré nala'acare pachá penaje. Jesucristo huajájeri necá. Ina'uqué naquiayana huajájeri penaje Tupana a'arí ri'imacá. Tupana macápo'ori Jesucristo ritaca'acá ejomí i'imacá. Aú iná hue'epí rihuajájica pu'uhuaré la'acaño rimacá que —que Pablo quemacá najló.

<sup>32</sup> Aú nala'á ne'echajno ricá, rimacale caja taca'acaño nacú: "Macápo'ojeño necá" que. Ajopana piño quemano rijló:

—Apú huacajé ca'ajná pi'imajé piño riyucuna huajló.

<sup>33</sup> Ají que nemacá aú Pablo ja'apari naliyá.

<sup>34</sup> Mequeleja nanaquiayana pechu i'imacá caphí Jesucristo chojé, ri'imatácaloje necá capichácajo liyá Tupánajlo penaje. Necá penájenami jahuacaño Pablo hua'até, re-huñña'atacaloje necá Tupana puráca'alo nacú penaje. Pajluhua nanaquiayana íi i'imari Dionisio. Nahuacára'ajeño naquiayana ri'imacá. Apa'ahuelo íi i'imari Dámaris. Ñaque caja ajopana ina'uqué a'acá ripuráca'alo nanacojó. Nema'á Jesucristo ja'apiyá.

## 18

### *Corinto e Pablo i'imacá yucuna marí:*

<sup>1</sup> E caja Pablo jácho'oro Atenas eyá, i'ijnari ají que apú pajimila ojo. Pajimila íi i'imari Corinto.

<sup>2</sup> Re riphata apú judío ja'a, rií i'imari Aquila. Ponto te'eré eyaje ri'imacá. Riyajalo íi i'imari Priscila. Meyale queja Aquila riyajalo hua'até jácho'oño Italia te'eré eyá. Italia e Claudio i'imari nachaje huacára'ajeri. Rihuacára'a piyuque judíona jácho'oco pajimila Roma eyá i'imacá. Italia te'eré nacú pajimila Roma. Ñaquele ne'emacana puráca'alo aú Aquila, Priscila, quele jácho'oño reyá i'imacá. Aú caja ne'ejná ají que Corinto ojo. Re Pablo iphátari ne'emacá.

<sup>3</sup> A'arumacaji me'ejñapí nojé nacujípa'a. Ilé caje a'arumacaji naquiayana ne'iyajena la'año najluhua pajreji. Ricujípa'acanaja i'imari nasápaca'ala. Ñaque caja Pablo sápacala i'imacá júpimi. Aú riyuró najhua'até, risápacáloje najhua'até rinacu penaje.

<sup>4</sup> Judíona le'ejé huatána'acaje huacajé i'imajica queja Pablo i'ijnajica nahuacáca'alo ñacarelana chojé. Re ri'imaqué Tupana puráca'alo yucuna najló. Judíonajlo, uncá judíona calé naquiyánajlo hua'até ri'imaqué riyucuna, nema'acáloje ra'apiyá penaje.

<sup>5</sup> E caja rijhuáque'ena Silas, Timoteo, quele iphaño rejo. Macedonia eyá nácho'o i'imacá. Ejomi Pablo ja'apátaqueri Tupana puráca'alo yucuna rehuájena ina'uquejlo. Ricaja rihue'epí ritucumó i'imacá. Rimaqué judíonajlo marí que Jesús nacú:

—Iná i'imatájeri penaje Jesús, ricá Tupana huacára'acare majó i'imacá —que rimájica najló.

<sup>6</sup> E'iyonaja chapú napechu i'imajica Pablo nacú. Pu'uhuaré caja napura'acó rinacu. Ñaquele Pablo ñaca'arí ra'arumacá e'iyayá najló. Marí que la'acana aú riya'atá najló caja penaje ri'imacá najló Jesucristo yucuna. Rimá najló:

—Icapichájico ee Tupana liyá, uncá nupachá calé ricá. Ipachójiya icapichajo. Caja nu'umajla riyucuna ijlo. E'iyonaja uncá jema'alá ra'apiyá. Chuhua nu'ujnajica Tupana puráca'alo yucuna i'imaté uncá judíona calé naquiyánajlo —que rimacá najló.

<sup>7</sup> Aú rácho'o nahuacáca'alo ñacarelana chiyá, i'ijnari Justo ñacaré ejo. Nahuacáca'alo ñacarelana ahua'ája riñacaré i'imacá. Cajrú péchuri ri'imacá Tupana nacú.

<sup>8</sup> Nahuacáca'alo ñacarelana chiyá huacára'ajeri íi i'imari Crispo. Ricá, riñacaré chiyájena, quele pechu i'imari caja caphí Jesucristo chojé, ri'imacáloje Ne'ematajeri penaje. Tupana puráca'alo jema'acana aú cajrú Corinto eruna pechu i'imacá caphí Jesucristo chojé, ri'imacáloje Ne'ematajeri penaje. Necá nala'aque bautizar.

<sup>9</sup> E caja lapí Jesucristo ya'ataró Páblojlo. Iná tapú iná amaca queja ramaca Rihuacára'ajeri Jesucristo. Rimá Páblojlo:

—Pihuó la'aniyo ujhuí que na'apejé. Pi'imá jo'ó nuyucuna najló. Pa. Pimanúma'aniyo najló.

<sup>10</sup> No'ocare nunacojó picá. Ñaquele uncá na calé la'ajeri chapú picá. Piyuríniya Tupana puráca'alo yucuna i'imacana najló. Re íqui'iruna jo'ó ina'uqué marí pajimila e'iyá; nema'ajé no'opiyá, pi'imajica ee najló nuyucuna —que Jesús quemacá Páblojlo.

<sup>11</sup> Raú Pablo yuriro ejo'ocaja Corinto e. Pajluhuaja jarechí eyá apú pe'iyojé quetana ri'imacá re. Rehuíña'ataque necá rehuá Tupana puráca'alo nacú.

<sup>12</sup> Acaya te'eré eruna huacára'ajeri íi i'imari Galión. Ri'imacá ne'emacana huacajé judíona naquiyana jahuacaño. Chapú péchuruna ne'emacá Pablo nacú. Aú nahuá'a ricá ne'emacana Galión ejo.

<sup>13</sup> Nemá ne'emacánajlo:

—Marí ina'uqué ja'apari maárohua. Cajrú rehuíña'ataca ina'uqué maare Tupana puráca'alo nacú. E'iyonaja calé apú que huani ricá, rehuíña'atacare nacú. Uncá huapuráca'alo lana'aquejami quemacá que calé ricá —que nemacá rijló.

<sup>14</sup> Eyá Pablo pura'arolja richayo. E Galión quemari judíonajlo:

—Uncá na aú calé rila'á pu'uhuaré. Uncá rata'alá nacaje; uncá caja rinola ina'uqué i'imacá. Uncá marí que la'ajeri calé ricá. Uncá na aú rila'alá rijluhua nacaje. Rila'aquela pu'uhuaré, noma'acajla ipuráca'alo.

<sup>15</sup> E'iyonaja uncá ñaque calé ricá. Iyúcha'o richá, nuhue'epí, nacaje rehuíña'atacare icá nacú jimaje. Uncá ipechu que calé ripechu peñahuilana puráca'alo nacú, jimaje iyúcha'o richá. Uncá ilé caje lamá'atajeri calé nucá. Ilamá'ata icoja ricá pajhua'atéchaca —que rimacá najló.

<sup>16</sup> E rihuacára'a ne'ejnacá huaca'apoyo.

<sup>17</sup> E huaca'apé griégona pataño nahuacáca'alo ñacarelana chiyá huacára'ajeri. Sóstenes rií i'imacá. Ne'emacana ñacaré cópeje naña'atá ricá majopeja. E'iyonaja uncá Galión a'alá rinacojó necá.

*Pablo pa'acó piño Antioquia ejo yucuna marí:*

<sup>18</sup> Pablo i'imari júpija rehuá. E caja ehuaja ri'imá riyucuno Jesucristo ja'apiyá jema'ajénojlo. E rácho'o reyá huapuru chu. Aquilo, Priscila, quele i'ijnáño caja rijhua'até. Ne'ejná ají que Siria te'eré ejo. E caja nephá pajimila Cencrea ejo. Re Pablo sara'arí rihuila'aru naquiyá rihuila, rila'acale nacaje rimacá Tupánajlo i'imacá que.

<sup>19</sup> Reyá ne'ejná piño ají que a'ajná ño'ojó. Iphaño pajimila Efeso ejo. Re Pablo ja'apáñari Aquila, Priscila, quele. Ri'ijná ají que nahuacáca'alo ñacarelana chojé. Re ripura'ó judíona hua'até Tupana nacú, richojé jahuacájeño hua'até.

<sup>20</sup> Nemá rijló:

—Maárohua piyuró huajhua'até jupi.

<sup>21</sup> Rimá najló:

—Nu'ujnajé Jerusalén ejo pamineco, no'opátacaloje fiesta rejo penaje. Rejomi Tupana huátajica ee nupa'ajó piño majó amaje —que rimacá najló.

E rihuitúca'a piño huapuru chojé. Rácho'o pajimila Efeso eyá.

<sup>22</sup> Iphari Cesarea ejé. Reyá ri'ijná ají que Jerusalén ejo. Rajalaca Jesucristo ja'apiyá jema'ajeño re i'imaçaño. Rejomi ra'apá piño ají que cahuacajo pajimila Antioquía ejo.

<sup>23</sup> Re ri'imá mequetana. E rácho'lo piño; ra'apá Galacia te'eré e'iyohuá. Ejomi ra'apá Frigia te'eré e'iyohuá. Ri'ijnajica ehuá que ripura'acó Jesucristo ja'apiyá jema'ajeño hua'até, napechu i'imaça piyá ujhúí Jesucristo ja'apiyá jema'acana nacú.

*Apolos i'imaça Tupana puráca'alo yucuna Efeso e i'imaçañojlo yucuna marí:*

<sup>24</sup> E rihuacajé apú ina'uqué iphari Efeso ejo. Pajimila Alejandría eyaje ri'imaça. Rii i'imari Apolos. Palá huani ri'imajica Tupana puráca'alo yucuna ajopana ina'uquejlo. Rihue'epí caja palá Tupana puráca'alo lana'aquejami nacojé, ricá Moisesmi chu lana'acare i'imaça.

<sup>25</sup> Caphí ripechu i'imajica Tupana yucuna i'imacana nacú. Rehuíña'ataque ina'uqué palá Jesucristo nacú. Juan Bautizar la'ajérimi chu quemaqueri Jesucristo nacú, rejeja caja rihue'epica riyucuna. Rihue'epícare caja na penájeca Juanmi chu la'ajica bautizar ina'uqué. Ricaja calé rihue'epí Tupana nacojé.

<sup>26</sup> Caja Apolos iphari Efeso ejo. E ri'imá Tupana yucuna najló nahuacáca'alo ñacarelana chu. Caphí ripechu i'imaça Tupana yucuna i'imacana nacú najló rehuá. Priscila, Aquila, quele i'imaño caja re najhua'até. Nema'á ri'imaça riyucuna najló. Ejomi nahuá'a ricá najhua'ató a'ajná ño'ojó, nehuíña'atacaloje ricá richaje Tupana puráca'alo nacú penaje.

<sup>27</sup> Ejomi Apolos huátari Acaya te'eré ejo i'ijnacana. Raú Jesucristo ja'apiyá jema'ajeño, Efeso e i'imaçaño, a'año riñaté i'imaça. Nahuacára'a rijhua'até papera Jesucristo ja'apiyá jema'ajeñojlo, Acaya te'eré nacú i'imaçañojlo, nahue'epícaloje raú palájne'equca ricá penaje. E caja ri'ijná ya'ajna; iphari Acaya te'eré ejo. Palá huani rila'ajica Jesucristo ja'apiyá jema'ajeño nacú rehuá. Jesucristo ja'apiyá jema'ajeño ne'emacá Tupana palamane aú.

<sup>28</sup> Apolos chá'ataqueri ajopana judíona naquiyana ripuráca'alo aú. Quehuácaje puráca'aloji chuhujaja ri'imaqué riyucuna najló. Aú calé uncá nahue'epila méqueca rapiyáacana. Tupana puráca'alo lana'aquejami quemacá que ri'imajica Jesucristo yucuna najló, nahue'epícaloje Jesucristo i'imaça ricá Tupana huacára'acare majó ina'uqué i'imatájeri penaje.

## 19

*Efeso e Pablo i'imaça yucuna marí:*

<sup>1</sup> Apolos i'imari Corinto e. Ma'apona Pablo ja'apari apú eyá, apú eyá que. Yenuri ihuami chuhúa pajimila i'imari cajrú apú eyá, apú eyá que. Re'iyohuá ra'apá. E caja riphá Efeso ejo. Re riphata mequeleja Jesucristo ja'apiyá jema'ajeño.

<sup>2</sup> E rimá najló:

—¿E Tupana Pechu ja'acó e'iyajé i'imaça, iqueño'ocá Jesucristo ja'apiyá jema'acana huacajé?

—Uncá. Uncá huema'alá riyucuna —que nemacá rijló.

<sup>3</sup> Pablo quemari najló:

—Nala'aque íca bautizar huacajé, ¿na ja'apiyá jema'á?

Nemá rijló:

—Juan Bautizar la'ajérimi chu puráca'alomi ja'apiyá huema'á i'imaça. Raú nala'á hueca bautizar.

<sup>4</sup> Pablo quemari najló:

—Pamineco napajno'otaque napéchuhua Tupana ejo pu'uhuaré nala'ajicare liyá. Ejomi Juan Bautizar la'ajérimi chu la'aqერი bautizar ina'uqué. Juanmi chu quemaqueri ina'uquejlo marí que: “Apú ina'uqué iphájeri nopumí chojé. Ipechu i'imá caphí richojé, ri'imatácaloje íca capichácajo liyá raú penaje”, que rimájica najló. Apú rimaqué nacú i'imari Jesús —que Pablo quemacá najló i'imaça.

<sup>5</sup> Marí que rimacá ejomi nala'á bautizar necá, Jesucristo ja'apiyá jema'ajeño ne'emacale.

<sup>6</sup> E caja Pablo to'otarí riyáte'ela nanacojé, hua'ató que Tupana Pechu ja'acó ne'iyajé. Raú napura'ó me'echuje puráca'aloji chu Tupana Pechu ja'apiyá que.

<sup>7</sup> Iyamá iphata ji'imaji nacojé quele ca'ajná ne'emacá, achiñana huánija ne'emacá.

<sup>8</sup> Hueji queta queri quetana Pablo i'imaça re najhua'até. Ri'ijnajica nahuacáca'alo ñacarelana chojé. Caphí ripechu i'imajica Tupana puráca'alo yucuna i'imacana nacú najló. Rimaqué najló méqueca Tupana huacára'aca iná.

<sup>9</sup> E'iyonaja ne'iyajena ijnúcha'aqueño ra'apiyá jema'acana nacú. Uncá nahuátala Jesucristo ja'apiyá jema'acana. Pu'uhuaré napura'acó Jesucristo puráca'alo nacú íqui'runa ina'uqué jimaje. Raú Pablo ja'apari naliyá. Rihuá'a rijhua'ató Jesucristo ja'apiyá

jema'ajeño. Re jehuíña'acajo ñacarelana i'ímacá. Nehuíña'atajeri í i'ímarí Tirano. Jehuíña'acajo ñacarelana chiyá nácho'oco queja napiyácajica necá. Richu Pablo jehuíña'ataqueri necá hue'echú ca'alá queja Tupana puráca'alo nacú.

<sup>10</sup> Marí queja rehuíña'ataca ne'emacá iyamá jarechí quetana. Marí caje aú cajrú ina'uqué Asia te'eré ehuájena jema'año Jesucristo yucuna. Judíona naquiyana, uncá judíona calé naquiyana hua'ató jema'año riyucuna.

<sup>11</sup> Tupana a'aqueri Pablo ñaté, rila'acáloje cajrú nacaje ina'uqué e'iyohuá penaje. Ñaquele rila'aque cajrú ne'iyohuá nacaje uncá meño'ojó iná la'alore caje.

<sup>12</sup> Ne'iyajena ñaqueño Pablo ja'apari naliyá. RihuPablo liyá ra'arumacá naquiyana, rilejuné caje macá. Ejomi najña'aque ricá natámina i'ímajícaño ejo, natejmo'ótacaloje necá raú penaje. Raú caja naca'aque jíñana pechu ajopana e'iyayá.

<sup>13</sup> Rehu caja ajopana judíona, naquiyana i'ímaño. Majopeja i'ímacaño ne'emacá. Ají ño'ojó, ají ño'ojó queja na'apájica chira'acajo nacú. Ricaja calé nahue'epique natucumó. Majopeja nemájica nanacuhuá marí que:

—Huecá hue'epiño jíñana pechu ca'acana ina'uqué e'iyayá.

E caja nemá rehuá i'ímacánjo:

—Huacá'á jíñana pechu ina'uqué e'iyayá Jesucristo í a'acana aú. Huemá jíñana péchujlo marí que: “Jesucristo, ricá Pablo quemácare nacú, í a'acana aú huahuacára'a jácho'oco ina'uqué e'iyayá”, que huemacá jíñana péchujlo. Aú nácho'oco ina'uqué e'iyayá —que nemacá najló.

<sup>14</sup> Naqué caja ajopana quemacá jíñá péchujlo, apú ina'uqué e'iyá i'ímacárejo. Esceva yaní ne'emacá. Judíona ja'á ri'ímacá. Sacerdótena huacára'ajeri ri'ímacá. Iyamá cuhuá'ata quele achíñana riyani i'ímacá.

<sup>15</sup> Necá quemaño jíñá péchujlo marí que:

—Jesucristo, ricá Pablo quemácare nacú, í a'acana aú huemacá pijló: Pácho'oco ilé ina'uqué e'iyayá.

Marí que nemacá rijló aú jíñá pechu quemari najló:

—Nuhue'epí mecajeca Jesucristo, Pablo, quele. Eyá icá ta, uncá nuhue'epila nátaca ina'uqueca icá —que rimacá najló.

<sup>16</sup> Eta ilé ina'uqué jíñá pechu i'ímacare e'iyá jeño'orí nachá. Riqueño'ó najhua'até nócaajo. Cajrú huani ritujla'ataca ne'emacá, chapú huani rila'acá necá. Raú neñaó pají chiyá ma'arumacánaruna. Cajrú naphú i'ímacá nanacuhuá.

<sup>17</sup> Ejomi piyuque ina'uqué, Efeso ehua' i'ímacaño, jema'año riyucuna. Naquero'ó cajrú raú. Richaje necá rehuá i'ímacaño ípháqueño Jesucristo ja'apí raú.

<sup>18</sup> Iqui'iruna ina'uqué jema'año Jesucristo ja'apiyá rehuá i'ímacá. Cajrú nanaquiyana jahuacájico pajhua'atéchaca. Pu'uhuaré nala'ajicare, namanaicho nala'ajicare yucuna ne'emaqué pajlocaca.

<sup>19</sup> Cajrú rehuá i'ímajícaño hue'epíqueño piyuqueja lahuícho'ocaje nacojé, lejñacaje caje macá nacojé. Papera chu lana'aquejami i'ímarí riyucuna. Aú nahuacata napapérane pajluhuaja chojé, nacára'atacaloje ricá íqui'iruna ina'uqué jimaje penaje. Nacára'ataca ricá ejomi nahuacata nacára'atacare huemí, namácaloje merejeca na'acá rihuemí i'ímacá pajluhuano, pajluhuano que. Cincuenta mil rihuemí jácho'oco najló.

<sup>20</sup> Marí que ri'ímacale rehuá, íqui'iruna ina'uqué jema'año Tupana puráca'alo ja'apiyá. Caphí caja nala'ajica napéchuhua Tupana puráca'alo chojé, ra'apiyá ne'emaqué.

<sup>21</sup> E caja Pablo huátari Macedonia te'eré e'iyohuá ja'apácana. Naqué caja rihuátaca Acaya te'eré e'iyohuá ja'apácana. Rihuata Jesucristo ja'apiyá jema'ajeño chaje i'íjnacana apú nacojé, apú nacojé que. Reyá rihuata Jerusalén ejo i'íjnacana. Ejomi rihuata Roma ejo i'íjnacana.

<sup>22</sup> Aú pamineco rihuacára'a iyamá rijhuáque'ena i'íjnacá ritucumá ají que Macedonia te'eré ejo. Timoteo, Erasto, quele rihuacára'a ritucumá. Pablo yuriro rehuaja Asia te'eré nacú ejo'ocaja mequetánaja.

*Cajrú Efeso eruna yúcha'aco yucuna marí:*

<sup>23</sup> Rihuacájé caja cajrú ina'uqué yúcha'aco Jesucristo puráca'alo jimaje rehuá.

<sup>24</sup> Marí que naqueño'ocá najluhua ri'ímacá: Apú i'ímarí, ca'átari ne'iyajé, nayúcha'acaloje penaje. Rí i'ímarí Demetrio. Ricá la'aqueri nacaje jenami, sereni naquiyana la'acanamí. Rehuájena quemaño apa'ahuelo Diana nacú: “Huachí'ináricanaru rucá.” Ruí i'ímarí Artemisa. Apú ruí i'ímarí Diana. Ruñacaré jenami la'acana nacuja risápaque rijhua'atéjena hua'até. Raú nacánaque cajrú liñeru najluhua.

<sup>25</sup> E caja rahuacata rijhua'até sápañeño, ajopana hua'até. Artemisa ñacaré jenami la'ajeño ne'emacá. E rimá najló:

—Nujhuáque'ena, caja ihue'epí cajrú huacánaca liñeru marí nacú sápacana aú.



<sup>26</sup> E'iyonaja Pablo quemari uncá na penaje calé nacaje jenami, ina'uqué quemacare nacú: "Huachi'ináricanaca ricá" que. Caja amá ricá; caja jema'á ripuráca'alo. Ricá ta ca'átari cajrú ina'uqué e'iyajé, nahuarúhua'aca piyá nacaje jenami. Uncá maárohuaja calé nema'á ra'apiyá. Piyuque Asia te'eré ehuá nema'á caja ra'apiyá cajrú —que rimacá najló.

<sup>27</sup> Rimá piño najló:

—Raú piyuque ina'uqué ca'ajná yuréjeño Artemisa ñacaré ja'apí iphácana. Uncá huani paala huajló ricá. Apala huasápaca'ala capichajo ca'ajná raú. Huachi'ináricanaru huajló rucá, Artemisa, ilerú cajrurú. Piyuqueja ina'uqué Asia te'eré e'yohuájena iphaño ro'opí. Ñaque caja piyuque ina'uqué eja'ahuá chu i'imacaño iphaca ro'opí. Chuhua ca'ajná nayuríjica ro'opí iphácana ají caje aú —que rimacá najló.

<sup>28</sup> Marí cajé aú nayúcha'o cajrú. Cajrú caja nahuíyo'oca marí que:

—Cajrurú huani Artemisa. Efeso eruna chi'ináricanaru rucá —que huánija nahuíyo'oca.

<sup>29</sup> Ñaque caja ajopana, ajopana que jahuíyo'oca najhua'até. Ehuá piyuqueja pajimila eruna i'imacá jahuíyo'ocaje nacuja najhua'até. Cajrú nahuíyo'oca, chapú napechu i'imacale Pablo puráca'alo nacú. Re caja ajopana i'imacaño iyamá, Pablo huáque'ena ne'emacá. Apú í i'imari Gayo, apú í i'imari Aristarco. Macedonia te'eré eyájena ne'emacá. E caja chapú nanacu péchuruna pataño Gayo, Aristarco, quele. E nachúra'a necá ají que a'ajná ño'ojó pajimila eruna jahuacáca'alo ñacarelana chojé.

<sup>30</sup> Richojé nahuacaco cajrú huani. Ñaque caja Pablo huátaca richojé mujlúca'acana najló nacaje nacú quemaje. E'iyonaja Jesucristo hua'atéjena uncá yurílaño rimujlúca'aca richojé.

<sup>31</sup> Asia te'eré eruna huacára'ajeño naquiayana i'imaño caja re. Palá péchuruna ne'emacá Pablo nacú. Necá caja huacára'año caja rijló napuráca'alo, rimujlúca'aca piyá ne'iyajé.

<sup>32</sup> Nahuacáca'alo ñacarelana chu cajrú nahuíyo'ojica que'iyapé. Ne'iyajena jahuíyo'oqueño apú que caja; ajopana jahuíyo'oqueño apojó, apojó que. Cajrú nanaquiayana i'imacá re, uncá hue'epílaño na penájeca nahuacaco i'imacá.

<sup>33</sup> Ajopana i'imaño riyucuna Alejandrojlo, na penájeca nahuacaco yucuna. Ejomi judíona naquiayana jara'año ricá ají que najimaje, ri'imacáloje riyucuna najló, nahue'epícaloje na penájeca nahuacaco rejé penaje. E Alejandro la'arí ají que najló riyáte'ela aú, namanúma'acoloje penaje. Rihuata judíona chaya pura'acano, nayurícaloje naliyó judíona cha yúcha'acano.

<sup>34</sup> Judíona ja'a Alejandro i'imacá. Namaca aú ritára'aco najimaje nahuíyo'o cajrú huani, richaje huani. Iyamá camú jená quetana nahuíyo'oca marí que huánija:

—Cajrurú huani Artemisa. Efeso eruna chi'ináricanaru rucá —que huani nahuíyo'oca.

<sup>35</sup> E caja ehuaa pajimila eyá huacára'ajeri ja'apiyateje manúma'atari necá. Rimá najló:

—Efeso eruna, piyuqueja ina'uqué hue'epiño Artemisa ñacaré hua'aphena huecá. Huachi'ináricanaru Artemisa. Jipa chu ro'ó je'echú chiyá majó marí eja'ahuá nacojé i'imacá. Ricá penaje jipa hua'aphena huecá. Piyuque ina'uqué hue'epicare caja ricá.

<sup>36</sup> Uncá na calé quemárijla nacú: "Uncá quehuaca calé ruyucuna". Ñaquele numá ijló: Imanúma'o. Ila'aníya nacaje mapechúhua'aca.

<sup>37</sup> Eyá mariruna achiñana, iji'ichájena majó, uncá na calé nala'á najlulhua pu'uhuaré. Uncá caja napura'alacho pu'uhuaré huachi'ináricanaru Artemisa nacú. E'iyonaja iji'ichá necá majó —que rimacá najló.

<sup>38</sup> Rimá piño najló:

—Demetrio, rijhuáque'ena, quele huátajica ee narucátacana, ne'emajé hue'emacánajlo riyucuna. Rejo huani iná i'ijná puráca'aloji lamá'ataje. Ricá jema'arí riyucuna pamineco palanaquiayacaca. Quéchami rilamá'ataca najló ricá.

<sup>39</sup> Ihuátajica ee apú nacaje nacú quemacana, apú huahuacájico huacajeco imá rinacu, hualamá'atacaloje ricá palá huahuacára'ajeño hua'até penaje —que rimacá najló i'imacá—

<sup>40</sup> Jahuíyo'ocaje nacú huecá me'tení, uncá huani paala ricá huánijlo. Apala ajopana arucátaje huecá huahuacára'ajeño huánijlo. Aú napechu i'imajé huanacu: "¿Nócaaje nacú chi ne'emajé huajhua'até? Penaje ca'ajná nahuíyo'o cajrú huani". Naquejá'ajica ee hualiyá marí jahuíyo'ocaje yucuna, ¿meque chi huemájica najló?

<sup>41</sup> Marí queja rimacá najló i'imacá. Ejomi rihuacára'a napa'acó, aú napa'ó.

## 20

*Pablo i'ijnari Macedonia te'eré ejo. Rejomi ri'ijná Grecia te'eré ejo. Riyucuna marí:*

<sup>1</sup> Rejeja Efeso eruna yuriño jahuíyo'ocaje. Ejomi Pablo hu'ari Jesucristo ja'apiyá jema'ajeño maná. Raú nahuacó rejé richaje. Re rila'á nenacú, napechu i'imacáloje caphí Jesucristo ja'apiyá jema'acana nacú penaje. E caja ri'imá riyucuno najló. Ejomi ri'ijná reyá ají que Macedonia te'eré ejo.

<sup>2</sup> Apojó, apojó que i'ijnacana nacuja ri'imacá. Jesucristo hua'atéjena chaje ri'ijnaqué. Ripura'ó najhua'até, nala'acáloje caphí napéchuhua Jesucristo ja'apiyá jema'acana aú. Caja ehuaaja riphá Grecia te'eré ejo.

<sup>3</sup> Re ri'imá hueji queta queri quetana najhua'até. E caja rihuata Siria te'eré ejo i'ijnacana huapuru chu. E'iyonaja ajopana quemano rijló:

—Judiona naquiyana huátaño pila'acana chapú rejo.

Raú ripa'ó riyámojo pe'iyóohua Macedonia te'eré ejo.

<sup>4</sup> Pablo huáque'ena i'imaño cha'apá. Pajluhuaaja i'í i'mari Sópater. Pajimila Berea eyaje ri'imacá. Aristarco apú, Segundo apú. Pajimila Tesalónica eyájena ne'emacá. Apú i'í i'mari Gayo. Pajimila Derbe eyaje ri'imacá. Ajopana rijhuaque'ena i'imaño piño: Timoteo, Tíquico, Trófimo, quele. Necá i'imaño Asia te'eré eyájena. Quele i'imaño rijhuaque'ena.

<sup>5</sup> Necá i'ijnaño Pablo tucumá ají que pajimila Troas ejo. Re nahuata hue'emacá.

<sup>6</sup> Eyá nucá, Lucas, i'ijnari Pablo hua'até. Caja na'apata fiesta i'imacá. Ricá fiesta i'imajica huacajé najñaque pan mamúra'atacanaru. Fiesta ejomi huácho'o pajimila Filipos eyá. Huapuru chu hue'ejná, iphaño Troas ejo. Pajluhua té'ela que cala huaca'a rejo i'ijnacana nacú. Re huephácaco huajhuaque'ena hua'até, i'ijnaño rejo huatucumá i'imacá. Re hue'emá najhua'até pajluhuaaja sápacaje quetana.

*Pablo i'imacá Troas e yucuna marí:*

<sup>7</sup> E caja huatána'acaje huacajé Jesucristo ja'apiyá jema'ajeño jahuacaño pajluhua'o chojé i'imacá. Rejé najña na'ajnehuá pajhua'atéchaca. Ejomi Pablo jehuíña'atari necá Tupana puráca'alo nacú. Muni que rihuátaca reyá jácho'ocano, Aú lainchiyó eyá ri'imá najló Tupana puráca'alo yucuna a'ajná lapi jenaji que ejená.

<sup>8</sup> Re ne'emá pají chu, hueji quele piso chu. Cajrú nacamaré cúhua'ataco re.

<sup>9</sup> Eyá apú i'mari najhua'até re, hualijímaca. Ríi i'mari Eutico. Ricá yá'aro ventana chu i'imacá. Júpija Pablo i'imacá Tupana yucuna najló. E caja ehuaaja tapú chá'atari Eutico, uncá meño'ojó rijña'alá ricá panacu. Tapú a'acuhuaná rícojno'o riyámajo ventana chiyá. Hueji quele piso quetana ra'acó te'eré e'iyajé. Aú nahuitúca'a ramaje, amaño caja ritaquí'ichami.

<sup>10</sup> E caja Pablo huitúca'ari nápumi chu ritami amaje najhua'até. Riphá tara'ajo ri'irúpachi aú támijimi ahua'ajé. Ejomi rimahuílo'o ritami. E Pablo quemari rejénajlo:

—Ihuó ca'aniyo, caja ripechu iphíchari piño.

<sup>11</sup> Ejomi Pablo pa'aró piño najhua'até napumí chuhua hueji quele piso chojé. E ritupa'a najló pan naquiyana, najñácaloje penaje. Najñaca ricá ejomi ri'imá piño Tupana yucuna najló a'ajná najme'etaca ejená. Ejéhami caja ri'ijnacá reyá.

<sup>12</sup> Lanáquiya ajopana pa'año nañacaré chojé. Cajmuni napa'atá najhua'até hualijímaca, ja'acaro yenuja, caja taca'arí penájemi. Pu'ují piyuqueja napechu i'imacá raú.

*Pablo i'ijnacá Mileto ejo yucuna marí:*

<sup>13</sup> E caja Pablo quemari huajló:

—Nu'ujichaca chuhua pe'iyóohua pajimila Aso ejé. Reyaco nu'ujná ijhua'até huapuru chu.

—Je —que huemacá rijló.

Aú huahuitúca'a huapuru chojé. Hue'ejná ají que ritucumá Aso ejo, huephá rejo.

<sup>14</sup> Re huamá piño Pablo. E rihuitúca'a huatu'uhueje huapuru chojé. Reyá hua'apá piño ají que apú pajimila Mitilene ejo.

<sup>15</sup> Huácho'o reyá. Muni que hua'apá piño Quío te'eré nacojé. Hua'apá piño muni caje chu, iphaño Samos te'eré ejo. Pajimila Trogilio e huahuatána'a. Reyá hua'apá piño muni que. Iphaño pajimila Mileto ejo.

<sup>16</sup> Uncá hue'ejnalá Efeso ejo. Mequetánaja calé hue'emacá Pablo hua'até Asia te'eré nacú. Ñaquele uncá hue'ejnalá Efeso ejo i'imacá. Rihuacajé yehuichaja fiesta iphaca rená chojé, Pentecostés fiesta i'í. Aú rihuata fiesta ja'apátacana Jerusalén ejo. Raú rila'á ricó tu'ujné, riphácaloje rípiyá rejo penaje.

*Pablo pura'acó Efeso eyájena hua'até yucuna marí:*

<sup>17</sup> Pajimila Mileto e Pablo i'imacá huacajé, rihuacára'a ajopana Efeso ejo peñahuilana maná huá'aje. Jesucristo ja'apiyá jema'ajeño ne'emacá. Aú ne'ejná rejo namaná huá'aje.

<sup>18</sup> E caja peñahuilana, rihuá'acarena maná, iphaño rinacu. Rajalaca necá ejomi rimá najló marí que:

—Júpimi nuphá majó Asia te'eré ejo i'imacá. Caja ihue'epí méqueca nu'umacá ijhua'até maárohua nuphaca huacajé eyá maárejcha.

<sup>19</sup> Marí que nula'ajica nacaje Tupánajlo e'iyohuá i'imajica. Uncá nula'aque nocó chá'atajeri que ajopana chaje. Nuyaque caja ina'uqué hua'até nomájica aú nala'acá

namanaicho cajrú. Judíona naquiyana la'aqueño nucá chapú. Nanacojé nomaque chapú cajé yajhué.

<sup>20</sup> E'iyonaja calé uncá nuyurique Tupana puráca'alo yucuna i'ímacana ijló i'ímacá. Palani ri'ímacale ijlojé penaje, nu'umá ijlo riyucuna. Nohuíña'atajica icá Tupana puráca'alo nacú jahuacájico ejeja. Ñaqueja caja nohuíña'atajica icá iñacaré chuhúa, apalá chojé, apalá chojé que.

<sup>21</sup> Nupura'ó ajopana ina'uqué hua'até Tupana nacú. Ñaque caja nupura'ajico judíona hua'até. Numaqué najló, napajno'otácaloje napéchuhua Tupana ejo pu'uhuaré nala'acare liyá. Nupura'ó caja najhua'até, napechu i'ímacáloje caphí Jesucristo chojé penaje, ri'ímacáloje Ne'emátajeri penaje.

<sup>22</sup> Chuhuaca nu'ujnajica Jerusalén ejo. Tupana Pechu huacára'ari nucá rejo. Uncá nuhue'epila naca nula'ajico rejo.

<sup>23</sup> Marija calé nuhue'epí: Meño'ojoca nu'ujnajica ehuá nala'ajica nucá chapú. Naca'ajé nucá ina'uqué huajáquelana chojé. Marí que Tupana Pechu quemacá nojló rinacu i'ímacá.

<sup>24</sup> E'iyonaja uncá nohuó ca'aló raú; uncá caja caí calé nujluhua nucá. Iqui'ija Tupana huátaca ina'uqué. Ñaquele ri'imatá ina'uqué capichácajo liyá Jesucristo palamane. Riyucuna i'imajeri penaje Jesucristo a'arí nucá. Marí nusápaca'ala, nuhuata riñapátacana.

<sup>25</sup> Riyucuna i'ímacana aú ja nuphá inacu i'ímacá. Tupana i'ímacáloje Ihucára'ajeri penaje nu'umá ijlo riyucuna i'ímacá. Chuhuaca uncá nu'umalaje maárohua; uncá nomálaje piño icá marí eja'ahuá chu.

<sup>26</sup> Ñaquele nuhuata ijlo marí que quemacana caja penaje: Re ca'ajná ijhua'atéjena capichájeño Tupana liyá. Uncá nupachá calé ricá.

<sup>27</sup> Caja nu'umá ijlo piyuqueja nacaje Tupana huátacare iná la'acá, caje yucuna. Piyuqueja que nu'umacá riyucuna ijlo, uncá nuyurila huejápaja rinaquiyá. Mamujrúmino que nu'umacá riyucuna ijlo.

<sup>28</sup> Chuhuaca a'á inacojó pecohuácaca. Ñaque caja a'ajica inacojó Jesucristo hua'atéjena piyuqueja. Tupana Pechu a'ari icá namájeño penaje. Huahuacára'ajeri Jesucristo huarúhua'acarena necá. Nachaya ritacá'á a'ahuaná apiyácacana nacojó i'ímacá. Marí que rila'acá aú rihuarúhua'a rijluhua necá.

<sup>29</sup> Marí pumí chiyó uncá nu'umalaje ijhua'até. Uncá ina'uquélaruna iphájeño e'iyajé, nuhue'epica. Yáhuina eja'ahuá e'iyajena iphácachu pirajina ohuéjona e'iyajé, neñaó paliyácaca. Ñaque caja ca'ajná ajopana la'ajica icá, ipechu i'ímacá piyá panacojéchaca que Jesucristo nacú.

<sup>30</sup> Inaquiyana i'imajeño caja pajlácachina. Uncá nehuíña'atalaje icá quehuácaje puráca'aloji nacú. Ñaque caja Jesucristo ja'apiyá jema'ajeño naquiyana i'imajica najhua'até.

<sup>31</sup> Iijnatá ipéchuhua palani puráca'aloji nacú, napajlájica ijhua'até. Caja nu'umá hueji quele jarechí quetana ijhua'até i'ímacá. Nohuíña'ata icá Tupana puráca'alo nacú. Hue'echú ca'alá queja lapejé hua'ató nohuíña'ataque icá pajluhuano que Tupana puráca'alo nú. Nuyaque ijhua'até, ihue'epicaloje rinacojó penaje.

<sup>32</sup> Chuhua nuyuríjica icá Tupánajlo, ra'acáloje rinacojó icá penaje, jema'acáloje ripuráca'alo ja'apiyá penaje. Tupana quemari huanacu: "Iqui'ija huánija nuhuátaca necá" que. Ricá Tupana puráca'alo la'arí iná pechu caphí, iná jema'acáloje palá Jesucristo ja'apiyá penaje. Tupana la'ajeri palá icá ajopana Jesucristo ja'apiyá jema'ajeño hua'até —que rimacá najló.

<sup>33</sup> Rimá piño najló:

—Maárohua nu'umacá quetana uncá nuquejá'aque nujluhua ajopana liyá a'arumacaji, liñeru caje.

<sup>34</sup> Nusapaque, nucánacaloje liñeru penaje, nuhuarúhua'acaloje nacaje nula'ajicare nacú camu'ují raú penaje. Ñaque caja nuhuarúhua'ajica nujuháque'enanjo nacaje nala'ajicare nacú camu'ují.

<sup>35</sup> Marí que la'acana aú nomata icá sápacaje aú, ila'acáloje ñaque caja penaje. Palani sápacaje inajlo, iná a'acáloje camu'ují la'acaño ñaté raú penaje. Ihue'epí méqueca Huahuacára'ajeri Jesucristo quemacá i'ímacá. Marí que rimacá rinacu: "Pu'ují iná pechu la'acó, ajopana a'acá aú inajlo nacaje. Eyá iná a'acá aú ajopánajlo nacaje, richaje iná pechu la'acó pu'ují raú", que Pablo ja'apátaca najló riyucuna i'ímacá.

<sup>36</sup> Riñapátaca pura'acajo ejomi ritára'o ri'irúpachi aú. E ripura'ó Tupana hua'até. Ñaque caja Efeso eyájena pura'acó Tupana hua'até rijhua'até.

<sup>37</sup> Ejéchami cajrú neyaca Pablo; namahuílo'o ricá; nachiño'ó rijimá chiyá.

<sup>38</sup> Camu'ují huani napechu la'acó Pablo hua'até, rimacale najló: "Uncá huamálaje piño pecohuácaca marí eja'ahuá chu." Ejomi nahuitúca'a rijhua'até juni turenaje punumaje chojé.

## 21

*Pablo i'ijnacá Jerusalén ejo yucuna marí:*

<sup>1</sup> E hua'apá Jesucristo hua'atéjema liyá, huitúca'año huapuru chojé. Reyá hue'ejná ají que pu'ucuja Cos te'eré ejé. Muní que hua'apaca piño reyá, iphaño Rodas te'eré ejé. Reyá hue'ejná piño apú pajimila Pátara ejé.

<sup>2</sup> Pátara e huephata apa'acú huapuru, i'ijnari Fenicia te'eré ejo. Richoje huahuitúca'a, hue'ejnacáloje richu penaje.

<sup>3</sup> Reyá hua'apá ají que a'ajná ño'ojó. Jucaya huamá cajruni paranácuha. Paranácuha íí Chipre. Ca'añá chojé pitá hua'apá rahua'ayá, hua'apaña ricá. E hua'apá, iphaño Siria te'eré nacoje. Nacaje í'imari huapuru chu, ne'ejnatácaloje ricá pajimila Tiro ejo penaje. Aú huarúca'o rejé. Reje huácho'o huapuru chiyá.

<sup>4</sup> Re huephata Jesucristo ja'apiyá jema'ajeño naquiñana. Huayuró najhua'até pajluhua sápacaje quetana. E nemá Páblojlo:

—Pi'ijnaniya Jerusalén ejo. Tupana Pechu quemari huajló naca pila'ajico rejo —que nemacá rijló.

<sup>5</sup> E riphá rená chojé, huácho'ocoloje penaje. Aú piyuque Jesucristo ja'apiyá jema'ajeño, achíñana, inaana, yuhuaná, quele ja'apaño huajhua'até ají que pajimila yámojo. Reje que'epé nacú hualapa'ó hue'erúpachí aú. Re huapura'ó Tupana hua'até.

<sup>6</sup> E hue'emá huayucuno najló, huamahuílo'ocaco pecohuácaca. E caja huahuitúca'a piño huapuru chojé. Reyá ileruna pa'año hualanaquiña nañacaré chojé.

<sup>7</sup> Hua'apá piño, huácho'o pajimila Tiro eyá, ja'apaño ají que pajimila Tolemaida ejo. Quetánaja hua'apaca juni jalomi jachuá. Re hue'emá Jesucristo ja'apiyá jema'ajeño naquiñana ajalácaje. Re huayuró najhua'até pajluhua cálaia.

<sup>8</sup> Muní que hua'apaca piño reyá, iphaño pajimila Cesarea ejo. Reyá hue'ejná Felipe ñacaré ejo. Tupana puráca'alo yucuna í'imajeri rí'imacá, ricá í'imari risápaca'ala. Júpimi Jerusalén e najña'á iyamá cuhuá'ata quele achíñana Jesucristo ja'apiyá jema'ajeño e'iyayá, natamáca'atacaloje a'ajnejí ihuacajlominajlo penaje. Nanaquiñana penájemi rí'imacá, rí-jhua'até huayuró.

<sup>9</sup> Pa'u quele Felipe yaní í'imacá, inaana huánija. Uncá huá'acalaño ne'emacá. Tupana puráca'alo ja'apátajeño ne'emacá.

<sup>10</sup> Mequetánaja hue'emacá re najhua'até. Ehuá apú iphaca huanacu, Judea te'eré eyaje rí'imacá. Tupana puráca'alo ja'apátajeri rí'imacá. Ríí í'imari Agabo.

<sup>11</sup> Caja riphá huanacu. E ricaráca'a Pablo naquiya rihuachaphila. Quéchami repo'ocá ricó raú, ra'anapitá naquiya, ritajné naquiya hua'ató. E rimá Páblojlo:

—Tupana Pechu quemari nojló marí que pinacu: “Marí que caja judíona naquiñana la'ajica picá chapú Jerusalén ejo. Ejomi na'ajé picá ajopánajlo, uncá judíona naquiñana calé ne'emajica”.

<sup>12</sup> Marí que rimacá Pablo nacú. Aú huemá rijló:

—Pi'ijnaniya Jerusalén ejo.

Ñaqué huánija Jesucristo hua'atéjema quemacá rijló. Cesarea e í'imacaño ne'emacá.

<sup>13</sup> E'iyonaja Pablo quemari huajló:

—¿Naje ta iyá nujhua'até? ¿Naje ila'á nupechu camu'ují ijhua'ató? Apala nepo'ojé ca'ajná nucá rejo. Apala nenoje ca'ajná nucá rejo, Jesucristo ja'apiyá jema'ajeri nu'umacale. Caphí nupechu rilocópa'ala —que rimacá huajló.

<sup>14</sup> Uncá meque calé huemacajla rijló, rí'ijnacá piyá Jerusalén ejo. Aú huamanúma'o ra'apejé. Marija calé huemá rijló:

—Tupana huátajica queja pi'imajica rejo.

<sup>15</sup> Rejomi caja hualamá'ata huanane, hue'ejnacáloje Jerusalén ejo penaje.

<sup>16</sup> Jesucristo hua'atéjema naquiñana, Cesarea eyájena ne'emacá, í'ijnáño caja huajhua'até. Pajluhuaja nanaquiñana íí í'imari Mnasón. Chipre eyaje rí'imacá.

*Pablo i'ijnacá Santiago chaje yucuna marí:*

<sup>17</sup> E caja huephá Jerusalén ejo. Pu'ují Jesucristo hua'atéjema pechu la'acó huanacu huamácana aú.

<sup>18</sup> Muní que Pablo i'ijnacá huajhua'até Santiago chaje. Piyuque Jesucristo ja'apiyá jema'ajeño huacára'ajeño í'imaño re caja rijhua'até.

<sup>19</sup> Pablo ajalácari necá. E rí'imá risápaca'ala yucuna najló, Tupana yucuna rí'imaqué ajopánajlo, ajopánajlo que, uncá judíona calé ne'emacá. Palá Tupana la'ajica ra'apiyá jema'ajeño, ajopana, ajopana que. Riyucuna rí'imá najló.

<sup>20</sup> Nema'á riyucuna, aú nemá Tupana nacú: “Meque palá huani rila'acá necá” que. E nemá Páblojlo:

—Caja pihue'epí cajrú huani judíona jema'acá Jesucristo ja'apiyá maárohua. Huechi jo'ó nahuátaca ina'uqué jema'acá Moisesmi chu puráca'alomi ja'apiyá.

<sup>21</sup> Marí que ne'iyajena quemacá pinacu: “Rimá judíonajlo, ajopana te'eré nacú i'ímacañjlo: 'Ila'aniya Moisesmi chu puráca'alomi quemacá que'. Hua'ató rehuíña'ata necá namata'acá piyá queráco'opena chinuma. Hua'ató caja rehuíña'ata necá, nala'acá piyá peñahuilánami chuna la'ajica que”. Marí que maárohuajena pura'acó pinacu —que nemacá Páblojlo.

<sup>22</sup> Nemá piño rijló:

—¿Chuhuata meque pimájica najló? Nema'ajica aú piphaca majó yucuna nahuacajo pinacojé.

<sup>23</sup> Nemá piño Páblojlo:

—Palani marí que la'acana. Re maare huajhua'até pa'u quele achiñana. Nahuata nacaje la'acana nemacare nacú Tupánajlo.

<sup>24</sup> Eco pihuá'a necá pijhua'ató Tupana ñacaré chojé, pilamá'tachi pipéchuhua Tupánajlo najhua'até. Ejomi pa'ajé Tupana ñacaré chiyá sápañejlo rihuemí, nacára'atacaloje ichaya piraji Tupánajlo penaje. Ejomi nasara'ajé pihuilá. Raú piyuque judíona hue'epéñe uncá quehuaca calé nemacare pinacu. Aú nahue'epeje re caja jo'ó pila'acá nacaje Moisesmi chu huacára'aca que —que nemacá rijló.

Nemá piño rijló:

<sup>25</sup> —Júpimi huahuacára'a papera Jesucristo ja'apiyá jema'ajéñjlo i'ímacá. Uncá judíona naquiyana calé necá. Najló palani, nala'acáloje huemacá najló i'ímacá que penaje. Huahuacára'a najñaaca piyá ri'ími nato'otácare nacaje jenami nacojé, renami nemacare nacú: “Huachí'ináricana ricá” que. Huemá caja najló najñaaca piyá rírami. Huemá caja najló najñaaca piyá ri'ími, uncá rira i'íjnalare raphumi chiyá palá. Huemá caja najló achiñana, inaana, quele la'acá piyá namanaicho pajhua'atéchaca, que huemacá najló i'ímacá —que nemacá Páblojlo.

*Naca'acá Pablo ina'uqué huajáquelana chojé yucuna marí:*

<sup>26</sup> Marí caje aú Pablo huá'ari ileruna achiñana rijhua'ató. Pa'u quele ne'emacá. Muni que riqneño'ocá ripéchuhua lamá'atacana Tupánajlo najhua'até. E rimujlúca'a Tupana ñacaré chojé, rimacáloje najló méquechaca nañapátaca napechu lamá'atacana. Marí caje ejomi nenójicano pirajina naquiyana nachaya pajluhuano que Tupánajlo.

<sup>27</sup> Ehuá yehuicha pajluhuaja sápacaje ja'apaca, nañapátacaloje ricá penaje. Caja iyamá cuhuá'ata que cálichá ne'emacá rinacu. Re caja ajopana judíona naquiyana i'ímaño, Asia te'eré eyájena ne'emacá. Necá amaño Pablo tára'aco Tupana ñacaré chu. Namaca aú ricá, napura'ó pu'uhuaré rinacu ajopana ina'uqué hua'até, nayúcha'acaloje Pablo cha penaje. A'acuhuaná ne'ejná Pablo pataje.

<sup>28</sup> Marí que nahuíyo'oca ajopana judíona naquiyánajlo:

—A'á huañaté ripatacicha pajluhuaja sápacaje ja'apaca, nañapátacaloje ricá penaje. Caja iyamá cuhuá'ata que cálichá ne'emacá rinacu. Re caja ajopana judíona, nala'acá piyá Moisesmi chu puráca'alomi quemacá que. Raú chapú napechu huecá'ana nacú, huapuráca'alo lana'aguéjami nacú hua'ató. Raú caja napechu i'imari chapú Tupana ñacaré nacú. Marí que rila'acá piño uncá huani paala: Rihua'a ajopana rijhua'até Tupana ñacaré chojé, uncá huecá'ana calé ne'emacá. Nahuá'acana aú rapichata huajló marí pají. Marí pají chojé huahuaco, huapechu i'ímacáloje pu'ují Tupana nacú penaje —que nemacá najló Pablo nacú.

<sup>29</sup> Marí que nemacá rinacu, namácale ra'apaca apú huacajé que Tróximo hua'até pajimila nacuhá. Uncá judíona naquiyana calé ri'ímacá, Efeso eyaje ri'ímacá. Napechu i'ímá Pablo nacú: “Rihua'ícha japi ricá rijhua'ató Tupana ñacaré chojé.” Aú napechu i'ímá rinacu ñaque. E'iyonaja uncá rihua'ala ricá rijhua'ató richojé.

<sup>30</sup> E caja nahuíyo'o: “A'á huañaté” que. Raú jecho'ocajo aú cajrú huani pajimila eruna jahuacaco nanacojé. Ejéchami yuríque'ela napatacá Pablo. E nachíra'a ricá ají que huaca'apoyo. Quéchami netaca Tupana ñacaré numaná.

<sup>31</sup> Nahuata rinócana. E'iyonaja ne'iyajena jecho'ótaño riyucuna surárana huacára'ajerijlo, nemá rijló:

—Cajrú pajimila eruna nócano pajhua'atéchaca me'etení.

<sup>32</sup> Eja surárana huacára'ajeri jahuacátari surárana, ra'apiyatéjena hua'até. E jecho'oquelo nephaca rejo íqui'iruna ina'uqué e'iyajé. Ina'uqué amaca aú surárana huacára'ajeri huaíchaca surárana hua'até, aú nayurí Pablo huilá i'ícacana.

<sup>33</sup> E caja surárana huacára'ajeri ja'apari Pablo ahua'ajé. Rijña'a ricá rijhua'ató, rica'acáloje ricá rihuajáquelana ñacarelana chojé penaje. Rihuacára'a nepo'ocá ricá iyajmela curete aú. Ejomi rimá ajopánajlo:

—¿Na rií ta quele? ¿Meque rili'ichaca ta?

<sup>34</sup> E pajñacani nahuíyo'oca riyló apú, apú que. Raú uncá surárana huacára'ajeri hue'epila méqueca nemacá riyló, cajrú huani namejé i'imacale rejo. E caja rihuacára'a surárana huá'aca Pablo surárana ñacaré ejo.

<sup>35</sup> E nahuá'a ricá rejo. Nephata ricá mitamitá nacojé. Rejé surárana jácho'otaño Pablo ají que nahuacúla'apajo, nenoca piyá ricá. Yuriná huani ne'emacá.

<sup>36</sup> Na'apaca rejo quetana nápumi chu chira'acaño jahuíyo'otaca:

—Inó ricá, inó ricá —que nahuíyo'otaca ricá.

Marí que nema'acá nahuíyo'oca aú nácho'ota ricá nahuacúla'apa nacuhuaja ají que yenoje, nala'acá piyá chapú ricá.

*Pablo pura'acó richayo yucuna marí:*

<sup>37</sup> E najña'ájla ricá surárana ñacaré chojé. Ejéchami Pablo quemacá surárana huacára'ajerijlo marí que griégoná pura'acó chu:

—Nuhuata nacaje nacú quemacana pijló pamineco.

E surárana huacára'ajeri quemari riyló:

—¿E pema'acá griégoná pura'acó?

—A'a, noma'acare —que rimacá riyló.

<sup>38</sup> Surárana huacára'ajeri quemari riyló:

—¿Uncá chi Egipto eyaje calé picá, uncá ina'uquélari? Meyale rihuá'a rijhua'ató cuatro mil ina'uqué rile'ejena surárana penaje. Pu'uteni meñaru chojé rihuá'a necá. Nahuata nócacajo, naca'acáloje hue'emacana penaje. ¿Uncá chi ricá ta calé picá? —que rimacá Páblojlo.

<sup>39</sup> E Pablo quemari riyló:

—Uncá ricá ta calé núcá. Judíona ja'a núcá. Pajimila Tarso eyaje núcá, Cilicia te'eré nacú ricá pajimila. Apú pajimila chaje ricá rehuá. Chuhuata pila'á nojló nacaje. Piyuri núcá, numachi najló nacaje nacú mequetánaja —que rimacá riyló.

<sup>40</sup> —Je —que rimacá riyló.

E ritára'o mitamitá chu. Rila'á ají que riyáte'ela najló, namanúma'acoloje raú penaje. Aú namanúma'o. E rimá najló napura'acó chu, hebreo pura'acó chu, marí que:

## 22

1 —Nojena, jema'á méqueca numájica ijlo nunacuhúa.

2 Nema'á ripura'acó napura'acó chu, hebreo pura'acó chu. Aú namanúma'o huani. E Pablo quemari najló:

<sup>3</sup> —Judíona ja'a núcá. Pajimila Tarso e nomoto'ó i'imacá, Cilicia te'eré nacú ricá pajimila. Maare Jerusalén e nutahuá'o i'imacá. Gamaliel jehuíña'atari nu'umacá maare. Peñahuilánami chuna puráca'alomi piyuqueja nacú rehuíña'ataque núcá. Nuhuátaque Tupana huátacare caje la'acana. Nupechu locópa'alaja nula'ajica ricá. Rihuacajé uncá jo'ó nuhue'epila rinacojé palá. Me'etení ila'acá que caja nula'ajica rihuacajé.

<sup>4</sup> Júpimi que nula'ajica chapú Jesucristo ja'apiyá jema'ajeño. Nucapichátaque caja ne'iyajena. Nujña'aque caja achiñana, inaana, quele, nuca'acáloje necá ina'uqué huajáquelana chojé penaje.

<sup>5</sup> Sacerdótena huacára'ajeri, ajopana huahuacára'ajeño, quele hue'epiño quehuaca nmacá ijlo me'etení. Najló numá i'imacá, nahuacára'acoloje nujhua'até papera huanquiyánajlo, Damasco e i'imacáñojlo penaje. Na'acáloje nojló Jesucristo ja'apiyá jema'ajeño penaje. Curete aú jepo'oqueja nuhuata nahuá'acana majó, Jerusalén ejo, huahuajácaloje necá maare penaje.

*Pablo quemari najló rinacuhúa méqueca Tupana apiyácaca ripechu yucuna marí:*

<sup>6</sup> Aú nu'ujná ají que Damasco ejo. No'opá ají que iñe'epú chuhúa. Yehuíchami nuphaca pajimila nacojé, caápu'ucu i'imari huachá rejé. E mana'í chiyó cajrú huani mejáma'atani ja'acó nunacojé je'echú chiyá majó.

<sup>7</sup> Ejéchami nocojno'ocá tejí que te'erí e'iyajé. E noma'á puráca'aloji quemacá nojló: “Saulo, ¿naje chi pila'á núcá chapú?”

<sup>8</sup> E numá riyló: “¿Na chi picá quele?” E rimá nojló: “Jesús núcá, Nazaret eyájemi núcá. Núcá pila'á chapú”, que rimacá nojló.

<sup>9</sup> Nujhua'até i'imacáño amaño caja cajrú camareji patacá nunacojé. Cajrú naquero'ocó raú. Uncá nema'alá ripura'acó nujhua'até.

<sup>10</sup> E numá riyló: “Nuhuacára'ajeri, ¿na pihuata nula'acá?” Rimá nojló: “Pácho'o, pi'ijnachi pajimila Damasco ejo. Rejo nemaje pijló piyuque nacaje nacú méqueca pila'ajicare”, que rimacá nojló.

<sup>11</sup> Aú nócho'o tára'ajo. Nuyacá'ojla. E'iyonaja uncá huani nomala. Caphí huani camareji i'imacá, ricá apichátari nujlú. Aú nujhuáque'ena huá'año núcá paco'otáqueja Damasco ejo.

<sup>12</sup> 'Damasco e apú i'imari, ríi i'imari Ananías. Palá rema'ajica Moisesmi chu puráca'alomi ja'apiyá. Palá caja judíona, Damasco eruna pechu i'imajica rinacu.

<sup>13</sup> Re nu'umá Damasco e. Uncá nomala. E Ananías i'ijnari nuchaje. Riphaca aú rimá nojló: "Nujmeremí, Saulo, piyáca'o nuchaje". Ejéchami nomaca palá.

<sup>14</sup> Rimá piño nojló: "Tupana hua'ajútayami chuna pechu i'imaqué chojé caphí, i'ihuapari rijluhua picá ajopana ina'uqué e'iyayá, pila'acáloje nacaje rihuátacare caje piyuque penaje ri'ihuapá picá. Ri'ihuapá caja rijluhua picá, pamácaloje ilé palájine'equé Jesucristo penaje, pema'acáloje caja ripura'acó pijhua'até penaje.

<sup>15</sup> Ñaquele chuhua pi'imajica riyucuna piyuqueja ina'uquejlo. Caja pamá ricá, ripura'ó caja pijhua'até. Riyucuna pi'imajé najló", que rimacá nojló.

<sup>16</sup> E rimá piño nojló: "Caja chuhuata, ¿naje pimalá'ata picó maare? Pácho'o, nula'achí bautizar picá. Pipechu i'imá caphí Jesucristo chojé, rica'achí pinaquiyá pu'uhuaré pila'acare", que Ananías quemacá nojló i'imacá.

<sup>17</sup> 'Damasco eyá nupa'ó nopumí chuhua majó Jerusalén ejo. E nu'ujná Tupana ñacaré chojé. Re nupura'ó Tupana hua'até richu. E'iyohuá que nomaca Nuhuacára'ajeri Jesucristo ya'atacó nojló. Iná amaca iná tapú que nomaca ricá.

<sup>18</sup> Rimá nojló: "Quiñaja pi'ijnacá maare Jerusalén eyá. Uncá na'alaje nanacojó maárohua nuyucuna pi'imajicare najló", que rimacá nojló.

<sup>19</sup> E numá rijló: "Nuhuacára'ajeri, necá hue'epiño méqueca nula'ajica maárohua. Nu'ujnaqué nahuacáca'alo ñacarelana chojé, nujña'acáloje ne'iyayá pa'apiyá jema'ajeño penaje, nuca'acáloje necá ina'uqué huajáquelana chojé penaje. Nuña'ataque caja necá.

<sup>20</sup> Estebánmi chu i'imari pijhua'até sápa'ajeri i'imacá. Ri'imaqué piyucuna ina'uquejlo. Nomá caja nenoca ri'imacá. Palani nojló ilé que rila'acana i'imacá. Jipa ca'ajeño a'arumacá hua'aphé nu'umacá rihuacajé. Caja Tupana pajno'otari nupechu marí que la'acana pu'uhuaré liyá. Riyucuna nu'umajé maare najló. Aú nema'ajé pa'apiyá noma'acá pa'apiyá que caja", que numacá Jesucristojlo Tupana ñacaré chu.

<sup>21</sup> E'iyonaja rimá nojló: "Pa'apá. Nuhuacára'aje picá ya'ajnaje, pi'imacáloje nuyucuna ajopana ina'uquejlo, uncá judíona naquiyana calejlo", que rimacá nojló —que Pablo quemacá najló.

*Surárana huacára'ajeri huacára'aca naña'ataca Pablo yucuna marí:*

<sup>22</sup> Rejenaja na'acá nanacojó ripura'acó. E caja na'ó piño jahuíyo'oje cajrú marí que:

—Inó ta ricá ta. Uncá na penaje calé ilé caje ta i'imacá eja'ahuá chu —que nahuíyo'oca.

<sup>23</sup> Iqui'ija huani nayúcha'aco. Nayuchá hua'até nahuíyo'oca, najiyo'otaca na'arumacá, naca'acá mu'upé yenoje.

<sup>24</sup> E caja surárana huacára'ajeri quemari suráranajlo:

—Ihuá'a Pablo ñacaré chojé. Richu iña'atá ricá, rimacáloje nojló pu'uhuaré rila'acare yucuna penaje. Nuhuata rihue'epícana na chónaca nayúcha'aco rijló iqui'ija huani —que rimacá najló.

“Riña'atácana aú ca'ajná ri'imajé huajló riyucuna,” que ripechu i'imacá rinacu.

<sup>25</sup> E caja nepo'ó ricá, naña'atácaloje ricá penaje. Ejéchami Pablo quemacá rahua'á tára'acajlo:

—Caja nahuíyo'o Romano naquiyana ña'atácana cha. Uncá jo'ó hue'emacana, ra'apiyatéjena, quele jema'alaño nuyucuna, nahue'epícaloje na chónaca nahuajáica nucá —que rimacá rijló.

<sup>26</sup> Marí que rimacá aú rijló ri'ijná surárana huacára'ajeri chaje. Rimá rijló:

—¿Naje calé ta pihuacári'icha huaña'ataca ricá! Uncá huani paala riña'atácana, Romano naquiyana ta ri'imacale.

<sup>27</sup> Raú nahuacára'ajeri i'ijnari Pablo ahua'ajé, rimá rijló:

—¿Quehuaca chí Romano naquiyana picá?

—A'a —que rimacá rijló.

<sup>28</sup> Nuhuacára'ajeri quemari rijló:

—Romano naquiyana caja nucá. No'ó liñeru cajrú, nu'umacáloje Romano naquiyana penaje.

Pablo quemari rijló:

—Nora'apá, Romano naquiyana ricá. Ñaquele nomoto'ó Romano naquiyana penaje.

<sup>29</sup> Raú uncá surárana ña'atalaño ricá, na'apaja riliyá. Ñaquele caja nahuacára'ajeri ja'apaca riliyá rihue'epica aú Romano naquiyana ri'imacá. Quero'ocajo nacú ri'imá, rihuacára'acale repo'ocana i'imacá. Uncá paala ilé que Romano naquiyana la'acana i'imacá.

*Pablo tára'aco judíona huacára'ajeño jimaje yucuna marí:*

<sup>30</sup> Surárana huacára'ajeri huátari rihue'epícana na penájeca judíona naquiyana yúcha'aco Pablo cha. Ñaquele muní que rahuacata sacerdotena huacára'ajeño, piyuque peñahuilana, quele hua'até. Ejomi ricaráca'ata Pablo naquiyá curete nepo'ocare aú rí'imacá. Ejomi rihua'a ricá najimaje.

## 23

<sup>1</sup> E caja Pablo yacá'aro nahuacára'ajeño chaje. E rimá najló:

—Nojena, palá nu'umacá maárejecha. Palani nupechu Tupánajlo nuhue'epica.

<sup>2</sup> Sacerdotena huacára'ajeri íi i'imari Ananías. Marí que Pablo quemacá aú rihuacára'a re rahua'á lapa'acaño ñaña'ataca ricá panuma'alaya.

<sup>3</sup> Raú Pablo quemari rijló:

—Ñaque caja Tupana ña'atájica picá ta, pajlácachi ta pi'imacale. Ina'uqué pechu pinacu: “Palájne'equé japi ricá” que. E'iyonaja uncá ñaque calé picá ta. Chapú huani pipechu. Maare picá, ajopana hua'até, amácaloje méqueca ijlo ricá nula'acare penaje. Maare icá amácaloje na aú ca nula'acá chapú ijlo. Uncá ca'ajná noma'alá huahuacaré lana'aquejami ja'apiyá. Penaje icá maare. Eta picá ta uncá la'alacha huahuacaré lana'aquejami quemacá que, pihuacári'ichacale ñaña'atácana panuma'alaya —que rimacá rijló.

<sup>4</sup> Raú rahua'á lapa'acaño quemañó rijló:

—¿Ijá que chí iná pura'acó pu'uhuaré Tupana le'ejé sacerdote hua'até?

<sup>5</sup> Aú Pablo quemari najló:

—Nojena, marí que Tupana puráca'alo lana'aquejami quemacá: “Ipura'aniyo pu'uhuaré ihuacára'ajeño nacú”. E'iyonaja uncá nuhue'epílacha Sacerdotena huacára'ajericá ricá. Nuhue'epíquela uncá numaláchajla ñaque rijló —que rimacá najló.

<sup>6</sup> Nahuacára'ajeño, re i'imacaño, naquiyana i'imaño saducéona, ajopana naquiyana i'imaño fariséona. Marí que saducéona pechu i'imacá caja taca'acaño nacú: “Uncá japi namacápo'olajo” que. Eyá fariséona pechu i'imá: “Macápo'ojeño necá” que. Pablo hue'epíri saducéona, fariséona, quele i'imacá nanaquiyana. Aú rahuiyo'ojó najló marí que:

—Nojena, fariséona naquiyana caja nucá, ñaque caja nora'apá. Nuhue'epí caja taca'acaño macápo'ojico piño. Marí que nupechu i'imacá pachá, ca'ajná maare nucá ijimaje, iculátacaloje nunacu penaje.

<sup>7</sup> Marí jimaje naqueño'ó pajhua'atéchaca aca'ácacano. Uncá rejenohuaja calé nemacá rinacu.

<sup>8</sup> Saducéona quemañó: “Uncá caja taca'acaño macápo'olajo.” Nemá caja Tupana hua'atéjena, je'echú chiyájena, nacú: “Uncá ne'emalá” que. Péchujimi nacú nemá caja; “Uncá ne'emalá” que. Eyá fariséona quemañó Tupana hua'atéjena nacú: “Re necá. Re caja péchujimi.” Caja taca'acaño nemá nacú: “Namacápo'oyo piño.”

<sup>9</sup> Caja Pablo quemari najló: “Fariséona naquiyana nucá” que. Rijimaje piyuque necá jahuíyo'ojó pajlocaca. Ehuá Tupana nacú jehuíña'atajeño tára'aco. Necá i'imaño fariséona naquiyana caja. E nemá Pablo nacú marí que:

—Uncá marí ina'uqué la'alá nacaje pu'uhuaré. Apala quehuaca palani péchujimi ca'ajná quemari rijló nacaje nacú. Pajluhuaja Tupana hua'atéjeri, je'echú chiyaje, ca'ajná quemari rijló nacaje nacú. Uncá paala chapú rila'acana. Huala'aqueja chapú ricá, ñaque caja huala'acajla Tupana chapú.

<sup>10</sup> Rijimaje caphí huani naca'ácaco pajhua'atéchaca. Raú surárana huacára'ajeri quero'oró. Ripachu i'imá: “¿Chuhúa chí najiyo'otájica Pablo?” Aú rihuacára'a surárana rihua'áje, napa'atácaloje ricá surárana ñacaré chojé penaje.

<sup>11</sup> E muní que lapí Rihuacára'ajeri Jesucristo ya'atacó Páblojlo. Rimá rijló:

—Pablo, caphí pila'acá pipéchuhua. Caja pi'imá nuyucuna maare Jerusalén e. Ñaque caja pi'imajica nuyucuna Roma ejo —que rimacá rijló.

*Ne'iyajena huátaca Pablo nócana yucuna marí:*

<sup>12</sup> E muní que ne'iyajena huátano Pablo nócana. Judíona ne'emacá, nemá pajlocaca:

—Reja huamáreja chapú caje yajhué, huajñájica ee hua'ajnehuá Pablo nócana yámona. Hue'etajícoja hua'ajné liyá. Pablo nócana ejómico huajñá hua'ajnehuá —que nemacá pajlocaca.

<sup>13</sup> Iyamá ina'uqué le'ejé quele chaje ne'emacá quemañó marí que. Achíñana huánija ne'emacá. Panacojéchaca que napechu i'imacá Pablo nócana nacú.

<sup>14</sup> E caja ne'ejná sacerdotena huacára'ajeño, peñahuilana, quele chaje. Nephá nanacu. E nemá najló:

—Caja huemá huanacuhúa: “Reja huamáreja chapú caje yajhué, huajñájica ee hua'ajnehuá Pablo nócana yámona. Hue'etajícoja hua'ajné liyá. Pablo nócana ejómico huajñá hua'ajnehuá”, que huemacá huanacuhúa.



<sup>15</sup> Chuhua marí que ila'ajica ajopana huahuacára'ajeño hua'até: Eco imá surárana huacára'ajeriño, rihuá'achi Pablo majó muní. Marí que imájica rijló Pablo nacú: "Huahuata riyucuna quejá'acana riliyá palá". Ñaque huecá ja'ajico ripé rapunana chu rejé, huenócaloje ricá penaje —que nemacá najló.

—Je —que nemacá najló.

<sup>16</sup> E'iyohuá que Pablo e'episá jema'acá riyucuna. Aú ri'ijná surárana ñacaré ejo riyucuna i'imáje Páblojlo. E caja ri'imá rijló riyucuna.

<sup>17</sup> Raú Pablo huá'ari apujlo, surárana huacára'ajeri ja'apiyateje ri'imacá. Rimá rijló:

—Pihuá'a marí yuhujá ihuacára'ajeri ejo. Rihuata nacaje nacú quemacana rijló.

—Je —que rimacá.

<sup>18</sup> E rihuá'a ricá ají que nahuacára'ajeri ejo. Rimá rijló:

—A'ajná huahuajácare, Pablo, huá'ichari nojló i'imichaca. Rihuacári'icha nuhuá'aca marí yuhujá majó pichaje, ripura'acóloje pijhua'até penaje.

<sup>19</sup> Raú nahuacára'ajeri patarí yuhujá ra'anapítá naquiyá. Rihuá'a ricá a'ajná ño'ojó quemachi. E rimá rijló:

—¿Meque pihuátaca nojló quemacana?

<sup>20</sup> Yuhujá quemari rijló:

—Marí que judíona naquiyana puri'ichaco pajhua'atéchaca. Muní nemájica pijló, pihuá'acaloje Pablo nahuacára'ajeño ejo penaje. Majopeja nemájica pijló rinacu marí que: "Palá huahuátaca riyucuna quejá'acana Pablo liyá. Ricá penaje huahuata pihuá'aca ricá majó", que nemájica pijló Pablo nacú.

<sup>21</sup> ¡Pa! Pema'aníya na'apiyá. Majopeja napajlájica pijhua'até. Re iyamá ina'uqué le'ejé quele chaje achíñana. Caja nemá nanacuhuá marí que: "Reja huamáreja chapú caje yajhué, huajñájica ee hua'ajnehuá Pablo nócana yámona. Hue'etajícoja hua'ajné liyá. Pablo nócana ejómico huajñá hua'ajnehuá", que nemacá nanacuhuá. Chuhua nemájica pijló, pihuá'acaloje ricá rejo penaje. Pimájica ee najló: "A'a" que, na'ajó ripé iñe'epú chu, nenócaloje ricá rejé penaje —que rimacá rijló.

<sup>22</sup> E surárana huacára'ajeri quemari yuhujá:

—¡Pa! Pi'imaniya ta riyucuna ajopánajlo. ¿E pemi'ichaca?

—A'a —que rimacá.

—Ñaquele chuhua pipa'ó —que rimacá rijló.

*Nahuá'aca Pablo nachaje huacára'ajeri ejo yucuna marí:*

<sup>23</sup> Ejomi surárana huacára'ajeri huá'ari surárana naquiyana maná. Ra'apiyá huacára'ajeño ne'emacá. Rimá najló:

—Eco jahuacata dos cientos surárana, ne'ejnacáloje Cesarea ejo penaje. Lapí, pa'u que cuhuá'ata quele camú jená chojé riphájica ee, icá i'ijnajeño rejo. Eyá jahuacátaje piño setenta surárana, ne'ejnacáloje rejo cahuaruna nacú penaje. Quecha jahuacátaje doscientos surárana, najña'acáloje nahuejucure nacápojo penaje —que rimacá najló.

<sup>24</sup> Ejomi rihuacára'a cahuaruna huá'acana, Pablo ja'apácaloje nanacu penaje. Rihuacára'a rimejñátacana palá, riphácaloje palá ne'emacana Félis ejo penaje.

<sup>25</sup> Rihuacára'a caja najhua'até papera Félisjlo. Marí que rimacá rijló papera chojé:

<sup>26</sup> "Nucá, Claudio Lisias, huacára'ari marí papera pijló. Huachaje huacára'ajeri picá. Eco palá pijló ca'ajno.

<sup>27</sup> Judíona naquiyana pataño Pablo i'imacá. Ujú caje chiyó nenócajla ri'imacá. E'iyonaja nucá hue'epiri ri'imacá Romano naquiyana. Ñaquele nuhuacára'a nule'ejena surárana, ne'emacáloje naliyá ricá penaje.

<sup>28</sup> Nuhuata rihue'epicana na chónaca nayúcha'o richá. Raú nuhuá'a ricá judíona huacára'ajeño ejo.

<sup>29</sup> Necá quemáño rinacu: 'Uncá rema'alá huapuráca'alo lana'aquejami ja'apiyá'. Pachá nemá rinacu: 'Pu'uhuaré la'ajeri ricá'. E'iyonaja uncá na aú rila'alá rijluhua nacaje, nenócaloje ricá penaje. Uncá caja meque rila'alá, naca'acáloje ricá ina'uqué huajáquelana chojé penaje. Uncá nalamá'atala puráca'aloji pajhua'atéchaca. Ejomi nupa'atá ricá rapumí chuhua.

<sup>30</sup> E apú quemari nojló rinacu: 'Napura'ó pajhua'atéchaca, nenócaloje ricá penaje'. Ñaquele nuhuacára'a ricá pichaje ca'ajno. Caja numá rarucátajeñojlo, ne'emacáloje riyucuna pijló penaje." Caja quetana rilana'acá riyucuna papera chojé Félisjlo.

<sup>31</sup> E caja surárana la'año rihuacára'aca que. Lapí nahuá'a Pablo pajimila Antípatris ejé.

<sup>32</sup> Muní que surárana rejo ja'apácaño pa'año ñañacaré ejo. Cahuaruna nacú ja'apácaño huá'año Pablo ya'ajnaje piño.

<sup>33</sup> E caja nephá Cesarea ejo. Na'á ne'emacánajlo papera. Ejomi na'á rijló Pablo.

<sup>34</sup> Ne'emacana pura'aró papera hua'até pamineco. E rimá Páblojlo:

—¿Mere eyaje chi picá?

Rimá rijló:

—Cilicia eyaje nucá.

<sup>35</sup> Rimá rijló:

—Nulamá'ataje ricá pijhua'até, parucátajeño iphájica majó quechami.

E caja rihuacára'a rile'ejena surárana huá'aca ricá Herodes ñacaré chojé. Rihuacára'a ne'emacá rihua'aphena re.

## 24

*Pablo tára'aco Félis jimaje yucuna marí:*

<sup>1</sup> E caja pajluhuaaja té'ela que cala ja'apari i'imacá. Ejomi Ananías iphari Cesarea ejo. Sacerdótena huacára'ajeri ri'imacá rihuacajé. Ajopana peñahuilana iphaño rijhua'até. Pajluhuaaja nanaquiyana íi i'imari Tértulo. Ajopana chaya pura'ajero ri'imacá. Caja piyuque necá iphaño Félis nacú, narucátaloje Pablo rijló penaje.

<sup>2</sup> E nahuá'a Pablo rejo. Ejéchami cajrú Tértulo queño'ocá Pablo maná aca'acana Félisjlo. Rimá rijló:

—Hue'emacana, palá pila'acá huecá. Pipalamane calé palánija huecá huañacajela ehua. Uncá nócacajo i'imalá huajló rehuá. Palá huani pihue'epica ina'uqué huacára'acana nacojé.

<sup>3</sup> Palá huapechu pinacu, palá huani pila'acale huecá.

<sup>4</sup> Chuhuata uncá nuhuátala pimalá'atacana. Pila'á huajló nacaje chuhua, pema'á hupuráca'alo mequetánaja.

<sup>5</sup> 'Marí huephátacare ina'uqué. Chapújne'equé huani ricá ta. Ri'ijnacá ehua que ricahuíla'aca judíona nacú majopéjari puráca'aloji aú. Ajopana jema'año apú ja'apiyá, Nazaret eyájami ricá. Jesús ta ricá. Pablo, quele jehuíña'atari necá ripuráca'alo nacú.

<sup>6</sup> Rihuá'ajla ina'uqué, uncá judíona calé necá, Tupana ñacaré chojé i'imacá. Ilé cajena huá'acana Tupana ñacaré chojé uncá huani paala huajló. Chona huapatá ricá. Huahuacaré lana'acquéjami quemacá que huahuátaca rihuajácana.

<sup>7</sup> E'iyonaja surárana huacára'ajeri, Lisias, iphari huanacu. Rijña'á Pablo hualiyá tejmuji huani.

<sup>8</sup> Rimá huajló: “Ihuátajica ee rarucátacana huahuacára'ajeri huánijlo, eco i'ijná rejo”, que rimacá huajló. Ñaqué penaje huecá majó. Piquejé'a Pablo liyá riyucuna, pihue'epichi raú quehuaca huemacare nacú pijló —que Tértulo quemacá Félisjlo.

<sup>9</sup> Ajopana judíona, re i'imacaño, quemañó rijló:

—Quehuaca Tértulo quemacá pijló.

<sup>10</sup> Raú ne'emacana la'arí ají que riyáte'ela Páblojlo, ripura'acóloje penaje.

Raú Pablo quemari rijló:

—Palani nojló, nupura'acóloje nuchayo penaje. Caja nuhue'epí júpicha huacára'ajeri huani picá —que rimacá rijló—.

<sup>11</sup> Iyamá iphata jí'imaji nacojé que cala i'imaqué huacajé nu'ujná Jerusalén ejo, pu'ují nupechu i'imacáloje Tupana nacú rejo penaje. Piquejé'ajla ajopana liyá riyucuna, pihue'epijla quehuaca numacá.

<sup>12</sup> Uncá noca'ácalo apú hua'até; ñaqué caja uncá nuyúcha'atala Tupana ñacaré chiyájena; uncá nula'alá ilé que pu'uhuaré pajimila e'iyohuá.

<sup>13</sup> Uncá huani puráca'aloji i'imalá mariruna ina'uquejlo, narucátaloje nucá pijló penaje. Uncá na calé nula'á pu'uhuaré.

<sup>14</sup> Nemá nunacu: “Ricá jema'arí pajluhuaaja Nazaret eyájami ja'apiyá”. Quehuaca jo'ó quele nemacá nunacu. Ra'apiyá jema'acana aú calé nuphá Tupana ja'apí. Hua'ajútayami chuna pechu i'imajicare chojé caphí ricá. Meyáleje puráca'aloji riyuricare huajló i'imacá, ja'apiyá calé noma'á. E'iyonaja mariruna ina'uqué quemañó rinacu: “Apojó ricá”. Uncá apojó calé ricá. Richuhuaja riyucuna. Ñaqué i'imacale nula'á Tupana puráca'alo, Moisesmi chu lana'acare quemacá que. Noma'á caja Tupana puráca'alo ja'apiyá, ripuráca'alo ja'apátajeñomi chuna lana'acare i'imacá.

<sup>15</sup> Mariruna ina'uqué pechu i'imá: “Tupana macápo'otajeri caja taca'acaño”. Ñaqué caja nupechu rinacu. Nuhue'epí Tupana macápo'otajica piyuqueja caja taca'acaño. Palá la'ajicañomi chuna, pu'uhuaré la'ajicañomi chuna hua'ató rimacápo'otaje.

<sup>16</sup> Ñaquele nupechu loco'opani ejeja nula'á piyuque nacaje palá, nupechu i'imacáloje palani Tupánajlo raú penaje. Ñaqué caja nuhuátaca ina'uqué hue'epica palá la'acá nucá.

<sup>17</sup> Jupí huani nu'umá ajopana, ajopana que te'eré nacú. E caja nupa'ó piño nute'eré ejo liñeru a'ajé camu'ují la'acáñojlo. Ajopana a'año nojló liñeru, no'ocáloje ricá camu'ují la'acáñojlo penaje. Nuhuata caja nacaje a'acana Tupánajlo majopeja, aú calé nupa'ó rejo.

<sup>18</sup> Caja nuphá rejo i'imaquí. Nupechu lamá'atacana nacuja nu'umá Tupana ñacaré chu. Nula'á ricá peñahuilánami chuna quemacá que. E'iyohuá que ajopana judíona, Asia te'eré eyájena, amaca nucá Tupana ñacaré chu. Re nu'umá nacaje a'acana nacú Tupánajlo majopeja. Mequeleja ina'uqué i'imaño nujhua'até. Uncá na hua'até calé noca'ácaco nu'umacá re.

<sup>19</sup> Nula'aguela pu'uhuaré, palani nomájeño i'ijnacajla pijló riyucuna i'imagé majó.

<sup>20</sup> Eco piquejá'a mariruna ina'uqué liyá riyucuna, nemacáloje pijló méqueca nemacá nunacu judíona huacára'ajeño jimaje nutára'aco huacajé.

<sup>21</sup> Rihuacajé nohuíyo'o najló marí que: “Apala ihuata nunacu culácatacano, nupechu i'imagé caja taca'acaño nacú: ‘Macápo'ojeño necá’”, que numacá najló i'imaquí —que Pablo quemacá ne'emacana Félisjlo.

<sup>22</sup> Félis huátari piño ripurá'alo jema'acana apú huacajé. Júpimi que Félis jema'acá Jesucristo yucuna, ra'apiyá jema'ajeño yucuna hua'ató. E caja rimá Páblojlo:

—Lisias, surárana huacára'ajeri huaícha. Riphájica penaje ri'imagé nojló riyucuna richuhaja. Ejéhami numájica pinacu méqueca huala'ajica picá —que rimacá rijló.

<sup>23</sup> Ejomi rimá apú surárana huacára'ajerijlo:

—Re caja jo'ó pi'imá Pablo hua'aphé pají chu. Piyurí rila'acá rihuátaca que. Piyurí caja ajopana, palá rinacu péchuruna, i'ijnacá richaje, na'acáloje rijló nacaje rila'acare camu'ují nacú penaje —que rimacá rijló.

<sup>24</sup> E caja meque cala i'imagémi Félis iphari piño Cesarea ejo riyajalo hua'até. Riyajalo í i'imari Drusila, Judíona ja'alo ru'umacá. E caja rihuá'a Pablo maná piño. Rihuata rijhua'até pura'acano Jesús nacú. Méqueca iná pechu i'imaquí caphí richojé, ri'imagáloje iná i'imatájeri penaje, nacú rihuata rijhua'até pura'acano.

<sup>25</sup> Aú Pablo quemari rijló méqueca Tupana huátaca iná la'acá ajopana palá. Rimá caja rijló rila'acá piyá nacaje ripechu queja huani. Ripura'ó caja rijhua'até eja'ahuá tajnájico nacú. Rimá rijló méqueca Tupana la'ajica palá huani palá la'ajeño. Rimá caja pu'uhuaré la'ajeño, namanaicho la'ajeño nacú méqueca rihuajájica necá. Marí nacú rimacá aú rijló Félis quero'oró. Aú rimá Páblojlo:

—Chuhuata pipa'ó. Re caja jo'ó hue'echú ca'alá i'imagé e nojló, nuhuá'aje piño pimaná.

<sup>26</sup> Félis pechu i'imá: “Apala ra'ajé japi nojló liñeru, nócho'otacaloje ricá penaje.” Ñaquele metú que rihuá'aca rimaná, ripura'acáloje rijhua'até penaje.

<sup>27</sup> Caja ají que iyamá jarechí quekana ja'apaca. Rejomí Félis jácho'oro ne'emacana caja chiyá. Rejo'ocaja Félis yuriri Pablo ina'uqué huajáquelana chu, Judíona pechu i'imagáloje palá rinacu raú penaje. Rapumí chojé Porcio Festo yuriro ne'emacana penaje.

## 25

*Pablo tára'aco Festo jimaje yucuna marí:*

<sup>1</sup> E caja Festo iphari. Caja na'á ri'imaquí ne'emacana penaje. Hueji que cala i'imagémi rácho'o piño pajimila Cesarea eyá, i'ijnari ají que Jerusalén ejo.

<sup>2</sup> Re sacerdoténa huacára'ajeño, ajopana judíona huacára'ajeño, quele arucátaño rijló Pablo, rihuajácaloje ricá penaje.

<sup>3</sup> Nemá rijló:

—Pila'á huajló nacaje. Eco pihuacára'a Pablo ña'acana majó, Jerusalén ejo, hualamá'atachi purá'aloji rijhua'até maare —que nemacá rijló.

Marí que napechu nacú i'imaquí: “Rihuá'acana majó nacú iñe'epú chu huenoje ricá.”

<sup>4</sup> E'iyonaja Festo quemari najló:

—Íle Pablo imá nacú, rejo'ocaja ricá ina'uqué huajáquelana chu Cesarea e. Meque cala i'imagémi nupa'ajó piño rejo.

<sup>5</sup> Ihuacára'ajeño huátajica ee nujhua'até i'ijnacana, palani. Reco ne'emajé nojló pu'uhuaré rila'acare yucuna —que rimacá najló.

—Je —que nemacá rijló.

<sup>6</sup> Festo i'imari Jerusalén e hueji que cuhuá'ata que cájala ca'ajná, iyamá té'ela que cájala ca'ajná ri'imaquí re. Ejomi ripa'ó piño rapumí chuhuá Cesarea ejo. Muní que riyá'ó, rema'acáloje meque napura'acó panacuhuácaca penaje. Rilamá'atacaloje najló purá'aloji penaje. E rihuá'a Pablo maná.

<sup>7</sup> Aú Pablo iphari rejé nanacu. Ejéhami judíona, Jerusalén eyájena, jahuacaco rinacojé. Reje cajú narucátaca rijló ricá. E'iyonaja uncá iná hue'epila raú méqueca nemacá, quehuaca ca'ajná, uncá ca'ajná.

<sup>8</sup> E Pablo pura'aró richayo, rimá najló:

—Uncá na calé nula'á pu'uhuaré. Nula'á judíona puráca'alo lana'aquejami quemacá que. Noma'á caja Romano le'ejé huacára'ajeri huani ja'apiyá. Uncá caja nopichátala Tupana ñacaré ajopana ina'uqué huá'acana aú richojé —que rimacá najló.

<sup>9</sup> Festo huátari judíona pechu i'imacá palá rinacu. Aú rimá Páblojlo:

—¿E pihuátaca Jerusalén ejo i'ijnacana, nulamá'atacaloje ijlo rejo puráca'aloji penaje?

<sup>10</sup> E'iyonaja Pablo quemari rijló:

—Maare nutára'o pijimaje. Roma le'ejé huacára'ajeri picá. Maare palani, pema'acáloje nuyucuna penaje. Caja pihue'epí palá uncá nula'alá chapú judíona.

<sup>11</sup> Nula'aquela nacaje nenócare chona iná, nenojla nucá. Uncá numejñátalajla nocoja naliyá. E'iyonaja uncá quehuaca calé ricá nemacare nunacu. Ñaquele uncá Jerusalén ejo nuhuacára'acana i'imalaje. Nuhuata huahuacára'ajeri huani, Cesar, hua'até pura'acano, rilamá'atacaloje huajló ricá penaje —que Pablo quemacá rijló.

<sup>12</sup> Raú Festo pura'aró ra'apiyatéjena hua'até pamineco. Ejomi rimá Páblojlo:

—Caja pihuata Cesar ejo i'ijnacana. Caja queja ri'imajica pijló chuhua. Rejo pi'ijnajé.

*Pablo tára'aco ne'emacana Agripa jimaje yucuna marí:*

<sup>13</sup> E caja meque cala i'imajemi apú ne'emacana iphari Cesarea ejo riyajalo hua'até. Rií i'imari Agripa. Riyajalo íí i'imari Berenice. Necá i'ijnajóna Festo ajalácaje.

<sup>14</sup> Re ne'emá mequetánaja. E Festo i'imari Pablo yucuna rijló, rimá rijló:

—Re pajluhuaja ina'uqué maare, ina'uqué huajáquelana chu, Félix yurícare richu.

<sup>15</sup> Nu'umacá Jerusalén e huacajé, Sacerdótena huacára'ajeño, peñahuilana, quele quemañónojló, nuhuacára'acaloje rinócana penaje.

<sup>16</sup> Aú numá najló: “Uncá nayurila huajló, huala'acáloje ilé que penaje. Uncá majopeja calé huecá romano naquiyana huajaca ina'uqué. Pamineco huahuata ritára'aco huajimaje, ricá nemacare nacú: “Uncá ina'uquéлари” que. Rarucátajeco hua'até huahuata ritára'aco huajimaje. Ejomi ricá nemacare nacú: “Uncá ina'uquéлари” que pura'aró richayo, huahuajaca piyá ricá majopeja”, que numacá najló i'imacá.

<sup>17</sup> Necá penájenami iphaño nunacu maáreje. Ejomi muní que huahuacó piño rilamá'ataje. E nuhuá'a Pablo maná.

<sup>18</sup> Nupechu i'imá rinacu: “¿Uncá huani ina'uquéлари chi ricá nemá nacú?” E'iyonaja uncá ñaquejaca calé ricá. Majopeja huani napura'acó rinacu.

<sup>19</sup> Nemá rinacu: “Uncá rila'alá huachi'inami chuna puráca'alomi quemacá que”. Jesús nacú napura'ó caja. Nemá rinacu: “Caja ritaca'á”. Eyá Pablo quemari rinacu: “Uncá” que. “Ejo'ocaja ricá”. Marí que napura'acó rinacu.

<sup>20</sup> Aú calé uncá nuhue'epila meque quemacánaca rinacu. Ñaquele numá Páblojlo: “¿E pihuátaca Jerusalén ejo i'ijnacana, nulamá'atacaloje ijlo ricá rejo penaje?”

<sup>21</sup> Aú rimá nojló: “Uncá nuhuátala rejo i'ijnacana. Nuhuata Cesar hua'até pura'acano rinacu”. Aú nuhuacára'a riyurícana re caja jo'ó ina'uqué huajáquelana chu. Apú i'ijnajica hua'até nuhuacára'aje ricá rejo —que Festo quemacá Agrípajlo.

<sup>22</sup> Raú Agripa quemari Féstojlo:

—Nucá caja huátari ripura'acó richayo jema'acana.

—Je, muní pema'ajica ripura'acó —que rimacá rijló.

<sup>23</sup> E caja muní que piño Agripa, Berenice, quele mujlúca'año ucapú chojé. Palá nojé huani na'arumacá hua'até namujlúca'a richojé. Ne'emacánajaca calé a'acare nanacuhúa, ricá i'imari nanacu. Surárana huacára'ajeño, ajopana pajimila eruna chaje i'imacáño, hua'até nephá rejé. E Festo huá'ari Pablo maná rejé.

<sup>24</sup> Raú riphá nanacu. E Festo quemari najló:

—Hue'emacana Agripa, piyuque icá jahuaquíchaño maare huajhua'até, chuhua numájica ijlo pura'acó nacú: Re pajluhuaja ina'uqué huajhua'até maare. Jerusalén e nu'umaqué huacajé, judíona naquiyana arucátaño nojló ricá. Nemá nojló: “Pu'uhuaré la'ajeri huani ricá”. Apú huacajé piño nanaquiyana i'ijnajóna majó, Cesarea ejo. Ñaque caja nemacá piño nojló rinacu. Nahuata nuhuacára'aca rinócana.

<sup>25</sup> E'iyonaja calé uncá paala nojló ilé que rila'acana. Uncá na calé rila'á pu'uhuaré i'imacá, nenócaloje ricá penaje. Rimá nojló i'imacá, nuhuacára'acaloje ricá huachaje huani huacára'ajeri ejo, rema'acáloje ripuráca'alo penaje. Aú calé nuhuata rihuacára'acana rejo.

<sup>26</sup> E'iyonaja uncá nuhue'epila na aú ca rila'á pu'uhuaré i'imacá, nulana'acáloje riyucuna pamera chojé huachaje huani huacára'ajerijlo penaje. Ricá penaje nuhuá'icha rimaná, ritára'acaloje ijimaje maare penaje. Hue'emacana, Agripa, pijimaje ritára'ajo pamineco, piquejá'acaloje riliyá riyucuna penaje. Ejomi ca'ajná nuhue'epeje méqueca nulana'ajica Césarjlo rinacóje.

<sup>27</sup> Uncá huani paala nojló rihuacára'acana rejo, uncaja que rinacu quemacana i'imá na aú ca rila'á pu'uhuaré.

## 26

*Pablo pura'acó richayo Agripa hua'até yucuna marí:*

<sup>1</sup> Raú Agripa quemari Páblojlo:

— Chuhuata pipura'ó pichayo, noma'áchi.

Aú Pablo jácho'otari ra'anapítá. E riqueño'ó richayo pura'acano. Rimá marí que rijló, ajopánajlo hua'até:

<sup>2</sup> —Pu'ují nupechu me'etení, hue'emacana Agripa, maare nu'umacale pijimaje. Caja judíona naquiyana arucátaño nucá cajrú huani hue'emacánajlo. Ñaquele maare nucá, nupura'acóloje nuchayo penaje.

<sup>3</sup> Pu'ují caja nupechu, pihue'epícale palá judíona puráca'alo nacojé. Raú pihue'epí na nacuca huecá judíona pura'acó pajhua'atéchaca. Pihue'epícare caja na jimájeca huaca'ácaco pajhua'atéchaca. Ñaquele pila'á nojló nacaje, pema'á nupuráca'alo a'ajná nutajátajica ricá ejená.

*Pablo quemacá rinacuhuá meque rila'ajica uncá chiyó rema'á Jesucristo ja'apiyá yucuna marí:*

<sup>4</sup> Piyuque judíona hue'epiño méqueca nula'ajica nute'eré ehuá, Jerusalén ehuá hua'ató. Namá nucá yuhuají nu'umaqué huacajé eyá maárejecha.

<sup>5</sup> Nahuátaquela nuyucuna i'imacana, ne'emajla ijlo nuyucuna. Nahue'epí fariséona naquiyánaca nucá. Nuqueño'o' nanaquiyana i'imacana hualijímaca nu'umaqué huacajé. Fariséona a'año nanacojó palá peñahuilánami chuna puráca'alomi. Ricá aú nachá'ata ajopana judíona.

<sup>6</sup> Nemá nunacu: “Uncá rema'alá jupichumi yucu ja'apiyá”. E'iyonaja uncá ñaque calé nucá. Caphí nupechu Tupana puráca'alo lana'aquejami chojé, aú calé nuhue'epí rimacápo'otajica piño ina'uqué caja taca'acaño. Nuhue'epí caja queja ri'imajica, Tupana quemacá hua'ajútayami chúnajlo i'imacá que. Rimá najló marí que i'imacá: “Numacápo'otaje piño ina'uqué caja taca'acaño”. Marí que ri'imacale nupechu nacú nemá nunacu: “Pu'uhuaré la'ajeri ricá” que. Ñaquele nutára'o pijimaje me'etení, piquejá'acaloje nuliya riyucuna penaje.

<sup>7</sup> Iyamá iphata ji'imaji nacojé quele hua'ajútayami chuna i'imajica. Nalaquénami huecá, Israelmi chu laquénami huecá piyuque. Tupana macápo'otajeri caja taca'acaño. Hua'ajútayami chúnajlo Tupana i'imari riyucuna i'imacá. Richuhujajena huecá riyucuna a'acana huanacojó. Ñaquele huapechu Tupana nacú hue'echú ca'alá queja lapí hua'ató. Ñaque caja nupechu. Tupana puráca'alo lana'aquejami quemari caja taca'acaño nacú: “Tupana macápo'otajeri necá” que. Aú nuhue'epí ñaque rila'ajica. Hue'emacana, Agripa, marí que nupechu i'imacá chona, judíona naquiyana quemano nunacu: “Pu'uhuaré la'ajeri ricá” que.

<sup>8</sup> ¿Naje ipechu i'imá: “Uncá meño'ojó calé Tupana macápo'otarijla caja taca'acaño?” —que rimacá najló i'imacá.

*Pablo quemacá rinacuhuá méqueca rila'ajica chapú Jesucristo ja'apiyá jema'ajeño yucuna marí:*

<sup>9</sup> Pablo quemari piño najló:

—Júpimi nula'aque chapú Jesucristo ja'apiyá jema'ajeño. Jesús, Nazaret eyáemi numá nacú. Nula'aque ra'apiyá jema'ajeño chapú, nupechu i'imajícale: “Marí que nala'acana palánija”.

<sup>10</sup> Chapú nula'ajica necá Jerusalén ehuá. Nupura'acó sacerdotena huacára'ajeño hua'até, nuca'acáloje necá ina'uqué huajáquelana chojé napuráca'alo aú penaje. Nemaqué: “Je” que. Aú nuca'aque cajrú Jesucristo ja'apiyá jema'ajeño richojé. Nenoque caja ne'iyajena, palani nojló ilé que nala'acana i'imacá.

<sup>11</sup> Pulapé nula'acá chapú ne'emacá, nayurícaloje naliyó Jesucristo ja'apiyá jema'acana raú penaje. Marí que nula'ajica huahuacáca'alo ñacarelana chu. Yuri huani nu'umajica najhua'até; nupinátaque necá ajopana te'eré ejo hua'ató. Rehuá nu'ujnaqué naculaje apú pajmíla nacojé, apú pajmíla nacojé que, nula'acáloje necá chapú penaje.

*Pablo quemacá piño rinacuhuá méqueca Tupana apiyáca rípechu yucuna marí:*

<sup>12</sup> Ricá penaje nu'ujná Damasco ejo i'imacá. Sacerdotena huacára'ajeño puráca'alo aú nu'ujná rejo.

<sup>13</sup> E hua'apá ají que a'ajná ño'ojó. Iñe'epú chu caápu'ucu i'imari huachá. Ejéchami cajrú huani camareji patacá nunacojé je'echú chiyá. Camú camaré chaje ricamaré patacá nunacojé. Nujhuáque'ena nacojé hua'ató ricamaré ja'aró.

<sup>14</sup> Raú piyuque huecá cojno'oño te'erí e'iyajé. Eja noma'á puráca'aloji quemacá nojló huapura'acó chu, hebreo pura'acó chu: "Saulo, ¿naje pila'á nucá chapú? Jema piracana la'arí ricó chapú, rica'acachu ri'imá a'ahuaná lupucuje rimirín cápeje. Ñaque caja pila'acá picó chapú".

<sup>15</sup> Raú numá rijló: "¿Na chi picá quele quemari nojló ilé que?" "Jesús nucá quemari pijló: Nucá pila'á chapú.

<sup>16</sup> Chuhua pácho'o", que rimacá nojló. "Caja nuya'achiyo pijló. Caja no'ochá picá nu-jhua'até sápaeri penaje. Ajopánajlomú camaré chaje ricamaré p, ajopánajlo que pi'imajica nuyucuna. Méqueca pamíchaca nucá me'etení yucuna pi'imajé najló. Marí pumí chiyó nuya'atajo piño pijló. Ñaque caja pi'imajica piño najló riyucuna.

<sup>17</sup> Nu'umataje picá judíona liyá, ajopana ina'uqué liyá hua'ató, nenoca piyá picá. Uncá judíona calé i'imacáñojlo pi'imajé nuyucuna, nahue'epicaloje nucá raú penaje.

<sup>18</sup> Mapéchuruna queja necá me'etení, uncale noma'alá nuyucuna. Pi'imajé nuyucuna najló, nácho'ocoloje pu'uhuaré la'acana chiyá raú penaje, palá la'acaño ne'emacáloje reyá a'ajná ño'ojó penaje. Caja Jiñá Chi'ináricana capi necá me'etení. Ne'emacáloje Tupana ja'apiyá jema'ajeño penaje pi'imajé najló nuyucuna. Pi'imajé najló nuyucuna, napechu i'imacáloje nochojé caphí penaje. Raú Tupana amájero nachaje pu'uhuaré nala'acare liyá, ne'emacáloje Tupana le'ejena ina'uqué naquiyaana raú penaje. Caphí nochojé péchuruna i'imajeño ajopana ríle'ejena ina'uqué hua'até. Rica'acarena naquiya pu'uhuaré nala'acare hua'até ne'emajé. Marí que ri'imacáloje penaje pi'imajé najló nuyucuna", que Jesucristo quemacá nojló i'imacá —que Pablo i'imacá najló riyucuna.

*Pablo jema'acá Jesucristo puráca'alo ja'apiyá yucuna marí:*

<sup>19</sup> Rimá piño Agrípajlo:

—Hue'emacana, Agripa, caja nula'á Jesucristo quemacá nojló que. Riya'ataco nojló je'echú chiyá huacajé, rimacá nojló que nula'acá.

<sup>20</sup> Ñaquele nuqueño'ó Tupana puráca'alo yucuna i'imacana ina'unquejlo. Dasmasco erúnajlo nu'umá riyucuna pamineco. Nu'umá riyucuna najló, napajno'otácaloje napéchuhua pu'uhuaré nala'acare liyá raú penaje. Nala'acáloje caja Tupana huátaca que raú penaje. Palá nala'acare aú ajopana ina'uqué hue'epiño Tupana apiyáca napechu. Marí caje penaje nu'umá riyucuna najló. Ñaque caja nu'umajica riyucuna Jerusalén erúnajlo, Judea te'eré ehuájenajlo, uncá judíona calé naquiyanajlo, cajénajlo nu'umaqué riyucuna.

<sup>21</sup> Riyucuna i'imacana nacuja nu'ujná. Marí caje pachá napatá nu'umacá Tupana ñacaré chu. Rejeja nahuata nonócana.

<sup>22</sup> E'iyonaja Tupana a'arí nuñaté, aú calé maárejecha nu'umacá riyucuna piyuque ina'unquejlo. Nahuacára'ajeñojlo, camu'ují la'acañojlo hua'ató nu'umá riyucuna. Tupana huacára'ari Moisesmi chu lana'acá papera chojé nacaje i'imajicare yucuna. Ñaqueja caja rihuacára'ajica Tupana puráca'alo ja'apátajeñomi chuna lana'acá riyucuna papera chojé. Tupana puráca'alo, nalana'acare papera chojé i'imacá, chuhuaja caja no'opata riyucuna ina'unquejlo.

<sup>23</sup> Marí que nemájica rinacu: "Tupana huacára'ajeri majó apú, ina'uqué i'imatájeri penaje ri'imajica. Rijña'ajé chapú caje panacu. Nenoje ricá. Ritaca'ajica ejomi rimacápo'oyo piño. Ajopana caja taca'acaño tucumá rimacápo'oyo. Raú judíona, ajopana hua'até hue'epéjeño Tupana i'imatájica ra'apiyá jema'ajeño ñaque caja capichácajo liyá", que ne'emajica riyucuna i'imajica. Riyucúnaja caja no'opata cajrú ina'unquejlo —que Pablo quemacá najló.

*Pablo ca'átaca Agripa e'iyajé, rema'acáloje Jesucristo ja'apiyá penaje yucuna marí:*

<sup>24</sup> Marí que Pablo pura'acó richayo. E'iyohuá que Festo quemacá Páblojlo jahuiyo'oqueja:

—Pablo, caja pehuíji'icho, jehuíñami pipechu, pamácale cajrú papera —que rimacá rijló.

<sup>25</sup> Pablo quemari rijló:

—Hue'emacana, Festo, uncá jehuíñami calé nupechu. Ile numíchaje nacú quehuaca ricá.

<sup>26</sup> Maare huajhua'até hue'emacana Agripa. Ricá hue'epiri palá riyucuna. Ñaquele uncá nohuó la'aló riyucuna i'imacana ja'apí; nuhue'epí rema'acá piyuque numíchaje nacú. Uncá caja me'echuje calé rijló ricá.

<sup>27</sup> E rimá Agrípajlo:

—¿E quehuaca pijló ricá Tupana puráca'alo ja'apátajeñomi chuna quemacare nacú i'imacá? Nuhue'epi quehuácaca pijló ricá —que Pablo quemacá rijló.

<sup>28</sup> Aú Agripa quemari rijló:

—¿E chi pipechu nunacu noma'ajica Jesucristo ja'apiyá huejápaja pimíchaje nojló aú?

<sup>29</sup> Pablo quemari piño rijló:

—Palani ri'imacajla nojló, pema'aquela Jesucristo ja'apiyá, riyucuna i'imacana pijló, huejapa puráca'aloji aú ca'ajná, íqui'ini puráca'aloji aú ca'ajná. Palani caja ri'imacajla nojló piyuque mariruna ina'uqué jema'aquela caja ra'apiyá. Nuhuata jema'acá ra'apiyá noma'acá ra'apiyá que caja. Mari curete, nepo'ocare aú nucá, ricaja calé uncá nuhuátala i'imacá ijló ñaque —que Pablo quemacá najló.

<sup>30</sup> Mari que Pablo quemacá najló aú ne'emacana jácho'oro tára'ajo. Ajopana rijhua'até i'imacaño jácho'oño caja tára'ajo. Ra'apiyá huacára'ajeri, Berenice quele, ne'emacana ahua'á yá'acaño, quele jácho'oño caja rijhua'até.

<sup>31</sup> Nácho'o pají chiyá. E napura'ó pajhua'atéchaca rinacu, nemá pajlocaca:

—Uncá ilé ina'uqué la'alá pu'uhuaré, nenócaloje ricá penaje. Uncá caja na rila'alá, ri'imacáloje ina'uqué huajáquelana chu penaje.

<sup>32</sup> E caja Agripa quemari Féstojlo:

—Huácho'otajla ricá ina'uqué huajáquelana chiyá, uncáquela rimalajla pijló, pihuacára'acaloje ricá huachaje huacára'ajeri ejo penaje. Rihuata richayo pura'acano rijhua'até. Uncáquela ri'imalajla pijló mari que, huácho'otajla ricá —que rimacá rijló.

## 27

*Nahuacára'aca Pablo Roma ejo yucuna marí:*

<sup>1</sup> E caja nemá:

—Chuhua huahuacára'ajica ricá Italia te'eré ejo.

Nucá, Lucas, i'ijnari caja Pablo hua'até. Nahuacára'a pajluhuaja surárana huacára'ajeri amaca Pablo, ajopana nahuajácarena hua'até. Ríi i'imari Julio. Rijhua'atéjena surárana íi i'imari Augusto.

<sup>2</sup> Pajimila Adramitio e huahuítuca'a huapuru chojé i'imacá. Caja nahuata reyá jácho'ocano. Reyaje huapuru i'imacá, chojé huahuitúca'a. E hue'ejná ají que Asia te'eré loco'opani apú pajimila ahua'ayá, apú pajimila ahua'ayá, que hue'ejnacá. Apú i'imari huajhuáque ehue, ríi i'imari Aristarco. Pajimila Tesalónica eyaje ri'imacá. Macedonia te'eré nacú Tesalónica. Ricá i'ijnari caja huajhua'até.

<sup>3</sup> Muni que surárana huacára'ajeri íphátari piño apa'acú huapuru. Pajimila Alejandría eyáje ri'imacá. Italia te'eré ejo ri'ijná. Aú surárana huacára'ajeri quemari huajló nacaje.

<sup>4</sup> E hua'apá piño Sidón eyá huapuru chu. Carená apho'orí huajimá chojé, ñaquele hua'apá paranácuhua Chipre nacojé ca'añá chojé pumitá. Ají que huejapa carená i'imacá. Carenaja calé aco'ótari huapuru a'arumacaji chojé apho'ocana aú.

<sup>5</sup> E huamata'á ají que a'ajná ño'ojó. Ja'apaño Cilicia te'eré loco'opániya, Panfilia te'eré loco'opániya hua'ató hua'apá. E huephá pajimila Mira ejé. Licia te'eré nacú ricá pajimila.

<sup>6</sup> Re surárana huacára'ajeri íphátari piño apa'acú huapuru. Pajimila Alejandría eyáje ri'imacá. Italia te'eré ejo ri'ijná. Aú surárana huacára'ajeri quemari huajló:

—Ihuitúca'a richojé.

Aú huahuitúca'a richojé, huácho'o piño reyá.

<sup>7</sup> Cachúhuaja hua'apaca meque cala. Hualaca'apheja huephaca Gnido pajimila ahua'ajé. Re caja jo'ó carená apho'orí huajimá chojé. Aú hua'apá ají que cahuacajo, Creta te'eré loco'opániya hua'apá. E huephá pajimila Salmón ejé, riturenó hua'apá. Re huejapa carená apho'ocá.

<sup>8</sup> Hualaca'apheja hua'apaca juni turenó. E caja ehujá huarúca'o punumaje chojé, Buenos Puertos ríi. Pajimila Lasea ahua'á ricá.

<sup>9</sup> Júpija huani hue'emacá ja'apácaje nacuja. Caja riphá rená chojé, carená i'imacáloje caphí penaje. Hua'até que yahuijá íphaca. Cajrupi huani ricá juni jalomi acuhá ja'apácana yahuijá e'iyá. Ñaque i'imacale Pablo quemari najló:

<sup>10</sup> —Uncá huani paala ricá me'etení juni jalomi chuhá ja'apácana, cajrupi huani ricá. Huapuru capichájero, piyuque nacaje richu i'imacare hua'ató. Eyá huecá hua'ató capichájeño ca'ajná rijhua'até —que rimacá najló.

<sup>11</sup> E'iyonaja uncá surárana huacára'ajeri jema'alá Pablo ja'apiyá. Huapuru minaricana, riyacuma i'imajeri, queleja ja'apiyá rema'á.

<sup>12</sup> Apú caje huani re i'imacá punumaje, nacutácaloje huapuru re yahuijá quetana penaje. Ñaquele ajopana pechu nacú ri'imá: “Palani huácho'ocojla maare eyá. Apala huephajla ca'ajná Fenice ejo,” que napechu i'imacá. Pajimila íi Fenice. Paranácuhua Creta nacú Fenice. Reju uncá carená ejo'olá caphí huani eja'ahuá huilaphe ejo pajimila e'iyajé. Re nahuata yahuijá ja'apátacana.

*Juni jalomi chuhá ne'emanaja carená noca necá caphí huani yucuna marí:*

<sup>13</sup> Ehuá carená queño'ocá apho'ocaje huejápaja. Eja'ahuá huilaphe ejo rapho'ó. Aú napechu i'imá: "Chuhuaca ca'ajná palani, huácho'ocoloje penaje." Raú huácho'o, hua'apá ají que Creta te'eré ahua'ayá.

<sup>14</sup> Hua'apánachami Creta te'eré ejéchami carená noca huecá caphí huani.

<sup>15</sup> E caphí huani carená apho'ocá huajimaje. Raú uncá meño'ojó huapuru ja'apala ritucumajo carená e'iyajé. Aú huapajno'ó huayámojo. Eyá carená aco'ótari huecá majopeja.

<sup>16</sup> Ají que hua'apaca paranácuha camu'ujuni ahua'ayá, Cauda ríi i'imacá. Rejé carená huara'aró huachá huejápaja, hua'apácalle rihuajlé chojó pumitá. E hualaca'apheja huachíra'aca jita huapuru chojé, huapuru nacú ri'imá jepo'oqueja.

<sup>17</sup> Ejomi nepo'otá huapuru tupajuma aú riyupa'acó piyá. Napechu i'imá: "Apala huapuru ja'ajico que'epé nacú." Sirte que'epé íi i'imacá. Aú quero'ocajo nacuja ne'emá richu. Raú nahuitúca'ata a'arumacaji yenuya, carená apho'ocare chojé ra'apátajona penaje. Nahuitúca'ataca a'arumacaji ejomi carená aco'ótaca huecá majopeja.

<sup>18</sup> Muni que caphini jo'ó carená i'imacá. Raú naca'á le'ejepelaji junápeje, maramarani huapuru la'acóloje raú penaje.

<sup>19</sup> Muni que piño huaca'á piño huapuru chiyá rinane.

<sup>20</sup> Júpija uncá huamala camú, ihuájina caje. Huapechu i'imá: "¿Chuhua chi huacapichájico piyuqueja? Uncá meño'ojó hue'emalajo richiyá, caphí huani carená japho'ocale."

<sup>21</sup> Caja júpija uncá huajñala hua'ajnehuá i'imacá. E caja ehuaja Pablo tára'aro ne'iyá, rimá najló:

—Jema'aquela no'opiyá hue'emacá Creta te'eré e huacajé, palani huecajla me'etení. Huayuríquelo re, uncá piyuque nacaje capichátalajla. Uncá caja huamálajla chapú caje yajhué me'etení.

<sup>22</sup> E'iyonaja chuhuata ila'á caphí ipéchuha. Uncá na calé capichájero hue'iyayá, huapúruja calé capichájero.

<sup>23</sup> Lapi pajluhuaja Tupana hua'atéjeri ya'achíyaro nojló i'imichaca. Nuhucára'ajeri, Tupana, huacári'ichari ricá je'echú chiyá nuchaje. Pu'ují nupechu i'imacare nacú ricá, Tupana. Rile'ejena ina'uqué naquiyana nucá.

<sup>24</sup> Rijhua'atéjeri quemíchari nojló: "Piquero'oniyo, Pablo. Piphaje nachaje huani huacára'ajeri ejo. Caja queja Tupana huátaca pijló ricá. Ñaquele Tupana amájeri picá, huapuru chu i'imacaño hua'até, icapichaco piyá", que Tupana hua'atéjeri quemíchari nojló.

<sup>25</sup> Ñaquele numacá ijlo: Ila'á chuhua caphí ipéchuha. Caphí nupechu Tupana chojé. Aú nuhue'epí ri'imajica Tupana hua'atéjeri quemíchari nojló que.

<sup>26</sup> Carená aco'ótajeri huecá ají que paranácuha ejo, pe'iyó juni jalomi chu ricá —que Pablo quemacá najló.

<sup>27</sup> Iyamá sápacaje quetana ja'apari huachá i'imacá. Ejomi lapí huephá Adriático chojé. Apú juni jalomi íi Adriático. Pajnú, pajnú que huani carená pajno'otaca huapuru. Lapi jenaji que huapuru chiyá sápageño quemano pajlocaca:

—Ají ño'ojó te'erí.

<sup>28</sup> E najña'á juni jalomi iphuta jená. Treinta y seis metros quetana juniphuca ri'imacá. E na'apá piño natucumajo huejápaja. Reyá najña'á rená piño. Veintisiete metros quetana ri'imacá iléreya.

<sup>29</sup> Quero'ocajo nacuja ne'emá, napechu i'imá: "Apala hua'ajó jipa nacú caphí huani. Raú ca'ajná huapuru majáca'ajero," que napechu i'imacá. Ñaquele naca'á huapuru jí'ipala chiyá cachini pejru'uhuá tupajuma aú jepo'ocanami, huapuru ja'apaca piyá. Pa'u quele pejru'uhuá naca'á junápeje. Me'etájenami ne'emacá lapí quetana.

<sup>30</sup> Ehuá huapuru chu sápageño huátaca jita huitúca'atacana junápeje. Me'echú nala'acá ricá ajopana amaca piyá ricá, neñaacóloje richu penaje. E majopeja nala'acá pejru'uhuá nahuitúca'ataca ritacú chiyá jenami.

<sup>31</sup> E'iyonaja Pablo arucátari necá surárana huacára'ajerijlo. Rimá rijló, rila'ejena suráranajlo hua'até:

—Uncaja que nayuró huajhua'até huapuru chu, uncá meño'ojó hue'emalajo —que rimacá najló.

<sup>32</sup> Raú surárana i'ijnaño ne'iyajé tupajuma mata'ajé jita nepo'ocare aú. E namata'á ricá, tapujlú que ra'acó junápeje.

<sup>33</sup> Huajé jareni jácho'oco ee, Pablo quemari najló:

—Chuhua ajña'á ajnehuá. Caja iyamá sápacaje quetánicha uncá ajñala a'ajnehuá palá. Uncá caja icamátalo palá.

<sup>34</sup> Ajña'á ajnehuá, ipechu iphachi raú, i'ihuapacáloje penaje, i'imacóloje raú penaje. Uncá na calé capichájero huanaquiyana, uncá na ñani calé ila'ajico —que rimacá najló.

<sup>35</sup> Marí que Pablo quemacá ejomi rijña'á pan ricápojo. E rimá Tupánajlo:



—Palá pila'acá huecá marí pan aú —que rimacá Tupánajlo najimaje piyuque.

E ritupa'á huejapa rinaquiyana. Ejomi riqueño'ó rajñacana.

<sup>36</sup> Marí cajé aú nala'á caphí napéchuhua. Ñaqueé caja naqueño'ocá na'ajnehuá ajñacana rijhua'até.

<sup>37</sup> Piyuque huecá, huapuru chu i'imacaño, i'imaño doscientos setenta y seis.

<sup>38</sup> Najñá na'ajnehuá nahuátaca que ejé. Ejomi naca'á trigo junápeje, na'ajné penaje ri'imacá. Maramarani quemachi huapuru la'acóloje raú penaje naca'á ri'imacá.

*Huapuru ja'acó junápeje yucuna marí:*

<sup>39</sup> E muní que huajme'etaca piño. Uncá huapuru chiyá sápañeño hue'epílaño merejéchaca hue'emacá. Uncá caja nahue'epila na te'ereca amaco huatucumá. Namá juni jalomi tujré a'ajnare queja, que'epé i'imari riturená. Marí que ramaco jucaya. Ñaquele nahuata rejé arúca'acano atá'acana.

<sup>40</sup> Namata'á tupajuma nepo'ocare aú pejru'uhua i'imacá. Rejeja juniphú chu pejru'uhua yuriro. Ejomi nacaráca'a hue'echí caje, ritehuiyo'ojona penaje ri'imacá. E nácho'ota a'arumacaji ritucumá i'imacare, carená ja'apátacaloje huapuru huatucumajo raú penaje. Raráca'acoloje ají que richipúca'ala churí que'epé nacojé penaje.

<sup>41</sup> E huapuru ja'apari ají que ta'agueni ihuami chiyá. Raú ri'ijnatá huapuru ají que cajruni que'epé nacojé ritacú aú. Ejéchami riyocola ña'acá caphí huani ri'ípala nacojé, majáca'atano ri'ípala.

<sup>42</sup> Marí caje aú surárana huátáño nahuajácarena nótacana, neñaacó piyá i'ihuapaqueja.

<sup>43</sup> E'iyonaja nahuacára'ajeri huátari Pablo i'imatácana. Aú calé uncá riyurila nenoca necá. Rihuacára'a palá hue'epícaño i'ihuapacaje jeño'ocá junápeje pamineco, nephácaloje riturenaje pamineco penaje.

<sup>44</sup> Eyá ajopana, uncá hue'epílaño i'ihuapacaje, rihuacára'a patacá huapuru jítami nacojé, na'acó piyá junápeje. Marí que la'acana aú huephaca piyuqueja riturenaje. Aú hue'emaó piyuqueja i'imacá.

## 28

*Malta e Pablo i'imacá yucuna marí:*

<sup>1</sup> Caja hue'emaó piyuqueja. Re i'imacaño quemáño huajló:

—Marí paranácuhaa í Malta.

<sup>2</sup> Ina'uqué, re i'imacaño, la'año palá huecá. Juni japi hue'emá. Aú huataca'á ipe'ení nacú. Aú napho'otá huajló, hua'anapacáloje ri'ilá penaje.

<sup>3</sup> E'iyohuá que Pablo iphaca macajreni siyá ña'ajemi. Rica'á ricá quera'atani chojé, hua'ató que jei jeño'ocá re'iyayá quera'atani chiyá majó. Ajma'arí Pablo riyáte'ela huajlé naquiyá. Rajma'acá ricá ejeja racúhua'o rinacu.

<sup>4</sup> Paranácuhaa eruna amaño jei acúhua'aco Pablo yáte'ela nacú. Aú nemá pajlocaca:

—Apala ina'uqué nójeri penájemi ca'ajná quele ina'uqué. Caja ri'imichó juni jalomi liyá. E'iyonaja chuhuata pu'uhuaré rila'acare loco'opani ramájica capichácajo yajhué —que nemacá rinacu.

<sup>5</sup> E Pablo huicha'arí ricá riyáte'ela naquiyá huichá quera'atani chojé. Uncá meque rila'alá Pablo.

<sup>6</sup> Piyuque, re i'imacaño, huátáño mequetana. Napechu i'imá rinacu: “Cajrú renátajica ca'ajná ricá, matámiru ca'ajná ricojno'ojica.”

E'iyonaja namá uncá méqueca rila'alá ricá. Aú napechu apiyácaro rinacu, nemá rinacu:

—Chí'ináricanaji ca'ajná quele ina'uqué.

<sup>7</sup> Eyá hua'anapacá ahua'á ne'emacana mená i'imá. Ne'emacana í i'imari Publio. Palá rila'acá huecá. Rijhua'até hue'emá hueji que cala.

<sup>8</sup> Publio jara'apá i'imari ritami, acóca'alaji jehué relo'ocó. Raú Pablo i'ijnari richaje. Ripura'ó Tupana hua'até rinacu. Ejomi rito'otá riyáte'ela rinacojé. Raú ritejmo'otó.

<sup>9</sup> Raú ajopana natámina, paranácuhaa eruna, i'ijnaño Pablo amaje. Ñaqueé caja ritejmo'ótaca necá.

<sup>10</sup> Ina'uqué, re i'imacaño, a'año huajló cajrú nacaje majopeja. Huácho'oco reyá huacajé, na'á huajló piyuque nacaje huala'acare nacú camu'ují, hua'apácaloje palá ra'ajnecanami penaje.

*Pablo iphaca Roma ejo yucuna marí:*

<sup>11</sup> Hueji queta queri quetana hue'emacá paranácuhaa nacú. Ejomi huácho'o. Hue'ejná piño apa'acú huapuru chu. Nacutá ri'imacá yahuijá quetana re. Alejandría eyaje huapuru i'imacá. Ajopana i'imaño najló nachí'ináricana que. Pajluhuaja í i'imari Cástor, apú í i'imari Pólus. Nenami pato'oró huapuru nacú iyamajótano.

<sup>12</sup> Richu hue'ejná ají que a'ajná ño'ojó, iphaño punumaje chojé, pajimila Siracusa ejé. Rejé huephá. Re hue'emá hueji que cala.

<sup>13</sup> Reyá huácho'o piño, hue'ejná ají que juni tureno. Iphaño pajimila Regio ejé. Muní que carená apho'ocá rihuilaphe ejo. E hua'apá piño. Apacala que huephaca pajimila Puteoli ejo.

<sup>14</sup> Re huephata huañaquiya, Jesucristo ja'apiyá jema'ajeño naquiya. Nemá huajló huayurícoloje najhua'até pajluhuaja sápacaje quetana penaje. Reyá i'imajemi hue'ejná pe'iyóohua ají que Roma ejo.

<sup>15</sup> Jesucristo ja'apiyá jema'ajeño, Roma eruna, jema'año huephaca yucuna. Aú ne'ejná iñe'epú chuhua ya'ajnao majó huajimajo. Foro de Apio pajimila í. Re huaqueño'ó ne'iyajena hua'até iphácacano. Reyá hua'apá piño apú pajimila e'iyajé. Tres Tabernas apú pajimila í. Re huephácaco piño ajopana hua'até. Pablo amale aú necá rimá Tupánajlo:

—Palá pili'ichaca huecá, mariruna ina'uqué i'ijichácale majó nomaje.

Marí que rimacá Tupánajlo, caphí ripechu la'acole namácana aú.

<sup>16</sup> E caja ehuaja huephá Roma ejo. Re surárana huacára'ajeri ja'apátari apujlo necá, nahua'acarena rejo, nahuajácaloje necá penaje. Nahua'aphena huacára'ajeri ri'imacá, rijló ra'á ne'emacá. Pábloja calé ra'apata apojó. Riyurí pajluhuaja surara rihua'aphé penaje.

*Pablo i'imacá Tupana yucuna Roma e yucuna marí:*

<sup>17</sup> Caja hueji que cala quetana Pablo i'imacá Roma e. E rihua'a judíona huacára'ajeño maná. Roma e nañacaré i'imacá. Caja rihua'a namaná, aú nahuacó rejé. E rimá najló:

—Nojena, uncá nula'alá chapú judíona. Uncá caja nula'alá apojó huachí'inami chu puráca'alomí liyá. E'iyonaja calé Jerusalén e nu'umacá huacajé, najña'á nucá, naca'acáloje nucá ina'uqué huajáquelana chojé penaje. Re na'á nucá Romano naquiyanajlo.

<sup>18</sup> Naquejá'a nuliyá riyucuna, nahue'epícaloje na aú ca nula'acá pu'uhuaré penaje. Uncá nephátala na pachaca nahuátaca nonócana i'imacá. Marí cajé aú nahuata nócho'otacana.

<sup>19</sup> E'iyonaja judíona naquiya, rehuá i'imacaño, uncá huátalaño nócho'otacana. Ñaquele numá najló, nahuacára'acaloje nucá majó penaje, nupura'acóloje huachaje huacára'ajeri hua'até penaje. Uncá nu'ujnalá majó, norucátacaloje rijló necá penaje.

<sup>20</sup> Nuhua'icha imaná majó, nomácaloje icá penaje, nupura'acóloje ijhua'até penaje. Huecá judíona piyuque huátaño ricá, Tupana huacára'acare majó ina'uqué i'imatájeri penaje. Nucá i'imari riyucuna ajopánajlo, ajopánajlo que. Rijimaje naca'á nucá ina'uqué huajáquelana chojé. Ñaquele amá nucá jepo'oqueja curete aú no'onapítá naquiya —que rimacá najló.

<sup>21</sup> E nemá Páblojlo:

—Uncá nahuacára'ala huajló papera pinacojé Judea te'eré eyá. Ajopana judíona iphaño caja majó reyá, uncá caja naca'alá pimaná huajló.

<sup>22</sup> Uncá huani napura'aló palá pipechu que péchuruna nacú. Piyuque ina'uqué, ajopana, ajopana que pura'año inacu pu'uhuaré. Ñaquele chuhua pi'imá huajló riyucuna méqueca pipechu nacú ricá nemacare nacú, huahue'epichí raú ricá —que nemacá rijló.

<sup>23</sup> Raú na'á rená, nahuacácoloje rihuacajé rejé penaje. E caja riphá rená chojé. Rihuacajé cajrú judíona jahuacaco Pablo i'imacare chojé. Lapiyami nephá rejo. Eyá ri'imá najló Tupana yucuna lainchu ejená. Méqueca iná la'acá, iná i'imacáloje Tupana hua'ateje penaje yucuna ri'imá najló. Tupana puráca'alo Moisesmi chu lana'acare, Tupana puráca'alo ja'apátajeñomi chuna lana'acare hua'ató nacú rimá najló. Raú rica'áta ne'iyajé, nema'acáloje Jesucristo ja'apiyá penaje.

<sup>24</sup> Palánija ne'iyajénajlo Pablo puráca'alo i'imacá. Raú napechu i'imá caphí Jesucristo chojé, ri'imacáloje Ne'ematajeri penaje. Eyá ajopana uncá jema'alaño ra'apiyá.

<sup>25</sup> Rijimaje uncá rejenohuaja cale napechu i'imacá rinacu. Napa'acó yámona Pablo quemari najló marí que:

—Palá huani Tupana Pechu quemacá Isaiásmi chujlo i'imacá, ra'apátacaloje ricá hua'ajútayami chúnajlo penaje. Marí que rilana'acare papera chojé riyucuna i'imacá:

<sup>26</sup> Marí que Tupana quemacá nojló:

Pi'ijná, pi'imachi riyucuna ina'uquejlo.

Marí que pimacá nanacu: Jema'ajé riyucuna. E'iyonaja uncá ihue'epílaje meque quemacánaca ricá.

Amaje caja ricá. E'iyonaja uncá ihue'epílaje naca ricá.

<sup>27</sup> Ijnúcha'ajo huani Tupana ja'apiyá jema'acana nacú.

Uncá jema'alaje ra'apiyá.

Uncá caja a'alaje inacojó ripuráca'alo.

Uncá caja ihue'epílaje méqueca ricá.

Uncá caja ipajno'otálaje ipéchuhua pu'uhuaré ila'acare liyá.

Ñaquele uncá Tupana amálajo ichaje pu'uhuaré ila'acare liyá,

que Tupana quemacá Isaíasmi chujlo i'imacá, ra'apátacaloje riyucuna najló penaje.

<sup>28</sup> Pablo quemari piño najló:

—Jema'á marí. Tupana i'imatari caja ajopana ina'uqué capichácajo liyá, uncá judíona calé necá. Necá jema'ajeño ra'apiyá —que rimacá najló.

<sup>29</sup> Marí que Pablo quemacá aú judíona naquiyana pa'año. Cajrú naca'ácaco rijimaje pajhua'atéchaca.

<sup>30</sup> Iyamá jarechí quietana Pablo i'imacá Roma e. Re riyuró pajluhuaaja pají miná ñacaré chu. Ra'á rijló rihuemí, riyurícoloje richu penaje. Reje ina'uqué i'ijnaqueño richaje. Palá ripechu i'imajica richaje i'ijnajícaño nacú.

<sup>31</sup> Tupana i'imatari ina'uqué capichácajo liyá, ne'emacáloje rijhua'atéjena raú penaje. Rinacu Pablo pura'acó najhua'até rihuátajica que. Rehuíña'ataque ina'uqué Jesucristo nacú. Uncá na calé jahuíyo'oqueri rijló richá, rehuíña'ataca piyá necá. Caja quietana riyucuna.

## ROMANOS

*Roma ejo San Pablo huacára'ari Jesucristo ja'apiyá jema'ajéñojlo puráca'aloji i'imacá. Marí que rimacá najló:*

<sup>1</sup> Pablo nucá. Jesucristo hua'até sápa jeri nucá. Rihuacára'acarena naquiyana caja nucá. Tupana a'ari nucá ajopana ina'uqué e'iyayá i'imacá, nu'umacáloje rihuacára'acarena naquiyana penaje. Ra'á caja nucá, nu'umacáloje Tupana i'imataca ina'uqué capichácajo liyá yucuna penaje.

<sup>2</sup> Palani huani riyucuna. Tupana puráca'alo lana'aquejami quemari ñaqueé caja rinacu. Uncá na i'imalá Tupana puráca'alo e'iyá apichátaqueja. Ripuráca'alo ja'apátajeño mi chúnajlo Tupana i'imari riyucuna i'imacá, nalana'acáloje ra'apiyá ricá papera chojé penaje.

<sup>3</sup> Ripuráca'alo quemari Jesucristo nacú, i'imatari iná capichácajo liyá. Hue'emacana huani ricá. Tupana i'iri caja ricá. Eja'ahuá chu ri'imaqué huacajé nemaqué rinacu: “Davidmi chu laqué nami naquiyana ricá.”

<sup>4</sup> Tupana macápo'ori Jesucristo taca'acaje chiyá i'imacá. Raú iná hue'epi Tupana i'iri huánica ricá.

<sup>5</sup> Jesucristo palamane aú Tupana la'ari nucá palá. Ra'á nucá, nu'umacáloje rihuacára'acarena naquiyana penaje. Ripuráca'alo aú nu'ujná Jesucristo yucuna i'imajé ajopánajlo, ajopánajlo que. Nu'umá najló riyucuna, caphí napechu i'imacáloje Jesús chojé penaje. Caphí richojé péchuruna i'imacáloje, piyuque ajopana te'eré ehuá, ajopana te'eré ehuá que, penaje nu'umá najló riyucuna. Nema'acáloje ra'apiyá raú penaje, nu'ujná riyucuna i'imajé najló ca'ajno.

<sup>6</sup> Ica caja jema'año ra'apiyá. Caja Tupana i'ihuapari rijlhuua icá, i'imacáloje rijhua'atéjena raú penaje. Pajimila Roma e i'imacaño icá.

<sup>7</sup> Ijló, piyuqueja, nulana'á marí papera chojé. Tupana huajhuena icá. Caja ra'á icá, i'imacáloje rila'ejena ina'uqué penaje. Huara'apá huani Tupana. Hue'emacana huani Jesucristo. Nuhuata i'imacá napalamane. Nuhuata caja Tupana, Ri'iri Jesucristo hua'até la'acá ipechu palá.

*Pablo huátaca Roma ejo i'ijnacana yucuna marí:*

<sup>8</sup> Pamineco nuhuata marí que inacu quemacana: Caphí ipechu Jesucristo chojé. Ñaquele ila'á palá rehuá. Marí que la'acaño icá. Cajrú iyucuna jema'acó ajopana ñacajela ejo, ajopana ñacajela ejo que. Aú calé numá Tupánajlo: “Palá pila'acá nucá, ne'emacale Jesucristo palamane,” que numacá Tupánajlo inacu.

<sup>9</sup> Tupana hua'até sápa jeri nucá. Nu'umá Jesucristo yucuna ajopánajlo, ajopánajlo que, nahue'epicaloje ricá penaje. Ricá nacuja nucá. Nupura'acó Tupana hua'até quehuá nupura'ó rijhua'até inacu. Tupana hue'epiri quehuaca numacá ijló me'etení.

<sup>10</sup> Nuhuata ichaje i'ijnacana ca'ajno. Aú pulapé nu'umacá riyucuna Tupánajlo, rihuátajica quéchami nu'ujnacáloje amaje penaje.

<sup>11</sup> Nuhuata amácana, nohuíña'atacaloje icá richaje, richaje que Tupana puráca'alo nacú penaje. Raú ipechu i'imajica richaje que Tupana chojé caphí.

<sup>12</sup> Caja ipechu i'imá caphí Tupana chojé. Ñaqueé caja nupechu. Ñaquele nu'umaquela ijhua'até, rejenohuaja huala'acájlá papéchuchaca caphí.

<sup>13</sup> Jesucristo hua'atéjena icá nujhua'até. Ñaquele numá inacu: “Nojena” que. Nojena, ihue'epi pulapé nuhuátaca ichaje i'ijnacana. Maárejecha uncá meño'ojó nu'ujnalá ca'ajno ichaje. Nuhuata ichaje i'ijnacana Tupana puráca'alo ja'apátaje ijló, ihue'epicaloje richaje Jesucristo nacojé raú penaje. Ajopana te'eré ehuá, ajopana te'eré ehuá que nu'ujnacá riyucuna i'imacana nacú. Riyucuna jema'acana aú ne'iyajena pechu i'imari caphí Jesucristo chojé, ri'imátacaloje necá capichácajo liyá penaje. Ajopana hue'epiño richaje Jesucristo nacojé raú. Ñaqueé caja nuhuátaca ijló ricá.

<sup>14</sup> Jesucristo huacára'ari nu'umacá riyucuna pajimato ina'uquejlo. Caríhuana ca'ajná necá, tapuhuíyana ca'ajná necá, cajrú hue'epi'acáño ca'ajná necá, uncá hue'epi'acáño ca'ajná necá. Pajimátoja rihuátaca nu'umacá riyucuna najló.

<sup>15</sup> Ñaquele nuhuata Jesucristo yucuna i'imacana ijló caja, Roma e i'imacáñojlo.

*Jesucristo ja'apiyá jema'acana aú Tupana a'ari iná rijhua'ateje penaje. Riyucuna marí:*

<sup>16</sup> Caphí Jesucristo chojé i'imacana aú, Tupana i'imatari iná capichácajo liyá. Uncá nopáña'alo riyucuna i'imacana ja'api, Tupana i'imatácale iná capichácajo liyá riyucuna ja'apiyá jema'acana aú. Riyucuna ne'emá judíonajlo pamineco, quéchami uncá judíona calé naquiyánajlo.

<sup>17</sup> Riyucuna jema'acana aú iná hue'epí méqueca iná la'acá, iná i'imacáloje lamára'ataquejami que Tupánajlo raú penaje. Caphí iná pechu i'imacachu richojé, iná i'imá lamára'ataquejami que pu'uhuaré iná la'acare liyá. Ricá aú ja calé iná i'imá lamára'ataquejami queja Tupánajlo. Marí que Tupana puráca'alo lana'aquejami quemacá rinacu: "Caphí richojé péchuruna, queleja i'imaño lamára'ataquejanami que Tupánajlo pu'uhuaré nala'acare chiyá. Raú ja calé ne'emajé matajnaco je'echú chu Tupana hua'até."

*Pu'uhuaré la'acaño ina'uqué, piyunqueja, yucuna marí:*

<sup>18</sup> Je'echú chu Tupana. Caja ina'uqué hue'epiño Tupana huajájica íqui' huani necá, uncá la'alaño rihuátaca que. Pu'uhuaré la'ajeño, namanaicho la'ajeño, necá rihuajaje cajrú. Pu'uhuaré la'acana nacuja necá, aú calé uncá na'alá nanacojó quehuácaje puráca'aloji.

<sup>19</sup> Caja pu'uhuacá najló nacaje Tupana la'acare. Caja Tupana iphátari najló napechu, nahue'epicaloje mecajeca ricá penaje.

<sup>20</sup> Uncá iná amálaré Tupana. Nacaje rila'acare aú ja iná hue'epí reca ricá. Rila'á piyunqueja eja'ahuá i'imacá. Piyuque nacaje richu i'imacare hua'ató rila'á i'imacá. Ramácana aú iná hue'epí piyucúe nacaje la'ajeri ricá, Tupana. Caja queja ricá, hue'epiri huani ricá. Rila'acare amácana aú iná hue'epí mecajeca ricá. E'iyonaja ne'iyajena pechu uncá huani i'imalá Tupana nacú. Richona Tupana huajájeri necá. Ñaquele uncá meño'ojó rihuajáicarena pura'aló nachayo. Uncá meño'ojó nemalá: "Uncá huahue'epila mecajeca ricá" que.

<sup>21</sup> Rila'acare aú iná hue'epí reca Tupana. E'iyonaja calé uncá napura'aló rinacu palá. Iná Chí'ináricana ricá, Tupana. E'iyonaja uncá napura'aló rinacu palá. Uncá caja nemalá Tupánajlo: "Palá pila'acá huecá" que. Uncá huani nala'alá palá. Aú calé uncá na penaje calé nacaje ne'ejnatácare napéchuhua nacú. Pajluhuaja nacojé queja necá raú. Uncá napechu i'imalá najló. Calajeruni chu iná i'imacachu, uncá iná amala nacaje palá. Ñaquele caja necá, uncale nahue'epila palani puráca'aloji nacojé.

<sup>22</sup> Napechu i'imá nanacuhá: "Cajrú hue'epícaño huecá" que. E'iyonaja uncá huani napechu i'imalá, uncale nema'alá Tupana ja'apiyá.

<sup>23</sup> Uncá caja napechu i'imalá pu'ují Tupana nacú. Uncá tajnácajo penaje calé i'imacá Tupana. Ina'uqué jenami caje nala'acare, nacuja pu'ují napechu. Tajnácajo penaje i'imacaño ina'uqué. Nala'á caje cupira'aphana naquiyana jenami. Nala'á caje eja'ahuá e'iyohuájena naquiyana jenami. Nala'á caje juni yajné naquiyana jenami. Marí caje nacuja pu'ují napechu. Ricá ja'apija nephá, ri'imacale nachí'ináricana que najló penaje. Eyá Tupana ja'apí uncá nephala.

<sup>24</sup> Marí que la'ajeño ne'emacale, Tupana yuriri necá, nala'acáloje pu'uhuaré napechu queja penaje. Marí caje aú pu'uhua'ereja nala'acá pajhua'atéchaca. Namanaicho nala'á pajhua'atéchaca. Iqui'ija iná apáña'aco riyucuna jema'acana aú. Marí que nala'acá najluhua.

<sup>25</sup> Tupana yuriri necá, nala'acáloje pu'uhuaré napechu queja penaje, uncale na'alá nanacojó quehuácaje puráca'aloji. Pajlácaje puráca'alojija na'á nanacojó palá. Palá napura'acó nacaje Tupana queño'ótacare nacú. Pu'ují caja napechu nacaje rila'acare nacuja. Eyá riquéño'ótajeri, Tupana nacú, uncá napechu i'imalá pu'ují. Uncá caja napura'aló rinacu palá. Re Tupana, ina'uqué pura'acóloje rinacu palá huani hua'ajini huani penaje. Marí queja ri'imajica.

<sup>26</sup> Marí que napechu i'imacale, Tupana yuriri najló pu'uhuaré la'acana napechu queja. Nala'á pu'uhuaré pajhua'atéchaca. Iná apáña'aco riyucuna jema'acana aú. Inaana la'año pajhua'atéchaca achiñana hua'até la'acana que caja. Pupuchi ca'ajeño necá pajhua'atéchaca.

<sup>27</sup> Ñaquele caja achiñana pajno'ocó panacuhuáca. Inaana hua'até la'acana que caja nala'acá namanaicho pajhua'atéchaca. Nañujure aú ja ne'emá pajhua'atéchaca. Iná apáña'aco huani marí que iná jema'acá nayucuna aú. Marí que la'acana aú nala'á necó chapú huani, Tupana huajájicale necá richona.

<sup>28</sup> Uncá ina'uqué huátalaño Tupana hue'epícana. Aú calé riyurí najló, nala'acáloje napechu queja penaje. Apichátacanami queja napechu i'imacale najló, nala'á nacaje uncá huani paala.

<sup>29</sup> Pu'uhuaré la'ajeño ina'uqué i'imacale, marí que nala'acá pu'uhuaré pecohuáca: Achiñana, inaana, quele la'año namanaicho pajhua'atéchaca. Nahuata caja najluhua ajopana nane. Nahuata caja ajopana ina'uqué la'acana chapú. Chapú caja napechu i'imacá ajopana ina'uqué nacú, nachá'atacale necá. Nenó caja ajopana ina'uqué. Naca'ácaco caja pajhua'atéchaca. Cajrú caja napajlaca ajopana hua'até. Chapú caja nahuó ajopana cha. Nachapújra'o caja ajopana nacú.

<sup>30</sup> Napura'ó caja pu'uhuaré nanaquiyana nacú. Nala'á caja ajopana ina'uqué uncá ina'uquélaruna que caja majopeja. Chapú caja napechu Tupana nacú. Uncá caja nephala ajopana ina'uqué ja'apí. Nahue'epí caja nanacuhá hue'epiño que huani. Napura'ó caja

nanacuhuaja palá. Pu'uhuaré la'acana, namanaicho la'acana nahue'epí caja natucumó. Uncá caja nayani jema'alá nach'i'iná ja'apiyá.

<sup>31</sup> Mapechúhuaca nala'acá nacaje. Uncá pajluhuaja chuhuá calé napechu i'imacá nacaje nemacare nacú. Uncá caja nahue'epila caí panacuhúacaca. Uncá caja namalo ajopana ina'uqué chaje. Uncá caja nahue'epila ina'uqué mu'ují. Marí que i'imacaño ina'uqué.

<sup>32</sup> Nahue'epí palá huani méqueca Tupana huacára'aca ina'uqué la'acá. Nahue'epí caja capichájeño penájenaca necá la'año pu'uhuaré. E'iyonaja uncá nayurila naliyó ricá. Eyá necá que caja pu'uhuaré la'ajeño nacú napechu i'imá palá.

## 2

*Uncá ina'uqué naquiyana la'alaño quehuácaje puráca'aloji quemacá que. Pachá Tupana huajájeri necá. Riyucuna marí:*

<sup>1</sup> Marí que numacá aú ina'uqué nacú, pimá ca'ajná: "Meque pu'uhuaré huani nala'acá. Tupana huajájeri necá richona," que ca'ajná pimacá.

Eta picá. Nala'acá que caja pila'acá pu'uhuaré. Pimacá aú nanacu: "Tupana huajájeri necá" que, pimá caja pinacuhú. Picá caja Tupana huajájeri. Uncá meño'ojó pipura'aló pipchayo, pu'uhuaré la'ajeri pi'imacale.

<sup>2</sup> Huahue'epí Tupana huajaca ina'uqué, nala'acale pu'uhuaré numacare nacú chona. Uncale nala'alá quehuácaje puráca'aloji quemacá que, pachá rihuajaje necá.

<sup>3</sup> Picá quemari apú nacú: "Pu'uhuaré la'ajeri ricá" que. Ñaque i'imacá huani picá. Eta, ¿meque pipechu i'imacá pinacuhú?: "Uncá japi Tupana huajálaje nucá," que ca'ajná pipechu i'imacá pinacuhú.

<sup>4</sup> Tupana hue'epiri ina'uqué mu'ují. Rihue'epícale huamu'ují, uncá quiñaja calé rihuajaca huecá. Marí queja ricá ina'uqué hua'até, rihuátacale huapala'ataco huapéchuhua pu'uhuaré huala'acare liyá. Marí que rihuátaca pila'acana palá. Aú ca'ajná piphá pa'apihua rijló.

<sup>5</sup> Caja pijnúcha'o Tupánajlo. Uncá caja pihuátala pu'uhuaré pila'acare yuricana piliyó. Ñaque i'imacale pahuacata richájeno huajácaje pijluhua. Pu'uhuaré pila'acare chona, Tupana huajájeri picá. Riphájica rená chojé, quechami rihuajájeri ina'uqué, uncale nala'alá quehuácaje puráca'aloji quemacá que, pachá Tupana huajájeri ina'uqué.

<sup>6</sup> Pu'uhuaré nala'acare loco'opáneje rihuajaje necá piyuqueja. Eyá palá la'ajeño rila'ajé palá. Palá nala'acare loco'opáneje caja rila'ajé necá palá.

<sup>7</sup> Palá la'ajeño i'imaño palá la'acana nacú. Uncá nayurila rila'acana. Nahuata Tupana hua'até i'imacana. Nahuata caja ripechu i'imacá palá nanacu. Nahuata caja macapichaco je'echú chu i'imacana rijhuata'até. Mariruna ina'uqué Tupana la'ajeri palá huani. Ra'ajé necá, ne'emacáloje matajnaco je'echú chu rijhua'até penaje.

<sup>8</sup> Eyá ajopana, riyuchá aú ja rihuajaje necá, uncale na'alá nanacójó quehuácaje puráca'aloji. Nahuátaca que huani la'acaño rihuajaje. Pu'uhuaré la'acana nacú i'imacaño, quele rihuajaje caja.

<sup>9</sup> Pu'uhuaré la'acá amájeño chapú caje yajhué. Quehuini yajhué hua'ató namaje. Marí que ri'imajica chapú pu'uhuaré la'acañojlo. Judíonajlo pamineco, quéchami uncá judíona calejlo.

<sup>10</sup> Eyá palá Tupana pechu i'imajica palá la'acaño nacú. Ripura'ajó caja nanacu palá. Rila'ajé caja napechu palá huani. Marí queja ri'imajica palá la'acañojlo. Palá ri'imajica judíonajlo pamineco, quéchami uncá judíona calejlo ri'imajica caja palá.

<sup>11</sup> Ñaque huánija ina'uqué Tupánajlo, piyuqueja.

<sup>12</sup> Re ina'uqué, uncá Tupana puráca'alo i'imalá najló, ricá Moisesmi chu lana'acare i'imacá. Pu'uhuaré la'acaño ne'emacale, nacapichajo Tupana liyá. Rihuajaje necá, uncá pachá nala'alá nahue'epicare caje. Uncá Tupana puráca'alo lana'aquejami i'imalá najló, nala'acáloje rimacá que penaje. Aú calé uncá rihuajálaje necá richona. Eyá judíonajlo, re ripuráca'alo lana'aquejami najló. Tupana huajájeri necá, uncá pachá na'alá nanacójó ripuráca'alo.

<sup>13</sup> Moisesmi chu lana'arí Tupana puráca'alo i'imacá. Uncá rema'acana aú ja calé iná i'imacá lamára'ataquejami que Tupánajlo. Rimacá que la'acana aú, iná i'imacá lamára'ataquejami que rijló pu'uhuaré iná la'acare chiyá.

<sup>14</sup> Ajopana ina'uquejlo uncá Tupana puráca'alo i'imalá, Moisesmi chu lana'acare i'imacá. Uncá judíona calé necá numá nacú. Uncá ripuráca'alo lana'aquejami i'imalá najló. E'iyonaja nala'á rinaquiyana ñaque caja palá, nahue'epícale ají que la'acana palani. Tupana puráca'alo lana'aquejami queja najló ricá napechu nacú.

<sup>15</sup> Palá nala'acare aú, iná hue'epí napechu queja nahue'epica Tupana puráca'alo quemacá que la'acana. Raú nahue'epí palá nala'acare nacojé, pu'uhuaré nala'acare nacojé hua'até.

Nala'acachu palá, napechu i'imari palá nanacuhúa. Nala'acachu pu'uhuaré, uncá paala napechu i'ímáá nanacuhúa.

<sup>16</sup> Tupana a'arí Jesucristo piyuque ina'uqué nacú quemajeri penaje. Rimaje huajló méqueca huala'acá nacaje, palani ca'ajná, pu'uhuaireni ca'ajná. Nacaje micho'ojneji i'ímacare ina'uqué pechu nacú hua'ató, rimaje nacú méqueca rijló ricá. Tupana i'imataca ina'uqué capichácajo liyá yucuna nu'umá ina'ujejlo. Riyucuna chuhúa nu'umá riyucuna me'etení.

*Tupana puráca'alo, Moisesmi chu lana'acare i'ímáá, yucuna marí:*

<sup>17</sup> Icó judíona pechu i'ímá inacuhúa: “Palá Tupana pechu huanacu.” Marí que ipechu inacuhúa, Tupana yurícale ijló ripuráca'alo, Moisesmi chu lana'acare i'ímáá. Raú ila'á inacuhúa ajopana chá'atajeño que.

<sup>18</sup> Ripuráca'alo lana'aquejiami nacojé icá hue'epiño Tupana huátaca que la'acana, ila'acá piyá pu'uhuaré. Ripuráca'alo lana'aquejiami nacojé ihue'epí ricá.

<sup>19</sup> Ñaquele icá, judíona pechu nacú ri'ímá: “Huecá jehuíña'atañojla ajopana ina'uqué rinacu. Necá, uncá hue'epilaño Tupana nacojé, huehuíña'atajla necá rinacu, nahue'epícaloje rinacojé penaje.”

<sup>20</sup> Caja ihue'epí Tupana puráca'alo, Moisesmi chu lana'acare nacojé. Ricá quemari quehuácaje nacú. Aú calé ipechu i'ímá inacuhúa: “Uncá hue'epilaño Tupana puráca'alo nacojé jenacú la'ajeño huecá. Huejapa hue'epícaño Tupana nacojé jehuíña'atajeño caja huecá,” que ipechu i'ímáá rinacuhúa.

<sup>21</sup> Ajopana ina'uqué jehuíña'atajeño que ihue'epica inacuhúa. Eta, ¿naje uncá ila'alá imacá najló que? Apala imá ajopana ina'ujejlo: “Ata'aniya” que. Eta icá ta, ¿naje ata'á?

<sup>22</sup> Apala imá ajopánajlo: “Ila'aniya imanaicho.” Eta, ¿naje ila'á imanaicho? Re ajopana ina'uqué, pu'ují napechu i'ímáá nacaje jenami nacú, napechu i'ímacale: “Huachí'ináricana jenami japi ricá.” Apala uncá paala ijló marí caje. Eta, ¿naje pu'ují ipechu liñeru nacú? Icó ata'año renami ñacarelana chiyá nacaje, apiyácaloje ricá liñeru aú penaje.

<sup>23</sup> Icó hue'epiño inacuhúa hue'epiño que huani, Tupana puráca'alo lana'aquejiami yurícale ijló i'ímáá. E'iyonaja calé uncá a'alá inacojó ricá. Pachá ajopana uncá huátalaño Tupana.

<sup>24</sup> Quehuaca jo'ó ricá Tupana puráca'alo lana'aquejiami quemacare nacú. Marí que rimacá inacu: “Ajopana ina'uqué, uncá judíona calé necá, pura'año pu'uhuaré Tupana nacú. Uncá pachá icá judíona jema'alaño ra'apiyá.”

<sup>25</sup> “Tupana le'ejena huecá,” que ipechu inacuhúa. Ila'acachu Tupana puráca'alo lana'aquejiami quemacá que, palani ijló judíona i'ímacana. Uncachu jema'alá ripuráca'alo ja'apiyá, uncá na penaje calé ijló ricá.

<sup>26</sup> Eyá ajopana, uncá judíona calé necá. Nala'acachu Tupana puráca'alo lana'aquejiami quemacá que, Tupana le'ejena necá raú.

<sup>27</sup> Nanaquiyana la'año Tupana puráca'alo lana'aquejiami quemacá que. Palá nala'acare aú nachá'ata icá, uncale ila'alá Tupana puráca'alo lana'aquejiami quemacá que. Ijló ripuráca'alo lana'aquejiami yuriro i'ímáá. E'iyonaja uncá a'alá inacojó ricá.

<sup>28</sup> Uncá caja rila'ejena calé necá piyuqueja, mata'aqueja chinúmaruna.

<sup>29</sup> La'arí Tupana puráca'alo quemacá que, ricá i'imari judío huani. Ca'arí pu'uhuaré rila'acare rinaquiyó, Tupana le'ejé ricá. Marí caje uncá amalo iná napona nacú. Tupana Pechu la'arí iná pechu palá, iná la'acáloje palá raú penaje. Tupana Pechu ca'arí ina'uqué naquiyá pu'uhuaré nala'acare. Ilé cajena nacú Tupana pechu i'ímá palá. Ina'uqué quemáño ca'ajná ne'iyajena nacú: “Tupana hua'atéjena necá” que. Uncá iná hue'epila raú quehuácaca ricá. Tupana pechu i'ímacachu nanacu palá, iná hue'epí rila'ejénaca necá. Raú ja calé iná hue'epí ricá.

### 3

<sup>1</sup> Marí que ri'ímacale, inaquiyana ca'ajná quemájeño: “Judíona huecá, e'iyonaja uncá na penaje calé huajló judíona i'ímacana. Uncá na penaje calé huajló queráco'ope achíñana chu'uhuere chinuma mata'acana. Uncá Tupana hua'ateje calé iná raú,” que ca'ajná imájica inacuhúa.

<sup>2</sup> Uncá ñaque calé ricá. Judíona chá'ataño jo'ó ajopana, Tupana yurícale najló ripuráca'alo. Ricá aú nachá'ata ajopana.

<sup>3</sup> Ne'iyajena uncá jema'alaño ripuráca'alo ja'apiyá. Uncá caja nala'alá rimacá que. Uncá Tupana jácho'olajo rimacá que nacaje la'acana chiyá raú.

<sup>4</sup> Uncá huani. Quehuácaje puráca'aloji nacojé Tupana la'arí piyuqueja nacaje. Ina'uqué pajlaño. Eyá Tupana uncá huani pajlala. Marí que Tupana puráca'alo lana'aquejiami quemacá Tupana nacú:

Ina'uqué hue'epéjeño quehuácaje pipuráca'alo.

Ina'uqué quemájica ee pinacu: “Uncá paala rila'acá” que, aú pipura'ajó pichayo. Raú nahue'epeje ina'uqué pajlaca, que Tupana puráca'alo lana'aquejami quemacá.

<sup>5</sup> Apala ipechu i'imá ca'ajná: “Tupana la'arí palá. Eyá huecá la'año pu'uhuaré. Pu'uhuaré huala'acá ijlungami chojé huamá palá Tupana la'acare. Ñaquele palani pu'uhuaré la'acana. Eta, ¿naje rihuajá ina'uqué richona? Marí uncá paala,” que ca'ajná ipechu rinacu.

<sup>6</sup> Uncá huani ilé que calé ricá. Tupana la'arí palá. Uncá majopeja calé Tupana amaco ina'uqué chaje, pu'uhuaré nala'acare chiyá. Majopeja ramáquelo nachaje, uncá meño'ojó rimalajla piyuque ina'uqué nacú mecajenaca necá. Na aú ca nala'á pu'uhuaré, na aú ca nala'á palá, nacú uncá rimalajla.

<sup>7</sup> Apala apú quemari ca'ajná marí que: “Nupajlájica aú, ajopana ina'uqué quemájeño Tupana nacú: ‘Meque palani huani Tupana. Uncá ripajlala. Eyá ajopana ina'uqué, majopeja pajlacaño necá’. Marí caje aú napechu i'imajé palá Tupana nacú. Marí que ri'imacale rijló palá, uncá naje calé Tupana quemari nunacu: ‘Pu'uhuaré rila'acá, ripajlaca aú’, que ca'ajná apú quemacá rinacuhúa.

<sup>8</sup> Ñaque caja ne'iyajena quemacá. Nemá: “Palani pu'uhuaré la'acana. Rijlungami chojé nacaje Tupana la'acare i'imacá palá. Marí que caja Pablo jehuíña'ataca ina'uqué rinacu i'imacá,” que nemacá nunacu. Majopeja napajlaca ta. Tupana huajájeri necá, quemáño ilé que nunacu. Nahuajácana richona palani ricá.

*Pu'uhuaré la'ajeño piyuqueja ina'uqué. Riyucuna marí:*

<sup>9</sup> Judíona huecá. Uncá ajopana chaje calé palá la'acajño huecá. Uncá huani. Caja numá huanaacu: “Pu'uhuaré la'ajeño huánija huecá, piyuqueja ajopana ina'uqué hua'ató.”

<sup>10</sup> Tupana puráca'alo lana'aquejami quemari marí que: Uncá na calé ina'uqué naquiyana i'imari, la'arí palá.

Uncá caja pajluhuaja ina'uqué naquiyana i'imalá palá la'ajeri.

<sup>11</sup> Uncá caja na calé hue'epiri Tupana huátacare caje la'acana. Uncá caja na calé pechu i'imari Tupana nacú.

<sup>12</sup> Piyuqueja ina'uqué pajno'oño Tupana liyá.

Maliyáruna huani caja necá Tupánajlo.

Uncá caja ina'uqué naquiyana i'imalá palá la'ajeño.

Uncá caja pajluhuaja ina'uqué naquiyana i'imalá palá la'ajeri.

<sup>13</sup> Pu'uhuaré huani napuráca'alo.

Pu'uhuaré huani nala'acá ajopana ina'uqué raú.

Nanuma chiyá napajlaca pajhua'atéchaca majopeja huani.

Napuráca'alo aú napichata ina'uqué pajlocaca.

<sup>14</sup> Pu'uhuari puráca'aloji, chapuni puráca'aloji caje, jácho'oro nanuma chiyá.

<sup>15</sup> Majopéjari caje pachá nahuata ajopana ina'uqué nócana.

<sup>16</sup> Pu'uhuaré la'acana nacuja necá pajhua'atéchaca. Raú nacapichata ina'uqué.

Marí que nala'acá pecohuácaca pachá, ajopana ina'uqué amaño chapú caje yajhué.

<sup>17</sup> Uncá napechu i'imalá palá, ne'emacáloje palá pajhua'atéchaca raú penaje.

<sup>18</sup> Uncá caja nephala Tupana ja'apí.

Marí que Tupana puráca'alo lana'aquejami quemacá ina'uqué nacú.

<sup>19</sup> Tupana puráca'alo, Moisesmi chu lana'acare i'imacá, quemari ina'uqué nacú, nala'acáloje rimacá que penaje. Pu'uhuaré la'ajeño piyuqueja ina'uqué, uncale nala'alá rimacá que. Uncá na i'imalá quemari rinacuhúa: “Uncá nula'alá pu'uhuaré” que. Caja Tupana quemari piyuqueja ina'uqué nacú mecajeca necá.

<sup>20</sup> “Pu'uhuaré la'acajño necá,” que rimacá piyuqueja ina'uqué nacú. Tupana huacára'ari Moisesmi chu lana'acá ripuráca'alo júpimi i'imacá. Uncá na calé i'imari lamára'ataquejami que Tupánajlo, ripuráca'alo júpichumi quemacá que la'acana aú. Tupana puráca'alo júpichumi aú iná hue'epí na aú ca iná la'acá pu'uhuaré. Marí caje penaje ricá.

*Caphí iná pechu i'imacachu Jesucristo chojé, Tupana i'imatari iná capichácajo liyá. Riyucuna marí:*

<sup>21-22</sup> Uncá Tupana puráca'alo júpichumi quemacá que la'acana aú calé Tupana lamára'atari huecá pu'uhuaré huala'acare liyá. Apú aú rilamára'ata huecá. Marí que Tupana lamára'ataca ina'uqué pu'uhuaré nala'acare chiyá: Iná pechu i'imacá aú caphí Jesucristo chojé, Tupana lamára'atari iná rijluhua. Piyuqueja caphí Jesucristo chojé péchuruna rilamára'ata rijluhua. Ñaque huánija ricá piyuqueja ina'unquejlo. Tupana puráca'alo, Moisesmi chu lana'acare i'imacá, quemari ñaque caja rinacu. Tupana puráca'alo, ripuráca'alo ja'apátajeñomi chuna lana'acare i'imacá, i'imari richuhua caja riyucuna.

<sup>23</sup> Piyuqueja huecá la'año pu'uhuaré. Uncá hue'emalá palá Tupana i'imacá que.



<sup>24</sup> E'iyonaja calé palá Tupana la'acá huecá. Jesucristo palamane aú calé rilamára'ata rijluhua huecá, pu'uhuaré huala'acare chiyá. Uncá na calé huala'á rijló, rilamára'atacaloje huecá penaje. Majopeja rilamára'ataca huecá. Ri'irí palamane aú ja calé rilamára'ata huecá rijluhua.

<sup>25</sup> Tupana a'arí Jesucristo, ritaca'acáloje a'ahuaná apiyacacanamí nacú penaje. Re rira aco'oró itapuhua aphumi chiyá. Raú rica'á ina'uqué liyá pu'uhuaré nala'acare. Caphí richojé iná pechu i'amacachu, Tupana amaro iná chaje pu'uhuaré iná la'acare liyá. Marí que rila'acare aú iná hue'epí Tupana la'acá palá. Júpimi que Tupana ña'arí pu'uhuaré ina'uqué la'acare panacu, uncale nalamára'atajери i'imalá najló rihuacajé.

<sup>26</sup> Me'etení re huajló Hualamára'atajери. Caphí huapechu i'amacachu Jesucristo chojé, Tupana lamára'atari rijluhua huecá pu'uhuaré huala'acare liyá. Marí que Tupana la'acá ina'uqué, huahue'epicaloje raú palá la'ajérica ricá penaje.

<sup>27</sup> Uncá marí que quemacana i'imalá inajlo: "Tupana puráca'alo jupichumi quemacá que la'ajeri nacú. Ñaquele palá Tupana pechu nunacu raú." Uncá marí que quemacana i'imalá inajlo. Caphí Jesucristo chojé i'amacana aú ja, iná i'imalá lamára'ataquejami que Tupánajlo.

<sup>28</sup> Caja huahue'epí méqueca iná i'amacá lamára'ataquejami que Tupánajlo. Caphí iná pechu i'amacá aú Jesucristo chojé, iná i'amacá lamára'ataquejami que rijló. Uncá Tupana puráca'alo jupichumi quemacá que la'acana aú calé, iná i'amacá lamára'ataquejami que rijló.

<sup>29</sup> Apala ipechu nacú ri'imá: "Judíonajloja calé Tupana. Uncá ajopánajlo calé ricá." Uncá huani ilé que calé ricá. Ajopánajlo ñaque caja Tupana.

<sup>30</sup> Re pajluhuaja calé Iná Chí'ináricana. Uncá apú i'imalá. Ñaque huani Tupánajlo judíona, uncá judíona calé, quele. Pajimátoja rilamára'ataca rijluhua caphí Jesucristo chojé péchuruna pu'uhuaré nala'acare liyá.

<sup>31</sup> Caphí iná pechu i'amacachu Jesucristo chojé, iná i'amacá lamára'ataquejami que Tupánajlo raú. Uncá numalá raú, uncá na penaje calé Tupana puráca'alo, Moisesmi chu lana'acare i'amacá. Uncá ilé que calé ricá. Caphí Jesucristo chojé i'amacana aú, iná la'á rimacá que.

## 4

### *Abrahami chu yucuna marí:*

<sup>1</sup> Chuhua nu'umajica Abrahami chu yucuna ijló. Hua'ajútami chu ri'amacá.

<sup>2-3</sup> Marí que Tupana puráca'alo lana'aquejami quemacá Abrahami chu nacú i'amacá: "Caphí Abrahami chu pechu i'amacá Tupana chojé. Raú calé lamára'ataquejami que ri'amacá Tupánajlo pu'uhuaré rila'acare liyá." Abrahami chu i'imaquela lamára'ataquejami que Tupánajlo palá rila'acare aú, rimajla Tupánajlo rinacuhá marí que i'amacá nacú: "Nucá la'arí palá, aú calé lamára'ataquejami que nucá pijló." Uncá marí que quemacana i'imalá rijló i'amacá.

<sup>4</sup> Iná carihuate a'arí inajlo iná sápacala huemí. Uncá iná quemalá iná sápacala huemí nacú: "Majopeja rilamá'ataca nucá raú." Uncá. Iná sápacala rijhua'até aú calé ra'á inajlo rihuemí.

<sup>5</sup> Majopeja Tupana lamára'ataca ina'uqué pu'uhuaré nala'acare liyá. Uncá rihuemí aú calé. Caphí péchuri richojé rilamára'ata. Pu'uhuaré rila'acare liyá lamára'ataquejami que ricá raú.

<sup>6</sup> Uncá meño'ojó iná la'alá nacaje, Tupana quemacáloje iná nacú: "Lamára'ataquejami nojló ricá" que. Pu'ují péchuruna, necá Tupana quemacárena nacú: "Lamára'ataquejami nojló necá" que. Riyucuna caja Davidmi chu i'imari i'amacá.

<sup>7</sup> Marí que rimacá i'amacá:

Ricá Tupana amácaro chaje, pu'ují ripechu, rica'acale riliyá pu'uhuaré rila'acare.

<sup>8</sup> Pu'ují péchuri ricá, uncá Tupana huajálare pu'uhuaré rila'acare pachá, que Davidmi chu quemacá rinacu i'amacá.

<sup>9</sup> Pu'ují péchuruna Davidmi chu quemacárena nacú, i'imaño judíona, ajopana hua'até, quele nacú rimá i'amacá. Caja huemá Abrahami chu nacú marí que: "Caphí ripechu i'amacá Tupana chojé, raú ri'imá lamára'ataquejami que Tupánajlo pu'uhuaré rila'acare liyá."

<sup>10</sup> Uncá chíyó namata'á richinuma, Tupana quemari rinacu: "Caja lamára'ataquejami que nojló ricá, caphí ripechu i'imatele nochojé."

<sup>11</sup> Quéchami namata'á rijí ima jep'oná. Rená que'ená penaje ri'amacá. Raú nahue'epí caja lamára'ataquejami que ri'amacá Tupánajlo, caphí ripechu ri'imatele richojé. Raú ri'imá lamára'ataquejami que rijló. Ñaque caja ricá ajopana caphí richojé péchuruna. Necá caja i'imaño Abrahami chu naquiyana. Ripechu i'amacá que caja napechu i'amacá caphí Tupana chojé. Lamára'ataquejanami Tupánajlo necá raú. Uncá ca'ajná mata'aqueja chinúmaruna calé necá. E'iyonaja calé lamára'ataquejami que necá Tupánajlo.

<sup>12</sup> Judíona naquiyana quemaña caja Abrahami chu nacú: “Huara'apá” que, riqueño'ocale najló caphí Tupana chojé i'imacana. Uncá chiyó namata'á Abrahami chu ijí ima jepo'oná, richinuma, ripechu i'imari caphí Tupana chojé, rilamára'atacaloje ricá pu'uhuaré rila'acare liyá penaje. Abrahami chu pechu i'imacá que rihuacajé, que caja napechu i'imacá caphí Tupana chojé riyami.

*Tupana a'arí najló nacaje rarucare najló i'imacá, napechu i'imacale richojé caphí i'imacá. Riyucuna marí:*

<sup>13</sup> Tupana arucari Abrahami chujlo piyunque eja'ahuá i'imacá, riyurícoloje rilaquénamijlo penaje. Rarucá najló ricá, Abrahami chu pechu i'imacale caphí richojé i'imacá. Raú ja calé ri'imá lamára'ataquejami que pu'uhuaré rila'acare liyá. Uncá Tupana puráca'alo jupichumi ja'apiyá jema'acana aú calé Tupana arucari rijló ri'imacá.

<sup>14</sup> Tupana quemari huanacu, rila'acáloje huecá palá penaje. Nacaje i'imaquela inajlo ripuráca'alo jupichumi ja'apiyá jema'acana aú, uncá na penaje calé iná pechu i'imacajla caphí Tupana chojé. Uncá na penaje calé rarucá huajló nacaje i'imacá.

<sup>15</sup> Tupana huajájeri necá, uncá la'alaño Tupana puráca'alo jupichumi quemacá que, necá Tupana huajájeri. Uncáquela Tupana puráca'alo, Moisesmi chu lana'acare i'imalajla, uncá na pachá calé rihuajácaja ina'uqué.

<sup>16</sup> Uncáquela ri'imalajla, uncá na i'imalajla inajlo, iná la'acáloje rimacá que penaje. Tupana la'ajeri ina'uqué nacú palá rimacá que i'imacá. Ripuráca'alo jupichumi ja'apiyá i'imacaño nacú rila'ajé palá, napechu i'imajica ee caphí richojé. Uncá necaja calé rila'ajé palá. Ñaqué caja rila'ajica ajopana nacú palá. Caphí Abrahami chu pechu i'imajica Tupana chojé i'imajica. Ñaqué péchurunajlo Tupana a'ajeri nacaje rimacá que nanacu. Huara'apá que Abrahami chu i'imacá, riqueño'ocale huani Tupana chojé i'imacana caphí i'imacá.

<sup>17</sup> Marí que Tupana puráca'alo lana'aquėjami quemacá Abrahami chu nacú: “Tupana quemari rijló: ‘No'ojé picá íqui'iruna ina'uqué jara'apá penaje. Ajopana, ajopana que jara'apá que penaje pi'imajica,’ ” que rimacá rijló i'imacá. Ñaquele huara'apá que caja Abrahami chu, riqueño'ocale huajloje penaje Tupana chojé i'imacana caphí. Tupana a'arí cajmuchaji caja taca'acáñojo. Nacaje uncá i'imalare ra'á pu'uhuacajé, ri'imacáloje penaje. Marí caje penaje i'imacá Tupana. Richojé ripechu i'imá caphí.

<sup>18</sup> Marí que ri'imacá Abrahami chujlo i'imacá. Uncá meño'ojó riyani i'imalá, phíyu'que huani ri'imacale. E'iyonaja calé caphí ripechu i'imacá Tupana chojé, ri'irí i'imacáloje penaje. Caja Tupana quemari rijló i'imacá: “Pi'irí i'imajeri.” Aú calé Tupana chojeja calé ripechu i'imá caphí. Marí que ripechu i'imacale, íqui'iruna ina'uqué jara'apá ricá. Tupana quemacá rijló i'imacá queja ricá.

<sup>19</sup> Ehuá Abrahami chu íphátaca cien jarechí i'imacá. E'iyonaja uncá ripechu jácho'olo Tupana chojé i'imacana caphí chiyá, ri'irí i'imacáloje penaje. Caja rihue'epí yehuichaja ricá, riyajalo, quele hua'até íphaca nená chojé, nataca'acáloje penaje. Uncá meño'ojó nayani i'imalá. Caja najácha'o huani i'imacá.

<sup>20</sup> E'iyonaja calé uncá ripechu i'imalá: “Uncá nu'urí i'imalaje” que. “Tupana quemacá nojló, que ri'imajica nojló,” que ripechu i'imacá. Uncá rácho'olo caphí Tupana chojé i'imacana chiyá. Uncá caja rimalá Tupana nacú marí que: “Uncá quehuaca calé rimacare nacú nojló.” Uncá ilé que calé ripechu i'imacá. Richaje, richájeno que ripechu i'imajica caphí Tupana chojé, rila'acáloje rijló rimacare nacú penaje. Palaja ripura'acó Tupana nacú i'imajica.

<sup>21</sup> Ripechu i'imari: “Uncá puhuichani calé Tupánajlo, rila'acáloje rimacá que nojló penaje,” que ripechu i'imacá Tupana nacú.

<sup>22</sup> Ñaqué i'imacale Tupana quemari Abrahami chujlo i'imacá: “Caja lamára'ataquejami que nojló picá, pu'uhuaré pila'acare liyá. Caphí pipechu i'imacá aú nochojé lamára'ataquejami que pipechu.”

<sup>23</sup> Uncá rinácuja calé Tupana quemari ñaqué.

<sup>24</sup> Ñaqué caja rimacá huanacu, huapechu i'imacale richojé caphí. Ricá macápo'ori Jesucristo taca'acaje chiyá i'imacá. Ricá chojé huapechu caphí.

<sup>25</sup> Tupana a'arí Jesucristo i'imacá, nenócaloje ricá pu'uhuaré huala'acare chaya penaje. Quéchami Tupana macápo'ori piño ricá rapumí chuhuá, hue'emacáloje lamára'ataquejami que pu'uhuaré huala'acare liyá raú penaje.

## 5

*Lamára'ataquejanami huecá pu'uhuaré huala'acare liyá yucuna marí:*

<sup>1</sup> Caphí huapechu Tupana chojé. Raú hue'emá lamára'ataquejanami que Tupánajlo. Caja huapala'ató huapéchuhua Tupánajlo. Palá huecá me'etení pajhua'atéchaca Tupana hua'até Jesucristo palamane.

<sup>2</sup> Caphí huapechu Jesucristo chojé. Raú calé Tupana palamane huecá me'etení. Pu'ují huapechu, huahue'epícale Tupana i'imacá que caja hue'emajica palá.

<sup>3</sup> Chapú caje yajhué huamaca aú caja pu'ují huapechu. Chapú caje yajhué huamácare la'arí huecá cayajhuéruna, huácho'oco piyá Tupana ja'apiyá jema'acana chiyá. Ñaquele pu'ují huapechu chapú caje yajhué amácana nacú.

<sup>4</sup> Cayajhuéruna i'imacana aú Tupana pechu i'imacá palá huanacu. Palá péchuruna hue'emacachu, huapechu i'imá Tupana chojé caphí.

<sup>5</sup> Marí cajé aú uncá huapechu la'aló ujhú riliyá. Uncá huapechu la'aló ujhú, Tupana a'acale huajló Ripechu. Ripechu aú huahue'epí rihuátaca huecá íqui'ija huani. Raú caja huahuata ricá íqui'ija caja.

<sup>6</sup> Pu'uhuaré la'acaño jo'ó hue'emaqué huacajé, Jesucristo taca'arí a'ahuaná apiyácanami nacú huachaya i'imacá. Uncá meque la'ajé hue'ematala huecá capichácajo liyá. Riphaca rená chojé rijló aú, ritaca'á uncá ina'uquélaruna chaya i'imacá.

<sup>7</sup> Uncá na ca'ajná taca'alajla palá la'acare ina'uqué chaya. Apala que iná iphátacajla pajluhua ja'ajná, taca'arijla palájne'equena huani chaya.

<sup>8</sup> E'iyonaja pu'uhuaré la'acaño jo'ó hue'emaqué huacajé, Jesucristo taca'arí huachaya. Marí caje aú huahue'epí íqui'ija Tupana huátaca huecá.

<sup>9</sup> Jesucristo taca'arí huachaya i'imacá. Ñaquele chuhua lamára'ataquejanami que huecá rijló pu'uhuaré huala'acare liyá. Aú caja huahue'epí ri'imataca huecá, Tupana huajájica huecá liyá. Marí palani huani.

<sup>10</sup> Chapú huapechu i'imacá Tupana nacú i'imacá. E'iyonaja calé Jesucristo pala'atari huapechu Tupánajlo. Ritaca'á huachaya, ripala'atácaloje huapechu Tupánajlo raú penaje. Chuhua palá Tupana pechu huanacu; huapechu Tupana naño ñaquele caja. Marí que huapechu panacuhuáca Jesucristo palamane. Tupana macápo'ori ri'imacá. Cajmuni ri'imacale me'etení, ra'á huañaté palá la'acana aú. Hue'emaó Tupana huajájica huecá liyá raú.

<sup>11</sup> Palá Tupana pechu huanacu me'etení Jesucristo palamane aú. Ñaquele caja huapechu Tupana nacú palá me'etení Jesucristo palamane aú. Marí la'arí huapechu pu'ují Tupana nacú.

*Adanmi chu, Jesucristo, quele yucuna marí:*

<sup>12</sup> Pajluhua ja'ajná ina'uqué i'imari. Rií i'imari Adán. Ricá queño'orí pu'uhuaré la'acana piyuque ina'uquejlo i'imacá. Aú calé piyuqueja ina'uqué yuriño pu'uhuaré la'ajeño, namanaicho la'ajeño reyá a'ajná ño'ojó. Ripachá calé huataca'á. Aú piyuqueja huecá taca'ajeño.

<sup>13</sup> Uncá Tupana puráca'alo, Moisesmi chu lana'acare, i'imalá huacajé, ina'uqué i'imaño pu'uhuaré la'acana nacú. E'iyonaja uncá nanacu quemacana i'imaqué: "Pu'uhuaré la'ajeño necá" que, uncale pu'uhuaré la'acana nacú quemacana i'imalá rihuacajé.

<sup>14</sup> Uncá Tupana puráca'alo i'imalá ina'uquejlo, Adanmi chu apumí chiyá i'imañañojlo. Ya'ajná Moisesmi chu i'imacá ejená uncá ri'imalá najló. Piyuque necá taca'año. Uncá nala'alá pu'uhuaré i'imacá, Adanmi chu la'acá que huani. Uncá rila'alá Tupana huacára'aca que. Raú rila'alá pu'uhuaré i'imacá. Uncá rapumí chiyá i'imañaño la'alá ñaque huani pu'uhuaré. E'iyonaja nataka'aque, pu'uhuaré la'ajeño ne'emajcale. Adanmi chu queño'orí pu'uhuaré la'acana huajló i'imacá. Eyá Jesucristo queño'orí palá la'acana huajló i'imacá. Riyucuna Tupana i'maqueri ina'uquejlo. Jesucristo iphájica yucuna, ri'imaqué júpimi i'imajica. Adanmi chu, Jesucristo, quele queño'oño huajló nacaje i'imacá.

<sup>15</sup> Ricá, Adanmi chu yuricare huajló, uncá Jesucristo yuricare huajló que calé ricá. Adanmi chu la'arí pu'uhuaré i'imacá. Pajluhua ja'ajná ina'uqué la'acale pu'uhuaré, aú piyuqueja ina'uqué ja'año taca'acaje chojé. Eyá Jesucristo palamane calé Tupana amaro huachaje. Ri'imatá huecá capichácajo liyá. Pajluhua ja'ajná palamane Tupana i'imatari cajrú ina'uqué capichácajo liyá. ¡Meque palani huani huajló Jesucristo palamane!

<sup>16</sup> Tupana i'imatari ina'uqué capichácajo liyá Jesucristo palamane. Rilamára'ata caja ina'uqué pu'uhuaré nala'acare liyá. Cajrú nala'acá pu'uhuaré. E'iyonaja rilamára'ata necá. Uncá ñaquele calé nacaje Adanmi chu la'acare i'imacá. Ricá, pajluhua ja'ajná pu'uhuaré i'imacá. Tupana quemari rijló rajñaca piyá pajjí icha rimacare nacú. E'iyonaja uncá rema'alá ra'apiyá. Raú rila'alá pu'uhuaré i'imacá. Pachá piyuque ina'uqué ja'año capichájeño penájena.

<sup>17</sup> Pajluhua ja'ajná ina'uqué la'arí pu'uhuaré. Pachá taca'acaje queño'oró ina'uquejlo i'imacá. Eyá Jesucristo i'imari caja pajluhua ja'ajná. Cajrú ina'uqué palamane ricá. Raú calé Tupana

lamára'atari ina'uqué pu'uhuaré nala'acare liyá. Rilamá'ata caja necá raú, uncá rihuemí i'imalá. Ripalamane aú rilamára'atacarena i'imaño matajnaco je'echú chu rijhua'até.

<sup>18</sup> Pu'uhuaré Adanmi chu la'acare pachá piyuqueja ina'uqué i'imaño Tupana huajáicarena penájena. Eyá palá Jesucristo la'acare huachaya, uncá rihuajálaje huecá.

<sup>19</sup> Marí que quemacana caja ricá: Pajluhuaja i'mari. Uncá rema'alá Tupana ja'apiyá i'ímacá. Pachá cajrú ina'uqué yuriño pu'uhuaré la'ajeño penájena. Apú piño i'mari. Ilé jema'arí Tupana ja'apiyá palá. Raú cajrú ina'uqué yuriño lamára'ataquejanami que Tupánajlo, pu'uhuaré nala'acare liyá.

<sup>20</sup> Tupana huacára'ari Moisesmi chu lana'acá ripuráca'alo i'ímacá, ina'uqué hue'epícaloje na aú ca iná la'acá pu'uhuaré raú penaje. Ina'uqué la'año pu'uhuaré cajrú. E'iyonaja Tupana hue'epiri huamu'ují íqui'ija huani. Ñaquele ramó huachaje. Iquí'ija huani huamu'ují rihue'epícare chá'ataca pu'uhuaré huala'acare.

<sup>21</sup> Capichájeño penájena ina'uqué, huala'acale pu'uhuaré. Lamára'ataquejanami que hue'emacachu Tupánajlo, hue'emájica macapichaco je'echú chu rijhua'até raú. Marí que ri'ímajica huajló, Huahuacára'ajeri, Jesucristo, palamane hue'emacale.

## 6

*Iná la'acáloje palá Jesucristo palamane aú penaje yucuna marí:*

<sup>1</sup> ¿Meque la'acana ca'ajná palani? ¿Ñaqueja chí huala'ajica pu'uhuaré, Tupana amácoloje huachaje cajrú penaje?

<sup>2</sup> Uncá huani paala pu'uhuaré la'acana. Jesucristo taca'arí huachaya i'ímacá, rica'acáloje pu'uhuaré huala'acare hualiyá raú penaje. Aú uncá paala huajló pu'uhuaré la'acana.

<sup>3</sup> Caja ihue'epí ca'ajná na penájeca nala'acá bautizar Jesucristo ja'apiyá jema'ajeño. Nala'á bautizar necá, ajopana hue'epícaloje Jesucristo palamane necá. Jesucristo palamane iná i'ímacá aú, iná ca'á iná liyó pu'uhuaré iná la'acare, iná manaicho la'acare hua'ató. Ritaca'á huachaya i'ímacá, rapichátacaloje hualiyá pu'uhuaré la'acana penaje.

<sup>4</sup> Nala'acá aú bautizar huecá, ra'apiyá jema'ajeño, marí que quemacana ricá: Jesucristo hua'ató que huapechu jupichumi, pu'uhuaré huala'acare aú tajnaro hualiyá. Tupana macápo'ori Jesucristo Ripecchu aú i'ímacá. Ripecchu aú rila'á huapechu huajé que caja, hue'emacáloje palá la'acana nacuja reyá a'ajná ño'ojó penaje. Palani huani rihue'epícare la'acana.

<sup>5</sup> Jesucristo hua'atéjena huecá. Jesucristo taca'acá hua'ató que jupichumi huapechu capichaco hualiyá, huala'acare aú pu'uhuaré. Jesucristo macápo'oco i'ímacá que caja huamacápo'ojico. Ñaquele huajé chuhua huapechu me'etení.

<sup>6</sup> Jupichumi iná pecchu aú iná la'á pu'uhuaré. Huahue'epí Jesucristo taca'acá huachaya a'ahuná apiyácacanamí nacú i'ímacá, hue'emacáloje pu'uhuaré la'acana liyá raú penaje.

<sup>7</sup> Uncá meño'ojó caja taca'arí penájemi la'alá pu'uhuaré.

<sup>8</sup> Uncá caja hue'emalá pu'uhuaré la'acana nacú, huapechu jupichumi capichácolo Jesucristo hua'até. Ñaquele huajé chuhua huapechu rijhua'até.

<sup>9</sup> Huahue'epí Jesucristo macápo'oco i'ímacá. Uncá ritaca'alaje piño. Uncá meño'ojó taca'acaje chá'atala ricá piño.

<sup>10</sup> Jesucristo taca'arí i'ímacá. Pu'uhuaré ina'uqué la'acare cháya calé ritaca'á pajluhua pe caja penaje. Ricá pumí chíyá uncá ritaca'alaje piño. Cajmúnija ricá me'etení. Palá rila'acá piyuqueja nacaje Tupana huátacare caje.

<sup>11</sup> Ñaqueé caja ijlo ricá. Ihue'epí inacuhua caja taca'acaño que pu'uhuaré la'acana liyá. Huahuacára'ajeri Jesucristo hua'até i'ímacana aú ila'ajé piyuque nacaje Tupana huátacare caje.

<sup>12</sup> Ñaqueé i'ímacale ila'aniya pu'uhuaré, imanaicho caje. Capichácajo penaje iná naponá. Ila'aniya pu'uhuaré inaponá aú.

<sup>13</sup> Ila'aniya ijluhua pu'uhuaré. Caja Tupana i'matari icá pu'uhuaré la'acana liyá, ila'acáloje palá rihuátaca que raú penaje. Ñaquele iyurí ichó Tupánajlo, ra'acáloje ináté palá la'acana aú penaje.

<sup>14</sup> Uncá Tupana puráca'alo, Moisesmi chu lana'acare, ja'apiyá calé icá. Ñaquele uncá ila'alaje pu'uhuaré chuhua. Caja Tupana palamane icá me'etení, ila'acáloje palá raú penaje.

*Majopeja sápejeño que huecá yucuna marí:*

<sup>15</sup> Tupana palamane huecá chuhua. Rilanaquiya uncá hue'emalá Tupana puráca'alo, Moisesmi chu lana'acare ja'apiyá. Huala'aniya huani pu'uhuaré me'etení, hue'emacale ripalamane.

<sup>16</sup> Caja ihue'epí marí: Iná a'acachu iná icó apujlo majopeja rijhua'até sápa'eri penaje, iná la'á rihuacára'aca iná que. Iná la'acachu pu'uhuaré, iná hue'epí pu'uhuaré la'acana nacú huacára'ajeri hua'ateje iná. Ra'apiyá i'imacana aú iná capichájico Tupana liyá. Eyá iná jema'acachu Tupana ja'apiyá, rijhua'até sápa'eri que caja iná raú. Raú iná i'imá rijhua'até palá la'acana nacuja.

<sup>17</sup> Palá Tupana la'acá icá. Júpimi icá i'imaño pu'uhuaré la'acana nacuja. Quehuácaje puráca'aloji jema'acana aú, icá jema'año ra'apiyá.

<sup>18</sup> Raú Tupana i'imatari icá pu'uhuaré la'acana liyá. Chuhua icá i'imaño palá la'acana nacú huacára'ajeri ja'apiyá.

<sup>19</sup> Huecá i'imaño apú hua'até sápa'jeño que. Hue'ehuapacá huajluhua mecajeca hua'até huahuata sápacana. Marí que numacá huanacu: "Apú hua'até sápa'jeño huecá" que, ihue'epícaloje raú meque quemacánaca ricá penaje. Júpimi icá i'imaqueño pu'uhuaré la'acana nacuja. Pu'uhuaré la'acana nacú huacára'ajeri hua'até sápa'jeño i'imacá. Aú ila'aque pu'uhuaré richaje, richájeno que. Pu'uhuaré caje nacuja i'ijnataque ipéchuhua rihuacajé. Eyá me'etení caja iyurí ichó Tupánajlo, ila'acáloje palá, i'imacáloje rijhua'até sápa'jeño penaje.

<sup>20</sup> Júpimi uncá ñaque calé i'imajica. Icó i'imaqueño pu'uhuaré la'acana nacú. Pu'uhuaré la'ajeño huacára'ajeri hua'atéjena i'imaqueño rihuacajé. Lanaquiya uncá i'imaqué palá la'ajeño huacára'ajeri hua'até i'imajica.

<sup>21</sup> Eyá chuhua uncá na penaje calé ijlo pu'uhuaré ila'acare i'imacá. Chuhua apáña'o ra'apí, pu'uhuaré la'ajeño capichájicole Tupana liyá.

<sup>22</sup> Caja chuhua i'imaño pu'uhuaré la'acana liyá. Caja chuhua ja'ó Tupana hua'atéjena penájena. Raú icá i'imaño palá la'acana nacú rijló. Eyá a'ajná ño'ojó icá i'imajeño macapichaco rijhua'até je'echú chu.

<sup>23</sup> Capichácajo aú Tupana a'ajeri ina'uquejlo pu'uhuaré nala'acare huemí. Ricá aú nacapichácoloje Tupana liyá penaje. Eyá Jesucristo chojé i'imacáñojlo ra'á cajmuchaji, ne'emacáloje macapichaco rijhua'até je'echú chu raú penaje. Majopeja ra'acá inajlo ricá, uncá rihuemí i'imalá inajlo.

## 7

*Iná hue'epícaloje méqueca inajlo Tupana puráca'alo penaje yucuna marí:*

<sup>1</sup> Nojena, icá hue'epíño Tupana puráca'alo, Moisesmi chu lana'acare nacojé. Iná i'imacá quetánaja iná i'imacá ra'apiyá. Iná taca'acá yámijico uncá iná i'imalá ra'apiyá.

<sup>2</sup> Marí que caja cayajnárujlo ricá. Ruyajná i'imacá quetana, Tupana puráca'alo quemari runacu, ruyurícoloje rijhua'até penaje. Ruyajná tajnaco ejomi uncá ru'umalá ripuráca'alo ja'apiyá, quemari runacu ruyurícoloje rijhua'até penaje.

<sup>3</sup> Ruyuríquela ruyajná, cajmuni jo'ó ri'imacá huacajé, pu'uhuaré rula'acajla raú. Apú achiñá hua'até la'acana queja ri'imacajla rojló. Ruyajná tajnácochu ruliyá, uncá Tupana puráca'alo quemalá runacu, ru'umacáloje caja taca'acá penájemi hua'até piño penaje. Ritajnacó yami, ruhuá'acacajla apú hua'até, uncá rula'alajla pu'uhuaré raú.

<sup>4</sup> Nojena, ñaque caja ijlo ricá. Caja taca'acaño queja icá Tupana puráca'alo, Moisesmi chu lana'acare, liyá. Marí que ijlo ricá, Jesucristo hua'atéjena i'imacale. Chuhua apú hua'até icá. Jesucristo hua'atéjena icá. Ricá macápo'oro caja taca'acaño e'iyayá i'imacá, hue'emacáloje caliyáruna Tupánajlo rijhua'até penaje.

<sup>5</sup> Huapechu queja huala'acá huacajé, huala'á pu'uhuaré, huamanaicho. Tupana puráca'alo jupichumi quemari huanacu huala'acá piyá ricá. E'iyonaja calé uncá hua'alá huanacójó ricá. Pu'uhuaré huala'acare pachá, capichájeño penájena hue'emacá Tupana liyá rihuacajé.

<sup>6</sup> Chuhua uncá hue'emalá Moisesmi chu puráca'alomi ja'apiyá, caja taca'acaño que hue'emacale riliyá. Caja hue'emaó riliyá. Hua'je ehua' me'etení huapechu Tupana Pechu ja'apiyá i'imacana aú. Tupana Pechu aú huala'á Tupana huátacare caje. Uncá hue'emalá me'etení jupichumi puráca'aloji lana'aquejami ja'apiyá.

*Tupana puráca'alo jupichumi yucuna marí:*

<sup>7</sup> Uncá iná quemalá Tupana puráca'alo jupichumi nacú: "Uncá paala ricá" que. Uncá huani iná quemalá ilé que rinacu. Uncáque'ela ri'imalá, uncá nuhue'epílajla pu'uhuaré nula'acare nacojé. Nuhuata ca'ajná apú le'ejé nacaje nujluhua. Ripuráca'alo quemari nunacu: "Pihuátaniya pijluhua ajopana nane" que. Rihuátacana aú nuhue'epí pu'uhuaré nula'acare nacojé.

<sup>8</sup> Tupana puráca'alo jupichumi iphari nupechu nacojé. Aú nuhue'epí pu'uhuaré nula'acare nacojé. Nuhue'epí caja numanaicho nula'acare nacojé. Uncachu iná hue'epila ripuráca'alo nacojé, uncá caja iná hue'epílajla na aú ca iná la'á pu'uhuaré.

<sup>9</sup> Júpimi uncá nuhue'epila méqueca Tupana puráca'alo quemacá nunacu i'imacá. Mana'ija nu'umacá rihuacajé. E caja nohuíña'o rinacu. Rejéchami nuhue'epica pu'uhuaré nula'acare nacojé. Nuhue'epí caja capichácajo penaje nu'umacá Tupana liyá raú.

<sup>10</sup> Iná jema'á Tupana puráca'alo jupichumi ja'apiyá, iná i'imacáloje matajnaco je'echú chu raú penaje. E'iyonaja calé uncá pachá noma'alá ra'apiyá capichácajo penaje nu'umacá.

<sup>11</sup> Pu'uhuaré nula'ajica huacajé, nupechu i'imaqué nunacuhú: "Palá la'ajeri nucá" que. E'iyonaja Tupana puráca'alo jupichumi aú nuhue'epí uncá quehuácaje calé ricá. Uncá noma'alá ripuráca'alo ja'apiyá. Pachá capichácajo penaje nu'umacá Tupana liyá.

<sup>12</sup> Palani Tupana puráca'alo lana'aquejami, jupichumi. Palani caja nacaje rihuacára'acare iná la'acá. Uncá caja apichátaqueja i'imalá re'iyá. Aú calé rihuacára'a ina'uqué palá.

<sup>13</sup> Uncá ripuráca'alo pachá calé nu'umá capichácajo penaje i'imacá. Uncá huani. Pu'uhuaré nula'acare pachaja calé nu'umá capichácajo que riliyá i'imacá. Ripuráca'alo palani aú nuhue'epí pu'uhuaré nula'acare nacojé. Uncale noma'alá ra'apiyá, nula'á pu'uhuaré. Ripuráca'alo aú pu'uhucá pu'uhuaré nula'acare i'imacá nupechu nacú.

<sup>14</sup> Tupana Pechu ja'apiyá que Moisesmi chu lana'acá ripuráca'alo jupichumi. Palani huani ripuráca'alo. Eyá apú caje ta nucá. Pu'uhuaré la'ajeri nucá. Pu'uhuaré la'acana nacuja nupechu.

<sup>15</sup> Uncá nuhue'epila méqueca nupechu. Palá nuhuátacare la'acana, uncá nula'alá. Eyá pu'uhuaré, uncá nuhuátalare la'acana, ricá nula'á.

<sup>16</sup> Pu'uhuaré nula'á. Uncá nuhuátala rila'acana. E'iyonaja nula'á ñaqué. Marí caje aú nuhue'epí palani Tupana puráca'alo jupichumi.

<sup>17</sup> Uncá nucá calé la'arí pu'uhuaré. Pu'uhuaré péchuri nu'umacale nula'á pu'uhuaré.

<sup>18</sup> Nuhue'epí uncá na calé palani nupechu nacú. Nuhuátajla palá la'acana. E'iyonaja uncá meño'ojó nupechu iphala palá la'acana locópa'ala.

<sup>19</sup> Palá nuhuátacare la'acana, uncá nula'alá. Eyá pu'uhuaré, uncá nuhuátalare la'acana, ricá nula'á.

<sup>20</sup> Nula'acachu pu'uhuaré, uncá nuhuátalare la'acana, uncá nucá calé la'arí ricá. Numanaicha jácho'oco nupechu nacú aú nula'á pu'uhuaré.

<sup>21</sup> Marí que nojló ricá: Nuhuata palá la'acana. E'iyonaja pu'uhuaré la'acana itari nojló rapu.

<sup>22</sup> Nupechu huani aú nuhue'epí palani Tupana puráca'alo, Moisesmi chu lana'acare.

<sup>23</sup> Re nacaje pu'uhuaireni nuhuajhué nacú, aú uncá nula'alá nupechu huátaca que. Pu'uhuaré la'acana i'imari nujuháque'ehue. Ricá nacojé uncá meño'ojó nula'alá nuhuátaca que. Caja ricaja chá'atari nucá.

<sup>24</sup> Ricá la'arí camu'ují huani nupechu. Capichácajo penaje nucá Tupana liyá. ¿Na i'imatájeri nucá capichácajo liyá?

<sup>25</sup> Hue'emacana Jesucristoja calé i'imatartácale nucá riliyá. Palani caja nojló Tupana puráca'alo jupichumi ja'apiyá jema'acana. Nuhuata palá la'acana. E'iyonaja uncá nupechu iphala rilocópa'ala.

## 8

### *Tupana Pechu ja'apiyá i'imacana yucuna marí:*

<sup>1</sup> Chuhua uncá Tupana huajálaje Jesucristo hua'atéjena, la'año Tupana Pechu huacára'aca que. Uncá napechu que la'ajeño calé necá.

<sup>2</sup> Tupana Pechu aú iná i'imacó pu'uhuaré la'acana chiyá. Ra'apiyá jema'acana aú iná la'á Tupana huátaca que. Aú iná i'imacó capichácajo liyá.

<sup>3</sup> Uncá meño'ojó Tupana puráca'alo jupichumi i'imatala huecá pu'uhuaré la'acana chiyá. Uncá pachá huapechu iphala ra'apiyá jema'acana locópa'ala, Tupana la'arí huajló nacaje, uncá meño'ojó hual'alare. Rihuacára'a Ri'irí huani majó i'imacá. Huecá que ri'imacá ina'uqué. Pu'uhuaré hual'acare chaya ritaca'á i'imacá. Raú richá'ata huajló pu'uhuaré la'acana, hue'emacáloje richiyá penaje.

<sup>4</sup> Ripalamane huema'á Tupana puráca'alo jupichumi ja'apiyá. Hual'acachu huapechu queja, uncá meño'ojó huema'alá ra'apiyá. Tupana Pechu ja'apiyá i'imacana aú ja calé iná jema'á ra'apiyá.

<sup>5</sup> Napechu queja la'acaño la'año nahuátaca que huani. Eyá Tupana Pechu ja'apiyá que la'acaño, la'año Tupana Pechu huátaca que.

<sup>6</sup> Nahuátaca que la'acaño capichájeño Tupana liyá. Eyá Tupana Pechu huátaca que la'acaño i'imajeño palá. Macapichaco ne'emajica je'echú chu rijhua'até.

<sup>7</sup> Napechu queja la'acaño la'año nahuátaca que. Chapú Tupana nacú péchuruna necá, uncale nahuátala ra'apiyá jema'acana. Uncá caja napechu iphala rilocópa'ala, nema'acáloje ra'apiyá penaje.

<sup>8</sup> Uncá meño'ojó napechu queja la'acaño la'alá nacaje Tupana huátaca que.

<sup>9</sup> Eyá icá, uncá ñaque calé i'imaño icá. Uncá ipechu queja la'ajeño calé icá. Tupana Pechu aú iná la'acachu nacaje, iná la'á Tupana Pechu huátaca que. Uncachu iná i'imalá Jesucristo Pechu ja'apiyá, uncá caja Jesucristo hua'ateje calé iná.

<sup>10</sup> Jesucristo Pechu ja'apiyá iná i'imacachu, iná pechu i'imajica macapichaco rijhua'até je'echú chu. Marí que ijló ricá, Tupana amácole ichaje pu'uhuaré ila'acare chiyá. Lamára'ataquejami que icá pu'uhuaré ila'acare liyá raú. Iná pechu i'imajé macapichaco raú. Iná napónaja calé capichájero, iná la'acale pu'uhuaré, iná manaicho raú.

<sup>11</sup> Re e'iyá Tupana Pechu. Ricaja caja Tupana Pechu i'imacare e'iyá, macápo'ori Jesucristo i'imagá. Raú Tupana macápo'ori ricá i'imagá. Ricaja caja macápo'otajeri piño icá. Ripectu i'imacare e'iyá aú rimacápo'otaje icá.

<sup>12</sup> Ñaque i'imacale, nojena, uncá na penaje calé ila'á pu'uhuaré ipechu queja.

<sup>13</sup> Ila'acachu pu'uhuaré ipechu queja, pachá icapichájico Tupana liyá. Eyá Tupana Pechu aú ica'ajica ee pu'uhuaré la'acana inaquiyó, icá i'imaño macapichaco Tupana hua'até.

<sup>14</sup> Tupana Pechu huacára'aca que la'acaño i'imaño Tupana yaní.

<sup>15</sup> Tupana a'arí inajlo Ripectu, aú uncá iná i'imalá apú hua'até sápjajeri queja. Uncá caja iná i'imalá quero'ocajo nacú. Ripectu la'arí iná riyani naquiyana penaje. Raú huemacá Tupana nacú: "Huará'apá ricá" que.

<sup>16</sup> Tupana Pechu ja'aró huapechu nacojé, huemacáloje raú: "Riyani huecá" que.

<sup>17</sup> Tupana arucari huajló cajrú nacaje je'echú chu. Ricá yuréjero huajló, riyani hue'emacale. Nacaje ra'acare Jesucristojlo ra'ajicare caja huajló. Huajña'acachu chapú caje yajhué panacu, rijña'acá ricá panacu que caja, hue'emajica caja rijhua'até. Palani caje hua'até hue'emajé rijhua'até ri'imagá que caja.

<sup>18</sup> Palani huani ri'imajica huajló je'echú chu. Re hue'emajica huacajé uncá huahue'epilaje chapú cajé huajña'acare panacu i'imagá, palá huani ri'imajícale huajló re. Ñaquele uncá chapuni huani calé huajló chapú caje yajhué huamácare me'etení.

<sup>19</sup> Tupana macápo'otajeri huecá, riyani, hue'emacáloje rijhua'até penaje. Piyuqueja nacaje Tupana queño'ótacare, i'imajeri palani caja rihuacajé.

<sup>20</sup> Piyuqueja nacaje Tupana queño'ótacare, eja'ahuá, je'echú, caje macá, uncá ri'imalá me'etení palá júpimi ri'imagá que. Uncá ri'imalá palá me'etení, riqueño'ótaca ri'imagá huacajé que caja. Ñaquele apichátaquejami que ricá me'etení. Uncá me'etení ri'imagá que calé ri'imagá rihuacajé. Tupana puráca'alo aú ja calé ri'imá apichátaquejami que me'etení, pu'uhuaré ina'uqué la'acá pachá. Ri'imataje caja capichácajo liyá nacaje, piyuqueja eja'ahuá chu i'imacare.

<sup>21</sup> Apichácajo nacú me'etení piyuqueja nacaje eja'ahuá chu i'imacare. Tupana yaní i'imajica macapichaco huacajé, piyuqueja nacaje i'imajó apichácajo liyá.

<sup>22</sup> Huahue'epi piyuqueja nacaje Tupana queño'ótacare i'imagá, chapú caje e'iyá ricá me'etení. Aquijñojo i'imajica huacajé ri'imajó riliyá.

<sup>23</sup> Eja'ahuá, je'echú, piyuqueja nacaje Tupana queño'ótacare, chapú caje e'iyaja ricá me'etení. Uncá ricaja calé i'imari chapú caje e'iyá. Huecá caja amaño chapú caje yajhué. Tupana a'acarénaajo Ripectu huecá. E'iyonaja calé chapú caje yajhué amájeño huecá. Ra'á huajló Ripectu i'imagá. Pamineco ra'acare huajló calé ricá. Quéchami ra'ajé piño huajló nacaje palá huani. Ra'ajé huecá riyani huani penaje. Rihuacajé ri'imatáca huecá capichácajo liyá, chapú caje liyá hua'ató. Marí caje huátacana nacú huecá me'etení maare.

<sup>24</sup> Tupana i'imatari huecá capichácajo liyá, huapechu i'imacale richojé caphí. Huahue'epi caja ra'ajica huajló huanapona huajé. Ricá huátacana nacú hue'emajé. Uncá iná i'imalá nacaje huátacana nacú, iná amácare caje.

<sup>25</sup> Hue'emacachu nacaje uncá huamálare huátacana nacú, huahuátaja ricá. Uncá caja huaya'aló rihuátacana nacú.

<sup>26</sup> Cajrú Tupana Pechu a'acá huañaté nacaje la'acana aú. Uncá meño'ojó huala'alá nacaje huecá Tupana huátacare caje. Uncá caja huahue'epila rihuátaca que quemacana nacú rijhua'até pura'acano aú. Tupana Pechu, ricaja calé, pura'aró Tupana hua'até huajló, uncale huahue'epila rijhua'até pura'acano palá.

<sup>27</sup> Tupana Pechu pura'aró ra'apiyá jema'ajeño nacú Tupana hua'até. Tupana hue'epiri palá nacaje Ripectu quemacare nacú rijló. Rihuátaca que ripura'acó rijhua'até. Piyuqueja ina'uqué pechu hue'epéjeri ricá, Tupana.

*Uncá na calé chá'ataca huecá yucuna mari:*

<sup>28</sup> Huamá ca'ajná chapú caje yajhué, quehuini yajhué, caje macá. Piyuqueja nacaje huala'acaro, Tupana la'arí huecá palá raú, ri'imacáloje palá huajló aquijñojo pani penaje. Marí que ricá huajló, huátano íqui'ija Tupana. Ra'á hue'emacá rijhua'atéjena penaje, hue'emacáloje júpimi ripectu nacú ri'imagá que caja penaje.

<sup>29</sup> Uncá chiyó eja'ahuá i'imá, Tupana hue'epiri mecajenaca ri'ihuapá rijluhua i'imacá. Hue'emacáloje Ri'irí chuhuá queja penaje ri'ihuapá rijluhua hue'emacá. Cajrú huecá i'imacá Tupana yaní. Ri'irí i'imari pe'ejri huani huajhua'até. Marí que ri'imacáloje penaje ri'ihuapá rijluhua huecá.

<sup>30</sup> Tupana a'arí caja huecá ri'ihuapacárena rijhua'atéjena penaje. Ajopana ina'uqué e'iyayá ri'ihuapacá rijluhua huecá. Huecá, ri'ihuapacárena, rilamára'ata rijluhua huecá pu'uhuaré huala'acare liyá. Rilamára'atacarena nacú ripechu i'imá palá, ripechu i'imacá Ri'irí nacú que caja.

<sup>31</sup> ¡Meque palá huani Tupana pechu huanacu! Raú uncá meque chapú huanacu péchuruna la'alá huecá.

<sup>32</sup> Uncá Tupana mejñátala Ri'irí, ritaca'acá piyá huachaya. Ra'á ri'imacá, ritaca'acáloje piyuqueja ina'uqué chaya penaje. Ñaque caja ra'ajica huajló mamejajneja nacaje piyuqueja.

<sup>33</sup> Uncá na calé quemárijla Tupánajlo: "Pu'uhuaré la'ajeño necá" que ri'ihuapacárena rijluhua nacú. Caja Tupana quemari huanacu: "Lamára'ataquejami que necá nojló."

<sup>34</sup> Uncá na calé huajájeri huecá, Jesucristo taca'acale huachaya i'imacá. Ritaca'á i'imacá. Ejomi rimacápo'o piño. Me'etení Tupana ahua'á ricá. Palá Tupana pechu rinacu. Ripura'ó caja Tupana hua'até huanacu.

<sup>35</sup> Iqui'ija Jesucristo huátacarena huecá. Uncá na calé jácho'otajeri huecá riliyá, íqui'ija huani rihuátacale huecá. Uncá caja riyurílaje íqui'ija huahuátacana. Huajña'ajé ca'ajná chapú caje yajhué panacu. Camu'ují ca'ajná huapechu la'ajico. Nala'ajé ca'ajná chapú huecá, huema'acale Jesucristo ja'apiyá. Apala huajña'ajé ca'ajná me'epejí panacu. Apala huala'ajé ca'ajná camu'ují a'arumacaji nacú. Apala cajrupi e'iyá ca'ajná hue'emajé. Apala nenoje ca'ajná huecá. Ají que huala'acana aú uncá Jesucristo yurílaje huecá. Iqui'ija rihuátajica huecá ñaqueja.

<sup>36</sup> Apú quemacá que Tupánajlo i'imacá, que caja huajló ricá. Marí que Tupana puráca'alo lana'aquéjami quemacá:

Caphí huapechu i'imacale pichojé, nahuata huenócana hue'echú ca'alá queja rijimaje.

Nahuá'a ohuéjana nenóquelana ojo, nenócaloje necá penaje. Ñaque que caja nahuátaca huala'acana marí eja'ahuá chu, que apú quemacá Tupánajlo i'imacá.

<sup>37</sup> Meque ca'ajná huala'ajico, nuhue'epí hua'apájica richiyá palá. Marí que huajló ricá, huátari íqui'ija huecá, a'ajícale huañaté.

<sup>38</sup> Iqui'ija huani Tupana huátaca huecá. Ñaquele nuhue'epí uncá na calé jácho'otaríjala huecá riliyá. Huataca'ajica aú uncá caja huácho'olajo riliyá. Hue'emacá marí eja'ahuá chu chuetana uncá na calé jácho'otajeri huecá riliyá. Uncá caja Tupana hua'atéjena, je'echú chujena, jácho'otalajla huecá riliyá. Uncá caja jiñana pechu huacára'ajeño, yenú i'imacaño, jácho'otala huecá riliyá. Uncá caja meño'ojó ina'uqué huacára'ajeño jácho'otala huecá riliyá. Uncá caja nacaje i'imacare me'etení jácho'otala huecá riliyá. Uncá caja nacaje i'imajicare aquijñojo jácho'otalaje huecá riliyá.

<sup>39</sup> Uncá na i'imalá yenojo jácho'otajla huecá riliyá. Uncá na i'imalá caja cahuacajo jácho'otalajla huecá riliyá. Uncá na i'imalá piyuqueja Tupana queño'ótacare naquiayana, jácho'otaríjala huecá Tupana liyá. Caphí péchuruna Jesucristo chojé hue'emacale, rihuata huecá íqui'ija huani.

## 9

*Israelmi chu laquéname, Tupana i'ihuapacárena necá. Riyucuna marí:*

<sup>1</sup> Jesucristo hua'ateje nucá. Ñaquele quehuaca numacá. Uncá nupajlala. Palani nacaje nuhue'epicare, Tupana Pechu palamane ricá. Aú calé nuhue'epí quehuácaca ricá numacare nacú.

<sup>2</sup> Caja camu'ují huani nupechu nucá'ana nacú, uncale nahuátala Jesucristo ne'ematajjeri penaje. Quehuini huani nojló ricá.

<sup>3</sup> Ra'aquela nañaté, nócho'ojla Jesucristo hua'ateje i'imacana chiyá najlojé penaje, nacapichaco piyá. Reyá nu'umajla capichácajo penaje napumí chojé.

<sup>4</sup> Israelmi chu laquéname naquiayana caja nucá. Tupana i'ihuapari hua'ajútayami chuna, ne'emacáloje riyani penaje. Rila'á cajrú nacaje palani ne'iyá i'imacá. Hua'ajútayami chuna hua'até rila'á nacaje, nayurícolaje ra'apiyá penaje. Nucá'anajlo riyurí ripuráca'alo, ricá Moisesmi chu lana'acare i'imacá. Rihuacára'a nala'acá Tupana ñacaré i'imacá, napechu i'imacáloje pu'ují rinacu richu penaje. Najló rarucá nacaje que'iyapejé i'imacá.

<sup>5</sup> Hua'ajútayami chuna laquéname nucá'ana. Huecá'ana naquiayana penajemi caja Jesucristo i'imacá, marí eja'ahuá chu ri'imacá huacajé. Piyuqueja nacaje mináricana ricá. Ina'uqué pura'ajeño rinacu palá huani hua'ajini huani. Marí queja ricá.



<sup>6</sup> Uncale nahuátala Jesucristo ne'ematájeri penaje, uncá Tupana a'alá najló piyuque nacaje rimacare nacú najló i'ímacá. Raú ca'ajná iná pechu i'ímá: "Uncá Tupana la'alá rimacá que." Uncá ilé que calé ricá. Uncá riyani calé piyuqueja Israelmi chu laquénami. Aú calé uncá piyuqueja nacaje yurilo najló.

<sup>7</sup> Ñaqué caja Abrahami chu laquénami i'ímacá. Uncá caja piyuqueja rilaquénami i'ímalaño Tupana yaní. Tupana quemari marí que Abrahami chujlo i'ímacá: "Pi'irí aú ja pilaquénami i'ímajeño."

<sup>8</sup> Marí que rimacá aú rimá Jesucristo nacú. Tupana arucari huajló Jesucristo i'ímacá, ri'ímacáloje ina'uqué palamane penaje. Caphí iná pechu i'ímacachu richojé, iná i'ímá riyani naquiñana. Marí caje aú iná hue'epí uncá iná icá'ana palamane aú calé Tupana yaní naquiñana iná.

<sup>9</sup> Marí que Tupana arucaca Abrahami chujlo ri'irí i'ímacá. Rimá rijló: "Pajluhuaja jarechí i'ímajemi nupa'ajó piño majó. Quéchami Sara huá'ajeyo ru'urí," que rimacá rijló i'ímacá.

<sup>10</sup> Re piño apa'amá yucu. Rebécami cholo yaní i'ímalaño achiñana iyamá. Iyamá moto'ocaño ne'emacá. Nara'apá, Isaacmi chu, laquénami huecá.

<sup>11-12</sup> Uncá chiyó ruyani moto'ó i'ímacá, uncá na nala'alá. Uncá nala'alá palá, uncá caja nala'alá pu'uhuaré. Uncá chiyó namoto'ó, Tupana quemari Rebécami chólolo marí que i'ímacá: "Pamineco amájero pijló, i'ímajeri rijmeremi hua'até sápaeri que."

Tupana i'ihuapari rijluhua ina'uqué rihuátaca que. Ripechu nacú i'ímacá queja ri'ihuapacá rijluhua necá. Uncá ri'ihuapalá necá nacaje nala'acare jimaje.

<sup>13</sup> Tupana puráca'alo lana'aquejami quemacá que nanacu, que ri'ímacá najló. Marí que rimacá nanacu: "Nuhuahué Jacob. Eyá Esaú chá chapú nohuó."

<sup>14</sup> ¿Meque huemájica Tupana nacú: "Uncá paala rila'acá," que?

<sup>15</sup> Uncá huemalaje ilé que rinacu, marí que Tupana quemacale Moisesmi chujlo i'ímacá: "Nuhuátaca queja nuhue'epica ina'uqué mu'ují," que rimacá rijló.

<sup>16</sup> Aú huahue'epí Tupana hue'epica ina'uqué mu'ují rihuátaca queja. Uncá nacaje nala'acare palamane aú calé rihue'epí namu'ují.

<sup>17</sup> Tupana puráca'alo lana'aquejami quemari caja méqueca Tupana quemacá Egipto eruna huacára'ajerijlo i'ímacá. Marí que rimacá rijló i'ímacá: "Pinacu nula'á cajrú nacaje, uncá meño'ojó ina'uqué la'alare. No'ó pi'ímacá ne'emacana penaje, nacaje nula'acare pinacu yucuna jema'acólolo piyuqueja eja'ahuá chuhúa penaje. Ricá penaje huani no'ó pi'ímacá ne'emacana penaje."

<sup>18</sup> Aú huahue'epí Tupana hue'epica ina'uqué rihuátacarena mu'ují. Nahuátaca aú ijnúcha'acajo, riyurí najló rinacojé.

<sup>19</sup> Apala pimaje nojló marí que: "Quehuaca ca'ajná pimacá. Eta, ¿naje Tupana quemari huanacu: "Pu'uhuaré nala'acá" que? ¿Na la'arijla apojó rihuátaca que?" que ca'ajná pimacajla nojló.

<sup>20</sup> Pijló numá: Uncá naje calé papiyaca Tupana. Uncá pucapé quemalá ripujéyojo marí que: "¿Naje pipú nacá marí que huani?"

<sup>21</sup> Ripujeyo ipuyo ricá ruhuátaca que. Pucapé naquiñana rupú i'ichí yajhué palá nojé, ruchaje riphácaño i'iracáloje richiyá penaje. Ricaja caja pucapé naquiñana rupú apa'alá majopéjari quemachi.

<sup>22</sup> Ñaqué caja Tupana la'acá ina'uqué e'iyá. Ne'iyajena amaño riyuchá yajhué, ajopana hue'epícaloje méqueca rihuajaca pu'uhuaré la'ajeño penaje. Nahue'epicaloje caja piyuqueja la'ajérica ricá raú penaje. Penaje rijña'á panacu rihuajájacarena cachuhua caje nacuhua. Capichájeño huani penájena necá.

<sup>23</sup> Rihue'epí caja ina'uqué mu'ují cajrú. Raú huahue'epí meque palá huani rila'acá ina'uqué. Quepeni huani ripalamane inajlo. Eja'ahuá queño'ocó huacajé, ri'ímá Tupana pechu nacú, hue'emacáloje ripalamane penaje.

<sup>24</sup> Huecá judíona ripalamane. Ñaqué caja ajopana ina'uqué ripalamane. Uncá judíona calé necá.

<sup>25</sup> Iná íphata riyucuna papera chu, Oséasmi chu lana'acare i'ímacá. Marí que Tupana quemacá:

Uncá i'ímalaño nule'ejena ina'uqué nacú numaje: "Nule'ejena necá" que.

Uncá nuhuátalarena i'ímajicaño nacú numaje: "Iqui'ija nuhuátacarena necá" que.

<sup>26</sup> Ajopana te'eré eruna, numacárena nacú, uncá nule'ejena calé necá. Rehuaja calé nemaje nanacu: "Tupana yaní necá. I'ímajeri huani penaje Tupana. Riyani necá," que nemájica nanacu.

<sup>27</sup> Marí que piño Isaiasmi chu quemacá: "Iqui'iruna Israelmi chu laquénami. Iqui'i juni jalomi le'ejé que'epé que íqui'ica necá. E'iyonaja calé, huejápaja nanaquiñana i'ímajeño capichácajo liyá.

<sup>28</sup> Tupana huajájeri cajrú pu'uhuaré la'acaño, namanaicho la'acaño. Rimacá que rihuajájica necá. Quiñaja rihuajájica necá," que Isaíasmi chu quemacá.

<sup>29</sup> Quéchami rimá piño marí que:

Piyuqueja la'ajeri Tupana.

Uncáquela rihue'epila huanaquiyana mu'ují, uncá hue'emalajla me'etení.

Pajimila Sodoma erúnami chuna, Gomorra erúnami chuna hua'até ricapichata i'imacá.

Ñaqué caja huacapichácojla, uncaja que rihue'epijla huamu'ují, que rimacá i'imacá.

*Tupana i'imatari ina'uqué capichácajo liyá. Marí que riyucuna Judíonajlo:*

<sup>30</sup> Necá ajopana, uncá judíona calé necá. Uncá napechu nacú ri'imalá: "¿Marí que chi hue'emajica lamára'ataquejami que pu'uhuaré huala'acare liyá Tupánajlo?" Uncá nahue'epila rinacóje. E'iyonaja nanaquiyana jo'ó Tupana lamára'atari riliyá, caphí napechu i'imacale Jesucristo chojé.

<sup>31</sup> Eyá judíona pecchu i'imacá Tupana puráca'alo jupichumi nacú marí que: "Ra'apiyá jema'acana aú hue'emajla lamára'ataquejanami que Tupánajlo." Uncá meño'ojó nala'alá rihuacára'aca que. Aú uncá ne'emalá lamára'ataquejanami que pu'uhuaré nala'acare liyá.

<sup>32</sup> Marí que najló ricá, uncá pachá napechu i'imalá caphí Jesucristo chojé. Nacaje nala'acare aú ja nahuata lamára'ataquejanami que i'imacana. Uncale nahuátala Jesucristo, na'ó capichácajo chojé.

<sup>33</sup> Tupana puráca'alo lana'aquejami quemari marí que Jesucristo nacú:

Tupana quemari: Nucá huacára'ajeri pajluhuaja ina'uqué pajimila Jerusalén eruna chaje.

Uncaja que nahuata ricá, na'ajó capichácajo chojé.

Eyá caphí richojé péchuruna i'imajeño palá.

Najló nacaje palani i'imajica Tupana quemacare nacú.

## 10

<sup>1</sup> Nojena, íqui'i huani nuhuátaca nucá'ana jema'acá Jesucristo ja'apiyá, Tupana i'imatácaloje necá capichácajo liyá raú penaje. Acuhuaná cajrú nupura'acó Tupana hua'até nachaya.

<sup>2</sup> Nuhue'epí nahuátaca Tupana huátaca que la'acana hue'epícana natucumó. E'iyonaja uncá nahue'epila palá ripuráca'alo nacóje. Aú majopeja nala'acá.

<sup>3</sup> Uncá nahue'epila méqueca Tupana lamára'ataca ina'uqué pu'uhuaré nala'acare liyá rijluhua. Napechu queja nahuátaca necó lamára'atacana rijló. Aú uncá nayurila necó Tupánajlo rilamára'atacaloje necá pu'uhuaré nala'acare liyá rihuátaca que penaje.

<sup>4</sup> Caphí iná pecchu i'imacachu Jesucristo chojé, Tupana lamára'atari iná pu'uhuaré iná la'acare chiyá rijluhua. Ñaquele uncá na penaje calé inajlo Tupana puráca'alo jupichumi, iná lamára'atacaloje iná icó rijló raú penaje.

<sup>5</sup> Apala ina'uqué huátáño necó lamára'atacana Moisesmi chu puráca'alomi ja'apiyá i'imacana aú. Uncá meño'ojó iná jema'alá ra'apiyá. Moisesmi chu puráca'alomi quemacá que nanacu, queja najló ricá. Marí que rimacá nanacu: "Pajimato Tupana puráca'alo quemacá que la'ajeño, necaja calé i'imajeño macapichaco rijhua'até je'échú chu," que rimacá.

<sup>6</sup> Chuhua uncá ñaquele calé inajlo ricá. Iná pecchu i'imacá aú caphí Jesucristo chojé, ricá'á iná liyá pu'uhuaré iná la'acare. Lamára'ataquejami que iná Tupánajlo raú. Ripuráca'alo lana'aquejami quemari piño marí que rinacu: "Uncá na penaje calé inajlo, iná i'ijnaquela je'échú chojé Jesucristo huá'aje majó, ra'acáloje huañaté penaje.

<sup>7</sup> Uncá caja na penaje calé inajlo, iná i'ijnaquela caja taca'acaño ejo, iná macápo'ocaloje ricá penaje," que rimacá.

<sup>8</sup> Huahue'epí caja Jesucristo i'imataca iná capichácajo liyá, iná pecchu i'imacá caphí richojé aú. Riyucuna i'imacana nacuja huecá, ina'uqué pecchu i'imacáloje caphí richojé penaje.

<sup>9</sup> Pimájica ee Jesucristo nacú: "Nuhucára'ajeri ricá" que, ri'imataje picá capichácajo liyá. Pihue'epíjica ee quehuaca Tupana macápo'oca Jesucristo i'imacá, ri'imatájica picá capichácajo chiyá.

<sup>10</sup> Iná pecchu i'imacachu caphí Jesucristo chojé, Tupana lamára'atari iná rijluhua raú. Iná numá chiyá iná quemacachu iná nacuhúa: "Caphí péchuri nucá Jesucristo chojé" que, Tupana i'imatari iná capichácajo liyá raú.

<sup>11</sup> Tupana puráca'alo lana'aquejami quemari marí que: "Caphí péchuri richojé uncá la'alajo ujhuí riliyá."

<sup>12</sup> Ñaquele huánija ina'uqué Tupánajlo. Judíona, uncá judíona calé hua'ató, ñaquele caja necá rijló. Tupana i'imari najlóje penaje, piyuqueja ina'uquéloje penaje ricá. Nacaje

eja'ahuá chu yurico mináricana caja ricá, Tupana. Quepeni nacaje ripalamane piyuqueja ina'uquejlo, quejá' año riliyá nacaje rijhua'até pura'acano aú.

<sup>13</sup> Marí que Tupana puráca'alo lana'aquejiami quemacá huanacu: “Iná quemacachu Tupánajlo: ‘Pi'imatá nucá capichácajo liyá’ que, ri'imatá iná capichácajo liyá raú.”

<sup>14</sup> Uncá meño'ojó ina'uqué quemalá rijló, ri'imatácaloje necá capichácajo liyá penaje, uncachu napechu i'imalá caphí richojé. Uncá caja meño'ojó napechu i'imalá caphí richojé, uncachu ne'emalá riyucuna najló. Uncá caja meño'ojó nahue'epila riyucuna, uncachu ina'uqué i'ijnalá riyucuna i'imajé najló.

<sup>15</sup> Uncá caja meño'ojó ne'ejnalá riyucuna i'imajé, uncachu nahuacára'ajeri i'imalá. Marí que Tupana puráca'alo lana'aquejiami quemacá ajopana ina'uqué nacú: “Ina'uqué iphaño majó Tupana i'imataca ina'uqué capichaco liyá yucuna i'imajé huajló. ¡Meque palá huani nala'acá huecá raú! que nemacá.”

<sup>16</sup> E'iyonaja uncá piyuqueja calé a'año nanacojó riyucuna. Marí que Isaíasmi chu lana'acá riyucuna i'imacá: “Nuhuacára'ajeri, uncá na calé huátari huapuráca'alo ja'apiyá jema'acana,” que rimacá rijló.

<sup>17</sup> Tupana i'imatari ina'uqué capichácajo liyá Jesucristo palamane aú. Riyucuna ne'emá ina'uquejlo, napechu i'imacácaloje caphí Jesucristo chojé raú penaje.

<sup>18</sup> Caja Israelmi chu laquénami jema'año riyucuna i'imacá. Tupana puráca'alo lana'aquejiami quemari marí que nanacu:

Tupana huacára'ari ina'uqué i'ijnacá piyuque nate'eré nacuhúá riyucuna i'imajé najló.

Ritajáca'alo ehua hua'ató ne'ejná riyucuna i'imajé najló. Caja natajata riyucuna i'imacana piyuque ina'uquejlo, eja'ahuá chu i'imacaño.

<sup>19</sup> Israelmi chu laquénami hue'epiño riyucuna. E'iyonaja uncá na'alá nanacojó ricá. Marí cajé aú riyuró ajopánajlo. Marí que Moisesmi chu lana'acá riyucuna i'imacá:

Marí que Tupana quemacá Israelmi chu laquénami nacú:

No'ojé ajopana ina'uqué nujhua'atéjena penaje.

“Huahuejáputenami necá,” queja imacá nanacu.

Necá no'ojé nule'ejena ina'uqué penaje,

nuyúcha'atacaloje icá raú penaje, que Tupana quemacá najló i'imacá.

<sup>20</sup> Uncá Isaíasmi chu huo la'aló riyucuna i'imacana piyá. Quéchami piño rilana'acá riyucuna marí que:

Tupana quemari marí que:

Uncá hue'epilaño mecajeca nucá, necá hue'epéjeño nucá.

Uncá quejá'alaño nuyucuna, hue'epéjeño mecajeca nucá.

<sup>21</sup> Marí que piño Isaíasmi chu quemacá Israelmi chu laquénami nacú i'imacá: “Tupana quemari nanacu: Uncá ina'uqué huátalaño no'opiyá jema'acana. Chapú nahuó nuchá. Najló calé numá hua'ajini huani, napala'atácaloje napéchuhua pu'uhuaré nala'acare liyá penaje.”

## 11

*Tupana i'imatari Israelmi chu laquénami capichácajo liyá. Riyucuna marí:*

<sup>1</sup> Huapechu i'imaniya Israelmi chu laquénami nacú: “Tupana cupácarena necá” que. Uncá huani ricupácarena calé necá. Israelmi chu laquénami naquiyaana caja nucá. Abrahami chu i'imari hua'ajútami chu huani i'imacá. Benjamínmi chu i'imari Israelmi chu yaní naquiyaana. Rilauénami naquiyaana huani nucá.

<sup>2</sup> Uncá chiyó ne'emá, Tupana hue'epiri nanacu rile'ejena que. Chuhuaca uncá ricupálaje necá. Icó hue'epiño méqueca Tupana puráca'alo lana'aquejiami quemacá Elíasmi chu nacú. Tupana puráca'alo ja'apátajeri ri'imacá. Cajrú raca'acá ricá'ana maná Tupana hua'até pura'acano aú. Marí que rimacá rijló i'imacá:

<sup>3</sup> “Nuhuacára'ajeri Tupana, maca'aní nenoca pipuráca'alo ja'apátajeñomi chuna i'imacá. Caja nacajya'atá napirana na'acárena pijló nóquelana pucuna. Nucleja calé yuriro pajluhuaja, jema'ari pa'apiyá. Eyá chuhua naculaca nucá, nenócaloje nucá penaje,” que rimacá rijló i'imacá.

<sup>4</sup> E'iyonaja marí que Tupana quemacá rijló: “Uncá picaja calé jema'ari no'opiyá. Caja nulamá'ata nujluhua ne'iyaya siete mil ina'uqué. Uncá ajopana pechu que calé napechu. Ajopana tára'año ne'erúpachi aú Baal jenami jimaje, napechu i'imacale: ‘Huachi'ináricana ricá’ que. Necá, nulamá'atacarena nujluhua, uncá tára'alaño ne'erúpachi aú rijimaje,” que Tupana quemacá rijló i'imacá.

<sup>5</sup> Naqué caja ina'uqué me'etení. Re huejápaja judíona, rijluhua Tupana i'ihuapacárena necá. Ri'ihuapá necá rijluhua, rihue'epícale namu'ují i'imacá.

<sup>6</sup> Iná mu'ují hue'epícana aú, Tupana i'ihuapari rijluhua iná. Uncá ra'alá rinacójo nacaje iná la'acare, ri'ihuapacáloje iná rijluhua raú penaje. Tupana i'ihuapaquela rijluhua ina'uqué nacaje nala'acare aú, uncá namu'ují hue'epícana aú calé ri'ihuapacajla rijluhua necá.

<sup>7</sup> Marí que ri'imacale, uncá Israélni chu laquénami i'imalaño Tupana le'ejena. Tupana i'ihuapacárena, necaja calé i'imaño rille'ejena. Eyá necá, uncá jema'alaño ra'apiyá, necaja calé ricupá rille'ejena e'iyayá, nejnúcha'acole ra'apiyá jema'acana pachá.

<sup>8</sup> Marí que Tupana puráca'alo lana'aguéjami quemacá nanacu: Tupana la'arí napechu, ne'emacáloje me'ejhuiruna penaje, nahue'epica piyá meque quemacánaca nacaje rila'acare. Hua'ató rila'á napechu, nahue'epica piyá ripuráca'alo nacojé, que rimacá nanacu.

Caja queja najló ricá maárejecha.

<sup>9</sup> Marí que caja piño Davidmi chu quemacá nanacu: Nahuacájciano na'ajnehuá ajñaje, ri'imacáloje palá Tupana nacú penaje. E'iyonaja calé majopéjari que nala'acá ricá.

Aú calé na'ó pu'uhuaré la'acana chojé.

Richona Tupana huajájeri necá.

<sup>10</sup> Palani caja najló me'ejhuiruna que i'imacana.

Palani caja najló uncá amálaño que i'imacana, uncale nema'alá ra'apiyá.

Palani caja najló chapú caje yajhué amácana hua'ajini huani, que Davidmi chu quemacá nanacu i'imacá.

*Tupana i'imataca rijluhua ajopana ina'uqué capichácajo liyá yucuna marí:*

<sup>11</sup> Uncá Tupana liyá cupáquejanami que calé judíona i'imajica hua'ajini huani. Uncá huani Tupana yurila necá caja penaje huani. Tupana i'imatari ajopana ina'uqué rijluhua capichácajo liyá, uncá pachá judíona jema'alaño ra'apiyá i'imacá. Ñaquele ajopánajlo rácho'o palá, caphí napechu i'imacale Ne'emátájeri chojé. Ri'imatá ajopana ina'uqué, judíona pechu i'imacáloje caphí richojé ñaquele caja penaje.

<sup>12</sup> Uncá judíona jema'alaño Tupana ja'apiyá i'imacá. Aú calé Tupana a'arí ajopana ina'uqué, ne'emacáloje ripalamane raú penaje. Piyuqueja ina'uqué eja'ahuá chu i'imacaño i'imacáloje ripalamane penaje, ra'á necá. Uncale judíona la'alá Tupana huátaca que, ra'á ajopana ripalamane penaje. Marí que ricá ina'unquejlo me'etení. Cajrú judíona naquiyana pechu pajno'ojero Tupana ejo i'imajica, ne'emacáloje ra'apiyá jema'ajeño penaje. Napechu pajno'ojico rejo huacajé, richaje huani íqui'ica ina'uqué i'imajeño ripalamane.

<sup>13</sup> Uncá judíona calejlo numá marí que: Tupana huacára'ari núcá Jesucristo yucuna i'imajé ijlo. Palá napechu marí sápacaje nacú, Tupana a'acare nojló i'imacá.

<sup>14</sup> Nuhuata nunaquiyana judíona, pechúhua'aca ícá, Tupana i'imatácaloje necá capichácajo liyá penaje, ri'imataca ícá que caja.

<sup>15</sup> Tupana pechu pajno'oró judíona liyá i'imacá. Nalanáquiya ajopana ina'uqué pechu pajno'oró Tupana ejo, napechu i'imacáloje palá rinacu raú penaje. Tupana pajno'ojero piño riyámojo judíona ejo. Rihuacajé palá huani ri'imajica ina'unquejlo. Cajmuchaji i'imacá taca'acáñojlo, que ri'imajica ina'unquejlo rihuacajé.

<sup>16</sup> Abrahámi chu, Tupana puráca'alo ja'apátajeñomi chuna, quele i'imaño Tupana le'ejena ina'uqué i'imacá. Ñaquele nalaquénami naquiyana i'imajeño caja Tupana le'ejena.

<sup>17</sup> Caja Abrahámi chu laquénami naquiyana jácho'oño Tupana liyá. Eyá ajopana ina'uqué, uncá Abrahámi chu laquénami calé necá. Uncá caja Tupana le'ejena ina'uqué calé na'ajútayami chuna i'imacá. E'iyonaja Tupana a'arí nanaquiyana, ne'emacáloje rille'ejena penaje. Ñaquele chuhua Tupana palamane ícá, judíona i'imacá ripalamane que caja ícá.

<sup>18</sup> Imaniya inacuhúa: "Judíona chá'atajeño huecá" que. Apala ilé que ca'ajná ipechu inacuhúa. Ihue'epí marí: Uncá ipalamane aú calé Tupana i'imari palá. Ripalamane aú ja ícá i'imaño palá.

<sup>19</sup> Apala imá marí que: "Judíona naquiyana jácho'oño Tupana liyá, hue'emacáloje rille'ejena ina'uqué napumi chojé penaje."

<sup>20</sup> Que jo'ó ricá. Caja nácho'o riliyá i'imacá, uncale napechu i'imalá caphí Jesucristo chojé. Tupana le'ejena ícá me'etení, caphí ipechu i'imacale richojé. Ñaquele ila'aniya ícá chá'atajeño que huani judíona chaje. Amá ícá palá, ila'acá piyá pu'uhuaré.

<sup>21</sup> Uncá Tupana amalo judíona chaje, uncá pachá napechu i'imalá caphí Jesucristo chojé. Necá i'imaño rille'ejena ina'uqué naquiyana i'imacá. Uncá caja ramálajo ichaje, ipechu i'imajica ee napechu que caja.

<sup>22</sup> Ihue'epí marí: Palá huani Tupana la'acá ina'uqué. A'apona que rihuajáica ajopana cajrú, uncá jema'alaño ra'apiyá. Inacu rila'á palá, caphí ipechu i'imacá Jesucristo chojé quetana. Iyuríjica ee richojé i'imacana caphí, ícá caja jácho'ojeño rille'ejena ina'uqué chiyá.

<sup>23</sup> Caphí judíona pechu i'imajica ee Jesucristo chojé, Tupana a'ajeri piño necá ríle'ejena ina'uqué penaje. Tupana hue'epiri napa'atácana piño napumí chuhúa.

<sup>24</sup> Na'ajútayami chuna i'imaño Tupana le'ejena ina'uqué i'imacá. Marí que ne'emacale, huechi ra'ajica nalaquénami naquiyana ríle'ejena penaje. Eyá icá, uncá a'ajútayami chuna i'imalaño ríle'ejena ina'uqué. E'iyonaja calé ra'á icá, i'imacáloje ríle'ejena penaje.

*Caja penaje Tupana i'imatájeri Israel laquénami rijluhua capichácajo liyá. Riyucuna marí:*  
<sup>25</sup> Nojena, nuhuata ijló nacaje nacú quemacana, ila'acá piyá icó hue'epiño que huani. Palá Tupana huátacare la'acana i'imari micho'ojneji ina'uqué liyá i'imacá. Nuhuata ihue'epica riyucuna. Judíona naquiyana jema'año ijnú Tupana ja'apiyá i'imacá. Uncá ñaqueja huani calé ne'emajica. Marí que necá me'etení, ajopana ina'uqué i'imacáloje Jesucristo hua'atéjena penaje.

<sup>26</sup> Iqui'iruna ne'emajica ee rihuátajica ejé, ejéchami caja Tupana i'imatájica Israel laquénami naquiyana capichácajo liyá. Marí que Tupana puráca'alo lana'aquejami quemacá nanacu:

Pajluhuaja ina'uqué i'imajeri.

Je'echú eyaje rí'imajica.

Ricá i'imatájeri Israelmi chu laquénami pu'uhuaré la'acana liyá.

<sup>27</sup> Raú nuca'ajé pu'uhuaré nala'acare nanaquiyá, numacá nanacu júpimi i'imacá que, que Tupana quemacá nanacu i'imacá.

<sup>28</sup> Tupana a'arí Jesucristo, rí'imatácaloje ina'uqué capichácajo liyá penaje. Judíona uncá a'alaño nanacajó riyucuna i'imacá. Aú calé nala'á necó chapú péchuruna Tupana nacú. Palani ijló marí. Marí que ne'emacale, Tupana i'imatari icá capichácajo liyá. Ica jema'año Jesucristo ja'apiyá, aú rí'imatá icá. Tupana huajhuena jo'ó necá judíona, rí'ihuapacale rijluhua na'ajútayami chuna i'imacá.

<sup>29</sup> Uncá Tupana apiyácala ripechu. Rimá nalaquénami nacú, rila'acáloje necá palá penaje. Ñaquele palá rila'ajica necá. Uncá caja rácho'otala ina'uqué, rí'ihuapacá rijluhua necá ejomi.

<sup>30</sup> Júpimi icá uncá jema'alaño Tupana ja'apiyá i'imacá. Ianaquiyá que uncá judíona jema'alaño ra'apiyá. A'acuhuanaja Tupana hue'epiri imu'ují.

<sup>31</sup> Chuhua uncá judíona jema'alaño ra'apiyá. Júpimi i'imacá que caja necá me'etení. Rihue'epica imu'ují que caja rihue'epijica namu'ují piño.

<sup>32</sup> Nachuhuájena piyuque ina'uqué, uncá nema'alá ra'apiyá. Marí que huecá, rihue'epicaloje huamu'ují pajimato penaje.

<sup>33</sup> Hue'epiri huani Tupana. Uncá na huani calé yuriro riyami. Uncá na calé iphátari ripechu. Uncá caja na calé hue'epiri nacaje rila'acare nacojé.

<sup>34</sup> Uncá huahue'epila nacaje Tupana i'ijnatácare ripéchuhua nacú. Uncá meño'ojó hue-malá nacaje nacú rijló, rihue'epicaloje rinacajé penaje. Caja rihue'epi piyuqueja.

<sup>35</sup> Uncá caja na calé a'arí Tupánajlo nacaje, rapiyácaloje ricá nacaje aú penaje.

<sup>36</sup> Ricaja calé queño'ótari piyuqueja nacaje i'imacá. Tupana palamane calé piyuqueja nacaje. Ríle'ejé huánija piyuqueja nacaje. Napura'ajico Tupana nacú palá huani hua'ajini huani.

## 12

*Huahue'epicaloje huatucumó nacaje la'acana Tupánajlo penaje yucuna marí:*

<sup>1</sup> Nojena, íqui'i huani Tupana hue'epica huamu'ují. Ñaquele numá ijló: A'á icó rijló. Palani huani Tupánajlo, iná a'acachu iná icó rijló. A'á icó rijló, ihue'epicaloje itucumó rihuátaca que la'acana penaje. Marí que lana'acana la'ajeri pu'ují Tupana pechu inacu, rihuátaca que la'ajeño i'imacale.

<sup>2</sup> Ajopana ina'uqué la'año napechu queja marí eja'ahuá chu. Ipechu i'imaniya napechu que caja. Ipajno'otá caja ipéchuhua naliyá, ipechu i'imacáloje huajé chuhúa penaje. Raú ihue'epeje na aú ca iná la'acá Tupana huátaca que. Raú caja ihue'epeje naca palani, iná la'acáloje penaje. Raú caja ihue'epeje naca i'imajica palá Tupana nacú. Marí caje ihue'epeje huajé chuhúa i'imacana aú.

<sup>3</sup> Tupana palamane aú nu'umá Tupana puráca'alo yucuna ina'uquejlo. Ñaquele numá ijló piyuqueja: Ila'aníya huani icó chá'atajeño que. Ica'á ipéchuhua palani puráca'aloji nacajé. Tupana la'arí ipechu caphí richojé pajluhuano, pajluhuano que, ila'acáloje nacaje rihuátaca que raú penaje. Ñaquele ila'aníya inacuhá hue'epiño que huani.

<sup>4</sup> Re cajrú iná napona naquiyana: re iná ijlú, iná i'ijhuí, iná yáte'ela, caje macá. Pajluhuano, pajluhuano queja iná napona naquiyana la'acá que'iyapé nacaje.

<sup>5</sup> Ñaque caja huajló ricá. Pajluhuaja hua'atéjena naquiyana huecá. Pajluhua japi ricá queja huecá piyuqueja Jesucristo hua'até. Pañatéchaca a'acana nacuja huecá pajhuatéchaca.

<sup>6</sup> Huala'acáloje que'iyapé nacaje penaje, Tupana a'arí huajló hue'epícaje, huala'acáloje nacaje pajlocaca raú penaje. Ripochu palamane calé ra'á huajló, apujlo, apujlo que ricá. Ra'acá huajló hue'epícaje ejé, huala'ajé nacaje. Apala Tupana a'arí inajlo hue'epícaje, iná ja'apátacaloje ajopánajlo ripuráca'alo ra'apiyá que penaje. Marí que ri'imajica ee inajlo, iná ja'apátaca riyucuna najló. Iná pechu i'imacá caphí richojé ejé, iná ja'apata najló ripuráca'alo.

<sup>7</sup> Apala Tupana a'arí inajlo hue'epícaje, iná la'acáloje nacaje ajopánajlo raú penaje. Marí que ri'imajica ee inajlo, iná la'acá ricá palá. Hue'epícaje ra'acare inajlo locópa'alaja iná la'á ricá. Apú ca'ajná hue'epiri ina'uqué jehuñña'atacana palá Tupana Pechu palamane aú. Ricaja calé rihue'epeje ritucumó.

<sup>8</sup> Apala inaquiyana ca'ajná hue'epiño ina'uqué pechu pala'atácana palá Tupana Pechu palamane aú. Marí que i'imacaño hue'epéjeño natucumó ina'uqué pechu pala'atácana. Tupana Pechu palamane aú re ca'ajná apujlo ñó'ope nacaje, ra'acáloje camu'ují la'acañojlo penaje. Palani mamejajné ra'acá najló ricá. Re apú ca'ajná, rihue'epi Jesucristo ja'apiyá jema'ajeño huacára'acana palá Tupana Pechu palamane. Marí que ri'imajica ee rijló, huechi risápajica risápaca'ala nacú. Re ajopana ca'ajná, Tupana a'arí necá, camu'ují la'acáño ñaté a'ajeño penaje, na'acáloje chapú caje yajhué amájeño ñaté raú penaje. Marí que ri'imajica ee najló, napechu i'imajica pu'ují nañaté a'acana nacú.

*Nacaje Jesucristo ja'apiyá jema'ajeño la'acá yucuna marí:*

<sup>9</sup> Ihuata íqui'ija pecohuácaca. Ila'aniya íqui'ija ihuátaca pecohuácaca que majopeja. I'imaníya pajlácachina que pajhua'atéchaca. Quehuaca ihuátaca íqui'ija pecohuácaca. Ihuátaniya huani imanaicho la'acana, pu'uhuaré la'acana caje. I'iraó palá la'acana nacoje.

<sup>10</sup> Ihuata íqui'ija pecohuácaca, Jesucristo hua'atéjena i'imacale pajhua'atéchaca. I'imá caja ipe'é péchuruna pajlocaca. Huechi caja iphaca pa'apíchaca.

<sup>11</sup> I'imá caja caphí péchuruna sápacaje nacú. I'imaniya ijnuruna. Huéchija ila'acá nacaje Tupana huátacare caje.

<sup>12</sup> Ipechu i'imá pu'ují, Tupana a'ajícate ijlo piyuqueja nacaje. Nacaje ra'ajícate ijlo huátacana nacuja i'imajé. Ila'aniya icó tu'ujné chapú caje yajhué amácana ehuá. Ihue'epi Tupana hua'até pura'acáñoja itucumó.

<sup>13</sup> A'á ajopana Jesucristo ja'apiyá jema'ajeño ñaté, nacaje nala'acare camu'ují nacú aú. Imá ya'ajnao iphájicañojlo, nayurícoloje iñacaré chu ijhua'até penaje.

<sup>14</sup> Apala ina'uqué la'año icá chapú. Imá Tupánajlo, rila'achí necá palá. Imaniya rijló, rila'achí chapú necá.

<sup>15</sup> I'imá queyajupa queleruna queyajupa i'imacaño hua'até. Eyá queleruna iyaño, iyá caja najhua'até.

<sup>16</sup> Ipechu i'imá palá panacuhuácaca. Ila'aniya inacuhúa chá'atajeño que huani paliyácaca. Ila'aniya caja inacuhúa hue'epiño que huani. I'imá palá ja'apejé péchuruna hua'até.

<sup>17</sup> Apú la'acachu picá chapú, papiyácaníya pinacójó ricá. Ila'á nacaje, ri'imacáloje palá piyuqueja ina'uqué nacú penaje.

<sup>18</sup> Ila'á ipechu ejé, i'imacáloje palá piyuqueja ina'uqué hua'até penaje.

<sup>19</sup> Nojena, íqui'ija nuhuátacarena, ila'aniya ajopana chapú, nala'acá icá chapú que caja. Ipura'aniyo ile'ejé jacumi nacú. Reja Tupana huajáreja necá, chapú nala'acare icá chona. Marí que la'acana palani, Tupana puráca'alo lana'aquejami quemacale marí que: "Nucaja calé huajájeri ina'uqué chapú nala'acare chona. Nucaco pura'ajero ile'ejé jacumi nacú ijlo," que Tupana quemacá.

<sup>20</sup> Marí que piño Tupana puráca'alo lana'aquejami quemacá, ila'acáloje penaje: "Quehuí me'epejé i'imacachu chapú péchuri pináujlo, pa'á rijló a'ajnejí. Rinúru'upi chu macára'acochu, pa'á rijló i'iracaje. Palá pila'acá rinacu ilé que pila'acá aú, rapaña'ajo ra'apihuá raú."

<sup>21</sup> Pila'aniya chapú, ajopana la'acá picá que caja. Pa'apata piliyó pu'uhuaré la'acana, palá laca'acana aú.

## 13

<sup>1</sup> Jema'á pajimátoja ihuacára'ajeño ja'apiyá. Tupana a'arí necá piyuqueja, ne'emacáloje ihuacára'ajeño penaje.

<sup>2</sup> Uncachu ina'uqué jema'alá na'apiyá, uncá caja nahuátala Tupana ja'apiyá jema'acana. Uncá jema'alaño nahuacára'ajeño ja'apiyá, amájeño huajácaje yajhué.

<sup>3</sup> Uncá ihuacára'ajeño i'imalá, naquero'ótacaloje palá la'acáñojlo penaje. Re necá, nahuajácaloje pu'uhuaré la'acáño penaje. Ñaquele ila'á palá, nahuajáca icá. Palá ila'ajica ee rehuá, palá caja napura'ajico inacú.

<sup>4</sup> Tupana hua'até sápageño que caja necá ihuacára'ajeño. I'imacáloje palá na'apiyá penaje necá. Ila'acachu pu'uhuaré, i'ímá quero'ocajo nací, nahuajácale icá. Tupánajlo sápageño queja necá. Tupana apumí chojé queja caja nahuajaca pu'uhuaré la'acaño.

<sup>5</sup> Ñaque i'imacale jema'á ihuacára'ajeño ja'apiyá. Jema'á na'apiyá, nahuajaca piyá icá. Jema'á caja na'apiyá, ihue'epicale palá iná la'acá na'apiyá jema'acana au.

<sup>6</sup> Ihuacára'ajeño sápaño Tupánajlo. Nasápaca'ala la'acanaja nahue'epí natucumó. Nahuacára'a ina'uqué a'acá najló naliñérute naquiñana, nala'acáloje nacaje ina'uquejlo rehuá penaje.

<sup>7</sup> Liñeru naquejá'acare iliyá, a'á caja najló ricá. Iphá caja na'apí. Ipechu i'ímá nanacu palá. Marí que i'imajica ihuacára'ajeño hua'até.

<sup>8</sup> Eyá marí que i'imajica pajhua'atéchaca rehuá. Ihehuériniya pajlocaca liñeru au. A'á najló ilehuéricare huemí, itajátacaloje iliyó lehuéricaje penaje. Ihuata ajopana íqui'ija. Itajátaniya iliyó ajopana huátacana íqui'ija. Íqui'ija ajopana huátacana au iná jema'á Tupana puráca'alo jupichumi lana'aquejami ja'apiyá.

<sup>9</sup> Marí que Tupana puráca'alo lana'aquejami jupichumi quemacá: “Uncá achiñana, inaana quele la'ajeño namanaicho pajhua'atéchaca. Pipajlániya caja ajopana ina'uqué nací. Pihuátaniya caja pijluhua apú le'ejé nacaje.” Marí que ripuráca'alo naquiñana huacára'aca iná. Re apú, apú que ripuráca'alo quemacare nací. Íqui'ija ajopana huátacana au iná jema'á ripuráca'alo ja'apiyá piyuqueja. Marí que Jesucristo huacára'aca iná: “Pihuata íqui'ija ajopana ina'uqué, picó pihuátaca que caja pihuátaca necá,” que rimacá. Ra'apiyá jema'acana au iná la'á caja piyuque ripuráca'alo jupichumi huacára'aca que.

<sup>10</sup> Huátari íqui'ija ajopana ina'uqué, uncá la'alaje chapú necá. Íqui'ija ajopana huátacana au iná la'á pajimato nacaje Tupana puráca'alo jupichumi quemacá que.

<sup>11</sup> Jema'á ra'apiyá hue'echú ca'alá i'imacá huajló quietana. Yehuicha hue'ematajéri huá'ajica huecá je'echú chojé. Caja ihue'epí uncá hue'echú ca'alá yurilo cajrú huajló, riyurico huajló júpimi i'imacá que caja. Huajé huaqueño'ocá Tupana puráca'alo ja'apiyá jema'acana huacajé riyuró richaje huajló i'imacá.

<sup>12</sup> Cajrú ina'uqué me'etení pu'uhuaré la'acana nací, namanaicho la'acana nacuja necá. Yehuicha Jesucristo huaicha. Riphájica reyá a'ajná ño'ojó uncá pu'uhuaré la'acana i'imalaje. Ñaquele huala'aniya pu'uhuaré ajopana ina'uqué la'acá que caja. Uncá jema'alaño Tupana ja'apiyá numá nací. Caphí hue'emajica ee Tupana chojé, huala'á palá rihuátaca que. Marí caje au ja hua'apátaje hualiyá pu'uhuaré la'acana.

<sup>13</sup> Jesucristo la'ari huapechu palá. Raú calé huahue'epí palá la'acana nacojé. Ñaquele huala'ajé riloco'opáneje palá. Uncá caja huayuhuéra'alajo. Uncá caja huahuíyo'olaje fiesta la'acana e'iyohuá. Uncá caja huala'alaje huamanaicho. Uncá caja hue'emalaje uncá ina'uquélaruna que. Uncá caja huenócalajo pajhua'atéchaca. Uncá caja huapechu i'imalaje chapú ajopana ina'uqué nací, nachá'atajica huecá au.

<sup>14</sup> Uncá ila'alaje ilé que. Marí queja ila'ajica: Jesucristo chojé ipechu i'imajé caphí, ila'acáloje palá Ripechu au rihuátaca que penaje. Ila'aníyaja ipechu queja imanaicho, ihuátacare caje.

## 14

*Iná quemacá piyá majopeja iná naquiñana nací “Pu'uhuaré la'ajeño necá” que, penaje marí puráca'aloji:*

<sup>1</sup> Re ca'ajná ajopana, nahuata ijhua'até jahuacácana. Caphí péchuruna Jesucristo chojé necá. E'iyonaja uncá jo'ó ca'ajná nahue'epila palá naca palani, iná la'acáloje penaje. Imá najló, nahuacácoloje ijhua'até penaje. I'ímá najhua'até palá. Aca'ácaniyo najhua'até, uncale ipechu que calé napechu.

<sup>2</sup> Marí que ca'ajná ricá: Re ina'uqué, piyuque ajñácaño necá. Re caja ajopana uncá hue'epílaño palá Tupana puráca'alo nacojé. Au uncá najñala ri'ími, napechu i'imacale: “Uncá paala iná la'acá ri'ími ajñacana au.”

<sup>3</sup> Marí que napechu i'imacale, piyuqueja ajñácaño la'año ca'ajná uncá ajñálaño ri'ími tejena. Marí nala'acana uncá paala. Eyá uncá ajñálaño ri'ími quemañó ca'ajná ajopana nací: “Uncá paala nala'acá ri'ími ajñacana au” que. Uncá paala ilé que nanacu quemacana, Tupana a'acale caja necá rijhua'atéjena penaje.

<sup>4</sup> Uncá na penaje calé pimá apú Tupana hua'ateje nací na au ca rila'acá pu'uhuaré. Tupana rihuacára'ajeri. Ricá quemájeri rijló na au ca rila'acá palá ca'ajná, na au ca rila'acá pu'uhuaré ca'ajná. Tupana a'ajica riñaté, rila'acáloje palá penaje.

<sup>5</sup> Marí que piño que'iyapé ina'uqué pechu nacaje nací: Ne'iyajénajlo huaphereni fiesta. Ajopana uncá a'alaño fiesta nanacojó. Rejenohuaja najló hue'echú ca'alá. Palani pajluhuano queja ihue'epica méqueca ijló ricá.

<sup>6</sup> Ne'iyajena iphaño fiesta i'imacá huacajé ja'apí, napechu i'imacale: "Ra'apí iphácana aú iná la'á Tupana huátaca que." Ajopana piño uncá iphálaño ra'apí. Napechu i'imacale rinacu: "Uncachu iná iphala ra'apí, iná la'á Tupana huátaca que." Piyuqueja ajñájeño ajñaño a'ajnejí pajimato, napechu i'imacale: "Palá iná la'acá Tupana huátaca que raú." Nemá Tupánajlo: "Palá pila'acá huecá marí a'ajnejí aú" que. Ajopana, uncá ajñálaño piyuqueja a'ajnejí, napechu i'imacale: "Tupana huátaca que iná la'á, uncachu iná ajñala piyuque a'ajnejí." Ñaqué caja nemacá Tupánajlo: "Palá pila'acá huecá raú" que.

<sup>7</sup> Uncá na calé i'imárijla ricó huacára'ajeri que, ri'imacáloje rihuátaca que penaje, ritaca'acáloje rihuátaca que penaje.

<sup>8</sup> Eja'ahuá chu huecá ra'apiyá jema'ajeño, huala'acáloje Tupana huátaca que penaje. Huataca'ajica ee, hue'ejnajé Tupana hua'até i'imajé. Tupana le'ejena huánija huecá marí eja'ahuá chu. Huataca'ajica ee, ñaqué caja Tupana le'ejena hue'emajica.

<sup>9</sup> Jesucristo taca'arí i'imacá. Ejomi rimacápo'o piño, ri'imacáloje Huahuacára'ajeri penaje. Caphí richojé péchuruna huacára'ajeri ricá. Cajmuruna huacára'ajeri ricá. Caja taca'acaño huacára'ajeri caja ricá.

<sup>10</sup> ¡Picá ta! ¿Naje pimá pinaquiayana nacú: "Uncá paala nala'acá" que? ¿Naje pila'á natejena? Piyuqueja huecá tára'ajeño Jesucristo jimaje, rimacáloje huanacu na aú ca huala'acá palá, na aú ca huala'acá pu'uhuaré penaje.

<sup>11</sup> Marí que Tupana puráca'alo lana'aquejami quemacá rinacu: Cajmuni nucá, que Tupana quemacá.

Piyuqueja huani ina'uqué tára'ajeño ne'erúpachi aú nujimaje. Ajopana jimaje que nemájica nunacu:

"Huachi'ináricana ricá" que.

<sup>12</sup> Marí que ri'imajica huajló. Piyuqueja huecá tára'ajeño pajluhuano, pajluhuano que Tupana jimaje, rimacáloje huajló méqueca rijló nacaje huala'acare hue'emacá marí eja'ahuá chu quetana.

*Ri'imacáloje palani ajopana ina'ueqejlo penaje huala'á nacaje. Riyucuna marí:*

<sup>13</sup> Marí que ri'imajicale, uncá paala iná quemacá ajopana Jesucristo hua'atéjena naquiayana nacú: "Pu'uhuaré la'ajeño necá" que. Eyá marí que ila'ajica: Ihue'epí nacaje la'acana itucumó, ri'imacáloje ajopánajloje palá penaje. Marí caje aú uncá amátalaje necá pu'uhuaré la'acana aú.

<sup>14</sup> Jesucristo hua'ateje nu'umacale, nuhue'epí palá uncá iná la'alá pu'uhuaré piyuque a'ajnejí ajñacana aú. Re ajopana ina'uqué, napechu i'imá a'ajnejí naquiayana nacú: "Pu'uhuaré iná la'acá rajñacana aú." Najñácahu ricá, nala'á pu'uhuaré, napechu i'imacale: "Pu'uhuaré iná la'acá rajñacana aú."

<sup>15</sup> A'ajnejí pajñácare aú ca'ajná pinaquiayana pechu la'aró ujhuí piliyá. Marí que la'acana uncá paala. Uncale pihuátala ricá iquí'ija, pila'á ilé que. Cacáme'e pi'imacare pihuátacare ajñacana nacú chona ca'ajná, papichátaje pinaquiayana Tupánajlo. Richaya caja Jesucristo taca'arí a'ahuná apiyácanami nacojé i'imacá.

<sup>16</sup> Apala pihue'epí palá uncá pu'uhuaré la'acana calé pila'acare. Uncá ñaqué calé ca'ajná ajopana ina'uqué pechu i'imacá pinacu. Aú nachapújra'o pinacu. Uncá pila'alá pu'uhuaré raú. E'iyonaja pila'aníya ricá, napura'acó piyá pinacu ilé que pila'acá aú.

<sup>17</sup> Uncá na penaje calé hua'á huanacajó huajñácare nacú, hue'erácare nacú hua'ató. Huahuacára'ajeri calé Tupana. Rihuata hua'acá huanacajó palá la'acana. Rihuata caja hue'emacá palá pajhua'atéchaca. Tupana Pechu la'arí huapechu pu'ují. Marí caje rihuata huajló.

<sup>18</sup> Marí que la'acaño la'año Tupana huátaca que. Marí que nala'acá palá Jesucristojlo. Palani caja ina'ueqejlo ricá.

<sup>19</sup> Ñaqué i'imacale huala'ajé nacaje, hue'emacáloje pajhua'atéchaca palá raú penaje. Hua'ajica pañatéchaca, huapechu i'imacáloje richaje, richájeno que Jesucristo chojé caphí penaje.

<sup>20</sup> Tupana huátari ina'uqué la'acana palá. Ñaquele papichátaniya nacaje Tupana huátacare la'acana a'ajnejí pajñácare aú. Piyuque a'ajnejí palani. Uncá iná la'alá pu'uhuaré rajñacana aú. Eyá marí que iná la'acá pu'uhuaré a'ajnejí naquiayana ajñacana aú: Iná la'á pu'uhuaré rajñacana aú, huanaquiayana pechu la'acochu ujhuí Tupana liyá raú, ripechu i'imacale: "Pu'uhuaré iná la'acá rajñacana aú." Marí que napechu i'imajica ee iná nacú, uncá huani paala rajñacana.

<sup>21</sup> Uncá huajñálaje ri'ími ca'ajná, uncá caja hue'erálaje cajmú caje jalá amúra'atacanami ca'ajná, huanaquiayana pechu la'ajico ee ujhuí Tupana liyá raú. Uncá huani huala'alaje nacaje, napechu pajno'ojico ee Tupana liyá raú.



<sup>22</sup> Apala pihue'epí uncá iná la'alá pu'uhuaré iná ajñácare aú. Pi'imaniya riyucuna ajopánajlo. Tupana hue'epiri méqueca ricá. Eyá picá hue'epiri caja méqueca pipechu nacú ricá. Pila'acachu ricá Tupana huátaca que, palánija pijló ricá. Apala iná la'á nacaje. Iná hue'epí palá uncá iná la'alá pu'uhuaré raú. Pu'ují iná pechu i'imacá raú.

<sup>23</sup> Eyá uncá ca'ajná pihue'epila palá a'ajnejí pajñacare nacojé. Uncá pihue'epila ca'ajná méqueca Tupánajlo ricá, palani ca'ajná, pu'uhuarieni ca'ajná. E'iyonaja pajñá ricá. Raú pila'á pu'uhuaré, uncale pihuátala piyuqueja nacaje la'acana Tupana huátaca que huani. Uncá ca'ajná iná hue'epila palá méqueca Tupánajlo, ricá nacaje iná huátacare la'acana. E'iyonaja iná la'á ricá. Raú iná la'á pu'uhuaré.

## 15

*Iná la'acáloje nacaje ajopana ina'uquéjloje penaje yucuna marí:*

<sup>1</sup> Hue'iyajena hue'epiño palá méqueca nacaje la'acana Tupana huátaca que. Ajopana huanaiyana uncá hue'epiño palá. Huecá, caja hue'epiño, a'ajeño nañaté, nephátacaloje huapechu raú penaje. Uncá paala inajlúhuaja calé iná la'acá nacaje.

<sup>2</sup> Piyuqueja huecá la'ajeño nacaje, ri'imacáloje palá ajopana ina'uquéjloje penaje. Iná la'á nacaje ajopana pechu i'imacáloje richaje, richájeno que caphí Tupana chojé raú.

<sup>3</sup> Uncá caja Jesucristo la'alá rihuátaca que huani i'imacá. Tupana puráca'alo lana'aquejami quemacá que rinacu, que ri'imacá Jesusjlo. Marí que rimacá Jesucristo nacú: "Chapú ina'uqué huo i'imacá Tupana cha. Marí que ri'imacale, napura'ó rinacu pu'uhuaré," que rimacá rinacu.

<sup>4</sup> Tupana puráca'alo jupichumi, nalana'á huajlojé penaje, rehuíña'atacaloje huecá penaje. Tupana puráca'aloja calé la'arí huenacú. Rihue'epicana aú uncá huapechu la'aló ujhuí rilíyá. Nacaje i'imajica huajló Tupana quemacá que huanacu. Marí caje huátacana nacú hue'emajé.

<sup>5</sup> Tupana la'arí iná pechu palá, iná i'imacáloje caphí péchuri penaje. Ra'apata iná pechu naquiya ujhuí caje. Ra'á caja huañaté, hue'emacáloje palá pajhua'atéchaca raú penaje. Ra'á caja huañaté, huapechu i'imacáloje rejenohuaja panacóchéchaca que penaje. Marí caje aú hue'emajé Huahuacára'ajeri Jesucristo quemacá que huanacu.

<sup>6</sup> Marí que hue'emajica ee, huecá piyuqueja pura'ajeño palá Tupana nacú. Hue'emacana huani, Jesucristo Jara'apá ricá. Ricá nacú huapura'ajó palá huani.

*Ajopana naquiayana jema'año caja Tupana i'imataca ina'uqué capichácajo líyá yucuna. Riyucuna marí:*

<sup>7</sup> Ipechu i'imá palá panacuhuácaca. Jesucristo pechu i'imacá huanacu palá, que caja ipechu i'imajica panacuhuácaca. Marí que ipechu i'imajica aú ajopana ina'uqué amájeño méqueca Tupana la'acá ina'uqué palá.

<sup>8</sup> Ihue'epí marí: Jesucristo íphari majó nacaje la'ajé, ri'imacáloje palá judíonajloje penaje. Marí que rila'acá aú, iná hue'epí quehuaca Tupana quemacá hua'ajútayami chúnajlo i'imacá.

<sup>9</sup> Riphá caja majó i'imacá, ajopana ina'uqué ñaté a'ajeri penaje. Uncá judíona calé necá. Rihue'epí namu'ují i'imacá, aú napura'ó rinacu palá. Uncá chiyó ri'imá, ñaque rinacu quemacana i'imacá. Marí que Tupana puráca'alo lana'aquejami quemacá rinacu:

Palá pila'acare nucá yucuna nu'umajé pijló ajopana ina'uqué e'iyá.

Uncá judíona calé necá numá nacú.

Notaneje caja pijló Tupana yale, pu'ují nupechu i'imacale pinacu.

<sup>10</sup> Apa'amá caja ripuráca'alo naquiayana quemari piño marí que:

Ajopana ina'uqué ícá; uncá judíona calé ícá.

Ijló numá: Ipechu i'imajé pu'ují ajopana ina'uqué hua'até.

Rile'ejena ina'uqué, judíona hua'até ipechu i'imajé pu'ují.

<sup>11</sup> Apa'amá caja quemari:

Uncá judíona calejlo numá: Ipura'ó palá Tupana nacú.

Piyuqueja ina'uquejlo numá: Ipura'ó rinacu palá huani.

<sup>12</sup> Apa'amá caja, Isaíasmi chu lana'acare i'imacá, quemari marí que:

Pajluhuaja calé Isaíasmi chu laquemi i'imajeri.

Uncá judíona calé naquiayana huacára'ajeri penaje ri'imajica.

Ricá chojé napechu i'imajé caphí, que rimacá.

<sup>13</sup> Huapechu i'imacare chojé caphí Tupana. Nuhuata caja rila'acá ipechu pu'ují; nuhuata caja rila'acá ipechu palá. Marí que rila'acá ícá, ipechu i'imacale richojé caphí. Tupana Pechu aú richaje, richaje que ipechu i'imajica caphí Tupana chojé.

<sup>14</sup> Nojena, nuhue'epí palá la'acaño ícá. Cajrú ihue'epica quehuácaje puráca'aloji nacojé. Ñaquele ihue'epí penacúchaca la'acana raú.

<sup>15</sup> Numá que'iyapejé nacaje nacú ijló marí puráca'aloji nulana'acare ijló e'iyá. Uncá nohuó la'aló riyucuna i'ímacana ijló ja'apejé. Nulana'á ijló riyucuna, ipechu capicháñaca piyá ricá. Tupana Pechu palamane aú nohuíña'ata icá rinacu.

<sup>16</sup> Raú nula'á Jesucristo huátaca que. No'ó uncá judíona calé naquiyana ñaté. Marí nusápaca'ala: Yucu nu'umá ijló, inaquiyanajlo hua'ató. Tupana i'ímataca rijluhua ina'uqué capichácajo liyá yucuna nu'umá ina'uquejlo, nema'acáloje ra'apiyá raú penaje. Ne'emacáloje Tupana hua'atéjena raú penaje. Penaje nu'umá najló riyucuna. Tupana Pechu aú ina'uqué i'ímaño Tupana le'ejena.

<sup>17</sup> Jesucristo chuhúá nu'umacale, pu'ují nupechu nula'acare nacú. Tupánajlo nula'á nusápaca'ala.

<sup>18</sup> Jesucristo palamane aú no'ó ina'uqué ñaté, ne'emacáloje Tupana hua'atéjena raú penaje. Ripechu palamane aú palani nacaje nula'acare. Palá nula'acale ne'iyohuá, ne'iyajena jema'año ra'apiyá. Ripuráca'alo yucuna caja nu'umá najló. Aú nema'á Tupana ja'apiyá.

<sup>19</sup> Tupana Pechu aú nula'á ne'iyohuá nacaje, uncá meño'ojó apú la'alare. Ricá i'mari noná que'ená penaje, nahue'epicaloje nucá raú penaje. Marí caje aú nuqueño'ó riyucuna i'ímacana pajímila Jerusalén ehuá. Ajopana ñacajela nacojé, ajopana ñacajela nacojé que nu'ujnacá Jesucristo yucuna i'ímajé najló. Ya'ajnaje lírico te'eré ejé nu'umá riyucuna i'ímajé najló.

<sup>20</sup> Nupechu nacuja ricá, nu'ujnacáloje uncá huani jema'alaño riyucuna ejo. Rejo nuhuata i'íjnacana Jesucristo yucuna i'ímajé najló. Uncá nuhuátala i'íjnacana riyucuna i'ímajé caja hue'epiño riyucuna ehuá que.

<sup>21</sup> Tupana puráca'alo lana'aquėjami quemacá que Jesucristo nacú, queja ricá. Marí que rimacá:

Ricá pajluhua ina'uqué, Tupana a'acare ina'uqué i'ímatájeri penaje, yucuna ne'emajé najló. Uncá hue'epílaño riyucuna, hue'epéjeño ricá, que rimacá.

*Pablo huátaca Roma ejo i'íjnacana yucuna marí:*

<sup>22</sup> Pulapé nu'ujnataca nupéchuhua íchaje i'íjnacana nacú. Jesucristo yucuna i'ímacana nacuja nucá. Uncá meño'ojó nu'ujnalá íchaje, nuhuátaca que.

<sup>23</sup> Caja nuñapata riyucuna i'ímacana rehuá. Caja júpicha huani nuhuata íchaje i'íjnacana.

<sup>24</sup> Ñaquele chuhua nu'ujnajica íchaje. España te'eré ejo nuhuata i'íjnacana, rapunana chu nomaje icá. Ejéchami queyajupa hue'emajica pajhua'atéchaca. Reyá no'opaje piño ají que España te'eré ejo. Eco a'á Jerusalé nacaje, nu'ujnacáloje rejo raú penaje.

<sup>25</sup> Pamineco nu'ujnajé Jerusalén ejo líñeru a'ajé huanaquiyánajlo. Jesucristo hua'atéjena caja necá.

<sup>26</sup> Jesucristo hua'atéjena Macedonia e i'ímacaño, Acaya e i'ímacaño, quele jahuacátaño líñeru, nu'ujnatácaloje ricá camu'ují la'acáñojlo rejo penaje.

<sup>27</sup> Necó nahuátaca líñeru huacára'acana Jerusalén ejo, judíonajlo. Nahuacára'a najló líñeru. Marí cajé aú nala'á necá palá. Jesucristo hua'atéjena, judíona naquiyana, ja'apátacale najló Tupana puráca'alo i'ímacá, nahuata nala'acana palá.

<sup>28</sup> No'ojica najló líñeru, nahuacátacare najló i'ímacá pamineco. Ejomi nu'ujnajé España te'eré ejo. Rapunana chu nomaje icá.

<sup>29</sup> Nuhue'epí nuphájica penaje no'opátajica ijló Jesucristo puráca'alo. Aú ipechu i'ímajé pu'ují ripuráca'alo jema'acana nacú.

<sup>30</sup> Nojena, hue'emacana Jesucristo chuhúá i'ímacaño huecá. Tupana Pechu la'arí huapechu palá, huahuátacaloje íqui'ija pecohuácaca penaje. Ñaquele numá ijló, ipura'acóloje Tupana hua'até cajrú nunacu penaje, no'opátacaloje pu'uhuaré caje la'acana napechu naquiyá raú penaje.

<sup>31</sup> Ipura'ó caja Tupana hua'até nunacu, rimejñátacaloje nucá ajopana ina'uqué liyá penaje. Uncá Jesucristo ja'apiyá jema'ajeño calé necá numá nacú. Judea te'eré eyájena necá. Jerusalén ejo nu'ujnajé líñeru a'ajé huanaquiyánajlo. Ipura'ó caja rijhua'até, napechu i'ímacáloje pu'ují no'ojicare najló líñeru aú penaje.

<sup>32</sup> Tupana huátajica ee, nuphaje inacu. Ipura'ó caja rijhua'até nunacu, nuphácaloje inacu palá penaje, nupechu i'ímacáloje pu'ují inacu raú penaje. Hue'emacáloje queyajupa pajhua'atéchaca penaje, ipura'ó Tupana hua'até nunacu.

<sup>33</sup> Tupana la'arí iná pechu palá. Nuhuata Ripechu i'ímacá ijhua'até piyuqueja. Marí queja ri'ímajica.

<sup>1</sup> Numá ijlo Febe nacú, ipechu i'imacáloje palá runacu penaje, ruphájica inacu huacajé. Jesucristo ja'apiyá jema'ajejo caja rucá. Cajrú ro'ocá Jesucristo ja'apiyá jema'ajeño ñaté pajimila Cencrea e.

<sup>2</sup> Palá Jesucristo hua'atéjena pechu i'imacá panacuhuácaca. Ñaque caja ipechu i'imajica runacu, Jesucristo hua'atéjeru caja ru'umacale. Eco a'á caja inacojó rucá, cajrú ina'uqué ñaté a'ajejo ru'umacale. Nuñaté caja ro'ó i'imacá.

<sup>3</sup> Eco palá Príscajlo, Aquilajlo, hua'até ca'ajno. Nujhuáque'ena ne'emacá Jesucristo sápacala la'acana nacú i'imacá.

<sup>4</sup> Na'ájla necó taca'acájeljo nuchaya penaje, nu'umacáloje capichácajo liyá napalamane aú penaje. Palá huani nala'acajla nucá raú. Ajopana quemáño caja ñaque caja nanacu. Jesucristo hua'atéjena, unca judíona calé jahuacaño apalá chojé, apalá chojé que. Necá caja quemáño nanacu: "Palá huanacu la'acaño necá" que.

<sup>5</sup> Eco palá Jesucristo hua'atéjenajlo, jahuacaño Prisca, Aquila, quele ñacaré chojéjlo. Eco palá Epenétojo. Iqui'ija nuhuátacare ricá. Asia te'eré e nu'umaqué huacajé, ricá queño'orí Jesucristo ja'apiyá jema'acana ajopana piyá.

<sup>6</sup> Eco palá Mariájlo ca'ajno. Cajrú rula'acá Tupana huátacare caje e'iyohuá.

<sup>7</sup> Eco palá nutelónajlo, Andrónico, Junias, quélejlo. Ina'uqué huajáquelana chu nu'umaqué huacajé, necá i'imaño nujhuáque'ena i'imacá. Palá caja ajopana Jesucristo huacára'acarena pechu nanacu. Nupiyá napechu i'imá caphí Jesucristo chojé i'imacá, ri'imacáloje ne'ematajéri penaje.

<sup>8</sup> Eco palá Ampliatojo ca'ajno. Iqui'ija nuhuátacare ricá. No'ohué que ricá, Jesucristo ja'apiyá jema'ajeño hue'emacale rijhua'até.

<sup>9</sup> Eco palá Urbánajlo ca'ajno. Huajhuáque'ehue ri'imacá Jesucristo sápacala la'acana nacú. Eco palá caja Estáquisjlo. Iqui'ija nuhuátacare caja ricá.

<sup>10</sup> Eco palá Apélesjlo ca'ajno. Palá rila'acare aú iná hue'epí caphí Jesucristo chojé péchuri ricá. Eco palá caja Aristóbulojlo, riyájalojlo, riyánijlo, quélejlo.

<sup>11</sup> Eco palá nuteló, Herodiónjlo. Eco palá caja Narcísojlo, rejénajlo, quele hua'até. Jesucristo ja'apiyá jema'ajeño caja necá.

<sup>12</sup> Eco palá Trifénajlo, Trifósajlo, quélejlo ca'ajno. Cajrú nasápaca hue'emacana Jesucristo huátacare caje la'acana nacú. Eco palá no'ohueló Pérsidajlo. No'ohueló que caja rucá, Jesucristo ja'apiyá jema'ajeño hue'emacale rujhua'até. Iqui'ija nuhuátacareru caja rucá. Caja cajrú rula'acá nacaje hue'emacana Jesucristojlo.

<sup>13</sup> Eco palá Rúfojlo. Palá rema'acá Jesucristo ja'apiyá. Eco palá caja ralojlo. Noló queja caja nuhue'epica runacu.

<sup>14</sup> Eco palá Asíncritojlo, Flegóntejlo, Hérmajlo, Patróbajlo, quélejlo palá ca'ajno. Eco palá caja huejena najhua'até i'imacáñojlo.

<sup>15</sup> Eco palá caja Filólogojlo, Júliajlo, Neréojlo, re'ehueló huánijlo, Olímpasjlo, quélejlo palá ca'ajno. Eco palá caja Jesucristo hua'atéjena i'imacáño najhua'atejlo.

<sup>16</sup> Tupana huátaca que ajalaca pecohuácaca palá íqui'ija pecohuácaca huátacaño queja. Re cajrú Jesucristo hua'atéjena maárohua. Apalá chojé, apalá chojé que nahuacaco. Piyuqueja necá quemáño inacu: "Eco palá najló ca'ajno."

<sup>17</sup> Nojena, nuhuata ihue'epica palá marí: Eco amá palá icó, amácaloje mecajenaca ina'uqué apichátaca ina'uqué pajlocaca. Ihue'epí mecajenaca ja'apátaño ina'uqué palani puráca'aloji chiyá. Unca nehuiña'atala ina'uqué ricá puráca'aloji nacú ihue'epicare.

<sup>18</sup> Ila'á natejena, uncale nala'alá hue'emacana Jesucristo huátaca que. Nacaje i'imacáloje palani najluhua penaje, nala'á nacaje. Huejapa péchuruna i'imacáño hua'até napajlano napuráca'alo aú. Palani japi ricá queja pu'uhuarieni puráca'aloji jácho'oco nanuma chiyá. Majopeja napajlaca najhua'até. Unca quehuaca calé nemacá.

<sup>19</sup> Piyuque ina'uqué hue'epiño icá jema'acá palá Jesucristo ja'apiyá. Pu'ují nupechu la'acó raú. Nuhuata ihue'epica palá huani la'acana nacojé. Unca nuhuátala ihue'epica pu'uhuaré la'acana nacojé.

<sup>20</sup> Tupana la'arí huapechu palá, hue'emacáloje palá pajhua'atéchaca raú penaje. Yehuichaja ricapichátaca Jiñá Ch'i'ináricana iliyá. Nuhuata Hue'emacana, Jesucristo, la'acá icá palá raú.

<sup>21</sup> Timoteo quemari inacu: "Eco palá najló ca'ajno." Nujhuáque'ehue ricá nusápaca'ala la'acana nacú. Nutelona, Lucio, Jasón, Sosípater, quele quemáño caja inacu: "Eco palá najló ca'ajno."

<sup>22</sup> Nucá, Tercio, lana'arí marí papera chojé Pablo ja'apiyá. Nucá quemari caja inacu: "Eco palá najló." Pajñacani huapechu Jesucristo chojé caphí ijhua'até.

<sup>23</sup> Ñaque caja Gayo quemacá inacu: "Eco palá najló ca'ajno. Rijhua'até nucá maare riñacaré chu. Riñacaré chu caja huahuacó, huecá Jesucristo hua'atéjena. Erasto piño

quemari inacu: “Eco palá najló ca'ajno.” Pajimila eruna liñerute lamá'atajeri ricá. Apú huanaguiyana, Cuarto rii, quemari ñaqueé caja inacu: “Eco palá najló ca'ajno.”

<sup>24</sup> Nuhuata Hue'emacana, Jesucristo, la'acá piyuqueja icá palá. Marí queja ri'imajica.

*Palá ripura'acó Tupana nacú yucuna marí:*

<sup>25</sup> Palani huapura'acó Tupana nacú palá. Ricá hue'epiri huapechu lamá'atacana, huapechu yurícoloje palani puráca'aloji chuhuaaja penaje. Nucá ja'apátari ijlo Jesucristo puráca'alo i'amacá. Tupana i'imatata rijluhua ina'uqué capichácajo liyá yucuna nu'umá ijlo i'amacá. Tupana a'ari riyucuna pu'uhuacajé i'amacá. Uncá chiyó eja'ahuá i'imá, marí que la'acana i'imari Tupana pechu nacú i'amacá. Micho'ojneji queja riyucuna i'amacá ina'uqué liyá.

<sup>26</sup> Chuhua pu'uhuacajé ina'uquejlo ricá. Tupana puráca'alo ja'apátajeñomi chuna lana'año riyucuna papera chojé i'amacá. Uncá tajnácajo penaje calé i'amacá Tupana. Ricá huacára'ari riyucuna i'amacana piyuqueja eja'ahuá chu i'amacáñojlo, napechu i'amacáloje caphí Jesucristo chojé raú penaje. Nala'acáloje Tupana huátaca que ra'apiyá i'amacana aú penaje. Marí caje penaje rihuacára'a riyucuna i'amacana piyuqueja ina'uquejlo.

<sup>27</sup> ¡Ricaja calé Tupana hue'epiri piyuqueja nacaje nacojé! Jesucristo palamane huecá. Ñaquele huapura'ó Tupana nacú palá huani hua'ajini huani. Caja quetana riyucuna.

## 1 CORINTIOS Introducción

*Huahue'epícaloje na penájeca San Pablo huacára'aca najló marí puráca'aloji yucuna marí:*

Jesucristo huacára'acarena naquiyana San Pablo i'imacá. Ri'ijnáque apú eyá, apú eyá que Jesucristo yucuna i'imacana nacú. Raú ne'iyajena jema'aque ra'apiyá riyucuna.

Pablo i'imari caja Jesucristo yucuna pajimila Corinto ehua i'imacáñojlo. Ne'iyajena jema'año caja Jesucristo ja'apiyá rehuá. Ñaque caja nahuacaco ajopana Jesucristo ja'apiyá jema'ajeño hua'até i'imajica. Caja ehujaja Pablo ja'apáñari ne'emacá. E caja ehujaja uncá paala ne'emacá pajhua'atéchaca. Caja Jiñá Chi'ináricana ca'átari ne'iyajena e'iyajé, nala'acáloje napechu queja penaje. Ne'iyajena la'año necó hue'epiño que huani. Nahuata ajopana chá'atacana napechu aú. Uncá paala ne'iyajena la'ajica nanaquiyana nacú. Aú calé San Pablo huacára'ari najló puráca'aloji, rila'acáloje nenacú raú penaje. Rimá najló, nahuatácaloje iqui'ija pecohuácaca penaje. Iqui'ija pecohuácaca huátacana chá'atari piyuque nacaje ina'uqué la'acare. Marí caje penaje rihuacára'a najló marí puráca'aloji.

*Pablo huacára'ari puráca'aloji najló marí que:*

<sup>1-2</sup> Pablo nucá. Tupana a'arí nucá, nu'umacáloje Jesucristo huacára'acarena naquiyana penaje. Caja queja Tupana huátaca nu'umacá. Huanaquiyana, Sóstenes, hua'até huahuacára'a ijlo marí puráca'aloji pajimila Corinto ejo. Jesucristo hua'atéjena icá. Ijlo huahuacára'a marí papera. Tupana le'ejena ina'uqué icá, Jesucristo chuhua i'imacale. Tupana a'arí icá, i'imacáloje palá la'acaño Tupánajlo penaje. Ñaque caja ra'acá ina'uqué ajopana, ajopana que piyuque eja'ahuá chu i'imacaño e'iyayá. Ne'emacáloje palá la'acaño rijlo penaje, ra'yá necá. Jesucristo nacú nemá: "Huahuacára'ajeri" que. Nahuacára'ajeri ricá. Eyá piyuque huahuacára'ajeri caja ricá.

<sup>3</sup> Tupana Huara'apá. Nuhuata ricá, huahuacára'ajeri Jesucristo, quele la'acá ipechu palá. Nuhuata caja i'imacá Tupana palamane, rila'acáloje icá palá penaje.

*Palá huani Jesucristo la'acá huecá yucuna marí:*

<sup>4</sup> Tupana hua'até pura'acano aú nu'umá rijlo palá rila'acá icá yucuna. Jesucristo palamane Tupana la'arí icá palá huani.

<sup>5</sup> Jesucristo hua'atéjena i'imacale, cajrú huani Tupana la'acá icá palá piyuqueja. Palá ihue'epica quehuácage puráca'aloji nacojé raú. Ñaquele ipura'ó palani puráca'aloji nacú rihuátaca que.

<sup>6</sup> Caja ihue'epí Jesucristo puráca'alo nacojé nu'umacare yucuna ijlo i'imacá.

<sup>7</sup> Ñaquele chuhua uncá na nacú calé ila'á camu'ují, ihue'epícale Tupana palamane icá. Ñaqueja ri'imajica ijlo Jesucristo iphájica ejená. Riphájica majó huátacana nacuja icá me'etení.

<sup>8</sup> Tupana la'ajeri ipechu caphí riphájica majó ejená. Marí caje aú uncá na pu'uhuaré ila'acare i'imalaje ijlo rihuacajé.

<sup>9</sup> Pajluhuaja chuhua péchuri Tupana. Rimacá que rila'acá nacaje. Ricá a'arí icá, i'imacáloje Ri'irí Jesucristo que caja rijhua'até penaje. Huahuacára'ajeri huani Jesucristo.

*Uncá pajluhuaja chuhua calé péchuruna Jesucristo hua'atéjena i'imacá rehuá yucuna marí:*

<sup>10</sup> Nojena, Jesucristo puráca'alo aú numá ijlo marí que: I'imá pajluhuaja queja pajhua'atéchaca. I'maniya ajopana que paliyácaca. Nacaje i'ijnatácare nacú ipéchuhua, i'imacáloje pajluhuaja queja caja ijlo penaje. Marí queja i'imajica aú, nacaje i'ijnatácare nacú ipéchuhua i'imajeri pajluhuaja chuhua. Ñaque caja nacaje ihue'epícare itucumó, i'imajeri ijlo pajluhuaja queja caja.

<sup>11</sup> Nojena, marí nacú numá ijlo me'etení, uncá paala ri'imacale rehuá. Cloé ejena i'imari nojló riyucuna. Marí que nemacá inacu: "Aca'ácacajo nacuja necá pajhua'atéchaca rehuá."

<sup>12</sup> Marí caje nacú nuhuata quemacana: Uncá paala nacaje imacare nacú. Apú nacojé, apú nacojé que imacá. Uncá huani paala i'imacá pajhua'atéchaca. E'iyajena quemano inacuá: "Pablo hua'atéjena huecá" que. Ajopana inaquiyana quemano piño nanacuhua: "Apolos hua'atéjena huecá." Ajopana piño quemano nanacuhua: "Pedro hua'atéjena huecá." Ajopana piño quemano nanacuhua: "Jesucristo hua'atéjena huecá."

<sup>13</sup> Uncá ajopana ja'apiyá, ajopana ja'apiyá que calé i'imacaño huecá Jesucristo ja'apiyá jema'ajeño. Uncá nucá, Pablo, calé taca'arí a'ahuaná apiyácacanami nacú ichaya. Uncá caja nupuráca'alo aú calé nala'á bautizar icá.

<sup>14</sup> Uncá nula'alá bautizar icá. Palani nojló, uncale nula'alá bautizar icá. Grispo, Gayo, queleja calé nula'á bautizar, iyamaja.

<sup>15</sup> Marí que ri'imacale, uncá ina'uqué quemalá nanacuhúa: "Bautizar la'aquejani huecá Pablo puráca'alo aú."

<sup>16</sup> Re jo'ó ajopana nula'acárena bautizar. Huajé riphíchaca nupechu nacojé. Nula'á caja bautizar Estéfanos, riyajalo, riyani, quele. Uncá nuhue'epila palá nula'acá bautizar ajopana ca'ajná, uncá ca'ajná. Queleja ca'ajná nula'á bautizar.

<sup>17</sup> Uncá Tupana a'alá núcá ina'uqué bautizar la'ajeri penaje. Jesucristo huacára'ari nu'umacá yucu ina'uquejlo. Méqueca Tupana i'imataca ina'uqué capichácajo liyá yucuna rihuacára'a nu'umacá najló. Jesucristo taca'arí a'ahuaná apiyácanami nacú huachaya i'imacá. Raú ri'imatá ina'uqué capichácajo liyá. Nu'umá riyucuna ijló i'imacá huacajé, nuhuata ipechu i'imacá rinacuja. Ñaquele uncá nupura'aló palá huani ajopana cajrú hue'epícaño pura'acó que caja.

*Capecthuni Tupana. Marí riyucuna:*

<sup>18</sup> Jesucristo taca'arí a'ahuaná apiyácanami nacú ina'uquéjloje penaje. Capichájeño Tupana liyá pechu nacú ri'imá: "Mapéchuruna i'imacáñojlo penaje riyucuna." Eyá huajló, Tupana i'imatácarena capichácajo liyá, palánija huajló riyucuna. Palani huajló riyucuna, rimacale huajló méqueca Tupana i'imataca iná capichácajo liyá Jesucristo palamane aú.

<sup>19</sup> Tupana puráca'alo lana'aquejani quemari marí que: Nopichátaje najló napechu, quemáño nanacuhúa: "Capéchuruna huecá" que. Cajrú napechu nacaje hue'epícana nacojé. Nacaje nahue'epícare nacojé, ricá nula'ajé najló majopéjari queja.

<sup>20</sup> Chuhua uncá na penaje calé najló nacaje cajrú nahue'epícare nacojé i'imacá. Uncá caja na penaje calé nacaje nehuíña'atacare nacú ajopana ina'uqué. Cajrú nacaje napura'acaro nacú, uncá caja na penaje calé ricá. Nacaje ina'uqué hue'epícare nacojé marí eja'ahuá chu, uncá na penaje calé ricá, Tupana la'acale ricá majopéjari queja najló.

<sup>21</sup> Hue'epiri huani Tupana. Aú calé ri'imatá ina'uqué capichácajo liyá, napechu i'imacá aú caphí ripuráca'alo chojé. Raú ja ri'imatá ina'uqué capichácajo liyá. Marí que ri'imacale, uncá meño'ojó iná hue'epila mecajeca Tupana, nacaje nacojé iná hue'epícare aú. Ñaquele riyucuna hue'emacare ajopana, ajopánajlo que, majopéjari queja ricá cajrú ina'uquejlo.

<sup>22</sup> Judíona huátaño Tupana la'acá najló nacaje cajrú rená que'ená penaje, nahue'epícaloje ricá raú penaje. Ajopana piño huátaño hue'epiri huani i'imacá yucu najló, nahue'epícaloje quehuaca huánica ricá raú penaje.

<sup>23</sup> Eyá huecá i'imaño Jesucristo yucuna. Nacúhua'ata ri'imacá a'ahuaná apiyácanami nacú ina'uqué chaya. Riyucuna hue'emá ina'uquejlo. Riyucuna jema'acana aú judíona quemáño rinacu: "Uncá huajlojé penaje calé ricá" que, uncale nahuátala rema'acana. Mapéchuruna puráca'alo queja ajopánajlo riyucuna.

<sup>24</sup> E'iyonaja Tupana a'ari ina'uqué naquiyana, ne'emacáloje ra'apiyá i'imacaño penaje. Najló calé capecthuni huani Tupana, rila'acale palá ina'uqué nacú Jesucristo palamane aú. Jesucristo palamane aú caja Tupana i'imatari necá capichácajo liyá. Ñaque caja ricá judíonajlo, ajopana ina'uquejlo hua'até.

<sup>25</sup> Tupana huacára'ari Jesucristo, ritaca'acáloje ina'uqué chaya a'ahuaná apiyácanami nacú penaje. Aú calé ne'iyajena pechu nacú ri'imá: "Meque uncá huani ripechu i'imalá" que. E'iyonaja ricá aú richá'ata capéchuruna pechu. Jesucristo taca'acá a'ahuaná apiyácanami nacú huacajé, napechu i'imá rinacu: "Meque maliyaru huani ricá." E'iyonaja raú Tupana la'arí cajrú huani; uncá na i'imalá ina'uqué e'iyayá, la'arí ñaque caja palá.

<sup>26</sup> Nojena, ihue'epí marí: Tupana i'ihuapari rijluhua icá ajopana ina'uqué e'iyayá, i'imacáloje rijhua'atéjena penaje. Uncá rimalá inacu: "Cajrú hue'epícaño necá" que. Rihuátaca que ri'ihuapacá rijluhua icá. Mequeleja calé inaquiayana i'imaño cajrú hue'epícaño. Mequeleja inaquiayana i'imaño icó huacára'ajeño naquiayana. Mequeleja cale inaquiayana i'imaño ihuacára'ajeño yaní.

<sup>27</sup> Ina'uqué nemacárena nacú: "Huahuejáputenami necá, uncá pechu i'imalaño necá" que, ilé cajena calé Tupana i'ihuapari rijluhua, rapáña'atacaloje capecthuni i'imacaño nacú penaje. Necá ajopana quemacárena nacú: "Uncá caphí calé péchuruna necá," necá calé Tupana i'ihuapari rijluhua, rapáña'atacaloje caphí péchuruna i'imacaño nacú raú penaje.

<sup>28</sup> Tupana i'ihuapari rijluhua necá, ajopana ina'uqué quemacárena nacú: "Majopéjaruna necá" que. Uncá ajopana ina'uqué iphálarena ja'apí ne'emacá. "Uncá na penájena calé necá," que napechu i'imacá nanacu. Ilé cajena ina'uqué Tupana i'ihuapari rijluhua, rapichátacaloje nachaje i'imacaño pechu raú penaje.

<sup>29</sup> Marí cajé aú uncá na calé la'ajeri ricó hue'epiri que huani Tupana jimaje.

<sup>30</sup> Tupana a'arí icá, i'imacáloje Jesucristo hua'atéjena penaje. Jesucristo ja'apiyá i'imacaño hue'emacale, huahue'epí Tupana palamane huecá. Jesucristo chojé calé rilamára'ata

rijluhua huecá pu'uhuaré huala'acare liyá. Richojeja caja rila'á huecá rile'ejena ina'uqué penaje, hue'emacáloje palá la'acana nacuja penaje. Raú ja caja ri'imatá huecá pu'uhuaré huala'acare liyá, huamanaicho huala'acare liyá.

<sup>31</sup> Ñaquele Tupana puráca'alo lana'aquéjami quemacá que, queja huajló ricá. Marí que rimacá: "Ipura'aniyo inacuhua palá. Hue'emacana huani Tupana nacuja calé iná pura'ó palá, ripalamane hue'emacale."

## 2

*Jesucristo taca'acá a'ahuaná apiyácacanamí nacú huachaya yucuna marí:*

<sup>1</sup> Nojena, quehuácage Tupana puráca'alo. Pu'uhuacá ri'imacá huajló riyucuna i'imacá. Nu'umaqué ijhua'até huacajé, no'opata ijlo ripuráca'alo i'imacá. Uncá nupuráca'alo i'imalá cajrú hue'epica puráca'alo que. Pu'uhuacatani chuhua ja nu'umaqué riyucuna ijlo rihua-cajé.

<sup>2</sup> Rihuacajé caja uncá nuhuátala apú nacojé, apú nacojé que hue'epicana. Jesucristo yucuna i'imacana nacuja nuhue'epí nutucumó i'imacá. Ricaja calé nuhue'epí nutucumó. Chaje huani nuhuátaca ihue'epica mecajeca ricá, taca'arí ina'uqué chaya a'ahuaná apiyácacanamí nacú i'imacá.

<sup>3</sup> Nuphaca inacu huacajé uncá caphí calé nupechu i'imacá nujluhua. Uncá nuhuátala apojó la'acana Tupana huátaca que la'acana liyá. Aú quero'ocajo nacuja nu'umacá.

<sup>4</sup> Nu'umacá ijhua'até huacajé nupura'ó ijhua'até i'imacá. Nu'umá Tupana puráca'alo yucuna ijlo. Ricaja calé yucuna nu'umá ijlo i'imacá. Uncá ipechu i'imalá nunacu: "Capechuni huani ricá" que, uncale nu'umalá ijlo riyucuna capechuni pura'acó que. Nuhuata Tupana Péchuja ca'átaca e'iyajé i'imacá. Tupana hue'epirí ina'uqué e'iyajé ca'átacana Ripechu aú, nema'acáloje ra'apiyá penaje.

<sup>5</sup> Marí que nu'umacá Tupana puráca'alo yucuna ijlo i'imacá, i'ijnataca piyá ipéchuhua nunacu: "Cajrú péchuri ricá" que. Marí caje uncá nuhuátala. Nuhuata ipechu i'imacá caphí Tupana chojé. Ricá hue'epirí piyuqueja nacaje la'acana.

*Tupana Pechu aú ina'uqué hue'epica Tupana nacojé yucuna marí:*

<sup>6</sup> Re ina'uqué, caphí péchuruna Jesucristo chojé necá. Ñaquele nala'á nacaje quehuácage puráca'aloji quemacá que. Najloja calé cahue'epicanami huapuráca'alo. Uncá ajopana ina'uqué marí eja'ahuá chu i'imacaño hue'epica que calé ricá. Uncá caja marí eja'ahuá chu i'imacaño huacára'ajeño hue'epica que calé ricá. Nacaje ina'uqué hue'epicare nacojé, ricá uncá i'imalaje. Ricapichajo.

<sup>7</sup> Eyá huecá pura'año nacaje Tupana hue'epicare nacú. Uncá capichácajo penaje calé ricá. Micho'ojneji queja riyucuna i'imacá ina'uqué liyá i'imacá. Ñaquele uncá nahue'epila méqueca rila'ajica necá palá Jesucristo palamane aú. Raú ri'imatá ina'uqué capichácajo liyá penaje, ne'emacáloje matajnaco je'echú chu raú penaje. Uncá chiyó riqueño'óta eja'ahuá i'imacá, marí que la'acana i'imari ripechu nacú.

<sup>8</sup> Uncá na calé nahuacára'ajeño naquiyana hue'epiño mecajeca Jesucristo i'imacá. Nahue'epíquela rinacojé i'imacá, uncá nahuacára'alajla rinócana a'ahuaná apiyácacanamí nacú. Hue'emacana huani Jesucristo, palani huani ricá. Ricá nenó i'imacá, uncale nahue'epila na penájeca ri'imacá.

<sup>9</sup> Palani huani ricá rila'ajicare huajló. Marí que Tupana puráca'alo lana'aquéjami quemacá rinacu:

Iqui'i Tupana huátacarena pe, Tupana lámá'atari cajrú huani nacaje.

Nacaje uncá jo'ó ina'uqué amálare, ricá rilamá'ata napé.

Uncá caja rinacu quemacana i'imalá ina'uquejlo.

Uncá caja napechu iphala rihue'epicana locópa'ala.

<sup>10</sup> Ripechu aú Tupana la'arí huajló riyucuna pu'uhuacá, huahue'epícaloje nacaje nacojé raú penaje. Ripechu hue'epirí nacaje Tupana pechu i'imacare nacú. Me'echuje huajló ricá. Ripechu aú ra'á huapechu nacojé nacaje, ri'imacáloje huajló pu'uhuacajé raú penaje, huahue'epícaloje na penájeca Tupana la'acá huecá palá penaje.

<sup>11</sup> Iná pechu aú ja iná hue'epí palá iná icó méqueca iná i'imacá. Ñaque caja Tupana Pechu hue'epica Tupana nacojé palá.

<sup>12</sup> Uncá huapechu i'imalá ajopana ina'uqué pechu que caja. Rihuacára'a Ripechu huapechu e'iyajé, huahue'epícaloje nacaje nacojé raú penaje. Raú huahue'epí méqueca Tupana la'acá huecá palá huani ripalamane aú.

<sup>13</sup> Uncá ina'uqué jehuíña'atala huecá riyucuna i'imacana nacú. Tupana Pechu jehuíña'ataca huecá rinacu que hue'emacá riyucuna ina'uquejlo. Tupana Pechu i'imacárena e'iyajlo hue'emá riyucuna.

<sup>14</sup> Eyá ina'uqué, uncá Tupana Pechu i'imalárena e'iyá, necá uncá huátalaño rihue'epicana. Mapéchuru i'imacá yucu najló, queja caja nacaje najló, Tupana Pechu quemacare nacú huajló. Uncá meño'ojó riphala napechu nacojé, uncale napechu i'imalá Tupana Pechu ja'apiyá.

<sup>15</sup> Tupana Pechu i'imalárena e'iyá huecá. Huecaja calé hue'epiño nacaje Tupana Pechu quemacare nacú huajló. Ñaquele uncá meño'ojó ajopana ina'uqué hue'epiño mecajenaca huecá. Nemá huanacu: "Mapéchuruna necá" que.

<sup>16</sup> Marí que Tupana puráca'alo lana'aquejami quemacá: "Uncá na calé hue'epiri méqueca Tupana pechu nacú nacaje. Uncá caja na calé la'arí Tupana jenacú," que rimacá. Eyá huajló uncá ñaque calé ricá. Huecá hue'epiño méqueca Tupana pechu nacú nacaje la'acana. Jesucristo pechu aú huapechu ripechu que caja.

### 3

#### *Tupana hua'até sápañeño yucuna marí:*

<sup>1</sup> Nojena, nu'umacá ijhua'até huacajé, uncá meño'ojó nupura'aló ijhua'até, iná pura'acó Tupana Pechu ja'apiyá i'imacá hua'até que caja. Iná pura'acó napechu queja la'acaño hua'até que caja nupura'acó ijhua'até i'imacá. Yuhuaná pechu que péchuruna i'imacá Tupana puráca'alo liyá.

<sup>2</sup> Queráco'opena i'iraño naló chu'uchure, uncale nahue'epila a'ajnejí ajñacana. Ñaque caja icá i'imacá Tupana puráca'alo liyá. Aú calé nohuíña'ata icá pu'uhuacatani aú. Uncá meño'ojó nohuíña'atala icá puhuichani quemachi nacú. Uncá meño'ojó ipechu iphala rilocópa'ala i'imacá. Rihuacajé ipechu i'imacá, ñaqueja caja ipechu me'etení.

<sup>3</sup> Ipechu queja i'imacáño icá. Aú ila'á nacaje ijluhua ihuátaca que. Chapú ihuó i'imacá ajopana ina'uqué cha, nachá'atacale icá nacaje la'acana aú. Ica'acaño pajhua'atéchaca. Ajopana que ila'acá panacuhúacaca. Marí caje aú iná hue'epí ipechu queja la'acaño icá. Ina'uqué uncá jema'alaño Tupana ja'apiyá que caja icá pajhua'atéchaca.

<sup>4</sup> Marí que inaquiyana quemacá nanacuhúa: "Pablo hua'atéjena huecá." Ajopana piño quemáño nanacuhúa: "Apolos hua'atéjena huecá." Marí que ila'acá icó chá'atajeño que pajlocaca, aú iná hue'epí ipechu queja la'acaño icá.

<sup>5</sup> Uncá na calé nucá Pablo. Uncá caja na calé Apolos. Tupana hua'até sápañeñoja calé huecá iyamá. Huecá ja'apátaño ijló Tupana puráca'alo i'imacá, ipechu i'imacáloje caphí Jesucristo chojé raú penaje. Pajluhuano, pajluhuano, queja huala'acá Tupana huacára'aca huecá que.

<sup>6</sup> Tupana mená que icá huajló. Re'iyohuá sápañeño queja huecá. Nucá ejátari nacaje icha ijí. Re'iyaya caja Apolos lamá'atari rina. Tupánaja calé tahuá'atari huajló ricá nojátacare.

<sup>7</sup> Ñaqueja Tupánajo nacaje icha ijí ejátajeri, rina lamá'atajeri quele. Rinacu sápañeñoja calé necá. Piyuque la'acá Tupana, ritahuá'atacale piyuque nacaje iná ejátacare, rina hua'ató.

<sup>8</sup> Apolos hua'até huala'á nacaje ijló. Iná la'acare loco'opáneje Tupana a'arí inajlo rihuemí.

<sup>9</sup> Pajluhuaja hua'até sápacáño huecá Apolos hua'até. Tupana hua'até sápañeño huecá. Ica' i'maño huajló Tupana mená queja. E'iyohuá huala'á huasápaca'ala, jema'acáloje Tupana ja'apiyá penaje.

Ñaqueja numájica rinacu apa'amá yucu aú: Pají queja icá, Tupana i'imacare la'acana nacú.

<sup>10</sup> Tupana palamane aú calé Jesucristo yucuna i'imajeri nucá. Palá nu'umacá riyucuna ina'uquejlo. Nu'umá caja ijlo Jesucristo yucuna i'imacá. Raú calé iyurí ichó rijló, ri'imatácaloje icá capichácajo liyá penaje. Marí que riqueño'ocó ijlo i'imacá, ila'acáloje reyá a'ajná ño'ojó palá ra'apiyá jema'acana aú penaje. Ihue'epí pajluhuano, pajluhuano que, ra'apiyá jema'acana palá, ila'acáloje Tupana huátaca que raú penaje.

<sup>11</sup> Tupana a'arí Jesucristo, ina'uqué i'imatájeri penaje. Uncá huani na apú i'imalá ina'uquejlo, ne'emacáloje ripalamane aú penaje. Ricaja calé, Jesucristo, Tupana a'arí ina'uquejlo, ne'ematajeri penaje.

<sup>12</sup> Ne'iyajena jehuíña'ataño Jesucristo puráca'alo nacú palá huani. Nupuráca'alo chuhuaaja caja nehuíña'ata ina'uqué rinacu. Palani huani ricá. Palani nacaje ina'uqué la'acare oro naquiyá, sereni naquiyá ca'ajná, cahuemí nojé jipa naquiyá, caje macá. Palani ricá, rijña'acáloje panacu jupi huani penaje. Ñaque caja nacaje nehuíña'atacare nacú i'imajica najló júpija, palani ri'imacale. Eyá ajopana, uncá jehuíña'atalaño ina'uqué palá Jesucristo puráca'alo nacú. Uncá ña'alare panacu júpija queja ricá najló. Nacaje ina'uqué la'acare mi-rapehua naquiyá la'acanami, jimichí tami naquiyá la'acanami, ijijila naquiyá la'acanami, caje macá uncá ña'alá panacu júpija. Uncá caja nacaje nehuíña'atacare nacú necá i'imalaje júpija.

<sup>13</sup> Aquijñojo Jesucristo quemajeri piyuqueja ripuráca'alo jehuíña'atajeño nacú pajluhuano, pajluhuano que. Rimaje méqueca rijló nacaje nehuíña'atacare nacú. Palani ca'ajná ri'imajica rijló, uncá paala ca'ajná. Rihuacajé Jesucristo a'ajeri pu'uhuacajé nacaje



huala'acare marí eja'ahuá chu i'imacá. Méqueca hua'acá huanacojó Tupana purá'alo nacú rimaje huajló. Majopeja huala'acare huapechu queja, ricá i'imajeri apichátaqueja que rijló. Palá huala'acare i'imajeri rijló palani. Quera'atani aú iná atá'a nacaje, iná hue'epicaloje méqueca ri'imacá penaje. Ñaqué caja huajló nacaje Jesucristo quemacare huanacu i'imajica rihuacajé. Raú huahue'epeje méqueca rijló nacaje huala'acare.

<sup>14</sup> Tupana quemájeri nacaje huala'acare nacú. Nacaje iná la'acare Jesucristo purá'alo chuhuá, ricá i'imajeri palani rijló. Raú ra'ajé inajlo palá iná la'acare huemi.

<sup>15</sup> Iná pechu queja iná la'acare, uncá rihuemi i'imalaje inajlo. Iná capichájico rihuemi aú. Iná ca'acá nacaje quera'atani chojé que caja iná capichájico raú. E'iyonaja calé iná icoja, uncá capichálajo. Iná i'imacó quera'atani chiyá que caja iná i'imajico capichácajo liyá.

<sup>16</sup> Apala caja ipechu capicháñari marí: Tupana ñacaré queja icá, Tupana Pechu i'imacale e'iyá.

<sup>17</sup> Apala apú ca'ajná jehuíña'atajeri icá apojó. Uncá Tupana purá'alo chuhuá calé ricá. Raú rapichátaje ca'ajná ipechu Tupana liyá. Marí que rehuíña'atajica ee icá, Tupana capichátajeri ricá iliyá, Tupana ñacaré queja i'imacale rijló.

<sup>18</sup> Uncá nuhuátala inaquiyana pechu i'imacá majopeja nanacuhuá marí que: "Huecá chá'ataño ajopana huapechu aú." Re ca'ajná inaquiyana, ajopana ina'uqué pechu chaje napechu. Aú napechu i'imá marí que nanacuhuá: "Cajrú hue'epicaño huecá." Mapéchuru que iná i'imacá pamineco, Tupana jehuíña'atacaloje iná nacaje nacú Ripechu aú penaje. Raú iná hue'epí nacaje la'acana Tupana huátacare caje.

<sup>19</sup> Marí eja'ahuá chu re ina'uqué nemá nacú: "Cajrú hue'epicaño necá" que. Nacaje nahue'epicare nacojé, Tupana quemari nacu: "Mapéchuruna pechu i'imacá nacaje nacu, que caja napechu rinacu" que rimacá rinacu. Marí que Tupana purá'alo lana'aquejami quemacá: "Capéchuruna la'año namanaicho, pu'uhuaré me'echú. E'iyonaja Tupánajlo uncá me'echú calé ricá. Aú calé ritá najló rapú."

<sup>20</sup> Apa'amá Tupana purá'alo lana'aquejami quemari piño marí que: "Tupana hue'epiri uncá na penaje calé nacaje capéchuruna i'ijnatácare napéchuhua nacú."

<sup>21-22</sup> Ñaquele ihue'epiniya inacuhuá chá'atajeño que huani paliyáca. E'iyajena quemañó inacuhuá: "Pablo hua'atéjena huecá" que. Eyá ajopana inaquiyana quemañó: "Apolos hua'atéjena huecá" que. Eyá ajopana piño quemañó: "Pedro hua'atéjena huecá" que. Marí cajé aú ila'á icó chá'atajeño que huani paliyáca. Nucá Pablo, Apolos, Pedro, quele la'año nacaje ijlojé penaje. Tupana queño'ótari marí eja'ahuá ijlojé penaje. Re cajmuchaji ijlojé penaje. Re caja taca'acaje ijlojé penaje. Ijlojé penaje caja nacaje huala'acare piyuqueja. Nacaje eja'ahuá chu i'imacare me'etení, a'ajná ño'ojó chami i'imajicare hua'ató, i'imari caja ijlojé penaje.

<sup>23</sup> Eyá Jesucristojloje penaje icá. Tupánajloje penaje Jesucristo.

## 4

### *Jesucristo huacára'acarena sápacá'ala yucuna marí:*

<sup>1</sup> Tupana a'arí huecá, huehuíña'atacaloje ina'uqué nacaje nacú. Pu'uhucá ri'imacare yucuna huajló i'imacá. Ihue'epí huanacu Jesucristo hua'até sápacajeño queja.

<sup>2</sup> Huahuacára'ajeri ricá. Aú calé huala'á rihuátaca que. Iná huacára'ajeri huacára'acachu iná la'acá nacaje, iná la'á ricá rihuátaca que.

<sup>3</sup> Icó ca'ajná i'imaño noco'oná, imacáloje nunacu méqueca nohuíña'ataca ina'uqué penaje. Jesucristo huacára'acarena naquiyana nucá. Noco'oná i'imajeri ricá, Jesucristo, ramácaloje méqueca nohuíña'ataca ina'uqué ripurá'alo nacú penaje. Ñaquele uncá na penaje calé nojló i'imajla noco'oná. Ajopana ca'ajná i'imañojla noco'oná. E'iyonaja uncá caja na penaje calé nojló necá, ina'uqué ne'emacale. Uncá Tupana calé necá. Uncá caja numalá nunacuhuá mecajeca nucá.

<sup>4</sup> Uncá nula'alá nacaje rihuátaca que liyá. Uncá nuhue'epila naca nula'acá apojó me'etení. Marí que numacá aú uncá iná hue'epila quehuácaca ricá. Quehuaca numacá ca'ajná, uncá ca'ajná. Ricaja calé, Hue'emacana huani Jesucristo, hue'epiri meque rijló nacaje nula'acare. Ricaja calé quemárijla nunacu: "Marí que la'ajeri ricá" que.

<sup>5</sup> Uncá paala imacá ina'uqué nacú me'etení mecajenaca necá Tupánajlo. Uncá jo'ó riphala rená chojé marí que quemacana nacú. I'imaja Hue'emacana Jesucristo huátacana nacú riphájica majó ejená. Iná ña'acá nacaje me'echú i'imacá chiyá mejáma'atani chojé, iná amácaloje ricá palá penaje. Ñaqué caja Hue'emacana huani a'ajica huecá pu'uhucajé, iná hue'epicaloje méqueca rijló nacaje huala'acare penaje. Que rila'ajica huecá riphájica majó huacajé. Rila'ajé pu'uhucá nacaje ina'uqué pechu nacú i'imacare me'echú. Nacaje nahuátacare la'acana rihue'epicare caja ricá. Rihue'epicare caja iná pechu. Riphájica majó

huacajé Tupana quemájeri huanacu pajluhuano, pajluhuano que méqueca rijló nacaje huala'acare rijlojé penaje i'ímacá. Palá iná la'acare loco'opáneje rimaje iná nacú palá.

<sup>6</sup> Nojena, marí que numacá ijló, ihue'epícaloje raú meque i'ímacáñoca huecá Apolos hua'até. Numá ijló huanacuhua, ipechu i'ímacá piyá apojó huanacu. Numá ijló huanacuhua, i'ijnatácaloje ipéchuhua Tupana puráca'alo chuhua penaje. Me'etení pu'ují ipechu ina'uqué naquiyana nacú, nalanáquiya ujhuí ipechu ajopana nacú. Marí que ila'acá icó chá'atajeño que pajlocaca. Raú uncá i'ijnatala richuhua rípuráca'alo quemacá que.

<sup>7</sup> Uncá naje calé ila'á inacuhua ajopana ina'uqué chá'atajeño queja huani. Tupana palamane aú ihue'epí nacaje ihue'epícare nacú me'etení. Nacaje Tupana a'acare ijló aú ila'á icó chá'atajeño queja. Ile'ejhua japi ricá queja ila'acá icó raú. Uncá huani paala ila'acá ijluhua raú.

<sup>8</sup> Caja ila'á inacuhua cajrú nacaje i'ímacare capi que. Ipechu i'ímá inacuhua me'etení: "Re huacapi nacaje huahuátacare caje" que. Ihue'epí caja inacuhua ajopana huacára'ajeño que. Nacojé uncá ihue'epíla huecá, huehuíña'atacaloje icá ejo'ocaja Tupana puráca'alo nacú penaje. Palani ri'ímacajla ijló, quehuaca i'ímaquela ajopana huacára'ajeño que, huahuacára'acaloje caja necá ijhua'até penaje.

<sup>9</sup> Jesucristo huacára'acarena naquiyana huecá. Tupana a'arí huecá ca'ajná, hue'emacáloje ajopana ina'uqué huejáputenami que penaje. Uncá ina'uquélaruna nenócarena ajopana jímaje queja huecá me'etení marí eja'ahuá chu. Piyuque ajopana ina'uqué jímaje que huecá, nayacá'acaloje huachaje raú penaje. Nahuejáputenami i'ímacá que i'ímacaño najló huecá. Ñaque caja ca'ajná Tupana hua'atéjena, je'echú chu i'ímacañojlo huecá.

<sup>10</sup> Ina'uqué hue'epiño huanacu: "Mapéchuruna japi necá" que, huala'acale Jesucristo huátaca que. Piyuqueja nacaje nacojé hue'epícaño queja ihue'epíca inacuhua, ihue'epícale mecajeca Jesucristo. Po'oló péchuruna queja ihue'epíca huanacu. Eyá inacuhua ihue'epí caphí péchuruna queja. Palá ipechu inacuhua. Eyá huanacu ujhuí ipechu.

<sup>11</sup> Me'etení huecá me'epijí ña'acana panacu nacú. Uncá caja i'iracaje caje i'ímala huajló. Camu'ují caja huala'acá a'arumacaji nacú. Chapú huani ajopana ina'uqué ña'ataca huecá. Majopeja i'ímacaño huecá, uncá ñacaré i'ímalaño que huecá marí eja'ahuá nacú.

<sup>12</sup> Cajrú huasapaca huayáte'ela aú. Pu'uhuaré napura'acó huanacu. E'iyonaja nupura'ó Tupana hua'até nanacu, rila'acáloje necá palá penaje. Chapú nala'acá huecá. E'iyonaja uncá chapú calé huala'acá necá raú. Huajña'ája panacu ricá.

<sup>13</sup> Pu'uhuaré nemacá huanacu ajopánajlo. E'iyonaja huapura'ó najhua'até palá, napechu pala'acóloje huajhua'até raú penaje. Nacaje cupacánami queja huecá najló. Ina'uqué huejáputenami que najló huecá. Marí que i'ímacaño huecá najló.

<sup>14</sup> Uncá nopáña'atacaloje inacu penaje calé nulana'á ijló marí que. Nulana'á ijló, nula'acáloje jenacú nupuráca'alo aú penaje. Iqui'ija iná huátacare iná yaní. Ñaque caja nuhuátaca icá. Iná la'acá nenacú que caja nula'acá jenacú nupuráca'alo aú.

<sup>15</sup> Jara'apá queja nucá ijhua'até. Nucá i'ímari palani puráca'aloji yucuna ijló i'ímacá. Tupana i'ímataca ina'uqué capichácajo liyá yucuna nu'umá ijló i'ímacá. Raú calé ipechu i'ímá caphí Jesucristo chojé, i'ímatájeri penaje. Ñaquele nucá i'ímari jara'apá queja ijló, nupuráca'alo aú iqueño'ocale Jesucristo ja'apiyá jema'acana. Cajrú huani ina'uqué jehuíña'ataquela piño icá Jesucristo puráca'alo nacú, uncá ne'emalajla jara'apá que ijló. Ne'emajla ijipiture queja. Nucaja calé jara'apá que ijhua'até.

<sup>16</sup> Ñaque i'ímacale, íqui'i nuhuátaca ja'apaca nuchuhua, ipechu i'ímacáloje nupechu que caja penaje.

<sup>17</sup> Caja nuhuacára'a Timoteo i'ijnacá ichaje. Iqui'i nuhuátacare ricá. Pajluhuaja chu péchuri ricá. Rimacá que nacaje nacú que rila'acá. Nucá jehuíña'atari ricá Tupana puráca'alo nacú. Ñaquele nu'urí queja nojló ricá. Ricá nuhuacára'a ichaje i'ímacá, ri'ímacáloje ijhua'até penaje. Rimaje piño ijló méqueca nula'acá Jesucristo ja'apiyá i'ímacana aú. Rehuíña'ataje caja icá Tupana puráca'alo nacú, nohuíña'atacareno nacú. Ñaqueja nohuíña'ataca Jesucristo ja'apiyá i'ímacaño rinacu apú eyá, apú eyá que nahuacáca'alo ñacarelana chu.

<sup>18</sup> Inaquiyana la'año necó hue'epiño que huani, napechu nacú ri'ímacale: "Uncá Pablo i'ijnalaje majó."

<sup>19</sup> Tupana huátajica ee, huajátacaje nu'ujnajica ca'ajno. Ejéchami nomájica mecajenaca inaquiyana la'acá nanacuhua chá'atajeño que. Cajrú napura'acó nanuma chiyá. Nacaje nala'acare Tupana Pechu aú nuhue'epeje mecajenaca necá.

<sup>20</sup> Tupana i'ímari iná huacára'ajeri, iná la'acáloje rihuátaca que raú penaje. Ripechu ja'apiyá i'ímacana aú iná la'á Tupana huátaca que. Palá ne'iyajena i'ímacá Tupana yucuna. E'iyonaja uncá nala'alá rimacá que. Nanuma chiyaja calé ne'emá riyucuna.

<sup>21</sup> ¿Meque ihuátaca nupechu i'ímacá inacu, ca'ajno nuphájica huacajé? ¿E ihuátaca nuhuajaca icá? ¿E ihuátaca caí nuhue'epíjica inacu?

## 5

*Pajluhuaja nanaquiyana i'imari uncá ina'uquéleri yucuna marí:*

<sup>1</sup> Marí que yucu iphaca majó. Pajluhuaja nanaquiyana re i'imacare, ricá jehuíña'atari riylápuhua rito'ojneru i'imacá. Chapuni huani ilé que la'acana. Necá, uncá jema'alaño Tupana ja'apiyá, uncá la'alaño ilé que huani.

<sup>2</sup> Ilé que rila'acá. E'iyonaja calé ila'a inacuhá chá'atajeño que huani. Palani ila'ájla ipéchuhua camu'ují, inaquiyana la'acale rimanaicho. Riqueño'ocá rimanaicho la'acana rujhua'até huacajé, palani ri'imacajla ijló, ica'aquela e'iyayó ri'imacá.

<sup>3</sup> Uncá ijhua'até calé nucá me'etení. E'iyonaja nupechu aú ja calé nu'umá ijhua'até. Jesucristo pechu aú nuhue'epí méqueca rila'acana, la'arí rimanaicho. Ilere japi nucá ijhua'até, queja numacá ijló rinacu me'etení.

<sup>4</sup> Jahuacájico ee pajhua'atéchaca rilamá'ataje, Hue'emacana Jesucristo a'ajeri ijló hue'epícaje, ihue'epícaloje méqueca ila'ajica ricá raú penaje. Nucá caja i'imajeri ijhua'até nupechu aú.

<sup>5</sup> Marí que ila'ajica: Ilé ina'uqué numácare nacú ijló, icá a'ajeño Jiñá Chi'ináricanajlo ricá, rapichátacaloje rinapon penaje. Marí que ila'ajica ricá. Raú ripecchu i'imajó capichácajo liyá Jesucristo iphájica majó huacajé.

<sup>6</sup> Ila'aniya icó chá'atajeño que huani, marí que ri'imacale rehuá. Ica hue'epiño méqueca nemacá rehuá pan amúra'atajona nacú: "Huejápaja pan amúra'atajona amúra'atari pan piyuqueja." Ñaque caja ina'uejlo ricá. Mequeleja ina'uqué la'año ca'ajná pu'uhuaré. Necá amátaño ajopana. Raú cajru ina'uqué la'año pu'uhuaré.

<sup>7</sup> Ñaquele ica'á e'iyayó quele rimanaicho la'ajeri, la'acá pu'uhuaré e'iyohuá. Ica'á ilé cajena e'iyayó. Marí que la'acana aú icá i'imajeño pajluhuaja chuhua queja palá la'ajeño. Nuhue'epí caja queja palá la'acaño icá. Hue'emacáloje palá péchuruna penaje, Jesucristo taca'arí huachaya i'imacá. Ra'á ricó ina'uquejlo, nenócaloje ricá pu'uhuaré la'acaño chaya penaje. Marí aú rica'á pu'uhuaré ina'uqué la'acare nanaquiyá.

<sup>8</sup> Ñaquele chuhua Jesucristo ja'apiyá i'imacana nacuja hue'emajé. Palá la'acana nacuja hue'emajé. Quehuácaje puráca'aloji chuhua hue'ejnataje huecó. Uncá hue'emalaje huamanaicho la'acana nacú, pu'uhuaré la'acana nacú hua'até. Jupichumi huapechu aú calé huala'á ilé que i'imacá.

<sup>9</sup> Nuhuacára'a papera ijló i'imacá. Richu numá ijló, ila'acáloje natejena penaje, la'año namanaicho. Necaja calé, Jesucristo ja'apiyá jema'ajeño, numá nacú ijló.

<sup>10</sup> Uncá numalá ijló ñaque ajopana ina'uqué nacú, ila'acáloje natejena penaje. Uncá jema'alaño Tupana ja'apiyá necá, numá nacú. Necá jo'ó, queleluna, la'año namanaicho. Canacújne'equena caja necá. Piro'oquéjena caja necá. Pu'ují napechu nacaje jenami nacú, napechu i'imacale rinacu: "Huachi'ináricana jenami japi ricá" que. Marí que i'imacaño necá. Uncá numalá ijló ilé cajena nacú, ila'acáloje natejena penaje. Uncá meño'ojó iná la'alá natejena. Iná jácho'oquelo eja'ahuá naquiyá, e ca'ajná iná la'ájla natejena.

<sup>11</sup> Apú ca'ajná quemari rinacuhua: "Jesucristo ja'apiyá jema'ajeri nucá" que. E'iyonaja rimanaicho la'acana nacú ca'ajná ricá, canacújne'equé ca'ajná ricá. Pu'ují ca'ajná ripecchu nacaje jenami nacú, nemacare nacú: "Huachi'ináricana jenami ricá" que. Richapújra'o ca'ajná. Yuhuéra'acajo nacú ca'ajná ricá. Ata'acachi ca'ajná ricá. Cayucújne'equé ca'ajná ricá. Marí que i'imacá ricá. E'iyonaja rimá rinacuhua: "Jesucristo ja'apiyá jema'ajeri nucá." Marí que i'imajícaño necá, tejena ila'ajé. Ilé cajena numá nacú ijló, ila'acáloje natejena penaje. Jara'aniyo caja nanacu ta. Ajñániya caja a'ajnehuá ilé que i'imacaño hua'até.

<sup>12-13</sup> Uncá numalaje ina'uqué nacú meque nala'acana pu'uhuaré nala'acare chona, uncachu ne'emalá Jesucristo ja'apiyá jema'ajeño. Tupana quemájeri nanacu méqueca nala'acana. Eyá Jesucristo hua'atéjena nacú ijhua'até i'imacaño re, nacú imaje na aú ca nala'acá pu'uhuaré, ihuajácaloje necá richona penaje. Ñaquele ica'á pu'uhuaré la'acaño inaquiyana e'iyayó, Tupana puráca'alo lana'aquéjami quemacá queja.

## 6

*Nalamá'ataca najló aca'ácajajo yucuna marí:*

<sup>1</sup> Re caja ijhua'até rehuá puráca'aloji lamá'atajeño. Uncá Jesucristo ja'apiyá i'imacaño calé necá. ¡Meque uncá ihuó la'aló nachaje i'ijnacana ja'apí, nalamá'atacaloje ijló puráca'aloji penaje! Tupana hua'atéjena icá, la'año marí que. Marí que la'acana uncá huani paala. Tupana le'ejena ina'uqué hua'até huánija iná lamá'ata ricá.

<sup>2-3</sup> Uncá ca'ajná ihue'epila marí: Aquijñojo Jesucristo hua'atéjena quemájeño ajopana ina'uqué nacú, uncá jema'alaño ra'apiyá nacú, méqueca nahuajácana i'imajica. Uncá la'alaño Tupana huátaca que imájica nacú. Ñaque caja imájica Tupana hua'atéjena, je'echú

chu i'imacaño nacú méqueca nala'acana i'imajica. Marí que quemájeño penájena icá. Eta, maliyáruna huani icá me'etení, ilamá'atacaloje puráca'aloji penaje. Uncá puhuichani calé puráca'aloji lamá'atacana. Ñaquele a'á inacojó rilamá'atacana icámica que rehuá.

<sup>4</sup> Uncá naje calé i'ijná ajopana ina'uqué chaje, nalamá'atacaloje ijlo puráca'aloji penaje. Uncá Jesucristo hua'atájena calé necá. Uncá caja paala ipechu nanacu. E'iyonaja i'ijná nachaje.

<sup>5</sup> Marí caje numá nacú ijlo, nopáña'atacaloje inacu raú penaje. Uncá huani ca'ajná pajluhuaja inaquiyana i'imalá, hue'epiri puráca'aloji lamá'atacana ijlo. Ica Jesucristo hua'atájena nacú numá. Re ricá nuhue'epi.

<sup>6</sup> E'iyonaja inaquiyana Jesucristo hua'atájena, arucátaño pecohuácaca. Raú ne'ejná ajopana chaje, nalamá'atacaloje najlo puráca'aloji penaje. Uncá Jesucristo ja'apiyá jema'ajeño calé necá, ne'ejnacárena chaje.

<sup>7</sup> Re caja inaquiyana rehuá, narucata pecohuácaca ihuacára'ajeñojlo. Raú icá i'ijnáño nachaje, nalamá'atacaloje ijlo ricá penaje. Uncá Jesucristo ja'apiyá jema'ajeño calé necá. Marí que ila'acale rehuá, maliyáruna huani Tupánajlo icá. Iyuríquela inaquiyana la'acá chapú icá, palá ri'imacajla ijlo. Ila'acá me'etení chaje huani palaca ri'imacajla ijlo. Iyuríquela nata'acá inane iliyá, ila'acá me'etení chaje huani palaca ri'imacajla ijlo.

<sup>8</sup> Marí que la'acana nacú icá me'etení: Chapú la'acana pecohuácaca nacú icá. Panánechaca ata'acana nacú caja icá. Jesucristo hua'atájena icá. E'iyonaja marí que huani ila'acá pecohuácaca.

<sup>9</sup> Caja ihue'epi necá uncá la'alaño Tupana huátaca que, uncá i'imalájeño rijhua'até je'echú chu. Re i'imacaño huacára'ajeri Tupana. Marí que la'acaño uncá i'imalájeño Tupana hua'até je'echú chu: Namanaicho la'ajeño. La'año namanaicho ajopana luna hua'até. Achiñana, necá pajno'oño panacuhuácaca, nala'á pajhua'atéchaca pu'uhuaré. Inaana la'año caja pu'uhuaré napajno'ocó aú panacuhuácaca. Marí que la'acaño, uncá i'imalájeño Tupana hua'até je'echú chu. Re ina'uqué pu'ují napechu nacaje jenami nacú, nemacare nacú: "Huachi'ináricana jenami ricá" que. Necá caja uncá i'imalájeño Tupana hua'até je'echú chu. Rehuájena huacára'ajeri ricá. Ipechu i'imaniya nanacu: "Ne'emajica re".

<sup>10</sup> Uncá caja marí que la'acaño i'imalájeño re: Ata'acáchina, canacújne'equena, yuhuéra'ajeño, cachapújre'equena, cayucújne'equena, natejmú aú ne'iyajena ata'año ina'uqué liyá nanane, necá cajena uncá i'imalájeño Tupana i'imacá ejo. Rehuájena huacára'ajeri ricá.

<sup>11</sup> E'iyajena i'imaño ilé cajena naquiyana i'imacá. Caja Tupana ca'arí inaquiyá pu'uhuaré ila'acare, imanaicho ila'acare hua'até. Ñaquele chuhua Tupana le'ejena ina'uqué icá. Jesucristo palamane aú Tupana lamára'atari rijluhua icá, pu'uhuaré ila'acare liyá. Ripecthu aú caja rilamára'ata huecá rijluhua i'imacá.

<sup>12</sup> Re ina'uqué, nemá ajopánajlo: "Iná la'á iná huátaca que, uncachu rinacu quemacana i'imalá" que, nemacá rinacu. Rinacu numá: Iná la'ájla iná huátaca que. E'iyonaja uncá paala inajlo re'iyajé que iná la'acare. Uncá caja paala ajopánajlo ricá. Uncachu rinacu quemacana i'imalá, iná la'á iná huátaca que. Re nacaje iná la'acare, uncá meño'ojó iná yurila iná liyó ricá. Marí que ri'imacachu inajlo, uncá paala iná i'imacá raú.

<sup>13</sup> Marí que ne'iyajena quemacá a'ajnejí nacú: "Iná napónajloja calé a'ajnejí. Re iná huo, re caja iná iñe'epichí, tamáca'atari a'ajnejí iná ajñacare iná napon e'iyajé," que nemacá. Tupana capichátajeri a'ajnejí. Ricapichátaje caja iná huo, iná iñe'epichí hua'ató. Ne'iyajena quemáño caja nanacuhua marí que: "Huala'acáloje huamanaicho pajhua'atéchaca penájena huecá," que nemacá. Uncá huala'acáloje huamanaicho penájena calé huecá. Huala'acáloje nacaje Jesucristojloje penaje i'imacaño huecá. Huajlo caja Jesucristo, rila'acáloje nacaje huajlo palá penaje, huala'acáloje rijlo nacaje rihuátacare caje penaje.

<sup>14</sup> Tupana macápo'otajeri huecá Ripecthu aú. Hue'emacana Jesucristo rimacápo'o i'imacá que caja rimacápo'otajica huecá.

<sup>15</sup> Ica pajluhuano, pajluhuano que i'imaño Jesucristo hua'atájena naquiyana. Pajluhua japi ricá queja icá rijhua'até. Jesucristo hua'atájeri la'acachu rimanaicho inanaru ñuju'uqueru hua'até, ri'imá runaquiyana queja caja raú. Uncá huani paala ilé que la'acana. Apala uncá ihue'epila rinacojó.

<sup>16</sup> Apala uncá caja ihue'epila marí: Iná la'acachu huapichá hua'até, pajluhuaja queja iná i'imacá rujhua'até. Marí que Tupana puráca'alo lana'aquéjami quemacá pajhua'atéchaca huá'acajeñomi nacú: "Achiñá, inanaru hua'até, iyamá necá, i'imaño pajluhua japi necá queja."

<sup>17</sup> Ñaque caja iná i'imacá Jesucristo hua'até. Iná i'imacachu rijhua'ateje, iná i'imá caja pajluhua japi ricá queja rijhua'até ripecthu chuhua i'imacana aú.

<sup>18</sup> Ila'aníya huani imanaicho. Ihue'epínoja, la'año pajhua'atéchaca majopeja, uncá pajhua'atéchaca huá'acajeñomi calé ne'emacachu, la'año chapú nanapona raú. Apú manaichaji ina'uqué la'acare chaje nala'acá chapú nanapona raú.

<sup>19</sup> Apala uncá huani ihue'epila Tupana Pechu i'imacá ijhua'até. E'iyá Tupana Pechu. Ripechu ñacaré queja iná napona rijló. Uncá caja ile'eje huani calé inapona. Tupana le'eje ricá, rihuarúhua'acale icá i'imacá.

<sup>20</sup> Ñaquele ila'á palá Tupana nacú inapona aú.

## 7

<sup>1</sup> Ihuacára'a nojló papera i'imacá. Richu iquejá'a nuliya cajrú nacaje yucuna i'imacá. Chuhua nu'umajica ijló huá'acacajo yucuna. Palani uncachu ina'uqué huá'acalo.

<sup>2</sup> I'maque e'iyonaja cajrú ina'uqué la'año namanaicho. Ñaquele palani achiñajlo huá'acacajo. Ñaquele caja inanárulo ricá, ina'uqué i'imacáloje pajluhuano, pajluhuano que naluna hua'até penaje.

<sup>3</sup> Huá'acajeñomi a'año nanacajo pecohuácaca. Ruyajná a'arí riyajalo rinacajo. Riyajalo a'ayó ruyajná runacajo caja.

<sup>4</sup> Uncá runapona miná huani calé riyajalo. Ruyajná le'eje caja runapona. Uncá caja rinapona miná huani calé ruyajná. Riyajalo le'eje caja ruyajná napona. Marí que huá'acajeñomi i'imacá pajhua'atéchaca.

<sup>5</sup> Huá'acajeñomijlo numá: Pa, ijmeñátaniya icó paliyácaca. Apala ñaquele ipechu i'imacá, iyuricaloje pajhua'atéchaca la'acana meque cálaja penaje, ihue'epicaloje Tupana hua'até pura'acano nacú itucumó penaje. Quéchami ila'ajica piño pajhua'atéchaca. Imejñátaniya icó paliyácaca rejomi. Marí que la'acana palani. Uncá meño'ojó ca'ajná ijña'alá panacu ñaquele la'acana. Marí caje aú Jiñá Chi'ináricana ca'átajeri e'iyajé, ila'acáloje imanaicho ajopana hua'até penaje. Marí uncá huani paala.

<sup>6</sup> Marí que numacá ijló, ila'acáloje ricá penaje. Uncá nuhuacára'ala icá, i'imacáloje nucá que caja penaje.

<sup>7</sup> Caja numá ijló, ihuá'acaloje penaje. E'iyonaja nuhuata piyuqueja ina'uqué i'imacá nucá que caja. Ihuacajina i'imacáño naquiayana nucá. E'iyonaja calé Tupana palamane hualalá que'iyapé nacaje paliyácaca.

<sup>8</sup> Ihuacajina, ihuacajilomina, quélejlo numá: Uncájica ee ihuá'acojla, nucá que caja i'imacajla. Marí que la'acana ca'ajná palani ijló.

<sup>9</sup> Uncá ca'ajná ijña'alajla panacu icó i'imacana, palani ijló huá'acacajo, ila'acá piyá imanai-cho pajhua'atéchaca raú. Marí que la'acana piyá, palani ijló huá'acacajo.

<sup>10</sup> Chuhua numájica naluna ca'acana nacú. Jesucristo quemari rinacu ñaqueja i'imacá. Uncá caja nupechu que calé numacá ijló. Uncá inanaru ca'alaje ruyajná.

<sup>11</sup> Inanaru ca'acachu ruliyá ruyajná, marí que la'acana palani: uncá ruhuá'acalajo piño apú hua'até. Rupalajó ca'ajná ruyajnamí chaje. Achiñánajlo ñaquele caja ricá. Uncá caja naca'alaje naluna naliyá.

<sup>12</sup> Chuhua numájica piño ajopana nacú. Uncá Jesucristo quemalá ñaquele huani rinacu. Re ca'ajná pajluhuaja Jesucristo hua'ateje riyajalo hua'até. Uncá Jesucristo hua'atéjeru calé rucá, riyajalo. Palani ri'imajica ee rojló rahua'á i'imacana nacú, uncá rica'alaje rucá.

<sup>13</sup> Ñaquele caja inaánajlo ricá. Re ca'ajná pajluhuájaru ruyajná hua'até. Jesucristo hua'atéjeru rucá. Eyá ruyajná uncá Jesucristo hua'ateje calé ricá. Palani ri'imajica ee rijló rohua'á i'imacana nacú, uncá ruyurílaje ricá.

<sup>14</sup> Ruyajná, uncá i'imalare Jesucristo hua'ateje, i'imari palani Tupánajlo, ri'imacale pajluhuaja queja rujhua'até. Jema'ayó Jesucristo ja'apiyá hua'até ricá. Eyá apú piño, riyajalo ca'ajná, uncá i'imalayo Jesucristo hua'atéjeru. Rucá i'imayo palani caja Tupánajlo, ru'umacale pajluhuaja queja rijhua'até. Jema'arí Jesucristo ja'apiyá hua'até rucá. Ñaquele nayani i'imaño caja palani Tupánajlo. Uncáquela ri'imajla marí que, ajopana yaní queja Tupánajlo nayani i'imacajla. Uncá jema'alaño Jesucristo ja'apiyá yaní queja caja ne'emacajla raú. Uncá ñaquele calé necá. Palani Tupánajlo nayani.

<sup>15</sup> Apú ca'ajná i'imari riyajalo hua'até. Rucá, riyajáloja calé ca'ajná, jema'ayó Jesucristo ja'apiyá. Eyá ricá uncá. Rihuata ca'ajná ro'opañacana, ri'imacáloje apojó juca ruliyá penaje. Reja rila'áreja rihuátaca que. Ñaquele caja inaánajlo ricá. Re ca'ajná apa'ahuelo, uncá Jesucristo ja'apiyá jema'ajeyo calé rucá. Ruyajnája calé ca'ajná jema'arí ra'apiyá. Ruhuata ca'ajná ra'apañacana, ru'umacáloje juca riliyá penaje. Reja rula'áreja ruhuátaca que. Marí que nala'ajica aú uncá pajhua'atéchaca huá'acajeñomi calé ne'emajica raú. Tupana a'arí huecá, ra'apiyá jema'ajeño ajopana ina'uqué e'iyayá, hue'emacáloje palá pajhua'atéchaca raú penaje.

<sup>16</sup> Jesucristo ja'apiyá jema'ajéñojlo numá: Uncá meque ca'ajná pila'alajla piyajná ra'acáloje ricó Tupánajlo penaje, ri'imatácaloje ricá capichácajo liyá raú penaje. Naqué caja numacá achiñánajlo: Uncá meque ca'ajná pila'alajla piyajalo ro'ocáloje rocó Tupánajlo, ri'imatácaloje rucá capichácajo liyá raú penaje.

<sup>17-20</sup> Tupana i'ihuapari icá ajopana ina'uqué e'iyayá i'imacá, i'imacáloje rile'ejena ina'uqué penaje. Tupana i'ihuapari rijluhua apú ca'ajná, ri'imacáloje rijhua'ateje penaje. Uncá chiyó rema'á Tupana ja'apiyá mata'aqueja chinumari ca'ajná ri'imacá rihuacajé. Caja queja riyuríjico. Tupana a'arí apú ca'ajná mamata'acánaru chinumari. Ricá caja yuréjero caja queja. Uncá na penaje calé inajlo iná chinuma mata'acana. Uncá caja na penaje calé, mamata'acánaru chinumari. Tupana huacára'aca que la'acana aú iná la'á palá. Marí que caja nuhuacára'aca piyuque Jesucristo hua'atéjena, jahuacaño apú eyá, apú eyá que. Numá najló, ne'emacáloje me'etení ne'emacá queja caja penaje.

<sup>21</sup> Tupana a'acá rijhua'ateje picá huacajé, pi'imá ca'ajná ajopana hua'até sápaieri. Pihuó ca'anio pinacuhá raú. Nahuátajica ee pácho'otacana richiyá, pácho'oja richiyá.

<sup>22</sup> Tupana a'arí icá rijhua'atéjenahua penaje, i'imacáloje rijhua'atéjena penaje. Rihuacajé e'iyajena i'imaño ajopana hua'até sápaieño i'imacá. Me'etení jácho'otaquejanami que icá, isápacaloje Hue'emacana huani hua'até penaje. Rihuacajé caja e'iyajena i'imaño ijluhua sápaieño i'imacá. Me'etení icá Jesucristo hua'até sápaieño queja.

<sup>23</sup> Tupana a'arí rihuemí i'imacá, rihuaru'hua'acaloje rijluhua icá penaje. Ñaquele i'imaniya ajopana ina'uqué pechu ja'apiyá.

<sup>24</sup> Tupana a'arí icá rijhua'atéjena penaje ajopana ina'uqué e'iyayá i'imacá. Ñaquele, nojena, iyuró caja queja ñaqueja hua'até.

<sup>25</sup> Chuhua numájica piño ihuacajina i'imacaño nacú. Uncá Tupana huacára'ala méqueca rinacu quemacana. Jesucristo hue'epícale numu'ují i'imacá, ripechu huatána'ari numacajé me'etení.

<sup>26</sup> Aú calé numá piyuque ina'uqué nacú marí que me'etení: Nuhue'epí palani najló caja queja ne'emacáloje penaje, chapú caje e'iyohuá hue'emacale me'etení.

<sup>27</sup> Cayajáloni pi'imajica ee, caja queja piyuríjico rujhua'até. Ihuacají pi'imajica ee caja queja pi'imajica ihuacají. Piculánia pijluhua inanaru piyajálohua penaje.

<sup>28</sup> Ihuá'acajico ee, uncá ila'alaje pu'uhuaré raú. Naqué caja numacá inaánajlo: Ihuá'acajico ee, uncá caja ila'alaje pu'uhuaré raú. E'iyonaja ihuá'acajico ee, amaje chapú caje yajhué, sápacaje yajhué, caje macá, chapú caje e'iyohuá hue'emacale me'etení. Uncá nuhuátala amaca chapú caje yajhué. Ñaquele numá ijlo ihuá'acaco piyá.

<sup>29</sup> Nojena, marí que numacá ijlo, huejápaja hue'echú ca'alá yurícole huajló. Ñaquele nuhuata hue'echú ca'alá yuríco huá'acajeñomijlo, riyuríco ajopánajlo que caja, nala'acáloje nacaje Tupánajlo raú penaje.

<sup>30</sup> I'imaño iyacaje nacú me'etení, ijlo numá, i'imá palá péchuruna queja, ila'acáloje nacaje Tupana huátaca que raú penaje. I'imaño i'ichacaje nacú me'etení, ijlo numá, i'imá hua'ajrí pechuruna queja, a'acáloje inacojó Tupana huátaca que la'acana penaje. Huarúhua'año nacaje najluhua, ijlo numá, i'ijnataca piyá ipéchuhua nacaje ihuarúhua'acare nacú. Uncá ila'alaje icó paminana que, a'acáloje inacojó nacaje Tupana huátaca que la'acana penaje.

<sup>31</sup> Marí eja'ahuá, hue'emacare nacú me'etení, i'imari tajnácajo nacú. Aú calé uncá i'ijnatálaje cajrú ipéchuhua nacaje marí eja'ahuá chu i'imacare nacú, ihue'epícaloje Tupana huátaca que la'acana itucumó penaje.

<sup>32</sup> Uncá nuhuátala a'acá inacojó cajrú huani nacaje. Ihuacajina, Tupana ja'apiyá jema'ajeño, la'año nacaje, ri'imacáloje palá Tupana nacú penaje. Nahuata Tupana huátaca que la'acana.

<sup>33</sup> Eyá achiñá, cayajálori, pechu i'imari marí eja'ahuá chu i'imacana nacú, rihuátacale nacaje la'acana, ri'imacáloje palá riyajalo nacú penaje.

<sup>34</sup> Naqué caja inaánajlo ricá. Ihuacajilo a'ayó runacajó Hue'emacana Jesucristo huátaca que la'acana. Ru'umacáloje Tupánajlo a'aquejami que penaje. Rupechu, runapona hua'até i'imari Tupánajlo a'aquejami queja. Eyá inanaru, cayajnaru, pechu i'imari marí eja'ahuá chu i'imacana nacú, rula'acáloje nacaje, ri'imacáloje palá ruyajná nacú penaje.

<sup>35</sup> Marí numacare nacú ijlo, numá ijlo, nacaje i'imacáloje palá ijloje penaje. Uncá nuhuátala ihuacára'acana majopeja, ila'acá piyá nacaje ihuátaca que. Uncá ilé caje penaje calé numá ijlo. Nuhuata ila'acá palá. Nuhuata caja a'acá icó Tupánajlo, ihue'epícaloje rijluhua que la'acana itucumó penaje.

<sup>36</sup> Uncá ca'ajná ihue'epila naca palani itunajlo. Re ca'ajná e'iyajena pechu nacú iyani a'acana, nahuá'acacaloje ajopana hua'até penaje. Caja ca'ajná na'apá inaya caje chiyá. Ila'á ihuátaca que iyani hua'até. Uncá nara'apá la'alá pu'uhuaré nayani a'acana aú, nahuá'acacaloje penaje.

<sup>37</sup> Re ca'ajná apú, rihue'epí méqueca rila'ajica. Caja ripechu nacú ri'imá: "Uncá nó'olaje nutu, apú huá'acacoloje rujhua'até penaje. Uncá na calé huacára'ari núcá ro'ocana," que ca'ajná ripechu. Marí que la'acana i'majeri palani caja rojló.

<sup>38</sup> A'arí ritu, apú huá'acacoloje rujhua'até penaje, la'arí palá. Eyá apú ca'ajná uncá a'alá ritu, ruhuá'acacoloje penaje. Ricá la'ajeri palá, ritu a'ajeri chaje palaca. Marí que la'acana palani rojló, chapú caje e'iyá hue'emacale me'etení.

<sup>39</sup> Chuhua numájica piño marí que ijló: Tupana puráca'alo lana'aquejami quemari inaana nacú, nayurícoloje naluna hua'até ne'emacá quetana penaje. Apú ca'ajná tajnaro ruliyá. Ejomi ruhuátajica ee ruhuá'acojla piño apú hua'até, ruhuátacare caje hua'até. Jesucristo hua'atéjina naquiyana numá nacú, ruhuá'acacoloje rijhua'até penaje.

<sup>40</sup> E'iyonaja pu'ují ihuacajílo mi pechu, uncájica ee ruhuá'aco apú hua'até. Ruhuá'acaquelo apú hua'até, uncá ñaque calé rupechu i'imacajla pu'ují. Marí que numacá ijló rinacu nupechu queja. Nuhue'epí Tupana Pechu huáque'ehue que caja nupechu. Aú numá ijló marí que.

## 8

### *A'ajnejí na'acare nachí'ináricana jenámijlo ajñacana yucuna marí:*

<sup>1</sup> Chuhua nu'umajica a'ajnejí na'acare nachí'ináricana jenámijlo ajñacana yucuna. Na'á a'ajnejí nachí'ináricana jenámijlo, napechu i'imacale rinacu: "Huachí'ináricana jenami japi ricá" que. Apala ipechu i'imá inacuhá: "Caja huecá maárohua i'imacaño hue'epiño uncá na penaje calé ilé caje." Raú ca'ajná ila'á icó chá'atajeño que. Nacaje huahue'epicare aú huala'á huecó chá'atajeño. Eyá íqui'ija pecohuácaca huátacana aú huala'á caphí pajlocaca huapechu, hue'emacáloje Tupana puráca'alo chojé caphí raú penaje.

<sup>2</sup> Apú ca'ajná pechu i'imari rinacuhá marí que: "Nucá hue'epiri palá piyuque nacaje nacojé." Ilé que i'ijnatácare ripéchuhua uncá hue'epila palá.

<sup>3</sup> Tupana hue'epiri mecajenaca huátaca ricá íqui'ija. Najloja calé ra'á hue'epícaje, nahue'epicaloje palá penaje. Najloja calé ra'á hue'epícaje, nahue'epicaloje palá penaje.

<sup>4</sup> A'ajnejí nato'otácare nacaje jenámijlo ajñacana yucuna nu'umajé ijló. Nacaje jenami nemá nacú: "Huachí'ináricana jenami ricá" que. Uncá na penaje calé ricá. Huahue'epí, uncá cajrú calé ina'uqué chí'ináricana i'imaño. Ricaja calé Tupana, pajluhua, piyuque ina'uqué chí'ináricana ricá.

<sup>5</sup> E'iyonaja ina'uqué naquiyana quemaño: "Re cajrú huachí'ináricana marí eja'ahuá chu. Re caja necá je'echú chu. Huahuacára'ajeño caja necá." Marí que najló ricá.

<sup>6</sup> Huahue'epí reca chí'ináricanaji, pajluhua, ricá, Jesucristo Jara'apá ricá. Ricá queño'ótari piyuqueja huani nacaje i'imacá. Ina'uqué hua'ató riqueño'óta. Huecá, Jesucristo hua'atéjina, i'imaño rijló penaje. Re caja pajluhua Huahuacára'ajeri huani, Jesucristo ricá. Ripalamane aú piyuqueja nacaje i'imacá. Huecá i'imaño caja Tupana yaní ripalamane.

<sup>7</sup> Uncá piyuque ina'uqué calé hue'epiño ricá numacare nacú. Uncá chiyó ne'emá Jesucristo hua'atéjina, pu'ují napechu i'imajica nacaje jenami nacú, nemacare nacú: "Huachí'ináricana jenami ricá." Marí que ne'ejnatájicano napéchuhua rinacu i'imajica, uncá chiyó nema'á Jesucristo ja'apiyá. Raú ra'á renó napechu nacojé. Najñácahu me'etení a'ajnejí ajopana to'otácare nacaje jenami nacojé i'imacá, napechu i'imá: "Huachí'ináricanajlo na'á marí a'ajnejí i'imacá." Aú uncá najñala ricá, uncale napechu i'imalá caphí quehuácaje puráca'aloji hue'epícana nacú. Rajñaniya aú napechu i'imá: "Pu'uhuaré huala'acá rajñacana aú," que napechu i'imacá rinacu. Najñácahu ricá, napichata napechu najluhua.

<sup>8</sup> Uncá Tupana pechu i'imalá pu'ují huanacu a'ajnejí naquiyana ajñacana aú. Uncá hue'emalá palani Tupánajlo huajñácare a'ajnejí aú. Uncá caja pu'uhuaré la'ajeño que calé rijló huecá, uncachu huajñala ricá.

<sup>9</sup> Inaquiyana hue'epiño uncá ila'alá pu'uhuaré ilé caje a'ajnejí ajñacana aú. Eyá ajopana inaquiyana, uncá hue'epilaño palá necá uncá ñaque calé najló ricá. Uncá jo'ó nahue'epila palá quehuácaje puráca'aloji nacojé. Ica hue'epiñojlo numá: Ajñaniya ilé a'ajnejí nato'otácare renami jimaje. Apala huejapa pechu i'imacaño ja'año ijhua'até rajñaje. Raú nala'ajla pu'uhuaré.

<sup>10</sup> Apala pihue'epí uncá ina'alá pu'uhuaré rajñacana aú. A'ajnejí nato'otácare renami nacojé ajñacana aú piyá'ó ca'ajná. Riñacarelana chu piyá'ó ca'ajná rajñacana nacú. E'iyohuá que ca'ajná apú Jesucristo hua'ateje ja'apaca rehuá, huejápaja péchuri ri'imacá rihue'epícana nacú. Ricá amari pajñaca ricá. Raú caja rajñá ricá pijhua'até. Pipechu nacú ri'imá ca'ajná: "¿Chuhua chí rihue'epí uncá rila'alá pu'uhuaré raú?" E'iyonaja ricahuíla'ó rinacojé, ripechu i'imacale: "Pu'uhuaré ca'ajná nula'acá huachí'ináricana marí a'ajnejí ajñacana aú."

<sup>11</sup> Picá hue'epiri uncá pila'alá pu'uhuaré rajñacana aú. E'iyonaja calé pihue'epícare aú pila'á chapú pinaquiyánajlo, ripechu i'imacale, "Rajñacana aú nula'á pu'uhuaré" que. Pipachá rila'á nacaje apojó rihue'epícare liyá. Reyá a'ajná ño'ojó rila'ájé piño ca'ajná nacaje. Uncá rihue'epílaje ca'ajná méqueca ricá Tupánajlo. E'iyonaja rila'ájé ricá. Marí caje aú papichata ricá Tupánajlo. Richaya caja Jesucristo taca'arí i'imacá, ri'imacáloje Tupana le'ejé penaje raú.

<sup>12</sup> Rajñacana aú ila'á chapú inaquiyánajlo, Jesucristojlo hua'até. Uncá hue'epílaño palá Tupana nacojé necá. Ilé caje a'ajnejí ajñacana aú icá apichátaño napechu Tupánajlo.

<sup>13</sup> Jesucristo hua'atéjena la'ajica ee pu'uhuaré nacaje nula'acare aú, uncá huani nula'alaje ricá. Uncá caja nojñálaje a'ajnejí napechu i'imacare nacú: "Uncá paala rajñacana" que. Apala nomátaje necá rajñacana aú. Rajñacana aú nala'ajica pu'uhuaré, uncale nala'alaje nacaje napechu nacú ri'imacá que.

## 9

<sup>1</sup> Uncá no'olá nunacojó méqueca ajopana pechu i'imacá nunacu. Jesucristo huacára'acarena naquiyana núcá. Núcá caja amari Hue'emacana huani Jesucristo i'imacá. Jesucristo hua'atéjena icá me'etení, nu'umacale riyucuna ijlo i'imacá.

<sup>2</sup> Ajopana ca'ajná quemáño nunacu: "Uncá Jesucristo huacára'acarena naquiyana calé ricá." Icá hue'epiño nanaquiyánaca núcá, jema'acale Jesucristo ja'apiyá nupalamane aú. Marí caje aú ihue'epí Jesucristo huacára'acarena naquiyánaca núcá.

<sup>3</sup> Re nunacu culácatajeño. Nemá nunacu: "Uncá Jesucristo huacára'acarena naquiyana calé ricá." Aú marí que nupura'acó nuchayo.

<sup>4</sup> Numá nunacuhúa: "Jesucristo huacára'acarena naquiyana núcá." Ñaquele nuhuátaquela nuquejá'ajla ina'uqué liyá a'ajnejí, nu'umacáloje raú penaje.

<sup>5</sup> Nuhuátaquela, nuhuá'acojla inanaru, Jesucristo ja'apiyá jema'ajeyo hua'até, ru'ujnacáloje nujhua'até penaje. Ajopana Jesucristo huacára'acarena chirá'año naluna hua'até. Cayajáloruna caja Jesucristo merénami. Cayajáloni caja Pedro. Marí que necá.

<sup>6</sup> Eyá marí que huecá: Huasapa hue'emajohua penaje. Apala ipechu nacú ri'imá: "Uncá meño'ojó Pablo, Bernabé, quele huacára'ala ina'uqué, na'acáloje najló nacaje penaje. Uncá meño'ojó nayurila nayáte'ela aú sápacana, ne'emacáloje Tupana puráca'alo ja'apátacana nacuja penaje," que ca'ajná ipechu huanacu.

<sup>7</sup> Ne'emacana a'arí suráranajlo nasápaca'ala huemí. Uncá surárana sapala najluhua, nahuaríhua'acaloje najluhua a'ajnejí, a'arumacají, caje macá penaje. Piyuque namena minana ajñaño caja namena naquiyá. Piyuque ohuéjana lamára'ajeño ajñaño caja a'ajnejí nala'acare nachu'uchure naquiyá. Ñaque caja Jesucristo huacára'acarenajlo ricá. Necá jehuíña'ataño ina'uqué Tupana puráca'alo nacú. Nehuíña'atacarena a'año najló nacaje, ne'emacáloje raú penaje.

<sup>8</sup> Uncá numalá rinacu ajopana quemacloje najluhua a'ajnejí, a'aá que. Ñaque caja Tupana puráca'alo lana'aquejami, Moisesmi chu lana'acare i'imacá, quemacá rinacu.

<sup>9</sup> Marí que rimacá: "Nachira'átajica ee jema pircana trigo jahuacátaquejami e'iyohúa, ritojro'ocáloje ricá penaje, uncá nepo'otálaje ritacú, rajñácaloje rinaquiyana risápaca'ala huemí penaje," que rimacá. Uncá ina'uqué hue'epícaloje jema pircana mu'ují penaje calé rimá marí que rinacu.

<sup>10</sup> Rimá caja huanacu, Tupana puráca'alo yucuna i'imajeño nacú, ina'uqué a'acáloje huajló nacaje huasápaca'ala huemí penaje. Nehuíña'atacana Tupana puráca'alo nacú i'imari huasápaca'ala. Apa'amá aú numá piño rinacu: Te'erí pajno'otájeri lamá'atari te'erí napé, nejátacaloje nacaje icha ijí re'iyajé penaje. Richa naquiyana i'imacáloje rijló penaje, risapa te'erí lamá'atacana nacú. Apú piño richa ña'ajeri, sápari caja rinacu richa naquiyana i'imacáloje rijló penaje.

<sup>11</sup> Huecá ja'apátano ijlo Tupana puráca'alo i'imacá. Ñaquele huahuátaquela huahuacára'ajla icá, a'acáloje huajló nacaje, a'ajnejí caje, hue'emacáloje raú penaje.

<sup>12</sup> Icá a'año ajopánajlo nacaje. Ne'emá ijlo Tupana puráca'alo yucuna. Aú huahuacára'ala icá, a'acáloje najló nacaje penaje. Ñaque caja huajló ricá. Huahuátaquela huahuacára'ajla a'acá huajló nacaje, cajrú hua'apátacale ijlo Tupana puráca'alo i'imacá. Huahuátaquela, huahuacára'ajla a'acá huajló nacaje. E'iyonaja uncá huaquej'ala nacaje ina'uqué liyá. Camu'ují huala'acá aú nacaje nacú, huajña'á ricá panacu. Marí que huala'acá ina'uqué e'iyohúa, napechu i'imacá piyá huanacu: "¿Najña'acáloje nacaje najluhua penaje chi ne'emá Jesucristo yucuna huajló?" Marí que napechu i'imaquela, uncá na'alajla ripuráca'alo nanacojó.



<sup>13</sup> Ică hue'epiño reca nacaje Tupana ñacaré chiyá sápageñojlo. Pirajina nóquelana chojé, nenó napirana naquiyana, pu'uhuaré nala'acare chaya penaje. Rinacu sápageño ajñaño ri'ími naquiyana.

<sup>14</sup> Marí que caja Hue'emacana Jesucristo huátaca huajló, riyucuna i'imagéñojlo. Ajopana hua'até hue'emá Tupana i'imacana ina'uqueé capichácajo liyá yucuna ajopánajlo. Rihuacára'a ina'uqueé a'acá huajló nacaje, hua'emacáloje raú penaje.

<sup>15</sup> Nuhuátaquela nuhuacára'ajla ina'uqueé a'acá nojló nacaje, nu'umacáloje raú penaje. E'iyonaja calé uncá huani nuquejá'ala nujluhua nacaje ina'uqueé liyá. Uncá caja numalá ijlo me'etení, a'acáloje nojló nacaje penaje. Apala nutaca'ajé me'epejí nacú ripachá. E'iyonaja uncá nuquejá'alaje iliyá nacaje. Caja queja nuhuátaca i'imacaje. Palani huani nojló Jesucristo yucuna i'imacana ina'uquejlo majopeja. Ñaquele uncá nuquejá'ala nacaje naliyá rihuemí penaje. Uncá nuhuátala ina'uqueé jácho'otaca núcá ñaqueé i'imacana chiyá.

<sup>16</sup> Tupana i'imatari ina'uqueé capichácajo liyá. Uncá nu'umalá riyucuna, nula'acáloje nocó chá'atajeri queja raú penaje. Tupana a'arí núcá, nu'umacáloje riyucuna ina'uquejlo penaje. Chapú huani ri'imajica nojló, uncája que nu'umá riyucuna ina'uquejlo.

<sup>17</sup> Nocó nuhuátaquela riyucuna i'imacana ina'uquejlo, re rihuemí i'imacajla nojló. Marí que ricá: Nu'umá riyucuna ina'uquejlo, Jesucristo huacára'acale núcá. Ricá penaje ra'á nu'umacá.

<sup>18</sup> Palani nojló riyucuna i'imacana ina'uquejlo. Ra'apiyá jema'acana aú Tupana i'imatari necá capichácajo liyá. Rihuemí queja caja nojló ricá. Nu'umá Tupana i'imataca ina'uqueé capichácajo liyá yucuna ina'uquejlo. Marí nusápaca'ala. Caja Tupana quemari nunacu, nuhuátaquela nuquejá'ajla naliyá nacaje nujluhua penaje. E'iyonaja calé uncá nuhuátala na'acá nojló rihuemí.

<sup>19</sup> Uncá na calé huacára'ari nula'acá nacaje. Nula'á nocó piyuque ina'uqueé hua'até sápageñi que, ina'uqueé jema'acáloje Jesucristo ja'apiyá raú penaje.

<sup>20</sup> Judíona naquiyana hua'até nu'umacá huacajé, napechu queja caja nula'acá nupéchuhua najhua'até, nu'umacáloje Jesucristo yucuna najló penaje, nema'acáloje ra'apiyá raú penaje. Judíona i'imaño Tupana puráca'alo ja'apiyá, Moisesmi chu lana'acare i'imacá. Núcá uncá i'imalá ra'apiyá. E'iyonaja re nu'umacá najhua'até quietana, napechu queja caja nupechu i'imacá ra'apiyá jema'acana nacú. Marí que nula'acá, nu'umacáloje nojló Jesucristo yucuna, nema'acáloje ra'apiyá raú penaje.

<sup>21</sup> Nu'umacá aú ajopana ina'uqueé hua'até, napechu queja caja nula'acá nupéchuhua najhua'até. Uncachu ne'emalá Moisesmi chu puráca'alomí ja'apiyá, uncá caja nu'umalá ra'apiyá nu'umacá najhua'até quietana. Marí que nula'acá, nu'umacáloje najló Jesucristo yucuna penaje. Marí que numacá aú uncá numalá: "Caja nuyurí Tupana puráca'alo ja'apiyá jema'acana" que. Jesucristo puráca'alo ja'apiyá jema'ajeri jo'ó núcá.

<sup>22</sup> Re ina'uqueé, uncá hue'epiño palá Tupana nacojé. Uncá nupechu i'imalá nanacu: "Majopeja i'imacaño necá" que. Necá queja caja núcá najhua'até, nu'umacáloje Jesucristo yucuna najló penaje, nema'acáloje ra'apiyá raú penaje. Necá queja caja nu'umacá piyuqueja ina'uqueé hua'até, nema'acáloje nupuráca'alo ja'apiyá raú penaje, ne'emacáloje capichácajo liyá raú penaje.

<sup>23</sup> Marí que nula'acá ina'uqueé e'iyohuá, Jesucristo ja'apiyá jema'ajeño i'imacáloje íqui'iruna huani nachaje raú penaje. Tupana i'imataca ina'uqueé capichácajo liyá. Ricá i'imari nusápaca'ala huemí queja nojló.

<sup>24</sup> Ică hue'epiño marí: Necho'ó ca'ajná, namácaloje naca chá'atari necá jecho'ocajo aú. Pajluhuájajloja calé na'ó rihuemí, richá'atacale ne'emacá. Ñaquele ijlo numá: Ila'á ipéchuhua ñaqueé caja. A'á inacojé Tupana huátaca que la'acana nacu, rihuemí i'imacáloje ijlo raú penaje.

<sup>25</sup> Piyuque jecho'ojeño lamára'ataño nanapona palá. Uncá nala'alá nahuátaca que huani najluhua. Nala'á nanapona peyajhué, nahuó i'ijnacá piyá. Marí que nala'acá, nachá'atacaloje ajopana raú penaje. Chá'atajeño huíla'aru nacojé na'á nacaje ramájona penaje, huíchu'upe caje. Raú ajopana pechu i'imari nanacu: "¿Necá chi chá'atajeño huani?" Nachá'atacare huemí queja huíchu'upe i'imacá. Re rijimáreacha. Mequetánaja calé rijña'á panacu, quéchami ra'apaca. Ñaqueé caja ina'uqueé pechu capicháñari nachá'ataca yucuna. Eyá huecá i'imaño nacaje la'acana nacú, uncá tajnácajo penaje calé rihuemí i'imacáloje huajló penaje. Palá Tupana pechu i'imajica huanacu ñaqueja. Ñaquele huemí a' piyuque nacaje rihuátaca que.

<sup>26</sup> Uncá nula'alá nacaje majopeja. Uncá caja nula'alá nacaje menáhuaca.

<sup>27</sup> Uncá ñaqueé calé núcá. Uncá nula'alá nacaje nuhuátaca que huani nujluhua, nula'acáloje palá raú penaje. Marí que nula'acá, nu'umacá piyá maliyaru Tupánajlo.

Rihuátaca que nula'acáloje raú penaje, nuhuajá nocó. Caja nohuíña'ata cajrú ina'uqué rinacu. Ñaquele nuhuata piyuqueja nacaje la'acana, ri'imacáloje palá Tupana nacú penaje.

## 10

*Rila'á nenacú, napechu i'imacáloje caphí Tupana chojeja penaje. Riyucuna marí:*

<sup>1</sup> Nojena, nuhuata ihue'epica marí ila'acá piyá pu'uhuaré: Tupana i'imari hua'ajútayami chuna hua'até i'imacá. Juni suhuáca'ala aú ri'ijná nachó i'imacá. Ají que rihuá'aca ne'emacá Egipto te'eré eyá. Nephá juni jalomi turenaje. E rijme'etá najló juni jalomi, te'erí amácolojé penaje. Ricá nacuhá nacuhá'a pa'anajo pitá.

<sup>2</sup> Marí que Tupana huá'aca ne'emacá. Marí que piyuqueja necá, rihuá'acarena, i'imaño bautizar la'aquejanami queja rijló. Raú nahue'epí Moisesmi chu hua'atéjena ne'emacá.

<sup>3</sup> Piyuqueja necá ajñaño ricaja caja a'ajnejí, Tupana a'acare najló je'echú chiyá i'imacá.

<sup>4</sup> Ricá ajñácanami nacú ne'emaqué. Uncá juni i'malá najló huacajé, Cristo jeño'ótari najló juni jipa e'iyayá. Piyuqueja necá i'iraño ricaja caja juni naquiyana. Cristo i'imari najhuáque'ehue i'imacá, la'arí napechu caphí. Juni jipa e'iyayá jeño'ocaro i'imari palá narúru'upijlo. Ñaque caja Cristo i'imacá napéchujo. Ricá la'arí napechu palá.

<sup>5</sup> E'iyonaja cajrú nanaquiyana la'año pu'uhuaré. Marí que nala'acá chona Tupana huajari ne'emacá. Aú cajrú nanaquiyana taca'atoco cajruni huani pu'uteni chu i'imacá.

<sup>6</sup> Marí que rihuajaca ne'emacá, huala'acáloje huenacuhá raú penaje, hue'emacá piyá huéchiruna ñaque la'acana nacú.

<sup>7</sup> Nanaquiyana pechu i'imari pu'ují nacaje jenami nacú Tupana apumí chojé. Ila'aniya nala'acá i'imacá que caja. Tupana puráca'alo lana'aquejami quemari marí que nanacu: "Rehuá nayá'o na'ajnehuá ajñacana nacú. I'iracaje nacú caja nayá'o. Quéchami nácho'oco arápa'aje," que rimacá. Marí que nala'acá i'imacá, nacajmo'ocó huacajé, napechu i'imacáloje pu'ují jema i'irí jenami nacú penaje.

<sup>8</sup> Apú huacajé piño nala'á namanaicho ajopana hua'até. Huala'aniya ñaque caja. Marí que nala'acá chona, Tupana capichátari pajluhua cálaja veintitrés mil ina'uqué i'imacá.

<sup>9</sup> Nanaquiyana la'año Tupana mapéchuru queja najluhua, uncale ra'alá nacaje nahuátacare caje. Huala'aniya nala'acá i'imacá que caja. Ilé que nala'acá pachá, Tupana huacára'ari jeina yuriná ajma'acá necá ne'iyayá. Ricá nacuja ñaque i'imacáloje taca'atano i'imacá. Marí que rihuajaca ne'emacá.

<sup>10</sup> Nanaquiyana aca'año Tupana maná, pachá rihuacára'a pajluhuaja rijhua'ateje, je'echú chiyaje, nenótaje i'imacá.

<sup>11</sup> Hua'ajútayami chuna yucunami Moisesmi chu lana'arí i'imacá, ri'imacáloje Tupana puráca'alo lana'aquejami naquiyana penaje, rila'acáloje me'etení i'imacáloje jenacú raú penaje. Pu'uhuaré nala'acare yucuna rilana'á, huala'acá piyá pu'uhuaré nala'acá que caja. Piyuque nacaje Tupana puráca'alo ja'apátajeñomi chuna quemáicare nacú, iphari rená chojé, ñaque ri'imacáloje huajló penaje.

<sup>12</sup> Apala pipechu nacú ri'imá: "Mana'í i'imacá nucá. Uncá nuhue'epila pu'uhuaré la'acana, uncá caja nuhue'epila numanaicho la'acana," que ca'ajná pipechu pinacuhá. Pijló numá: Pamá picó, pa'ajico pu'uhuaré la'acana chojé, pimanaicho la'acana chojé.

<sup>13</sup> Re caájna nacaje, a'arí ime'é rijluhua, ila'acáloje pu'uhuaré raú penaje. Ñaqueja caja piyuqueja ina'uquejlo ricá. Tupana la'arí iná palá, iná la'acá piyá pu'uhuaré. Uncá riyurila pu'uhuaré la'acana chá'ataca iná, iná la'acáloje iná namaicho raú penaje. Pu'uhuaré la'acana a'acachu iná me'é rijluhua, Tupana la'arí iná pechu caphí, iná la'acá piyá ñaque penaje. Marí caje aú calé uncá iná ja'aló ñaque la'acana chojé.

<sup>14</sup> Nojena, iqui'ija nuhuátacarena, marí que ri'imacale, ila'á icó u'upejlú nacaje jenami liyá, nemacare nacú: "Huachi'ináricana ricá."

<sup>15</sup> Que'ejhuiruna icá. Jema'á méqueca numacare nacú ijlo.

<sup>16</sup> Nenoca yámona Jesucristo i'imacá, rimá i'iracaje, pan caje nacú: "Palá pila'acá huecá raú" que Tupánajlo. Ñaque caja huemacá rinacu Tupánajlo, Jesucristo taca'acale huachaya i'imacá. Rihuacajé rira i'ijnari raphú chiyá huajloje penaje. Rijhua'atéjena hue'emacale, hue'erá cajmú caje jalá amúra'atanami. "Nuchaya caja ritaca'á i'imacá" que quemacana iná i'iracá aú ricá. Rijhua'atéjena hue'emacale, huajná caja pan. "Nuchaya caja ra'á ricó taca'acájejo i'imacá," que quemacana iná ajñaca aú ricá.

<sup>17</sup> Jesucristo, pajluhuaja ricá. Huecá, iqui'iruna, i'imaño ripalamane aú. Raú huecá piyuqueja pajluhuaja hua'atéjena i'imacáloje. Jesucristo hua'atéjena huecá.

<sup>18</sup> Ihuajá ipéchuhua méqueca Israelmi chu laqueñami naquiyana la'acá. Nenó napirana naquiyana, ne'ejnatácalojé napéchuhua Tupana nacú raú penaje. Quéchami ne'iyajena ajñaca ri'imi naquiyana. Tupana huáque'ena queja ne'emajica raú.

<sup>19</sup> Marí cajé aú uncá numalá nanacu ñaque najló ricá, to'otaño ri'ími nacaje jenami nacojejló. Uncá nachí'ináricana i'imalá nemacare nacú, ne'emacáloje ri'ími huáque'ena que penaje. Uncá caja na penaje calé ri'ími nato'otácare renami nacojé.

<sup>20</sup> Marí cajé nacú nuhuata quemacana ijló: Necá, uncá hue'epiláño Tupana nacú, to'otaño nacaje jenami nacojé a'ajnejí, napechu i'imacale: "Huachí'ináricana jenami japi ricá" que. Jiñana péchujlo a'acanamei ricá. Uncá Tupánajlo a'acanamei calé ricá. Ñaquele uncá nuhuátala i'imacá jiñana pechu huáque'ena ri'ími ajñacana aú, jiñana péchujlo a'acanamei ri'imacale.

<sup>21</sup> Uncá meño'ojó hue'emalá Jesucristo huáque'ena, jiñana pechu huáque'ena hua'até. Re i'iracaje, Huahuacá'ara'ajeri Jesucristo hue'epéjona penaje ricá. Re caja apú i'iracaje jiñana péchujlo a'acanamei ricá. Uncá paala iná i'iracá ricá pajñacani queja Jesucristo le'ejé, jiñana le'ejé hua'até.

<sup>22</sup> Uncá huani paala marí que la'acana. Raú Tupana yúcha'aro huachá, rimejajlena hue'emacale. Uncá richaje calé huecá.

*Iná huátacachu íqui'í ajopana ina'uqué, uncá iná la'alá iná huátaca que huani. Riyucuna marí:*

<sup>23</sup> Ne'iyajena quemano marí que rinacu:

—Uncachu rinacu quemacana i'imalá Tupana puráca'alo lana'aquejami e'iyá, iná la'á iná huátaca que."

Quehuaca jo'ó ricá. E'iyonaja re'iyajé nacaje iná huátacare la'acana, uncá ra'alá iná ñaté. Iná la'á iná huátaca que, uncachu rinacu quemacana i'imalá. Marí quehuaca. E'iyonaja re re'iyajé nacaje iná huátacare la'acana, uncá ra'alá ajopana ñaté, nala'acáloje richaje, richaje que Tupana huátaca que raú penaje.

<sup>24</sup> Palani iná la'á nacaje, ñaqueja ri'imacáloje palani ajopana ina'uquejlo penaje. Uncá paala iná la'acá nacaje inajlúhuaja calé.

<sup>25</sup> Ri'ími, iná huarúhua'acare ri'ími ñacarelana chiyá, ajñá ricá. Ipechu i'imaniya rinacu: "¿Mere eyá chí najña'á ri'imacá? ¿Rajñacana aú chí nula'á pu'uhuaré?" I'ijnataniya ipéchuhua marí que.

<sup>26</sup> Ajñá ricá, Tupana palamane ri'imacale. Tupana puráca'alo lana'aquejami quemari marí que: "Piyuque eja'ahuá chuhua i'imacare nacaje mináricana ricá Tupana."

<sup>27</sup> Pajlúhuaja ca'ajná yucupé'ari picá, pajñácaloje pa'ajnehuá rijhua'até penaje. Uncá ca'ajná Jesucristo hua'ateje calé ricá. Pihuata ca'ajná richaje i'ijnacana. Aú ca'ajná pi'ijná richaje. Pajñá ri'ími ra'acare pijló. Rajñacana nacú ca'ajná pi'ijnatá pipéchuhua: "¿E chí ri'ími i'imacá to'otáqueja nacaje jenami nacojé?" que ca'ajná pipechu. E'iyonaja piquej'aniya riyucuna.

<sup>28</sup> E'iyohuá que ca'ajná apú iphaca pinacu. Rimá ca'ajná pijló: "Marí ri'ími i'imichari nachí'ináricana jenámijlo a'acanamei." Marí que rimacá aú ca'ajná, uncá pajñala ricá. Ripechu i'ímá ca'ajná: "Rajñacana aú iná la'á pu'uhuaré." Ñaquele uncá pajñala ricá.

<sup>29</sup> Rajñacana aú apú cahuíla'aro rinacojé, ripechu i'imacale pinacu: "Uncá huani paala rila'acá rajñacana aú" que. Ñaquele ri'imacáloje rinacu palá penaje, uncá pajñálaje ricá. Picá ca'ajná uncá cahuíla'alo rinacojé raú. E'iyonaja pajñaniya ricá.

Marí que ri'imacale iná quemari ca'ajná: "Apú cahuíla'acaro nacojé pachá, uncá riyurila huajló huahuátaca que la'acana. ¿Naje ilé que huani ricá?"

<sup>30</sup> Iná quemá Tupánajlo iná ajñaca ricá yámona: 'Palá pila'acá nucá marí a'ajnejí aú.' Uncá naje calé apú quemari huacanú 'Pu'uhuaré nala'acá marí caje a'ajnejí ajñacana aú' " que ca'ajná iná huátaca rinacu quemacana.

<sup>31</sup> Ila'á piyuqueja nacaje, ri'imacáloje palá Tupana nacú penaje. Piyuque nacaje ila'acare, a'ajnehuá ajñacana ca'ajná, nacaje jalá i'iracana ca'ajná, ila'á piyuqueja nacaje Tupana huátaca que.

<sup>32</sup> Ila'aniya nacaje, apichátacare aú ina'uqué pechu Tupana liyá. Apichátaniya judíona pechu. Apichátaniya caja ajopana, uncá judíona i'imacaño calé, pechu, Jesucristo hua'atéjona pechu quele. Apichátaniya Tupana liyá napechu pila'acare aú.

<sup>33</sup> Nucá la'arí nacaje piyuqueja palá, ri'imacáloje palá piyuqueja ina'uqué nacú penaje. Uncá nujlúhuaja calé nula'á nacaje. Nuhuata nacaje nula'acare i'imacá palá ajopana ina'uquéloje penaje, napechu i'imacáloje caphí Jesucristo chojé raú penaje. Marí que ne'emajica aú, ne'emajó capichácajo liyá.

## 11

<sup>1</sup> Nula'acá que caja nuhuata ila'acá marí eja'ahuá chu. Uncá Jesucristo la'alá nacaje rijlúhuaja calé i'imacá. Rila'acá i'imacá que caja nula'acá. Ñaquele ila'á nula'acá que caja.

*Marí que inaana i'imajica ijhua'até, jahuacaco Tupana puráca'alo jema'ajé huacajé:*

<sup>2</sup>Nojena, palá nupura'acó inacu, ihue'epícale núcá. Ejo'ocaja ipechu nacú nacaje piyuque nohuíña'atacare nacú i'ímacá. Aú calé nupura'ó caja inacu palá.

<sup>3</sup>Nuhuata ihue'epica Jesucristo i'ímacá achiñá huacára'ajeri. Tupana i'ímacá Jesucristo huacára'ajeri que caja achiñá i'ímacá inanaru huacára'ajeri.

<sup>4</sup>Ina'uqué jahuacaño ca'ajná Tupana puráca'alo jema'ajé pajhua'atéchaca. Re ca'ajná pajluhuaja ne'iyá, pura'aró Tupana hua'até. Apú ca'ajná ja'apátari ina'ujejlo Tupana puráca'alo. Tupana quemacá rijló que ra'apátaca najló ricá. Marí que rila'acá quetana re ca'ajná risapéhuane richá. Marí que la'acana aú uncá riphala Jesucristo ja'apí. Uncá paala Jesucristo nacú ricá, achiñá huacára'ajeri ri'ímacale.

<sup>5</sup>Inanaru ca'ajná pura'ayó caja Tupana hua'até. Ro'opata ca'ajná ina'ujejlo Tupana puráca'alo rimacá rojló que. Uncachu ruhuíla'aru pajré i'imalá ra'apátaca najló ricá quetana, uncá paala rula'acá ruyajná nacú, ruhuacára'ajeri ri'ímacale. Napiro'ó uncá ina'uquélaruna huilá. Ñaqué caja rula'acá pu'uhuaré ruyajná nacú, uncachu ruhuíla'aru pajré i'imalá rucá, rupura'acó Tupana hua'até quetana ca'ajná, ro'opátaca ripuráca'alo quetana ca'ajná.

<sup>6</sup>Uncachu ropára'ala ruhuilá ripajré aú, palani caja rojló ruhuilá piro'ocana. Ruhuilá i'ímacachu piro'o'queja, ropáña'o raú. Ñaqué caja napáña'aco sara'aqueja nehuíla'aru i'ímacachu. Marí que ri'ímacale najló, ihuacára'a napára'aca nehuíla'aru ripajré aú.

<sup>7</sup>Eyá achiñá uncá apára'ala ruhuíla'aru ripura'acó ee Tupana hua'até. Uncá rapára'ala ricá, Tupana que caja ri'ímacale nahuacára'ajeri. Achiñá huacára'ajeri Tupana. Inanaru huacára'ajeri achiñá.

<sup>8</sup>Tupana queño'ótari achiñá i'ímacá. Uncá inanaru napona naquiyana aú calé riqueño'óta ri'ímacá. Inanaru riqueño'óta achiñá napona naquiyana aú i'ímacá.

<sup>9</sup>Uncá caja Tupana queño'ótala achiñá inanárujlo penaje. Riqueño'óta inanaru achiñajlo penaje, riñaté a'ajeyo penaje.

<sup>10</sup>Marí que ri'ímacale, inanaru apára'ayo ruhuíla'aru ripajré aú. Ruhuíla'aru pajré iná amaca aú iná hue'epí achiñana ja'apiyá jema'ajeyo rucá. Marí que ri'ímacale, inaana apára'año nehuíla'aru. Palani caja Tupana hua'atéjena, je'echú chu i'ímacaño, nacú marí que la'acana.

<sup>11</sup>Achiñana, inaana hua'até i'ímaño papalamánechaca pajhua'atéchaca. Que huajló ricá Jesucristo ja'apiyá jema'ajénojlo. Uncá hue'emalá hue'emajohua paliyácaca.

<sup>12</sup>Quehuaca achiñá napona naquiyá queño'ótacanami inanaru. Eyá inanaru palamane achiñá i'ímacá. Piyuqueja nacaje i'ímacá Tupana palamane.

<sup>13</sup>Icá hue'epiño jahuacaco ee, uncá paala inaana pura'acó Tupana hua'até, uncachu nehuíla'aru pajré i'imalá.

<sup>14</sup>Necoja piyuque ina'uqué hue'epica achiñana huilá pituca'acá aú ajopana ina'uqué apáña'año na'apí.

<sup>15</sup>Inaana amaño palá nehuilá chojé. Nehuíla'aru pajré queja nehuilá.

<sup>16</sup>Marí que numacale ijlo rinacu inaquiayana huátaño ca'ajná nujhua'até aca'acacano. Ihue'epí marí: Marí queja hue'emacá pajhua'atéchaca huahuacaco Tupana puráca'alo jema'ajé. Ajopana Jesucristo hua'atéjena, ajopana Jesucristo hua'atéjena que la'año ñaqué caja. Uncá inaana pura'alaño Tupana hua'até, uncachu nehuíla'aru pajré i'imalá. Caja marí queja hue'emacá.

*Najñá na'ajnehuá pajhua'atéchaca, nahue'epícaloje méqueca Jesucristo la'acá nachaya raú penaje. E'iyohuá que uncá paala nala'acá. Marí riyucuna:*

<sup>17</sup>Numáicare nacú ijlo me'etení, uncá numalaje inacu: "Palá ila'acá" que. Jesucristo hua'atéjena jahuacaño pajhua'atéchaca, palá napechu i'ímacáloje Tupana nacú raú penaje. Eyá ijlo ta uncá ñaqué calé ricá. Jahuacaco aú ila'á icó chapú.

<sup>18</sup>Marí que numacá inacu, ajopana i'ímacale nojló riyucuna. Nemá nojló marí que: —Ne'iyajena i'ímaño ajopana, ajopana que paliyácaca, nahuacácochu Tupana puráca'alo jema'ajé —que ne'emacá iyucuna nojló.

Nuhue'epí apala quehuaca ca'ajná nemacá inacu.

<sup>19</sup>Caja queja ricá, ramácoloje mecajenaca e'iyohuá ja'apaño palani puráca'aloji chuhúa.

<sup>20</sup>Icá jahuacaño pajluhuaja chojé a'ajnehuá ajñaje pajhua'atéchaca, ihue'epícaloje méqueca Jesucristo la'acá huachaya penaje. E'iyonaja uncá huani ila'alá Jesucristo quemacá que rinacu.

<sup>21</sup>Riphaca aú rená chojé, ajñácaloje a'ajnehuá pajhua'atéchaca penaje, e'iyajena ajñaño a'ajnejí ijña'acare ijhua'ató icámica que ajopana liyá. A'apona que ajopana ña'acá me'epejí panacu. Eyá ajopana yuhuéra'año caja nahua'á.

<sup>22</sup>Re iñacaré ta, ajñácaloje a'ajnehuá richu penaje. Uncá naje calé ila'á majopéjaruna queja ajopana Jesucristo hua'atéjena, ijhua'até jahuacácaño. Icá apáña'ataño camu'ují la'acaño

nacú. ¿Meque ihuátaca numacá ilé caje nacú? ¿E ihuátaca nupura'acó inacu palá raú? Ilé que ila'acá pachá, uncá meño'ojó nupura'aló inacu palá.

*Jesucristo huacára a'ri ra'apiyá jema'ajeño ajñaca pan caje pajhua'atéchaca apú huacajé, apú huacajé que, palá rila'acare necá hue'epéjona penaje. Riyucuna marí:*

<sup>23</sup> Hue'emacana Jesucristo liyaje hue'epícanami marí puráca'aloji, no'opátacare ijló i'imacá: Pajluhuaja Jesucristo ja'apiyateje a'ari ripinánajlo ricá i'imacá. Rihuacajé lapí, ra'acá ripinánajlo ricá yámona, Jesucristo ajñari ra'ajnehuá ra'apiyatéjona hua'até. E rijña'á ricápojo pan.

<sup>24</sup> Rimá Tupánajlo:

—Palá pila'acá huecá marí pan aú.

Aú ritupa'á najló rinaquiayana. Rimá najló:

—Ijloje penaje no'ó nunapona. Marí que ajñájica pan pajhua'atéchaca nuyámijo, ipechu capicháñaca piyá nutaca'ajicare ichaya —que rimacá najló i'imacá.

<sup>25</sup> Ejomi najña na'ajnehuá rijhua'até. Pan rijña'acá ricápojo que caja rijña'acá ricápojo chiyela. E caja rimá najló:

—Marí nura aú Tupana la'ajeri huajé nacaje ina'uquéjloje penaje, ne'emacáloje ra'apiyá raú penaje. Marí que caja i'irajica ricá pajhua'atéchaca nuyámijo, ipechu capicháñaca piyá nutaca'ajicare ichaya penaje —que rimacá najló i'imacá.

<sup>26</sup> Marí que ri'imacale huajña pan pajhua'atéchaca, najñaca ri'imacá que caja huajñaca ricá quehuá, hue'ejnatácano huapéchuhua rinacu. Jesucristo taca'acá huachaya huajloje penaje, ricá hue'epéjona penaje ricá. A'ajná majó riphájica ejená huala'ajé ñaque ricá. Hue'erá cajmú caje jalá pajhua'atéchaca, ne'eracá ri'imacá que caja hue'eracá ricá quehuá, hue'ejnatá huapéchuhua rinacu. Marí que ila'ajica, Jesucristo taca'acá huachaya hue'epéjona penaje ricá. A'ajná majó riphájica ejená huala'ajé ñaque ricá.

<sup>27</sup> Ina'uqué ajñácahu majopeja ricá pan, nala'á pu'uhuaré raú, uncá pachá napechu i'imalá palá Jesucristo napona nacú. Ra'á ri'imacá huajloje penaje, hue'emacáloje capichácajo liyá raú penaje. Ne'eracachu caja majopeja nacaje jalá, nala'á caja pu'uhuaré raú, uncá pachá napechu i'imalá palá méqueca rila'acá huachaya i'imacá. Rita'acá huacajé rira i'ijnari raphú chiyá huachaya i'imacá.

<sup>28</sup> Pamineco iná i'imá iná pechu co'oná, iná hue'epícaloje na aú ca iná la'acá pu'uhuaré. Iná ca'acáloje ricá iná naquiyo penaje, iná i'imá iná pechu co'oná. Rica'acana ejomi iná ajñaca ricá, iná i'iracá caja ralá.

<sup>29</sup> Jesucristo taca'arí huachaya rinapona aú i'imacá. Huajña pan pajhua'atéchaca, rihue'epíjona penaje. Uncachu iná hue'epila na penájeca inajlo ricá, iná la'á pu'uhuaré rajñacana aú. Richona Tupana huajari iná. Ñaque caja inajlo ricá ralá i'iracana aú.

<sup>30</sup> Majopeja inaquiyana ajñaca ricá. Ñaque caja ne'eracá ralá. Uncá nahue'epila na penájeca ricá, pachá cajrú inaquiyana i'imaño natámina. Ajopana inaquiyana i'imaño natámina pojlo'ocajo nacú. Ne'iyajena taca'año rinacu i'imacá.

<sup>31</sup> Hue'emacachu huapechu co'oná huajñaca ricá yámona, huayurícaloje pu'uhuaré huala'acare hualiyó raú penaje, uncá na chona calé Tupana huajari huecá marí que huala'acá aú.

<sup>32</sup> Pu'uhuaré huala'acare chona Tupana huajari huecá, huala'acá piyá ñaqueja caja piño. Marí caje aú uncá hue'emalaje capichátaquejami que riliyá. Uncá hue'emalaje ajopana ina'uqué i'imacá que huani, uncá jema'alaño Tupana ja'apiyá que. Capichájeño penájena i'imajácaño necá.

<sup>33</sup> Ñaquele, nojena, jahucájico ee a'ajnehuá ajñaje pajhua'atéchaca, ihuata pecohuacaca, ajñácaloje pajñacani ricá penaje.

<sup>34</sup> Quehuí me'epeji i'imacárenajlo, ajñajeño na'ajnehuá nañacaré chu. Marí que la'acana aú uncá Tupana huajálaje icá. Uncá pachá ina'uqué la'alá palá pajhua'atéchaca nahuacaco huacajé, Tupana huajari necá.

Re ejo'ocaja nacaje uncá nulamá'atalare ijhua'até. Nuphájica inacu huacajé nulamá'ataje ricá ijhua'até.

## 12

*Hue'epícaje Tupana Pechu a'acare ra'apiyá jema'ajeñojlo yucuna marí:*

<sup>1</sup> Nojena, Tupana Pechu a'arí Jesucristo hua'aténajlo hue'epícaje. Nuhuata ihue'epica riyucuna.

<sup>2</sup> Icó hue'epiño méqueca i'imacá, uncá chiyó jema'á Jesucristo ja'apiyá i'imacá. Cajrú nacaje jenami i'imari ijló ichi'ináricana que Tupana apumí chojé. Uncá meño'ojó nacaje jenami pura'aló. Majopeja ricá. E'iyonaja ipechu i'imá rinacu: “Quehuácaje cari.” Raú ica'á apojó ipéchuhua quehuácaje puráca'aloji liyá.

<sup>3</sup> Ñaquele chuhua nuhuata ihue'epica marí: Uncá Tupana Pechu huacára'ala iná pura'acó pu'uhuaré Jesucristo nacú. Tupana Péchua calé quemari inajlo: “Jesucristo i'imari Pi-huacára'ajeri huani” que. Raú iná quemá iná nacuhuá: “Nuhuacára'ajeri huani Jesucristo.”

<sup>4</sup> Tupana Pechu a'arí ra'apiyá jema'ajéñojlo apú, apú que hue'epícaje. Majopeja ra'acá ricá, uncá rihuemí aú calé. Ricaja caja Tupana Pechu a'arí huajló hue'epícaje que'iyapejé.

<sup>5</sup> Raú ra'apiyá jema'ajéño la'año Jesucristojlo nacaje apú, apú que. Rijloja calé huala'á nacaje palá rihuacára'aca que.

<sup>6</sup> Eyá ricaja calé Tupana a'arí huañaté, nacaje jácho'ocoloje palá rijló penaje, ricá huala'acare Ripechu palamane aú.

<sup>7</sup> Tupana Pechu a'arí hue'epícaje Jesucristo hua'atéjenajlo. Ra'á inajlo ricá, iná la'acáloje ajopana rinaquiyánajlo nacaje raú penaje.

<sup>8</sup> Tupana Pechu aú ca'ajná apú hue'epiri nacaje nacojé palá, ra'apátacaloje riyucuna ajopánajlo penaje. Apú ca'ajná hue'epiri Tupana Pechu aú meque quemacánaca Tupana puráca'alo, ri'imacáloje riyucuna ajopánajlo penaje.

<sup>9</sup> Ricaja caja Tupana Pechu a'arí apujlo hue'epícaje, ripechu i'imacáloje caphí Tupana chojé raú penaje. Raú rila'á ajopánajlo nacaje. Tupana Pechu a'arí apujlo hue'epícaje, ritejmo'ótacaloje ina'uqué natámina raú penaje.

<sup>10</sup> Ajopánajlo Tupana Pechu a'arí hue'epícaje, nala'acáloje nacaje uncá meño'ojó iná la'alare iná icó. Ajopánajlo ra'á caja hue'epícaje, na'apátacaloje ina'uquejlo Tupana puráca'alo ra'apiyá que penaje. Apujlo Tupana Pechu a'arí hue'epícaje, rihue'epícaloje puráca'aloji nacojé raú penaje. Raú rihue'epí mecajeca puráca'aloji jñana le'ejé. Raú caja rihue'epí mecajeca puráca'aloji Tupana le'ejé. Apujlo ra'á hue'epícaje, ripura'acóloje me'echuje puráca'aloji chu penaje. Eyá apujlo ra'á caja hue'epícaje, ra'apátacaloje ajopánajlo me'echuje puráca'aloji penaje.

<sup>11</sup> Ricaja caja Tupana Pechu, pajluhuaja, a'arí Jesucristo hua'atéjena naquiyánajlo que'iyapejé hue'epícaje numacare nacú. Ra'á apujlo, apujlo que, hue'epícaje rihuátaca que.

*Yucu ri'imá najló, rehuña'atacaloje necá nacaje nacú raú penaje. Riyucuna marí:*

<sup>12</sup> Re cajrú iná napona naquiyana. Rinaquiyana hua'até ri'imá caja pajluhuaja. Ñaqueé caja Jesucristo hua'atéjena i'imacá cajrú. E'iyonaja pajluhuaja naquiyana queja huecá rijhua'até piyuqueja.

<sup>13</sup> Jesucristo hua'atéjena i'imaño judíona naquiyana ca'ajná, griégona naquiyana ca'ajná necá, ajopana hua'até sápaño ca'ajná, najluhua sápaño ca'ajná. Piyuque huecá i'imaño pajluhuaja hua'atéjena, Tupana Pechu la'arí huecá bautizar, hue'emacáloje Jesucristo ja'apiyá jema'ajeño penaje. Tupana Pechu la'arí huecá Jesucristo hua'atéjena penaje. Tupana a'arí huajló Ripechu. Ñaquele ricaja caja Ripechu huajhua'até piyuqueja.

<sup>14</sup> Uncá pajluhuaja nacojé que calé iná napona. Re cajrú iná napona naquiyana.

<sup>15</sup> Re ca'ajná Jesucristo ja'apiyá jema'ajeño naquiyana, napechu i'imá ujhui nanacuhuá. Aú nemá: “Uncá na penaje calé huecá. Uncá rinaquiyana calé ca'ajná huecá. Caja ajopana chá'ataño huecá hue'epícaje aú,” que napechu i'imacá nanacuhuá. Iná ji'imá quemaquela inajlo marí que: “Uncá piyáte'ela calé nucá. Ñaquele uncá pinapona naquiyana calé nucá.” Marí que rimaquela inajlo, uncá rácho'olojla raú iná napona naquiyá.

<sup>16</sup> Iná i'ijhui ca'ajná quemaquela inajlo: “Uncá pijlú calé nucá. Ñaquele uncá pinapona naquiyana calé nucá.” Marí que rimaquela inajlo, uncá rácho'olojla raú iná napona naquiyá.

<sup>17</sup> Piyuque iná napona i'imaquela iná ijllú que, uncá na aú calé iná jema'acajla. Piyuque iná napona i'imaquela iná i'ijhui que, uncá na aú calé iná ama'acajla nacaje ama.

<sup>18</sup> Tupana puhuícha'ari iná napona apú naquiyana, apú naquiyana que rihuátaca que.

<sup>19</sup> Piyuque iná napona i'imaquela pajluhuaja rinaquiyana que, uncá iná napona i'imalajla.

<sup>20</sup> Re cajrú iná napona naquiyana iná nacú. E'iyonaja pajluhuaja iná napona. Ñaqueé caja re cajrú Jesucristo ja'apiyá jema'ajeño. E'iyonaja pajluhua japi queja huecá rijhua'até.

<sup>21</sup> Re ca'ajná Jesucristo ja'apiyá jema'ajeño naquiyana, marí que napechu i'imacá nanacuhuá: “Huecá chá'ataño ajopana huanaquiyana. Uncá na penaje calé huajló necá majopéjaruna.” Uncá iná ijllú quemalajla iná yáte'elajlo: “Uncá na penaje calé nojló picá” que. Uncá caja iná huila'aru quemalajla iná ji'imajlo: “Uncá na penaje calé nojló picá” que.

<sup>22</sup> Uncá ilé que quemacana i'imalá. Re ca'ajná apú huanaquiyana, ina'uqué pechu i'imari rinacu: “Majopéjari ta ricá” que. Rinaquiyana nemacare nacú “majopéjari” que, ricá la'arí nacaje Tupana huátacare caje. Raú ra'á Jesucristo ja'apiyá jema'ajeño ñaté. Uncá meño'ojó hue'emalajla palá, uncáquela ri'imalajla ñaqueé la'ajeri penaje.

<sup>23</sup> Ñaqué caja huanapona naquiyana. Re ca'ajná rinaquiyana huapechu i'imacare nacú: "Majopéjari queja ricá," apú huanapona naquiyana chaje hua'acá huanacojó ricá. Uncá palani amácanami calé ricá. Ñaquele hua'á ripajré a'arumacaji, palá ramácoloje penaje. Marí que hua'acá huanacojó ricá.

<sup>24</sup> Eyá apú huanapona naquiyana palá amácaro, uncá ñaque calé hua'acá huanacojó ricá. Uncá na penaje calé iná a'á iná nacojó ricá. Tupana puhuícha'ari iná napona, iná hua'epícaloje caja rinaquiyana nacú, iná pechu i'imacare nacú: "Majopéjari" que ricá. Apú huanapona naquiyana chaje íqui'ica hua'acá huanacojó ricá.

<sup>25</sup> Marí que ripuhuicha'aca iná napona, ri'imacáloje pajluhuaja queja inajlo penaje. Ñaque caja huajló ricá, Jesucristo ja'apiyá jema'ajéñojlo. Tupana huátari huapechu i'imacá palá panacuhuácaca. Rihuata caja hua'acá pañatéchaca. Rihuata caja hua'acá huanacojó pecohuácaca.

<sup>26</sup> Pajluhuaja huanapona naquiyana chapátacachu huecá, uncá paala piyuque huanapona i'imacá raú. Ñaque caja Jesucristo hua'aténajlo ricá. Apala apú huanapona amari chapú caje yajhué. Raú uncá caja paala ri'imacá huajló, huanapona ri'imacale. Apala ajopana iná'uqué quemáño palá apú huanapona nacú. Raú palá huani ri'imacá huanacu, huanapona ri'imacale.

<sup>27</sup> Ica' i'imaño Jesucristo hua'aténajlo. Piyuqueja icá, pajluhuano, pajluhuano que, i'imaño rijhua'aténajlo naquiyana.

<sup>28</sup> Jesucristo hua'aténajlo e'iyayá Tupana a'arí iná'uqué i'imacá, ne'emacáloje Jesucristo huacára'acarena penaje. Pamineco ra'á huecá i'imacá. Ejomi ra'á caja nanaquiyana Tupana puráca'alo ja'apátajeño penaje, na'apátacaloje iná'uquejlo ripuráca'alo ra'apiyá que penaje. Rejomi ra'á caja nanaquiyana iná'uqué jehuíña'atajeño penaje, nehuíña'atacaloje iná'uqué Tupana puráca'alo nacú penaje. Rejomi ra'á caja ajopana, nala'acáloje nacaje uncá meño'ojó iná la'alare iná icó penaje. Rejomi ra'á caja ajopana, natejmo'ótacaloje iná'uqué natami caje liyá penaje. Rejomi ra'á caja ajopana, ne'emacáloje iná'uqué ñaté a'ajeño penaje. Rejomi ra'á caja ajopana, ne'emacáloje Jesucristo ja'apiyá jema'ajeño huacára'ajeño penaje. Eyá caja penaje ra'á caja ajopana, napura'acóloje me'echuje puráca'aloji chu penaje.

<sup>29</sup> Uncá piyuqueja huecá i'imalaño Jesucristo huacára'acarena. Uncá caja piyuque huecá i'imalaño Tupana puráca'alo ja'apátajeño. Uncá caja piyuque i'imalaño iná'uqué jehuíña'atajeño. Uncá caja piyuque huecá la'alaño nacaje uncá meño'ojó iná la'alare iná icó.

<sup>30</sup> Uncá caja piyuque huecá i'imalaño natámina tejmo'ótajeño. Uncá caja piyuque huecá pura'alaño me'echuje puráca'aloji chu. Uncá caja piyuque huecá hue'epilaño napuráca'alo ja'apátacana na'apiyá.

<sup>31</sup> Pajluhuano, pajluhuano que ca'ajná ihuátaca ijluhua hue'epícaje Tupana liyá. Apú hue'epícaje ra'acare iná'uquejlo chaje palaca i'imacare, ihuata ca'ajná ijluhua. Chuhua nohuíña'atajica icá apú nacaje nacú. Apú nacaje chaje huani ricá.

## 13

### *Iqui' i iná'uqué huátacana yucuna marí:*

<sup>1</sup> Apala nuhue'epí ajopana, ajopana que pura'acó chu pura'acano. Apala nuhue'epí caja Tupana hua'aténajlo, je'echú chu i'imacaño, pura'acó chu pura'acano. Apala marí que nuhue'epícaja pura'acajo palá huani. Uncáquele nuhuata íqui'ija ajopana iná'uqué, nu'umajla cumu nacú huara'acana meje que. Uncá na nula'alajla palá ajopana raú.

<sup>2</sup> Apala nuhue'epí Tupana puráca'alo ja'apátacana ra'apiyá que. Apala nuhue'epí caja piyuque nacaje nacoje me'echuje i'imacá iná'uquejlo. Apala nuhue'epí piyuqueja nacaje nacoje. Apala nupechu i'imari caphí Tupana choje, rica'acáloje nojló ipuré rapucuna chiyá penaje. Apala marí que nuhue'epícaja la'acana piyuque. Uncáquele nuhuata ajopana iná'uqué íqui'ija majopéjari queja nu'umacajla.

<sup>3</sup> Apala no'ó piyuque nunane camu'ují la'acáñojlo. Apala no'ó caja nocó quera'atani choje Jesucristo huátaca que la'acana chaya. Uncá na penaje calé marí que la'acana i'imajla nojló, uncachu nuhuátala íqui'ija ajopana iná'uqué.

<sup>4</sup> Iná huátacachu íqui'ija iná'uqué, marí que iná i'imacá najhua'até: Uncá iná yúcha'alo nachá quiñaja, uncachu nala'alá quiñaja iná huátaca que. Iná'uqué huani iná najhua'até. Uncá caja chapú calé iná huo i'imacá nachá, nachá'atacale huecá. Uncá caja iná quemalá iná nacuhá ajopánajlo: "Nucá chá'atari ajopana" que. Uncá caja iná pechu i'imalá iná nacuhá: "Nucá hue'epiri nachaje" que.

<sup>5</sup> Iná huátacachu íqui'ija iná'uqué, uncá iná la'alá nacaje maparátano que. Uncá caja iná i'imalá canacújne'equé raú. Uncá caja iná i'imalá ima'á péchuri. Uncá caja iná a'alá iná nacojó chapú iná'uqué la'acare iná. Quiñaja iná ca'acá iná pechu naquiyó ricá.

<sup>6</sup> Iná huátacachu ina'uqué íqui'ija, uncá iná la'alá pu'ují iná péchuhua pu'uhuaré nala'acare aú, namanaicho nala'acare aú. Pu'ují iná pechu palá nala'acare aú. Palani puráca'aloji chuhua'á ri'imacale, pu'ují iná pechu najhua'até.

<sup>7</sup> Iná huátacachu íqui'ija ajopana ina'uqué, uncá iná huátala ajopana la'acá necá uncá ina'uquélaruna que. Iná huata ina'uqué íqui'ija nala'acá iná chapú e'iyonaja. Palá la'ajeño penájena iná amá ajopana ina'uqué, uncá chiyó ne'emá palá la'ajeño. Uncá iná jácho'olo íqui'ija nahuátacana chiyá.

<sup>8</sup> Uncá íqui'ija ajopana huátacana tajnálajo. Aquijñojo i'imajica uncá na'apátalaje Tupana puráca'alo ra'apiyá que. Uncá caja napura'alajo me'echuje puráca'aloji chu. Nacaje ina'uqué hue'epícare nacojé, uncá i'imalaje ñaque' rihuacajé.

<sup>9</sup> Chuhua huahue'epica nacaje nacojé huejápaja rinaquiyánaja calé. Tupana puráca'alo naquiyánaja calé yucuna hue'emá ina'uquejlo me'etení, huahue'epícale rinaquiyánaja calé.

<sup>10</sup> Huahue'epítajica ee piyuqueja nacaje nacojé huacajé, uncá rinaquiyánaja calé huahue'epeje reyá a'ajná ño'ojó. Piyuqueja huahue'epitaje reyá a'ajná ño'ojó.

<sup>11</sup> Yuhua'í nu'umaqé huacajé, nupura'ó yuhua'í pura'acó que caja. Nupechu i'imari caja yuhua'í pechu que caja. Nu'ujnatá nupéchuhua, yuhua'í i'ijnataca ripéchuhua que caja. Caja phíyu'uque nu'umacá eyá, nu'yuhua'co chuhua'á nupechu i'imacá, yuriró nuyámajo.

<sup>12</sup> Ñaque' caja huajló nacaje me'etení. Isámaja huahue'epica Jesucristo puráca'alo nacojé. Iná amaca nacaje ñaacá jupichumi caná chojé, queja caja ricá huajló. Je'echú chu hue'emajica ee, huamácájo Jesucristo hua'até. Me'etení nuhue'epí huejápaja, rinaquiyánaja calé nuhue'epí. Je'echú chu nu'umajica huacajé nuhue'epeje piyuqueja nacaje nacojé. Tupana hue'epica nunacu que caja nuhue'epíjica nacaje piyuque Jesucristo puráca'alo nacojé.

<sup>13</sup> Caphí huapechu i'imajica Tupana chojé hua'ajini huani. Palá rila'ajicare huecá nacú huapechu i'imajé hua'ajini huani caja. Hua'ajini huani caja huahuátajica íqui'ija peco-huácaca. Marí que la'acana i'imari huajló me'etení, ñaque' caja ri'imajica huajló hua'ajini huani rihuacajé. Íqui'ija iná huátaca ajopana, ricá aú iná chá'ata apú nacaje iná la'acare.

## 14

*Me'echuje puráca'aloji chu napura'acó Tupana Pechu ja'apiyá que yucuna marí:*

<sup>1</sup> Tupana Pechu a'arí iná ñaté, iná huátacaloje íqui'ija ajopana ina'uqué raú penaje. Marí caje ihue'epeje itucumó maáreya a'ajná ño'ojó, apú nacaje chaje huani ri'imacale. Ihuata caja ijluhua hue'epícaje, Tupana Pechu a'acare ina'uquejlo. Palani jo'ó ijlo hue'epícaje, ja'apátacaloje ajopánajlo Tupana puráca'alo ra'apiyá que penaje.

<sup>2</sup> Me'echuje puráca'aloji chu pura'ajeño quemañó Tupánajlo nacaje nacú. Rijloja calé nemá. Uncá nemalá rinacu ajopana ina'uquejlo, uncale nema'alá napura'acó. Nacaje nemacare nacú, nemá nacú Rippechu aú Tupana ja'apiyá que. Micho'ojneji ricá ina'uqué liyá.

<sup>3</sup> Eyá ajopana, Tupana puráca'alo ja'apátajeño necá. Necá ja'apátajeño ina'uquejlo Tupana puráca'alo ra'apiyá. Raú ina'uqué hue'epiño richaje, richaje queno Tupana huátacare caje iná la'acá nacú. Napuráca'alo la'arí caja iná pechu caphí, iná la'acó piyá ujhú. Napuráca'alo aú caja iná pechu palá'ó.

<sup>4</sup> Eyá me'echuje puráca'alo chu pura'ajeño la'año caphí napéchuhua necó. Necámica que nala'acá napéchuhua caphí ripuráca'alo aú. Eyá ajopana Tupana puráca'alo ja'apátajeño, napuráca'alo la'arí ajopana Jesucristo hua'atéjena pechu caphí rema'acana aú.

<sup>5</sup> Nuhuata ipura'acó me'echuje puráca'aloji chu piyuque icá. Richaje nuhuata ihue'epica Tupana puráca'alo ja'apátacana ra'apiyá. Palánija rema'ajéñojlo ricá. Tupana puráca'alo ja'apátajeri chá'atari me'echuje chu pura'ajero. Uncá meño'ojó nahue'epila meque quemacánaca napuráca'alo, pura'año me'echuje puráca'aloji chu. Ra'apátajeri i'imacachu, palani caja ricá rema'ajéñojlo, nahue'epícaloje richaje, richaje que Tupana nacojé raú penaje.

<sup>6</sup> Ichaje ca'ajná nu'ujná. E nupura'ó ca'ajná ijhua'até me'echuje puráca'aloji chu. Uncá na penaje calé ijlo me'echuje ta. Eyá numá ca'ajná ijlo nacaje nacú huapura'acochu, Tupana quemacare nacú nojlo. Numá ca'ajná ijlo nacaje Tupana hue'epícare nacú. No'opata ca'ajná ijlo Tupana puráca'alo ra'apiyá. Marí caje puráca'aloji i'imarijla palani ijlojé penaje.

<sup>7</sup> Apa'amá yucu aú nu'umajé piño ijlo rinacu. Quehuirí, uncá pechu i'imalá. Uncachu rimejé i'imalá palanaquiya, palanaquiya que, uncá na calé hue'epiri na yáleca ricá napho'ó. Uncá caja guitarra pechu i'imalá. Uncachu rimejé i'imalá palanaquiya, palanaquiya que, uncá iná hue'epila naca atanicaje nahuara'á.

<sup>8</sup> Ajopana huacára'ajeri huacára'ari ca'ajná rila'ejena surárana ajopana hua'até nócajo. Ajopana amaca aú necá huaíchaca napho'ó luhuiluhú caje chojé. Napho'ó apú que caja



hue'epéjona penaje. Raú surárana ja'año nalecaré ja'apejé, nenócacoloje najhua'até penaje. Eyá napho'ouela apojó, uncá na'alajla nanacojó nócacajo.

<sup>9</sup> Ñaque caja ijlo ricá. Napura'acochu me'echuje puráca'aloji chu, uncá iná hue'epila meque quemacánaca ricá. Ñaquele uncá na penaje calé ricá.

<sup>10</sup> Re cajrú ajopana, ajopana que marí eja'ahuá chu, pura'año me'echuje napura'acó chu. Richu pura'ajeño hue'epiño meque quemacánaca ricá.

<sup>11</sup> Uncá ca'ajná noma'alá apú pura'acó. Raú rihue'epí nunacu ajopana naquiyana ricá que. Ñaque caja nupechu i'amacajla rinacu, uncale noma'alá ripura'acó.

<sup>12</sup> Caja huechi ihuátaca ijluhua hue'epícaje Tupana Pechu a'acare inajlo. Ñaquele numá ijlo: Palani ijlo hue'epícaje huátacana ijluhua, ila'acáloje piyuque Jesucristo hua'atéjona pechu caphí raú penaje, napechu i'amacáloje richaje, richaje que caphí Tupana puráca'alo nacú raú penaje.

<sup>13</sup> Ñaquele marí que me'echuje puráca'aloji chu pura'ajeño la'ajica: Napura'ajico ee me'echuje chu, naquejá'aje caja Tupana liyá najluhua hue'epícaje, na'apátacaloje ajopánajlo riyucuna raú penaje.

<sup>14</sup> Nupura'acochu Tupana hua'até me'echuje puráca'aloji chu, nupechu aú ja calé nupura'ó rijhua'até. Uncá nuhue'epila meque quemacánaca ricá.

<sup>15</sup> Ñaquele nupura'ajó rijhua'até nupechu aú puráca'aloji noma'acare chu. Ñaque caja notanijica rijlo riyale nupechu aú nuhue'epicare puráca'aloji chu.

<sup>16</sup> Apala pipura'ó Tupana hua'até me'echuje puráca'aloji chu. Palá rila'acare picá yucuna ca'ajná pi'imá rijlo richu. Apú ca'ajná jema'ari pipura'acó Tupana hua'até me'echuje puráca'aloji chu. Uncá ca'ajná Tupana a'alá rijlo hue'epícaje, rema'acáloje ricá penaje. Raú uncá meño'ojó ra'ajipalá pijlo rinacojé. Palá Tupana la'acare picá yucuna pi'imá ca'ajná Tupánajlo me'echuje puráca'aloji chu. Raú uncá meño'ojó apú hue'epila méqueca pimacá rijlo.

<sup>17</sup> Apala palá huani pi'imacá palá rila'acare picá yucuna Tupánajlo. E'iyonaja uncá pipuráca'alo a'alá riñaté, uncale rema'alá pa'apiyá ricá. Uncá ra'alá riñaté, rihue'epícaloje richaje, richaje que Tupana nacojé raú penaje.

<sup>18</sup> Cajrú nupura'acó Tupana hua'até me'echuje puráca'aloji chu. Ipura'acó chaje íqui'ica nupura'acó rijhua'até richu. Ñaquele numá Tupánajlo: "Palá pila'acá nucá raú."

<sup>19</sup> Ajopana Jesucristo hua'atéjona hua'até nohuacaco aú, uncá nu'umalá yucu najlo me'echuje puráca'aloji chu. Nu'umaquela yucu huaphereni najlo richu, uncá na penaje calé najlo ricá, uncale nema'alajla riyucuna. Eyá nu'umaquela najlo yucu metajlani napura'acochu, nahue'epijla rinacojé. Marí que riyucuna i'amacana palani.

<sup>20</sup> Nojena, ipechu i'imaniya yuhuaná pechu queja. I'ijnatá ipéchuhua peñahuilana pechu chuhua marí numacare nacú ijlo. Ila'aniya pu'uhuaré, imanaicho. I'imá queráco'opena i'amacá que. Queráco'opena ne'emacale, uncá nahue'epila pu'uhuaré la'acana. I'imá ñaque caja.

<sup>21-22</sup> Me'echuje puráca'aloji chu pura'acano nacú numá marí que: Tupana a'arí ne'iyajénajlo hue'epícaje, napura'acóloje richu raú penaje. Raú necá, uncá jema'alaño Tupana ja'apiyá, hue'epiño uncá paala Tupana la'ajica necá. Ñaquele Tupana puráca'alo lana'aquejami quemari marí que: "Numaje marí te'erí erúnajlo nacaje nacú ajopana pura'acó chu. Ajopana te'eré eyájena i'imajeño najlo riyucuna nopumí chojé. E'iyonaja marí cajé aú uncá caja na'alajle nanacojó nupuráca'alo," que Tupana quemacá i'amacá. Uncá Tupana ja'apiyá jema'ajeñojlo calé me'echuje puráca'aloji. Puráca'aloji ne'iyajena ja'apátacare Tupana ja'apiyá que, ricá palani Tupana ja'apiyá jema'ajeñojlo. Uncá jema'alaño ra'apiyajlo calé ricá.

<sup>23</sup> Apala icá Jesucristo ja'apiyá jema'ajeño jahuacaño Tupana puráca'alo jema'ajé. Ica ca'ajná piyuque pura'año me'echuje puráca'aloji chu re'iyohuá. Re ajopana ca'ajná iphaño ijhua'até jahuacajo. Uncá Tupana ja'apiyá jema'ajeño calé necá. Ajopana piño ca'ajná jahuacaño ijhua'até rejé. Uncá Tupana a'alá najlo hue'epícaje i'amacá. Necá jahuacaño ca'ajná ijhua'até. Nema'acá aú ipura'acó me'echuje puráca'aloji chu, napechu i'imajla inacu: "Caja jehuífamina queja necá," que ca'ajná napechu i'amacajla inacu.

<sup>24</sup> Eyá ja'apátacala Tupana puráca'alo ra'apiyá que, uncá napechu i'imalajla ñaque inacu. Pajluhuaja ina'uqué ca'ajná jahuacaro ijhua'até. Uncá Tupana ja'apiyá jema'ajeri calé ca'ajná ricá. Uncá caja Tupana a'alá rijlo hue'epícaje i'amacá. Ricá ca'ajná jahuacaro ijhua'até. Rema'aquele Tupana puráca'alo ja'apátacare ra'apiyá que, pu'uhuaré rila'acare, rimanaicho rila'acare ja'arajla rijlo pu'uhucacajé raú. Raú caja ri'ijnatajla ripéchuhua rinacu: "¿Naje marí que huani i'amacá nucá?"

<sup>25</sup> Nacaje ripechu nacuja i'imagare ja'aró pu'uhucacajé rijló, Tupana puráca'alo jema'acana aú. Marí caje aú ritára'ojla ca'ajná ri'irúpachi aú, ripura'acóloje Tupana nacú palá penaje. Rimacáloje rijló: "Quehuaca re picá maare huajhua'até."

*Ne'emacáloje palá nahuacáca'alo ñacarelana chu penaje yucuna marí:*

<sup>26</sup> Ñaquele nojena, marí que ila'ajica jahuacájico huacacajé: Inaquiayana ca'ajná atanéjeño palá Tupana la'acare huecá yálena. Ajopana piño jehuíña'atajeño ca'ajná icá nacaje nacú, ila'acáloje palá raú penaje. Ajopana piño quemajeño ca'ajná nacaje Tupana quemacare nacú najló huajé que. Ajopana ca'ajná pura'ajeño me'echuje puráca'aloji chu. Eyá ajopana ca'ajná ja'apátajeño nacaje nemacare nacú ijló richu. Marí que la'acana palaní ijló, ila'acáloje richaje, richaje que Tupana huátaca que raú penaje.

<sup>27</sup> Marí que nuhuacára'aca ila'acá jahuacájico huacacajé: Inaquiayana ca'ajná pura'ajeño me'echuje puráca'aloji chu. Iyamá ca'ajná, hueji quele ca'ajná, queleja pura'ajeño richu. Pajehuémicacha napura'ajico richu. Apú piño ja'apátajeri ina'uquejlo napuráca'alo.

<sup>28</sup> Uncájica ee napuráca'alo ja'apátajeri i'imá, uncá nemalaje ajopánajlo nacaje nacú me'echuje puráca'aloji chu. Necámica que nupura'ajico cachuhua richu. Napura'ajó napechu aú ja Tupana hua'até.

<sup>29</sup> Ñaqueé caja numacá nanacu, ja'apátajeño Tupana puráca'alo ra'apiyá que. Palaní caja iyamá, hueji quele ca'ajná pura'ajeño pajehuémicacha, pajehuémicacha que. Ajopana quemajeño napuráca'alo nacú na le'ejé puráca'aloji ricá, Tupana Pechu quemacare nacú najló ricá ca'ajná, uncá ca'ajná.

<sup>30</sup> Jahuacácajo nacú ca'ajná i'imajica. Re ca'ajná pajluhuaaja yá'ajero ahua'á. Rema'ajé ca'ajná apú i'imajica yucu ijló. E'iyohuá que ca'ajná Tupana quemajica rijló nacaje nacú, rimacáloje ijló rinacu penaje. Marí que ri'imajica ee, ricá i'imajicare yucu i'imagana nacú, tajátajeri riyucuna, reyá apú pura'acóloje rapumí chojé penaje.

<sup>31</sup> Marí que la'acana, piyuque necá, apú, apú que, quemajeño méqueca Tupana quemacare nacú ijló. Pajehuémicacha que nemájica ijló rinacu. Marí que la'acana piyuqueja jema'ajeño nacaje yucuna. Raú ipechu i'imajé caphí Tupana puráca'alo jema'acana aú.

<sup>32</sup> Tupana puráca'alo ja'apátajeri hue'epiri ripuráca'alo tajátacana. Ñaquele ritajátaje ricá, ajopana pura'acóloje rijehuemi penaje.

<sup>33</sup> Marí que nala'ajica, Tupana la'acale ina'uqué pechu palá. Pajehuémicacha napura'ajico. Uncá rihuátala napura'acó pajñacani, iná jema'acá piyá napuráca'alo.

<sup>34</sup> Uncá caja inaana quemalájeño nacaje nacú jahuacájeñojlo. Ñaqueé huánija Jesucristo hua'atéjena jahuacaco. Uncá nayurila napura'acó nahuacáca'alo e'iyá. Uncá nemalaje nacaje nacú Jesucristo hua'atéjenajlo nahuacaco huacacajé. Tupana puráca'alo lana'aquejiami quemacá que nanacu que ne'emajica nahuacaco huacacajé.

<sup>35</sup> Nahuátajica ee nacaje yucuna quejá'acana naliyá, naluna liyá naquejá'aje riyucuna, nephájica nañacaré chojé ejomi. Uncá huani paala inaana pura'acojla Jesucristo hua'atéjena jahuacáca'alo e'iyá.

<sup>36</sup> Marí que ajopana Jesucristo hua'atéjena la'acá nahuacaco aú. Ila'acáloje ñaqueé caja penaje numá ijló. Uncá ajopana huacára'ajeño calé icá. Uncá icá calé queño'oño Tupana puráca'alo ja'apátacana ajopánajlo, ajopánajlo que. Uncá caja icámica que calé jema'acá ra'apiyá. Ajopana, ajopana queja jema'acá caja ra'apiyá.

<sup>37</sup> Re ca'ajná e'iyajena, marí que ca'ajná ihue'epica inacuhú: "Tupana a'ari huajló hue'epicaje, hua'apátacaloje ripuráca'alo ra'apiyá raú penaje. Tupana liyaje nacaje huahue'epicare," que ca'ajná e'iyajena pechu inacuhú. Marí nupuráca'alo, nuhuacára'acare ijló me'etení, Hue'emacana Jesucristo puráca'alo caja ricá. Ica Tupana puráca'alo ja'apátajeño hue'epéjeño quehuaca numacá.

<sup>38</sup> Uncaja que inaquiayana a'año nanacajó marí puráca'aloji, uncá caja a'alájeño napuráca'alo inacajó.

<sup>39</sup> Nojena, ñaqueé i'imagale ihuata ijluhua hue'epicaje, ja'apátacaloje raú Tupana puráca'alo ajopánajlo ra'apiyá penaje. Jahuíyo'oníya caja me'echuje puráca'aloji chu pura'ajeño cha.

<sup>40</sup> Ila'á palá nacaje jahuacáca'alo ejé, ri'ijnacáloje palá richuhú ijló penaje.

## 15

*Jesucristo macápo'oco yucuna marí:*

<sup>1</sup> Chuhua, nojena, nuhuata ihue'epica Tupana i'imataca ina'uqué capichácajo liyá yucuna nacojé. Riyucuna nu'umá ijló i'imagá. Riyucuna jema'acana aú ipechu i'imari caphí.

<sup>2</sup> Riyucuna, no'opátacare ijló i'imagá, ja'apiyá jema'acana aú Tupana i'imatari icá capichácajo liyá me'etení. Uncaja que iyurí ra'apiyá jema'acana, Tupana i'imatájeri icá

capichácajo huani liyá. Icó jema'año Tupana ja'apiyá i'ímacá. Apala uncá majopeja penaje calé ijló ricá.

<sup>3</sup> Nohuíña'ata icá Jesucristo yucuna nacú i'ímacá. Nacaje nehuíña'atacare nacú núcá, no'opata caja ijló i'ímacá. Marí que nohuíña'ataca icá rinacu: Jesucristo taca'arí huachaya, pu'uhuaré huala'acare pachá. Tupana puráca'alo lana'aquejami quemacá rinacu queja ri'ímacá.

<sup>4</sup> Ritaca'acá ejomi nato'otá ritami liri chojé i'ímacá. Hueji que cálaja ritami i'ímacá liri chu. Ejomi rimacápo'o. Tupana puráca'alo lana'aquejami quemacá rinacu queja ri'ímacá.

<sup>5</sup> Rimacápo'oco ejomi riya'ató Pédrojlo i'ímacá. Ejomi riya'ató ra'apiyatéjenajlo.

<sup>6</sup> Ejomi riya'ató piño ra'apiyá jema'ajéñojlo. Iqui'iruna ne'emacá. Quinientos chaje ca'ajná ne'emacá. Necajlo riya'ató i'ímacá. Pajluhuaaja chojé nahuacó i'ímacá. Rejé riya'ató najló i'ímacá. Rejo'ocaja ne'iyajena maárohua. Nanaquiayana taca'año.

<sup>7</sup> Quéchami riya'ataco caja Santiágojlo. Quéchami riya'ataco piño piyuque ra'apiyatéjenajlo.

<sup>8</sup> Caja penaje huani riya'ató nojló i'ímacá. Júpimi que ajopana amaño ri'ímacá. E'iyonaja calé caja penaje nayámajo riya'ató caja nojló i'ímacá.

<sup>9</sup> Jesucristo huacára'acarena naquiayana caja núcá. Uncá chiyó nu'umá nanaquiayana, chapú huani nula'ajica Jesucristo hua'atéjena i'imajica. Marí que nula'ajicale ne'emajica, uncá nuliyá i'ímalá, nemacáloje nunacu: "Jesucristo huacára'acarena naquiayana ricá" que penaje.

<sup>10</sup> E'iyonaja Tupana apiyácarí nupechu. Aú palá nupechu me'etení Tupana palamane. Penaje núcá Tupana palamane. Uncá majopeja calé ripalamane yurico nojló i'ímacá. Raú calé nusapa caphí. Ajopana Jesucristo huacára'acarena chaje nusápaca caphí. Uncá nule'ejó aú calé nusapa caphí. Tupana palamane aú nusapa caphí. Aú calé nula'á cajrú nacaje ina'uquejlo.

<sup>11</sup> Uncá na penaje calé huajló rihue'epícana, mecajenaca sápaño caphí. Ijlojé penaje huasapa, jema'acáloje Jesucristo yucuna penaje. Ricaja caja yucu i'ímacana nacú huecá piyuque ajopana riyucuna i'ímajeño hua'até. Ricaja caja yucu ja'apiyá jema'ajeño icá.

*Caja taca'acaño macápo'ojico yucuna marí:*

<sup>12</sup> Jesucristo macápo'oco yucuna hue'emá ina'uquejlo. Inaquiayana quemáño caja taca'acaño nacú: "Uncá namacápo'olajo" que.

<sup>13</sup> Uncá ñaque calé ricá. Jesucristo taca'arí i'ímacá. Ejomi rimacápo'o piño. Aú calé huahue'epí ñaqueja caja caja taca'acaño macápo'ojico.

<sup>14</sup> Uncá majopeja calé hue'emacá ijló riyucuna. Quehuaca rimacápo'oco i'ímacá. Quehuaca ri'ímacale, uncá majopeja calé ipechu i'ímacá richojé caphí.

<sup>15</sup> Uncáquela caja taca'acaño macápo'olajojla, majopeja huapajlácajla Tupana nacú. Huemá Tupana nacú rimacápo'oca ri'ímacá.

<sup>16</sup> Quehuaca Tupana macápo'ori Jesucristo i'ímacá. Aú calé huahue'epí ñaque caja Tupana macápo'otajica caja taca'acaño i'imajica.

<sup>17</sup> Uncáquela Jesucristo macápo'olojla i'ímacá, uncá na penaje calé caphí ipechu richojé. Uncá na i'ímalajla, pu'uhuaré ila'acare ca'ajeri iliyá.

<sup>18</sup> Marí que ri'imaquela, Jesucristo ja'apiyá jema'ajéñomi chuna capichájeñojla Tupana liyá.

<sup>19</sup> Marí eja'ahuá chu hue'emacá quetánaja calé huapechu i'imaquela caphí Jesucristo chojé, chapú huani huala'acajla raú. Uncáquela nacaje i'ímalajla quehuácaje huapechu i'ímacare chojé caphí, chapú huani ri'ímacajla huajló. Huachá'atajla ajopana ina'uqué huahuejápucha aú.

<sup>20</sup> I'imaqué e'iyonaja quehuaca jo'ó Jesucristo macápo'oro i'ímacá. Ajopana caja taca'acaño tucumá rimacápo'o i'ímacá. Raú iná hue'epí ajopana caja taca'acaño macápo'ojico piño.

<sup>21</sup> Pajluhua ina'uqué queño'orí huajló taca'acaje i'ímacá. Ñaque caja pajluhuaaja ina'uqué piño queño'ocá macápo'ocajo huajlojé penaje i'ímacá.

<sup>22</sup> Piyuque huecá ina'uqué taca'ajeño, Adanmi chu naquiayánami hue'emacale. Jesucristo hua'atéjena i'ímajeño piño, Jesucristo chojé i'ímacana aú.

<sup>23</sup> Jesucristo macápo'oro pamineco ajopana piyá i'ímacá. Quéchami ra'apiyá jema'ajeño macápo'ojico piño, riphájica majó huacajé.

<sup>24</sup> Riphájica rená chojé caja huacajé, Jesucristo capichátajeri piyuque jiñana huacára'ajeño. Nacaje nahuacára'acare la'acana hua'ató ricapichátaje naliyá. Ejéchami ra'ajica Rara'apá Tupánajlo piyuque ina'uqué, ri'ímacáloje nahuacára'ajeri penaje.

<sup>25</sup> Pamineco Jesucristo huacára'ajeri piyuqueja, Tupana chá'atajica caja chapú péchuruna Jesucristo nacú ejená.

<sup>26</sup> Ejomi caja penaje richá'atajica taca'acaje ina'uquejlo penaje. Rejéchami uncá taca'acaje i'imalaje. Raú caja chapú caje tajnájero.

<sup>27</sup> Tupana puráca'alo lana'aquejami quemari marí que: "Tupana a'arí Jesucristo, piyuqueja ina'uqué jema'acáloje ra'apiyá penaje." Rimacá au "piyuqueja," uncá rimalá Tupana nacú, ri'amacáloje ra'apiyá penaje. Ricá calé a'arí Jesucristo, piyuqueja nacaje i'amacáloje rile'ejé huánija penaje.

<sup>28</sup> Tupana a'ajeri piyuqueja nacaje, ri'amacáloje Jesucristo ja'apiyá penaje. Quéchami Jesucristo, Tupana i'irí, quemajeri piño Rara'apajlo, piyuqueja nacaje yurícoloje rijló penaje. Ricá calé a'ajeri nacaje piyuqueja, ri'amacáloje Tupana ja'apiyá penaje. Marí caje au piyuqueja nacaje i'imajeri Tupana ja'apiyá.

<sup>29</sup> Chuhua nu'umájica piño apa'amá yucu. Re ina'uqué nahuacára'a ajopana la'acá necá bautizar caja taca'acaño apumí chojé penaje. ¿Naje ca'ajná nala'á ñaque? Uncáquela namacápo'olajojla, uncá na penaje calé nala'ájla ilé que.

<sup>30</sup> Hue'echú ca'alá queja nomaca chapú caje yajhué.

<sup>31</sup> Nojena, hue'echú ca'alá queja ne'erataca numaná. Marí caje hua'ateja nucá, ina'uqué jema'acáloje Tupana ja'apiyá nupalamane penaje. Marí que numacá ijló, pu'ují nupechu i'imalace inacu, Jesucristo ja'apiyá jema'ajeño i'imalace.

<sup>32</sup> Efeso e nu'umaque huacajé, chapú huani ina'uqué la'ajícana nucá. Nu'umajícate najló Jesucristo yucuna chona nala'aque nucá chapú. Uncá na penaje calé ilé caje ña'acana panacu, uncáquela caja taca'acaño macápo'olajojla. Re ina'uqué, nemá nanacuhuá: "Cajrú ajnácaño hua'ajnehuá huecá. Ñaque caja hue'eracá nacaje jalá. Marí que la'acana palani. Aquijñojo huacapichájico. Rejé ca'ajná huatajnájico. Uncá hue'emalaje piño rejomi," que ne'ejnataca napéchuhua. Palani napuráca'alo i'amacajla, uncáquela ina'uqué, caja taca'acaño, macápo'olajojla piño.

<sup>33</sup> Re ina'uqué, nemá caja taca'acaño nacú: "Uncá namacápo'olajo" que. Pajlácachina necá. ¡Pa! Napajlájica ijhua'até. Jema'aniya na'apiyá. Re ina'uqué nemá marí que: "Palá la'acana huáque'ena i'amacachu uncá ina'uquélaruna, necá uncá ina'uquélaruna apichátaño najhuáque'ena palá la'acana liyá," que nemacá. Quehuaca ricá nemá nacú.

<sup>34</sup> E'iyajena ca'ajná i'imaño uncá ina'uquélaruna huáque'ena. Ipa'ó piño palani e'iyajé. I'má palá la'acana nacuja pajhua'atéchaca. Ila'aniya imanaicho. Ila'aniya caja pu'uhuaré. Re e'iyajena, uncá huani hue'epiláño Tupana. Marí que numacá inacu, nopáña'atacaloje inacu raú penaje.

*Méqueca caja taca'acaño napona i'imajica yucuna marí:*

<sup>35</sup> Apú ca'ajná quemari:

—¿Meque chí caja taca'acaño macápo'otajico? ¿Meque ca'ajná nanapona i'imajica namacápo'ojico ejomi?

<sup>36</sup> Uncá hue'epilare quemari ilé que. Marí queja ricá: Iná ejátacachu nacaje icha ijí, rijí apicharo pamineco. Quéchami riqueño'ocá iphácaje.

<sup>37</sup> Nacaje icha ijí iná ejátacare, trigo ca'ajná, apú nacaje icha ijí ca'ajná, uncá rijí que calé rina. Apojó caja richa.

<sup>38</sup> Tupana la'arí nacaje icha ijí, rina i'amacáloje ripechu nacú i'amacá que. Richa ijí iná ejátacare, ricá naquiyá rina jeño'orí. Re que'iyapé nacaje icha ijí. Aú rina i'imá que'iyapejé caja. Tupana la'arí que'iyapé ricá, riphácaloje rinacojé penaje.

<sup>39</sup> Apojó caja ina'uqué napona camejérina napona liyá. Cayuphéruna napona i'imari apojó caja ajopana camejérina liyá. Apojó caja cayuphéruna napona jíñana napona liyá. Apojó, apojó queja nanapona paliyácaca. Uncá réjenohuanija calé nanapona.

<sup>40</sup> Nacaje iná amácare je'echú chu, eja'ahuá chu, apojó caja ripalacha paliyácaca. Re ripalacha. Rile'ejó caja je'echú chu i'amacare palacha. Eja'ahuá chu i'amacare palacha rile'ejó caja riliyá.

<sup>41</sup> Camú palacha, rile'ejó caja. Queri palacha, rile'ejó caja riliyá. Ihujirina palacha nale'ejó caja riliyá. Ihujirina e'iyohuá nale'ejó caja napalacha paliyácaca.

<sup>42</sup> Apojó caja caja taca'acaño napona i'imajica namacápo'ojico ejomi. Naca'á támijimina rica'aquelana chojé. Rejeja nanapona capicharo. Namacápo'ojico ejomi uncá capichácajo penaje calé ne'emajica reyá a'ajná ño'ojó.

<sup>43</sup> Támijimi naca'acare rica'aquelana chojé, pu'uhureni ricá. Rimacápo'ojico au palánija ri'imajica. Támijimi nasa'acare, uncá hue'epila nacaje la'acana. Ina'uqué tami macápo'ojico huacajé, rihue'epeje nacaje la'acana piyuqueja.

<sup>44</sup> Nasa'á caja taca'acá tami, marí eja'ahuá chu i'amacá penaje rinapónami i'amacá. Eyá rimacápo'ojico ee apú caja rinapona hua'até ri'imajica, ri'amacáloje je'echú chu matajnaco rijhua'até penaje. Re huanapona, hue'emacáloje eja'ahuá chu raú penaje. Re caja huanapona i'imajé, hue'emacáloje je'echú chu raú penaje.

<sup>45</sup> Tupana queño'ótari ina'uqué i'imacá. Pamineco riqueño'ótacare íi i'imari Adán. Ricá aú ina'uqué queño'oñó eja'ahuá chu i'imacana. Capechuni, cajmuni Adanmi chu i'imacá. Eyá Jesucristo, ricá queño'orí piño ina'uquejlo i'imacaje. Ricá a'arí najló cajmuchaji, ina'uqué i'imacáloje matajnaco raú je'echú chu penaje.

<sup>46</sup> Uncá je'echú chu i'imacana i'imalá huajló pamineco. Eja'ahuá chu i'imacánaja calé i'imari huajló. Marí pumí chiyó je'echú chu i'imacana i'imajeri huajló.

<sup>47</sup> Adanmi chu i'imari te'erí naquiyana queño'ótacanami i'imacá. Eyá Jesucristo i'imari je'echú chiyaje naquiyana.

<sup>48</sup> Tupana queño'ótari Adanmi chu te'erí naquiyana. Ricá que caja i'imacaño huecá marí eja'ahuá chu. Eyá marí que ri'imajica huajló, Jesucristo ja'apiyá jema'ajéñojlo: Huanapona i'imajeri Jesucristo napona que caja. Je'echú chiyaje napónari que huanapona i'imajica.

<sup>49</sup> Huecá i'imaño ricá que, Tupana queño'ótacare te'erí naquiyana i'imacá que caja. Ñaque caja hue'emajica Jesucristo que caja hue'emajica, iphácare je'echú chiyá majó i'imacá que caja.

<sup>50</sup> Nojena, nuhuata marí nacú quemacana: Huanapona, hue'emacare chu marí eja'ahuá chu, uncá meño'ojó ri'imalajla Tupana hua'até je'echú chu. Rehuá i'imacaño huacára'ajeri ricá. Huanapona maare hue'emacare hua'até capichájero. Uncá meño'ojó ri'imalajla macapichaco.

<sup>51</sup> Nuhuata ihue'epica marí nacojé, micho'ojneji queja ri'imacá ina'uqué liyá i'imacá. Uncá piyuqueja ina'uqué taca'alájeño. Jesucristo iphájica penaje Tupana apiyácajica huanapona, caja taca'acaño napona hua'até.

<sup>52</sup> Quiñaja, pherú queja Tupana apiyácajica huanapona. Marí que ri'imajica riphájica rená chojé caja penaje huacajé. Luhuilluhú caje mejé queño'ojico ee, ejéchami caja taca'acaño macápo'ojico. Reyá a'ajná ño'ojó uncá huani nataca'alaje. Hua'ató que Tupana apiyácajica huecá cajmuruna napona.

<sup>53</sup> Tajnácajo penaje caja huapechu. Tupana apiyácajeri huapechu, ri'imacáloje matajnaco penaje. Capichácaja Tupana apiyácajica huanapona. Tupana apiyácajeri caja ricá, ri'imacáloje macapichaco penaje.

<sup>54</sup> Marí queja ri'imajica aú, ri'imajé Tupana puráca'alo lana'aguéjami quemacá rinacu queja. Marí que rimacá: "Tupana apichátajeri taca'acaje. Caja penaje huani richá'ataje taca'acaje.

<sup>55</sup> Rejéchami uncá taca'acaje la'alaje huecá chapú. Reyá caja uncá taca'acaje chá'atalaje ina'uqué piño reyá a'ajná ño'ojó," que rimacá.

<sup>56</sup> Taca'acaje chá'atari ina'uqué me'etení, manaicho nala'acare pachá, pu'uhuaré nala'acare pachá. Tupana puráca'alo, Moisesmi chu lana'acare i'imacá, quemari na aú ca iná la'acá iná manaicho, na aú ca iná la'acá pu'uhuaré. Uncá pachá huema'alá ra'apiyá huataca'á.

<sup>57</sup> "Palá pila'acá huecá," que huemacá Tupánajlo, richá'atajicale huajló taca'acaje Hue'emacana Jesucristo palamane aú.

<sup>58</sup> Ñaquele nojena, íqui'ija nuhuátacarena, ipechu i'imá ñaqueja caphí Jesucristo chojé. I'imá pajluhuaja chuhúa péchuruna ra'apiyá i'imacana nacú. Richaje, richaje que ila'acá nacaje, ri'imacáloje palá Tupánajlo penaje. Richuhúa iná la'acachu nacaje, iná la'á palá raú. Marí que la'acana nacuja i'imajé, ihue'epícale uncá majopeja calé ricá huala'acare Tupánajlo.

## 16

*Liñeru na'acare ajopana naquiyánajlo yucuna marí:*

<sup>1</sup> Chuhua numájica liñeru nacú, ijña'acare iliyó, ajopana Jesucristo hua'atéjenajloje penaje. Caja numá ra'acana nacú ajopana Jesucristo hua'atéjenajlo, Galacia te'eré nacú necá. Numacá najló que caja ila'ajica ilérohua.

<sup>2</sup> Huatána'acaje huacajé queja piyuqueja icá ña'ajeño iliñéroute naquiyana, a'acáloje camu'ují la'acáñojlo penaje. Cánari cajrú liñeru rijluhua, a'ajeri cajrú caja riliñéroute naquiyana. Cánari huejápaja, a'ajeri huejápaja caja rila'eje naquiyana. Liñeru ijña'acare ilamá'ataje nupé, ri'imacáloje re nuphájica rejo huacajé penaje. Marí que rila'acana aú uncá nuñña'alaje apú liyá, apú liyá que liñeru, nuphájica rejo huacajé.

<sup>3</sup> Nuphájica penaje nuhuacára'aje achíñana liñeru jahuacátacare ña'ajé Jerusalén ojo, na'acáloje ajopana Jesucristo hua'atéjenajlo ricá penaje. Ileruna ipechu i'imacárena nacú palá, huahuacára'aje rejo. No'ojé najló carta nená que'ená penaje, nahue'epícaloje necá raú penaje.

<sup>4</sup> Palani ri'imajica ee nojló, nu'ujnajé caja rejo. Necá penájena caja i'ijnajeño rejo nujhua'até.

*Pablo huátaca ajopana ñacajela ojo, ajopana ñacajela ojo que i'ijnacana yucuna marí:*

<sup>5</sup> Nóch'o'ojico maare eyá huacajé, nu'ujnajé Macedonia te'eré e'iyohuá pamineco. Quéchami nuphájica piño inacu Corinto ejo.

<sup>6</sup> Apala nu'umajé ijhua'até júpija quemachi ilérohua. Pajluhuaja yahuisá quetana ca'ajná nu'umajica ijhua'até. Rejomi icá a'ajeño nuñaté, nu'ujnacáloje Tupana huátaca nu'ujnacá ejo penaje.

<sup>7</sup> Uncá nuhuátala quiñaja amácana ilérohua. Júpija quemachi nuhuata ijhua'até yurícano, Tupana huátajica ee.

<sup>8</sup> Nuhuata maare Efesio e yurícano fiesta huacajé ejená. Pentecostés huacajé ejená nuhuata yurícano maare.

<sup>9</sup> Palani ricá maárohua huajló, nula'acáloje Tupana huátacare caje penaje, no'opátacaloje cajrú ina'uquejlo Tupana puráca'alo penaje. Hua'ató que re cajrú chapú péchuruna nunacu, huátaño nopy itácana.

<sup>10</sup> Timoteo iphájica ee inacu, eco ipechu i'imá palá rijhua'até, palá ri'imacáloje ijhua'até rehuá penaje. Tupana huátaca que rila'acá nacaje nula'acá que caja.

<sup>11</sup> Ñaquele uncá ipechu i'imalaje rinacu: "Majopéjari ricá" que. Ripa'ajico ee majó piño, eco pa'á riñaté nacaje le'epé caje aú, ripa'acóloje piño majó rapumí chuhúá penaje. Maare nuhuátaje ricá, ajopana huanaquiyana hua'até.

<sup>12</sup> Huanaquiyana, Apolos nacú numaje ijló me'etení. Pulapecha numacá rijló, ri'ijnacáloje ajopana huanaquiyana hua'até ichaje ca'ajno. Uncá jo'ó ca'ajná rihuátala ichaje i'ijnacana. Hue'echú ca'alá i'imajica ee rijló, ri'ijnajé ichaje.

*Caja penaje rimacare nacú najló marí:*

<sup>13</sup> I'imá capéchuruna, ila'acá piyá pu'uhuaré. Ñaqueja ipechu i'imajica caphí Tupana puráca'alo chojé. Iquero'oniyo ina'uqué piyá. I'imá caphí richojé peñahuilana péchuruna que.

<sup>14</sup> Iná huátacachu íqui'ija Tupana, ajopana ina'uqué hua'até, iná la'á piyuque nacaje palá. Marí que ila'ajica.

<sup>15</sup> Ica jema'año Estéfanos, riyajalo, riyani, quele yucuna. Acaya te'eré nacú necá. Necá pajno'otaño napéchuhua Tupana ejo ajopana tucumá rehuá, nema'acáloje Jesucristo ja'apiyá penaje. Chuhua Jesucristo ja'apiyá jema'ajeño ñaté a'ajeño necá. Nañaté a'acana nacuja necá me'etení.

<sup>16</sup> Nojena, numá ijló, jema'acáloje marí que la'acaño ja'apiyá penaje. Ajopana najhua'até sápañeño ja'apiyá jema'á caja.

<sup>17</sup> Estéfanos, Fortunato, Acaico, quele iphaño nuchaje reyá i'imacá. Aú nupechu la'aró pu'ují. Maare na'á nuñaté. Necá la'año nacaje nojló apumí chojé que. Uncá meño'ojó ila'alá nacaje nojló, uncale i'imalá maare. Aú apumí chojé que nala'acá nojló nacaje.

<sup>18</sup> Necá caja ja'apátaño nupechu ujhúí caje liyá. Ñaqueé caja nala'acá icá i'imacá. Ihue'epí caja ajopana ina'uqué necá que caja i'imacaño.

<sup>19</sup> Asia te'eré ehuá cajrú Jesucristo hua'atéjena jahuacaco apalá chojé, apalá chojé que. Piyuque necá quemañeño inacu: "Eco palá najló ca'ajno." Aquila, Priscila quele quemañeño ñaqueé caja ijló. Jahuacaño najhua'até nañacaré chojé, quele quemañeño caja inacu: "Eco palá najló ca'ajno."

<sup>20</sup> Piyuque Jesucristo hua'atéjena maare quemañeño inacu: "Eco palá najló" que. Ipe'é ipechu aú ajalaca pecohuácaca palá.

<sup>21</sup> Nucá, Pablo, quemari caja: Eco palá ijló. Marí nulana'á nuyáte'ela aú nocó ijló, numacáloje inacu marí que: Eco palá najló que.

<sup>22</sup> Uncá huátalaño Hue'emacana Jesucristo, Tupana yerúca'ajeri nachá. Jesucristojlo numá: "Hue'emacana, pipa'ó majó quiñaja."

<sup>23</sup> Nuhuata Hue'emacana Jesucristo la'acá icá palá.

<sup>24</sup> Jesucristo ja'apiyá jema'ajeño huecá pajhua'atéchaca. Ñaquele nuhuata ihue'epica íqui'ija nuhuátaca icá. Caja quetana riyucuna.

## 2 CORINTIOS Introducción:

*Na penájeca San Pablo huacára'aca najló marí puráca'aloji yucuna marí:*

Júpimi San Pablo i'ijnari apú pajimila nacojé, apú pajimila nacojé que. Tupana puráca'alo yucuna i'imacana nacú ri'ijnaqué. Ehuá riphaca pajimila Corinto ejo i'imacá. Re riyuró mequetana, ri'imacáloje Jesucristo yucuna najló rehuá penaje. Ri'imá riyucuna najló. Raú ne'iyajena queño'ofo Jesúsristo ja'apiyá jema'acana. Necá penájemina rehuíña'ata palá Tupana puráca'alo nacú, nema'acáloje ra'apiyá penaje. Rehuíña'ata ne'emacá ejomi ra'apaña necá, ri'imacáloje riyucuna ajopánajlo penaje. E caja ehujaja ajopana piño i'imaño rehuá. Necá caja jehuíña'ataqueño necá Tupana nacú. E'iyonaja napechu queja nehuíña'atajica necá. Majojeja nemájica. Necá quemáño marí que nanacuhúa: "Jesucristo huacára'acarena naquiyana huacá" que. Naca'ataque ne'iyajé, napechu i'imacá piyá palá Pablo nacú, ripuráca'alo nacú hua'até. Aú caja napechu i'imá Pablo nacú: "Majopéjari japi ricá." Caja uncá nephala ra'apí raú. Marí que napechu i'imacale rinacu, rihuacára'a najló puráca'aloji. Ripura'ó richayo, nahue'epicaloje quehuácaca Jesucristo huacára'acarena naquiyana huani ri'imacá. Rihuata nahue'epica Tupana puráca'alo ricá ra'apátacare najló i'imacá. Uncá ripechu queja calé rimacá najló nacaje nacú i'imacá. Uncá rihuátala ajopana ina'uqué apichátaca napechu quehuácaje puráca'aloji liyá. Iqui'i rihuátaca necá. Rihuata ne'ejnataca napéchuhua quehuácaje puráca'aloji nacú. Aú calé rihuacára'a najló marí puráca'aloji.

*Jesucristo ja'apiyá jema'ajeño i'imaño Corinto e i'imacá. Najló San Pablo huacára'ari marí puráca'aloji:*

<sup>1</sup> Pablo nucá. Tupana a'arí nucá Jesucristo huacára'acarena naquiyana penaje. Caja queja Tupana huátaca nu'umacá. Nucá, Timoteo hua'até huacára'año ijlo marí puráca'aloji pajimila Corinto ejo. Jesucristo ja'apiyá jema'ajeri caja Timoteo. Jesucristo ja'apiyá jema'ajeño caja icá. Tupana a'acarena rila'ejena ina'uqué penájena icá. Piyuque Tupana le'ejena ina'uqué, Acaya te'eré ehuá i'imacáñojlo huahuacára'a marí puráca'aloji.

<sup>2</sup> Tupana Huara'apá. Nuhuata i'imacá ripalamane, Hue'emacana Jesucristo palamane hua'até. Nuhuata caja Tupana la'acá ipechu palá. Ñaqué caja nuhuátaca Jesucristo la'acá ipechu palá.

*Pablo amaca chapú caje yajhué yucuna marí:*

<sup>3</sup> Palani huani Tupana. Hue'emacana Jesucristo jara'apá ricá. Huara'apá caja ricá. Rihue'epí huamu'ují. Hua'ajini ra'apátaca huapechu ujhuí caje liyá.

<sup>4</sup> Tupana pala'atari huapechu huamaca aú que'iyapé chapú caje yajhué. Marí que rila'acá huacá palá, huapala'atácaloje ajopana pechu ñaqué caja penaje. Ripala'ataca huapechu i'imacá que caja huapala'ataca napechu chapú caje yajhué amácana liyá.

<sup>5</sup> Jesucristo pechu chuhúa hue'emacale, huamaca cajrú chapú caje yajhué. Riloco'opáneje caja ripala'atá huapechu.

<sup>6-7</sup> Nala'á huacá chapú, hua'apátacale Tupana puráca'alo ajopánajlo, ajopánajlo que. Ijlo caja hue'emá riyucuna i'imacá. Ra'apiyá jema'acana aú i'imaó capichácajo liyá. Riyucuna i'imacana jimaje nala'á huacá chapú. Tupana pala'atari huapechu palá chapú caje yajhué huamácare liyá. Apala ijña'á chapú caje yajhué panacu huajña'acá panacu que caja. Ripala'ataca huapechu rilijá, que caja ripala'atájica ipechu rilijá. Marí que ri'imacale ijlo, huahue'epí palá i'imajica.

<sup>8</sup> Nojena, huahuata ihue'epica meque íqui'ica huamaca chapú caje yajhué Asia te'eré ehuá. Cajrú nala'acá huacá chapú rehuá i'imacá. Caja uncá meño'ojó huajña'alá panacu ri'imacá. Caja huapechu i'imá huacuahuá: "¿Ají caje aú ja chi huacapichajo?"

<sup>9</sup> Ina'uqué nenoca queja huahue'epica huacuahuá raú. Marí que ri'imacá huajló, Tupana chojeja calé huapechu i'imacáloje caphí penaje. Ricá hue'epiri piyuque caja taca'acaño macápo'otacana. Richojeja calé huapechu i'imá caphí. Uncá huachojó calé huapechu i'imá caphí.

<sup>10</sup> Tupana i'imatari huacá naliyá, nenoca piyá huacá. Ri'imataje piño huacá ñaqué caja. Richoje huapechu i'imá caphí, ri'imatácaloje piño huacá rilijá penaje.

<sup>11</sup> Ipura'ó Tupana hua'até huacuacu. Cajrú ina'uqué pura'ajico ee Tupana hua'até huacuacu, cajrú caja ina'uqué quemájeño Tupánajlo "Palá pila'acá huacá" que. Marí que nemájica riljlo, rila'ajica aú huacá palá.

*Uncá Pablo i'ijnalá Corinto ejo nachaje yucuna marí:*

<sup>12</sup> Palá huani huapechu huanacuhúa, huahue'epícale huala'acá palá huani ina'uqué nacú marí eja'ahuá chu. Hue'emaqué ijhua'até huacajé, palá huani huala'ajica e'iyohúa. Tupana a'aqueri huañaté, hue'emacáloje ijhua'até palá huani raú penaje. Uncá huécó calé huala'á icá palá. Tupana palamane aú palá huala'acá icá.

<sup>13</sup> Huahuacára'a ijló puráca'aloji lana'aquejami me'etení, ipura'acóloje rijhua'até penaje, ihue'epícaloje ricá penaje. Uncá me'echuje calé huapuráca'alo huahuacára'acare ijló. Nuhuaata jema'acá ricá palá.

<sup>14</sup> Caja ihue'epí huécá huejápaja. Jesucristo iphájica majó huacajé, ipechu i'imajé pu'ují huanacu, huapechu i'imacá inacu que caja.

<sup>15</sup> Nuhue'epí pu'ují huapechu panacuhúacaca. Aú calé nuhuata ichaje i'ijnacana, ipechu i'imacáloje pu'ují raú penaje. Iyamá pe notá'acajla ichaje i'ijnacana i'imacá.

<sup>16</sup> Nupechu nacú ri'imá ichaje i'ijnacana Macedonia te'eré ehúa ja'apácana. Eyá nunacuhúa nuhuata icá ehúa ja'apácana. Raú icá a'acajla nojló nacaje, nu'ujnacáloje piño Judea te'eré ejo penaje.

<sup>17</sup> Marí que nuhuátaca ichaje i'ijnacana. Apala marí que ipechu nunacu: "Uncá ñaque calé ripechu. Majopeja ripajlaca," que ca'ajná ipechu nunacu. Uncá iyamá chuhúa calé nupechu, numacáloje "nu'ujnajé" que, "uncá nu'ujnalaje" que ca'ajná. Necá, uncá jema'alaño Tupana ja'apiyá, iyamá chuhúa napechu. Uncá ñaque calé nupechu.

<sup>18</sup> Tupana hue'epíri méqueca huapechu nacú ri'imacá. Rihue'epí uncá huemalá iyamá chuhúa ricaja caja nacú.

<sup>19</sup> Uncá Tupana i'irí, Jesucristo, quemalá iyamá chuhúa ricaja caja nacú. Quehuaca huani Jesucristo quemacá pajluhuaja puráca'aloji chuhúa. Silvano, Timoteo, núcá, quele i'imaño riyucuna ijló i'imacá.

<sup>20</sup> Jesucristo palamane aú Tupana a'arí huajló nacaje, Tupana quemacare nacú ina'uquejlo i'imacá. Tupana quemari huanacu i'imacá, rila'acáloje huécá palá penaje. Jesucristo palamane aú ri'imá ñaque huajló. Palá huani Tupana la'acá huécá. Hue'emacá aú riyucuna ajopánajlo, hue'emá caja palá Jesucristo la'acare huécá yucuna najló.

<sup>21</sup> Tupana la'arí huapechu caphí. Rila'á caja ipechu caphí Jesucristo chojé. Ra'á caja huécá rila'ejena ina'uqué penaje ijhua'até.

<sup>22</sup> Tupana a'arí huajló Ripechu huená que'ená penaje. Raú iná hue'epí rila'ejenaca huécá. Raú caja iná hue'epí ra'ajica piño huajló piyuque nacaje yurícaro huajlojé penaje.

<sup>23</sup> Uncá jo'ó nu'ujnalá ichaje Corinto ejo nupechu nacú ri'imacá que. Tupana hue'epíri najeca uncá nu'ujnalá ichaje. Uncá nuhuátala inaquiyana huajácana pu'uhuaré nala'acare chona. Aú calé uncá jo'ó nu'ujnalá ichaje.

<sup>24</sup> Uncá huahuátala ijló quemacana: "Marí que ipechu i'imajica nacaje nacú." Uncá huahuátala marí que quemacana ijló, huahue'epícale ipechu i'imacá Tupana puráca'alo chojé caphí. Huahuata iñaté a'acana, ipechu i'imacáloje pu'ují, me'etení ipechu i'imacá chaje raú penaje.

## 2

<sup>1</sup> Ñaquele marí que nupechu i'imacá inacu: "Uncá nu'ujnalaje nachaje; apala nuhuajaje necá. Raú napechu i'imajé camu'ují huani."

<sup>2</sup> Nu'ujnaquela ichaje, nula'ájla ipechu camu'ují. Reyá uncá na calé la'aríjla nupechu pu'ují. Nula'aquela ipechu camu'ují, uncá meño'ojó ila'alá nupechu pu'ují.

<sup>3</sup> Ricá penaje nuhuacára'a papera ijló i'imacá. Uncá nuhuátala ichaje i'ijnacana, ila'acáloje camu'ují nupechu penaje. Ica la'año pu'ují nupechu. Nu'ujnaquela ichaje, ila'ájla camu'ují nupechu. Marí nuhue'epí palá: Pu'ují nupechu i'imacá aú ijhua'até, ñaque caja ipechu i'imacajla nujhua'até.

<sup>4</sup> Nuhucára'aca ijló papera huacajé, camu'ují huani nupechu i'imacá nujluhua. Caja nuhuajhué majáca'aro nojló, nu'ujnatácale nupéchuha camu'ují huani inacojé i'imacá. Nuyaco nulana'acá ijló papera. Uncá nula'acáloje ipechu camu'ují penaje calé nuhuacára'a ijló nupuráca'alo i'imacá. Ihue'epícaloje nuhuátaca icá íqui'ija penaje nuhuacára'a ijló papera i'imacá.

*Pajluhuaja nanaquiyana rimanaicho la'ajeri penájemi yucuna marí:*

<sup>5</sup> Ricá uncá ina'uquelári numacare nacú ijló i'imacá, ricá la'arí nupechu camu'ují. Uncá nupéchuja calé rila'á camu'ují. Piyuqueja ina'uqué pechu rila'á camu'ují ca'ajná. Apala uncá piyuque ina'uqué pechu calé ca'ajná rila'á camu'ují. Marí que numacá rinacu, nupuráca'alo i'imacá piyá caphí huani rijló, la'arí pu'uhuarejlo.

<sup>6</sup> Caja jahuacó rinacu pura'ajó. Caja palá ihuajaca ricá. Chuhua ihuajániya piño ricá. Ilérejeja iyurí rihuajácana.



<sup>7</sup> Chuhua amó richaje pu'uhuaré rila'acare liyá. Iyurí iliyó chapú ramácana. Ipura'ó palá rijhua'até, ripechu i'imacáloje palá caja inacu raú penaje. Marí caje aú uncá ri'ijnatálate ripechuhua ujhuí caje nacú.

<sup>8</sup> Iqui'i nuhuátaca ila'acá marí que: Ila'á rijló nacaje, ripechu i'imacáloje inacu: "Iqui'ija nahuátaca nucá" que penaje.

<sup>9</sup> Nuhucára'a ijló puráca'aloji i'imacá, nuhue'epícaloje méqueca jema'acá no'opiyá penaje. Marí que ila'acana aú notá'a icá.

<sup>10</sup> Caja iyurí iliyó pu'uhuaré la'ajérimi amácana chapú. Ñaque caja nuyurica nuliyó ramácana chapú. Uncá rila'alá nucá chapú. E'iyonaja nomó richaje ijhua'até, Jesucristo ijlu' chujena hue'emacale.

<sup>11</sup> Marí que huala'acá, Jiñá Chi'ináricana la'acá piyá piño huanaquiyana chapú. Caja huahue'epí mecajeca ricá.

*Pablo huo ca'acó yucuna marí:*

<sup>12</sup> Nu'ujná pajimila Troas ejo i'imacá. Rejo nu'ujná Jesucristo yucuna i'imajé najló. Rihucajé palá Tupana la'acá necá rehuá, nu'umacáloje riyucuna cajrú rehuájenajlo penaje.

<sup>13</sup> Uncá nuphátala huanaquiyana Tito rehuá i'imacá. Aú calé nohuó ca'aró rijhua'até. Aú nu'umá nuyucuno najló. Ejomi no'opá piño ají que Macedonia te'eré ejo.

*Huajlojé penaje Jesucristo la'acá piyuque nacaje jácho'oco palá yucuna marí:*

<sup>14</sup> Palá rila'acare huecá yucuna hue'emá Tupánajlo. Chá'atajeri huani Jesucristo i'imacale, rila'á piyuque nacaje jácho'oco palá huajlojé penaje. Rijhua'atéjena caja huecá. Riyucuna hue'emá ina'unquejlo. Palani huani riyucuna ra'apiyá jema'ajéñojlo.

<sup>15</sup> Hue'emá Jesucristo yucuna ina'unquejlo. Ricá i'imari palá Tupana nacú. Ra'apiyá jema'acana aú Tupana i'imatari ina'uqué capichácajo liyá. Ra'apiyá jema'ajéñojlo palánija riyucuna. Eyá capichájeño penájena jema'año caja riyucuna.

<sup>16</sup> Capichájeñojlo chapú Tupana puráca'alo yucuna, ri'imacale nacapichájico yucuna najló. Aú uncá paala najló riyucuna jema'acana. Tupana i'imatari ina'uqué capichácajo liyá nema'acá aú ra'apiyá. Ra'apiyá jema'ajéñojloja calé palani riyucuna. Raú nahue'epí matajnaco ne'emajica je'echú chu. Uncá na calé hue'epiri riyucuna i'imacana ina'unquejlo palá, uncachu Tupana a'alá ina'ñaté riyucuna i'imacana aú.

<sup>17</sup> Uncá huacánacaloje huajluhua liñeru penaje calé hue'emá Tupana yucuna. Ricá penaje cajrú ajopana i'imacá riyucuna ina'unquejlo. Uncá ñaque la'acaño calé huecá. Huecá hue'epiño quehuaca riyucuna. Tupana ijlu' chu hue'emá riyucuna. Rihucára'acarena huecá; Jesucristo hua'até sápageño queja caja huecá.

### 3

*Puráca'aloji hue'emacá ja'apiyá me'etení yucuna marí:*

<sup>1</sup> Marí que huemacá aú huanacuhua, uncá huala'alá huecá chá'atajeño queja. Uncá caja huahuátala iliyá papera lana'aquejami quemacá: "Palájne'equena necá" que, nahue'epícaloje huecá raú penaje. Marí caje ne'iyajena huátano najluhua. Uncá ñaque calé huajló ricá. Uncá naje calé hua'á ijlo papera ajopana liyaje, ihue'epichi huecá raú.

<sup>2</sup> Huale'ejé papera que huajló icá; icá quemáño huanacu palá. Caja Tupana ja'apiyá jema'ajeño icá chuhua huapalamane. Raú ajopana amaño palá Tupana la'acá icá. Marí que ri'imacale ijlo, ina'uqué hue'epiño méqueca huala'acá icá palá.

<sup>3</sup> Huecá i'imaño ijlo Jesucristo yucuna i'imacá. Raú calé iqueño'ó ra'apiyá i'imacana. Raú caja rila'á ipechu palá. Palá caja Tupana la'acá icá Ripechu aú. Uncá tajnácajo penaje calé i'imacá ricá. Marí que ijlo ricá. Caja Jesucristo hua'atéjena icá. Marí caje aú ajopana hue'epiño huala'acá icá palá. Uncá papera chojé lana'aquejami calé riyucuna. Uncá caja jipa nacú lana'aquejami calé ricá, nahue'epichi rinacajé raú. Namaca palá Tupana la'acá icá, aú nahue'epí rinacajé.

<sup>4</sup> Marí que huemacá rinacu, Tupana chojé huapechu i'imacale caphí Jesucristo palamane aú.

<sup>5</sup> Maliyárana huecá, huala'acáloje nacaje Tupánajlo penaje. Piyuque nacaje huala'acare, Tupana palamane aú huala'á ricá.

<sup>6</sup> Ricaja calé la'arí huecá caliyárana, hua'apátacaloje ajopánajlo ripuráca'alo penaje. Tupana i'imatari ina'uqué capichácajo liyá. Ripuráca'alo, hua'apátacare ina'unquejlo, quemari huanacu, hue'emacáloje ra'apiyá me'etení penaje. Uncá ripuráca'alo, Moisesmi chu lana'acare, que calé ricá. Uncá pachá hua'alá huanacajó ripuráca'alo, capichájeño penájena queja hue'emacá piyuqueja. E'iyonaja Tupana Pechu a'arí inajlo cajmuchaají, ina' i'imacáloje matajnaco je'echú chu raú penaje.

<sup>7</sup> Tupana puráca'alo, Moisesmi chujlo ra'acare, i'imari jipa nacú lana'aquejami. Moisesmi chu ipháta aú ricá Israelmi chu laquénami nacú, mejáma'atani que rijimá amaco rihua'até. Uncá meño'ojó nayacá'alo richaje rinacojé. Mejáma'atani hua'até riphá ina'uqué nacú i'ímáca. Caja ehuaja mejáma'atani capicharo rijimá chiyá. Ripuráca'alo quemari ina'uqué nacú: "Capichájeño penájena necá" que. E'iyonaja marí que riphaca palá huani mejáma'atani hua'até i'ímáca.

<sup>8</sup> ¡Palani huani nacaje Tupana Pechu a'acare huajló! Ripuráca'alo ra'acare Moisesmi chujlo chaje palaca ricá. Ripechu aú ra'á cajmuchaji ina'uquejlo. Uncá tajnácajo penaje calé cajmuchaji ra'acare inajlo.

<sup>9</sup> Tupana a'arí Moisesmi chujlo ripuráca'alo i'ímáca, ina'uqué hue'epícaloje capichájeño Tupana liyá penájena necá raú penaje. Marí penaje ri'ímáca. E'iyonaja cajrú mejáma'atani hua'até riphata ricá ina'uqué nacú i'ímáca. Eta, ¡Meque richaje huani palaca ina'uquejlo riyucuna, quemari ina'uqué nacú: "Chuhua Tupana i'imatari necá capichácajo liyá!"

<sup>10</sup> Moisesmi chu ipháta Tupana puráca'alo ina'uqué nacú mejáma'atani que rijimá i'ímáca. Marí que riphaca ripuráca'alo lana'aquejami hua'até. Chuhua Tupana i'imatari ina'uqué capichácajo liyá. Marí puráca'aloji palani huani ina'uquejlo. Jupichumi puráca'aloji chaje huani palaca ricá.

<sup>11</sup> Mequetánaja lojeja penaje calé jupichumi puráca'aloji i'ímáca. E'iyonaja mejáma'atani hua'até Moisesmi chu ja'apátari ina'uquejlo ri'ímáca. Richaje huani palaca ripuráca'alo, uncá tajnácajo penaje calé i'ímácare.

<sup>12</sup> Huahue'epí uncá ripuráca'alo tajnácajo. Aú calé caphí huapechu riyucuna i'ímacana nacú ajopánajlo.

<sup>13</sup> Uncá huala'alá Moisesmi chu la'acá que. Ricá apára'ari rijimá a'arumacaji aú, Israelmi chu laquénami amaca piyá mejáma'atani rijimá chojé yacácano.

<sup>14</sup> Uncá huani riphala Israelmi chu laquénami pechu nacojé méqueca ripuráca'alo quemacá. Me'etení ñaque caja najló ricá. Napura'acochu jupichumi lana'aquejami hua'até, apára'aquejami que najló ricá, me'echuje ri'ímácale najló. Moisesmi chu jimá i'ímáca apára'aqueja a'arumacaji aú, que caja najló ricá apára'aquejami que. Jesucristo ja'apiyá i'ímacana aú iná hue'epí meque quemacánaca ricá. Uncá apára'aquejami que calé inajlo ricá, Jesucristo la'acale iná pechu palá.

<sup>15</sup> Eyá najló ojo'ocaja apára'aquejami que najló ricá. Napura'acochu Tupana puráca'alo hua'até, Moisesmi chu ja'apátacare najló i'ímáca, me'echuje jo'ó najló ricá.

<sup>16</sup> Iná pajno'otácachu iná péchuhua Tupana ojo, Tupana la'arí iná pechu palá, ripuráca'alo i'ímáca piyá me'echuje inajlo raú.

<sup>17</sup> Hue'emacana Jesucristo. Ripechu i'imari hue'iyá, huala'acáloje rihuacára'aca huecá que raú penaje. Aú calé hue'emaó jupichumi puráca'aloji liyá.

<sup>18</sup> Jesucristo la'arí huecá palá. Ripechu aú huala'á palá, ajopana amácaloje mecajeca Jesucristo raú penaje. Ripechu ja'apiyá i'ímacana aú richaje, richájeno que huapechu i'ímáca Jesucristo pechu que caja.

#### 4

<sup>1</sup> Ñaque i'ímácale uncá huala'aló ujhú riyucuna i'ímacana liyá. Tupana hue'epiri huamu'ují i'ímáca. Aú calé ra'á huajló marí sápacaje i'ímáca.

<sup>2</sup> Uncá huani huala'alá nacaje huamicho'oneji, ajopana apáña'añojla raú, namáquela huala'acá ricá pu'uhuacá. Uncá caja huapajlala ina'uqué hua'até. Uncá caja huemalá majopeja Tupana puráca'alo nacú: "Marí que rimacá" que, uncachu rimalá ñaque. Quehuácaje puráca'aloji chuhuaja hue'ejnatá ricá. Uncá huapiyácala Tupana puráca'alo. Huala'á piyuque nacaje Tupana jimaje que, ajopana ina'uqué pechu huatána'acaloje huanacojé raú penaje.

<sup>3</sup> Tupana i'imatari ina'uqué capichácajo liyá. Riyucuna i'ímacana nacuja huecá. Pu'uhuacájé riyucuna piyuque ina'uquejlo. Eyá capichájeño penájenaajlo, me'echuje ca'ajná ricá.

<sup>4</sup> Palani huani Jesucristo yucuna. Ne'iyajena uncá jema'alaño ra'apiyá, Jifá Ch'i'ináricana la'acale necá mejluruna queja, nahue'epica piyá ricá. Rinacojé uncá nahue'epila mecajeca Jesucristo. Tupana pechu que huani péchuri ricá.

<sup>5</sup> Uncá huayucuno i'ímacana nacú calé huecá. Hue'emacana huani Jesucristo. Riyucuna hue'emá ina'uquejlo. Huecá la'año huecá ijhua'até sápacaje queja, huahuátacale íqui'ija ricá.

<sup>6</sup> Tupana queño'ótaca eja'ahuá i'ímáca huacajé, rihuacára'a mejáma'atani patacá calajeruni e'iyajé. Chuhua ñaque caja Tupana la'acá pu'uhuacá huajló nacaje, huahue'epícaloje raú meque palani huánica Tupana penaje. Jesucristo nacojé calé huahue'epí mecajeca ricá.

*Iná i'ímácaloje caphí Jesucristo chojé penaje yucuna marí:*

<sup>7</sup> Tupana puráca'alo yucuna i'imajeño huecá. Ripechu aú huahue'epí riyucuna. Ripechu aú caja huala'á nacaje. Nacaje cahuemini huani, iná lámá'atacare majopéjari ra'arú chojé, queja huajló ricá. Majopéjaruna huecá; i'ichilá queja huecá. E'iyonaja re hue'iyá Tupana Pechu. Raú ja calé huala'á nacaje palani. Caja queja huecá, ina'uqué hue'epicaloje uncá huecó calé huala'acá nacaje.

<sup>8</sup> Marí que i'imacaño huecá: Pulapé huamaca chapú caje yajhué. Que'iyapé huajló ricá. E'iyonaja uncá richá'atala huecá. Re'iyohuá uncá huani huahue'epila méqueca rácho'ojico huajló. E'iyonaja calé uncá huapechu la'aló ujhuí raú.

<sup>9</sup> Chapú huani ne'iyajena la'acá huecá. E'iyonaja uncá cupáquejanami que calé huecá Tupana liyá. Rehuaja calé nala'á quehuí huani huanapona. E'iyonaja uncá nacapichátala huecá.

<sup>10</sup> Jesucristo i'imacá marí eja'ahuá chu huacajé, pulapé nahuátaca rinócana i'imacá. Ñaque caja huajló ricá. Hue'ejnacá ehuá nahuata huenócana. Marí caje aú ina'uqué hue'epiño Jesucristo i'imacá huajhua'até. I'imatari huecá capichácajo liyá ricá.

<sup>11</sup> Marí eja'ahuá chu hue'emacá quetana, hue'emajica capichácajo e'iyá. Marí que huajló ricá hue'echú ca'alá queja, huala'acale Jesucristojlo nacaje. Capichácajo nacú huanapona. E'iyonaja ra'á huañaté nacaje la'acana aú, ajopana ina'uqué amácaloje palá rila'acarena huecá penaje.

<sup>12</sup> Tupana puráca'alo ja'apátacana nacú hue'emacale, ina'uqué naquiyana huátáño huenócana. Capichácajo e'iyá hue'emacá i'imacá. Re'iyohuá que hue'emacá ichaje. Hue'emá caja ijló Tupana puráca'alo yucuna i'imacá, i'imacáloje matajnaco ra'apiyá jema'acana aú penaje.

<sup>13</sup> Tupana puráca'alo lana'aquejámi quemari marí que: "Nuhue'epí quehuaca ricá, aú calé nu'umá riyucuna," que apú quemacá i'imacá. Ripechu nacú ri'imacá que caja huapechu rinacu. Huahue'epí quehuaca riyucuna. Aú calé hue'emá riyucuna ajopánajlo.

<sup>14</sup> Tupana macápo'ori Jesucristo i'imacá. Raú huahue'epí, rimacápo'otajica huecá ñaque caja. Ejomi rihuá'aje huecá, hue'emacáloje rijhua'até je'echú chu penaje. Re hue'emajica ijhua'até pajñacani.

<sup>15</sup> Marí que ri'imajícale huajló, huamá cajrú chapú caje yajhué me'etení ijlojé penaje. Marí caje aú richaje, richaje que íqui'irunaca inaquiyana i'imaño ripalamane. Ñaquele íqui'iruna icá pura'año Tupana hua'até, i'imacáloje palá rila'acare icá yucuna rijló penaje. Palá ipura'acó Tupana nacú.

<sup>16</sup> Marí que ri'imacale, uncá huapechu la'aló ujhuí. Huanapona i'imari tajnácajo nacú. A'apona que huapechu i'imacá hue'echú ca'alá queja richaje, richaje que caphí Tupana chojé.

<sup>17</sup> Chapú caje yajhué huamácare marí eja'ahuá chu, uncá caphini huani calé huajló ricá. Mequetánaja calé huamaca riyajhué. Palá huani hue'emajica je'echú chu matajnaco. Ñaquele uncá caphini huani calé huajló chapú caje yajhué huamácare me'etení.

<sup>18</sup> Uncá hue'ejnatala huapéchuhua nacaje iná amácare nacú. Nacaje uncá iná amálare nacú huapechu. Nacaje iná amácare capichájero. Eyá nacaje uncá iná amálare me'etení, uncá capichálajo.

## 5

<sup>1</sup> Huapechu a'arú huanapona. Huanapona, me'etení hue'emacare hua'até, capichájero. Huataca'ajica aú huapéchumi jácho'ojero richiyá, ri'ijnacáloje apú huanapona huajé chojé penaje. Ricá Tupana la'ajícare chojé ri'ijnajé. Matajnaco hue'emajica rejo je'echú chu.

<sup>2</sup> Caja huaya'ó huanapona hua'até i'imacana nacú, marí eja'ahuá chu hue'emacá quetana. Maca'anija huahuátaca huanapona apiyácacana apú huanapona je'echú chu i'imacare aú.

<sup>3</sup> Huanapona i'imajícare je'echú chu, i'imajeri huapéchumi a'aruná que. Uncá manapónaru calé huapéchumi i'imajeri rehuá.

<sup>4</sup> Hue'emacá eja'ahuá chu quetana huaya'acó huanapona hua'até i'imacana. Huahue'epí huanacuhuá caja nachá'atacarena que. E'iyonaja calé uncá huahuátala huanapona jupichumi cupácana huanacuyó. Huajé huanapona huahuata huajluhua, hue'emacáloje huajé huanapona hua'até penaje. Macapichaco hue'emajica rijhua'até je'echú chu. Lanáquiya huanapona tajnácajo penaje i'imacare, capichájero.

<sup>5</sup> Marí que ri'imacáloje huajló penaje, Tupana lámá'atari ricá huapé. Huahue'epí ra'ajica huajló nacaje je'echú chu yurícaro huajló. Caja ra'á huajló Ripechu apú nacaje ra'ajícare huajló piyá. Rejomi ra'ajé huajló apú nacaje piño je'echú chu. Ripechu ra'á huajló pamineco, huahue'epícaloje ñaque caja ra'ajica huajló nacaje je'echú chu.

<sup>6</sup> Marí que ri'imacale, caphí huapechu ñaqueja. Nuhue'epí marí eja'ahuá chu nu'umacá quetana, uncá nuñacaré huani chu calé nucá, uncale nu'umalá je'echú chu Hue'emacana Jesucristo hua'até. Re nuñacaré huani i'imajé. Uncá huamálare ricá.

<sup>7</sup> E'iyonaja caphí huapechu richojé, nacaje uncá huamálare chojé. Uncá caphí calé huapechu nacaje iná amácare chojé.

<sup>8</sup> Uncá huahuó la'aló taca'acaje piyá. Palani huajló taca'acaje, hue'emacáloje Jesucristo hua'até raú penaje.

<sup>9</sup> Ñaquele huala'á piyuqueja nacaje, ri'imacáloje palá Jesucristo nacú penaje. Hue'emajica ehua, eja'ahuá chu ca'ajná, je'echú chu ca'ajná, huahuata piyuqueja nacaje la'acana palá, ri'imacáloje palá rinacu penaje.

<sup>10</sup> Marí que nuhuátaca nacaje la'acana, piyuqueja huecá tára'ajicole Jesucristo jimaje. Rijimaje huatára'ajo, rimacáloje huanacu méqueca rijló nacaje huala'acare, marí eja'ahuá chu hue'emacá quetana. Quéchami pajluhuano, pajluhuano que ra'ajica huajló rihuemí. Pu'uhuaré huala'acá ca'ajná, palá huala'acá ca'ajná. Nacaje huala'acare loco'opáneje ra'ajé huajló rihuemí.

*Tupana huátaca ina'uqué pechu i'imacá palá rinacu yucuna marí:*

<sup>11</sup> Tupana quemájeri nacaje huala'acare nacú méqueca rijló ricá. Ñaquele huahuata cajrú ina'uqué e'iyajé ca'átacana Tupana puráca'alo aú. Marí que huala'acá, huahue'epícale chapú huani ri'imajica uncá jema'alaño ra'apiyajlo. Ra'apí iphájeño huecá. Caja Tupana hue'epiri mecajenaca huecá; palá péchuruna huecá. Nuhuata caja ihue'epica ñaqué caja mecajenaca huecá.

<sup>12</sup> Uncá huahuátala huanacuhua pura'acano palá ijlo. Marí que huemacá huanacuhua, ipechu i'imacáloje palá huanacu ajopana e'iyá penaje. Ajopana iphaño inacu Tupana puráca'alo yucuna i'imajé. Raú nala'á necó chá'atajeño que. E'iyonaja uncá paala napechu. Apiyácaloje necá inacojó penaje huemá huanacuhua ijlo marí que me'etení.

<sup>13</sup> ¿Meque ca'ajná ihue'epica huanacu?: “Palá péchuruna necá” que ca'ajná. “Uncá pechu i'imalaño necá” que ca'ajná ipechu huanacu. ¿Meque ca'ajná ipechu huanacu, huapura'acole huanacuhua palá? Ipechu i'imacachu huanacu: “Uncá pechu i'imalaño necá” que, marí que huecá, ri'imacáloje palá Tupánajlo penaje. Ipechu i'imacachu huanacu: “Palá péchuruna necá” que, marí que caja huecá, huala'acáloje palá inacu penaje.

<sup>14</sup> Huahue'epí íqui'ija Jesucristo huátaca huecá. Aú calé hua'á iñaté nacaje la'acana aú. Ricá taca'arí pu'uhuaré huala'acare chaya. Ricá, pajluhuaja, taca'arí huachaya piyuqueja huajloje penaje. Ripalamane aú huaca'acáloje hualiyó pu'uhuaré huala'acare.

<sup>15</sup> Jesucristo taca'arí piyuque ina'uqué chaya i'imacá. Ñaquele huecá ri'imatácarena capichácajo liyá, uncá la'alaño huajluhua nacaje. Huala'á Jesucristojlo nacaje, ritaca'acale huachaya i'imacá. Rimacápo'lo caja huajloje penaje. Ñaqué i'imacale rijloja calé huala'á nacaje palá.

<sup>16</sup> Uncá paala huemacá ina'uqué nacú ajopana quemacá nanacu que caja. Ajopana quemaqueño Jesucristo nacú que caja numájica rinacu i'imajica. Ajopana pura'aqueño rinacu pu'uhuaré. Aú nupechu i'imaqué: “Nemacá rinacu que japi ricá.” Eyá chuhua caja nuhue'epí uncá ñaqué calé ricá.

<sup>17</sup> Iná i'imacachu Jesucristo hua'ateje, huajé chuhua iná pechu. Jupichumi iná pechu yuriro iná yámojo. Huajé chuhua iná i'ijnatá iná péchuhua iná tucumó reyá a'ajná ño'ojó.

<sup>18</sup> Tupana la'arí huapechu palá, hue'ejnátacaloje huapéchuhua huajé chuhua huatumucó raú penaje. Jesucristo palamane aú ripajno'otá huapechu Tupana nacoje, huapechu i'imacáloje palá aú Tupana nacú raú penaje. Ra'á caja huecá ajopana ina'uqué pechu pajno'otájeño penaje, palá napechu i'imacáloje Tupana nacú raú penaje.

<sup>19</sup> Jesucristo palamane aú Tupana pajno'otari ina'uqué pechu yurí caje chiyá, napechu i'imacáloje palá Tupana nacú raú penaje. Caja ramó nachaje pu'uhuaré nala'acare liyá, namanáicho nala'acare liyá hua'ató. Riyucuna hue'emá ina'uquejlo, napechu i'imacáloje palá Tupana nacú raú penaje. Riyucuna i'imacana nacuja huecá; ricá huasápaca'ala.

<sup>20</sup> Jesucristo puráca'alo ja'apátajeño huecá. Tupana apumí chojé que huemacá nacaje nacú ijlo. Jesucristo apumí chojé que caja huemacá ijlo marí que me'etení: Ipajno'otá ipéchuhua Tupana ejo, ipechu i'imacáloje richojé palá panacuhuáca raú penaje.

<sup>21</sup> Uncá huani Jesucristo la'alá pu'uhuaré. Uncá caja rila'alá chapú Tupana, ajopana ina'uqué hua'até. E'iyonaja huapumí chojé que Tupana hue'epica ricá pu'uhuaré la'ajeri que. Rihuajá ri'imacá pu'uhuaré huala'acare chona, richojé hue'emacáloje palá la'acaño penaje. Raú hue'emá Tupana i'imacá que caja. Jesucristo chojé i'imacana aú iná i'imacá pajluhua japi ricá queja rijhua'até.

## 6

<sup>1</sup> Ică i'imaño Tupana hua'até sápageño huajhua'até. Palá huani Tupana la'acarena icá. Ñaquele a'á inacojó ricá, ripalamane i'imacale.

<sup>2</sup> Marí que numacá ijló, Tupana puráca'alo lana'aquejami quemacale marí que: Palani ri'imajica ijló.

Riphájica ee rená chojé huacajé, noma'ajé ipura'acó nujhua'até.

Nu'umatájica ina'uqué capichácajo liyá huacajé, no'ojé iñaté, que Tupana quemacá júpimi najló i'imacá.

Rimacare nacú júpimi i'imacá iphari rená chojé. Chuhua Tupana i'imatari ina'uqué capichácajo liyá. Rimacá rinacu júpimi i'imacá que ricá me'etení huajló.

<sup>3</sup> Uncá huahuátala nacaje la'acana apojó que, ina'uqué pechu i'imacá piyá ujhuí Tupana nacú raú. Marí que huala'acá, nachapújra'aco piyá huapuráca'alo nacú.

<sup>4</sup> Tupánajlo huala'á piyuque nacaje. Huahuata piyuque ina'uqué hue'epica ñaque ricá. Marí caje aú nahue'epí Tupánajlo sápageño huecá: Que'iyapejé chapú caje yajhué amájeño huecá. E'iyonaja uncá huapechu la'aló ujhuí raú. Apú huacajé que huala'acá camu'ují nacaje nacú. Apú huacajé que hue'emacá laca'apheji i'imacana nacú. Marí caje hua'até hue'emá.

<sup>5</sup> Apú huacajé que ñaña'atájica hue'emajica. Rejomi apú huacajé piño naca'á huecá ina'uqué huajáquelana chojé i'imacá. Apú huacajé piño cajrú ina'uqué jahuacaco caja huanacojé tujlá que, nayúcha'acole huachá i'imacá. Apú huacajé huamá sápacaje yajhué i'imacá. Apú huacajé hue'emá me'etájeñomi. Reyá hue'emá piño apú huacajé. Huajña'á me'epejí panacu i'imacá. Marí caje hua'até huecá huasápaca'ala la'acana nacú.

<sup>6</sup> Palá huala'acare aú ina'uqué hue'epiño Tupánajlo sápageño huecá. Palá huahue'epica quehuácaje puráca'alojio nacojé. Uncá huapechu i'imalá ujhuí ina'uqué liyá. Cachuhua caje nacuhuaja hue'emacá najhua'até napala'atácana nacú. Ina'uqué huani huecá ina'uqué hua'até. Iqui'ija huahuátaca necá Tupana Pechu aú. Uncá huala'alá huecá majopeja íqui'ija huahuátaca necá que.

<sup>7</sup> Quehuaca huapuráca'alo. Hue'epícaje Tupana a'acare huajló aú huala'á nacaje palá. Marí que huala'acá aú ina'uqué hue'epiño mecajenaca huecá. Palá huala'acare aú huapichata chapú huanacu péchuruna puráca'alo. Palá huala'acare aú caja ina'uqué hue'epiño mecajeca Tupana, nema'acáloje ra'apiyá raú penaje.

<sup>8</sup> Palá ne'iyajena ina'uqué pechu huanacu. Ne'iyajena piño la'año huecá nahuejáputenami queja. Ne'iyajena caja pura'año huanacu palá. Ne'iyajena caja chapújra'año huanacu. Ne'iyajena caja quemáño huanacu: "Pajlácachina necá" que. E'iyonaja calé quehuaca huemacá.

<sup>9</sup> Ne'iyajena hue'epiño huanacu ajopana te'eré eyájena que. Ne'iyajena hue'epiño huanacu ñanacajela ehuaájena queja. Capichácajo e'iyá huecá, e'iyonaja calé rejo'ocaja huecá. Nahuajácarena que huecá, e'iyonaja uncá nenólarena huecá.

<sup>10</sup> Huamá chapú caje yajhué, e'iyonaja pu'ují huapechu. Camu'ují la'acaño huecá, e'iyonaja Tupana puráca'alo aú huala'á palá huani ajopana nacú, ne'emacáloje Tupana palamane raú penaje. Uncá caja hualíñéroute i'imalá. E'iyonaja Tupana chojé caphí huapechu. Ricá chá'atari liñeru. Cajrú nacaje huacapi queja huajló ricá.

<sup>11</sup> Nojena, Corinto e i'imacaño, pu'ucuja hue'emacá ijló huanacuhúa méqueca i'imacaño huecá. Iqui'ija huahuátacarena icá.

<sup>12</sup> Uncá na calé itari huapu, huahue'epica piyá caí inacu. Icaja calé la'año ipéchuhua ujhuí hualiyá.

<sup>13</sup> Nara'apá pura'acó riyani hua'até, que caja nupura'acó ijhua'até me'etení. Ihue'epí huanacu caí, huahue'epica inacu que caja. Ihuata caja huecá íqui'ija.

*Tupana Pechu ja'apiyá jema'ajeño yucuna marí:*

<sup>14</sup> I'imaniya uncá jema'alaño Jesucristo ja'apiyá huáque'ena. Ñaque caja ihuá'acaniyo nanaquiyana hua'até. Uncá panacojéchaca que calé huapechu najhua'até. Uncá jema'alaño Jesucristo ja'apiyá necá. Uncá palá la'acaño i'imalajla pu'uhuaré la'acaño huáque'ena. Tupana ja'apiyá i'imacaño la'año palá. Eyá necá uncá jema'alaño ra'apiyá uncá la'alaño palá.

<sup>15</sup> Uncá Jesucristo pechu i'imalá Jiñá Chi'ináricana pechu i'imacá que caja. Uncá meño'ojó napechu i'imalá ñaque la'acana nacú. Uncá caja Jesucristo ja'apiyá jema'ajeño pechu i'imalá ajopana pechu que caja. Necá, uncá jema'alaño Jesucristo ja'apiyá, uncá Jesucristo ja'apiyá jema'ajeño pechu que calé napechu. Apojó napechu nacaje la'acana nacú.

<sup>16</sup> Uncá caja ñaque calé Tupana ñacaré, nacaje jenami ñacarelana. nemacare nacú: "Huachí'ináricana ricá" que. Cajmuni, capechuni ricá Tupana. Uncá nacaje jenami

la'acanamí que calé ricá. Huecá ra'apiyá jema'ajeño e'iyá Tupana Pechu. Marí que Tupana quemacá ra'apiyá jema'ajeño nacú i'ímacá:

Najhua'até nu'umajica.

Nachi'ináricana huani nu'umajica najló.

Necá i'ímajeño nule'ejena ina'uqué.

<sup>17</sup>Ñaqué i'ímacale Tupana quemari piño marí que ina'uqué nacú:

Jácho'o ne'iyayá. Ica'á ipéchuhua apojó paliyácaca, ipechu i'ímacá piyá napechu chuhúa.

Ila'aníya caja imanaicho, pu'uhuaré najhua'até, nuhuátacaloje icá raú penaje.

<sup>18</sup>Marí que ila'ajica ee, nu'umajé Jara'apá.

Icá i'ímajeño nuyani, que Hue'emacana huani quemacá huanacu. Piyuque nacaje la'ajeri ricá, que Tupana puráca'alo lana'aquéjami quemacá.

## 7

<sup>1</sup>Nojena, íqui'ija nuhuátacarena, marí queja huajló ricá. Marí que Tupana quemacá huanacu, rila'acáloje huecá palá raú penaje. Ñaquele marí la'acana yuriro huajló: Huaca'ajé hualiyó piyuqueja nacaje la'arí huapechu pu'uhuaré. Pu'uhuaré huala'acare la'arí huecá uncá ina'uquélaruna que. Marí que la'acana huayureje hualiyó. Huahue'epeje caja huatucumó nacaje la'acana piyuqueja Tupana huátaca que. Ra'apí íphácana aú huala'á nacaje rihuátaca que.

*Corinto eruna pala'ataco napéchuhua yucuna marí:*

<sup>2</sup>Ihue'epi piño cai huanacu. Uncá na ina'uqué calé huala'á chapú i'ímacá. Uncá caja na aú calé huapichata ina'uqué. Uncá caja na aú calé huala'á huajluhua nacaje. Uncá huaca'alá nanane caje naliyá.

<sup>3</sup>Marí que numacá aú, uncá numalá inacu: "Pu'uhuaré nala'acá" que. Numaje piño numacá que i'ímacá: Cai nuhue'epica inacu. Pajñacani queja huecá íjhua'até. Caja queja hue'emajica íjhua'até marí eja'ahuá chu. Huataca'ajica ee, ñaqueja caja hue'emajica íjhua'até. Marí que nupechu inacu, cai nuhue'epícale inacu.

<sup>4</sup>Nupechu huatána'ari inacojé. Pu'ují caja nupechu inacu. Cajrú chapú caje yajhué nomaca. E'iyonaja calé caphí jo'ó nupechu. Ñaqué caja nupechu pu'ují.

<sup>5</sup>Huephaca majó aú, Macedonia te'eré ejo, uncá caja huahuatána'ala chapú caje nala'acare huecá liyá. Que'iyapejé chapú caje amaco huajló. Ajopana huataño huajhua'até aca'ácacano. Quero'ocajo nacú huacá maare.

<sup>6</sup>Tupana ja'apátari ujhuí caje iná liyá, iná pechu i'ímacáloje caphí raú penaje. Chapú caje yajhué amácana e'iyohuá que Tito íphaca nunacu i'ímacá. Raú Tupana la'arí nupechu caphí.

<sup>7</sup>Uncá ricaja calé la'arí nupechu palá. Apú aú caja rila'á palá nupechu. Rimá nojló inacu marí que: "Huechí nahuátaca pi'ijnacá nachaje. Camu'ují nahue'epica nanacuhúa, uncá paala nala'acare i'ímacá pachá. Pichaya napura'ó chapú péchuruna pinacu hua'até," que rimacá nojló i'ímacá. Riyucuna jema'acana aú pu'ují huani nupechu la'acó.

<sup>8</sup>Nuhuacára'a íjló papera i'ímacá. Ricá la'arí ipechu camu'ují i'ímacá. Uncá nupechu i'ímalá chapú nunacuhúa, camu'ují ipechu la'acole raú. Pamineco chiyó nupechu i'ímari chapú nunacuhúa i'ímacá. Mequetánaja calé ila'acá ipéchuhua camu'ují, noca'acale i'ímacá. Caja iyurí iliyó pu'uhuaré la'acana. Ñaquele uncá chapú calé nupechu me'etení.

<sup>9</sup>Chuhua pu'ují nupechu. Uncá pu'ují calé nupechu camu'ují ipechu la'acaro aú. Pu'ují nupechu, ipechu pajno'ocole, pu'uhuaré la'acana liyá. Camu'ují ipechu i'ímacá, pu'uhuaré ila'acale i'ímacá. Palani Tupánajlo marí. Uncá huala'alá icá chapú huaca'acá aú icá pu'uhuaré ila'acare chona.

<sup>10</sup>Camu'ují huapechu i'ímacachu pu'uhuaré huala'acare liyá, marí palani Tupánajlo. Raú huapajno'otá huapéchuhua Tupana ejo pu'uhuaré la'acana liyá, hue'emacáloje richiyá raú penaje. Marí caje aú uncá iná pechu i'ímalá chapú iná nacuhúa. Necá, uncá jema'alaño Tupana ja'apiyá, uncá ñaqué calé najló ricá. Apala camu'ují ne'ejnataca napéchuhua pu'uhuaré la'acana aú. E'iyonaja uncá napajno'otala napéchuhua Tupana ejo. Marí que ri'ímacale najló, nacapichájico Tupana liyá.

<sup>11</sup>Camu'ují ila'acá ipéchuhua i'ímacá. Caja queja Tupana huátaca íjló ri'ímacá. Pa. ¡Chuhua meque palá huani rácho'oco íjló! Tu'ujné ila'acá ipéchuhua i'ímacá, ilamá'atacaloje inaquiyana pechu pu'uhuaré rila'acare liyá penaje. Ipura'ó caja ichayo huajló i'ímacá. Pu'uhuaré inaquiyana la'acare jimaje iyúcha'o; ¡quero'ó pu'uhuaré caje piyá. Quéchami ihuátaca nu'ujnacá ichaje íñaté a'ajeri penaje. Ihuata caja rihuajácana, la'arí pu'uhuaré i'ímacá. Marí caje aú iná hue'epí lamára'ataquejami que ipechu. Uncá pu'uhuaré la'acana nacú calé icá me'etení.

<sup>12</sup> Uncá nuhuacára'ala ijló papera i'imacá, ihuajácaloje pu'uhuaré la'ajeri penájemi penaje. Uncá caja nuhuacára'ala ijló papera pu'uhuaré rila'acare chaya. Caja ihue'epí caí nunacu papera nuhuacára'acare ijló aú. Ihue'epícaloje méqueca ipechu i'imá huanacu penaje, nuhuacára'a ijló papera i'imacá. Tupana hue'epiri méqueca ipechu huanacu.

<sup>13</sup> Chuhuaca huahue'epí palá ipechu huanacu. Tito i'imacá ijhua'até huacajé, pu'ují ripechu la'acó. Ramá caja iyurica pu'uhuaré la'acana iliyó. Ñaqué caja nupechu la'acó pu'ují riyucuna jema'acana aú.

<sup>14</sup> Tito i'ijnacá ichaje yámona numá rijló inacu: "Palá péchuruna necá ca'ajno, quele pi'ijná ejo," que numacá rijló i'imacá. Numacá rijló i'imacá que jo'ó icá. Nu'umaqué ichaje ca'ajno huacajé, quehuaca numacá ijló. Ñaqué caja numacá inacu Títojlo i'imacá.

<sup>15</sup> Tito i'imaqué ijhua'até huacajé, icá a'año inacojó ripuráca'alo i'imacá. Palá caja iphaca ra'apí i'imacá. Uncá caja ila'alá icó hue'epiño que rijló. Marí nacú ri'ijnataca ripéchuhua, aú richaje iqui'ica rihuátaca icá.

<sup>16</sup> Caja nuhue'epí Tupana huátaca que la'acaño icá me'etení. Pu'ují nupechu la'acó raú. Chuhua nupechu huatána'ari piño inacojó.

## 8

*Na'acáloje liñeru camu'ují la'acáñojlo penaje yucuna marí:*

<sup>1</sup> Tupana la'arí ajopana Jesucristo hua'atéjena palá. Macedonia te'eré ehuájena necá. Chuhua, nojena, nuhuata riyucuna i'imacana ijló.

<sup>2</sup> Cajrú namaca chapú caje yajhué rehuá. Raú Tupana atá'ari necá, ramácaloje méqueca napechu i'imacá raú penaje. Marí que najló ricá. E'iyonaja calé pu'ují péchuruna necá. Camu'ují la'acaño caja necá. E'iyonaja calé cajrú na'acá liñeru ajopana camu'ují la'acañojlo.

<sup>3</sup> Liñeru i'imacá nacapi ejé na'á liñeru camu'ují la'acañojlo. Nacaje i'imacare najluhua hua'ató na'á najló. Marí queja nahuátaca ra'acana najló. Nuhue'epí quehuácaje ricá.

<sup>4</sup> Mahuó nala'acá nucá, na'acáloje ajopana Jesucristo hua'atéjena ñaté raú penaje. Camu'ují la'acaño ñaté nahuata a'acana.

<sup>5</sup> Uncá nuhue'epila ilé que huani nala'ajica palá. Pamineco na'á necó Hue'emacana Jesucristojlo. Quéchami na'acá piño huajló necó, nala'acáloje nacaje raú huajhua'até penaje. Tupana huátaca que huala'acá najhua'até.

<sup>6</sup> Tito queño'orí liñeru ña'acana iliyá i'imacá. Aú huahuacára'a piño ricá ichaje, riñapátacaloje rijña'acana iliyá penaje.

<sup>7</sup> Ica a'ajeño ca'ajná liñeru. Palá ipechu i'imacá caphí Jesucristo chojé. Aú calé marí que i'imacáño icá. Re inaquiayana, palá nahue'epica ina'uqué jehuiña'atacana nacú. Cajrú hue'epiño icá. Caphí ipechu i'imacá nacaje la'acana nacú Tupánajlo. Iqui'ija ihuátaca huecá. Marí cajé aú ila'á nacaje palá huani. Chá'atajeño icá, marí que i'imacale. Ila'á piño palá necá liñeru a'acana aú, iqui'ija ihuátacale ajopana.

<sup>8</sup> Marí que numacá ijló. Uncá nuhuacára'ala raú a'acá liñeru. Nuhuátaja ihue'epica meque huechi ajopana a'acá camu'ují la'acañojlo liñeru. Marí que a'ajica ee najló iliñérote naquiayana, huapechu i'imajé inacu: "¿Iqui'ija chí nahuátaca necá?"

<sup>9</sup> Caja ihue'epí meque palá huánica Hue'emacana Jesucristo la'acá huecá. Je'echú chu ri'imaqué huacajé cajrú nacaje rihuátaca ejé i'imacá rijló. E'iyonaja marí eja'ahuá chu ri'imacá quetana uncá na i'imalá rijló. Camu'ují la'ajeri que ri'imacá. Rila'á ina'uqué palá, nayurícolaje Tupana palamane ja'apiyá raú penaje. Camu'ují la'ajeri que ri'imacá ijló, i'imacáloje cajrú la'ajeño que ripalamane aú. Cajrú la'acaño que icá me'etení. Jesucristo palamane i'imacale.

<sup>10</sup> Apú jarechí i'imacá huacajé, icá queño'oño liñeru jahuacátacana. Ajopana piyá jahuacata ri'imacá. Maca'aní ihuátaca liñeru a'acana ajopánajlo i'imacá.

<sup>11</sup> Naquele palani ijló marí que la'acana: I'imá huechiruna riñapátacana nacú. Ipechu i'imacá riqueño'ocana nacú, que caja ipechu i'imacá riñapátacana nacú. Eco a'á liñeru icapi a'acaje penaje.

<sup>12</sup> Huechi iná huátacachu nacaje a'acana ajopánajlo, iná capi, iná a'á najló. Marí que la'acana palani Tupánajlo. Uncá riquej'á'ala hualiyá nacaje, uncá i'imalare huacapi.

<sup>13</sup> Uncá nuhuátala ila'acá icó camu'ují nañaté a'acana aú.

<sup>14</sup> Rejenohuaja nuhuátaca nacaje i'imacá ijló najhua'até. Chuhua re nacaje ijlo ñó'ope, a'acáloje nañaté, camu'ují nala'acare nacú aú penaje. Apala icá piño la'ajeño camu'ují nacaje nacú i'imajica. Najló ca'ajná ñó'ope nacaje i'imajé. Rihuacajé necá penájenami a'ajeño iñaté, camu'ují ila'ajicare nacú aú. Marí que ila'ajica pecohuácaca aú rejenohuaja nacaje i'imajica palá ijló.

<sup>15</sup> Tupana puráca'alo lana'aquejami quemacá que ila'ajica raú. Marí que rimacá: "Apú capi ca'ajná ñó'ope nacaje. Ritamáca'ata camu'ují la'acañojlo ricá. Aú uncá ñó'ope huani

calé yuriro rijló. Eyá camu'ují la'acaño, uncá caja nahue'epílaje camu'ují huani la'acana reyá a'ajná ño'ojó."

*Tito, rijhuáque'ena, quele yucuna marí:*

<sup>16</sup> Palá Tupana la'acá huecá. Rila'á Tito pechu caí inacu. Nupechu i'imacá inacu que caja rila'acá ripechu.

<sup>17</sup> Nupura'ó rijhua'até i'imacá, ri'ijnacáloje ichaje penaje.

—Je —que rimacá nojló.

Caí huani rihue'epica inacu. Aú rihuata ichaje i'ijnacana. Caja queja ripechu i'imacá inacu uncá chiyó numá rijló i'imacá.

<sup>18</sup> Rijhua'até huahuacára'aje apú Jesucristo hua'ateje. Piyuque Jesucristo ja'apiyá jema'ajeño jahuacaño apalá chojé, apalá chojé que. Necá pura'año palá rinacu. Palá napechu rinacu, palá ri'imacale Tupana yucuna najló. Tupana i'imataca ina'uqué capichácajo liyá yucuna ri'imá najló i'imacá.

<sup>19</sup> Necá penájenami quemano caja rinacu, ri'ijnacáloje huajhua'até liñeru a'ajé camu'ují la'acáñojo penaje. Huahue'epicale caí nanacu, aú calé huátaca que.

<sup>20</sup> Hua'acáloje camu'ují la'acaño ñaté penaje, huaquejá'a liñeru ajopana, ajopana liyá que. Uncá huahuátala ina'uqué chapújra'aco huanacu rijimaje.

<sup>21</sup> Ñaquele huahuata rila'acana palá Tupana jimaje que. Huahuata caja ina'uqué hue'epica palani ricá huala'acare.

<sup>22</sup> Najhua'até caja huahuacára'aje apú Jesucristo hua'ateje. Cajrú rila'acá nacaje palani. Aú iná hue'epi peyajhué péchuri ricá. Huechi rihuátaca iñaté a'acana, palá ripechu i'imacale inacu.

<sup>23</sup> Naquejá'ajica ee Tito yucuna iliyá, eco imá najló marí que: "Pablo huáque'ehue ricá. Rijhua'até sápa jeri illojé penaje ricá." Naquejá'ajica ee piño rijhuáque'ena yucuna, eco imá piño najló marí que: "Re Jesucristo hua'atéjéna apú eyá, apú eyá que. Necá huacára'año necá majó huañaté a'ajeño penaje. Ina'uqué pechu i'imacáloje palá Jesucristo nacú penaje nala'á piyuque nacaje," que imájica najló.

<sup>24</sup> Ñaquele ihuata necá íqui'ija. Ajopana Jesucristo hua'atéjéna, nahuacára'ajeño, quele jema'acáloje íqui'ija ihuátaca necá yucuna penaje. Ihuátajica ee necá íqui'ija, nahue'epeje quehuaca numacasucristo hua'atéjéna apú eyá, apú eyá que. Necá huacára'año necá majó re inacu najló i'imacá.

## 9

*Liñeru na'acare camu'ují la'acáñojo yucuna marí:*

<sup>1-2</sup> Marí que numacá najló inacu i'imacá: "Necá, Acaya te'eré nacú i'imacaño, queño'oño liñeru jahuacátacana camu'ují la'acáñojoje penaje. Apú jarechí i'imacá huacajé naqueño'ó rahuacátacana." Marí que numacá najló inacu i'imacá. Riyucuna jema'acana aú necá la'año caja ñaque caja ijehuemi. Uncá naje calé numá ijlo, a'acáloje liñeru ajopana Jesucristo ja'apiyá jema'ajeñojo penaje. Camu'ují la'acaño necá numá nacú. Caja nuhue'epi ihuátaca ra'acana najló. Palá nupechu inacu. Raú nu'umá Macedonia e i'imacañojo riyucuna.

<sup>3</sup> Chuhua nuhuacára'ajica huanaquiayana Tito, rijhuáque'ena, quele ca'ajno liñeru ña'ajé iliyá. Marí que la'acana aú uncá ri'imajaje majopeja, numacare inacu najló i'imacá. Numacá inacu queja ca'ajná a'ajica liñeru.

<sup>4</sup> Apala ina'uqué, Macedonia eyájéna, i'ijnajeño huajhua'até ichaje. Amájeño ca'ajná uncá jahuacátala liñeru a'acaje penaje. Uncájica ee ila'á ñaque, nopáña'ajo raú, nupechu i'imacale inacu: "Palá japi na'ajica liñeru." Ñaque caja apáña'ajico raú.

<sup>5</sup> Marí que ri'imacá piyá, nuhuacára'aje huanaquiayana i'ijnacá huatucumá ichaje. Necá ñapátajeño liñeru jahuacátacana imacare nacú i'imacá huajló penaje. Nahuacátaje ricá, ri'imacáloje huapé penaje. Ihue'epicale caje ajopana mu'ují, a'ajé liñeru najlojé penaje. Uncá nupuráca'alo aú ja calé a'ajé najló ricá.

<sup>6</sup> Ihue'epi marí: Ejátari huejápaja nacaje icha ijí, ña'arí caje huejápaja richa. Ejátari cajrú nacaje icha ijí, ña'arí caje cajrú nacaje icha. Marí que quemacana ricá: Iná a'acachu huejapa liñeru camu'ují la'acáñojo, ñaque caje Tupana la'acá iná palá huejápaja riloco'opáneje. Iná a'acachu cajrú liñeru, rila'á caje iná palá cajrú riloco'opáneje.

<sup>7</sup> Iná a'á liñeru ajopánajlo iná pechu nacú ri'imacá ejé. Mamejajneja iná a'acá ricá. Pamineco ca'ajná iná pechu i'imá ijno ra'acana nacú. Nemacá aú: "Pa'á ricá" que, iná a'á ricá ijno caje hua'até. Marí que iná pechu i'imacachu, uncá paala Tupánajlo ricá. Eyá Tupana huátari íqui'ija ricá, pu'ují ripechu que ra'acá nacaje ajopánajlo.

<sup>8</sup> Tupana hue'epiri piyuque nacaje a'acana ijlo cajrú. Raú uncá ila'alajo camu'ují nacaje nacú. Hua'até caje ño'ope nacaje i'imajica ijlo, a'acáloje ajopana ñaté raú penaje.

<sup>9</sup> Marí que Tupana puráca'alo lana'aquejami quemacá cajrú nacaje a'ajeri nacú:



Mamejajneja ra'acá camu'ují la'acáñojlo nacaje.

Uncá Tupana pechu capicháñalaje palá rila'acare.

Hua'ajini huani rihue'epíjica ricá raú, que rimacá.

<sup>10</sup> Tupana palamane aú re nacaje icha ijí inajlo, iná ejátacaloje penaje. Tupana palamane aú re caja a'ajneji huajló, huajñacaloje penaje. Ricaja caja Tupana a'ajeri ijlo nacaje cajrú, ila'acáloje palá huani ajopana ina'uqué nacú raú penaje.

<sup>11</sup> Marí caje aú cajrú nacaje i'imajica ijlo, a'acáloje ñó'ope najló ricá penaje. Huecá i'ijnatájeño liñeru a'ajicare huajló, camu'ují la'acáñojlo penaje. Jesucristo hua'atéjena necá. Nacaje hua'ajicare najló aú nemaje Tupánajlo: “Palá pila'acá huecá” que.

<sup>12</sup> Liñeru a'ajicare najló aú a'ajé nañaté, camu'ují nala'ajicare nacú aú. Raú caja palá napechu i'imajica Tupana nacú. Cajrú nemájica rijló: “Palá pila'acá huecá” que raú.

<sup>13</sup> Marí que a'ajica nañaté aú nemaje: “Necá jema'año palá Jesucristo ja'apiyá” que. Raú caja cajrú napura'ajico Tupana nacú palá. Nó'ope liñeru a'ajicare najló aú a'ajica nañaté. Palani caja ri'imajica piyuqueja Jesucristo hua'atéjenajlo. Raú napura'ajó caja palá huani Tupana nacú.

<sup>14</sup> Palá caja napechu i'imajica inacu, a'ajicale nañaté. Napura'ajó caja Tupana hua'até inacu, ripalamane aú a'ajicale nañaté.

<sup>15</sup> Palá huani Tupana la'acá huecá. Iqui'ija huani ra'acá huañaté. Uncá huapechu iphala, riyucuna i'imacana locópa'ala.

## 10

*Jesucristo a'arí Pablo rihuacára'acarena naquiyana penaje i'imacá. Riyucuna marí:*

<sup>1</sup> Uncá Jesucristo yúcha'alo quiñaja, ina'uqué huani ri'imacale ina'uqué hua'até. Marí que caja nucá ijhua'até. Aú numá ijlo me'etení marí que: E'iyajena quemano nunacu ilérohua: “Ujhuí que ricá, maere ri'imacachu huajhua'até. Ya'ajná ri'imacachu hualiyá, caphí ripuráca'alo iphaca huajló.”

<sup>2</sup> Ajopana piño, inaquiyana quemano huanacu: “Necá la'año najluhua nacaje napechu queja,” que nemacá. Nahuátajica ee, nula'ajé caphí nupéchuha najló. Huapura'ajó rinacu pajhua'atéchaca. Ca'ajno nuphájica huacajé, noca'ajé cajrú ñaque pura'ajeño richona.

<sup>3</sup> Re huapechu. Ajopana ina'uqué pechu i'imacá que caja huapechu. Necá, uncá hue'epílaño Tupana, uncá napechu que calé huapechu. Huahuata pu'uhuaré nala'acare apichátacana napechu queja la'ajéñojlo.

<sup>4</sup> Nócacajo e'iyá queja huecá. Uncá lecareji ina'uqué la'acare aú calé huenoco. Nacaje Tupana la'acare huajló, lecareji queja huajló ricá. Ricá a'arí huañaté, huapichátacaloje ina'uqué liyá pu'uhuaré nala'acare raú penaje.

<sup>5</sup> Cajrú ina'uqué pura'ajo majopeja Tupana nacú. Ra'á huañaté pajlácage puráca'aloji apichátacana aú. Ne'iyajena la'año necó cajrú hue'epícaño queja. Raú netá ajopana ina'uqué apu, nema'acá piyá Jesucristo ja'apiyá. Ra'á huañaté ina'uqué pechu pajno'otácana Tupana ejo aú, nema'acáloje Jesucristo ja'apiyá raú penaje.

<sup>6</sup> A'ajica ee palá inacojlo Tupana puráca'alo, huahuajaje e'iyayá necá, uncá a'alaño nanacojlo ripuráca'alo.

<sup>7</sup> Ica quemano ina'uqué nacú mecajenaca necá namácana aú. Re inaquiyana ca'ajno, napechu i'imá nanacuhúa: “Jesucristo hua'até sápageño huecá” que. Huecá caja i'imaño Jesucristo hua'até sápageño. Rejenohuaja i'imacáño huecá, Jesucristo hua'até sápageño. Nahue'epícaloje penaje numá najló marí que.

<sup>8</sup> Jesucristo hua'até sápageño queja, huehuíña'atacaloje icá Tupana nacú raú penaje, ihue'epícaloje richaje, richájeño que rinacojlo raú penaje. Uncá ra'alá huecá, huapichátacaloje icá penaje.

<sup>9</sup> Papera nuhuacára'acare ijlo aú ca'ajná ihuó la'ó no'opejé. Uncá nuhuátala ri'imacá marí que ijlo.

<sup>10</sup> Apala marí que inaquiyana quemacá nunacu: “Caphini ripuráca'alo, Pablo huacára'acare huajló. Huajhua'até ri'imacá huacajé, riliyómica que ripechu i'imacá. Majopéjari puráca'alo queja ripuráca'alo i'imacá.”

<sup>11</sup> Quemano ilé que nunacu, nuhuata nahue'epica marí: Huahuacára'a ijlo huapuráca'alo lana'aquéjami ya'ajnaya i'imacá. Hue'emaquela ijhua'até ñaqueja caja huemacajla ijlo rinacu.

<sup>12</sup> Uncá huani huahuátala huanacuhúa pura'acano palá, inaquiyana pura'acó nanacuhúa que caja. Napechu queja nemacá nanacuhúa mecajenaca necá. Nachá'ata ca'ajná nanaquiyano necámica que. Aú napechu i'imá nanacuhúa: “Cajrú péchuruna huecá” que. ¡Meque uncá huani ta napechu i'imalá najló!

<sup>13</sup> Uncá huemalá huanacuhuá huapechu queja. Tupana pechu nacú ri'imacá ejeja hualalá nacaje. Rejeja caja huemacá huanacuhuá. Ripecchu nacú ri'imacá que huephaca inacu Corinto ejo i'imacá.

<sup>14</sup> Ripuráca'alo aú caja huemá nacaje nacú ijló. Ajopana piyá hue'emá Jesucristo yucuna ijló i'imacá. Palani Jesucristo yucuna.

<sup>15</sup> Nacaje ajopana ina'uqué la'acare nacú uncá huemalaje: "Huecá la'año ricá" que. Marí caje uncá huahuátalare. Huahuátaja Tupana puráca'alo ja'apátacana ijló, ipechu i'imacáloje richaje, richaje que caphí Tupana chójé raú penaje. Quéchami hualalá'ajica piño nacaje ijhua'até. Tupana pechu nacú ri'imajica ejé hualalá'ejé ricá. Raú richaje íqui'irunaca jema'ajeño palá Tupana ja'apiyá.

<sup>16</sup> Quéchami huahuata ite'eré yámajo i'ijnacana ya'ajnae, hue'emacáloje Tupana i'imataca ina'uqué capichácajo liyá yucuna najló penaje. Ajopana ca'ajná jehuíña'ataño ne'emacá rehuá. Aú uncá huemalaje huanacuhuá: "Huecá jehuíña'ataño necá" que.

<sup>17</sup> Tupana puráca'alo lana'aquejami quemari marí que: "Iná la'á ca'ajná palá. Aú iná huata iná nacuhuá pura'acano palá. Marí uncá paala. Iná pura'ó palá Tupana nacú, iná la'acale nacaje palá ripalamane aú," que rimacá.

<sup>18</sup> Marí caje aú iná hue'epi mecajeca i'imari Tupana hua'até sápaieri que: Ricá, Hue'emacana Jesucristo quemacare nacú palá, i'imari rijhua'até sápaieri que. Eyá quemari rinacuhuá palá, uncá Tupana hua'até sápaieri calé ricá.

## 11

*Pablo aca'acá ajopana maná yucuna marí:*

<sup>1</sup> Jema'á méqueca numájica nuncacuhuá ijló. Majopeja ca'ajná ri'imajica ijló. E'iyonaja nuhuata jema'acá nupuráca'alo.

<sup>2</sup> Numejajnena icá ajopana liyá. Tupana liyaje aú numejajnena icá. Iqui'ija nuhuátaca i'iracó Tupana nacojé. Inaya huátacachu apú, rumejñata rocó ajopana achiñana liyá, ruhuá'acacoloje ruhuátacare hua'até penaje. Marí que caja nuhuátaca imejñátaca ícá, i'imacáloje Jesucristo hua'atéjena penaje.

<sup>3</sup> Júpimi Jiñá Chi'ináricana pajlari Evami cholo hua'até i'imacá. Capecchú huani ri'imacá rujhua'até pajlácana nacú. Naqué caja ca'ajná icá a'acá pajlácaje inacojó. Aú calé nohuó ca'aró huani ijhua'até. Jesucristo ja'apiyá jema'acana ihue'epique itucumó. Chuhua ca'ajná uncá ñaque calé icá. Apú puráca'aloji chuhua ca'ajná i'ijnataca ipéchuhua me'etení.

<sup>4</sup> Ajopana, ajopana que nephaca inacu. Ne'emá Jesucristo yucuna ijló apojó. Apojó caja ne'emacá ijló Tupana Pechu yucuna. Uncá hue'emacá ijló riyucuna que calé ne'emacá riyucuna ijló. E'iyonaja calé palá ipechu nanacu. Marí caje aú uncá paala ila'acá. Tupana i'imataca ina'uqué capichácajo liyá yucuna ne'emá caja apojó. Uncá riyucuna hue'emacare ijló que calé ricá. E'iyonaja calé huechi jema'acá na'apiyá.

<sup>5</sup> Jesucristo huacára'acarena naquiayana que caja ijló necá. Ajopana chaje péchuruna que ihue'epica nanacu. Uncá na'apejé calé núcá.

<sup>6</sup> Apala uncá nupura'aló palá napura'acó que. Marí aú calé nachá'ata núcá. Uncá nachá'atala núcá napechu aú. Piyuque nacaje numacare nacú ijló aú ihue'epi quehuácaje ricá.

<sup>7</sup> Hue'emaqué ichaje huacajé nu'umá ijló Tupana i'imataca icá capichácajo liyá yucuna. Rihuacajé uncá nuquejá'ala iliyá liñeru i'imacá. Majopéjari queja nu'umacá ijhua'até, nócho'otacaloje icá pajlácaje puráca'aloji chiyá penaje. Reyá i'imacáloje cajrú hue'epicaño raú penaje. Apala uncá paala ijló nacaje nula'acare e'iyohuá i'imacá.

<sup>8</sup> Ajopana Jesucristo ja'apiyá jema'ajeñoja calé a'año nojló liñeru i'imacá, nohuíña'atacaloje icá penaje. Ijnú ihuátacale ra'acana nojló, na'á huajló ricá i'imacá. Ilé na'acare nojló nujña'á nalilyá i'imacá, nula'acáloje palá e'iyohuá raú penaje.

<sup>9</sup> Nu'umaqué ijhua'até huacajé, uncá nucahuíla'aque inacu nacaje camu'ují nula'ajicare nacú aú. Rihuacajé ajopana Jesucristo hua'atéjena iphaño huanacu i'imacá. Macedonia te'eré eyájena ne'emacá. Necá calé a'año nojló nacaje nula'acare nacú camu'ují i'imacá. Marí caje aú uncá nucahuíla'a inacu nacaje aú i'imacá. Uncá caja nucahuíla'alaje inacu.

<sup>10</sup> Marí que nula'acare e'iyohuá yucuna i'imajé ajopánajlo. Uncá huani nuyurilaje riyucuna i'imacana. Piyuque Acaya te'eré e'iyohuá hua'ató nu'umajé riyucuna. Uncá Jesucristo pajlala. Ñaque uncá caja nupajlala. Aú numá ijló marí que.

<sup>11</sup> Uncá ca'ajná ihue'epila nájea numacá inacu ilé que. Apala ipechu i'imá nunacu: "Uncá japi rihuátala huecá" que. Eyá uncá ñaque calé nojló ricá. Núcá huátari icá íqui'ija. Tupana hue'epiri meque íqui'ica nuhuátaca icá.

<sup>12</sup> Re ajopana, nemá nanacuhúa marí que: “Pablo la'acá Tupánajlo nacaje, que caja huala'acá rijló nacaje.” Nuphájica inacu huacajé, nula'ajé piño e'iyohuá júpimi nula'acá que caja. Marí caje aú amaje unca ñaque calé nacaje nala'acare.

<sup>13</sup> Necá, numacárena nacú ijló, unca Jesucristo huacára'acarena naquiyana calé necá. Majopeja nemacá nanacuhúa: “Jesucristo huacára'acarena naquiyana huecá” que. Pajlácachina ta huani necá. Majopeja nala'acá necó Jesucristo huacára'acarena naquiyana que.

<sup>14</sup> Nuhue'epí mecajenaca necá. Jiñá Chi'ináricana ja'apiyá jema'ajeño necá. Ricá la'arí ricó Tupana hua'ateje, je'echú chiyaje que caja.

<sup>15</sup> Rijhua'atéjema la'año ñaque caja necó, huahue'epícarena caja mecajenaca necá. Nala'á necó palá la'ajeño queja inacu'quejlo. Riphájica caja penaje rená chojé huacajé, pu'uhuaré nala'acare loco'opáneje Tupana huajájeri necá.

*Jesucristo huacára'acarena naquiyana Pablo i'imacá. Ñaquele ramá cajrú chapú caje yajhué i'imacá. Marí riyucuna:*

<sup>16</sup> Numá piño ijló: Ipechu i'imaniya nunacu: “Uncá ripechu i'imalá” que. Ñaque ca'ajná ipechu nunacu nuhue'epica. E'iyonaja jema'á no'opiyá. Uncá pechu i'imalá puráca'alo que ca'ajná ijló ricá. E'iyonaja jema'á no'opiyá, nu'umacáloje ijló nula'acare yucuna penaje.

<sup>17</sup> Uncá Nu'umacana, Jesucristo, huacára'aca que calé numájica nunacuhúa ijló me'etení. Uncá pechu i'imalá quemacá rinacuhúa queja numájica nunacuhúa ijló me'etení.

<sup>18</sup> Cajrú ina'uqué quemáño nanacuhúa palá, nacaje nala'acare nacú. Nemacá nanacuhúa que caja numájica nunacuhúa palá.

<sup>19</sup> Ica hue'epiño inacuhúa capéchuruna que huani. E'iyonaja palani ca'ajná ijló ina'uqué mapéchuruna i'imacaño.

<sup>20</sup> Necá i'imaño ijló ihuacára'ajeño que. Caphí nahuacára'aca icá napuráca'alo aú. Nephá caja na'apihuá ijló. Necaja caja i'imaño iminana queja caja ijhua'até. Necaja caja la'año icá nahuejáputenami que caja. Naña'á icá pajimaya. Marí que la'acaño necá. Ijló ca'ajná palani necá.

<sup>21</sup> Uncá nula'alajla icá ñaque, nohuó la'acole ñaque ila'acana ja'apí.

Uncá nahuó la'aló nanacuhúa pura'acano palá ja'apí. Uncá caja nohuó la'aló ñaque quemacana nunacuhúa ja'apí. Nopáña'o marí que quemacana ja'apí.

Uncá pechu i'imalá quemacá nacaje nacú, queja numacá nacaje nacú ijló me'etení.

<sup>22</sup> Nemá nanacuhúa: “Hebreo ja'ana huecá.” Hebreo ja'a caja nucá najhua'até. Nemá piño: “Israelmi chu laquénami huecá.” Rilaquemi caja nucá najhua'até. Nemá piño nanacuhúa: “Abrahami chu laquénami caja huecá.” Rilaquémija caja nucá najhua'até.

<sup>23</sup> Nemá piño nanacuhúa: “Jesucristo hua'até sápareño huecá.” Rijhua'até sápareji huani jo'ó nucá. Nucá chá'atari necá raú. Uncá pechu i'imalá pura'acó queja nupura'acó ijhua'até me'etení. Nucá sápari nasápaca chaje íqu'ica. Cajrú ajopana ña'ataca nu'umacá, nu'umacale Jesucristo yucuna. Richónaja caja naca'á nucá ina'uqué huajáquelana chojé pulapé i'imacá. Pulapé nuphaca capichácajo eje i'imacá, riyucuna i'imacana chaya.

<sup>24</sup> Pajluhua té'ela que peno apú huacajé, apú huacajé que judíona naquiyana ña'atájica nu'umajica. Riyucuna i'imacana chona naña'ataque nu'umajica. Treinta y nueve que pe naña'atájica nu'umajica apú huacajé, apú huacajé que.

<sup>25</sup> Hueji que pe naña'ataca nu'umacá a'ahuaná aú. Pajluhua pe caja nenoca nucá jipa aú. Hueji que pe la'acá huapuru no'opácare chu, ja'acó hua'apiyá i'imacá. Pajluhua lapí quetana, eyá hue'echú quetana nocúhua'aco juni jalomi acú i'imacá.

<sup>26</sup> Cajrú nu'ujnájica ajopana ñacajela nacojé, ajopana ñacajela nacojé que i'imajica. Capichácajo e'iyohuá nu'umacé juni chuhúa ja'apácana nacú. Re caja ata'acáchina. Necá i'icaño iná huilá, najña'acáloje iná liñérite iná liyá penaje. Ne'iyayá no'opá caja i'imacá. Chapú nute'eré eyájena amaca nu'umacá. Ajopana te'eré eyájena amaño caja nucá chapú i'imacá. Pajmilla e'iyohuá chira'acano nacú ajopana la'año iná chapú. Ñaque caja pu'uteni chuhúa chira'acano ehua iná iphátaca ajopana chapú péchuruna. Marí caje e'iyohuá nuchira'acó. Ñaque caja nuchira'acó juni jalomi acuhúa. Rehuá iná amá caja chapú caje yajhué. Marí caje e'iyohuá nu'umá i'imacá. Re caja ina'uqué majopeja nemacá nanacuhúa: “Jesucristo hua'atéjema huecá” que. E'iyonaja unca Jesucristo hua'atéjema calé necá. Necá caja apichátaño ina'uqué Tupana liyá. Marí que i'imacaño e'iyohuá nu'umá i'imacá, nula'acáloje Tupana huacára'aca que penaje.

<sup>27</sup> Re'iyohuá que calaca'aphé nula'ajica nacaje i'imajica. Sápacaje yajhué nomaque. Me'etájemi que nu'umajica re'iyohuá. Nujña'aque caja me'epeji panacu. Nunúru'upi chu macára'ataco caja i'imajica rehuá. Re'iyohuá caja nula'aque camu'ují a'ajnejí nacú, pajreji nacú, a'arumacaji nacú, caje macá nacú. Piyuque nacaje nacú nula'aque camu'ují i'imajica. Marí que nomájica chapú caje yajhué i'imajica.

<sup>28</sup> Re caja jo'ó ñó'openi nacaje unca numálare nacú. Hue'echú ca'alá queja no'ocá nunacojó Jesucristo ja'apiyá jema'ajeño, ajopana, ajopana que. Nuhuata nema'acá Tupana ja'apiyá. Aú nucahuíla'o nanacojó.

<sup>29</sup> Re ca'ajná apú Jesucristo ja'apiyá jema'ajeri. Unca caphí calé ripechu Tupana chojé. Raú nupechu la'ó camu'ují rijhua'até. Apú Jesucristo hua'atéjeri ca'ajná la'arí rimanaicho ca'ajná. Pachá nuyúcha'o richá.

<sup>30</sup> Marí caje la'arí ujhuí nupechu. Marí nacú numajla ijló, nuhuátaquela nocó la'acana chá'atajeri queja.

<sup>31</sup> Jesucristo jara'apá Tupana. Palani huani ricá. Rinacu napura'ajó palá huani hua'ajini huani. Ricá hue'epirí quehuácaje nacaje numacare nacú ijló me'etení.

<sup>32</sup> Nu'umacá Damasco e huacajé, nachaje huacára'ajeri ja'apiyateje i'mari nahuacára'ajeri. Nachaje huacára'ajeri ii i'mari Aretas. Nu'umacá rejo huacajé, ra'apiyateje huacára'ari ina'uqué ja'acó nupé. Pajimila numanaje na'ó nupé i'imagá, napatacáloje núcá rejé penaje, naca'acáloje núcá ina'uqué huajáquelana chojé penaje.

<sup>33</sup> Corral yenoje, jipa nauquiyá la'acanami, chipúca'ari pajimila nacojó tujlá que pajimáechaca. Ajopana huanauquiyana chojé calé nu'umaó. Necá huitúca'ataño nu'umacá corral aphú chiyá ají que corral yámajo. Cuhuá'ala cajruni chu nahuitúca'ata nu'umacá. Raú calé nu'umaó ne'emacana liyá. Marí que i'imagá penájemi núcá.

## 12

### *Nacaje ya'atacá Páblojlo yucuna marí:*

<sup>1</sup> Unca naje calé iná pura'ó palá iná nacuhuá. E'iyonaja numaje nacaje nacú ijló. Hue'emacana Jesucristo ya'atacare nojló i'imagá nacú numaje ijló me'etení. Pu'uhuacá rila'acá nojló nacaje i'imagá.

<sup>2-3</sup> Pa'u quele iphata jí'imaji nacojó quele jarechí i'imagá huacajé, Tupana huá'ari nu'umacá ají que je'echú chojé. Ya'ajnaje hueji ca'amá je'echú chojé ejé ri'imatá núcá. Unca nuhue'epila palá, nunapona hua'até ca'ajná nu'umacá rejo, unca ca'ajná. Nupéchuja ca'ajná i'mari rejo. Ricaja calé Tupana hue'epirí méqueca nu'umacá rejo. Nuhue'epí je'echú chojé Tupana huá'aca nu'umacá.

<sup>4</sup> Re noma'á puráca'aloji. Micho'ojneji jo'ó ricá ina'uqué liyá. Unca Tupana huátala nu'umacá riyucuna. Unca caja puráca'aloji i'imalá ina'uquejlo, ne'emacáloje riyucuna raú penaje.

<sup>5</sup> Nacaje nomácare rejo nacula calé nupura'ajó palá. Unca nupura'alajo nunacuhuá palá. Nacaje numáicare nacú, numaje ijló, ihue'epícaloje núcá raú penaje. Po'oloni núcá. Caje nacula numaje nunacuhuá ijló.

<sup>6</sup> Nuhuátaquela nunacuhuá quemacana palá, unca ri'imalajla mapéchuru le'ejé puráca'aloji que. Quehuácaje ri'imacajla, numaquela nunacuhuá palá. Unca numalaje nunacuhuá palá, ina'uqué pechu i'imagá piyá palá nunacu raú. Nacaje nula'acá aú, nacaje numacare nacú aú ja nuhuata ina'uqué pechu i'imagá palá nunacu.

<sup>7</sup> Núcá amari palá nojé huani nacaje je'echú chu, huá'aqueja nu'umaqué rejo huacajé. Nupechu i'imagá piyá nunacuhuá hue'epirí que huani, nomaca quehuini yajhué me'etení. Jiñá Chi'ináricana liyaje ricá, rila'acáloje chapú núcá raú penaje. Marí que nojló ricá, nula'acá piyá nocó chá'atajeri que huani nomácare aú.

<sup>8</sup> Hueji que pe numacá Tupánajlo, ra'apátacaloje quehuini yajhué nuliya penaje.

<sup>9</sup> E'iyonaja unca Tupana ja'apátala nuliya ri'imagá. Marí que rimacá nojló: "Iqui'ija nuhuáatacare picá. Nupalamane picá. Marí ejeja palani pijló. Po'olóruna ina'uqué ñaté a'ajeri núcá. Cajrú huani no'ocá ñañaté, ajopana catejmúruna chaje," que rimacá nojló i'imagá. Ñaque i'imagale palá nupura'ajico nunacuhuá, po'oló napónari nu'umacale. Raú ajopana ina'uqué hue'epiño Jesucristo a'acá nuñaté.

<sup>10</sup> Ñaquele po'oló cajé yahua'achiro nojló palá. Marí po'oló caje numacare nacú, marí que nojló ricá: Pu'uhuaré napura'acó nunacu. Camu'ují nula'acá cajrú nacaje nacú. Chapú huani ajopana la'acá núcá. Calaca'aphé nula'aquejami nula'acá nacaje Jesucristo huátaca que. Caja marí que la'acana a'arí renó nunacu. Po'oloni huani nu'umacachu, nula'á nacaje cajrú Tupana huátacare caje ripalamane aú.

### *Pablo huo ca'aró Corinto eruna hua'até, uncale nala'alá palá. Riyucuna marí:*

<sup>11</sup> Unca pechu i'imalá pura'aró rinacuhuá palá. Ñaque caja nupuri'ichaco nunacuhuá palá. Ipachá nupuri'ichó ilé que nunacuhuá. Palani ri'imaquela imacajla nunacu palá. E'iyonaja ajopana i'imaño ijló Jesucristo huacára'acarena nauquiyana queja. Ajopana chaje péchuruna que ihue'epica nanacu. Unca caja nachá'atala núcá napechu aú. Majopéjari huani núcá. E'iyonaja nuchá'ata necá.

<sup>12</sup> Nu'umacá ijhua'até huacajé, cachuhua nacuja nohuña'ataca icá Tupana puráca'alo nacú, ihue'epicaloje ricá raú penaje. Uncá nula'aló ujhui'iliyá, uncale ihue'epila ricá quiñaja i'imacá. Nula'á nacaje e'iyohuá uncá meño'ojó iná la'alare iná icó. Noná que'ená penaje nula'á nacaje e'iyohuá, ihue'epicaloje nucá raú penaje. Raú ihue'epi Jesucristo huacára'acarena naquiayana nucá.

<sup>13</sup> Uncá nupechu i'imalá inacu: "Ajopana Jesucristo hua'atéjena ja'apejé i'imacaño necá" que. Panacójechaca queja najhua'até icá nojló. Uncá nuquejá'ala iliyá liñeru nujlulhua nu'umajohua penaje, nu'umacá ijhua'até huacajé. Eyá ajopana Jesucristo hua'atéjena liyá nuquejá'ano liñeru. Marí caje aú ja calé nula'á icá apojó. Aú calé amó nuchaje, uncale nula'alá rejenohuaja ijhua'até i'imacá.

<sup>14</sup> Chuhua nu'ujnajica piño ichaje hueji que pe la'acá. Uncá nuquejá'alaje iliyá liñeru nujlulhua nu'umajohua penaje. Uncá nu'ujnalaje ichaje nacaje i'imacare icapi chaya. Nu'ujnajé ichaje, nuhuátacale icá íqui'ija. Jara'apá queja nucá ijló, nuqueño'ocale Jesucristo yucuna i'imacana ijló paminace i'imacá. Uncá nayani calé jahuacátaño liñeru nach'i'inajlo. Nach'i'iná jahuacátaño nayánijlo liñeru. Naquele uncá nuquejá'alaje iliyá liñeru nujlulhua.

<sup>15</sup> Palani nojló, nuca'acáloje nacaje piyuqueja nucapi i'imacare ijlojé penaje. Nuhuata ñaté a'acana raú, ipechu i'imacáloje Tupana pechu que caja raú penaje. Nocó ca'ajná no'ójla ijló, nula'acáloje ijló nacaje penaje. Richaje, richaje que nuhuátaca icá íqui'ija. Lanáquiya icá ihuátaño nucá ra'apejé, ra'apejé que. Marí que ca'ajná ricá ijló.

<sup>16</sup> Ica hue'epiño uncá nucahuíla'ala inacu liñeru quejá'acana iliyá nujlulhua aú. E'iyonaja ipechu i'imá nunacu: "Ra'á huame'é rijlulhua, quéchami rata'acáloje huécá penaje."

<sup>17</sup> Nuhuacára'a ina'uqué i'ijnacá ichaje i'imacá. Necá uncá caja ata'alaño icá.

<sup>18</sup> Numá Títojo i'imacá, ri'ijnacáloje ichaje penaje. Nuhuacára'a caja apú Jesucristo hua'ateje rijhuáque'ehuehua penaje. Uncá caja Tito ata'alá icá liñeru quejá'acana iliyá aú. Nupechu que péchuri ricá. Nucá queja caja ricá.

<sup>19</sup> Apala ipechu i'imá huanacu: "Nachayo nemá huajló nacaje nacú." Uncá ricá penaje calé huemá huanacuhúá. Jesucristo huátaca que huemacá ijló nacaje nacú. Tupana ijlu'chu que huemacá ijló rinacu me'etení. Nojena, íqui'ija nuhuátacarena, piyuqueja nacaje huemacare nacú, ijlojé penaje ricá, ipechu i'imacáloje richaje, richaje que raú penaje.

<sup>20</sup> Nuphájica rejo huacajé, uncá ca'ajná nomálaje ila'acá palá nuhuátaca que. Uncá caja ca'ajná amálaje nula'acá ihuátaca que. Apala nomaje ca'ajná icá aca'ácaco pajhua'atéchaca. Apala nomaje ca'ajná chapú ihuó i'imajica pachácaca, inaquiayana chá'atacale icó. Nomaje ca'ajná iyúcha'aco pachácaca. Nomaje ca'ajná inaquiayana la'acá napechu queja huani nacaje necámica que. Noma'ajé ca'ajná ichapújra'aco panacuhuácaca. Noma'ajé ca'ajná ipura'acó pu'uhuaré panacuhuácaca. Nomaje ca'ajná inaquiayana la'acá necó chá'atajeño que e'iyohuá. Nomaje ca'ajná uncá paala i'imacá pajhua'atéchaca. Marí cajé cahuíla'ari nunacu.

<sup>21</sup> Ilé que ila'acá pecohuácaca aú nohuó ca'aró nojló. Ca'ajno nu'ujnajica ichaje huacajé, apala nopáña'ajo ca'ajná ja'apí. Cajrú nuyájica ca'ajná ijhua'até, imanaicho la'ajeño i'imacale. Caja júpicha huani e'iyajena i'imaño imanaicho la'acana nacú ilérohua. Uncá jo'ó caja ipajno'otalo ipéchuhua imanaicho la'acana liyá. Re e'iyajena la'año imanaicho inaquiayana luna hua'até. Nuju'uquena huani e'iyajena. Marí caje liyá uncá jo'ó e'iyajena pala'atálaño ipéchuhua.

## 13

### *Pablo la'acá nenacú yucuna marí:*

<sup>1</sup> Chuhua nu'ujnajica ichaje. Hueji pe la'acá nu'ujnacá ichaje. Nuphájica huacajé huapura'ajó pajhua'atéchaca namanaicho la'ajeño nacú, huahuajácaloje necá penaje. Tupana puráca'alo lana'aquejami quemacá que huahuajájica necá. Marí que rimacá pu'uhuaré la'acaño, namanaicho la'ajeño nacú: "Iyamá ca'ajná, hueji quele ca'ajná namájeño arucátajeño necá najló. Ina'uqué hue'epicaloje ñaque ricá raú penaje," que rimacá rinacu. Richuhuaja huala'ajica ñaque.

<sup>2</sup> Nu'umacá ichaje huacajé, iyamá pe la'acá huacajé, numá ijlo marí que namanaicho la'ajeño nacú i'imacá: "Uncaja que nayurí namanaicho la'acana naliyó, nuphájica piño huacajé nuhuajaje necá. "Chuhua numájica piño ñaque caja: La'año rejo'ocaja jo'ó namanaicho, nuhuajaje necá ajopana namanaicho la'ajeño hua'até.

<sup>3</sup> Rihuacajé ihue'epeje Jesucristo quemacá que nojló, que caja numacá ijló. Uncá po'oloni i'imacá que calé ricá ijhua'até. Ricá caja hue'epiri piyuque nacaje la'acana e'iyohuá.

<sup>4</sup> Nacúhua'ata ricá a'ahuaná apiyácacanami nacojé i'imacá. Rihuacajé po'oloni ri'imá najló. Tupana hue'epiri piyuque nacaje la'acana, ñaquele cajmuni ricá me'etení. Ri'imacá najló

po'oloni, que caja hue'emacá po'olóruna caja ijló. E'iyonaja Jesucristo chuhua' i'ímacana aú huala'á ijló nacaje Tupana Pechu aú.

<sup>5</sup> I'ímá íco'onó, amáijla méqueca ipechu Jesucristo nacú. ¿E chi Jesucristo pechu ijhua'até, ila'acáloje rihuátaca que raú penaje? Ihue'epí meque ca'ajná ijló ricá. Apala uncá ca'ajná Jesucristo hua'atéjona calé icá.

<sup>6</sup> Nuhuata ihue'epica Jesucristo hua'atéjona jo'ó huecá.

<sup>7</sup> Huapura'ó Tupana hua'até inacu, ila'acá piyá pu'uhuaré. Palá ila'ajícara aú ca'ajná ina'uqué quemájeño huanacu: “Meque palá huani nala'acá nanacu raú.” Uncá ri'ímacáloje marí que huajló penaje calé, huapura'ó Tupana hua'até inacu. Napura'ajó huanacu pu'uhuaré ca'ajná. Nuhuátaja calé ila'acá palá.

<sup>8</sup> Uncá huala'alá apojó quehuácaje puráca'aloji quemacá que. Rimacá que huahuátaca nacaje la'acana.

<sup>9</sup> Tupana a'arí po'olóruna ina'uqué ñaté. Palánijlaca huajló po'oló i'ímacaño queja i'ímacana, hua'acáloje iñaté penaje. Caphí péchuruna i'ímaquela palá la'acana nacú, nupechu la'acojla pu'ují raú. Ñaqueja caja huapura'ajico Tupana hua'até inacu, ipechu i'ímacáloje richaje, richaje que Tupana pechu que caja penaje.

<sup>10</sup> Ñaquele nulana'á ijló marí me'etení, nuphájica inacu yámona. Nuphájicaja rejo, uncá nuhuátala aca'acana cajrú huani. Uncá caja nuhuátala ihuajácana. Jesucristo a'arí nucá, nula'acáloje nacaje ra'apiyá que penaje. Ñaquele nuhuata inacu la'acana palá, ipechu i'ímacáloje richaje, richaje que Tupana pechu que caja raú penaje. Uncá nuhuátala inacu quemacana: “Pu'uhuaré la'ajeño necá” que.

<sup>11</sup> Chuhua, nojena, eco i'ímá palá ca'ajno. I'ímá ilérohua palá la'ajeño que, uncá la'alaño pu'uhuaré. A'á caja inacojó nupuráca'alo. I'ímá caja panacojéchaca péchuruna que pajhua'atéchaca. Ipechu i'ímá caja palá panacuhuácaca. Nuhuata caja Tupana i'ímacá ijhua'até ripechu aú. Ricá la'arí iná pechu palá, iná huátacaloje íqui'ija ajopana raú penaje.

<sup>12</sup> Ajalaca pecohuácaca palá, Jesucristo hua'atéjona ajalaca pecohuácaca que caja.

<sup>13</sup> Piyuque Jesucristo hua'atéjona maárohua i'ímacaño quemáño inacu: “Eco palá najló ca'ajno.”

<sup>14</sup> Nuhuata i'ímacá Hue'emacana Jesucristo palamane. Iqui'ija huani Tupana huátacarena icá. Nuhuata caja iyurico ra'apiyá. Nuhuata caja Tupana Pechu i'ímacá ijhua'qué'ehue penaje. Marí queja nuhuátaca ijló nacaje. Maáreje riyucuna tajnaro.

## GÁLATAS

*San Pablo huacára'ari puráca'aloji Jesucristo hua'atéjenajlo Galacia te'eré ejo marí que:*

<sup>1-2</sup> Nucá Pablo, piyuque Jesucristo ja'apiyá jema'ajeño maare nujhua'até, quele huacára'año ijlo mari puráca'aloji; Jesucristo ja'apiyá jema'ajeño caja icá. Apú eyá, apú eyá que inaquiyana jahuacaco Galacia te'eré ehua. Ijló piyuque huahuacára'a marí puráca'aloji. Pablo nucá; Jesucristo huacára'acarena naquiyana nucá. Uncá ina'uqué puráca'alo aú calé nanaquiyana nucá. Uncá caja ina'uqué a'alá nucá, nu'umacáloje Jesucristo huacára'acarena naquiyana penaje. Jesucristo, Rara'apá Tupana, queleja a'año nu'umacá. Tupana macápo'ori Jesucristo i'imacá.

<sup>3</sup> Hue'emacana huani Jesucristo; Rara'apá Tupana. Nuhuata Tupana, Jesucristo hua'até la'acá icá palá. Nuhuata caja nala'acá ipechu palá.

<sup>4</sup> Pu'uhuaré huala'acare chaya Jesucristo a'arí ricó taca'acájejo i'imacá, ra'apátacaloje huecá pu'uhuaré la'acana chiyá raú penaje. Marí caje aú rilá'a huecá palá. Tupana, Huara'apá, huátaca que rila'acá raú.

<sup>5</sup> Palá huani Tupana la'acá ina'uqué. Palá huani caja huapura'ajico rinacu hua'ajini huani.

*Pajluhuaja chuhuaja riyucuna, méqueca Tupana i'imataca ina'uqué rijluhua capichácajo liyá. Riyucuna marí:*

<sup>6</sup> Marí que nupechu inacu: "¡Meque quiñaja huani ta nayurica Tupana ja'apiyá jema'acana!" Caja iqueño'ó ra'apiyá jema'acana chiyá jácho'ocano me'etení. Ricá jácho'otari icá capichácajo liyá Jesucristo palamane aú. Caja iqueño'ó ripuráca'alo jema'acare yuricana iliyó me'etení, i'imacáloje apa'amá puráca'aloji ja'apiyá penaje. Apa'amá yucu ne'emá ijlo. Méqueca iná i'imacó capichácajo liyá yucuna ne'emá ijlo apojó.

<sup>7</sup> Uncá apa'amá yucu i'imalá quehuaca. Pajluhuaja chuhuaja calé riyucuna, méqueca Tupana i'imataca ina'uqué capichácajo liyá. Re ca'ajná ina'uqué ijhua'até; nahuata inacu cahuíla'acana. Nahuata ijlo Jesucristo yucuna apiyáacana apojó napuráca'alo aú. Tupana i'imatari ina'uqué capichácajo liyá iná pechu i'imacá aú caphí Jesucristo chojé. Riyucuna nahuata apiyáacana ijlo.

<sup>8</sup> Apala apú i'imari ijlo riyucuna, méqueca Tupana i'imataca rijluhua ina'uqué capichácajo liyá. E'iyonaja calé uncá richuhuaja calé ca'ajná ri'imacá riyucuna ijlo. Apojó ca'ajná ri'imá riyucuna ijlo, hue'emacá ijlo riyucuna liyá. I'imari riyucuna apojó, nuhuata Tupana yerúca'aca richaje. Ri'imajla ñaque caja nojló, uncaja que nu'umá ñaque caja richuhuaja riyucuna ijlo. Apala Tupana hua'atéjeri, je'echú chiyaje, iphájeri inacu. Uncaja que ri'imá riyucuna richuhuaja, nuhuata Tupana yerúca'aca richaje.

<sup>9</sup> Caja numá ijlo rinacu i'imacá. Chuhua numájica ijlo ñaque caja piño rinacu. Apú ca'ajná i'imari ijlo riyucuna, méqueca Tupana i'imataca ina'uqué rijluhua capichácajo liyá. Uncaja que ri'imá riyucuna ijlo nu'umacare yucuna chuhua, nuhuata Tupana yerúca'aca richaje.

<sup>10</sup> Marí numacare nacú aú ihue'epí mecajeca nucá. Uncá majopeja calé numacá nacaje nacú, ina'uqué pechu i'imacáloje palá nunacu raú penaje. Nuhuátaja Tupana pechu i'imacá nunacu palá. Eyá iná huátacachu ina'uqué pechu i'imacá iná nacú palá, uncá iná quemalá najló pu'uhuaré nala'acare nacú. Apala nayúcha'o iná cha raú. Marí que la'ajeri iná i'imacachu, uncá meño'ojó iná i'imalá Jesucristo hua'até sápajeri.

*Jesucristo huacára'acarena naquiyana Pablo i'imacá. Méqueca riqueño'ocá rijlo i'imacá yucuna marí:*

<sup>11</sup> Nojena, ihue'epí marí: Tupana i'imataca rijluhua ina'uqué capichácajo liyá. Riyucuna nu'umá ina'uquejlo. Uncá ina'uqué liyaje hue'epícanami calé ricá, nu'umá yucuna najló.

<sup>12</sup> Uncá ina'uqué calé i'imari riyucuna nojló i'imacá. Uncá caja na calé jehuíña'atari nucá rinacu i'imacá. Jesucristo ja'apiyá calé i'imari riyucuna nojló, nuhue'epícaloje ricá raú penaje.

<sup>13</sup> Caja ihue'epí méqueca nula'ajica i'imajica, judíona puráca'alo ja'apiyá nu'umaqué huacajé. Caja ihue'epí chapú huani nula'ajica Jesucristo ja'apiyá jema'ajeño. Nuhuátaque nacapichátacana i'imajica rihuacajé.

<sup>14</sup> Judíona puráca'alo ja'apiyá nu'umaqué huacajé, nuchá'ataque ajopana nojena. Nucá que caja phíyu'uque i'imacáño nuchá'atacarena caja. Huachí'inami chuna puráca'alomija nuhue'epique nutucumó. Ajopana chaje nu'ujnatájica richuhuaja ricá. Marí caje aú nuchá'atajica ajopana i'imajica.

<sup>15</sup> Tupana i'ihuapari rijluhua nucá, nula'acáloje rihuacára'aca que nacaje penaje. Uncá chiyó nomoto'ó, ri'ihuapá nucá rijluhua, íqui'ija rihuátacale nucá. E nuphá nonó chojé rijló, ri'ihuapacáloje rijluhua nucá ajopana ina'uqué e'iyayá penaje.

<sup>16</sup> Aú rila'á nupechu palá, nuhue'epícaloje mecajeca Ri'irí i'imacá raú penaje, nu'umacáloje riyucuna ajopánajlo, ajopánajlo que penaje. Uncá judíona naquiyánajlo calé nu'umá riyucuna. Marí que rila'acá nupechu huacajé, uncá nupura'aló ajopana ina'uqué hua'até rinacu.

<sup>17</sup> Uncá caja nu'ujnalá Jerusalén ejo, ajopana Jesucristo huacára'acarena amaje. Nupiyá ne'emá Jesucristo huacára'acarena i'imacá. Pamineco nu'ujná Arabia te'eré ejo i'imacá, Tupana jehuíña'atacaloje nucá palá re meñaru chu penaje. Ejomi nupa'ó piño nopumí chuhua Damasco ejo.

<sup>18</sup> Hueje quele jarechí ja'apaca ejomi nu'ujná Jerusalén ejo Pedro amaje. Iyamá sápacaje quetánaja nu'umacá rijhua'até i'imacá.

<sup>19</sup> Necaja calé nomá: Pedro, Santiago, Hue'emacana Jesús meremi, queleja nomá i'imacá. Ajopana Jesucristo huacára'acarena naquiyana uncá nomala i'imacá.

<sup>20</sup> Tupana ijló chuhuaaja nulana'á ijlo marí que papera chojé me'etení. Quehuaca numacare nacú.

<sup>21</sup> Nu'umá Jerusalén e mequetánaja. Ejomi nu'ujná Siria te'eré ejo. Ejomi no'opá piño Cilicia te'eré ejo.

<sup>22</sup> Jesucristo ja'apiyá jema'ajeño, Judea te'eré ehua'á i'imacaño, uncá namána'apa calé nucá.

<sup>23</sup> Marí que yucu i'imacá rehua: "Rica Pablo la'aqueri huanacuyana chapú i'imajja, hue'emajícale Jesucristo ja'apiyá jema'ajeño. E'iyonaja chuhuaaca ricá penájemí i'imari Jesucristo yucuna i'imacana nacú rehua'á najlo. Méqueca iná pechu i'imacá caphí Jesucristo chojé yucuna ri'imá najlo. Rica puráca'aloji rihuátacare apichátacana i'imacá, yucuna i'imajeri ricá me'etení," que nemacá nunacu rehua'á i'imacá.

<sup>24</sup> Aú palá napura'acó Tupana nacú, rapiyácacale nupechu i'imacá.

## 2

### *San Pablo i'ijnacá Jesucristo huacára'acarena amaje yucuna marí:*

<sup>1</sup> Catorce jarechí ja'apari i'imacá. Ejomi nu'ujná piño Jerusalén ejo Bernabé hua'até. Nuhua'á caja Tito nujhua'ató i'imacá.

<sup>2</sup> Tupana quemari nojló, nu'ujnacáloje rejo penaje. Aú nu'ujná rejo. Jerusalén e huahuacó najhua'até i'imacá. Jesucristo ja'apiyá jema'ajeño huacára'ajeño naquiyana hua'até huahuacó i'imacá. Huecámica queja huahuacaco najhua'até. Rihuacajé nu'umá najló riyucuna, nahue'epícaloje raú méqueca nu'umacá ajopánajlo riyucuna. Tupana i'imataca ina'uqué capichácajo liyá yucuna nu'umá ajopánajlo; uncá judíona calé necá. Numá najlo méqueca nu'umacá riyucuna najlo, nuhue'epícaloje méquecablo i'ijnacá Jesucristo huacára'acarena amaje yucuna marí: a najlo ricá penaje. Tupana puráca'alo no'opátacare ajopánajlo, uncá nuhuátala ri'imacá majopéjari que najlo, Jesucristo ja'apiyá jema'ajeño huacára'ajeñojlo. Ñaquele nu'umá najlo riyucuna.

<sup>3</sup> Tito i'imari caja nujhua'até. Griégona naquiyana ricá; uncá judíona naquiyana calé ricá. Ñaquele mamata'acánu richinuma i'imacá. E'iyonaja uncá nahuacára'ala richinuma mata'acana.

<sup>4</sup> Uncáquela ajopana achíñana i'imalajla re, uncá huapura'alojla rinacu. E'iyonaja calé re achíñana rehua; uncá Jesucristo hua'atéjena calé necá. Majopeja nala'acá nanacuhua Jesucristo ja'apiyá jema'ajeño que. Nahuacono huanacuyana hua'até re. Raú uncá iná hue'epila mecajenaca ne'emacá. Uncá júpichumi, puhuichani puráca'aloji ja'apiyá calé huecá; Jesucristo ja'apiyá jema'ajeño. Nahue'epícaloje riyucúnaja penaje calé nahuacaco najhua'até. Necá ta quemáño huajlo, hua'acáloje huanacójó jupichumi puráca'aloji penaje. Raú nahuata hua'apátacana Jesucristo puráca'alo chiyá puhuichani chojé.

<sup>5</sup> Uncá huani hua'alá huanacójó napuráca'alo. Uncá caja huema'alá na'apiyá mequetánaja. Uncá huahuátala napichátaca ijlo quehuacaje puráca'aloji. Uncá caja nuhuátala napichátaca ajopánajlo ricá ñaque' caja. Tupana i'imatari ina'uqué capichácajo liyá caphí Jesucristo chojé i'imacana aú. Uncá huahuátala napichátaca iliyá riyucuna.

<sup>6</sup> Re ina'uqué rehua, nahuacára'ajeño que najlo necá. Palá caja ajopana pechu nanacu rehua. E'iyonaja uncá ñaque' calé nupechu nanacu. Uncá na penaje calé nojló méqueca ajopana pechu i'imacá nanacu. Pajimátoja Tupana hue'epica mecajenaca ina'uqué. Necá nahuacára'ajeño que i'imacaño quemáño nojló nacaje nacú i'imacá. Caja nuhue'epícare ri'imacá. Uncá caja nemalá nojló huajé puráca'aloji nacú.

<sup>7</sup> Nahue'epí Tupana a'acá nucá, nu'umacáloje Tupana calé nupechu nanacu. Uncá na penaje calé nojló méqueca ajopana pechu i'imacá nanacu. Pajimátoja Tupana hue'e caja Tupana a'acá nucá, nu'umacáloje riyucuna ajopánajlo, uncá judíona naquiyana calejlo penaje. Nahue'epí caja Tupana a'acá Pedro i'imacá, ri'imacáloje riyucuna judíonajlo penaje. Nahue'epí Tupana a'acá Pedro que caja ra'acá nu'umacá.



<sup>8</sup> Tupana a'arí Pedro, Jesucristo huacára'acaloje ricá riyucuna i'imajé judiónajlo penaje. Ricaja caja, Tupana, a'arí nucá riyucuna i'imajeri penaje. Ajopánajlo, uncá judíona calejlo, nu'umá riyucuna.

<sup>9</sup> Santiago, Pedro, Juan, quele hue'epiño ricá penaje Tupana a'acá nu'umacá. Jesucristo ja'apiyá jema'ajeño huacára'ajeño necá rehuá. Nahue'epí riyucuna i'imajeño caja nucá Bernabé hua'até. Palani najló marí: Huecá i'imaño riyucuna ajopana ina'uquejlo; eyá necá i'imaño Tupana yucuna judiónajlo. Marí caje nacú huapura'ó pajhua'atéchaca i'imacá, huahue'epícaloje méqueca riyucuna i'imacana ajopánajlo penaje.

<sup>10</sup> Nemá huajló, hua'acáloje camu'ují la'acaño ñaté nacaje aú penaje. Nanaquiya, Judea te'eré ehuájena, nemá nacú huajló i'imacá. Ricaja calé nemá nacú huajló, huala'acáloje penaje. Mahuó nula'acá nocó, no'ocáloje camu'ují la'acaño ñaté penaje. Nahucára'aca que nuhuátaca ñahté a'acana.

*Antioquía e Pablo aca'acá Pedro yucuna marí:*

<sup>11</sup> Pedro iphari Antioquía ejo i'imacá. Re ri'imacá huacajé noca'á ri'imacá ajopana ina'uqué jimaje. Uncá rila'alá palá, jimaje noca'á ri'imacá.

<sup>12</sup> Marí que rila'acá chona noca'á ri'imacá: Hue'emacá re huacajé ina'uqué iphaño huanacu i'imacá. Santiago huacára'acarena ne'emacá. Uncá chiyó nephá Pedro nacú, rajñá ra'ajnehuá ajopana ina'uqué hua'até. Uncá judíona calé ne'emacá, hua'até rajñá ra'ajnehuá. Caja nephá rejo. Ejéchami uncá rajñala ra'ajnehuá najhua'até, rihuó la'acole na'apejé. Santiago huacára'acarena ja'apejé rihuó la'aró. Jesucristo ja'apiyá jema'ajeño ne'emacá; e'iyonaja uncá nayurila Moisesmi chu puráca'alomi ja'apiyá i'imacana. Uncá paala najló na'ajnehuá ajñacana uncá judíona calé i'imacaño hua'até.

<sup>13</sup> Pedro huo la'acole na'apejé, pachá uncá rila'alá palá rihue'epica que. Ajopana rehuá i'imacaño la'año ñaque caja rápumi chu. Jesucristo ja'apiyá jema'ajeño ne'emacá; judíona naquiya caja ne'emacá. Nanacojé Bernabé quero'oró caja najhua'até.

<sup>14</sup> Jesucristo puráca'alo jehuíña'atari ina'uqué palá nacaje nacú. Nomá uncá nala'alá palani puráca'aloi quemacá que. Aú numá Pédrojlo marí que jahuacájeño jimaje: "Judíona naquiya picá. E'iyonaja piyurí piliyó napuráca'alo a'acana pinacojó. Ajopana hua'até picá necá que caja; napechu que caja pipechu najhua'até. Uncá caja judíona puráca'alo ja'apiyá calé picá. Eta, ¿Naje ta pihuata ajopana i'imacá judíona puráca'alo ja'apiyá?" que numacá rijló i'imacá.

*Caphí iná pechu i'imacá aú Jesucristo chojé Tupana i'imatari iná capichácajo liyá. Ñaque caja ricá piyuqueja ina'uquejlo. Marí riyucuna:*

<sup>15</sup> Numá piño rijló: "Huecá moto'oño judíona penájena. Uncá ajopana que calé huecá. Huecá hue'epiño Tupana puráca'alo nacojé, Moisesmi chu lana'acare i'imacá.

<sup>16</sup> Huecá judíona, Jesucristo ja'apiyá jema'ajeño, numá nacú. Huahue'epí uncá iná i'imalá lamára'ataquejami que Tupánajlo Moisesmi chu puráca'alomi aú. Uncá lamára'ataquejanami que calé rijló ina'uqué pu'uhuaré nala'acare liyá raú. Caphí iná pechu i'imacá aú Jesucristo chojé, Tupana lamára'atari rijluhua iná, pu'uhuaré iná la'acare liyá. Huapechu caja i'imari caphí Jesucristo chojé. Raú Tupana lamára'atari rijluhua huecá pu'uhuaré huala'acare chiyá. Raú ja calé lamára'ataquejanami que huecá Tupánajlo. Uncá Moisesmi chu puráca'alomi ja'apiyá i'imacana aú calé palani huecá Tupánajlo. Uncá huani Tupana lamára'atala rijluhua iná, pu'uhuaré iná la'acare liyá raú.

<sup>17</sup> Huecá, judíona, huátáño caja Tupana lamára'ataca huecá pu'uhuaré huala'acare liyá. Aú calé caphí huapechu Jesucristo chojé. Raú huahue'epí pu'uhuaré la'acaño caja huecá; ajopana i'imacá que caja huecá; uncá Jesucristo pachá calé pu'uhuaré la'ajeño huecá. Uncá huani ripachá calé.

<sup>18</sup> Marí que numacá ina'uquejlo: "Moisesmi chu puráca'alomi ja'apiyá jema'acana aú, uncá Tupana lamára'atala iná pu'uhuaré iná la'acare liyá. Eyá me'etení numaqueja piño apojó najló marí que: "Ra'apiyá jema'acana aú, Tupana lamára'atari iná rijluhua pu'uhuaré iná la'acare liyá. Marí que numaqueja rinacu, pu'uhuaré la'ajeri nu'umacajla raú. Uncá pachá nu'umalajla najló palá riyucuna, pu'uhuaré la'ajeri nu'umacajla.

<sup>19</sup> Nuhue'epí Tupana puráca'alo, Moisesmi chu lana'acare nacojé. Ñaquele nuhue'epí uncá meño'ojó Tupana lamára'atala iná pu'uhuaré iná la'acare liyá ra'apiyá jema'acana aú. Nuhue'epí lamára'ataquejami que iná Tupánajlo, iná pechu i'imacá aú caphí Jesucristo chojé. Marí que la'ajeri iná i'imacachu, iná la'á Tupana huátaca que.

<sup>20</sup> Jesucristo taca'arí nuchaya a'ahuaná apiyácanami nacú i'imacá, ri'imatácaloje nucá pu'uhuaré nula'acare liyá penaje. Ñaquele chuhua uncá nu'umalá pu'uhuaré la'ajeri júpimi nu'umacá que. Palá la'ajeri nucá me'etení. Uncá nocó calé nula'acá palá Tupana huátaca

que. Ri'irí Jesucristo palamane aú nula'á palá. Ricá huátari nucá íqui'íja. Aú ritaca'á nuchaya i'ímacá. Caphí nupechu richojé. Aú nula'á nacaje Ripecthu ja'apiyá que.

<sup>21</sup> Uncá nuhuátala nacaje palani huani Tupana la'acare huajló la'acana majopéjari queja. Iná i'ímaquela lamára'ataquejami que Tupánajlo, Moisesmi chu puráca'alomi ja'apiyá i'ímacana aú, uncá na penaje calé Jesucristo taca'arijla huachaya i'ímacá.

### 3

*Tupana lamá'atari rijluhua ina'uqué pu'uhuaré nala'acare liyá, napechu i'ímacachu caphí Jesucristo chojé. Nayurícale naliyó riyucuna, Pablo aca'arí necá. Riyucuna mari:*

<sup>1</sup> ¡Meque mapéchuruna huani icá, Galacia e i'ímacaño! ¿Na ca'ajná pajlari ijhua'até, iyurícaloje quehuácaje puráca'aloji ja'apiyá i'ímacana penaje? Hue'emacá ijhua'até huacajé, hue'emá richuhuaja riyucuna ijlo i'ímacá. Caja nu'umá ijlo riyucuna i'ímacá, na penájeca nacúhua'ataca Jesucristo a'ahuaná apiyácanami nacojé.

<sup>2</sup> Tupana i'imatari ina'uqué capichácajo liyá Jesucristo palamane aú. Ica jema'año ra'apiyá i'ímacá; raú ra'á ijlo Ripecthu. Uncá Tupana a'alá ijlo Ripecthu, i'ímacale Moisesmi chu puráca'alomi ja'apiyá. Imá nojló méqueca ipecthu nacú ricá.

<sup>3</sup> ¡Meque uncá huani ta ipecthu i'ímalá ijlo! Huajé iqueño'ojica Jesucristo ja'apiyá jema'acana huacajé, Tupana Pechu ja'apiyá que ila'ajica nacaje; Tupana huátaca que caja ila'ajica nacaje raú. ¿Chuhua chi ihuátaca nacaje la'acana ipecthu queja, iqueño'ocare la'acana Tupana Pechu aú?

<sup>4</sup> Tupana Pechu ja'apiyá jema'acana aú ila'á cajrú nacaje palani rehuá i'ímacá. ¿Majopeja chí ijlo me'etení nacaje ila'acare raú i'ímacá?

<sup>5</sup> Tupana a'arí ijlo Ripecthu i'ímacá. Ripecthu aú inaquiyana la'año e iyohuá nacaje palani i'ímacá, uncá meño'ojó iná la'alare caje. Ra'apiyá jema'ajeño i'ímacale rihuacajé, ila'á nacaje palani ra'apiyá que i'ímacá. ¿Meque ca'ajná ijlo mari que i'ímacana me'etení? Uncá Tupana Pechu a'alá Moisesmi chu puráca'alomi ja'apiyá i'ímacaño ñatá, nala'acáloje palá ñaque caja penaje. Jesucristo palamane aú ja calé Tupana i'imatari ina'uqué capichácajo liyá. Jesucristo ja'apiyá i'ímacana aú ri'imatá iná.

<sup>6</sup> Abrahami chu pechu i'ímari caja caphí Tupana chojé i'ímacá. Raú ja Tupana quemari rinacú mari que i'ímacá: "Caja nulamára'atacare ricá pu'uhuaré rila'acare liyá."

<sup>7</sup> Ihue'epí mari: Caphí Tupana chojé péchuruna, Abrahami chu naquiyánami necá. Lamára'ataquejami que necá Tupánajlo.

<sup>8</sup> Chuhuaca mari que caja ricá ajopana ina'uquejlo, uncá judiona calé necá. Tupana lamára'atari rijluhua necá caphí napechu i'ímacá aú Jesucristo chojé. Uncá chiyó ri'ímá najló mari que, Tupana hue'epiri caja queja ri'ímajica najló. Ñaquele rihuacára'a nalana'acá riyucuna papera chojé. Ya'ajná i'ímajícañojlo penaje nalana'á ri'ímacá. Mari que ripuráca'alo lana'aquejami quemacá: Tupana quemari Abrahami chujlo mari que i'ímacá: 'Pilaquemi palamane calé nula'ajé palá huani piyuqueja ajopana ina'uqué.'

<sup>9</sup> Abrahami chu pechu i'ímari caphí richojé. Aú Tupana la'arí rinacu palá i'ímacá. Ñaque caja rila'acá palá caphí péchuruna richojé piyuqueja.

<sup>10</sup> Re ina'uqué, Moisesmi chu puráca'alomi ja'apiyá i'ímacaño necá. Raú nahuata necó lamára'atacana Tupánajlo pu'uhuaré nala'acare liyá. Mari que nala'acale namaje Tupana huajáica necá. Tupana puráca'alo lana'aquejami quemari mari que nanacu: "Uncachu iná la'alá richuhuaja huani Moisesmi chu puráca'alomi quemacá que, Tupana huajájeri iná. Iná capichajo Tupana liyá raú," que rimacá nanacu.

<sup>11</sup> Mari caje aú iná hue'epí palá huani uncá na calé Tupana lamára'ataca rijluhua, Moisesmi chu puráca'alomi ja'apiyá i'ímacana aú. Mari que ricá, Tupana puráca'alo lana'aquejami quemacale mari que: "Caphí iná pechu i'ímacachu Tupana chojé, Tupana lamára'atari iná pu'uhuaré iná la'acare liyá. Raú ja calé iná i'ímajica matajnaco Tupana hua'até."

<sup>12</sup> Re ca'ajná ina'uqué, nahuata Moisesmi chu puráca'alomi ja'apiyá i'ímacana. Raú ja nahuata necó i'imatácana capichácajo liyá. Uncá napechu i'ímalá caphí Tupana chojé, ne'emacóloje capichácajo liyá ripalamane aú penaje. Tupana puráca'alo lana'aquejami quemacá que caja najló ricá. Mari que rimacá: "La'arí richuhuaja piyuqueja Moisesmi chu puráca'alomi quemacá que, ricaja calé i'ímajeri matajnaco je'echú chu Tupana hua'até."

<sup>13</sup> Uncá la'alaño Moisesmi chu puráca'alomi quemacá que, amájeño Tupana huajáica necá yajhué. Jesucristo ja calé i'imatari huacá huahuajácana liyá. Huachaya penaje Jesucristo amari rihuajaca ricá yajhué i'ímacá. Mari que Tupana puráca'alo lana'aquejami quemacá: "Cúhua'aro a'ahuaná apiyácanami nacú amari Tupana huajaca ricá yajhué." Mari que Jesucristo amaca rihuajaca ricá yajhué huajló penaje i'ímacá.

<sup>14</sup> Tupana lamára'atari rijlhuua Abrahami chu pu'uhuaré rila'acare liyá, ripechu i'imacale caphí richojé. Ri'imacáloje ñaqueé caja uncá judiona calejlo penaje, Jesucristo amari Tupana huajaca ricá yajhué huachaya penaje. Caphí Jesucristo chojé iná pechu i'imacá aú, Tupana a'arí inajlo Ripechu, que Tupana quemacá huanacu i'imacá.

*Nacaje Tupana quemacare nacú júpimi que yucuna marí:*

<sup>15</sup> Nojena, chuhua numájica ijlo nacaje ihue'epícare nacú, ihue'epícaloje palá numacare nacú raú penaje. Apala iyamá ina'uqué la'año nacaje pajlocaca, contrato caje. Nayá'ata neí hua lana'aquejami ja'apejé. Ejomi uncá meño'ojó napiyácala ricá. Uncá caja iná yá'atala re'iyajé piño apú puráca'aloji. Uncá caja iná ca'alá rinaquiiana.

<sup>16</sup> Chuhua jema'á, Tupana quemari Abrahami chujlo marí que i'imacá: "Nupalamane aú pi'imajé palá huani. Nupalamane aú ja caja pilaquemi i'imajeri palá huani," que rimacá. Uncá Tupana puráca'alo lana'aquejami quemalá marí que: "Nupalamane aú ja caja rilaquénami i'imajeño palá huani." Uncá rimalá marí que. Rilaquemi, pajluhuaja nacuja calé rimá. Uncá rimalá cajrú ina'uqué nacú. Pajluhuaja nacuja calé rimá; Jesucristo ricá rimacare nacú.

<sup>17</sup> Ñaquele numá marí que: Caja Tupana quemari ina'uqué nacú: "Nu'umataje caphí péchuruna nochojé capichácajo liyá." Abrahami chujlo rimá ñaqueé caja júpimi que i'imacá. Ejomi cuatrocientos treinta jarechí quetana ja'apari i'imacá. Ejéchami Tupana huacára'aca Moisesmi chu lana'acá ripuráca'alo, ina'uqué i'imacáloje ra'apiyá penaje. Ñaquele nacaje rimacare nacú Abrahami chujlo i'imacá, uncá meño'ojó rapiyácacana i'imalá. Caja Tupana la'arí contrato caje Abrahami chu hua'até i'imacá.

<sup>18</sup> Tupana a'arí nacaje Abrahami chujlo i'imacá, rarucácale rijllo ri'imacá. Majopeja ra'acá rijllo ricá. Tupana i'imatáquela huecá capichácajo liyá Moisesmi chu puráca'alomí ja'apiyá i'imacana aú, caja queja ri'imacajla huajllo. Uncá na penaje calé rarucajla huajllo hue'ematácana capichácajo liyá.

<sup>19</sup> Apala imá rinacu marí que: "Eta, ¿na penájica Tupana puráca'alo, Moisesmi chu lana'acare i'imacá?" que ca'ajná imájica. Marí penaje ricá: Huahue'epícaloje pu'uhuaré huala'acare, huamanaicho huala'acare nacojé raú penaje ricá. Iná hue'epícaloje raú capichácajo penaje Tupana liyá iná, pu'uhuaré iná la'acare pachá. Penaje Tupana puráca'alo, Moisesmi chu lana'acare. Ricá yuriro ina'uquejlo penaje i'imacá; Jesucristo queño'ocá eja'ahuá chu i'imacana ejená riyurico najllo i'imacá. Jesucristo nacú Tupana quemari Abrahami chujlo i'imacá: "Ripalamane aú numaje cajrú ina'uqué nacú: 'Caja lamára'ataquejami que necá nojllo. Uncá nuhuajálaje necá, caphí péchuruna ne'emacale Jesucristo chojé.'" Marí que rarucaca ijlo ricá ina'uqué i'imatájeri penaje. Ricó rimacá rijllo rinacu. Eyá Tupana puráca'alo Moisesmi chu lana'acare i'imacá, marí que riphaca najllo: Tupana hua'atéjena, je'echú chu i'imacaño, ja'apátaño rijllo ricá. Na'apiyá que Moisesmi chu ja'apátaca ina'uquejlo ri'imacá.

<sup>20</sup> Eyá nacaje Tupana arucácare Abrahami chujlo i'imacá, rarucá rijllo ricó ricá. Uncá rihuacára'ala rijhuua'atéjena, je'echú chiyájena, arucaca rijllo ricá. Uncá caja ri'imalá apujlo riyucuna, ra'apátacaloje ricá penaje. Ricó rarucaca Abrahami chujlo apú ina'uqué, ri'imatácaloje ina'uqué capichácajo liyá penaje.

*Tupana puráca'alo, Moisesmi chu lana'acare yucuna marí:*

<sup>21</sup> Apala ipechu i'imá nacaje Tupana arucácare nacú: "Uncá ripuráca'alo chuhua calé ricá ra'acare Moisesmi chujlo," que ca'ajná ipechu i'imacajla rinacu. E'iyonaja uncá apojó calé ricá. Pajluhuaja chuhua ripuráca'alo. Uncá meño'ojó Tupana puráca'alo lana'aquejami huacára'alajla iná la'acá nacaje, iná i'imacáloje matajnaco raú je'echú chu penaje. Rihuacára'auela iná i'imacá matajnaco, Tupana lamára'atarijla iná pu'uhuaré iná la'acare liyá ra'apiyá jema'acana aú.

<sup>22</sup> E'iyonaja Tupana puráca'alo lana'aquejami quemari piyuqueja ina'uqué nacú: "Pu'uhuaré la'ajeño necá. Nachuujájenaja necá pu'uhuaré la'ajeño. Uncá caja meño'ojó nácho'olo richiyá," que rimacá piyuqueja ina'uqué nacú. Marí que ri'imacale Tupana quemari ina'uqué nacú: "Nuhuacára'aje Jesucristo ne'ematájeri penaje," que rimacá rinacu uncá chiyó riphá majó i'imacá. Ñaquele caphí péchuruna richojé i'imacaño, ri'imatá capichácajo liyá.

<sup>23</sup> Uncá chiyó Jesucristo iphari majó i'imacá, uncá meño'ojó ina'uqué pechu i'imalá caphí richojé ne'ematájeri penaje. Uncá chiyó riphá, Tupana puráca'alo, Moisesmi chu lana'acare, ja'apiyá hue'emaqué. Capichájeño Tupana liyá penájena piyuqueja ina'uqué, uncale nala'alá rimacá que. Ra'apiyaja hue'emaqué a'ajná Jesucristo iphaca majó i'imacá ejená. Ejéchami ina'uqué i'imatájeri i'imacá huajloje penaje, huapechu i'imacáloje richojé caphí penaje.

<sup>24</sup> Tupana puráca'alo, Moisesmi chu lana'acare, yuriro ina'uquejlo, rehuíña'atacaloje huecá Tupana nacú penaje. Ricaja calé yuriro huajló Jesucristo iphaca majó ejená. Pumí chojé Jesucristo yuriro ina'uquejlo, napechu i'imacáloje caphí richojé penaje, ril-amára'atacaloje iná pu'uhuaré iná la'acare liyá, iná manaicho iná la'acare liyá penaje.

<sup>25</sup> Caja Tupana a'arí huajló pu'uhucacajé Jesucristo, huapechu i'imacáloje caphí richojé penaje. Ñaquele chuhua uncá na penaje calé Tupana puráca'alo, Moisesmi chu lana'acare. Ricá i'imari huehuíña'atajeri que huajló i'imacá.

<sup>26</sup> Caphí iná pechu i'imacá aú Jesucristo chojé, iná i'imá Tupana yaní naquiayana.

<sup>27</sup> Nala'á icá bautizar i'imacá, a'acale icó Jesucristojlo i'imacá. Icó a'año icó rijló, i'imacáloje rijhua'atéjena penaje, ipechu i'imacáloje ripechu que caja nacaje la'acana nacú.

<sup>28</sup> Piyuque Jesucristo pechu chuhua i'imacaño i'imaño pajluhua japi necá queja Tupánajlo. Uncá ajopana, ajopana que calé rijló necá. Rejenohuaja rijló judíona, uncá judíona calé, quele. Rejenohuaja caja rijló najluhua sápageño, ajopana hua'até sápageño, quele. Rejenohuaja caja rijló achiñana, inaana, quele. Pajluhua japi necá queja rijló necá piyuqueja.

<sup>29</sup> Jesucristo hua'atéjena hue'emacachu, caja lamára'ataquejanami que Tupánajlo huecá raú. Abrahami chu laquénami queja caja huecá, Jesucristo hua'atéjena. Nacaje Tupana quemacare nacú rijló i'imacá, yuriro huajló, rila'acáloje huecá palá raú penaje.

#### 4

<sup>1</sup> Marí nacú nuhuata quemacana: Re ca'ajná pajluhuaja yuhuaij. Richi'inami chuna tajnaño ca'ajná riliyá i'imacá. Raú rara'apami chu nánemi yuriro ri'irímijlo, ri'imacáloje paminá penaje. E'iyonaja uncá na'alá rijló nacaje yuhuaij ri'imacá huacajé. Re ca'ajná rijipiture. Sápari riñacaremi chiyá. Uncá rihuacára'ajeri calé yuhuaij, paminá penaje ri'imacá e'iyonaja.

<sup>2</sup> Yuhuaij ri'imacá quetana, re rilamára'ajeño. Na'á nanacajó ricá ra'apaca yuhuaij caje chiyá ejená. Marí que rijló ricá riphaca rená chojé ejená, rara'apami chu nánemi yurícolaje rijló reyá a'ajná ño'ojó penaje. Riphaca aú rená chojé nacaje yuriro rijló. Ñaqueé caja huajló ricá.

<sup>3</sup> Uncá chiyó Jesucristo iphá, ñaqueé caja ri'imacá huajló. Huecá caja i'imaño ajopana puráca'alomi ja'apiyá. Yuhuaná que caja hue'emacá Tupana nacajé hue'epícana nacú rihuacajé i'imacá. Nacaje i'imari huajló penaje, uncá yuriro huajló rihuacajé.

<sup>4</sup> E'iyonaja riphaca aú rená chojé, Tupana huacára'ari huajló Ri'irí majó marí eja'ahuá chojé i'imacá. Maare ramó ralojlo i'imacá. Ina'uqué ri'imacá huecá que caja. Ajopana judíona i'imacá que caja ri'imacá Moisesmi chu puráca'alomi ja'apiyá.

<sup>5</sup> Ri'imatácaloje ra'apiyá i'imacaño capichácajo liyá penaje riphá majó i'imacá. Capichácajo liyá hue'ematácana aú Tupana a'acá huecá riyani penaje.

<sup>6</sup> Ñaquele Tupana a'arí huajló Ripechu, huahue'epícaloje Tupana yaní huecá raú penaje. Tupana Pechu quemari huajló rinacu. Aú huemá Tupana nacú pajluhuano, pajluhuano que: "Nora'apá ricá" que.

<sup>7</sup> Ñaquele chuhua uncá apú hua'até sápageji que calé iná. Ri'irí iná me'etení Jesucristo palamane. Ri'irí iná i'imacale, Tupana yuriri inajlo piyuque nacaje.

*Pablo huo ca'acó najhua'até yucuna marí:*

<sup>8</sup> Uncá chiyó ihue'epí Tupana nacajé, icá i'imaño majopeja ajopana hua'até sápageño queja. Marí que i'imacá, ajopana i'imacale ichi'ináricana ijlo. Uncá ichi'ináricana huani calé ne'emacá; majopeja ipechu i'imajica nanacu: "Huachi'ináricana japi necá" que. Ihuacára'ajeño queja ne'emacá ijlo.

<sup>9</sup> Chuhua iqueño'ó Tupana hue'epícana, ihue'epícaloje mecajeca ricá penaje. Uncá icá calé queño'oño rihue'epícana. Tupana, ricaja calé hue'epiri icá pamineco, ra'acáloje icá riyani penaje. Eta, ¿na penaje ta ihuata piño majopéjari puráca'aloji ja'apiyá i'imacana? Uncá na penaje calé inajlo ilé caje puráca'aloji. Uncá iná i'imaló capichácajo liyá ra'apiyá i'imacana aú. ¿Chuhua chi ihuátaca richojé pa'acano, i'imacáloje majopéjaruna penaje? Majopeja sápageño queja caja ihuátaca i'imacaje.

<sup>10</sup> ¡Pa! Marí que ila'acá uncá paala. Icó a'año inacajó cajrú fiesta. Pajluhuaja jarechí e'iyá pajluhuata queri quetana a'acá inacajó ricá. Nacaje iphaca rená chojé que, icá a'año inacajó ricá. Ñaqueé caja a'acá jarechí naquiayana inacajó. Marí que a'acá fiesta inacajó ipechu i'imacale: Marí que iná la'acá, iná pechu i'imacáloje palani Tupánajlo penaje.

<sup>11</sup> Caja ila'á nupechu ujhui iliyá. Caja ila'á ijluhua pajlácaje queja ricá nohuíña'atacare icá Tupana nacú i'imacá. Marí caje la'arí ujhui nupechu iliyá.

<sup>12</sup> Nojena, ila'á ipéchuhua nupechu que caja Jesucristo nacú. Júpimi uncá i'imalá Moisesmi chu puráca'alomi ja'apiyá. Nucá, uncá caja i'imalá ra'apiyá. Raú nula'á nocó ipechu que caja i'imagá. Ica' a'año nuñaté nu'umaqué ijhua'até huacajé.

<sup>13</sup> Huajé nuqueño'ocá inacu iphácana huacajé nutami nu'umacá. Ñaqueja hua'ateja nu'umá Tupana yucuna ijló. Ri'imataca ina'uqué capichácajo liyá yucuna nu'umá ijló i'imagá.

<sup>14</sup> Nutami nu'umacá rihuacajé. E'iyonaja nohuíña'ata i'imagá. Nutami caje cahuíla'ari inacu. E'iyonaja uncá ipechu i'imalá nunacu "Meque apú caje huani ricá" que. Ihuátacare nu'umacá. Tupana hua'ateje, je'echú chiyaje, ihuátajla queja caja ihuátaca nu'umacá. Jesucristo que nu'umaquela, ñaque caje ihuátacajla nucá rihuacajé.

<sup>15</sup> Palá ipechu i'imagá nunacu rihuacajé. Eta, ¿nata ca'ajná ca'arí icá nuliya? Nuhue'epí nu'umaqué ijhua'até huacajé, palani ca'ajná ri'imacajla ijló nujlú apiyácacana ijlú aú, nutami nu'umacale nujlú chiyá. Iná la'aquela marí que, ila'ájla nojló ricá, palá huani ipechu i'imagale nunacu.

<sup>16</sup> Apala chuhuaca chapú ipechu nunacu, numacale ijló nacaje nacú uncá ila'alare palá. Quehuaca numacá.

<sup>17</sup> Re ajopana ijhua'até me'etení. Jehuíña'ataño icá. Palá ne'emacá ijhua'até majopeja, a'acá piyá inacojó nupuráca'alo. Palá nala'acá napéchuhua ijló, pu'ují ipechu i'imagáloje nanacu raú penaje. E'iyonaja uncá paala ricá nehuíña'atacare nacú. Uncá paala ijló quele, uncale ri'imalá Jesucristo puráca'alo chuhua.

<sup>18</sup> Ina'uqué la'acachu napéchuhua pu'ují ijló, nala'acáloje icá palá raú penaje, palani jo'ó cari. Apala nala'á icá palá nu'umacá ijhua'até quietana. Eyá uncá nu'umalá ijhua'até huacajé uncá ñaque calé nala'acá icá palá. Marí uncá paala.

<sup>19</sup> Nojena, inaana amaño quehuini yajhué, nahuá'aca nayani huacajé. Najña'á quehuini yajhué panacu namaco najló ejená. Inanaru pechu i'imagá que ru'urí huá'acana huacajé, que caja nupechu i'imagá ijhua'até. Uncá paala ila'acá me'etení. Marí caje nujña'á panacu ipechu i'imagica Jesucristo pechu chuhua piño ejená.

<sup>20</sup> Palánijla nojló, nu'umaquela ijhua'até me'etení, nupura'acáloje ijhua'até penaje. Uncá nuhue'epíljla méqueca quemacana inacu maare eyá.

*Pablo i'imari Agarmi cholo, Sárami cholo, quele yucuna najló, rehuíña'atacaloje necá Tupana puráca'alo nacú raú penaje.*

<sup>21</sup> E'iyajena huátaño Tupana puráca'alo, Moisesmi chu lana'acare, ja'apiyá i'imagana, i'imagáloje capichácajo liyá raú penaje. Ijló numá marí que: Ihue'epí ripuráca'alo nacóje, meque quemacána nacaje rimacare nacú Abrahami chujlo i'imagá.

<sup>22</sup> Marí riyucuna: Iyamá riyani i'imagá. Apú ri'irí i'imari apa'ahuelo hua'até. Ruí i'imari Agar. Rihuarúhua'a ru'umacá, rusápacaloje riñacaré chiyá mahuemiru penaje. Apú ri'irí i'imari riyajalo huani hua'até. Riyajalo í i'imari Sara. Uncá riñacaré chiyá sáapajeyo calé ru'umacá. Riyajalo huani ru'umacá.

<sup>23</sup> Pamineco ri'irí i'imari riñacaré chiyá sáapajeyo hua'até. Ripechu queja rila'acare aú ri'irí i'imari rujhua'até. Eyá ri'irí i'imari piño riyajalo huani hua'até. Ricá i'imari najló i'imagá, Tupana quemacá najló que. Aú calé ne'erí i'imagá. Peñahuilana huani ne'emacá riyajalo hua'até rihuacajé. E'iyonaja ne'erí i'imari, Tupana quemacale najló rinacu i'imagá.

<sup>24</sup> Iyamá inaana yucuna quemari caja huajló apú nacaje nacú. Agarmi cholo i'imagá queja necá, i'imaño Tupana puráca'alo ja'apiyá, Moisesmi chu lana'acare i'imagá. Mahuemiru sáapajeyo queja necá. Nayurí ajopana huacára'aca necá.

<sup>25</sup> Tupana a'arí Moisesmi chujlo ripuráca'alo i'imagá ipuré i'ihuata. Ipuré í Sinaí; Arabia te'eré nacú ricá. Ripuráca'alo ja'apiyá i'imagáño i'imaño mahuemiru sáapajeyo queja. Agarmi cholo i'imagá que caja necá. Mahuemiru sáapajeyo queja judíona ripuráca'alo ja'apiyá i'imagáño. Uncá riyani calé necá.

<sup>26</sup> Eyá huecá Jesucristo ja'apiyá jema'ajeño, i'imaño Tupana yaní que, hue'emacale Jesucristo hua'atéjena. Je'echú chiyaje ricá. Uncá hue'emalá chuhuaca puhuichani puráca'aloji ja'apiyá mahuemiru sáapajeyo que.

<sup>27</sup> Marí que Tupana puráca'alo ja'apátajerimi chu, Isaíasmi chu, lana'acá riyucuna júpimi i'imagá:

Uncá pijhua'atéjena i'imalá.

E'iyonaja pila'ajé pipéchuhua pu'ují, marí que ri'imajícale pijló.

Uncá ina'uqué huátalare pi'imagica pamineco.

E'iyonaja rejomi íqui'iruna pijhua'atéjena i'imajeño.

I'imaño jupichumi puráca'aloji ja'apiyá chaje íqui'lica pijhua'atéjena i'imagica,

que Isaíasmi chu lana'acá Jesucristo yucuna, uncá chiyó riphá eja'ahuá chojé i'imagá.

<sup>28</sup> Nojena, Tupana quemari Abrahami chujlo, ri'irí i'ímacáloje penaje. Aú ri'irí i'ímarí ñaqué. Ríí i'ímarí Isaac. Ñaqué caja hualjlo ricá. Tupana quemari ina'uqué nacú i'ímacá, ne'emacáloje riyani penaje Jesucristo ja'apiyá i'ímacana aú. Ñaquele riyani huecá, ra'apiyá jema'ajeño. Rimacá i'ímacá que huecá.

<sup>29</sup> Abrahami chu i'irí i'ímarí pamineco apa'ahuelo hua'até, rila'acale ripechu queja. Ejomi apú ri'irí i'ímarí piño riyajalo hua'até. Ricá i'ímarí Tupana quemacare nacú najló i'ímacá. Tupana Pechu palamane ri'ímacá. Yuhuaná ne'emaqué huacajé, ri'irí, ripechu queja i'ímacare, cahuíla'aque ri'ijmeremi nacú, Tupana Pechu aú i'ímacá. Ricá nacú richahuíla'aque i'ímacá. Me'etení ñaqué caja hualjlo ricá. Napechu queja la'ajeño uncá huátaloño Tupana Pechu ja'apiyá jema'ajeño.

<sup>30</sup> Marí que Tupana puráca'alo lana'aquejami quemacá Abrahami chu yaní nacú; Tupana quemari rijló: "Pácho'ota rucá, sapayo piñacaré chiyá. Ru'urí hua'até pácho'ota rucá. Uncá nacaje yurilaje rijló. Uncá piyajalo huani i'irí calé ricá, nacaje yuricaloje rijló penaje. Ñaquele pácho'ota necá iyamá raló hau'até piñacaré chiyá," que rimacá rijló.

<sup>31</sup> Nojena, ñaqué caja uncá na calé yuréjero Moisesmi chu puráca'almi ja'apiyá i'ímacáñojlo. Necá i'ímaño Abrahami chu ñacaré chiyá sápayejo i'irí i'ímacá que caja. Uncá na calé yuririo rijló i'ímacá. Eyá huecá, Jesucristo ja'apiyá jema'ajeño; Tupana yaní huecá. Piyuque nacaje rimacare nacú yuréjero huajló, hue'emacale Abrahami chu yajalo i'irí i'ímacá que caja. Rijló piyuque nacaje yuririo i'ímacá.

## 5

*Iná i'ímacá piyá majopeja sápayeri que yucuna marí:*

<sup>1</sup> Caja Jesucristo jácho'otari huecá puhuichani puráca'aloji chiyá, hue'emacáloje riliyá penaje. Ñaquele chuhua i'ímá richiyá jácho'otacanamina queja. A'aniyo piño inacojó puhuichani puráca'aloji.

<sup>2</sup> Jema'á, nucá quemájeri piño ijlo rinacu me'etení. Apala ihuata namata'acá achíñana chinuma, i'ímacáloje Tupana hua'atéjena raú penaje, i'ímacáloje capichácajo liyá raú penaje. Marí que ipechu i'ímacachu, uncá na penaje calé ijlo Jesucristo, ri'imatácaloje icá capichácajo liyá penaje.

<sup>3</sup> Marí que ipechu i'ímacachu rinacu, nuhuata marí que quemacana piño ijlo: Tupana puráca'alo Moisesmi chu lana'acare, quemari nachinuma mata'acana nacú. Ihuátajica ee namata'acá ichinuma rimacá que, ila'ajica caja pajimato ripuráca'alo quemacá que. Caja queja ijlo ricá, huátaloño ra'apiyá i'ímacana. Uncá meño'ojó ila'alá apojó ricá. Uncá pachá iná la'alá pajimato rimacá que, iná capichaco Tupana liyá.

<sup>4</sup> E'iyajena huátaloño Tupana lamára'ataca icá pu'uhuaré ila'acare liyá Moisesmi chu puráca'almi ja'apiyá i'ímacana aú. Raú ila'alá Jesucristo tejena. Uncá caja i'ímalá Tupana palamane raú.

<sup>5</sup> Huecá i'ímaño lamára'ataquejanami que Tupánajlo pu'uhuaré huala'acare liyá, caphí huapechu i'ímacale Jesucristo chojé. Ripechu ja'apiyá i'ímacana aú huala'acá rihuátaca que. Marí caje aú Tupana quemajeri huanacu: "Palá la'acaño icá" que. Que rimájica huanacu Jesucristo pa'ajico majó huacajé.

<sup>6</sup> Jesucristo hua'ateje iná i'ímacachu, uncá na penaje calé inajlo iná chinuma mata'acana ca'ajná, uncá ca'ajná. Eyá iná pechu i'ímacá aú caphí Jesucristo chojé, iná huata íqui'ija Tupana, ñaqué caja iná huátaca ajopana ina'uqué raú. Marí caje palánija.

<sup>7</sup> Icá queño'oño Jesucristo ja'apiyá jema'acana palá. ¿Na ca'ajná ca'atari e'iyajé, iyuricaloje iliyó quehuácage puráca'aloji penaje.

<sup>8</sup> Tupana i'ihuapari rijluhua icá ajopana ina'uqué e'iyayá, i'ímacáloje Jesucristo ja'apiyá jema'ajeño penaje. Uncá Tupana calé jácho'otari icá richiyá.

<sup>9</sup> Ihue'epí marí: Huejápaja pan amúra'atajona amúra'atari ño'ope harina. Ñaqué caja puráca'aloji apichátacanami jema'acó cajrú ina'uqué e'iyohuá, na'acá piyá quehuácage puráca'aloji nanacojó.

<sup>10</sup> Nuhue'epí nupechu queja caja ipechu i'ímaca numacare ijlo nacú. Jesucristo la'arí nupechu palá, nupechu huatána'acaloje inacojé penaje. Tupana huajájeri ipechu apichátajeri. Uncá meque calé Tupánajlo mecajeca ina'uqué ricá.

<sup>11</sup> Ne'iyajena quemaño ca'ajná nunacu: "Ricá caja quemari ina'uquejlo, namata'acáloje achíñana chinuma penaje," que ne'iyajena ca'ajná quemacá nunacu. Uncá nucá calé quemari ilé que. Marí que numacano najló riyucuna: A'ahuaná apiyáccacanami nacú Jesucristo taca'arí ina'uqué chaya i'ímacá. Caphí iná pechu i'ímacachu Jesucristo chojé, iná i'ímacó capichácajo liyá raú. Riyucúnaja calé nu'umá ina'uquejlo. Pu'uhuaré riyucuna judíona naquiyánajlo. Aú calé nanaquiyana la'año nucá chapú. Numaquela ina'uquejlo, namata'acáloje achíñana chinuma penaje, uncá pu'uhuaré calé riyucuna i'ímacajla najló.

Jesucristo taca'arí a'ahuaná apiyáccanami nacojé ina'uqué chaya i'imacá. Ricá yucúnaja calé nu'umá najló. Uncá paala najló ricá.

<sup>12</sup> Necá, ijhua'até i'imacaño, huátaño imata'acá achiñana chinuma. Marí caje áu naca-huúla'a inacu ilérohua. Uncá huani paala ricá. Palani ca'ajná najló nalajhuero hua'ató mata'acana.

<sup>13</sup> Nojena, Tupana i'ihuapari rijluhua icá ajopana ina'uqué e'iyayá, i'imacóloje calaca'aphé caje liyá penaje. Tupana jácho'otari icá richiyá, uncá ila'acáloje pu'uhuaré ipechu queja penaje calé. Rácho'ota icá, ihuátacaloje íqui'ija pecohuáccaca penaje ripalamane áu. Ila'acáloje nacaje palani pajlocaca raú penaje, rácho'ota icá richiyá.

<sup>14</sup> Marí que Tupana puráca'alo lana'aquejami huacára'aca iná la'acá: "Pihuata íqui'ija ajopana ina'uqué. Pihuátaca picó que caja pihuátaca necá." Metajlani áu rimá piyuque nacaje Tupana huátacare iná la'acá nacú.

<sup>15</sup> E'iyonaja uncá ñaque calé ca'ajná ijló ricá. Ica' la'año chapú pecohuáccaca. Chapú ipura'acó caja panacuhuáccaca. Camejérina i'imacá pajhua'atéchaca que caja icá pajhua'atéchaca. ¡Pa! Apichátajica pecohuáccaca.

*Iná pechu, Tupana pechu, quele yucuna marí:*

<sup>16</sup> Numá ijló: Jema'á Tupana Pechu ja'apiyá, ila'acá piyá ipechu queja raú.

<sup>17</sup> Huechi iná la'acá pu'uhuaré, uncá Tupana Pechu huátalare. Eyá palá Tupana Pechu huátacare iná la'acá, ricá iná la'á ijnú. Marí caje la'arí ipechu ají ño'ojó, ají ño'ojó que. Raú uncá meño'ojó ila'alá palá.

<sup>18</sup> Tupana Pechu i'imacachu ihuacára'ajeri, uncá Tupana puráca'alo, Moisesmi chu lana'acare, ja'apiyá i'imacaño calé icá, ila'acáloje ricá ipechu queja penaje.

<sup>19</sup> Napechu queja ina'uqué la'acá pu'uhuaré. Pu'uhuacá inajlo nacaje nala'acare. Marí que nala'acá napechu queja: Achiñana, inaana, quele la'año namanaicho pajhua'atéchaca. Nahuure caje nacuja ne'ejnatá napéchuhua, namanaicho la'ajeño ne'emacale.

<sup>20</sup> Pu'ují napechu nacaje jenami nacú, ina'uqué la'acare, ri'imacáloje najló nach'i'ináricana jenami que penaje. Napechu queja la'ajeño la'año lahuícho'ocaje, lejñácaje. Napechu i'imari caja chapú ajopana ina'uqué nacú. Naca'ácaco caja pajhua'atéchaca. Chapú caja nahuó i'imacá ajopana cha, nachá'atacale necá nacaje la'acana áu. Quiñaja nayúcha'aco. Necoja calé na'á nanacojó. Áu calé nala'á nacaje najlúhuaja. Ujhuí nala'acá napéchuhua ajopana nanaquiyana liyá. Nahuata necámica que i'imacana necá cajena hua'até. Napechu huáque'ena hua'até nahuata necami que i'imacana.

<sup>21</sup> Nacaje ajopana ina'uqué capi, nahuata caja najluhua. Nayuhuéra'o. Cajrú fiesta la'acana nacuja ne'ejnataca napéchuhua. Marí que napechu queja la'ajeño i'imacá ina'uqué e'iyohuá. Que'iyapé nala'acá piño nacaje pu'uhuaré ñaque caja. Uncá huani marí que la'acáño i'imalájeño Tupana hua'até je'echú chu. Rehuájena huacára'ajeri Tupana. Caja numá ijló rinacu i'imacá, ila'acá piyá icó pu'uhuaré la'ajeño raú. Me'etení ñaque caja numacá piño ijló rinacu.

<sup>22</sup> Eyá Tupana Pechu ja'apiyá i'imacaño la'año palá marí que Ripechu áu: Iqui'ija nahuátaca Tupana, ajopana ina'uqué hua'até. Pu'ují caja napechu Tupana nacú. Ñaquele pu'ujija napechu raú. Palánija napechu. Uncá caja nayúcha'alo quiñaja. Tupana Pechu ja'apiyá i'imacaño uncá pechu la'aló ujhuí ajopana ina'uqué liyá. Uncá caja napechu la'aló ujhuí Tupana liyá. Uncá caja nayúcha'alo ina'uqué cha, chapú nala'acá necá e'iyonaja. Ina'uqué huani necá ajopana ina'uqué hua'até. Ajopánajloje penaje nala'á nacaje palá. Pajluhuaja chuhuaja pura'acáño caja necá; ricá chuhuaja nala'á nemacá que.

<sup>23</sup> Uncá caja Tupana Pechu ja'apiyá i'imacaño la'alaño nanacuhá hue'epéjeño que huani. Mayuchérana necá. Uncá caja nala'alá nacaje napechu queja. Nahuajá napéchuhua palá la'acana nacú. Marí que ina'uqué la'acá Tupana Pechu áu ajopana ina'uqué e'iyohuá. Tupana puráca'alo, Moisesmi chu lana'acare, quemacá que caja nala'acá raú. Uncá caja pu'uhuaré la'acana i'imalá najló marí que la'acana áu.

<sup>24</sup> Jesucristo taca'arí a'ahuaná apiyáccanami nacojé i'imacá, huaca'acáloje huanaquiyó pu'uhuaré huala'acare, huamanaicho huala'acare raú penaje. Ñaquele piyuque Jesucristo hua'atájena hue'epiño nanacuhá caja taca'acáño que pu'uhuaré la'acana liyá. Marí que nahue'epica nanacuhá, nala'acá piyá pu'uhuaré, namanaicho.

<sup>25</sup> Tupana Pechu a'arí huajló cajmuchaji, hue'emacáloje hua'ajini huani je'echú chu raú penaje. Ñaquele huahuata Tupana Pechu huacára'aca huecá rihuátaca que. Huahuata piyuqueja nacaje la'acana rihuátaca que.

<sup>26</sup> Huala'aníya huanacuhá ajopana chá'atajeño que. Uncá caja huayúcha'alajo pacháccaca. Huahuó i'imaniya caja chapú ajopana ina'uqué cha, nachá'atacale huecá nacaje la'acana áu.

## 6

*Hua'acáloje pañatéchaca penaje yucuna marí:*

<sup>1</sup>Nojena, re ca'ajná inaquiayana rehuá, na'ó pu'uhuaré la'acana chojé. Tupana Pechu ja'apiyá i'imacáñojlo numá: Ja'apata naliyá pu'uhuaré nala'acare, nayurícaloje naliyó ricá penaje. I'imaniya yuríná najhua'até. Ihue'epí icó ila'acá piyá pu'uhuaré nala'acá que caja.

<sup>2</sup>Aá pañatéchaca, amácachu chapú caje yajhué, ila'acáloje palá Tupana huátaca que raú penaje. Marí que la'acana aú ila'ajé Jesucristo puráca'alo quemacá que.

<sup>3</sup>Re ca'ajná apú inaquiayana ilérohua. Ripechu i'imá ca'ajná rinacuhúa marí que: "Uncá ajopana que calé nucá. Palicha nuhue'epica palá la'acana Tupana huátaca que. Raú nuchá'ata ajopana." Marí que ripechu i'imacá ca'ajná rinacuhúa. E'iyonaja uncá quehuaca calé ripechu nacú i'imacare. Uncá ñaqué calé ricá.

<sup>4</sup>Apala iná la'á nacaje. Apú la'arí ñaqué caja ricá. Nacaje rila'acare amácana aú iná pechu i'imá ca'ajná iná nacuhúa: "Palá la'ajeri caja chi nucá." Uncá iná quemalá iná la'acare nacú, nacaje apú ina'uqué la'acare nacojé. Tupana puráca'alo lana'aquejamiya quemari nacaje nacú méqueca ricá, palani ca'ajná, pu'uhuariení ca'ajná. Riloco'opáneje iná la'acachu ricá, iná pechu i'imá: "Palá la'ajeri nucá" que.

<sup>5</sup>Iná icoja iná la'acá nacaje Tupana huátaca que. Uncá meño'ojó apú la'alá huapumí chojé ricá.

<sup>6</sup>Re ijhua'até ina'uqué, jehuíña'ataño icá Tupana puráca'alo nacú. Aá nañaté nacaje a'acana aú najló.

<sup>7</sup>Apala ipechu i'imá Tupana nacú marí que: "Uncá rihue'epila pu'uhuaré huala'acare nacojé," que ca'ajná ipechu rinacu. E'iyonaja uncá quehuaca calé ipechu nacú ricá. Uncá meño'ojó ina'uqué la'alá Tupana mapéchuru queja. Palá iná la'acá ca'ajná, pu'uhuaré iná la'acá ca'ajná. Nacaje iná la'acare loco'opáneje Tupana quemájeri iná nacú méqueca rijló ricá.

<sup>8</sup>Napechu queja la'ajeño capichájeño Tupana liyá. Tupana Pechu huacára'aca que la'acaño i'imajeño matajnaco je'echú chu rijhua'até.

<sup>9</sup>Huaya'aníyo palá la'acana nacú. Uncaja que huala'ó ujhuí palá la'acana liyá, Tupana a'ajeri huajló rihuemí, riphájica rená chojé huacajé.

<sup>10</sup>Hue'emacá ehua re ca'ajná ina'uqué, nala'á camu'ují nacaje nacú. Palani nañaté a'acana nacaje la'acana aú. Richaje huani hua'ajica Jesucristo ja'apiyá jema'ajeño ñaté.

*Caja penaje rimacare nacú najló marí:*

<sup>11</sup>Imujulá nojé lana'aquejami aú nulana'á marí papera chojé ijlo nuyáte'ela aú.

<sup>12</sup>Necá numacárena nacú ijlo, huacára'año imata'acá achíñana chinuma rehuá. Nahuata judíona naquiayana pechu i'imacá palá nanacu. Aú nala'á ñaqué, nala'acá piyá chapú necá raú. Jesucristo ja'apiyá jema'ajeño nala'á chapú. Ricá taca'arí huachaya a'ahuaná apiyácanami nacú i'imacá, hue'emacáloje capichácajo liyá richojé i'imacana aú penaje. Uncá judíona huátalajo Jesucristo ja'apiyá jema'acana. Aú calé nala'á chapú ra'apiyá jema'ajeño.

<sup>13</sup>Uncá nachinuma mata'ajeño la'alá pajimato Moisesmi chu puráca'alomi quemacá que. Nahuata ihuacára'acana, imata'acáloje achíñana chinuma raú penaje, napechu i'imacáloje nanacuhúa: "Marí que nahuacára'acana aú huala'á palá" que.

<sup>14</sup>Uncá ñaqué calé nojló ricá. Uncá numalá nunacuhúa: "Palá la'ajeri nucá" que, nacaje nula'acare aú. Jesucristo taca'arí nuchaya a'ahuaná apiyácanami nacú i'imacá. Caphí nupechu richojé. Raú ja calé palá la'ajeri nucá rijló. Ina'uqué, uncá hue'epíño Tupana, la'año nacaje uncá Tupana huátalare caje. Uncá nunaquiayaje calé ilé caje. Apichátaqueja que nucá ilé caje la'acana liyá.

<sup>15</sup>Uncá na penaje calé Tupánajlo, mata'aquejána chinúmaruna huecá ca'ajná, uncá ca'ajná. Tupana Pechu ja'apiyá i'imacana aú ina'uqué la'año palá. Ricaja calé palani Tupánajlo.

<sup>16</sup>Tupana Pechu ja'apiyá i'imacáñojlo numá: Eco Tupana la'á palá ipechu. Eco rihue'epí imu'ují. Ñaqué caja nuhuátaca Tupana la'acá rila'ejena ina'uquejlo piyuque.

<sup>17</sup>Murí caje pumí chiyó uncá nuhuátala ajopana ina'uqué cahuíla'aca inacu. Re cajrú nucupijneremi nunacu, judíona naquiayana ña'atácale nucá i'imacá, uncale nupechu i'imalá napechu que caja. Marí caje aú ajopana hue'epíño Jesucristo hua'até sápa jeri nucá.

<sup>18</sup>Nojena, nuhuata hue'emacana Jesucristo, la'acá icá palá piyuqueja. Marí queja ricá. Maáreje ritajno.



## EFESIOS

*Jesucristo ja'apiyá jema'ajeño, Efeso e i'imacáñojlo Pablo huacára'ari puráca'aloji marí que i'imacá:*

<sup>1</sup> Pablo nucá. Nuhuacára'ajeri Jesucristo. Jesucristo huacára'acarena naquiyana nucá. Marí queja Tupana pechu nacú nu'umacá. Nulana'á marí papera chojé ijló, Efeso e i'imacáñojlo. Jesucristo ja'apiyá jema'ajeño icá chuhuaca. Ñaquele Tupana le'ejena ina'uqué icá.

<sup>2</sup> Hura'apá huani Tupana; Hue'emacana huani Jesucristo. Nuhuata Tupana, Jesucristo hua'até la'acá ipechu palá.

*Jesucristo palamane palá huani Tupana la'acá ina'uqué yucuna marí:*

<sup>3</sup> Palánijlaca huapura'acojla Tupana nacú palá huani. Hue'emacana, Jesucristo jara'apá huani ricá. Palá huani rila'acá huecá, hue'emacale Jesucristo hua'atéjena. Pajluhuaaja queja huecá rijhua'até chuhuaca. Ñaquele rila'á huapechu palá que'iyapejé nacaje aú, je'echú chu i'imajcaño hue'emacale.

<sup>4</sup> Uncá chiyó Tupana queño'ótari eja'ahuá i'imacá, ripechu nacú ri'imá i'imacá, hue'emacáloje Jesucristo ejena penaje. Ripechu nacú ri'imá caja, hue'emacáloje rijló lamára'ataquejanami que rijló pu'uhuaré huala'acare liyá penaje. Uncá na chona calé rihuajaje huecá.

<sup>5</sup> Caja ri'imá ñaque Tupana pechu nacú júpimi i'imacá, hue'emacáloje Tupana yaní penaje. Caphí Jesucristo chojé i'imacana aú hue'emá riyani. Marí que ricá, iquí'ija huani rihuátacale huecá. Palani rijló ilé que huala'acana palá. Caja queja rihuátaca ri'imacá huajló.

<sup>6</sup> Ñaquele huapura'ó Tupana nacú palá, ripalamane hue'emacale. Ri'irí, iquí'ija rihuátacare, hua'atéjena huecá. Raú palá huani rila'acá huecá.

<sup>7</sup> Jesucristo taca'arí a'ahuaná apiyácanami nacú huachaya i'imacá. Richojeja calé hue'emaó. Richojeja caja Tupana amaro huachaje pu'uhuaré huala'acare, huamanai-chó huala'acare liyá hua'até. Raú huahue'epí iquí'ija huánica Tupana huátaca huecá. A'acuhuaná ri'imatá huecá, huacapichaco piyá Tupana liyá. Iquí'ija huani rihue'epica huamu'ují i'imacá.

<sup>8</sup> Palá huani Tupana la'acá huecá. Capechuni huani Tupana; hue'epiri huani caja ricá. Ñaque i'imacale rila'á nacaje, palá huani ripechu nacú ri'imacá que.

<sup>9</sup> Chuhua huahue'epica ricá. Rihuacára'a Jesucristo marí eja'ahuá nacojé i'imacá, rila'acáloje ina'uqué palá raú penaje. Marí que la'acana i'imari ripechu nacú júpimi i'imacá. Micho'ojneji ri'imacá ina'uqué liyá.

<sup>10</sup> Riphájica rená chojé huacajé, Tupana ñapátajeri apú nacaje ripechu nacú i'imacare la'acana. Raú rahuacátaje piyuqueja ina'uqué je'echú chu i'imacáño, maare eja'ahuá chu i'imacáño hua'ató, Jesucristo i'imacáloje nahuacára'ajeri penaje. Marí que Tupana pechu nacú ricá.

<sup>11</sup> Uncá chiyó eja'ahuá queño'ó Tupana i'ihuapari rijluhua huecá ajopana ina'uqué e'iyayá, hue'emacáloje rile'ejena ina'uqué penaje. Jesucristo palamane huecá, rijhua'atéjena. Caja júpimi ñaqueja la'acana i'imari ripechu nacú i'imacá. Ñaquele rila'á nacaje palani ripechu nacú i'imacá que.

<sup>12</sup> Huecá, judíona naquiyana pechu i'imari caphí Jesucristo chojé. Ajopana ina'uqué tumá huapechu i'imá richojé caphí. Marí que ri'imacá huajló, hue'emacáloje palá huani rila'acare huecá yucuna ajopánajlo penaje. Marí penaje rila'á huecá palá i'imacá.

<sup>13</sup> Ñaque caja ijló ricá, uncá judíona calejlo. Ica jema'año Tupana i'imataca ina'uqué capichácajo liyá yucuna i'imacá. Quehuácaje riyucuna. Rema'acana aú ipechu i'imari caphí Jesucristo chojé, ri'imacáloje i'imatájeri penaje. Ñaquele chuhua Jesucristo hua'atéjena icá. Ra'apiyá jema'acana aú Tupana a'arí caja ijló Ripechu. Ripechu, rarucácare ina'uejlo júpimi que i'imacá, ra'á ijló. Ripechu i'imacachu iná e'iyá, iná hue'epí Jesucristo hua'ateje iná.

<sup>14</sup> Caja ra'á huajló Ripechu rimacá que. Raú huahue'epí hue'emajica rijhua'até je'echú chu rimacá huanacu que caja. Riñapátajica ee piyuque rile'ejena ina'uqué i'imatácana capichácajo liyá, rihuá'aje huecá je'echú chojé. Ñaquele palá huani la'ajeri ri'imacale, ina'uqué pura'ajeño palá huani rinacu.

*Pablo pura'acó Tupana hua'até Efesio eruna nacú yucuna marí:*

<sup>15</sup> Marí que ajopana ina'uqué quemacá inacu: “Caphí huani napechu hue'emacana Jesucristo chojé. Iquí'ija huani nahuátaca piyuqueja Tupana le'ejena ina'uqué,” que nemacá inacu.

<sup>16</sup> Caja noma'á riyucuna i'ímacá. Ñaquele numá Tupánajlo marí que inacu: “Pu'ují nupochu nanacu, pila'acale palá necá.” Que numacano rijló nupura'acó rijhua'até quehua.

<sup>17</sup> Hue'emacana huani Jesucristo; Rara'apá Tupana; palani huani ricá. Piyuqueja hue'epica caja ricá. Riliyá nuquejá'a hue'epícaje ijló, ihue'epícaloje palá mecajeca Jesucristo raú penaje. Numá caja rijló, rila'acáloje ipechu palá, ihue'epícaloje méqueca Jesucristo la'ajica ijló nacaje palani penaje.

<sup>18</sup> Numá caja Tupánajlo, rila'acáloje ipechu palá penaje, ihue'epícaloje raú méqueca palá huani ri'imajica ijló penaje. Ina'uqué, ri'ihuapacárena ajopana ina'uqué e'iyayajlo, ri'imajé palá. Tupana la'ajeri rila'ejena ina'uqué nacú palá huani je'echú chu i'ímacana aú. Ipechu iphácaloje rihue'epícana nacú penaje, numá Tupánajlo, rila'acáloje palá ipechu penaje.

<sup>19</sup> Nuquejá'a ijló péchuji Tupana liyá, ihue'epícaloje raú meque íqui'ica huani ra'acá huañaté Ripecchu aú penaje. Piyuque nacaje la'ajeri ricá. Uncá meño'ojó iná hue'epila nacaje rila'acare nacojé piyuque. Ra'á Ripecchu caphí Jesucristo chojé i'ímacáñojlo.

<sup>20</sup> Ripecchu ra'acare ra'apiyá jema'ajeñojlo aú caja Tupana macápo'ori Jesucristo i'ímacá. Raú ja caja rihua'á ri'ímacá je'echú chojé, ri'ímacáloje rehuájena huacára'ajeri Tupana hua'até penaje.

<sup>21</sup> Je'echú chiyájena huacára'ajeri Jesucristo. Ajopana huacára'ajeño, re i'ímacaño, chaje ricá. Ajopana re i'ímacaño paminana chaje ricá. Ajopana chaje huani ricá me'etení. Caja queja ri'imajica.

<sup>22</sup> Tupana a'arí Jesucristo piyuque nacaje amájeri penaje. Ra'á caja ricá ra'apiyá jema'ajeño huacára'ajeri huani penaje.

<sup>23</sup> Jesucristo ja'apiyá jema'ajeño i'ímaño rijhua'atéjena. Piyuque eja'ahuá chu Jesucristo Pechu, ra'acáloje ra'apiyá jema'ajeño ñaté raú penaje.

## 2

*Tupana i'imatari ina'uqué capichácajo liyá, íqui'ija huani rihuátacale huecá. Riyucuna marí:*

<sup>1</sup> Capichájeño Tupana liyá que i'ímacá júpimi, ila'acale pu'uhuaré. Ra'apiyá jema'acana aú Jesucristo i'imatari icá rihuajáica icá liyá, i'ímacáloje matajnaco Jesucristo hua'até raú penaje.

<sup>2</sup> Júpimi ila'ajícana pu'uhuaré. Ñaqueé caja ila'ajícana imanaicho. Ajopana ina'uqué, uncá jema'alaño ra'apiyá, la'ajica que caja ila'ajícana. Ila'aqueé raú Jiña Chi'ináricana huacára'aca que. Jiñana huacára'ajeri ricá. Ina'uqué uncá jema'alaño Tupana ja'apiyá huacára'ajeri caja ricá.

<sup>3</sup> Necá queja caja hue'emajica. Huahuátajica queja huala'ajica huajluhua pu'uhuaré. Huamanaicho huala'aqueé huapechu queja. Ajopana ina'uqué que caja hue'emajica pu'uhuaré la'acana nacú. Ríphájica rená chojé huacajé Tupana huajájeri piyuque pu'uhuaré la'ajeño. Nanaquiyana hue'emacá i'ímacá.

<sup>4</sup> E'iyonaja calé Tupana hue'epiri cajrú huamu'ují, íqui'ija huani rihuátacale huecá.

<sup>5</sup> Ñaquele ri'imatá huecá capichácajo liyá, hue'emacáloje matajnaco je'echú chu raú penaje. Capichájeño penájena hue'emajla, huamanaicho, pu'uhuaré huala'acare pachá. E'iyonaja calé ra'á huajló i'ímacaje, hue'emacáloje Jesucristo hua'até raú penaje. Tupana palamane aú calé hue'emaó capichácajo liyá.

<sup>6</sup> Pajluhua japi ricá queja huecá Jesucristo hua'até. Ñaquele rihua'aje huecá richajo je'echú chojé, hue'emacáloje rijhua'até re penaje.

<sup>7</sup> Iquí'ija huani rihuátaca huecá; cajrú huani rihue'epica huamu'ují. Ñaquele Jesucristo palamane aú rila'á huecá palá huani, ajopana i'imajícaño jema'acáloje riyucuna penaje.

<sup>8</sup> Iquí'ija huani Tupana huátaca icá, raú ri'imatá icá capichácajo liyá, ipechu i'ímacale caphí richojé. Uncá na calé ila'á, ri'imatácaloje icá penaje. Uncá na huemí aú calé ri'imatá icá. Majopeja ri'imataca icá.

<sup>9</sup> Uncá meño'ojó iná la'alá nacaje, Tupana i'imatácaloje iná capichácajo liyá penaje. Uncá caja meño'ojó iná quemalá iná nacuhá marí que: “Nucá la'arí palá, raú ri'imataje nucá capichácajo liyá.”

<sup>10</sup> Marí que quemacana uncá i'ímalá inajlo. Tupánaja calé a'arí huecá, ra'apiyá jema'ajeño, hue'emacáloje Jesucristo hua'atéjena penaje, huala'acáloje ajopana ina'uqué palá rijhua'até penaje. Marí que i'ímacaño hue'emacáloje penaje, i'imari Tupana pechu nacú júpimi.

*Chuhua huapechu palá ajopana ina'uqué nacú Jesucristo palamane. Riyucuna marí:*

<sup>11</sup> Ihue'epí méqueca ri'ímacá ijlo, uncá chiyó jema'á Jesucristo ja'apiyá. Uncá judíona calé icá. Ñaquele judíona quemaqueño inacu: "Uncá Tupana le'ejena ina'uqué calé necá, uncale namata'alá achíñana chinuma," que nemájica inacu. Eyá nanacuhúa nemaqué: "Tupana le'ejena huecá, huamata'acale achíñana chinuma."

<sup>12</sup> Rihuaacajé uncá icá i'imalaño Jesucristo naquiyana. Uncá caja Israelmi chu laquéname naquiyana calé icá. Tupana i'ihuapari rijluhua necá i'ímacá. Uncá caja ihue'epila méqueca Tupana quemaca na'ajútayami chúnajlo i'ímacá, rila'acáloje necá palá penaje. Uncá inacu quemacana i'imalá, rila'acáloje inacu palá penaje. Uncá caja ihue'epila naca Tupana arucácare ina'uquejlo i'ímacá. Majopéjaruna queja icá i'ímaño marí eja'ahuá chu i'ímacá, uncale ihue'epila méqueca Tupana la'acá ina'uqué palá.

<sup>13</sup> Eyá chuhuaa Jesucristo hua'atéjena icá. Jesucristo taca'arí ina'uqué chaya a'ahuaná apiyácanami nacú i'ímacá, i'ímacáloje rijhua'atéjena raú penaje. Júpimi uncá chiyó ipechu i'ímá caphí richojé, uncá i'ímalá Tupana le'ejena ina'uqué.

<sup>14</sup> Uncá judíona pechu i'ímalá palá ajopana nacú, uncale ne'emalá necá'ana. Uncá caja ne'emalá Moisesmi chu puráca'alomi ja'apiyá. Jimaje uncá nahuátala necá, ajopana. Lanaquiya uncá caja ajopana huátala necá. Palanaquíyaca que huecá najhua'até uncá huahuátala pecohuácaca. Eyá huema'á Jesucristo ja'apiyá. Raú ripala'atá huapechu pajlocaca ra'apiyá jema'acana aú, hue'emacáloje pajluhuaa yaní queja pajhua'atéchaca penaje. Marí caje aú ricapichata hualiyá chapú huamácare pecohuácaca i'ímacá.

<sup>15</sup> Moisesmi chu lana'arí Tupana puráca'alo naquiyana papera chojé i'ímacá. Ripuráca'alo lana'aquejiami quemari ina'uqué nacú, nala'acáloje palá rimacá najlo que penaje, Tupana pechu i'ímacáloje palá nanacu raú penaje. E'iyonaja uncá na calé jema'arí ra'apiyá. Richona Tupana huajájeri ina'uqué. Uncá jema'alaño ra'apiyá chaya, Tupana huajari Ri'írí Jesucristo i'ímacá. A'ahuaná apiyácanami nacú ritaca'á i'ímacá. Marí que rihuajaca ri'ímacá. Ñaquele chuhua iná jema'acachu Jesucristo ja'apiyá, rijhua'atéjena naquiyana iná raú. Marí que ricá chuhua judíona naquiyánajlo; ñaqueé caja ricá ajopánajlo. Chuhua ra'apiyá jema'ajeño, ajopana, ajopana que, i'ímaño pajluhuaa yaní queja pajhua'atéchaca. Chuhua palá huapechu panacuhuácaca.

<sup>16</sup> Jesucristo taca'acá a'ahuaná apiyácanami nacú aú rilamá'ata ina'uqué pechu, napechu i'ímacáloje palá Tupana nacú raú penaje. Raú caja rilamá'ata ina'uqué pechu pajlocaca, namaca piyá chapú pecohuácaca. Pajluhuaa yaní queja rila'acá huecá raú.

<sup>17</sup> Jesucristo ipharí majó yucu i'imajé ina'uquejlo. Napechu pala'acóloje Tupana nacú penaje ri'ímá najlo yucu i'ímacá. Palani yucu yuriro piyuqueja ina'uquejloje penaje. Riyuró Tupana yucuna hue'epéjeñojlo; ñaqueé caja riyurico uncá hue'epilaño riyucúnajlo.

<sup>18</sup> Caphí huapechu i'ímacá Jesucristo chojé aú Tupana a'arí huajlo Rijhu. Ñaquele chuhua huapura'ó Tupana hua'até. Ra'apiyá i'ímacana aú palá Tupana pechu i'ímacá huanacu. Raú ja calé ripechu i'ímá palá huanacu. Ñaqueé ricá judíonajlo; ajopánajlo ñaqueé caja ricá.

<sup>19</sup> Ajopana que caja i'ímacá júpimi, uncale ihue'epila Tupana puráca'alo nacojé i'ímacá. Ñaquele chuhua uncá ajopana que calé icá. Chuhua Tupana le'ejena ina'uqué naquiyana icá. Ajopana rila'ejena ina'uqué que caja icá chuhua.

<sup>20</sup> Tupana puráca'alo ja'apátajeñomi chuna, Jesucristo huacára'acarena, quele yuriño huajlo Tupana puráca'alo lana'aquejiami i'ímacá. Richojé huapechu la'aró caphí, ri'imacale huajlo Jesucristo yucuna, huahue'epicaloje mecajeca ricá raú penaje. Jesucristo palamane Tupana hua'atéjena huecá.

<sup>21</sup> Jesucristo ja'apiyá jema'ajeño i'ímaño nachaje, nachaje que íqui'irunaca. Pajluhuaa naquiyana queja huecá pajhua'atéchaca. Tupana le'ejena ina'uqué huecá, huapechu i'ímacáloje pu'ují Tupana nacú raú penaje.

<sup>22</sup> Icó caja, uncá judíona naquiyana calá icá, i'ímaño Tupana hua'atéjena chuhuaa, Jesucristo ja'apiyá jema'ajeño i'ímacale. Re ajopana ra'apiyá jema'ajeño. Necá que caja icá; ra'apiyá jema'ajeño caja icá. Rejenohuaa icá najhua'até ra'apiyá jema'ajeño. Tupana i'imari ra'apiyá jema'ajeño hua'até Ripechu aú.

### 3

*Pablo sápacala yucuna marí:*

<sup>1</sup> Nucá, Pablo, pura'aró Tupana hua'até inacu. Jesucristo yucuna nu'umá inaquiyánajlo. Uncá judíona calé icá. Riyucuna i'ímacana inaquiyánajlo nacuja nucá. Uncá ne'iyajena huátalaño riyucuna. Ñaquele naca'á nucá ina'uqué huajáquelana chojé. Richu nucá me'etení.

<sup>2</sup> Tupana i'imatari ina'uqué capichácajo liyá, palá huaní ripechu i'imacale huanacu. Riyucuna i'imajeri penaje Tupana a'arí nucá. Icó, uncá i'imalaño judíona naquiyana, i'ímacáloje palá ra'apiyá penaje, ra'á nucá riyucuna i'imajeri penaje. Caja jema'á ca'ajná

nuyucuna. Riyucuna i'imajeri pe huátalaño riyucuna. Ñaquele naca'á nucá ina'uqué huajáquelana chojénaje nucá.

<sup>3</sup> Tupana huátari piyuque ina'uqué nacú la'acana palá. Júpimija ripechu nacuja ri'imá uncá judíona naquiyana calé la'acana palá. Eyá nojló ra'á pu'uhucacajé nacaje ripechu nacú i'amacare. Caja nulana'á ijló riyucuna naquiyana papera chojé i'amacá.

<sup>4</sup> Papera, nuhuacára'acare ijló i'amacá amácana aú ihue'epeje meque rila'acá nupechu palá. Rila'acale nupechu palá, nu'ujná Jesucristo yucuna i'imajé inaquiyánajlo uncá judíonajlo calé. Micho'ojneji queja ri'amacá ina'uquejlo, meque rila'ajica uncá judíona calé i'amacáñojlo.

<sup>5</sup> Júpimi uncá riyucuna nacú quemacana i'imalá. Micho'ojneji que ri'amacá rihuacajé. Chuhua Tupana a'arí riyucuna pu'uhucacajé. Ripechu aú ri'imá riyucuna huajló, Jesucristo huacára'acarenajlo. Ñaqué caja ri'amacá riyucuna ripuráca'alo ja'apátajeñojlo. Riyucuna i'imajeño penaje Tupana a'arí huecá.

<sup>6</sup> Tupana i'imatari ina'uqué capichácajo liyá Jesucristo palamane aú. Chuhua Tupana la'acá palá piyuque ina'uqué nacú Jesucristo palamane aú. Júpimi judíonaja calé nacú rila'aqué palá. Eyá chuhua ñaquele caja rila'acá ajopana ina'uqué nacú palá. Ñaquele chuhua uncá ajopana que calé huecá paliyácaca. Piyuque Jesucristo ja'apiyá jema'ajeñojlo nacaje yuriro je'echú chu. Rimacá rinacu i'amacá queja ri'imajica huajló.

<sup>7</sup> Eyá nucá piño. Maliyaru queja nu'umacá Tupánajlo i'amacá. E'iyonaja calé ra'á nucá riyucuna i'imajeri penaje, nu'umacáloje riyucuna uncá judíona calejlo penaje. Ripechu aú ja ra'á nucá riyucuna i'imajeri penaje.

<sup>8</sup> Tupana hua'ateje nucá. Ajopana rijhua'atéjena i'imaño nuchaje péchuruna. E'iyonaja Tupana la'arí nunacu palá huani. Ra'á nucá, nu'ujnacáloje riyucuna i'imajé uncá judíona calejlo penaje. Quepeni huani nacaje yuriro ra'apiyá jema'ajeñojlo. Riyucuna nu'umá najló. Palani huani nacaje riyuricare huajló penaje. Uncá iná pechu iphala rilocópa'ala, que'iyapé huani ri'amacale.

<sup>9</sup> Tupana queño'ótari piyuqueja nacaje i'amacá. Caja júpimi huani ri'imá ripechu nacú ina'uqué i'imatácana capichácajo liyá. Micho'ojnéjija riyucuna i'amacá ina'uqué liyá júpimi i'amacá. Ñaquele ra'á nucá, nu'umacáloje riyucuna penaje, piyuque ina'uqué hue'epícaloje raú méqueca Tupana pechu nacú, ina'uqué i'imatácana capichácajo liyá penaje.

<sup>10</sup> Ñaquele Jesucristo hua'atéjena necá, ri'imatácarena capichácajo liyá. Marí que rila'acá ina'uqué nacú palá, je'echú chiyájena huacára'ajeño hue'epícaloje raú meque capechuni huani ricá penaje. Nahue'epícaloje caja na aú ca ri'imataca ina'uqué capichácajo liyá, penaje rila'á marí que. Uncá nahue'epila riyucuna i'amacá, micho'otáqueja ri'imacale naliyá. Chuhua caja napechu iphari rihue'epícana nacojé.

<sup>11</sup> Tupana huacára'ari Hue'emacana huani, Jesucristo, eja'ahuá chojé i'amacá, ri'amacáloje ina'uqué palamane penaje. Caja queja la'acana i'imari ripechu nacú ñaqueja i'amacá.

<sup>12</sup> Tupana quemari huanacu, hue'emacáloje Tupana hua'atéjena penaje. Huapechu i'imá caja caphí Jesucristo chojé. Marí caje la'arí caphí iná pechu, iná i'amacáloje rijhua'ateje raú penaje. Marí que ri'imacale huajló huapura'ó rijhua'até.

<sup>13</sup> Jesucristo yucuna nu'umá uncá judíona calejlo. Ajopánajlo, ajopánajlo que nu'umacá riyucuna. Nu'umá caja ijló riyucuna i'amacá. Riyucuna nu'umacare ina'uquejlo chona nala'á nucá chapú me'etení. Ila'aniya ujhuí ipéchuhua, marí que nala'acale nucá. Palani ri'amacáloje ijlojé penaje nu'umá riyucuna ijlo.

*Iqui'ija Jesucristo huátaca ra'apiyá jema'ajeño yucuna marí:*

<sup>14</sup> Palá huani Tupana la'acá icá. Ñaquele i'amacale nupura'ó Tupana hua'até inacu.

<sup>15</sup> Piyuque Tupana hua'atéjena, je'echú chu i'imaña, eja'ahuá chu i'imaña, quele nacú nemá: "Tupana le'ejena necá." Tupana i'imari Nara'apá; necá i'imaño riyani. Ñaquele nemá nanacu: "Tupana hua'atéjena necá" que.

<sup>16</sup> Palani huani nacaje rila'acare. Ricá i'imajeri uncá tajnácajo penaje calé. Ñaquele Tupana hua'até pura'acano aú numá rijló, rila'acáloje icá caphí péchuruna Ripechu aú penaje.

<sup>17</sup> Nupura'ó caja rijhua'até inacu, caphí ipechu i'amacáloje richojé penaje, ipechu i'amacáloje Jesucristo pechu chuhua penaje. Raú íqui'ija ihuátajica ricá. Ñaquele caja ihuátajica íqui'ija pecohuácaca. Marí que la'acáño i'imajica raú.

<sup>18</sup> Nupura'ó caja Tupana hua'até inacu, ihue'epícaloje meque íqui'ica huani Jesucristo huátaca ina'uqué penaje. Uncá huani ripechu jácho'olo huahuátacana liyá. Marí ihue'epícaloje penaje, nupura'ó Tupana hua'até inacu. Ñaquele caja nuhuata ajopana rijhua'atéjena hue'epica meque íqui'ica rihuátaca necá.

<sup>19</sup> Nuquejá'a Tupana liyá hue'epícaje ijló, ihue'epícaloje raú meque íqui'i huánica Jesucristo huátaca icá penaje. Uncá iná pechu iphala rihue'epícana locópa'ala, íqui'ija huani rihuátacale iná. Marí nuquejá'a riliyá ijló, i'imacáloje rihuátaca que la'ajeño penaje. Ripechu ja'apiyá i'imacaño, i'imacáloje penaje numá rijló.

<sup>20</sup> Chuhua a'ajlaca ina'uqué pura'añojla Tupana nacú palá, rihue'epícale piyunqueja nacaje la'acana. Nacaje huemacare nacú rijló, rila'acáloje huajló penaje, chaje huani rila'acá huajló nacaje. Uncá meño'ojó huapechu iphala rila'acare nacojé hue'epícana. Ripechu i'imacare hue'iyá aú rila'á huecá palá.

<sup>21</sup> Palánijlaca ina'uqué pura'acojla Tupana nacú palá huani hua'ajini huani, ri'imatácale rijluhua ina'uqué Jesucristo palamane aú. Palá rila'acá ra'apiyá jema'ajeño nacú. Aú piyunqueja ina'uqué amaño méqueca palá huani rila'acá. Ya'ajnájojena i'imajicaño amájeño caja méqueca rila'ajica ra'apiyá jema'ajeño palá.

## 4

### *Jesucristo hua'atéjena yucuna marí:*

<sup>1</sup> Ina'uqué huajáquelana chu nucá me'tení, Jesucristo yucuna nu'umacale ina'uquejlo pachá. Tupana i'ihuapari rijluhua ina'uqué, ne'emacáloje rijhua'atéjena penaje. Ri'ihuapacárena naquiyana caja icá. Naquele numá ijló: I'imá caliyáruna rijló palá la'acana nacú. Rihuátaca que la'acana loco'opani, ila'á palá, rijhua'atéjena i'imacale.

<sup>2</sup> Ila'aniya inacuhú hue'epiño que huani. Iyúcha'aniyo caja ina'uqué chá. Mayuchéruna i'imacá pajhua'atéchaca. Ila'aniya icó mahuó nanacojé. Ijña'á panacu ina'uqué a'ajná nala'ajica palá ejená. Iqui'ija ihuátacale pecohuácaca, i'imá pajhua'atéchaca palá.

<sup>3</sup> I'imá Tupana ja'apiyá, i'imacáloje pajluhuaja chuhú queja pajhua'atéchaca penaje. Tupana Pechu a'ajeri iñaté, palá ipechu i'imacáloje panacuhuácaca penaje.

<sup>4</sup> Pajluhua japi ricá queja piyuque Jesucristo ja'apiyá jema'ajeño. Tupana Pechu hua'jhua'até i'imacare, pajluhuaja caja ricá. Pajluhuaja caja chojé huapechu i'imá caphí. Tupana i'ihuapari rijluhua huecá, hue'emacáloje palá i'imajicaño je'echú chu raú penaje. Marí la'ari huapechu caphí.

<sup>5</sup> Re pajluhuaja Huahuacára'ajeri huani; Jesucristo ricá. Ricá pajluhuaja chojé huapechu caphí. Re caja pajluhuaja bautizar la'acanamí.

<sup>6</sup> Re pajluhuaja Ina'uqué Chí'ináricana; Huara'apá ricá. Piyuque ra'apiyá jema'ajeño huacára'ajeri ricá. Rile'ejé huánija caja piyuque nacaje. Piyunqueja Jesucristo ja'apiyá jema'ajeño hua'até re caja Ripechu. Naquele pajluhuaja yaní queja huecá rijhua'até.

<sup>7</sup> Jesucristo palamane Tupana a'arí huajló hue'epícaje, huala'acáloje rijló nacaje raú penaje. Jesucristo huátaca que ra'acá huajló ricá.

<sup>8</sup> Jesucristo a'arí péchuij ina'uquejlo, Tupana puráca'alo lana'aquejami quemacá rinacu que. Marí que rimacá rinacu:

Jesucristo jácho'ojero je'echú chojé, richá'atajica ripiná Jiñá Chí'ináricana ejomi.

Reyá i'imajemi ra'ajé ina'uquejlo hue'epícaje, nala'acáloje nacaje rijló raú penaje, que ripuráca'alo lana'aquejami quemacá.

<sup>9</sup> ¿Meque chi quemacana rácho'oco que? Marí que quemacana ricá: Pamineco Jesucristo huitúca'ari cahuacaje marí eja'ahuá nacojé i'imacá.

<sup>10</sup> Ricá penájemi caja jácho'oro je'echú chojé i'imacá. Yenoje, ritajáca'alo ejé, rácho'o i'imacá, ripechu i'imacáloje piyuque eja'ahuá chuhú, piyuque je'echú chuhú hua'ató penaje. Re ricá, ri'imacáloje Huahuacára'ajeri penaje.

<sup>11</sup> Ricá penájemi a'arí ina'uquejlo, apú, apujlo que péchuij, nala'acáloje rijló nacaje rihuátaca que raú penaje. Ne'iyajénajlo ra'á péchuij, ne'emacáloje Jesucristo huacára'acarena raú penaje. Ra'á caja ne'iyajénajlo péchuij, ne'emacáloje Tupana puráca'alo ja'apátajeño raú penaje. Ra'á caja ne'iyajénajlo péchuij, ne'emacáloje riyucuna ajopánajlo, ajopánajlo que raú penaje. Tupana i'imatari ina'uqué capichácajo liyá. Ne'ejnacáloje riyucuna i'imajé ajopánajlo, ajopánajlo que penaje ra'á najló hue'epícaje. Ra'á caja ne'iyajénajlo hue'epícaje, ne'emacáloje Jesucristo hua'atéjena amájeño penaje. Ra'á caja ne'iyajéñojlo hue'epícaje, nehuíña'atacaloje ajopana Tupana puráca'alo nacú penaje.

<sup>12</sup> Marí caje penaje ra'á hue'epícaje apujlo, apujlo que: Nehuíña'atacaloje Jesucristo ja'apiyá jema'ajeño raú penaje. Caphí napechu i'imacáloje Tupana huátaca que la'acana nacú penaje. Richaje íqui'irunaca Jesucristo hua'atéjena i'imacáloje raú penaje. Marí caje penaje ra'á najló hue'epícaje.

<sup>13</sup> Necá Tupana a'acárenajlo hue'epícaje ja'apiyá i'imacana aú, huapechu i'imajé pajñacani caphí Jesucristo chojé. Huahue'epeje caja méqueca palá huani Tupana I'irí la'acá ina'uqué. Palá péchuruna, peñahuilana péchuruna hue'emajé na'apiyá i'imacana nacú. Jesucristo pechu

queja caja huapechu i'imajica raú. Marí queja hue'emajica ejená, hue'emajé na'apiyá. Necá, Tupana a'acárenajlo hue'epícaje, ja'apiyá hue'emajica.

<sup>14</sup> Marí caje aú uncá hue'emalaje yuhuaná pechu que péchuruna. Majopéjari aú ja yuhuaná pechu ja'aró iyamá chojé. Uncá hue'emalaje necá que caja. Uncá huayurilaje Tupana puráca'alo ja'apiyá i'imacana, ajopana ina'uqué quemájica ee huajló apojó. Uncá caja a'alaje apú caje puráca'aloji inacojó. Camachá itára'ajico palani puráca'aloji chojé. Uncá i'imalaje majopeja nacaje carená ja'apátacare que. Nemaje ca'ajná huajló pajlácaje puráca'aloji nacú. Quehuácaje japi ricá que ca'ajná nemájica huajló rinacu. Uncá huema'alaje na'apiyá, peñahuilana péchuruna hue'emacachu.

<sup>15</sup> Marí que la'acana palani: Ihuata pecohuácaca Iqui'ija; ipura'ó quehuácaje puráca'aloji nacú pajhua'atéchaca; i'imá richaje, richaje que péchuruna, Jesucristo pechu chuhuá. Jesucristo hua'atéjena huecá; Huahuacára'ajeri ricá. Rila'acá que caja huala'ajica.

<sup>16</sup> Pajluhuaja iná napona. E'iyonaja cajrú rinaquiñana re'iyá, sápari piyuqueja re'iyohuá, iná tahuá'acoloje raú penaje, iná i'imacáloje peyahueni raú penaje. Ñaque caja huecá, Jesucristo hua'atéjena, Iqui'iruna huecá. Jesucristo ja'apiyá i'imacana aú hue'emá pajluhuaja queja pajhua'atéchaca. Huasapa pajhua'atéchaca. Iqui'ija huahuátaca pecohuácaca. Ñaquele hua'á pañatéchaca. Richaje, richaje que hue'emacá palá la'acana nacú Tupana quemacá que.

*Ina'uqué yuriño naliyó pu'uhuaré la'acana, ne'emacachu Jesucristo ja'apiyá jema'ajeño. Riyucuna marí:*

<sup>17</sup> Hue'emacana huani Jesucristo. Rihuacaré aú numá ijlo marí que: Re cajrú ina'uqué marí eja'ahuá chu, uncá hue'epílaño Tupana. Ica i'imaño ñaque júpimi i'imacá. I'imaniya ñaque me'etení. Uncá jema'alaño Tupana ja'apiyá la'año pu'uhuaré napechu queja. Uncá na penaje calé iná la'á ilé que.

<sup>18</sup> Uncá huani nahue'epila mecajeca Tupana. Uncá caja ne'emalá Tupana Pechu ja'apiyá, ne'emacáloje matajnaco raú penaje. Marí que najló ricá, ijnú nema'acale ra'apiyá. Ñaquele uncá nahue'epila Tupana Pechu ja'apiyá i'imacana nacojó.

<sup>19</sup> Chuhua uncá napaña'alo namanaicho nala'acare ja'api. Pu'uhuaré la'acana, namanaicho la'acana nacuja necá. Huéchiruna necá que'iyapejé namanaicho la'acana nacú.

<sup>20</sup> Uncá Jesucristo puráca'alo quemalá iná nacú, iná la'acáloje pu'uhuaré ñaque caja penaje.

<sup>21</sup> Caja jema'á riyucuna; caja ne'emá riyucuna ijlo i'imacá. Quehuácaje Jesucristo puráca'alo. Richuhuaja ne'emá riyucuna ijlo i'imacá.

<sup>22</sup> Ñaquele chuhua ica'á iyámajo jupichumi ipechu, ila'acare aú pu'uhuaré i'imacá. Uncá chiyó jema'á Jesucristo ja'apiyá, uncá paala ipechu i'imacá. Aú calé ila'á pu'uhuaré i'imacá. Capichájeño penájenami i'imacá rihuacajé. Pu'uhuaré ila'ajica, imanaicho ila'ajica caja, ipechu i'imajícale: "Marí que la'acana palani huajló." Uncá ñaque calé iná i'imacá palá. Caja iyurí iliyó ipechu júpichumi.

<sup>23</sup> Ñaquele huajé chuhuá ipechu me'etení. Huajé nacaje nacú caja i'ijnatá ipéchuhua chuhuá.

<sup>24</sup> I'imá chuhua huajé ipechu ja'apiyá. Tupana a'arí ijlo huajé ipechu. Ripechu que caja rila'acá ipechu huajé. Raú iná i'imá palá huani la'ajeri rijhua'até. Uncá iná la'alá pu'uhuaré; uncá caja iná la'alá iná manaicho huajé iná pechu hua'até.

<sup>25</sup> Ñaquele ipajlániya pajhua'atéchaca. Imá pajlocaca quehuaca, Jesucristo hua'atéjena i'imacale.

<sup>26</sup> Iyúcha'acochu, ila'aníya pu'uhuaré raú. I'imaniya iyuchá hua'até jupi huani. I'imaniya yúcha'acajo nacú pajluhuaja hue'echú quetana.

<sup>27</sup> Ja'apata inaquiyo iyuchá quiñaja, Jiñá Chi'ináricana ja'apátaca piyá icá pu'uhuaré la'acana chojé.

<sup>28</sup> Ata'acáchina penájenamijlo numá: Iyurí iliyó piyuque ata'acaje. Isapa palani sápacaje nacú, nacaje i'imacáloje ijlo raú penaje, a'acáloje camu'ují la'acáño ñaté nacaje aú penaje.

<sup>29</sup> Ijló piyuqueja numá: Ipura'aníyo pu'uhuari puráca'aloji aú. Ipura'ó palani puráca'aloji aú pajhua'atéchaca, ri'imacáloje palá ipuráca'alo jema'ajeño nacú penaje. Apala uncá paala ca'ajná napechu. Palá imacá nacaje nacú najló, napechu la'acáloje palá raú penaje.

<sup>30</sup> Tupana a'arí ra'apiyá jema'ajeñojlo Ripechu, nala'acáloje palá ra'apiyá i'imacana aú penaje. Ila'aníya ujhuí Tupana Pechu, ra'acare ijlo, apojó la'acana aú. Tupana Pechu ra'acare huajló aú huahue'epí rila'ejena ina'uqué huecá. Marí queja ri'imajica huajló hue'ejnajica je'echú chojé ejená. Ejéchami i'imatáquejanami huani hue'emajica capichácajo liyá.

<sup>31</sup> Ica'á inaquiyó quele la'arí ima'á ipechu. Ica'á inaquiyó iyuchá jahuíyo'ocare aú cajrú. Ila'aniya ajopana ina'uqué uncá ina'uquélaruna que. Iyurí iliyó chapú ipechu i'imagare ajopana ina'uqué nacú.

<sup>32</sup> Ila'aniya pu'uhuaré numacare nacú. Marí que i'imajica: I'imá ipe'é péchuruna pajhua'atéchaca. Ihue'epí caja pamu'ujíchaca. Amó caja pachájecaca, chapú ila'acare pecohuácaca liyá. Jesucristo chojé Tupana amaro huachaje pu'uhuaré huala'acare liyá. Ramaco huachaje que caja amaco pachájecaca, chapú ila'acare pecohuácaca liyá.

## 5

*Marí que Tupana hua'atéjena i'imagá pajhua'atéchaca:*

<sup>1</sup> Caja Tupana yaní icá. Iqui'ija caja rihuátacarena icá. Ñaquele i'imá rí'imagá que caja.

<sup>2</sup> Iqui'ija Jesucristo huátaca huecá. Ñaquele ra'á ricó taca'acájelo huachaya i'imagá, rica'acáloje pu'uhuaré huala'acare huanaquiyá raú penaje. Ilé que rila'acana i'imarí palani Tupana nacú. Iqui'ija Jesucristo huátaca huecá que caja ihuátaca pecohuácaca.

<sup>3</sup> Caja Tupana le'ejena ina'uqué icá. Ñaquele i'imá palá pajhua'atéchaca, yucu i'imagá piyá ilérohua marí que inacu: "Nanaquiyana la'año namanaicho pajhua'atéchaca. Canacújne'equena caja necá." Ila'á palá nemacá piyá marí que inacu.

<sup>4</sup> Ipura'aniyo pu'uhuarieni pura'acajo aú pajhua'atéchaca. Pu'uhuarieni pura'acajo apáña'atari iná nacú. Ipura'aniyo caja majopeja huani. Marí caje uncá i'imalaje ijlo penaje. Palá Tupana la'acá icá. Ricá nacú ipura'ó pajhua'atéchaca.

<sup>5</sup> Caja ihue'epí achiñana, inaana, quele, la'acá namanaicho pajhua'atéchaca. Marí que la'acaño uncá i'imalájeño je'echú chu Tupana, Jesucristo, quele hua'até. Rehuá i'imacaño huacára'ajeño necá. Marí que i'imacaño piño uncá i'imalájeño rejo: Pu'uhuaré la'ajeño, canacújne'equena, quele necá uncá i'imalájeño je'echú chu. Nacaje marí eja'ahuá chu i'imagare nacú pu'ují canacújne'equena pechu, nahuajhué rí'imagale.

<sup>6</sup> Ajopana ca'ajná quemájeño ijlo, ila'acáloje pu'uhuaré penaje. Uncá nuhuátala jema'acá na'apiyá. Nemaje ca'ajná ijlo: "Uncá Tupana huajala iná richona" que. Jema'aniya na'apiyá, Tupana huajácale pu'uhuaré la'ajeño numacárena nacú ijlo. Uncá jema'alaño ra'apiyá la'año pu'uhuaré numacá rinacú que.

<sup>7</sup> Ñaquele i'imaniya najhua'até, ila'ajica pu'uhuaré ñaque caja najhua'até.

<sup>8</sup> Uncá chiyó i'imá Jesucristo ja'apiyá jema'ajeño, pajlácaje puráca'aloji ja'apiyá i'imacaño i'imagá. Pu'uhuaré la'ajeño i'imagá rihuacajé. Chuhua Jesucristo hua'atéjena icá. Ñaquele quehuácaje puráca'aloji chuhua ipechu me'etení. Chuhua palá la'acana nacuja icá.

<sup>9</sup> Quehuácaje puráca'aloji ja'apiyá i'imacaño, Jesucristo ja'apiyá jema'ajeño necá. Raú ra'apiyá i'imacaño la'año palá huani ajopana ina'uqué nacú. Tupana puráca'alo quemacá que nala'acá nacaje palá.

<sup>10</sup> Ihue'epí mecajeca nacaje Tupana huátacare, ila'achí ricá rihuátaca que.

<sup>11</sup> Ila'aniya nacaje majopeja la'acaño la'acá que caja. Uncá Tupana hua'atéjena calé necá. Pu'uhuaré la'acaño necá. Ñaquele uncá na penaje calé nacaje nala'acare. Imá najlo méqueca Tupana puráca'alo lana'aquejami quemacá pu'uhuaré nala'acare nacú, nahue'epícaloje rinacóje raú penaje. Tupana puráca'alo aú iná hue'epí nacaje nacoje, mecajeca uncá paala i'imagare.

<sup>12</sup> Pu'uhuaré nala'acare me'echú ne'emacá ehua, pu'uhuarieni huani ricá. Iná apáña'o riyucuna i'imagana ja'apí, pu'uhuarieni huani rí'imagale.

<sup>13</sup> Tupana puráca'alo aú iná hue'epí mecajeca palani iná la'acare. Ñaque caja rica pu'uhuaré la'ajéñojlo. Quehuácaje puráca'aloji aú, nahue'epí mecajeca pu'uhuaré nala'acare. Nayurica aú pu'uhuaré nala'acare naliyó, caja na'apá richiyá, ne'emacáloje Tupana ja'apiyá jema'ajeño penaje.

<sup>14</sup> Rinacu caja Tupana yale lana'aquejami quemacá. Marí que rimacá pu'uhuaré la'ajeri nacú:

Mapéchuru picá pu'uhuaré pila'acare nacú, pimanaicho pila'acare nacú hua'até.

Marí caje jimaje Tupana huajájeri picá.

Pijló numá: Pácho'o ilé caje chiyá.

Richiyá jácho'ocano aú Jesucristo la'ajeri pipechu palá, pihue'epícaloje quehuácaje puráca'aloji nacoje raú penaje, que rimacá.

<sup>15</sup> Ñaquele icá Jesucristo ja'apiyá jema'ajeño, amá icó palá, i'imagáloje palá pajhua'atéchaca penaje. I'imaniya ajopana que caja, uncá a'alaño nanacójo Tupana puráca'alo. I'imá capechúruna que.

<sup>16</sup> Hue'echú ca'alá i'imajica ijlo quetana ila'á palá, cajrú pu'uhuaré la'ajeño i'imagale e'iyohuá.

<sup>17</sup> I'imaniya mapéchuruna que; capechúruna i'imá, ila'acáloje Tupana huátaca que raú penaje.

<sup>18</sup> Iyuhuéra'aniyo. Yuhuéra'acajo ña'arí iná capichácajo chojé. Tupana Pechu ja'apiyá queja ila'acá piyuque nacaje palá.

<sup>19</sup> Ipura'ó pajhua'atéchaca Tupana puráca'alo lana'aquejami nacú. Ipura'ó caja Tupana le'ejé atanícaje nacú pajhua'atéchaca. Ila'á caphí papechúhuaca raú. Ataní Tupánajlo, pu'ují ipechu i'imacale rinacu.

<sup>20</sup> Tupana, huara'apá ricá. I'imá rijló palá rila'acare icá yucuna piyuqueja nacaje nacú. Jesucristo, Huahuacára'ajeri ja'apiyá que imacá rijló marí que.

*Palá Jesucristo hua'atéjena i'imacáloje nañacaré chiyájena hua'até penaje yucuna marí:*

<sup>21</sup> Iphá pa'apíchaca, iphácale Jesucristo ja'apí.

<sup>22</sup> Inaana calúyanajlo numá: Iphá iluna ja'apí. Iphaca Jesucristo ja'apí que caja iphájica na'apí.

<sup>23</sup> Jesucristo i'imatari ina'uqué capichácajo liyá, ne'emacáloje rijhua'atéjena raú penaje. Ri'imacá rijhua'atéjena huacára'ajeri que caja achiña i'imacá riyajalo huacára'ajeri riñacaré chiyá.

<sup>24</sup> Jesucristo hua'atéjena yuriño nachó Jesucristojlo, ri'imacáloje nahuacára'ajeri penaje. Ñaque caja inaana, calúyana, yuríjica nachó nalúnajlo, ne'emacale nahuacára'ajeño.

<sup>25</sup> Achiñana calúyanajlo numá: Ihuata íqui'ija iluna, Jesucristo huátaca rijhua'atéjena que caja ihuátaca iluna. Jesucristo huátari rijhua'atéjena íqui'ija. Ñaquele ra'á ricó taca'acájelo huachaya penaje i'imacá.

<sup>26</sup> Marí que rila'acá, ra'acáloje huecá Tupana le'ejena ina'uqué penaje. Huachaya ritaca'á, rica'acáloje pu'uhuaré hual'acare huanaguiyá raú penaje. Ripuráca'alo ja'apiyá jema'acana aú iná yurí pu'uhuaré la'acana iná liyó, iná i'imacáloje Tupánajlo palá péchuri penaje.

<sup>27</sup> Uncá huani pu'uhuareni i'imalaje iná pechu nacú raú. Huecá ra'acárena, rijhua'aténahua penaje i'imaño palá péchuruna. Hue'emacáloje je'echú chu i'imacaño penaje ra'á hue'emacá.

<sup>28</sup> Numá achiñánajlo, a'acáloje pajluhuano, pajluhuano que iyajalo inacajó, a'acá icó inacajó que caja. Icó ihuátaca que caja ihuátaca iyajalo.

<sup>29</sup> Uncá na i'imalá uncá huátala ricó. Iná a'á iná icó iná nacojó, iná lamára'atacaloje iná napona penaje. Ñaquele iná ajñá iná a'ajnehuá.

<sup>30</sup> Ñaque caja Jesucristo a'acá rinacajó huecá, rijhua'atéjena, rila'acáloje nacaje huajló penaje, hue'emacáloje palá raú penaje.

<sup>31</sup> Marí que Tupana puráca'alo lana'aquejami quemacá: "Pajhua'atéchaca huá'acajeñomi i'imaño pajluhua japi necá queja. Aú caja achiñá anúca'aro richi'iná liyá, ri'imacáloje riyajalo hua'até penaje. Raú iyamá ina'uqué i'imaño pajluhua queja pajhua'atéchaca," que Tupana puráca'alo quemacá huá'acajeñomi nacú.

<sup>32</sup> Raú caja rimá Jesucristo, rijhua'atéjena, quele nacú. Huecá rijhua'atéjena i'imaño pajluhua japi queja huecá rijhua'até. Me'echuje ri'imacá ina'uquejlo. E'iyonaja calé palani huani riyucuna.

<sup>33</sup> Ñaque caja rimacá huá'acajeñomijlo, ne'emacáloje pajluhua japi necá queja pajhua'atéchaca. Rimá achiñánajlo, nahuátacaloje naluna, nahuátaca necó que caja. Rimá caja inaánajlo nacú, nephácaloje naluna ja'apí penaje.

## 6

<sup>1</sup> Yuhuanajlo numá: Jema'á ichi'iná ja'apiyá. Palani marí que la'acana Tupánajlo. Yuhuaná, Jesucristo ja'apiyá i'imacaño, jema'año nachi'iná ja'apiyá.

<sup>2</sup> Tupana quemari iyamá té'ela quele nacaje la'acana nacú, ina'uqué i'imacáloje ra'apiyá penaje. Ripuráca'alo naquiayana quemari yuhuanajlo marí que: "Iphá ichi'iná ja'apí." Najloja calé rarucá júpja eja'ahuá chu i'imacana ra'apiyá jema'acana aú.

<sup>3</sup> Ñaquele rimá najló: "Iphá ichi'iná ja'apí, palá i'imacáloje raú penaje, júpja i'imacáloje eja'ahuá chu raú penaje," que rihuacára'aca yuhuaná i'imacá.

<sup>4</sup> Nachi'inajlo numá: I'imaniya yuriná iyani hua'até, nala'acá piyá ujhuí inacu. Iamára'a necá palá. Jehuñña'ata caja necá palá Tupana puráca'alo nacú, nala'acáloje Tupana huátacare caje penaje.

<sup>5</sup> Ajopana hua'até sápageñojlo numá: Palá jema'acá huacára'año icá sápacaje nacú ja'apiyá. Iphá caja na'apí. Napiyá quero'ocano queja jema'acá na'apiyá. Caja ihue'epi méqueca iná la'acá. Locópa'alaja jema'á na'apiyá. Jesucristo hua'até sápageño i'imacaño que caja isápaca najhua'até.



<sup>6</sup> Apala ila'á palá nejlú chuhuaja isápaca ee, napechu i'imacáloje palá inacu raú penaje. Ila'á palá ñaqueé caja, uncaja que namá icá. Jesucristo hua'atéjena icá; rijló ila'á nacaje. Ñaquele ipechu i'imá caphí sápacaje nacú, Tupana huátaca que isápaca palá.

<sup>7</sup> Pu'ují ipechu aú ila'á isápaca'ala. Tupana hua'até isápacajla que caja ila'acá isápaca'ala. Ri'imacáloje palá caja Tupana nacú penaje ila'á isápaca'ala palá. Rijhua'até sápageño que caja icá, isápaca aú ajopana hua'até.

<sup>8</sup> Ihue'epí marí: Tupana a'ajeri ina'uquejlo palá nala'acare loco'opáneje rihuemí. Ñaqueé caja ricá ajopana hua'até sápejeñojlo. Najluhua sápacañojlo ñaqueja caja ricá. Ra'ajé palá nala'acare huemí najló.

<sup>9</sup> Sápacaje mináricanajlo numá: I'imá ñaqueé caja palá ijhua'até sápageño hua'até. Ihuacá'aniya necá tejmuji huani sápacaje nacú. Ihue'epí marí: Re caja isápaca'ala mináricana je'echú chu. Imináricana caja ricá ijhua'até sápageño hua'até. Ñaqueé huánija icá, ijhua'até sápageño hua'até Tupánajlo.

*Iná jema'acá piyá Jiñá Chi'ináricana ja'apiyá yucuna marí:*

<sup>10</sup> Chuhua nojena, ila'á caphí ipéchuhua Huahuacára'ajeri Jesucristo hua'até i'imacana aú. Chá'atajери huani Jesucristo. Chá'atajери huani ri'imacale, i'imá richojé caphí.

<sup>11</sup> Re surárajlo rilecare, richá'atacaloje ripinana raú penaje. Tupana a'arí caja ijlo apú caje lecareji, Jiñá Chi'ináricana chá'ataca piyá icá ripajlácare aú. Ijña'á inacojó rilecare ra'acare ijlo, inócaloje raú penaje.

<sup>12</sup> Uncá huenócalo ina'uqué hua'até. Re nanapona. Re caja ajopana, jiñana huacára'ajeño necá yenú. Uncá nanapona i'imalá; napéchuja calé re. Chapújne'equena huani necá. Necá, uncá iná amálarena, huátano huachá'atacana, huala'acá piyá palá. Necá caja huacára'año ina'uqué la'acá pu'uhuaré marí eja'ahuá chu. Ñaquele cajrú ina'uqué la'acá pu'uhuaré marí eja'ahuá chu. Nahuacára'ajeño, jiñana pechu huátaca que nala'acá pu'uhuaré. Necá huátano huame'é a'acana najluhua, hue'emacáloje huamanaicho la'acana nacú, pu'uhuaré la'acana nacú najhua'até penaje.

<sup>13</sup> Ñaquele a'á inacojó nacaje Tupana yurícare ijlo, ijmeñátacaloje icó Jiñá Chi'ináricana liyá raú penaje. Ipechu apichátajeri iphájica huacajé, itára'ajo camachá rijló raú. Caphí richojé tára'acano aú ja ichá'ataje Jiñá Chi'ináricana.

<sup>14</sup> Surárana a'año nahuachaphila nanacuhúa. Na'á caja pejrú'uhua melanani ne'ecú pajré penaje, ne'ecú mejñátajona penaje. Eyá icá caja mejñátajeño icó Jiñá Chi'ináricana chapujré liyá, quehuácaje puráca'aloji chuhúa i'imacana aú. Caphí ipechu i'imacale Jesucristo chojé, Tupana lamára'atari icá pu'uhuaré ila'acare liyá. Caja palánija icá Tupánajlo chuhua. Marí nacoje hue'epícana mejñátari caja icá riliyá.

<sup>15</sup> Surara a'arí ri'ima'ulá rinacuhúa, ri'ima'ulá rinacuhúa penaje, ri'ijnacáloje nócajo richu penaje. Jesucristo yucuna pala'atari ina'uqué pechu Tupánajlo. I'imá riyucuna i'imacana nacú. Surara i'ijnacá ri'ima'ulá rinacu queja nócajo, que caja iná i'ijnacá Jesucristo yucuna i'imajé ajopánajlo, ajopánajlo que. Nema'acachu ra'apiyá, iná capichata naliyá pu'uhuaré nala'acare raú.

<sup>16</sup> Ipechu i'imá caphí Tupana chojé, piyuque Jiñá Chi'ináricana le'ejé chapú caje chá'ataca piyá icá. Iná pechu i'imacachu caphí Tupana chojé, surárajlo jemú que caja inajlo ricá. Raú namejñata necó ijijila liyá, naca'acare quera'atani hua'até. Ñaqueé caja iná ca'acá iná liyá Jiñá Chi'ináricana le'ejé chapú caje, iná pechu i'imacachu caphí Tupana chojé.

<sup>17</sup> Nenóquela surara pehuíla'aruya ijijila aú, uncá meque nala'alajla ricá, re rihuíla'aru mejñátajona i'imacale. Ñaqueé caja Jesucristo ijlo. Icapichaco piyá Tupana liyá, ri'imatá icá rijluhua. I'imá Tupana puráca'alo chojé caphí; jema'á ra'apiyá. Raú Tupana Pechu capichátari pu'uhuaré la'acana iliyá. Surara capichátari ripinana rijo'ojohua aú. Ñaqueé caja inajlo Tupana puráca'alo lana'aquejami, Tupana Pechu capichátacaloje pu'uhuaré la'acana iná liyá raú penaje. Marí que inajlo lecareji Tupana a'acare inajlo.

*Napura'acóloje Tupana hua'até penaje yucuna marí:*

<sup>18</sup> Ipura'ó Tupana hua'até piyuque nacaje nacú. Iquejá'a nacaje riliyá; mahuó iquejá'aca nacaje riliyá. Tupana Pechu a'ajeri iñaté rijhua'até pura'acano aú. I'imá caja capechúruna rijhua'até pura'acano aú. Iyuríniya caja rijhua'até pura'acano. Ipura'ó Tupana hua'até piyuque rile'ejena ina'uqué nacú.

<sup>19</sup> Ipura'ó caja nunacu, Tupana a'acáloje nuñaté nu'umajica aú riyucuna ajopánajlo. Ipura'ó caja nunacu, caphí nupechu i'imacáloje riyucuna i'imacana nacú penaje, riyucuna jema'ajeño hue'epícaloje meque Tupana i'imataca ina'uqué capichácajo liyá raú penaje. Piyuqueja ina'uquejlo riyucuna. Micho'ojnejiya riyucuna i'imacá ina'uquejlo júpimi i'imacá.

<sup>20</sup> Ñaquele Tupana huacára'ari nucá, nu'umacáloje riyucuna penaje. Ripuráca'alo aú nu'umá ina'uquejlo riyucuna. Riyucuna i'amacana chona, maare nucá ina'uqué huajáquelana chu me'etení. Ipura'ó caja Tupana hua'até nunacu, nu'umacáloje caphí riyucuna i'amacana nacú, rihuátaca que penaje.

*Caja penaje rimacare nacú najló marí:*

<sup>21</sup> Tíquico quemájeri ijlo nunacu, méqueca nucá maare, naca nula'á. Jesucristo ja'apiyá jema'ajeri caja ricá huajhua'até. Iqui'ija nuhuátacare ricá, Tíquico. Palá caja ra'acá nuñaté Tupana sápacala'ala la'acana aú.

<sup>22</sup> Rimacáloje méqueca huecá maárohua penaje nuhuacára'a ricá ichaje i'amacá, rila'acáloje caphí ipechu raú penaje.

<sup>23</sup> Jesucristo jara'apá Tupana. Nuhuata Tupana, Jesucristo hua'até la'acá palá ipechu. Nuhuata caja Tupana, Jesucristo hua'até a'acá iñaté, ihuátacaloje íqui'ija pecohuácaca raú penaje. Nuhuata caja na'acá iñaté, ipechu i'amacáloje caphí nachojé penaje.

<sup>24</sup> Nuhuata caja Tupana la'acá inacu palá. Nuhuata caja Tupana la'acá palá necá nacú, uncá yurilaño naliyó Jesucristo huátacana íqui'ija. Marí que nuhuátaca ri'amacá ijlo. Caja quetana riyucuna.

## FILIPENSES

*San Pablo i'imacá ina'uqué huajáquelana chu huacajé, rihuacára'a Filipos erúnajlo marí puráca'aloji i'imacá:*

<sup>1</sup> Nucá Pablo, Timoteo, quele Jesucristo hua'até sápageño huecá. Huacára'año ijlo marí puráca'aloji. Piyuqueja Jesucristo hua'atéjena Filipos e i'imacáñojlo huahuacára'a marí puráca'aloji. Re ijhua'até amájeño; re caja ijhua'até nañaté a'ajeño. Ijló piyuque huahuacára'a marí puráca'aloji. Caja Tupana le'ejena ina'uqué icá. Pajluhua japi ricá queja icá Jesucristo hua'até.

<sup>2</sup> Huara'apá huani Tupana; Hue'emacana huani Jesucristo. Nuhuata Tupana, Jesucristo hua'até la'acá ipechu palá. Nuhuata caja i'imacá napalamane ja'apiyá.

*Pablo pura'acó Tupana hua'até nanacu yucuna marí:*

<sup>3</sup> Nuhue'epica quehuá icá, nu'umá riyucuna Tupánajlo: "Palá pila'acá nucá, nema'acale pa'apiyá," que numacá rijló.

<sup>4</sup> Nupura'acó aú Tupana hua'até, pu'ují nupechu aú nupura'ó inacu rijhua'té.

<sup>5</sup> Marí que nupechu inacu, a'acale nuñaté liñeru aú, nu'ujnacáloje Jesucristo yucuna i'imagé ajopánajlo, ajopánajlo que penaje. Iqueño'ocá riyucuna jema'acana huacajé eyá maárejecha icá a'año nuñaté.

<sup>6</sup> Caja Tupana queño'orí ipechu la'acana palá, i'imacáloje palá la'ajeño raú penaje. Nuhue'epí ñaqueja rila'ajica ipechu palá, a'ajná Jesucristo iphájica majó ejená.

<sup>7</sup> Palani marí que nupechu i'imacá inacu piyuqueja, caí huani nuhue'epicale inacu. Jesucristo i'imatari ina'uqué capichácajo liyá. Riyucuna i'imacana chona naca'á nucá ina'uqué huajáquelana chojé. Nupura'ó huahuacára'ajeño hua'até riyucuna nacú, nahue'epicaloje quehuácaca ricá penaje. Tupana palamane aú nu'umá Jesucristo yucuna ajopana ina'uquejlo. Ripalamane aú caja icá a'año nuñaté liñeru aú, nu'ujnacáloje riyucuna i'imagé ajopánajlo, ajopánajlo que penaje.

<sup>8</sup> Tupana hue'epirí meque íqui'ica huani nuhuátaca icá piyuqueja. Jesucristo palamane aú iná huátaca íqui'ija ajopana ina'uqué. Ñaquele nuhuata icá íqui'ija.

<sup>9</sup> Nupura'ó Tupana hua'até inacu quehuá numacá rijló, ra'acáloje iñaté penaje, íqui'ija ihuátacaloje pecohuácaca richaje, richájeno que penaje. Numá caja rijló, ra'acáloje ijlo hue'epicaje, ihue'epicaloje Tupana nacojé mecajeca ricá raú penaje.

<sup>10</sup> Hue'epicaje Tupana a'acare inajlo aú iná hue'epí nacaje la'acana, chá'atari apú nacaje iná la'acare. Marí que la'acana aú uncá na i'imalaje ipechu nacú pu'uhuaré. Raú caja uncá na i'imalaje ijlo, rihuajácaloje icá penaje, Jesucristo iphájica majó huacajé.

<sup>11</sup> Cajrú huani ila'ajica palá Jesucristo palamane aú. Marí que ila'ajica, ajopana ina'uqué pechu i'imacáloje Tupana nacú palá penaje. Napura'acóloje palá Tupana nacú penaje, ila'ajé marí que. Marí que ri'imacáloje ijlo penaje, nupura'ó Tupana hua'até inacu.

*Pablo hue'epica Jesucristo ritucumó yucuna marí:*

<sup>12</sup> Nojena, caja naca'á nucá marí ina'uqué huajáquelana chojé. Nuhuata ihue'epica maare nu'umacale, ajopana, ajopana que jema'acá Tupana yucuna. Ri'imataca ina'uqué capichácajo liyá yucuna jema'acó piyuqueja ina'uquejlo maare, naca'acale nucá calajeruni chojé.

<sup>13</sup> Surárana i'imacaño maare, nuhua'aphé hua'ató jema'año riyucuna. Hue'emacana hua'até i'imacaño maare jema'año caja riyucuna. Hue'emacana ñacaré hua'aphena i'imacaño necá. Piyuqueja necá jema'año riyucuna na penájeca nucá maare ina'uqué huajáquelana chu. Jesucristo yucuna i'imacana ajopánajlo chona nucá maare. Ajopana i'imacaño maare jema'año caja riyucuna.

<sup>14</sup> Cajrú Jesucristo ja'apiyá jema'ajeño pechu i'imacá richaje queno caphí Tupana chojé, namaca aú uncá nuquero'oló marí chu i'imacana. Ñaquele chuhua uncá nahuó la'aló na'apejé Tupana puráca'alo yucuna i'imacana nacú ajopánajlo.

<sup>15</sup> Ne'iyajena i'imaño Jesucristo yucuna ajopánajlo, nachá'atacaloje nucá raú penaje. Chapú nahuó i'imacale nuchá, ne'emá riyucuna. Ajopana piño i'imaño Jesucristo yucuna. Palá napechu i'imacá nunacu; palá caja napechu i'imacá Jesucristo yucuna nacú.

<sup>16</sup> Ne'iyajena, numacárena nacú, i'imaño Jesucristo yucuna. Nacaje nahuátacare najluhua chaya ne'emá riyucuna. Uncá ne'emalá riyucuna, ri'imacáloje palá ajopánajlo penaje. Nahuata nuchá'atacana, nupechu la'acóloje camu'ují raú penaje, calajeruni chu nu'umacá quetana. Ricá penájeca ne'emá riyucuna ajopánajlo.

<sup>17</sup> Eyá ajopana, ne'emá Jesucristo yucuna ajopánajlo, nahuátacale íqui'ija nucá. Nahue'epí Tupana a'acá nu'umacá, nupura'acóloje ajopana hua'até Jesucristo puráca'alo chaya penaje.

<sup>18</sup> Marí que ne'emacá riyucuna. Palani napechu aú ca'ajná ne'iyajena i'imaño Jesucristo yucuna ajopánajlo. Uncá paala ca'ajná ne'iyajena pechu i'imagá. Uncá naje calé nojló nájeca ne'emacá riyucuna ajopánajlo. Pu'ujija nupechu la'acó, ne'emacale riyucuna ajopánajlo. Marí que nala'acá aú nala'á nupechu pu'ují.

<sup>19</sup> Nuhue'epí ñaqueja nupechu i'imajica pu'ují, ipura'acole Tupana hua'até nunacu. Jesucristo a'arí nuñaté ripechu aú, nácho'otacaloje nucá marí ina'uqué huajáquelana chiyá penaje. Marí la'arí nupechu pu'ují.

<sup>20</sup> Marí caje nuhuatá iquí'i nujluhua: Nuhuata nupechu i'imagá caphí Jesucristo yucuna i'imagana nacú. Uncá nuhuátala riyucuna ja'apí apáña'acano. Nenoje ca'ajná nucá, no'opaje ca'ajná richiyá. Uncá nuhue'epila méqueca ca'ajná ri'imajica nojló. Nuhuátaja ajopana pechu i'imagá palá Jesucristo nacú richaje, richaje que. Nuhuata caja piyuque nacaje la'acana ina'uquejlo, palá napechu i'imagáloje Jesucristo nacú raú penaje. Marí caje penaje nuhuata marí eja'ahuá chu i'imagana. Nenoje ca'ajná nucá, marí que nu'umacale.

<sup>21</sup> Jesucristoja calé nuhue'epí nutucumó me'etení marí eja'ahuá chu i'imagana aú. Nuta'ajica ee, richaje palaca ri'imajica nojló.

<sup>22</sup> Marí eja'ahuá chu nu'umacá quetana, nula'ajica nacaje, ri'imagáloje palá Jesucristojlo penaje. Marí caje aú uncá nuhue'epila mecajeca nuhuátacare, eja'ahuá chu i'imagana ca'ajná, taca'acaje ca'ajná.

<sup>23</sup> Puhuichani nojló rihue'epícana mecajeca palani. Nuhuata taca'acaje, nu'umacáloje Jesucristo hua'até penaje. Palani huani nojló rijhua'até i'imagana.

<sup>24</sup> E'iyonaja, palani ijloje penaje nu'umacá aú marí eja'ahuá chu.

<sup>25</sup> Marí nuhue'epí quehuaca: Nuhue'epí ejo'ocaja nu'umajica ijhua'até, no'ocáloje iñaté penaje. Richaje, richaje que ipechu i'imagáloje caphí Jesucristo chojé raú penaje. Pu'ují ipechu i'imagáloje raú penaje.

<sup>26</sup> Marí caje aú palá ipechu i'imajica Jesucristo nacú nu'umajica aú ijhua'até.

<sup>27</sup> Richaje nuhuata ila'acá marí que: Nuhuata i'imagá eja'ahuá chu palá. I'imá pajhua'atéchaca palá Jesucristo purá'alo quemacá que. Nu'umajé ijhua'até ca'ajná, uncá ca'ajná nu'umalaje ijhua'até. Nuhuátaja calé yucu iphaca nunacu marí que: "Ejo'ocaja jo'ó napechu caphí Jesucristo chojé. Rejenohuaja péchuruna necá, Tupana huátaca que la'acana nacú. Caphí péchuruna caja necá ajopana ina'uquejlo Jesucristo yucuna i'imagana nacú." Marí que nuhuátaca nemacá inacu nojló.

<sup>28</sup> Re ca'ajná chapú péchuruna inacu. Ihuó la'aníyo na'apejé. Namaca aú ilé que i'imagá, nahue'epeje Tupana hua'atéjenaca icá. Raú caja nahue'epeje capichájeño penájena necá. Tupánaja calé i'imatari ina'uqué capichácajo liyá.

<sup>29</sup> Tupana palamane aú ipechu i'imá caphí Jesucristo chojé. Ripalamane aú caja ijña'ajé chapú caje panacu. Marí que huajló ricá, ripalamane hue'emacale.

<sup>30</sup> Ajopana ina'uqué la'año icá chapú, Jesucristo ja'apiyá jema'ajeño i'imagale. Ma'apona que caja nala'acá nucá chapú maare. Rejenohuaja huamaca chapú caje yajhué; pajñacani huajña'ala ricá panacu. Ica'amañá nala'acá nucá chapú, ijhua'até nu'umaqué huacajé. Chuhua icá jema'año piño nala'acá nucá chapú yucuna.

## 2

*Cajrú péchuri Jesucristo i'imagá. E'iyonaja calé rila'á ricó ajopana ina'uqué ja'apejé que péchuri, marí eja'ahuá chu ri'imaqué huacajé. Marí riyucuna:*

<sup>1</sup> Jesucristo la'arí rijhua'atéjena pechu caphí. Iquí'ija rihuátacarena caja huecá. Marí que ri'imagale huajló, palá huapechu. Ripechu aú ja ri'imá rijhua'atéjena hua'até. Raú rila'á ina' péchu palá, ina' hue'epícaloje ajopana mu'ují raú penaje. Rila'á caja ina' péchu palá, ina' hue'epícaloje caí ajopana ina'uqué nacú raú penaje.

<sup>2</sup> Marí que caja ri'imagachu ijlo, ila'á pu'ují nupechu marí que ila'acare aú: Ipechu i'imá panacojéchaca que pajhua'atéchaca. Ipechu i'imá panacojéchaca que iquí'ija pecohuácaca huátacana nacú. Ipechu i'imá caja panacojéchaca que iquí'ija Tupana huátacana nacú. Ipechu i'imá caja panacojéchaca que Tupana Pechu ja'apiyá i'imagana aú. Ipechu i'imá caja panacojéchaca que, ñaqueja itucumó hue'epícana aú.

<sup>3</sup> Ila'aníya nacaje ijluhuaja calé. Ila'aníya caja nacaje, ila'acáloje inacuhá chá'atajeño que huani raú penaje. Ila'á inacuhá ajopana ja'apejé que i'imagáño. Marí que ipechu i'imagá pajluhuano, pajluhuano que inacuhá: "Apú hue'epiri nuchaje" que.

<sup>4</sup> I'imaniya i'imajóhuaja paliyácaca. Ihue'epí pecohuácaca nacaje la'acana aú.

<sup>5</sup> Ipechu i'imá Jesucristo pechu i'imagá que caja. Marí que ripechu i'imagá:

<sup>6-7</sup> Tupana pechu que caja Jesucristo pechu i'imagá. Rihuátacula, ri'imagajla ricá que caja. E'iyonaja calé riyurí richó Tupánajlo, ri'imagáloje ra'apiyá penaje. Rimoto'ó marí

eja'ahuá chu i'ímacá, ri'ímacáloje ina'uqué huecá que caja penaje. Rila'á ricó Tupana hua'até sápa jeri queja.

<sup>8</sup> Ina'uqué ri'ímacá huacajé, ri'ímá na'apejé queja. Rihuacajé nenoque uncá ina'uqué laruna a'ahuaná apiyáccanami nacojé i'ímacá. E'iyonaja a'ahuaná apiyáccanami nacojé nenó ri'ímacá. Tupana ja'apiyá jema'acana aú riyurí richó najló, nenócaloje ricá penaje.

<sup>9</sup> Marí que rema'acale ra'apiyá, Tupana a'arí ricá ajopana chá'atajeri penaje. Tupana a'arí ricá, ri'ímacáloje ajopana huacára'ajeño chaje huani penaje.

<sup>10</sup> Piyuqueja je'echú chujena, eja'ahuá chujena, caja taca'acaño, quele, i'ímaño ra'apejé huani. Ri'ímacáloje nahuacára'ajeri penaje, Tupana a'arí ri'ímacá. Ne'erúpachi aú huánija natára'ajo rijimaje, nachaje huacára'ajeri ri'ímacale.

<sup>11</sup> Nahue'epeje ajopana chaje huani ricá. Marí que ri'imajica, nemacáloje Jesucristo nacú: "Ajopana chaje Huacára'ajeri huani ricá." Raú napura'ajó palá Tupana nacú.

*Jesucristo hua'atéjena amátaño ajopana eja'ahuá chujena palá la'acana aú. Riyucuna marí:*

<sup>12</sup> Nojena, íqui'ija nuhuátacarena, palá huani jema'acá no'opiyá nu'umaqué ijhua'até huacajé. Me'etení jua núcá iliyá. Chuhua nuhuátaca jema'acá no'opiyá richájeno que. Tupana i'imatari icá capichácajo liyá. Ri'imatá iná capichácajo liyá, iná i'ímacáloje palá la'ajeri penaje. I'imá ra'apiyá quero'ocajo nacú, i'ímacá piyá pu'uhuaré la'ajeño. Raú i'imajó capichácajo liyá.

<sup>13</sup> Tupana la'arí iná pechu palá, iná huátacaloje palá la'acana raú penaje. Ra'á caja iná ñaté rila'acana aú, iná la'acáloje palá rihuata que raú penaje.

<sup>14</sup> Piyuque nacaje ila'ajica quehuá aca'aniya pamanáchaca. Aca'acaniyo caja pajhua'atéchaca rijimaje.

<sup>15-16</sup> Marí que ila'ajica ee nacaje, uncá na calé quemajeri inacu: "Pu'uhuaré la'ajeño necá" que. Tupana yaní icá. Ajopana ina'uqué e'iyohuá icá marí eja'ahuá chu. Pu'uhuaré la'ajeño necá; uncá ina'uqué laruna caja necá. Uncá nala'alá palá, uncale nahue'epila Tupana nacojé. Ica i'imajeño quehuacaje puráca'aloji yucuna najló. Naquele nahue'epeje palá la'acana nacojé. Ripuráca'alo aú iná hue'epí méqueca iná la'acá, iná i'ímacáloje matajnaco je'echú chu raú penaje. Ricá puráca'alo ja'apiyá i'imacana aú iná i'imajé matajnaco je'echú chu. Ila'ajica ee numacá ijlo que, nupechu i'imajé palá huani inacu, Jesucristo iphájica majó huacajé. Raú nuhue'epeje uncá majopeja calé nohuíña'ataca icá Tupana nacú i'ímacá.

<sup>17</sup> Nenoje ca'ajná núcá, Jesucristo yucuna nu'umacá chona. E'iyonaja pu'ují nupechu raú, nu'umacale Tupana puráca'alo yucuna ijlo i'ímacá. Riyucuna ja'apiyá jema'acana aú ipechu i'imá caphí Jesucristo chojé. Marí palani Tupánajlo. Marí la'arí huapechu pu'ují pajhua'atéchaca.

<sup>18</sup> Nenoje ca'ajná núcá, nu'umacale Jesucristo yucuna ajopánajlo, ajopánajlo que. Marí pachá nenoje ca'ajná núcá. E'iyonaja nuhuata ipechu i'ímacá pu'ují nujhua'até, ihue'epícale riyucuna nuliya i'ímacá.

*Timoteo, Epafrodito, quele yucuna marí:*

<sup>19</sup> Tupana huátajica ee, mequetana i'imajemi nuhuacára'aje Timoteo ichaje rejo. Quéchami ri'imajica piño nojló riyucuna, nuhue'epícaloje méqueca icá rehuá penaje. Aú pu'ují nupechu la'ajico piño.

<sup>20</sup> Uncá apú i'imalá maare nujhua'até, nupechu que caja péchuri. Uncá caja apú i'imalá a'arí rinacojó icá, nacaje i'ímacáloje palá ijlo penaje. Ricaja calé, Timoteo, a'arí rinacojó icá.

<sup>21</sup> Piyuque ajopana a'año nanacojó nacaje nuhuátacare najluhua. Eyá Jesucristo huátacare caje, uncá na'alá nanacojó.

<sup>22</sup> Ica hue'epiño caliyani Timoteo nojló. Ica amaño ra'acá nuñaté Jesucristo yucuna i'imacana aú, ilérohua hue'emaqué ijhua'até huacajé. Iná i'irí a'acá iná ñaté, que caja ra'acá nuñaté raú.

<sup>23</sup> Naquele nuhuata rihuacára'acana ca'ajno amaje. Nuhue'epíjica ee méqueca nacaje i'imajica nojló, ejéchami nuhuacára'ajica ricá ichaje.

<sup>24</sup> Caphí nupechu Hue'emacana huani chojé, mequetana i'imajemi rácho'otacaloje núcá ina'uqué huajáquelana chiyá penaje. Ejéchami nu'ujnajica ichaje.

<sup>25</sup> Nuhuata caja Epafrodito huacára'acana ichaje. Jesucristo hua'ateje ricá. Nujuhúaque'ehue queja risápaca nujhua'até. Hualaca'aphé huehuíña'ataca ina'uqué Tupana nacú, nayurícaloje naliyó pu'uhuaré nala'acare raú penaje. Nujuhúaque'ehue ricá marí caje la'acana nacú. Ihuacára'acare nuchaje ri'ímacá, ra'acáloje nuñaté penaje.

<sup>26</sup> Huechi rihuátaca amácana piyuque. Rimicho'ojneja rihuátaca ritami caje hua'até i'imacana, jema'acá piyá riyucuna ilérohua, ipechu la'acó piyá camu'ují raú. E'iyonaja jema'á riyucuna i'ímacá. Marí caje la'arí ripechu camu'ují huani.

<sup>27</sup> Ritami huani jo'ó ri'imacá; ujú caje chiyó ritaca'acajla. Tupánaja calé hue'epiri huamu'ují rijhua'até. Chapú caje yajhué nomá me'etení. Ritaca'aquela, richaje nomácajla riyajhué.

<sup>28</sup> Ñaquele huechi nuhuátaca rihuacára'acana ca'ajno ichaje, amácaloje ricá penaje. Aú ipechu i'ímajé piño pu'ují. Nuhuata caja rihuacára'acana ca'ajno ichaje. Camu'ují quemachi nupechu maare. Aú nuhuata rihuacára'acana, camu'ují caje ja'apácaloje nuliya' penaje.

<sup>29</sup> Eco i'ímá rijhua'até palá. Eco ipechu i'ímá rinacu pu'ují, Jesucristo hua'ateje ri'imacale ijhua'até. Iphá palá huani ra'apí. Ilé que i'imacaño ina'uqué ja'apí iphá palá.

<sup>30</sup> Ujú caje chiyó ritaca'acajla Jesucristo huátaca que la'acana chaya. Cajrupi ri'imacá huajló. E'iyohuaja ra'acá nuñaté i'imacá. Ica apumí chojé que ra'acá nuñaté, uncale i'imalajla nujhua'até nuñaté a'ajeño penaje.

### 3

#### *Palani caje Tupana huátacare huala'acá yucuna marí:*

<sup>1</sup> Chuhua nojena, ipechu i'ímá pu'ují Hue'emacana huani nacú. Numaje piño ijlo nacaje nacú. Caja numá ijlo rinacu i'imacá. Uncá nucahuíla'alo ñaqueja caja quemacana nacú. Nulana'á piño ijlo riyucuna papera chojé, ri'imacáloje palani ijloje penaje.

<sup>2</sup> Re ina'uqué, pu'uhuaré la'ajeño necá. Chapú Tupana nacú péchuruna caja necá. Nahuacára'a ina'uqué mata'acá achíñana chinuma, napechu i'imacale: "Marí que iná la'acá, iná i'imacáloje Tupana hua'ateje raú penaje." Amá icó naliya'.

<sup>3</sup> Huecá i'ímaño rijhua'atéjena huani, Jesucristo i'imatácale huecá capichácajo liya'. Ricaja calé la'arí pu'ují huapechu Tupana nacú. Uncá huapechu i'imalá caphí nacaje huala'acare chojé, hue'ematácaloje huecó capichácajo liya' raú penaje.

<sup>4</sup> Nacaje nula'acare i'imacá, i'imatáquela núcá capichácajo liya', núcá chá'atarijla ajopana ñaqué la'acana aú:

<sup>5</sup> Marí caje aú nuchá'atajla necá: Hueji que cuhuá'ata que cala nomoto'ocá ejomi namata'á nuchinuma i'imacá. Israelmi chu laquénami naquiyana núcá; Benjaminmi chu laquénami naquiyana caja núcá. Nuchi'nami chuna i'ímaño hebreo naquiyana. Ñaquele hebreo naquiyana núcá. Fariséona naquiyana caja nu'umacá. Napechu que caja nupechu i'imacá Tupana puráca'alo nacú i'imacá.

<sup>6</sup> Tupana huátaca que la'acana nuhue'epí nutucumó i'imacá. Uncale nuhue'epila palá Tupana nacóje rihuacajé, chapú nomaca ajopana i'imacá. Uncá nupechu que calé péchuruna ne'emacale, uncá nuhuátala necá. Aú calé nula'á Jesucristo hua'atéjena chapú i'imacá. Tupana puráca'alo, Moisesmi chu nula'acare, ja'apiya' noma'á palá huani i'imacá. Uncá na calé quemaquerijla nunacu: "Uncá richuha'á calé ri'ijnatá ricá palá" que.

<sup>7</sup> Jupimi nupechu i'ímá nunacuhua': "Palani japi núcá Tupánajlo" que. Caja queja nupechu i'imacá nunacuhua', nu'umacale numíchaje nacú ijlo ja'apiya'. Raú nuchá'atajla ajopana. Chuhua uncá na penaje calé nojló quele, nu'umacale Jesucristo hua'ateje.

<sup>8</sup> Uncá na penaje calé nojló chuhua ricá jupichumi nu'umacare ja'apiya'. Nuhuacára'ajeri Jesucristo ja'apiya' i'imacana ijlnami chojé, capicharo queja nojló jupichumi. Palani huani nojló ra'apiya' jema'acana. Nacaje cupáquejami, que nuhue'epíca nacaje jupimi nuhuátacare nacú. Caja nuyurí ricá nuyámojo, nu'umacáloje Jesucristo hua'ateje raú penaje.

<sup>9</sup> Uncá lamára'ataquejami que calé nu'umacá Tupánajlo Moisesmi chu puráca'alomí ja'apiya' i'imacana aú. Eyá chuhua lamára'ataquejami que núcá Tupánajlo, caphí nupechu i'imacale Jesucristo chojé. Raú nu'umá lamára'ataquejami que pu'uhuaré nula'acare liya'.

<sup>10</sup> Jesucristo macápo'oro i'imacá. Ejomi ra'á ra'apiya' jema'ajéñojlo Tupana Pechu. Nuhuata piyuque nacaje la'acana Ripéchu huacára'aca que. Jesucristo ña'arí chapú caje panacu huajlóje penaje i'imacá. Ñaque' caja nuhuátaca chapú nala'acare núcá ña'acana panacu riyucuna i'imacana chaya. Nenoje ca'ajná núcá, no'opátacale riyucuna. Jesucristo taca'arí huachaya i'imacá que caja nuhuátaca taca'acana riyucuna ja'apátacana ajopánajlo chaya.

<sup>11</sup> Nutaca'ajica ejomi nuhuata macápo'ocajo rimacápo'oco i'imacá que caja. Marí caje nuhuata nujuhua.

#### *Richaje, richaje que Pablo huátaca Tupana huátaca que la'acana. Riyucuna marí:*

<sup>12</sup> Uncá numalá nunacuhua': "Jesucristo que caja núcá." Uncá jo'ó nu'umalá palá huani Jesucristo que caja. E'iyonaja caphí nupechu aú nuhue'epí nutucumajo que, nula'acáloje nacaje rihuátacare caje penaje. Marí caje penaje Jesucristo a'arí núcá rijhua'ateje penaje.

<sup>13</sup> Nojena, nacaje nuhuátacare la'acana, uncá jo'ó ri'imalá ñaqué nojló me'etení.

<sup>14</sup> Ri'imacáloje ñaqué nojló penaje, nupechu capicháñari nuyámojo i'imacare, nula'acáloje nacaje ejo'ocaja yurícaro nutucumó penaje. Caphí nula'acá nupéchuhua, nula'acáloje nacaje rihuátaca que. A'ajná nutaca'ajica ejená nuhuata ñaqué la'acana. Je'echú chu i'imajícáño penájena ra'á huecá Jesucristo hua'atéjena. Rejo nu'umajica ejená nula'ajica rihuátaca que.

<sup>15</sup> Tupana huátaca que huani la'ajéñojlo numá: Ipechu i'imacáloje nupechu que caja ñaqueé la'acana nacú penaje. Apala e'iyajena pechu ca'ajná apojó quemachi. Eco Tupana la'á ipechu palá, iphátacaloje nupechu raú penaje.

<sup>16</sup> Me'etení puráca'aloji i'imacare chuhua, chuhuaja iyuró.

<sup>17</sup> Nojena, ila'á palá nula'acá que caja. Palá nu'umacá e'iyohuá, ihue'epícaloje méqueca iná i'imacá palá raú penaje. Ihue'epí mecajenaca inaquiana la'acá ñaqueé caja palá.

<sup>18</sup> Jesucristo taca'arí a'ahuaná apiyácacanamí nacojé i'imacá, ricapichátacaloje pu'uhuaré ina'uqué la'acare naliyá penaje. Re ina'uqué naquiyana, uncá huani na'alá nanacojó ricá. Uncá nahuátala rica'acá pu'uhuaré nala'acare nanaquiyá. Caja pulapecha numacá ijlo rinacu. Chuhua ñaqueja caja numacá ijlo nuyaco.

<sup>19</sup> Caja penaje nacapichájico Tupana liyá. Cajrú aññacaje nacú necá; cajrú i'iracaje nacú caja necá; namanaicho la'acana nacuja caja necá. Ricá nacuja napechu. Re nacaje iná la'acare iná apaña'o ra'apí. E'iyonaja necá uncá apaña'alaño ra'apí. Palá napechu i'imacá nanacuhú rila'acana aú. Nacaje marí eja'ahuá chu i'imacare nacuja napechu.

<sup>20</sup> Uncá necá que calé huecá. Nacaje je'echú chu i'imacana nacú huapechu. Huañacaré huani je'echú chu. Richiyá Hue'emátájeri huaícha majó. Ricá huátacana nacuja huecá me'etení. Jesucristo, Hue'emacana huani ricá, numá nacú.

<sup>21</sup> Ricá apiyácajeri huanapona huajló. Capichájero penaje huanapona, hue'emacare hua'até me'etení. Rinapona que caja huanapona i'imajica, palani huani, rihuacajé. Huanapona apiyácajeri hue'epirí piyuque nacaje la'acana, piyuqueja nacaje i'imacáloje ra'apiyá penaje. Ricaja caja hue'epirí huanapona apiyácacana, hue'emacáloje matajnaco ri'imacá que caja raú penaje.

## 4

*Napechu i'imacáloje pu'ují hua'ajini huani Jesucristo nacú penaje yucuna marí:*

<sup>1</sup> Nojena, íqui'i nuhuátacarena icá; nuhuata amácana piño. Icó calé la'año nupechu pu'ují. Palá caja nupechu inacu; nuhuajhuena caja icá. I'má ñaqueja Hue'emacana Jesucristo chojé caphí, me'etení i'imacá que caja.

<sup>2</sup> Evodíajlo, Síntiquejlo numá: Ipechu i'imá panacojéhcaca que pajhua'atéhcaca. Aca'acaniyo pajhua'atéhcaca. Jesucristo hua'atéjena i'imaño pajluhuaja péchuruna pajhua'atéhcaca. Ñaqueja caja nuhuátaca ipechu i'imacá pajhua'atéhcaca.

<sup>3</sup> Picá nujhuáque'ehuejlo numá piño, ñaqueé nacú sápjajeri picá nujhua'até, pijló numá: Eco pilamára'ata napechu, Evodia, Síntique, quele pechu, naca'ácaco piyá pajhua'atéhcaca. Jesucristo ja'apiyá jema'ajeño necá. Nu'umacá rehuá huacajé cajrú na'acá nuñaté, nu'umacáloje Tupana yucuna rehuá penaje. Ñaqueé caja Clemente, ajopana hua'até a'acá nuñaté i'imacá. Piyuque necá i'imajeño Tupana hua'até je'echú chu i'imajica. Caja Tupana quemari nanacu, ne'emacáloje matajnaco je'echú chu penaje.

<sup>4</sup> Ipechu i'imá pu'ují hua'ajini huani Jesucristo nacú. Numá piño ijlo: Ipechu i'imá pu'ujija.

<sup>5</sup> I'imá ina'uqué huani piyuque ina'uqué hua'até. Yehuicha Jesucristo pa'ajico piño majó.

<sup>6</sup> Ihuó ca'aniyo huani. I'má piyuqueja nacaje i'imacare ipechu nacú yucuna Tupánajlo. Iquejá'a riliyá nacaje. Ipechu i'imá palá rila'acare icá nacú rijhua'até pura'acano aú.

<sup>7</sup> Raú Tupana la'arí iná pechu palá huani, iná huo ca'acó piyá raú, iná pechu la'acó piyá camu'ují raú. Palá huani rila'acá iná pechu Jesucristo ja'apiyá i'imacana aú. Uncá meño'ojó iná pechu iphala rilocópa'ala. Palá rila'acare iná pechu, ricá i'imari iná pechu hua'aphé que.

*I'ijnatácaloje ipéchuhua palani nacuja penaje yucuna marí:*

<sup>8</sup> Nojena, caja penaje numaje ijlo: I'ijnatá ipéchuhua quehuácaje nacú. I'ijnatá caja ipéchuhua apú nacaje chaje huani i'imacá nacú. I'ijnatá caja ipéchuhua palá la'acana nacú. I'ijnatá caja ipéchuhua palani nacú, uncá pu'uhuariení nacú calé. I'ijnatá caja ipéchuhua nacaje palani inajlo i'imacare nacú. I'ijnatá caja ipéchuhua palani puráca'aloji nacú. I'ijnatá caja ipéchuhua nacaje palani ajopana la'acare nacú. Marí caje nacú i'ijnatá ipéchuhua, ila'acáloje ñaqueé caja penaje.

<sup>9</sup> Ila'á nacaje nohuíña'atacare nacú icá. Caja nula'á jenacú. Ila'á quele jema'acare no'opiyá. Caja amá nula'acá nacaje rehuá i'imacá. Ñaquele ila'á ñaqueé caja ricá. Ricá la'acana aú Tupana la'ajeri palá ipechu.

*Liñeru na'acare Páblojlo i'imacá yucuna marí:*

<sup>10</sup> Pu'ují huani nupechu nuhuacára'ajeri Jesucristo nacú, ihue'epícale piño nucá nuñaté a'acana aú. Uncá numalá raú: "Caja ipechu capicháñari nucá" que. Uncá ilé que calé ricá. Uncá meño'ojó a'alá nuñaté ya'ajná nu'umacá iliyá aú.

<sup>11</sup> Uncá nula'alá camu'ují nacaje nacú. Pu'ujija nupechu. Caja nuyahua'achó nacaje i'ímacare nucapi hua'até.

<sup>12</sup> Caja nuyahua'achó huejapa nacaje hua'até i'ímacana nacú. Nuyahua'achó caja cajrú nacaje hua'até i'ímacana nacú. Pajimato nupechu nacaje eja'ahuá chu i'ímacare nacú. Palá caja nupechu ñó'ope a'ajnejí i'ímacachu nojló. Palá caja nupechu nujña'acachu me'epejí panacu. Palá caja nupechu ñó'ope nacaje i'ímacachu nojló. Palá caja nupechu uncachu na i'ímalá nojló.

<sup>13</sup> Jesucristo a'arí nuñaté, nula'acáloje piyuque nacaje rihuátaca que penaje.

<sup>14</sup> Eyá icá piño hue'epiño nucá. Palá huani ila'acá nucá raú. Chapú caje yajhué nomá maare, e'iyá ila'á nucá palá.

<sup>15</sup> Ihue'epícare marí: Tupana i'imatari ina'uqué capichácajo liyá. Riyucuna nu'umá ajopánajlo, ajopánajlo que. Ñaquele nócho'o Macedonia te'eré eyá i'ímacá. Rejomi icaja calé a'año nuñaté. Nojló ihuacára'a liñeru i'ímacá. Nujhuáque'ena que nojló icá, a'acale nuñaté raú i'ímacá. Nucá caja a'arí iñaté. Caja nohuíña'ata icá Tupana puráca'alo nacú.

<sup>16</sup> Tesalónica e nu'umacá huacajé, pulapeno que ihuacára'aca nojló liñeru, apú nacaje hua'até i'ímacá. Raú uncá nula'aqué camu'ují nacaje nacú i'ímacá.

<sup>17</sup> Ila'aqué nucá palá; palani nojló ricá. Hua'ató que ila'acá inacuhuá palá, Tupana a'ajícalle iñaté richaje, richaje que palá la'acana aú. Uncá nuhuátala nacaje nujlúhuaja penaje. Nuhuata caja nacaje i'ímacá ijló penaje.

<sup>18</sup> Caja ihuacára'a nojló piyuque nacaje nuhuátacare caje. Nuhuátaca chaje íqui'ica, ihuacára'a nojló nacaje i'ímacá. Nacaje ihuacára'acare nojló Epafrodito hua'até i'ímacá, caje aú re ñó'ope nacaje nojló me'etení. Palani nojló ila'acare; palani caja Tupánajlo ricá. Nacaje rihuátacare, pu'ují ripechu i'ímacare nacú, que caja rijló nacaje a'acare nojló.

<sup>19</sup> Tupana palamane nucá. Ricá a'ajeri ijló piyuque nacaje camu'ují ila'ajícare nacú.

<sup>20</sup> Tupana palamane huecá. Huara'apá huani ricá. Nuhuata ina'uqué pura'acó rinacu palá huani hua'ajini huani. Marí queja nuhuátaca ricá.

*Caja penaje rimacare nacú najló marí:*

<sup>21</sup> Jesucristo palamane aú iná i'imá Tupana hua'ateje. Imá marí que nunacu piyuque Tupana hua'atéjena re i'ímacáñojlo: "Eco palá najló" que. Huejena, maare nujhua'até i'ímacaño, quele quemaño caja inacu: "Eco palá najló ca'ajno."

<sup>22</sup> Piyuque Tupana hua'atéjena, maárohua i'ímacaño, quemaño inacu: "Eco palá najló ca'ajno." Romano le'ejé huacára'ajeri ñacaré chiyájena quemaño caja inacu ñaqueé caja.

<sup>23</sup> Hue'amacana huani Jesucristo. Nuhuata rila'acá inacu palá huani piyuqueja ilérohua. Marí queja ricá. Caja quetánaja riyucuna.



## COLOSENSES

*Jesucristo ja'apiyá jema'ajeño i'imaño Colosas e i'imacá. Najló San Pablo huacára'ari puráca'aloji marí que i'imacá:*

<sup>1</sup> Pablo nucá. Tupana huátari no'ocana Jesucristo huacára'acarena naquiyana penaje i'imacá. Aú nanaquiyana nucá me'etení. Re caja maare nujhua'até Timoteo. Jesucristo ja'apiyá jema'ajeri caja ricá huajhua'até.

<sup>2</sup> Ilé ca'ajno nuhuacára'a ijlo marí puráca'aloji pajimila Colosas ejo. Jesucristo ja'apiyá jema'ajeño icá. Pajñacani huema'acá Jesucristo ja'apiyá. Aú huemá "huejena" que pajlocaca. Huejena queja huecá piyuque pajhua'atéchaca. Nuhuata Huara'apá Tupana la'acá palá inacu. Nuhuata caja rila'acá ipechu palá.

*San Pablo pura'acó Tupana hua'até Jesucristo hua'atéjena nacú yucuna marí:*

<sup>3</sup> Hue'emacana huani Jesucristo. Rara'apá Tupana. Rijhua'até huapura'ó inacu. Pulapé huani huemacá rijló: "Palá pila'acá huecá, nema'acale pa'apiyá aú."

<sup>4</sup> Palani yucu ajopana iphátacare nojló majó. Nemá inacu marí que: "Caphí napechu Jesucristo chojé. Iquí'ija caja nahuátaca piyuqueja Tupana le'ejena ina'uqué," que nemacá inacu.

<sup>5-6</sup> Caja jema'á Tupana puráca'alo yucuna. Quehuaca ricá. Aú ihue'epí palá meque palá huánica nacaje i'imajica ra'apiyá jema'ajéñojlo je'echú chu. Caja lamára'ataqueja ijlo nacaje je'echú chu. Marí que ri'imacale ijlo, caphí ipechu Jesucristo chojé. Ñaquele ihuata íquí'ija ñaque caja péchuruna. Ripuráca'alo, jema'acare i'imacá, ja'apátacana nacú ne'ejná apú eyá, apú eyá que. Piyuque eja'ahuá chuhua' ne'ejná ra'apátacana nacú. Ra'apiyá jema'acana aú Tupana apiyá'ari ina'uqué pechu, ne'emacá piyá pu'uhuaré la'acana nacú. Chuhua palá nala'acá pecohuáca. Palá caja napechu Tupana nacú. Ñaque caja ijlo ricá. Iqueño'ocá ra'apiyá jema'acana huacajé eyá maárejecha palánija ijlo ra'apiyá i'imacana. Iquí'ija Tupana huátaca ina'uqué. Ica jema'año riyucuna ra'apiyá. Raú ihue'epí quehuáca riyucuna.

<sup>7</sup> Júpimi Epafras jehuña'atari icá rinacu i'imacá. Iquí'ija huahuátacare, Epafras. Huajhua'até ri'imá, Tupana puráca'alo yucuna i'imacana nacú. Jesucristo hua'até sápa'ajeri que ricá ijlojé penaje.

<sup>8</sup> Ricá quemari huajló inacu i'imacá, meque íquí'ica ihuátaca pecohuáca. Tupana Pechu palamane aú ihuata pecohuáca íquí'ija.

<sup>9</sup> Ne'emacá huajló riyucuna huacajé maárejecha, uncá huayurila Tupana hua'até inacu pura'acano. Huemá Tupánajlo, ra'acáloje ijlo hue'epícaje penaje. Ihue'epícaloje rihuátaca que la'acana raú penaje. Raú ipechu iphaje nacaje Tupana huátacare caje la'acana nacú.

<sup>10</sup> Hue'epícaje ra'acare ijlo aú ihue'epeje palá pajhua'atéchaca i'imacana nacojé. Jesucristo huátari rile'ejena ina'uqué la'acá nacaje palá. Ica caja hue'epéjeño ñaque la'acana. Ñaqueja ila'ajica Tupana huátacare caje. Cajrú palá la'acana nacuja i'imajica, hue'epícaje Tupana Pechu a'acare ijlo aú. Marí que ri'imajica ee ijlo, richaje, richaje que ihue'epícaje Tupana nacojé.

<sup>11</sup> Tupana hue'epiri piyuqueja nacaje la'acana. Rihue'epí caja ipechu la'acana caphí, ijña'acáloje que'iyapejé chapú caje yajhué panacu raú penaje. Raú ipechu i'imajé pu'ují chapú caje yajhué e'iyohuá. Uncá ipechu la'alajo ujhú Tupana liyá raú.

<sup>12</sup> Ipura'acó aú Huara'apá Tupana hua'até, imá rijló: "Palá pila'acá huecá" que, rimacale inacu, nacaje yurícaloje ijlo je'echú chu penaje. Palá péchuruna huacára'ajeri ricá Tupana. Ripalamane re nacaje rile'ejena ina'uquejlo.

<sup>13</sup> Tupana i'imatari huecá Jiña Chí'ináricana cápiya, ra'apátacaloje huecá Ri'irí cápeje penaje. Raú Ri'irí, íquí'ija rihuátacare, yuriro Huahuacára'ajeri penaje.

<sup>14</sup> Tupana I'irí taca'arí a'ahuana' apiyácanami nacú huachaya i'imacá, hue'emacóloje pu'uhuaré huala'acare liyá penaje. Raú Tupana amaro huachaje.

*Jesucristo pala'ataca ina'uqué pechu yucuna marí:*

<sup>15</sup> Uncá iná amálare ricá, Tupana. Ri'irí Jesucristo, Rara'apá queja caja ripechu. Ina'uqué amácare ri'imacá. Piyuque nacaje Tupana queño'ótacare, chaje i'imacá Ri'irí. Uncá chíyo nacaje i'imá, Ri'irí i'imari.

<sup>16</sup> Jesucristo hua'até Tupana queño'ótari piyuqueja nacaje je'echú chu i'imacare. Rijhua'até caja riqueño'óta piyuqueja nacaje eja'ahuá chu i'imacare. Piyuqueja nacaje iná amácare riqueño'ótacare caja rijhua'até. Piyuque nacaje uncá iná amálare caje hua'ató riqueño'ótacare caja. Yenú i'imacaño riqueño'óta caja i'imacá. Tupana ahua'á i'imacaño, je'echú chu i'imacaño huacára'ajeño, yenú i'imacaño huacára'ajeño, quele riqueño'óta Jesucristo hua'até i'imacá. Jesucristojloje penaje riqueño'óta ri'imacá.

<sup>17</sup> Uncá chiyó nacaje i'imá, Jesucristo i'imari. Piyuqueja nacaje me'etení i'imagare, i'imari ñaqueja i'imacana nacú Jesucristo Pechu aú.

<sup>18</sup> Jesucristo i'imari ra'apiyá jema'ajeño huacára'ajeri huani. Ra'á cajmuchaji ri-jhua'atéjenajlo, ne'emacáloje matajnaco je'echú chu raú penaje. Ricá macápo'oro piyuque júpimi que taca'acaño piyá i'imacá, ri'imacáloje piyuque ajopana chaje penaje.

<sup>19</sup> Tupana i'iri pechu i'imari ripechu queja caja. Caja queja Tupana huátaca ri'imacá.

<sup>20</sup> Rihuata caja piyuqueja ina'uqué pechu pala'atácana pajlocaca rijluhua. Ñaque caja rihuátaca piyuque nacaje je'echú chu i'imagare, eja'ahuá chu i'imagare hua'até lamá'atacana palá. Jesucristo taca'arí a'ahuaná apiyácacanami nacú ina'uqué chaya, ina'uqué pechu pala'acóloje raú penaje. Piyuqueja ina'uqué pechu i'imacáloje rinacu palá penaje ritaca'á huachaya i'imacá.

<sup>21</sup> Júpimi icá i'imaño ajopana que Tupana liyá i'imacá. Rihuacajé chapú ipechu i'imajica Tupana nacú. Raú ila'aque pu'uhuaré ijluhua. Pu'uhuaré la'acana nacuja i'ijnataque ipéchuhua. Eyá chuhua Tupana pala'atarí ipechu rijluhua, palá ipechu i'imacáloje rinacu raú penaje.

<sup>22</sup> Marí que ri'imacáloje penaje, Jesucristo ña'arí chapú cajé yajhué panacu i'imacá. Nacúhua'ata ricá a'ahuaná apiyácacanami nacú i'imacá. Rejé ritaca'á i'imacá. Marí cajé aú ra'á Tupánajlo icá ríle'ejena ina'uqué penaje. Ñaquele chuhua palá péchuruna icá Tupánajlo. Uncá Tupana quemalá inacu: "Pu'uhuaré la'ajeño necá" que.

<sup>23</sup> Marí que icá Tupánajlo, caphí ipechu i'imagale Jesucristo chojé, ripuráca'alo chojé hua'até. Ila'á ipéchuhua caphí Tupana puráca'alo ja'apiyá i'imacana aú. Tupana i'imatari ina'uqué capichácajo liyá. Caja jema'á riyucuna. Aú caja ihue'epí meque palá huani ri'imajica ijlo. Iyuriniya ripuráca'alo ja'apiyá i'imacana. Tupana puráca'alo na'apátacare ijlo i'imacá, ajopana piño ja'apátaño ricá ajopánajlo, ajopánajlo que. Ne'ejná piyuque eja'ahuá chuhua riyucuna i'imacana nacú. Nucá Pablo; ñaque caja nu'umacá riyucuna i'imacana nacú.

*Jesucristo hua'atéjena ñaté a'ajeri Pablo i'imacá. Riyucuna marí:*

<sup>24</sup> Nu'umacale riyucuna, ajopana ina'uqué la'año nucá chapú. Pu'ují nupechu, nomácale chapú caje yajhué ijloje penaje. Ajopana rijhua'atéjenajloje penaje hua'ató nomá chapú caje yajhué. Caja queja nu'umajica chapú caje yajhué ña'acana panacu, nula'acáloje raú nacaje Jesucristo huacára'aca nucá que penaje.

<sup>25</sup> Tupana a'arí nucá Jesucristo hua'atéjena ñaté a'ajeri penaje. Riyurí caja nucá riyucuna i'imajeri penaje ijlo. Uncá judiona calé icá. Ica'anajlo calé nu'umá riyucuna. Pajimato nu'umacá riyucuna ina'uquejlo.

<sup>26-27</sup> Uncá Tupana i'imalá Jesucristo yucuna najló júpimi i'imacá. Micho'ojneji que riyucuna i'imacá ina'uqué liyá rihuacajé. Uncá nahue'epila méqueca Jesucristo i'imajica ra'apiyá jema'ajeño hua'até. Jesucristo a'arí Ripechu ina'pechu e'yajé. Raú iná i'imá ríle'ejena ina'uqué naquiyana. Piyuque ina'uquejloje penaje riyucuna, ne'emacáloje ríle'ejena ina'uqué ra'apiyá jema'acana aú penaje. Piyuqueja rijhua'atéjena, Jesucristo Pechu i'imacárena e'iyá, i'imajeño palá huani je'echú chu, caphí richojé péchuruna ne'emacale.

<sup>28</sup> Jesucristo yucuna i'imacana nacuja nucá, nula'á caja piyuque ina'uqué jenacú riyucuna aú. Nohuíña'ata piyuque ina'uqué rinacu, nahue'epicaloje ricá palá penaje. Hue'epícaje Tupana a'acare huajló aú nohúíña'ata necá, ne'emacáloje palá péchuruna penaje. Napechu i'imacáloje Jesucristo pechu que caja penaje huehúíña'ata necá rinacu.

<sup>29</sup> Marí que ina'uqué pechu i'imacáloje penaje nusapa íqui'i huani najló. Iqui'i huani Jesucristo a'acá nuñaté, ejé nula'á nacaje.

## 2

<sup>1</sup> Nuhuata ihue'epica meque íquilica no'ocá nunacajó icá, Laodicea eruna, ajopana hua'até. Uncá amálaré nucá.

<sup>2</sup> No'ó nunacajó icá, ipechu i'imacáloje caphí Jesucristo chojé ñaqueja penaje, ipechu i'imacá piyá ujhuí Jesucristo nacú. Ipechu i'imacáloje pajluhuaja chuhua íqui'ija peco-huácaca huátacana nacú penaje no'ó nunacajó icá. Nuhuata caja ihue'epica méqueca Jesucristo la'acá iná palá huani nacajé. Júpimi uncá ne'emalá riyucuna. Micho'ojneja queja Jesucristo yucuna i'imacá ina'uqué liyá rihuacajé. Chuhua uncá ñaque calé ricá. Chuhua iná hue'epica rinacajé. Iná hue'epí piyuque nacaje nacajé Tupana huátacare inajloje penaje. Raú iná i'imá palá.

<sup>3</sup> Capechuni Tupana; piyuqueja nacajé nacajé hue'epica ricá. Me'echuje caja ina'uquejlo nacaje rihue'epícare la'acana. Jesucristo ja'apiyá jema'acana aú iná hue'epí méqueca inajlo ricá.

<sup>4</sup> Riyucuna nu'umá ijlo me'etení, ajopana ina'uqué pajlaca piyá ijhua'até. Re ajopana. Quehuaca japi ricá queja napajlaca iná hua'até majopeja.

<sup>5</sup> Uncá nu'umalá ijhua'até me'etení. E'iyonaja cajrú nupechu inacu. Pu'ují caja nupechu inacu, i'imagale palá pajhua'atéchaca ilérohua. Pu'ují caja nupechu inacu, uncale iyurila caphí i'imagana Jesucristo chojé.

<sup>6</sup> Caphí ipechu i'imagá Huahuacára'ajeri Jesucristo chojé i'imagá. Raú ri'imatá icá capichácajo liyá. Nuhuata ñaqueé caja ipechu i'imagá richojé caphí me'etení, i'imagáloje pajluhuaja queja Jesucristo hua'até nacaje la'acana nacú penaje.

<sup>7</sup> Ñaquele nuhuacára'a la'acá ñaqueé, iyurica piyá Jesucristo chojé i'imagana caphí. Raú i'imagé palá. Ja'apá richuhua i'imagana nacú. Ihue'epí caja richaje, richaje que nacaje rihuátacare la'acana nacojé, ila'acáloje ricá penaje. Nehuñña'ataca icá rinacu i'imagá huacajé, nehuñña'ata icá marí caje nacú i'imagá. Ila'á me'etení ñaqueja ricá. Iyuríniya caja palá rila'acare icá yucuna i'imagana Tupánajlo.

*Huajé que iná pechu Jesucristo pechu chuhú. Riyucuna marí.*

<sup>8</sup> Re ina'uqué, majopeja pajlácaño necá. Amá icó naliyá, napichátajica ijlo ipechu quehuacaje puráca'aloji liyá. Napechu queja nemacá ina'uquejlo nacaje nacú. Uncá quehuaca calé ne'emacá riyucuna. Nachi'inami chuna puráca'alomi nacuja napura'ó. Je'echú chiyá huacára'ajeño nacú caja napura'ó. Uncá Jesucristo puráca'alo calé ricá nemá nacú. Necó ajopana queñótacare ricá.

<sup>9</sup> Uncá naje calé jema'á na'apiyá, marí que ri'imagale: Tupana pechu queja caja Jesucristo pechu. Huecá que caja Jesucristo i'imagá ina'uqué.

<sup>10</sup> Ricá chojeja calé iná i'imagá palá marí eja'ahuá chu. Piyuque je'echú chiyá huacára'ajeño chaje Jesucristo.

<sup>11</sup> Tupana hua'atéjena icá, Jesucristo chuhú i'imagana aú. Ajopana quemañó majopeja nanacuhua: "Tupana hua'atéjena huecá" que, mata'aqueja chinúmaruna ne'emacale. Uncá iná la'alá ñaqueé, iná i'imagáloje rijhua'atéjena naquiyana raú penaje. Jesucristoja calé i'imatari icá pu'uhuaré ila'acare liyá. Pu'uhuaré ila'ajica ipechu queja. Caja rica'á inauiyá ricá. Marí caje aú ra'á icá rijhua'atéjenahua penaje.

<sup>12</sup> Caja nala'á icá bautizar. Marí que quemacánaca ricá. Jesucristo hua'ató que ipechu jupichumi, pu'uhuaré ila'acare aú, tajnaro iliyá. Jesucristo hua'até sa'aquejami queja ipechu jupichumi. Nacapichata Jesucristo napon a i'imagá, hua'ató que ipechu jupichumi capichaco. Caja macápo'oco queja ipechu rijhua'até me'etení. Chuhua huajé que ipechu Jesucristo chuhú i'imagana aú. Marí que ijlo ricá, ipechu i'imagale caphí Tupana chojé. Tupana hue'epirí piyuqueja nacaje la'acana. Ricá caja macápo'ori Jesucristo i'imagá. Ricá chojeja calé ipechu i'imagá caphí.

<sup>13</sup> Júpimi icá i'imaño capichájeño que Tupana liyá, pu'uhuaré ila'ajicale i'imagica. Capichájeño que i'imagá riliyá, uncale Tupana le'ejena ina'uqué i'imalá. Uncá caja i'imalá ripuráca'alo ja'apiyá i'imaño rihuacajé. Chuhua Jesucristo hua'até i'imagale, Tupana a'arí ijlo cajmuchaji, i'imagáloje matajnaco je'echú chu raú penaje. Ramó caja ichaje piyuqueja nacaje ila'acare pu'uhuaré liyá.

<sup>14</sup> Tupana puráca'alo lana'aquejami aú huahue'epí pu'uhuaré la'ajéñoca huecá, uncale hual'alá rimacá que. Pachá Tupana huajáicarena queja hue'emacá júpimi. Jesucristo taca'arí a'ahuaná apiyácanami nacú huachaya i'imagá. Raú calé ra'apata huecá richiyá.

<sup>15</sup> Jesucristo taca'arí a'ahuaná apiyácanami nacú i'imagá. Raú richá'ata Jiñá Ch'i'ináricana i'imagá. Pajñacani richá'ataca ra'apiyá huacára'ajeño rijhua'até raú i'imagá. A'ahuaná apiyácanami nacú taca'acana aú richá'ata necá. Rihuata piyuque ina'uqué jema'acá richá'atacarena yucuna.

*Ihuátacaloje ijluhua nacaje je'echú chu i'imagare penaje yucuna marí:*

<sup>16</sup> Ajopana ina'uqué quemañó a'ajnejí naquiyana nacú: "Uncá ajñacaje penaje calé ricá." I'iracaje naquiyana nacú nemá caja: "Uncá i'iracaje penaje calé ricá." Uncale napechu que calé ipechu i'imagá rinacu, nemá inacu: "Pu'uhuaré la'ajeño necá" que. Marí queja nemacá inacu, uncale iphala fiesta huacajé ja'apí, nale'ejé huatána'acaje huacajé ja'apí caje macá. A'aniya inacojé napuráca'alo.

<sup>17</sup> Uncá chiyó Jesucristo iphá, iná hue'epí huejápaja Jesucristo nacojé, nacaje nemacare nacú aú. Caja riphá i'imagá. Chuhú pu'uhuacá huani huajlo riyucuna.

<sup>18</sup> Re ina'uqué naquiyana majopeja nala'acá necó majopéjaruna queja. Pu'ují napechu Tupana hua'atéjena, je'echú chu i'imaño, nacú. Nala'á nanacuhua hue'epiño que, namácale ca'ajná nacaje tapú que ya'atacó najlo. Uncá Tupana pechu que calé napechu nacaje nacú. Ne'ejnatácare napéchuhua, napechu queja ricá. Nemájica ee inacu: "Pu'uhuaré la'ajeño necá" que, a'aniyo inacojé napuráca'alo. Uncá pachá ila'alá nemacá que nemá inacu ñaqueé.

<sup>19</sup> Necá numacárena nacú yuriño naliyó Jesucristo ja'apiyá jema'acana. Jesucristo ja'apiyá jema'ajeño huacára'ajeri huani Jesucristo. Ricá la'arí piyuqueja rijhua'atéjema palá pajluhuano, pajluhuano que. Raú nahue'epí richaje, richaje que Tupana huátacare la'acana nacojé. Piyuqueja rinaquiyana i'imaño pajluhuaja queja pajhua'atéchaca raú. Ehuá, ehúá que rijhua'atéjema la'acá palá Tupana huátaca que Jesucristo palamane aú.

<sup>20</sup> Júpimi hla'aqué majopeja ajopana huacára'ajica icá que. Eyá me'etení caja ritajno iliyá, Jesucristo hua'atéjema i'imacale. Ñaquele chuhua uncá na penaje calé ila'á nacaje majopeja nahuacára'aca icá que. I'imanía necá que caja, huacára'año nacaje la'acana majopeja.

<sup>21</sup> Marí que nahuacára'aca iná. Nacaje naquiyana nacú nemá: "Pisápaniya rinacojé." Eyá a'ajnejí naquiyana nacú nemá caja: "Pajñaniya ricá" que. Nacaje naquiyana nacú nemá: "Pijña'aniya picápojo ricá." Marí que nahuacára'aca ajopana ina'uqué la'acá najhua'até.

<sup>22</sup> Majopeja huani nacaje nemacare nacú. Uncá na penaje calé iná la'á ricá.

<sup>23</sup> Apala ne'iyajena pechu i'imá nacaje nehuíña'atacare nacú. "Meque capechuni huani napuráca'alo." Marí que napechu rinacu, nahuacára'acale nala'acá nacaje nach'i'ináricanajlo penaje. Majopeja nala'acá nanacuhá ajopana ja'apejena que. Quehuí nala'acá nanapona. E'iyonaja calé uncá na penaje calé ricá najló, nala'acá piyá napechu queja pu'uhuaré, namanaicho hua'até raú penaje.

### 3

<sup>1</sup> Caja Jesucristo i'imatari icá capichácajo liyá. Aú calé ila'á huajé ipechu chuhúa ra'apiyá que nacaje. Ñaquele Jesucristo hua'até macápo'ocaño que icá me'etení. Marí que ri'imacale ijlo, ihuata ijluhua nacaje je'echú chu i'imacare. Tupana ahua'á Jesucristo. Rijhua'até rihuacára'a rile'ejena ina'uqué.

<sup>2</sup> Ipechu i'imá nacaje je'echú chu i'imacare nacú; ipechu i'imanía nacaje eja'ahuá chu i'imacare nacú.

<sup>3</sup> Jupichumi ipechu, ila'acare aú pu'uhuaré, capicharo Jesucristo hua'até. Me'etení ipechu Jesucristo hua'até. Ñaquele caja Tupana hua'até ipechu.

<sup>4</sup> Jesucristoja calé huapechu huani. Jesucristo iphájica majó huacajé, rihuá'aje icá rijhua'ató, i'imacáloje rijhua'até penaje. Cajrú mejáma'atani hua'até riphájica majó. Rijhua'atéjema huani hue'emajica rijhua'até rihuacajé.

*Jupichumi iná pechu hua'até iná la'á pu'uhuaré, iná la'á iná manaicho. Huajé iná pechu hua'até iná la'á palá. Riyucuna marí:*

<sup>5</sup> Ica'á ipechu naquiyá nacaje uncá Tupana huátalare caje. Ila'aniya caja imanai-cho. Ila'aniya icó mahuó nacaje uncá Tupana huátalare caje nacú. I'imanía caja canacújne'equena. Canacújne'equena pechu i'imá pu'ují nacaje i'imacare marí eja'ahuá chu nacú, nahuajhué ri'imacale najló. Lanaquiya uncá na'alá nanacojó Tupana.

<sup>6</sup> Marí que la'acaño pu'uhuaré, Tupana huajájeri cajrú huani. Uncá pachá nema'alá ra'apiyá.

<sup>7</sup> Júpimi ñaquele caja icá i'imaqueño pu'uhuaré la'acaño. Nala'acá pu'uhuaré que caja ila'ajica pu'uhuaré rihuacajé.

<sup>8</sup> Chuhua iyurí iliyó ñaquele la'acana. Iyurí caja iliyó iyuchá. Iyurí caja iliyó chapú ipechu i'imacare ina'uqué nacú. Ila'aniya caja ajopana ina'uqué uncá ina'uquélaruna queja ipuráca'alo aú. Ipura'aniyo caja pu'uhuaereni puráca'aloji aú.

<sup>9</sup> Ipa'jlanía caja pajhua'atéchaca. Caja ica'á inaquiyo ipechu júpichumi, pu'uhuaré ila'acare hua'até.

<sup>10</sup> Huajé ipechu hua'até icá me'etení. Huajé ipechu ehua ipechu me'etení, ipechu i'imacáloje Tupana pechu que caja raú penaje. Huajé huapechu chuhúa huecá me'etení ripalamane.

<sup>11</sup> Ajopana, ajopana que ina'uqué paliyácaca. Ne'iyajena nacú nemá: "Judíona necá." Ajopana nacú nemá: "Ajopana necá. Uncá judíona calé necá." Ajopana nacú nemá: "Tapuhuíyana necá." Ajopana nacú nemá: "Ajopana hua'até sápa'ajeño necá." Ajopana nacú nemá: "Najluhua sápa'ajeño necá" que. Marí caje la'arí huecá ajopana, ajopana que paliyácaca. Uncá ajopana, ajopana que calé ina'uqué i'imacá paliyácaca Jesucristo ja'apiyá i'imacana aú. Piyuqueja Jesucristo ja'apiyá jema'ajeño e'iyá Jesucristo pechu. Ricá la'arí huecá pajluhuaja yaní queja pajhua'atéchaca.

<sup>12</sup> Iqui'ija huani Tupana huátacarena icá. Ri'ihuapacárena caja rijluhua icá, i'imacáloje rile'ejena ina'uqué penaje. Ñaquele i'imá palá ajopana ina'uqué hua'até. Ihue'epí namu'ují. I'imá ina'uqué huani péchuruna que ina'uqué hua'até. Ila'aniya caja inacuhá hue'epiño que huani. I'imanía yuriná pajhua'atéchaca; ila'aniya icó tu'ujné nacaje nacú; iyúcha'aniyo caja quiñaja pachácaca.

<sup>13</sup> A'á caja pañatéchaca. E'iyajena ca'ajná aca'año pamanáchaca. Marí que la'acana uncá paala. Eco amó pachájecaca. Jesucristo amaco ichaje i'ímacá que caja amájico pachájecaca.

<sup>14</sup> Chaje huani nuhuátaca ihuátaca pecohuácaca íqui'ija huani. Raú ila'ajé nacaje piyuque numacare nacú ijiló me'etení.

<sup>15</sup> Jesucristo la'arí iná pechu palá. Palá rila'acare ipechu ja'apiyá i'ímá palá. Tupana i'ihuapari icá rijlhua ajopana ina'uqué e'iyayá, i'ímacáloje palá péchuruna Jesucristo palamane aú penaje. Tupana la'ari inacu palá. Ñaque caja ina'uqué naquiyana la'año icá palá. I'ijnatá ipéchuhua palá nala'acare icá nacú.

<sup>16</sup> A'á caja Jesucristo puráca'alo cajrú inacojó, ila'acáloje rimacá que penaje. Ila'á caja penacúchaca raú. Ihue'epí ripuráca'alo nacojé palá, jehuíña'atacaloje pecohuácaca penaje. Atani caja pajhua'atéchaca Tupana yale. Ihuajá ipéchuhua palá rila'acare icá nacojé raú.

<sup>17</sup> Piyuqueja nacaje ila'acare, ila'á ricá Jesucristo ja'apiyá jema'ajeño la'acá que caja. Piyuqueja nacaje imacare nacú, imá caja rinacu Jesucristo huátaca que. Jesucristo ipalamente. Ñaquele imá Tupánajlo: “Huara'apá, palá pila'acá huecá” que.

*Jesucristo hua'atéjena i'ímacáloje ñañacaré chiyájena hua'até palá penaje yucuna marí:*

<sup>18</sup> Calúyana inaánajlo numá me'etení: Jema'á iluna ja'apiyá. Jesucristo hua'atéjena la'año marí que.

<sup>19</sup> Calúyana achiñánajlo numá: Ihuata íqui'ija iluna. I'imaniya caja yuriná iluna hua'até.

<sup>20</sup> Iyánijlo numá: Jema'á ichi'iná ja'apiyá palá. Jesucristo ja'apiyá jema'ajeño jema'año nachi'iná ja'apiyá palá. Palani Tupánajlo na'apiyá jema'acana.

<sup>21</sup> Icó, nachi'inajlo numá: Iyúcha'aniyo hua'ajini huani iyani hua'até, napechu la'ajico ujhuí iliyá.

<sup>22</sup> Ajopana hua'até sápageñojlo numá: Jema'á na'apiyá, huacára'año icá sápacaje nacú. Nema'á ijiló queja ila'ajica nacaje piyuqueja. Apala ila'á palá nejlú chu i'ímacá quetana, napechu i'ímacáloje palá inacu raú penaje. Ila'á ñaqueja ricá palá, ícoja i'ímajica ehua. Ila'á nacaje najló, palá ihue'epícare ricá locópa'alaja. Iphácale Tupana ja'apí, ila'ajé numacá que.

<sup>23</sup> Piyuque nacaje ila'acare, ila'á ricá caphí ipechu aú. Jesucristo hua'até sápacana que ila'acá nacaje. Rijhua'até sápageño que caja icá, isápaca aú ajopana hua'até.

<sup>24</sup> Ihue'epí Jesucristo a'ajica ijiló palá ila'acare huemí. Je'echú chu i'ímacana ra'ajé ijiló rihuemí penaje. Jesucristo hua'até sápageño icá. Ricá ihuacára'ajeri huani. Aú calé ila'á palá.

<sup>25</sup> Ñaque huánija ina'uqué Tupánajlo. Palá la'ajeño rila'ajé palá; eyá pu'uhuaré la'ajeño rihuajaje. Pu'uhuaré nala'acare loco'opáneje rihuajaje necá.

#### 4

<sup>1</sup> Sápageño carihuáatenajlo numá: Ila'á palá ijhua'até sápageño nacú. A'á palá najló nasápaca'ala huemí. Ata'aniya necá. Ihue'epí marí: Re caja iminá je'echú chu.

<sup>2</sup> Piyuque Jesucristo ja'apiyá jema'ajeñojlo numá: Iyuríniya Tupana hua'até pura'acano. I'ímá capechúruna rijhua'até pura'acano aú. I'ímá caja palá rila'acare icá yucuna rijló.

<sup>3</sup> Ipura'ó caja rijhua'até nunacu, Huahuacára'ajeri, Tupana a'acáloje nuñaté penaje, nu'umacáloje Jesucristo yucuna cajrú ajopánajlo, ajopánajlo que penaje. Ina'uqué huajáquelana chu nucá me'etení, nu'umacale Jesucristo yucuna chona. Mícho'ojneji que riyucuna i'ímacá ina'uquejlo júpimi i'ímacá.

<sup>4</sup> Ñaquele ipura'ó nunacu Tupana hua'até, nu'umachi riyucuna najló palá, ri'ímacá piyá me'echú najló. Palani marí que riyucuna i'ímacana ajopánajlo.

<sup>5</sup> Uncá jema'alaño Tupana ja'apiyá hua'até i'ímajica ee, i'ímá najhua'até palá. I'ímá najló Tupana yucuna. Ipechu i'imaniya nanacu: “Quéchamico hue'emajé najló riyucuna” que.

<sup>6</sup> Ipura'ó pajimato ajopana ina'uqué hua'até palá. Palani puráca'aloji aú ipura'ó najhua'até. Raú caja i'ímajé najló nacaje yucuna palá.

*Caja penaje rimacare nacú najló marí:*

<sup>7</sup> Re Tíquico nujhua'até maare. Huanaquiyana ricá. Iqui'ija nuhuátacare ricá. Palá caja ra'acá nuñaté Tupana sápac'a'ala la'acana aú. Jesucristo hua'até sápagejeri ricá nujhua'até. Ricá quemájeri ijiló nunacu méqueca nucá maárohua.

<sup>8</sup> Ñaquele nuhuacára'a ricá ichaje, ri'ímacáloje ijiló maare hue'emacare rijhua'até yucuna penaje. Rica'acáloje ujhuí cajé iliyá raú penaje.

<sup>9</sup> Onésimo hua'até ne'eñajé ca'ajno. Iqui'ija huahuátacare caja ricá; Jesucristo ja'apiyá jema'ajeri caja ricá. Ñaquele huanaquiyana caja ricá. Inaquiyana caja ricá. Necá, iyamá Onésimo hua'até, i'ijnajeño riyucuna i'ímajé ijiló méqueca huecá maare.

<sup>10</sup> Aristarco, nujhua'aque'ehue huani ricá maare ina'uqué huajáquelana chu. Ricá quemari caja inacu: “Eco palá najló ca'ajno.” Ñaque caja Marcos quemacá inacu. Bernabé e'ehué ricá Marcos. Caja numá ijiló, riphájica penaje palá i'ímajica rijhua'até.

<sup>11</sup> “Eco palá najló ca'ajno,” que Justo quemacá inacu. Aristarco, Marcos, Justo, quele judíona naquiyana necá. Jesucristo ja'apiyá jema'ajeño naquiyana caja necá. Necaja calé a'año nuñaté Tupana yucuna i'amacana aú. Ajopánajlo, ajopánajlo que nu'umacá riyucuna, ne'emacáloje rijhua'atéjéna ra'apiyá jema'acana aú penaje. Napalamane calé palá nupechu.

<sup>12</sup> “Eco palá ijlo ca'ajno,” que Epafras quemacá inacu. Inaquiyana ricá; Jesucristo hua'até sápjéni caja ricá. Cajrú ripura'acó Tupana hua'até inacu. Mahuó caja riquejá'aca nacaje Tupana liyá ijloje penaje. Ripura'ó caja Tupana hua'até inacu, caphí péchuruna i'amacáloje penaje. Ihue'epícaloje palá itucumó Tupana huátacare que la'acana penaje ripura'ó Tupana hua'até inacu.

<sup>13</sup> Nucá amari Epafras maare. Aú nuhue'epí cajrú risápaca ijloje penaje. Ñaqué caja risápaca Laodicea erúnajloje penaje, Hierápolis erúnajloje penaje hua'até.

<sup>14</sup> Lucas, pusána'ajeri ricá, hue'epiri pusana nacojé. Ricá caja quemari inacu: “Eco palá najló ca'ajno.” Iqui'ija huahuátacare, Lucas. Ñaqué caja Demas quemacá inacu: “Eco palá najló ca'ajno.”

<sup>15</sup> Eco palá Jesucristo hua'atéjenajlo, Loadicea erúnajlo. Eco palá caja Nínfasjlo, ruñacaré chojé jahuacájeñojlo hua'até.

<sup>16</sup> Ipura'ó marí papera hua'até inaquiyana hua'até piyuque. Quéchami ihuacára'a ricá Laodicea ejo, Jesucristo ja'apiyá jema'ajeño, re i'amacáño, pura'acóloje rijhua'até penaje. Nuhuacára'a caja najló papera i'amacá. Nuhuacára'aje caja ijlo ricá rilanaquiya. Eco ipura'ó rijhua'até.

<sup>17</sup> Eco imá Arquípojlo marí que: “Piñapata ilé sápacaje la'acana Hue'emacana Jesucristo yurícare pijló.”

<sup>18</sup> Nucá, Pablo, lana'arí ijlo nuyáte'ela aú marí nocó: “Eco palá ijlo ca'ajno.” Ihue'epí nucá maare. Ina'uqué huajáquelana chu nucá me'etení. Nuhuata Tupana la'acá icá palá. Marí queja nuhuátaca ijlo ricá. Caja quetana riyucuna.

## 1 TESALONICENSES

*Pablo, rijhuáque'ena, quele huacára'año Jesucristo ja'apiyá jema'ajéñojlo papera marí que i'ímacá:*

<sup>1</sup> Nucá Pablo, Silvano, Timoteo, quele huecá huacára'año ijlo marí papera. Pajimila Tesalónica ejo huahuacára'a ricá. Jesucristo ja'apiyá jema'ajeño caja icá. Pajluhua japi necá queja icá Tupana, Jesucristo, quele hua'até. Huara'apá huani ricá Tupana. Nuhuata rila'acá icá palá ipechu hua'ató.

*Nema'acá palá Tupana ja'apiyá yucuna marí:*

<sup>2</sup> Huemá Tupánajlo inacu: “Palá pila'acá huecá, nema'acale pa'apiyá,” que huemacá rijlo inacu. Huapura'acó Tupana hua'até quehuá huapura'acó caja inacu rijhua'até.

<sup>3</sup> Huahue'epí ipechu i'ímacá caphí richojé, rila'acáloje ijlo nacaje penaje. Huahue'epí caja caphí isápaca, Iqui'ija ihuátacale Tupana. Huahue'epícare caja uncá iyurila Jesucristo chojé i'ímacana caphí.

<sup>4</sup> Nojena, Tupana huajhuena huani icá. Huahue'epí ri'ihuapacá rijluhua icá ajopana ina'uqué e'iyayá, i'ímacáloje rile'ejena ina'uqué penaje.

<sup>5</sup> Caja hue'emá ijlo yucu i'ímacá. Méqueca Tupana i'imatata iná capichácajo liyá yucuna hue'emá ijlo i'ímacá. Uncá riyucúnaja calé hue'emá ijlo. Hua'ató Tupana Pechu a'arí iñaté, jema'acáloje ra'apiyá penaje. Huahue'epí quehuácaje riyucuna hue'emacare ijlo. Icó hue'epiño caja méqueca hue'emajica ijhua'até rehuá. Ihue'epí caja méqueca huala'ajica nacaje rehuá hue'emaqué ijhua'até huacajé. Ri'ímacáloje palá ijlojé penaje, huala'á nacaje rehuá.

<sup>6</sup> Huala'acá que caja ila'acá chuhua huajehuemi. Raú ñaqueé caja ila'acá Jesucristo la'acá que caja.

Tupana puráca'alo ja'apiyá jema'acana jimaje ajopana ina'uqué la'año icá chapú i'ímacá. E'iyonaja calé pu'ují ipechu i'ímacá ripuráca'alo ja'apiyá jema'acana aú. Tupana Péchuja calé la'arí ipechu pu'ují.

<sup>7</sup> Palá la'acana nacuja icá rehuá me'etení. Aú ajopana, Jesucristo ja'apiyá jema'ajeño, amaño palá ila'acá, nala'acáloje ñaqueé caja amájemí penaje. Macedonia te'eré ehuájena, eyá Acaya te'eré ehuájena, quele amaño méqueca ila'acá palá rehuá.

<sup>8</sup> Marí caje aú ajopana Macedonia te'eré eruna jema'año caja Tupana puráca'alo yucuna. Uncá necaja calé jema'año riyucuna. Piyuqueja rehuá i'ímacaño, jema'año caja riyucuna. Caphí ipechu Tupana chojé, aú calé ila'á palá. Ne'emá caja iyucuna najlo. Ñaqueé i'ímacale uncá na penaje calé hue'emá najlo riyucuna rehuá, caja nema'acale ricá.

<sup>9</sup> Necá quemaño huajlo inacu méqueca palani ri'ímacá ijlo hue'emaqué ichaje huacajé. Nemá piño inacu marí que: “Caja nayurí naliyó nacaje jenami ja'apí iphácana, napechu i'ímacare nacú: ‘Huachí'ináricana japi ricá’ que. Caja nayurí ra'apí iphácana, nala'acáloje Tupana huátaca que reyá penaje. Iná Chí'ináricana huani ricá Tupana. Uncá majopéjari yucu calé ricá. Re ricá cajmuni. Ra'apí iphájeño necá chuhua,” que nemacá inacu rehuá.

<sup>10</sup> Nemá piño inacu marí que: “Jesucristo, Tupana l'irí, pa'ajero majó je'echú chiyá, ricá huátacana nacú necá. Ricá Jesucristo ne'emacare huátacana nacú, taca'arí i'ímacá. Ejomi Tupana macápo'ori piño ri'ímacare. Ri'irí, Jesucristo palamane aú uncá Tupana huajálaje huecá pu'uhuaré huala'acare chona. Ñaquele ricá, Ne'ematajé, huátacana nacú necá, riphájica majó ejená,” que nemacá inacu.

## 2

*Nacaje Pablo la'acare Tesalónica e yucuna marí:*

<sup>1</sup> Nojena, caja ihue'epí hue'emacá ijhua'até huacajé, uncá hue'emalá ijhua'até majopeja.

<sup>2</sup> Ihue'epí caja méqueca nala'acá chapú huani hue'emacá, hue'ejnacá yámona ichaje, Tesalónica ejo. Chapú huani nala'acá huecá pajimila Filipos e. Pu'uhuaré huani caja napura'acó huanauc re hue'emaqué huacajé. Reyá hue'ejná ichaje. Cajrú huani Tupana a'acá huañaté, hue'emacáloje ijlo riyucuna penaje. Tupana i'imatata iná capichácajo liyá yucuna hue'emá ijlo palá. Riyucuna hue'emá ijlo, Tupana la'acale caphí huapechu. Ne'iyajena uncá huani huátalaño hue'emacá riyucuna ijlo. E'iyonaja calé hue'emá riyucuna ijlo.

<sup>3</sup> Quehuaca nacaje huemacare nacú ina'uquejlo; uncá pajlácaje calé huapuráca'alo. Uncá hue'emalá riyucuna, ri'ímacáloje palá huajlo penaje. Uncá caja hue'emalá riyucuna ijlo, huapajlácaloje ijhua'até raú penaje.

<sup>4</sup> Tupana quemari huanacu: “Palani necá riyucuna i'ímajeño penaje.” Raú calé ra'á huecá riyucuna i'ímajeño penaje. Ri'imatata ina'uqué capichácajo liyá yucuna i'ímajeño

penaje ra'á huecá. Ñaquele rihuátaca que hue'emacá riyucuna ñaqueja. Uncá caja huemalá nacaje nacú majopeja, ajopana ina'uqué pechu i'amacáloje palá huanacu raú penaje. Huala'á nacaje, ri'amacáloje palá Tupana nacú penaje. Iná pechu palamátajeri huani ricá.

<sup>5-6</sup> Icá hue'epiño palá, uncá huemalá ijlo inacu: "Palani icá" que majopeja, ipechu i'machi palá huanacu raú. Uncá huahuátala ipura'acó huanacu palá majopeja. Ñaque caja uncá huahuátala ajopana ina'uqué pura'acó huanacu palá majopeja. Uncá ricá penaje calé hue'emá riyucuna ijlo i'amacá. Uncá caja a'acáloje huajllo liñeru penaje calé hue'emá ijlo Tupana yucuna. Jesucristo huacára'acarena naquiyana huecá. Ñaquele huahuacára'ajla ila'acá huajllo nacaje. Hue'emaqué ijhua'até huacajé huahuacára'ajla icá. E'iyonaja calé uncá huahuacára'ala ila'acá huajllo nacaje. Tupana hue'epiri quehuaca numacare nacú.

<sup>7</sup> Uncá yuriná calé hue'emacá ijhua'até. Yuhuaná jaló lamára'aca ruyani queja hue'emacá ijhua'até.

<sup>8</sup> Huahuajhuena caja icá. Caí huani caja huahue'epica inacu. Aú calé hue'emá ijlo Tupana puráca'alo yucuna. Iqui'ija huahuátacarena caja icá. Aú calé huahue'epi huatucumó nacaje la'acana, ri'amacáloje palá ijloje penaje.

<sup>9</sup> Nojena, ihue'epi huasápaca caphí hue'emacá ijhua'até huacajé, huahuarúhua'acaloje huajlhuua a'ajnejí, a'arumacaji, caje macá penaje. Hue'echú, eyá lainchu huasapa lapejé hua'ató, huacahuíla'aca piyá inacu, hue'emacá ijhua'até quietana. Uncá huahuátala iliyá nacaje quejá'acana. Hue'emacáloje Tupana puráca'alo yucuna ijlo penájeja calé hue'emaqué ijhua'até.

<sup>10</sup> Caja ihue'epi marí numacare nacú, quehuaca ricá. Tupana hue'epicare caja ricá. Icá, Jesucristo ja'apiyá jema'ajeño, hue'epiño mecajenaca huecá. Palá la'acaño huecá; Tupana huátaca que la'acaño caja huecá. Uncá na calé huala'á pu'uhuaré rehuá hue'emaqué ijhua'até huacajé.

<sup>11</sup> Ihue'epicare caja méqueca huapura'acó ijhua'até pajluhuano, pajluhuano que, caphí ipechu i'amacáloje Jesucristo chojé penaje. Yuhuaná jara'apá pura'acó riyani hua'até, que caja huapura'acó ijhua'até rinacu i'amacá.

<sup>12</sup> Huahuacára'a ila'acá piyuque nacaje Tupana huátaca que. Tupana le'ejena ina'uqué la'año rihuátaca que. Ricá i'ihuapari icá ajopana ina'uqué e'iyayá rijlhuua, i'amacáloje rijhua'até je'echú chu raú penaje. Rehuájena huacára'ajeri huani ricá. I'amacáloje Tupana palamane penaje, ri'ihuapacá icá ajopana ina'uqué e'iyayá rijlhuua.

<sup>13</sup> Hue'emá Tupana puráca'alo yucuna ijlo i'amacá. Palani ri'amacá ijlo. Marí que ipechu i'amacá rinacu: "Uncá ina'uqué. Tupana le'ejena ina'uqué la'año rihuátaca que. Ricé puráca'alo calé ricá; Tupana puráca'alo ricá," que ipechu i'amacá rinacu. Que jo'ó ri'amacá. Tupana puráca'alo yucuna hue'emá ijlo i'amacá. Ripuráca'alo aú Tupana apiyácarí ra'apiyá jema'ajeño pechu, napechu i'amacáloje palá raú penaje. Ñaque i'amacale hue'emá Tupánajlo palá rila'acare huecá yucuna.

<sup>14</sup> Judea te'eré ehuá re caja cajrú Jesucristo ja'apiyá jema'ajeño. Marí que i'amacáño ne'emacale, judíona naquiyana la'año chapú huani necá. Ñaque caja iñacajela ehuájena la'acá chapú icá. Jesucristo ja'apiyá jema'ajeño i'amacale.

<sup>15</sup> Necá, judíona naquiyana, noño júpimi Tupana puráca'alo ja'apátajeñomi chuna i'amacá. Ñaque caja nahuacára'aca Jesucristo nócana i'amacá. Eyá huecá piño nala'á chapú huani. Uncá huani ina'uquélaruna necá Tupánajlo. Chapú huani caja napechu piyuqueja ina'uqué nacú.

<sup>16</sup> Marí que nala'acá piño chapú: Huahuata Tupana puráca'alo yucuna i'amacana ajopánajlo. Uncá judíona naquiyana calejlo, hue'emajla riyucuna, ne'emacáloje capichácajo liyá raú penaje. E'iyonaja nahuata huapu itacana, hue'emacá piyá riyucuna najllo. Marí que nala'acá aú huecá, richaje huani nala'acá pu'uhuaré. Marí caje chona Tupana huajájeri cajrú huani necá.

*Pablo huátaca nachaje i'ijnacana yucuna marí:*

<sup>17</sup> Nojena, caja hua'apáñacarena icá. Uncá hue'emalaje ijhua'até mequetánaja. Uncá caja huamálaje piño pecohuácaca. E'iyonaja calé rejo'ocaja jo'ó cajrú huapechu inacu. Iqui'ija huahuátaca ichaje i'ijnacana piño.

<sup>18</sup> Huahuata ichaje i'ijnacana i'amacá. Pulapé nucá, Pablo, huátaca ichaje i'ijnacana. E'iyonaja cale Jiñá Chi'ináricana itari huapu paliyáca.

<sup>19</sup> Icá jema'año Tupana ja'apiyá. Ñaquele inacojé calé Tupana pechu i'imajeri palá huanacu. Palá ripechu i'imajica huanacu, a'acale inacojé ripuráca'alo, hua'apátacare ijlo i'amacá. Pu'ují caja huapechu i'imajica inacu Jesucristo iphájica majó huacajé.

<sup>20</sup> Palá huapechu inacu, jema'acale ra'apiyá. Ñaquele pu'ují huapechu.



## 3

<sup>1-2</sup> Huahuata ichaje i'ijnacana júchácajo liyá yucuna ri'imá ajopánajlo huajhua'até. Huahuacára'a ricá rejo i'imacá, rimacáloje ijlo méqueca iná jema'acá palá Tupana ja'apiyá penaje. Ra'á iñaté, ipechu i'imacáloje caphí Jesucristo chojé penaje. Ipechu i'imacá piyá ujhui ra'apiyá jema'acana nacú, penaje ra'á iñaté i'imacá.

<sup>3</sup> Huahuacára'a ri'ijnacá ichaje, ra'acáloje iñaté penaje, Jesucristo ja'apiyá jema'acana nacú. Apala inaquiayana huátáño Jesucristo ja'apiyá jema'acana yurícana iliyó, nala'acale chapú icá. Tupana huátari huajña'acá chapú caje panacu. Ihue'epicare caja ricá.

<sup>4</sup> Hue'emaqué ijhua'até huacajé, hue'emá ijlo riyucuna i'imacá. Huemá ijlo marí que:

—Ne'iyajena la'ajeño icá chapú, jema'acale Jesucristo ja'apiyá.

Caja queja nala'acá icá me'etení. Chapú caje yajhué amá me'etení.

<sup>5</sup> Noma'á riyucuna. Aú nucahuíla'o inacojé. Caja ri'imató nuchá i'imacá. Aú numá Timotéojlo:

—Chuhua pi'ijná ca'ajno nachaje, pihue'epicaloje méqueca napechu i'imacá Jesucristo nacú rehuá penaje —que numacá rijló.

Marí que nupechu i'imacá inacu: “Apala Jiñá Chi'ináricana ca'átari ne'iyajé, nayurícaloje Jesucristo ja'apiyá jema'acana penaje. Marí que ri'imaquela, huasápaca'ala i'imajla majopéjari queja ne'iyayá,” que nupechu i'imacá inacu.

<sup>6</sup> Aú caja Timoteo i'imari ichaje pajimila Tesalónica ejo. Ejomi ripa'ó rapumí chuhúa majó. Palani yucu hua'até riphá huanacu. Ri'imá huajló iyucuna marí que necá rehuá:

—Ejo'ocaja caphí napechu Jesucristo chojé. Iqui'ija jo'ó nahuátaca Tupana, ajopana ina'uqué hua'até. Ejo'ocaja nahue'epica icá. Pu'ují jo'ó caja napechu inacu. Iqui'i nahuátaca amácana, ihuátaca namácana que caja —que rimacá huajló inacu.

<sup>7</sup> Maare huamá chapú caje yajhué i'imacá. Rimacá aú huajló inacu: “Ejo'ocaja jo'ó caphí napechu Jesucristo chojé” que, palá huapechu la'acó.

<sup>8</sup> Chuhuaca palá huecá maare, huahue'epicale uncá iyurila Jesucristo ja'apiyá jema'acana.

<sup>9</sup> Marí que icá i'imacale, huemá Tupánajlo: “Palá pila'acá huecá nema'acá pa'apiyá aú.” Pu'ují huani huapechu inacu.

<sup>10</sup> Cajrú huapura'acó Tupana hua'até inacu. Mahuó caja huemacá rijló, hue'ejnacáloje ichaje penaje. Huejapa yuriro ejo'ocaja ijlo, ihue'epicaloje ra'apiyá jema'acana palá huani raú penaje. Ñaquele nuhuata iñaté a'acana nupuráca'alo aú.

<sup>11</sup> Huara'apá Tupana. Huahuata ricá, Huahuacára'ajeri Jesucristo hua'até a'acá huañaté ichaje i'ijnacana aú.

<sup>12</sup> Huahuata caja Tupana a'acá iñaté, richaje íqui'ica ihuátacaloje pecohuácaca penaje. Ñaque caja ihuátacaloje íqui'ija ajopana ina'uqué penaje. Huecá huátáño icá íqui'ija. Ñaque caja íqui'ica ihuátajica pecohuácaca.

<sup>13</sup> Raú Tupana la'ajeri ipechu caphí, Jesucristo huaícha piño majó huacajé. Rile'ejena ina'uqué hua'até riphaje majó. Lamá'ataquejami que i'imajica Huara'apá Tupánajlo rihuacajé. Palá péchuruna i'imajé, itára'ajico Tupana jimaje huacajé.

## 4

*Iná la'acáloje palá ajopana ina'uqué penaje yucuna marí:*

<sup>1</sup> Nojena, caja ila'á palá Tupana huátaca que. Huehuíña'ata icá i'imacá que caja ila'acá nacaje palá. Chuhua Jesucristo puráca'alo aú nuhuacára'a ila'acá richaje, richájeno que palá.

<sup>2</sup> Caja ihue'epí nacaje nacojé huemacare nacú ijlo i'imacá. Jesucristo huacára'aca que huemacá ijlo nacaje nacú i'imacá.

<sup>3</sup> Tupana huátari ihue'epica itucumó nacaje la'acana rihuátaca que. Uncá rihuátala achiñana, inaana, quele la'acá namanaicho pajhua'atéchaca.

<sup>4</sup> Ica achiñánajlo numá: I'imá iluna hua'até palá. Tupana huátaca que i'imacá najhua'até. Iphá caja na'apí.

<sup>5</sup> Uncá paala iná hue'epica iná tucumó iná yajalo hua'até la'acánaja. Necá uncá jema'alaño Tupana ja'apiyá, hue'epiño natucumó naluna hua'até la'acana. I'maniya ilé cajena ina'uqué i'imacá que. I'imá palá iluna hua'até.

<sup>6</sup> Eyá apú piño ñaque caja: Iná la'acachu apú yajalo hua'até, chapú huani iná la'acá ricá raú. Caja huemá ijlo méqueca ri'imajica ina'uquejlo, uncá jema'alaño Tupana ja'apiyajlo. Tupana huajájeri cajrú huani namanaicho la'ajeño, pu'uhuaré la'ajeño hua'até.

<sup>7</sup> Tupana i'ihuapari huecá ajopana ina'uqué e'iyayá, hue'emacáloje palá la'ajeño penaje, hue'emacá piyá huamanaicho la'ajeño. Hue'emacáloje rile'ejena ina'uqué penaje ri'ihuapá rijluhua huecá ajopana ina'uqué e'iyayá i'imacá.

<sup>8</sup> Apala e'iyajena quemaño huanacu: “Majopeja napajlaca” que. Raú imá caja Tupana nacú: “Pajlácachi ricá” que. Ricá a'arí huajló Ripachu.

<sup>9</sup> Nuhue'epí íqui'ija ihuátaca ajopana Jesucristo ja'apiyá jema'ajeño. Ñaquele uncá naje calé numá ijló rinacu. Tupánaja calé jehuíña'atari icá rinacu, ihuátacaloje íqui'ija pecohuácaca raú penaje.

<sup>10</sup> Caja ihuata íqui'ija piyuque Jesucristo ja'apiyá jema'ajeño, Macedonia te'eré ehua' i'imañaño. Nojena, numá piño ijló, ihuátacaloje necá íqui'ija richaje, richájeno que penaje.

<sup>11</sup> Ihue'epí itucumó pajhua'atéchaca i'imañana palá.

Chuhua numájica ijló sápacaje nacú: Ila'á isápaca'alo ijluhua, icahuíla'aca piyá ajopana ina'uqué nacú. Ila'á isápaca'alo huemacá ijló i'imañá que.

<sup>12</sup> Mari que la'acana aú ajopana ina'uqué pechu i'imañé palá inacu. Uncá Jesucristo ja'apiyá jema'ajeño naquiayana calé necá numá nacú. Isápajica ee numacá ijló que, uncá na nacú ila'alaje camu'ují. Uncá caja icahuíla'alaje ajopana nacú nacaje chaya.

*Jesucristo pa'ajico piño majó yucuna marí:*

<sup>13</sup> Nojena, huahuata ihue'epica caja taca'acaño yucuna, ipechu i'imañá piyá camu'ují najhua'até. Re ina'uqué, uncá Tupana hua'atájena calé necá. Necá la'año napéchuhua camu'ují, ina'uqué caja taca'acaño hua'até.

<sup>14</sup> Mari eja'ahuá chu ri'imañé huacajé, Jesucristo taca'arí i'imañá. Ejomi rimacápo'o piño rapumí chuhua. Huahue'epí quehuaca ricá. Huahue'epí caja Tupana macápo'otajica piyuque ina'uqué caja taca'acaño. Caphí huapechu i'imañachu Jesucristo chojé a'ajná huataca'ajica ejená, rimacápo'otaje huecá.

<sup>15</sup> Nacaje Hue'emacana Jesucristo jehuíña'atacare nacú huecá, huemá nacú ijló. Jesucristo pa'ajico majó huacajé, huecá cajmuruna i'imañá, uncá jácho'olajeño caja taca'acaño tucumá.

<sup>16</sup> Hue'emacana Jesucristo, huitúca'ajica je'echú chiyá majó huacajé, cajrú namejé i'imañá. Tupana hua'atájena, je'echú chiyájena huacára'ajeri jahuíyo'ojeri najló: “Jácho'o” que, namacápo'ocoloje penaje raú. Cajrú Tupana le'ejé luhuiluhuí caje mejé i'imañá. Ejéchami Tupana macápo'otajica Jesucristo ja'apiyá jema'ajéñomi chuna piyuqueja. Ejomi nahuá'aje necá je'echú chojé.

<sup>17</sup> Ejomi huecá piño, cajmuruna, nahuá'aje ají que yenoje juni suhuáca'ala e'iyajé, huephácacaloje caja taca'acaño penájemina hua'até penaje. Jesucristo jimaje huephácajico najhua'até. Ejéchami hue'emajica Jesucristo hua'até matajnaco je'echú chu. Mari que hue'emajica.

<sup>18</sup> Mari yucuna i'imañá pajlocaca, ipechu i'imañáloje caphí raú penaje.

## 5

<sup>1</sup> Caja ihue'epí Jesucristo pa'ajico piño majó jená nacojé. Ñaquele uncá naje calé nu'umá piño riyucuna ijló.

<sup>2</sup> Caja ihue'epí uncá na calé hue'epica méquechamica Jesucristo iphájica piño majó. Piro'oqueji ipháchachu lapí nacaje ata'ajé, uncá ra'alá inajlo renó méquechamica riphájica. Mana'í chiyoja riphaca iná nane a'atajé. Mari que caja Jesucristo iphájica. Uncá caja iná hue'epila méquechamica riphájica.

<sup>3</sup> Riphájica majó yámona marí que nemájica pajlocaca:

—Chuhua palá hue'emajica piyuqueja. Uncá merohúa nóccajico i'imalaje —que nemájica pajlocaca.

Eyá mana'í ne'emajica ee, capichácajo iphájica nanacu. Uncá meño'ojó ne'emalajo richiyá. Inanaru iphaca roná chojé, ruhua'acaloje ru'urí penaje, quiñaja ri'imañá ruchá. Ñaquele caja mana'í chiyó capichácajo iphájica nanacu, uncá jema'alaño Tupana ja'apiyá nacú.

<sup>4</sup> Nojena, huahue'epí quehuaca ricá numacare nacú ijló. Aú uncá hue'emalá mapéchuruna rinacu. Ica'á caja hue'epiño Jesucristo iphájica majó jená nacojé. Aú calé uncá riquero'ótajaje ijló, piro'oqueji quero'ótaca inajlo ata'ajaje aú que caja.

<sup>5</sup> Jesucristo hua'atájena icá. Ica'á hue'epiño quehuácaje puráca'aloji nacojé. Uncá mapéchuruna i'imañá que calé icá. Mapéchuruna uncá hue'epilaño quehuácaje puráca'aloji nacojé.

<sup>6</sup> Ñaquele uncá hue'emalaje chuhua camátajeño que. Uncá hue'epilaño quehuácaje puráca'aloji nacojé, necá i'imañá camátajeño que. Eyá huecá hue'epiño rinacojé. Aú cajmuruna que huecá.

<sup>7</sup> Lapí calé ina'uqué camátáño. Ñaquele caja ne'iyajena yuhuéra'aco lapí.

<sup>8</sup> Uncá la'alaño ñaquele caja huecá. Quehuácaje puráca'aloji ja'apiyá i'imañá huecá. Ñaquele huácho'oniyó capechú caje chiyá, huapechu i'imañá caphí Tupana chojé. Iqui'ija

huahuátacare Tupana. Iqui'ija huahuátaca caja ajopana ina'uqué. Marí nacuja hue'emajé, huamejñátacaloje huecó Jiñá Chi'ináricana liyá raú penaje. Surara i'icú pajré aú rimejñátaca ricó. Ñaque caja huamejñátajica huecó riliyá Tupana chojé i'amacana caphí aú. Surara a'arí richó risapéhuane, pejru'uhua náquiyana la'acanami, rihuila'aru mejñátajona penaje. Eyá Tupana i'imatari huecá capichácajo liyá. Surara huila'aru mejñátaco risapéhuane ja'apejé que caja huamejñátaca huecó Jiñá Chi'ináricana liyá raú.

<sup>9</sup> Uncá Tupana i'ihuapala rijluhua huecá ajopana ina'uqué e'iyayá, rihuajácaloje huecá penaje. Ri'ihuapá rijluhua huecá ajopana ina'uqué e'iyayá, Jesucristo i'imatácaloje huecá capichácajo liyá penaje.

<sup>10</sup> Jesucristo taca'arí huachaya i'amacá, ri'imatácaloje huecá pu'uhuaré huala'acare liyá penaje, hue'emacáloje rijhua'até raú penaje. Cajmuruna ca'ajná hue'emajica, caja taca'acaño ca'ajná hue'emajica majó riphájica huacajé. Uncá meque calé rijló hue'emajica. Riphájica ejomi hue'emajica cajmurúnaja piyuqueja rijhua'até reyá a'ajná ño'ojó.

<sup>11</sup> Ñaquele ila'á papéhcucaca caphí ripé marí puráca'aloji aú. A'á pañatéchaca, ipechu i'imacáloje caphí raú penaje. Me'etení ila'acá que caja ila'ajica maáreya huatucumajo.

*Palab huacára'aca nala'acá nacaje yucuna marí:*

<sup>12</sup> Nojena, re ina'uqué e'iyá, jehuíña'ataño icá Tupana puráca'alo nacú. Re caja amájeño. Necá la'año jenacú Tupana puráca'alo aú. Iphá na'apí.

<sup>13</sup> Ipechu i'imá caja palá amájeño nacú. Ihuata caja necá íqui'ija, nala'acale nasápaca'ala Tupana a'acare najló i'amacá. I'imá caja palá pajhua'atéchaca.

<sup>14</sup> Nojena, ijló numá: Eco aca'á necá, uncá huátalaño sápacaje; ijnuruna necá. Ipura'ó caja ujhúí péchuruna hua'até, napechu la'achó palá raú. Uncá hue'epílaño palá Tupana puráca'alo nacojé, a'á nañaté, nahue'epichi richaje, richaje que rinacojé raú penaje. Mayuchéruja amaca piyuque inu'uqué.

<sup>15</sup> Ajopana ina'uqué ca'ajná la'año icá chapú. Pa. Ipura'aniyo ile'ejé jacumi nacú ñaque caja nala'acana aú. Eyá marí que ila'ajica: Palá ila'ajica pecohuáca. Piyuqueja ina'uqué ila'ajé palá.

<sup>16</sup> Ipechu i'imá pu'ují hua'ajini huani.

<sup>17</sup> Ipura'ó caja Tupana hua'até cajú. Iyuríniya rijhua'até pura'acano nacú.

<sup>18</sup> Iná quemá Tupánajlo: "Palá pila'acá nucá" que, palá iná i'amacá huacajé. Iná quemá caja rijló: "Palá pila'acá nucá" que, chapú caje yajhué iná amaca huacajé. Marí que rihuátaca Jesucristo ja'apiyá jema'ajeño quemacá rijló.

<sup>19</sup> Tupana Pechu huátari ihuacára'ajeri i'amacana. Jema'a ra'apiyá, rila'acó piyá ujhúí ihuacára'acana nacú.

<sup>20</sup> Tupana ja'apiyá que inaquiyana ja'apátaca ripuráca'alo ijló. Ipechu i'imaniya ripuráca'alo nacú: "Majopéjari ricá. Uncá na penaje calé ricá" que.

<sup>21</sup> Ihue'epí piyuque puráca'aloji nacojé mecajeca ricá: quehuácaje ca'ajná ricá, majopeja ca'ajná ricá. T'iraó quehuácaje puráca'aloji nacojeja.

<sup>22</sup> Ihuátaniya huani pu'uhuaré la'acana, imanaicho la'acana.

<sup>23</sup> Tupana la'arí iná pechu palá, palá iná i'imacáloje raú penaje. Nuhuata rila'acá icá palá, i'imacáloje rila'ejena huani ina'uqué penaje. Iyurí ichó rijló, ra'acáloje rinacojó icá penaje. Iyurí caja rica'acá pu'uhuaré ila'acare, imanaicho ila'acare inaquiyá, ipechu, inapona hua'até, i'imacáloje palani rijló raú penaje. Jesucristo, Huahuacára'ajeri huani ricá. Riphájica majó huacajé, icá i'imajeño lamá'ataquejanami que rijló raú.

<sup>24</sup> Tupana a'arí icá rijhua'atéjena penaje. Ricaja caja la'ajeri ijló nacaje rimacá inacu que.

*Caja penaje rimacare nacú najló marí:*

<sup>25</sup> Nojena, ipura'ó Tupana hua'até huanacu.

<sup>26</sup> Eco palá piyuque huejénajlo ca'ajno.

<sup>27</sup> Eco ipura'ó marí papera hua'até piyuque Jesucristo ja'apiyá jema'ajeñojlo. Marí nacú numá ijló Jesucristo puráca'alo aú.

<sup>28</sup> Nuhuata caja Jesucristo la'acá icá palá. Hue'emacana huani ricá. Maáreje riyucuna tajnaro.

## 2 TESALONICENSES

*Pablo, rijhuáque'ena, quele huacára'año puráca'aloji Jesucristo ja'apiyá jema'ajeñojlo marí que:*

<sup>1</sup> Nucá Pablo, Silvano, Timoteo, quele huecá huacára'año ijló marí puráca'aloji pajimila Tesalónica ejo. Jesucristo ja'apiyá jema'ajeño icá. Huara'apá huani Tupana. Huahuacára'ajeri huani caja Jesucristo. Pajluhua japi necá queja huecá najhua'até.

<sup>2</sup> Nuhuata Tupana, Jesucristo hua'até la'acá icá palá. Nuhuata caja nala'acá ipechu palá.

*Jesucristo pa'ajico majó huacajé, Tupana huajájeri piyuqueja namanaicho la'ajeño, pu'uhuaré la'ajeño, quele. Riyucuna marí:*

<sup>3</sup> Nojena, huapura'ó Tupana hua'até inacu. Palá huapechu i'imacale inacu, huemá rijló: “Palá pila'acá huecá, palá nema'acale pa'apiyá” que. Marí que huemacá rijló, richaje, richaje que ipechu i'imacale caphí Tupana chojé. Hua'até caja richaje, richaje que ihuátaca ajopana ina'uqué iqui'ija. Marí que ila'acale palá huani, huemá Tupánajlo: “Palá pila'acá huecá, nema'acale pa'apiyá.”

<sup>4</sup> Marí que i'imacaño i'imacale, hue'emá iyucuna ajopana Jesucristo ja'apiyá jema'ajeñojlo. Palani huajló iyucuna i'imacana najló. Jesucristo ja'apiyá jema'ajeño i'imacale, ne'iyajena la'año icá chapú me'etení. E'iyonaja re caja jo'ó ipechu caphí Tupana chojé. Uncá ila'aló ujhui Tupana liyá, chapú caje yajhué amácana aú.

<sup>5</sup> Palá huani Tupana hue'epica naca palani inajlo. Ñaquele riyurí nala'acá icá chapú me'etení. Caja Tupana hue'epiri caliyárunaca icá rijló, iphácaloje raú je'echú chojé penaje. Rehuájena huacára'ajeri ricá. Rejo i'imajícaño penájena i'imacale, amá chapú caje yajhué me'etení.

<sup>6</sup> Tupana la'ajeri palá. La'año chapú icá, rila'ajé caja chapú. Ilé que nala'acana palani.

<sup>7</sup> Jesucristo huitúca'ajica majó je'echú chiyá huacajé, Tupana huatána'atajeri icá, huecá hua'ató, chapú nala'acare huecá liyá me'etení. Rijhua'atéjena, je'echú churuna hua'até riphaje majó. Cajrú péchuruna necá rijhua'atéjena. Cajrú quera'atani e'iyohuá ri-huitúca'ajica majó rijhua'atéjena hua'até rihuacajé.

<sup>8</sup> Ejéchami rihuajájica piyuqueja ina'uqué uncá hue'epílaño Tupana. Jesucristo palamane aú Tupana i'imatari ina'uqué capichácajo liyá. E'iyonaja cajrú ina'uqué uncá a'alaño nanacajó riyucuna. Ripa'ajico piño majó huacajé rihuajaje ñaque' la'acaño.

<sup>9</sup> Marí que rihuajájica necá: Rica'ajé necá jucajo huani Tupana liyá. Caja queja ne'emajica capichájeño Tupana liyá hua'ajini huani. Uncá Tupana palamane i'imajícaño calé ne'emajica. Uncá caja namálaje palani nacaje rila'ajicare.

<sup>10</sup> Riphájica majó huacajé, rila'ejena ina'uqué pura'ajeño palá Jesucristo nacú. Nala'ajé nayájelepano raú. Re caja icá i'imajeño najhua'até, ila'acale quehuaca hua'apiyá Jesucristo yucuna hue'emacare ijló i'imacá.

<sup>11</sup> Ñaquele cajrú huapura'acó Tupana hua'até inacu, i'imacáloje caliyáruna rijló raú penaje. Ajopana ina'uqué e'iyayá Tupana i'ihuapari rijluhua icá, i'imacáloje palájne'equena huani rijló penaje. Huemá caja Tupánajlo, ra'acáloje iñaté penaje, ila'acáloje nacaje palá ipechu nacú ri'imacá que penaje. Caphí péchuruna icá Tupana chojé, ra'acáloje iñaté raú penaje. Marí caje penaje huapura'ó Tupana hua'até inacu.

<sup>12</sup> Palá ila'acá aú, ajopana ina'uqué pechu i'imajica palá Hue'emacana Jesucristo nacú. Ñaque' caja Jesucristo pechu i'imajica inacu raú. Tupana, Hue'emacana Jesucristo, quele palamane ja'apiyá iná la'acá palá. Marí caje aú, palá ripechu i'imajica inacu.

## 2

*Uncá ina'uquélari huani i'imajica yucuna marí:*

<sup>1</sup> Nojena, chuhua nu'umajica Jesucristo pa'ajico majó yucuna. Ripa'ajico majó huacajé rahuacátaje huecá, rihuá'acaloje huecá rijhua'ató ají que je'echú chojé penaje.

<sup>2</sup> Nojena, ipechu quechíra'aniyo Jesucristo pa'ajico majó yucuna liyá. Apala caja nemá ca'ajná ijló rinacu marí que:

—Caja Jesucristo iphari majó.

Apú ca'ajná quemari ijló marí que rinacuhúa:

—Tupana huacára'ari nu'umacá riyucuna ijló, caja riphaca majó yucuna.

Apú ca'ajná huacára'ari ijló papera i'imacá. Huahuacára'aca que caja ca'ajná rihuacára'aca ijló ri'imacá. Apala majopeja ca'ajná rihuacára'aca ijló ricá, ipechu i'imacáloje rinacu: “Pablo japi huacára'ari huajló ricá” que.

<sup>3</sup> ¡Pa! Jema'aniya pajlácachina ja'apiyá. Marí que nacaje i'imajica marí eja'ahuá chu yehuicha Jesucristo iphájica majó piyá: Ina'uqué la'ajeño cajrú nacaje uncá Tupana huátalare caje. E'iyohuá queja pajluhua ja'apiyá uncá iphájica. Uncá ina'uquéleri huani penaje ri'imajica. Tupana capichátajicare penaje ri'imajica.

<sup>4</sup> Chapú huani péchuri caja ri'imajica Tupana nacú. Uncá rihuátalaje Tupana, Tupana yale, Tupana puráca'alo caje. Uncá caja rihuátalaje nacaje jenami, napechu i'imacare nacú: "Huachí'ináricana ricá" que. Uncá caja rihuátalaje ajopana yucupere, nemacare nacú: "Huachí'ináricana yucuna ricá" que. Marí que la'ajeri ina'uqué ri'imajica, uncale rihuátalaje napechu i'imacá apú nacú. Rinácuja calé rihuata napechu i'imacá palá. "Ajopana chaje huani ripechu," que rihuátaca nemacá rinacu. E caja rimujlúca'aje Tupana ñacaré chojé. Re riyá'ajo. E rimaje rinacuhua: "Tupana nucá" que.

<sup>5</sup> Me'etení numájicare nacú ijlo, numá caja rinacu nu'umaqué ijhua'até huacajé.

<sup>6</sup> Caja ihue'epi Tupana itaca ilé ina'uqué apu, ri'imacá piyá ñaque me'etení. Ricá chapú péchuri Tupana nacú numá nacú. Aquijñojo ramajo.

<sup>7</sup> Caja ina'uqué la'año pu'uhuaré, namanaicho, uncale nema'alá Tupana ja'apiyá. Me'echuje jo'ó najló naca nahuacára'ajeri. Tupana Pechu itari rapu ri'imacá piyá me'etení. Tupana ña'ajeri Ripechu eja'ahuá e'iyayá. Ejéhami caja ra'ajico pu'uhucacajé majó ricá quele, uncá ina'uquéleri, numacare nacú.

<sup>8</sup> Hue'emacana Jesucristo iphájica majó huacajé, cajrú mejáma'atani hua'até riphaje. Riphájica aú ricapichátaje ricá, uncá ina'uquéleri. Rinoje ricá ripuráca'alo aú ja.

<sup>9</sup> Uncá chiyó Jesucristo iphaje majó, ilé uncá huani ina'uquéleri la'ajeri nacaje piyuqueja, uncá meño'ojó iná la'alore caje. Jiñá Chi'ináricana a'ajícale riñaté rila'acana aú rila'ajé marí que: Majopeja rila'ajica nacaje, ina'uqué jema'acáloje ra'apiyá raú penaje. Marí que ripajlájica cajrú ina'uqué hua'até.

<sup>10</sup> Cajrú huani ripajlájica capichájeño penájena hua'até. Uncá huátalaño quehuácaje puráca'aloji a'acana nanacojo necá. Hua'até ripajlaje. Uncá na'alá Tupana puráca'alo nanácho, ne'emacáloje capichácajo liyá raú penaje. Pachá nacapichajo.

<sup>11</sup> Ñaquele Tupana yuriri necá, nema'acáloje pajlácaje puráca'aloji ja'apiyá penaje, nacapichácajoje ra'apiyá i'imacana aú penaje.

<sup>12</sup> Piyuque necá uncá huátalaño quehuácaje puráca'aloji ja'apiyá i'imacana, necá capichájeño. Apú nacaje chaje nahuata namanaicho la'acana, pu'uhuaré la'acana hua'até. Pachá nacapichajo.

*Tupana a'acá ina'uqué ajopana ina'uqué e'iyayá, ne'emacáloje rila'ejena huani penaje. Riyucuna marí:*

<sup>13</sup> Iqui'ija Tupana huátacarena icá, Jesucristo hua'atéjena i'imacale. Aú pulapeno que huemacá Tupánajlo inacu marí que:

—Palá pila'acá huecá, nema'acale pa'apiyá aú.

Marí que quemacana palani huajló, Tupana i'ihuapácale rijluhua icá ajopana e'iyayá. Eja'ahuá queño'ocó huacajé caja Tupana pechu nacú ri'imá, i'imacáloje rila'ejena ina'uqué penaje. Ri'ihuapá rijluhua icá ne'iyayá, ri'imatácajoje rijluhua icá capichácajo liyá penaje. Ripechu aú ja ri'imatá icá, i'imacáloje rila'ejena ina'uqué penaje. Caphí ipechu i'imacá Tupana puráca'alo chojé, aú i'imá.

<sup>14</sup> Caja hue'emá ijlo Tupana i'imataca ina'uqué capichácajo liyá yucuna i'imacá. Ica jema'año ra'apiyá i'imacá. Ñaquele Tupana a'arí icá, i'imacáloje Jesucristo hua'até ri'imacá que caja penaje.

<sup>15</sup> Ñaquele, nojena, marí puráca'aloji numacare nacú ijlo me'etení, numacare caja nacú ijlo nu'umaqué ijhua'até huacajé. Iyuríniya iliyó ra'apiyá jema'acana. Ipechu capicháñaniya caja ricá. Quehuaca riyucuna.

<sup>16</sup> Ina'uqué huani Tupana. Iqui'ija rihuátaca huecá. Ñaquele huahue'epí palá huani hue'emajica rijhua'até hua'ajini huani.

<sup>17</sup> Nuhuata Huahuacára'ajeri Jesucristo, Tupana, quele la'acá ipechu palá, caphí ipechu i'imacáloje richojé penaje. Raú caja il'ajé piyuque nacaje palá. Raú caja imaje nacaje nacú palá.

### 3

*Pablo quemari najló, napura'acáloje Tupana hua'até nanacu penaje. Riyucuna marí:*

<sup>1</sup> Chuhua numájica ijlo: Ipura'acáloje Tupana hua'até huanacu, hue'emacáloje palá Tupana puráca'alo yucuna ajopana, ajopánajlo que penaje. Quiñaja riyucuna jema'acáloje piyuque ina'uejlo penaje. Ipura'ó caja rijhua'até, riyucuna i'imachi napechu nacú palá

penaje. Palá ri'imacá inacu jema'acá aú ricá. Ñaque caja ri'imacáloje ajopánajlo penaje, ipura'ajó Tupana hua'até.

<sup>2</sup> Imá caja Tupánajlo, ri'imatácaloje huecá chapújne'equena ina'uqué liyá penaje. Uncá piyuqueja calé ina'uqué pechu i'imacá caphí Tupana chojé.

<sup>3</sup> Tupana la'arí palá. Ñaquele rila'á icá palá, caphí ipechu i'imacáloje ra'apiyá jema'acana nacú penaje. Ra'á rinacojó icá, Jiñá Chi'ináricana la'acá piyá icá chapú.

<sup>4</sup> Tupana la'arí palá icá. Ñaquele nuhue'epí palá la'acana nacuja i'imajica huemacá ijló que.

<sup>5</sup> Nuhuata Jesucristo a'acá iñaté, ihue'epícaloje raú, íqui'ija huánica Tupana huátaca icá penaje. Nuhuata caja ra'acá iñaté, jácho'oco piyá ra'apiyá jema'acana chiyá ripalamane aú.

*Palani inajlo sápacaje. Riyucuna marí:*

<sup>6</sup> Nojena, Jesucristo puráca'alo aú huahuacára'a icá marí que me'etení: I'maniya inaquiyana hua'até, uncaja que nahuata huapuráca'alo a'acana nanacojó. Caja huehuíña'ata icá rinacu i'imacá.

<sup>7</sup> Icó hue'epiño eja'ahuá chu i'imacana nacojé, huamátacale icá sápacaje aú i'imacá. Uncá hue'emalá ijhua'até mana'íja. Hue'emaqué ijhua'até huacajé, sápacaje nacuja hue'emaqué ijhua'até.

<sup>8</sup> Uncá huaquejá'aque iliyá a'ajnejí majopeja. A'ajnejí a'ajicare huajló, hua'aque ijló rihuemí. Hue'echú, lapejé hua'ató huasápaque, ica'ajica piyá iliñéroute huanacojé a'ajnejí huemí.

<sup>9</sup> Ihuacára'ajeño huecá. Ihuacára'ajeño hue'emacale, huahuacára'ajla a'acá huajló a'ajnejí majopeja. E'iyonaja calé uncá huahuátala ilé que ijhua'até la'acana. Huasapa i'imacá, ñaque caja isápacaloje huamájemi penaje. Ricá penaje huasapa ilé que i'imacá.

<sup>10</sup> Hue'emaqué ijhua'até huacajé huemá ijló marí que:

—Uncá sápalaje uncá caja ajñálaje ra'ajnehuá.

<sup>11</sup> Marí que nemacá huajló inacu:

—Ne'iyajena uncá sápaláño. Majopeja nacahuíla'aca ajopana ina'uqué nacú —que nemacá huajló inaquiyana nacú.

<sup>12</sup> Ilé cajena huahuacára'a Jesucristo puráca'alo aú, nasápacaloje penaje, ne'emacáloje palá ajopana ina'uqué hua'até raú penaje. Na'acáloje najló nasápaca'ala huemí penaje nasápaje ajopana hua'até. Raú liñeru i'imajé najló, nahuarúhua'acaloje ne'emajohua najluhua raú penaje.

<sup>13</sup> Nojena, jaya'aniyo palá la'acana nacú.

<sup>14</sup> Uncaja que inaquiyana a'á marí huapuráca'alo nanacojó, eco amá mecajenaca necá. Ila'á natejena raú, napáña'acoloje raú penaje.

<sup>15</sup> Ipechu i'maniya chapú nanacu. Ipura'ója najhua'até palá, nala'acáloje palá penaje. Ipura'ó najhua'até palá, Jesucristo ja'apiyá jema'ajeño ne'emacale ijhua'até.

*Caja penaje rimacare nacú najló marí:*

<sup>16</sup> Palá iná pechu la'ajeri Tupana. Nuhuata rila'acá ipechu palá, i'imacáloje caja queja palá péchuruna penaje. Nuhuata caja Tupana i'imacá ijhua'até palá, piyuqueja.

<sup>17</sup> Nucá, Pablo, lana'arí marí nocoja: Pablo. Marí que nulana'acá nú hua.

<sup>18</sup> Nuhuata Hue'emacana huani, Jesucristo, la'acá icá palá piyuqueja. Maáreje ritajno.

## 1 TIMOTEO Introducción

*Na penájeca San Pablo huacára'aca Timotéojlo papera yucuna marí:*

Pablo ipháta Timoteo huacajé, hualijímaca Timoteo i'ímacá. Raló íí i'mari Eunice. Judíona ja'aló ru'umacá. Riruta íí i'mari Loida. Necá i'ímaño Jesucristo ja'apiyá jema'ajeño. Timoteo jema'arí caja ra'apiyá, ne'emacale rijló riyucuna. Palá rema'ajica ra'apiyá. Palá caja rila'ajica rehuá. Marí caje aú palá Jesucristo ja'apiyá jema'ajeño pechu i'imajica rinacu.

Rihuacajé Pablo i'ijnaqueri apú eyá, apú eyá que Jesucristo yucuna i'imacana nacú. Ehuá riphaca rejo. Re ramá Timoteo. Palá ripechu i'ímacá rinacu. Aú ripura'ó rijhua'até. Rimá rijló, ri'ijnacáloje rijhua'até penaje. "Je" que Timoteo quemacá rijló. Aú ri'ijná Pablo hua'até Jesucristo yucuna i'imacana nacú. Ri'ijnaqué rijhua'até apú eyá, apú eyá que. Quehuá nephaca pajimila Efeso ejo. Re Pablo ja'apáñari ricá. Rimá rijló:

—Maáreje piyurejo, pehuíña'atacaloje necá penaje, nahue'epícaloje richaje Tupana puráca'alo nacojé raú penaje.

Reyá Pablo ja'apari piño apú pajimila ejo. Reyá i'imajemi Pablo huacára'ari rijló marí puráca'aloji.

*San Pablo huacára'ari Timotéojlo marí puráca'aloji i'ímacá:*

<sup>1</sup> Nucá Pablo. Tupana, Jesucristo hua'até quemáño nunacu nu'umacáloje Jesucristo huacára'acarena naquiñana penaje. Hue'ematajari Tupana. Jesucristo palamane aú palá hue'emajica.

<sup>2</sup> Timoteo, marí puráca'aloji nuhuacára'aje pijló ca'ajno. Nu'urí huani que nojló picá, pema'acale Jesucristo ja'apiyá nujhua'até. Tupánaja calé Huara'apá huani. Hue'emacana huani caja Jesucristo. Nuhuata pi'ímacá palá napalamane aú. Nuhuata Tupana, Jesucristo hua'até la'acá pipechu palá. Nuhuata caja nahue'epica pimují palá. Marí que nuhuátaca nala'acá picá palá.

*Uncá quehuácaje calé ne'iyajena puráca'alo yucuna marí:*

<sup>3</sup> Nuhuata piyurico rejo'ocaja jo'ó pajimila Efeso e. Re nuyurí pi'ímacá nu'ujnacá majó Macedonia te'eré ejo yámona. Efeso e ajopana jehuíña'ataño ina'uqué nacaje nacú, uncá quehuácaje calé napuráca'alo. Ñaquele numá pijló, piyurícolaje ejo'ocaja re penaje, pihuacára'acaloje necá, nehuíña'ataca piyá pecohuácaca pajlácaje puráca'aloji nacú penaje.

<sup>4</sup> Pimá najló, nayurícaloje naliyó júpichumi puráca'aloji penaje. Na'ajútayami chuna puráca'alomí ricá. Huaphereni huani nayucúnami. Uncá meño'ojó iná tajátala ricá. Majopéjari yucu nacuja napura'ó pajhua'atéchaca. Uncá na penaje calé ilé caje nacú pura'acano. Rinacojé uncá nehuíña'atala necá palá Tupana ja'apiyá jema'acana nacú.

<sup>5</sup> Caphí iná pechu i'imacachu Tupana chojé, Tupana ca'arí iná liyá pu'uhuaré iná la'acare, iná manaicho iná la'acare hua'ató. Raú calé rila'á huecá palá péchuruna, huahuátacaloje íqui'ija pecohuácaca raú penaje. Ñaquele marí que caja ri'ímacáloje najló rehuá penaje, nuhuacára'a pehuíña'ataca necá.

<sup>6</sup> Caja ne'iyajena yuriño naliyó palani puráca'aloji. Majopéjari yucu nacuja napura'ó pajhua'atéchaca me'etení. Nacojé nayurí palani puráca'aloji naliyó.

<sup>7</sup> Nahuata caja ina'uqué jehuíña'atacana Tupana puráca'alo nacú, Moisesmi chu lana'acare i'ímacá. E'iyonaja uncá nahue'epila meque quemacánaca ricá nemacare nacú. Nemá marí que huani quemacánaca ricá. E'iyonaja uncá huani nahue'epila meque quemacánaca ricá. Marí que ri'ímacale najló, majopeja napura'acó.

<sup>8</sup> Iná hue'epícahu na penájeca Tupana puráca'alo, Moisesmi chu lana'acare i'ímacá, palani jo'ó ricá.

<sup>9</sup> Tupana puráca'alo, Moisesmi chu lana'acare i'ímacá, re ricá pu'uhuaré la'ajéñojlo, nahue'epícaloje capichájeño penájenaca necá raú, nala'acale pu'uhuaré. Uncá palá la'ajéñojlo calé ricá. Marí que i'ímacáñojloja ricá: Re ina'uqué uncá huani na'alá nana-cojó quehuácaje puráca'aloji. Re caja ina'uqué uncá jema'alaño Tupana ja'apiyá. Uncá caja nema'alá nahuacára'ajeño ja'apiyá. Re caja ina'uqué, chapú péchuruna necá, uncá ina'uquélaruna caja necá. Re caja ina'uqué namanaicho la'ajeño necá. Re caja ina'uqué uncá iphálaño Tupana ja'apí. Ripuráca'alo hua'ató uncá caja nephala ja'apí. Re nayani, noño nachí iná. Re caja ina'uqué noño ajopana ina'uqué.

<sup>10</sup> Re caja necá achiñana, inaana, quele la'año namanaicho pajhua'atéchaca. Re caja achiñana, pajno'oño panacahuácaca, nala'acáloje pajhua'atéchaca inaana hua'até la'acana

que caja penaje. Re caja ina'uqué, ajopana ina'uqué ata'ajeño necá. Re caja ina'uqué pajlácachina necá. Re caja ina'uqué, quemano: "Quehuaca ricá" que nacaje nacú, e'iyonaja uncá quehuaca calé ricá. Marí que la'acáñojlo Tupana puráca'alo Moisesmi chu lana'acare. Uncá a'alaño nanacojó quehuácage puráca'alojijlo ricá, nahue'epícaloje raú capichájeño penájena necá Tupana liyá. Ricá pena je ripuráca'alo.

<sup>11</sup> Chuhuaca Jesucristo palamane aú Tupana i'imatari ina'uqué capichácajo liyá. Palani huani riyucuna. Riyucuna i'imajeri penaje rihuacára'a nucá. Palájne'equ huani Tupana.

*Palá Pablo pechu i'ímacá Tupana palamane yucuna marí:*

<sup>12</sup> Nupura'acó aú Tupana hua'até, nu'umá Huahuacára'ajeri Jesucristojlo palá rila'acare nucá yucuna. Riyucuna nu'umá rijló, rila'acale peyajhué nupechu, nula'acáloje nusápaca'ala raú penaje. Numá caja rijló: "Palá pila'acá nucá" que, ripechu huatána'acale nunacojé i'ímacá. Raú ra'á nucá rijhua'até sápa'ajeri penaje.

<sup>13</sup> Júpimi uncá ñaque cale nu'umajica. Nupura'acó rinacu pu'uhuaré. Nula'aqué caja ra'apiyá jema'ajeño chapú. Chapú huani nula'ajica ricá raú. Marí que nu'umajica rihuacajé. E'iyonaja calé ra'á nu'umacá rijhua'até sápa'ajeri penaje. Rihue'epí numu'ují i'ímacá, uncale nupechu i'imalá caphí richojé rihuacajé. Uncá nupechu i'imalá caphí richojé huacajé nula'á pu'uhuaré i'ímacá. E'iyonaja uncá nuhue'epila na aú ca nula'acá pu'uhuaré rihuacajé i'ímacá.

<sup>14</sup> Palá huani Tupana la'acá nucá. Chuhuaca Jesucristo pechu chuhua nupechu. Chuhua ripalamane aú nuhuata i'iqi'ija ricá, ajopana ina'uqué hua'até. Caphí péchuri richojé caja nucá chuhuaca ripalamane aú.

<sup>15</sup> Jesucristo iphari marí eja'ahuá nacojé i'ímacá, r'i'imatácaloje namanaicho la'ajeño, pu'uhuaré la'ajeño, capichácajo liyá penaje. Palá huani piyuque ina'uquejlo riyucuna ja'apiyá jema'acana. Quehuaca riyucuna. Ajopana chaje nula'ajicano pu'uhuaré.

<sup>16</sup> E'iyonaja calé Tupana hue'epiri numu'ují i'ímacá. Uncá caja Jesucristo yúcha'alo nuchá. Pu'uhuaré nula'ajica huacajé rijña'aqué nucá panacu. Marí que r'i'ímajica nujhua'até pamineco. Raú ajopana hue'epiño méqueca Tupana hue'epica iná mu'ují. Rihue'epica numu'ují i'ímacá, que caja rihue'epica ajopana ina'uqué mu'ují. Nunacojé ajopana hue'epiño marí que la'ajérica Tupana, napechu i'ímacáloje richojé caphí nupechu i'ímacá richojé caphí que caja. Raú necá caja i'ímajeño je'echú chu matajnaco rijhua'até.

<sup>17</sup> Ñaquele nuhuata piyuque ina'uqué quemacá nujhua'até marí que Tupana nacú: "Palani huani ricá. Palá rila'acare nacú napura'ajó hua'ajini huani. Hue'emacana huani ricá. Uncá tajnácajo penaje calé ricá; i'imajeri huani penaje ricá. Uncá caja iná amálaré ricá. Pajluhuaja calé ricá Tupana, Ina'uqué Chi'ináricana." Marí queja ricá.

<sup>18</sup> Timoteo, nu'urí que nojló picá. Nuhuacára'a pitaca rapu najló, nehuíña'ataca piyá ina'uqué pajlácage puráca'aloji nacú. Pila'á ricá huanaquiyana quemacá pinacu i'ímacá que; Tupana ja'apiyá que nemacá pinacu i'ímacá. Pila'á caphí pipéchuhua napuráca'alo chojé, pa'apátacaloje ina'uqué pu'uhuaré nala'acare liyá penaje.

<sup>19</sup> Pácho'oniyo ilé pipechu i'ímacare caphí Tupana chojé chiyá. Re pipechu nacú nacaje la'acana palá. Rilocópa'alaja pila'á najló nacaje palá rehuá. Ne'iyajena uncá la'alaño palá napechu nacú r'i'ímacá loco'opáneje. Marí que nala'acá aú napichata naliyó ricá. Ñaquele chuhua uncá nema'alá Jesucristo ja'apiyá.

<sup>20</sup> Ñaque Himeneo, Alejandro, quele la'acá i'ímacá. Aú caja nuyurí necá Jiñá Chi'ináricanajlo, napura'acó piyá pu'uhuaré piño Tupana nacú.

## 2

*Méqueca iná pura'acó Tupana hua'até yucuna marí:*

<sup>1</sup> Pamineco nuhuata marí nacú quemacana: Nuhuata piyuque Jesucristo ja'apiyá jema'ajeño pura'acó Tupana hua'até marí que. Iná pura'ó rijhua'até ajopana ina'uqué nacú. Iná quejá'a caja najló nacaje Tupana liyá. Iná i'ímá caja Tupánajlo palá rila'acá necá yucuna. Iná pura'ó Tupana hua'até piyuqueja ina'uqué nacú.

<sup>2</sup> Iná pura'ó caja rijhua'até iná te'eré eyá huacára'ajeri nacú. Ñaque caja iná pura'acó rijhua'até ajopana iná huacára'ajeño nacú. Iná pura'ó nanacu Tupana hua'até, hue'emacáloje palá, mana'í pajhua'atéchaca penaje, huapechu i'ímacáloje Tupana nacuja raú penaje. Raú iná la'á palá nacaje piyuque. Marí caje penaje iná pura'ó Tupana hua'até iná huacára'ajeño nacú.

<sup>3</sup> Marí que la'acana i'imari Tupana nacú palá. Hue'ematájeri ricá.

<sup>4</sup> Ricá huátari piyuqueja ina'uqué i'ímatácana capichácajo liyá. Rihuata caja piyuqueja ina'uqué a'acá nanacojó quehuácage puráca'aloji.



<sup>5</sup> Re pajluhuaja Huachi'ináricana. Piyuque huani ina'uqué Chi'ináricana ricá. Re pajluhuaja caja ina'uqué, puráca'aloji lamá'atajeri ricá Tupánajlo. Rilamá'ata ina'uqué pechu Tupánajlo, huapechu i'imacáloje palá Tupana nacú raú penaje. Ñaqué caja ripectu i'imacáloje palá huanacu raú penaje, rilamá'ata huapechu Tupánajlo. Jesucristo ricá numacare nacú.

<sup>6</sup> Riyurí richó ajopana ina'uquejlo i'imacá, nenócaloje ricá ina'uqué chaya penaje. Riphaca rená chojé aú ra'á ricó, ri'imatácaloje ina'uqué capichácajo liyá penaje, ina'uqué i'imatácana capichácajo liyá huemí penaje rila'á marí que. Marí que rila'acale huachaya, iná hue'epí Tupana huátaca piyuque ina'uqué i'imacó capichácajo liyá.

<sup>7</sup> Ñaquele Tupana a'arí nu'umacá, nu'umacáloje riyucuna ajopánajlo que penaje, napechu i'imacáloje caphí richojé raú penaje. Uncá judíona calé necá nu'umajlo riyucuna. Nohuíña'ata caja necá Tupana puráca'alo nacú. Quehuácaje ripuráca'alo. Jesucristo ja'apiyá jema'ajeri núcá. Ñaquele numá quehuaca; uncá nupajlala.

<sup>8</sup> Nuhuata piyuque ina'uqué eja'ahuá chu i'imacaño pura'acó Tupana hua'até, palá napechu i'imacachu rinacu. Uncá iná i'imalá ajopana ina'uqué hua'até yurí, iná yuchá hua'até aca'ácacajo nacú.

*Inaana i'imacáloje palá najhua'até penaje yucuna marí:*

<sup>9</sup> Marí que nuhuátaca inaana i'imacá ijhua'até. Nuhuata na'acá nanacuhúa marí caje a'arumacaji: majopéjari quemachi, mahuemiru quemachi caje. Na'ajé a'arumacaji nanapona i'imacá piyá pu'uhucá rijhua'até. Caje nuhuátaca na'acá nanacuhúa. Uncá nehuiá i'imalaje pitóro'oqueja. Uncá caja na'alaje nanúru'upi nacuhúa nejnehuá palá nojé, oro naquiya la'acanamí. Uncá caja nacúhua'atalaje palá nojé ne'ejuí chiyá cúhua'atajona, palá namácaloje penaje.

<sup>10</sup> Uncá inaana hue'epilajeño marí cajé natucumó. Nahue'epeje natucumó Tupana huátaca que la'acana, nala'acáloje palá raú penaje.

<sup>11</sup> Jahuacájico ee Tupana puráca'alo jema'ajé huacajé uncá inaana pura'alajo. Nayureje nachó nehuíña'atajeñojlo.

<sup>12</sup> Uncá nuyurila inaana jehuíña'ataca achiñana, nahuacácochu Tupana puráca'alo jema'ajé. Uncá caja nuyurila inaana i'imacá achiñana huacára'ajeño. Nuhuata ne'emacá manumarú, nahuacácochu.

<sup>13</sup> Marí que nuhuacára'aca inaana, pamineco i'imacayo queño'ocale pu'uhuaré la'acana i'imacá. Tupana queño'ótaca ina'uqué huacajé, riqueño'óta pajluhuaja achiñá pamineco. Adán ríi i'imacá. Rejomi riqueño'óta inanaru. Eva ruí i'imacá. Necá i'imaño pamineco huani i'imacá. Pajlácachi huani Jiñá Chi'inácana.

<sup>14</sup> Uncá Adanmí chu calé queño'orí ra'apiyá jema'acana pamineco i'imacá. Rucá inanaru queño'oyó ra'apiyá jema'acana pamineco. Raú uncá rula'alá Tupana quemacá najló i'imacá que. Marí que ruqueño'ocale pu'uhuaré la'acana i'imacá pachá, uncá nuhuátala inaana jehuíña'ataca ina'uqué Tupana puráca'alo nacú. Uncá nuhuátala nehuíña'ataca necá nahuacaco huacajé.

<sup>15</sup> Ruqueño'ó pu'uhuaré la'acana i'imacá. E'iyonaja Tupana amaro inaana chaje. Marí que inaana la'ajica: Nalamára'aje palá nayani. Napechu i'imajé caphí Tupana chojé. Iqui'ija nahuátajica Tupana, ajopana ina'uqué hua'até. Ne'ejnataje napéchuhua palani nacaje nacú. Marí que nala'ajica ee, ne'emajó capichácajo liyá.

### 3

*Jesucristo ja'apiyá jema'ajeño amájeño yucuna marí:*

<sup>1</sup> Apú huátari ca'ajná Jesucristo ja'apiyá jema'ajeño amájeri i'imacana. Palani jo'ó ricá rihuátacare. Palani sápacaje ricá. Quehuaca jo'ó marí que rinacu quemacana.

<sup>2</sup> Palá nala'acá icá ne'emacá aú amájeri. Ñaquele marí cajena i'imajeño Jesucristo ja'apiyá jema'ajeño amájeño: uncá huani la'alaño pu'uhuaré necá; pajluhuájaru inanaru hua'até hua'acajeñomi caja necá; hue'epiño napéchuhua i'ijnatácana palá caja necá; caphí péchuruna caja necá; ina'uqué iphácarena ja'apí caja necá; huéchiruna caja necá ya'ajnaya iphácáño nanacu a'atacana nacú nañacaré chojé; hue'epiño ina'uqué jehuíña'atacana caja necá. Marí que i'imacaño i'imaño palani Jesucristo ja'apiyá jema'ajeño amájeño penaje.

<sup>3</sup> Eyá marí que la'acaño uncá i'imalájeño namájeño: yuhuéra'acachona, nócacachona, íqui'i huátacaño liñeru najluhua. Marí que i'imacaño uncá i'imaláñojla namájeño penaje. Marí que i'imacáñoja calé i'imaláñojla namájeño penaje: ina'uqué huani péchuruna; uncá yuríná calé necá; uncá caja aca'ácalaño necá; uncá caja huátalaño íqui'i liñeruja najluhua necá. Necaja calé i'imaláñojla Jesucristo ja'apiyá jema'ajeño amájeño penaje.

<sup>4</sup> Hue'epiño caja necá nañacaré chiyájena huacára'acana palá; hue'epiño caja necá nayani lamára'acana palá, nephácaloje na'apí penaje. Marí que i'imacaño i'imañojla namájeño penaje.

<sup>5</sup> Uncachu nahue'epila nañacaré chiyájena huacára'acana nayani hua'até, uncá caja nahue'epilaje Jesucristo ja'apiyá jema'ajeño huacára'acana.

<sup>6</sup> Meyale queja queño'ocá Jesucristo ja'apiyá jema'acana, uncá caja i'imalaje namájeri penaje. Apala rila'á najló rinacuhua hue'epiri que huani. Marí que caja Jiñá Ch'i'náricana la'acá rinacuhua i'imacá. Pachá Tupana huajájeri ricá. Rihuajaje caja ajopana ina'uqué ñaque lá'acaño. Marí que ri'imacá piyá, uncá a'alaje necá, meyale jema'acaño Jesucristo ja'apiyá, ne'emacáloje namájeri penaje.

<sup>7</sup> Namájeri penaje i'imajeri marí que: Palá la'ajeri ri'imajica. Raú ina'uqué, uncá jema'alaño Tupana ja'apiyá, pechu i'imajé rinacu palá. Uncá napechu i'imalaje rinacu: "Majopéjari ricá" que. Palá la'ajeri namájeri i'imajica ee, uncá rila'alaje Jiñá Ch'i'náricana huátaca que. Ricá a'arí inajlo rime'é rijluhua, iná la'acáloje pu'uhuaré raú penaje.

*Marí que i'imacaño i'imajeño Jesucristo ja'apiyá jema'ajeño ñaté a'ajeño:*

<sup>8</sup> Eyá ajopana piño i'imajeño namájeño ñaté a'ajeño. Marí que i'imacaño ne'emajica: palájne'equena; palá ajopana ina'uqué pechu i'imacarena nacú caja necá; pajluhuaja chuhua péchuruna caja necá. Nemacá ina'uquejlo queja la'acá necá. Uncá yuhuéra'alaño caja necá; uncá huátalaño cajrú liñeru najluhua i'imacaño caja necá. Marí que i'imacaño i'imajeño namájeño ñaté a'ajeño.

<sup>9</sup> Quehuácaje puráca'aloji nacojé i'iracaño caja necá. Na'á nanacojó ricá, nala'acáloje ricá nahue'epica ricá locópa'alaja penaje. Júpimi uncá Tupana puráca'alo nacú quemacana i'imalá. Uncá ina'uqué hue'epilaño Tupana puráca'alo nacojé rihuacajé. Chuhua pu'uhucá riyucuna.

<sup>10</sup> I'imá namájeño ñaté a'ajeño co'oná pamineco, a'ajica necá yámona. Iyurí na'acá nañaté mequetánaja, amájlja méqueca nala'acá. Palá nal'ajica ee ricá, a'ajé necá namájeño ñaté a'ajeño penaje.

<sup>11</sup> Ñaque caja naluna i'imajica palájne'equena caja, ina'uqué iphájicarena ja'apí caja necá. Uncá caja ne'emalaje cachapújre'equena. Palá i'ijnatácaño napéchuhua naquiyana caja ne'emajica. Pajluhuaja chuhua péchuruna caja ne'emajica, la'año piyuque nacaje nemacá rinacu chuhua. Marí que i'imacaño nañaté a'ajeño luna i'imajica.

<sup>12</sup> Eyá ricá achiñá, nañaté a'ajeri penaje, i'imajeri pajluhuájaru inanaru hua'até huá'acajeñomi. Palá hue'epica riyani huacára'acana riñacaré chiyájena hua'até ri'imajica caja.

<sup>13</sup> Marí que nañaté a'ajeño i'imajica. Necá a'ajeño Jesucristo ja'apiyá jema'ajeño amájeño ñaté. Nala'acachu palá nasápaca'ala, palá caja ajopana ina'uqué pechu i'imacá nanacu raú. Raú caphí nañaté a'ajeño pechu i'imacá ajopana hua'até pura'acano nacú, ne'emacáloje najló Jesucristo yucuna penaje. Caphí napechu i'imacare chojé yucuna ne'emajé najló.

*Puráca'aloji hue'emacare ja'apiyá yucuna marí:*

<sup>14</sup> Tu'ujné nuhuátaca pichaje i'ijnacana. Ñaquele me'etení nuhuacára'a pijló marí puráca'aloji ca'ajno.

<sup>15</sup> Apala numalá'ajo ejo'ocaja maare. Pihue'epícaloje méqueca la'acana palani Tupana le'ejena ina'uquejlo penaje, nuhuacára'a pijló marí puráca'aloji. Cajmuni Tupana. Pajluhuaja yaní que huecá rile'ejena ina'uqué. Quehuácaje puráca'aloji ja'apiyá i'imacaño caja huecá rijhua'atájena. Re Tupana; capechuni ricá. Uncá ajopana chi'náricana jenami que calé ricá. Huecá ja'apátaño ajopana, ajopánajlo que ripuráca'alo.

<sup>16</sup> Puráca'aloji hue'emacare ja'apiyá quehuácaje ricá. Quehuaca huani caja nojló ricá. Me'echuje Jesucristo yucuna i'imacá ina'uquejlo, uncá chiyó Tupana a'á majó pu'uhucajé ri'imacá. Ricá chojé huapechu i'imá caphí. Marí que ripuráca'alo quemacá Jesucristo nacú: Riya'ató huajló i'imacá.

Marí huanapona que caja Jesucristo napona i'imacá.

Tupana Pechu ja'apiyá ri'imacale, uncá huani rila'alá pu'uhuaré i'imacá.

Tupana hua'atájena, je'echú chu i'imacaño, amaño caja ri'imacá.

Riyucuna i'imajeño i'imaño caja riyucuna ajopana te'eré erúnajlo, ajopana te'eré erúnajlo que.

Raú ne'iyajena, ajopana, ajopana que i'imacaño, jema'año ra'apiyá.

Caja Tupana huá'ari Ri'irí Jesucristo je'echú chojé i'imacá.

Que ripuráca'alo lana'aquejami quemacá Jesucristo nacú i'imacá.

## 4

*Nanaquiya yurica Tupana ja'apiyá jema'acana yucuna marí:*

<sup>1</sup> Eja'ahuá íphájica rená chojé caja penaje huani huacajé, uncá paala ina'uqué la'ajica rihuacajé. Pu'uhucá Tupana Pechu í'ímáca riyucuna hualjlo í'ímáca. Marí que rimacá rinacu í'ímáca: Ne'iyajena yuréjeño Tupana puráca'alo ja'apiyá í'ímacana. Lanaquiya na'ajé nanacojó pajlácaje puráca'aloji. Jiñana le'ejé puráca'aloji nacu nehuíña'ataje necá, ricá nacuja napechu í'ímajé.

<sup>2</sup> Pajlácachina í'ímajeño. Nala'ajé necó palá la'ajeño que ina'uqué íjlú chu. E'iyonaja uncá ñaque calé ne'emajica. Necá í'ímajeño najló yucu. Nema'ajé na'apiyá. Palani puráca'aloji nahue'epicare nacojé nayureje caja naliyó. Nala'ajé pu'uhuaré, namanaicho. Nala'ajé caja chapú ajopana ina'uqué. E'iyonaja uncá napechu í'malaje chapú nanacuhúá ílé caje la'acana aú.

<sup>3-4</sup> Nahuacára'aje caja ne'iyajena, nahuá'acaco piyá. Ajñácaje penaje nacú nemaje: "Ajñániya ricá" que. Marí uncá paala. Tupana queño'ótari piyuque ajñácaje, ina'uqué ajñácaloje ricá penaje. Nacaje Tupana queño'ótacare í'ímáca, palani ricá. Uncá na penaje calé iná quemacá rinacu: "Uncá ajñácaje penaje calé ricá." Ajñácaje lojé penaje í'ímáca ricá. Ñaquele ra'apiyá jema'ajeño ajñaño piyuque a'ajnejí. Pamineco napura'ó Tupana hua'até a'ajnejí nacú. Nemá rijló: "Palá pila'acá huecá marí a'ajnejí aú" que. Ejomi najñá ricá.

<sup>5</sup> Caja Tupana quemari piyuque a'ajnejí nacú: "Palani ricá" que. Iná pura'ó Tupana hua'até rinacu, raú palani ricá, iná ajñácaloje penaje.

*Palani Jesucristo hua'até sápaieri yucuna marí:*

<sup>6</sup> Caja numá pijló méqueca iná jema'acá palá Jesucristo ja'apiyá. Pa'apata ajopana Jesucristo ja'apiyá jema'ajeñojlo riyucuna. Raú pila'ajé necá palá. Tupana puráca'alo a'acana pinacojó aú pipechu í'ímajé caphí Tupana chojé. Caja pa'á pinacojó ripuráca'alo. Ñaque caja pa'ajica ee pinacojó ricá, caphí pi'imajica richojé.

<sup>7</sup> Pa'aniya pinacojó yucu, majopeja ne'emacare. Uncá na penaje calé ricá. Uncá caja Tupana ja'apiyá jema'acanamí que calé ricá. Pa'á pinacojó Tupana puráca'alo, pila'acáloje Tupana huátaca que raú penaje.

<sup>8-9</sup> Marí caje la'acana pihue'epeje pitucumó. Quehuaca huani ricá numacare nacú. Palani caja piyuque ina'uquejlo ricá, ne'emacáloje ra'apiyá penaje. Iná a'acachu iná tej-muhua, iná í'ímacáloje catejmuni penaje, palani quemachí inajlo ricá. Eyá iná hue'epícachu iná tucumó Tupana huátaca que la'acana, palani huani inajlo ricá. Palá iná í'ímáca marí eja'ahuá chu raú; ñaque caja iná í'majica palá je'echú chu raú.

<sup>10</sup> Ricá penaje huasapa cajrú; ricá penaje caja huajña'á chapujreji panacu. Marí que hualjlo ricá, huapechu í'macale Tupana chojé caphí. Uncá nachí'ináricana jenami que calé Tupana. Capechuni ricá. Piyuqueja ina'uqué í'matájeri penaje caja ricá. Necaja calé ra'apiyá jema'ajeño, ri'imataje capichácajo liyá.

<sup>11</sup> Pihuacára'a ina'uqué la'acá nacaje numacare nacú pijló. Pehuíña'ata caja necá rinacu.

<sup>12</sup> Pila'á palá, napechu í'ímáca piyá pinacu majopéjari queja. Hualjí'ímaca jo'ó picá. Aú ca'ajná napechu í'ímajé pinacu: "Majopéjari chí ricá." Pipura'ó caja palani puráca'aloji nacú. Pila'aniya pu'uhuaré, pímanaicho. Pi'ímá caja palá; pihuata caja íqui'ija ajopana ina'uqué; pila'á caja caphí picó Tupana chojé, ra'acáloje piñaté raú penaje. Marí que la'acana nacuja pi'imajica, ajopana Jesucristo ja'apiyá jema'ajeño amácaloje méqueca pi'ímáca ra'apiyá penaje, ne'emacáloje ñaque caja pinacojé ra'apiyá penaje.

<sup>13</sup> Jahuacájico quehuá pipura'ajico Tupana puráca'alo lana'aquejami hua'até najló. Pi'ímá caja Tupana yucuna najló, napechu í'ímacáloje caphí richojé raú penaje. Pehuíña'ata caja necá Tupana puráca'alo nacú. Ricá nacuja pi'ímajé najhua'até nuphájica pinacu ejená.

<sup>14</sup> Peñahuilana to'otaca nayáte'ela pinacu huacajé, na'apata Tupana puráca'alo pijló. Tupana Pechu quemacá najló que na'apátaca pijló ri'ímáca. Rihuacajé Tupana a'arí pijló hue'epícaje, pila'acáloje pisápaca'alo rijló penaje. Rihuátaca que pila'acá raú. Pamá, pácho'oniyó hue'epícaje ra'acare pijló chiyá.

<sup>15</sup> Rila'acana nacuja pi'ímajé. Ricaja calé la'acana pihue'epeje pitucumó. Raú ajopana ina'uqué amájeño méqueca pila'acá palá. Richaje, richaje que pila'ajica pisápaca'alohua Tupánajlo.

<sup>16</sup> Pa'á pinacojó picó, pehuíña'atacaloje palá ajopana Tupana puráca'alo nacú penaje. Me'etení pila'acá queja pila'ajica ricá. Raú pi'imataje picó pu'uhuaré la'acana liyá pipuráca'alo jema'ajeño hua'ató.

## 5

*Méqueca iná í'ímáca ajopana Jesucristo ja'apiyá jema'ajeño hua'até yucuna marí:*

<sup>1</sup> Paca'aníya peñahuilana huani pu'uhuaré nala'acare chona. Iná pura'acó iná jara'apá hua'até que caja iná pura'acó peñahuilana hua'até, napechu pala'acóloje pu'uhuaré nala'acare liyá penaje. Ñaqué caja iná i'imacá hualijímacana hua'até. Iná pura'acó iná ejena huani hua'até que caja iná pura'acó najhua'até.

<sup>2</sup> Ñaqué caja iná i'imacá peñahuilana inaana hua'até. Iná pura'acó iná jaló hua'até que caja iná pura'acó najhua'até, nala'acáloje palá penaje. Ñaqué caja iná i'imacá ináyana hua'até. Iná pura'ó iná e'ehuelona hua'até que caja iná pura'acó najhua'até. Pila'aníya pipéchuhua manáique'ela najhua'até.

*Ihuacajílomina ñaté a'acana yucuna marí:*

<sup>3</sup> Ica a'ajeño ihuacajílomina ñaté, camu'ují la'acaño ne'emajica ee.

<sup>4</sup> Cayaniruna ca'ajná necá; calaquénaruna ca'ajná necá. Necá a'ajeño nanacójo necá, na'acáloje ñañaté camu'ují nala'acare nacú aú penaje. Marí que la'acana i'imari palá Tupana nacú. Nalamára'aca ne'emacá huemí na'ajé najló ñañaté a'acana aú. Marí que la'acana palani Tupánajlo.

<sup>5</sup> Marí cajena ihuacajílomina ñaté a'ajé: uncá ñañaté a'ajeño i'imalaño; caphí Tupana chojé péchuruna caja necá; cajrú caja nupura'acó Tupana hua'até. Marí que i'imacaño ñaté a'ajé.

<sup>6</sup> Uncá a'alaje marí que i'imacaño ihuacajílomina ñaté: huátaño napechu queja nacaje la'acana, ne'emacáloje queyájuparuna raú penaje. Na'ajné huani majopeja i'imacana. Cajmuruna jo'ó necá. E'iyonaja calé capicharo queja napechu Tupana liyá. Marí que i'imacaño ñaté uncá a'alaje.

<sup>7</sup> Eco pihuacára'a nayani, nalaquena, quele a'acá ñañaté, ajopana ina'uqué pura'acó piyá nanacu pu'uhuaré.

<sup>8</sup> Uncachu iná a'alá iná nacojó iná ejena huani, uncá caja iná jema'alá Tupana ja'apiyá. Caja jácho'oco Tupana ja'apiyá i'imacana chiyá, que caja iná i'imacá raú. Uncá ina'uquélaruna necá, uncá jema'alaño Tupana ja'apiyá. Nachaje huani iná i'imacá uncá ina'uquéleri, uncachu iná a'alá iná ejena huani iná nacojó.

<sup>9</sup> Marí cajena ihuacajílomina a'ajé ñaté: peñahuilana huani i'imacaño, sesenta jarechí ejé chajena ñaté a'ajé. Pajluhuaja ruyajnamí chu i'imacá, penájerumi ihuacajílomi rucá.

<sup>10</sup> Ajopana ina'uqué hue'epiño marí que la'ajícaño ne'emajica: palá nalamára'ajica nayani; na'ataqué caja ya'ajnaya iphácaño ñañaré chojé; Jesucristo ja'apiyá jema'ajeño nala'aque caja palá. Najló sápaño queja ne'emajica ne'iyohuá. Na'aque caja chapú caje yajhué amájeño ñaté; palá caja nala'ajica ina'uqué apú nacaje aú, apú nacaje aú que. Marí cajena ihuacajílomina ñaté a'ajé, Jesucristo ja'apiyá jema'ajeño necá numá nacú.

<sup>11</sup> Marí que i'imacaño uncá a'alaje ñaté: sesenta jarechí ja'apejé i'imacaño. Uncá a'alaje ñañaté, huechí napechu i'imacale huá'acacajo nacú. Ricá nacojó uncá na'alá nanacójo Jesucristo huátaca que la'acana.

<sup>12</sup> Pamineco chiyó nemá nanacuhúa: "Rihuátaca que huala'ajica." E'iyonaja uncá nala'alá ñaqué. Marí caje aú uncá a'alaje ñañaté.

<sup>13</sup> Marí que nala'acá piño, uncá paala: nachira'ó ajopana chaje, ajopana chaje que. Majopeja namalá'ataca necó ñañaré chu. Hua'ató que nachapújra'aco ajopana ina'uqué nacú. Naculácató caja nanacu. Napura'acaro nacú ajopana hua'até uncá huani paala ricá.

<sup>14</sup> Ñaquele nuhuata ihuacajílomina, ináyana jo'ó i'imacaño, huá'acaco piño, nayani i'imacáloje piño apú hua'até penaje, nasápacaloje palá ñañaré chiyá penaje. Marí que la'acana aú uncá chapú huanacu péchuruna pura'alajo pu'uhuaré huanacu.

<sup>15</sup> Marí que numacá pijló, ihuacajílomina naquiyana yurícale Jesucristo ja'apiyá jema'acana. Raú na'ó Jiña Chí'ináricana hua'atéjena penájena.

<sup>16</sup> Marí que Jesucristo ja'apiyá jema'ajeño la'ajica: re ca'ajná ihuacajílomina ejena huani rehuá. Necaja calé, nejena, a'ajeño ñañaté nacaje nala'acare nacú camu'ují aú. Uncá ajopana Jesucristo ja'apiyá jema'ajeño a'alájeño ñañaté. Raú liñeru yuréjero najló, na'acáloje ajopana ñaté raú penaje. Uncachu ñañaté a'ajeño i'imalaño, a'ajé ñañaté. Marí que a'ajica ihuacajílomina ñaté.

<sup>17</sup> Chuhua numájica piño Jesucristo ja'apiyá jema'ajeño amájeño nacú: namácahu palá najhua'atéjena, necá a'ajeño najló rihuemí. Chaje huani na'ajica najló rihuemí, nehuíña'atacachu necá palá Tupana puráca'alo nacú. Ñaqué caja na'ajica najló rihuemí, na'apátacachu najló palá Tupana puráca'alo.

<sup>18</sup> Marí queja pihuacára'ajica necá, Tupana puráca'alo quemacale ñaqué la'acana nacú. Marí que rimacá rinacu apa'amá yucu aú: "Jema pira'cana ja'apari aú trigo jahuacátacanami e'iyohuá, ripajára'acaloje richa re'iyayá penaje. Uncá paala rinuma jepo'ocana, rajñaca piyá trigo naquiyana. Rajñacare i'imari risápaca'ala huemí que." Marí que apa'amá quemacá

piño: “Iná sápacachu iná carihuante hua'até, ra'á inajlo iná sápacala huemí,” que rimacá. Ñaqué caja Jesucristo ja'apiyá jema'ajeño a'ajica nehuíña'atajeñojlo nasápaca'ala huemí.

<sup>19</sup> Eyá narucátajica ee pijló peñahuilana, pa'aniya napuráca'alo pinacojó. Ajopana i'imajeño iyamá ca'ajná, hueji quele ca'ajná. Nemájica ee ñaqué caja rinacu, pimaje: “Quehuaca ricá nemacare nacú nojló.”

<sup>20</sup> Quehuaca pu'uhuaré la'ajeño ne'emajica ee, paca'á necá ajopana Jesucristo ja'apiyá jema'ajeño jimaje, ajopana quero'ocóloje ñaqué caja la'acana piyá raú penaje.

<sup>21</sup> Tupana, Ri'irí Jesucristo, Tupana hua'atéjona je'echú chujena, quele amaño huecá me'etení. Najimaje que nuhuacára'aca pila'acá nacaje numacá pijló que. Pimaniya peñahuilana nacú: “Pu'uhuaré la'ajeño necá” que, uncachu pihue'epila palá méqueca necá. Re ca'ajná apú la'ari pu'uhuaré. Palá pipechu i'imacale rinacu, uncá pihuátala ca'ajná rijllo quemacana: “Pu'uhuaré la'ajeri picá” que. E'iyonaja numá pijló, pimacáloje rijllo pu'uhuaré rila'acare nacú penaje.

<sup>22-23</sup> Hua'ajini pila'acó pitami pihuó chiyá. Me'etení júnija i'iracá picá. Pi'irá caja huejápaja nacaje jalá amúra'atacanami pihuó tepé penaje.

Pa'aniya quiñaja apú, ri'imacáloje Jesucristo ja'apiyá jema'ajeño amájeri penaje. Apala pu'uhuaré la'ajeri jo'ó ca'ajná ricá. Pa'ajica ee ricá, ñaqué caja pila'ajica pu'uhuaré rijhua'até. Pamá picó, pila'ajica piyá pu'uhuaré ajopana hua'até.

<sup>24</sup> Pu'uhuaré ne'iyajena la'acá pu'uhuaré. Uncá chiyoja iná i'imá naco'oná, caja iná hue'epí pu'uhuaré la'ajeño necá. Eyá me'echuji ne'iyajena la'acá pu'uhuaré. Uncá meño'ojó iná hue'epí meque i'imacáñoca necá. Iná i'imá naco'oná ejomi iná hue'epí mecajenaca ina'uqué necá. Ñaquele pa'aniya quiñaja apú, Jesucristo ja'apiyá jema'ajeño amájeri penaje.

<sup>25</sup> Ñaqué caja pu'uhuaré ne'iyajena la'acá palá. Raú iná hue'epí palá la'ajéñoca necá. Me'echuje caja ne'iyajena la'acá palá. E'iyonaja uncá ri'imajaje micho'ojneji que naliyá.

## 6

<sup>1</sup> Marí que pihuacára'aca ajopana hua'até sápageño: Pihuacára'a nephácaloje nacarihuante ja'apí palá penaje. Uncaja que Jesucristo ja'apiyá jema'ajeño iphá na'apí, ajopana ina'uqué pura'ajeño pu'uhuaré Tupana nacú. Napura'ajó caja pu'uhuaré ripuráca'alo huehuíña'atacare ina'uqué nacú. Ri'imacá piyá marí que pihuacára'a nephaca nacarihuante ja'apí.

<sup>2</sup> Nasapa ca'ajná apú hua'até, Jesucristo ja'apiyá jema'ajeri caja ricá najhua'até. Ricá ja'apí uncá nephala palá ca'ajná, necá que caja ri'imacale najhua'até. Uncá ca'ajná nasápala palá rijllo. Marí uncá paala. Richaje nasápajica rijllo palá, Jesucristo ja'apiyá jema'ajeri ri'imacale. Ricá, íqui'ija Tupana huátacarejlo nala'á nacaje. Marí que numacá pijló, pehuíña'atacaloje necá rinacu penaje.

*Naca la'acá iná pechu pu'ují yucuna marí:*

<sup>3-4</sup> Re ne'iyajena, uncá Jesucristo puráca'alo chuhúa calé nehuíña'ata ina'uqué Tupana nacú. Marí que nala'acá aú nala'á nanacuhúa hue'epiño que huani. Uncá na calé nahue'epí. Huéchiruna necá ajopana hua'até aca'ácacano nacú. Meque quemacánaca puráca'aloji jimaje naca'ácaco pajhua'atéchaca. Pachá napechu i'imacá chapú nachá'atajeño nacú. Marí que nala'acá aú uncá paala ne'emacá pajhua'atéchaca. Pu'uhuaré caja napura'acó panacuhuáca. Uncá ina'uquélaruna que napechu i'imacá panacuhuáca.

<sup>5</sup> Hua'ajini aca'ácaño pajhua'atéchaca ileruna ina'uqué. Caja apichátacanami queja napechu i'imacale, naca'ácaco pajhua'atéchaca. Caja napechu pajno'oró quehuácaje puráca'aloji liyá. Marí que napechu nacú ri'imacá: “Hue'emajé Tupana yucuna ajopana, ajopánajlo que. Aú na'ajé huajllo cajrú liñeru.” Pijló numá, para'acó piyá ilé que la'acano ina'uqué nacú.

<sup>6</sup> Iná la'acachu Tupana huátaca que, palani huani inajlo ricá. Palani inajlo ricá, pu'ují iná pechu i'imacachu nacaje i'imacare iná capi hua'até.

<sup>7</sup> Uncá huajña'alá nacaje majó huajhua'ató huamoto'oqué huacajé. Ñaqué caja huataca'ajica huacajé uncá caja huajña'alaje nacaje huajhua'ató.

<sup>8</sup> A'arumacaji, ajñácaje caje i'imacachu inajlo, queyajupa iná i'imacá raú.

<sup>9</sup> Re ina'uqué naquiyana canacújne'equena huani necá. Huéchirunaja necá nacaje ña'acana nacú najluhua. Cajrú nacaje majopeja amátari necá. Iná amátaca camejérina riyená aú, que caja nacaje amátaca rijluhua necá. Uncá huani paala najllo ricá. Marí caje aú nacapichata necó.

<sup>10</sup> Que'iyapé ina'uqué la'acá najluhua nacaje pu'uhuaré, nahuátacale íqui'ija liñeru. Huechi caja ne'iyajena huátaca liñeru najluhua. Raú calé nayurí Tupana chojé i'imacana caphí. Reyá a'ajná ño'ojó cajrú namaca chapú caje yajhue.

*Iná i'iracóloje Tupana puráca'alo nacojé penaje yucuna marí:*

<sup>11</sup> Tupana ja'apiyá jema'ajeri picá. Pila'aniya pu'uhuaré numacare nacú pijló. Pila'á palá; pihue'epí caja pitucumó Tupana huátaca que la'acana; pipechu i'imá caja caphí Tupana chojé. Piyuríniya ra'apiyá i'imacana. Pihuata caja íqui'ija Tupana, ajopana ina'uqué hua'até. Pi'imá caja ina'uqué huani najhua'até. Pila'aniya caja ujhúí piliyó ajopana ina'uqué; pila'aniya caja piéchuha ujhúí Tupana ja'apiyá jema'acana liyá. Pila'aniya caja picó hue'epiri que huani.

<sup>12</sup> Pila'á pipechu locópa'alaja nacaje Tupana huátaca que, papichátacaloje pu'uhuaré nala'acare rehuá penaje. Tupana a'arí pijló cajmuchaji, pi'imacáloje matajnaco je'echú chu raú penaje. Pihue'epí caja pitucumó ilé cajmuchaji ja'apiyá i'imacánaja, ñaque rí'imacáloje pijló penaje. Ricá penaje Tupana i'ihuapari rijluhua picá. Caja caphí pipechu Tupana chojé. Caja pi'imá riyucuna najló íqui'iruna ina'uqué jimaje i'imacá.

<sup>13</sup> Tupana a'arí piyuqueja eja'ahuá chu i'imacáñojlo napechu, ne'emacáloje raú penaje. Jesucristo tára'aco Poncio Pilato jimaje huacajé, rimá rijló rinacuhú na ina'uqueca rí'imacá. Chuhua Tupana jimaje que, Jesucristo jimaje que, nuhuacára'aca pema'acá no'opiyá.

<sup>14</sup> Pila'aniya apojó, papiyácaniya caja nupuráca'alo. Richuhuaja pi'imajé riyucuna najló. Pila'á palá. Raú uncá na calé quemájeri pinacu: "Uncá paala rila'acá" que. Marí queja pila'ajica palá Jesucristo iphájica majó ejená.

<sup>15</sup> Riphájica rená chojé rijló ejomi Tupana huacára'ajeri piño Rí'irí Jesucristo majó. Palani huani Tupana; Huacára'ajeri huani caja ricá. Uncá caja apú i'imalá richaje huacára'ajeri. Hue'epiri caja piyuqueja nacaje la'acana ricá. Ajopana huacára'ajeño huacára'ajeri caja ricá. Ajopana chaje i'imacáño, chaje huani caja ricá.

<sup>16</sup> Ricaja calé pajluhuaja, uncá tajnácajo penaje calé i'imacá ricá. Mejáma'atani e'iyá ricá. Uncá na calé i'ijnárijla rejo. Uncá caja ina'uqué amálare ricá; uncá meque la'ajé iná amala ricá. Marí que i'imacá ricá. Palá napura'ajico rinacu hua'ajini huani. Piyuqueja nacaje la'ajeri caja rí'imajica hua'ajini huani.

<sup>17</sup> Pihuacára'a cajrú le'ejepeláruna, napechu i'imacá piyá nanacuhú ajopana ina'uqué chá'atajeño que huani. Pihuacára'a caja necá, napechu i'imacá piyá caphí le'ejepélaji, liñeru caje chojé. Mequetánaja penaje calé quele. Uncá naje calé iná pechu i'imacá caphí ilé caje chojé. Ricaja calé Tupana, iná pechu i'imacare chojé caphí. Ricá a'arí huajló ñó'ope nacaje, hue'emacáloje palá raú penaje.

<sup>18</sup> Pimá caja cajrú le'ejepelárunajlo, nala'achí palá ajopana ina'uqué. Pimá caja najló, mamejajné na'acáloje ajopana ñaté penaje. Nacaje camu'ují nala'acare nacú na'ajé najló. Palani huani Tupánajlo marí que la'acana.

<sup>19</sup> Marí cajé aú nacaje palani huani i'imajica najló je'echú chu. Re iná i'imajica palá huani.

*Caja penaje rimacare nacú Timotéojlo marí:*

<sup>20-21</sup> Timoteo, Tupana a'arí picá, pehuíña'atacaloje ina'uqué ripuráca'alo nacú penaje. Ñaquele pila'á ricá palá. Pema'aniya majopeja pura'ajeño ja'apiyá. Uncá Tupana puráca'alo chuhua calé napuráca'alo. Caja nayurí Tupana puráca'alo ja'apiyá i'imacana. Ñaquele uncá na penaje calé nacaje nemacare nacú ina'uquejlo. Nemá napuráca'alo nacú: "Cajrú hue'epicáño le'ejé ricá." Majopéjari ta ricá quele napura'ó nacú.

Nuhuata Tupana la'acá picá palá. Maáreje riyucuna tajnaro.

## 2 TIMOTEO

*Puráca'aloji San Pablo huacára'acare piño Timotéojlo marí:*

<sup>1</sup> Pablo nucá. Jesucristo huacára'acarena naquiyana caja nucá. Marí que Tupana huátaca nu'umacá. Rihuacára'a nucá, nu'umacáloje Tupana i'imataca ina'uqué capichácajo liyá yucuna ajopánajlo penaje. Jesucristo chojé i'amacana aú iná i'imajica matajnaco je'echú chu; rimacá rinacu i'amacá que, iná i'imajica rejo.

<sup>2</sup> Nuhuacára'a pijló marí puráca'aloji. Iqui'ija nuhuátacare picá, Timoteo. Huara'apá huani Tupana; Huahuacára'ajeri huani caja Jesucristo. Nuhuata pi'amacá palá napalamane aú ilérohua. Nuhuata caja Tupana, Jesucristo hua'até hue'epica pimu'ují. Nuhuata caja nala'acá pipechu palá.

*Palá Tupana la'acá Pablo yucuna marí:*

<sup>3</sup> Tupana hua'até nupura'acó quehuá nupura'acó pinacu. “Palá pila'acá nucá” que numacá rijló. Rijhua'até sápjajeri nucá. Palani nacaje nupechu nacú i'imacare ejé nula'á rijló nacaje. Nuchi'inami chuna la'ajícano que caja nula'acá.

<sup>4</sup> Nuhue'epí pipechu la'acó camu'ují nujhua'até hua'apaque paliyácaca huacajé. Picá iyari nu'umacá rihuacajé. Chuhua íqui'ija huani nuhuátaca pichaje i'ijnacana, pu'ují nupechu i'amacáloje raú penaje.

<sup>5</sup> Nuhue'epí quehuaca pipechu caphí Tupana chojé. Pitucumá paló Eunice, pirú Loida, quele pechu i'imari caphí richojé. Nuhue'epí napechu que caja pipechu Tupana chojé caphí.

<sup>6</sup> Ñaqué i'imacale numá pijló marí que: Noto'otá nuyáte'ela pinacojé i'amacá. Raú Tupana a'arí pijló hue'epícaje, pila'acáloje nacaje rihuátaca que raú penaje. Me'etení pila'acá queja pila'ajica; pácho'oniyo richiyá.

<sup>7</sup> Tupana a'arí huajló Ripechu. Ripechu ja'apiyá i'amacana aú huahuata Tupana íqui'ija ajopana ina'uqué hua'até. Raú caja huapechu i'imá caphí. Uncá ra'alá huajló Ripechu, huaquero'ocóloje raú penaje. Ripechu aú caja iná pala'atá iná péchuhua, iná la'acá piyá pu'uhuaré iná huátaca que huani.

<sup>8</sup> Ñaqué i'imacale papáña'aniyo Jesucristo yucuna i'amacana ja'apí. Papáña'aniyo caja no'opí. Ina'uqué huajáquelana chu nucá me'etení, noma'acale Jesucristo ja'apiyá. Tupana i'imatari ina'uqué capichácajo liyá. Riyucuna i'amacana jimaje ne'iyajena la'año chapú iná. Rijimaje caja nala'ajé picá chapú. Eco pijña'a panacu ricá a'ajná Tupana a'ajica piñaté ejená.

<sup>9</sup> Tupana i'imatari huecá capichácajo liyá, hue'emacáloje rile'ejena ina'uqué raú penaje, huahue'epícaloje huatucumó rihuátaca que la'acana penaje. Uncá na calé huala'á i'amacá, ri'imatácaloje huecá capichácajo liyá penaje. Jesucristo palamane aú ja calé ri'imatá huecá richiyá. Caja queja Tupana pechu nacú huala'acana i'amacá, íqui'ija huani rihuátacale huecá. Uncá chiyó riqueño'ó eja'ahuá la'acana, hue'emá ripechu nacú.

<sup>10</sup> Caja chuhua huahue'epí rihuajhuénaca huecá, rihuacára'acale Jesucristo majó i'amacá hue'ematájeri penaje. Jesucristo chá'atari taca'acaje i'amacá. Tupana i'imatari ina'uqué capichácajo liyá Jesucristo palamane aú, iná i'amacáloje matajnaco rijhua'até je'echú chu penaje. Riyucuna jema'acana aú iná hue'epí rinacojé.

<sup>11</sup> Aú calé Tupana huacára'ari nucá, nu'umacáloje riyucuna ajopánajlo penaje. Ra'á caja nucá Jesucristo huacára'acarena naquiyana penaje, nohuíña'atacaloje ajopana rinacu penaje. Uncá judíona calé necá nohuíña'atacarena.

<sup>12</sup> Rijimaje nala'á nucá chapú me'etení. E'iyonaja calé uncá nopáña'alo raú, caphí nupechu i'imacale Tupana chojé. Caja nuyurí nocó rijló. Aú calé nuhue'epí palá ra'acá rinacojó nucá. A'ajná nu'umajica rijhua'até huacajé ejená ra'ajica nucá rinacojó.

<sup>13</sup> Palá nohuíña'ataca pi'amacá. Quehuácaje ripuráca'alo, nohuíña'atacare nacú picá. Pi'ihuapato richá, caja queja pipechu i'amacáloje caphí Tupana chojé raú penaje. Iqui'ija Tupana huátacarena huecá, Jesucristo hua'atéjena hue'emacale.

<sup>14</sup> Tupana a'arí pijló Ripechu piñaté a'ajeri penaje, pila'acáloje raú Tupana quemacá pijló que penaje.

<sup>15</sup> Maare nujhua'até Asia te'eré eyájena i'imaño i'amacá. Caja pihue'epí méqueca na'apáñaca nu'umacá piyuque. Figelo, Hermógenes, quele ja'apáñaño caja nu'umacá najhua'até.

<sup>16</sup> Nuhuata Tupana la'acá palá huani Onesíforo, riyajalo, riyani, quele. Pulapeno que ripala'ataca nupechu. Ina'uqué huajáquelana chu nu'umacá. E'iyonaja uncá rapáña'alo no'opí.

<sup>17</sup> Uncá huani rapáña'alo no'opí i'imacá. Roma ejo riphaca huacajé, ricolá nu'umacá a'ajná riphátaca nucá ejená.

<sup>18</sup> Efeso ejo hue'emaqué huacajé rila'á piño huecá palá, pihue'epícare caja. Marí que rila'acale nucá palá, nuhuata Tupana la'ajica ricá palá huani, je'echú chu ri'imajica huacajé. Re Jesucristo quemajeri piyuqueja ina'uqué nacú méqueca rijló nacaje nala'acare marí eja'ahuá chu ne'emacá quetana.

## 2

*Iná i'imacáloje palani Jesucristo hua'até sápaieri penaje yucuna marí:*

<sup>1</sup> Nu'urí que nojló picá, Timoteo, Jesucristo palamane huecá. Ñaquele pipechu i'imá caphí, ripalamane pi'imacale.

<sup>2</sup> Capinaca pi'imajica nujhua'até nohuíña'atajica cajrú ina'uqué huacajé. Nupuráca'alo pema'acare i'imacá rihuacajé, nacú pehuíña'ataje ajopana achiñana, na'apátachi riyucuna ajopánajlo. Marí que i'imacaño pehuíña'ataje: achiñana, caliyárana, hue'epiño caja ina'uqué jehuíña'atacana necá. Marí que i'imacaño pehuíña'ataje rinacu, na'apátacaloje riyucuna ajopánajlo penaje.

<sup>3</sup> Surárana ña'año chapú caje panacu, nema'acale nahuacára'ajeri ja'apiyá. Ñaqué caja pijña'acá chapú caje yajhué panacu, pema'acale Jesucristo, pihuacára'ajeri ja'apiyá.

<sup>4</sup> Uncá surárana la'alá nasápaca'ala ñañacajela ehuá. Rihuacára'ajeri quemacá rijló queja rila'acá nacaje piyuque.

<sup>5</sup> Ñaqué caja bola nacú cátafejñojlo ricá. Uncá na'alá najló nachá'ataca huemí, uncachu nacátalo namájeri quemacá que. Ñaqué caja pijló ricá. Pila'á richuhano nacaje pihuacára'ajeri quemacá que.

<sup>6</sup> Re ca'ajná apú. Camenane ricá; risapa rimena e'iyá, a'ajnejí i'imacáloje rijluhua penaje. Cachuhua nacuhuaa nacaje tahuá'aro rijló re'iyá. Riphaca rená chojé huacajé ri'ijná a'ajnejí ña'ajé rijluhua pamineco. Quéchami ajopana i'ijnacá najluhua rijña'ajé. Ñaqué caja pijló ricá. Pila'aniya tu'ujné picó, palani nacaje Tupana a'ajicare pijló yurícoloje pijló penaje.

<sup>7</sup> Pi'ijnatá pipéchuhua numacare nacú pijló. Jesucristo la'ajeri palá pipechu, pihue'epícaloje ricá penaje.

<sup>8</sup> Pihue'epí méqueca Jesucristo i'imacá. Ne'emacánami chu, Davidmi chu, laquemi ri'imacá marí eja'ahuá chu. Ritaca'á i'imacá. Ejomi rimacápo'o piño. Jesucristo yucuna nu'umá ina'uquejlo. Méqueca Tupana i'imataca ina'uqué capichácajo liyá yucuna nu'umá najló no'opaca ehuá.

<sup>9</sup> Nujña'á chapú caje panacu me'etení, nu'umacale riyucuna ajopánajlo. Caja jepo'oqueja nucá curete aú no'onapítá naquiyá, nu'umá naquiyá, quele hua'ató. Uncá ina'uquelari que huani nala'acá nucá. E'iyonaja uncá meque nala'alá, ajopana ina'uqué jema'acá piyá Tupana puráca'alo.

<sup>10</sup> Tupana i'ihuapari rijluhua ina'uqué naquiyana ajopana e'iyayá, ne'emacáloje capichácajo liyá penaje. Jesucristo hua'atéjena ne'emacale, ne'emajó capichácajo liyá. Palá huani rila'acá ina'uqué, ne'emacáloje matajnaco je'echú chu raú penaje. Marí que ri'imacáloje najló penaje, nu'umá Jesucristo yucuna najló. Rijimaje nujña'á chapú caje panacu.

<sup>11</sup> Marí puráca'aloji numacare nacú quehuaca ricá: Huataca'ajica ee rihuátaca que la'acana nacú, hue'emajé piño rijhua'até je'echú chu.

<sup>12</sup> Me'etenija calé huajña'á chapú caje yajhué panacu. Eyá rejo, je'echú chu, hue'emajé rijhua'até huacára'ajeño. Huamícho'otájica ee richaya maare, ñaqué caja rimícho'otájica huachaya rejo.

<sup>13</sup> Uncá ca'ajná huala'alá piyuqueja nacaje Tupana huacára'aca que. E'iyonaja rimacá chuhua rila'á huanacu palá rimacá que. Uncá meño'ojó Tupana la'alá apojó rimacare nacú liyá.

*Tupana hua'até sápaieri yucuna marí:*

<sup>14</sup> Eco pimá piño pijhua'atéjenajlo, Tupana ijlú chuhua que pimacá najló, naca'ácaco piyá pajhua'atéchaca majopéjari puráca'aloji jimaje. Uncá na penaje calé aca'ácacajo. Rapichátaja rema'ajeño pechu.

<sup>15</sup> Pila'á pipechu locópa'alaja, pi'imacáloje Tupana hua'até sápaieri palá penaje. Ratá'acare sápacaje aú penájemi picá. Ñaquele uncá papáña'alo nacaje pila'acare ja'apí. Pehuíña'o caja palá Tupana puráca'alo nacú, pehuíña'atacaloje ina'uqué rinacu palá raú penaje.

<sup>16</sup> Pipura'aniyo ajopana hua'até majopéjari puráca'aloji nacú. Uncá na penaje calé ricá pijló. Uncá caja Tupana liyaje calé ricá. Ilé caje puráca'aloji jema'acana aú iná jácho'o Tupana puráca'alo chiyá richaje, richaje que.



<sup>17</sup> Che'erá apíro'otaca iná napona naquiyá iná; riña'ataco que caja iná jácho'oco Tupana puráca'alo chiyá. Huejápajano, huejápajano que iná jácho'oco richiyá, iná jema'acá pachá na'apiyá. Himeneo, Fileto, quele jehuíña'ataño necá rinacu.

<sup>18</sup> Caja nayurí naliyó quehuácaje puráca'aloji ja'apiyá i'imacana. Marí que nemacá ina'uqué nacú: "Caja ina'uqué caja taca'acaño macápo'oño i'imacá." Marí caje aú napichata ne'iyajena pechu, napechu i'imacá piyá caphí Jesucristo chojé.

<sup>19</sup> Uncá na calé apiyácajeri nacaje Tupana quemacare nacú. Rimacá rinacu queja ri'imajica. Marí que rimacá i'imacá:

—Huahuacára'ajeri Tupana, hue'epiri mecajenaca ina'uqué rile'ejena huani.

Rimá piño marí que:

—Piyuque Jesucristo ja'apiyá i'imacaño yuriño naliyó pu'uhuaré la'acana.

<sup>20</sup> Pají ñópo'ojlo chu re cajrú nacaje piyuqueja. Re huánija nacaje richu: chiyela, paratú, i'ichilá, caje macá richu. Re caja nacaje oro naquiyá la'acanamí ca'ajná, serení naquiyá la'acanamí ca'ajná richu. Re caja richu nacaje pucapé naquiyá ipucánami. Re caja richu nacaje mirapehua naquiyá la'acanamí caje. Re caja richu i'ichí, iná ac'o'ocare chojé juni hue'echú ca'alá queja. Re caja richu chiyela palá lamá'atacanami, naco'ocáloje nacaje jalá richojé nachaje i'ijnacáñojlo penaje. Ricá penájeja calé paminá huátari palaní chiyela.

<sup>21</sup> Ñaqué huajló ricá. Iná ca'a piyuque pu'uhuaré iná la'acare iná naquiyó. Raú palaní iná Tupánajlo, rihuacára'acaloje iná la'acá nacaje palaní rijló penaje. Ilé chiyela i'imacá paminajlo que caja iná i'imacá rijló raú.

<sup>22</sup> Hualjímaca jo'ó picá. Hualjímaca iná i'imacachu, huechi iná la'acá iná manaicho. Ñaqué caja iná la'acá pu'uhuaré. Pila'aniya huani ñaqué. Pipechu i'imá caphí Tupana chojé. Pihuata íqui'ija ricá ajopana ina'uqué hua'até. Pipechu i'imá caja palá. Pica'a piliyó quele cahuíla'ari pinacu. Marí que pi'imajica ajopana Tupana ja'apiyá jema'ajeño hua'até. Rijhua'até pura'ajeño necá. Caja Tupana ca'arí nanaquiyá pu'uhuaré nala'acare. Ñaquele napura'ó Tupana hua'até, ra'acáloje nañaté palá la'acana aú penaje.

<sup>23</sup> Pa'aniya caja pinacajó pajlácaje puráca'aloji. Ilé caje puráca'aloji jimaje naca'ácaco pajhua'atéchaca.

<sup>24</sup> Uncá Tupana hua'até sápaajeri i'imalá aca'ácacajo nacú. Palaja ri'imacá ina'uqué hua'até pajimato; rehuíña'ata ina'uqué palá; uncá caja riyúcha'alo quiñaja. Marí que rijhua'até sápaajeri i'imacá.

<sup>25</sup> Tupana hua'até sápaajeri quemari caja uncá jema'alaño Tupana ja'apiyajlo, nala'acáloje palá penaje. Palá rimacá najló, uncá yurí calé. Marí caje aú ca'ajná Tupana a'arí nañaté, napajno'otacáloje napéchuhua Tupana ejo, pu'uhuaré nala'acare liyá. Ne'emacáloje reyá a'ajná ño'ojó quehuácaje puráca'aloji ja'apiyá penaje iná pura'ó najhua'até.

<sup>26</sup> Nala'ajica ee quehuaca ricá, nayureje naliyó Jiñá Ch'i'ináricana huátaca que la'acana. Caja rile'ejena necá me'etení. Ñaquele nala'á rihuátaca que. Nácho'ocoloje richiyá penaje iná i'imá najló Tupana puráca'alo yucuna.

### 3

*Méqueca ina'uqué la'ajica caja penaje huacajé yucuna marí:*

<sup>1</sup> Pema'á marí: Ina'uqué amájeño chapú caje yajhué eja'ahuá iphájica ee rená chojé caja penaje huacajé.

<sup>2</sup> Marí cajena ina'uqué i'imajeño rihuacajé: caí hue'epícaño nanacuhua i'imajeño cajrú rihuacajé. Liñeru i'imajeri caja nahuajhué huani. Napura'ajó caja nanacuhuaja palá; eyá ajopana nacú napura'ajó pu'uhuaré. Uncá caja nayani jema'alájeño nach'i'iná ja'apiyá. Uncá caja ina'uqué quemalájeño: "Palá pila'acá huecá" que Tupánajlo. Uncá caja nahue'epilaje: "Palá pila'acá huecá" que quemacana palá la'acana necajlo. Uncá caja nephálaje Tupana puráca'alo ja'apí.

<sup>3</sup> Uncá caja nahue'epilaje caí ina'uqué nacú; uncá caja nahue'epilaje ina'uqué mu'ují. Cajrú caja nachapú'ra'ajico panacuhuácaca. Uncá huani meño'ojó naca'alá namanaicho nanaquiyó. Chapú huani caja nala'ajica ajopana ina'uqué. Uncá huani nahuátalaje palá la'acaño.

<sup>4</sup> Nemaje caja nanaquiyana nacú ajopana ina'uquejlo, nala'acáloje necá chapú penaje. Mapechúhua'aca caja nala'ajica nacaje. Nanacuhuaja calé napura'ajó caja palá. Nala'ajé caja necó hue'epiño que huani. Pu'ují napechu la'ajona que najló pu'uhuaré la'acana, namanaicho la'acana. Ricaja calé nahue'epeje caja natucumó. Rilanaquiyaya uncá nahuátalaje Tupana.

<sup>5</sup> Napura'ajó Tupana nacú; majopeja ne'emajica ajopánajlo riyucuna. E'iyonaja uncá nayurílaje nachó rijló, rica'acáloje nanaquiyá pu'uhuaré nala'acare, ne'emacáloje palá la'acaño raú penaje.

<sup>6</sup> Pi'imaniya ilé cajena ina'uqué hua'até numacare nacú pijló. Ne'iyajena i'ijnáño ajopana ñacaré chojé, ajopana ñacaré chojé que, napajlácaloje inaana hua'até penaje. Uncá caphí calé péchuruna inaana hua'até napajlá. Cajrú namanaicho la'acafío necá inaana. Cajrú nacaje majopéjari amátari necá.

<sup>7</sup> Cajena inaana huátaño ajopana puráca'alo, ajopana puráca'alo que jema'acana. E'iyonaja napechu je'eló quehuácaje puráca'aloji ja'apejé. Necá cajena hua'até napajlá.

<sup>8</sup> Júpimi Janesmi chu, Jambresmi chu, quele uncá huani huátalaño Moisesmi chu i'imacá. Ñaqué caja necá queleruna ina'uqué numacárena nacú pijló: Uncá huani nahuátala quehuácaje puráca'aloji ja'apiyá i'imacana. Uncá nehuíla'aru sápara palá najló rinacu. Caja nayurí naliyó Tupana puráca'alo ja'apiyá i'imacana.

<sup>9</sup> Uncá ne'emalaje ñaqueja riyucuna i'imacana nacú. Mequetana i'imajémija ina'uqué hue'epéjeño mecajenaca necá. Nahue'epeje mapéchuruna necá. Marí que caja namaca Janesmi chu, Jambremi chu hua'até i'imacá. Uncá huátalaño Moisesmi chu ne'emacá.

<sup>10</sup> Caja pila'á palá nohuíña'ataca pi'imacá que. Nupechu que caja pipechu me'etení. Nula'á que caja pi'ijnataca nópumi chu ricá. Nacaje nuhue'epicare la'acana nutucumó que caja pihue'epica pitucumó nacaje la'acana. Caphí nupechu Tupana chojé. Nupechu que caja pipechu i'imacá caphí Tupana chojé. Uncá nupechu i'imalá ujhuí Tupana nacú; ñaque caja picá. Uncá caja pipechu i'imalá ujhuí Tupana nacú. Uncá caja nula'á ujhuí nuliyó ajopana ina'uqué. Ñaqué caja picá, uncá caja pila'á ujhuí piliyó necá. Iqui'ija nuhuátaca Tupana, ajopana ina'uqué hua'até. Ñaqué caja pihuátaca íqui'ija Tupana, ajopana ina'uqué hua'até. Cahuajhueni nucá Tupana sápara'ala la'acana nacú; cahuajhueni caja picá rinacú.

<sup>11</sup> Nala'á nucá chapú, noma'acale Jesucristo ja'apiyá. Ñaqué caja nala'acá picá chapú. Nujña'á caja chapú caje yajhué yajhué panacu. Caja pihue'epí méqueca nala'acá nucá chapú huani i'imacá, pajmíla Antioquía e nu'umaqué huacajé. Ñaqué caja nala'acá nu'umacá, Iconio e, Listra e nu'umaqué huacajé. Chapú nala'acá nucá rehuá i'imacá. E'iyonaja calé Tupana i'imatari nucá naliyá.

<sup>12</sup> Marí queja ricá: Iná hue'epícahu iná tucumó Jesucristo huátaca que la'acana, ajopana ina'uqué la'año iná chapú.

<sup>13</sup> Pu'uhuaré la'ajeño la'año richájeno que huani pu'uhuaré. Ñaqué caja pajlácachina pajlaca richájeno que huani pajhua'atéchaca. Napajlá caja ajopana ina'uqué hua'até; nema'á caja pajlácaje na'apiyá.

<sup>14</sup> Pijló numá, piyuríniya quehuácaje puráca'aloji ja'apiyá jema'acana. Caja nehuíña'ata picá rinacu i'imacá. Pihue'epí caja mecajenaca jehuíña'ataño pi'imacá; caja pihue'epí quehuaca ricá.

<sup>15</sup> Pijyuhuácoja pihue'epí Tupana puráca'alo lana'aquejami nacojé maárejecha. Raú pihue'epí méqueca Tupana i'imataca iná capichácajo liyá. Tupana puráca'alo lana'aquejami quemari marí que: "Iná pechu i'imacachu caphí Jesucristo chojé, Tupana i'imatari iná capichácajo liyá."

<sup>16</sup> Tupana puráca'alo ricá lana'aquejami. Ripechu aú ri'imá riyucuna rilana'ajéñojlo i'imacá. Ra'apiyá que nalana'acá ricá papera chojé. Ñaquele palani inajlo Tupana puráca'alo lana'aquejami. Rehuíña'ata iná palá quehuácaje puráca'aloji nacú. Raca'á caja huecá pu'uhuaré huala'acare chona. Rimá caja huajló pu'uhuaré ajopana la'acare nacú, huala'acá piyá ñaque caja. Palá huani Tupana puráca'alo lana'aquejami jehuíña'ataca huecá, hue'emacáloje palá ra'apiyá penaje.

<sup>17</sup> Tupana ja'apiyá jema'ajéñojloje penaje Tupana puráca'alo lana'aquejami, nahue'epícaloje que'iyapejé palá la'acana nacojé raú penaje.

#### 4

<sup>1</sup> Eja'ahuá tajnájico ejomi Jesucristo quemájeri piyuque ina'uqué nacú méqueca necá Tupánajlo. Rimaje caja nacaje nala'acare nacú méqueca rijló ricá, palani ca'ajná, pu'uhuarieni ca'ajná. Marí eja'ahuá chu hue'emacá quetana huala'á nacaje. Ricá nacú rimaje huajló méqueca rijló ricá. Ina'uqué caja taca'acafío nacú rimaje méqueca rijló nacaje nala'acare. Ina'uqué cajmuruna nacú rimaje caja mecajeca palani nacaje nala'acare. Jesucristo íphájeri piño majó ina'uqué huacára'ajeri penaje. Ñaquele nuhuacára'a picá marí que Tupana, Jesucristo, quele ijllú chuhua que:

<sup>2</sup> Pa'apata ajopánajlo Tupana yucuna. Pihue'epí pitucumó ricá. Pi'imá riyucuna najló pajimato. Pi'imá riyucuna huátaño rema'acánajlo, uncá huátalañojlo hua'ató. Pica'áta ne'iyajé Tupana puráca'alo aú, nala'acáloje palá raú penaje. Paca'á caja necá raú pu'uhuaré nala'acare chona; pila'á caja ajopana pechu caphí raú; pehuíña'ata necá palá. Piyúcha'aniyo caja najhua'até uncaja que nahue'epí ricá quiñaja.

<sup>3</sup> Uncá ina'uqué huátalajeño quehuácaye puráca'aloji jema'acana aquiññojo. Napechu nacú riyucuna i'imacá que caja nahuátajica ajopana jehuíña'ataca necá. Ñaquele naculaje najluhua ina'uqué nehuíña'atajeño penaje, nehuíña'atacaloje necá nahuátacare caje nacuja penaje.

<sup>4</sup> Napajno'otaje napéchuhua quehuácaye puráca'aloji liyá jupichumi yucu ejo.

<sup>5</sup> Pi'imajica queja pipechu i'imá caphí. Pijña'á caja chapú caje panacu. Tupana i'imataca ina'uqué capichácajo liyá yucúnaja pi'imá ina'uquejlo. Ricaja pihue'epeje pitucumó. Pila'á pisápaca'ala palá.

<sup>6</sup> Marí que pila'ajica nopumí chojé. Nula'acale Tupana huátaca que, nahuata nonócana.

<sup>7</sup> Nula'á nusápaca'ala caphí nupechu i'imacá locópa'alaja. Huátaño ajopana chá'atacana jecho'ocajo aú, jecho'oño na'acá rená ejená. Jecho'ojero pechu que caja nupechu i'imacá nusápaca'ala la'acana nacú. Nutaca'ajica ejená nupechu i'imajé Jesucristo chojé caphí. Uncá nócho'olajo richiyá.

<sup>8</sup> Chuhua palani huani nacaje i'imajeri nojló, nula'acale palá. Eja'ahuá tajnájico huacajé Jesucristo quemajeri nacaje huala'acare nacú méqueca rijló ricá. Ricá hue'epiri palá rinacu quemacana. Marí eja'ahuá chu hue'emacá quetana huala'á nacaje. Rinacu rimaje huajló méqueca rijló ricá rihuacajé. Rimájica huanacu huacajé, rilamá'ataje núcá nacaje aú palá. Ñaque caja ra'ajica majopeja ajopánajlo nacaje. Iqui'i huátacaño Jesucristo pa'acó majó, necá numá nacú.

*Nacaje rimacare nacú rijló caja penaje marí:*

<sup>9</sup> Patá'ajla majó i'ijnacana quiñaja.

<sup>10</sup> Caja Demas ja'apáñari núcá, ri'ijnacáloje pajimila Tesalónica ejo penaje. Tupana chaje íqui'ica rihuátaca nacaje marí eja'ahuá chu i'imacare. Caja riyurí riliyó Tupana huátaca que la'acana. Aú calé ra'apaña núcá. Crescente, Tito, quele uncá caja i'imaláño maare. Crescente i'ijnari ají que Galacia te'eré ejo. Tito i'ijnari caja Dalmacia te'eré ejo.

<sup>11</sup> Ricaja calé, Lucas nujhua'até maare. Eco piculá Marcos; pihua'a ricá pijhua'ató majó, ra'achí nuñaté maare nusápaca'ala la'acana aú.

<sup>12</sup> Caja nuhuacára'a Tíquico pajimila Efeso ejo.

<sup>13</sup> Pi'ijnajica ee majó, pijña'á majó no'orumacá naquiyana, nuyurícare pajimila Troas e. Carpo ñacaré chu ricá. Pijña'á caja majó nupapérane piyuque. Richaje íqui'ica nuhuátaca pijña'acá majó nupapérane nulana'acare chojé.

<sup>14</sup> Alejandro, pejru'uhuá nacú sápañari ricá, la'arí núcá chapú huani i'imacá. Tupánaco a'á rijló rihuemí, chapú rila'acare núcá huemí.

<sup>15</sup> U'upejlú pi'imacá riliyá. Caja chapú huani ripechu Tupana puráca'alo nacú hua'apátacare ajopánajlo.

<sup>16</sup> Nuqueño'ocá huacajé huate'eré eyaje huacára'ajeri hua'até pura'acano nuchayo, piyuque nujhua'atéjena ja'apáñaño nu'umacá. Nuhuata Tupana amaco nachaje.

<sup>17</sup> Uncá Tupana ja'apáñala núcá. Rila'á caphí nupechu, nu'umacáloje riyucuna penaje. Tupana i'imataca ina'uqué capichácajo liyá yucuna nu'umá uncá judíona calé naquiyánajlo. Tupana i'imatari núcá nupinana liyá, nacapichátaca piyá núcá.

<sup>18</sup> Tupana i'imatájeri piño núcá ajopana nupinana liyá. Piyuque chapú caje yajhué nomájacare liyá hua'ató ri'imataje núcá. Rilamá'ataje núcá, nu'umacáloje rijhua'até je'echú chu penaje. Re i'imacaño huacára'ajeri ricá. Palá huani napura'ajico Tupana nacú hua'ajini huani. Marí queja ri'imajica.

<sup>19</sup> Eco palá Priscajlo, Aquílajlo, quélejlo. Eco palá Onesíforojlo, riyajálojo, riyánijlo, quélejlo.

<sup>20</sup> Erasto yuriro pajimila Corinto e. Nuyuri Tróximo Mileto e. Ritami ri'imacá aú nuyurí ri'imacá rejeja.

<sup>21</sup> Patá'ajla majó i'ijnacana yahuijá piyá. Ebuló, Pudente, Lino, Claudio, piyuque Jesucristo ja'apiyá jema'ajeño i'imacaño maare, quele quemaño pinacu: "Eco palá rijló" que.

<sup>22</sup> Nuhuata Jesucristo i'imacá pipechu hua'até. Nuhuata caja Tupana la'acá icá palá rehuá piyuqueja. Maáreje riyucuna tajnaro.

## TITO

*San Pablo huacára'ari puráca'aloji Títo. Marí que rimacá rijló i'ímacá:*

<sup>1</sup> Nucá Pablo. Tupana hua'até sápjari nucá. Jesucristo huacára'acarena naquiyana caja nucá. Jesucristo huacára'ari nucá, nu'ujnacáloje riyucuna i'ímajé ajopánajlo, ajopánajlo que penaje. Nu'umá riyucuna najló, caphí napechu i'ímacáloje Jesucristo chojé raú penaje. Nu'umá caja riyucuna najló, nahue'epícaloje quehuácage puráca'aloji nacojé raú penaje, nala'acáloje Tupana huátaca que ra'apiyá i'ímacana aú penaje. Marí caje penaje Tupana i'ihuapari rijluhua nucá.

<sup>2</sup> Ra'apiyá jema'ajeño i'ímajeño matajnaco rijhua'até je'echú chu. Caja júpimi que Tupana quemacá huanacu marí que i'ímacá: “No'ojé ina'uquejlo cajmuchaji, ne'emacáloje matajnaco je'echú chu raú penaje.” Marí que rimacá huanacu i'ímacá uncá chiyó riqueño'óta eja'ahuá i'ímacá. Uncá huani pajlácachi calé ricá Tupana; quehuaca rimacá.

<sup>3</sup> Riphaca rená chojé huacajé, Tupana i'ímari ina'uquejlo riyucuna, huahue'epícaloje ricá penaje. Tupana, hue'ematajéri, a'ari nucá, riyucuna i'ímajeri penaje. Rihuacára'a caja nucá riyucuna i'ímacana ajopana, ajopánajlo que.

<sup>4</sup> Tito, pijló nuhuacára'a marí puráca'aloji. Nujuhuemi piqueño'ocá Jesucristo ja'apiyá jema'acana i'ímacá. Chuhuaca pajñacani huapechu i'ímacá Jesucristo chojé caphí. Huara'apá huani Tupana; Hue'ematajéri Jesucristo. Nuhuata Tupana, Jesucristo hua'até la'acá picá palá.

*Tito i'ímacá Creta te'eré nacú yucuna marí:*

<sup>5</sup> Nuyurí pi'ímacá Creta te'eré nacú Jesucristo ja'apiyá jema'ajeño hua'até, pilamá'atacaloje nacaje najló rehuá penaje. Nuyurí caja picá rejo, pa'acáloje achiñana naquiyana namájeño penaje. Piyuque pajmíla rehuá i'ímacá apú, apú que, nuhuata pa'acá nanaquiyana namájeño penaje. Numacá pijló i'ímacá que nuhuátaca pa'acá rehuájena naquiyana namájeño penaje.

<sup>6</sup> Marí cajena iná a'acá namájeño penaje: achiñana nemácarena nacú palájne'equena necá. Uncá la'alaño namanaicho; pajluhuaja lúnaruna caja necá. Marí que i'ímajícáno namájeño yaní i'ímajica: Jesucristo ja'apiyá jema'ajeño caja ne'emajica. Uncá nemalárena nacú “namanaicho la'ajeño necá” que. Nachí'iná ja'apiyá jema'ajeño caja ne'emajica. Marí cajena nayani i'ímajica, pa'ajícarena namájeño penaje.

<sup>7</sup> Namájeño a'año nanacójó ina'uqué, namácaloje nala'acá nacaje Tupana huátaca que penaje. Ñaquele marí cajena iná a'a namájeño penaje: palá i'ímacaño; uncá la'alaño pu'uhuaré; uncá caja la'alaño necó hue'epiño que huani; uncá caja yúcha'alaño quiñaja; uncá caja yuhuéra'alaño; uncá caja huátalaño nócacajo; uncá caja huajhuela liñeru. Marí que i'ímacaño i'ímajeño namájeño penaje.

<sup>8</sup> Quemaño caja ya'ajnaya iphácañojlo, nayurícaloje najhua'até nañacaré chu penaje. Huechiruna i'ímacaño caja necá palá la'acana nacú; uncá caja la'alaño pu'uhuaré napechu queja necá; hue'epiño caja natucumó palá la'acana; palá péchuruna caja i'ímacaño necá; la'año caja palani nahue'epícare locópa'alaja. Marí que i'ímacaño necá i'ímaño namájeño penaje.

<sup>9</sup> Quehuácage puráca'aloji nacojé i'irajeño necá, na'apátacaloje riyucuna ajopánajlo penaje. Huehuíña'ata ne'emacá rinacu que caja na'apátajica ricá ajopánajlo. Quehuaca jo'ó ripuráca'alo huehuíña'atacare nacú necá. Raú nala'ajé ina'uqué pechu caphí; raú caja nala'ajé nenacú. Re ina'uqué apojó napechu Tupana puráca'alo nacú. Nenacú nala'ajé raú.

<sup>10</sup> Iná a'a necá Jesucristo ja'apiyá jema'ajeño amajeño penaje, marí que ina'uqué i'ímacale: Re cajrú ina'uqué, uncá huani na'alá nanacójó quehuácage puráca'aloji. Chaje huani judíona naquiyana, uncá a'alaño nanacójó ricá. Majopeja napuráca'alo aú napajlaca ina'uqué hua'até.

<sup>11</sup> Ina'uqué jema'acá piyá na'apiyá, namájeño ja'apátajeño najló quehuácage puráca'aloji. Caja napichata ajopana ina'uqué pechu, ajopana ina'uqué pechu que. Apalá pají chojé, apalá pají chojé que napichátaca napechu napuráca'alo aú. Nacaje nehuíña'atacare nacú, uncá huani paala ricá. Najña'acáloje najluhua liñeru raú penaje nehuíña'ata ina'uqué.

<sup>12</sup> Re, pi'ímacare e, apú i'ímari. Nayucupere penaje i'ímajeri ri'ímacá. Ricá quemari rite'eré eruna nacú marí que i'ímacá: “Pajlácachina huani Creta te'eré e i'ímacaño. Yuríná caja necá; ijnuruna huani caja necá; cahuale'equena huani caja necá,” que rimacá rite'eré eruna nacú i'ímacá.

<sup>13</sup> Quehuaca jo'ó quele rimá nacú. Ñaque i'ímacale paca'ajé necá caphí huani, napechu i'ímacáloje palá Tupana puráca'alo chuhuá penaje.

<sup>14</sup> Nayurícaloje judíona yucupere ja'apiyá jema'acana penaje paca'ajé necá. Caja naca'á quehuácaje puráca'aloji naliyó. Necá penájenami jehuíña'ataño ajopana nayucupere nacú. Necó naqueñótacare najluhua nayucupere. Paca'á necá, na'acá piyá nanacójó ricá.

<sup>15</sup> Tupana lamá'atacarena péchurunajlo palani piyuque nacaje Tupana queño'ótacare. Eyá necá, uncá a'alaño nanacójó quehuácaje puráca'aloji, najló uncá nacaje i'imalá palani. Uncá na i'imalá palani chapú péchurunajlo, apichátaquejami que napechu i'imacale. Nacaje napechu nacú i'imacare hua'ató, apichátaqueja que ricá.

<sup>16</sup> Nemá nanacuhúa: “Huahue'epícare Tupana.” E'iyonaja nacaje nala'acare aú iná hue'epí uncá quehuaca calé nemacá. Marí que i'imacaño necá: Chapú huani napechu ajopana ina'uqué nacú. Uncá caja nema'alá Tupana ja'apiyá. Uncá liyá i'imalaño necá palá la'acana nacú.

## 2

### *Quehuácaje puráca'aloji yucuna marí:*

<sup>1</sup> Pehuíña'atajica ee ina'uqué, pi'ijnatá ricá quehuácaje puráca'aloji chuhúa.

<sup>2</sup> Pimá achiñana peñahua'anijlo, ne'emacá piyá quejátacachina. Pimá caja najló, nala'achí ina'uqué palá. Pimá caja najló, nala'acá piyá pu'uhuaré napechu queja. Pimá caja najló, napechu i'imachi caphí Tupana chojé, ripuráca'alo chojé hua'até. Pimaje caja najló, nahuátachi íqui'ija Tupana, ajopana ina'uqué hua'até. Pimá caja najló, ne'emachi cahuahueruna Tupana ja'apiyá jema'acana nacú.

<sup>3</sup> Ñaqueé caja pimájica inaana peñahua'anijlo, nephachi Tupana ja'apí, nala'achí piyuque nacaje palá Tupana huátaca que. Pimá caja najló nachapújra'aco piyá pajhua'atéchaca. Pimá caja najló, ne'emacá piyá nacaje jalá amúra'atacanami i'iracana nacú. Pimá caja najló, nala'achí palá, namátachi ajopana ñaqueé caja la'acana aú.

<sup>4</sup> Palá la'acana aú nehuíña'ataje ináyana, nahuátacaloje íqui'ija naluna, nayani quele penaje.

<sup>5</sup> Palá nala'acá aú caja namata ináyana, napechu i'imacáloje caphí raú penaje. Palá nala'acare aú namata caja necá, ne'emacáloje mamanaícharuna penaje. Ináyana amaño peñahuilana liyá sápacaje, nasápacaloje ñaqueé caja najluhua ñañacaré chiyá penaje. Namata caja necá, ne'emacáloje ina'uqué péchuruna penaje. Namata caja necá, ne'emacáloje naluna ja'apiyá jema'ajeño penaje. Marí que inaana peñahua'aní la'acá ináyana jenacú, ne'emacáloje palá la'acaño raú penaje. Ajopana ina'uqué pura'acó piyá pu'uhuaré Tupana puráca'alo nacú, nala'ajé marí que.

<sup>6</sup> Ñaqueé caja pimájica hualijímacanajlo, nala'acá piyá najluhua napechu queja pu'uhuaré.

<sup>7</sup> Picá caja la'ajeri piyuque nacaje palá. Raú památaje necá palá la'acana nacú. Pehuíña'atajica ee ina'uqué, pi'imaniya riyucuna i'ichajneji. Piphá caja quehuácaje puráca'aloji ja'apí.

<sup>8</sup> Pimá caja palá nacaje nacú, nemacá piyá pinacu: “Pu'uhuaré ripura'acó” que. Palá la'acana aú chapú péchuruna huanacu apáña'ajo na'apihuá, uncale na i'imalaje najló nachapujré penaje.

<sup>9</sup> Marí que pimájica Jesucristo ja'apiyá jema'ajéñojlo, sápaño ajopana hua'até. Pimá najló, nema'acáloje nacarihuate ja'apiyá palá penaje. Nala'acáloje piyuque nacaje nacarihuate huátaca que penaje. Pimá caja najló, napiyáca piyá nanacójó nacarihuate.

<sup>10</sup> Pimá caja najló, nata'acá piyá nacaje naliyá. Marí que nala'ajica palá, nacarihuate pechu huatána'acaloje nanacójó raú penaje. Marí que la'acana aú nacarihuatena hue'epéjeño palánija ricá huehuíña'ataca necá Tupana nacú. Hue'emátajeri Tupana.

<sup>11</sup> Caja Tupana la'arí pu'uhucá ricá, nacaje rihuátacare la'acana ina'uquéloje penaje. Piyuque ina'uqué i'imacáloje capichácajo liyá raú penaje.

<sup>12</sup> Ripalamane iná i'imacá aú uncá iná la'alá apojó que nacaje rimacá que. Iná yurí caja pu'uhuaré iná la'acare iná liyó; iná yurí caja iná manaicho iná la'acare iná liyó. Ripalamane aú caja iná i'imá caja palá péchuri; iná ca'á caja laca'apheji iná liyó, iná la'acáloje palá penaje. Iná la'á caja palá. Iná hue'epí caja iná tucumó Tupana huátaca que la'acana.

<sup>13</sup> Marí caje la'acana nacú hue'emaje a'ajná Jesucristo iphájica majó ejená. Ripa'ajó piño majó rimacá i'imacá que. Majó riphaje piño. Rihuátacana nacú huecá maare. Palani huani Tupana. Pu'uhucá huamájica mejáma'atani riphájica majó rihuacajé. Ñaqueé caja huamájica Hue'emátajeri Jesucristo riphájica majó huacajé.

<sup>14</sup> Jesucristo a'arí ricó najló, ritaca'acáloje a'ahuaná apiyácanami nacojé penaje. Huachaya ritaca'á i'imacá. Raú ri'imatá huecá pu'uhuaré huala'acare liyá, piyuqueja. Ri'imatá huecá, hue'emacáloje palá péchuruna rijló penaje, hue'emacáloje caja rile'ejena

ina'uqué penaje. Huéchiruna hue'emacáloje palá la'acana nacú penaje, ri'imatá huecá pu'uhuaré huala'acare liyá.

<sup>15</sup> Pehuñña'ata ajopana ina'uqué marí numacare nacú. Pi'imá riyucuna najló, caphí napechu i'amacáloje raú penaje. Uncaja que na'á nanacójó ricá, paca'á necá caphí. Nahuacára'ajeri picá. Marí que pila'acáloje penaje, no'ó pi'imacá. Marí que pila'ajica necá, napechu i'imajica piyá majopéjari queja pinacu.

### 3

*Jesucristo ja'apiyá jema'ajeño la'acáloje palá penaje yucuna marí:*

<sup>1</sup> Pimá piño pijhua'atéjenajlo, nema'achí nahuacára'ajeño ja'apiyá, na'apejé huacára'ajeño ja'apiyá hua'até. Pimá caja najló, ne'emachi huéchiruna piyuque nacaje palani la'acana nacú.

<sup>2</sup> Pimá caja najló, napura'acó piyá pu'uhuaré ajopana ina'uqué nacú. Pimá caja najló, naca'acaco piyá pajhua'atéchaca. Pimá caja najló, ne'emacáloje ina'uqué huani piyuque ajopana ina'uqué hua'até penaje.

<sup>3</sup> Re ina'uqué naquiya uncá huani napechu i'imalá najló palá. Ñaqueé caja hue'emajica júpimi, capichájeño penájenami hue'emaqué rihuacajé. Uncá caja huema'aqueé Tupana ja'apiyá. Huéchirunaja hue'emajica pu'uhuaré la'acana nacú; uncá ina'uquélaruna caja hue'emaqué. Chapú caja huapechu i'imajica ajopana ina'uqué nacú, nachá'atajicale huecá. Ñaqueé caja huapechu i'imajica huanacu chapú. Marí cajé aú huapechu i'imaqué chapú panacuhuácaca najhua'até. Marí que la'acana nacuja hue'emaqué rihuacajé.

<sup>4</sup> E'iyohuá que huema'acá Tupana puráca'alo yucuna. Raú huahue'epí méqueca palá huani Tupana pechu i'imacá huanacu. Iqui'ija huani Tupana huátaca piyuqueja ina'uqué. Hue'emátajeri ricá.

<sup>5</sup> Aú calé rihue'epí huamu'ují. Ri'imatá huecá capichácajo liyá rijluhua. Uncá na huani calé huala'á palá, ri'imatácaloje huecá penaje. E'iyonaja calé ri'imatá huecá capichácajo liyá. Rica'á caja huanaquiya pu'uhuaré huala'acare. Ra'á caja huajló Ripecchu, hue'emacáloje huajé péchují chuhuá penaje.

<sup>6</sup> Jesucristo palamane aú Tupana a'arí huajló Ripecchu, hue'emacáloje palá huani ra'apiyá penaje.

<sup>7</sup> Jesucristo palamane aú palánija huecá me'etení Tupánajlo, hue'emacáloje rijhua'até matajnaco je'echú chu raú penaje. Ricá huátacana nacú huecá me'etení.

<sup>8</sup> Marí numacare nacú, quehuaca huani ricá. Ñaquele nuhuata pi'imacá pulapeno que riyucuna re i'imaçáñojlo, nahue'epicaloje ricá palá raú penaje. Pimá caja Tupana ja'apiyá jema'ajeñojlo riyucuna, ri'imaçáloje napechu nacuja penaje, nala'acáloje palá ajopana ina'uqué raú penaje. Marí que la'acana palani. Palani piyuque ina'uqué nacú ricá.

<sup>9</sup> Paca'acaniyo najhua'até Moisesmi chu puráca'alomi jimaje. Paca'acaniyo caja najhua'até pajlácaje puráca'aloji jimaje. Paca'acaniyo caja najhua'até huachí'inami chuna yucupéremi jimaje. Uncá na penaje calé ilé caje puráca'aloji ta.

<sup>10</sup> Re ca'ajná apú ijhua'até, apichátari inaquiyana ripuráca'alo aú. Eco pimá rijló, riyurichi riliyó ricá. Pimá rijló rinacu pajluhua pe, iyamá pe ca'ajná. Uncaja que rema'á pa'apiyá, pácho'ota ricá inaquiyana e'iyayá.

<sup>11</sup> Uncaja que rema'á pa'apiyá, pipechu i'imajé rinacu: “¿Pu'uhuaré rila'acare chí i'ihuapataró richá.” Ñaqueé caja ripecchu i'imajica rinacuhuá: “Pu'uhuaré la'ajeri nucá” que.

*Caja penaje rimacare nacú Títojlo yucuna marí:*

<sup>12</sup> Nuhuacára'aje ca'ajná Artemas ca'ajná, Tíquico ca'ajná. Riphájica lanáquiya pi'ijná nomaje pajmilla Nicópolis ejo. Pila'á mahuó picó, pi'ijnacáloje rejo penaje. Rejo nuhuata i'imaçaje yahuijá quetana.

<sup>13</sup> Eco pa'á Zenas, Apolos, quele ñaté. Ina'uqué chaya pura'ajero Zenas. Eco pa'á najló nacaje nahuátacare caje, nala'acá piyá camu'ují nacaje nacú na'apájica ehuá.

<sup>14</sup> Eco pimá pijhua'atéjenajlo, na'achí ina'uqué ñaté nacaje nala'acare camu'ují nacú aú. Marí que la'acana aú pijhua'atéjena la'ajica palá. Uncá ne'emalaje majopeja marí eja'ahuá chu.

<sup>15</sup> Piyuque nujuhua'até i'imaçáño maare quemáño pinacu: “Eco palá rijló. Eco palá Jesucristo ja'apiyá jema'ajeño re i'imaçáñojlo.” Pajñacani huema'acá Jesucristo ja'apiyá najhua'até. Nuhuata Tupana la'acá icá palá piyuqueja. Maáreje riyucuna tajnaró.

## FILEMÓN Introducción

*Na penaje San Pablo huacára'aca Filemonjlo papera yucuna marí:*

Júpimi que ajopana te'eré ehuájena huarúhua'aqueño ina'uqué, nasápacaloje najló penaje. Majopeja nasápajica najhua'até. Uncá nacarihuátena a'aqueño najló nasápaca'ala huemí. Na'aque najló a'ajnejí, a'arumacaji, queleja na'aque najló. Uncá najhua'até sápageño amáqueño liñeru.

Apú i'imari. Ríi i'imari Onésimo. Ricarihuate ú i'imari Filemón. Jesucristo ja'apiyá jema'ajeri Filemón, ricarihuate, i'ímacá. Rijhua'até Onésimo sápaqueri majopeja. Uncá ricarihuate a'aque rijló liñeru. Re'iyohuá que rata'acá riliyá nacaje. Aú riñaó reyá. Ri'ijná aji que ya'ajnjaje pajimila Roma ejo. Re riphata Pablo. Caja naca'á Pablo ina'uqué huajáquelana chojé i'ímacá, Jesucristo yucuna ri'ímacale ajopánajlo, ajopánajlo que.

Ñaquele re ramá Pablo. E caja Pablo i'imari Jesucristo yucuna rijló. Raú rema'á Jesucristo ja'apiyá. Ripechu i'imari Jesucristo chojé caphí, ri'imatácaloje ricá capichácajo liyá penaje.

Mequetánaja ri'ímacá re i'ímacá. Ejomi Pablo huacára'ari ripa'acó rapumí chuhua ricarihuate ejo. Rijhua'até rihuacára'a marí puráca'aloji.

*Pablo huacára'ari Filemonjlo puráca'aloji i'ímacá. Marí que rimacá rijló:*

<sup>1</sup> Pablo nucá. Nujhua'até maare Timoteo. Jesucristo ja'apiyá jema'ajeri ricá huajhua'até. Hucá huacára'año pijló marí papera. Ina'uqué huajáquelana chu nucá me'etení. Jesucristo yucuna nu'umacá pachá maare nucá. Pijló, Filemonjlo, huahuacára'a marí papera. Huasápaca'ala huáque'ehue que picá; huasápaca'ala nacú caja pisapa. Iqui'ija huahuatácare picá.

<sup>2</sup> Eco piya'atá marí papera Jesucristo ja'apiyá jema'ajéñojlo, piñacaré chojé jahuacáñojlo. Apia, Ariquipo, quélejo piya'atá caja ricá. Jesucristo ja'apiyá jema'ajeyo Apia huajhua'até. Ariquipo la'arí nacaje Tupánajlo huala'acá que caja.

<sup>3</sup> Nuhuata Tupana, Ri'irí Jesucristo, hua'até, la'acá icá palá. Huara'apá huani Tupana; Huahuacára'ajeri huani Jesucristo.

*Iqui'ija Filemón huátaca Tupana yucuna marí:*

<sup>4</sup> Nupura'acó Tupana hua'até quehua nupura'acó pinacu. Hua'ajini numacá Tupánajlo marí que pinacu: "Palá pila'acá nucá, rema'acale pa'apiyá."

<sup>5</sup> Nemá nojló marí que pinacu: "Iqui'ija Filemón huátaca Tupana, rile'ejena ina'uqué hua'até. Caphí huani caja ripechu Jesucristo chojé," que nemacá nojló pinacu.

<sup>6</sup> Caphí pipechu Tupana chojé. Tupana yucuna ja'apátacana nacú picá ajopánajlo. Raú ajopana piño jema'año Tupana ja'apiyá pi'ímacá aú najló riyucuna. Nanacu caja nupura'ó Tupana hua'até, nahue'epicaloje meque iqui'ica Jesucristo la'acá iná palá penaje.

<sup>7</sup> Pu'ují nupechu pinacu, iqui'ija pihuátacale Tupana, ajopana ina'uqué hua'até. Marí palani nojló. Palá pila'acare i'imari caja palá ajopana Jesucristo ja'apiyá jema'ajeño nacú. Palá nupechu la'acó raú.

*Pablo huátari Filemón la'acá rijhua'até sápagejlo nacaje yucuna marí:*

<sup>8</sup> Jesucristo ja'apiyá jema'ajeri picá; ra'apiyá jema'ajeri caja nucá. Ñaquele nuhuatáquela, nuhuacára'ajla pila'acá nacaje palá.

<sup>9</sup> E'iyonaja calé uncá nuhuacára'alaje pila'acá nacaje. Nuhuejhué picá. Ñaquele numá pijló: Eco pila'á nojló nacaje. Nucá Pablo quemari pijló. Jesucristo huacára'acarena naquiayana nucá. Ina'uqué huajáquelana chu nucá me'etení, noma'acale Jesucristo ja'apiyá.

<sup>10</sup> Numá pijló: Eco pila'á Onésimojlo nacaje. Maare ina'uqué huajáquelana chu nu'umanoja riyurí richó Jesucristojlo, ri'imatácaloje ricá capichácajo liyá penaje. Chuhuaa caphí ripechu Jesucristo chojé, nu'umacale riyucuna rijló.

<sup>11</sup> Júpimi risápajica pijhua'até. Maliyaru huani ri'ímacá pijló sápacana nacú i'ímacá. Chuhuaa caliyani ricá nojló. Ñaque caja ri'imajica pijló.

<sup>12</sup> Pé ca'ajno nuhuacára'aje ricá rapumí chuhua pijhua'até sápage. Eco pipechu i'imá palá rinacu, pipechu i'ímacá nunacu que caja.

<sup>13</sup> Palani nojló riyuricajla nujhua'até maare, ra'acáloje nuñaté maare ina'uqué huajáquelana chu nu'umacá quetana penaje. Papumí chojé que ra'acajla nuñaté. Jesucristo yucuna nu'umacá ajopánajlo, pachá maare nucá ina'uqué huajáquelana chu.

<sup>14</sup>Uncá nuhuátala riyurico maare, uncaja que pipechu i'imá ñaqué caja rinacu. Uncá caja nuhuátala pijló quemacana: “Eco pihuacára'a riyurico nujhua'até maare.” Pihuátajica ee riyurícana, riyurejo maare. Palani caja nojló ilé que la'acana.

<sup>15</sup>Onésimo ja'apáñari picá mequetánaja, ri'imacáloje pijhua'até eja'ahuá chu pi'imajica quetana penaje.

<sup>16</sup>Mahuemiru pijhua'até sápañari ricá. Uncá ricaja calé ricá me'etení. Jesucristo ja'apiyá jema'ajeri caja ricá. Iqui'ija huahuátacare ricá. Palá huani nupechu rinacu. Picá huátajeri caja ricá. Nuhuátaca ricá chaje huani pihuátajica ricá, pijhua'até sápañari ri'imacale. Pijhua'até ricá, hua'ató que Jesucristo ja'apiyá jema'ajeri caja ricá.

<sup>17</sup>Palá pipechu i'imajica ee nunacu, ñaqué caja pipechu i'imajica rinacu.

<sup>18</sup>Apala rila'á chapú pi'imacá; apala rejo'ocaja rilehuérica pijló. Eco pimá nojló, nucá a'ajeri pijló rihuemí.

<sup>19</sup>Nucá Pablo lana'arí pijló marí nuyáte'ela aú. Nucá a'ajeri pijló rilehuéricare huemí. I'imaqué e'iyonaja picá hue'epiri pi'imacó nochojé i'imacá. Uncá naje calé numá pijló rinacu, caja pihue'epícare.

<sup>20</sup>No'ohué picá, pema'acale Jesucristo ja'apiyá, noma'acá ra'apiyá que caja. Jesucristo ja'apiyá jema'ajeño la'año papéchucaca palá. Ñaquele pila'á numacá pijló que. Raú pila'ajé nupechu palá.

<sup>21</sup>Numá pijló, nuhue'epícale numacá pijló que pila'ajica. Chaje huani pila'ajica nuhue'epica.

<sup>22</sup>Re apú nacaje nuhuata pila'acá. Eco pilamá'ata nopucuna nupé, nu'umacáloje pijhua'até penaje. Caja ipura'ó Tupana hua'até nunacu, nácho'otacaloje nucá ina'uqué huajáquelana chiyá penaje. Ñaquele nu'umajé ca'ajná ijhua'até.

*Caja penaje rimacare nacú rijló mari:*

<sup>23</sup>Epafras quemari pinacu: “Eco palá rijló ca'ajno.” Maare nujhua'até ricá, Jesucristo ja'apiyá jema'ajeri ri'imacale.

<sup>24</sup>Ñaqué caja Marcos, Aristarco, Demas, Lucas, quele quemacá pinacu: “Eco palá rijló ca'ajno.” Necá calé a'año nuñaté nusápaca'ala la'acana aú.

<sup>25</sup>Nuhuata Huahuacára'ajeri Jesucristo la'acá icá palá ca'ajno. Maáreje ritajno.



## HEBREOS

*Tupana I'irí ja'apátaca ina'uquejlo Tupana puráca'alo yucuna marí:*

<sup>1</sup> Júpimi hua'ajútayami chuna i'imaño i'ímacá. Najló Tupana huacára'aqueri ripuráca'alo i'imajica, nahue'epícaloje ricá penaje. Pulapé rihuacára'ajica najló ricá. Ne'iyajénajlo rimaqué nacaje nacú natapú queja. Ne'iyajénajlo Tupana ya'atáqueri nacaje natapú queja caja. Ne'iyajénajlo rimaqué nacaje nacu Ripechu aú ja. Apú nacojé, apú nacojé queja ri'imajica riyucuna apujlo, apujlo que. Ripuráca'alo ja'apátajeñojloja calé ri'imaqué riyucuna pamineco. Ejomi na'apátaque riyucuna ajopana ina'uquejlo. Marí que rihuacajé i'imacaño jema'ajica riyucuna.

<sup>2</sup> Eyá huecá piño jema'año riyucuna. Huajló calé Tupana I'irí ja'apátari ripuráca'alo i'ímacá. Yehuicha eja'ahuá iphaca rená chojé, ritajnácoloje penaje. Ricá ja'apejecha huecá me'etení. Ri'irí hua'até Tupana queño'ótari piyuqueja huani nacaje i'ímacá. Ra'á caja Ri'irí, ri'ímacáloje piyuqueja nacaje mináricana penaje.

<sup>3</sup> Palani huani Tupana; ricá que caja Ri'irí. Rara'apá pechu queja caja ripechu. Ripuráca'alo aú ja piyuqueja nacaje i'imari me'etení ri'ímacá que. Nacaje eja'ahuá chu i'ímacare, i'imari caja me'etení ri'ímacá queja ripuráca'alo aú. Nacaje je'echú chu i'ímacare piyuqueja i'imari caja ri'ímacá queja ripuráca'alo aú. Tupana I'irí i'ímacá marí eja'ahuá chu huacajé ritaca'á a'ahuaná apiyácanami nacú huachaya i'ímacá. Raú rica'á huanaquiyá pu'uhuaré huala'acare, huamanaicho huala'acare hua'ató, hue'emacáloje lamára'ataquejanami que Tupánajlo raú penaje. Ritaca'á huachaya, ejomi ripa'ó piño rapumí chuhúa je'echú chojé. Re Tupana a'arí ricá rijhua'até huacára'ajeri penaje. Ricá palani huani hua'até rihuacára'a pajñacani rijhua'atéjena.

*Tupana hua'atéjena, je'echú chu i'imacaño, chaje huani Ri'irí. Marí riyucuna:*

<sup>4</sup> Ajopana Tupana hua'atéjena, je'echú chu i'imacaño, chaje huani Jesucristo, Tupana I'irí ri'imacale.

<sup>5</sup> Iná hue'epí nachaje ricá, Tupana quemacale marí que Ri'irijlo i'ímacá: Chuhua ina'uqué hue'epíjica Nu'urí picá, nucá Para'apá. Uncá rimalá apú rijhua'atéjena nací: "Nu'urí ricá" que. Ri'iríjloja calé rimá marí que i'ímacá.

<sup>6</sup> Tupana huacára'ari Ri'irí eja'ahuá nacojé i'ímacá, rimoto'ocáloje marí eja'ahuá chu penaje. Rihuacára'aca ricá majó yámona, rimá rijhua'atéjena, je'echú chu i'imacañojlo marí que i'ímacá: "Iphá ra'apí, ichaje huani r'imacale, que rimacá najló.

<sup>7</sup> Marí que Tupana quemacá rijhua'atéjena, je'echú chu i'imacaño nacú: Nujhua'até sápañeño necá.

Nohuíña'ata necá carená, quera'atani queja, nala'acáloje nojlo nacaje raú penaje.

<sup>8</sup> Eyá marí que rimacá Ri'iríjlo:

Picá Ina'uqué Chí'ináricana; ne'emacana penaje caja picá.

Nahuacára'ajeriya pi'imajica hua'ajini huani.

Palani puráca'aloji aú ja pihuacára'aje necá.

<sup>9</sup> Iqui'ija huani pihuátaca palá la'acana.

Uncá huani pihuátala pu'uhuaré ajopana la'acare.

Ñaquele no'ó picá, pi'imacáloje ajopana pijhuáque'ena chaje huacára'ajeri penaje, que Tupana quemacá Ri'iríjlo i'ímacá.

<sup>10</sup> Rimá piño rijló marí que i'ímacá:

Picá, Ne'emacana, queño'ótari eja'ahuá, je'echú hua'até i'ímacá.

Piyuqueja nacaje i'ímacare richu hua'ató piqueño'óta caja i'ímacá.

<sup>11</sup> Piyuqueja nacaje piqueño'óracare tajnájero.

A'arumacaji jupichumi tajnaco que caja ritajnájero.

Eyá picá, uncá tajnácajo penaje calé i'ímacá picá.

<sup>12</sup> Iná cupaca iná a'arumacá jupichumi, que caja picupájica nacaje piqueño'óta care.

A'arumacaji apiyácano huajé ri'ímacá chiyá, que caja nacaje apiyácajico.

Eyá picá, uncá huani apiyácajico penaje calé i'ímacá.

Ñaqueja pi'imajica. Uncá caja pitajnájico.

<sup>13</sup> Rimá piño rijló marí que i'ímacá:

Maare nohua'á pi'imajé, pihuacára'acaloje nujhua'até naje.

Nuchá'atajica chapú picu péchuruna ejená pihuacárté rihuacá'aje nujhua'até maare, que Tupana quemacá Ri'iríjlo i'ímacá.

Ri'iríjloja calé rimá marí que i'imacá. Eyá rijhua'atéjenajlo, je'echú Ahu i'imacaño naquiyáajlo uncá rimalá ñaqué caja.

<sup>14</sup> Chuhua nu'umajica rijhua'atéjena, je'echú chu i'imacaño yucuna ijlo: Uncá nanapona i'imalá. Napéchuja calé re. Tupana hua'até sápageño necá. Rihuacára'a necá, na'acáloje ina'uqué ñaté napechu aú ra'apiyá penaje. Tupana i'címatarí ina'uqué naquiyana capichácajo liyá. Nañaté a'ajeño necá.

## 2

*Tupana i'imatarí ina'uqué capichácajo liyá. Iná la'acá piyá ricá majopéjari que, penaje riyucuna marí:*

<sup>1</sup> Caja huema'á Jesucristo yucuna. Quehuaca ricá. Ñaquele hua'á íqui'i huani ripuráca'alo huanacojó, apechu i'ijnacá piyá rilíyá apojó.

<sup>2</sup> Júpimi Tupana yuriri Moisesmi chujlo ripuráca'alo i'imacá piyuqueja ina'uqué i'imacáloje ra'apiya penaje. Tupana hua'atéjena, je'echú chu i'imacaño, ja'apátaño rijlo ripuráca'alo i'imacá. Huahue'epí quehuácaca ripuráca'alo, nacaje i'imacale rimacá rinacu que. Tupana huajari ne'emacá, uncá pachá na'alá nanacojó ripuráca'alo.

<sup>3</sup> Richaje huani rihuajáica necá, uncá la'alaño Ri'irí puráca'alquemacá que. Tupana i'imatarí ina'uqué capichácajo liyá Jesucristo palamane aú. Meyalqueja Huahuacára'ajeri, Jesi'cúcristo, i'imari riyucuna ina'uquejlo. Ajopana piyá ri'imá riyucuna i'imacá. Pumí chiyó ra'apiyá jema'ajeño ja'apátaño piño riyucuna ajopánajlo i'imacá. Uncá meño'ojó hue'emalojla Tupana huajaca huecá liyá, uncaja que hua'á huanacojó ripuráca'alo.

<sup>4</sup> Ra'apiyá jema'ajeño ja'apátaño huajlo riyucuna. Hua'até caja Tupana la'arri ina'uqué capichácajo liyá Jesucristo palamane aú. Meyalqueja Huahuacára'ajeri, Jesi'céhuácaca ricá penaje. Tupana Pechu a'arí caja ra'apiyá jema'ajeñojlo hue'epícaje. Apujlo, apujlo que ra'acá huajlo hue'epícaje, huala'acáloje palá ajopana ina'uqué nacú rihuátaca que raú peje. Rihuátaca que ra'acá huajlo ricá.

*Jesucristo i'imari huecá que caja, maare eja'ahuá chu ri'imaqué huacajé. Marí riyucuna:*

<sup>5</sup> Apú eja'ahuá i'imajeri piño. Richu i'imajáico huacára'ajeño i'imajeño caja re. Uncá Tupana a'alá rijhua'atéjena, je'echú chu i'imacaño, ina'uqué huacára'ajeño penaje.

<sup>6</sup> Tupana puráca'alo lana'aquejami i'imari riyucuna. Marí que apú quemacá Tupánajlo: Uncá na penaje calé ina'uquépihue'epícaloje necá penaje.

Palá huani pila'ajica rinacu, moto'orí ina'uquéjloje penaje.

<sup>7</sup> Picá huacára'ajeri ricá, ri'imacáloje pijhua'atéjena, e'echú chu i'imacaño, ja'apejé penaje. Mequetánaja ri'imajica na'apejé.

E'iyonaja calé palá huani pipechu i'imajica rinacu.

Palá pila'ajica ricá, ajopana ina'uqué pechu i'imacáloje palá rinacu raú penaje.

Piyuque nacaje pil

<sup>8</sup> Ri'imacáloje piyuqueja nacaje i'imacare minárica penaje, pa'ajé caja ricá, que apú quimacá Tupánajlo.

Rimá rinacu, ra'ajica ricá piyuqueja ina'uqué huacára'ajeri penaje. Piyuqueja nacaje i'imajicare minárica ri'imajica. Maárejecha uncá jo'ó huamala ñaqué ricá.

<sup>9</sup> Jesucristo i'imari ricá, rimacare nacú i'imacá. Ricaja calé Tupana a'arí i'imacá, ri'imacáloje mequetánaja Tupana hua'atéjena, je'echú chu i'imacaño, ja'apejé penaje. Iqui'ija huani Tupana huátaca ina'uqué. Aú calé rihuata ritaca'acá a'ahuaná apiyácanami nacú huachaya i'imacá. Chuhua Tupana la'acá ricá palá huani. Ñaquele palá ajopana ina'uqué pechu rinacu. Marí que rijlo ricá me'etení, ritaca'acale ina'uqué chaya a'ahuaná apiyácanami nacú i'imacá.

<sup>10</sup> Tupana le'ejé huánija nacaje piyuqueja, riqueño'ótacale ri'imacá. Ricá huacára'ari Ri'irí, Jesucristo, rijña'acáloje chapú caje yajhué panacu menaje. Ri'imatácaloje ina'uqué capichácajo liyá raú penaje. Marí caje aú Jesucristo la'arí palá Tupana huátaca que i'imacá. Ajopana ina'uqué tucumá rila'á palá, ri'imacáloje ne'ematajari penaje. Raú calé ra'apiyá jema'ajeño i'imaño ripalamane.

<sup>11</sup> Rica'á ra'apiyá jema'ajeño liyá pu'uhuaré nala'acare. Raú Jesucristo a'arí necá Tupana hua'atéjena penaje. Jesucristo jara'apá Tupana. Necá, ra'acárena rijhua'atéjena penaje, necá jara'apá caja Tupana. Aú calé Jesucristo quemari nanacu: "Nojena necá" que. Uncá rapáña'alo marí que nanacu quemacana ja'apí.

<sup>12-13</sup> Marí que Tupana puráca'alo lana'aquejami quemacá rinacu. Jesucristo quemari Rara'apajlo:

Tupana, nu'umajé piyucuna nojénajlo.

Notaneje caja piyale pijlo cajú ina'uqué jahuacáca'alo e'iyá.

Caphí caja nupechu i'imajica pichojé.

Piyani, pa'ajícarena nojló, hua'até nu'umajé maare, que Jesucristo quemacá Rara'apá Tupánajlo.

<sup>14</sup> Necá rimacárena nacú: "Piyani necá" que, ina'uqué necá rimá nacú. Ra'acáloje nañaté penaje, rila'á ricó ina'uqué que caja najhua'até, ri'imacáloje nanaquiyana queja penaje. Ina'uqué que caja ri'imacale najhua'até, ritaca'á nachaya i'imacá, ricapichátacaloje Jiñá Ch'i'náricana sápac'ala ra'apiyá jema'ajeño liyá raú penaje. Jiñá Ch'i'náricana pachá ina'uqué taca'añó.

<sup>15</sup> Jesucristo taca'arí ina'uqué chaya, naquero'ocó piyá taca'acaje piyá. Cajmuruna ne'emacá quetana ina'uqué quero'oño taca'acaje piyá.

<sup>16</sup> Uncá ri'ijnalá majó i'imacá, ra'acáloje Tupana hua'atéjena, je'echú chu i'imacaño, ñaté penaje. Ra'acáloje Abrahama chu laquénami ñaté penaje riphá majó i'imacá.

<sup>17</sup> Ra'acáloje nañaté penaje, ri'imá ne'ehué queja najhua'até. Necá queja ri'imacá najhua'até, rihue'epícaloje namu'ují raú penaje. A'ahuaná apiyácanami nacú ritaca'á ina'uqué chaya i'imacá, rica'acáloje ina'uqué liyá pu'uhuaré nala'acare, namanaicho nala'acare hua'até penaje. Marí que la'acana aú rilamá'ata ina'uqué Tupánajlo. Puráca'aloji lamá'atajeri ina'uqué chaya Tupana hua'até ricá.

<sup>18</sup> Ramá chapú caje yajhué i'imacá, iná amaca ricá que caja. Aú calé rihue'epí iná ñaté a'acana, iná amáchachu chapú caje yajhué. Pu'uhuaré la'acana a'arí caja rime'ó Jesucristojlo, rila'acáloje pu'uhuaré raú penaje. E'iyonaja uncá rila'alá pu'uhuaré. Marí que ri'imacale rijló i'imacá, rihue'epí huañaté a'acana, pu'uhuaré la'acana a'acachu huame'é rijluhua. Ra'á huañaté huala'acá piyá pu'uhuaré, huamanaicho hua'até.

### 3

*Moisesmi chu chaje huapechu Jesucristo nacú, palá huani rila'acale huecá. Marí riyucuna:*

<sup>1</sup> Nojena, Jesucristo ja'apiyá i'imacaño icá. Tupana a'arí icá, i'imacáloje rila'ejena ina'uqué penaje. Chuhua i'ijnatá ipéchuhua Jesucristo nacú. Tupana huacára'ari ricá majó i'imacá ripuráca'alo ja'apátajeri penaje. Eyá chuhua puráca'aloji lamá'atajeri ricá me'etení hualjó. Huachaya rilamá'ata puráca'aloji Tupana hua'até. Caphí huapechu ripuráca'alo chojé, raú rilamá'ata huecá Tupánajlo.

<sup>2</sup> Tupana a'arí Moisesmi chu rila'ejena ina'uqué amájeri penaje i'imacá. Palá ramájica necá. Moisesmi chu la'ajica que caja Jesucristo la'ajica palá nacaje ina'uquéloje penaje. Tupana huacára'aca que rila'ajica najló nacaje.

<sup>3</sup> Moisesmi chu chaje huapechu i'imacá palá Jesucristo nacú, hue'emacale Tupana le'ejena ina'uqué Jesucristo palamane aú. Namájeri chaje ricá, a'arí ina'uqué Tupana le'ejena penaje.

<sup>4</sup> Re cajú ina'uqué que'iyapejena ajopana, ajopana que necá. Nachi'inami chuna palamane i'imacaño necá. Tupana palamáneja calé piyunqueja nacaje eja'ahuá chu, je'echú chu hua'até. Ñaquele Paminá huani ricá, Tupana.

<sup>5</sup> Moisesmi chu amari Tupana le'ejena ina'uqué palá. Namájerija ri'imacá Tupánajlo. Rijhua'até sápa'eri ri'imacá. Nacaje rila'acare aú nahue'epí isama queja méqueca nacaje i'imajica a'ajná ño'ojó chami.

<sup>6</sup> Jesucristo a'arí rila'ejena ina'uqué rinacojó palá, Tupana i'irí ri'imacale. Huecá, Jesucristo ja'apiyá jema'ajeño, i'imano rila'ejena ina'uqué. Caja queja hue'emajica rila'ejena, huapechu i'imajica ee richojé caphí huataca'ajica ejená.

*Tupana huatána'ataca rila'ejena ina'uqué yucuna marí:*

<sup>7</sup> Tupana Pechu quemari marí que i'imacá:

Chuhua na'apátajica ee Tupana puráca'alo ijló,

<sup>8</sup> ijnúcha'aniyo na'apiyá.

Júpimi a'ajútayami chuna i'imaño pu'uteni chu i'imacá. I'maniya ne'emacá que caja.

Necá ijnúcha'aqueño no'opiyá i'imajica.

Namanaicho nala'ajica quehuá nuyúcha'aco nachá.

<sup>9</sup> A'ajútayami chuna la'aqueño namanaicho, namácaloje méqueca nula'acá necá richona penaje. Nala'aqué nucá mapéchuru queja najluhua, uncale no'olá najló nacaje nahuátacare caje.

Iyamá ina'uqué le'ejé quele jarechí quetana nula'ajica nacaje palani ne'iyohuá.

Namájicare ri'imajica.

E'iyonaja calé nala'aqué namanaicho.

<sup>10</sup> Marí que nala'ajica pachá, nuyúcha'aco najló i'imajica.

Aú numá nanacu: Apu cajé ta puráca'aloji chuhuaja ne'ejnata napéchuhua hua'ajini huani.

Uncá huani nahuátaque napéchuhua i'ijnatácana nupuráca'alo chuhuá.

11 Namanaicho nala'ajicare pachá nuyúcha'aco najhua'até.

Aú numá nanacu:

Uncá huani ne'ejnalaje te'erí, norucácare najló ejo. Marí caje aú uncá caja nahuatána'alaje nujhua'até.

Marí que numacá nanacu, caja queja ri'imacáloje najló penaje, que Tupana quemacá nanacu i'imacá.

<sup>12</sup> Nojena, i'imá u'upejlú ñaqué la'acana liyá, e'iyajena ijnúcha'aco piyá Tupana ja'apiyá jema'acana nacú. Apala e'iyajena pechu i'imá pu'uhuaré, aú ipechu pajno'oró Tupana liyá. Cajmuni, capechuni Tupana. Ipechu pajno'oniyo riliyá. Uncá pachá iná pechu i'imalá caphí richojé, iná pechu pajno'oró riliyá.

<sup>13</sup> Ila'á caja papechúhuaca caphí Tupana puráca'alo aú. Hue'echú ca'alá queja ila'ajica caphí papechúhuaca raú, a'ajná Jesucristo iphájica majó ejená. Marí que ca'ajná inaquiyana pechu i'imajica: "Palá hue'emajica huamanaicho la'acana nacú." Uncá quehuaca calé ricá. Marí que la'acana aú iná pechu pajno'oró Tupana liyá. I'imá pajlocaca Tupana puráca'alo yucuna, ipechu i'imacáloje richojé caphí penaje. Raú uncá ijnúcha'alajo Tupana ja'apiyá jema'acana nacú.

<sup>14</sup> Jesucristo hua'atéjena huecá, uncaja que huayurí hualiyó richojé i'imacana caphí. Huaqueño'ó richojé i'imacana caphí júpimi. Ñaqué caja huapechu i'imajica ee caphí richojé huataca'ajica ejená, hue'emajé rijhua'atéjena huani reyá a'ajná ño'ojó.

<sup>15</sup> Marí que Tupana puráca'alo lana'aquejami quemacá:

Chuhua ne'emajica ee Tupana puráca'alo yucuna ijló, ijnúcha'aniyo na'apiyá rema'acana nacú.

Júpimi a'ajútayami chuna i'imaqueño pu'uteni chu.

I'imaniya ne'emacá que caja.

Necá ijnúcha'aqueño no'opiyá jema'acana nacú, que Tupana puráca'alo lana'aquejami quemacá.

<sup>16</sup> Necá, Moisesmi chu huá'acarena Egipto te'eré eyá i'imacá, jema'año Tupana puráca'alo i'imacá. Nema'á ricá. E'iyonaja calé nejnúcha'o ra'apiyá jema'acana nacú.

<sup>17</sup> Pu'uteni chu ne'emacá huacajé, ne'iyajena la'año namanaicho i'imacá. Pachá calé nataca'ató i'imacá. Nachá Tupana yúcha'aro i'imacá. Iyamá ina'uqué le'ejé quele jarechí quetana riyúcha'aco nachá.

<sup>18</sup> Uncá jema'alaño ra'apiyajlo rimá:

Uncá i'ijnalaje te'erí, norucácare ijló ejo.

Uncá caja huatána'acaje i'imalaje ijló, ihuatána'acaloje chira'acajo liyá penaje.

Caja queja ri'imacáloje najló penaje, rimá najló marí que i'imacá.

<sup>19</sup> Uncá pachá napechu i'imalá caphí richojé, uncá riyurila ne'ejnacá te'erí rarucácare najló i'imacá ejo.

## 4

<sup>1</sup> Ejo'ocaja Tupana quemari ina'uqué nacú, ne'emacáloje rijhua'até penaje, nahuatána'acaloje caja rijhua'até penaje. Ñaquele quero'ocajo hua'até hua'á huanacajo ricá, piyuqueja huecá i'imacáloje rijhua'atéjena penaje, huahuatána'acaloje rijhua'até penaje.

<sup>2</sup> Tupana i'imatari ina'uqué capichácajo liyá. Riyucuna ne'emá najló i'imacá, ne'emacá huajló riyucuna que caja. E'iyonaja uncá na penaje calé ri'imacá najló, uncale napechu i'imalá caphí richojé.

<sup>3</sup> Eyá huecá, huema'á ra'apiyá. Caphí caja huapechu richojé. Aú calé rijhua'atéjena huecá chuhua. Huatána'acaje rimacare nacú yuriro caja huajló. Marí que rimacá júpimi i'imacaño nacú:

Nuyúcha'acole nachá, numá marí que nanacu:

Uncá huani ne'ejnalaje te'erí norucácare najló i'imacá ejo.

Uncá caja nahuatána'alaje nujhua'até.

Marí que numacá nanacu, caja queja ri'imacáloje najló penaje, que Tupana quemacá nanacu i'imacá.

Tupana queño'ótari eja'ahuá, je'echú piyuqueja richu i'imacá hua'ató. Raú riñapata risápaca'ala la'acana i'imacá, ina'uqué i'imacáloje rijhua'até raú penaje. E'iyonaja rimá nanacu: "Uncá nahuatána'alaje nujhua'até."

<sup>4</sup> Tupana queño'ótari piyuqueja nacaje pajluhua cuhuá'ata quele cala e'iyajé i'imacá. Ripuráca'alo lana'aquejami e'iyá rimá marí que iyamá cuhuá'ata que cala nacú:

Iyamá cuhuá'ata que cala i'imacá huacajé Tupana huatána'ari risápaca'ala liyá.

<sup>5</sup> Marí que ri'imacá rijló. E'iyonaja rimá nanacu marí que: 'Uncá huatána'acaje i'imalaje najló.'

<sup>6</sup> Tupana i'imatari ina'uqué capichácajo liyá. Jema'añó riyucuna pamineco i'ímacá, uncá a'alaño nanacojó riyucuna. Pachá uncá nahuatána'ala Tupana hua'até i'ímacá. Ñaquele re huatána'acaje ejo'ocaja ajopánajlo, nahuatána'acaloje Tupana hua'até penaje.

<sup>7</sup> Huahue'epí marí que ricá, rimacale piño apú huacajé nacú. Hue'echú ca'alá hue'emacare e'iyá me'etení, nacú rimá. Júpimi i'ímacaño yámijjo Davidmi chu quemari piño rinacu i'ímacá. Tupana ja'apiyá que ri'ímacá riyucuna najló i'ímacá. Tupana puráca'alo lana'aquejami caja huamichaje, quemari caja marí que:

Chuhuaca ne'emajica ee Tyucuna pamineco i'ímacúpana puráca'alo yucuna ijlo, ijnúcha'aniyo na'apiyá jema'acana nacú.

<sup>8</sup> Josuémi chu huá'ari Israelmi chu laquénami te'erí Tupana arucácare najló i'ímacá ejo. Caja capichácaño yanimínami ne'emacá, rihuá'a rejo i'ímacá. Huatána'acaje i'ímaquela najló re, uncá Tupana quemalajla piño apú huatána'acaje nacú.

<sup>9</sup> Ñaquele re chuhua huatána'acaje Tupana ja'apiyá jema'ajéñojlo.

<sup>10</sup> Tupana hua'até huatána'ajeño, huatána'año nacaje nala'acare liyá. Tupana huatána'aca nacaje rila'acare liyá que caja nahuatána'aca nacaje nala'acare liyá.

<sup>11</sup> Palani huala'acá huecó tu'ujné rinacojó, huahuatána'acaloje Tupana hua'até penaje. Marí que huala'ajica, huanaquiyana i'ímacá piyá necá que caja, uncá jema'alaño ra'apiyá i'ímacá.

<sup>12</sup> Uncá hue'emalaje necá que, Tupana puráca'alo i'ímacale capechuni huajló. Piyuqueja nacaje la'ajeri caja ricá. Sajalu iyámajo pomitano irerí i'imari puhue'ení. Raú iná jo'ó nacaje e'iyajé. Rimujlúca'a ya'ajnaje re'iyajé. Ñaque caja Tupana puráca'alo iphaca ya'ajnaje iná pechu e'iyajé. Raú iná hue'epí méqueca Tupánajlo nacaje iná i'ijnatácare nacú iná péchuhua. Raú caja iná hue'epí caja méqueca Tupánajlo nacaje iná huátacare la'acana.

<sup>13</sup> Piyuque Tupana queño'ótacare nacaje e'iyohuá, uncá na i'imalá micho'otáqueja que riliyá. Piyuqueja ina'uqué, piyuqueja nacaje i'imari pu'uhuacá rijló. Piyuqueja huecá lapa'ajeño rijimaje je'echú chu pajluhuano, pajluhuano que. Re rimaje huajló rinacu méqueca rijló nacaje huala'acare marí eja'ahuá chu hue'emacá quetana.

*Puráca'aloji lamá'atajери huani Jesucristo ina'uqué chaya Tupana hua'até. Riyucuna marí:*

<sup>14</sup> Tupana I'irí Jesucristo. Tupana ahua'a ricá. Ricaja calé i'imari huapuráca'alo lamá'atajери huani. Huachaya rilamá'ata puráca'aloji Tupana hua'até. Marí que ri'ímacale huajló, ipechu i'ímacá caphí ripuráca'alo ja'apiyá i'ímacana nacú.

<sup>15</sup> Huapuráca'alo lamá'atajери huani ricá huajló. Rihue'epí caja huamu'ují, rihue'epícale mecajenaca huecá. Marí que i'ímacaño huecá: Uncá huapechu iphala palá la'acana locópa'ala. Rihue'epí méqueca huajló nacaje, ri'ímacale huecá que caja i'ímacá. Rijña'a que'iyapejé chapú caje yajhué panacu i'ímacá. Que'iyapejé nacaje a'arí rime'é rijluhua, rila'acáloje pu'uhuaré, rimanaicho hua'até raú penaje. Nacaje a'acá huame'é rijluhua, que caja ra'acá rime'é rijluhua. Uncá rila'alá pu'uhuaré. Uncá caja rila'alá rimanaicho raú.

<sup>16</sup> Huecá que caja Jesucristo i'ímacale, i'ijná huala'achí huapéchuhua caphí, huapura'acóloje rijhua'até piyuqueja nacaje nacú penaje. Ripalamanan aú rihue'epí huamu'ují. Ra'a huáñaté nacaje camu'ují huala'acare nacú aú.

## 5

<sup>1</sup> Moisesmi chu i'ímacá huacajé, Tupana a'aqueri apú, apú que puráca'aloji lamá'atajери penaje, rilamá'atacaloje ina'uqué chaya puráca'aloji Tupana hua'até penaje. Nanaquiyana e'iyayá ri'ihuapaqué rijluhua ri'imajica. Ricá penájemi pura'aró ina'uqué chaya Tupana hua'até i'imajica. Ra'aque caja nacaje majopeja Tupánajlo. Rinoque caja napirana naquiyana Tupánajlo, pu'uhuaré ina'uqué la'ajicare chaya.

<sup>2</sup> Rihue'epique caja ina'uqué pala'atácana pu'uhuaré nala'ajicare liyá. Necá que caja ri'imajica najhua'até. Ñaquele uncá yurí calé ripala'atájica najló napechu. Necá que caja ri'imajicale najhua'até, rihue'epique ina'uqué nacojó mecajenaca necá. Majopeja jal'acaño namanacho la'acana chojé necá. Pu'uhuaré nala'acá, uncale napechu i'imalá palá la'acana nacú. Necá que caja ri'imajicale, rihue'epique nañaté a'acana. Rihue'epique caja palani puráca'aloji chíyá jácho'ojeño ñaté a'acana. Marí caje penaje rilamá'ataque pu'uhuaré puráca'aloji ina'uqué chaya Tupana hua'até.

<sup>3</sup> Pu'uhuaré la'ajeri ri'imajicale ajopana ina'uqué que caja, rinoque pamineco napirana naquiyana pu'uhuaré rila'ajicare chaya. Qu'échami rinójica piño nanaquiyana ajopana la'ajicare pu'uhuaré chaya.

<sup>4</sup> Uncá na calé a'aqueri ricó puráca'aloji lamá'atajери penaje. Tupánaja calé a'aqueri ricá. Ra'a pamineco Aarón puráca'aloji lamá'atajери penaje i'ímacá. Ricá pumí chojé ra'ajica piño apú rihuátajicare. Marí que ra'ajica necá papumí chojéchaca.

<sup>5</sup> Uncá caja Jesucristé. Ñaquele uncá yurí calé o a'alá ricó i'imacá, ri'imacáloje puráca'aloji lamá'atajeño huacára'ajeri penaje. Tupánaja calé a'arí ri'imacá puráca'aloji lamá'atajeri penaje. Ri'imacáloje nachaje péchuri penaje ra'á ri'imacá. Marí que Tupana puráca'alo lana'aquejami quemacá rinacu:

Picá Nu'urí. Chuhuaca ina'uqué hue'epíjica Nu'urica picá, que Tupana quemacá rijló i'imacá.

<sup>6</sup> Apa'amá Tupana puráca'alo lana'aquejami e'iyá rimá marí que rinacu:

Picá i'imajeri hua'ajini huani puráca'aloji lamá'atajeri penaje ina'uquejlo, pilamá'atacaloje puráca'aloji nachaya nojló penaje.

Melquisedec i'imacá que caja pi'imajica puráca'aloji lamá'atajeri, que Tupana quemacá rinacu.

<sup>7</sup> Marí eja'ahuá chu nenoca Jesucristo yámona ripura'ó Tupana hua'até. Iqui'i huani rihuátaca Tupana a'acá riñaté i'imacá. Tupana hue'epiri ina'uqué i'imatácana taca'acaje chiyá. Ñaquele cajrú jahuiyo'ocaje nacú ri'imá, e'iyá ripura'ó rijhua'até. Cajrú iyacaje nacú hua'ateja ripura'ó rijhua'até. Tupana jema'arí ra'apiyá, Tupana huátaca que huani la'ajeri ri'imacale.

<sup>8</sup> Richona ajopana ina'uqué la'año chapú ri'imacá. Ri'irí ricá. E'iyonaja rijña'á chapú caje yajhué panacu. Palá rema'ajica ra'apiyá.

<sup>9</sup> Nala'aque ricá chapú, e'iyonaja calé rema'aque ra'apiyá. Aú iná hue'epí rila'acá nacaje piyuqueja huani Rara'apá huátaca que. Uncá na calé yuriro riliyá, rila'acáloje penaje. Chapú caje yajhué ramá i'imacá. Ejomi Tupana a'arí ricá, ri'imacáloje ra'apiyá jema'ajeño i'imatájeri penaje. Capichácajo liyá ri'imatá ra'apiyá jema'ajeño, ne'emacáloje matajnaco Tupana hua'até je'echú chu raú penaje.

<sup>10</sup> Tupana a'arí caje Ri'irí puráca'aloji lamá'atajeri penaje. Ina'uqué chaya rilamá'ata puráca'aloji. Melquisedec i'imacá que caja ricá.

*Nayurica piyá Tupana ja'apiyá jema'acana yucuna marí:*

<sup>11</sup> Re ejo'ocaja jo'ó ñó'ope riyucuna, numacáloje rinacu ijlo penaje. E'iyonaja calé puhuichani ijlo rinacóje hue'epicana, ijnú ihuátacale rema'acana.

<sup>12</sup> Jupichúnami icá Jesucristo ja'apiyá jema'ajeño. Maárejecha jehuíña'atajla ajopana rinacu. E'iyonaja calé uncá jo'ó ihue'epila. Ñaquele apú jehuíña'atajeri icá rejo'ocaja jo'ó rinacu. Pu'uhucataní aú jehuíña'atacana Tupana puráca'alo nacú palani ijlo. Queráco'opena que caja icá mapéchuruna. Queráco'opena i'iraño naló chu'uchure, uncale nahue'epila na'ajnehuá ajñacana, peñahuilana ajñaca na'ajnehuá que caja. Necá que caja icá, uncale iná jehuíña'atalajla icá Tupana puráca'alo puhuichani nacú.

<sup>13</sup> Queráco'opena que necá, uncá hue'epilaño Tupana puráca'alo nacóje. Uncá caje hue'epilaño palá la'acana, pu'uhuaré la'acana liyá queráco'opena que necá.

<sup>14</sup> Eyá peñahuilá i'imacaño i'imaño marí que: Palá hue'epicaño necá Tupana puráca'alo lana'aquejami nacóje. Nala'á caja palá rimacá que. Nahue'epí caja palá la'acana nacóje, nala'acá piyá pu'uhuaré.

## 6

<sup>1</sup> Uncá huemalaje piño ijlo me'etení nacaje nacú, iná quemacare nacú huajé ripuráca'alo jema'ajeñojlo. Huajé ripuráca'alo jema'ajeñojlo iná quemá, napechu i'imacáloje caphí Jesucristo chojé penaje, ri'imatácaloje necá capichácajo liyá penaje. Iná quemá caja najló, nayurícaloje pu'uhuaré, namanaicho la'acana naliyó penaje. Napala'atácoloje napéchuhua riliyá penaje. Marí caje aú Tupana i'imatari iná capichácajo liyá. Pulapecha riyucuna jema'acano icá. Ñaquele uncá nu'umalaje piño ijlo riyucuna. Iná la'acáloje piyuque nacaje Tupana huátacare caje nacú hue'ejnataje huapéchuhua maáreya.

<sup>2</sup> Uncá caja nohuíña'atalaje icá bautizar la'acana nacú. Uncá caja nohuíña'atalaje icá na penájeca nato'otaca nayáte'ela Jesucristo ja'apiyá jema'ajeño nacóje. Uncá caja nohuíña'atalaje icá caja taca'acaño macápo'ojico nacú. Uncá caja nohuíña'atalaje icá Tupana huajájica necá uncá jema'alaño ra'apiyá nacú. Uncá jema'alaño ra'apiyá rihuajaje hua'ajini huani.

<sup>3</sup> Tupana huátajica ee huemaje ijlo apú nacaje nacú, Tupana huátacare caje nacú.

<sup>4</sup> Re ina'uqué naquiayana. Naqueño'ó Jesucristo ja'apiyá jema'acana. Nahue'epícare caje, nacaje je'echú chu i'imacare, palani caje ricá. Naqueño'ó Tupana Pechu ja'apiyá jema'acana.

<sup>5</sup> Palá caja napechu i'imacá Tupana puráca'alo nacú. Namá caja Tupana la'acá nacaje ne'iyá uncá meño'ojó ina'uqué la'alare caje. Raú calé nahue'epí mecajeca Tupana. Uncá tajnácajo penaje calé i'imacá ricá.

<sup>6</sup> Marí caje nacojé hue'epéjeño ne'emacá. E'iyonaja calé nayurí naliyó ripuráca'alo. Raú napechu pajno'oró Tupana liyá. Uncá meque iná la'alajla necá, napala'atácoloje napéchuhua pu'uhuaré nala'acare liyá penaje. Caja nala'á najluhua Jesucristo uncá ina'uquélari que. Uncá ina'uquélaruna i'imagacño nenó a'ahuaná apiyácanami nacú i'imagá. Uncá pu'uhuaré la'ajeri calé Jesucristo i'imagá. E'iyonaja ñaqueé caja nenoca ri'imagá. Caja yurícaño naliyó ra'apiyá jema'acana, la'año piño ricá ñaqueé caja uncá ina'uquélari que, uncale nahuátala nacaje rila'acare nachaya. Marí que nala'acá aú naca'á nayámojo ricá.

<sup>7</sup> Ina'uqué naquiya i'imaño iná i'icacapere i'imagá inajlo que caja. Juni ja'aró re'iyajé. Raú palá nacaje iphaca richu. Palani inajlo nacaje iná ña'acare re'iyayá. Raú caja Tupana la'arí iná palá. Ñaqueé caja ina'uqué naquiya la'acá palá Tupana palamane aú.

<sup>8</sup> Eyá apú iná i'icacapere, cahuichini ca'ajná ricá. Lucú caje, jimichi caje iphari richu. Uncá na penaje calé inajlo ricá. Uncá na iphala richu palani inajlo, aú iná yurí ricá. Ñaqueé caja Tupana yurica necá, uncá huátalaño ra'apiyá yuricana. Necá cajena amájeño Tupana huajáica necá yajhué, uncale nala'alá palá Tupana palamane aú.

<sup>9</sup> Caja numá ijlo méqueca ri'imajica najló, uncá la'alaño najlo. Eyá ijlo uncá ñaqueé calé ri'imajica. Huahue'epí palá la'ajeño icá Tupana palamane aú. Ñaqueja Tupana la'ajica necá ri'imatácarena capichácajo liyá palá.

<sup>10</sup> Uncá iyurila iliyó Tupana ja'apiyá jema'acana, ñaquele rila'á icá palá. Rihue'epí palá ila'acare nacojé. Rihue'epí caja palá a'ajica ajopana Jesucristo ja'apiyá jema'ajeño ñaté i'imajica. Ñaqueja jo'ó a'acá ñataté me'etení. Marí que ila'acá aú Tupana hue'epiri íqui'ija ihuátaca ricá.

<sup>11</sup> Huechi iqueño'ocá palá la'acana. Huahuata i'imagá ñaqueja la'acana nacú a'ajná Jesucristo pa'ajico majó ejená. Raú nacaje i'imagare ijlo je'echú chu, yuréjero ijlo.

<sup>12</sup> Ñaquele i'imaniya ijnuruna marí caje chaya. Ajopana, caphí péchuruna Tupana chojé i'imagacño mi chuna, uncá i'imalaño ujhuí Tupana ja'apiyá jema'acana nacú. Raú Tupana a'arí najló nacaje, rimacare nacú najló i'imagá que. Ila'á nala'acá i'imagá que caja, i'imagácoloje necá que caja penaje.

*Tupana la'arí ina'uquejlo nacaje rimacá najló que. Riyucuna marí:*

<sup>13</sup> Júpimi Tupana quemari Abrahami chujlo nacaje nacú i'imagá. Rimá rijló palá rila'ajicare nacú. Uncale apú i'imalá richaje péchuri, rimá rijló rinacu. Rinacuhuaja calé rimá rijló, rihue'epícaloje ñaqueé caja ri'imajica rijló penaje.

<sup>14</sup> Marí que Tupana quemacá Abrahami chujlo i'imagá: "Nula'ajé picá palá, cajrú pilaquénami i'imagácoloje penaje."

<sup>15</sup> Caphí Abrahami chu pechu i'imajica rimacare rijló chojé. Uncá rácho'olo richiyá. Aú Tupana la'arí rijló rimacá rijló i'imagá que.

<sup>16</sup> Iná quemá ca'ajná: "Tupana hua'até que numacá quehuaca." Marí que iná quemacá, iná chaje ri'imagale. Marí que iná quemacachu nacaje nacú, apú hue'epiri quehuaca iná quemacá. Raú uncá aca'ácacajo i'imalá inajlo apú hua'até.

<sup>17</sup> Tupana la'arí ina'uqué palá i'imagá. Rihuata nahue'epica rimacá que huani rila'ajica najló nacaje. Rihuata caja nahue'epica uncá rapiyácalaje ripéchuhua rila'acana nacú. Aú calé rinacuhuaja rimá najló: "Quehuaca nula'ajica najló ricá."

<sup>18</sup> Tupana quemari huanacu, rila'acácoloje huecá palá penaje. Rimá rinacuhua, huahue'epícaloje rimacá que caja ri'imajica huajló. Uncá meño'ojó Tupana pajlala. Caphí richojé i'imagacño i'imaño palá. Marí hue'epicana la'arí huapechu caphí, huácho'oco piyá richiyá.

<sup>19</sup> Tupana i'imatájeri huecá capichácajo liyá, hue'emacácoloje rijhua'até penaje. Richojé calé huapechu i'imá palá; uncá huacapichácajo raú. Nacaje je'echú chu i'imagare chojé, caphí caja huapechu. Re caja Jesucristo Tupana ahua'á.

<sup>20</sup> Ri'ijná huatucumá rejo. Re ripura'ó huachaya Tupana hua'até, hue'ejnacácoloje rejo penaje. Puráca'aloji lamá'atajeri huani ricá ina'uqué chaya Tupana hua'até. Caja queja ri'imajica matajnaco. Melquisedec lamá'atari puráca'aloji ina'uqué chaya i'imagá. Ri-naquiya queja caja Jesucristo.

## 7

*Melquisedec yucuna marí:*

<sup>1</sup> Melquisedec i'imari pajmíla Salem eruna i'imagana i'imagá. Tupana, ajopana chaje i'imagare, a'arí ricá ina'uqué chaya puráca'aloji lamá'atajeri penaje. Ricá penájemi pura'aró Abrahami chu hua'até i'imagá. Abrahami chu, rijhua'atéjena hua'até, i'imaño ajopana hua'até nócacajo nacú i'imagá. Nachá'ata ne'emacá. Nenota piyuque ne'emacánana ne'iyayá, pu'uhuaré la'ajeño ne'emacale. E caja napa'ó nócajomi. Ehuá Melquisedec,

rijhuáque'ena, quele iphaca Abrahami chu nacú. E Melquisedec pura'aró Tupana hua'até Abrahami chu nacú, rila'acáloje ricá palá penaje.

<sup>2</sup> Ejomi Abrahami chu a'arí rijló nacaje naquiyana, najña'acare napinana nachá'atacarena liyá i'imacá. Iyamá té'ela quele nacaje i'imacá ricapi, ra'á rinaquiyá pajluhuano, pajluhuano que. Caja queja ra'ajica rijló rinane naquiyana.

Marí que quemacana rií, Melquisedec: "Palá huacára'ajeri ricá," que quemacana rií. Marí que quemacana caja pajmila Salem: "Palá i'imacaño pajhua'atéchaca pajmila," que quemacana ricá. Salem eruna huacára'ajeri ri'imacá.

<sup>3</sup> Uncá Melquisedec chi'iná nacú quemacana i'imalá. Uncá caja ra'ajútayami chuna nacú quemacana i'imalá. Uncá caja Melquisedec moto'ocá yucuna i'imalá. Uncá caja ritaca'acá yucuna i'imalá. Tupana l'irí que caja ri'imacá, ri'imacale puráca'aloji lamá'atajeri penaje. Ina'uqué chaya rilamá'ata puráca'aloji Tupánajlo. Uncá rácho'olo richiyá.

<sup>4</sup> Ajopana chaje ri'imacá. Aú calé Abrahami chu a'arí rijló rinane caje naquiyana. Cajrú ina'uqué queráto'ojeri Abrahami chu i'imacá. Ajopana chaje ri'imacá rehuá. E'iyonaja ricá a'arí Melquisedecjlo pajluhuano, pajluhuano que iyamá té'ela quele rinane i'imacá naquiyana. Marí aú iná hue'epí richaje Melquisedec i'imacá.

<sup>5</sup> Naqué caja na'ajica iyamá té'ela quele nanane naquiyana pajluhuano, pajluhuano que, Moisesmi chu i'imacá huacajé. Reyá a'ajná ño'ojó ñaqueé caja na'ajica nanane caje naquiyana Tupana hua'até sápageñojlo. Na'aqué Levítami chu laquénami naquiyana puráca'aloji lamá'atajeño penaje. Moisesmi chu puráca'almi huacára'ari najña'acá ina'uqué liyá iyamá té'ela quele nanane caje naquiyana pajluhuano, pajluhuano que. Necá'ana ne'emajica. E'iyonaja najña'aqueé naliyá ricá.

<sup>6</sup> Eyá Melquisedec, uncá ri'imalá Levítami chu laquénami naquiyana. E'iyonaja rijña'á Abrahami chu liyá iyamá té'ela quele rinane naquiyana, pajluhuano, pajluhuano que. Ripura'ó caja palá rinacu Tupana hua'até, Tupana la'acáloje ricá palá penaje. Tupana arucari Abrahami chujlo cajrú nacaje i'imacá, riyurícaloje rilaquénamijloje penaje.

<sup>7</sup> Iná hue'epí apú chaje ricá, quemari apú nacú, Tupana la'acáloje ricá palá penaje.

<sup>8</sup> Taca'ajeño penájena Levítami chuna laquénami i'imacá. Necá ña'aqueño ina'uqué liyá nanane naquiyana i'imajica. Eyá Melquisedec, uncá tajnácajo penaje calé ricá, que Tupana puráca'alo lana'aquejami quemacá rinacu. Ricá ña'arí Abrahami chu liyá iyamá té'ela quele rinane naquiyana, pajluhuano, pajluhuano que.

<sup>9</sup> Levítami chu naquiyana ña'aqueño ina'uqué liyá iyamá té'ela quele nanane caje naquiyana, pajluhuano, pajluhuano que. Levítami chu a'arí caja Melquisedecjlo iyamá té'ela quele rinane naquiyana i'imacá. Uncá ricá huani calé a'arí rijló ricá. Abrahami chu, a'arí rijló ricá, rilaquénami pumí chojé penaje.

<sup>10</sup> Uncá chiyó Levítami chu moto'ó, Melquisedec iphari Abrahami chu nacú i'imacá. Rihuacajé uncá jo'ó Levítami chu i'imalá. Rilaquénami naquiyana ri'imacá.

<sup>11</sup> Tupana quemari Levítami chu laquénami nacú, ne'emacáloje puráca'aloji lamá'atajeño ina'uqué chaya penaje. Napuráca'almi ja'apiyá Israelmi chu laquénami i'imaqueño. E caja Tupana a'arí piño apú ina'uqué caja penaje. Puráca'aloji lamá'atajeri ina'uqué chaya penaje ra'á ri'imacá. Melquisedec naquiyánami ricá. Uncá ajopana que calé ricá. Palani ñaqueja na'acana i'imaquela, uncá na penaje calé Tupana a'aríjla apú caja penaje. E'iyonaja ra'á piño apú, Melquisedec naquiyánami ricá. Uncá ra'alá apú Aaronmi chu naquiyana na'ajica que caja.

<sup>12</sup> Na'acachu ajopana naquiyana ina'uqué chaya puráca'aloji lamá'atajeño penaje, napiyaca caja najló riyucuna i'imacana, ne'emacáloje ra'apiyá penaje. Uncá ajopánajlo ne'emacá riyucuna que calé ne'emacá riyucuna najló.

<sup>13</sup> Marí que Tupana puráca'alo lana'aquejami quemacá Jesucristo nacú. Ajopana naquiyana ricá. Uncá na'alá apú rinaquiyana e'iyayá puráca'aloji lamá'atajeri ina'uqué chaya penaje.

<sup>14</sup> Nahue'epí palá Judá laquénami naquiyana Jesucristo i'imacá, marí eja'ahuá chu ri'imaqué huacajé. Uncá Moisesmi chu quemalá nanaquiyana nacú, ne'emacáloje puráca'aloji lamá'atajeño ina'uqué chaya penaje.

<sup>15</sup> Raú iná hue'epí caja Tupana apiyácaca júpimi que nala'acare i'imacá. Ra'á Jesucristo puráca'aloji lamá'atajeri ina'uqué chaya penaje. Melquisedec naquiyana ricá.

<sup>16</sup> Uncá Tupana a'alá ricá jupichumi puráca'aloji quemacá que. Ina'uqué puráca'almi ricá jupichumi. Ra'á ri'imacá, uncá tajnácajo penaje calé ri'imacale.

<sup>17</sup> Tupana puráca'alo lana'aquejami quemari Jesucristo nacú marí que: Picá i'imajeri puráca'aloji lamá'atajeri ina'uqué chaya nojló penaje, Melquisedec i'imacá que caja pi'imajica, que rimicá.

<sup>18</sup> Uncá meño'ojó jupichumi puráca'aloji la'alá palá ina'uqué nacú. Aú caja Tupana cupari ricá apojó, uncá na penaje calé ri'imacale rijló.



<sup>19</sup> Uncá meño'ojó ina'uqué i'imalá lamára'ataquejanami que Tupánajlo Moisesmi chu puráca'alomi ja'apiyá i'amacana aú. Chuhua re apú huapechu i'amacare chojé caphí. Palani ricá. Richojé lamára'ataquejanami que huecá Tupánajlo, hue'emacáloje rijhua'até penaje.

<sup>20</sup> Tupana quemari Jesucristo nací, ri'amacáloje puráca'aloji lamá'atajeri ina'uqué chaya penaje. Caja queja ri'imajica hua'ajini huani ina'uqué chaya pura'ajero penaje.

<sup>21</sup> Ajopana puráca'aloji lamá'atajeño ripyá nacú, uncá rimalá: "Caja queja ne'emajica" que. Eyá Jesucristo nacú rimá: "Caja queja ri'imajica hua'ajini huani. Rimá rijló marí que i'amacá:

Uncá huani nopiyácalaje nupechu piliyá i'imajica.

Picá i'imajeri puráca'aloji lamá'atajeri ina'uqué chaya hua'ajini huani nojló.

<sup>22</sup> Marí que Tupana quemacá rinacu i'amacá. Aú huahue'epí palani huajló ricá huachaya pura'ajero penaje. Tupana quemari huanacu, hue'emacáloje palá rijhua'até penaje. Apú nacaje, riyurícare huajló, ricá chaje huani huajló rijhua'até i'amacana.

<sup>23</sup> Cajrú ajopana ina'uqué i'imajica puráca'aloji lamá'atajeño ina'uqué chaya i'imajica. Nataca'ajica aú nácho'oco richiyá.

<sup>24</sup> Eyá Jesucristo, uncá tajnácajo penaje i'amacá calé ricá. Ñaquele uncá risápaca'ala yurílaajo apujlo.

<sup>25</sup> Chuhua ri'imatá necá capichácajo liyá, huátaño Tupana hua'até i'amacana Jesucristo palamane aú. Uncá tajnácajo penaje i'amacá calé ricá. Ñaquele ripura'ó Tupana hua'até ina'uqué chaya. Marí que ricá huajló me'etení. Caja queja ri'imajica huajló.

<sup>26</sup> Palani Jesucristo huajló, rilamá'atacaloje huecá Tupánajlo penaje. Uncá rihue'epila pu'uhuaré la'acana. Uncá caja pu'uhuaré la'acaño que calé ricá. Caja Tupana huá'ari ricá je'echú chojé i'amacá, ri'amacáloje rijhua'até re penaje.

<sup>27</sup> Uncá ajopana puráca'aloji lamá'atajeño i'amacá que calé ricá. Marí que ajopana la'ajica i'imajica: nenoque hue'echú ca'alá queja napirana naquiyana, nalamá'atacaloje napéchuhua pamineco Tupánajlo raú penaje. Ejomi nenoque piño napirana naquiyana pu'uhuaré ajopana ina'uqué la'acare chaya penaje. Eyá Jesucristo, uncá ñaque calé rilá'acá. Pajlhuua peja ritaca'á i'amacá. Ra'á ricó i'amacá, nenócaloje ricá pu'uhuaré ina'uqué la'acare chaya penaje. Reyá a'ajná ño'ojó uncá ina'uqué chaya taca'acana i'imalá Tupánajlo.

<sup>28</sup> Moisesmi chu puráca'alomi ja'apiyá ne'emacá huacajé, na'aque ajopana ina'uqué puráca'aloji lamá'atajeño ina'uqué chaya penaje. Necá, na'acárena, uncá meño'ojó nala'alá palá Tupana huátaca que, uncale napechu iphala rilocópa'ala i'amacá. Ñaquele Tupana a'arí Ri'irí, Jesucristo, rihuátaca que la'ajeri huani ri'imacale. Caja queja ri'imajica hua'ajini huani. Ina'uqué i'amacáloje ripuráca'alo ja'apiyá Moisesmi chu puráca'alomi apumí chojé penaje.

## 8

*Huajé puráca'aloji ja'apiyá huecá. Marí riyucuna:*

<sup>1</sup> Caja huemá ijlo Jesucristo nacú, ihue'epicaloje mecajeca ricá penaje. Marí nuhuata ihue'epica palá: Je'echú chu ricá; Tupana ahua'á caja ricá. Ajopana chaje huani i'amacá Tupana, ahua'á ricá. Tupana hua'até caja rihuacára'a re i'imaçaño.

<sup>2</sup> Tupana pucuna chu rilamá'ata puráca'aloji ina'uqué chaya Tupánajlo. Tupana la'arí ricá pucunaji re i'amacá. Uncá ina'uqué calé la'año ricá i'amacá.

<sup>3</sup> Eyá marí eja'ahuá chu na'aque ina'uqué naquiyana puráca'aloji lamá'atajeño ina'uqué chaya penaje. Na'aque necá, na'acáloje nacaje Tupánajlo penaje. Na'aque caja necá, nenócaloje napirana naquiyana Tupánajlo, pu'uhuaré ina'uqué la'acare chaya penaje. Eyá chuhua Jesucristo lamá'ataca huajló puráca'aloji Tupana hua'até.

<sup>4</sup> Jesucristo i'imaquela marí eja'ahuá chu me'etení, uncá ri'imalajla puráca'aloji lamá'atajeri ina'uqué chaya penaje. Moisesmi chu puráca'alomi quemacá rinacu queja nala'acá ri'amacá marí eja'ahuá chu. Uncá ripuráca'alo ja'apiyá calé Jesucristo.

<sup>5</sup> Puráca'aloji lamá'atajeño júpimi i'imaçaño chuna la'ajica nacaje jenami. Nacaje je'echú chu i'amacare jenámija calé nala'á maare. Tupana quemari Moisesmi chujlo rinacu i'amacá. Raú renami queja iná hue'epica rinacojé. Tupana huacára'ari Moisesmi chu la'acá pají napirana ímami naquiyá la'acanami, ina'uqué jahuacácolaje richojé penaje. Richu ne'ejnataque napéchuhua Tupana nacú. Penaje ri'imaqué. Ñaquele rimá rijló marí que i'amacá: "Pamá. Pila'á ricá, renami nuya'atácare pijló que huani. Ipuré i'ihuata chu pi'imaqué huacajé, nuya'atá pijló ricá," que rimacá rijló i'amacá.

<sup>6</sup> Eyá Jesucristo, uncá la'alá nacaje je'echú chu i'amacare jenami, ricá huani je'echú chu ri'imacale. Re rilamá'ata puráca'aloji huachaya Tupana hua'até. Ricá aú richá'ata jupichúnami renami la'ajeño. Ripura'ó ina'uqué chaya, ne'emacáloje huajé puráca'aloji ja'apiyá penaje. Huajé puráca'aloji chá'atari caja jupichumi puráca'aloji. Rimá caja huanacu

nacaje yurícoloje huajló penaje. Nacaje riyurjicare huajló chá'atari caja nacaje jupichumi puráca'aloji quemacare nacú.

<sup>7</sup> Puráca'aloji ne'emacare ja'apiyá pamineco, lamá'ataquela ina'uqué Tupánajlo, palani ri'imacajla. E'iyonaja calé uncá ricá penaje calé ri'imacá. Raú Tupana a'arí huajló huajé puráca'aloji, rilanaquiya que jupichumi puráca'aloji yurico hualiyá.

<sup>8</sup> Tupana amari maliyáruna ina'uqué i'imacá jupichumi puráca'aloji ja'apiyá. Aú calé rimá marí que i'imacá:

Aquijñojo nula'ajé huajé nacaje Israelmi chu laquénami hua'até. Ñaque caja nula'ajica Judami chu laquénami hua'até.

<sup>9</sup> Uncá nula'alaje nacaje najhua'até nula'acá nacaje na'ajútayami chuna hua'até i'imacá que caja.

Nuhúa'aca necá Egipto eyá huacajé, nuyurí najló puráca'aloji, ne'emacáloje ra'apiyá penaje. E'iyonaja uncá na'alá nanacojó ricá. Aú calé uncá caja no'olá nunacojó necá," que Tupana quemacá nanacu.

<sup>10</sup> Rimá piño huanacu marí que i'imacá:

Nupuráca'alo nuyurjicare nule'ejena ina'uquejlo i'imajeri marí que najló:

Napechu nacuja ri'imajé, nala'acáloje nacaje nojló nuhuátaca que raú penaje.

Napechu huáque'ehueja ri'imajica, nema'acáloje no'opiyá raú penaje.

Nucá chojé napechu i'imajé caphí. Necá i'imajeño nule'ejena ina'uqué.

<sup>11</sup> Uncá na calé jehuíña'atajeri ajopana, ajopana que Tupana nacú.

Piyuqueja ina'uqué hue'epéjeño mecajeca nu'umajica. Aú calé uncá caja apú quemalaje re'ehuejlo: "Pihue'epí Tupana" que.

Piyuqueja ina'uqué, yuhuaná, peñahuilana, quele hue'epéjeño nucá.

<sup>12</sup> Nomajo caja nachaje pu'uhuaré nala'acare liyá.

Rejomi uncá huani nu'ujnatálaje nupéchuhua pu'uhuaré nala'acare nacú.

<sup>13</sup> Que Tupana quemacá huanacu i'imacá meyáleje. Rimá puráca'aloji nacú: "Huajé ricá" que. Raú iná hue'epí jupichumi ripuráca'alo ja'aró capichácajo chojé. Ñaquele uncá ina'uqué i'imalá ejo'ocaja jupichumi puráca'aloji ja'apiyá.

## 9

*Nacaje nala'acare júpimi i'imacá, napechu i'imacáloje palá Tupánajlo raú penaje. Riyucuna marí:*

<sup>1</sup> Júpimi que Tupana yurica najló ripuráca'alo lana'aquejami. Ricá quemari méqueca rihuátaca nahuacaco, napechu i'imacáloje palá Tupana nacú raú penaje. Aú calé nahuacó pají caje chojé, ina'uqué la'acare i'imacá.

<sup>2</sup> Nala'á pají, napiránami ímami naquiyá la'acanamí ri'imacá. Iyamá ucapú i'imari richu. Pamineco iná mujlúca'acare chojé nemá nacú: "Tupana pucuna ricá." Richu camareji lapa'aró. Mesa to'oró caja richu. Mesa nacú caja pan to'oró. Tupana jimaje que nato'otácare ricá, to'oró rinacu.

<sup>3</sup> A'arumacaji cúhua'aro apalá ucapú penaje. Ricá íí na'á: "Tupana pucuna huani ricá."

<sup>4</sup> Richu caja mesa caje to'oró. Oro naquiyá la'acanamí ri'imacá. Rinacu nacára'ataque a'ahuaná ícá, pu'umé jamarí. Richu caja caichama yá'aro. Oro naquiyá la'acanamí caja ri'imacá piyuque. Ilé caichama chu Tupana puráca'alo lana'aquejami i'imari; iyamata jipa nacú lana'aquejami ri'imacá. Ríchuja caja a'ajnejí a'acuná i'imacá. Oro naquiyá la'acanamí caja ri'imacá. A'ajnejí a'acuná chu a'ajnejí i'imari. Ríí i'imari maná. Ricá caichama chu caja Aaronmi chu cutihuáremi i'imari. Rijitunare iphari rinaquiyá.

<sup>5</sup> Iyamá je'echú chiyájena jenami cúhua'aro caichama cha. Tupana jimaje que nenami cúhua'aco re. Caichama pajré que renami i'imacá. Ripajré ja'apejé puráca'aloji lamá'atajeño huicha'aqueño pirajina írami, Tupana amácoloje ina'uqué chaje pu'uhuaré nala'acare liyá penaje. Uncá nutajátalaje riyucuna i'imacana íjló me'etení.

<sup>6</sup> Marí que nacaje i'imacá najló Tupana ñacaré chu rihuacajé i'imacá. Puráca'aloji lamá'atajeño ina'uqué chaya mujlúca'aqueño pajluhua ucapú chojé hue'echú ca'alá queja. Majó pumitá i'imajicare chojé namujlúca'aque hue'echú ca'alá queja. Re nala'aque nasápaca'ala rijló i'imajica.

<sup>7</sup> Eyá apú ucapú i'imari a'ajná ño'ojó pumitá. Pajluhuaaja calé mujlúca'aque ri'ichojé. Ajopana puráca'aloji lamá'atajeño chaje ri'imacá. Pajluhuaa peno rimujlúca'ajica ri'ichojé pajluhuaaja jarechí japi. Rijña'aque rijhua'ató pirajina írami, ra'acáloje Tupánajlo ricá penaje. Pu'uhuaré rila'ajicare chaya ra'aque rijló ricá pamineco. Ejomi ra'aque piño rijló pirajina írami pu'uhuaré ajopana ina'uqué la'ajicare chaya.

<sup>8</sup> Renami queja nala'acá ricá. Raú Tupana Pechu jehuñña'atari huecá marí nacú: Pamineco i'ímacá ucapú, i'ímacá re quetana, uncá meño'ojó ajopana ina'uqué mu-  
jlúca'alaño apalá chojé, rapucuna huani i'ímacare chojé.

<sup>9</sup> Renami queja nacaje nala'acare i'ímacá. Huahue'epícaloje raú meque quemacánaca ricá  
me'etení penaje. Nacaje na'ajícare Tupánajlo, uncá lámá'ataque ina'uqué pechu Tupánajlo.  
Pirajina, nenójacarena pu'uhuaré ina'uqué la'ajícare chaya, uncá caja lámá'ataque napechu  
Tupánajlo.

<sup>10</sup> Marí que nala'acá ricá renami queja. Uncá ricá huani calé ri'ímacá. A'ajnejí, i'iracaje,  
iná amácare, nacú nemaqué rihuacajé. Nepaque nayáte'ela chiyá, najimá chiyá hua'até, eyá  
nanapona caje macá. Marí que nala'ajica aú, nala'aque nacupájica nanaquiyó pu'uhuaré  
nala'ajícare jenami. Marí queja nala'ajica renami, uncá chiyó Tupana a'arí ricá huani  
ina'uquejlo i'ímacá.

<sup>11</sup> Chuhuaca marí que ricá huajló. Caja Jesucristo iphari majó i'ímacá. Caja ripa'ó piño  
rapumí chuhua' j'e'echú chojé. Chuhua nachaje huani puráca'aloji lámá'atajeri ina'uqué  
chaya ricá me'etení. Chuhuaca ripalamane huecá. Puráca'aloji hue'emacare ja'apiyá  
me'etení, i'ímari jupichumi puráca'aloji chaje palaca. Pucunaji ri'ímacare chu me'etení  
i'ímari ricá huani. Nacaje marí eja'ahuá chu i'ímacá, uncá na i'ímalá ñaque' caja re je'echú  
chu. Palani huani ricá, chá'atari renami ina'uqué la'acare i'ímacá.

<sup>12</sup> Caja rimujlúca'a rapucuna huani chojé, je'echú chojé. Uncá caja rijña'alá cahuyá  
piracana, jema piracana írami rijhua'ató. Uncá rijña'alá marí caje rijhua'ató, Tupana  
amácoloje ina'uqué chaje pu'uhuaré nala'acare liyá raú penaje. Ricá taca'arí a'ahuaná  
apiyáccanami nacú ina'uqué chaya pajlulhua peja i'ímacá. Re rira aco'oró raphú chiyá  
i'ímacá. Raú Tupana amaro huachaje pu'uhuaré huala'acare chiyá. Ri'imatá caja huecá  
capichácajo liyá, hue'emacáloje matajnaje Tupana hua'até raú penaje.

<sup>13</sup> Eyá marí que ri'ímajica najló, Moisesmi chu puráca'alomí ja'apiyá i'ímacáñojlo: Támijimi  
nacú nasápajica aú nala'aque necó pu'uhuaré Tupánajlo. Raú netaque napu, namujlúca'aca  
piyá Tupana ñacaré chojé. Nahuacácoloje piño najhua'até rejé penaje, nala'aque marí que:  
Nahuicha'aque nachá cahuyá piracana, jema piracana, quele írami. Ejomi nacára'ataque  
jema i'írí. Ricá maca'apemí nacojlo'oque juni hua'até, nahuicha'acáloje ricá nachá pe-  
naje. Ricá aú naca'aque nanaquiyó nasápajicare támijimi nacú. Ejéchami namujlúca'ajica  
najhua'até Tupana ñacaré chojé.

<sup>14</sup> Marí que nala'ajica i'ímajica. ¡Eyá richaje huani palaca nacaje Jesucristo la'acare  
i'ímacá, hue'emacáloje palani Tupánajlo raú penaje! Uncá tajnácajo penaje calé Tupana  
Pechu. Ra'apiyá jema'acana aú Jesucristo a'arí ricó Tupánajlo i'ímacá, ina'uqué nócaloje ricá  
a'ahuaná apiyáccanami nacú penaje. Uncá la'alá pu'uhuaré ricá. Ricá taca'arí huachaya  
i'ímacá. Rira aco'oró raphú chiyá i'ímacá. Marí que rila'acale huachaya, palani huecá  
Tupánajlo, hue'emacáloje palá la'ajeño ra'apiyá raú penaje. Raú uncá hue'emalá majojeja  
la'acaño que.

<sup>15</sup> Jesucristo yuriri huajló huajé puráca'aloji, hue'emacáloje ra'apiyá penaje. Tupana  
a'acárena, rila'ejena ina'uqué penájena, huecá. Huajé puráca'aloji palamane hue'emajé  
chuhua. Uncá tajnácajo penaje calé nacaje riyurícare huajló. Quepénjica ri'ímajica  
ina'uquejlo. Caja Tupana quemari ina'uqué nacú, riyurícoloje ñaqueja najló penaje. Je-  
sucristo aú riyurí ina'uquejlo ricá. Ritaca'á huachaya, rácho'otacaloje huecá pu'uhuaré  
huala'acare chiyá penaje. Apa'amá puráca'aloji ja'apiyá hue'emaqué huacajé, huala'aque  
pu'uhuaré i'ímajica. Richiyá rácho'otacaloje huecá penaje ritaca'á huachaya i'ímacá.

<sup>16-17</sup> Apú quemacachu ajopánajlo, rinane yurícoloje najló ritaca'ajica quéchami, iná  
hue'epí uncá riyurila najló ricá, cajmuni ri'ímacá quetana. Ritaca'acá ejomi riyuró najló.

<sup>18</sup> Ñaque' caja nacaje i'ímacá najló, Moisesmi chu i'ímaqué huacajé. Nahuicha'aque nachá  
napirana írami, ne'emacáloje ripuráca'alo ja'apiyá raú penaje.

<sup>19</sup> Marí que nala'ajica Moisesmi chu i'ímaqué huacajé: Pamineco Moisesmi chu  
i'ímaqueri najló Tupana puráca'alo yucuna. Rimaqué najló, nala'acáloje piyuque nacaje  
Tupana huátaca que penaje. Quéchami rijña'ajica jema piracana i'írí írami, cahuyá piracana  
írami, juni hua'até naquechípa'aque napirana írami. Quéchami rihuicha'ajica rinaquiyana  
Tupana puráca'alo lana'aquejami nacojé. Rinaquiyánaja caja rihuicha'aque ina'uqué cha.  
Marí que rihuicha'ajona i'ímacá: A'ahuaná yainá lupucuje repo'oque ohueja chijnemi  
querani aú. Ricá aú rihuicha'aque ina'uqué cha. A'ahuaná yainá íi i'ímari hisopo.

<sup>20</sup> Quéchami rimájica najló marí que: "Marí írami aú huayurí huachó rijló, huala'acáloje  
Tupana puráca'alo lana'aquejami quemacá que penaje."

<sup>21</sup> Ñaque' caja Moisesmi chu huicha'ajica rírami Tupana ñacaré nacojé, rinane i'ímajica  
richu nacojé hua'ató.

<sup>22</sup> Marí que nala'ajica renami Moisesmi chu puráca'alomi ja'apiyá ne'emaqué huacajé. Piyuqueja nacaje nala'aque palani Tupánajlo pirajina írami aú. Huejápaja calé yuríquero uncá nala'aque palani rijló raú. Ñaque caja huajló ricá me'etení, nacaje Jesucristo la'acare huachaya i'ímacá. Rira i'ijnari raphú chiyá nenoca ricá huachaya huacajé, rila'acáloje huecá palani Tupánajlo raú penaje. Raú caja Tupana amaro iná chaje, pu'uhuaré iná la'acare liyá, iná manaicho iná la'acare liyá.

*Jesucristo taca'acá huachaya yucuna marí:*

<sup>23</sup> Moisesmi chu i'ímaqué huacajé, nala'á Tupana ñacaré i'ímacá. Pirajina írami aú nala'aque ricá palani Tupánajlo. Raú caja nala'aque palani rijló piyuque nacaje richu i'ímajicare. Caja nu'umichá ijlo riyucuna. Nacaje je'echú chu i'ímacare jenámija ri'ímacá. Je'echú chu ricá huani. Uncá meño'ojó pirajina írami la'alá huecá palani Tupánajlo, hue'emacáloje je'echú chu rijhua'até raú penaje.

<sup>24</sup> Tupana ñacaré chu ucapú i'imari nemá nacú: "Tupana pucuna huani ricá." Nacaje je'echú chu i'ímacare jenámija calé ri'ímacá. Uncá Jesucristo mujlúca'ala renami la'acanamí chojé i'ímacá. Ricá huani, je'echú chu i'ímacare, chojé calé rimujlúca'a. Re ricá Tupana hua'até me'etení, re riphurá huachaya rijhua'até.

<sup>25</sup> Eyá puráca'aloji lámá'atajeño ina'ugué chaya mujlúca'aqueño renami la'acanamí chojé, nemacare nacú, rapucuna huani que. Pajluhua peja pajluhua jarechí japi namujlúca'ajica richojé. Pirajina írami nacapi que namujlúca'ajica richojé. Uncá Jesucristo a'alá ricó Tupánajlo pulapé, ina'ugué nócaloje ricá pu'uhuaré nala'acare chaya penaje.

<sup>26</sup> Marí que ri'ímaquela rijló, ramajla chapú caje yajhué metuque huani. Eja'ahuá queño'ocó eyá maárejecha ramajla ricá. Uncá ñaque calé ri'ímacá rijló. Yehuicha eja'ahuá íphaca rená chojé, ritajnácaloje penaje huacajé, riphá majó i'ímacá. Riphá majó pajluhua peja caja penaje. Maare eja'ahuá chu ri'ímaqué huacajé, ra'á caja ricó pajluhua peja Tupánajlo, ina'ugué nócaloje ricá pu'uhuaré huala'acare chaya penaje. Marí que ritaca'acá huachaya i'ímacá, rica'acáloje huanaquiyá pu'uhuaré huala'acare raú penaje.

<sup>27</sup> Riphá rená chojé piyuqueja ina'ujejlo, nataca'acáloje penaje. Nataca'acá ejomi Tupana quemájeri nanacu mecajenaca necá. Palá la'ajeño ca'ajná, pu'uhuaré la'ajeño ca'ajná necá.

<sup>28</sup> Ñaque caja Jesucristo taca'acá pajluhua peja i'ímacá. Ra'á ricó Tupánajlo, ina'ugué nócaloje ricá íqui'iruna ina'ugué chaya penaje. Rica'acáloje huanaquiyá pu'uhuaré huala'acare raú penaje. Riphaje piño majó. Rihuacajé uncá ritaca'alaje piño pu'uhuaré ina'ugué la'acare chaya. Riphájica penaje ri'imatájica huecá capichácajo liyá, i'imajeño rihuátacana nacú.

## 10

<sup>1</sup> Moisesmi chu puráca'alomi ja'apiyá i'ímacaño la'aqueño nacaje, ina'ugué hue'epícaloje huejápaja nacaje i'ímajicare nacojé raú penaje. Ricá palani huani nacojé nahue'epí huejápaja raú. Renami queja ri'ímajica nala'ajicare. Hua'ajini, jarechí queja, nenójica pirajina, na'acáloje Tupánajlo necá, pu'uhuaré ina'ugué la'acare chaya penaje. Nanaquiyana huátaqueño Tupana hua'até i'ímacana. E'iyonaja uncá ne'emaqué palani Tupánajlo renami la'acana aú.

<sup>2</sup> Rica'aquela pu'uhuaré nala'acare naliyá, nayurijla naliyó pirajina nócana nachaya. E'iyonaja uncá rica'alá naliyá pu'uhuaré nala'acare raú. Aú calé caja queja nayuró pu'uhuaré la'ajeño.

<sup>3</sup> Nenoque pirajina nachaya jarechí queja, napechu capicháñaca piyá pu'uhuaré nala'acare.

<sup>4</sup> E'iyonaja calé uncá meño'ojó jema piraicana írami, cahuyá piraicana írami caje, ca'alá ina'ugué liyá pu'uhuaré nala'acare.

<sup>5</sup> Jesucristoja calé ca'arí iná liyá pu'uhuaré iná la'acare. Ñaquele Jesucristo i'ijnacá marí eja'ahuá chojé yámona rimá marí que Tupánajlo:

Chuhua caja uncá pihuátalaje ina'ugué noca pirajina pu'uhuaré nala'acare chaya. Uncá caja pihuátalaje na'acá pijló nacaje.

Ñaquele picá la'ajeri nojló nunapona, nu'umacáloje ina'ugué penaje.

<sup>6</sup> Uncá caja paala pijló pirajina cára'atacana.

Uncá caja paala pijló pirajina nócana pu'uhuaré ina'ugué la'acare chaya.

<sup>7</sup> Ñaquele numá pijló: Maare nucá, Tupana, nula'acáloje pihuátaca que penaje.

No'ó nocó pijló, nula'acáloje pipuráca'alo lana'aquejami quemacá nunacu que penaje, que rimacá rijló ri'ijnacá marí eja'ahuá chojé yámona.

<sup>8</sup> Pamineco rimá rijló: "Uncá paala pijló pirajina cára'atacana. Uncá caja paala pijló pirajina nócana pu'uhuaré ina'ugué la'acare chaya." Marí que Moisesmi chu puráca'alomi quemacá

nanacu, nala'acáloje ricá penaje. E'iyonaja Jesucristo quemari rijló: “Uncá paala ñaque la'acana pijló,” que.

<sup>9</sup> Ejomi rimá piño: “Maare nucá, Tupana, nula'acáloje pihuataca que penaje.” Aú iná hue'epí Tupana tajátaca naliyá renami la'acana, ra'acáloje Jesucristo rapumí chojé penaje, ricá taca'acáloje ina'uqué chaya penaje.

<sup>10</sup> Jesucristo la'acale Tupana huátaca que, Tupana ca'arí hualiyá pu'uhuaré huala'acare. Ricoja ra'acá ricó Tupánajlo, ritaca'acáloje huachaya penaje. Marí caje aú uncá ajopana ina'uqué chaya taca'acana i'imalaje piño. Ricá taca'arí pajluhua peja i'imacá. Piyuque ina'uqué la'acare pu'uhuaré chaya ritaca'á i'imacá.

<sup>11</sup> Ajopana puráca'aloji lamá'atajeño la'aqueño nasápaca'ala hue'echú ca'alá queja. Pulapeno que nenójica pirajina naquiyana pu'uhuaré ina'uqué la'acare chaya. E'iyonaja marí que la'acana aú uncá naca'alá nanaquiyá pu'uhuaré nala'acare.

<sup>12</sup> Eyá Jesucristo, ricá a'arí ricó Tupánajlo, nenócaloje ricá ina'uqué chaya pajluhua peja penaje. Piyuqueja pu'uhuaré ina'uqué la'acare chaya, ritaca'á pajluhua peja i'imacá. Marí que rila'acá, ejomi ripa'ó piño rapumí chuhá je'echú chojé, ri'imacáloje re Tupana ahua'á penaje. Rijhua'até rihuacára'a rijhua'atéjena me'etení.

<sup>13</sup> Re ricá je'echú chu me'etení. Tupana chá'atajica chapú péchuruna rinacu ejená ri'imajé rijhua'até.

<sup>14</sup> Pu'uhuaré ina'uqué la'acare chaya ritaca'á pajluhua peja i'imacá. Marí que rila'acá aú ina'uqué i'imaño lamára'ataquejanami que Tupánajlo. Necá, rica'acárena liyá pu'uhuaré nala'acare, i'imajeño palani huani Tupánajlo hua'ajini huani.

<sup>15</sup> Tupana Pechu quemari caja rinacu, iná hue'epícaloje riyucuna raú penaje. Marí que rimacá pamineco rinacu i'imacá:

<sup>16</sup> Nupuráca'alo nuyurjicare aquijñojo i'imajícáñojo, i'imajeri najló marí que:

Ri'imajé napechu nacuja, nala'acáloje nuhuátaca que raú penaje.

Napechu huáque'ehue queja ri'imajica, nema'acáloje no'opiyá raú penaje.

<sup>17</sup> Ejomi rimá piño:

Nomajo nachaje pu'uhuaré nala'acare, namanaicho nala'acare liyá, que rimacá huanacu.

<sup>18</sup> Tupana amaro ina'uqué chaje pu'uhuaré nala'acare liyá, uncá na penaje calé nachaya taca'acana i'imajé piño.

*Hue'emacáloje Tupana palamane penaje yucuna marí:*

<sup>19</sup> Nojena, Jesucristo taca'acale huachaya, Tupana quemari huanacu, hue'ejnacáloje je'echú chojé penaje, hue'emacáloje re rijhua'até penaje. Rapucuna huani chu ricá. Re caja hue'emajé rijhua'até.

<sup>20</sup> Júpimi que Tupana itaca ina'uqué apu, ne'ejnacá piyá rahua'ajé. Hue'ejnacáloje Tupana ejo Jesucristo palamane aú penaje, ritaca'á huachaya i'imacá.

<sup>21</sup> Puráca'aloji lamá'atajери huachaya Tupana hua'até, Jesucristo. Tupana le'ejena ina'uqué amájeri caja ricá.

<sup>22</sup> Ñaquele marí que la'acana huajló palani: Huapechu aú hue'ejnajé Tupana ahua'ajé me'etení, rilamára'atacale huecá rijló. Uncá caja rimalaje huanacu: “Pu'uhuaré la'ajeño necá” que. Caja rica'á hualiyá pu'uhuaré huala'acare. Ra'á caja huajló Ripechu. Ñaquele caphí huapechu rahua'á i'imacana nacú.

<sup>23</sup> Huácho'oniyo caphí i'imacana richojé chiyá. Caja Tupana quemari huanacu, ri'imatácaloje huecá capicháajo liyá penaje, hue'emacáloje rijhua'até raú penaje. Caphí caja huapechu Tupana chojé, rila'acale huajló nacaje rimacá que.

<sup>24</sup> Ñaquele marí que la'acana nacú hue'emajé chuhuaca: Hua'ajica huanacójo pecohuácaca, palá huala'acáloje pecohuácaca raú penaje. Huala'ajé caja penacáchaca, huahuátacaloje íqui'ija pecohuácaca raú penaje. Ñaquele caja huahuátacaloje ajopana penaje huala'ajé ñaque.

<sup>25</sup> Iyuríniya caja pajhua'atéchaca jahuacácano, jema'acáloje Tupana puráca'alo penaje. Caja inaquiyana yuriño ijhua'até jahuacácano. Marí uncá paala. Ila'á papéchuhuaca caphí. Yehuicha Jesucristo pa'ajico piño majó. Ñaquele jahuacó pajhua'atéchaca riyucuna jema'ajé.

<sup>26</sup> Jesucristo taca'arí huachaya, hue'emacáloje pu'uhuaré huala'acare liyá penaje. Ripalamane aú hue'emacó riliyá. Apú ca'ajná jema'arí riyucuna. Rihue'epí caja riyucuna nacojé palá. E'iyonaja calé uncá ra'alá rinacójo ricá. Raú rila'á pu'uhuaré, rimanaicho. Pu'uhuaré rila'acare rijluhua hua'ateja ri'imajé. Uncá Tupana amáajo richaje, uncá pachá rihuátala rijluhua nacaje Jesucristo la'acare richaya. Marí caje pachá Tupana huajájeri ricá, uncale apú i'imalá ri'imatájeri penaje. Marí que ricá najló uncá a'alaño nanacójo ripuráca'alo.

<sup>27</sup> Quero'ocajo nacú ne'emajé, Tupana huajáicale necá chapú caje huani aú. Quera'atani ima'aní huani aú rihuajaje necá. Marí caje aú ricapichátaje piyuque chapú péchuruna rinacu.

<sup>28</sup> Moisesmi chu i'imaqué huacajé nenoque pu'uhuaré la'ajeño i'imajica. Iyamá, hueji quele ca'ajná amáqueño nala'ajica pu'uhuaré. Napuráca'alo aú ja nenoque necá. Uncá caja nahue'epique namu'ují.

<sup>29</sup> Marí que nala'ajica pu'uhuaré la'ajeño júpimi i'imajica. Eyá chuhua, richaje Tupana la'ajica chapú necá, la'año majopéjari queja Jesucristo. Ricá taca'arí huachaya a'ahuaná apiyácanami nacú i'ímacá. Re rira aco'oró raphú chiyá. Raú Tupana ca'arí hualiyá pu'uhuaré huala'acare, hue'emacáloje lamára'ataquejanami que rijló raú penaje. Raú caja hue'emá ripuráca'alo ja'apiyá. Chapú huani ri'imajica najló, la'año nacátajohua queja nacaje Jesucristo la'acare huajló i'ímacá. Marí caje aú Tupana Pechu yúcha'aro nachá, uncale nahuátala rila'acare nachaya ja'apiyá i'ímacana. Marí que la'ajicaño amájeño cajrú huani Tupana huajájica necá yajhué.

<sup>30</sup> Caja huahue'epí méqueca Tupana quemacá i'ímacá. Rimá marí que huanacu: "Nucá huajájeri ina'ugué, pu'uhuaré nala'acare chona. Nucá caja pura'ajero nule'ejé jacumi nacú," que rimacá i'ímacá.

Rimá piño: "Nucá caja quemájeri nule'ejena ina'ugué nacú méqueca nojló nacaje nala'acare i'ímacá," que rimacá i'ímacá.

<sup>31</sup> Cajmuni Tupana. Piyuque nacaje la'ajeri caja ricá. Chapú huani ri'imajica ri-huajájecarenajlo.

<sup>32</sup> Ihue'epí méqueca ri'ímacá ijló iqueño'oqué Jesucristo ja'apiyá jema'acana huacajé. Nala'á icá chapú rijimaje. E'iyonaja calé uncá jácho'olo ra'apiyá jema'acana chiyá i'ímacá.

<sup>33</sup> Najña'aque icá ajopana ina'ugué e'iyajé, napura'acóloje inacu pu'uhuaré najimaje penaje. Najimaje caja nala'aque icá chapú. Ajopana, ñaque caja nala'ajicarena chapú, nacú ihue'epique camu'ují najhua'até.

<sup>34</sup> Naca'aque Jesucristo ja'apiyá jema'ajeño naquiyana ina'ugué huajáquelana chojé, Jesucristo ja'apiyá jema'ajeño ne'emacale. Raú ihue'epique camu'ují nanacu. Nacupaque inane, majopeja namajáca'atajica ricá. Uncá ijña'aque inacojé chapú ricá, ihue'epícale nacaje i'ímacare ijló je'echú chu, palani huani ricá. Uncá tajnácajo penaje calé ricá. Aú ijña'á chapú nala'acare icá panacu.

<sup>35</sup> Chuhua numá ijló: Jácho'oniyo caphí Tupana chojé i'ímacana chiyá. I'imá caphija Tupana chojé i'ímacana nacú, Tupana la'acáloje icá palá huani raú penaje.

<sup>36</sup> I'imá caja peyajhuérna Tupana huátaca que la'acana nacú. Úncá nacaje rimacare nacú yuréjero ijló.

<sup>37</sup> Marí que Tupana puráca'alo lana'aquejami quemacá Jesucristo nacú:

Huejápaja yuriro huatucumá, riphácaloje majó penaje.

Uncá rimalá'atalaje ricó cajrú huani majó i'ímacana piyá.

<sup>38</sup> Nule'ejena ina'ugué, palá la'ajeño, necá i'ímajeño matajnaco je'echú chu. Caphí napechu i'ímacale Jesucristo chojé ne'emajé nujhua'até je'echú chu.

Uncá huani paala nupechu i'ímajica nanacu, jácho'oño Jesucristo ja'apiyá i'ímacana chiyá.

<sup>39</sup> Uncá richiyá jácho'ojeño calé huecá. Richiyá jácho'ojeño capichájeño. Eyá huecá, caphí huapechu i'ímacale richojé, hue'emajó capichácajo liyá.

## 11

### *Caphí péchuruna Tupana chojé yucuna marí:*

<sup>1</sup> Iná pechu i'ímacachu caphí Tupana chojé, iná hue'epí caja queja nacaje i'ímajica inajlo rimacá rinacu queja. Uncá iná amálaré ricá. E'iyonaja iná hue'epí re ricá.

<sup>2-3</sup> Huahue'epí Tupana queño'ótaca eja'ahuá ripuráca'alo aú, nacaje richu i'ímacare hua'ató. Caphí huapechu i'ímacá aú Tupana chojé, huahue'epí rimacá que rinacuhuá queja ricá. Rila'á nacaje huamácare me'etení. Rila'á eja'ahuá, nacaje richu i'ímacare hua'ató. Piyuque nacaje la'ajeri ricá. Nacaje uncá iná amálaré hua'ató rila'á caja. Palá Tupana pechu i'ímacá júpimi i'ímacaño naquiyana nacú, napechu i'ímacale caphí richojé.

<sup>4</sup> Abelmi chu pechu i'ímaqueri caphí Tupana chojé i'ímajica. Aú calé ra'á Tupánajlo nacaje, Tupana huátacare caje. Nacaje ra'acare rijló chá'atari nacaje re'ehuemi chu a'acare rijló. Palani Tupánajlo ri'ímacá. Aú calé Tupana quemari Abelmi chu nacú: "Palani nojló ricá" que. Ritaca'acá ejomi ne'emá pajlocaca palá rila'acare yucuna i'ímacá.

<sup>5</sup> Apú i'imari. Ríi i'imari Enoc. Caphí caja ripechu i'ímajica Tupana chojé. Aú uncá ritaca'alá. Tupana huá'ari ri'ímacá je'echú chojé. Quéchami uncá na iphátala ricá, Tupana huá'acale ri'ímacá. Tupana puráca'alo lana'aquejami quemari rinacu marí que: "Uncá chiyó Tupana huá'a ri'ímacá, Tupana huátaca que rila'ajica," que rimacá rinacu.

<sup>6</sup> Uncá meño'ojó iná la'alá Tupana huátaca que, uncachu iná pechu i'ímalá caphí richojé. Iná huátacachu Tupana ja'apiyá i'ímacana, iná pechu i'ímá marí que rinacu: "Re Tupana. Palá rila'acá iná, íqui'í iná huátacachu ra'apiyá jema'acana."

<sup>7</sup> Ñaque caja Noémi chu pechu i'imajica caphí Tupana chojé. Ñaquele ra'aque rinacojó Tupana quemacá rijló que. Rimá rijló nacaje nacú, uncá chiyó ri'imá. Uncá caja ramácana i'imalá rihuacajé. E'iyonaja calé rema'á ra'apiyá. Eyá ajopana, uncá jema'alaño ra'apiyá rijhua'até, capichaño i'imagá. Noémi chuja calé jema'arí Tupana ja'apiyá. Ñaquele rila'á huapuru ñópo'ojlo huani i'imagá. Richojé ricá, riyajalo, riyani, queleja i'imaño capichácajo liyá. Eyá ajopana, uncá jema'alaño Tupana ja'apiyá, capichaño. Tupana quemari Noémi chu nacú: "Palani nojló ricá." Marí que rimacá rinacu, ripechu i'imagale richojé caphí.

<sup>8</sup> Ñaque caja ri'imajica Abrahami chujlo i'imajica. Tupana quemari marí que rijló i'imagá: Chuhua no'ojica pijló apú te'erí, ri'imagáloje pite'erehua penaje. Pácho'o chuhua pite'eré eyá, pi'ijnacáloje te'erí no'ojicare pijló ejo penaje, que rimacá rijló.

Caphí Abrahami chu pechu i'imajica Tupana chojé. Aú calé rema'aque ra'apiyá. Ñaquele rácho'o rite'eré eyá i'imagá. Ri'ijná menáhuaca apú te'erí Tupana quemacare nacú rijló ejo.

<sup>9</sup> E caja riphá rejo. Ilé te'erí, Tupana quemacare nacú rijló i'imagá, ejo riphá, riyurícoloje rijló rite'erehua penaje, ri'imagáloje re penaje. Caphí ripechu i'imagale Tupana chojé, riquéño'ó re i'imagana. Ajopana te'eré eyaje queja ri'imagá re rinacu pamineco. A'arumacaji me'ejñapini riñacaré i'imagué. Ñaque caja riyanimínami chuna, Isaacmi chu, Jacobmi chu, quele i'imagá a'arumacaji me'ejñapini ja'apija caja. Ricaja calé i'imaqueri nañacaré. Najló caja Tupana quemari ilé te'erí nacú, riyurícoloje najló penaje.

<sup>10</sup> Uncá Abrahami chu la'alá riñacaró huani rehuá, rihue'epícale ritucumó je'echú chu i'imagana nacú. Pajimila Tupana la'acare nacú ripechu i'imagué. Uncá tajnácajo penaje calé ricá. Rejo rihuata i'imagana i'imagá.

<sup>11</sup> Caphí caja riyajalo, Sárami cholo, pechu i'imajica Tupana chojé. Aú ru'urí moto'orí i'imagá. Phíyu'uqueru huani ru'umacá. E'iyonaja ru'urí moto'orí i'imagá. Caja ro'opá inaya caje chiyá i'imagá. E'iyonaja rupechu i'imagué caphí Tupana chojé, ru'urí i'imagáloje rimacá rojló que penaje.

<sup>12</sup> Phíyu'uque huani caja ruyajná Abrahami chu i'imagá rihuacajé. Yehuicha riphaca ritaca'acá jená chojé i'imagá. Ejéchami ri'irí i'imagá rujhua'até. Ricá tahuá'aro, rilaquénami moto'ocáloje penaje. Ehuá íqui'ica ne'emacá. Ihuijina que caje íqui'ica necá. Que'epé que íqui'ica necá me'etení. Uncá meño'ojó iná lapa'atálarena necá.

<sup>13</sup> Caja nu'umá ijlo caphí péchuruna Tupana chojé yucuna. Caphí napechu i'imajica Tupana chojé nataka'ajica ejená. E'iyonaja uncá nacaje yurilo najló Tupana quemacá najló que. Nahue'epí aquijñajo ri'imajica najló rimacare nacú najló. Ñaquele nahuata ricá. Nemájica nanacuhuá: "Ajopana te'eré eyájena huecá" que. Marí que nemájica nanacuhuá, marí eja'ahuá chu ne'emajica quetana.

<sup>14</sup> Iná hue'epí ají que quemacaño huátaño najluhua apú te'erí nañacajelo penaje.

<sup>15</sup> Uncá napechu i'imalá nate'eré nacú, nácho'ocaró eyá. Napechu i'imaquela rinacu, napa'ojla richaya.

<sup>16</sup> Napechu i'imari je'echú chu i'imagana nacú, richá'atacale ajopana, ajopana te'eré que. "Huete'eré" que napechu i'imagué rinacu. Ñaquele palá Tupana pechu i'imajica nanacu. Rimacué nanacu: "Nule'ejena necá. Nochojé caphí péchuruna i'imagáloje necá." Uncá caja rapáña'alo na'apí marí que quemacana nacú. Marí que ri'imagale najló, rila'á najló pajimila napé, ne'emacáloje rejo penaje.

<sup>17</sup> Caphí Abrahami chu pechu i'imagale Tupana chojé, rinojla ri'irí i'imagá, ra'acáloje ricá Tupánajlo penaje. Tupana huacára'ari rinoca ri'irí rijló penaje, rihue'epícaloje méqueca ripechu i'imagá ra'apiyá jema'acana nacú penaje. Uncá chiyó ri'irí moto'ó, Tupana quemari Abrahami chujlo rinacu marí que i'imagá: "Pi'irí i'imajeri." Ricá rinojla Tupánajlo. <sup>18</sup> Tupana quemari rijló marí que i'imagá: "Pi'irí, Isaac aú, pilaquénami i'imajeño."

<sup>19</sup> Marí que rimacá rijló i'imagá. E'iyonaja calé rinojla ricá, ripechu i'imagale: "Nonójica ee ricá, Tupana macápo'ojeri piño ricá." Caja rinojla ricá. E'iyonaja Tupana jahuíyo'ori richá, rinoca piyá ricá. Raú ri'imaó. Ra'á rara'apajlo ricá, ri'imagáloje rijhua'até penaje.

<sup>20</sup> Eyá ñaque caja Isaacmi chu pechu i'imajica Tupana chojé caphí. Riyanimínami i'imaño iyamá, Jacobmi chu, Esaúmi chu, quele. Caphí ripechu i'imagale Tupana chojé, rimá nanacu Tupánajlo, rila'acáloje necá palá raú penaje, ne'emacáloje reyá a'ajná ño'ojó palá penaje.

<sup>21</sup> Caphí Jacobmi chu pechu i'imagale Tupana chojé, rimá ri'irimi chu, Josemi chu, yaní nacú, Tupana la'acáloje necá palá penaje. Iyamá achiñana José yaní i'imagá. Ritaca'acá yámona rimá nanacu pajluhuano, pajluhuano que, Tupana la'acáloje necá palá penaje. Ricutihuafe lupucuje rijláma'aco ripura'acó Tupana hua'até. Pu'ují ripechu aú ripura'acó Tupana hua'até nanacu.

<sup>22</sup> Ñaque caja Josemi chu pechu i'imajica caphí Tupana chojé. Caphí ripechu i'imagale Tupana chojé, rihue'epí rejena jácho'ojico Egipto te'eré eyá. Ñaquele ritaca'acá yámona

ri'imá najló riyucuna. Rimá caja najló: "Nutaca'ajica ejomi, jupichami icá jácho'ojeño maáreya, ipa'acóloje huale'ejemi te'erí nacojé penaje. Eco ijña'á nophínami ijhua'ató jácho'ojico maáreya huacajé, isa'acáloje nophínami huach'i'inami chuna te'eré nacú penaje," que rimacá najló i'imacá.

<sup>23</sup> Ñaqué caja Moisesmi chi chi'inami chuna pechu i'imajica caphí Tupana chojé. Caphí napechu i'imacale Tupana chojé, nata'á ne'erí surárana liyá, queráco'ope ri'imaqué huacajé. Hueji queta queri quetana ri'imá me'echú caje chu naliyá. Ne'emacana huacára'ari Israelmi chu laquénami huajé moto'ocaño nayani nótacana. Achiñánaja calé rihuacára'a nótacana ne'iyayá. Uncá Moisesmi chu chi'inami chuna quero'oló raú i'imacá. Nata'á ricá naliyá, nenoca piyá ricá, namácale palani ne'erí amaco.

<sup>24</sup> Uncá nenola ri'imacá. Ne'emacana itu lamára'ayo ri'imacá. Riñapaca ejéchami uncá rihuátala rinacuhúa quemacana: "Hue'emacana itu i'irí nucá" que.

<sup>25</sup> Caphí ripechu i'imacale Tupana chojé, rihuata Tupana le'ejena ina'uqué hua'até i'imacana. Pu'ují iná pechu i'imacá mequetánaja iná la'acá aú iná huátaca que pu'uhuaré, iná manaicho. Uncá rihuátala ripechu i'imacá pu'ují ilé caje hua'até mequetánaja. Richaje rihuátaca chapú caje yajhué amácana Tupana le'ejena ina'uqué hua'até.

<sup>26</sup> Ripechu i'imá: "Palani chapú caje yajhué amácana, nupechu i'imacale caphí Hue'emátajeri chojé. Ricá, Tupana huacára'ajicare majó, chojé nupechu i'imá caphí. Piyuque nacaje cahuemini huani Egipto e i'imacare, chaje huani palaca ricá," que ripechu ri'imacá rijluhua. Caja riyurí riyámojo nacaje eja'ahuá chu i'imacá, rihue'epícale nacaje yurico rijló je'echú chu.

<sup>27</sup> Caphí Moisesmi chu pechu i'imacale Tupana chojé, rácho'o Egipto te'eré eyá. Uncá caja riquero'oló ne'emacana yuchá piyá. Uncá caja rácho'olo caphí ripéchuhua la'acana chiyá. Tupana, uncá iná amálare, nacuja ripechu i'imaqué.

<sup>28</sup> Caphí ripechu i'imajícale Tupana chojé, rila'ajica Tupana huacára'ajica que. Reyá Tupana quemari rijló, rihuacára'acaloje Israelmi chu laquénami noca ohuéjana i'irí, nahuicha'acáloje rírami pají numaná paná nacojé penaje. Raú uncá Tupana hua'atéjeri, je'echú chiyaje, capichátala Israelmi chu laquénami, ricapichátaca Egipto eyájena naquiyana que.

<sup>29</sup> Israelmi chu laquénami ñaño Egipto te'eré eyá i'imacá. E'iyonaja juni jalomi itari napu. Caphí napechu i'imacale Tupana chojé, nacuhua'a juni jalomi queránli te'erí nacuhúa. Tupana mata'arí najló juni ife'epú que. Richuhúa nacuhúa'a ají que pa'anajo pitá. Eyá Egipto eyájena jecho'ótaño ne'emacá nápumi chu richuhuaaja caja. Ejéchami juni pa'acó rapumí chuhúa nachá i'imacá. Rejeja nacapichó piyuqueja i'imacá.

<sup>30</sup> Apa'amá piño. Israelmi chu laquénami i'ijñaño Tupana puráca'alo aú pajimila Jericó ejo. Rihuacára'a necá rejo, nacapichátacaloje necá penaje. Jipa naquiyana la'acanamí i'imari corral. Ricá chipúca'ari tujlá que pajimila nacú, najmeñátacaloje richojé penaje. Israelmi chu laquénami pechu i'imacale Tupana chojé caphí, corral cojno'otari najló i'imacá. Pamineco pitúca'aqueja nachipúca'aca rinacojé hue'echú ca'alá queja. Iyamá kuhúa'ata que cala quetana nachipúca'aca rinacu. Ejéchami corral cojno'otaca najló. Aú namujlúca'a pajimila e'iyajé napinana capichátaje.

<sup>31</sup> Ricaja caja pajimila e ñuju'uqueru inanaru i'imayo. Ruí i'imari Rahab. Rucá a'atayo rujhua'ató pajimila quejila'ajeño i'imacá. Rupechu i'imacale caphí Tupana chojé, uncá nacapichátala rucá ajopana hua'até i'imacá. Uncá jema'alaño Tupana ja'apiyá ne'emacá.

<sup>32</sup> Ajopana piño, ñaqué caja caphí péchuruna Tupana chojé ne'emacá. Nanaquiyana i'imaño: Gedeónmi chu, Baracmi chu, Sansónmi chu, Jeftemi chu, Davidmi chu, Samuelmi chu, Tupana puráca'alo ja'apátajeñomi chuna, quele nanaquiyana i'imacá. Uncá hue'echú ca'alá i'imalá nojló me'etení, nu'umacáloje nayucuna penaje.

<sup>33</sup> Nanaquiyana chá'ataño ajopana te'eré eruna nócacajo aú. Nahuacára'ajeño naquiyana huacára'año nale'ejena ina'uqué palá, napechu i'imacale caphí Tupana chojé. Ajopánajlo Tupana a'arí nacaje rimacare nacú najló i'imacá, napechu i'imacale caphí richojé. Ajopana piño naca'á yáhuina e'iyajé, yáhuina nócaloje necá penaje. Uncá yáhuina nola ne'emacá, Tupana a'acale nañaté.

<sup>34</sup> Naca'á caja nanaquiyana quera'atani chojé. Uncá meque nala'aló raú. Napechu i'imacale caphí Tupana chojé, ra'á nañaté i'imacá. Nanaquiyana caja i'imaño natami caje hua'até i'imacá. Tupana tejmo'otari ne'emacá. Nanaquiyana caja i'imaño chá'atajeño huani nócacajo aú. Cajrú na'apaca napinana nacú naliyá raú i'imacá. Marí que nala'acá, napechu i'imacale caphí Tupana chojé, ra'acáloje nañaté penaje.

<sup>35</sup> Tupana macápo'otari inaana naquiyánajlo nayani, napechu i'imacale richojé caphí. Eyá caphí Tupana chojé péchuruna naquiyana taca'año, chapú huani napinana la'acale necá. Nema'acale Tupana ja'apiyá, nala'á necá chapú huani i'imacá. E'iyonaja uncá nácho'olo



richiyá raú, nahuátacale Tupana macápo'otaca necá, ne'emacáloje palá rijhua'até je'echú chu penaje.

<sup>36</sup> Nala'á caja ne'echajno nanaquiyana. Ajopana naña'atá. Ajopana naca'á ina'uque huajáquelana chojé. Nepo'otá necá curete aú.

<sup>37</sup> Tupana ja'apiyá jema'ajeño naquiyana caja nenó jipa aú. Nanaquiyana namata'á pe'yohuá a'ahuaná irajona aú. Nanaquiyana caja nenó sajalu caje aú. Nanaquiyana caja chira'aqueño majopeja. Ohuéjana ímami, cahuyá pircana caje ímami i'imaqueri na'arumacá. Ajopana piño la'aqueño camu'ují nacaje nacú. Chapú nala'ajica necá. E'iyonaja uncá nayurique Tupana ja'apiyá jema'acana raú.

<sup>38</sup> Palá la'acaño huani ne'emacá. Uncá paala eja'ahuá palá la'acañojlo. Eyá ajopana eja'ahuá chu i'imacaño, pu'uhuaré la'ajeño ne'emacá. Chapú nala'ajica palá la'acaño. Ñaquele nachira'acó mate'eréruna queja rehuá. Pu'uteni meñaru chuhua, yenuri e'yohuá nachira'acó. Ulahuija i'imaqueri nañacaré. Ulahuí jipa aphú i'imaqueri caja nañacaré. Marí que ne'emajica, nala'ajícale necá chapú.

<sup>39</sup> Necá, numacárena nacú, i'imaño caphí péchuruna Tupana chojé. Palá Tupana pechu i'amacá nanacu. Uncá Tupana a'alá najló piyuque nacaje rimacá nanacu que.

<sup>40</sup> Rihuata nahuátaca ejo'ocaja nacaje najluhua, ripechu nacú ri'imacale huala'acana palá. Huecá hua'ató rihuata nala'acana palá huani, ne'emacáloje huajhua'até penaje. Pajñacani hue'emacáloje palá péchuruna hua'até penaje.

## 12

### *Huahue'epícaloje Jesucristo huatucumó penaje yucuna marí:*

<sup>1</sup> Chuhua numájica ijlo apa'amá yucu nacú. Nahuata ca'ajná amácana mecajeca chá'atajica necá jecho'ocajo aú. Rená na'acare najló ejená necho'ó. Necho'ocó yámona naca'á na'arumacá cachini nanaquiyó, necho'ocóloje palá maramarani na'arumacá hua'até penaje. Uncá meño'ojó necho'oló palá cachini na'arumacá hua'até. Ñaqueé caja huajló ricá. Re ca'ajná nacaje huala'acare, uncá paala ricá. Rinacojé uncá meño'ojó huala'alá palá Tupana huátaca que. Ñaquele iná ca'á iná naquiyó piyuque pu'uhuaré iná la'acare, iná la'acáloje piyuque nacaje palá Tupana huátaca que penaje. Cajrú huapiyá i'imacáñomi chuna la'ajica que caja huala'ajica palá. Caphí péchuruna Tupana chojé ne'emajica.

<sup>2</sup> Jesucristoja calé huahue'epeje huatucumó. Huapiyá ricá la'arí piyuqueja nacaje Tupana huátaca que, ripechu i'imacale caphí richojé. Ripalamane aú huapechu i'imari caja caphí Tupana chojé. Ripalamane caja huapechu i'imajica caphí richojé caja penaje ejená. Nenó ri'imacá a'ahuaná apiyácanami nacojé i'amacá. Uncá ina'uquelarunaja calé nenó ilé que. E'iyonaja calé uncá ra'alá rinacojó ri'imacá, rihue'epícale pu'ují ripechu i'imajica rejomi. Chuhua Tupana ahua'á ricá; ajopana chaje ricá; Tupana hua'até huacára'ajeri caja ricá, Jesucristo.

<sup>3</sup> I'ijnatá ipéchuhua méqueca ri'imacá rijló. Chapú huani chapú la'ajeño pechu i'imacá rinacu. Aú cajrú ramaca chapú caje yajhué. Ñaquele numá ijlo: Ila'aniyo ujhuí ra'apiyá i'imacana nacú. Jácho'onioy caja ra'apiyá jema'acana chiyá.

<sup>4</sup> Ica huátano piyuqueja ina'uqueé i'amacá palá la'acana nacú. Ihuata caja nayurica pu'uhuaré nala'acare nanaquiyó. Marí que ri'imacáloje najló penaje, i'imá najló Tupana yucuna. Uncá jo'ó ajopana nola icá rijimaje.

<sup>5</sup> Tupana yaní icá. Ripuráca'alo lana'aquejami quemari huanacu: "Riyani necá" que. Palá rila'acá huecá ripuráca'alo aú. Ipechu capicháñaniya rimacare nacú. Marí que rimacá huanacu apujlo, apujlo que:

Nu'urí, Tupana huajájica ee picá, piyurí pichó rijló.

Apala rimaje pijló nacaje pila'acare nacú: "Uncá paala ricá" que.

Pila'aniya picó ujhuí raú.

<sup>6</sup> Tupana huajari necá, íqui'ija rihuátacarena. Riyani ne'emacale, rihuata namaca chapú caje yajhué, nácho'ocoloje richiyá palá péchuruna penaje.

<sup>7</sup> Ñaquele ijña'á chapú caje panacu. Iná jara'apá huajari iná, iná jácho'ocoloje palá rijló raú penaje. Iná jara'apá huajaca iná, que caja Tupana huajaca iná chapú caje yajhué amácana aú, reyá a'ajná ño'ojó iná i'imacáloje palá penaje. Amaca aú chapú caje yajhué, ihue'epí riyánica icá. Uncá na calé i'imari majopeja, uncá rara'apá huajálare. Eyá piyuqueja huecá, huara'apá huajácarena huecá.

<sup>8</sup> Tupana huajari caja riyani. Uncachu Tupana huajala icá, uncá riyani huani calé icá rijló. Apú yaní que caja icá, rujlapu yaní queja icá rijló.

<sup>9</sup> Iná jara'apá huajari iná rijluhua. Raú iná iphá ra'apí. Richaje huani palaca Tupana la'acá iná, rihuajaca iná ejomi iná i'imá palá la'ajeri rijló. Marí que ri'imacale, iyurí ichó jara'apá Tupánajlo, jácho'ocoloje palá la'acaño rijló raú penaje.

<sup>10</sup> Iná jara'apá huajari iná mequetánaja, iná jácho'ocoloje palá iná jara'apajlo penaje. Eyá Tupana huajari huecá huajluhuaje penaje, hue'emacáloje ricá que caja raú penaje. Uncá chapú la'ajeri calé ricá.

<sup>11</sup> Rihuajaca huecá quetánaja calé huapechu la'acó camu'ují. Uncá huahuátala rihuajaca huecá. Reyá a'ajná ño'ojó caja huahue'epí palá la'acana cajrú huatucumó. Palá huapechu i'ímacá raú.

*Iná jácho'oco piyá Tupana ja'apiyá i'ímacana chiyá yucuna mari:*

<sup>12</sup> Ipechu i'ímá caphí. Jácho'o caja ujhuí caje chiyá.

<sup>13</sup> I'ijnatá caja ipéchuha palani puráca'aloji nacú, jácho'oco piyá richiyá, i'ímacáloje palá la'ajeño raú penaje. Raú caja a'ajé inaquiayana ñaté. Uncá hue'epílaño palá Tupana huátaca que la'acana nacú, ñaté a'ajé raú. Raú nala'ajé palá; uncá nala'alaje pu'uhuaré.

<sup>14</sup> Ila'á mahuó icó, i'ímacáloje palá piyuqueja ina'uqué hua'até penaje. Ila'á caja mahuó icó, ila'acá piyá pu'uhuaré, imanaicho, i'ímacáloje palá la'acaño penaje. Uncá na i'ímalaje Tupana hua'até, la'arí pu'uhuaré, rimanaicho.

<sup>15</sup> A'á inacojó pecohuácaca, inaquiayana jácho'oco piyá Tupana ja'apiyá i'ímacana chiyá. A'á caja inacojó pecohuácaca, inaquiayana pechu i'ímacá piyá chapú Tupana nacú. Chapú napechu i'ímalaje ee Tupana nacú, napichátaje cajrú inaquiayana pechu Tupana liyá.

<sup>16</sup> Achiñana, inaana, quélejo numá: Ila'aniya imanaicho pajhua'atéchaca. Uncá huani paala ricá. Ila'aniya caja Tupana yucuna majopéjari queja. Marí que caja Esaúmi chu la'acá i'ímacá. Nacaje rara'apami chu yuricare ja'apiyá riyurícojla, nape'é huani ri'ímacale. E'iyonaja quehuí me'epeji i'ímacá rijló huacajé re'ehué quemari rijló: "No'ojé pijló a'ajnejí, piyurijica ee nucá nacaje ja'apiyá paphumi chojé penaje." "Je," que rimacá rijló i'ímacá. Aú rijmeremi yuriro ra'apiyá.

<sup>17</sup> Quéchami piño rihuátaca nacaje yurico rijló rara'apá quemacare nacú. E'iyonaja rara'apá itari rapu rijló. Uncá meño'ojó rapiyácala nacaje rimacare nacú re'ehuejlo. Chapú rihuó i'ímacá richó raú. Iyacaje hua'até rihuata rapiyácacana. E'iyonaja calé uncá rapiyácacana i'ímalá rijló.

Ñaquele numá ijlo, ila'acá piyá majopéjari queja nacaje Tupana yuricare ijlo.

<sup>18</sup> Uncá ri'ímalá ijlo ri'ímacare Israelmi chu laquénamijlo júpimi que. Tupana a'arí Moisesmi chujlo ripuráca'alo, ipuré i'íhuata nacú ri'ímaqué huacajé. Rihuacajé cajrú quera'atani lucúna'aco ipuré naquiayá i'ímacá. Calájma'ani japi ajopana i'ímacá rihuacajé. Cajrú caja carená i'ímacá.

<sup>19</sup> Nema'á caja luhuiluhuí caje mejé. Ricá e'iyá Tupana pura'aró najhua'até. Ripuráca'alo jema'ajeño quemárijlo: "Pipura'aniyo huajhua'até."

<sup>20</sup> Marí que nemacá rijló, rimacale marí que nanacu pamineco: "Na ca'ajná, ina'uqué ca'ajná, ipirana ca'ajná, iphájica ee ipuré nacojé, inó ricá jipa aú, huejucú aú ca'ajná."

<sup>21</sup> Quero'ótacaje huani nacaje namácare i'ímacá najló. Moisesmi chu hua'ató quemari najló: "Cajrú nucurúca'aca quero'ocajo aú." Marí que ri'ímacá najló rihuacajé i'ímacá.

<sup>22</sup> Eyá ijlo, uncá ñaque calé ricá. Tupana hua'atéjena i'ímacale, icá i'ímajeño rijhua'até je'echú chu. Re Tupana; uncá majopeja calé riyucuna; cajmuni ricá. Rijhua'até icá i'ímajeño rejo. Rijhua'atéjena, je'echú chu i'ímacaño, hua'até caja i'ímajé. Iqui'iruna huani necá hua'até i'ímajé.

<sup>23</sup> Re palá ipura'ajico Tupana nacú. Tupana yaní icá. Ajopana riyani piyuqueja hua'até i'ímajé rejo. Ina'uqué caja taca'acaño hua'até caja i'ímajé, ra'apiyá jema'ajeño ne'emacá. Re napéchumi rijhua'até me'etení. Caja Tupana lamá'atari napechu, palani napechu i'ímacáloje raú penaje. Tupana hue'epiri mecajenaca i'ímajica rejo. Caja lana'aquejémi íi ripapérane chu, rijhua'atéjena i'ímacale. Piyuque ina'uqué nacú quemájeri Tupana. Nacaje huala'acare nacú rimaje huajló pajluhuano, pajluhuano que méqueca rijló ricá.

<sup>24</sup> Jesucristo hua'até caja i'ímajé je'echú chu. Ricá a'arí icá i'ímacá, i'ímacáloje huajé puráca'aloji ja'apiyá penaje. Ichaya pura'ajero ricá. Ritaca'acá huachaya huacajé rira aco'oró raphú chiyá huajlojé penaje. Raú calé Tupana amaro huachaje pu'uhuaré huala'acare liyá. Uncá ñaque calé ri'ímacá Caimi chujlo i'ímacá. Rinoca Abelmi chu huacajé, rira i'ijnari caja raphú chiyá. Pachá Tupana huajari re'ehuemi, nori ri'ímacá.

<sup>25</sup> Tupana huajari ne'emacá, uncá a'alaño nanacojó ripuráca'alo, riyuricare Moisesmi chujlo i'ímacá. Marí eja'ahuá chujena naquiayana Moisesmi chu i'ímacá. Richaje huani rihuajájica necá, uncá a'alaño nanacojó Jesucristo puráca'alo. Je'echú chiyá riphá majó i'ímacá. Amá icó ila'ajica majopéjari queja ijluhua Tupana puráca'alo.

<sup>26</sup> Tupana yurica Moisesmi chujlo ripuráca'alo huacajé, te'erí curúca'ari ripura'acó aú. Ñaque caja ri'ímalaje piño. Marí que rimacá rinacu i'ímacá: "Nucurúca'ataje piño eja'ahuá, je'echú hua'ató."

<sup>27</sup> Rimá: “Nucurúca'ataje eja'ahuá.” Raú iná hue'epí rimacá nacaje Tupana queño'ótacare nacú. Rapichátaje ricá. Reyá a'ajná ño'ojó nacaje yuréjero, uncá uncá capichácajo penaje i'imagare.

<sup>28</sup> Huecá i'imajeño rejo. Uncá capichácajo penaje calé nacaje rehuá. Ñaquele imá Tupánajlo: “Palá pila'acá huecá” que, marí que ri'imajícale huajló. Ipechu i'imá caja pu'ují Tupana nacú. Ihue'epí caja ricá itucumó. Iphá caja ra'apí palá, ila'acáloje piyuque nacaje rijló rihuátaca que penaje. Marí que la'acana palani.

<sup>29</sup> Marí que huala'ajica, Tupana huajácale ina'uqué pu'uhuaré nala'acare chona, nanaicho nala'acare chona. Uncá meño'ojó pu'uhuaré la'ajeño i'imalá rijhua'até.

## 13

*Iná la'acáloje nacaje palá Tupánajlo penaje yucuna marí:*

<sup>1</sup> Ejena que icá pajhua'atéchaca, Jesucristo ja'apiyá jema'ajeño i'imagale. Ñaquele jácho'otaniyo íqui'ija pecohuácaca huátacana chiyá.

<sup>2</sup> Ipechu capicháñaca piyá numá ijló, imacáloje ajopana te'eré eyájenajlo, nayurícoloje ijhua'até iñacaré chu penaje. Ne'iyajena a'ataño ajopana te'eré eyájena nanacaré chu i'imagá. Tupana hua'atéjena, je'echú chiyájena, ne'emacá. A'ataño necá uncá hue'epiláño reyájenaca ne'emacá.

<sup>3</sup> Re ca'ajná ina'uqué rehuá, ina'uqué huajáquelana chu necá. Ihue'epí nanacu camu'ují. Ina'uqué huajáquelana chu i'imaquela najhua'até, ihue'epijla camu'ují inacuhua. Ñaquele caja ihue'epica nanacu camu'ují jucaya. Ñaquele caja ihue'epica camu'ují ajopana chapú caje yajhué amájeño.

<sup>4</sup> Pajhua'atéchaca huá'acajeñomijlo numá, iphá pa'apichaca. Uncá ajopana hua'até la'acana i'imalaje. Tupana huajájeri necá, la'año nanaicho.

<sup>5</sup> Eyá liñeru, ri'imaniya ihuajhué huani. Ipechu i'imá palá nacaje i'imagare icapi hua'até, Tupana quemacale marí que ra'apiyá jema'ajeño nacú: “Uncá huani nuyurílaje icá. Uncá huani caja no'opáñalaje icá,” que Tupana quemacá huanacu.

<sup>6</sup> Marí caje la'arí huapechu caphí. Aú calé iná quemá iná nacuhua marí que: Nuñaté a'ajeri Tupana.

Ñaquele uncá nuquero'oló ina'uqué piyá.

Uncá caja nala'alaje nucá chapú, Tupana a'acale nuñaté.

<sup>7</sup> Ihue'epí amájeño penájenami, jehuñña'ataño icá Tupana puráca'alo nacú i'imagá. I'ijnatá ipéchuhua palá nala'acare nacú, ipechu i'imagáloje caphí Tupana chojé napechu i'imagá que caja.

<sup>8</sup> Júpimi Jesucristo i'imagá. Ñaquele caja ricá me'etení. Ñaquele caja ri'imajica. Uncá rapiyácala ripuráca'alo.

<sup>9</sup> Iqui'ija Tupana huátaca huecá. Ricá la'arí iná pechu caphí, iná la'acáloje palá penaje. Marí palani inajlo, iná i'imagáloje ra'apiyá penaje. Eyá re cajrú puráca'aloji apú caje huani ricá. Apojó caja ricá. Jema'aníya ra'apiyá. Nemá a'ajneji naquiyana nacú, iná ajñaca piyá ricá. Uncá na penaje calé ricá ra'apiyá jema'ajeñojlo.

<sup>10</sup> Moisesmi chu i'imaqué huacajé, puráca'aloji lámá'atajeño i'imaqueño. Ina'uqué chaya nalamá'ata puráca'aloji Tupana hua'até. Necá la'aqueño nasápaca'alahua Tupana ñacaré chu. Pirajina ímami naquiyá la'acanami ri'imagá. Nenoque napirana naquiyana pu'uhuaré ina'uqué la'ajicare chaya. Ejomi najñaque ri'ími. Uncá ne'emalá Jesucristo palamane hue'emacá que caja. Jesucristoja calé taca'arí huachaya i'imagá, hue'emacáloje ra'apiyá penaje.

<sup>11</sup> Nenoque napirana naquiyana. Ejomi puráca'aloji lámá'atajeño huacára'ajeri ña'aqueri rírami naquiyana ucapú chojé. Nemaicare nacú: “Tupana apucuna huani ricá” chojé rijña'aque rírami, ra'acáloje ricá Tupánajlo, pu'uhuaré ina'uqué la'acare chaya penaje. Quéchami najña'aque napirana nenójicarena tami pajimila yámijo. Re nacára'ataque piyuque huani natami.

<sup>12</sup> Pajimila yámijo caja nenó Jesucristo i'imagá. Re nacúhua'ata ricá a'ahuaná apiyácanami nacú i'imagá. Re rira aco'oró raphú chiyá, rica'acáloje pu'uhuaré huala'acare huanaquiyá raú penaje.

<sup>13</sup> Ñaquele ricaja calé i'imari huajló hue'ematájeri. Uncá nahuátalare Jesucristo i'imagá. Aú nala'á ricá chapú. Ñaquele caja ca'ajná uncá ajopana huátalaño huecá, huema'acale ra'apiyá. Marí caje aú nala'á piño huecá chapú. Huajña'ája panacu ricá rijña'acá chapú caje panacu que caja. Marí que la'acana palani.

<sup>14</sup> Uncá huañacajela que huani calé marí eja'ahuá hue'emacare nacú. Je'echú chu huañacajela huani i'imajeri huajló. Ricá nacú huapechu. Ñaquele palani huajló chapú caje yajhué amácana maare. Chapú nala'acá huecá, huala'acale Jesucristo huátaca que.

<sup>15</sup> Palá huapura'ajico Tupana nacú ajopana hua'até, palá rila'acale huecá Jesucristo palamane aú. Marí palani Tupánajlo.

<sup>16</sup> Ipechu capicháñaniya palá la'acana. A'á pajlocaca nacaje camu'ují ila'ajícare nacú. Marí que la'acana palani Tupánajlo.

<sup>17</sup> Jema'á necá ja'apiyá, jehuíña'ataño icá Tupana puráca'alo nacú. Necá a'año icá nana-cojó, ipechu i'ímacáloje caphí Tupana chojé penaje. Tupana jimaje natára'ajo, ne'emacáloje méqueca nehuíña'ataca icá yucuna rijló penaje. Jema'ajica ee na'apiyá, pu'ují napechu i'imajica raú. Uncaja que jema'á na'apiyá, camu'ují napechu la'ajico raú. Camu'ují napechu i'imaquela, uncá paala ri'ímacajla ijló.

<sup>18</sup> Huala'á nacaje palani huapechu nacú i'ímacare caje. Ñaquele uncá chapú la'acana i'ímalá huapechu nacú. Ñaqueja huahuátaca i'ímacaje. Ipura'ó Tupana hua'até huanacu, caja queja palá la'acaño hue'emacáloje penaje.

<sup>19</sup> Ipura'ó caja Tupana hua'até, numalá'aco piyá ichaje i'ijnacana nacú.

*Caja penaje rimacare nacú najló marí:*

<sup>20</sup> Tupana macápo'ori Jesucristo i'ímacá. Hue'emacana, íqui'ija huahuátacare, ricá. Rile'ejena ina'uqué amájeri caja ricá. Huajé puráca'aloji ja'apiyá huecá, ritaca'acale huachaya i'ímacá. Matajnaco hue'emajica ra'apiyá.

<sup>21</sup> Tupana la'arí iná pechu palá. Nuhuata ra'acá ijló piyuque nacaje palani ihuátacare, ila'acáloje rihuátaca que raú penaje. Nuhuata caja rilmára'ataca icá palá Jesucristo palamane aú. Nuhuata caja ina'uqué pura'acó palá huani Jesucristo nacú hua'ajini huani. Marí nuhuata ijló.

<sup>22</sup> Nojena, jema'á marí puráca'aloji nuhuacára'acare ijló ja'apiyá. Ila'aniya ipéchuhua tu'ujné apú nacaje nacú, jema'acá piyá ijluhua ricá. Nuhuacára'a ijló ricá, ipechu i'ímacáloje caphí raú penaje. Metajlani aú ja nu'umá ijló riyucuna.

<sup>23</sup> Timoteo i'imari Jesucristo yucuna ajopánajlo, ajopánajlo que. Richona naca'á ricá ina'uqué huajáquelana chojé. Caja nácho'ota piño ricá. Riyucuna nuhuata i'ímacana ijló. Riphájica ee majó uncá chiyó nu'ujná ichaje piyá, ri'ijnajé caja nujhua'até ichaje. Ejéchami amájica ricá.

<sup>24</sup> Eco palá najló, jehuíña'ataño icá Tupana puráca'alo nacujlo. Eco palá caja piyuque Jesucristo ja'apiyá jema'ajéñojlo. Jesucristo ja'apiyá jema'ajeño maare, Italia e, quemañó caja inacu: "Eco palá najló ca'ajno."

<sup>25</sup> Nuhuata i'ímacá palá Tupana palamane aú. Maáreje riyucuna tajnaro.

## SANTIAGO

<sup>1</sup> Santiago nucá. Tupana, Jesucristo, quele hua'até sápa jeri nucá. Hue'emacana huani Jesucristo. Marí puráca'aloji nuhuacára'a ijlo. Eco palá ijlo ca'ajno. Que'iyapejena icá ilérohua. Iyamá íphata ji'imaji nacojé quele a'ajútayami chuna i'amacá. Israelmi chu laquénami icá. Caja itamáca'ato apojó, apojó que ajopana te'eré nacojé.

*Péchuji Tupana a'acare ina'uquejlo yucuna marí:*

<sup>2</sup> Nojena, ila'á pu'ují ipéchuhua chapú caje yajhué amácana aú.  
<sup>3</sup> Caja ihue'epí, raú iná hue'epica méqueca iná pechu Tupana nacú. Caphí iná pechu i'amacachu richojé raú, uncá iná jácho'olo ra'apiyá i'amacana chiyá.  
<sup>4</sup> Ila'á ipéchuhua caphí rijló, jácho'oco piyá ra'apiyá i'amacana chiyá. Marí que ila'ajica aú ipechu íphátaje Tupana huátaca que la'acana. Raú icá i'imajeño palá la'acana nacuja reyá a'ajná ño'ojó.

<sup>5</sup> Re ca'ajná inaquiyana, uncá hue'epilaño na penájeca iná amá chapú caje yajhué. Ijlo numá: I'imá riyucuna Tupánajlo. Raú ra'ajé ijlo péchuji, ihue'epícaloje na penájeca iná amaca chapú caje yajhué penaje. Cajrú Tupana a'acá iná ñaté. Uncá raca'alá iná, iná pura'acó aú rijhua'até.

<sup>6</sup> Iná quemacachu Tupánajlo, ra'acáloje iná ñaté penaje, rihuata iná pechu i'amacá caphí richojé. Uncá rihuátala iná pechu la'acó ujhuí riliyá. Iná pechu la'acochu ujhuí riliyá, uncá iná pechu i'imalá caphí richojé raú. Marí que iná pechu i'amacachu, iná pechu i'imari juni yocola queja. Ají ño'ojó, ají ño'ojó que iná pechu inajlo iyamá chuhúa. Carená yoco'ocare juni, queja rila'acá iná pechu. Iyamá chuhúa rila'á iná pechu, uncachu iná pechu i'imalá Tupana chojé caphí.

<sup>7</sup> Ujhuí iná pechu i'amacachu Tupana nacú, uncá huani Tupana a'alá inajlo nacaje iná quejá'acare riliyá.

<sup>8</sup> Uncá na calé iyamá chuhúa péchuruna la'año palá, mari que napechu i'amacale.

<sup>9</sup> Camu'ují la'acáñojlo numá me'etení: Palá Tupana pechu inacu. Ñaquele ila'á ipéchuhua pu'ují raú. Jesucristo ja'apiyá jema'ajéñojlo numá marí que.

<sup>10-11</sup> Cajrú le'ejepelárúnajlo numá piño: Ipechu i'imá pu'ují inane capichaco aú. Uncá na penaje calé inane Tupánajlo. A'ahuaná ihu' moco'ocá que caja cajrú le'ejepeláruna i'imajica. Quiñaja camú camaré huijiño'otaca a'ahuaná ihu'. Raú ricujrúca'a rina naquiyá. Ejeja ripalacha capicharo rijhua'até. Mequetánaja calé ri'amacá. Ñaque caja cajrú le'ejepeláruna i'imajica mequetánaja. Nasápaca'ala la'acana nacú cháyaja natajnajo.

*Nájeca ina'uqué la'acá pu'uhuaré yucuna marí:*

<sup>12</sup> Ina'uqué ca'ajná amaño chapú caje yajhué. Uncá nayurila Tupana chojé i'amacana caphí raú. Aú napechu i'imá palá. Chapú caje yajhué amácana aú Tupana hue'epirí mecajenaca caphí péchuruna richojé. Iqui'ija Tupana huátajeñojlo ra'ajé rihuemí. Marí i'imajeri rihuemí najló: Ra'ajé najló cajmuchaji, ne'emacáloje matajnaco je'echú chu raú penaje. Rarucaca najló que ra'ajica huátano íqui'ija Tupánajlo ricá.

<sup>13</sup> Chapú caje yajhué amácana aú ca'ajná, pu'uhuaré la'acana a'arí iná me'é rijluhua, iná la'acáloje pu'uhuaré raú penaje. Uncá paala Tupana nacú quemacana marí que: "Ricá huacára'ari pu'uhuaré la'acana a'acá numé'é rijluhua" que. Uncá na calé huacára'ari pu'uhuaré la'acana a'acá Tupana me'é rijluhua. Uncá caja rihuacára'ala pu'uhuaré la'acana a'acá ajopana ina'uqué me'é rijluhua.

<sup>14</sup> Marí que ricá: Manaíchaji a'arí iná me'é rijluhua, iná la'acáloje iná manaicho raú penaje. Caja queja iná pechu nacú ri'amacá aú iná la'á iná manaicho.

<sup>15</sup> Iná icó iná huátaca ra'acá iná me'é rijluhua. Aú iná la'á pu'uhuaré. Ricá la'arí pu'uhuaré péchuri iná rijluhua, caja queja iná i'amacáloje penaje. Caja queja iná i'imajica ee pu'uhuaré la'acana nacú, iná capichajo Tupana liyá.

<sup>16</sup> Nojena, íqui'ija nuhuátacarena, a'aníya inacójo pajlácaje puráca'aloji. Uncá Tupana huacára'ala pu'uhuaré la'acana a'acá iná me'é rijluhua, iná la'acáloje pu'uhuaré raú penaje.

<sup>17</sup> Piyuqueja nacaje palani, Tupana liyaje ricá. Ricá queño'ótari piyuque nacaje, moco'orí je'echú chiyá. Camareji riqueño'otacare apiyácaro, richipúca'acale. Raú uncá ricamaré amalo apú eyá, apú eyá queja. Uncá ñaque calé Tupana. Uncá rapiyácalo. Rihuata hue'emacá palá la'acana nacuja. Uncá rihuátala huala'acá pu'uhuaré, huamanaicho hua'até.

<sup>18</sup> Tupana a'arí huajló Ripachu ripuráca'alo ja'apiyá jema'acana aú. Quehuácaje ripuráca'alo. Ra'á caja huajló Ripachu, hue'emacáloje riyani raú penaje. Ajopana piyá

huecá i'imaño riyani. Marí queja rihuátaca huala'acana i'imacá. Aú calé ajopana ina'uqué riqueño'ótacarena naquiyana chaje rihuátaca huecá.

*Ina la'acáloje Tupana puráca'alo quemacá que penaje yucuna marí:*

<sup>19</sup>Nojena, íqui'ija nuhuátaca icá. Caja ihue'epí ricá numacare nacú ijló. Uncá iná pura'aló cajrú huani, iná pura'acochu ajopana hua'até, iná jema'acáloje méqueca nahuátaca inajlo quemacana. Iyúcha'anio caja majopeja.

<sup>20</sup>Yúcha'acajo aú uncá iná i'imalá palá. Uncá caja iná la'alá Tupana huátaca que raú.

<sup>21</sup>Iyurí iliyó piyuqueja pu'uhuaré ila'acare, imanaicho ila'acare hua'até. Ila'aniya caja inacuhá hue'epiño que huani. I'imá Tupana puráca'alo ja'apiyaja. Ripuráca'alo chujena i'imajica ee, Tupana i'imatájeri icá capichácajo liyá.

<sup>22</sup>Ila'á Tupana puráca'alo quemacá que. Jema'á ra'apiyá. Uncá paala majopeja penaje calé jema'acá riyucuna. Apala iná pechu i'imá iná nacuhá: "Palá nula'acá, nu'ujnacale riyucuna jema'ajé." E'iyonaja uncá paala ricá, uncachu iná a'alá iná nacojó ricá.

<sup>23</sup>Apala iná jema'á ne'emacá Tupana puráca'alo yucuna. E'iyonaja uncá ca'ajná iná a'alá iná nacojó ricá. Majopeja caná chojé yacá'acaño queja iná i'imacá raú. Majopeja namaca necó caná chojé.

<sup>24</sup>Quéchami ne'ejnacá reyá. Caja queja napechu capicháñaca namácano. Pachá uncá nalamá'atala necó. Naqué caja iná la'acá majopeja, uncachu iná la'alá Tupana puráca'alo quemacá que.

<sup>25</sup>Palani Tupana puráca'alo. Uncá apichátaqueja i'imalá re'iyajé. Ricá quemari huanacu méqueca Tupana la'acá huecá palá, huala'acáloje palá raú penaje. Uncachu iná pechu capicháñala ripuráca'alo iná ajeri caje e'ejmí, palá iná la'acá raú. Ri'imacachu iná pechu nacuja, iná la'á rimacá que raú. Pu'ují caja iná pechu raú. Marí que ri'imacachu inajlo, Tupana la'ajeri iná palá huani piyuque nacaje iná la'acare aú.

<sup>26</sup>Pimá ca'ajná pinacuhá: "Palá nupechu Tupana nacú." E'iyonaja pichapújra'o ca'ajná, pipura'ó ca'ajná pu'uhuaré ajopana nacú. Marí caje aú iná hue'epí uncá quehuaca calé ricá pimacare pinacuhá. Majopeja pimacá: "Palá nupechu Tupana nacú," que. Uncá na penaje calé Tupánajlo ilé que quemacana.

<sup>27</sup>Quehuaca pimacachu pinacuhá marí que la'ajeri picá: Majnúyanami ñaté a'ajeri picá, ihuacajilomina ñaté a'ajeri caje picá. Namácale chapú caje yajhué, pa'á ñaté. Caja queja iná la'acá palá, iná pechu i'imacale Tupana nacú palá. Ina'uqué uncá hue'epiño Tupana la'año pu'uhuaré. Palá péchuri Tupana nacú uncá la'alá ilé que.

## 2

*Ina pechu i'imacáloje pajimato ina'uqué nacú palá penaje yucuna marí:*

<sup>1</sup>Nojena, palani huani Jesucristo. Ra'apiyá jema'ajeño icá. Naquele uncá paala amaca ujhú ajopana ina'uqué liyá ajopana.

<sup>2</sup>Apala icá jahuacáloje Tupana puráca'alo jema'ajé. E ca'ajná apú ina'uqué mujlúca'ari jahuacáca'alo ñacarelena chojé. Palani a'arumacari ricá. Palani caja anillo pato'oró riyatehuana nacú, iyamá, huejei quele ca'ajná. Oro naquiyá la'acanami ricá. Rijhua'até que caja ca'ajná apú iphaca, jupichumi, pu'uhuareni a'arumacari ricá.

<sup>3</sup>Palani a'arumacárijlo ca'ajná imajla: "Piyá'ó maare palani ñáca'ajori chu" que. Eyá apú camu'ují la'acajlo imajla ca'ajná: "Ilérejeja pitára'o, a'ajinare te'erí e'iyá piyá'ó," que ca'ajná imacajla rijló.

<sup>4</sup>Marí que la'acana, uncá huani paala Tupánajlo, uncale ila'alá ina'uqué palá pajimato. Namácana aú ja amá necá palá ca'ajná, ujhú ca'ajná. Uncá paala ipechu i'imacale, ila'á ilé que.

<sup>5</sup>Nojena, íqui'ija nuhuátacarena, jema'á marí: Tupana i'ihuapari rijlúhua ajopana ina'uqué e'iyayá necá nemacárena nacú: "Camu'ují la'acaño necá" que. E'iyonaja Tupánajlo nahuemí cajrú, nayuricale nachó Jesucristojlo, ri'imatácaloje necá capichácajo liyá raú penaje. Palá huani Tupana la'ajica necá rijhua'até i'imacana aú. Marí que rila'ajica necá palá, íqui'ija nahuátacale ricá. Rimacá nacú que rila'ajica necá palá.

<sup>6</sup>Eyá icá, camu'ují la'acaño nacú ipechu i'imá: "Huahuejápútenami ta necá, majopeja i'imacá necá" que. Eyá cajrú le'ejepelárúna nacú ipechu i'imá palá. Necá jo'ó la'año icá chapú. Necá huá'año icá ihuacára'ajeño ejo, nahuajácaloje icá penaje.

<sup>7</sup>Necá, cajrú le'ejepelárúna, pura'año caja pu'uhuaré Jesucristo nacú. Rijhua'atéjena icá. Ricá, palani huani Jesucristo nacú, napura'ó pu'uhuaré. E'iyonaja palá ipechu nacú.

<sup>8</sup>Tupana huacára'ari ina'uqué la'acá palá. Richaje rihuata ila'acá marí que: Ihuata íqui'ija piyuque ina'uqué, icó que caja ihuátaca necá, ajopana. Marí que la'acana aú iná la'á palá.

<sup>9</sup> E'iyonaja pu'ují ipechu ne'iyajena ina'uqué nacú. Eyá ajopana nacú ujuhuí ipechu. Marí caje uncá paala Tupánajlo, uncale ila'alá raú Tupana huacára'aca que. Uncá pachá ila'alá ripuráca'alo quemacá que, Tupana quemari inacu: "Pu'uhuaré la'ajeño necá" que.

<sup>10</sup> Re ina'uqué, uncá huani na'alá nanacojó Tupana puráca'alo. Uncá pachá nema'alá ra'apiyá, Tupana huajájeri necá. Tupana huajájeri caje ajopana. Ripuráca'alo lana'aguéjami quemacá que la'ajeño necá. E'iyonaja uncá nala'alá ricá pajimán. Pachá Tupana huajájeri necá. Rihuajájeri uncá huani jema'alaño ra'apiyá, que caje rihuajájeri necá, la'año huejápaja pu'uhuaré.

<sup>11</sup> Tupana quemari achiñana, inaana hua'até nacú: "Ila'aniya imanaicho pajhua'atéchaca" que. Ricáca caje Tupana quemari piño marí que: "Pinóniya ina'uqué." Apala uncá ca'ajná pila'alá pimanaicho. Apala pinó ca'ajná ina'uqué. Marí caje aú uncá pila'alá ripuráca'alo quemacá que.

<sup>12</sup> Tupana huacára'ari huala'acá palá ripuráca'alo lana'aguéjami quemacá queja. Eja'ahuá tajnájico huacajé, rimaje huanacu méqueca rila'ajica huecá ripuráca'alo quemacá queja. Rihuajaje huecá ca'ajná, palá rila'ajica huecá ca'ajná. Ripuráca'alo a'acana huanacojó aú hue'emajó. Ñaquele numá ijló: Ila'á piyuque nacaje palá. Ipura'ó caje palá pajhua'atéchaca.

<sup>13</sup> Tupana quemájeri piyuqueja ina'uqué nacú méqueca rijlo piyuqueja nacaje huala'acare marí eja'ahuá chu hue'emacá quetana. Uncachu huahue'epila ina'uqué mu'ují, uncá caje Tupana hue'epilaje huamu'ují rihuacajé. Huahue'epicachu ina'uqué mu'ují me'etení, palani hue'emajica Tupánajlo rihuacajé.

*Iná pechu i'imacachu caphí Jesucristo chojé, palá iná i'imacá raú. Riyucuna marí:*

<sup>14</sup> Nojena, re ca'ajná apú, quemari rinacuhá: "Caphí nupechu Jesucristo chojé" que. E'iyonaja uncá rila'alá palá ajopana ina'uqué. Aú iná hue'epi uncá na penaje calé rimacá rinacuhá ñaque. Uncá Tupana i'imatálaje ricá capichácajo liyá, ilé que ripechu i'imacale.

<sup>15</sup> Re ca'ajná ijhua'até ilérohua inanaru ca'ajná, achiñá ca'ajná. Inaquiyana necá; camu'ují la'acaño necá. Uncá a'arumacaji i'imalá najló; uncá caje a'ajneji i'imalá najló.

<sup>16</sup> Apala apú inaquiyana quemari najló:

—Eco i'ijná palá ca'ajno. Re ca'ajná a'arumacaji i'imajé ijló. Palá ca'ajná ajnájica a'ajnehua ca'ajno —que ca'ajná rimacajla najló.

Uncá na ca'ajná ra'alá najló camu'ují nala'acá aú. Ñaquele uncá na penaje calé ricá rimacare nacú najló, uncale ra'alá najló nacaje.

<sup>17</sup> Apala pimá pinacuhá ajopana ina'uquejlo: "Caphí nupechu Tupana chojé" que. E'iyonaja uncá pila'alá ajopana ina'uqué palá. Uncá na penaje calé pimacare pinacuhá. Uncá meque la'ajé ilé puráca'aloji la'alá nacaje ricó. Támijimi que caje pipuráca'alo. Uncá meño'ojó támijimi a'alá apú ñaté.

<sup>18</sup> Apala apú quemari apujlo mari que: "Picá quemari pinacuhá: 'Caphí nupechu Tupana chojé'. Eyá nucá la'arí palá ajopana ina'uqué." que ca'ajná rimacá rijlo rinacuhá.

Numá ijló: ¿Na aú chi iná hue'epi quehuácaca iná pechu caphí Jesucristo chojé? Palá iná la'acare ajopana ina'uqué aú iná hue'epica quehuácaca iná pechu Jesucristo chojé caphí. Palá nula'acá ajopana ina'uqué aú iná hue'epi caphí nupechu richojé. Caphí nupechu richojé, aú ra'á nuñaté ñaque la'acana aú.

<sup>19</sup> Apala pihue'epi re Iná Chi'ináricana; pajluhuaja ricá; Tupana ricá. Ñaque ricá. Palani pipechu nacú ricá. Ilérejeja palani. E'iyonaja ñaque caje jiñana pechu i'imacá Tupana nacú, ilé pipechu i'imacá que caje. Ñaquele naquero'ó Tupana piyá.

<sup>20</sup> ¡Meque mapéchuru huani picá! Chuhua nu'umajica pijló riyucuna: Picá quemari ca'ajná pinacuhá: "Caphí nupechu Jesucristo chojé" que. Uncachu pila'alá palá, uncá na penaje calé pijló ilé que quemacana pinacuhá.

<sup>21</sup> Tupana quemari Abrahami chu nacú marí que i'imacá: "Lamára'ataquejami que nojló ricá." Palani Tupánajlo Abrahami chu i'imacá, rila'acale Tupana quemacá rijló que. Ujú caje chiyó hua'ajútami chu, Abrahami chu, nócajla ri'irí, Isaacmi chu i'imacá. Ra'acáloje ricá Tupánajlo penaje rinojla ri'imacá. Marí que rila'acajla ricá, Tupana huacára'acale ilé que rila'acana. Rema'á ra'apiyá. Raú Tupana amari palá la'ajeri Abrahami chu i'imacá.

<sup>22</sup> Raú iná hue'epi Abrahami chu pechu i'imacá caphí Tupana chojé. Caphí richojé péchuri ri'imacale, rema'á ra'apiyá. Palá rila'acá raú, Tupana huátacare caje.

<sup>23</sup> Abrahami chu la'arí ripuráca'alo quemacá rinacu que. Marí que Tupana puráca'alo lana'aguéjami quemacá rinacú: "Abrahami chu pechu i'imari Tupana chojé caphí. Raú Tupana quemari rinacu: Caja lámára'ataquejami que nojló ricá, pu'uhuaré rila'acare chiyá." Marí que Tupana quemacá rinacu, ripechu i'imacale Tupana chojé caphí. Ajopana ina'uqué piño quemáño Abrahami chu nacú marí que i'imacá: "Ricá iqui'ija Tupana huátacare ri'imacá."

<sup>24</sup> Jema'á marí: Re ca'ajná apú, quemari rinacuhúa: “Caphí nupechu Tupana chojé.” E'iyonaja calé uncá rila'alá palá. Aú Tupana quemari ilé caje nacú: “Pu'uhuaré la'ajeri ricá.” Re ca'ajná apú. Ilé quehuaca, caphí péchuri Jesucristo chojé ricá. Ñaquele rila'á palá. Ri'imá caja palá ajopana ina'uqué hua'até. Ilé caje nacú Tupana quemari: “Palá la'ajeri ricá. Caja lamára'ataquejami que nojló ricá.”

<sup>25</sup> Apa'amá aú numaje piño ijlo rinacu: Júpimi i'ímacá Josuémi chu huacára'ari iyamá rijhua'atéjena naquiyana pajimila quejila'aje. Namácaloje meque la'ajeca nachá'atacajla necá nóccajajo aú penaje. Re apa'ahuelo i'imayo. Ruí i'imari Rahab. Ñuju'uqueru ru'umacá. Huapichá ru'umacá. Ruñacaré ejo nephá i'ímacá. E rumá najló, nayuricolaje ruñacaré chojé penaje. Raú rula'á necá palá. Rejomi ruhuacára'a napa'acó apú caja iñe'epú chuhúa, napinana noca piyá necá. Palá rula'acá necá raú. Roma'á caja na'apiyá napuráca'alo. Rula'acale palá, Tupana quemari runacu: “Caja lamára'ataquejami que nojló rucá pu'uhuaré rula'acare liyá.”

<sup>26</sup> Pimá ca'ajná pinacuhúa: “Caphí nupechu Tupana chojé.” Uncachu pila'alá palá raú, uncá na penaje calé pijló pimacare pinacuhúa. Uncá meño'ojó ina'uqué támijimi la'alá nacaje, uncale ripechu i'imalá re'iyá. Ñaque caja pijló ricá pimacare pinacuhúa.

### 3

#### *Nacaje ina'uqué quemacare nacú yucuna marí:*

<sup>1</sup> Nojena, uncá paala íqui'iruna ina'uqué i'imacajla jehuíña'atajeño penaje. Tupana puráca'alo nacú jehuíña'atajeño naquiyana caja nucá. Jema'á marí: Tupana huátari ripuráca'alo nacú jehuíña'atajeño jema'acá ra'apiyá palá. Ajopana chaje rihuátaca nema'acá ra'apiyá. Tupana puráca'alo nacú jehuíña'atajeño naquiyana ca'ajná uncá la'alaño ripuráca'alo quemacá que. Pachá Tupana huajájeri necá. Ajopana chaje íqui'ica rihuajájica necá ripachá.

<sup>2</sup> Piyuque huecá la'año nacaje, uncá paala ricá. Uncachu iná pura'aló ina'uqué nacú pu'uhuaré, palá la'ajeri huani iná. Iná hue'epícachu iná puráca'alo nacú quemacana palá, caja queja iná i'ímacá palá huani la'ajeri. Ñaquele piyuque nacaje iná la'ajicare i'imajeri palá.

<sup>3</sup> Camu'ujuni iná numá iná pura'acó aú. E'iyonaja iná pura'ó cajrú nacaje nacú richiyá. Camu'ujuni caja pejru'uhua ñani na'acare cahuarú numá chojé ripajno'ótajona penaje. Cajruni cahuarú. E'iyonaja ricá aú ja rinacu ja'apájeri pocóro'otari ricá rihuátaca ejo.

<sup>4</sup> Ñaque caja huapuru, cajruni huani ricá. Camu'ujuni pejru'uhua ñani i'imari riyacúmare i'imajona, cúhua'aro ri'ipala ja'apí. Caphini carená ja'apátari huapuru. Riyacuma i'imajeri ja'apátari ricá rihuátaca ejo riyacúmare camu'ujuni aú.

<sup>5</sup> Ñaque caja ujú caje ñani quera'atani aú iná queño'ocá íqui'ini iná i'icacapere e'iyá lucúna'atacana, ricára'acaloje piyuque penaje. Ñaque caja camu'ujuni caja iná numá. E'iyonaja cajrú puráca'aloji jácho'oro richiyá. Pu'uhuari puráca'aloji nacú iná pura'ó caja richiyá. Iná numá chiyá caja iná pura'ó iná nacuhúa palá huani.

<sup>6</sup> Quera'atani capichátari nacaje. Ñaque caja huala'acá chapú ajopana ina'uqué huapuráca'alo pu'uhuari iná, huanuma chiyaje pachá. Huanuma aú huala'á chapú huani ajopana ina'uqué. Huanapona naquiyánaja ricá huanuma. Apicháca'alo queja huecá huanuma pachá, huapura'acole pu'uhuaré richiyá. Jiñana pechu huacára'año piyuque ina'uqué, uncá jema'alaño Tupana ja'apiyá, pura'acó pu'uhuaré. Pu'uhuaré ina'uqué pura'acole panacuhúacaca, chapú napechu panacuhúacaca.

<sup>7</sup> Ina'uqué hue'epiño piyuqueja camejérina la'acana mana'í quena. Piyuque cupira'aphana, jiñana, jeina cajena hua'ató nahue'epí la'acana mana'í quena. Yuriná cajena hua'ató nahue'epí caja la'acana mana'í quena.

<sup>8</sup> Eyá iná numá, uncá na calé la'arijla mana'í que ricá. Pu'uhuaré pura'ajona ricá. Richá'ata puyunqueja nacajena riyuchá aú. Uncá meño'ojó iná chá'atala iná numá, iná quemacá piyá pu'uhuaré richiyá. Puhuini aú ina'uqué nócana que caja huala'acá chapú ajopana ina'uqué, huapura'acó aú nanacu pu'uhuaré.

<sup>9</sup> Huanuma chiyá huapura'ó. Ricaja caja huanuma chiyá huapura'ó palá Tupana nacú. Richiyaja caja huapura'ó pu'uhuaré ina'uqué nacú. Tupana queño'ótari ina'uqué i'ímacá. Renámihua que huecá. Ajopana ina'uqué nacú huapura'ó pu'uhuaré richiyá.

<sup>10</sup> Iná numá chiyá iná puráca'alo jácho'oro. Pajluhua iná numá. Richiyá iná quemacá palani puráca'aloji nacú. Richiyá caja iná quemacá pu'uhuari puráca'aloji nacú. Nojena, marí que la'acana uncá huani paala.

<sup>11</sup> Uncá juni ípisílaní, pumélani hua'até jeño'olá pajluhua mutú chiyá.



<sup>12</sup> Nojena, uncá meño'ojó piriyé arúca'ala punama icha que caja. Uncá caja meño'ojó cajmú arúca'ala piriyé icha que caja. Uncá caja juni pumélani jeño'olá ca'ajiparélani hua'até pajñácani pajluhua mutú chiyá. Ñaque caja huajló ricá. Uncá paala palani puráca'aloji, pu'uhuarieni hua'até jácho'oco huanuma chiyá. Palani puráca'aloji nacuja pura'acano, palánija.

*Hue'epíachina yucuna marí:*

<sup>13</sup> Re e'iyajena ca'ajná, hue'epíachina icá. Icó jehuíña'atajeño caja icá. Iná i'imacachu hue'epíachi, palá la'ajeri iná. Uncá iná la'alá iná icó hue'epiri que huani ajopánajlo. Iná la'alá iná icó ajopana ina'uqué ñaté a'ajeri queja. Marí que iná la'acá, iná i'imacachu hue'epíachi.

<sup>14</sup> Marí que ca'ajná icá: Chapú ca'ajná ihuó ajopana ina'uqué cha, nachá'ataca aú icá. Ajopana chá'atacana ca'ajná ihue'epí itucumó. Marí cajena i'imacachu, ipechu i'imaniya inacuhá: "Palani puráca'aloji ja'apiyá i'imacaño huecá" que. Uncá hue'epíachina calé icá. Pajlácachina icá.

<sup>15</sup> Uncá Tupana huátala ihuó i'imacá chapú ina'uqué cha. Uncá caja rihuátala ila'acá nacaje, ichá'atacaloje ajopana raú penaje. Uncá hue'epíachina la'alaño marí que. Eyá ricá, Jiñá Chi'ináricana, huátari ina'uqué huo i'imacá chapú ajopana ina'uqué cha. Ricá caja huátari ina'uqué la'acá nacaje najlúhuaja, nala'acá piyá ajopana ina'uqué palá raú. Pu'uhuarieni ina'uqué pechu. Aú calé nala'á ilé queja.

<sup>16</sup> Chapú ihuó i'imacachu ajopana cha, nachá'atacale icá, uncá paala i'imacá pajhua'atéchaca. Ila'acachu nacaje, ichá'atacaloje ajopana penaje, uncá paala ipechu panacuhuácaca. Ina'uqué chapú péchuruna panacuhuácaca la'año chapú huani peco-huácaca.

<sup>17</sup> Péchuji Tupana a'acare inajlo aú iná la'alá palá. Uncá yurí calé iná raú. Iná la'alá caja palá ajopana ina'uqué raú. Péchuji Tupana a'acare inajlo aú iná i'imá ina'uqué huani ajopana ina'uqué hua'até. Raú caja iná hue'epí camu'ují ajopana ina'uqué nacú. Apú ca'ajná la'arí iná jenacú, iná jema'á ra'apiyá raú. Uncá iná apiyácala ricá rijimaje. Péchuji Tupana a'acare inajlo aú caja iná pechu i'imá pajmato ajopana ina'uqué nacú palá. Uncá caja que'iyapé calé iná pechu raú. Uncá caja pajlácaje i'imalá iná pechu nacú, péchuji Tupana a'acare inajlo aú.

<sup>18</sup> Huátano ina'uqué hua'até i'imacana palá, la'año palá ajopana ina'uqué. Raú palá huani ne'emacá pajhua'atéchaca, Tupana huátaca que.

## 4

*Uncá huátalaño Tupana yucuna marí:*

<sup>1</sup> Nócacajo nacú, aca'acacajo nacú icá pajhua'atéchaca, huéchiruna i'imacale chapú la'acana nacú. Huéchiruna icá ijluhua nacaje la'acana nacú, pu'uhuaré péchuruna i'imacale. Pachá inoco pajhua'atéchaca, aca'acacajo nacú, aca'acacajo nacú, pu'uhuaré péchuruna i'imacale. Pachá inoco pajhua'atéchaca, aca'acacajo nacú, aca'acacajo nacú, pu'uhuaré péchuruna i'imacale.

<sup>2</sup> Ihuátajla nacaje ijluhua. E'iyonaja uncá meño'ojó ipechu iphala rilocópa'ala, ijña'acáloje ijluhua ricá penaje. Marí caje aú inó ina'uqué. Ihuátajla nacaje ijluhua ajopana capi i'imacare. E'iyonaja uncá rijña'acana i'imalá ijló. Pachá aca'acacajo pajhua'atéchaca, inoco pajhua'atéchaca. Nacaje ihuátacare uncá yurilo ijló, uncale iquejá'ala Tupana liyá ijluhua ricá.

<sup>3</sup> Iquejá'acachu Tupana liyá nacaje, uncá ra'alá ijló ricá. Uncá paala ipechu nacú nacaje iquejá'acare riliyá. Ñaquele uncá ra'alá ijló nacaje. Ijluhuaja ihuata Tupana liyá nacaje, ila'acáloje nacaje ihuátaca que raú penaje.

<sup>4</sup> Calúyana naquiyana i'imacaño la'año ca'ajná namanaicho, ñaque i'imacaño icá, uncale ihuátala íqui'ija Tupana. Re cajrú nacaje marí eja'ahuá chu, uncá paala ricá. Iná huátacachu inajluhua ricá, uncá caja iná huátala Tupana. Ihuátacachu namanaicho la'ajeño, pu'uhuaré la'ajeño, quele ijhuáque'ena penaje, chapú ihuó Tupana cha.

<sup>5</sup> Uncá majopeja calé Tupana quemacá marí i'imacá: "Nucá a'arí ina'uqué naquiyánajlo Nupechu, ri'imacáloje nahuacára'ajeri penaje. Nupechu mejajnena caja necá. Nupechu huátari caja nahuátaca nucá íqui'ija," que Tupana quemacá nanacu.

<sup>6</sup> Cajrú Tupana a'acá huañaté, huapechu i'imacáloje rinacuja penaje. Marí que Tupana puráca'alo lana'aquejami quemacá: "Uncá Tupana a'alá nañaté, la'año necó hue'epiño que. Eyá necá, uncá la'alaño necó hue'epiño que, necá ñaté a'ajeri ricá."

<sup>7</sup> Iyurí ichó Tupánajlo. Ila'á caja Jiñá Chi'ináricana tejena. Raú riñaajó iliyá.

<sup>8</sup> Pu'uhuaré la'ajéñojlo numá: Iyurí pu'uhuaré la'acana iliyó. Re ina'uqué iyamá chuhúa péchuruna necá. Nahuata Tupana. E'iyonaja nahuata piño nacaje pu'uhuarieni marí eja'ahuá chu i'imacare. Necá cajénajlo numá: Iyurí ichó Tupánajlo, rica'achí pu'uhuaré ila'acare inaquiyá. Ihuata Tupana; raú palá caja Tupana huátajeri icá. Ipechu i'imá caja palá Tupana nacú; raú caja Tupana pechu i'imajeri inacu palá.

<sup>9</sup> Ipechu i'imá camu'ují pu'uhuaré ila'acare nacú. Iyá caja raú. I'ichacaje nacuja icá me'etení. I'ichaniya. Ipechu i'imaniya caja pu'ují caje chuhuá. Ipechu i'imá camu'ují ijluhua, ila'acale pu'uhuaré.

<sup>10</sup> Ila'aníya caja icó hue'epiño que Tupánajlo. Aú rila'ajé icá palá, i'imacáloje rihuátaca que penaje.

*Iná pura'acó piyá pu'uhuaré ajopana ina'uqué nacú yucuna marí:*

<sup>11</sup> Nojena, ipura'aniyo pu'uhuaré panacuhuáaca. Apala ipechu queja imacá ca'ajná apú inaquiyana nacú pu'uhuaré. Imá ca'ajná rinacu marí que: "Palani ca'ajná Tupana huajácajla ricá," que ca'ajná imacá rinacu. Pu'uhuaré iná la'acá marí que rinacu quemacana aú. Iná pura'acó pu'uhuaré Tupana puráca'alo lana'aquejami nacú, que caja ricá. Pu'uhuaré Tupana puráca'alo nacú pura'ajeño uncá jema'alaño ra'apiyá. Napechu queja nemacá rinacu.

<sup>12</sup> Tupánaja calé quemari huanacu naca palani, huala'acáloje penaje. Ricá caja quemari huanacu méqueca rijllo nacaje huala'acare, palani ca'ajná, uncá ca'ajná. Ricá caja hue'epiri hue'emátacana capichácajo liyá, huema'acachu ra'apiyá. Rihue'epí caja huacapichátacana, uncachu huema'alá ra'apiyá. Ñaquele uncá icá calé quemajeño ina'uqué nacú méqueca Tupánajlo nacaje nala'acare.

*Uncá iná hue'epila méqueca iná i'imajica muní yucuna marí:*

<sup>13</sup> Chuhua jema'á. Re ca'ajná pajluhua inaquiya, marí que ripechu: "Chuhujá ca'ajná, muní ca'ajná nu'ujnáje ají ño'ojó pajimila ejo. Re nu'umajé pajluhua jarechí quetana. Nuhuarúhua'aje nacaje, no'ocáloje ajopánajlo ricá rihuemí aú penaje. Marí que nucánajica nujluhua liñeru," que ca'ajná ripechu nacú r'i'imajica.

<sup>14</sup> Uncá iná hue'epila méqueca iná i'imajica muní. Majopéjaruna huecá, isamani queja. Iná amaca isamani cúhua'aco mequetánaja; quéchami ra'apaca.

<sup>15</sup> Marí que quemacana nacú palani: Maare huecá eja'ahuá chu Tupana palamane. Ñaquele huemá marí que: "Tupana huátajica ee hue'emajé. Rihuátajica ee huala'ajé huasápaca'ala." Marí que huanacuhú quemacana palani.

<sup>16</sup> E'iyonaja icá la'año icó hue'epiño que, nacaje ila'ajicare nacú. Marí uncá paala.

<sup>17</sup> Iná hue'epí ca'ajná palá la'acana. Uncachu iná la'alá ricá, iná la'á pu'uhuaré raú.

## 5

*Meque ri'imajica cajrú le'ejelárunajlo yucuna marí:*

<sup>1</sup> Chuhua nuhuátaca nacaje nacú quemacana cajrú liñeru minánajlo. Iyá cajrú ijluhua. Jahuíyo'oqueja iyaca, chapú caje yajhué amájicale.

<sup>2</sup> Ilé nacaje ijña'acare ijluhua i'imacá, caja rapichó. Caja pi'iréjena apíro'otaño a'arumacá palá nojé.

<sup>3</sup> Caja iliñéroute a'apitari rirahuá. Raú iná hue'epí ijluhua calé ilamá'ataca iliñéroute. Ma'aque'runa huani icá. Pachá quera'atani capichátajeri icá inane hua'ató. Ipitá ijluhua cajrú le'ejepelaji i'imacá. Tupana quemájeri piyuqueja ina'uqué nacú méqueca rijllo nacaje nala'acare marí eja'ahuá chu ne'emacá quetana. Yehuicha rihuacajé iphájica rená chojé.

<sup>4</sup> Ijhua'até sápa'ajeño ña'año ijlo cajrú richa imena e'iyayá. E'iyonaja uncá a'alá najllo nasápaca'ala huemí. Tupana amari liñeru nasápaca'ala huemí penaje. Rihue'epí chapú ila'acá necá. Raú ijhua'até sápacañó aca'año cajrú imaná. Tupana jema'ari méqueca naca'acá imaná. Je'echú chu i'imacáloje huacára'ajeri ricá, Tupana.

<sup>5</sup> Marí eja'ahuá chu cajrú iliñéroute. Aú ila'á maare majopeja ihuátaca que. Paminá lamára'ari jémana piracana. Cajrú napitacó ee paminá nori necá ne'ími chaya. Ilé que caja ipitacá ijluhua nacaje, Tupana huajácaloje icá richona penaje.

<sup>6</sup> Icó, cajrú liñeru minana, puráca'alo aú nenó ajopana ina'uqué. Palá la'acañó necá. E'iyonaja ipenó necá ipuráca'alo aú. Uncá meque nala'alá nanacojó icá.

*Ila'acá piyá tu'ujné ipéchuhua yucuna marí:*

<sup>7</sup> Nojena, cachuhua caje nacuja i'imá, a'ajná Jesucristo pa'ajico piño majó ejená. Ihue'epí nacaje icha ijí ejátajeri nacojé. Rejata nacaje icha ijí piyuque. Riñápataca rejátacana ejomí cachuhua caje nacú rihuata ritahuá'aco a'ajná rarúca'aca ejená. Yahuisá quetana rihuátaca ricá cachuhua caje aú ja rarúca'aca ejená. Raú rijña'á rijluhua palá nojé richa.

<sup>8</sup> Ñaque' caja i'imacá cachuhua caje nacuja a'ajná Jesucristo pa'ajico majó ejená. Ila'á ipéchuhua caphí. Yehuicha riphaca Jesucristo pa'acó majó jená chojé.

<sup>9</sup> Nojena, aca'aniya pamanáchaca, Tupana huajaca piyá icá. Tupana quemájeri piyuque ina'uqué nacú méqueca rijllo piyuque nacaje nala'acare, marí eja'ahuá chu ne'emacá quetana. Yehuicha huani riphaca rená chojé, ñaque' r'i'imacáloje penaje.

<sup>10-11</sup> Nojena, ihue'epí méqueca Tupana puráca'alo ja'apátajeñomi chuna la'acá i'imacá. Ajopana ina'uqué la'año chapú ne'emacá. E'iyonaja uncá nayurila Tupana puráca'alo yucuna i'imacana najló raú. Ají que la'acaño nacú huemá: "Palá péchuruna" que. Chapú nala'acá necá. E'iyonaja uncá nayurila Tupana ja'apiyá jema'acana. Ilé que la'acana palani, huala'acáloje ñaqué caja penaje. Caja jema'á Jobmi chu yucuna, méqueca ri'i'macá. Ramá cajrú chapú caje yajhué i'imacá. E'iyonaja uncá riyurila Tupana chojé caphí i'imacana raú. Caja ihue'epí méqueca Tupana la'acá ricá palá huani caja penaje i'imacá. Raú iná hue'epí méqueca Tupana hue'epica camu'ují ina'uqué nacú.

<sup>12</sup> Nojena, richaje huani nuhuátaca ila'acá marí que: Imaniya Tupana que, apú hue'epícaloje quehuaca ricá raú penaje. Apú nacaje marí eja'ahuá chu i'imacare íi a'acana aú, imaniya caja quehuaca ricá que. Apú nacaje íi a'acana aú imaniya caja quehuaca ricá. Imacachu a'a que, caja queja ricá. Imacachu caja uncá que, caja queja caja ricá. Marí queja imájica nacaje nacú, Tupana huajaca piyá icá.

<sup>13</sup> Re ca'ajná e'iyajena ilérohua, amaño chapú caje yajhué me'etení. Ijló numá: Ipura'ó Tupana hua'até. Re ca'ajná e'iyajena, pu'ují ipechu. Ijló numá: Ataní Tupana yale.

<sup>14</sup> E'iyajena ca'ajná itámina icá. Ijló numá: Eco ihuá'a Jesucristo ja'apiyá jema'ajeño amájeño maná, ne'ejnacáloje ichaje Tupana hua'até pura'ajó inacu penaje. Napura'ajó Tupana hua'até, ritejmo'ótacaloje icá penaje. Naco'ojé caja nacaje jilá ihuilá e'iyajé. Ejomi Jesucristo puráca'alo aú nemaje Tupánajlo, ritejmo'ótacaloje icá penaje.

<sup>15</sup> Caphí péchuri Tupana chojé iná i'imacachu, iná pura'ó Tupana hua'até. Raú Tupana tejmó'ótajeri natámina. Raú caja ramajo natámina chaje pu'uhuaré nala'acare liyá.

<sup>16</sup> I'imá pu'uhuaré ila'acare yucuna pajlocaca. Ipura'ó Tupana hua'até panacuhuácaca. Raú Tupana tejmó'ótajeri icá itámina caje chiyá. Palá péchuri pura'acochu huechi Tupana hua'até, cajrú Tupana a'acá riñaté palá la'acana aú.

<sup>17</sup> Ñaqué ri'i'macá Elíasmi chujlo i'imacá. Tupana puráca'alo ja'apátajeri ri'i'macá. Marí huecá que caja ri'i'macá. Huechi ripura'acó Tupana hua'até i'imacá, juni ja'acó piyá, ina'uqué pechu pajno'ocóloje Tupana ejo raú penaje. Raú uncá huani juni ja'aló i'imacá. Hueji quele jarechí eyá apú pe'iyojé quetana uncá juni ja'aló i'imacá.

<sup>18</sup> Quéchami ripura'acó piño Tupana hua'até, juni ja'acóloje penaje. Raú juni ja'aró piño. Reyá a'ajná ño'ojó nacaje icha ijimi iphari piño. E caja nacaje arúca'ari piño reyá a'ajná ño'ojó.

<sup>19</sup> Nojena, apala apú inaquiyana caja ca'ajná riyurí Tupana huátaca que la'acana. Apú ca'ajná pura'aró rijhua'até, ripa'acóloje richojé piño penaje.

<sup>20</sup> Ihue'epí marí: Apú yuricachu pu'uhuaré la'acana riliyó pipuráca'alo aú, pi'imatá ricá capichácajo liyá. Raú caja Tupana amaro richaje cajrú pu'uhuaré rila'acare liyá. Maáreje riyucuna tajnaro.

## 1 PEDRO

*Puráca'aloji San Pedro huacára'acare Jesucristo ja'apiyá jema'ajéñojlo marí:*

<sup>1</sup> Pedro nucá. Pajluhuaja Jesucristo huacára'acarena naquiayana nucá. Ijló nuhuacára'a marí puráca'aloji. Caja itamáca'ato ajopana te'eré nacojé, ajopana te'eré nacojé que. Re inaquiyana Ponto te'eré nacú. Ajopana inaquiyana Galacia te'eré nacú. Ajopana piño Capadocia te'eré nacú, Asia te'eré nacú, Bitinia te'eré nacú re caja inaquiyana.

<sup>2</sup> Júpimi huani Tupana i'ihuapari rijluhua icá, uncá chiyó i'imá. Rihuacajé caja rihue'epí rile'ejena ina'uqué penájena icá. Chuhua ñaqué icá. Caja ra'á Ripechu ijló. Raú jema'á Jesucristo ja'apiyá, rica'acáloje inaquiyá pu'uhuaré ila'acare penaje. Marí que ri'imacáloje huajló penaje, ritaca'á a'ahuaná apiyáccanami nacú huachaya i'imacá. Nephácare ricá itapuhua aphumi chiyá cajú rira i'ijnacá. Marí que ritaca'acá huajlojé penaje i'imacá. Júpimi que marí queja Tupana pechu nacú ri'imacá marí que caja rila'acana.

Nuhuata i'imacá Tupana palamane aú palá. Nuhuata caja rila'acá ipechu palá.

*Je'echú chu i'imajícaño yucuna marí:*

<sup>3</sup> Palánijlaca huapura'acó palá huani Tupana nacú, íqui'i huani rihue'epícale huamu'ují. Huahuacára'ajeri huani Jesucristo; Rara'apá Tupana. Ripalamane aú calé riyani huani huecá me'etení. Huahue'epí je'echú chu i'imajícaño penájena huecá. Tupana macápo'ori Jesucristo taca'acaje chiyá i'imacá. Aú calé huahue'epí ñaqué caja rimacápo'otajica huecá, hue'emacáloje je'echú chu penaje.

<sup>4</sup> Ijló calé nacaje i'imajeri, Tupana lamá'atacare ijló je'echú chu. Nacaje rilamá'atacare ijló, uncá capichácajo penaje calé ricá. Uncá caja pu'uhuaré caje i'imalá rinacu. Caja ñaqueja ri'imajica jimáreni ijló.

<sup>5</sup> Ica i'imajeño je'echú chu matajnaco. Ripechu aú ja Tupana a'arí rinacojé icá, i'imacá piyá capichájeño penaje rijló. Marí que ri'imajica ijló, ipechu i'imacale caphí richojé. Eja'ahuá iphájica caja penaje rená chojé huacajé, ri'imataje icá je'echú chojé. Ejéchami pu'uhuacá nacaje amájico ijló.

<sup>6</sup> Ñaqué i'imacale ipechu i'imá pu'ují marí hue'epícana nacojé. Me'etenija calé ca'ajná amá que'iyapejé chapú caje yajhué. E'iyonaja i'ijnatá pu'ují ipéchuha nacaje palani i'imajícare ijló nacú.

<sup>7</sup> Tupana yuriri iná amaca chapú caje yajhué. Raú Tupana atá'ari iná, ramácaloje méqueca iná pechu rinacu raú penaje. Caphí iná pechu i'imacachu Tupana chojé chapú caje yajhué amácana aú, palani huani iná pechu Tupánajlo. Palani rijló, iná pechu i'imacare caphí richojé. Iqui'i rihuátaca iná pechu i'imacá caphí richojé. Iqui'i ina'uqué huátacare oro, cahuemini huani ri'imacale. Capichácajo penaje oro. Quera'atani huani aú iná la'á ima'á ricá, pu'uhuareni ñaacóloje re'iyayá penaje, riyurícolaje oro huani raú penaje. Ñaqué caja Tupana ca'acá iná liyá pu'uhuaré iná la'acare, chapú caje yajhué amácana aú, iná yurícolaje palá la'ajeri huani raú penaje. Caje la'arí iná pechu palá Tupánajlo. Pu'uhuareni huajló oro, caphí huapechu i'imacá Tupana chojé ijlunami chojé. Caphí huapechu i'imacachu Tupana chojé, palá huani Tupana pechu i'imajica huanacu. Palá huani rila'ajica huecá raú, Jesucristo iphájica majó huacajé.

<sup>8</sup> Iqui'ija huani ihuátaca Jesucristo. Uncá amálare ricá, e'iyonaja ihuata iqui'ija huani ricá. Uncá amálare ricá, e'iyonaja caphí ipechu richojé. Pu'ují huani caja ipechu rinacu Tupana palamane. Palá huani rila'acá huecá. E'iyonaja uncá puráca'aloji i'imalá huajló, hue'emacáloje richuhuano riyucuna penaje.

<sup>9</sup> Pu'ují ipechu, Tupana i'imatájicale ipechu rijluhua. Marí caje penaje ipechu i'imacá caphí richojé me'etení.

<sup>10</sup> Júpimi Tupana puráca'alo ja'apátajeñomi chuna i'imacá huacajé, nahuata rihue'epícana méqueca Tupana i'imatájica rijluhua ina'uqué capichácajo liyá. E'iyonaja uncá nahue'epila rinacojé. Aú napalamáta palá huani riyucuna, nahue'epícaloje méqueca ri'imajica nacojé penaje. Riyucúnaja calé ne'emaqué ina'uquejlo. Palá Tupana la'ajicare ya'ajná i'imajícaño nacú napura'acó i'imajica.

<sup>11</sup> Jesucristo pechu i'imari ne'iyá i'imacá. Rimá najló méqueca ri'imajica uncá chiyó ri'imá. Ripechu aú rimá najló marí que: "Ricá Tupana huacára'ajicare majó, ña'ajeri chapú caje yajhué panacu. Pumí chiyó palá huani Tupana la'ajica ricá." Tupana puráca'alo ja'apátajeñomi chuna atá'ajojla rihue'epícana, nahue'epícaloje na ina'uqueca ri'imajica penaje. Méquechamica riphájica majó nahuata caja hue'epícana.

<sup>12</sup> E'iyonaja Tupana quemari najló i'imacá:

—Uncá ijlojé penaje calé nupuráca'alo, nuhuacára'acare ja'apátacana ajopánajlo. A'ajná ño'ojó i'majícañojloje penaje ricá —que Tupana quemacá najló.

Ñaquele huajlojé penaje napuráca'almi yurico. Tupana huacára'ari Ripechu je'echú chiyá cha'apá ina'uqué e'iyajé i'amacá. Rejomi ra'apiyá que nucá, ajopana huanaquiyana hua'até, i'mañó ijlo riyucuna i'amacá. Tupana i'imataca ina'uqué rijluhua capichácajo liyá yucuna hue'emá ijlo i'amacá. Palani huani riyucuna. Tupana hua'atéjena, je'echú chu i'imañaño, huátaño caja rinacójé hue'epicana i'amacá.

*Tupana huátari ina'uqué i'amacá palá i'imañaño yucuna marí.*

<sup>13</sup> Palá huani Tupana la'acá huanacu. Ñaquele i'ijnatá ipéchuhua palá méqueca ila'ajica rehuá, ila'acáloje palá raú penaje. Jesucristo iphájica majó huacajé, palá huani Tupana la'ajica icá. Ñaquele ipechu i'imá caphí rila'ajicare ijlo nacú.

<sup>14</sup> Tupana yaní i'imacale, jema'á ra'apiyá. Uncá chiyó ihue'epí Tupana nacojé, huéchiruna i'amacá pu'uhuaré la'acana nacú, imanaicho la'acana nacú. I'imaniya ñaque caja chuhuaca.

<sup>15</sup> Tupana i'ihuapari icá rijluhua ajopana ina'uqué e'iyayá. Uncá rihue'epila pu'uhuaré la'acana. Ñaquele chuhuaca i'imá palá péchuruna, i'amacáloje Tupana i'amacá que caja.

<sup>16</sup> Marí que Tupana puráca'alo lana'aquejami quemacá: “Palá péchuri nucá. Uncá nuhue'epila pu'uhuaré la'acana. Ñaquele i'imá nucá que caja palá péchuruna,” que Tupana quemacá.

<sup>17</sup> Tupana Huara'apá hua'até pura'ajeño icá. Iphá ra'apí marí eja'ahuá chu i'amacá que-tana. Eja'ahuá tajnájico huacajé, Tupana quemájeri piyuqueja ina'uqué nacú pajluhuano, pajluhuano que méqueca rijló nacaje huala'acare marí eja'ahuá chu hue'emacá quietana, palani ca'ajná, uncá paala ca'ajná. Pajimato rihuajájica pu'uhuaré la'ajeño. Ñaquele iphá ra'apí ñaqueja maare i'imajica quietana.

<sup>18</sup> Tupana i'imatari icá pajlácaje puráca'aloji liyá, ichi'inami chuna quemájacare nacú ijlo. Uncá na penaje calé napuráca'almi. Cajrú Tupana a'acá rihuemí i'amacá, ri'imatácaloje icá capichácajo liyá penaje. Caja ihue'epicare, uncá ra'alá oro, plata caje macá rihuemí penaje i'amacá. Tajnácajo penaje quele.

<sup>19</sup> Jesucristo, uncá hue'epílare pu'uhuaré la'acana, ricá a'ari hue'ematácana huemí i'amacá. Ritaca'á huachaya a'ahuaná apiyácanami nacú i'amacá. Re rira i'ijnari raphú chiyá i'amacá. Iqui'ija huani rila'acá huécá palá raú.

<sup>20</sup> Uncá chiyó Tupana queño'óta eja'ahuá, Tupana quemari Jesucristo nacú, ritaca'acáloje ina'uqué chaya penaje. Yehuicha marí eja'ahuá iphaca rená chojé, ritajnácolaje penaje. Ejéchami Tupana a'acá pu'uhuacajé ijlo Jesucristo, rila'acáloje icá palá huani raú penaje.

<sup>21</sup> Jesucristo chojé calé icá jema'año Tupana ja'apiyá. Tupana macápo'ocare penájemi ricá. Jesucristo palamane aú ipechu i'imá caphí Tupana chojé.

<sup>22</sup> Tupana Pechu aú icá a'año quehuácaje puráca'aloji inacójó. Marí caje aú ica'á inaquiyó pu'uhuaré caje, i'imagare ipechu nacú, i'amacáloje palá péchuruna raú penaje. Ñaquele chuhua ihuata iqui'ija ajopana Jesucristo ja'apiyá jema'ajeño. Numá ijlo piño ihuátacaloje pecohuácaca iqui'ija, piyuqueja ipechu aú, nacaje ila'acare aú hua'ató.

<sup>23</sup> Huajé ipechu aú i'imá me'etení, Tupana le'ejena ina'uqué i'imacale. Ripuráca'alo a'acana inacójó aú iqueño'ó riyani i'imacana. Uncá itajnájajo je'echú chu raú. Ina'uqué tajnaño. Eyá ijlo uncá ñaque calé ricá. Uncá tajnácajo penaje calé Tupana; cajmúnija ri'imajica. Ica i'imajeño ñaque caja matajnaco, riyani i'imacale Jesucristo palamane aú.

<sup>24</sup> Marí que Tupana puráca'alo lana'aquejami quemacá ina'uqué nacú:

Jimichi i'amacá que caja ina'uqué.

Jimichi i'imari mequetánaja.

Quéchami ritaca'acá.

Quéchami rimeríya'aco.

Rihuí i'imari ñaque caja mequetánaja.

Quéchami rihuijño'oco.

Ejomi ricujrúca'aco.

Ñaque caja nacaje ina'uqué la'acare i'amacá mequetánaja.

A'ahuaná ihuí queja caja ricá nala'acare.

Ñaque caja ina'uqué i'amacá mequetánaja.

Quéchami natajnaco.

<sup>25</sup> Eyá Tupana puráca'alo, uncá ñaque calé ricá. Matajnaco ri'imajica.

Ricá Tupana puráca'alo rimacare nacú, huanaquiyana ja'apátaño ijlo i'amacá. Ne'emá ijlo Tupana i'imataca ina'uqué capichácajo liyá yucuna, jema'acáloje ra'apiyá penaje. Riyucuna ne'emacare ijlo i'amacá, Tupana puráca'alo ricá. Ica jema'año ra'apiyá. Ñaquele icá i'imajeño matajnaco caja je'echú chu.

## 2

<sup>1</sup> Ñaquele iyurí iliyó piyuqueja pu'uhuaré ila'acare, imanaicho ila'acare hua'ató. Iyurí caja ipajlácare iliyó. Ila'aniya icó palájne'equena que ajopánajlo majopeja, napechu i'ímacáloje palá inacu penaje. Ihuó i'ímaniya caja chapú ajopana cha, nachá'ataca aú icá. Iyurí caja iliyó chapújra'acajo.

<sup>2</sup> Chuhua i'imá huajé moto'ocaño que. Cacáme'e necá chu'uchú i'iracana nacú. Ñaque caja i'ímacá cacáme'e Tupana puráca'alo lana'aquejami hue'epicana nacú, ila'acáloje richaje, richaje que rimacá que penaje. Raú caja Tupana i'ímatájeri icá capichácajo liyá.

<sup>3</sup> Caja ihue'epí méqueca Tupana la'acá inacu palá huani. Ñaquele huechí a'acá Tupana puráca'alo inacojó.

*Jesucristo chojé ina'uqué i'ímacó capichácajo liyá yucuna marí:*

<sup>4</sup> I'ijná huahuacára'ajeri huani Jesucristo ejo ipechu aú. Uncá tajnácajo penaje calé cajmuchaji a'ajeri ricá. Tupana i'ihuapari rijluhua ricá, ajopana chaje huani ri'ímacale. E'iyonaja eja'ahuá chu ri'ímaqué huacajé nanaquiyana quemañó rinacu: "Uncá ina'uquéleri ricá" que. Aú calé nahuata ricapichátacana i'ímacá.

<sup>5</sup> Icó piño i'ímaño ri'ihuapacárena naquiyana. Jesucristo hua'at'éjena icá chuhuaa, Ripechu i'ímacale e'iyá. Ra'á ijló Ripechu i'ímacá, i'ímacáloje matajnaco ra'apiyá raú penaje. Iyurí ichó Tupánajlo, jema'acáloje Ripechu ja'apiyá penaje. Iyurí caja ichó rijló, ila'acáloje rihuátaca que penaje. Marí que iná la'acá, ri'ímacáloje palani ina'uquéloje penaje. Jesucristo a'arí iñaté, ila'acáloje nacaje palani Tupánajlo penaje. Raú palá Tupana pechu i'ímajica nacaje ila'acare nacú. Marí que ila'ajica Jesucristo palamane aú.

<sup>6</sup> Marí que Tupana puráca'alo lana'aquejami quemacá Jesucristo nacú:

Marí que Tupana quemacá i'ímacá:

Nu'uhuapajé nujluhua pajluhuaja ina'uqué ne'iyayá, ajopana i'ímacáloje palá ripalamane aú penaje.

Jerusalén ejo nuhuacára'aje ricá, ri'ímacáloje ajopana chaje péchuri penaje.

Ricaja calé chojé ina'uqué i'ímajeño palá.

Ina'uqué pechu i'ímajica ee caphí richojé, uncá napechu la'alajo ujhú riliyá, que Tupana quemacá Jesucristo nacú i'ímacá.

<sup>7</sup> Ijló, ra'apiyá jema'ajeñojlo, ajopana ina'uqué chaje huani Jesucristo. Eyá uncá jema'alaño ra'apiyajlo, Tupana puráca'alo lana'aquejami quemacá que Jesucristo nacú, queja najló ricá. Marí que rimacá rinacu:

Pajluhuaja ina'uqué i'ímajeri. Uncá nahuátalaje ricá. Ricá, uncá nahuátalaje, i'ímajeri piyuque ina'uqué chaje péchuri.

Richojeja calé ina'uqué i'ímajeño palá.

<sup>8</sup> Apa'amá Tupana puráca'alo lana'aquejami quemari marí que:

Ne'iyajena quemajeño rinacu:

"Uncá ina'uquéleri ricá" que.

Raú nala'ajé necó chapú.

Uncá nahuátalaje ricá pachá, Tupana huajájeri necá.

Marí que ri'ímajica najló, uncá pachá na'alá nanacojó Tupana puráca'alo. Ñaque penaje Jesucristo i'ímajeri najló.

*Tupana hua'at'éjena yucuna marí:*

<sup>9</sup> Eyá icá, ina'uqué Tupana i'ihuapacárena rijluhua icá. Ra'apiyá i'ímacaño icá, ila'acáloje ihuacára'ajeri Tupánajlo nacaje penaje. Uncá pu'uhuaré la'ajeño calé icá chuhuaa. Tupana hua'at'éjena icá; ríle'ejena ina'uqué icá. Tupana i'ihuapari rijluhua icá, i'ímacáloje riyucuna ajopánajlo penaje. Icó i'ímajeño palá huani Tupana la'acá ina'uqué yucuna ajopana ina'uquejlo. Caja Tupana i'ímatari icá majopéjari puráca'aloji liyá, i'ímacáloje quehuácaje puráca'aloji ja'apiyá penaje. Palani huani inajlo ripuráca'alo.

<sup>10</sup> Júpimi uncá i'ímalá Tupana le'ejena ina'uqué i'ímacá. Eyá chuhuaa Tupana le'ejena icá. Uncá chiyó i'ímalá ríle'ejena, uncá na calé hue'epíqueri imu'ují i'ímajica. Chuhuaa Tupana hue'epiri imu'ují, ríle'ejena i'ímacale.

*Iná la'acáloje Tupana huátaca que penaje yucuna marí:*

<sup>11</sup> Nojena, iquí'ija nuhuátacarena icá. Uncá iñacajela huani calé maare marí eja'ahuá chu. Je'echú chu iñacajela huani. Ajopana te'eré eyájena queja icá marí eja'ahuá chu. Ijló numá: Ila'aniya imanaicho, pu'uhuaré caje ipechu queja. Ilé que la'acana apichátari iná pechu Tupánajlo.

<sup>12</sup> Ila'á caja palá ina'uqué e'iyohuá, uncá jema'alaño Tupana ja'apiyá. Me'etení ca'ajná napura'ó pu'uhuaré inacu. Uncá ina'uquélaruna nacú napura'acó que caja napura'acó inacu pu'uhuaré me'etení. Aquijñojo Tupana a'ajeri piyuqueja ina'uquejlo rihuemí.

Nacaje huala'acare marí eja'ahuá chu hue'emacá quetana, huemí ra'ajé huajló rihuacajé. Rihuacajeja nahue'epeje palá ila'acá i'imacá. Raú napura'ajó palá Tupana nacú.

*Ri'imacáloje palá Tupánajlo penaje ila'ajé marí que:*

<sup>13</sup> Re ijhua'até ihuacára'ajeño. Ajopana ina'uqué a'acárena ihuacára'ajeño penájena necá. Jema'á na'apiyá. Jema'á caja nachaje huani huacára'ajeri ja'apiyá, ra'apiyá huacára'ajeño hua'até, quele.

<sup>14</sup> Richaje huacára'ajeri huacára'ari ra'apiyá huacára'ajeño, nahuajácaloje uncá ina'uquélaruna penaje. Rihuacára'a caja ra'apiyatéjena, nala'acáloje palá la'acaño palá penaje.

<sup>15</sup> Tupana huátari ila'acá palá. Palá la'acana aú uncá napura'alajo pu'uhuaré inacu. Raú imanúma'ataje uncá hue'epilaño, mapéchuruna, cajena.

<sup>16</sup> Caja iyurí iliyó pajlácaje puráca'aloji, ila'acáloje piyuqueja nacaje Tupana huátaca que raú penaje. Uncá jácho'olo richiyá, ila'acáloje pu'uhuaré ihuátaca que penaje.

<sup>17</sup> Naquele chuhua iphá piyuqueja ina'uqué ja'apí. Ihuata caja íqui'ija ajopana Jesucristo hua'atéjena. Iphá caja íqui'í Tupana ja'apí. Iphá caja ajopana chaje huacára'ajeri ja'apí.

*Chapú caje yajhué ña'acana panacu yucuna marí:*

<sup>18</sup> Apú hua'até sápaajeñojlo numá marí que: Jema'á isápaca'ala nacú huacára'ajeri ja'apiyá. Iphá caja ra'apí. Apala isapa ca'ajná pajlájne'eque hua'até; ina'uqué huani ca'ajná ricá isapa hua'até. Iphá ra'apí. Eyá isapa ca'ajná uncá ina'uquéleri hua'até. Iphá caja ra'apí.

<sup>19</sup> Apala ila'á piyuqueja nacaje palá Tupana huátaca que. Rijimaje ca'ajná nala'á icá chapú. Ijña'ajica ee ricá panacu, palá Tupana la'ajica icá raú.

<sup>20</sup> Eyá naña'atá ca'ajná icá, uncá ina'uquélaruna i'imacale pachá. Uncá na penaje calé ijña'á panacu ricá. Uncá ri'imalá palá Tupánajlo, ila'acale pu'uhuaré. Ila'acachu pu'uhuaré, marí que iña'atácana palani. Apala chapú nala'acá icá, palá ila'acá e'iyonaja. Ijña'ajica ee panacu ricá, marí caje i'imajeri palá Tupana nacú.

<sup>21</sup> Marí que i'imacáloje penaje, Tupana i'ihuapari rijluhua icá ajopana ina'uqué e'iyayá. Jesucristo ña'arí chapú caje yajhué panacu ichaya i'imacá. Raú ramata huecá chapú caje ña'acana panacu aú, huajña'acáloje ñaqueé caja chapú caje yajhué panacu penaje.

<sup>22</sup> Uncá Jesucristo la'alá pu'uhuaré i'imacá. Uncá caja na hua'até calé ripajlá i'imacá.

<sup>23</sup> Napura'acó rinacu pu'uhuaré i'imajica. E'iyonaja uncá rapiyácaque necá pu'uhuarieni puráca'aloji aú. Chapú nala'ajica ricá. E'iyonaja uncá rimaqueé nanacu: "Chuhua nupura'ajico nule'ejé jacumí nacú." Riyurique richó Tupánajlo, rilamá'atacaloje rijló puráca'aloji huajloje penaje. Tupana hue'epiri pu'uhuarieni puráca'aloji lamá'atacana.

<sup>24</sup> Pu'uhuaré huala'acare pachá, Jesucristo amari chapú caje yajhué huajloje penaje. Nenoca ri'imacá huacajé, cajú raphú i'imacá rinacú. Ritaca'á huachaya a'ahuaná apiyáccanami nacú i'imacá, ricá'acáloje hualiyá pu'uhuaré huala'acare, huamanaicho huala'acare raú penaje. Lanaquiyá huala'acáloje palá Tupana huátaca que penaje. Marí caje aú hue'emaó Tupana huajájica huecá chiyá.

<sup>25</sup> Capichájeño penájena i'imacajla. Caja ipa'ó chuhua i'imacáloje Jesucristo ja'apiyá jema'ajeño penaje. Ricá a'arí icá rinacójó. Ipechu hua'aphé caja ricá.

### 3

*Marí que huá'acajeñomi i'imajica pajhua'atéchaca:*

<sup>1</sup> Marí puráca'aloji huá'acajeñomi inaánajlo: Jema'á iluna ja'apiyá. Apala iluna ca'ajná uncá jema'alaño Tupana ja'apiyá. E'iyonaja ila'á palá nanacu. Namájica ee palá ila'acare, napechu ja'ajó Tupana ja'apiyá jema'acana ejo. Raú uncá naje calé ipura'ó najhua'até Tupana ja'apiyá jema'acana nacú.

<sup>2</sup> Namaca aú palá huani ila'acá ina'uqué nacú, aú ja calé nema'ajé ra'apiyá. Namaca aú palá iphaca Tupana ja'apí, aú ñaqueé caja nephájica ra'apí.

<sup>3</sup> Ila'aníya icó paláruna queja marí que: Ja'atáníya palá huani ihuilá, ramácoloje palá huani ajopana ina'uquejlo penaje. Ila'aníya icó paláruna que cahuemí nojé i'ijhuí chiyá cuhuá'atajona aú. Naqué caja ila'aníya icó paláruna que, cahuemí nojé iná a'acare iná ijnehuá aú, cahuemí nojé a'arumacaji aú, caje macá aú. Ila'aníya icó paláruna que, ajopana ina'uqué amácaloje icá palá penaje.

<sup>4</sup> Eyá marí que ila'ajica aú i'imajé palá Tupana huátaca que: I'imá palá péchuruna. Ila'aníya ima'á icó. I'imá ipe'é péchuruna, mayuchéruna. Marí que i'imacana aú i'imajé palani Tupánajlo. Marí que la'acana rihuata íqui'ija huani.

<sup>5</sup> Marí que caja inaana jupichúnami i'imacá palá la'acaño. Nahue'epí Tupana huátaca que la'acana natucumó. Caphí napechu i'imajica Tupana chojé. Naluna ja'apí iphájeño ne'emajica.

<sup>6</sup> Marí que Sárami cholo i'imajica: Palá roma'ajica ruyajnamí chu ja'apiyá. Rumaqué ruyajnamí chu nacú: "Nuhucára'ajeri ricá" que. Palá la'ajeyo ru'umajica. Caphí rupechu i'imajica ruquero'ocó piyá. Ñaque caja ila'ajica ee, i'imajé ru'umacá que caja.

<sup>7</sup> Ñaque caja numacá nacaje nacú huá'acajeñomi achiñánajlo: Matejmurú iná yajalo iná liyá. Ñaquele iná i'imá ina'uqué huani iná yajalo hua'até. Iná iphá caja iná yajalo ja'apí. Uncachu iná i'imalá palá iná yajalo hua'até, uncá Tupana a'alá rinacojó iná, iná pura'acó ee rijhuo'até. Tupana hue'epiri imu'ují i'imagá. Áu calé ra'á ijlo cajmuchaji, i'imagáloje matajnaco je'echú chu raú penaje. Pajñacani ra'acá ijlo matajnaco i'imagaje inaana hua'até. Ñaquele iphá iluna ja'apí. I'imá caja najhua'até palá.

*Nala'acá chapú palá la'acaño yucuna marí:*

<sup>8</sup> Chuhua marí nacú numájica caja penaje ijlo: Ipechu i'imá pajluhuaja chuhua pájhu'atéchaca. Ihue'epí caja pamu'ujichaca. Jesucristo ja'apiyá jema'ajeño icá. Ñaquele ihuata íqui'ija pecohuácaca. I'imá ipe'é péchuruna pajhua'atéchaca. Ila'aníya caja inacuhá hue'epiño que huani.

<sup>9</sup> Nala'ajica ee chapú icá, apiyácaníya necá inacojó chapú nala'acana áu. Pu'uhuaré napura'ajico ee inacu, apiyácaníya caja necá pu'uhuaeni puráca'alojí áu. Ila'aníya necá ilé que. Ila'á necá palá. Marí que ila'acáloje penaje, Tupana i'ihuapari icá rijluhua ajopana ina'uqué e'iyayá. Rila'acáloje palá inacu penaje caja ri'ihuapá rijluhua icá ne'iyayá.

<sup>10</sup> Marí que Tupana puráca'alo lana'aquejami quemacá rinacu: Iná huátacachu palá, queyajupa i'imagana, iná la'á marí que:

Uncá iná pura'aló pu'uhuaré.

Uncá caja iná pajlala.

<sup>11</sup> Iná yurí caja pu'uhuaré la'acana iná liyó.

Palá la'acánaja iná hue'epí iná tucumó.

Iná huata caja ina'uqué hua'até i'imagana palá.

Marí que i'imagana nacuja iná i'ijnataca iná péchuhua.

<sup>12</sup> Marí que la'acana i'imari palani inajlo, Tupana a'acale rinacojó palá la'acaño.

Ñaque caja ra'acá rinacojó palá la'acaño puráca'alo napura'acó áu rijhua'até.

Uncá huani rihuátala pu'uhuaré la'ajeño, que ripuráca'alo lana'aquejami quemacá.

<sup>13</sup> Ihue'epíjica ee palá la'acana itucumó, uncá ipechu la'alaju ujhuí na'apejé nala'acá áu icá chapú.

<sup>14</sup> Apala nala'á icá chapú, palá la'acaño i'imagale. Ipechu i'imá pu'ují nala'acá icá chapú e'iyonaja. Iquero'oníyo caja ina'uqué piyá. Ihue'epíniya caja ijluhua.

<sup>15</sup> Iphá Jesucristo ja'apija. Iyurí íchó rijlo, ri'imachi Ihucára'ajeri penaje. I'ijnatá ipéchuhua méqueca ímajica ajopánajlo Jesucristo nacú, nemájica ee ijlo: "¿Naje ilé que ipechu Jesucristo nacú?" I'imajica ee najlo riyucuna, ila'aníya icó nachá'atajeño que. Iphá na'apí.

<sup>16</sup> Jesucristo ja'apiyá jema'ajeño icá. Ñaquele palá ila'ajica ina'uqué nacú raú. Apala ina'uqué naquiyana pura'ajeño pu'uhuaré palá ila'acare nacú. Ila'á piyuqueja nacaje palá, ipechu cahuíla'aco piyá nacaje pu'uhuaré ila'acare nacojé. Palá ila'acare áu pu'uhuaré inacu pura'ajeño apáña'ajeño na'apihua.

<sup>17</sup> Nala'acá áu icá chapú, palá ila'acare jimaje, palani ijlo ricá. Tupana huátacachu nala'acá icá marí que, palani ijlo ricá. Eyá nala'aqueila icá chapú, chapú ila'acare ajopana ina'uqué chona ca'ajná, imanaicho ila'acare chona ca'ajná, uncá huane pachá ritaca'á huachaya i'imagá. Ila'á ca'ajná palá, e'iyonaja nala'á icá chapú. Marí palani Tupánajlo.

<sup>18</sup> Ñaque caja Jesucristo ña'acá chapú caje yajhué panacu i'imagá. Nenó ri'imagá. Pu'uhuaré huala'acila'acare jimaje, palani ijlo ricá. Tupana huátacachu nala'acá icá marí que, palani ijlo ricá. Eyá nala'aqueila icá chapú, chapú ila'acare ajopana ina'uqué chona ca'ajná, imanaicho ila'acare chona ca'ajná, uncá huare pachá ritaca'á huachaya i'imagá. Pajimátoja ritaca'acá piyuqueja ina'uqué chaya. Uncá huani hue'epila pu'uhuaré la'acana ri'imagá. Eyá huecá i'imaño uncá ina'uquélaruna i'imagá. Pu'uhuaré la'ajeño hue'emacá. Huachaya ilé, uncá huani hue'epila pu'uhuaré la'acana, taca'arí i'imagá. Ritaca'á huachaya, ri'imátacaloje huecá Tupánajlo raú penaje. Rinapónaja calé taca'arí. Eyá Ripechu i'imari cajmuni. Uncá capichácajo penaje calé i'imagá ricá.

<sup>19</sup> Ritaca'acá ejomi ripéchumi i'ijnacá ajopana ina'uqué péchumi ejo. Júpimi taca'acaño péchumi ne'emacá. Re ri'imá najlo yucu. Calajeruni chu napéchumi i'imagá.

<sup>20</sup> Júpimi i'imagáño eja'ahuá chu, péchumi i'imari re. Uncá nema'alá Tupana ja'apiyá i'imagá. Noémi chu i'imaqué huacajé, ri'imaqué najlo Tupana puráca'alo yucuna. Uncá nema'aque ra'apiyá. E'iyonaja calé Tupana ña'arí necá panacu. Noémi chu la'acá huapuru quetana. Mequeleja i'imaño Noémi chu hua'até rihuapúrune chu cajú júni ja'acó huacajé. Noémi chu huapúrune chu i'imagáño, queleja calé i'imaño capichácajo liyá. Hueje que



cuhuá'ata queleja ne'emacá piyuque. Queleja calé i'imaño capichácajo liyá rijhua'até i'imacá.

<sup>21</sup> Uncá juni capichátala ne'emacá, huapuru chu ne'emacale. Raú calé ne'emaó capichácajo liyá. Ñaque caja Jesucristo macápo'oco capichácajo liyá i'imacá. Rijhua'até i'imacana aú hue'emaó caja capichácajo liyá. Nala'acá aú bautizar ina'uqué nala'á renami. Juni ipari iná pisá iná naquiyá. E'iyonaja uncá iná pisá ipacana aú calé iná i'imaó capichácajo liyá. Iná quemá Tupánajlo, rica'acáloje iná pechu naquiyá pu'uhuaré iná la'acare, iná pechu i'imacáloje lama'ataqueja rijló raú penaje. Marí que la'acana aú iná i'imaó Tupánajlo Jesucristo palamane aú.

<sup>22</sup> Ricá penájemi jácho'oro je'echú chojé i'imacá. Re ricá me'etení. Tupana hua'até huacára'ajeri ricá. Tupana hua'atéjema, ajopana huacára'ajeño re i'imacaño, huacára'ajeri ricá re.

## 4

### *Tupana a'acá ina'uquejlo hue'epícaje yucuna marí:*

<sup>1</sup> Jesucristo i'imacá marí eja'ahuá chu huacajé nala'á ricá chapú. Rinapona aú rijña'á ricá panacu. Ñaquele ila'á caphí ipéchuhua, ñaque caja ijña'acáloje chapú caje yajhué panacu penaje. Ña'arí chapú caje yajhué panacu rinapona aú, yuriri caja rinaquiyó pu'uhuaré la'acana.

<sup>2</sup> I'imajica eja'ahuá chu quetana marí que ila'ajica: Uncá ila'alaje imanaicho. Uncá caja ila'alaje pu'uhuaré. Uncá caja ila'alaje ipechu queja. Tupana huátacare caje ila'ajé.

<sup>3</sup> Júpimi cajrú ila'ajica pu'uhuaré. Ina'uqué uncá huátalaño Tupana, la'año pu'uhuaré. Ñaque caja ila'ajica pu'uhuaré rihuacajé. Rihuacajé caja icá i'imaqueño uncá ina'uquélaruna. Huéchiruna caja i'imaqué imanaicho la'acana nacú. Yuhuéra'acajo nacuja i'imaqué rihuacajé. Ñaque caja cajrú jahuíyo'ojica ajopana ina'uqué e'iyayá. Cajrú caja i'irajica cahuí caje ajopana hua'até rihuacajé. Nacaje jenami la'acánami jehuíña'ataque ijluhua ichi'ináricanahua penaje rihuacajé. Pu'ují ipechu i'imajica rinacu. Majopéjari nacaje jenami la'acanamí imaque nacú: "Huachi'ináricana ricá" que. Nacaje uncá Tupana huátalare, ricá nacú ipechu i'imaqué pu'ují.

<sup>4</sup> Chuhua uncá ila'alá ñaque caja najhua'até. Raú napechu inacu: "Meque apojó que huani necá me'etení." Marí que napechu inacu, uncale ila'alá pu'uhuaré najhua'até. Aú calé napura'ó inacu pu'uhuaré.

<sup>5</sup> Pachá uncá paala ne'emajica. Marí que ri'imajica pu'uhuaré la'ajéñojlo: Tupana jimaje natára'ajo, riquej'acaloje naliyá pu'uhuaré nala'acare yucuna penaje, rihuajácaloje piyuque pu'uhuaré la'acaño penaje. Cajmruna, caja taca'acaño, quele hua'ató rihuajaje pu'uhuaré nala'acare chona.

<sup>6</sup> Tupana i'imatari ina'uqué capichácajo liyá. Jesucristo i'imari caja riyucuna ina'uqué péchumijlo i'imacá, uncá tajnácajo penaje calé napéchumi i'imacáloje raú penaje. Tupana pechu i'imacá que caja napechu i'imacáloje matajnaco penaje, ri'imá najló riyucuna. Marí eja'ahuá chu ne'emacá huacajé, rihuajácarena ne'emacá.

<sup>7</sup> Tajnácajo nacuja eja'ahuá. Ñaquele i'imá capéchuruna. Capechú caja i'imacá Tupana hua'até pura'acano nacú. Marí ihue'epeje itucumó.

<sup>8</sup> Apú nacaje chaje ila'á marí que: Ihuata íqui'ija pecohuácaca, ila'acá piyá pu'uhuaré raú.

<sup>9</sup> Marí que ila'ajica pecohuácaca: Imá ya'ajnyaya iphácañojlo, nayurícoloje iñacaré chu ijhua'até penaje. Aca'aniya caja pamanáchaca raú.

<sup>10</sup> Apú, apujlo que Tupana a'acá ijlo hue'epícaje, ila'acáloje nacaje pajlocaca raú penaje. Ñaquele rihuacára'aca que a'acá pañatéchaca raú. Ila'á ipéchuhua palá pajlocaca hue'epícaje Tupana a'acare ijlo aú.

<sup>11</sup> Apala Tupana a'arí apujlo hue'epícaje, ri'imacáloje riyucuna ina'uquejlo raú penaje. Ripalamane aú ri'imajé Tupana yucuna ajopánajlo. Apala Tupana a'arí apujlo hue'epícaje, ra'acáloje ajopana ñaté raú penaje. Ra'ajé ina'uqué ñaté, hue'epícaje Tupana a'acare rijló aú. Ila'á piyuqueja nacaje, ri'imacáloje palá Tupana nacú penaje. Jesucristo chojé calé iná pechu i'imá palá Tupana nacú. Palánijlaca hua'ajini huani ina'uqué pechu i'imacajla palá Jesucristo nacú. Ñaqueja huani Jesucristo hue'epíjica nacaje la'acana piyuqueja. Marí queja nuhuátaca ri'imacá.

### *Méqueca Jesucristo ja'apiyá jema'ajeño ña'acá chapú caje yajhué panacu yucuna marí:*

<sup>12</sup> Nojena, íqui'ija nuhuátacarena icá. Amájica ee chapú caje yajhué, iquechíra'aniya ipéchuhua raú. Ipechu i'imaniya inacuhúa: "Uncá ñaque calé ajopana amaca chapú caje yajhué."

<sup>13</sup> I'ijnatánia ipéchuha ñaqueja rinacu. Pu'ujija i'ijnatá ipéchuha chapú caje yajhué amácana aú. Jesucristo ña'acá ricá panacu i'ímacá que caja ijña'acá ricá panacu. Marí que la'acana aú pu'ují huani ipechu i'imajica riphájica majó huacajé. Rihuacajé amaje meque palá huánica ricá. Raú ipechu la'ajó pu'ují.

<sup>14</sup> Apala pu'uhuaré napura'acó inacu me'etení, Jesucristo ja'apiyá jema'ajeño i'ímacale. Marí caje aú iná hue'epí caja Tupana Pechu i'ímacá iná e'iyá. Palani huani Ripechu. Ñaquele i'ímá pu'ují péchuruna raú. Necá pura'año pu'uhuaré caja Tupana nacú. Eyá icá pura'año rinacu palá.

<sup>15</sup> Eyá ri'imaniya marí que ijló: Apala chapú nala'acá inaquiyana, nenoca ina'uqué pachá. Apala nala'á inaquiyana chapú nata'acá pachá nacaje ca'ajná. Majojeja inaquiyana huátaca ca'ajná ina'uqué nacú culácacano. Pachá ca'ajná nala'á necá chapú. Uncá ina'uquélaruna ca'ajná inaquiyana, pachá nala'á necá marí que. Ri'imaniya ilé que ijló.

<sup>16</sup> Apala nala'á chapú icá, jema'acale Jesucristo ja'apiyá. Apáña'aniyoja ra'apí. Imaja Tupánajlo marí que: "Palá pila'acá huecá, pijhua'atéjena hue'emacale."

<sup>17</sup> Caja ajopana la'año icá chapú. Marí que Tupana queño'ocá ra'apiyá jema'ajeño huajácana. Marí que ri'ímacá huajló, ra'apiyá jema'ajeñojlo. ¡Eta meque chapú huani ri'imajica najló, uncá jema'alaño Tupana ja'apiyajlo!

<sup>18</sup> Chapú caje yajhué amácana nacuja palá la'acaño i'ímaño. Marí caje hua'ató Tupana i'imatari huecá capichácajo liyá. Marí queja ri'ímacá palá la'acañojlo. Eyá pu'uhuaré la'acañojlo chapú huani ri'imajica. Uncá huátalaño Tupana necá.

<sup>19</sup> Apala ijña'á chapú caje yajhué panacu Tupana huátaca que. Nala'acá icá chapú ehua, ila'á palá rehua. Iyurí caja ichó Tupánajlo. Huaqueño'ótajeri huani ricá. Rimacá nacaje nacú que rila'acá nacaje piyuqueja. Pajluhuaja chuhua péchuri Tupana palá la'acana nacú.

## 5

### *Nacaje rimacare nacú Jesucristo hua'atéjenajlo yucuna marí:*

<sup>1</sup> Icó, Jesucristo hua'atéjena, jahuaaño Tupana puráca'alo jema'ajé apalá chojé, apalá chojé que rehua. Re caja ijhua'até ihuacára'ajeño, peñahuilana. Chuhua numájica nacaje nacú najlojé penaje. Nanaquiyana huacára'ajeri caja nucá. Nomá Jesucristo ña'acá chapú caje yajhué panacu i'ímacá. Nucá penaje i'imari riyucuna ajopánajlo. Palá huani Tupana la'ajica ra'apiyá jema'ajeño nacú, ripa'ajico majó huacajé. Nucá caja i'imajeri najhua'até rihuacajé.

<sup>2</sup> Jesucristo hua'atéjena huacára'ajeñojlo numá: A'á inacojó ijhua'atéjena, Tupana a'acale icá namájeño penaje. Tupana huátari i'ímacá huéchiruna, a'acáloje inacojó necá. I'ímá caja huéchiruna nañaté a'acana nacú. I'imaniya ijinú namácana nacú. Ihue'epíniya caja itucumó liñeru ña'acana ijluhua marí que la'acana aú. Marí uncá paala.

<sup>3</sup> Tupana a'arí icá ina'uqué amájeño penaje. ¡Pa! I'imaniya nahuacára'ajeño huani. Amata caja necá palá la'acana nacú, nala'acáloje ñaque caja amájeño penaje.

<sup>4</sup> Marí que la'acana aú rihuemí i'imajé ijló, Huamájeri huani Jesucristo iphájica majó huacajé. Palá nojé huani nacaje yuréjero ijló rihuacajé. Palá ila'acare huemí ri'imajica. Chá'atari necá jécho'ocajo aújlo na'á rihuemí. Uncá rihuemí que calé rihuemí i'imajica ijló rihuacajé. Jecho'ocajo aú chá'atajerijlo na'á rihuemí marí que: Na'á richá pútenaji caje, huíchu'upe naquiyá la'acanami. Aú ajopana hue'epiño ricá chá'ataca necá jecho'ocajo aú. Pútenaji caje na'á rijló rihuemí, richá'atacale necá jecho'ocajo aú. E'iyonaja uncá huíchu'upe ña'alá panacu. Quiñaja rihuijío'oco. Hua'até que rijimárecha capichaco. Eyá ijló, uncá ñaque calé rihuemí i'imajica. Uncá rijimárecha tajnálajo; ñaqueja ri'imajica.

<sup>5</sup> Marí puráca'aloji hualijímacanajlo, quéchami ináyanajlo, quélejlo ricá: Jema'á amájeño ja'apiyá. Iyurí caja ichó najló. Numá ijló piyuqueja: Ila'aniya inacuhua chá'atajeño que, i'ímacáloje palá pajhua'atéchaca raú penaje. Marí que Tupana puráca'alo lana'aquejami quemacá:

Uncá Tupana huátalarena necá, la'año nanacuhua hue'epiño que.

Tupana a'arí nañaté uncá la'alaño necó chá'atajeño queja, que rimacá.

Marí que la'acaño i'ímaño ripalamane.

<sup>6</sup> Ñaquele ila'aniya icó chá'atajeño queja Tupánajlo, piyuque ina'uqué chá'atajeri huani ri'ímacale. Ra'apeje hue'epiño queja ihue'epica inacuhua, rila'achí icá palá huani riphájica aú rená chojé ijló huacajé.

<sup>7</sup> Icahuíla'aniyo nacaje nacojé, Tupana a'acale rinacojó icá.

<sup>8</sup> Capéchuja i'ímacá Jiña Ch'i'ináricana liyá. Amá caja icó riliyá. Chapú péchuri inacu ricá. Yahui, eja'ahuá e'iyohuaje, culaca rijluhua camejérina que caja ri'ijnacá ina'uqué

cahuíla'acana nacú. Rica'áta ne'iyajé rijluhua, nayurícaloje naliyó Tupana ja'apiyá i'imacana penaje.

<sup>9</sup> Iyuríniya ichó rijló, richá'atajica icá. Ipechu i'imá caphí Tupana puráca'alo chojé. Richojé itára'ajo camachá rijló. Ihue'epí marí: Piyuqueja Jesucristo ja'apiyá jema'ajeño marí eja'ahuá chu i'imacaño, amaño chapú caje yajhué. Ijña'acá chapú caje yajhué panacu que caja ajopana ña'acá panacu ricá.

<sup>10</sup> Iná ña'acá chapú caje yajhué panacu mequetánaja. Quéchami Tupana lamá'ataca iná. Rila'á caja caphí iná pechu, chapú caje yajhué chá'ataca piyá iná, caphí iná tára'acoloje Jiñá Chi'ináricanajlo raú penaje. Tupana la'arí huecá palá huani. Ri'ihuapá rijluhua huecá ajopana ina'uqué e'iyayá, hue'emacáloje rijhua'até matajnaco je'echú chu raú penaje. Pajluhua japi ricá queja hue'emacale Jesucristo hua'até, hue'emajé matajnaco je'echú chu rijhua'até.

<sup>11</sup> Palá la'ajeri huani Tupana. Hua'ajini huani rihue'epeje piyuqueja nacaje la'acana. Tupana nacuja ina'uqué pechu i'imajé palá huani hua'ajini huani. Marí queja ri'imajica.

*Caja penaje rimacare nacú yucuna marí:*

<sup>12</sup> Maare nujhua'até Silvano. Jesucristo ja'apiyá jema'ajeri ricá. Palá huani rema'acá ra'apiyá. Ricá a'arí nuñaté marí papera chojé lana'acana aú. Metajlánija riyucuna. Nulana'á marí puráca'aloji papera chojé ijlojé penaje, ipechu la'acáloje caphí raú penaje. Palá huani Tupana la'acá huecá. Marí caje aú huahue'epí quehuaca jo'ó rihuátacarena íqui'ija huecá. Iyuríniya caja ra'apiyá i'imacana. Ila'á ipéchuhua caphí ra'apiyá jema'acana nacú.

<sup>13</sup> Re Jesucristo ja'apiyá jema'ajeño Babilonia te'eré e. Tupana i'ihuapacá rijluhua icá que caja ri'ihuapacá rijluhua necá. Necá quemano inacu: "Eco palá najló ca'ajno." Ñaque caja Marcos quemacá inacu: "Eco palá najló ca'ajno." Nu'urí queja Marcos nujhua'até maare.

<sup>14</sup> Ajalaca pecóhuacaca palá. Iqui'ija Jesucristo ja'apiyá jema'ajeño huátaca pecóhuácaca. Ñaquele ajalaca pecóhuácaca palá. Jesucristo hua'atéjena nacú numá marí que: Nuhuata Tupana la'acá ipechu palá. Marí queja nuhuátaca ri'imacá ijlo. Maáreje riyucuna tajnaro.

## 2 PEDRO

*Puráca'aloji San Pedro huacára'acare Jesucristo ja'apiyá jema'ajéñojlo marí:*

<sup>1</sup> Nucá, Pedro, huacára'ari ijlo marí puráca'aloji ca'ajno. Jesucristo hua'até sápjari que nucá. Jesucristo huacára'acarena naquiyaana caja nucá. Ricá huacára'ari nucá. Aú nulana'á ijlo marí puráca'aloji. Caja caphí péchuruna icá Tupana puráca'alo chojé. Huapechu i'ímacá richojé que caja ipechu richojé caphí. Iná pechu i'ímacachu caphí Tupana chojé, palani huani inajlo ricá. Nacaje marí eja'ahuá chu i'ímacare palá nojé, ricá chaje huani palaca huajló ricá. Marí que huapechu nacú ricá, palá huani Jesucristo la'acale huecá. Hue'ematajari ricá; Huahuacára'ajeri caja ricá; Huachi'ináricana caja ricá.

<sup>2</sup> Nuhuata Tupana la'acá palá huani inacu. Nuhuata caja rila'acá palá ipechu. Marí que rila'acá iná palá huani, iná jema'acá aú richaje, richájeno que Tupana, Jesucristo, quele ja'apiyá. Huahuacára'ajeri huani Jesucristo.

*Ripalamane aú iná jema'á ra'apiyá. Marí riyucuna:*

<sup>3</sup> Tupana hue'epiri piyuqueja nacaje la'acana. Ñaquele ra'á huajló Ripectu, huala'acáloje piyuqueja nacaje rihuátaca que penaje. Ra'apiyá jema'acana aú iná la'á rihuátaca que. Hue'emacáloje ricá que caja palá la'acana nacú, penaje caja ra'á huajló Ripectu. Marí que huajló ricá, huahue'epícale Jesucristo ja'apiyá i'ímacana nacojé. Ri'ihuapá caja rijluhua huecá ajopana ina'uqué e'iyayá, hue'emacáloje ripalamane penaje. Hue'emacáloje palá la'ajeño ripalamane aú penaje.

<sup>4</sup> Rihue'epúeja nacaje rihuátaca que penaje. Ra'apiyá jema'acana aú iná la'á rihuátaca que. Hue'emacáloje rica huani raú penaje. Palá huani hue'emajica ripalamane aú. Iná huajhué que huani inajlo ricá. Marí eja'ahuá chu re cajrú ina'uqué uncá nema'alá Tupana ja'apiyá. Huéchiruna necá pu'uhuaré la'acana nacú, namanaicho la'acana nacú. Tupana Pechu ja'apiyá i'ímacana aú hue'emaó ñaqueé caja la'acana liyá. Hue'emaó richiyá, hue'emacáloje Jesucristo que caja raú penaje.

<sup>5</sup> Caphí péchuruna icá Jesucristo chojé, Tupana puráca'alo chojé hua'até. Ñaquele marí que ila'ajica: Ila'á ipéchuhua caphí, i'ímacáloje palá la'acaño penaje. Hua'até caja a'á ripuráca'alo inacojó, ihue'epicaloje palá la'acana raú penaje.

<sup>6</sup> Hua'até caja ila'á ipéchuhua caphí palá la'acana nacú. Jácho'oniyo richiyá, i'ímachi palá la'ajeño, caja queja i'ímacáloje ñaqueje la'acana nacú penaje. Ihue'epí Tupana huátaca que la'acana itucumó.

<sup>7</sup> Hua'até caja ihue'epí caí ajopana Jesucristo ja'apiyá jema'ajeño nacú. Ihuata caja íqui'ija Tupana, ajopana ina'uqué hua'até. Marí que ila'ajica.

<sup>8</sup> Pajimato rila'acana aú, palá la'acaño icá. Uncá majopéjaruna calé icá Tupánajlo ilé que la'acana aú. Marí que la'acana aú uncá majopeja calé jema'acá Huahuacára'ajeri Jesucristo yucuna.

<sup>9</sup> Eyá necá, uncá la'alaño numacá que, mejluruna queja necá. Jesucristo la'arí necá palá i'ímacá. Rica'á nanaquiya pu'uhuaré nala'acare, namanaicho nala'acare hua'até. Raú rila'á palá necá. E'iyonaja calé napechu capichaña ricá. Aú calé mejluruna queja necá.

<sup>10</sup> I'imaniya necá que. I'imá huéchiruna nacaje rihuátaca que la'acana nacú. Nojena, Tupana i'ihuapari rijluhua icá ajopana ina'uqué e'iyayá i'ímacá, i'ímacáloje rila'ejena ina'uqué raú penaje. Ñaquele huechi ila'ajica nacaje rihuátacare caje. Raú ihue'epeje ri'ihuapacárena jo'ó icá. Numacare nacú la'acana aú uncá iyurilaje ricá.

<sup>11</sup> Raú Tupana quemájeri inacu, imujlúca'acaloje Jesucristo i'ímacá ejo, i'ímacáloje matajnaco rijhua'até penaje. Rehuájena huacára'ajeri ricá. Huahuacára'ajeri, Hue'ematajari caja Jesucristo.

<sup>12</sup> Jema'acáloje palá ra'apiyá penaje, pulapeno que nu'umacá ijlo riyucuna. Nu'umano ijlo riyucuna, ipechu capicháña piyá ricá. Caja jema'á riyucuna; caja ihue'epí rina-coje; caja caphí ipechu quehuácáje puráca'aloji chojé, quele ihue'epí me'etení. Ipechu capicháña piyá ricá, nu'umá piño ijlo riyucuna me'etení.

<sup>13</sup> Nu'umajica eja'ahuá chu quetana nu'umajica pulapeno ijlo riyucuna, ipechu capicháña piyá ricá. Palani nojló marí que la'acana.

<sup>14</sup> Uncá nu'umalaje júpja ejo'ocaja marí eja'ahuá chu. Caja Huahuacára'ajeri Jesucristo quemari nojló marí que: "Mequetana i'ímajémija pitaca'ajica," que rimacá nojló. Aú nuhue'epí uncá capinaca calé nu'umajica marí eja'ahuá chu ijhua'até.

<sup>15</sup> Ñaquele nula'á caphí nupéchuhua ejé, nuyurícaloje marí puráca'aloji ijlo penaje. Riyurícaloje ijloje penaje nutaca'ajica ejomí, ri'ímacáloje ipechu nacú ñaqueje penaje.

*Jesucristo amájeño penájenami yucuna marí:*

<sup>16</sup> Jesucristo i'imaqué marí eja'ahuá chu huacajé rila'aqué cajrú nacaje uncá meño'ojó iná la'alare caje. Riyucuna calé nu'umá ijló i'imaqué. Uncá nu'umalá majopeja yucu jupichúnami queñótacare i'imaqué. Nucá amari Huahuacára'ajeri Jesucristo i'imaqué, marí eja'ahuá chu ri'imaqué huacajé. Ñaqué caja ajopana ina'uqué amaca ri'imaqué. Huamá méqueca palani huani ri'imaqué.

<sup>17</sup> Hue'emaqué ipuré i'ihuata nacú rijhua'até huacajé, Tupana huacára'ari cajrú mejáma'atani rahua'ó i'imaqué. Huamácare ri'imaqué. Palá huani Tupana pura'acó rinacu rihuacajé je'echú chiyá. "Marí, Nu'urí, íqui'ija huani nuhuátacare ricá. Palá huani caja nupechu rinacu," que Tupana quemacá rinacu i'imaqué.

<sup>18</sup> Marí que huema'acá ripura'acó rijhua'até je'echú chiyá i'imaqué. Palani huani rapucuna i'imaqué, Tupana i'imacale re.

<sup>19</sup> Tupana puráca'alo lana'aquėjami quemacá rinacu que huamaca ri'imaqué. Ra'apátajeñomi chuna lana'año riyucuna i'imaqué. Ñaquele a'a inacojó ripuráca'alo nalana'acare i'imaqué, quehuácage ri'imacale. Ripuráca'alo lana'aquėjami i'imari huajló Jesucristo yucuna, huahue'epícaloje rinacojó raú penaje. Ra'apiyá jema'acana aú rilamá'ataje iná pechu palá.

<sup>20</sup> Ihue'epí marí: Uncá Tupana puráca'alo ja'apátajeñomi chuna lana'alaño Tupana puráca'alo papera chojé napechu queja. Uncá caja nalana'alá ricá iná hue'epícare rinacojó que.

<sup>21</sup> Uncá caja na'apátaque ricá ajopánajlo nahuátajica queja, napechu queja. Nahue'epique natucumó Tupana huátajica que la'acana. Ripuráca'aloja na'apátaque ina'uquejlo Tupana Pechu quemajica najló que. Ricaja calé na'apátaque najló.

## 2

*Pajlácage puráca'aloji nacú jehuíña'atajeño yucuna marí:*

<sup>1</sup> Tupana puráca'alo ja'apátajeño i'imaqueño Israelmi chu laquénami e'iyohuá i'imaqué. Ma'apona que pajlácachina i'imajica caja ne'iyohuá. Nala'aqué nanacuhuá Tupana puráca'alo ja'apátajeño que i'imajica. Chuhua ñaqué caja ri'imajica ijló ilérohua. Ñaqué caja pajlácachina i'imajica piño ijhua'até. Nala'ajé caja nanacuhuá Tupana nacú jehuíña'atajeño que caja. Napajlácare aú nehuíña'ataje icá nacaje nacú napechu queja. Nacaje nehuíña'atajicare nacú apichátari iná pechu. Uncá caja nahuátala Huahuacára'ajeri Jesucristo. Ricá i'imatari iná capichácajo liyá. Uncá nahuátala ricá. Marí caje pachá Tupana huajájeri necá mequetana i'imajemi.

<sup>2</sup> Napuráca'alo aú cajrú ina'uqué i'ijnatájica nápumi chu pu'uhuaré la'acana, namanaicho la'acana. Nanacojó caja cajrú ina'uqué pura'ajeño pu'uhuaré quehuácage puráca'aloji nacú. Quehuácage puráca'aloji quemari méqueca Tupana i'imataca iná capichácajo liyá.

<sup>3</sup> Cameján'e'equena caja ne'emajica. Necá jehuíña'atajeño icá pajlácage puráca'aloji nacú. A'acáloje najló nacaje, liñeru caje macá penaje, ne'emajé pajlácage puráca'aloji yucuna ijló. Capichájeño penájena ne'emajica. Uncá huani ne'emalajo rilijá. Caja júpimi que ñaqué nanacu quemacana i'imaqué. Marí que la'ajícaño amájeño huajácage yajhué.

<sup>4</sup> Ñaqué caja Tupana hua'atéjena, je'echú chujena, naquiayana i'imajica. Pu'uhuaré la'ajeño caja ne'emaqué. Ñaquele uncá Tupana amalo nachaje pu'uhuaré nala'acare liyá. Rica'a ne'emacá pu'uhuaré la'acaño huajáquelana pucuna chojé. Calajeruni huani chojé riyurí ne'emacá. A'ajná Tupana huajájica chapújne'equena huacajé ejená ne'emajé calajeruni chu. Ejéchami Tupana quemájica nanacu méqueca rihuajájica piño necá reyá a'ajná ño'ojó.

<sup>5</sup> Uncá caja Tupana amalo júpimi i'imaquéñomi chuna chaje, pu'uhuaré nala'acare liyá i'imaqué. Noémi chu i'imari riyucuna najló i'imaqué, nala'acáloje palá pecohuáca raú penaje. E'iyonaja uncá nema'aqué ra'apiyá. Aú calé Tupana huacára'ari cajrú juni ja'acó, ricapichátacaloje piyuqueja pu'uhuaré la'acaño raú penaje. Méqueleja calé ri'imatá capichácajo liyá i'imaqué. Noémi chu, rijhua'até i'imaqué, queleja ri'imatá i'imaqué. Iyamá cuhuá'ata queleja rijhua'até i'imaqué i'imaqué. Necaja calé ri'imatá capichácajo liyá i'imaqué.

<sup>6</sup> Apú huacajé piño, júpimi i'imaqué, Tupana capichátari iyamá pajimila. Apú pajimila íi i'imari Sodoma. Apú íi i'imari Gomorra. Pajimila e i'imaqué ricapichata quera'atani aú i'imaqué. Pajimila pucunami yuripo pa'ilá que. Marí que rila'acá ne'emacá, ajopana pu'uhuaré la'acaño hue'epícaloje méqueca Tupana huajaca pu'uhuaré la'acaño penaje.

<sup>7</sup> Ricapichátaca iyamá pajimila huacajé, pajluhuaja calé i'imaró ne'iyayá. Ríi i'imari Lot. Palá la'ajeri ri'imacale, Tupana i'imatari ricá capichácajo liyá ne'iyayá. Chapú huani ri'ijnatájica ripéchuhua ramájica aú chapú huani nala'ajica pecohuáca rehuá. Ripochu la'aró camu'ují najhua'até, uncá ina'uquélaruna ne'emacá aú.

<sup>8</sup> Palájne'equ Lotmi chu i'ímacá. Hue'echú ca'alá queja ramájica nala'ajica chapú pecohuácaca. Ramaque caja nala'ajica namanaicho pajhua'atéchaca. Rema'aque caja napura'acó pu'uhuaré pajhua'atéchaca. Marí que ramájica nala'ajica. Ricá i'ímaqueri chapú caje huani rijló. Rihuajhué majáca'aco i'ímajica marí que ramájica nala'ajica aú.

<sup>9</sup> Tupana hue'epiri pu'uhuaré caje yajhué ja'apátacana rihuátaca que la'acaño liyá. Rihue'epí caja chapú la'acaño huajácana. Tupana quemájeri piyuque ina'uqué nacú méqueca rijló, nacaje nala'acare marí eja'ahuá chu ne'emaca quetana. Rihuacajé caja pu'uhuaré la'acaño amájeño Tupana huajájica necá yajhué.

<sup>10</sup> Chaje huani íqui'ica rihuajájica marí cajena: Ñuju'uquena huani i'ímacaño, uncá jema'alaño nahuacára'ajeño ja'apiyá, uncá quero'olaño je'echú chu i'ímacaño nacú pura'acano pu'uhuaré piyá. Marí cajena Tupana huajájeri ajopana chaje íqui'ica.

<sup>11</sup> Tupana hua'atéjena, je'echú chujena, ajopana chaje necá. Nachá'ata napechu aú pajlácaje puráca'aloji nacú jehuíña'atajeño pechu. E'iyonaja calé uncá napura'aló pu'uhuaré huani pu'uhuaré la'acaño nacú. Uncá napura'aló nanacu pu'uhuaré huani, narucátaca ee Tupánajlo necá.

<sup>12</sup> Eyá necá, pajlácaje puráca'aloji nacú jehuíña'atajeño, majopeja napura'acó pu'uhuaré nacaje nacú. Napechu queja napura'acó pu'uhuaré nacaje nacú, uncá nahue'epílare nacojé. Uncá meño'ojó iná la'alá nenacú. Napechu queja nala'acá nacaje; napechu queja caja nemaca nacaje nacú. Camejérina queja necá. Camejérina i'ímaño ina'uquéloje penaje, nenócaloje necá penaje, najñácaloje ne'ími penaje. Richaya nenó necá. Capichájeño penájena caja iléruma ina'uqué, jehuíña'ataño ajopana pajlácaje puráca'aloji nacú.

<sup>13</sup> Chapú huani nala'acá ajopana ina'uqué. Rilocópa'alaja namájica chapú caje yajhué. Pu'uhuacá nala'acá pu'uhuaré, namanaicho. Majopeja caja napáña'ataca inacu, jahuacaco aú a'ajnehuá ajñácana nacú. Pu'ují ipechu aú jahuacó a'ajné ajñaje. E'iyohuá que napáña'ataca inacu. Pu'ují caja napechu pajlácaje nacú. E'iyonaja calé nala'á nanacuhúa palá la'ajeño japi necá que.

<sup>14</sup> Namanaicha aú nayacá'o inaana chaje. Uncá aya'alaño necá namanaicho la'acana nacú. Uncá pechu i'ímalaño caphí Tupana chojé, necá namata namanaicha aú. Canacújne'equena huani necá. Capichácajo penájena huani i'ímacaño necá ta.

<sup>15</sup> Caja nahua'ó palani iñe'epú chiyá. Chuhuaca na'apaca cahuichini e'yohuá capichájeño que. Júpimi apú i'ímari uncá ina'uquéleri. Ricá chuhuá ne'ejnataca rápumi chu. Tupana puráca'alo ja'apátajeri r'i'ímacá. Ríi i'ímari Balaam. Beormi chu i'irimi r'i'ímacá. Na'á rijló liñeru i'ímacá, rila'acáloje pu'uhuaré penaje. Rihuátacale liñeru rijluhua rema'á na'apiyá. R'i'ijná najhua'até.

<sup>16</sup> Ehuá ríle'ejé cahuarú caje aca'acá r'i'ímacá, rihuátacare pu'uhuaré la'acana chona. Uncá meño'ojó cahuarú pura'aló. E'iyonaja Tupana pura'átari rijló r'i'ímacá, raca'acáloje ricá ina'uqué puraca'acó chu penaje, rila'acá piyá íqui'i huani pu'uhuaré.

<sup>17</sup> Apichátaqueja puráca'aloji nacú jehuíña'atajeño numacárena nacú, uncá na penaje calé necá. Uncá na penaje calé juni amo'oquelana, uncá juni i'ímalare chu. Uncá na penaje calé juni suhuáca'ala, carená ja'apátacare majopeja, uncá juni ja'alaro e'iyayá. Naqué caja necá, uncá na penaje calé necá. Matajnaco ne'emajica calajeruni chu. Marí caje penájena ne'emajica.

<sup>18</sup> Nala'á piño marí que uncá huani paala: Ina'uqué naquiayana queño'oño pajlácaje puráca'aloji chiyá jácho'ocano. Naqueño'ó caja pu'uhuaré la'acana yurícana naliyó. Namata ilé cajena namanaicho nala'acare aú, napa'acóloje piño richojé penaje.

<sup>19</sup> Pajlácaje puráca'aloji nacú jehuíña'atajeño quemáño najló: "Ila'á ihuátaca que. Uncá na i'ímalá ihuacára'ajeri, rihuajácaloje icá richona penaje," que napajlaca ina'uqué hua'até. Re jo'ó nahuacára'ajeri. Pu'uhuaré la'acana nacú huacára'ajeri ricá. Rijhua'atéjena ne'emacale, nala'á pu'uhuaré, namanaicho. Naquele uncá meño'ojó nala'alá palá nahuátaca que. Caja pu'uhuaré la'acana i'ihuapataro nachá rijluhua, ne'emacáloje ñaqueja la'acana nacú penaje.

<sup>20</sup> Huahuacára'ajeri Jesucristo; Hue'emátajeri caja ricá. Ricá i'imatari iná pu'uhuaré la'acana chiyá. Richojeja calé iná i'ímao capichácajo liyá. Re ina'uqué naquiayana, naqueño'ó riyucuna a'acana nanacojé. Raú calé ne'emaó pu'uhuaré nala'acare liyá, namanaicho nala'acare liyá hua'ató. E'iyonaja calé napa'ó piño pu'uhuaré la'acana chojé, namanaicho la'acana chojé. Raú calé na'ó piño pu'uhuaré la'acaño huacára'ajeri ja'apejé. Marí que nala'acale, chapú huani r'i'ímajica najló. Uncáquela naqueño'ójla Jesucristo ja'apiyá jema'acana i'ímacá, uncá ñaque calé chapuni r'i'ímajica najló.

<sup>21</sup> Re ca'ajná ina'uqué naquiayana, nahue'epí Jesucristo puráca'alo nacojé, aú nala'á palá. E'iyonaja ejomi nácho'o piño richiyá. Richaje r'i'ímajica palani najló, uncáquela nahue'epíajla quehuácacaje puráca'aloji nacojé. Chapú huani r'i'ímajica najló, nayurica ricá pachá.

<sup>22</sup> Marí que nemacá ilé que la'acaño nacú: “Yahui piracana chilácarí ra'ajné, quéchami rajñaca piño ricá. Ñaqué caja je'erú piracana a'apitacá palani juni acojé, quéchami ripa'ó piño cajaca'apé acojé to'ojó.” Marí que caja ina'uqué naquiyana pa'acó pu'uhuaré la'acana chojé, nayurica Tupana puráca'alo ja'apiyá i'imacana ejomí.

### 3

#### *Jesucristo huaícha piño majó yucuna marí:*

<sup>1</sup> Nojena, íqui'lja nuhuátacarena, caja iyamá pecha nuhuacára'aca ijló papera ca'ajné. Nuhuata i'ijnataca ipéchuhua palá numacare nacú ijló nacú. Huajé numacare nacú, jupichumi numacare nacú hua'até i'ijnatá ipéchuhua.

<sup>2</sup> Tupana puráca'alo ja'apátajeñomi chuna, júpimi i'imaña, i'imaño palájne'equena huani. A'á inacojó napuráca'almi. Ñaqué caja a'acá inacojó Huahuacára'ajeri Jesucristo puráca'alo. Jesucristo huacára'acarena ja'apátajeñomi ijló ripuráca'alo i'imacá.

<sup>3</sup> Ihue'epí marí: Eja'ahuá iphájica rená chojé caja penaje huacajé, ina'uqué naquiyana la'ajeño ne'echajné Tupana puráca'alo nacú. Napechu queja caja nala'ajica pu'uhuaré, namanaicho.

<sup>4</sup> Marí que nemájica ina'uquejlo: “Jesucristo quemari rinacuhúa i'imacá: ‘Nupa'ajó piño majó' que. Eta, ¿mere chi ricá quemari marí que rinacuhúa i'imacá? Uncá riphala. Caja hua'ajútayami chuna tajnaño i'imacá. Eja'ahuá queño'ocó huacajé, ñaqueja caja nacaje ja'apaca maárejecha. Uncá Tupana la'alá nacaje rimacá que rinacu,” que nemájica.

<sup>5</sup> Ijnú nahuátajica rila'acare nacojé hue'epícana. Marí que rila'acá i'imacá: Júpimi, Tupana queño'ótari eja'ahuá je'echú, hua'até, piyuque richuhúa i'imacare hua'ató. Ripuráca'alo aú ja riqueño'óta nacaje piyuqueja i'imacá. Juni e'iyayá riqueño'óta pamineco eja'ahuá i'imacá. Eja'ahuá i'imari juni aú.

<sup>6</sup> Juni aú caja Tupana capichátari eja'ahuá chu i'imacáñomi chuna júpimi i'imacá. Ri-huacára'a cajrú juni ja'acó i'imacá. Raú ricapichata ne'emacá.

<sup>7</sup> Ripuráca'alo aú caja Tupana lamá'atari je'echú, eja'ahuá hua'até me'etení i'imacare, ricapichaco piyá me'etení. Ricá puráca'aloji aú ja caja riqueño'óta ri'imacá. Chuhua rilamá'ata ricá, ricapichátacaloje ricá quera'atani aú caja penaje. Rihuacajé rihuajaje pu'uhuaré la'acaño, namanaicho la'acaño. Eja'ahuá capichájico hua'ató que nacapichájico.

<sup>8</sup> Nojena, nuhuátacarena, ipechu capicháñaniya marí: Júpija huani ina'uquejlo mil jarechí. Eyá Tupánajlo uncá júpija calé ricá. Pajluhua cala queja rijló mil jarechí. Pajluhuaja cala e'iyá rila'á cajrú huani nacaje. Marí que ri'imacale rijló, pajluhuaja cala queja rijló mil jarechí. Panacójehaca que huani rijló hue'echú ca'alá.

<sup>9</sup> Uncá Tupana malá'atala ricó, rila'acáloje rimacare nacú penaje. Ina'uqué pechu i'imá rinacu: “Rimalá'ata japi ricó” que. Uncá ñaqué calé ricá. Uncá quiñaja calé Tupana huajájica ina'uqué pu'uhuaré nala'acare chona. Rihuata napajno'ocó pu'uhuaré nala'acare liyá. Uncá huani rihuátala ina'uqué naquiyana capichaco. Aú calé uncá jo'ó ri'imalá rimacá que. Rihuata piyuqueja ina'uqué pala'ataco napéchuhua rijló pu'uhuaré nala'acare liyá, namanaicho nala'acare liyá hua'até.

<sup>10</sup> Rimacare nacú i'imajeri. Huajátacaje Jesucristo huaícha majó pu'uhuaré la'ajeño huajaje. Piro'oqueji iphaca lapí nacaje ata'ajé mana'í chiyó, que caja riphájica piño majó. Uncá caja ra'alaje renó. Riphájica penaje, je'echú capichájico. Mejeji quero'otacare huani ina'uquejlo, que caja rimejé i'imajica je'echú capichájico aú. Quera'atani huani aú piyuqueja nacaje capichajo. Piyuque eja'ahuá, piyuque nacaje richu i'imacare capichájero quera'atani aú.

<sup>11</sup> Marí que piyuqueja nacaje capichájico. Ñaquele numá ijló, i'imacáloje palá la'acana nacuja me'etení. Ihue'epí caja itucumó Tupana huátaca que la'acana.

<sup>12</sup> I'imá rihuacajé huátacana nacú. Ila'á ipéchuhua caphí Tupana huátaca que la'acana nacú, huajé eja'ahuá, je'echú caje i'imacáloje quiñaja penaje. Ri'imajica huacajé, je'echú me'etení i'imacare, capichájero quera'atani aú. Piyuqueja richuhúa i'imacare hua'ató capichájero caja quera'atani aú. Hua'ató que piyuque nacaje capichájico.

<sup>13</sup> Rapumí chojé huajé eja'ahuá, je'echú hua'até i'imajeri piño. Caja Tupana arucari huajló ricá. Ricá huátacana nacú hue'emajé. Re piyuqueja nacaje i'imajé palani. Palá la'acañoja calé i'imajeño re palá la'acana nacú.

<sup>14</sup> Nojena, íqui'lja nuhuátacarena, caja numá ijló méqueca ri'imajica. Rihuátacana nacú ila'á ipéchuhua caphí, ila'acá piyá chapú ajopana ina'uqué. Ila'á caja ipéchuhua caphí, ila'acá piyá pu'uhuaré, imanaicho caje. Ila'á caja ipechu ejé, palá ipechu i'imacáloje panacuhuácaca penaje. Marí que ila'ajica aú palá ripechu i'imajica inacu, i'imajica rijhua'até huacajé.

<sup>15</sup> Jema'á marí: Uncá Huahuacára'ajeri Jesucristo la'alá ricó tu'ujné majó i'ijnacana nacú. Ina'uqué pala'atácaloje napéchuhua pu'uhuaré nala'acare liyá penaje, uncá ri'ijnalá majó

quiñaja. Raú hue'echú ca'alá i'imajé jupi najló, ne'emacóloje capichácajo liyá penaje. Ricá yucuna caja Pablo i'imari i'imacá. Huanaquiyana caja ricá, íqui'ija huahuátacare. Rilana'á caja riyucuna papera chojé i'imacá. Tupana a'arí rijló hue'epícaje, ri'imacáloje riyucuna raú penaje.

<sup>16</sup> Aú calé rihuacára'a ajopana Jesucristo hua'aténajlo puráca'aloji. Ricá puráca'aloji numacare nacú ijlo, riyucuna caja Pablo i'imari najló. Puhuichani ripuráca'alo naquiyana. Uncá iná hue'epila palá pamineco chiyó meque quemacánaca ricá. Re ina'uqué, uncá hue'epílaño palá Tupana puráca'alo nacojé. Apojó, apojó que nemacá rinacu. Necá quechíra'año Tupana puráca'alo Pablo lana'acare i'imacá. Ñaqué caja naquechíra'ataca apa'amá Tupana puráca'alo lana'aquejami naquiyana. Marí que la'acana aú nala'á necó chapú.

<sup>17</sup> Nojena, íqui'ija nuhuátacarena, caja nu'umá ijlo riyucuna. Uncá la'alaño Tupana huátaca que yucuna nu'umá ijlo. Chapú la'ajeño necá. Uncá caja quehuácaje calé napuráca'alo. Ihue'epí necá iliyó, a'acá piyá napuráca'alo inacojó. Naca'ajica icá quehuácaje puráca'aloji liyá.

<sup>18</sup> Ñaquele ihue'epí richaje, richájeno Huahuacára'ajeri Jesucristo nacojé. Hue'ematójari ricá. Ripalamane aú i'imá richaje, richaje que richojé caphí. Palánijlaca ina'uqué pura'acojla palá huani rinacu me'etení. Ñaqué caja napura'ajico hua'ajini huani rinacu palá. Marí queja ri'imajica. Caja quetana riyucuna.



## 1 JUAN Introducción:

*Huahue'epícaloje na penájeca San Juan huacára'aca najló marí puráca'aloji yucuna marí:*

Jesucristo i'imacá marí eja'ahuá chu huacajé, ri'imá ina'uqué huecá que caja. Ritaca'á huachaya pu'uhuaré huala'acare chona. Ripalamane aú Tupana amaro Jesucristo ja'apiyá i'imacaño chaje. Rihuajá Ri'irí Jesucristo, pu'uhuaré huala'acare chaya huapumí chojé penaje. Ritaca'á i'imacá. Rejomi rimacápo'o piño. Reyá ri'imá piño marí eja'ahuá chu iyamá ina'uqué le'ejé que cala. Ejomi rácho'o je'echú chojé. Ra'apiyatéjena penájenami, ajopana hua'até, ja'apátaño palá richuhuaja ripuráca'alomi. E'iyonaja ajopana i'imaño, apojó huani napechu i'imacá Tupana nacú. Nemaqué Jesucristo nacú: "Uncá ri'imalá ina'uqué huecá que caja, marí eja'ahuá chu ri'imacá huacajé. Ripéchuja calé i'imari pajluhuaja ina'uqué e'iyá mequetánaja. E'iyonaja uncá ri'imalá rinapona hua'até huecá que caja," que nemájica rinacu. Nemaqué piño marí que Tupana nacú: "Palánija ricá. Uncá rihue'epila pu'uhuaré la'acana. Uncá caja rila'alá nacaje pu'uhuareni i'imacare hua'até. Marí eja'ahuá chu ina'uqué la'año pu'uhuaré. Aú huahue'epí uncá Tupana queño'ótacarena calé huecá," que nemájica rinacu. "Apala rijhua'atéjena, je'echú chu i'imacaño, necá ca'ajná queño'ótaño huecá, nacaje marí eja'ahuá chu i'imacare hua'até. Uncá paala huanapona huala'acare aú pu'uhuaré. Uncá Tupana calé queño'ótari huecá. Naquele uncá caja ra'alá rinacojó pu'uhuaré huala'acare. Iná la'á iná pechu queja pu'uhuaré iná huátaca que. Uncá Tupana huajálaje huecá richona," que nemájica rinacu. "Piyuqueja huecá i'imacá queño'ótacajajo liyá Tupana palamane aú. Uncá na penaje calé Jesucristo taca'arí ina'uqué chaya," que napechu i'imajica apojó huani Tupana pechu liyá. Nala'aque caja necó hue'epiño que huani. Aú nala'aque ajopana ina'uqué mapéchuruna que najluhua, uncale napechu i'imalá napechu que caja.

Ina'uqué hue'epícaloje quehuácaje puráca'aloji nacojé penaje San Juan lana'arí marí puráca'aloji najló i'imacá. Riyuró caja huajló. Ri'imá huajló riyucuna, hua'acá piyá huanacojó pajlácaje puráca'aloji. Rimá caja huajló, huahuátacaloje íqui'ija pecohuáca penaje, huala'acáloje palá Tupana huátaca que raú penaje.

*Iná cajmuchá a'ajeri yucuna marí:*

<sup>1</sup> Jesucristo yucuna hualana'á ijlo papera chojé. Uncá chiyó eja'ahuá i'imá, Jesucristo i'imari. Ri'imacá marí eja'ahuá chu huacajé, huecá amaño ricá huejlú aú. Huema'á caja ri'imacá huajló yucu. Huasapa caja rinacu huayáte'ela aú i'imacá. Ricá penaje a'arí inajlo cajmuchaji, iná i'imacáloje matajnaco je'echú chu raú penaje.

<sup>2</sup> Pu'uhuaacá ri'imacá huajló, aú huamá ricá. Aú calé hue'emá riyucuna ajopánajlo. Uncá tajnácajo penaje calé ricá huemá nacú. Ri'imá Tupana hua'até i'imacá. Eyá pu'uhuaacá ri'imacá marí eja'ahuá chu.

<sup>3</sup> Ricá, huamácare yucuna, hue'emá ijlo. Hua'até ripuráca'alo rimacare nacú huajló hua'apata caja ijlo, ipechu i'imacáloje huapechu que caja raú penaje. Tupana pechu chuhua huapechu; Ri'irí Jesucristo pechu chuhua caja huapechu. Naqué caja ipechu i'imacáloje penaje, hue'emá riyucuna ijlo.

<sup>4</sup> Riyucuna hualana'á ijlo papera chojé, ipechu i'imacáloje pu'ují raú penaje.

*Palá la'acá Tupana yucuna marí:*

<sup>5</sup> Tupana yucuna, Jesucristo i'imacare huajló i'imacá yucuna, hua'apata piño ijlo. Ricá quemari Tupana nacú: "Palá huani la'acá ricá. Uncá huani rila'alá pu'uhuaré. Uncá huani rihue'epila pu'uhuaré la'acana."

<sup>6</sup> Apala huemá huanacuhua: "Tupana Pechu chuhua huapechu." E'iyonaja huanaicho la'acana nacú ca'ajná huecá. Pu'uhuaré la'acana nacú jo'ó ca'ajná huecá. Marí cajena hue'emacachu, majopeja huapajlaca huanacuhua. Pu'uhuaré huala'acare aú iná hue'epí majopeja huapajlaca.

<sup>7</sup> Palá la'acá Tupana. Palá la'acana aú huala'á rila'acá que caja. Panacójéchaca que huapechu raú. Jesucristo, Tupana i'irí, taca'arí a'ahuaná apiyácanami nacú huachaya i'imacá. Rihuacajé rira aco'oró itapuhua aphumi chiyá i'imacá. Marí caje aú ricá'á huanaquiyá piyuqueja pu'uhuaré huala'acare, huanaicho huala'acare hua'até.

<sup>8</sup> Apala huemá huanacuhua marí que huecá: "Uncá huala'alá pu'uhuaré. Uncá caja huala'alá huanaicho." Marí que huemacá ca'ajná, huapechu i'imacale huanacuhua: "Quehuaca ricá huemacare huanacuhua." E'iyonaja uncá quehuaca calé ricá. Uncá

quehuácage puráca'aloji ja'apiyá calé huecá, marí que huapechu i'imacachu. Tupana quemari piyuqueja ina'uqué nacu: "Pu'uhuaré la'ajeño necá, namanaicho la'ajeño necá."

<sup>9</sup> Huapechu i'imajica ee: "Quehuaca pu'uhuaré la'ajeño huecá Tupana quemacá que", e rihue'epeje huamu'ují. Hue'emajica ee piyuque pu'uhuaré huala'acare yucuna Tupánajlo, rila'ajé huanacu palá rimacá que. Ramajo huachaje pu'uhuaré huala'acare liyá. Rica'ajé huanaquiyá piyuqueja pu'uhuaré huala'acare, huamanaicho huala'acare hua'ató. Palá Tupana la'acá iná nacú raú.

<sup>10</sup> Huemá ca'ajná huanacuhúa: "Uncá huala'alá pu'uhuaré." Marí que quemacana aú huala'á Tupana pajlácachi que huajluhua, uncale huema'alá ripuráca'alo ja'apiyá. Ripuráca'alo quemari piyuqueja ina'uqué nacú: "Pu'uhuaré la'ajeño necá, namanaicho la'ajeño necá."

## 2

### *Huachaya pura'ajero Jesucristo*

<sup>1</sup> Nulaquena, nulana'á ijlo marí, ila'acá piyá pu'uhuaré, ila'acá piyá imanaicho. E'iyonaja iná la'acachu pu'uhuaré, Jesucristo pura'aró huachaya Tupana hua'até. Ricá la'arí palá huecá.

<sup>2</sup> Pu'uhuaré huala'acare pachá Jesucristo taca'arí huachaya i'imacá, Tupana amácoloje raú huachaje pu'uhuaré huala'acare liyá penaje. Ñaque caja piyuqueja ina'uqué eja'ahuá chu i'imacáñojlo ricá. Piyuqueja ina'uqué chaya penaje ritaca'á i'imacá, Tupana amácoloje raú nachaje pu'uhuaré nala'acare liyá penaje.

<sup>3</sup> Tupana huacára'aca que la'acaño hue'emacachu, huahue'epí Tupana hua'atéjena huecá.

<sup>4</sup> Apala pimá pinacuhúa: "Tupana hua'ateje nucá" que. Apala uncá ca'ajná pema'alá ra'apiyá. Marí que pila'acachu, pajlácachi picá. Uncá quehuácage puráca'aloji chuhuá calé picá.

<sup>5</sup> Tupana huacára'aca que la'ajeri, ricaja calé huajhué Tupana palá. Tupana huátaca que rihuátaca íqui'ija ricá, ajopana ina'uqué hua'até. Rihuacára'aca que la'ajeri iná i'imacachu, iná hue'epí ripechu chuhuá caja iná pechu.

<sup>6</sup> Apala pimá pinacuhúa marí que: "Tupana pechu chuhuá nupechu." Pu'uhuacá pila'acachu palá, Jesucristo la'acá i'imacá que caja, iná hue'epí quehuácaca pimacá pinacuhúa.

### *Méqueca Jesucristo huacára'aca huala'acá yucuna marí:*

<sup>7</sup> Íqui'ija nuhuátacarena, nulana'á ijlo méqueca Jesucristo huacára'aca huala'acá pajlocaca nacaje. Uncá meyájeje calé ricá rimacare nacú. Caja júpimi icá jema'año méqueca rihuacára'aca huala'acá pajlocaca nacaje. Naqueño'ocá Jesucristo yucuna i'imacana ijlo huacajé, ne'emá ijlo riyucuna.

<sup>8</sup> Rihuacára'a huecá, huahuátacaloje íqui'ija pecohuácaca penaje. Meyájeje queja caja huajlo riyucuna, Jesucristo huátacale huecá íqui'ija. Ñaque caja ihuátaca íqui'ija pecohuácaca. Marí caje aú iyurí pu'uhuaré la'acana iliyó. Chuhua caja ihue'epí palá la'acana itucumó.

<sup>9</sup> Apala pimá pinacuhúa marí que: "Uncá la'alá pu'uhuaré nucá chuhua." E'iyonaja chapú ca'ajná pipechu ajopana pejena nacú. Marí que pipechu i'imacá aú, ejo'ocaja jo'ó pu'uhuaré la'ajeri picá.

<sup>10</sup> Palá la'ajeri iná, iná huátacachu íqui'ija iná ejena. Palá la'acana aú uncá iná ja'aló pu'uhuaré la'acana ejo.

<sup>11</sup> Eyá chapú péchuri rejena nacú, ricá i'imari pu'uhuaré la'ajeri jo'ó, rila'acale necá chapú. Uncá rihue'epila quehuácage puráca'aloji nacojé, pu'uhuaré la'ajeri ri'imacale. Mejlurú queja ricá Tupánajlo, uncale rila'alá Tupana huátaca que.

<sup>12</sup> Icó yuhuanajlo nulana'á marí papera chojé. Tupana amácaro chájena icá. Caja Tupana amaro ichaje pu'uhuaré ila'acare liyá, imanaicho ila'acare liyá hua'ató. Jesucristo palamane calé ramó huachaje.

<sup>13</sup> Yuhuaná chí'inajlo piño nulana'á marí papera chojé, ihue'epícale naca ina'uqueca Jesucristo. Eja'ahuá queño'ocó huacajé ricá i'imari i'imacá. Hualijímacanajlo, ináyanajlo hua'até piño nulana'á marí papera chojé, uncale jema'alá Jiñá Chí'ináricana ja'apiyá. Yuhuanajlo piño nulana'á marí papera chojé, Tupana Huara'apá hua'atéjena i'imacale.

<sup>14</sup> Marí papera chojé nulana'á yuhuaná chí'inajlo. Caja ihue'epí naca Jesucristo. Caja ri'imá eja'ahuá queño'ocó huacajé. Nulana'á hualijímacanajlo, ináyanajlo hua'até. Caja caphí péchuruna icá. Ipechu nacuja Tupana puráca'alo. Raú uncá meque jema'alá jiñana huacára'ajeri ja'apiyá.

<sup>15</sup> Re ina'uqué, uncá napechu i'imalá Tupana nacú. Ipechu i'imaniya nacaje nacú, napechu nacú ri'imacá que caja. Ihuátaniya íqui'ija nacaje marí eja'ahuá chu i'imacare. Iná

huátacachu íqui'ija nacaje marí eja'ahuá chu i'imacare, liñeru, le'ejepelaji, caje macá, uncá meño'ojó iná huátala Tupana rilanaquiya.

<sup>16</sup> Uncá Tupana huacára'ala ajopana ina'uqué la'acá napechu queja. Marí que nala'acá: Namanaicha ja'apiyaja nala'á nacaje. Que'iyapejé nacaje, le'ejepelaji caje, amaro najló. Ricá a'arí name'é rijluhua, nahuátacaloje piyuqueja nacaje najluhua penaje. Nanane aú nala'á necó chá'atajeño que huani. Marí que la'acaño cajrú ina'uqué marí eja'ahuá chu. Uncá Tupana liyaje ilé caje i'imalá.

<sup>17</sup> Caja eja'ahuá queño'orí tajnácajo; caja piyuque nacaje ina'uqué huátacare najluhua hua'até queño'orí tajnácajo. Tupana huátaca que la'acaño, necaja calé i'imaajeño macapichaco je'echú chu. Uncá tajnácajo penaje calé ne'emajé je'echú chu.

*Iná hue'epícaloje quehuácaje yucuna, pajlácaje yucuna liyá penaje marí:*

<sup>18</sup> Nuhuátacarena, yehuicha eja'ahuá íphájica rená chojé caja penaje. Caja jema'á nemacá marí que: "Pajluhuaja huaícha. Chapú huani péchuri Jesucristo nacú ri'imajica." Caja riphá rená chojé. Chuhuaca re ina'uqué, chapú péchuruna Jesucristo nacú necá. Cha'apá necá. Marí caje aú huahue'epí yehuicha eja'ahuá íphájica rená chojé caja penaje.

<sup>19</sup> Chapú péchuruna Jesucristo nacú i'imaño huanahuiyana hua'até i'amacá. Na'apaña hue'emacá, uncale huapechu que calé napechu i'amacá aú. Huapechu que napechu i'imaquela, uncá ne'ejnañáalaja huecá. Na'apá hualiyá i'amacá, huahue'epícaloje mecajnaca necá penaje. Uncá huapechu que calé péchuruna necá.

<sup>20</sup> Jesucristo a'arí ijló Tupana Pechu i'amacá. Raú ihue'epí mecajeca quehuácaje puráca'aloji.

<sup>21</sup> Nulana'á ijló marí papera chojé, caja ihue'epícale mecajeca quehuácaje puráca'aloji. Uncá nulana'alá ijló ricá, ihue'epícaloje rinacojé penaje. Caja ihue'epí rinacojé. Ñaquele ihue'epí uncá pajlácaje i'imalá quehuácaje puráca'aloji e'iyá.

<sup>22</sup> Marí caje aú iná hue'epí mecajeca pajlácahi. Apú quemari ca'ajná Jesucristo nacú: "Uncá Tupana calé huacára'ari rila'acá risápaca'alo marí eja'ahuá nacú i'amacá." Marí que rimacá aú iná hue'epí mecajeca ina'uqueca ricá. Pajlácahi ricá; chapú Jesucristo nacú péchuri caje ricá. Uncá rihuátala Tupana; uncá caja rihuátala Jesucristo.

<sup>23</sup> Marí que ne'iyajena quemacá: "Uncá Tupana calé huacára'ari Jesucristo la'acá rila'acá que i'amacá." Marí que nemacachu rinacu, iná hue'epí uncá Tupana hua'atéjena calé necá. Eyá ajopana quemañó rinacu marí que: "Tupana huacára'ari Jesucristo la'acá nacaje marí eja'ahuá chu i'amacá." Raú iná hue'epí Tupana hua'atéjena necá, quemañó marí que rinacu.

<sup>24</sup> Ñaqueja a'ajica inacojé Tupana puráca'alo. Iqueño'ocá Tupana ja'apiyá jema'acana huacajé, icá jema'año riyucuna. A'ajica ee inacojé ricá ñaqueja, Tupana pechu chuhuá ipechu. Ri'irí pechu chuhuá caja ipechu.

<sup>25</sup> Ri'irí Jesucristo, a'arí huajló cajmuchaji, hue'emacáloje matajnaco je'echú chu raú penaje. Rimacá huanacu i'amacá que ra'acá huajló ricá.

<sup>26</sup> Marí que nulana'acá ijló, jema'acá piyá ijhua'até pajlácaño ja'apiyá.

<sup>27</sup> Jesucristo huacára'ari huajló Tupana Pechu. Ñaquele re hue'iyá Tupana Pechu. Ricá jehuíña'atari huecá piyuqueja quehuácaje puráca'aloji nacú. Uncá ripajlala huajhua'até. Ñaquele uncá na penaje calé ajopana ina'uqué jehuíña'ataca huecá. I'imá ñaqueja Jesucristo pechu chuhuá. Tupana Pechu jehuíña'ataca huecá que caja hue'emajica ripechu chuhuá.

<sup>28</sup> Nulaquena, ipechu i'imá Jesucristo pechu chuhuá. Raú ipechu i'imaaje caphí majó riphájica huacajé. Uncá caja apáña'alajo ripiyá rihuacajé.

<sup>29</sup> Caja ihue'epí Jesucristo la'acá piyuqueja nacaje palá. Ñaquele caja la'acaño, Tupana yaní necá. Caja ihue'epí rinacojé.

### 3

*Tupana hua'atéjena yucuna marí:*

<sup>1</sup> Pamá, meque íqui'ica Tupana huátaca huecá. Iqui'ija huani rihuátaca huecá, aú rimá huanacu: "Nuyani necá" que. Que jo'ó ricá. Riyani jo'ó huecá. Uncá jema'alaño Tupana ja'apiyá, uncá hue'epíalaño Tupana yanica huecá. Uncá caja nahue'epila Tupana. Aú uncá nahue'epila naca huecá.

<sup>2</sup> Nojena, íqui'ija nuhuátacarena, caja Tupana yaní huecá. Uncá jo'ó huahue'epila palá méqueca hue'emajica. Huahue'epí Jesucristo íphájica majó huacajé, ricá que caja hue'emajica. Rihuacajé huamaje mecaje huánica ricá. Marí que ri'imajica huajló rihuacajé.

<sup>3</sup> Huátáño ñaquele i'imacana, ca'año nanaquiyó namanaicho nala'acare, pu'uhuaré nala'acare hua'ató. Naca'á caja nanaquiyó chapú caje napechu nacú i'amacá, ne'emacáloje palá reyá penaje. Jesucristo pechu i'amacá que caja napechu i'amacáloje raú penaje.

<sup>4</sup> La'arí pu'uhuaré, rimanaicho caje, uncá Tupana ja'apiyá jema'ajeri calé ricá. Uncá la'alá Tupana huacára'aca que, pu'uhuaré la'ajeri ricá.

<sup>5</sup> Caja ihue'epí Jesucristo i'imacá marí eja'ahuá chu i'imacá, rica'acáloje huanauquiyá huamanaicho huala'acare, pu'uhuaré huala'acare hua'ató penaje. Uncá Jesucristo hue'epila rimanaicho la'acana, pu'uhuaré la'acana. Uncá caja chapú caje i'imalá ripechu nacú.

<sup>6</sup> Jesucristo pechu chuhuá iná pechu i'imacachu, uncá iná i'ijnatala iná péchuhua iná manaicho la'acana nacú, pu'uhuaré la'acana nacú hua'até. Eyá rimanaicho la'ajeri, pu'uhuaré la'ajeri, uncá Jesucristo hua'ateje calé ricá. Uncá caja rihue'epila mecajeca Jesucristo.

<sup>7</sup> Iqui'ija nuhuátacarena, jema'aniya ajopana ina'uqué pajlácachina ja'apiyá. Marí quehuaca: Palá la'ajeño la'año palá, palá péchuruna ne'emacale. Jesucristo pechu que caja napechu i'imacale, nala'á palá.

<sup>8</sup> Eyá pu'uhuaré la'acana nacú i'imacaño, namanaicho la'acana nacú i'imacaño, Jiñá Ch'i'náricana hua'atéjena necá. Jiñá Ch'i'náricana queño'orí pu'uhuaré la'acana riqueño'ocó eyá. Tupana i'irí capichátacaloje riliyá risápaca'alo penaje riphá majó marí eja'ahuá nacojé i'imacá.

<sup>9</sup> Iná i'imacachu Tupana hua'ateje, uncá iná i'imalá pu'uhuaré la'acana nacú. Tupana Pechu i'imacale iná e'iyá, uncá iná i'imalá pu'uhuaré la'acana nacú. Ñaquele uncá meño'ojó rijhua'atéjena i'imalá pu'uhuaré la'acana nacú. Tupana a'arí Ripechu najló, napechu i'imacáloje ripechu que caja raú penaje.

<sup>10</sup> Iná hue'epí palá mecajenaca ina'uqué Tupana hua'atéjena ca'ajná, Jiñá Ch'i'náricana hua'atéjena ca'ajná. Uncá la'alaño palá, uncá caja huátalaño íqui'i ajopana ina'uqué, uncá Tupana hua'atéjena calé necá.

*Iqui'ija huahuátacaloje pecohuácaca penaje yucuna marí:*

<sup>11</sup> Iqueño'ocá Jesucristo ja'apiyá jema'acana huacajé, ícá jema'año nemacá marí que i'imacá: "Ihuata íqui'ija pecohuácaca."

<sup>12</sup> Huala'aniya Caími chu la'acá que i'imacá. Jiñá Ch'i'náricana hua'ateje ri'imacale, rinó re'ehuemi chu i'imacá. Marí jimaje rinó ri'imacá: Pu'uhuaré la'ajeri Caími chu i'imacá. Eyá re'ehuemi chu i'imari palá la'ajeri i'imacá. Nacaje rila'acare i'imari palani Tupánajlo. Raú caími chu amari chapú re'ehuemi chu, rinócaloje ricá penaje. Marí caje jimaje rinó ri'imacá.

<sup>13</sup> Nojena, re caja chapú péchuruna inacu. Uncá jema'alaño Tupana ja'apiyá necá. Ipechu i'imaniya nanacu: "¿Naje ilé que napechu huanacu?"

<sup>14</sup> Júpimi calé uncá caja huema'alá Tupana ja'apiyá. Pachá huacapichácojla Tupana liyá. Caja chuhua huema'acá ra'apiyá i'imacá. Ñaquele hue'emajé rijhua'até matajnaco je'echú chu. Chuhua caja íqui'ija huahuátaca pecohuácaca. Raú calé huahue'epí quehuácaca rijhua'atéjena huecá. Eyá uncá huátalaño íqui'ija ajopana, capichájeño penájena jo'ó necá.

<sup>15</sup> Chapú iná pechu i'imacachu iná nauquiyana nacú, ina'uqué nójeri queja iná Tupánajlo. Caja pihue'epí uncá meño'ojó Tupana Pechu i'imalá ina'uqué nójeri e'iyá. Uncachu Tupana Pechu i'imalá iná e'iyá, uncá iná i'imalaje je'echú chu Tupana hua'até.

<sup>16</sup> Huahue'epí Jesucristo huajhuena huecá. Ñaquele riyurí richó ajopana ina'uquejlo, nenócaloje ricá huachaya penaje. Palani ñaque caja huapechu i'imacá huanauquiyana nacú, huataca'acáloje najló penaje.

<sup>17</sup> Re huajló nacaje ca'ajná, a'ajnejí, a'arumacaji caje macá piyuque, hue'emacáloje palá raú penaje. Re ca'ajná apú huanauquiyana, camu'ují huani rila'acá rinacu. E'iyonaja uncá ca'ajná huahue'epila rimu'ují raú. Uncá ca'ajná hua'alá rijló nacaje. Uncachu hua'alá ilé cajena ñaté, iná hue'epí uncá Tupana Pechu ja'apiyá calé huecá. Ripechu aú iná huátaca íqui'ija ajopana.

<sup>18</sup> Iqui'ija nuhuátacarena, uncá paala majopeja huemacá huanauquiyana nacú: "Iqui'ija huahuátaca necá" que. Palá iná la'acá necá aú iná hue'epí íqui'ica iná huátaca necá.

*Caphí péchuri pura'acó Tupana hua'até yucuna marí:*

<sup>19</sup> Huahue'epí Tupana hua'atéjena huecá, íqui'ija huahuátacachu huanauquiyana. Marí que ri'imacale huajló, uncá huahuó la'aló Tupana hua'até pura'acano aú.

<sup>20</sup> Apala pipechu i'imá: "Uncá paala nula'acá." Tupana pechu chá'atari huapechu. Ricá hue'epiri piyuqueja nacaje iná pechu nacú i'imacare.

<sup>21</sup> Iqui'ija nuhuátacarena, uncachu huapechu quemalá huajló pu'uhuaré huala'acare nacú, caphí huapechu Tupana hua'até pura'acano nacú.

<sup>22</sup> Tupana a'ajeri huajló nacaje piyuque huaquej'ajicare riliyá, huala'acale ripuráca'alo quemacá que. Ra'ajé huajló ricá, huala'acale piyuque nacaje, ri'imacáloje palá Tupana nacu penaje.

<sup>23</sup> Tupana huacára'ari huapechu i'imacá caphí Ri'irí chojé, Jesucristo chojé. Rihuacára'a caja huahuátaca íqui'ija pecohuácaca. Marí que rihuacára'aca huala'acá i'imacá.

<sup>24</sup> Ra'apiyá jema'ajeño pechu i'imari Tupana pechu que; ne'emá pajhua'até chaca napechu aú. Huahue'epí Tupana pechu chuhua huapechu. Ripechu ra'acare huajló aú huahue'epí ricá.

## 4

### *Chapú péchuri Jesucristo nacú yucuna marí:*

<sup>1</sup> Nojena, íqui'ija nuhuátacarena, re cajrú huani pajlácachina marí eja'ahuá chu. Nemá nanacuhua: "Huecá ja'apátaño Tupana puráca'alo." Jema'aniya piyuque ina'uqué ja'apiyá, quemáño nanacuhua marí que. Pamineco jema'á méqueca napura'acó, palani ca'ajná napuráca'alo, pajlácaje ca'ajná ricá. Raú ihue'epeje mecajenaca necá. Re ca'ajná Tupana Pechu ne'iyá ca'ajná, uncá ca'ajná.

<sup>2</sup> Marí cajé aú ihue'epeje mecajena e'iyaca Tupana Pechu: Pu'uhucá nemájica Jesucristo nacú: "Marí eja'ahuá chu ri'imacá huacajé, huecá que caja ri'imacá ina'uqué." Aú iná hue'epí re Tupana Pechu ne'iyá.

<sup>3</sup> Uncá quemalaño ilé que Jesucristo nacú, uncá Tupana Pechu i'imalá ne'iyá. Chapú péchuruna Jesucristo nacú necá, uncá i'imalaño riyucuna ñaqué. Caja ne'emá ijlo chapú huani péchuri Jesucristo nacú yucuna. Nemá rinacu: "Riphájica majó i'imajica." Caja riphá rená chojé nemacare nacú ijlo i'imacá. Caja cha re cajrú ina'uqué me'etení, chapú péchuruna necá Jesucristo nacú.

<sup>4</sup> Iqui'ija nuhuátacarena, Tupana hua'atéjena icá. Caja chuhua uncá a'alá inacajó pajlácachina puráca'alo, Tupana Pechu i'imacale e'iyá. Jiñá pechu aú nemá nacaje nacú. Eyá huecá quemáño nacaje nacú Tupana Pechu aú. Aú calé uncá hua'alá huanacajó pajlácachina puráca'alo.

<sup>5</sup> Chapú péchuruna Jesucristo nacú, necá pura'año nacaje nacú marí eja'ahuá chu i'imacare. Ne'iyajena jema'año na'apiyá, napechu i'imacale chapú Jesucristo nacú nahua'até.

<sup>6</sup> Eyá huecá, Tupana hua'atéjena huecá. Hue'emá Tupana yucuna ina'uquejlo. Tupana ja'apiyá jema'ajeño ne'emacale, nema'á hua'apiyá ricá. Uncá hue'epilaño Tupana, uncá caja jema'alaño hua'apiyá. Marí caje aú huahue'epí mecajenaca necá i'imaño quehuácaje puráca'aloji ja'apiyá. Raú caja huahue'epí mecajenaca i'imacá pajlácaje puráca'aloji ja'apiyá.

### *Tupana huajhuena ina'uqué yucuna marí:*

<sup>7</sup> Nojena, íqui'ija nuhuátacarena, ihuata íqui'ija pecohuácaca. Tupana Pechu aú iná huátaca íqui'ija pecohuácaca. Huátari íqui'ija ajopana, Tupana yaní naquiyana ricá. Rihue'epí caja Tupana.

<sup>8</sup> Iqui'ija Tupana huátaca ina'uqué. Tupana la'arí iná pechu palá, iná huátacaloje íqui'ija ajopana ina'uqué raú penaje. Necá uncá huátalaño íqui'ija ajopana ina'uqué, uncá hue'epilaño Tupana.

<sup>9</sup> Tupana huacára'ari Ri'irí huani marí eja'ahuá chojé i'imacá. Pajluhuaja Ri'irí. Rihuacára'a ri'imacá, ra'acáloje huajló cajmuchaji, hue'emacáloje matajnaco je'echú chu raú penaje. Marí caje aú huahue'epí Tupana huajhuena huecá.

<sup>10</sup> Marí que Tupana huajhuena huecá: Uncá huecá calé huátaño íqui'ija ri'imacá pamineco chiyó. Eyá ricá huátari hue'emacá íqui'ija pamineco. Aú calé rihuacára'a Ri'irí majó i'imacá, ritaca'acáloje huachaya pu'uhuaré huala'acare pachá penaje. Raú Tupana amaro huachaje huamanaicho huala'acare liyá, pu'uhuaré huala'acare liyá hua'ató. Jesucristo palamane calé ramó huachaje.

<sup>11</sup> Nojena, íqui'ija nuhuátacarena, Tupana huátari huecá íqui'ija. Ñaquele palani huajló, huahuátacaloje pecohuácaca ñaqué caja penaje.

<sup>12</sup> Uncá na calé amari Tupana. Re Ripechu hue'iyá. Raú huahuajhué ricá palá; huahuajhuena caja ajopana ina'uqué Ripechu aú.

<sup>13</sup> Tupana a'arí huajló Ripechu. Raú huahue'epí huajhua'até Ripechu; huapechu ri'jhua'até caja.

<sup>14</sup> Huecá calé amaño Tupana i'irí i'imacá. Ricá Tupana huacára'acare majó ina'uqué i'imatájeri penaje huamá i'imacá. Riyucuna hue'emá ajopana ina'uquejlo, ajopana ina'uquejlo que.

<sup>15</sup> Ne'iyajena quemáño Jesucristo nacú: "Tupana i'irí ricá" que. Raú iná hue'epí Tupana Pechu i'imari ne'iyá; napechu i'imari caja Tupana hua'até.

<sup>16</sup> Huahue'epí Tupana huátaca huecá íqui'ija. Huahue'epí caja quehuácaca Tupana huajhuena ina'uqué. Huahuátacachu íqui'ija pecohuácaca, huahue'epí Tupana Pechu chuhua huapechu. Huahue'epí caja huapechu chuhua caja Ripechu.

<sup>17</sup> Marí caje aú palá huahuátaca íqui'ija pecohuácaca Tupana huátaca huecá que caja. Marí eja'ahuá chu hue'emacá quetana huala'á cajrú nacaje. Aquijñojo Tupana quemájeri huana-cu méqueca rijló nacaje huala'acare. Rihuacajé uncá huahuó la'alajo ripiyá, huala'acale marí eja'ahuá chu Jesucristo la'acá i'ímacá que caja.

<sup>18</sup> Huahuátacachu íqui'ija Tupana, uncá huahuó la'aló Tupana piyá. Iná huo la'acochu ripiyá, iná pechu nacú rí'imá: "¿Rihuajaje chí nucá?" Marí que iná pechu i'ímacachu, uncá paala iná pechu Tupana nacú. Iqui'ija iná huátacachu Tupana, ra'apata iná liyá quero'ocajo.

<sup>19</sup> Huahuajhué Tupana, rihuajhuena hue'emacale pamineco.

<sup>20</sup> Apala pimá ca'ajná pinacuhúa: "Nuhujhué Tupana" que. E'iyonaja chapú pihuó ca'ajná apú pinaquiayana cha. Marí caje aú pila'á pinacuhúa pajlácachi que caja. Iná naquiayana, iná amácarena necá. Uncachu iná huátala necá íqui'ija, uncá caja meño'ojó iná huátala íqui'ija Tupana. Uncá iná amálare ricá.

<sup>21</sup> Marí que Jesucristo huacára'aca huecá: "Pihuata íqui'ija pinaquiayana. Iná huata ca'ajná íqui'ija Tupana. Ñaque caja Tupana huátaca iná huátaca íqui'ija iná naquiayana."

## 5

*Jesucristo ja'apiyá jema'ajeño yurica naliyó pu'uhuaré la'acana yucuna marí:*

<sup>1</sup> Tupana a'arí Jesucristo Hue'emátájeri penaje. Rí'irí huani Jesucristo. Huala'acachu quehuácaca ricá, Tupana yaní huecá. Iná huátacachu íqui'ija Tupana, ñaque caja iná huátaca riyani.

<sup>2</sup> Iná la'á Tupana huacára'aca que; iná huata caja ricá íqui'ija. Marí que iná la'acachu, iná hue'epí iná huátaca caja riyani.

<sup>3</sup> Iqui'ija iná huátacachu Tupana, iná la'á rihuacára'aca que. Nacaje rihuacára'acare huala'acá, uncá puhuichani calé ricá.

<sup>4</sup> Marí que la'ajeño Tupana hua'atéjena: Nayurí naliyó pu'uhuaré la'acana, namanaicho la'acana. Uncá nala'alá pu'uhuaré ajopana la'acá que caja. Caphí huapechu Jesucristo chojé. Ripalamane aú ja calé huayurí pu'uhuaré la'acana hualiyó. Raú calé uncá huala'alá pu'uhuaré ajopana la'acá que caja.

<sup>5</sup> Caphí Jesucristo chojé péchuruna, necaja calé yuriño pu'uhuaré la'acana naliyó. Marí eja'ahuá chu ajopana la'año pu'uhuaré cajrú. Uncá huala'alá ñaque, huahue'epícale mecajeca Jesucristo, Tupana I'irí.

*Jesucristo yucuna marí:*

<sup>6</sup> Huahue'epí Tupana I'irí huani ricá, Tupana quemacale rinacu: "Nu'urí" que. Nala'acá bautizar ricá huacajé Tupana pura'aró je'echú chiyá rijhua'até. Rimá: "Nu'urí" que rinacu rihuacajé. Ñaque caja rimacá rinacu je'echú chiyá, nacúhua'ataca ricá a'ahuaná apiyácanami nacojé huacajé. Eyá Tupana Pechu quemari caja rinacu: "Tupana I'irí ricá" que. Quehuácage puráca'aloji nacú pura'ajero Tupana Pechu.

<sup>7</sup> Hueji que pe rinacu quemacana i'ímacá. Ripechu quemari rinacu: "Tupana I'irí ricá" que. Tupana quemari caja: "Nu'urí ricá" que, nala'acá bautizar ricá huacajé. Eyá nacúhua'ataca rí'ímacá huacajé rimá piño ñaque caja.

<sup>8</sup> Panacójéchaca que napuráca'alo. Marí caje aú iná hue'epí Tupana I'irica Jesucristo.

<sup>9</sup> Ina'uqué i'ímaño Jesucristo yucuna huajló i'ímacá. Huema'á na'apiyá. Tupana i'ímarí caja Rí'irí yucuna huajló. Ina'uqué chaje rihue'epica riyucuna. Ñaquele ra'apiyá jema'acana palani.

<sup>10</sup> Caphí Tupana I'irí chojé péchuruna, necá hue'epíño quehuaca Tupana quemacá Rí'irí nacú. Eyá uncá caphí calé richojé péchuruna la'año Tupana pajlácachi que. Pajlácachi que nala'acá najluhua ricá, uncale nema'alá ra'apiyá Rí'irí yucuna.

<sup>11</sup> Marí que Tupana quemacá huanacu i'ímacá: "Nucá a'arí ina'uquejlo cajmuchaji, natajnaco piyá raú je'echú chu penaje. Nu'urí, Jesucristo, ricaja calé a'arí ijlo cajmuchaji," que rimacá Rí'irí nacú huajlójé penaje.

<sup>12</sup> Iná i'ímacachu Tupana I'irí palamane aú, re inajlo cajmuchaji, iná i'ímacáloje matajnaco raú je'echú chu penaje. Uncachu iná i'ímalá Tupana I'irí palamane aú, uncá caja cajmuchaji i'ímalaje inajlo. Aú uncá iná i'ímalaje matajnaco je'echú chu.

*Caja penaje rimacare nacú najló i'ímacá marí:*

<sup>13</sup> Tupana I'irí ja'apiyá jema'ajeño, i'ímajeño matajnaco je'echú chu. Ihue'epícaloje rinacójé penaje, nulana'á marí patera chojé ijlo riyucuna.

<sup>14</sup> Huapechu huatána'ari Tupana nacojé, ra'acale huajló nacaje huaquejá'acare riliyá. Palani nacaje huaquejá'acare riliyá i'ímacachu rijló, ra'á huajló ricá.

<sup>15</sup> Huahue'epí rema'acá hua'apiyá huemacare nacú rijló. Huahue'epí caja ra'acá huajló nacaje huaquejá'acare riliyá.

<sup>16</sup> Apala pamá Jesucristo ja'apiyá jema'ajeri la'acá pu'uhuaré. Pu'uhuaré rila'ajica ee, eco pipura'ó Tupana hua'até richaya, ritaca'acá piyá ripachá. Apú ca'ajná la'ajeri pu'uhuaré. Pachá ritaca'ajé. Pipura'aniyo Tupana hua'até ilé caje chaya, rila'acáloje ricá palá penaje.

<sup>17</sup> Piyuque pu'uhuaré ina'uqué la'acare, uncá paala Tupánajlo ricá. Re nacaje uncá Tupana huátala iná la'acá, uncá iná taca'alá raú.

<sup>18</sup> Huahue'epí Tupana hua'atéjena uncá i'imalaño pu'uhuaré la'acana nacú, Tupana I'irí amácale huecá Jiñá Chi'ináricana liyá. Raú uncá hue'emalá pu'uhuaré la'acana nacú.

<sup>19</sup> Huahue'epí Tupana hua'atéjena huecá. Huahuacára'ajeri caja ricá. Eyá piyuque ajopana ina'uqué eja'ahuá chu i'imacaño, necá i'imaño Jiñá Chi'ináricana hua'atéjena.

<sup>20</sup> Huahue'epí Tupana I'irí iphaca majó i'imacá. Ricaja calé la'arí huapechu palá, huahue'epícaloje raú mecajeca Tupana penaje. Quehuaca re Tupana; uncá riyucúnaja calé ricá. Ripachu chuhúá caja huapechu. Jesucristo pechu chuhúá caja huapechu que quemacana marí. Huachi'ináricana jo'ó ricá, Jesucristo. Matajnaco cajmuchaji minaricana caja ricá.

<sup>21</sup> Iqui'ija nuhuátacarena, ipechu i'imaniya apú nacú ca'ajná, nacaje jenami nacú ca'ajná: "Huachi'ináricana ricá" que. Maáreje riyucuna tajnaro.

## 2 JUAN

*San Juan huacára'ari apa'ahuélojlo puráca'aloji marí que:*

<sup>1</sup> Nucá, Juan, huacára'ari marí papera pijló. Phíyu'uque cha nucá. Tupana ja'apiyá jema'ajeyo caja picá nujhua'até. Tupana i'ihuapacáreru rijluhua ajopana ina'uqué e'iyayá caja picá. Pijló, piyánijlo hua'até nuhuacára'a marí papera. Iqui'ija nuhuátacarena icá. Uncá nucaja calé huátari icá íqui'ija. Ñaque' caja ajopana huátaca icá íqui'ija. Hue'epiño quehuácaje puráca'aloji nacojé necá numá nacú.

<sup>2</sup> Iqui'ija huahuátaca icá, quehuácaje puráca'aloji ja'apiyá hue'emacale ijhua'até. Caja queja hue'emajica ra'apiyá matajnaco.

<sup>3</sup> Jesucristo jara'apá Tupana. Nuhuata ricá Ri'irí, hua'até la'acá icá palá, i'imacáloje Ripechu aú palá penaje. Marí que huani nuhuátaca ijlo ricá, íqui'ija Tupana huátacarena i'imacale.

<sup>4</sup> Pu'ují nupechu, nuhue'epícale piyana naquiyana a'acá nanacojó quehuácaje puráca'aloji. Raú nala'á Huara'apá Tupana huacára'aca que.

<sup>5</sup> O'ohueló, chuhua numájica pijló marí que: Jesucristo huacára'ari huecá, huahuátacaloje íqui'ija pecohuácaca penaje. Uncá huajé calé marí numacare nacú pijló. Caja queja rihuacára'aca huecá, huaqueño'ocá ra'apiyá jema'acana huacajé.

<sup>6</sup> Iná huátacachu íqui'ija Tupana, iná la'á ripuráca'alo quemacá que. Iqueño'ocá ra'apiyá jema'acana huacajé, icá hue'epiño méqueca rihuacára'aca huecá, huahuátacaloje íqui'ija pecohuácaca raú penaje.

*Pajlácachina yucuna marí:*

<sup>7</sup> Caja cajrú pajlácachina ja'apaca pajlácage nacú marí eja'ahuá chu. Uncá na'alá nanacojó Jesucristo yucuna. Apojó nemacá rinacu: "Ri'imaqué marí eja'ahuá chu huacajé, uncá ina'uqué huecá que calé ri'imajica." Marí que quemacaño pajlaño rinacu majopeja. Chapú péchuruna caja necá Jesucristo nacú.

<sup>8</sup> A'aniya inacojó napuráca'alo, napichátajica ijlo quehuácaje puráca'aloji. Caja palá la'acana nacuja icá. Marí que ila'acá aú palani nacaje i'imajica ijlo je'echú chu. Ñaquele a'aniya inacojó napuráca'alo marí caje apichaco piyá ijlo.

<sup>9</sup> Apala apú i'imari yucu. Uncá Jesucristo puráca'alo chuhua calé ca'ajná ri'imá yucu ina'uquejlo. Marí caje aú iná hue'epí uncá ripechu i'imalá Tupana pechu chuhua. Eyá i'ihuapataro Jesucristo puráca'alo cha, pechu i'imari Jesucristo pechu chuhua. Tupana pechu chuhua caja ripechu.

<sup>10</sup> Apala apú ina'uqué iphájeri ca'ajná inacu. Uncá ca'ajná rehuíña'atalaje icá nacaje nacú, Jesucristo jehuíña'ataca rinacu que caja. Iyuríniya ilé caje mujlúca'aca iñacaré chojé, rehuíña'atacaloje icá penaje. Imániya caja rijlo marí que: "Eco Tupana la'á picá palá" que.

<sup>11</sup> Marí que imájica ee rijlo, pu'uhuaré la'ajeño i'imajeño rijhua'até.

*Caja penaje rimacare nacú rojló marí:*

<sup>12</sup> Re cajrú nuhuata nacú quemacana pijló. E'iyonaja uncá nuhuátala rilana'acana papera chojé. Nuhuata ichaje i'ijnacana. Ejéchami nupura'ajico ijhua'até rinacu. Marí que la'acana aú pu'ují huapechu i'imajica.

<sup>13</sup> Pilara'úna pila'útuna, quele quemano pinacu: Eco palá olahuilajlo ca'ajno. Tupana i'ihuapacáreru rijluhua ajopana ina'uqué e'iyayá pe'ehueló. Maáreje ritajno.



### 3 JUAN

*Puráca'aloji San Juan huacára'acare apujlo marí:*

<sup>1</sup> Nucá, Juan, huacára'ari marí puráca'aloji pijló, Gáyojlo. Caja cha phíyu'uque nucá. Picá íqui'ija nuhuátacarejlo, nulana'á marí. Iqui'ija nuhuátacare picá, nupechu e'ehué pi'imacale quehuácaje puráca'aloji ja'apiyá jema'acana nacú.

<sup>2</sup> Iqui'ija nuhuátacare picá. Nupura'ó Tupana hua'até pinacu, piyuque nacaje i'imacáloje pijló palá penaje. Nupura'ó caja rijhua'até pinacu, pi'imacáloje peyajhueni raú penaje. Nuhue'epí caja palá péchuri picá Tupana nacú. Ñaqueé caja nuhuátaca pinapona i'imacá palá, peyajhueni pijló.

<sup>3</sup> Majó huanaquiyana iphaño nunacu i'imacá. Necá i'imaño nojló piyucuna. Nemá pinacu: "Caphí ripechu Tupana chojé. Palá caja ra'acá quehuácaje puráca'aloji rinacojó," que nemacá pinacu. Riyucuna jema'acana aú pu'ují huani nupechu la'acó.

<sup>4</sup> Nulaquena la'acachu quehuácaje puráca'aloji quemacá que, pu'ují huani nupechu la'acó raú. Uncá na apú la'alá nupechu nojló ñaqueé.

<sup>5</sup> Iqui'ija nuhuátacare picá. Nuhue'epí pila'acá palá huanaquiyana re i'imacaño nacú. Ajopana te'eré eyájena hua'ató pila'á caja palá.

<sup>6</sup> Ne'emá piño huajló piyucuna marí que: "Iqui'ija rihuátaca Tupana, ajopana ina'uqué hua'até." Piyucuna ne'emá huajló maare Jesucristo ja'apiyá jema'ajeño jahuacáca'alo ejé. Eyá numá piño pijló: Eco pa'á piño ajopana te'eré eyájena ñaté, nacaje nala'acare nacú camu'ují aú, ne'ejnacáloje palá reyá penaje. Pa'ájé ñañaté Tupana huátaca que.

<sup>7</sup> Necá i'ijnaño apú eyá, apú eyá que Jesucristo yucuna i'imacana nacú. Ajopana ca'ajná huátaño ñañaté a'acana, nacaje nala'acare nacú camu'ují aú. Uncachu ne'emalá Jesucristo ja'apiyá jema'ajeño, uncá najña'alá naliyá ricá.

<sup>8</sup> Ñaquele huecá, Jesucristo ja'apiyá jema'ajeño, a'año huanacojó necá, hua'acáloje ñañaté nacaje a'acana najló aú penaje, ne'ejnacáloje quehuácaje puráca'aloji i'imagé ajopánajlo, ajopánajlo que penaje.

*Uncá paala Diótreres la'acá yucuna marí:*

<sup>9</sup> Jesucristo ja'apiyá jema'ajeño icá. Nuhuacára'a puráca'aloji ijlo i'imacá, nula'acáloje jencacú raú penaje. E'iyonaja uncá Diótreres jema'alá no'opiyá. Ricoja rihuátaca ihuacára'ajeri i'imacana.

<sup>10</sup> Nuphájica penaje inacu nu'umajé pijló riyucuna piyuque. Cajrú richapújra'aco nunacu. Majopeja ripajlaca. Uncá paala rijló pu'uhuaré la'acana rejeja. Richaje rila'acá pu'uhuaré marí que la'acana aú: Uncá rihuátala ajopana Jesucristo ja'apiyá jema'ajeño iphaca inacu. Uncá caja riyurila ajopana ina'uqué la'acá necá palá. Marí caje pachá rácho'ota necá jahuacáca'alo ñacarelana chiyá.

<sup>11</sup> Iqui'ija nuhuátacare picá, pila'aniya pu'uhuaré, pu'uhuaré la'acáloje la'acá que caja. Pila'á palá, palá la'acáloje la'acá que caja. Tupana le'ejena ina'uqué la'año palá. Eyá uncá la'alaño palá, uncá caja Tupana le'ejena calé necá.

*Demetrio la'acá palá yucuna marí:*

<sup>12</sup> Piyuque ina'uqué pura'año palá Demetrio nacú. Quehuácaje puráca'aloji quemacá que caja rila'acá nacaje. Ñaquele palá rila'acá. Huecá caja amaño rila'acá palá. Ica hue'epiño huemacare nacú quehuaca ricá.

*Caja penaje rimacare nacú najló marí:*

<sup>13</sup> Re cajrú nacaje nuhuátacare nacú quemacana pijló. E'iyonaja calé uncá nuhuátala rilana'acana papera chojé.

<sup>14</sup> Quiñaja nuhuátaca pichaje i'ijnacana ca'ajno. Ejéchami huapura'ajico rinacu pajhua'atéchaca.

<sup>15</sup> Nuhuata pipechu i'imacá palá. Piyuqueja íqui'i pihuátacarena maare quemáloje pinacu: "Eco palá rijló ca'ajno" que. Eco palá caja ilérohua i'imacaño, íqui'ija huahuátacarenajlo piyuqueja. Caja quetana riyucuna.

## SAN JUDAS Introducción

*Huahue'epícaloje na penájeca San Judas huacárára'aca najló marí puráca'aloji yucuna marí:*

Jesucristo i'ímacá marí eja'ahuá chu huacajé, ri'imá ina'uqué huecá que caja. Ritaca'á huachaya pu'uhuaré huala'acare chona. Ripalamane aú Tupana amaro Jesucristo ja'apiyá i'ímacaño chaje. Rihuajá Ri'irí Jesucristo, pu'uhuaré huala'acare chaya huapumí chojé penaje. Ritaca'á i'ímacá. Rejomi rimacápo'o piño. Reyá ri'imá piño marí eja'ahuá chu iyamá ina'uqué le'ejé que cala. Ejomi rácho'o je'echú chojé. Ra'apiyatéjena penájenami, ajopana hua'até, ja'apátaño palá richuhuaja ripuráca'alomi. E'iyonaja ajopana i'ímaño, apojó huani napechu i'ímacá Tupana nacú. Nemaqué Jesucristo nacú: “Uncá ri'imalá ina'uqué huecá que caja, marí eja'ahuá chu ri'imaqué huacajé. Ripéchuja calé i'imari pajluhuaja ina'uqué e'iyá mequetánaja. E'iyonaja uncá ri'imalá rinapona hua'até huecá que caja,” que nemájica rinacu. Nemaqué piño marí que Tupana nacú: “Palánija ricá. Uncá rihue'epila pu'uhuaré la'acana. Uncá caja rila'alá nacaje pu'uhuareni i'ímacare hua'até. Marí eja'ahuá chu ina'uqué la'año pu'uhuaré. Aú huahue'epí uncá Tupana queño'ótacarena calé huecá,” que nemájica rinacu. “Apala rijhua'atéjena, je'echú chu i'ímacaño, necá ca'ajná queño'ótáño huecá, nacaje marí eja'ahuá chu i'ímacare hua'até. Uncá paala huanapona huala'acare aú pu'uhuaré. Uncá Tupana calé queño'ótari huecá. Ñaquele uncá caja ra'alá rinacójó pu'uhuaré huala'acare. Iná la'á iná pechu queja pu'uhuaré iná huátaca que. Uncá Tupana huajálaje huecá richona,” que nemájica rinacu. “Piyuqueja huecá i'imajé capichácajo liyá Tupana palamane aú. Uncá na penaje calé Jesucristo taca'arí ina'uqué chaya,” que napechu i'ímacaño apojó huani Tupana pechu liyá. Nala'aqué caja necó hue'epiño que huani. Aú nala'aqué ajopana ina'uqué mapéchuruna que najluhua, uncale napechu i'ímalá napechu que caja.

Ina'uqué hue'epícaloje quehuácaje puráca'aloji nacojé penaje San Judas lana'arí marí puráca'aloji najló i'ímacá. Riyuró caja huajló. Ri'imá huajló riyucuna, hua'acá piyá huanaacójó pajlácaje puráca'aloji.

*Puráca'aloji San Judas huacárára'acare najló i'ímacá marí:*

<sup>1</sup> Judas nucá; Jesucristo hua'até sápa'eri nucá; Santiago e'ehué nucá. Nuhuacá'a marí papera ijlo. Caja Tupana i'ihuapari rijluhua icá ajopana ina'uqué e'iyayá, i'ímacáloje rila'ejena reyá penaje. Jesucristo a'arí rinacójó icá, rijhua'atéjena i'ímacale.

<sup>2</sup> Tupana hue'epícarena mu'ují caja icá. Nuhuata jema'acá ra'apiyá palá. Nuhuata caja i'ímacá Tupana ja'apiyá, ipechu i'ímacáloje palá raú penaje, ihuátacaloje íqui'ija pecohuáca raú penaje.

*Nema'acá piyá pajlácachina puráca'alo ja'apiyá yucuna marí:*

<sup>3</sup> Nojena, íqui'ija nuhuátacarena, nuhuátajla papera huacá'acana ijlo i'ímacá, nu'umacáloje ijlo méqueca Tupana i'imataca huecá capichácajo liyá yucuna penaje. E'iyonaja uncá huani paala ne'iyajena la'acá. Ñaquele numaje ijlo, itára'acoloje Tupana puráca'alo chojé capí penaje. Riyurícare piyuqueja rila'ejena ina'uquejlo ricá, hue'emacáloje ra'apiyá penaje.

<sup>4</sup> Iqui'ija huani Tupana huátaca ina'uqué. Ñaquele ri'imatá ina'uqué capichácajo liyá Jesucristo palamane aú ri'imatá iná capichácajo liyá. Caphí péchuruna Jesucristo chojé ri'imatá capichácajo liyá, nala'acá piyá pu'uhuaré. Re ina'uqué, pu'uhuaré la'ajeño huani necá. Napajlá huanaquiyana Jesucristo ja'apiyá jema'ajeño hua'até, nahuacáloje najhua'até penaje. Pu'uhuaré la'ajeño necá, napechu i'ímacale: “Uncá japi Tupana huajálaje ina'uqué pu'uhuaré nala'acare chona.” Marí que nala'acale, nala'á majopéjari queja Tupana puráca'alo lana'aquejiami. Ripuráca'alo lana'aquejiami i'imari Tupana yucuna huajló. Tupana palamane huecá; Jesucristo palamane caja huecá. Huahuacá'ajeri huani caja ricá; Huaminá caja ricá. Uncá na'alá nanacójó nacaje rila'acare ina'uquejlo penaje i'ímacá. Júpimi que Tupana puráca'alo lana'aquejiami quemacá ilé cajena nacú marí que: “Cajrú Tupana huajájica necá, iphaño na'apihuá huahuacá'ajeri Tupánajlo. Iphaño caja na'apihuá Jesucristojlo rihuajaje caja cajrú. Chapú nala'acare ejeja rihuajaje necá,” que rimacá nanacu.

<sup>5</sup> Chuhua nu'umajica piño apa'amá yucu ijlo. Caja jema'á riyucuna i'ímacá. E'iyonaja calé nuhuata piño rinacu quemacana ijlo, ipechu capichácajo piyá ricá. Tupana i'imatari Israelmi chu laquénami Egipito eruna liyá i'ímacá. Ri'imataca necá naliyá ejomi ne'iyajena

uncá jema'alaño ra'apiyá. Pachá ricapichata ne'emacá. Marí que Tupana huajaca pu'uhuaré la'ajeño.

<sup>6</sup> Ñaqué caja Tupana hua'atéjena, je'echú chu i'imacaño, penájenami i'imacá. Tupana a'arí ne'emacá ajopana huacára'ajeño penaje. E'iyonaja uncá nahuátala ra'apiyá i'imacana. Raú nácho'uo richiyá. Chapú la'ajeño ne'emacale, Tupana ca'arí necá cahuacajo, calajeruni huani chojé. Re ne'emajé jepo'oqueja hua'ajini huani. Tupana huajájica uncá ina'uquélaruna huacajé ejená ne'emajica re. Ejéchami namájica piño Tupana huajájica necá yajhué. Uncá huani nácho'olajo richiyá. Marí que Tupana huajaca pu'uhuaré la'ajeño.

<sup>7</sup> Ñaqué caja júpimi iyamá pajimila i'imacá. Apú pajimila íi i'imari Sodoma. Apú pajimila íi i'imari Gomorra. Ricá pajimila erúnami chuna la'aqueño namanaicho. Tupana hua'atéjena, je'echú churuna, penájenami la'ajica que caja nala'ajica namanaicho. Ñuju'uquena huani ne'emajica. Achiñana, necá pajno'oño panacuhuácaca, nala'acáloje namanaicho pajhua'atéchaca penaje. Ñaqué caja nañujure a'acuhuana inaana ca'ajica pupuchí pajhua'atéchaca. Chuhua namaca quera'atani uncá yacálaré yajhué. Marí caje aú piyuque ina'uqué hue'epiño meque Tupana huajájica namanaicho la'ajeño.

<sup>8</sup> Ileruna ina'uqué pajlácachina numacárena nacú, amaño que'iyapé natapú que. Natapú namaca que nala'acá chapú nanapona rinacojé. Uncá huani nahuátala Tupana nahuacára'ajeri penaje. Pu'uhuaré caja napura'acó Tupana hua'atéjena, je'echú chu i'imacaño, nacú.

<sup>9</sup> Tupana hua'atéjena, je'echú chu i'imacaño, huacára'ajeri íi Miguel. Ricá aca'ácaro Jiñá Chí'ináricana hua'até i'imacá. Moisesmi chu tami jimaje naca'ácaco pajhua'atéchaca. Tupana hua'atéjena huacára'ajeri huo la'aró Jiñá Chí'ináricana aca'acana ja'apí. Raú rimá rijló: "Tupana aca'ajeri picá richona" que.

<sup>10</sup> Eyá ileruna achiñana numacárena nacú, uncá nahuó la'aló pu'uhuaré puráca'aloji piyá. Pu'uhuaré napura'ó nacaje nacú, uncá nahue'epílaré nacojé palá. Nacaje nala'acare pu'uhuaré najluhua, ricá aú napichata necó, camejérina pechu queja napechu i'imacale najluhua.

<sup>11</sup> ¡Meque chapú huani ri'imajica najló, nala'acale pu'uhuaré! Caími chu la'acá pu'uhuaré i'imacá que caja nala'acá. Ricá nori re'ehuemi chu i'imacá. Necá numacárena nacú, majopeja ne'emacá pajlácaje puráca'aloji ja'apiyá, najña'acáloje liñeru najluhua raú penaje. Marí que caja Balaami chu la'acá i'imacá. Apú piño i'imari uncá ina'uquélari. Ríi i'imari Coré. Chapú ripechu i'imacá nahuacára'ajeño nacú i'imacá. Richona Tupana capichátari ricá. Ñaqué caja ileruna achiñana culaca naohuá, chapú napechu i'imacale nahuacára'ajeño nacú.

<sup>12</sup> Majopeja napáña'ataca inacu, jahuacácochu a'ajnehuá ajñacana nacú. Queyajupa jahuacaco pajhua'atéchaca. Uncá na ja'apí calé nephá. Uncá caja nahue'epíla ajopana ina'uqué. Necoja calé nahue'epí. Nemá ajopánajlo cajrú nacaje nacú, nala'acáloje palá penaje. Eyá necó uncá nala'alá palá ñaqué caja. Re juni suhuáca'ala, uncá juni ja'aló re'iyayá. Majopeja carená ja'apátaca ricá. Ñaqué que caja necá. Mecharú pajíj que caja necá. Pajíj naquiayana ihuí i'imari cajrú. E'iyonaja uncá richa pataló. Que caja necá, uncale nala'alá palá. Ina'uqué támijimina queja caja necá. Uncá na nala'alá. A'ahuaná jero'ocánami ra'apare hua'ató queja caja necá, uncale nala'alá palá. Marí que necá, uncale napechu i'imalá palá la'acana nacú.

<sup>13</sup> Juni ta'aqueni queja caja necá. Ta'aqueni aco'ótari nacaje pu'uhuaereni juni aquiyá riquejare e'iyajé. Ñaqué caja pu'uhuaré ileruna ina'uqué la'acare amaco nanacojé. Ihuijina capichaco que caja necá. Calajeruni huani chojé cupáquejamina ne'emajica. Reja ne'emajé hua'ajini huani.

<sup>14</sup> Adanmi chu i'imari pamineco huani i'imacá. Pajluhua cuhuá'ata quele chami ina'uqué i'imacá rapumí chojé. Ejéchami Enoc moto'ocá i'imacá. Ricá quemari ilé cajena nacú méqueca Tupana la'ajica necá pu'uhuaré nala'acare chona. Marí que rimacá rinacu Tupana ja'apiyá que: "Ihue'epí mari: Huahuacára'ajeri huani huaícha íqui'iruna huani rijhua'atéjena, je'echú churuna, hua'até."

<sup>15</sup> Nemaje piyuque ina'uqué nacú méqueca ricá Tupánajlo, piyuque nacaje nala'acare mari eja'ahuá chu ne'emacá quetana. Namanaicho la'ajeño nahuajaje. Pu'uhuaré huani nala'ajicare pachá nahuajaje necá. Pu'uhuaré napura'acó Tupana nacú pachá, nahuajaje caja ina'uqué," que rimacá rinacu i'imacá.

<sup>16</sup> Ileruna achiñana, numacárena nacú, cayucújne'equena huani necá. Majopeja naca'acá ajopana maná. Majopeja caja nala'acá necá uncá ina'uquélaruna que. Nala'á necó mahuó nacaje nahuátacare nacojé. Nanacuhuaja calé napura'ó palá. Majopeja napura'acó ajopana ina'uqué jimá chojé palá, napechu i'imacáloje palá nanacu raú penaje, nala'acáloje najló nacaje raú penaje.

*Jesucristo ja'apiyá jema'ajeño la'acá piyá pu'uhuaré yucuna marí:*

<sup>17</sup> Iqui'ija nuhuátacarena icá. Ihue'epí méqueca Jesucristo huacára'acarena quemacá ijló i'imacá.

<sup>18</sup> Marí que nemacá ijló i'imacá:

—Eja'ahuá iphájica ee rená chojé caja penaje piyá, ina'uqué naquiyana la'ajeño ne'echajno Tupana, ra'apiyá jema'ajeño, quele. Ripuráca'alo lana'aquejami hua'ató nala'ajé caja ne'echajno. Nahuátaca que nala'ajica nacaje, uncá Tupana huátalare caje. Marí que la'acana nacuja ne'emajé —que nemacá nanacu i'imacá.

<sup>19</sup> Ileruna ina'uqué apichátaño ajopana pajlocaca. Napechu queja la'acaño necá. Uncá Tupana Pechu i'imalárena e'iyá caja necá.

<sup>20</sup> Icó Íqui'ija nuhuátacarena, ijlo numá: Richaje, richaje que ipechu i'imacá caphí Jesucristo chojé, ripuráca'alo chojé hua'até. Ipura'ó caja Tupana hua'até Ripechu huacára'aca icá que.

<sup>21</sup> Tupana huajhuena icá. I'imá ñaqueja ra'apiyá. Jesucristo hue'epiri huamu'ují. Ñaquele ra'ajé huajló cajmuchaji, hue'emacáloje matajnaco raú je'echú chu penaje. Ihuata aohuá raú, marí que ri'imacáloje ijlo penaje. Rihuacajé huátacana nacuja i'imajé.

<sup>22</sup> Re ca'ajná ina'uqué mequetá nanoja napechu i'imacá caphí Tupana chojé. Quéchami napechu i'imá: “Uncá quehuaca calé ca'ajná ricá.” Ihue'epí namu'ují. Ipura'ó najhua'até, napechu i'imachi pajluhuaja chuhua Tupana chojé.

<sup>23</sup> I'imatá necá ipuráca'alo aú ja, ne'ejnacá piyá quera'atani chojé. Ñaquele caja ihue'epíjica ajopana ina'uqué mu'ují. Ihue'epí icó, ila'acá piyá pu'uhuaré najhua'até. Ila'aniya huani nacaje uncá Tupana huátalare caje najhua'até.

*Palá rimacá Tupana nacú yucuna marí:*

<sup>24</sup> Re pajluhuaja Iná Chi'ináricana. Tupana ricá. Capechuni huani ricá. Jesucristo palamane ri'imatá huecá capichácajo liyá. Rihue'epí rinacajó hua'acana, huala'acá piyá pu'uhuaré, huamanaicho hua'até. Rihue'epí caja huapechu lámá'atacana, hue'emacáloje palá péchuruna rijló penaje.

<sup>25</sup> Rila'ajé pu'ují huapechu hue'emajica rijimaje huacajé. Palani huani ricá. Ñaquele palani ina'uquejlo ricá, napura'acóloje palá nacaje rila'acare nacú penaje. Ajopana chaje huani ricá. Rihue'epí piyuqueja nacaje la'acana. Ajopana chaje huani huacára'ajeri caja ricá. Caja queja Tupana i'imacá júpimi; ricá chuhua caja ricá me'etení; ricá chuhuaja caja ri'imajica. Maáreje riyucuna tajnaro.

## APOCALIPSES

*Jesucristo i'imacá méqueca nacaje i'majica a'ajná ño'ojó chami yucuna marí:*

<sup>1</sup> Tupana a'arí pu'uhucacajé marí yucuna Jesucristojlo i'imacá, ra'apátacaloje riyucuna ra'apiyá jema'ajéñojlo penaje. Méqueca ri'imajica a'ajná ño'ojó chami yucuna ricá. Ñaquele Jesucristo huacára'ari pajluhuaja, Tupana hua'ateje, huitúca'aca je'echú chiyá riyucuna i'imajé. Nucá Juanjlo ri'imá riyucuna i'imacá.

<sup>2</sup> Cajrú nacaje ya'atacó nojló a'ajnare que i'imacá. Piyuque nacaje nomácare yucuna nulana'á papera chojé i'imacá, napuráca'alo noma'acare hua'ató. Quehuácaje marí yucu; Tupana, Jesucristo, quele puráca'alo ricá.

<sup>3</sup> Palá Tupana la'ajica icá, ipura'ajico ee marí puráca'aloji lana'aquejami hua'até ajopana ina'uquejlo. Palá caja rila'ajica necá, a'ajeño nanacojó ripuráca'alo. Palánija ra'apiyá jema'acana, ri'imajícale marí puráca'aloji quemacá que. Mequetana i'imajemí ri'imajica ñaque.

*Juan huacára'ari Jesucristo ja'apiyá jema'ajéñojlo marí puráca'aloji i'imacá:*

<sup>4</sup> Nucá, Juan, huacára'ari ijlo marí puráca'aloji. Asia te'eré nacú ñacajélaruna icá. Re iyamá cuhuá'ata quele jahuacáca'alo ñacarelana rehuá. Apú eyá, apú eyá, que ricá. Richojé jahuacájeñojlo nuhuacára'a marí puráca'aloji. Nuhuata Tupana la'acá ipechu palá. Nuhuata caja i'imacá palá ripalamane aú. I'imajeri huani Tupana. Júpimi huani i'imacá Tupana; ñaqueja caja ricá me'etení. Eyá ñaque caja ri'imajica maáreya huatucumajo. Re iyamá cuhuá'ata quele pechují rahua'á je'echú chu. Nuhuata nala'acá icá palá.

<sup>5</sup> Nuhuata caja Jesucristo la'acá icá palá. Ricá ja'apátari ina'uquejlo quehuácaje puráca'aloji. Rila'á caja piyuque nacaje Tupana huacára'aca que. Ajopana chaje ri'imacale, rimacápo'o i'imacá. Ajopana caja taca'acaño tucumá rimacápo'o i'imacá. Uncá ritaca'alaje piño. Ajopana huacára'ajeño chaje ricá. Iqui'ija huani Jesucristo huátaca huecá. Ñaquele ritaca'á huachaya a'ahuaná apiyácanami nacú i'imacá, rica'acáloje huanaquiyá pu'uhuaré huala'acare raú penaje.

<sup>6</sup> Ra'á caja huecá Tupana le'ejena ina'uqué penaje, rihuacára'acaloje huecá, huala'acáloje nacaje Rara'apájlo rihuátaca que penaje. Palá huapura'ajico Jesucristo nacú hua'ajini huani. Uncá caja rácho'olajo ina'uqué huacára'ajeri i'imacana chiyá. Marí queja ri'imajica.

<sup>7</sup> Marí que nemájica Jesucristo nacú: "Iyacá'o, juni suhuáca'ala e'iyayá rihuitúca'aca majó. Piyuqueja ina'uqué amájeño ricá. Noño ri'imacá hua'ató amájeño ricá. Piyuqueja eja'ahuá chu i'imacaño, ajopana, ajopana que amájeño caja riphájica majó. Cajrú neyájica raú. Cajrú caja nahuýo'ojica majó riphájica aú. Marí que ri'imajica."

<sup>8</sup> Huahuacára'ajeri huani Tupana; Huachi'ináricana caja ricá. Piyuque nacaje la'ajeri caja ricá. Marí que rimacá rinacuhúa: "Piyuqueja nacaje queño'ótajeri nucá; piyuqueja nacaje tajátajeri caja nucá," que rimacá rinacuhúa.

Júpimi huani i'imacá Tupana; ñaqueja caja ricá me'etení. Eyá ñaqueja caja ri'imajica maáreya huatucumajo.

<sup>9</sup> Nucá, Juan, lana'arí ijlo marí que. Huejena que huecá ijhua'até, Jesucristo ja'apiyá jema'ajeño hue'emacale. Rijhua'atéjena hue'emacale, ajopana la'año huecá chapú. Marí caje e'iyá Jesucristo la'arí huecá cahuahuéruna, huayurica piyá ra'apiyá jema'acana. No'opata Tupana puráca'alo ajopana, ajopánajlo que. Jesucristo yucuna hua'ató no'opata najló. Pachá najña'á nucá tejmuji majó paranacuhua ejo. Nu'umacá piyá riyucuna ajopánajlo, najña'á nucá majó. Marí paranacuhua íí Patmos.

<sup>10</sup> Chuhua nu'umajica ijlo riyucuna, nacaje pu'uhucá nomácare yucuna. Huatána'acaje huacajé i'imari rihuacajé. E Tupana Pechu ja'aró nunacojé cajrú. Ejéhami noma'acá apú pura'acó nuyámojo. Mejrí huani ripuráca'alo i'imacá. Luhuiluhuí chojé iná apho'ocá que rimejé i'imacá.

<sup>11</sup> E rimá nojló:

—Pilana'á papera chojé pamájacare me'etení yucuna. Ejomi pihuacára'aje Jesucristo ja'apiyá jema'ajéñojlo ricá. Asia te'eré nacú nahuacó apú eyá, apú eyá que nahuacáca'alo ñacarelana chu. Najló pihuacára'aje ricá. Re iyamá cuhuá'ata quele nahuacáca'alo ñacarelana rehuá. Re ricá Efeso e, Esmirna e, Pérgamo e, Tiatira e, Sardis e, Filadelfia e, Laodicea e. Rejo pihuacára'aje najló pamájacare me'etení yucuna.

<sup>12</sup> Marí que rimacá nojló aú nupajno'ó nuyámojo yacá'ajo, nomácaloje naca pura'acó nujhua'até penaje. Nuyacá'o nuyámojo, amari jepé caje lucúna'aquejami lapa'acó; iyamá cuhuá'ata quele ri'imacá. Oro naquiyá la'acanami ri'imacá.

<sup>13</sup> Re'iyá nomá caja pajluhua ina'uqué tára'aco. Jesucristo ri'imacá. Huaphereni a'arumacaji i'imari rinacu. Chítaje caja rihuachaphila i'imacá, mapíra'aro ri'icú chuhuá rinacu. Oro que sereca ri'imacá.

<sup>14</sup> Jarepí rihuilá, rihuilá'aru hua'até amaco, amaniyú que. Juni suhuáca'ala jareni huani que rihuilá, rihuilá'aru hua'até amaco. Quera'atani que rijlú amaco.

<sup>15</sup> Ri'imá amaro pejru'uhuá la'acanamí que, oro que caja amácanamí ri'imacá. Pejru'uhuá caje nahuicho'ocare quera'atani ima'aní huani aú, nala'acáloje ricá capiluni sereni que penaje, que ri'imá amaco. Rinúru'upi mejé jema'aró cajruni huani jipa mejé que.

<sup>16</sup> Riyáte'ela ca'añá aú ripatá iyamá cuhuá'ata quele ihuujina. Rinuma chiyá nomá caja sajalu caje jácho'oco. Iyamajo punitano irerí ri'imacá; pu'uhuení huani ri'imacá. Nomá caja rijimá moco'ocá. Camú moco'ocá caápu'ucu que caja rijimá moco'ocá.

<sup>17</sup> Nomaca aú ricá nujláma'o ri'imá nacojé matámiru que. E rito'otá riyáte'ela ca'añá nunacojé. Rimá nojló:

—Piquero'oniyo. Matajnaco i'imacá nucá. Piyuque nacaje queño'ótajeri nucá. Piyuque nacaje me'etení i'imacare tajátajeri penaje caja nucá.

<sup>18</sup> Cajmuni nucá. Nutaca'á i'imacá. E'iyonaja pamaca nucá me'etení cajmuni jo'ó. Caja queja nu'umajica hua'ajini huani, uncá nutajnálajo. Tupana a'arí nucá, nu'umatácaloje no'opiyá jema'ajeño capichácajo liyá penaje. Ra'á caja nucá, nuhuacára'acaloje uncá jema'alaño no'opiyá nahuajáquelana ejo.

<sup>19</sup> Piyá'ata papera chojé huajé pamíchaje, nacaje pamáicare mequetánaja i'imajemi hua'ató.

<sup>20</sup> Marí que quemacana iyamá cuhuá'ata quele ihuujina jenami pamíchaje nucapi: No'opiyá jema'ajeño jahuacáca'alo ñacarelana chiyá huacára'ajeño que necá. Marí que quemacánaca caja iyamá cuhuá'ata quele jepé caje lapa'acó pamíchaje: Iyamá cuhuá'ata quele no'opiyá jema'ajeño jahuacáca'alo ñacarelana que ricá, Asia te'eré nacú i'imacare.

## 2

*Puráca'aloji rihuacára'acare pajimila Efeso e i'imacáñojlo marí:*

<sup>1</sup> Rimá nojló:

—Marí que pilana'acá no'opiyá jema'ajeño huacára'ajerijlo, Efeso e i'imacajlo: No'opiyá jema'ajeño jahuacáca'alo ñacarelana chiyá huacára'ajeño i'imaño nujhua'atájena. Marí que numacá inacu, Efeso e i'imacáño nacú:

<sup>2</sup> Nuhue'epí palá ila'acare nacojé. Nuhue'epí caja tu'ujné ipechu nuhuátaca que la'acana nacú. Rijimaje nala'á icá chapú. E'iyonaja uncá iyurila rila'acana iliyó. Uncá caja ihuátala inaquiyana la'acá pu'uhuaré, namanaicho hua'até. Re ina'uqué ijhua'até ilérohua, quemáño nanacuhua: “Tupana puráca'alo ja'apátajeño huecá”. E'iyonaja uncá quehuaca calé nemacá nanacuhua. Nephácahu inacu, icá i'imaño naco'oná pamineco. Raú ihue'epí mecajenaca necá pajlácachina. Nuhue'epícare caja marí que ila'acá palá:

<sup>3</sup> Jema'acale no'opiyá, nala'á icá chapú rehuá. E'iyonaja uncá jácho'olo no'opiyá jema'acana chiyá raú. Marí que ila'acá palá.

<sup>4</sup> Eyá marí que ila'acá piño uncá nuhuátalare: Iqueño'ocá no'opiyá jema'acana huacajé íqui'ija ihuátaca nucá. Me'etení uncá ñaqué calé ihuátaca nucá.

<sup>5</sup> Ihue'epí na aú ca iqueño'ó nuliya pajno'ocano. Iyurí pu'uhuaré la'acana iliyó. Quéchami ila'á piño ila'acá i'imacá que, iqueño'ocá no'opiyá jema'acana huacajé. Uncaja que iyurí pu'uhuaré la'acana iliyó, nucupaje icá reyá.

<sup>6</sup> Eyá marí que ila'acá piño, palani ricá. Uncá huani paala ijlo pu'uhuaré ajopana la'acare. Nicolaitas na'acá nei. Nupechu que caja ipechu nacaje nala'acare nacú, marí palani.

<sup>7</sup> Que'ejhuiruna i'imacachu, jema'á méqueca Tupana Pechu quemacá no'opiyá jema'ajeñojlo. Caphí tára'ajeño nochojejlo no'ojé cajmuchaji, ne'emacáloje matajnaco Tupana hua'até raú penaje, que Jesucristo quemacá nojló nanacu.

*Puráca'aloji rihuacára'acare pajimila Esmirna e i'imacáñojlo marí:*

<sup>8</sup> Marí que Jesucristo quemacá piño nojló:

—Pihuacára'a piño marí puráca'aloji no'opiyá jema'ajeñojlo, Esmirna e i'imacáñojlo. Pimá nahuacára'ajerijlo nunacu marí que: Matajnaco i'imacá nucá, Jesucristo. Nucá queño'ótari piyuqueja nacaje i'imacá. Nucá caja tajátajeri piyuqueja nacaje me'etení i'imacare. Nenócare penájemi nucá. Ejomi numacápo'o piño. Marí que numacá inacu:

<sup>9</sup> Nuhue'epí chapú caje yajhué amácare me'etení nacojé. Nuhue'epícare caja camu'ují la'acaño icá rehuá. Eyá je'echú chu, icá i'imaño cajrú la'acaño que. Nuhue'epí caja pu'uhuaré ajopana judíona quemacare inacu nacojé. Nemá nanacuhua: “Tupana ja'apiyá

jema'ajeño huecá". E'iyonaja uncá Tupana ja'apiyá jema'ajeño calé necá, Jiñá Chi'ináricana hua'atéjena necá.

<sup>10</sup> Iquero'onioy chapú nala'ajicare icá piyá. Jiñá Chi'ináricana huacára'ajeri ajopana ca'acá inaquiayana ina'uqué huajáquelana chojé. Jiñá Chi'ináricana la'ajeri icá chapú, iyurícaloje no'opiyá jema'acana penaje. Mequetánaja calé rila'ajica icá chapú. Jácho'onioy no'opiyá jema'acana chiyá raú. Apala nenoye ca'ajná inaquiayana, no'opiyá jema'ajeño i'imagale. Jácho'onioy no'opiyá jema'acana chiyá raú. Marí que huani ila'ajica ee, i'imagé matajnaco je'echú chu.

<sup>11</sup> Que'ejhuiruna i'imagachu, jema'á méqueca Tupana Pechu quemacá Jesucristo ja'apiyá jema'ajeñojlo. Uncá Tupana ca'alaje caphí nochojé i'imagácaño, quera'atani uncá yacálaré chojé, que Jesucristo quemacá nojló nanacu.

<sup>12</sup> Marí que Jesucristo quemacá piño nojló:

—Pihuacára'a piño marí puráca'aloji no'opiyá jema'ajeñojlo, Pérgamo e i'imagácañojlo. Pimá marí que nunacu nahuacára'ajerijlo:

—Tupana puráca'alo ja'apátajeri núcá.

<sup>13</sup> Nuhue'epí méqueca nacaje i'imagá ijlo iñacajela ehuá. Cajrú ina'uqué rehuá, Jiñá Chi'ináricana hua'atéjena necá; nahuacára'ajeri huani ricá. Antipas i'imaqueri ina'uejlo nuyucuna rehuá i'imagá. Pachá nenó r'i'imagá iñacajela e. Marí que nala'acá ricá chapú. E'iyonaja uncá imicho'otala nuchaya raú. Caphí ipechu i'imagácaño chojé. Marí caje aú ila'á palá.

<sup>14</sup> Eyá re nacaje ila'acare uncá paala nojló ricá. Re ina'uqué ijhua'até uncá huani paala napuráca'alo. Balaami chu puráca'alomí chuhua' na'apá. Marí que Balaami chu la'acá pu'uhuaré i'imagá. Rimá Balacmi chujlo i'imagá, ra'acáloje Israelmi chu laquénami me'é penaje, najñácaloje a'ajnejí, nato'otácare nacaje jenami nacojé i'imagá. "Huachí'ináricana ricá" que nemájica renami nacu. Rimá caja rijllo, ra'acáloje name'é, nala'acáloje namanaicho ajopana hua'até penaje.

<sup>15</sup> Re caja ajopana e'iyohuá, nicolaítas puráca'alo ja'apiyá i'imagácaño necá. Pu'uhuaré huani nojló napuráca'alo, uncá nuhuátalare ricá. Re inaquiayana ijhua'até, uncá yurílaño naliyó napuráca'alo a'acana nanacojlo.

<sup>16</sup> Necajlo pimá, napajno'otachí Tupana ejo napéchuhua pu'uhuaré nala'acare liyá. Uncaja que napajno'otá napéchuhua pu'uhuaré nala'acare liyá, nu'ujnajé nachaje nacapichátaje nupuráca'alo aú.

<sup>17</sup> Que'ejhuiruna i'imagá ee, jema'ajé méqueca Tupana Pechu quemacá no'opiyá jema'ajeñojlo —que Jesucristo quemacá nanacu—.

'Nula'ajé napechu caphí, uncá jácho'olaño nupuráca'alo ja'apiyá jema'acana chiyá. No'ojé caja najllo pajluhuano, pajluhuano que jipa jareni, nacú lana'acanami neí huajé. Uncá na calé hue'epéjeri huajé nef. Necaja calé no'ocárenajlo huajé neí hue'epéjeño ricá —que Jesucristo quemacá nojló nanacu.

*Puráca'aloji rihuacára'acare pajimila Tiatira e i'imagácañojlo marí:*

<sup>18</sup> Marí que Jesucristo quemacá ra'apiyá jema'ajeñojlo, pajimila Tiatira e i'imagácañojlo. Rimá piño nojló:

Pimá marí que nunacu nahuacára'ajerijlo: Tupana l'irí puráca'alo marí. Quera'atani que rijllo, amari piyuqueja nacaje. Pejru'uhua' capiluni, sereni que r'i'má i'mari. Penaje quemari marí que inacu:

<sup>19</sup> Núcá hue'epirí nacaje ila'acare nacojé. Nuhue'epí caja íqui'ija ihuátaca ajopana. Nuhue'epí caja caphí ipechu nochojé. Palá ila'acá ajopana ina'uqué; uncá caja iyúcha'alo quíñaja. Nuhue'epí ila'acá palá me'etení. Iqueño'ocá no'opiyá jema'acana huacajé chaje ila'acá palá me'etení.

<sup>20</sup> Eyá re apú nacaje ila'acare, uncá huani paala ricá nojló. Re ijhua'até apa'ahué, Jezabel ruí. Rucá quemayo runacuhua: "Tupana puráca'alo ja'apátajeyo núcá". E'iyonaja uncá quehuaca calé rumacá. Rururáca'alo jimaje no'opiyá jema'ajeño naquiayana jácho'oño quehuácaje puráca'aloji chiyá. Re nacaje jenami nemá nacú: "Huachí'ináricana jenami ricá". Renami nacojé nato'otá a'ajnejí. Ejomi na'á ricá ajopánajlo, najñácaloje penaje. Rucá quemayo ilé a'ajnejí nacú: "Uncá iná la'alá pu'uhuaré rajñacana aú." Rumá caja: "Uncá pu'uhuaré la'acana calé, achiñana, inaana, quele la'acachu namanaicho pajhua'atéchaca". Marí que rohuíña'atacale ina'uqué, uncá huani paala rula'acá. Ica'aquele e'iyayá rucá, ila'ájla palá. E'iyonaja uncá ica'alá rucá e'iyayá. Raú caja uncá ila'alá palá.

<sup>21</sup> Caja no'ó rojllo hue'echú ca'alá, rupajno'otácaloje rupéchuhua Tupana ejo rumanaicho rula'acare liyá penaje. E'iyonaja uncá ruhuátala riyurícana ruliyo.

<sup>22</sup> Nuhuacára'aje rutami caje noca rucá. Cajrú huani romájica chapú caje yajhué raú. Ñaque' caja ileruna, la'acaño namanaicho rujhua'até, amájica caja chapú caje yajhué

ro'opona. Marí que nula'ajica necá chuhua. Napajno'otájica ee napéchuhua namanaicho nala'acare liyá, uncá nucapichátalaje necá rujhua'até.

<sup>23</sup> Uncaja que napajno'otá napéchuhua Tupana ejo, nucapichátaje ro'opiyá jema'ajeño rujhua'até. Raú piyuque Jesucristo ja'apiyá jema'ajeño hue'epéjeño mecajeca nucá. Nucá amari ina'uqué pechu. Nuhue'epícare caja méqueca napechu nacú nahuátacare la'acana. Pu'uhuaré ina'uqué la'acare ejé nuhuajájica necá.

<sup>24</sup> E'iyajena, Tiatira e i'imacaño, uncá jema'alaño rupuráca'alo ja'apiyá. Uncá caja jema'alá Jiñá Ch'i'náricana puráca'alo ja'apiyá. Nemá rinacu: "Me'echuje ripuráca'alo cajrú ina'uquejlo" que. Ica uncá jema'alaño ra'apiyá, marí palani. Ijló numá: Me'etení ila'acá queja ila'ajica. Uncá numálaje ijló apú nacaje nacú, ila'acáloje penaje.

<sup>25</sup> Jácho'onio puráca'aloji i'imacare ja'apiyá me'etení chiyá. Ra'apiyaja iyurejo a'ajná nupa'ajico eja'ahuá nacojé ejená.

<sup>26</sup> Nucá a'ajeri ina'uqué, ajopana, ajopana que te'eré eyájena huacára'ajeño penaje. Marí que i'imacaño ne'emajica: Uncá jácho'olajeño nupuráca'alo ja'apiyá jema'acana chiyá, la'ajeño nacaje nuhuátaca que nataca'ajica ejená. Necá no'ojé nahuacára'ajeño penaje, uncá jema'alaño Tupana ja'apiyá huacára'ajeño ne'emajé.

<sup>27</sup> Nora'apá a'acá nucá nahuacára'ajeri penaje, que caja no'ojica necá nahuacára'ajeño penaje. Caphí nahuacára'ajica necá. I'ichilá iná majáca'aca queja nacapichájico, necá uncá jema'alaño Tupana ja'apiyá.

<sup>28</sup> No'ojé no'opiyá jema'ajeño, ne'emacáloje matajnaco nujhua'até penaje —que Jesucristo quemacá i'imacá—.

<sup>29</sup> Que'ejhuiruna i'imajica ee, jema'ajé méqueca Tupana Pechu quemacá Jesucristo ja'apiyá jema'ajeñojlo.

### 3

*Puráca'aloji rihuacára'acare pajimila Sardis e i'imacáñojlo marí:*

<sup>1</sup> Marí que Jesucristo quemacá piño nojló:

—Pihuacára'a piño marí puráca'aloji no'opiyá jema'ajeñojlo, Sardis e i'imacáñojlo. Pimá nunacu marí que nahuacára'ajerijlo: Jesucristo puráca'alo marí. Tupana Pechu ja'apiyá i'imacá huani ricá. Ra'apiyá jema'ajeño huacára'ajeño i'imaño caja rijhua'atéjena. Iyamá cuhuá'ata quele necá. Marí que rimacá inacu: Nucá hue'epiri nacaje ila'acare nacojé. Napechu i'imá inacu rehuá: "Tupana Pechu ja'apiyá i'imacaño necá" que. E'iyonaja uncá ñaque calé ricá.

<sup>2</sup> Ñaquele numá ijló: A'á inacojé nupuráca'alo. Ila'á caphí ipéchuhua richojé, ricapichaco piyá ipechu naquiyá. Nacaje ila'acare me'etení, uncá paala Tupánajlo ricá. Uncá rihuátaca que calé ila'acá nacaje i'imacá. Ñaquele uncá paala rijllo ricá.

<sup>3</sup> Ihuajá ipéchuhua, Tupana puráca'alo nehuíña'atacare icá nacojé. Jema'á ra'apiyá, ipajno'otá ipéchuhua pu'uhuaré ila'acare liyá. Uncaja que a'á inacojé piño nupuráca'alo, huajátacajo nu'ujnajica ichaje. Ata'acachi iphácachu iná ñacaré chojé nacaje ata'ajé, uncá ra'alá inajlo renó. Ñaque uncá uncá no'olaje ijló noná nuphájica inacu.

<sup>4</sup> Re icá méqueleja palá péchuruna pajimila Sardis e. Uncá pu'uhuaré la'acano, imanaicho la'acano calé icá ajopana i'imacá que caja. Ica i'imajeño nujhua'até. Palánija ipechu i'imajica nupalamane. Marí que ri'imajica ijló, caliyáruna i'imacale nojló.

<sup>5</sup> Nupalamane aú ina'uqué naquiyana ca'año nanaquiyó pu'uhuaré nala'acare. Necaja calé i'imajeño palá nujhua'até je'echú chu. Uncá caja nolácalaje neí papera chiyá. Richu neí i'imari lana'aquejami. Ricá papera chu lana'aquejami quemari mecajenaca i'imajeño je'echú chu matajnaco nujhua'até. Tupana jimaje, rijhua'atéjena, je'echú chu i'imacaño, jimaje hua'ató numaje nanacu: Nujhua'atéjena necá que.

<sup>6</sup> Que'ejhuiruna i'imajica ee, jema'ajé méqueca Tupana Pechu quemacá no'opiyá jema'ajeñojlo —que Jesucristo quemacá nojló nanacu.

*Puráca'aloji rihuacára'acare pajimila Filadelfia e i'imacáñojlo marí:*

<sup>7</sup> Jesucristo quemari piño nojló:

—Pihuacára'a piño marí puráca'aloji no'opiyá jema'ajeñojlo, Filadelfia e i'imacáñojlo. Pimá nahuacára'ajerijlo marí que nunacu:

Jesucristo puráca'alo marí. Uncá la'alá pu'uhuaré ricá. Quehuácage puráca'aloji yucuna i'imajeri caja ricá. Ricaja calé quemari ina'uqué nacú, mecajenaca mujlúca'ajeño je'echú chojé. Rimacá nanacu queja ri'imajica najló. Uncá meño'ojó apú me'etala ricá najló. Uncá caja meño'ojó apú itala ricá. Ricaja calé, Jesucristo, quemájeri nanacu, namujlúca'acaloje je'echú chojé penaje.

<sup>8</sup> Ricá quemari marí que inacu: Nuhue'epí nacaje ila'acare nacojé. Uncá caphí huani calé ipechu nuhuátaca que la'acana nacú. E'iyonaja icá a'año inacojé nupuráca'alo, uncá caja



imicho'otala nuchaya. Ica i'imaño nuyucuna ina'uqué rehuá i'imacáñojlo. Ñaquele unca caja na calé itaje ijlo rapu, i'imacá piyá nuyucuna najló.

<sup>9</sup> Re Jiñá Chi'ináricana hua'atéjena rehuá. Necá quemano nanacuhua: "Jesucristo hua'atéjena huecá" que. Uncá nujhua'atéjena calé necá, majopeja napajlaca nanacuhua. Nuhua'aje necá ijimaje, nahue'epícaloje raú icá chá'ataca necá penaje. Nahue'epeje caja íqui'ija nuhuátacarena caja íca.

<sup>10</sup> Numá ijlo i'imacá: Ila'aniya icó tu'ujné. Ica jema'año no'opiyá. Ñaquele nochojé unca amálaje chapú caje yajhué i'imajicare rehuá. Aquijñojo piyuqueja ina'uqué amájeño chapú caje yajhué. Raú Tupana atá'ajeri ina'uqué, ramácaloje méqueca napechu i'imacá rinacu penaje.

<sup>11</sup> Mequetana i'imajemi nucá i'imajeri ichaje. Ica jema'año no'opiyá, jácho'oniya nupuráca'alo chiyá. Uncájica ee jácho'o, Tupana a'ajeri ijlo rihuemí je'echú chu i'imacana au. Iyuriniya ajopana jácho'otaca icá richiyá.

<sup>12</sup> Marí que nula'ajica caphí nochojé tara'ajeño: No'ojé necá, ne'emacáloje ajopana ina'uqué hua'até penaje. Ajopana, pu'ují péchuruna Tupana nacú, hua'até ne'emajé matajnaco. Tupana le'ejena ina'uqué ne'emajé. Je'echú chu re huajé pajimila, Jerusalén rií. Ricá pajimila huitúca'ajeri je'echú chiyá majó. Re caphí nochojé tara'ajeño i'imajeño. Au ajopana hue'epéjeño Tupana hua'atéjena necá.

<sup>13</sup> Que'ejhuiruna i'imajica ee, jema'ajé méqueca Tupana Pechu quemacá no'opiyá jema'ajéñojlo —que Jesucristo quemacá nanacu.

*Puráca'aloji rihuacára'acare pajimila Laodicea e i'imacáñojlo marí:*

<sup>14</sup> Marí que Jesucristo quemacá piño nojló:

—Pihuacára'a piño marí puráca'aloji no'opiyá jema'ajéñojlo, Laodicea e i'imacáñojlo. Pimá nahuacára'ajerijlo marí que nunacu: Jesucristo puráca'alo marí. Tupana huátaca que huani la'ajeri ricá. Quehuácaje puráca'aloji nacú quemájeri caja ricá. Rijhua'até caja Tupana queño'ótari piyuqueja nacaje i'imacá. Penaje quemari marí que inacu:

<sup>15</sup> Nucá hue'epirí nacaje ila'acare nacojé. Nuhue'epi unca íqui'ija calé ihuátaca nucá, unca caja ipechu i'imalá chapú nunacu. Nuhuata ipechu i'imacá pajluhuaja chuhuaja nunacu. Nuhuata ipechu i'imacá íqui'ija nuhuátacana nacú ca'ajná, nuhuata ipechu i'imacá chapú nunacu ca'ajná. Uncá nuhuátala ipechu i'imacá huejápaja nuhuátacana nacú, eyá huejápaja chapú nunacu hua'até.

<sup>16</sup> Huejápaja quemachi ihuátaca nucá, uncale ihuátala nucá íqui'ija, nuca'ajé nuliyo íca.

<sup>17</sup> Imá inacuhua: "Cajrú la'acaño huecá" que. "Uncá na nacú calé huala'á camu'ují", que imacá inacuhua. Uncá ihue'epila mecajenaca nojló íca. Nojló camu'ují la'acaño íca. Chapú caje yajhué amájeño queja caja nojló íca. Ma'arumacáruna queja caja nojló íca; me'ejluruna queja caja nojló íca. Marí que nojló íca, uncale i'imalá quehuácaje puráca'alo ja'apiyá.

<sup>18</sup> Jiló numá: Iquejá'a nuliya i'imajóhuaji, i'imacáloje palá la'acaño raú penaje. Raú i'imajé cajrú la'acaño nojló. Imá caja nojló, nuca'acáloje pu'uhuaré ila'acare inaquiyá penaje, palá péchuruna iyuricolaje reyá a'ajná ño'ojó raú penaje. Imá caja nojló, nula'acáloje ipechu palá penaje, ihue'epícaloje Tupana puráca'alo nacojé raú penaje.

<sup>19</sup> Noca'á necá íqui'ija nuhuátacarena; nuhuajá caja necá. A'á inacojó nupuráca'alo. Ipajno'otá caja ipéchuhua pu'uhuaré ila'acare liyá Tupana ojo.

<sup>20</sup> Chuhua numájica ijlo, jema'acáloje ricá penaje: Numá apú, apujlo que: "Nuhuata pijhuáque'ehue i'imacana." Pimájica ee nojló: "Pi'imá nujhua'até'ehue" que, au nu'umajé pijhuáque'ehue. Palá hue'emajica pajhua'atéchaca reyá a'ajná ño'ojó.

<sup>21</sup> Nupalamane au ina'uqué naquiyana ca'año naliyo pu'uhuaré nala'acare. Necá no'ojé nujhua'até huacára'ajeño penaje. Uncá nula'alá pu'uhuaré i'imacá. Ñaquele chuhua Nora'apá ahua'á nucá. Ina'uqué huacára'ajeri nucá rijhua'até.

<sup>22</sup> Que'ejhuiruna i'imajica ee, jema'ajé méqueca Tupana Pechu quemacá no'opiyá jema'ajéñojlo —que Jesucristo quemacá nojló nanacu.

## 4

*Pu'ují je'echú chu i'imacaño pechu Tupana nacú yucuna marí:*

<sup>1</sup> Caja Jesucristo quemari nojló, nuhuacára'acaloje ra'apiyá jema'ajéñojlo puráca'aloji apú eyá, apú eyá que. Ejomi iná amaca iná tapú que nomaca je'echú numaná me'etaco. Richiyá noma'á apú pura'acó. Luhuiluhuí mejé que rinúru'upi mejé jema'acó. Ricaja caja pura'aró nujhua'até maapami que i'imacá. Rimá piño nojló:

—Pácho'o majó, nuya'atachi pijló naca i'imajica a'ajná ño'ojó chami pani.

<sup>2</sup> Ejéchami Tupana Pechu huá'aca nupechu je'echú chojé. Re nomá ñáca'ajori nahuacára'ajerijlo penaje. Richu nomá apú yá'aco.

<sup>3</sup> Jipa palá nojé huani que rijimá amaco. Jipa íí jaspe. Apú jipa íí cornalina. Ricá queja amacánami ri'imacá. Ñáca'ajori nacojé nomá yurijiri pato'ocá, esmeralda que ricamaré i'imacá.

<sup>4</sup> Pe'iyorí ñáca'ajori nacojé veinticuatro ñáca'ajori chipúca'ari tujlá que pajimájechaca. Nahuacára'ajeñojlo penaje ri'imacá. Veinticuatro caja peñahuilana yá'año richu. Jaré nojé huánija na'arumacá i'imacá. Pútenaji caje i'imari nachá, oro naquiyá la'acanamí ri'imacá.

<sup>5</sup> Ñáca'ajori pe'iyorí e noma'á cajrú pichaní majáca'aco, cajrú rimejé i'imacá. Ñáca'ajori jimaje caja nomá iyamá cuhuá'ata quele camareji lapa'acó lucúna'aqueja. Tupana Pechu que caja ricá.

<sup>6</sup> Pe'iyorí ñáca'ajori nacú nomá cajrú huani huíluru caje to'ocó me'ejñapí nojé huani, Jamára'apani huani ri'imacá.

Ñáca'ajori ahua'á ajopana lapa'año. Pa'u quele ne'emacá. Cajmuruna ne'emacá. Pajluhuaja tára'aro majó pitá nacojó; apú tára'aro apojó pitá nacojó; apú tára'aro rihuajlé chojó; apú tára'aro rijimá chojó. Que natára'aco. Quejlrúna huani ne'emacá, cajrú nejlú paja'acó nanacu. Najimá chu, nahuajlé chuhua hua'ató nejlú paja'acó nanacuhua.

<sup>7</sup> Pajluhuaja cajmuruna naquiyana amaro león que. Apú amaro jema pircana achiñá que. Apú i'imari, rijimá amaro ina'uqué jimá que. Iná amaca perí ajaca que apú amaco.

<sup>8</sup> Pa'u quele ne'emacá. Cayuphéruna huánija ne'emacá. Pajluhua cuhuá'ata quele huánija nayuphé i'imacá nanacu. Quejluni nayuphé i'imacá. Ra'apíjó pitá cajrú nejlú i'imacá. Richajo pumitá cajrú caja nejlú i'imacá. Uncá nayurila atanícaje; rinácuja ne'emá hue'echú quetana, lapí quetana. Marí que nataníjica:

“Palánija, palánija, palánija Tupana.

Piyuqueja huacára'ajeri ricá.

Piyuqueja la'ajeri caja ricá.

Ricá i'imari i'imacá.

Me'etení re caja ricá.

Ricá caja i'imajeri maáreya huatucumó a'ajná ño'ojó.”

<sup>9</sup> Marí que necá, pa'u quele cajmuruna, ataníjica. Palá nemájica pe'iyorí ñáca'ajori chu yá'aco nacú. Matajnaco penaje ricá. Palá rila'acá necá yucuna ne'emá atanícaje aú.

<sup>10</sup> Natanica aú, necá veinticuatro peñahuilana, láma'año rinacojé najimá aú. Pe'iyorí ñáca'ajori chu yá'aco nacojé najláma'o, pu'ují napechu i'imacale rinacu. Uncá tajnácajo penaje calé i'imajica nacú napechu i'imá pu'ují. Aú naca'á napútena ri'imá nacojé. E nemá rijló:

<sup>11</sup> “Huhuacára'ajeri, caphí huapechu i'imacare chojé picá.

Picaja calé palani, huemacáloje pinacu palá penaje.

Picaja calé palani, huapechu i'imacáloje pinacu palá penaje.

Picaja calé hue'epiri piyuque nacaje la'acana.

Picaja caja calé queño'ótari piyuqueja nacaje i'imacá.

Picaja caja calé a'ari nacaje pu'uhuacajé ina'uquejlo, pipechu nacú ri'imacá queja. Cajmuchaji a'ajeri caja picá.”

## 5

<sup>1</sup> Quéchami nomaca papera caje pila'aqueja pe'iyorí ñáca'ajori chu yá'aco capi. Ca'añá aú ripatá ri'imacá. Iyamajo pumitano rinacu lana'aquejami i'imacá. Iyamá cuhuá'ata quele ripapi i'imacá chúta'aqueja rinacu.

<sup>2</sup> É nomá Tupana hua'atéjeri, je'echú churí. Piyuque la'acare ri'imacá. Ricá quemari caphí mejrí huani marí que:

—¿Mecaje palani Tupánajlo maare, rica'acáloje ripapi rinaquiyá penaje?

<sup>3</sup> Uncá na i'imalá palani papera me'etájeri penaje, ramácaloje méqueca lana'aquejami quemacá richu penaje. Uncá na i'imalá je'echú chu; uncá caja na i'imalá eja'ahuá chu; uncá caja na i'imalá caja taca'acaño naquiyana rijme'etájeri penaje.

<sup>4</sup> Cajrú nuyaca, uncale nomala naca palani rijme'etájeri penaje, ramácaloje ripuráca'alo richu penaje.

<sup>5</sup> Re pajluhuaja peñahuilana naquiyana i'imacá, ricá quemari nojló:

—Piyániya, piyacá'o, re pajluhuaja, nahuacára'ajeri huani ricá. Judá laquénami naquiyana ricá. Ne'emacánami chu, Davidmí chu laquénami naquiyana caja ricá. Ricá capichátari pu'uhuaré la'acana ina'uqué liyá. Ricaja calé palani papera me'etájeri penaje. Palánija ricá ripapi ca'ajeri rinaquiyá penaje —que rimacá nojló.

<sup>6</sup> Ejéchami nomaca Jesucristo, nemacare nacú, “Ohueja I'irí” que. Nomá ritára'aco pe'iyó. Pa'u quele cajmuruna, veinticuatro peñahuilana, quele i'imaño rinacu tujlá que pajimájechaca. Nenócare penájemi queja Ohueja I'irí amaco. Iyamá cuhuá'ata quele

ri'ihuahui i'ímacá. Iyamá cuhuá'ata quele caja rijlú i'ímacá. Iyamá cuhuá'ata quele Tupana Pechu que ricá, rihuacára'acare piyuque eja'ahuá chuhuá i'ímacá.

<sup>7</sup> E Ohueja I'irí i'ijnari pe'iyori ñáca'ajori chu yá'aco jimaje. E rijña'á papera pila'aquejami riyáte'ela ca'añá chiyá.

<sup>8</sup> Marí caje aú pa'u quele cajmuruna, veinticuatro peñahuilana, quele láma'año Ohueja I'irí nacojé najimá aú. Guitarra caje huánija i'imari nacapi. Chiyela, oro naquiyá la'acanamí, i'imari caja nacapi. A'ahuaná icá, iná cára'atacare, i'imari chiyela chu. Nacaje Tupana le'ejena ina'uqué quemacare nacú rijhua'até pura'acano aú, que quemacánaca a'ahuaná icá, i'imari chiyela chu.

<sup>9</sup> E nataní huajé yájeje. Marí que natanica rijlú huajé yájeje aú:

Palánija picá Tupánajlo, ilé papera ña'ajeri penaje.

Palánija picá Tupánajlo, rijme'etájeri penaje, ripapi ca'ajeri rinaquiyá penaje.

Nenó pi'ímacá, pitaca'á ina'uqué chaya i'ímacá, ne'emacáloje Tupana hua'atéjena raú penaje.

Ajopana, ajopana que rijhua'atéjena i'ímacáloje penaje pitaca'á nachaya.

Ajopana, ajopana que icá'ana i'ímaño rijhua'atéjena.

Apú, apú chu que pura'ajeño i'ímaño rijhua'atéjena.

Piyuque ajopana te'eré, ajopana te'eré eyájena que i'ímaño rijhua'atéjena.

<sup>10</sup> Picá a'ari necá Tupana hua'atéjena penaje, nala'acáloje Tupana huátaca que penaje.

Picá a'arí caja necá piyuque eja'ahuá chu i'ímacaño huacára'ajeño penaje, que natanica rijlú.

<sup>11</sup> E nuyacá'ó piño ají que, amari Tupana hua'atéjena, je'echú churuna. Atanícaje nacú ne'emá. Iqui'iruna huani ne'emacá, millones ne'emacá. Ajopana i'ímaño ñaqueé caja millones caja. Necá piyuque i'ímaño tujlá que pajimájechaca ilé yá'aro ñáca'ajori chu nacojé. E necá, cajmuruna, veinticuatro peñahuilana, quele ataniño rijlú caphí huani.

<sup>12</sup> Marí que nemacá natanica:

“Ohueja I'irí, nenócare i'ímacá, palánija ricá, Tupana a'acáloje ricá piyuqueja amájeri penaje. Palánija ricá, piyuqueja nacaje i'ímacáloje ríle'ejé huánija penaje.

Palánija ricá, piyuqueja ina'uqué pechu i'ímacáloje rinacu palá penaje, piyuqueja hue'epícare ri'ímacale.

Palánija ricá, piyuqueja ina'uqué pura'acáloje rinacu palá penaje,” que natanica rijlú.

<sup>13</sup> Ejomi noma'á ajopana atanica piño. Tupana queño'otacarena ne'emacá. Eja'ahuá chu i'ímacaño, je'echú chu i'ímacaño, caja taca'acaño, quele ne'emacá. Piyuqueja necá, camejérina hua'ató ataniño. Marí que nemacá natanica:

“Palá huemacá rinacu quele yá'aro ñáca'ajori chu.

Palá caja huemacá Ohueja I'irí nacú.

Palá caja huapechu i'imajica nanacu hua'ajini huánija.

Piyuqueja nacaje la'ajeño ne'emajica hua'ajini huani,” que natanica.

<sup>14</sup> Pa'u quele cajmuruna ja'ajipaño najló:

“Ñaqueé jo'ó ri'imajica,” que nemacá najló.

E peñahuilana láma'año rinacojé, napechu i'ímacale pu'ují Tupana nacú.

## 6

*Iyamá cuhuá'ata quele ripapi yucuna marí:*

<sup>1</sup> Ejomi nomá Ohueja I'irí ca'acá pajluhuata ripapi papera pila'aquejami naquiyá. Raú pajluhuaja cajmuruna naquiyana huá'ari najló:

—Majó pi'ijná —que rimacá.

Pichaní majáca'aco mejé que rinúru'upi mejé i'ímacá.

<sup>2</sup> E nuyacá'ó, nomá cahuarú, jareni ri'ímacá. Pajluhuaja yá'aro rinacu. Huirá'apaji i'imari ricapi. Apú a'arí pútenaji richá. E nachá'atajeri que ra'apaca cahuarú nacú. Raú ri'ijná ajopana chá'ataje nócajajo aú.

<sup>3</sup> Ejomi Ohueja I'irí ca'arí apú richúta'ajona papera pila'aquejami naquiyá. Ejéchami apú cajmuruna naquiyana quemacá nojló:

—Majó pi'ijná.

<sup>4</sup> Aú nu'ujná rejo, amari apú cahuarú jácho'oco, querani ri'ímacá. Apú a'arí rinacu ja'apájerijlo sajalu caje cajruni huani. Rinacu ja'apájeri huacára'ari ina'uqué nócaco pajhua'atéchaca eja'ahuá chu, nenócaloje pecohuácaca raú penaje.

<sup>5</sup> Ejomi Ohueja I'irí ca'arí piño apú ripapi rinaquiyá. Hueji quele cha rica'acá richúta'ajona.

Raú apú cajmuruna naquiyana quemari nojló:

—Majó pi'ijná.

Nuyacá'o rejo. Amari apú cahuarú, cameni ri'imacá. Cachini jená ña'ajona i'imari rinacu ja'apátajeri capi.

<sup>6</sup> Pa'u quele cajmuruna e'iyayá apú quemari marí que: "Pajluhua cala iná sápacala huemí na'á inajlo pajluhua ja jená ña'acó trigo. Pajluhua cala iná sápacala huemí na'á inajlo hueji quele jená ña'acó cebada. ¡Pa! Apichátaniya Olivos ícha jílá. Apichátaniya caja cajmú cajé jalá amúra'atacanami," que rimacá.

<sup>7</sup> Ejomí Ohueja I'irí ca'arí piño apú richúta'ajona papera naquiyá. Pa'u quele cha rica'acá richúta'ajona rinaquiyá. Ejéchami apú piño, pa'u que cajmuruna naquiyana, quemacá nojló: —Majó pi'ijná.

<sup>8</sup> Nuyacá'o rejo. Amari piño apú cahuarú, memáreni ri'imacá. Rinacu ja'apátajeri i'í i'imari Taca'acaje. Rápumi chu apú ja'apari. Caja taca'acaño, pu'uhuaré la'acaño apucuna, rií i'imacá. Necá huacára'año ina'uqué nócano pajhua'atéchaca, nenócaloje pecohuácaca raú penaje. Nahuacára'a caja cajrú me'epejí, cajrú ina'uqué taca'acáloje raú penaje. Nahuacára'a caja natami caje noca ina'uqué cajrú, nataca'acáloje rinacu penaje. Nahuacára'a caja camejérina yuríná noca ina'uqué. Marí que nahuacára'aca cajrú ina'uqué la'acana chapú eja'ahuá chuhú.

<sup>9</sup> Ejomí Ohueja I'irí ca'arí piño apú richúta'ajona papera pila'aquejami naquiyá. Pajluhua ja té'ela quele cha rica'acá ricá. E nomá caja taca'acaño péchumi mesa caje ja'apí. Nenó ne'emacá, na'apátacale Tupana puráca'alo ina'uquejlo. Uncá nayurila Tupana yucuna i'imacana raú. Ajopana la'año necá chapú rijimaje. E'iyonaja uncá nayurila naliyó ricá.

<sup>10</sup> Jahuíyo'oqueja nemacá Tupánajlo: "Picá huahuacára'ajeri. Picá caja hue'epiri piyuqueja nacaje la'acana. Uncá hue'epílaré pu'uhuaré la'acana picá. Quehuácaca purácaloje nacú quemájeri caja picá. ¿Méquechamíca pimájica nanacu, noño hue'emacá? ¿Méquechamíca pihuajájica ne'emajica ripachá?" que nemacá Tupánajlo.

<sup>11</sup> E apú a'arí najló pajluhuano, pajluhuano, que a'arumacaji jaré nojé huani ri'imacá. Rimá najló, nahuatána'acaloje re caja jo'ó piño penaje. Nenójica piño nejena naquiyana, nenoca ne'emacá que caja. Najlupemí chami ne'emajica, ejéchami Tupana huajájica nenójenami.

<sup>12</sup> E nomá piño Ohueja I'irí ca'acá apú richúta'ajona papera naquiyá. Pajluhua cuhuá'ata quele chami rica'acá ripapí chúta'ajona rinaquiyá. Raú nomá eja'ahuá ñaca'acó cajrú huani. Hua'ató que camú jimá yacaca camé. A'arumacaji cameni, me'ejñapí nojé huani queja rijimá amaco. Hua'ató que querá queri amaro. Jirá que rijimá amaro querani.

<sup>13</sup> Ihuijina naquiyana cujúca'año eja'ahuá nacojé. Paijí ícha, uncá jo'ó aparálare, carená cujúca'ataca que nacujúca'aca marí eja'ahuá nacojé.

<sup>14</sup> Hua'ató que je'echú capichaco. Iná pila'acá papera que caja ricapichaco. Piyuque huani ipuré, paranacuhua caje macá jatataro rapucuna chiyá a'ajná ño'ojó.

<sup>15</sup> Ejéchami piyuqueja ina'uqué ñaacó raú, ata'año jipa pajremi chojé. Piyuque necá ata'año: nahuacára'ajeño, surárana huacára'ajeño, cajrú la'acaño, cajrú péchuruna, huejapa péchuruna, ajopana hua'até sápageño, najluhua sápageño, quele piyuqueja necá ata'año jipa pajremi chojé. Ne'iyajena ñaño ipuré e'iyajé ata'ajó.

<sup>16</sup> Nemá jípaño, ra'acáloje nachá penaje, Tupana amaca piyá necá. Piyuque huacára'ajeri ricá. Nemá caja jípaño, ra'acáloje nachá penaje, namejñátacaloje ra'apejé Ohueja I'irí yuchá liyá penaje.

<sup>17</sup> Caja riphá rená chojé najló, uncá jema'alaño ra'apiyá, namácaloje riyuchá yajhué penaje. Uncá na ña'alaje riyuchá panacu, que nomaca ri'imacá.

## 7

<sup>1-2</sup> Quéchami nomaca pa'u quele Tupana hua'atéjina, je'echú chiyájina. Pa'u quele eja'ahuá curu'uhuere queja natára'aco. Necá pataño pa'u quele carená, ra'apaca piyá piyuque eja'ahuá e'iyohuá. Napatá ricá ra'apaca piyá juni jalomí jimó, a'ahuaná e'iyohuá hua'até. Tupana quemari najló i'imacá, napichátacaloje eja'ahuá, juni jalomí, caje macá penaje. E nomá piño apú Tupana hua'ateje, je'echú chiyaje, huaíchaca camú jeño'ocá eyá. Cajmuni Tupana le'ejé lana'ajona i'imari ricapí. Jahuíyo'oqueja rimacá ajopana Tupana hua'atéjenajlo, eja'ahuá curu'uhuere chu tára'acañojlo:

<sup>3</sup> "Apichátaniya eja'ahuá, juni jalomí, a'ahuaná, caje macá, Tupana le'ejena ina'uqué i'imacale rehuá. Pamineco hualana'ajé Tupana le'ejena ina'uqué pulá nacú, nahue'epícaloje Tupana le'ejena necá penaje," que rimacá najló.

<sup>4</sup> Nemá nojló: "Caja nalana'á ciento cuarenta y cuatro mil ina'uqué pulá nacú, ajopana hue'epícaloje Tupana le'ejena ne'emacá raú penaje." Israelmi chu laquénami naquiyana ne'emacá.

<sup>5</sup> Doce mil nanaquiyana i'imaño Judami chu laquénami. Doce mil caja i'imaño Rubenmi chu laquénami naquiyana. Doce mil caja i'imaño Gadmi chu laquénami naquiyana.

<sup>6</sup> Doce mil caja i'imaño Asermi chu laquénami naquiya. Doce mil caja i'imaño Neftalimi chu laquénami naquiya. Doce mil caja i'imaño Manasesmi chu laquénami naquiya.

<sup>7</sup> Doce mil caja i'imaño Simeónmi chu laquénami naquiya. Doce mil caja i'imaño Levimi chu laquénami naquiya. Doce mil caja i'imaño Isacarmi chu laquénami naquiya.

<sup>8</sup> Doce mil caja i'imaño Zabolomi chu laquénami naquiya. Doce mil caja i'imaño Josemi chu laquénami naquiya. Doce mil caja i'imaño Benjaminmi chu laquénami naquiya. Marí quele ne'emacá i'imacá.

*Jareni a'arumacáruna yucuna marí:*

<sup>9</sup> Quéchami nuyacá'aco piño. Nomá cajrú huani ina'uqué tami yá'aco. Uncá meño'ojó iná lapa'atala necá, íqui'iruna huani ne'emacá re. Ajopana, ajopana que ne'emacá. Ajopana, ajopana que naquiya ne'emacá. Apú, apú chu que pura'ajeño ne'emacá. Piyuque ajopana te'eré, ajopana te'eré eyájena que ne'emacá. Ñáca'ajori, Tupana yá'acaro chu, ahua'á natára'o. Ohueja l'irí ahua'á natára'o caja. Jareni a'arumacáruna huánija ne'emacá piyuqueja. Huejirí huirulá nacapi que natára'aco.

<sup>10</sup> E caphí nahuíyo'oca, nemá:

“Hue'ematajéri Tupana.

Caphí huapechu i'imacare chojé ricá, yá'aro ñáca'ajori chu.

Ri'irí palamane ri'imatá huecá capichácajo liyá,” que nemacá.

<sup>11</sup> Piyuque Tupana hua'atéjena, je'echú chu i'imacaño, tára'año Tupana ahua'á veinticuatro peñahuilana hua'até. Pa'u quele cajmuruna i'imacaño tára'año caja najhua'até. E najláma'o najimá aú Tupana nacojé.

<sup>12</sup> Nemá:

“Marí queja ricá: Palani Tupana, huapura'acóloje palá huani rinacu penaje.

Palá rila'acare huecá yucuna hue'emá caja rijló.

Piyuqueja nacaje nacojé hue'epéjeri ricá.

Palá ina'uqué pechu i'imacare nacú caja ricá.

Piyuqueja nacaje la'ajeri caja ricá.

Piyuqueja caja rihue'epica nacaje la'acana.

Marí queja Tupana, huapechu i'imacare chojé caphí, matajnaco i'imacá ricá —que nemacá Tupana nacú.

<sup>13</sup> Eyá pajluhuaja peñahuilana naquiya quemari nojló:

—¿Na ina'uqueca necá jareni a'arumacáruna? ¿Mere eyájena chí necá?

<sup>14</sup> —Capí —que numacá rijló—. Picá hue'epiri.

Rimá nojló:

—Chapú huani nala'acá Tupana ja'apiyá jema'ajeño i'imacá eja'ahuá tajnaco yámona. Uncá ileruna, pamácarena, yurilaño Tupana ja'apiyá i'imacana raú. Tupana a'arí Ri'irí Jesucristo ina'uquejlo i'imacá, nenócaloje ricá pu'uhuaré nala'acare chaya, namanaicho nala'acare chaya penaje. Raú ricá'á ricá naliyá. Necá, pamácarena, yuriño nachó rijló, rila'acáloje necá palá la'acaño penaje. Naquele palá la'acaño necá, jareni a'arumacáruna necá. Jareni na'arumacá, nepácale re'iyayá Jesucristo írami aú.

<sup>15</sup> Aú calé natára'o Tupana ahua'á. Me'etení nala'acá rihuátaca que hua'ajini huani riñacaré chu. Tupana mejñátari necá, rahua'á ne'emacale.

<sup>16</sup> Uncá huani quehuí me'epejí i'imalaje najló, uncá caja nanúru'upi chu macára'atalajo, uncá caja camú cára'atalaje necá.

<sup>17</sup> Ohueja l'irí i'imari Tupana ahua'á, ricá i'imajeri namájeri. Rihua'aje caja necá juni ejo, matajnaco jeño'ocare te'eré i'iyayá ejo rihua'aje necá. Iná cajmuchá penaje ricá juni. Rejo rihua'aje necá. Tupana jalacájeri nejlú jalá nejlú chiyá. Reyá a'ajná ño'ojó uncá iyácaje i'imalaje,” que rimacá nojló.

## 8

<sup>1</sup> E caja Ohueja l'irí ca'arí caja penaje ripapi papera naquiya. Rica'acá ricá ejomi, mamejeru huani ri'imacá je'echú chu pe'iyoyé camú jená quetánaja.

<sup>2</sup> Quéchami nomaca iyamá cuhua'áta quele Tupana hua'atéjena, je'echú churuna. Tupana jimaje tára'ajeño ne'emacá. E apú a'arí najló pajluhuano, pajluhuano que luhuiluhú caje.

<sup>3</sup> Apú Tupana hua'atéjeri i'imari re. Ra'acuná i'imari ricapi, oro naquiya la'acanami ri'imacá. Ricá chojé naca'á a'ahuaná icá, pu'umé jamarí.

<sup>4</sup> Tupana le'ejena ina'uqué pura'año Tupana hua'até. Napuráca'alo hua'ató riyá'ata ricá mesa nacojé, Tupana jimaje ritára'o. Isa jácho'oro Tupana hua'ateje yáte'ela chiyá, hua'até que caja ina'uqué puráca'alo jácho'oco. Tupana hua'até pura'acano nacú ne'emá.

<sup>5</sup> E Tupana hua'ateje ña'arí quera'atani mesa naquiya, rimano'otácaloje a'ahuaná icá a'acunami raú penaje. Quéchami rica'acá ricá je'echú chiyá ají que eja'ahuá nacojé. Raú

cajrú pichaní majáca'aco, cajrú caja rimejé i'imacá, cajrú pichaní camaré patacá, eja'ahuá ña'acaró caja raú.

*Luhuiluhuí yucuna marí:*

<sup>6</sup> E caja iyamá cuhuá'ata quele Tupana hua'atéjena, je'echú churuna, i'imaño re. Iyamá cuhuá'ata quele caja luhuiluhuí caje i'imari nacapi. Caja lamá'ataquejami que ne'emacá, napho'ocáloje richojé penaje.

<sup>7</sup> Pajluhuaja nanaquiyana apho'orí riluhuiluhuine caje chojé. Raú juni taca'átacanami, quera'atani, jirá hua'até ja'aró je'echú chiyá eja'ahuá nacojé. Raú cajrú eja'ahuá lucúna'aco. A'ahuaná, jimíchi, caje macá cára'ataro. Pe'iyó ja'apejeja eja'ahuá naquiyana capichaco raú.

<sup>8</sup> Quéchami apú Tupana hua'ateje, iyamá la'acá, apho'orí piño riluhuiluhuine caje chojé. Raú ipuré caje cára'aco amácanami ja'aró juni jalomí acojé. Raú pe'iyó ja'apejeja yuriro jirá que.

<sup>9</sup> Pe'iyó ja'apejeja caja juni jalomí yajné capichaño raú. Ñaqueja caja pe'iyó ja'apejé huapuru, racú i'imacare, apichaco raú.

<sup>10</sup> Ejomí apú Tupana hua'ateje, hueji quele la'acá, apho'orí piño riluhuiluhuire chojé. Raú ihuují cajruni huani ja'aró je'echú chiyá majó. Jepé lucúna'aqueja que ra'acó junápeje. Raú rapichata ajopana, ajopana que le'ejé juni. Rapichata juni, mutú caje hua'ató. Pe'iyó ja'apejé piyuque juni naquiyana apichaco raú.

<sup>11</sup> Ricá ihuují ja'acaro í i'imari Ipisini. Pe'iyó ja'apejé piyuque juni naquiyana la'aró ipisi raú. Cajrú ina'uqué taca'acá rinaquiyana i'iracana aú, ipisini ri'imacale.

<sup>12</sup> Rejomí apú Tupana hua'ateje, pa'u que la'acá, apho'orí piño riluhuiluhuine chojé. Raú camú, queri hua'té naquiyana apicharo pe'iyó ja'apejé. Ñaque caja ihuujina naquiyana apichaco pe'iyó ja'apejeja caja. Ñaquele ricamaré patarí ra'apejeja rapichaco loco'opánija. Ricamaré i'imari pe'iyó ja'apejeja hue'echú, ñaque caja lapí le'ejé i'imacá.

<sup>13</sup> Ejomí nuyacá'o je'echú chojé, amari Perú caje ajaca yenuhua huani. Caphí huani rimacá: "Chapú huani, chapú huani. Re caja jo'ó hueji quele Tupana hua'atéjena yuriño. Apho'ojeño naluhuiluhuine chojé. Naqueño'ojica richojé apó'ocana, ejéchami chapú huani ri'imajica ina'uqué eja'ahuá chu i'imacáñojlo."

## 9

<sup>1</sup> Ejomí apú Tupana hua'atéjeri, pajluhua té'ela quele la'acá, apho'orí piño riluhuiluhuine chojé. Raú apú Tupana hua'ateje, je'echú churí, ja'aró je'echú chiyá majó. Apú a'arí rijló chahui, ulahuí me'etájona penaje. Ulahuí matajnáca'aru me'etájona ri'imacá.

<sup>2</sup> Raú rijme'etá richaya. Eja cajrú huani isa jeño'ocá richiyá. Iná i'icacapere e'iyá iná cára'aca que isa jeño'ocó majó richiyá. Uncá camú amalo rinacojé, isa itácale rijimá.

<sup>3</sup> Isa e'iyayá majichíra'apana cajena cujúca'año marí eja'ahuá nacojé. Jipijí i'iracá que quehuica ne'eracá ina'uqué.

<sup>4</sup> Nahuacára'ajeri quemari najló, nacapichátaca piyá a'ahuaná, jimíchi piyuqueja nacaje iphari te'erí e'iyá caje macá. Rimá caja najló, nala'acáloje ina'uqué chapú, uncá i'imalaño Tupana le'ejena, uncá Tupana lana'acare i'imalá napulá nacú.

<sup>5</sup> Uncá nahuacára'ajeri yurila nenoca necá. Rihuata nala'acá necá chapú pajluhua té'ela queta queri quetana. Quehuí ne'eracá necá jipijí i'iracá que caja.

<sup>6</sup> Ne'erajica necá huacajé, ina'uqué huátajeño taca'acaje. E'iyonaja uncá nataca'alaje riquiyá nacú. Naculájica nahuá, e'iyonaja uncá nephátalaje ricá.

<sup>7</sup> Marí que majichíra'apana amaco. Cahuaruna i'ijnacá nócajo que namaco. Nehuila'aru nacú pútenaji i'imari. Oro naquiyá la'acanami ri'imacá. Ina'uqué achíñana jimá que najimá i'imacá.

<sup>8</sup> Inaana huilá que caja nehuilá i'imacá. León aí que caja naí i'imacá.

<sup>9</sup> Ne'ecú pajré i'imari caja. Pejru'uhuá naquiyana la'acanami queja ramaco. Cajrú huani nayuphé mejé i'imacá najraca aú. Marí que namejé i'imacá: cajrú cahuaruna chíra'año ca'ajná pe'iyohuá ja'apaca jecho'ocano nacú. Richu ja'apácaño i'ijnacáloje ajopana hua'até nócajo penaje ne'ejnacá peyajhué. Cajrú namejé i'imacá raú. Ñaque caja nayuphé mejé i'imacá nomácarena.

<sup>10</sup> Cajjírúna necá, ne'erajohua i'imari jipijí i'irajohua que caja. Najipí aú nala'á ina'uqué chapú pajluhua té'ela queta queri quetana.

<sup>11</sup> Re nahuacára'ajeri. Ulahuí, matajnáca'aru chiyá huacára'ajeri caja ricá. Ababón rií hebreo pura'acó chu, Apolión rií griego pura'acó chu. Apichátajeri ricá que quemacana rií.

<sup>12</sup> Caja chapú caje, pamineco i'imacare, ja'apari. Rejo'ocaja jo'ó iyamá yuriño.

<sup>13</sup> E caja apú Tupana hua'ateje, pajluhuaja cuhuá'ata quele la'acá, apho'orí piño riluhuiluhuine chojé. Raú puráca'aloji mejé jácho'oco mesa curu'uhuere chiyá. Pa'u quele

ricuru'uhuere chiyá puráca'aloji jácho'oro. Tupana jimaje ricá mesa tára'aro, oro naquiyá la'acanamí ri'imacá.

<sup>14</sup> Puráca'aloji quemari Tupana hua'ateje, huajé apho'ocá riluhuiluhuire chojejo: "Juni Eufrates e pa'u quele jiñana. A'aquėjami mucúruna necá. Chuhua pica'á namucú nanaquiyá."

<sup>15</sup> Raú rica'á namucú nanaquiyá. Pa'u quele ne'emacá. Caja riphá rená chojé najló. Ricá camú jená, ricá hue'echú, ricá queri, ricá jarechí que ne'emacá lamá'ataqueja, nacapichátaloje cajrú ina'uqué penaje. Pe'iyó ja'apejé nacapichata piyuque ina'uqué naquiyana.

<sup>16</sup> E caja nemá nojló mequele surárana i'imacá najhua'atéjena. Cahuaruna nacú ja'apácaño ne'emacá, doscientos millones ne'emacá.

<sup>17</sup> Nutapú queja nomaca cahuaruna, nanacu ja'apácaño, quele. Marí que nomaca necá: Surárana i'icú mejñátajona i'imari nanacu. Querá nojé huánija ne'ecú mejñátajona ri'imacá. Quera'atani que caja ramaco i'imacá. Ipureni, jehuaní hua'até i'imari caja rinacu. Nacahuarútena huíla'aru i'imari león huíla'aru que. Quera'atani, isa, azufre, quele hua'até jeño'orí nanuma chiyá.

<sup>18</sup> Raú ja calé nacapichata ina'uqué. Pe'iyó ja'apejé nacapichátaca necá. Quera'atani, isa, azufre, cajé jeño'orí cahuaruna numá chiyá. Ricá aú nacapichata ina'uqué.

<sup>19</sup> Nanuma chiyá jeño'ocá aú ja nacapichata necá. Najipí aú caja nala'á ina'uqué chapú. Jeína, quehuíla'aruna que cahuaruna jipí i'imacá.

<sup>20</sup> Marí que nala'acá necá chapú. E'iyonaja necá, uncá nenólarena, uncá nayurila naliyó nacaje jenami ja'apí iphácana, nemacare nacú "Huachi'ináricana" que. Pu'ují napechu i'imajica jiñana naquiyana nacú. Ñaque caja napechu i'imajica nacaje jenami nacú. Oro, plata, pejru'uhuá, jipa, a'ahuaná, cajé macá naquiyá la'acanamí ri'imacá. Uncá meño'ojó nacaje jenami, nala'acare nach'i'ináricana penaje amala, uncá caja meño'ojó rema'alá, uncá caja ra'apala. Marí caje i'imari najló nach'i'ináricana ejo, uncá nayurila naliyó ricá.

<sup>21</sup> Uncá caja napajno'otala napéchuhua Tupana ejo ina'uqué nócana liyá. Uncá caja nayurila naliyó nalahuichure, lejñacaje hua'ató. Uncá caja achiñana, inaana quele pajno'otálano napéchuhua namanaicho nala'acare liyá pajhua'atéchaca. Uncá caja nayurila ata'acaje naliyó.

## 10

<sup>1</sup> Ejomi nomá piño apú Tupana hua'ateje huitúca'aca je'echú chiyá. Rihue'epí cajrú nacaje la'acana. Juni suhuáca'ala i'imari ra'arumacá, yurijiri chipúca'ari rihuíla'aru nacojé, camú jimá que caja rijimá i'imacá, ritajné i'imari quera'atani.

<sup>2</sup> Camu'ujuni papera pila'aquejami i'imari ricapi. Me'etáqueja ri'imacá. Ri'imá ca'añá chojé pitari tára'aro juni jalomí acú, ri'imá pajrú chojé pitari tára'aro pe'iyoyó te'erí nacú.

<sup>3</sup> Caphí huani rahuíyo'oca. León jahuíyo'oca queja caja rinúru'upi mejé i'imacá. Rahuíyo'oca ejomi, iyamá cuhuá'ata quele pichaní mejé ja'ajipari rijló.

<sup>4</sup> Na'ajipaca rijló ejomi nuhuata napuráca'alo lana'acana papera chojé, méqueca nemacare nacú. Nuqueño'ó riyá'atacana. Ejéchami puráca'aloji jácho'oco je'echú chiyá, rimá nojló:

—¡Pa! Pilana'aníya riyucuna papera chojé méqueca iyamá cuhuá'ata quele pichaní mejé quemacá. Pi'imaniya caja riyucuna ajopánajlo —que rimacá nojló.

<sup>5</sup> E ricá Tupana hua'ateje, nomácare tára'aco juni jalomí acú, te'erí nacú hua'até, jácho'otari ra'anapítá ca'añá chojé aji que je'echú chojé.

<sup>6</sup> E rimá najló méqueca nacaje i'imajica. Nahue'epícaloje rimacá que rinacu, que huani ri'imajica najló penaje rimá: "Tupana hue'epiri quehuaca numacá." Uncá tajnácajo penaje calé Tupana. Ricá queño'ótari je'echú, eja'ahuá, juni jalomí, quele, richu i'imacare hua'ató. E caja Tupana hua'ateje quemari marí que: "Chuhuaca uncá rimalá'alajo; mequetana i'imajémija ri'imajica.

<sup>7</sup> Tupana hua'ateje, iyamá cuhuá'ata quele la'acá, apho'orí riluhuiluhuire chojé. Raú Tupana ñapátajeri nacaje ripechu nacú i'imacare la'acana. Mícho'onéjija ri'imacá ina'uqué liyá júpimi i'imacá. Ripuráca'alo ja'apátajeñoimi chuna i'imaqueño rijhua'até sápageño que. Necá i'imaqueño riyucuna i'imajica," que rimacá.

<sup>8</sup> Ejomi puráca'aloji, noma'acare iphaca je'echú chiyá majó, quemari piño marí que nojló: —Pi'ijná Tupana hua'ateje i'imacá ejo. Pajrú chojé pumitá ri'imá tára'aco juni jálomí acú. Apojó pitari ri'imá tára'aro te'erí nacú. Ricá ejo pi'ijná. Eco pijña'á ricápiya papera.

<sup>9</sup> Raú nu'ujná rejo, numá rijló:

—Pa'á nojló ilé camu'ujuni papera picapi.

—Je —que rimacá—. Marí ricá. Pijña'á ricá, pajñachi ricá. Munumunú jalá que pumeca ra'apájica pinuma chu. Eyá pihuó chojé riphájica ee rila'ajó ca'amani —que rimacá nojló.

<sup>10</sup> Nujña'á papera riliyá. Ejomi nojña ricá. Munumunú jalá que pumeca ra'apaca nunuma chu. Nojmílo'oca ricá ejomi rila'ó ca'amani nohuó chu.

<sup>11</sup> Ejomi rihuacára'a nucá nacaje i'imajícare yucuna i'imajé ajopánajlo. Nahue'epícaloje méqueca ina'uqué la'ajico ajopana te'eré nacú, ajopana te'eré nacú que penaje. Méqueca ri'imajica ajopana, ajopana que naquiyánajlo yucuna rihuacára'a caja nu'umacá. Méqueca ri'imajica apú, apú chu que pura'ajeñojlo yucuna rihuacára'aca caja nu'umacá. Méqueca ri'imajica ajopana, ajopana que huacára'ajeñojlo yucuna rihuacára'a caja nu'umacá najló.

## 11

<sup>1</sup> Ejomi apú a'arí nojló nacaje jená ña'ajona, cutihua que ri'imacá. Rimá nojló:

—Pácho'o, piji'ichachi Tupana ñacaré huapherecha jená. Piji'ichá caja mesa jená richu to'ocó. Pilapa'achiya caja ina'uqué méqueleca necá la'año pu'ují napéchuhua Tupana nacú richu.

<sup>2</sup> Pijña'aníya ta corral jená, ilé chipúca'ari Tupana ñacaré nacojé. Uncá hue'epílaño Tupánajlo penaje ricá. Necá i'imajeño Tupana le'ejé pajimila e hueji quele jarechí, eyá apú pe'iyojé quetana. Chapú nala'ajica re.

<sup>3</sup> Nucá huacára'ajeri iyamá nuyucuna i'imajeño rejo rihuacajé. Cotari caje i'imajé na'arumacá, ajopana hue'epícaloje raú camu'ují napechu i'imacá penaje. Camu'ují napechu i'imajica, uncá paala ajopana la'acale rehuá. Nuyucuna i'imajeño ja'apátajeño Tupana puráca'alo najló ñaquetana caja júpica. Hueji quele jarechí, eyá apú pe'iyojé quetana.

<sup>4</sup> Iyamá nuyucuna i'imajeño, iyamá a'ahuaná Olivos que caja necá, iyamá ricamaré tára'aco Tupana jimaje que caja necá. Tupana le'ejé piyuque eja'ahuá.

<sup>5</sup> Chapú nanacu péchuruna la'ajica ee chapú necá, quera'atani jeño'ojeri nanuma chiyá. Ricá aú nacapichátaje necá.

<sup>6</sup> Tupana quemari najló, nahuacára'acaloje juni ja'acó piyá, na'apátaca ina'uquejlo Tupana puráca'alo quetana. Juni jeño'orí te'erí e'iyayá, mutú chiyá, caje hua'ató uncá caja jeño'olaje re'iyayá. Nahuacára'aje caja juni jehuíña'aco apojó jirá que. Tupana quemari caja najló, nahuacára'acaloje ina'uqué amaca chapú caje yajhué nahuátaca que penaje.

<sup>7</sup> Nañapátajica Tupana puráca'alo ja'apátacana ina'uquejlo ejomi, camejeri cajruni huani jácho'ojeri ulahuí matajnáca'aru chiyá. Najhua'até nócajo penaje rácho'oyo richiyá. Ricá chá'atajeri necá iyamá nuyucuna i'imajeño; rinoje necá.

<sup>8</sup> Tupana le'ejé pajimila e'iyá iñe'epú chu natami pitajero. Ricá caja pajimila e nenó Nahuacára'ajeri i'imacá. Nacúhua'ata ri'imacá a'ahuaná apiyácacanamí nacú. Majopeja na'acá ricá pajimila íí Sodoma, quecha Egipto, cajrú nala'acale pu'uhuaré, namanaicho hua'até rehuá.

<sup>9</sup> Hueji que cala, eyá apú pe'iyojé quetana natami pitajico re iñe'epú chu. Piyuque ina'uqué eja'ahuá chu i'imacaño yacá'ajeño natami chaje. Ajopana te'eré, ajopana te'eré eyájena que yacá'ajeño caja natami chaje. Ajopana, ajopana que naquiyana yacá'ajeño caja natami chaje. Apú, apú chu que pura'ajeño yacá'ajeño caja natami chaje. Uncá nayurilaje natami sá'acana.

<sup>10</sup> Piyuque ina'uqué eja'ahuá chu i'imacaño pechu i'imajé pu'ují nataka'acá aú. Napachá ina'uqué amaño cajrú chapú caje yajhué. Ñaquele nataka'ajica aú nala'ajé fiesta najluhua. Nalamá'ataje caja pecohuácaca nacaje aú.

<sup>11</sup> Hueji que cala, apú pe'iyojé ja'apájeri. Ejéchami Tupana pa'atájica piño najló cajmuchaji. Raú taca'acaño penájenami jácho'oño piño tára'ajo. Raú iqui'ija huani namájeño quero'ojico.

<sup>12</sup> Ejomi puráca'aloji quemájeri je'echú chiyá marí que najló: “Majó i'ijná!” Aú ja juni suhuáca'ala ña'ajeri necá je'echú chojé. Chapú péchuruna nanacu ijlú chuhuaaja riñña'ajé necá ne'iyayá.

<sup>13</sup> Ejéchami te'erí ñaca'ajica caphí huani. Rapichátaje pajimila naquiyana. Iyamá té'ela quele nacaje i'imajícare naquiyana pajluhua apichájeri. Ají que pajluhuano, pajluhuano que nacaje iyamá té'ela quele i'imajícare naquiyana apichátajico. Ñaque caja siete mil ina'uqué capichájico raú. Najlupemí yuréjeño, i'imajeño quero'ocajo nacú cajrú. Rejéchami palá napura'ajico Tupana, je'echú churí, nacú. Piyuqueja nacaje rihue'epícare la'acana nacú napura'ajó caja palá.

<sup>14</sup> Caja namá chapú huani yajhué iyamá pe la'acá. ¡Eco pamá! Mequetana i'imajémija namájica piño apú chapú caje huani yajhué, hueji que pe rila'acá raú.

<sup>15</sup> Eyá Tupana hua'ateje, iyamá cuhua'ata quele la'acá, apho'orí piño riluhuiluhuine chojé. Ejéchami caphí huani napuráca'alo jema'acó je'echú chiyá. Nemá:

“Chuhuaca Huahuacára'ajeri Tupana i'imajica piyuqueja eja'ahuá churuna huacára'ajeri. Matajnaco ri'imajica nahuacára'acana nacú.



Ri'irí, rihuacára'acare eja'ahuá chojé i'imacá ina'uqué i'imatájeri penaje, huacára'ajeri caja rihhua'até," que nemacá.

<sup>16</sup> E veinticuatro peñahuilana, yá'acaño tujlá que Tupana nacojé, láma'año najimá aú Tupana nacojé. Pu'ují napechu i'imacá rinacu.

<sup>17</sup> Nemá marí que rijló:

"Hue'emacana Tupana. Huapechu i'imacare chojé caphí picá.

Piyuque la'ajeri picá.

Picá i'imari me'etení; picá caja i'imari júpimi i'imacá.

Palá pila'acá huecá.

Picá hue'epiri piyuqueja nacaje la'acana.

Chuhuaca piyuqueja ina'uqué huacára'ajeri picá me'etení.

<sup>18</sup> Uncá hue'epilaño picá, necá yúcha'año raú.

Chuhua pihuaájica necá. Caja taca'acaño hua'até pihuajaje pu'uhuaré nala'acare chona.

Chuhua pa'ajica pijhua'até sápageñojlo rihuemí. Pipuráca'alo ja'apátajeño necá pijhua'até sápageño.

Pa'ajé caja piyuque pa'apí iphájeñojlo rihuemí.

Re pa'apí iphájeño: cajrú péchuruna, huejapa péchuruna, quele necá. Najló piyuqueja pa'ajé rihuemí.

Chuhua caja riphaca pu'uhuaré la'ajeño capichátacana jená chojé.

Pu'uhuaré la'acana nacú ne'emá eja'ahuá chu i'imacá," que nemacá Tupánajlo.

<sup>19</sup> Eyá najme'etá Tupana ñacaré numaná, je'echú chu i'imacare. Najme'etaca aú ricá cajrú pichaní camaré ja'acó majó, cajrú pichaní mejé ñaacó richiyá. Raú cajrú te'erí ñaca'acó. Cajrú juni taca'átacanamí ja'acó richiyá majó. Tupana ñacaré chu caichama caje i'imari, ricá chu Tupana puráca'alo lana'aquejiami jipa nacú i'imacá.

## 12

<sup>1</sup> Ejomi nomá je'echú chu nacaje i'imacá apú caje huani. Nomá pajluhuajaru inanaru. Camú i'imari ro'orumacá; queri i'imari ru'umá ja'apí. Ruhuíla'aru nacú rupútena i'imacá, iyamá iphata ji'imaji nacojé quele ihuujina i'imacá rinacu.

<sup>2</sup> Caja riphá rená chojé rojló, ruhuá'acaloje ru'urí penaje. Caja romaca reyá quehuini yajhué, aú rohuíyo'o.

<sup>3</sup> E caja apú cajrúni i'imacá ya'ataró je'echú chiyá majó rojló. Cajrú nojé lánahuaru caje ri'imacá. Querani rinacu i'imacá. Iyamá cuhuá'ata quele rihuíla'aru i'imacá; iyamá té'ela quele caja ri'ihuahui i'imacá. Pútenaji i'imari caja piyuque rihuíla'aru quele nacú.

<sup>4</sup> Rijjipi aú richíra'a ihuujina je'echú chiyá, rica'acáloje necá marí eja'ahuá nacojé penaje. Pe'iyó ja'apejé piyuque ihuujina naquiyana rica'á marí eja'ahuá nacojé. Ejomi ritára'o ilerú inanaru ahua'á, yehuicha huá'aca ru'urí ahua'á, rajñácaloje ru'urí ruhuá'ajica ricá ejomi penaje.

<sup>5</sup> E caja ruhuá'a ru'urí, achiñá ri'imacá. Piyuque ina'uqué, eja'ahuá chu i'imacaño, huacára'ajeri penaje ri'imacá, rihuacára'acaloje necá caphí penaje. Ramaco rajlojlo ejomi Tupana huá'ari ricá je'echú chojé, re ri'imacáloje rahua'á penaje.

<sup>6</sup> Ilerú inanaru ñaayó pu'uteni chojé. Ilé pucunaji Tupana lamá'atacare rojló i'imacá, ricá chojé ruñao. Re ra'á rinacójo rucá hueji quele jarechí, eyá apú pe'iyojé quetana.

<sup>7</sup> E caja naqueño'ó nócacajo je'echú chu. Tupana hua'atéjena, je'echú chu i'imacaño, huacára'ajeri iú Miguel. Ricá, rijhua'atéjena hua'até nócaño lánahuaru caje hua'até.

<sup>8</sup> Nachá'ataca ricá ejomi naca'á ricá je'echú chiyá rijhua'atéjena hua'até. Uncá nahuátala nayurico je'echú chu.

<sup>9</sup> Caja naca'á ricá lánahuaru caje je'echú chiyá. Cajrú nojé huani ri'imacá, jeí chí'ináricana ricá. Ricá iú Jiñá Chi'ináricana, Satanás. Cajrú ripajlaca piyuque ina'uqué hua'até eja'ahuá chu i'imacaño. Ricá naca'á je'echú chiyá, rijhua'atéjena hua'até.

<sup>10</sup> Ejomi noma'á puráca'aloji quemacá caphí huani marí que: "Caja chuhuaca Tupana i'imatájica ina'uqué capichácajo liyá. Chuhua Tupana i'imajica piyuqueja ina'uqué huacára'ajeri. Chuhua ricá, rihuacára'acare eja'ahuá chojé i'imacá ina'uqué i'imatájeri penaje, ricá huacára'ajeri caja rijhua'até. Caja naca'á ricá je'echú chiyá. Ricá aca'arí Jesucristo ja'apiyá jema'ajeño maná. Hua'ajini huani raca'ajica namaná Tupánajlo.

<sup>11</sup> Jesucristo ja'apiyá jema'ajeño chá'ataño Jiñá Chi'ináricana, Jesucristo taca'acale nachaya a'ahuaná apiyáccanamí nacú i'imacá. Nachá'ata caja ricá quehuácaje puráca'aloji aú. Riyucuna ne'emá ajopánajlo. Uncá caja nahue'epila caí nanacuhúa. Ajopana que-maquela nanacu: 'Huenójica icá, uncaja que iyurí Jesucristo ja'apiyá jema'acana' que. Marí que nemaquela nanacu, uncá nayurílaja ra'apiyá jema'acana raú. Marí que i'imacaño chá'ataño Jiñá Chi'ináricana.

<sup>12</sup> Eyá rimá piño je'echú churúnajlo, napechu i'imacáloje pu'ují penaje. Chapú huani ri'imajica eja'ahuajlo, juni jalómijlo, Jiñá Ch'i'náricana huitúca'acale rejo. Yuri huani ricá, rihue'epícale mequetanaja calé ri'imajica ejo'ocaja."

<sup>13</sup> Caja lánahuaru caje hue'epiri naca'acá ri'imacá je'echú chiyá eja'ahuá nacojé. Raú riqueno'ó inanaru jecho'ótacana, huá'ayo ru'uri i'imacá penájerumi.

<sup>14</sup> Tupana a'arí rojló iyamata yupheji, rojácaloje pu'uteni meñaru chojé raú penaje. Perí cajruni le'ejé que caja riyuphé i'imacá. Re ru'umá hueji quele jarechí quetana. Tupana a'arí rinacojé rucá jeí ch'i'náricana liyá.

<sup>15</sup> E caja jeí ch'i'náricana yuriri cajrú huani juni jeño'ocá rinuma chiyá, rapichátacaloje ilerú inanaru raú penaje.

<sup>16</sup> E'iyonaja eja'ahuá a'arí ruñaté. Ricá huijro'ori juni jeño'ocare lánahuaru caje numá chiyá.

<sup>17-18</sup> Marí caje aú lánahuaru caje yúcha'aro íqui'ija huani inanaru cha. Raú ri'ijná piño rulaquénami hua'até nócajo. Ri'ijná Tupana ja'apiyá jema'ajeño, Jesucristo puráca'alo ja'apiyá jema'ajeño, quele hua'até nócajo.

### 13

<sup>1</sup> Ejomi nomá camejeri caje jácho'oco juni jalomi aquíyá, iyamá té'ela quele ri'ihuahui i'imacá; iyamá té'ela quele caje pútenaji pata'aró ri'ihuahui nacú, iyamá cuhuá'ata ca'alá huíla'aruri ri'imacá. Rí pu'uhuareni huani i'imari lana'aquejami pajluhuano, pajluhuano que rihuíla'aru nacú. Pu'uhuaré huani quemacana ricá Tupana nacú.

<sup>2</sup> Ricá camejeri caje nomácare, amaro yahui eja'ahuá e'iyohuaje que. Ri'imá i'imari oso i'imá que, rinuma i'imari león numá que caja. Ilé lánahuaru caje a'arí rijló ripechu, rihuacára'acaloje rijhua'atéjena rihuacára'aca rijhua'atéjena que caja penaje.

<sup>3</sup> Nenó pajlúhua'ala camejeri huíla'aru naquiayana. Aú napechu nacú i'imá: "Caja pajlúhua'ala rihuíla'aru taquí'ichari," que napechu i'imacá. E'iyonaja ripala'ó piño palá rapumí chuhú. Raú piyuque ina'uqué pechu nacú ri'imá: "¡Meque piyuque huani la'ajeri ricá!" que. Raú naqueño'ó ra'apiyá jema'acana.

<sup>4</sup> Piyuque ina'uqué, eja'ahuá chu i'imacaño, pechu i'imari pu'ují ricá lánahuaru caje nacú, ra'acale ricá camejerijlo ripechu, rihuacára'acaloje raú penaje. Pu'ují napechu i'imá caja ilé camejeri caje nacú. Nemá rinacu: "Uncá na i'imalá ricá que caja. Uncá caja na calé chá'atari ricá nócajo aú."

<sup>5</sup> Tupana yuriri ilé camejeri caje pura'acó pu'uhuaré huani. Riyurí caja ri'imacá eja'ahuá chu i'imacaño huacára'ajeri. Hueji quele jarechí eyá apú pe'iyojé quetana ri'imacá nahuacára'ajeri.

<sup>6</sup> Ripura'ó pu'uhuaré huani Tupana nacú. Ripura'ó caja pu'uhuaré je'echú nacú, Tupana i'imacare e. Piyuque richu i'imacaño hua'até nacú ripura'ó caja pu'uhuaré huani.

<sup>7</sup> Rinoco Tupana le'ejena ina'uqué hua'até; richá'ata necá. Ri'imá caja piyuque ina'uqué i'imacana. Piyuque ajopana, ajopana que huacára'ajeri penaje ri'imá. Ajopana, ajopana que te'eré eruna huacára'ajeri ri'imá. Apú, apú chu que pura'ajeño huacára'ajeri ri'imá caja. Uncá Tupana itala rijló rapu, ri'imacá piyá ñaque rijló.

<sup>8</sup> Piyuque ina'uqué, eja'ahuá chu i'imacaño, pechu i'imari pu'ují rinacu. Uncá huátalaño Tupana ne'emacá. Uncá caja neí i'imalá lana'aquejami Jesucristo papérame chu, ina'uqué chaya nenó ri'imacá. Uncá chiyó Tupana queño'óta eja'ahuá, rihue'epí mecajenaca i'imajica ríle'ejena ina'uqué. Caja rihuacajé eyá re neí i'imari lana'aquejami ripapérame chu. Ripapérame chu lana'aquejami í i'imacaño i'imajeño matajnaco rijhua'até je'echú chu.

<sup>9</sup> Jema'á icá que'ejhuiruna.

<sup>10</sup> Tupana hue'epiri mecajenaca napatájica ne'iyayá, naca'acáloje necá ina'uqué huajáquelana chojé penaje. Necaja calé napataje. Tupana hue'epiri caja mecajenaca nenójica. Necaja calé nenoje ne'iyayá. Ñaquele numá Tupana le'ejena ina'unquejlo: i'imá cahuajhuéruna. Ipechu i'imá caja caphí Tupana chojé.

<sup>11</sup> Ejomi nomá piño apú camejeri caje jácho'oco te'erí e'iyayá. Iyamá ri'ihuahui i'imacá, capajé nojé. Ohueja i'irí i'ihuahui queja ri'ihuahui i'imacá capajé nojé. Lánahuaru caje pura'acó que ripura'acó.

<sup>12</sup> Ricá camejeri, jácho'ocaro junápiya, ahua'á caja ri'imá. Caphí rihuacára'aca ajopana ra'apiyá que. Tejmuji huani rihuacára'a piyuque ina'uqué pechu i'imacá pu'ují ricá camejeri nacú, junápiya jácho'oco ri'imacá. Nenócare pehuíla'aruya ri'imacá; caja pala'acó penájemi ri'imacá.

<sup>13</sup> Ricá camejeri, jácho'ocaro te'erí e'iyayá, la'arí cajrú nacaje uncá meño'ojó ina'uqué la'alare. Rihuitúca'ata quera'atani je'echú chiyá eja'ahuá nacojé. Piyuque ina'uqué e'iyajé rihuitúca'ata ricá, namácaloje ricá penaje.

<sup>14</sup> Rila'á cajú nácaje uncá meño'ojó iná la'alore. Raú ripajlá piyuque ina'uqué hua'até eja'ahuá chu i'imaçaño. Ricá camejeri, jácho'ocaró junápiya, ahua'á rila'á nacaje uncá meño'ojó ina'uqué la'alore. Camejeri jácho'ocaró te'erí e'iyayá, huacára'ari piyuqueja ina'uqué la'acá nacaje jenami. Palá napechu i'imaça camejeri caje nacú, jácho'oco junápiya nacú. Ra'apí iphácana aú nala'á renami i'imaça. Nenó ri'imaça jo'ojó aú, e'iyonaja uncá ritaca'alá.

<sup>15</sup> Nala'á renami camejeri jácho'oco junápiya nacojé. Riyurí rapho'ocá ricaésa renami chojé, raú ri'imá cajmuni. Ejéchami ripura'acó i'imaça. Uncachu ina'uqué pechu i'imalá pu'ují rinacu, rinó necá.

<sup>16</sup> Rihuacára'a tejmují piyuqueja ina'uqué. Cajrú péchuruna, huejapa péchuruna, camu'ují la'acaño, cajrú la'acaño, ajopana hua'até sápañeño, najlujhua sápañeño, necá piyuqueja huani rihuacára'a tejmují. Na'á nayaró nayáte'ela ca'añá chojó pitá nacojé, napulá nacojé hua'ató.

<sup>17</sup> Uncachu ilé camejeri í i'imalá nayáte'ela nacú lana'aquejami, napulá nacú hua'até, uncá nayurila nahuarúhua'aca nacaje. Uncá caja nayurila na'acá nacaje rihuemi aú. Ríi ca'ajná, rile'ejé lapa'atácaje ca'ajná i'imari lana'aquejami nayáte'ela nacú, napulá nacú hua'ató.

<sup>18</sup> Capéchuruna hue'epiño rile'ejé lapa'atácaje nacojé, ríi hue'epicana aú. Ríi queja caja lapa'atácaje. Rile'ejé lapa'atácaje i'imari seiscientos sesenta y seis (666).

## 14

<sup>1</sup> Ejomi nuyacá'o piño. Amari Jesucristo tára'aco Jerusalén e. Ciento cuarenta y cuatro mil (144,000) rijhua'atéjéna i'imaño. Ríi, rara'apá íi, hua'até i'imari lana'aquejami rijhua'atéjéna pulá nacú.

<sup>2</sup> E puráca'aloji jema'acó je'echú chiyá. Cajruni huani jipa mejé que caja rinúru'upi mejé i'imaça. Cajrú caja pichaní majáca'aco mejé jema'acó rijhua'até. Cajrú ina'uqué huára'aca guitarrá caje nacú, que caja rinúru'upi mejé jema'acó.

<sup>3</sup> E caja rijhua'atéjéna, necá ciento cuarenta y cuatro mil (144,000), tára'año nahuacára'ajeri jimaje. Pa'u quele cajmuruna, peñahuilana, quele tára'año caja najhua'até rijimaje. E nataní Tupana yale rijló. Huajé yájeje ri'imaça. Necá, Ri'irí taca'acárena chaya, queleja hue'epiño riyale.

<sup>4</sup> Palá la'acaño ne'emacá. Achiñana ne'emacá, uncá la'alaño inanana hua'até ne'emacá. Ne'ejnaqué Jesucristo hua'até ri'ijnajica ejo. Jesucristo taca'arí nachaya i'imaça, raú Tupana huarúhua'ari necá ajopana eja'ahuá chu i'imaçaño e'iyayá. Ajopana piyá ri'imatá necá capichácajo liyá, ne'emacáloje Tupana, Ri'irí Jesucristo, quele le'ejéna penaje.

<sup>5</sup> Uncá huani caja napajlala, uncá caja nala'alá pu'uhuaré.

<sup>6</sup> Ejomi nomá piño Tupana hua'ateje, je'echú churí, ajaca yenuhua huani. Tupana puráca'alo ra'apata eja'ahuá chu i'imaçañojlo. Tupana i'imataca ina'uqué capichácajo liyá Jesucristo palamane aú, riyucuna ra'apata najló. Uncá riyucuna capichálajo. Piyuque ina'uqué marí eja'ahuá chu i'imaçañojlo ri'imá riyucuna. Ajopana, ajopana que naquiyánajlo ri'imá caja riyucuna. Apú, apú chu que pura'ajéñojlo ri'imá caja riyucuna. Ajopana, ajopana que te'eré erúnajlo, que ri'imaça caja riyucuna.

<sup>7</sup> Caphí huani rimacá najló: "Iphá Tupana ja'apí. Ipura'ó caja palá rihue'epicare la'acana nacú. Caja chuhua rimájica piyuqueja ina'uqué nacú pajlujhuano que méqueca nala'acana. Ipechu i'imá pu'ují ricá nacú, la'arí je'echú, eja'ahuá, juni jalomi, piyuque apú juni hua'até rila'acare i'imaça, ricá nacú ipechu i'imá pu'ují, que rimacá.

<sup>8</sup> Apú Tupana hua'ateje pura'aró piño rapumí chojé. Ricá quemari: "Caja pajimila Babilonia capicharo. Marí que i'imaçaño pajimila eruna i'imaça: Napichátaque ajopana, ajopana que pechu. Pu'ují napechu i'imaça nacaje jenami nacú. Nachi'ináricana queja ri'imaça najló. Caja namata ajopana, ñaqueé caja napechu i'imaçaloje pu'ují rinacu najhua'até penaje. Raú napichátaque napechu. Namata caja ajopana, ajopana que namanaicho la'acana aú."

<sup>9-10</sup> E caja apú Tupana hua'ateje, hueji quele ne'emá rijhua'até, i'ijnari caja ajopana iyamá ápumi chu. Caphí huani rimacá marí que: "Pu'ují péchuruna i'imaçaño ilé camejeri nacú, necá amájeño chuhua Tupana yuchá yajhué. Re ríi lana'aquejami napulá nacú, nayáte'ela nacú hua'até. Iqui'i huani riyúcha'aco nachá. Quera'atani, azufre hua'até yajhué namájica chuhua. Jesucristo, rijhua'atéjéna, quele jimaje namájica ricá.

<sup>11</sup> Namaca ima'aní yajhué eyá isa jácho'oro. Matajnaco rácho'ojico reyá. Hua'ajini huani namájica ima'aní yajhué re, uncá rima'achare huatána'atalaje necá. Marí queja ri'imajica najló. Pu'ují napechu i'imajica ilé camejeri caje nacú. Ríi i'imajeri caja lana'aquejami nanacu. Pu'ují caja napechu i'imajica renami nacú, rinacojé la'acamani ri'imaça. Ríi i'imajeri caja lana'aquejami nanacu. Marí cajéna amájeño ima'aní yajhué."

<sup>12</sup> Marí que ri'imajícale numá Tupana ja'apiyá jema'ajéñojlo marí que: Iimá cahua-jhuéruna Tupana ja'apiyá jema'acana nacú. Tupana le'ejena ina'uqué a'año ripuráca'alo nanacójó. Uncá caja nayurila Jesucristo ja'apiyá jema'acana.

<sup>13</sup> E puráca'aloji jema'acó piño je'echú chiyá, rimá nojló:

—Pilana'á marí papera chojé: “Maáreya a'ajná ño'ojó ina'uqué naquiya jema'ajeño Jesucristo ja'apiyá. Ra'apiyá jema'ajeño ne'emajica a'ajná nataca'ajica ejená. Pu'ují péchuruna ne'emajica, Tupana la'ajícale necá palá.” “Que jo'ó,” que Tupana Pechu ja'ajipacá rijló. “Nahuatána'ajica nasápaca'ala liyá. Caphí nasápaca i'imacá. Chuhua palá ne'emajica je'echú chu palá nala'acare huemí,” que Tupana Pechu quemacá nojló.

<sup>14</sup> Ejomi nuyacá'o piño, nomá juni suhuáca'ala jareni. Rinacu nomá nápacaca yá'aco, ina'uqué que ramácana. Pútenaji i'imari richá, oro naquiya la'acanamí ri'imacá. Sajalu caje pu'uhuení i'imari caje ricapi.

<sup>15</sup> Ejomi nomá apú Tupana hua'ateje jácho'oco Tupana ñacaré chiyá. E jahuíyo'oqueja rimacá juni suhuáca'ala nacú yá'acajlo: “Chuhua pisápajica ilé pisajálune aú. Pi'ijichá richa eja'ahuá e'iyayá. Chuhua richa ña'acana eja'ahuá e'iyayá iphari rená chojé.”

<sup>16</sup> Raú ricá, juni suhuáca'ala nacú yá'aco, mata'arí. Pajlúhua'ama aú ja rijña'á richa eja'ahuá e'iyayá.

<sup>17</sup> Ejomi nomá piño apú Tupana hua'ateje jácho'oco je'echú churí Tupana ñacaré chiyá. Sajalu caje pu'uhuení i'imari caje ricapi.

<sup>18</sup> E caja apú Tupana hua'ateje ja'apari mesa ahua'ayá. Quera'atani mináricana ri'imacá. E jahuíyo'oqueja rimacá caphí huani sajalu pu'uhuení i'imacare cápijlo: “Chuhua pimata'á pisajálune aú cajmú caje icha eja'ahuá chu i'imacá. Caja rapará chuhua.”

<sup>19</sup> “Je” que rimacá.

E risajálune aú rimata'á richuhuaja piyuque cajmú caje icha eja'ahuá chu i'imacá. Ejomi rica'á ricá ralá apáca'aruna chojé. Namácaloje Tupana yuchá yajhué penaje, Tupana huajari pu'uhuaré la'ajeño.

<sup>20</sup> Napa'á cajmú caje jalá re'iyayá ralá apáca'aruna chojé pajimila yámojo. Raú nérami i'imari cajrú huani rehuá caesa que. Cahuarú tára'aco ra'áta ja'apejé quetana juníphuca ri'imacá. Trescientos quilómetros quetana ehua richípúca'aco.

## 15

<sup>1</sup> Ejomi nomá piño apú nacaje uncá iná amálare. Nupechu i'imá: “Meque piyuque huani caji.” Nomá iyamá cuhuá'ata quele Tupana hua'atéjena, je'echú churuna. Pajluhuano que nacaje nacapi, nahuajácaloje raú necá uncá jema'alaño Tupana ja'apiyá penaje, Tupana yuchá tajnácaloje raú penaje.

<sup>2</sup> Ejomi nomá cajruni huiluru caje quera'atani hua'até to'ocó. Cajruni, juni jalomi que ri'imacá. Rahua'á ajopana ina'uqué tára'año. Ilé camejeri junápiya jácho'oco, uncá jema'alaño ra'apiyá ne'emacá. Uncá caja pu'ují napechu i'imalá renami nacú. Uncá caja rile'ejé lana'aquejami i'imalá nanacu. Necá tára'año guitarra caje i'imari nacapi. Tupana a'acare najló guitarra caje i'imari nacapi.

<sup>3</sup> Re ne'emá atanícaje nacú. Moisés yale nataní. Tupana hua'até sápacari ri'imacá. Quéchami natanica piño Tupana I'irí, Jesucristo yale. Marí que natanica:

“Huahuacára'ajeri Tupana. Piyuque la'acare picá.

Palani huani nacaje pila'acare.

Piyuqueja ina'uqué huacára'ajeri caje picá.

Palá nojé nacaje pila'acare.

Quehuácaje caje pipuráca'alo.

<sup>4</sup> Huahuacára'ajeri, piyuqueja ina'uqué iphaño pa'apí.

Piyuque necá ja'apátaño piyuque nacaje pila'acare yucuna ajopánajlo.

Picaja calé pajluhuaja uncá la'alá pu'uhuaré.

Piyuque ajopana, ajopana te'eré eyájena que huaícha pijimajo, napechu i'imacácaloje pu'ují pinacu penaje.

Pu'ují napechu i'imajica pinacu, namácale palá pila'acare i'imacá,” que natanica i'imacá.

<sup>5</sup> Ejomi nomá Tupana ñacaré, je'echú churí. E nomá rinumaná me'etaco. Richu nomá ucapú Tupana puráca'alo lana'aquejami i'imacare chu.

<sup>6</sup> Ejomi nomá Tupana hua'atéjena, iyamá cuhuá'ata quele ne'emacá. Nomá namujlúca'aca richiyá. Nacaje i'imari nacapi, nahuajácaloje ina'uqué raú penaje. Uncá jema'alaño Tupana ja'apiyá huajájona i'imari nacapi. Jaré nojé, palá nacurí na'arumacá i'imacá. Huachaphilaji caje lájma'aro ne'ecú nacú, oro naquiya la'acanamí ri'imacá.

<sup>7</sup> E caja pajluhuaja cajmuruna naquiya a'arí Tupana hua'atéjenajlo chiyela caje. Iyamá cuhuá'ata quele Tupana hua'atéjena i'imacá. Ra'á najló chiyela apú, apujlo que. Oro naquiya la'acanamí ri'imacá. Uncá tajnacajo penaje calé Tupana. Ricá yúcha'aro ina'uqué

cha, uncá pachá ne'emalá ra'apiyá. Richona rihuajáica necá. Nahuajájona i'imari chiyela nacapi i'imacare chu.

<sup>8</sup> Piyuque la'acare Tupana. Cajrú isa i'imari riñacaré chu, re ri'imacale. Uncá na calé mujlúca'ari Tupana ñacaré chojé. Iyamá cuhuá'ata quele Tupana hua'atéjena huajaño necá, uncá jema'alaño Tupana ja'apiyá. Nahuajaca necá quetana uncá na calé mujlúca'ari Tupana ñacaré chojé.

## 16

<sup>1</sup> Ejomi puráca'aloji jema'aró Tupana ñacaré chiyá. Rimá iyamá té'ela quele Tupana hua'atéjenajlo: “Chuhua i'ijná, ijláma'atachi iyamá cuhuá'ata ca'alá chiyela chiyá Tupana yuchá eja'ahuá nacojé.”

<sup>2</sup> Raú Tupana hua'ateje, natucumá tára'aco láma'ari richiyélane chiyá Tupana yuchá eja'ahuá nacojé. Raú pacháca'aloji nóteri ne'emacá. Pu'ují péchuruna camejeri jenami nacú i'imacaño ne'emacá. Ríi i'imari caja lana'aquejami nanacu. Necá penájenami i'imacaño pacháca'aloji nóteri ne'emacá. Piyuqueja nanapona nacú napacháca'alo i'imari. Quehuini huani ri'imacá.

<sup>3</sup> Ejomi apú Tupana hua'ateje, iyamá la'acá, láma'ari piño richiyélane chiyá juni jalomi acojé. Raú riyuró ina'uqué caja taca'arí írami que. Raú piyuque juni yajné taca'ataño.

<sup>4</sup> Ejomi apú Tupana hua'ateje, hueji que la'acá, láma'ari piño richiyélane chiyá, apú juni acojé. Ina'atana, mutú caje hua'ató acojé rijláma'a ricá. Ricá aú riyuró caja ina'uqué írami que.

<sup>5</sup> E Tupana hua'ateje, juni minaricana ri'imacá, quemari marí que Tupánajlo: “Palá pila'acá marí que nahuajácana aú. Uncá la'alá pu'uhuaré picá. I'imajeri huani picá. Picá i'imari i'imacá, re caja picá me'etení.

<sup>6</sup> Necá pihuajácarena me'etení nóqueño pile'ejena ina'uqué. Nenoque pipuráca'alo ja'apátajeñomi chuna. Cajrú nérami i'imajica. Chuhuaca picá a'ajeri nanuma jirá caje, ne'eracáloje ricá penaje. Chapú nala'acare ajopana i'imacá ejé pihuajaca necá,” que rimacá Tupánajlo.

<sup>7</sup> E nomá'a puráca'aloji huaíchaca mesa caje eyá. Rimá Tupánajlo: “Huahuacára'ajeri, huapechu i'imacare chojé caphí picá. Piyuqueja la'ajeri caja picá. Palá pila'acá marí que nahuajácana aú.”

<sup>8</sup> Ejomi apú Tupana hua'ateje, pa'u quele la'acá, láma'ari piño Tupana yuchá camú nacojé. Yúcha'atari huani camú camaré. Ima'aní huani ri'imacá raú, majopeja ricára'ataca ina'uqué.

<sup>9</sup> Cajrú nacára'ataco raú. Marí que nala'acó aú cajrú napura'acó pu'uhuaré Tupana nacú. Ricá huacára'ari chapú caje ca'acana nachá. Raú namá chapú caje yajhué. E'iyonaja uncá napajno'otala Tupana ejo napéchuhua pu'uhuaré nala'acare liyá. Uncá caja napura'aló palá piyuque nacaje Tupana hue'epícare la'acana nacú.

<sup>10</sup> Ejomi apú Tupana hua'ateje, pajluhua té'ela la'acá, láma'ari Tupana yuchá ilé camejeri junápiya jácho'oco cha. Raú piyuqueja rijhua'atéjena i'imacá calajéruni chu. Namá caja quehuí huani yajhué. A'acuhuaná najma'atá nalenahua.

<sup>11</sup> Cajrú napachaco a'acuhuaná napura'ó pu'uhuaré huani Tupana nacú. Uncá napa-jno'otala napéchuhua marí cajé aú Tupana ejo, pu'uhuaré nala'acare liyá.

<sup>12</sup> Ejomi apú Tupana hua'ateje, pajluhua cuhuá'ata quele la'acá, láma'ari piño Tupana yuchá richiyélane chiyá chí'taje juni acojé. Juni íi Eufrates. Raú rimacára'o, napu me'etácoloje penaje. Richuhua ajopana te'eré eyájena huacára'ajeño i'ijnáño nale'ejena surárana hua'até. Camú jeño'ocá eyá naqueño'ó richuhua jácho'ocano majó.

<sup>13</sup> Ejomi nomá piño hueji quele jiñana pechu. Máhuana queja namácana. Pajluhua ja jiñá pechu jácho'oro lánahuaru caje numá chiyá. Apú jiñá pechu jácho'oro camejeri, junápiya jácho'oco numá chiyá. Apú jácho'oro apú numá chiyá. Ricá quemaqueri rinacuhua: “Tupana puráca'alo ja'apátajeri núcá.” Uncá quehuaca calé ricá. Ricá numá chiyá apú jiñá pechu jácho'oro.

<sup>14</sup> Jiñana pechu jácho'ocarona numá chiyá hue'epiño nacaje la'acana, uncá meño'ojó ina'uqué la'alare caje. Hueji quele jiñana pechu necá i'ijnáño ajopana, ajopana que huacára'ajeño chaje. Ne'ejná nachaje, nahuacátacaloje necá penaje, nenócacoloje Tupana hua'até penaje. Rihuacajé Tupana huajájeri necá cajrú huani. Rimacá nanacu i'imacá que rihuajáica necá.

<sup>15</sup> Jesucristo quemari marí que i'imacá: “Jema'á, núcá i'ijnajeri ca'ajno. Ata'acachi iphaca ee nacaje ata'ajé, uncá ra'alá renó. Ñaqueé caja nupháica inacu, uncá ihue'epilaje noná. Pu'ují nuhuátajeño pechu i'imajica. Palá péchuruna, uncá i'imalaño pu'uhuaré la'acana nacú, pechu i'imajé pu'ují nupháica aú. Mariruna uncá apáña'alajo no'opí nupháica huacajé,” que Jesucristo quemacá.

<sup>16</sup> E caja jiñana pechu jahuacátaño ajopana, ajopana que huacára'ajeño. Nahuacata necá Aramedón ojo, que na'acá pucunaji íi hebreo pura'acó chu.

<sup>17</sup> E caja apú Tupana hua'atéjeri, iyamá cuhuá'ata quele la'acá láma'ari piño Tupana yuchá richiyélane chiyá. Rijláma'a ricá aji que cahuacaje carená e'iyajé. Ejéchami Tupana quemacá “caja” que. Mejrí huani ripuráca'alo ja'acó majó Tupana ñacaré chiyá, Tupana i'imacá eyá.

<sup>18</sup> Marí que rimacá aú cajrú pichaní jeño'ocá je'echú jimahua. Caphí huani rimejé i'imacá. Cajrú huani caja eja'ahuá ñaca'acó raú. Tupana queño'ótari ina'uqué eyá maárejecha uncá eja'ahuá ñaca'aló ñaqueja.

<sup>19</sup> Raú pajimila Babilonia tamáca'ato paliyácaca hueji quele repo'oná queja a'ajná ño'ojó. “Apú pajimila chaje ricá,” que nemacá ricá pajimila nacú. Piyuque huani pajimila apú, apú que eja'ahuá chu i'imacare, capicharo eja'ahuá ñaca'acaro aú. Tupana hue'epiri méqueca nala'ajica pu'uhuaré, namanaicho hua'até Babilonia e. Pachá namá Tupana yuchá yajhué.

<sup>20</sup> Te'erí ñaca'acó aú paranacuhua capicharo caja. Ñaque caja piyuqueja ipuré capichaco raú.

<sup>21</sup> Hua'ató cajrú nojé huani juni taca'átacanami ja'aró je'echú chiyá. Juni ja'acó que caja ra'acó ina'uqué cha. Cincuenta quilos pajlúhua'ala juni taca'átacanami jená ña'acó. Cincuenta quilos que ra'acono majó. Ricá nórtari ina'uqué. Raú pu'uhuaré huani naca'acá Tupana maná, namácale chapú caje yajhué marí que.

## 17

<sup>1</sup> Iyamá cuhuá'ata quele Tupana hua'atéjena je'echú churuna i'imacá chiyela nacapi que. Pajluhuaja nanaquiyana i'ijnari majó nohua'ajé. E rimá nojló:

—Pi'ijná nujhua'até, nuya'achíyachi pijló méqueca Tupana huajájica pajimila eruna. Pajimila nemacare nacú apú pajimila chaje ricá, eruna rihuajaje. Apú, apú que juni cha ricá pajimila. Huapichá que caja ricá pajimila, ina'uqué pechu i'imacale apojó Tupana liyá napuráca'alo jimaje.

<sup>2</sup> Ajopana, ajopana que huacára'ajeño piyuque eja'ahuá chu i'imajícaño i'ijnaqueño rejo. Re nala'aqué pu'uhuaré, namanaicho. Tupana apumí chojé que napechu i'imajica pu'ují apú nacaje nacú —que rimacá nojló.

<sup>3</sup> Tupana hua'ateje, je'echú churí, huá'ari nupechu meñaru pu'uteni chojé. Re nomá inanaru yá'aco camejeri caje huajlé chu. Querani camejeri i'imacá. Lana'aquejami i'imari rinacu, quemari pu'uhuaré huani Tupana nacú. Iyamá cuhuá'ata ca'alá rihuíla'aru i'imacá, iyamá té'ela quele caja ri'ihuahui i'imacá. Marí que ri'imacá. Ricá huajlé chu nomá inanaru yá'aco.

<sup>4</sup> Querálucuni, ipurélucuni hua'até ro'orumacá i'imacá. Cajrú caja oro pato'ocó ro'orumacá nacú. Cahuemí nojé jipa, caje pato'oro caja rinacu. Perlas, cahuemini huani pato'oro caja ro'orumacá nacú. Chiyela i'imari rucapi. Oro naquiyá la'acanamí ri'imacá. Pu'uhuaré nojé huani nacaje i'imari richu. Pu'uhuarieni puráca'aloji i'imari caja richu. Caje puráca'aloji jimaje cajrú ina'uqué pechu i'imacá chapú Tupana nacú.

<sup>5</sup> Rupulá nacú lana'aquejami i'imari caja. Me'echuje ripuráca'alo i'imacá. Marí que rimacá: “Babilonia, nemacare nacú apú pajimila chaje ricá. Piyuqueja huapichana jaló que ricá pajimila. Reyá caja apú caje puráca'aloji jácho'oro reyá cajrú, ina'uqué pajno'otácaloje napéchuhua Tupana liyá raú penaje, ne'emacáloje apú caje puráca'aloji ja'apiyá rilanaquiya penaje,” que lana'aquejami quemacá, i'imari rupulá nacú.

<sup>6</sup> E nomá ilerú inanaru yuhuéra'aco. Cajrú nenoca Tupana le'ejena ina'uqué i'imacá. Nérami nacú ruyuhuéra'o. Jesucristo ja'apiyá jema'ajeño ne'emacale, nenota ne'emacá. Pu'ují napechu i'imajica nenócana nacú.

Nomaca aú ilerú inanaru nupechu i'imá: “¡Meque apú cajeru ta huani rucá!”

<sup>7</sup> E Tupana hua'atéjeri quemari nojló:

—¿Naje ílé que pipechu? Chuhua numaje pijló meque quemacánaca ricá quele inanaru, camejeri caje, pamíchaje. Me'echuje ricá. Ro'opá camejeri caje nacú. Iyamá cuhuá'ata quele rihuíla'aru, iyamá té'ela quele caja ri'ihuahui.

<sup>8</sup> Camejeri pamácare cajmuni ri'imacá. Caja ricapichó. Ricá penájemija caja jácho'ojero piño ulahuí uncá tajáca'alo i'imalá chiyá majó. Ejomi ri'ijnajé aji ño'ojó, nacapichátacaloje piño rejo ricá penaje. Rácho'ojico ulahuí matajnáca'aru chiyá ee cajrú ina'uqué amájica ricá. Uncá Tupana le'ejena calé ne'emajica, amájeño ricá. Uncá chiyó Tupana queño'óta eja'ahuá, rilana'á ríle'ejena ina'uqué íi papera chojé. Necá i'imajeño matajnaco rijhua'até. Uncá nanaquiyana calé amájeño ílé camejeri caje. Ajopana yacá'ajeño richaje, aú napechu i'imajé: “¡Meque piyuque huani rila'acá!”

E Tupana hua'atéjeri quemari piño nojló:

—Ílé camejeri caje pamácare i'imari cajmuni. Caja ricapichó. E'iyonaja calé riyá'atajo piño ina'uquejlo.

<sup>9</sup> 'Capéchuruna ina'uqué hue'epiño meque quemacánaca ricá camejeri caje, inanaru, quele. Re rihuila'aru iyamá cuhuá'ata quele. Iyamá cuhuá'ata quele yenuri que caja ricá. Ricá nacuhúa pajimila to'oró. Pajimila que caja ilerú inanaru. Re caja iyamá cuhuá'ata quele nahuacára'ajeño.

<sup>10</sup> Caja naca'á pajluhua té'ela quele nanaquiyana. Pajluhuaaja cale yuriro nahuacára'ajeri me'etení. Apú uncá jo'ó ri'imálá nahuacára'ajeri. Ri'imajica ee, ri'imajé mequetánaja calé.

<sup>11</sup> Ilé camejeri querani caje, cajmuni ri'imacá. Capicharo ri'imacá. Penájemi i'imajeri nahuacára'ajeri piño. Iyamá cuhuá'ata quele, apú, apú que ne'emacá nahuacára'ajeño i'imacá. Ricá caja i'imari nanaquiyana i'imacá. Ricá penájemi i'ijnajeri caja a'ajná ño'ojó, nacapichátaloje ricá penaje.

<sup>12</sup> Rimá piño nojló:

—Iyamá té'ela quele ri'ihuahui pamíchaje, marí que quemacánaca ricá: Iyamá té'ela quele nahuacára'ajeño caja ricá. Uncá jo'ó naqueño'olá ina'uqué huacára'acana. Mequetánaja calé ne'emajica nahuacára'ajeño. Camejeri caje hua'até nahuacára'ajica.

<sup>13</sup> Iyamá té'ela quele nahuacára'ajeño i'imajeño. Ñaqueja caja nahue'epíjica nacaje la'acana natucumó ilé camejeri caje huátaca que.

<sup>14</sup> Nenócajo Ohueja I'irí hua'até. Ricá, rijhua'atéjena, hua'até chá'atajeño necá. Palá jema'acano ra'apiyá rijhua'atéjena. Ina'uqué ri'ihuapacárena ajopana e'iyayá necá. Necá hua'até richá'ataje necá. Chá'atajeri huani Ohueja I'irí. Ajopana huacára'ajeño, ajopana huacára'ajeño que chaje huacára'aca ricá. Ñaquele richá'ataje necá.

<sup>15</sup> Tupana hua'ateje, je'echú chiyaje, quemari piño nojló marí que:

—Juni, pamíchaje, apú, apú que marí que quemacánaca ricá: ajopana, ajopana que te'eré que caja ricá. Ina'uqué ajopana, ajopana que caja quemacana ricá. Ajopana, ajopana que naquiyana caja ricá. Apú, apú chu que pura'ajeño que caja juni pamíchaje.

<sup>16</sup> Iyamá té'ela quele ri'ihuahui pamíchaje, iyamá té'ela quele nahuacára'ajeño que quemacánaca ricá. Nahuacára'ajeño, camejeri caje, quele pechu i'imajé chapú pajimila eruna nacú. Napuráca'alo jimaje uncá ina'uqué huátalaño Tupana. Nacapichátaje pajimila piyuqueja, uncá na yuríloje re.

<sup>17</sup> Tupana la'arí nahuacára'ajeño pechu, nala'acáloje nacaje ripechu nacú ri'imacá que penaje. Piyuque necá quemáño ilé camejeri caje nacú, ri'imacáloje piyuque ina'uqué huacára'ajeri penaje. Nacaje i'imajicaja Tupana quemacá que, ejená ri'imajé nahuacára'ajeri.

<sup>18</sup> Rimá piño nojló:

—Ilerú inanaru pamíchaje, pajimila que quemacánaca rucá. Apú pajimila chaje nemacare nacú ricá. Ricá pajimila e nahuacára'ajeri. Apú eyá, apú eyá que piyuque nahuacára'ajeño jema'ajeño ilé pajimila naquiyá huacára'ajeri ja'apiyá —que rimacá nojló.

## 18

<sup>1</sup> Marí caje ejomi nomá piño apú Tupana hua'ateje huitúca'aca je'echú chiyá. Ricá i'imari nahuacára'ajeri huani. Cajrú mejáma'atani i'imacá rinacu. Ricá patarí piyuque eja'ahuá nacojé.

<sup>2</sup> Caphí rahuíyo'oca, rimá marí que: “Caja nacapichata pajimila Babilonia, nemacare nacú apú pajimila chaje ricá. Chuhua cajrú jiñana rehuá. Re caja jiñana pechu rehuá cajrú. Pu'uhuaré nojena camejérina, cayuphéruna, cajena i'imaño caja rehuá. Chapú péchuruna necá ajopana nacú.

<sup>3</sup> Caja nacapichata pajimila, napichátaca pachá cajrú ina'uqué pechu. Ajopana huacára'ajeño, ajopana huacára'ajeño que jema'aqueño ricá pajimila naquiyá huacára'ajeri ja'apiyá. Raú napajno'otá napéchuhua Tupana liyá, nala'acáloje pu'uhuaré raú penaje. Le'ejepelaji minana apú eyá, apú eyá que, piyuque eja'ahuá chu, i'ijnatáqueño le'ejepelaji rejo. Mahuoja re i'imacáloje pechu i'imacá nacaje huarúhu'acana nacú najluhua. Raú le'ejepelaji minana jácho'otáno cajrú liñeru najluhua.”

<sup>4</sup> E apú jahuíyo'ori piño je'echú chiyá. Rimá: “Nujhua'atéjenajlo numá: Jácho'o ricá pajimila eyá, ila'acá piyá pu'uhuaré, imanaicho najhua'até rehuá. Ila'ajica ee pu'uhuaré najhua'até, Tupana huajájeri icá ajopana pu'uhuaré la'acano hua'até.

<sup>5</sup> Cajrú huani nala'acá pu'uhuaré, namanaicho hua'até. Pachá Tupana huajájeri necá. Maáreya a'ajná ño'ojó uncá rijña'alaje necá panacu ejo'ocaja.

<sup>6</sup> Chapú nala'acare ajopana que caja Tupana la'ajica necá chapú. Richaje huani rila'ajica necá chapú, rihuajájica necá huacajé.

<sup>7</sup> Cajrú que'iyapejé nacaje i'imajica najluhua. Rihuajaje necá, namachi chapú caje yajhué riloco'opani. Napechu i'imaqué nanacuhúa: 'Nahuacára'ajeño huecá. Ajopana

chaje huecá. Palá i'imacaño huecá. Uncá huamala chapú caje yajhué i'imacá. Uncá caja huamálaje ricá', que napechu i'imajica nanacuhúa.

<sup>8</sup> Marí que napechu i'imacale nanacuhúa, mana'í chiyoya namájica chapú caje yajhué cajrú. Cajrú caja nanaquiyana taca'ajica. Chapú caje yajhué namaje raú. Cajrú caja ina'uqué taca'ajeño me'epejí nacú rihuacajé. Quera'atani aú nacapichátaje pajimila. Tupana huajájeri necá. Piyuque hue'epica nacaje la'acana ricá; Paminá huani ricá."

<sup>9</sup> Quera'atani aú nacapichátaje ricá pajimila. Ajopana, nahuacára'ajeño, ajopana huacára'ajeño que, piyuque eja'ahuá chu i'imacaño, amájeño pajimila cára'aco. Raú neyaje. Necá a'aqueño nanacojó ricá pajimila huacára'ajeño puráca'alo. Rilanaquiya uncá nema'alá Tupana ja'apiyá. Na'aque caja pajimila erúnajlo nacaje nahuátacare caje. Raú nácho'ota cajrú liñeru najluhua. Namaje pajimila cára'aco.

<sup>10</sup> Jucaja ne'emajica reyá. Quero'ocajo nacú ne'emajica, namájicale najña'acá chapú caje yajhué panacu. Nemaje pajlocaca: "¡Meque chapú huani! Mana'í chiyó huani namaca chapú caje yajhué. Apú pajimila chaje ri'imacá, chuhua namaca chapú caje yajhué," que nemájica rinacu pajlocaca.

<sup>11</sup> Ñaqué caja le'ejepelaji minana iyájica, uncale na i'imalaje, huarúhua'ajeri le'ejepelaji naliyá.

<sup>12</sup> Nahuarúhua'aque naliyá oro sereni caje, jipa capajé nojé, cahuemí nojé nejnehuá penaje. Perlas cahuemí nojé nahuarúhua'aque nala'ajohua penaje. Palá nojé a'arumacaji, ipurélucuni lajneri, seda, caje macá nahuarúhua'aque naliyá. Nahuarúhua'aque caja naliyá a'ahuaná pu'umé jamarí. Nacaje jenami palá nojé camejeri aimi naquiyá la'acanamí, caje macá nahuarúhua'aque caja naliyá. Nacaje, palá nojé a'ahuaná naquiyá la'acanamí, caje macá nahuarúhua'aque naliyá. Nacaje pejru'uhua sereni naquiyá la'acanamí, nacaje pejru'uhua naquiyá la'acanamí; nacaje, palá nojé jipa naquiyá la'acanamí, caje macá nahuarúhua'aque naliyá.

<sup>13</sup> Na'aque caja najló palá rama a'ajona marí quele: canela, especias, a'ahuaná icá, mirra, caje. Na'aque caja najló i'iracaje, cajmú jepepi inarí icha jalá, nacaje jilami, harina, trigo, jémana piracana, ohuéjana, cahuaruna, pe'iyojohua ja'apaca, caje macá na'aque najló. Nahuarúhua'aque caja naliyá ina'uqué, nasápacaloje najhua'até mahuemiru penaje. Napechu minana caja ne'emacá. Marí que le'ejepelaji minana a'ajica najló nacaje.

<sup>14</sup> Namájica aú pajimila capichaco, nemaje: "Caja palá nojé nacaje nahuátacare caje, capicharo naliyá. Cajrú que'iyapejé nacaje i'imaqueri re, palá nojé, cahuemí nojé caje. Caja ricapichó piyuqueja naliyá. Uncá ri'imalaje ñaqué caja," que le'ejepelaji minana quemájica pajimila eruna nacú.

<sup>15</sup> Le'ejepelaji minana jahuacátaqueño najluhua cajrú liñeru nacaje najló a'acana aú. Necá yuréjeño juca pajimila liyá. Quero'ocajo nacú ne'emajé, namájica aú najña'acá chapú caje yajhué panacu re. Cajrú neyájica pajimila eruna hua'até.

<sup>16</sup> Nemaje: "¡Meque chapú huani nala'acá ca'ajno! Apú pajimila chaje ri'imacá. Palá nojé a'arumacaji reruna a'ajica nanacuhúa. Ipurélucuni, querálucuni hua'até rilajnere i'imaqué palá nojé. Cajrú nala'ajohua pato'ojico na'arumacá nacú. Oro naquiyá la'acanamí ri'imacá. Jipa, cahuemí nojé, huayajrú caje naquiyá la'acanamí apú nala'ajohua i'imacá. Murehua caje, perlas naquiyana la'acanamí i'imari namurehuane, nejnehuá penaje.

<sup>17-18</sup> Marí caje capicharo naliyá piyuqueja mana'í chiyó," que le'ejepelaji minana quemájica nanacu.

Re cajrú huapuru, cajrú nojé i'ijnari juni jalomi acuhúa. Richu i'ijnacaño, richiyá sárpajeño, quele amájeño caja cajrú isa jácho'oco pajimila e'iyayá. Raú juca natajno pajimila liyá. Namaca aú cajrú ricára'ataco, nemaje: "Uncá huani apú pajimila i'imalá richaje."

<sup>19</sup> Camu'ují napechu la'acó, a'acuhuaná naca'á nachó mu'upé. Nemá: "¡Meque chapú huani! Apú pajimila chaje ri'imacá. Rejé cajrú huapuru arúca'ajico. Huapuru minana jahuacátaqueño najluhua liñeru rejé i'ijnacana aú. Mana'í chiyoya piyuque nacaje capichaco naliyá," que nemájica nanacu.

<sup>20</sup> Mariruna i'imaño je'echú chu: Tupana le'ejena ina'uqué, Jesucristo huacára'acarena, Tupana puráca'alo ja'apátajeño, quele. Necajlo numá: Ipechu i'imá pu'ují, Tupana huajácale pajimila eruna, chapú nala'acare icá chona.

<sup>21</sup> E nomá Tupana hua'ateje je'echú chiyaje, jácho'otaca jipa cajruni. Ejomi rica'á ricá juni jalomí acojé. E rimá: "Ñaqué caja pajimila capichájico ilé nemacare nacú: 'Apú pajimila chaje ricá'. Uncá caja ri'imalaje piño.

<sup>22</sup> Uncá atanícaje, yáleje caje i'imalaje rehuá reyá a'ajná ño'ojó. Guitarra caje nacú huara'acana, quehuirí caje chojé apho'ocana, luhuiluhuí chojé apho'ocana uncá caja i'imalaje reyá a'ajná ño'ojó. Uncá caja nacaje nacú sárpajeño i'imalájeño re rihuacajé. Uncá caja nacaje tojro'ojeño i'imalájeño re rihuacajé.



<sup>23</sup> Uncá caja nacamaré amálajo piño re. Uncá caja nahuá'acalajo pajhua'atéchaca re. Le'ejepelaji minana, re i'imajícaño, chá'ataqueño ajopana le'ejepelaji minana eja'ahuá chu i'imacaño. Nacaje a'acana aú nachá'ataque necá. Cajrú nahue'epica lahuícho'ocaje la'acana nacojé rehuá. Raú napajlaque ina'uqué hua'até, napechu i'imacá piyá caphí Tupana chojé," que Tupana hua'atéjeri quemacá.

<sup>24</sup> Cajrú Tupana huajájica pajimila eruna, nenócale Tupana le'ejena ina'uqué, ripuráca'alo ja'apátajeño, quele. Piyuque Tupana le'ejena ina'uqué nenócarena eja'ahuá chu i'imacá, pachá rihuajaje necá.

## 19

<sup>1</sup> Marí caje ejomi noma'á napuráca'alo ja'acó majó caphí huani je'echú chiyá. Iqui'iruna huani ina'uqué pura'acó mejé que rema'acó nojló. Pajñacánija nemacá marí que:

"Palani huani Tupana.

Ricá i'imatari ina'uqué capichácajo liyá.

Ricaja calé hue'epiri piyuqueja nacaje la'acana nacojé.

Palani caja rinacu pura'acano palá.

<sup>2</sup> Nala'acare pu'uuharé loco'opáneje rihuajá ina'uqué. Palá rila'acá raú.

Caja ricapichata pajimila eruna. Napuráca'alomi jimaje cajrú ina'uqué, eja'ahuá chu i'imacaño, pajno'otaño napéchuhua Tupana liyá.

Cajrú napichátaca ina'uqué pechu napuráca'alo aú. Nenoca pachá Tupana le'ejena ina'uqué, Tupana huajari necá richona," que nemacá.

<sup>3</sup> E nemá piño caphí huani marí que:

"Palani huani Tupana.

Pajimila nemacare nacú: 'Apú chaje ricá' que, e'iyayá isa jácho'ojero. Ñaqueja rácho'ojico reyá," que nemacá.

<sup>4</sup> E caja veinticuatro peñahuilana, pa'u quele cajmuruna, quele láma'año najimá aú Tupana nacojé. Ñaca'ajori chu riyá'aco ejé najláma'o rinacojé. E nemá:

"Ñaque ricá. Palani huani Tupana."

*Tupana I'irí huá'acaco yucuna marí:*

<sup>5</sup> E Tupana i'imacá eyá puráca'aloji jema'acó. Rimá:

"Tupana huátaca que la'acáñojlo numá: Ipura'ó palá Tupana nacú. Rihuátaca que la'acáño naqui yana i'imaño ajopana chaje. Ajopana inaquiyana i'imaño ajopana ja'apejé. Ica piyuqueja pura'ajeño palá Tupana nacú," que puráca'aloji jema'acó najló.

<sup>6</sup> E noma'á piño napura'acó. Cajrú huani ina'uqué puráca'alo que rema'acó nojló. Cajruni jipa mejé que, pichaní mejé que napuráca'alo jema'acó nojló. Pajñacani nemacá:

"Palánija Tupana. Paminá huani ricá.

Piyuque la'ajeri caja ricá.

Huapechu i'imacare chojé caphí ricá. Huahuacára'ajeri caja ricá.

<sup>7</sup> Ñaquele i'ijná, huala'achí pu'ují huapéchuhua rinacu.

Palá huapura'ajico palá rila'acare huecá nacú.

Caja chuhua riphicha rená chojé, Tupana I'irí huá'acacoloje penaje.

Caja lamá'ataquejami ri'ihuapaniperu ripé.

<sup>8</sup> Caja ra'á rojló palá nojé a'arumacaji, mapisarú huani ri'imacá.

Sereni que ramaco. Marí ra'á rojló, ro'ocáloje runacuhúá penaje," que nemacá.

Palá Tupana le'ejena ina'uqué la'acare, que quemacánaca ricá palá nojé a'arumacaji, ro'ocare runacuhúá.

<sup>9</sup> E Tupana hua'atéjeri, je'echú chiyaje, quemari piño nojló:

—Pilaná'á papera chojé marí que: Pu'ují péchuruna necá, Tupana quemacárena nacú, ne'emacáloje rejo penaje, namácaloje Ri'irí huá'acaco penaje.

Tupana hua'atéjeri quemari piño nojló:

—Tupana puráca'alo marí numacare pijló, quehuácaje ricá —que rimacá nojló.

<sup>10</sup> E nujláma'o ri'imá nacojé, nupechu i'imacale pu'ují rinacu. Aú rimá nojló:

—Pila'aníya ilé que nucá. Nacaje la'ajeri nucá Tupánajlo. Picá que caja nucá; pinaqui yana queja caja nucá. Caphí péchuruna icá Jesucristo puráca'alo chojé. Pipechu i'imá pu'ujija Tupana nacú, eyá nunacu uncá pipechu i'imalaje pu'ují —que rimacá nojló.

Tupana puráca'alo ja'apátajeño ja'apátaño Jesucristo puráca'alo i'imacá, napechu i'imacare chojé caphí puráca'alo na'apata ajopánajlo.

*Apú ja'apaca cahuarú jareni nacú yucuna marí:*

<sup>11</sup> E nomá je'echú me'etaco. Re nomá pajluhuaja cahuarú jareni tára'aco. Rihuajlé chu apú yá'aro. Nacaje Rimacare Nacu Que La'ajeri Ricá, que na'acá rií. Apú rií i'imari

Quehuácaje. Quehuaca quemacá ricá. Marí que na'acá ríí, palá rihue'epícale ina'uqué huajácana pu'uhuaré nala'acare chona. Pu'uhuaré la'acaño hua'até nócajero caja ricá.

<sup>12</sup> Cahuarú nacú ja'apájeri ijlú amaro quera'atani que. Cajrú ripútena i'ímacá rihuíla'aru nacú. Ríí caja i'ímari lana'aquejami rinacu. Uncá na calé hue'epiri, ricaja calé paminá hue'epiri ricá.

<sup>13</sup> Cajrú caja jirá caje i'ímari ra'arumacá e'iyá. Tupana Puráca'alo, que na'acá ríí, cahuarú nacú ja'apájeri íí.

<sup>14</sup> Rijhua'atéjena surárana i'ímaño cajrú. Rápumi chu na'apá cahuaruna nacú. Jaré nacuruna cahuaruna ne'emacá, nacú na'apá. Jaré nojé huánija rijhua'atéjena a'arumacá i'ímacá. Palá nacurí, uncá pisá i'ímalá ri'ímacá.

<sup>15</sup> Nahuacára'ajeri numá chiyá sajalu caje jeño'orí puhue'ení. Ricá aú richá'ataje ajopana, ajopana te'eré que eruna. Rihuacára'aje necá caphí huani. Namaje Tupana yuchá yajhué. Yurí huani ri'ímajica najhua'até, uncá pacha nema'alá ra'apiyá. Cajrú Tupana yúcha'ajico nachá raú.

<sup>16</sup> Ra'arumacá nacú, ritajné nacú hua'ató lana'aquejami i'ímacá. Marí que rimacá: "Ajopana huacára'ajeño chaje ricá. Paminá huani i'ímacá ricá."

<sup>17</sup> E nomá Tupana hua'atéjeri, je'echú chiyaje, tára'aco camú chu. E rahuíyo'o caphí huani. Piyuque huayúnajlo rimá marí que: "Chuhúa jahuacó, ajñachi a'ajnehuá Tupana a'acare ijló.

<sup>18</sup> Chuhua i'ijná, ajñachi piyuque ina'uquénami chuna i'ími, nahuacára'ajeño mi chuna i'ími, surárana huacára'ajeño mi chuna i'ími, suráranami chuna i'ími, cahuarúnami chuna i'ími, nanacu ja'apájeño mi chuna i'ími hua'ató ajñácaloje penaje numá ijló. Mahuemiru ajopana hua'até sápa jeño mi chuna ne'iyajena i'ímacá. Ajopana ina'uqué chaje i'ímacáño mi chuna ne'iyajena i'ímacá. Ajopana ja'apejena ne'iyajena i'ímacá. Necá caje i'ími ajñaje piyuque," que rimacá huayúnajlo.

<sup>19</sup> E nomá ilé camejeri caje. Piyuque ina'uqué, eja'ahuá chu i'ímacaño huacára'ajeño hua'até ri'ímacá. Nale'ejena surárana i'ímaño caja re najhua'até, nenócaloje jareni cahuarú nacú ja'apájeri, rijhua'atéjena, quele hua'até penaje.

<sup>20</sup> E caja netá ilé camejeri caje cha. Quéchami piño napataca ricá, quemaqueri rinacuhúa: "Tupana puráca'alo ja'apátajeri nucá." Majojeja ripajlájica rinacuhúa. Rila'aqué caja cajrú nacaje uncá meño'ojó iná la'alare. Ilé camejeri caje ahua'á rila'ajica ñaque i'ímajica. Raú ripajlaque cajrú ina'uqué hua'até. Ilé camejeri caje le'eje lana'aquejami nacú i'ímacárena ne'emacá, ripajlá hua'até i'ímacá. Pu'ují péchuruna ne'emacá camejeri jenami, nala'acare i'ímacá nacú. Queleruna hua'até ripajlá i'ímacá. Napatá ilé camejeri. Napatá caja ilé quemari rinacuhúa majojeja: "Tupana puráca'alo ja'apátajeri nucá" que. E naca'á necá, iyamá cajmuya quera'atani cajruni chojé. Cajruni caésa que ricá. Azufre aú lucúna'aco ricá. Ricá chojé naca'á ne'emacá.

<sup>21</sup> Cahuarú nacú ja'apájeri capichátari caja najhua'atéjena surárana. Sajalu jeño'orí rinuma chiyá aú ricapichátaca necá. Ripuráca'alo aú ja ricapichata necá. Ejomi huayuna piyuque iphaño natami ajñaje. Namano'ocá ejé najñá piyuqueja ne'ími.

## 20

### *Mil jarechí yucuna marí:*

<sup>1</sup> E nomá Tupana hua'atéjeri huitúca'aca je'echú chiyá. Chahui i'ímari ricapi cajrú nojé curete hua'até. Ulahuí uncá tajnáca'aru i'ímalá me'etájona ri'ímacá.

<sup>2</sup> E ripatá Jiñá Ch'i'ináricana, na'acare íí lánahuaru caje, jeí ch'i'ináricana, que ríí. Eja'ahuá queño'ocó huacajé ri'ímacá. Ricá Jiñá Ch'i'ináricana ripatá. Quéchami repo'otaca ricá. Riyurí ricá jepo'otáqueja mil jarechí quetana.

<sup>3</sup> Tupana hua'atéjeri, je'echú chiyaje, ca'arí ricá ulahuí matajnáca'aru chojé, rejé ritá richá. Richahuíña'a richá. Ejomi richúta'a rinumaná. Marí que ritacá rapu, ripajlaca piyá ina'uqué eja'ahuá chu i'ímacaño hua'até. Riyureje ricá richu mil jarechí quetana. Ejomi rijme'etaje richaya, rácho'ocoloje richiyá penaje, ri'ímacáloje marí eja'ahuá chu mequetánaja penaje.

<sup>4</sup> Ejomi nomá cajrú ñáca'ajori pitacó. Ne'emacánana penaje ri'ímacá. Richu ina'uqué yá'áño. Necá quemáño ajopana ina'uqué nacú méqueca nala'acana nacaje nala'acare jimaje. Ricá penaje Tupana a'ari ne'emacá. Nomá caja ajopana ina'uqué nenócarena péchumi re. Na'apátaque Jesucristo puráca'alo ajopánajlo, ajopánajlo que. Quehuácaje puráca'aloji, Tupana puráca'alo, na'apátaque. Jimaje nenoque ne'emajica. Uncá napechu i'ímaqué pu'ují camejeri caje nacú; uncá caja napechu i'ímaqué pu'ují renami nala'acare rinacóje nacú; uncá caja nahuátaque ilé camejeri caje le'eje lana'aquejami i'ímacá nayáte'ela nacú, napulá

nacú hua'até. Marí cajena ne'emacá, nenó i'imacá. Necá penájenami macápo'ofno i'imacá. Ejomi ne'emá Jesucristo ja'apiyá huacára'ajeño mil jarechí quetana.

<sup>5</sup> Tupana macápo'otari necá ajopana caja taca'acaño tucumá i'imacá. Ajopana caja taca'acaño uncá jo'ó macápo'olaño rihuacajé. Mil jarechí ja'apájica ejomi namacápo'oyo piño napumi chuhuá.

<sup>6</sup> Pu'ují ajopana tucumá macápo'ojeño pechu i'imajica raú. Tupana le'ejena huani ne'emajica; uncá ne'emalaje Tupana liyá cupáquejanami que quera'atani chojé. Tupana, Jesucristo, quele hua'até nala'ajica nacaje. Na'apiyá nahuacára'aje ina'uqué mil jarechí quetana.

<sup>7</sup> Mil jarechí ja'apaca ejomi rijme'etaje piño Jiñá Chi'ináricana chaya, rácho'ocoloje piño ulahuí matajnáca'aru chiyá penaje.

<sup>8</sup> Ejomi ri'imajé piño pajlácaje nacú. Ripajlájica piyuque ina'uqué, eja'ahuá chu i'imacaño, hua'até, ajopana hua'até, ajopana hua'até que. Gog te'eré, Magog te'eré e i'imajícaño hua'até ripajlaje. Chapú péchuruna Tupana nacú ne'emajica. Jiñá Chi'ináricana jahuacájeri necá, nenócacolaje penaje. Iqui'iruna huani ne'emajica, que'epé i'imacá juni jalomi turená que caja iqui'iruna ne'emajica.

<sup>9</sup> Piyuque nate'eré eyájena jahuacájeño Israelmi chu laquénamí te'eré nacú. Netaje pajimila Jerusalén cha. Tupana huátacare ricá pajimila. Netaje richá, nacapichátacaloje ricá penaje. E'iyonaja quera'atani ja'ajero je'echú chiyá nachá. Ricá aú chapú Tupana nacú péchuruna capichájeño.

<sup>10</sup> Ejomi rica'ajé Jiñá Chi'ináricana quera'atani chojé. Azufre aú rilucúna'aco. Caésa cajruni que ricá. Ina'uqué hua'até pajlájeri ricá. Caja naqui'ichami richojé ilé camejeri caje apú hua'até, quemájica rinacuhuá majopeja: "Tupana puráca'alo ja'apátajeri nucá," que. Re najña'ajé rijhua'até chapú caje yajhué panacu hue'echú quetana, lapi quetana hua'até. Marí que ne'emajica re matajnaco.

*Tupana quemájica piyuqueja ina'uqué nacú meque nala'acana i'imajica yucuna marí:*

<sup>11</sup> E nomá pajluhuaja ñáca'ajori cajruni. Jareni ri'imacá. Nahuacára'ajerijlo penaje ri'imacá. Nomá caja richu yá'ajero yá'aco richu. E nomá eja'ahuá, je'echú hua'até capichaco sujhuí queja rahua'ayá. Uncá ramalo reyá a'ajná ño'ojó.

<sup>12</sup> E nomá caja taca'acaño tára'aco rijimaje, ilé yá'aro nahuacára'ajeri ñáca'ajori chu jimaje. Piyuqueja necá tára'año rijimaje. Ajopana chaje i'imacaño, ajopana ja'apejé i'imacaño, quele necá tára'año rijimaje piyuqueja. E caja rijme'etá ripapérane, apú papera hua'até. Necá í i'imari lana'aquejami richu; necá i'imajeño rijhua'até matajnaco. Apú quemari caja taca'acaño nacú meque nala'acana. Ripapérane chu nanacu quemacana i'imari. Meque nala'ajica marí eja'ahuá chu ne'emaqué huacajé loco'opáneje rila'ajica necá palá.

<sup>13</sup> Juni jalomi acú caja taca'acaño i'imaño. Necá caja tára'año rijimaje. Caja taca'acaño, uncá jema'alaño Tupana ja'apiyá, péchumi i'imari napucuna chu. Necá caja tára'año piño rijimaje. Necá, uncá jema'alaño Tupana ja'apiyá, péchumi i'ijnari apú napucuna chojé. Re piyuque caja taca'acaño tára'año rijimaje. Ejomi rimá nanacu méqueca nala'acana; méqueca nala'ajica marí eja'ahuá chu ne'emaqué huacajé, loco'opáneje rihuajaje necá.

<sup>14</sup> E Tupana ca'arí pu'uhuaré la'acaño péchumi apucuna quera'atani cajruni chojé. Richojé caja rica'á taca'acaje. Caésa cajruni que ricá quera'atani. Marí cajé aú nacapichó piño Tupana liyá.

<sup>15</sup> Apú papera chu ina'uqué í i'imari lana'aquejami. Necá i'imajeño matajnaco Tupana hua'até. Uncachu neí i'imalá lana'aquejami apú papera chu, naca'á necá cajruni quera'atani chojé.

## 21

*Huajé je'echú, huajé eja'ahuá, quele yucuna marí:*

<sup>1</sup> Caja je'echú, eja'ahuá pamineco i'imacare capicharo. Ñaqué caja juni jalomi capichaco rijhua'até i'imacá. Pumí chiyó nomá huajé je'echú, huajé eja'ahuá hua'até.

<sup>2</sup> E nucá, Juan, amari Tupana le'ejé pajimila huitúca'aca je'echú chiyá Tupana i'imacá eyá. Jerusalén rií. Lamá'ataquejami que ri'imacá najló. Nahuacaco huacajé ri'ihuapaniperu lamá'atayo rocó palá huani ripé. Ñaqué caja ricá pajimila i'imacá lamá'ataquejami que najló.

<sup>3</sup> E noma'á apú quemacá caphí marí que Tupana i'imacá eyá: "Iyacá'o. Chuhua Tupana i'imajica ina'uqué hua'até. Rile'ejena ina'uqueja ne'emajica. Tupana yuréjero caja najhua'ateja.

<sup>4</sup> Tupana jalácajeri nejlú chiyá nejlú jalá. Uncá taca'acaje i'imalaje re najló. Uncá caja namálaje chapú caje yajhué; uncá caja neyálaje; uncá caja namálaje quehuini yajhué. Uncá ri'imalaje júpimi ri'imacá eja'ahuá chu que caja," que rimacá.

<sup>5</sup> E ricá, yá'acaro ñáca'ajori chu, quemari: "Chuhua nula'ajica piño nacaje piyuque huajé."

E rimá piño nojló:

—Pilana'á marí papera chojé. Quehuácaje nupuráca'alo, ina'uqué pechu i'ímacáloje caphí richojé penaje.

<sup>6</sup> E rimá piño:

—Caja. Nucá queño'ótari piyuqueja nacaje i'ímacá; nucá caja tajátajeri piyuqueja nacaje caja penaje. Nuru'upi chu macára'atajeño huátaño juni i'iracana. Huátaño najluhua cajmuchaji ñaqué caja, no'ó najló ricá, ne'emacáloje matajnaco nujhua'até penaje. Majopeja no'ocá ina'uquejlo ricá; uncá rihuemí i'imalá.

<sup>7</sup> Nucá quemari caphí nochojé tára'ajeñojlo, ne'emacáloje nuyani que raú penaje. Caphí napechu i'ímacare chojé caja nucá. Marí que ricá najló uncá jácho'olajeño nupuráca'alo ja'apiyá jema'acana chiyajlo.

<sup>8</sup> Eyá ajopánajlo ri'imajica chapú. Marí que i'ímacaño ne'emacale pachá, ri'imajé najló chapú: ina'uqué piyá quero'ojeño, uncá caphí cale péchuruna Tupana chojé; uncá ina'uquélaruna; ina'uqué nójeño; namanaicho la'ajeño pajhua'atéchaca; lahuícho'ocaje la'ajeño; lejñacaje la'ajeño; pu'ují péchuruna nacaje jenami nacú, nemacare nacu: "Huachi'ináricana ricá" que; piyuque pajlácachina. Marí que i'ímacaño i'ímaleño cajruni siyá chu. Azufre aú lucúna'aco ricá. Marí que nacapichájico piño Tupana liyá.

*Huajé Jerusalén yucuna marí:*

<sup>9</sup> E pajluhuaja Tupana hua'atéjeri, je'echú churí, iphari nunacu. Iyamá cuhuá'ata quele, maapami que nomácarena naquiyana ri'ímacá. Chiyela i'ímacare nacapi que, nala'acáloje chapú eja'ahuá chu i'ímacaño raú penaje. Pajluhuaja nanaquiyana iphari nunacu, rimá nojló:

—Pi'ijná nujhua'até, nuya'achíyachi pijló Ohueja l'irí yajalo i'ímajícayo —que rimacá nojló.

<sup>10</sup> E Tupana hua'ateje, je'echú churí, huá'ari nupechu cajruni huani ipuré ejo. Yenoje ri'ímacá. Ricá naquiyá riyá'atá nojló pajmíla Jerusalén, Tupana le'ejé ricá pajmíla. Nomá ricá huitúca'aca je'echú chiyá, Tupana eyá.

<sup>11</sup> Cajrú mejáma'atani Tupana le'ejé i'ímacá rinacu. Jipa, cahuemí nojé huani que nomaca ricá. Cahuemí nojé jipa í jaspe, ricá que ri'ímacá. Jamára'apani, cristal que nomaca ricá.

<sup>12</sup> Corral cajruni, yenuhua, chipúca'ari rinacojé. Jipa naquiyá la'acanami ri'ímacá. Iyamá iphata ji'imaji nacojé quele rinumaná i'ímacá apú eyá, apú eyá que. Iyamá iphata ji'imaji nacojé quele caja Tupana hua'atéjena, je'echú churuna, tára'año rinumaná rihua'aphena penaje. Rinumaná nacú lana'aquejami i'ímari. Israelmi chu laquénami a'ajútayami chuna í i'ímari lana'aquejami rinacu.

<sup>13</sup> Hueji queleno huánija rinumaná i'ímacá. Camú jeño'ocá ejo pitá hueji quele rinumaná i'ímacá. Eyá ripara'alá chojé pumitá i'ímari hueji quele caja yacá'aro. Eyá apojó pitá, ripara'alá chojé pumitá hueji quele caja rinumaná yacá'aco. Camú yá'aco ejo pitá hueji quele caja rinumaná yacá'aro.

<sup>14</sup> Iyamá iphata ji'imaji nacojé quele jipa to'oró corral ja'apihuá. Jesucristo huacára'acarena í i'ímari lana'aquejami rinacu.

<sup>15</sup> Tupana hua'atéjeri, pura'acó nujhua'até i'ímacá, ña'arí pajmíla huapherecha jená. Oro naquiyá la'acanami ri'ímacá, rijña'acare aú rená. Rijña'á caja corral jená, rinumaná jená hua'até.

<sup>16</sup> Rejenohuánija pajmíla chita i'ímacá. Camíta'achi que ri'ímacá. Rená ña'ajona aú Tupana hua'atejeri ña'arí rená. Dos mil doscientos quilómetros quietana rihuapherecha i'ímacá, ñaquietana caja yenuca ri'ímacá.

<sup>17</sup> Rijña'á caja corral yenuca jená. Sesenta y cuatro metros quietana yenójeja ri'ímacá. Quietana rená ña'acó ríle'ejé rená ña'ajona aú.

<sup>18</sup> Jipa, palá nojé naquiyá la'acanami, corral i'ímacá. Jaspe jipa í. Oro huani naquiyana la'acanami pajmíla i'ímacá. Jamára'apani que ramaco huíluru que.

<sup>19</sup> Palá nojé jipa, cahuemí nojé pato'oró jipa nacú, corral ja'apihuá to'ocó nacú. Ripalacha penaje ri'ímacá, palá ramaco raú. Marí jipa í, to'oró ra'apihuá: jaspe, apú zafiro, apú ágata, apú esmeralda,

<sup>20</sup> apú crisoprassa, apú jacinto, apú caja penaje í amatista.

<sup>21</sup> Re nacaje cahuemí nojé, ríí perla. Ricá huánija i'ímari rinumaná itájona apú, apú que. Iyamá iphata ji'imaji nacojé quele rinumaná i'ímacá. Pajlúhua'alano huánija perla i'ímari rinumaná itájona. Pajmíla e'iyohuá íñe'epú to'oró, oro naquiyá la'acanami ri'ímacá; jamára'apani, huíluru que ramaco.

<sup>22</sup> Uncá nomala re Tupana ñacaré, ina'uqué i'ijnatácaloje napéchuhua Tupana nacú richu penaje. Tupana, Ri'irí Jesucristo, quele i'ímaño re. Ñaquele uncá Tupana ñacaré i'imalá. Piyuque la'ajeri Tupana, Nahuacára'ajeri caja ricá.

<sup>23</sup> Uncá caja camú, queri, caje i'imalá re. Uncá na penaje calé ricá, Tupana i'imalace mejáme'etani najló. Ri'irí i'imari nacamaré queja.

<sup>24</sup> Ina'uqué, ajopana te'eré eyájena, ajopana te'eré eyájena que amájeño ricamaré chojé. Piyuque ajopana, ajopana que huacára'ajeño i'ijnatájeño nacaje palá nojé, cahuemí nojé rejo.

<sup>25</sup> Pajimila numaná yuríjico me'etáqueja hue'echú quetana. Uncá netálaje ricá, uncale lapí i'imalaje re.

<sup>26</sup> Palá nojé nacaje ajopana, ajopana que capi i'imajica, ne'ejnataje ricá pajimila ejo.

<sup>27</sup> Uncá ne'ejnatálaje nacaje pu'uhua'reni rejo. Uncá caja pu'uhuaré la'acaño, uncá ina'uquélaruna, cajena i'imalájeño re. Uncá caja pajlácachina i'imalájeño re. Caja Tupana lana'arí ina'uqué í Ri'irí papé'rane chu, ne'emacáloje matajnaco rijhua'até re penaje. Necaja calé i'ima'jeño re.

## 22

<sup>1</sup> E Tupana hua'atéjeri, je'echú chiyaje, ya'atarí nojló juni, iná cajmucha' a'ajona penaje ricá. Jamarani huani ri'imacá, cristal que jamaraca ri'imacá. Tupana i'imari Ri'irí hua'até. Re ripomí i'imacá.

<sup>2</sup> Iñe'epú i'ijnari pajimila ihuami chuhua'. Ricá iñe'epú ihuami chu juni to'ocó pe'iyohua'. Iyama punitano riturenó a'ahuaná lapa'acó. Iná cajmucha' a'ajona caja ricá a'ahuaná. Queri queja rarúca'aca. Ripaná i'imari pusana, ajopana, ajopana que i'imacáloje peya-jhuéruna raú penaje.

<sup>3</sup> Uncá Tupana yerúca'ala nacaje chaje ricá pajimila e'iyá, palánija nacaje i'imacale re.

Tupana i'imajeri nahuacára'ajeri Ri'irí hua'até. Pu'ují rijhua'atéjena pechu i'imajica nanacu re.

<sup>4</sup> Namaje ricá. Rií i'imajeri lana'aquejiami napulá nacú.

<sup>5</sup> Uncá lapí i'imalaje re, uncá caja camú i'imalaje re, uncá caja nacamaré i'imalaje re; uncá na penaje calé ricá najló, Tupana i'imajicale mejáma'atani que najló re. Nahuacára'ajeri ricá. Rijhua'atéjena huacára'ajeño i'ima'jeño caja rijhua'até. Matajnaco ne'emajica rijhua'até.

<sup>6</sup> E Tupana hua'atéjeri, je'echú chiyaje, quemari piño nojló:

—Quehuacaje marí puráca'aloji, iná a'acáloje iná nacojó ricá penaje. Tupana a'arí Ripechu ripuráca'alo ja'apátajeño. Ripenájemija caja Tupana huacára'ari nucá majó, numacáloje ra'apiyá jema'ajeño méqueca ri'imajica mequetana i'imajemi penaje —que rimacá nojló.

<sup>7</sup> Rimá piño nojló. Marí que Jesús quemacá:

—Jema'á. Mequetana i'imajemi nucá iphájeri ca'ajno. Palani ri'imajica najló, a'año nanacojó marí puráca'aloji. Marí papera chu lana'aquejiami quemari nacaje i'imajicare nacú —que rimacá.

<sup>8</sup> Nucá, Juan, jema'arí méqueca nemacá. Nomá caja nacaje i'imajicare ya'atacó nojló. Marí cajé aú nujláma'o Tupana hua'atéjeri jí'imá nacojé, nupechu i'imacale pu'ují rinacu. Ricá ya'atarí nojló nacaje nomácare i'imacá. Aú nujláma'o rí'imá nacojé.

<sup>9</sup> E rimá nojló:

—Pila'aníya ilé que nucá. Nacaje la'ajeri nucá Tupánajlo. Picá, que caja nucá. Tupana puráca'alo ja'apátajeño, marí papera puráca'alo a'acaño nanacojó, quele naquiyana caja nucá. Naquele pipechu i'imá pu'ujija Tupana nacú, uncá nunacu calé —que rimacá nojló.

<sup>10</sup> —Pimicho'otáníya ajopana liyá marí puráca'aloji. Nacaje i'imajicare nacú quemacana ricá. Mequetana i'imajemi ri'imajé marí puráca'aloji quemacá que.

<sup>11</sup> Riphájica ee rená chojé, pu'uhuaré la'ajeño i'ima'jeño caja queja pu'uhuaré la'ajeño. Uncá ina'uquélaruna i'ima'jeño caja queja uncá ina'uquélaruna. Palá la'acaño i'ima'jeño caja queja palá la'acaño. Tupana ja'apiyá i'imacaño i'ima'jeño caja queja Tupana ja'apiyá i'imacaño —que rimacá nojló.

<sup>12</sup> Rimá piño, marí que Jesús quemacá:

—Jema'á. Mequetana i'imajemi nucá i'ijnajeri piño ca'ajno eja'ahuá nacojé. Nujña'ajé nujhua'ató nacaje ina'uqué la'acare huemí. No'ojé najló rihuemí. Nacaje nala'acare loco'opáneje no'ojica najló rihuemí pajluhuano, pajluhuano que.

<sup>13</sup> Nucá queño'ótari piyuqueja nacaje eja'ahuá chu i'imacare. Naquele nucá caja tajátajeri caja piyuqueja ricá —que rimacá.

<sup>14</sup> Pu'ují péchuruna necá, yuriño naliyó pu'uhuaré nala'acare, palá péchuruna ne'emacáloje reyá penaje. Necá ajnájeño a'ahuaná icha naquiyana, a'acare inajlo cajmuchaji, iná i'imacáloje matajnaco raú penaje. Necá caja i'ima'jeño pajimila nacú je'echú chu i'imacare.

<sup>15</sup> Eyá marí que i'imacaño uncá i'imalájeño ricá pajimila nacú: lejñacaje la'ajeño; namanaicho la'ajeño pajhua'atéchaca; ina'uqué nójeño; quele uncá i'imalájeño rejo. Pu'ují

péchuruna nacaje jenami nacú nemacare nacú: “Huachi'ináricana ricá” que, necá caja uncá i'imalájeño rejo. Pajlácachina uncá caja i'imalájeño rejo. Marí cajena uncá i'imalájeño Tupana hua'até.

<sup>16</sup> E rimá piño nojló: Marí que Jesús quemacá:

—Nucá, Jesús huacára'ari nujhua'atéjeri, je'echú chiyá, ri'imacáloje nacaje i'imajicare yucuna ijlo penaje. No'opiyá jema'ajeño jahuacaño apalá chojé, apalá chojé que, necajlo riyucuna yuréjero. Nu'umaqué eja'ahuá chu huacajé: “Davidmi chu laquemi ricá” que nemájica nunacu. Nucá a'arí ina'uquejlo huajé i'imacaje —que rimacá.

<sup>17</sup> Tupana Pechu, Jesucristo ja'apiyá jema'ajeño, quele quemañó Jesucristojlo: “Majó pi'ijná.” Imá ñaqué caja rijló, que numacá marí puráca'aloji jema'ajeñojlo.

Núru'upi chu macára'ataño huátaño juni i'iracana. Ñaqué caja ihuátajica ee Jesucristo liyá cajmuchaji, iquejá'a riliyá ricá, ra'achí ijlo ricá. Raú i'imajé matajnaco rijhua'até. Majopeja ra'ajica ijlo ricá, uncá rihuemí i'imalaje.

<sup>18</sup> Nucá, Juan, quemari marí puráca'aloji jema'ajeñojlo: ¡Pa! Apiyácaniya marí puráca'aloji. Uncá quemalájeño richuhúa rinacu, necá apichátajeño cari ripuráca'alo lana'aquéjami. Pachá namaje chapú caje yajhué rimacare nacú marí papera chu que.

<sup>19</sup> Uncá ja'apátalajeño ajopánajlo piyuque rimacare nacú marí papera chu, uncá i'imalájeño matajnaco Tupana hua'até rile'ejé pajimila e. Marí papera chu rimá ricá pajimila nacú.

<sup>20</sup> Jesucristo amari marí puráca'aloji. Ricá quemari: “Que jo'ó ricá. Mequetana i'imajemi nucá i'ijnajeri ca'ajno.”

Ñaqué ricá. “Pi'ijná majó,” que numacá pijló, Huahuacára'ajeri Jesucristo.

<sup>21</sup> Nuhuata piyuque icá i'imacá palá Huahuacára'ajeri Jesucristo palamane aú. Caja quetana riyucuna.